


Makromod lalap lirna  
wawan



New Testament in Kisar

# **Makromod lalap lirna wawan**

## **New Testament in Kisar**

copyright © 2008 Yayasan Sumber Sejahtera

Language: Kisar

Translation by: Wycliffe Bible Translators, Inc.

### **Copyright Information**

© 2008, Yayasan Sumber Sejahtera. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Kisar

**© 2008, Yayasan Sumber Sejahtera. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 29 Jan 2022

97b91eda-c10a-5f87-8fec-cce597a825a4

## Contents

Matius . . . . .	1
Markus . . . . .	78
Lukas . . . . .	126
Yohanis . . . . .	211
Honowok Nair .	275
Roma . . . . .	355
1 Korintus . . . .	396
2 Korintus . . . .	437
Galatia . . . . .	467
Epesus . . . . .	482
Pilipi . . . . .	496
Kolose . . . . .	507
1 Tesalonika . . .	517
2 Tesalonika . . .	525
1 Timotius . . . .	530
2 Timotius . . . .	541
Titus . . . . .	549
Pilemon . . . . .	554
Ibrani . . . . .	557
Yakobus . . . . .	589
1 Petrus . . . . .	599
2 Petrus . . . . .	612
1 Yohanis . . . . .	620
2 Yohanis . . . . .	630
3 Yohanis . . . . .	632
Yudas . . . . .	634
Wahyu . . . . .	638

# Matius

## *Horok Lirna La'an*

Yesus Nin man lernohi pakunohi ida ma naran Matius horok Lirna Wawa'an eniyeni (9:9-13).

Lolo horok eni Matius wakunu mouropo nahenia Makromod Lalap kikan Yesus namwali Rai laa ewi-ewi (Mesias), la an kukunohi nahenia Ai onne rai Daud Upun Anan. Lolo horok eni Matius napolu Yesus, rai Daud Anan rew'ira (1:1; 9:27; 12:23; 15:22; 20:30-31; 21:9, 15; 22:41-45). Nonolu lolo Nou Nonolu Makromod Lalap nou nahenia rai Daud upun anan ida namwali Rai laa ewi-ewi. Yesus na'akuku na'anokor nou onne ono Ai onne rai Daud Upun Anan. Nonolu nabi-nabi kukunohi inhawe ma namwali lere man mai, la Matius wakunu mouropo hi'ihehewi Yesus na'akuku na'anokor rir wanakunu onnenihe (1:22-23; 2:5-6, 15, 17-18, 23; 3:3; 4:14-16; 8:17; 12:17-21; 13:35; 21:4-5, 16; 26:31; 27:9-10).

## *Horok Ihin*

1. Matius horok wanakunu mori Yesus noro Nin honowok dedesne (pnk. 1-4).
2. Yesus wakuku heri lolo wo'or (pnk. 5-7).
3. Yesus Nin hini'i wenewhe man ri kan dodo'onnala makun kukul Nin ke'eke'el an'anha man lap narehi (8:1-9:34).
4. Yesus wakuku Nin man lernohi pakunohi idaweli woro'o mene

hopon hir laa loikaru Lirna Wawa'an ri (9:35-11:1).

5. Ha wo'ira ma namwali lolo noho Galilea kukul nahenia Yesus namwali Rai laa ewi-ewi (11:2-12:5).
6. Yesus nodi wanakunu naho'ok wakuku hi'ihehewi Makromod Lalap nodi molollo ri mormori (13:1-52).
7. Yesus Nin honowok nair lolo kota-kote ma aile noho Galilea (13:53-17:27).
8. Yesus wakuku Nin man lernohi hini'i wenewhe man wa'an ri man lernohi Ai hi'ie (pnk. 18).
9. Yesus nala'a laa kota Yerusalem wakuku ri nodi wanakunu naho'ok, la rakan Yerusalem rin kokala Ai noro wawa'an, la Yesus kuku sala Yahudi rir man panulu (pnk. 19-23).
10. Yesus wakunu inhawe ma namwali lere man mai (pnk. 24-25).
11. Yesus maki la mori wali'ur (pnk. 26-28).

## *Yesus upun a'an kanakarne* (Luk. 3:23-28)

<sup>1</sup> Yesus Kristus upun a'an: Yesus eni rai Daud upun anan; Daud eni Abraham upun anan.

## *Yesus upun a'anhe nano* *Abraham rakan Daud* *kanakarne*

<sup>2</sup> Abraham na'ori Isak,  
Isak na'ori Yakup,  
Yakup na'ori Yehuda noro  
mo'oniwalinhe idaweli ida.

<sup>3</sup> Yehuda na'ori Peres noro Zerah (woro'o eniyenihe inna naran Tamar)  
 Peres na'ori Hezron,  
 Hezron na'ori Ram,  
<sup>4</sup> Ram na'ori Aminadab,  
 Aminadab na'ori Nahason,  
 Nahason na'ori Salmon,  
<sup>5</sup> Salmon na'ori Boas (Boas eniyeni inna naran Rahab),\*  
 Boas na'ori Obed (Obed eniyeni inna naran Rut),  
 Obed na'ori Isai,  
<sup>6</sup> la Isai na'ori Daud ma namwali rai Israel.

*Yesus upun a'anhe nano Daud rakan lere Babel enihe kele Israel rodi laa rir nohe*

Daud na'ori Salomo (Salomo eniyeni inna naran Batseba, la nonolu Uria hono ma namwalumedi).

<sup>7</sup> Salomo na'ori Rehabeam, Rehabeam na'ori Abia, Abia na'ori Asa,  
<sup>8</sup> Asa na'ori Yosafat, Yosafat na'ori Yoram, Yoram na'ori Uzia,  
<sup>9</sup> Uzia na'ori Yotam, Yotam na'ori Ahas, Ahas na'ori Hizkia,  
<sup>10</sup> Hizkia na'ori Manasye, Manasye na'ori Amon, Amon na'ori Yosia,  
<sup>11</sup> la Yosia na'ori Yekonya noro mo'oniwalinhe lere Babel enihe keledi Israel, rodi laa rir nohe.

*Yesus upun a'anhe nano lere manin Babel kele Israel rodi laa rir nohe rakan lere momori Yesus*

<sup>12</sup> Nano lere Babel enihe keledi Israel,  
 Yekonya na'ori Sealtiel,

Sealtiel na'ori Zerubabel,  
<sup>13</sup> Zerubabel na'ori Abihud, Abihud na'ori Elyakim, Elyakim na'ori Azur,  
<sup>14</sup> Azur na'ori Zadok, Zadok na'ori Akim, Akim na'ori Eliud,  
<sup>15</sup> Eliud na'ori Eleazar, Eleazar na'ori Matan, Matan na'ori Yakup,  
<sup>16</sup> la Yakup na'ori Yusup man ho Maria. Maria eniyeni mori Yesus man rapolu Kristus.

<sup>17</sup> Ende Yesus upun a'anhe nano Abraham rakan Daud, ku rewen idaweli wo'akka; nano Daud rakan lere manin Babel enihe keledi Israel rodi laa rir nohe, ku rewen idaweli wo'akka haenhi; nano lere Israel laa noho Babel rakan Yesus Kristus Nin lere, ku rewen idaweli wo'akka wali'ur.

*Roh Kudus nodi molollo Maria ihin kemen penia mori Yesus*

(Luk. 2:1-7)

<sup>18</sup> Lere momori Yesus onneni lirna la'an hi'i heheni: Yesus inna Maria noro aman Yusup, ida ma naledi honorok aki ida me'e, maa ka ramkuru wuku makun. Roh Kudus nodi molollo Maria ihin kemen, penia nornoro raramne me'e.\*

<sup>19</sup> Maa, Yusup ka nauroin Roh Kudus nodi molollo Maria kemen makun, de an pene'ek Maria larlewenedi woro'ohe rira honorok aki ma namnehe na'alono me'e. Yusup eni ri man akin mou la namdudu, penia ai namhene wakunu nano'onyaka Maria

\* **1:5** Rahab eniyeni man paku suwar noho Israel nin man koklolo na'inau woro'o lolo kota Yeriko. \* **1:18** Luk. 1:27

lolo heri kalarna, de nanoin kalla namehin leke yon ho Maria me'e.

<sup>20</sup> Alam ida nine, Yusup naho'ok nakail nina aki eniyeni mene namkuru la namarmi. Namlilin-nohi Makromod Lalap Nin hophopon a'am raram mai nalhari kemen Yusup lolo nina namarmi na'heni, "Yusup, Daud upun anan o, Tatana man minle Maria ihin kemen onne, Roh Kudus nina molollo, de yon mamka'uk more ho."

<sup>21</sup> Rakan Maria nina lere alam nokor, an mori mo'onyane. Lere onne waki naran Yesus, ono Ai penia man huri we'er Nin ri nano dohohale nin molollo."

<sup>22</sup> Onnenihe na'akeme namwali lekpananne na'akuku na'anokor inhawa Makromod Lalap na'aheniyedi lolo Nin nabi na'ahenia,

<sup>23</sup> "Dernala! Maekrara ida ma kan ho makun nornoro raramne, de moriyana mo'oni ida. Tatan eniyeni rin waki naran Imanuel."

Nano wanakunu Ibrani, naran 'Immanuel' napa'ahne, 'Makromod Lalap aiyedi ik leken kalarna me'e.' \*

<sup>24</sup> Yusup namake ne, ler-nohi inhawa man Makromod Lalap Nina hophopon a'am raram hophopon onneni, de ai nala Maria namwali hono,

<sup>25</sup> maa noro Maria ka ramkuru wuku hehen nanumene rakan Maria moriyedi mo'onyana onneni. Enla Yusup waki naran Yesus.

## 2

*Ri Majus woro'o wokelu mai ranoin Yesus*

<sup>1</sup> Yesus mori lolo kota Betlehem, noho Yudea, lere rai Herodes nodi molollo noho onne. Ler onne ri Majus woro'o wokelu ma nauroin tada kaliyoro ramhara rano noho wali kimur mai kota Yerusalem.

<sup>2</sup> Rakanedi Yerusalem hi ra'ukani, "Emene Tatana man Makromod Lalap nouwedi namwali Rai Yahudi nano nonolu me'en, mori Ai lolo ewie? Am do'onedi kaliyoro ida ha'a lolo kimur nala tanada mayai nahenia An mori lolo eniyeni, penia am mai leke male ainima hiyene arore."

<sup>3</sup> Rai Herodes derne rir na'ukankani ne, ai akin apinha me'e, de ri Yerusalem na'akeme ramka'uk haenhi.

<sup>4</sup> Enime'ede an hopon imam-imam lalap noro meser Horok Lap na'akeme lawuku hopun pepen leke na'ukani hi tarana. Ai na'ukani, "Emene ri man Makromod Lalap na'anouwedi namwali Rai Yahudi\* onne, mori ai lolo ewie?" <sup>5</sup> Hir walha ra'aheni, "Ai onne mori lolo kota Betlehem, noho Yudea, ono nabi ida horokedi na'aheni,

<sup>6</sup> 'Eih, Betlehem, o kam tana narehi nano kota lalap man minle noho Yudea, ono nano o, ri ida namwali Rai man leluwai makrana Ainu'u ri mormori Israel.' \*\*

\* 1:23 Yes. 7:14 \* 2:4 ee, Mesias \* 2:6 Mik. 5:2

<sup>7</sup> Enime'ede rai Herodes nodi kalla susuwar napolu Majus ma nauroin tada kaliyoro enihe leke na'ukani hi, "Konohi ya'u lere dedesne paphe do'on kaliyoro onne?"

<sup>8</sup> Hir konohiyedi Herodes horu ne, an nou hi na'henia, "Mim laa Betlehem manoin Tatana onne wawa'an, la mim do'onedi haromo, wali mam konohi ya'u leke i laa ala ainu'u hiyene arore Ai haenhi."

<sup>9-10</sup> Hir derne rai Herodes nin nou horu, hi rala'a me'e. Hi rala'a ne, hi akin senan wake'e ono hir do'on wali'ur kaliyoro dodo'on lolo kimur eni. Kaliyoro onne noluwedhi hi rakan Betlehem, ren namlolole onno Tatana miminle wawan.

<sup>11</sup> Enime'ede hir laa nakar onne raram, do'on Tatana onne noro inna. Hir kadi ein korno, rawa rahuwo'ok, la ra'uli rasa'a Ai. Hir hari rir panaku onno leke rala mahe, kemenyan,<sup>†</sup> noro mur,<sup>‡</sup> hoikani Ai.<sup>§</sup>

<sup>12</sup> Hi rala'a ne, Makromod Lalap nou hi lolo namarmi na'henia, "Mim wali laa minim lekloi, yono lolo rai Herodes me'e." Ende hir wali laa rir lekloi loledi kalla namehin.

*Yusup noro hono ananne lari laa Mesir*

<sup>13</sup> Ri Majus onne rala'edi ne, Makromod Lalap Nina

<sup>†</sup> 2:11 kemenyan: Dupa onne wella ai wawan, hihi'i nano au'ono ida. <sup>‡</sup> 2:11 mur: Au hairn wala'ula'u ma napro'ukedi, rala nano au'ono ida. <sup>§</sup> 2:11 Orworoin ma nadedem wakuku wanakunu Yunani lolo Horok Lapeni ra'aheni mahe, kemenyan, noro mur nin panaeku aile: Mahe nin panaeku na'aheni Yesus namwali Rai; kemenyan nin panaeku nahenia Ai namwali Makromod Lalap; la mur onne nin panaeku nahenia Ai namwali ri mormori man lernala apinha me'e den maki. <sup>\*</sup> 2:15 Hos. 11:1

hophopon a'am raram mai nalhari kemen Yusup lolo namarmi hopon na'ahenia, "Mamakedi! Herodes maha nanoin Tatana onne leke nesne, de mala Tatana noro inna mala'a laa noho Mesir. Min lolo onne rakan lere Ya'u kukunohi mi mamhara."

<sup>14</sup> A'alam onne me'ede Yusup namaka, la noro hono anan rala'a Mesir me'e.

<sup>15</sup> Hir min lolo onne hehen nanumene Herodes makiyedi. Ha onnnenihe namwali lekpananne na'akuku na'anokor in-hawa Makromod Lalap na'aheniyedi lolo Nin nabi na'ahenia,

"Ya apolu Ya An'u namhara noho Mesir."  
\*

*Herodes nesne tatan mo'onyiana*

<sup>16</sup> Herodes nauroinnala Majus enihe wuku hapluredi ne, ai na'ahan rehi, de hopon resne mouwedi tatana mo'onyiana na'akeme ma nin anna woro'o laa yawa lolo kota Betlehem noro leke-leke man aile herne wali-wali enihe. Ai nala panaeku onneni ono majus enihe ra'aheni hir do'on kaliyoro ma nala tanada onne anna woro'o man laedi me'e.

<sup>17</sup> Nina hini'i onne na'akuku na'anokor nabi Yeremia lirna ma na'aheni, <sup>18</sup> "Lolo leke Rama, rin derne sus mak oir mamani.

Rahel nina sus mak oir kan horu, de na-herhere mamani, ono anan na'akeme resne horu.” \*

*Yusup noro hono ananne wali nano Mesir*

<sup>19</sup> Lere Herodes maki, Makromod Lalap Nina hophopon a'am raram nalhari kemen lolo Yusup nina namarmi wali'ur na'aheni,

<sup>20</sup> “Mamakedi! Man paeku nesne tataneni makiyedi me'e, de moro tatana noro inna wali wali'ur laa noho Israel.”

<sup>21</sup> Enime'ede Yusup namaka, la noro hono ananne wali wali'ur laa Israel.

<sup>22</sup> Maa an dernedi nahenia Herodes ananne Arkelaus herre wali'ur aman nodi molollo noho Yudea, de ai namka'uk laa enne. Makromod Lalap Nin hophopon a'am raram nou wali'ur lolo nina namarmi nahenia ai noro nakar raram laa noho Galilea,

<sup>23</sup> penia hir laa Galilea ramkene lolo kota Nazaret. Panaeku onne na'akuku na'anokor nabi-nabi lirna ma na'aheni,  
“Ai onne, rin wekel manin Nazaret.” \*

### 3

*Yohanis man ulutade ri nin honowok nair*  
(Mrk. 1:1-8; Luk. 3:1-18;  
Yoh. 1:19-28)

<sup>1</sup> Lere Yesus minle leke Nazaret makun, Yohanis ma nodi oir ulutada ri mai Yudea loikaru Makromod Lalap Lirna Wawan laa ri lolo noho

mamun ma napro'uk man ai lolo onne. Ai na'aheni,

<sup>2</sup> “Herre minim morimori ma ka namloleni, la derne makani Makromod Lalap, ono lere Makromod nodi molollo ri mormori wakuraniyedi me'e.”

<sup>3</sup> Nonolu nabi Yesaya wekel Yohanis eni na'aheni,  
“Ri ida aile lolo noho mamun ma napro'uk wakaukau na'aheni,  
‘Ma'ahari kalla, la ma'anehe, leke Makromod lole.’ ” \*

<sup>4</sup> Yohanis eni nin nainair rodi unta wulu hi'ie, nin kali ehe rodi ha mormori ulikne hi'ie, la nina nana'an nonomun poreke noro wani oir. \*

<sup>5</sup> Ri nammori rano Yerusalem, Yudea ne'en raramne na'akeme, noro leke-leke man minle oir wauwau Yordan wali-wali maiwuku, derne Yohanis nin loloi kakaru eni.

<sup>6</sup> Hi meririi werre akin kukunohi rira dohohale nanumene Yohanis norhe laa oir Yordan raram leke ulutade.

<sup>7</sup> Enimaa lere an do'on ri Parisi noro ri Saduki nammori mai leke ulutade ne, ai ne'el hi na'ahenia, “Heih, mi eniyenihe ailanna maisa haimoke! Yon makoto mim mai ulutade leke lo'o mahinuriyedi nano hunukum lere man mamaai eni.

<sup>8</sup> Maa lam hi'i ha man wa'an leke ri nauroin mim herredi minima morimori ma ka namloleni, la derne makani Makromod Lalap me'e.

\* 2:18 Yer. 31:15 \* 2:23 Mrk. 1:24; Luk. 2:39; Yoh. 1:45 \* 3:3 Yes. 40:3 \* 3:4  
2Rai 1:8

9 Yon makoto mi mamwali Abraham upun anan de kam lernala hunukum. Makromod Lalap peni nodi molollo hi'i waku eniyenihe herre mi namwali Abraham upun anan.

10 Makromod Lalap Nin hunukum na'akeki rakanedi me'e. Lere eni Ai na'akenedi Nin he'i aile au onno me'e. Inhawa au'ono ma kan woi wawa'an, An keri, sopol laedi aiye raram.

11 Yo odi oir ulutada mi leke namwali tanada mim herredi minima morimori ma ka namloleni, maa yo oluwedi Ri ida man ulutada mi nodi Roh Kudus noro aiye. Ai nodi molollo narehi ya'u, penia ainu'u molollo kaale yo ohu Nina pakpak ei.

12 Ai nodi kokopo ka'i na'amou Nina gandum, loiwuku ihin dakar raram, la osorne sopol laedi aiye man mori mamani raram."

### *Yohanis ulutada Yesus (Mrk. 1:9-11; Luk. 3:21-22)*

13 Lere onneni Yesus namhara noho Galilea mai oir wauwau Yordan leke Yohanis ulutade,

14 maa Yohanis na'okulale na'heni, "Wa'an rehi Pape ulutada ya'u. Yon Papa napnak ya'u ulutade."

15 Maa Yesus na'heni, "Wa'an rehi ors eni ulutade Ya'u leke ik ka'akuku ka'anokor Makromod Lalap Nin honorok panaeku na'akemeni." Enine ai ne'e, de noro Yesus laa oir raram leke ulutade.

\* 3:17 NN. 22:2; Mzm. 2:7; Yes. 42:1; Mat. 12:18; 17:5; Mrk. 1:11; Luk. 9:35 \* 4:4  
Ul. 8:3

16 Yesus namhara oir wauwau eni ne, namlilinohi a'am nahinari, An po'on Makromod Lalap Nin Roh naise merpati ida kopur namlololo Ai wawan.

17 Enla lirida nano a'am raram na'heni, "E'eni Ya An'u, Ya amre'e amharu. An hi'i Ya akin nahuwa'an rehi." \*

## 4

### *Yesus lernalala kenene panta-*

*(Mrk. 1:12-13; Luk. 4:1-13)*

1 Lere onneni Roh Kudus norkaru Yesus laa noho mamun ma napro'uk leke Hayakyak Makromon kene patale.

2 Lere alam welia'akka raram Ai na'aluli kemen ka na'ak, de namlara wake'e.

3 Enine Hayakyak Makromon man ken patal onne, mai na'heni, "Lo'o namlolo kokkoo Makromod Lalap Anan O, hopon waku eniyenihe namwali banana'an."

4 Maa Yesus walhe, "Makromod Lalap na'aheniyedi lolo Horok Lap raram, 'Ri kan mori nano banana'an mehe, maa nano Makromod Lalap Lirna na'akeme haenhi.' " \*

5 Onne horu, Hayakyak Makromon norkaru Ai laa Makromod Lalap Nin kota Yerusalem laa onno man kulu wake'e lolo Makromod Lalap Nin Romleu Lape, la na'heni,

6 "Lo'o namlolo kokkoo Makromod Lalap Anan O, nehu laa yawa, ono

horhorok aile Lirna Wawan  
ma na'henia,  
'Makromod Lalap hopon Nin  
hophopon a'am raram  
mai leke radiyaka O.  
Hir mai paku O leke  
yom wekur wakue.'” \*

<sup>7</sup> Yesus walha, “Maa  
horhorok aile haenhi ma  
na'heni,

'Yon hi'i ha ma kan min  
haida modi kene  
Makrommu, ma  
namwali Makromod  
Lalap.'” \*

<sup>8</sup> Horu ne, Hayakyak  
Makromon norkaru Yesus  
laa wo'or man kulu rehi leke  
An do'on hair-hair na'akeme  
noro rira linikir kanaru. An  
nou Yesus na'henia,

<sup>9</sup> “Ya ala ha onne na'akeme  
ki O, horo kadi eum korno  
yawa, ma'uli masa'a ya'u.”

<sup>10</sup> Maa Yesus walhe,  
“Hayakyak Makromon o,  
mala'a here! Horhorok aile  
man hopon mayai na'henia,  
'Ma'uli masa'a Makromod  
Lalap, la derne makani  
Ai mehe.'” \*

<sup>11</sup> Enime'ede Hayakyak  
Makromon hoikaruwedidi  
Yesus, la hophopon a'am  
raram mai ilitolle Ai.

Yesus laa Galilea loikaru  
Makromod Lalap Lirna  
Wawan eni  
(Mrk. 1:14-15; Luk. 4:14-  
15)

<sup>12</sup> Yesus derne nahenia  
Yohanis aiyedi bui raram  
me'e ne, Ai namhara Yudea  
wali wali'ur laa nohu Galilea.

<sup>13</sup> Ai namhara Nazaret la  
minle kota Kapernaum man  
aile oir lape Galilea herne.

Nohorai eniyeni, Yakup anan  
Zebulon noro Naptali rira  
nohe.

<sup>14</sup> Yesus min lolo onne  
leke na'akuku na'anokor  
inhawa Makromod Lalap  
na'aheniyedi lolo horok  
nabi Yesaya nonolu eni,  
na'ahenia,

<sup>15</sup> “Lolo ri Zebulon noro Nap-  
tali rira nohorai man  
aile ranrani oir lapa  
Galilea,  
la man aile oir wauwau  
Yordan wali enne,

ri nammori ma ka namwali  
Yahudi holi enne.\*

<sup>16</sup> Hir do'on Ropropo man  
lapida,  
la Ropropo onne  
ropa'ahedi hi man  
minle metmetek  
kalkala onnenihe  
me'e.”

<sup>17</sup> Nano lere onne me'ede  
Yesus loikaru Makro-  
mod Lalap Lirna Wawan  
na'aheni, “Herredi minim  
morimori ma ka namloleni,  
la derne makani Makromod  
Lalap, ono Nin lere alam  
nodi molollo ri mormori  
na'uraniyedi me'e.”

*Yesus napolu ma nohu  
meki wo'akka*  
(Mrk. 1:16-20; Luk. 5:1-11)

<sup>18</sup> Lerida Yesus nala'ala'a  
lolo oir lapa Galilea arkan ne,  
An do'on mo'oni woro'o, Si-  
mon (rapolu 'Petrus' haenhi)  
noro mo'oniwalla Andreas.  
Woro'ohe ma nohu meki de  
mahar sopol diyale.

<sup>19</sup> Yesus napolu hi  
na'ahenia, “Mam lernohi  
Ya'u, leke Ya'u wakuku mi

\* 4:6 Mzm. 91:11-12

\* 4:7 Ul. 6:16

\* 4:10 Ul. 6:13 \* 4:15 Yes. 9:2-3

manoin ri mormori naise  
manoin i'in."

<sup>20</sup> Idewe hir hoikaruwed  
rir diyalen, la lernohi Ai.

<sup>21</sup> Hi rala'a kan ko'uwalla,  
An do'on ri woro'o wali'ur,  
Yakobus noro mo'oniwalla  
Yohanis. Hi roro aman  
Zebedeus mahanoro tapil  
dari lolo korkore wawan.  
Yesus napolu hi, "Mam  
lernohi Ya'u."

<sup>22</sup> Idewe hir huri karuwedi  
aman, kopur laa ro lernohi  
Yesus.

*Yesus hi'i wa'an ri nam-  
mori*  
(Luk. 6:17-19)

<sup>23</sup> Onne horu, Yesus  
laliwewer noho Galilea  
wakukuwala ri lolo Yahudi  
rira kerei-kerei. An loikaru  
Makromod Lirna Wawa'an  
eni, na'amou na'aropo  
hi'ihehewi Makromod nodi  
molollo ri mormori, la An  
hi'i wa'an ri ma nakni'ir noro  
man apinha na'akeme.

<sup>24</sup> Enpenia Ai naran  
pe'eredi lolo Siria ne'en  
raram me'e, de ri nam-  
mori rorkaru man lernala  
apinha noro ma nakni'ir  
warna-warna mai Yesus, ma  
napihi haha'al, ma naplu'uk  
nap'eker, noro idewe ri  
man hayakyaka huhu'ur  
raram haenhi. An hi'i wa'an  
na'akeme.

<sup>25</sup> Heri nammori mai lolo  
ewi-ewi lernohi Yesus. Hir  
mai nano noho Galilea,  
Dekapolis (napa'ahne, 'Leke  
Idaweli'), kota Yerusalem,  
noho Yudea, noro leke-leke  
ma aile oir wauwau Yordan  
wali kimur haenhi.

## 5

*Yesus wakuku hi'ihehewi  
ri akin nahuwa'an*  
(Luk. 6:20-23)

<sup>1</sup> Yesus po'on heri on-  
nenihe, An wakiha'a wo'or  
ida naikoredi, la Nina man  
lernohi pakunohi enihe mai  
raikoro wukuwedi.

<sup>2</sup> An wakuku hi na'ahenia,

<sup>3</sup> "Ri ma nauroin nahenia  
ai mehe ka nauroin hi'i  
haida-haida man wa'an,  
de honorok akin pu'ik  
mehe Makromod Lalap, ai  
akin nahuwa'anedi, ono ai  
namwali Makromod Lalap  
Nin ri.

<sup>4</sup> Ri ma akin sus, ai akin  
nahuwa'anedi, ono Makro-  
mod Lalap na'alapedi ai hon-  
orok akin me'e.\*

<sup>5</sup> Ri ma kan holi kukulu  
lalapa, ai onne akin  
nahuwa'anedi, ono na'amoli  
manarnna noho wawan  
na'akeme.\*\*

<sup>6</sup> Ri man raram nodi rehi  
hi'i ha ma namlolo lolo  
Makromod Lalap kalarna,  
ai onne akin nahuwa'anedi,  
ono Makromod Lalap  
na'akuku na'anokor nin  
raram nodi onne.\*

<sup>7</sup> Ri man kukul aki man  
wa'an nina ri mormori wali,  
ai akin nahuwa'anedi, ono  
Makromod Lalap kukul Nin  
aki man wa'an ai haenhi.

<sup>8</sup> Ri man honorok akin  
mou, ai akin nahuwa'anedi,  
ono na'amoli an min wew-  
erre noro Makromod Lalap.  
\*

<sup>9</sup> Ri man holi lilili maumau  
la iuwuku auwuku man yaka

\* 5:4 Yes. 61:2 \* 5:5 Wanakunu 'na'amoli manarnna noho wawan na'akeme' nin  
panaeku 'hir lo'o kokala inhawa man Makromod Lalap nouwedi me'e.' \* 5:5

Mzm. 37:11 \* 5:6 Yes. 55:1-2 \* 5:8 Mzm. 24:3-4

man hala lolo nina ri heri ri wali, ai akin nahuwa'anedi, ono ai onne penia rapolu Makromod Lalap ananne.

<sup>10</sup> Ri man lernohi Makromod Lalap Nin honorok panaeku mamani, de lernala wewerek pananaka, ai akin nahuwa'anedi, ono ai namwali Makromod Lalap Nin ri.

<sup>11</sup> Lere rin hadwei hadwokor mi, hi'i apinpinha mi, la wakunu nano'onyak mi ono mim lernohi Ya'u, mi akim nahuwa'anedi.

<sup>12</sup> Horhorok, nonolu rin hi'i apinpinha nabi-nabi haenhi. Ende hi'i mi akim nahuwa'an wake'edi here, ono Makromod Lalap na'akenedi minim mahmaha kolkoli ihin ennen man lap aiyedi a'am raram me'e."

*Yesus naho'ok man lernohi  
Ai naisa asir noro roprope*

(Mrk. 9:50; Luk. 14:34-35)

<sup>13</sup> "Mi man lernohi Ya'u, mamwali asir noho wawan, maa lo'o mi kam lernohi Ainu'u wanakuku, mi maisa asir ma ka nam'arha me'e. Rodi inhawe leke hi'i nam'arha wali'ur? Asir onne wawedi ha man yaka, de sopoledi laa kalla wawan leke rin hihir hamar.

<sup>14</sup> Mi ri man lernohi Ya'u maisa wadu ma nala ropropo noho wawan na'akeme, la maisa kote man minle wo'or tilu ma ka nasinuwari.

<sup>15</sup> Ri ka nadedem lokon wadu rodi e'enoir honowale, maa rala loile onno kukulu leke ropo lolo nakar raram na'akeme.

<sup>16</sup> Ende yon mim suwarala minim ropropo lolo heri kalarna, maa hurinohi heri onne do'on minim hini'i wenewhe man wa'anee, leke hi ra'uli rasa'a minim Pape man minle a'am raram."

*Yesus na'amou na'aropo  
Makromod Lalap Nina keneri  
hono'ok*

<sup>17</sup> "Yom pene'ek Ainu'u panaeku mai eni a'amoluloinedi Makromod Lalap Nina keneri hono'ok noro nabinaabi rira horok. Ka! Ya'u mai leke a'akuku a'anokor rira wanakuku na'akeme.<sup>†</sup>

<sup>18</sup> Horhorok Ainu'u nou ma na'ono eniyeni: Noho wawan noro a'am aile makun, wanakunu lirna na'akeme lolo Makromod Lalap nin keneri hono'ok eni na'ene namwali kokkoo, hurup ida, me, titik ida kan molu.

<sup>19</sup> Inhoi man larlewenedi keneri hono'ok ida, kade man deul tana wake'e, lan wakuku ri namehin lernohi haenhi, an lolo yawa Makromod Lalap Nin ri na'akeme. Maa inhoi lernohi Nin keneri hono'ok na'akeme, la wakuku ri namehin leke lernohi haenhi, ai onne Makromod Lalap kikan namwali ri lalapa lolo Nin ri na'akeme.

<sup>20</sup> Ende mahinorokedi, lo'o mi ka mamkene lernohi Makromod Lalap Nin honorok panaeku eni narehi nalewen meser-meser Horok Lape roro ri Parisi enihe, mi kam laa onno man Makromod Lalap nodi molollo raram."

<sup>†</sup> 5:17 'Ya'u mai leke a'akuku a'anokor rira wanakuku na'akeme' nin panaeku namehin haenhi, 'Ya'u mai leke a'amou a'aropo rira wanakuku na'akeme.'

*Yesus wakuku yon ida ma na'ahan ida*  
(Luk. 12:57-59)

<sup>21</sup> "Mi mauroinedi nounaku ik upud a'ad kokaledi me'e ma na'ahenia, 'Yono resne ri. Inhoi ma nesne ri, na'amoli ho'ok kail ai leke hukum.' \*

<sup>22</sup> Maa Ya aheni ki mi, inhoi ma na'ahan noro walinne,‡ na'amoli ho'ok kail ai leke hukume. Inhoi man warei yaksala noro walinne, ai onne rodi laa nakpali Yahudi rir man ho'ok kail enihe. Inhoi ma ne'el walinne na'ahenia, 'Maplo'edi,' ai onne na'akeki rakanedi kawali pire ai porom raram me'e.

<sup>23</sup> Ende lo'o mim laa Makromod Lalap Nin Rom-leu Lape raram modi minim honoi kanani leke loile honoi kanani onno wawan, maa mamlilinnohi horokala mi walinne ma na'a'ahan ki mi,

<sup>24</sup> ma'akenedi honoi kanani onne lolo honoi kanani onno kalarne, laa moro mi walinne mahuwa'anedi nanumene wali mai honoi kanani onno onne mala minim honoi kanani Makromod Lalap.

<sup>25</sup> Enla lo'o man tumdesne mi aile, halhala mapanak mahuwa'anedi noro ai, leke yon ai lan kalaka mi laa man ho'ok kail eni, de man ho'ok kail onne huri mi laa polisi, rala mi nahan bui raram.

<sup>26</sup> Horhorok Ainu'u nou ma na'ono eniyeni: Lo'o mi ka mahuwa'anedi noro ai nolu, hi kar huri mi nano

bui raram hehen nanumene mim pair minim okon raka onne na'akeme horu."

*Yesus na'amou na'aropo keneri hono'ok 'yono lerwa'u hailai'*

<sup>27</sup> "Mi mauroinedi nounaku ma na'ahenia, 'yono lerwa'u hailai'.

<sup>28</sup> Maa Ya aheni ki mi, inhoi po'on maeke ida, la namono lolo honorok akin mehe, ai onne lerwa'u hailaiyedi noro maeke onne me'e.

<sup>29</sup> Ende lo'o mi makum malanna nakoko mi hi'i dohohala, hidu sopoledi. Wa'an rehi min wewerre ik Makromod Lalap mamani, kade mi makum wali kaale. Yon hi'i de mi makum woro'o aile, maa Makromod Lalap sopol mi laa kawali pire ai porom raram.

<sup>30</sup> Lo'o mi liman malanna nakoko mi hi'i dohohala, heru sopoledi. Wa'an rehi min wewerre Makromod Lalap mamani, kade mi liman wali kaale. Yon hi'i de mi liman woro'o aile, maa mi mala'a kawali pire ai porom raram."

*Yon ri namhene hono*  
(Mat. 19:9; Mrk. 10:11-12;  
Luk. 16:18)

<sup>31</sup> "Mi mauroinedi nounaku man hopon heheni, 'Ri ma namhene nin maekleher, hi'i horok reiha'ar nala nin maekleher nanumene reiha'ar noro ai.'

<sup>32</sup> Maa Ya aheni ki mi, inhoi namhene nin maekleher, la maeke onne kan larlewenedi

\* 5:21 Kel. 20:13; Ul. 5:17      ‡ 5:22 'inholi ma na'ahan' Horok Lap dedesne na'aheni eni mehe, ma Horok Lap ida woro'o man horok lere li'ur ra'uwali na'aheni 'inholi ma na'ahan na'alehe panaeku ma na'ono...'      \* 5:27 Kel. 20:14; Ul. 5:18      \* 5:31 Ul. 24:1-4

rir nou, mo'oni onne penia  
hi'i maeke onne lerwa'u lere  
an ho mo'oni namehin. Enla  
mo'oni man ho noro maeke  
onneni, an lerwa'u hailai  
haenhi."

*Yon ma'akerhe nou modi  
lira hope*

<sup>33</sup> "Mi mauroin haenhi  
nounaku ik upud a'ad  
kokaledi ma na'ahenia, 'Yono  
lari nano onum noue. Lo'o  
rin nou haida la nahopedilaa  
Makromod Lalap, kan huri ai  
lari nano nin nou onne!'" \*

<sup>34</sup> Maa Ya aheni ki mi, yono  
ma'akerhe nou modi hopo  
me'e. Lo'o mim hi'i nou,  
yon wekel a'am raram naran  
ma'akerhe nou onne, ono  
a'am raram onne Makromod  
Lalap Nina naikoro onno.

<sup>35</sup> Yon ma'akerhe nou  
wekel in-noho naran, ono  
in-noho onne Makromod  
Lalap Nina ek'eker onno.  
Yon ma'akerhe nou wekel  
Yerusalem naran, ono kota  
onne Rai Lalap onno."

<sup>36</sup> Yono ma'akerhe nou  
wekel mi uluwakun ono ka  
modi molollo ma'uwarha, ee  
ma'amohon muruk lihir ida.

<sup>37</sup> Lo'o minim panaeku  
ma'aheni, 'Ya,' ma'aheni  
mehe, 'Ya.' Lo'o minim  
panaeku ma'aheni, 'Ka,'  
ma'aheni mehe, 'Ka.'  
Wanakunu ma narehi onne,  
Hayakyak Makromon nina  
panaeku me'e."

*Yesus wakuku ri yon herre  
walha ri nin hini'i wenewhe  
man yaka*

(Luk. 6:29-30)

<sup>38</sup> "Mi mauroinedi  
nounaku ma na'ahenia,  
'Maka herre maka, nihi herre  
nihi.'"

<sup>39</sup> Maa Ya aheni yono mim  
herre walha ri nin hini'i we-  
newhe man yaka. Lo'o rin  
pahar mi muman malanna,  
mala mariri pahar haenhi,

<sup>40</sup> ee, lo'o rin kalaka mi lolo  
man ho'ok kaile kalarna leke  
an hopon mala minim rain,  
na'amoli mala minim ho'ir  
homnono haenhi.

<sup>41</sup> Lo'o man panulu ida ho-  
pon mi ma'uwara nin ha-  
haa modi mala'a kilu ida,  
na'amoli modi mala'a kilu  
woro'o.

<sup>42</sup> Lo'o ri napanak haida-  
haida nano mi, male, la lo'o  
ri napanak herre haida ki mi,  
yon ma'okulale."

*Yesus wakuku maramyaka  
arwali*

(Luk. 6:27-28, 32-36)

<sup>43</sup> "Mi mauroin wanakuku  
ida aile ma na'ahenia,  
'Maramyaka mi walinne, la  
sopoledi minim arwali.'"

<sup>44</sup> Maa Ya aheni maramyaka  
minim arwali, la hi'i lir  
napanak ri man hi'i sus mi.

<sup>45</sup> Lo'o mim hi'i heheni,  
ri namehin rauroin mi  
mamwali minim Pape man  
aile a'am raram ananne. Ai  
penia nala ha man wa'an  
ri mormori na'akeme. Ai  
nalha'a lere ri man holi  
wawa'an noro ri man  
ailanna haenhi. Ai nala  
okon mai ri man hi'i ha ma  
namlolo noro ri man hi'i ha  
ma ka namlolo haenhi.

<sup>46</sup> Lo'o mi maramyaka  
mehe ri ma nadedem

\* 5:33 Im. 19:12, Bil. 30:1, Ul. 23:21

\* 5:35 Yes. 66:1, Mzm. 48:3 \* 5:38 Kel.

21:24, Im. 24:20, Ul. 19:21 \* 5:43 Im. 19:18

naramyaka mi, yom pene'ek Makromod Lalap herre walha minim hini'i wenewhe onne. Ka! Man ra'uk paipair kade hir ailanna, maa hi me'ene raramyaka ri ma naramyaka hi haenhi.

<sup>47</sup> Lo'o mi maramyaka mi wallum mehe, hi'ihewi minim hini'i wenewhe wa'an narehiyedi ri ma ka nauroin Makromod Lalap makun. Hi me'ene hi'i heheni haenhi.

<sup>48</sup> Ende hi'i ha ma namlolo moro ri na'akeme naise mi Ammu man aile a'am raram eni."§\*

## 6

*Yesus wakuku hi'ihehewi ik paku ma na'alehe haida-haida*

<sup>1</sup> "Horhorok! Yom paeku hi'i agame nina holoor halauk lolo heri kalarna leke rin do'on la ra'uli rasa'a mi. Lo'o mim hi'i heheni, mi kam lernala wawa'an rara'a nano Makromod Lalap man minle a'am raram.

<sup>2</sup> Enla lo'o mi mala haida ri ma na'alehe haida-haida, yono wakunu laliwewer minim hini'i wenewhe onne naise ri man kokme'e. Hir suk hi'i panaeku wawa'an lolo rir kerei raram, ee lolo kalla lapeni leke rin do'onne, ra'uli. Loi honorok wawa'an Ainu'u panaeku ma na'ono eniyeni: Hi kar kokala haida nano Makromod Lalap, ono ri mormori ra'uli rasa'edi hi me'e.

<sup>3</sup> Maa lere mi mala haida ri ma na'alehe haida-haida,

karkaramedi, leke yon ri mahaku do'on nauroin.

<sup>4</sup> Na'amoli mi Ammu ma nauroin ha ma nasinuwari na'akeme, po'on minim hini'i wawa'an onne, mehen herre walha minim hini'i onne."

*Yesus wakuku hi'ihehewi ik hi'i lir napanak*  
(Luk. 11:2-4)

<sup>5</sup> "Lere mim hi'i lir napanak yom hi'i naise ri man kokme'e ramwali ri molololo. Hir suk laa ramriri hi'i lir napanak lolo kerei raram, la hir suk minle kalla heri lololo lalaa leke rin do'onne, ra'uli. Loi honorok wawa'an Ainu'u panaeku ma na'ono eniyeni: Hi kar kokala haida nano Makromod Lalap, ono hir lernaledi ri mormori rira uli sa'a me'e.

<sup>6</sup> Maa lere mim hi'i lir napanak, mala'edi kamar raram elekedi nike mene hi'i lir napanak laa mi Ammu man ri kan dodo'on eni. An do'on minim hini'i wenewhe ma nasinuwari onneni, An herre walha minim hini'i man wa'an onneni.

<sup>7</sup> Enla lere mim hi'i lir napanak, yono mim teti lau ki mai naise ri ma ka nauroin ik Makromod Lalap. Hi rakoto nahenia lo'o Makromod Lalap kokala hirira lir napanak ono hir wakunu nammori.

<sup>8</sup> Yom hi'i naise ri eniyenihe ono mi kam hi'i lir napanak makun, mi Ammu nauroinedi minim ha wo'ira ma kan kuku kan nokor me'e.

<sup>9</sup> Ende mim hi'i lir napanak, hi'i heheni leke!

§ **5:48** Hanalle namehin: Ende maramyaka ri na'akeme namnenehe naise mi Ammu man aile a'am raram. \* **5:48** Im. 19:2, Ul. 18:13

- 'Ainim Pape man minle a'am raram,  
 Na'amoli O naran man moumou dewdewe,  
 ri na'akeme rahiyene arore.  
 10 Na'amoli mamwali Rai ma nodi molollo ri noho wawan na'akeme,  
 la malala molollo mayai leke am derne makani Onum panaeku na'akeme lolo noho wawan naise man derne nakani O lolo a'am raram.  
 11 Lere eniyeni mala hanana'an man kukkuku noknokor mayai,  
 12 la malala ampun ainima sale naise ai mala ampun ri man hi'i sala mayai.  
 13 Ewekala kawala mayai leke yono am lernala kenene panatal,  
 la morle'ule'u morwali-wali yai leke yono hayakyaka makromon nodi molollo mayai,  
 [ono] O penia Rai man sik-sik lerlere, la ma nodi molollo laa ewi-ewi.']\*  
 14 Lo'o mi mala ampun ri man hi'i sala mi, mi Ammu man aile a'am raram nala ampun mi haenhi.  
 15 Maa lo'o mi ka mala ampun ri man hi'i sala ki mi, mi Ammu man aile a'am raram ka nala ampun minim sale haenhi."

*Yesus wakuku lere ma'aluli mi kemen ka ma'ak, yon manoin ri nin uli sa'a*

\* **6:13** Horok man aile lolo tanada [ ] raram, kaale lolo horok Yunani dedesne heruwali.

16 "Enla rakan lere mi ma'aluli mi kemen ka ma'ak leke ma'uli masa'a Makromod Lalap wawa'an, yon hi'i naisa ri man kokme'e ramwali ri molololo. Hir hi'i oin makan sus leke rin po'onne, ra'aheni hir maha ra'aluli kemen ka ra'ak. Loi honorok wawa'an Ainu'u panaeku ma na'ono eniyeni: Makromod Lalap ka nala haida hi, ono hir kokaledi uli sa'a nano ri mormori me'e.

17 Maa, rakan lere ma'aluli mi kemen ka ma'ak, laru mi oin makan la ma'akeki mi kemen haenhi,

18 leke yon ri nauroin nahenia mi maha ma'aluli mi kemen ka ma'ak. Naukara ik Amad man kak dodo'on eni mehe nauroin minim hini'i ma nasinuwari onne, la An herre walha minim hini'i wennewhe onneni."

*Yesus naho'ok kanaru man aile noho wawan noro man aile a'am raram*  
*(Luk. 12:33-34)*

19 "Yom loiwuku kanaru lolo noho wawan ono wutu rau noro karkoi nano'onyaka, la ma namna'a lo'o namna'e.

20 Loiwuku kanaru man minle a'am raram man wutu rau noro karkoi ka nano'onyaka, la ma namna'a ka namna'e,

21 ono minim linikir kanaru nin miminlole namwali mi akim nin miminlole haenhi."

*Yesus wakuku ri kan paekunala lolo kalla ropropo noro idewe kalla metmetek*  
*(Luk. 11:34-36; Luk. 16:13, 12:22-31)*

<sup>22</sup> "Makum namwali wadu mi kemmu. Lo'o mi makum mou, mim do'on mauroin wawa'an naise ri man min lolo ropropo.

<sup>23</sup> Maa lo'o mi makum kan mou, mi kam do'on mauroin haida naisa ri man min lolo noho momohon mamani. Lo'o mauroin hi'ihehewi lernohi ropropo man aile mi raram, maa kam lernohie, minim morimori eren memetek, kam do'on haida-haida.

<sup>24</sup> Ri kan paekunala namwali man howok makromon woro'o, kalo'o nalida wa'an, nalida yaka, ee namkene lernohi ida, la ida ka. Kam paekunala mamwali Makromod Lalap Nin man howok noro idewe man howok nanoin linikir kanaru mamani."

*Yon ma'irhu minim morimori akilere*

<sup>25</sup> "Enpenia Ya'u konohi mi, yon ma'irhu minim morimori akilere. Yon ma'aheni, 'Lo'o ai mo'on momun inhawa, ee lo'o am hewek nair inhawa?' ono ha ma na'ono lolo minim morimori eni ka namwali banana'an noro nainair mehe.

<sup>26</sup> Po'onala manu merwui me'ene, kar howok kirna, ka ra'ilili radai banana'an loi-wuku dakar raram, maa mi Ammu man aile a'am raram leluwai makrana hi. Emene mi ri mormori, Makromod Lalap peni na'ono mi narehiyedi manu merwui enihe.

<sup>27</sup> Mi eniyenihe, lo'o ma'irhu la loi honorok ha wo'ira onne mamani, maa

onne kan paku mi ma'uwali lere ida lolo minim lere alam.

<sup>28</sup> Alhi'ihepenia ma'irhu minim nainairre? Po'onala au dipi man minle wo'or au tilu. Au dipi onne kar howok, la kar kenna mair.

<sup>29</sup> Maa horhorok, rai Salomo onne ri orkanaru wake'e, maa ai kan nair nainair ma'aruru naise au dipi onnenihe.\*

<sup>30</sup> Penek man minle wo'or au tilu Makromod Lalap na'akeki ma'aruru, kade mori lere eniyeni, maa oreki harnedi! Emene maika ho'o? Ai na'akeki ika narehi nalewenedi penek onne, maa mi akim ka naili'il wawa'an makun.

<sup>31</sup> Enpenia Ya ahni, yon mamka'uk. Yon ma'aheni, 'Lo'o ai mo'on momun inhawa, ee lo'o am nair inhawa?'

<sup>32</sup> Panaeku rahu eni ri ma ka nauroin ik Makromod Lalap rahinorok manani. Ende yon mamka'uk panaeku rahu onneni ono mi Ammu man minle a'am raram nauroinedi minim ha wo'ira na'akeme ma kan kuku kan nokor makun.

<sup>33</sup> Ai na'uwali ha wo'ira onneni ki mi, horo nahenia mi mahehe leke Makromod Lalap nodi molollo mi manani, la mim hi'i ha ma namlolo lolo Makromod Lalap herne kalarne.

<sup>34</sup> Ende yono mamka'uk alam oreki nin suse, ono lere eniyeni nina suse nokoredi me'e. Yon ma'uwali alam oreki onne nina sus wali'ur."

*Yesus wakuku yon ho'ok kail ri*  
(Luk. 6:37-38, 41-42)

<sup>1</sup> "Yom ho'ok kail ri namehin, leke yono Makromod ho'ok kail mi,

<sup>2</sup> ono Ai lo'o ho'ok kail mi namnenehe mim ho'ok kail ri namehin. Enla hono'ok mim nanair modi ho'ok kail ri namehin onne, Makromod Lalap lo'o nairre nodi ho'ok kail mi wali'ur.

<sup>3</sup> Hi'ihepenia mim do'odo'on au mo'anida man minle mi wallum makan raram, maa au lapa man aile mi makan raram kam talukire?

<sup>4</sup> Hi'ihepenia mi me'el mi wallum ma'aheni, 'Mai, ya aledi au mo'o onne nano makum,' maa mi makan me'ene au lapida aile kam do'one?

<sup>5</sup> Yon kokme'e mamwali ri molololo! Maledi au lapa man aile mi makan raram leke mim do'on wawa'an nanumene mi mala au mo'o man aile mi wallum makan mai paharne."

*Yon loikaru Makromod Lalap Lirna laa ri ma namhene kokale*

<sup>6</sup> "Yon mala ha man moumou dewdewe ahue, kalo'o wali kili'ur na'unihii mi, la yono diuk mutiyare laa wawi, kalo'o hihir hamar mutiyara onne."

*Yesus wakuku mapanak Makromod Lalap leke lernala*  
(Luk. 11:9-13)

<sup>7</sup> "Mapanak ik Makromod Lalap leke mim lernala, manoin leke lernale, la disna nika leke hari nika.

<sup>8</sup> Hi'i heheni ono inhoi ma napanak, Makromod Lalap

nale ai; inhoi ma nanoin, an lernale; la inhoi man disna nika, nahinari ai.

<sup>9</sup> Mi ri mormori eniyenihe lo'o mi anum rapanak roti, mi ka mala waku, ra'an!

<sup>10</sup> Lo'o mi anum rapanak i'in, mi ka mala nee, ra'an!

<sup>11</sup> Kade mi mamwali man hi'i yaksala, maa mi mauroin mala ha man wa'an mi anume. Emene mi Ammu man aile a'am raram lo'o nauroin narehi mi nala ha man wa'an ri ma napanak Ai!

<sup>12</sup> Inhawa hini'i wenewhe mim suk rin hi'i ki mi, hi'i onne laa hi haenhi. Onne penia wanakuku ma na'ono lolo agame nina keneri hono'ok noro nabi enihe rira wanakuku."

*Kalla mamarke namwali kalla ma namlolo*  
(Luk. 13:24)

<sup>13</sup> "Lole nike man mamarke leke laa raram, ono nike noro kalla ma naprororo naphari laa kawali pire ai porom raram, la ri nammori lole.

<sup>14</sup> Maa nike mamarke noro kalla mamarke man laa or'ori dardari onno onne, sus mene rin do'on de ri taran mehe lole."

*Ik kauroin nabi ma ka namlolo nano rir hini'i we-newhe*

(Luk. 6:43-44; 13:25-27)

<sup>15</sup> "Nakinemen ki mi! Madiyaka nabi ma ka namlolo. Hir mai kokme'e hi'i rira morimori naise pipdume, maa hi onneni naise ahu merwui ma na'an makmaka nomun rarara.

<sup>16</sup> Ik kahiyene hi nano rira hini'i wenewhe. Ruri roke kan woi anggur woin, la

penek lauhohoro kan woi are woin.

<sup>17</sup> Nammenehe onne, ik lernala woin man wa'an nano au'ono man meur, maa au'ono ma kan meur kak lernala woin man wa'an.

<sup>18</sup> Au'ono man meur, kan woi woin man yak, la au'ono ma kan meur, kan woi woin man wa'an.

<sup>19</sup> Nadedem man howok kirna keri au'ono man woin kan wa'an, harnedi.

<sup>20</sup> Ende ik po'on rira hini'i wenewhe me'e de, ik kauroin hi ramwali nabi-nabi ma ka namlolo.

<sup>21</sup> Ri nammori rapolu Ya'u, 'Makromod! Makromod!' Maa nano hi, heruwali ka ramwali Makromod Lalap Nina ri. Inhoi man hi'i lernohi Ya Am'u man aile a'am raram Nin honorok panaeku, ai onne mehen laa onno man Makromod Lalap nodi molollo, de na'amoli noro Ai min wewerre.

<sup>22</sup> Lere alam Makromod Lalap naho'ok nakail noho wawan na'akeme, ri nammori lo'o ra'aheni Maya'u, 'Makromod! Makromod! Om mehe do'on am nair O naran loikaru Num nou laa ri mormorikanen. Ai modi O naram mohiyedi hayakyaka, la ai modi Makromod naran hi'i ha nammori ri kan dodo'onnala makun.'

<sup>23</sup> Ya'u walha hi na'ahenia, 'Ka auroin mi! Mala'a here, mi man hi'i ha yakyaka mani.' \* \*

\* **7:23** Mzm. 6:9 \* **8:2** Wanakunu lirna 'hi'i wa'anedi' eni herre Yunani nin wanakunu lirna 'ma'amouwedi'. Ai na'aheni onne ono nano ri Yahudi rir agame hi rauroin nahenia ri man ulik yak hi'ie 'kan mou, ai kemen morso.' Enpenia ri eniyeni mai Jesus napanak ai na'amouwedi ai, maa ainin napanpanak onne nin panaeku hi'i wa'an ai.

*Ri man derne la lernohi Yesus Nin wanakunu, ai akin namkene naise nakar man minle waku wawan  
(Luk. 6:47-49)*

<sup>24</sup> "Ende ri man derne Ainu'u wanakunu, la lernohie, ai onne akin namkene naise ri ma nauroin, de na'ariri nina nakar waku wawan.

<sup>25</sup> Lere okon, anna, noro oirulu lapa mai nediyale nakar onne, ka nawollo ono ra'ariri aile waku wawan.

<sup>26</sup> Enima ri man derne Ainu'u wanakunu eni, la kan lernohie, ai onne naise ri man pode, de na'ariri nina nakar lolo doslo wawan.

<sup>27</sup> Lere okon, anna, noro oirulu lapa mai nediyala nakar onne, nakar nadiporedi."

<sup>28</sup> Yesus wakuku horu, heri man min lolo onne mehe nanana mouwedi la aki'aki uluwakun derne Nina wanakukue,

<sup>29</sup> ono Ai kan wakuku naise hirira meser Horok Lap enihe, maa An wakuku naise ma nodi molollo.

## 8

*Yesus hi'i wa'an mo'oni man ulik yaka hi'ie*

*(Mrk. 1:40-45; Luk. 5:12-16)*

<sup>1</sup> Yesus kopur nano wo'or onneni, ri nammori lernohie.

<sup>2</sup> Lere onne mo'oni ida man ulik yak hi'ie mai Yesus kadi ein korno kalarna, na'aheni, "Papa ne'e harome,

hi'i wa'anedi ainu'u apinha ke'e."\*

<sup>3</sup> Enime'ede Jesus kemanala liman laa ri onneni, na'heni, "Ye e'e! Wa'anedi here!" Me'e'eni me'ede ri onne nina ulik yake wa'anedi.

<sup>4</sup> Horu ne, Jesus nou na'henia, "Yom konohi ri ha ma namwali o kemmu eniyeni, maa mala'a laa imam nanu leke an po'onala o kemmu, nauroin nahenia om wa'anedi me'e, la modi onum honoi kanani<sup>†</sup> mala ai leke lernohi agame nina holoor halauk eni. Hi'i onne leke namwali tanada nahenia om wa'anedi kokkoo me'e."

*Uluwakun arida man akin naili'il Yesus kokkoo*  
(Luk. 7:1-10)

<sup>5</sup> Lere Yesus rakanedi Kapernaum, Roma nin uluwakun arida mai napank Yesus pakuwale.

<sup>6</sup> Ai na'heni, "Pape, naramyakala ainu'u hophopon ida ma nakni'ir, aile ainu'u nakar. Ai ka nauroin nawollo me'e, la kemen apinha wake'e, de ya apanak hi'i wa'anedi."

<sup>7</sup> Yesus na'heni, "Wa'an, Ya'u ki num nakar leke hi'i wa'ane."

<sup>8</sup> Maa uluwakun onne na'heni, "Eih! Kan wa'an Pape ki ainu'u nakar, ono ya'u inhoi penia Pape ki ainu'u nakar! Lo'o Pape wekelle wanakunu lisir ida woro'o, ainu'u ma nakni'ir wa'anedi me'e.

<sup>9</sup> Ya auroin Papa nodi molollo hi'i wa'an ai, ono ya'u me'ene man derne nakani ri ma nodi molollo haenhi, la yo odi molollo ri namehin haenhi. I hopon ainu'u ma nasala ke'urauk, 'Mala'a here!' Hi rala'a. Ya'u polu mai, hir mai. Ya'u hopon ainu'u hophopon lolo nakar hi'i haida, hir hi'ie."

<sup>10</sup> Jesus derne nina wanakunu onneni, heheledi, de ne'el heri man lernohi onnenihe na'henia, "Loi honorok wawa'an Ainu'u panaeku ma na'ono eniyeni! Ri ma ka namwali Yahudi eniyeni, akin naili'il kokkoo! Lolo Israel raramne ka oro ri ma naise eniyeni pakromala makun.

<sup>11</sup> Lere man mai ri nammori ma ka namwali Yahudi enihe mai nano noho wali kimur noro noho wali warak leke raikoro wuku roro ik upud a'adhe Abraham, Isak, noro Yakup ra'an romun wewerre lolo onno man Makromod Lalap nodi molollo.

<sup>12</sup> Nano nonolu eni Makromod Lalap na'ono Yahudi enihe ramwali Nin ri, maa ri nammori nano hi akin ka naili'il Ai, de lere man mai An sopol hi laa paharne laa noho momohon man ko'u Ai. Lolo onne hi raherhere la apinpinha mamani."

<sup>13</sup> Kame'ede Jesus hopon uluwakun onne, "Mala'a wawa'anedi, ono ha man o akim naili'il onneni namwaliyedi me'e." Ai

\* <sup>8:4</sup> Lolo Yahudi rir agame nin holoor halauk, lere ri man ulik yak hi'ie wa'anedi, an laa nakpali imam leke po'on kemen de nauroin wa'anedi me'e, ee kaun. Po'onala Im. 14:2-32 leke mauroin rodi inhawa honoi kanani rala imam.

na'aheni onne horu nina hophopon wa'anedi me'e.

*Jesus hi'i wa'an ri nam-mori*  
(Mrk. 1:29-34; Luk. 4:38-41)

<sup>14</sup> Yesus laa Petrus nina nakar, do'on paninne maeke nakni'ir rinna manha aile namkuru onno.

<sup>15</sup> Yesus lan roulle liman me'ede, nina kini'ir onne wa'anedi. Enine namaka na'akene hanana'an Yesus na'an.

<sup>16</sup> Na'akeki lere helem, ri nammori mai Yesus rodi ri man hayakyake huhu'ur raramne noro ri ma nakni'ir leke An hi'i wa'an. An wakunu mehe, hayakyaka manin ri onnenihe raramne ramharedi, la An hi'i ri ma nakni'ir na'akeme wa'anedi.

<sup>17</sup> An hi'i ha eni na'akeme leke na'akuku na'anokor nabi Yesaya lirna ma na'ahenia,

"Ai penia na'uwhara iknik apinha wo'operi rahue la hi'i wa'an iknika kini'ir na'akeme."\*

*Kalla lernohi Yesus sus rehi*  
(Luk. 9:57-62)

<sup>18</sup> Ler ida wali'ur ri namansa minwuku Yesus herne wali-wali, de An hopon Nina man lernohi pakunohi ha'a korkore wewerre hopol laa oir lap Galilea wali enne.

<sup>19</sup> Maa, kar ha'a korkore makun, meser Horok Lapida mai Yesus na'aheni, "Papa

Meser, i raram nodi lernohi Papa laa ewi-ewi!"

<sup>20</sup> Yesus na'aheni, "La'u‡ nina ku'il aile, manu liwli-war nina wonno aile, maa Ya'u ma namwali Ri Mormori Anane, Ya a'alehe nakar leke ren warnala."

<sup>21</sup> Onne horu man lernohi ida mai Yesus na'aheni, "Pape, hurinohi ya'u ke'ede waliyala laa nakar karuwedi ainu'u papa nanumene i wali mai lernohi Papa wali'ur."

<sup>22</sup> Yesus hopon na'ahenia, "Lernohi Ya'u maman! Na'amoli ri man maki meher karu rira makie!"§

*Jesus na'alina kahi anna lapa*

(Mrk. 4:35-41; Luk. 8:22-25)

<sup>23</sup> Yesus wakunu onne horu, An ha'a laa korkore, la Nin man lernohi pakunohi enihe lernohi wewerre.

<sup>24</sup> Hir hopol rakanedi heleken, ramlilinnohi kahi anna lapa mai nalwalile korkore, de na'iheri nawali, maa Yesus namkuru mahmahan. <sup>25</sup> Enime'ede hir laa ramake, ra'aheni, "Pape, Pape, pelek mamaka! Pakuwala yai nanu, kalo'o ik maki!"

<sup>26</sup> Enime'ede Ai namaka ne'el hi na'ahenia, "Alhi'ihepe mi mamka'uk? Mi akim ka naili'il Maya'u wawa'an makun!" Yesus namriri komdere na'ahenia, "Heih! Kahi anna lapa, mamlinedi here!" Idewe

\* 8:17 Yes. 53:4 ‡ 8:20 Herre wanakunu Malay 'serigala' nair Yotowawa nin la'u'. § 8:22 Lolo lisir eniyeni Yesus wekel 'ri man maki onne', Ainin panaeku ri ma kan lernohi Ai. Hi kemenhe kan maki makun, maa rira roh man maki. Ende Yesus na'ahenia, 'na'amoli ri ma kan lernohi Ai meher karu rir maki.'

kahi anna lapa onne namrina  
namkaiyedi.

<sup>27</sup> Hir do'on ha ma namwali  
onne hir hehel rehi, la ida  
ma na'ukani ida na'ahenia,  
“Leher eni inhoi, penia kahi  
anna lapa derne nakani Aie?”

*Yesus hi'i wa'an ri woro'o  
man hayakyake huhu'urle  
raramne*

(Mrk. 5:1-20; Luk. 8:26-39)

<sup>28</sup> Yesus noro Nin man  
lernohi pakunohi enihe  
rakanedi ro ne, rala'a on-  
nida na'urani kota Gadara.  
Lolo onne mo'oni woro'o  
aile hayakyake hu'u'hu'r  
raramne. Hi radedem minle  
ku'il man aile makileke  
raram. Hayakyake hi'i  
woro'ohe ra'iseri la ailanna  
wake'e penia ri na'akeme  
ramka'uk lolo kalla man lolo  
onne. Hi ramhara ku'il onne,  
mai pakromo noro Yesus.

<sup>29</sup> Hayakyaka man hu'ur  
raramne enihe wakaukau,  
“Makromod Lalap Anan O!  
Onum panaeku inhawa noro  
mayai? Yom ma'o'o mayai!  
Kan rakan Makromod Lalap  
Nina lere alam hukum mayai  
makun!”

<sup>30</sup> Lere onne wawi ukun  
lapida aile kan ko'uwala  
maha ranoin ya'ane.

<sup>31</sup> Hayakyaka man hu'ur  
raram onnenihe rapanak  
Yesus ra'aheni, “Lo'o ho-  
pon mayai mamhara ri  
eniye nihe, hurinohi yai laedi  
wawi ukun onne raramne.”

<sup>32</sup> Yesus na'aheni, “Wa'an,  
mamhara here!” Ende  
hayakyak onnenihe laedi  
wawi onnenihe raramne,

penia wawi rahu onne lari  
lolo wo'or laa yawa idewe  
wauwedi laa oir lapa Galilea  
raram de keper mouwedi.

<sup>33</sup> Enime'ede ma nadiyaka  
wawi onnenihe lari laa leke  
raram konohi ri na'akeme  
ha wo'ira na'akeme ma  
namwali noro ri woro'o man  
hayakyaka huhu'ur raram  
onneni.

<sup>34</sup> Ende leke raram on-  
neni na'akeme ramhara  
lar pakromo noro Yesus.  
Hi ramka'uk, de rapanak  
rehrehi lewlewen, “Wa'an  
rehi Pape laedi onno name-  
hin here! Yon min lolo eni  
me'e.”

## 9

<sup>1</sup> Ende Yesus noro Nina  
man lernohi pakunohi enihe  
ha'a korkore hopol laa oir  
lapa wali enne wali wali'ur  
laa Nin leke miminlole.\*

*Yesus hi'i wa'an ri ma  
naplu'uk nap'eker*

(Mrk. 2:1-12; Luk. 5:17-26)

<sup>2</sup> Lolo onne, ri ida woro'o  
le'ule'u mo'oni ma naplu'uk  
nap'eker ida mai Yesus. An  
po'on ri onnenihe akin naili'il  
wake'e, de ne'el ri man ap-  
inha onne na'ahenia, “Pa'e,  
yon mamka'uk! Ya a'ohu  
ahaledi num dohohala me'e.”

<sup>3</sup> Lere onne, meser Horok  
Lap ida woro'o aile man  
derne lirna onneni, de roro  
akin wakunu, ra'aheni,  
“Ri eni na'ihoru na'idaru  
Makromod Lalap!”†

<sup>4</sup> Maa Yesus nauroinedi hi  
honorok akin, de na'ukani  
na'ahenia, “Alhi'ihepeni

\* <sup>9:1</sup> Ler onne Yesus Nin miminlole ai leke Kapurnaum. Po'onala Mat. 4:13, 8:5.

† <sup>9:3</sup> Po'onala Mrk. 2:7; Luk. 5:21.

mim paeku honorok yaka mi raramne?

<sup>5</sup> Ewi man sus rehi? Ya a'ohu ahala ri eniyeni nin dohohala, ee Ya'u hi'i ai nala'ala'edi?

<sup>6</sup> Ya'u hi'i wa'an ri eni leke mi mauroin mouropo naheenia Ya'u eni ma namwali Ri Mormori Anan,<sup>‡</sup> la Yo odi molollo lolo noho wawan a'ohu ahala ri nina dohohala!" Enime'ede Jesus hoppo ri ma naplu'uk nap'eker onne, "Mamakedi! Modi num namkuru onno, wali laa num nakar here!"

<sup>7</sup> Ai namaka kikan nina namkuru onno nala'a nina nakar me'e.

<sup>8</sup> Enime'ede heri onne ramka'uk wake'e, ra'uli rasa'a Makromod Lalap ono Ai naledi Nina molollo man lewlewen ri mormori me'e.

*Jesus napolu Matius mai lernohi*

(Mrk. 2:13-17; Luk. 5:27-32)

<sup>9</sup> Jesus namhara lolo onne nala'ala'a, An po'on ri ida naran Matius naikorkoro lolo onno rodi ra'uk paipair. Ai napolu na'ahenia, "Mam lernohi Ya'u!" Idewe ai lan lernohi Jesus.

<sup>10</sup> Ka nalo'ol Matius lariyala Jesus noro Nin man lernohi pakunohi rala'a nina nakar, ra'ak. Man ra'uk paipair nammori roro ri namehin ma nin hini'i wenewhe namehiyala,<sup>§</sup> mai raikoro wuku roro Jesus ra'ak wewerre.

<sup>11</sup> Enla ri Parisi ida woro'o po'on onneni, de hi

ra'ukani Yesus Nina man lernohi pakunohi ra'aheni, "Hi'ihepenia minim Meser eni na'ak wewerre noro man ra'uk paipair noro man hi'i dohohala onnenihe?"

<sup>12</sup> Jesus dederne rira na'ukankani onne de walha na'ahenia, "Ri ma kan apinha, ka nanoin ma na'inapin, maa ri man apinha penia nanoin ma na'inapin.

<sup>13</sup> Ken koklolo ma'inau Makromod Lalap Lirna Wawan ma na'ahenia, 'Ya'u raram nodi mi ida man kukul aki man wa'an ida, narehi mala honoi kanani Maya'u.'

Ka'u mai apolu ri man hi'i ha ma namlolo mamani, maa Ya'u mai apolu ri man hi'i dohohala, leke hir lernohi Ya'u."\*

*Jesus nornoro man lernohi pakunohi makun, hi ka ra'aluli kemen ka ra'ak romun*  
(Mrk. 2:18-22; Luk. 5:33-39)

<sup>14</sup> Enla Yohanis man ulutade eni, ainina man lernohi pakunohi enihe mai Jesus ra'ukani, "Alhi'ihepe ai moro ri Parisi ma'aluli kemen ka ma'ak momun, maa Num man lernohi pakunohi enihe, kae?"

<sup>15</sup> Jesus walhe, "Emene ik min hohoo ida, popolu lalariyala ka ra'ak romune? Kan wa'an hi akin sus la ka ra'ak! Mo'oni man ho eni nornorhe makun, de hi ra'ak romun. Enimaq rakan orekiyedi, ri namehin mai

<sup>‡</sup> 9:6 Ri Mormori Anan onne namnenehe Kristus man Makromod Lalap kikan namwali Rai. <sup>§</sup> 9:10 Ri Yahudi po'on lewen ri onnenihe ono hi rauroin rir honowok noro rir hini'i wenewhe namehiyala la namwali dohohala. \* 9:13 Hos. 6:6

rala man ho eni nano hi leken kalarne nanumene hi ra'aluli kemen ka ra'ak."

*Yesus wakuku, "Yon rawa'aha Yahudi nin wanakuku lo'olo'ole noro Ainu'u wanakuku worworu eni"*

<sup>16</sup> Yesus nala wanakunu naho'ok na'heni, "Ri ka nadedem tapil nainair lo'olo'ol nodi tapi a'un worworu, kalo'o tapi a'un rodi tatapil onne hi'i riki nainair onne eren lalapa."

<sup>17</sup> Ai na'heni ida wali'ur, "Ri ka nadedem nala anggur worworu halle sak ulik lo'olo'ole, kalo'o anggur worworu eni hi'i sak ulik onne napriki. Maa ri nadedem nala anggur worworu halle sak ulik worworu, leke yon sak ulik napriki, de anggur worworu halle."

*Yesus na'amori wali'ur Yairus anan, la hi'i wa'an maeke man rara waeue*  
(Mrk. 5:21-43; Luk. 8:40-

<sup>56)</sup>

<sup>18</sup> Yesus wakunkunu makun ne, Yahudi rir man panulu ida mai, kadi ein korno Yesus kalarna. Ai napnak an'anhedi na'henia, "Pape, ya an'u maekida eni nanu maki, maa Papa ki nakar ke'e de, rouwalle leke mori wali'ur."

<sup>19</sup> Enime'ede Yesus noro Nina man lernohi pakunohi enihe rambra nakar onne, rala'a. Mo'oni woro'o makan tokedi lernohi Ai wakaukau ra'heni, "Daud upun anan O, maramyakala mayai ke'e!"

<sup>20-21</sup> Kar rakan nina nakar makun, maekida lolo kili'urne mai na'urani Yesus. Ai onne rara waeue anna idaweli woro'o raram me'e. An paeku nahenia lo'o an tukulala Yesus Nina rain

mehe, nin apinhe wa'anedi. Ende ai lan rouwalle Nin rain ki'il.

<sup>22</sup> Yesus wali kili'ur do'onedi, de na'aheni, "Ya an'u, ma'alapedi o akim, o akim naili'il Ya'u, de num apinha wa'anedi me'e." Idewe nina apinha wa'anedi.

<sup>23</sup> Yesus rakanedi uluwakun kerei onne nina nakar ne, An po'on ri man penpenu onnenihe, ma nou poloit, ma naherhere, la rusu arra wake'e.

<sup>24</sup> An hopon hi na'ahenia, "Laedi paharne! Tataneni kan maki, maa namkuru mehe!" Hir derne Ai lirna onneni, na'akeme ralauwedi.

<sup>25</sup> Heri onnenihe na'akeme laedi paharne nanumene An laa tatan onne nin kamar raram roulleliman. Idewe an moriyedi, namaka, la namririyyedi.

<sup>26</sup> Enpenia ha eniyeni pe'eredi lolo ri manina noho onne na'akeme.

*Yesus hi'i wa'an ri maktoke woro'o*

<sup>27</sup> Yesus noro Nina man lernohi pakunohi enihe rambra nakar onne, rala'a. Mo'oni woro'o makan tokedi lernohi Ai wakaukau ra'heni, "Daud upun anan O, maramyakala mayai ke'e!"

<sup>28</sup> Yesus rakan nakar An miminle, laedi romleher ne, maktoko woro'o onnenihe lernohie laa raram haehni. Yesus na'ukani hi na'ahenia, "Hi'ihehewi? Mi akim naili'il Yo odi molollo hi'i mi makam mouwedi?" Hir walhe, "Ya, ai akim naili'il Pape."

<sup>29</sup> Enime'ede Yesus kemenala liman makanhe, na'aheni, "Ya'u hi'i mi makan

wa'anedi, ono mi akim naili'il Maya'u kokkoo."

<sup>30</sup> Me'e'eni me'ede hi makan mouwedi, la Yesus nou an'anchedi hi na'aheni, "Yono konohi ri ha ma namwali mi eniyeni."

<sup>31</sup> Maa woro'ohe raderre radaul panaeku onneni ri manina noho onne na'akeme.

*Yesus hi'i wa'an ri man hakukuwedi*

<sup>32</sup> Woro'ohe rala'ala'a ne, ri namehin rodi ri ida man hayakyake huhu'ur raramne de hakukuwedi, mai Yesus leke hi'i wa'an.

<sup>33</sup> Ende Yesus nohiyedi hayakyaka man hu'uhu'ur ri onne raramne, idewe nau-roin wakunuwedi. Heri lolo onne hehel rehi, la ida ma ne'el ida na'ahenia, "Rakan lere eni ik kak do'onala ha ma namwali heheni lolo Israel makun!"

<sup>34</sup> Maa ri Parisi man aile lolo onne ra'aheni, "Hayakyak Makromon nala molollo Ai, penia Ai nodi molollo nohi hayakyaka."

*Yesus na'aheni noho ihin ennen nammori, maa ma na'ili nadai tarana mehe*

<sup>35</sup> Yesus laliwewer leke-leke noro kota-kota nammori. An laa Yahudi rira kerei raram loikaru Makromod Lirna Wawa'an eni man konohi hi'ihehewi Makromod Lalap nodi molollo ri mormori. An hi'i wa'an ri ma nakni'ir noro man lernala apinha warna-warna na'akeme.

<sup>36</sup> An po'on heri rahu onnenihe, Ai raram penu

rehi, ono hir mehe ili'ili mehe lohloho, naise pipduma ma na'alehe nina man huri. \*

<sup>37</sup> Enime'ede Yesus ne'el Nina man lernohi pakunohi enihe na'ahenia, "Noho ihin ennen nammori, maa, ma na'ili nadai tarana mehe.

<sup>38</sup> Ende mapanak Orkirenni, Makromod Lalap, leke nala man howok mai na'ili nadai Nina kirna raramne."

## 10

*Yesus nala molollo Nina ri idaweli woro'o*

(Mrk. 3:13-19; Luk. 6:12-16)

<sup>1</sup> Yesus polu Nina man lernohi pakunohi idaweli woro'o maiwuku, leke nala molollo hi rohi hayakyaka, la hi'i wa'an ri ma nakni'ir noro man lernala apinha warna-warna na'akeme.

<sup>2</sup> Ri idaweli woro'o ma namwali Nin hophopon onnenihe naran:

Simon (rapolu Petrus haenhi) noro mo'oniwalla Andreas,

Yakobus noro mo'oniwalla Yohanis (woro'ohe Zebedeus ananhe).

<sup>3</sup> Pilipus noro Bartolomeus, Tomas noro Matius (Matius ma nadedem ra'uk paipaire),

Yakobus (Alfeus ananne) noro Tadeus,

<sup>4</sup> Simon (ai eni namhene noho Roma nodi molollo Israel), noro Yudas Iskariot (ma na'olu Yesus).

*Yesus nala honowok Nin ri idaweli woro'o*

(Mrk. 6:7-13; Luk. 9:1-6)

\* **9:36** Bil. 27:17; 1Rai 22:17; 2Taw. 18:16; Yeh. 34:5; Zak. 10:2; Mrk. 6:34

<sup>5</sup> Yesus hopon ri idaweli woro'o enihe laa manin Israel. An nou hi na'ahenia, "Yono mim laa ri ma ka namwali Yahudi, maa mala'a ri Yahudi mehe. Yon laa kota-kota lolo Samaria haenhi,

<sup>6</sup> maa mala'a ik walin, Israel upun ananhe nolu. Hi raisa pipduma ma ka nau-roin kalla me'e, ono ra'alehe man huri.

<sup>7</sup> Lam loikaru mouropo ma'aheni, 'Lere alam Makromod Lalap nodi molollo ri mormori lolo noho wawan na'uraniyedi me'e.'

<sup>8</sup> Lam hi'i wa'an ri ma nakni'ir, ma'amori ri man makiyedi, hi'i wa'an ri man ulik yak hi'ie, la mohi hayakyaka man hu'uhu'ur ri raramne. Ya ala molollo mi hi'i ha wo'ira na'akemeni, maa ka apanak wanalhan ida, de mi lam hi'i ha wawa'an eni, yono mapanak wanalhan haenhi.

<sup>9</sup> Yono modi kupan mahe, kupan pere, ee kupan name-hin.

<sup>10</sup> Yono modi panaku onno, nainair, pakpak ei me au ke'eke'en, ono wa'an rehi mi man howok eni lernala minim hewhewek nanair nano ri man mim papaku eni.

<sup>11</sup> Rakan leke ida, manoin ri man akin wa'an kokala mi leke minala nina nakar hehen nanumene mamhara wali'ur.

<sup>12</sup> Mim rakan lolo nike laa raram, mapanak Makromod Lalap nodi nala hi.

<sup>13</sup> Lo'o hir kokala mi wawa'anedi, hir lernala

rere'e haharu onne, maa lo'o hi akin yaka de kar kokala mi, mapanak Makromod Lalap nala wali'uredi minim lir napanak onneni.

<sup>14</sup> Lo'o lolo nakar me lolo kote kar kokala mi, mamharedi lolo onne, disnedi elim'o hapu man aile mi ein rarame.

<sup>15</sup> Loi honorok wawa'an Ainu'u panaeku ma na'ono eniyeni: Rakan lere Makromod Lalap hukum ri na'akeme, manin kota onne lernala hunukum man werek narehi manin kota Sodom noro Gomora nonolu eni." \*

*Ma'akenkene mi akim lernala wewerek pananaka*

(Mrk. 13:9-13; Luk. 21:12-17)

<sup>16</sup> Yesus nala nounaku Nina ri idaweli woro'o enihe wali'ur na'ahenia, "Nakinem men ki mi, ono I hopon mim laa mamkene noro ri man ailanna naise pipduma man maru min lolo ahu merwui raram. Ende madiyakyaka mi kemen leke mi maise nee ma nauroin nahala kemen nano ha yakyaka, maa madiyaka leke mi akim wa'an mamani naise manu merpati.

<sup>17</sup> Ende ma'akenkene mi, ono ri lo'o kele mi rodi laa makpali agame nin man ho'ok kail enihe, la ri lo'o riuk rerhe mi lolo Yahudi rira kerei-kerei haenhi.\*

<sup>18</sup> Ri lo'o kele mi rodi laa makpali rir man panulu noro rir rai-rai kalarna, ono

\* **10:15** NN. 19:24-28 \* **10:17** Lolo Yahudi rira kerei man aile leke-leke, rira man ho'ok kail aile haenhi. Ri man hi'i yaksala ka rodi la polisi, maa rodi laa agame nin man ho'ok kail mehe.

mim lernohi Ya'u. Lere onne Makromod Lalap nala leken paharin loikaru Lirna Wawa'an eni hi noro ri ma ka nauroin Ai makun.

<sup>19</sup> Lere hir kele mi, yono mamka'uk walha rira na'ukankani, ono Makromod Lalap mehe nala wanalhanne ki mi.

<sup>20</sup> Ende lere onne yon mamka'uk ono inhawa man mim wakunu, ka mehem wakunu, maa mi Ammu Nin Roh mehen hari mi honorok akin moro hi wakunu.

<sup>21-22</sup> Lere onne ri nammori kar suk mi, ono mim lernohi Ya'u. Ri mehen huri we'er mo'oniwalla ri nesne. Onne namwali noro papa noro ananne haenhi. Enla tatana lalapanan kar derne rakani hi inna aman me'e, de huri laa rin nesnehe. Maa inhoi akin namkene naili'il Ya'u rakan lere onnneni horu, an lernala or'ori dardari ma kan horu.

<sup>23</sup> Lo'o mim laa kotida, la hir hi'i yakyaka mi, mamharedi lari laa kote namehin. Horhorok Ainu'u nou ma na'ono eniyeni: Mi kam laa Israel nin kota na'akeme horu makun, Ya'u ma namwali Ri Mormori Anan maiyedi me'e.

<sup>24</sup> Pudpude kan kulu narehi nin meser, la hophopon wahwahane kan kulu narehi makromon.

<sup>25</sup> Ha man wa'an, pudpude nin hini'i wenewhe namnenehe nin meser, la hophopon wahwahan nin hini'i wenewhe namnenehe noro makromon. Lo'o hir

waki Ya'u ma namwali uluwakun nakar raramne naran Beelzebul, Hayakyak Makromon onne, Ainu'u nakar raramne lo'o lernala naran man yaka narehi."

*Mamka'uk Makromod Lalap, yon mamka'uk ri mormori*  
(Luk. 12:2-7, 12:8-9)

<sup>26</sup> "Enimaayono mamka'uk ri ma na'okul minim loloi kakaru eni, ono lere man mai ha man rin suwsuwar lere eniyeni na'akeme ralhari mouwedi.<sup>†</sup>

<sup>27</sup> Ende inhawe Ya'u konohi mi aimehi, lam loikaru ri na'akeme leke derne rauroin haenhi. Inhawa man Ya alpupu mi kilinum, lam wakau lolo nakar-nakar leke heri derne rauroin.

<sup>28</sup> Yon mamka'uk ri man suk nesne mi. Hi rodi molollo resne ri ihin kemen mehe, maa ka rodi molollo resne ri hamaranne sopol laa kawali pire ai porom raram.

<sup>29</sup> Nadedem rin na'olu nurn woro'o wella lo'o rupei ida mehe, maa lo'o ik Amad, Makromod Lalap kan huri we'er nurn onne makun, mahaku ka nadiyaur.

<sup>30</sup> Makromod Lalap penia nauroinedi minima muruk lawanne me'e.

<sup>31</sup> Ende yono mamka'uk, ono Ai naramyaka mi narehi nalewen nurn onnnenihe.

<sup>32</sup> Inhoi na'aheni ai namwali Ainu'u ri lolo ri

<sup>†</sup> **10:26** 'Ha man rin suwsuwar lere eniyeni' onne wekel 'ha wo'ira na'akeme man konohi ri hi'ihehewi Makromod Lalap nodi molollo ri mormori.' Enpenia Yesus na'aheni, 'Yom mamka'uk ri ma na'okul minim loloi kakaru eni.'

leken kalaruna, Ya'u konohi Ya Am'u man aile a'am raram, 'Ai onne lernohi Ya'u.'

<sup>33</sup> Maa inhoi wiuk namhene Ya'u lolo ri morimori leken kalaruna, Ya'u wiuk amhenedi ai lolo Ya Am'u man aile a'am raram kalaruna haenhi."

*Inhoi-inhoi lernohi  
Yesus lernala apinpinha  
wo'operperi*

(Luk. 12:51-53, 14:26-27;  
Mrk. 9:41)

<sup>34</sup> "Yom pene'ek Ya'u mai noho wawan odi moiliwi mahuwele. Ka! Ya'u mai eni hi'i ida ma nasesi na'ara noro ida.

<sup>35-36</sup> Ya'u mamai eni hi'i nakar raramne ida man rohon ara noro ida. Hir hi'i ara ono heruwali lernohi Ya'u, heruwali ka. Ende mo'oniyana kan derne nakani aman, maekana kan derne nakani inna, la anan panin maeke kan derne nakani paninne maeke.\*

<sup>37</sup> Inhoi naramyaka inne noro aman narehi Ya'u, la inhoi naramyaka anan narehi Ya'u, ai onne ka namwali Ainu'u ri, ono hini'i onne ka nahuwa'an Makromod Lalap akin.

<sup>38</sup> Inhoi namhene lernala apinpinha la namhene maki‡ leke lernohi Ya'u, ai onne ka namwali man lernohi Ya'u, ono hini'i onne ka nahuwa'an Makromod Lalap akin haenhi.

<sup>39</sup> Inhoi namka'uk ihin kemen maki, de nasala kerk-erhe nin morimori aimehi, ai onne kan lernala or'ori dardari ma kan horu eni.

Maa inhoi hurinohi Makromod Lalap nodi molollo nin morimori, kade ihin kemen maki, ai onne lernala or'ori dardari ma kan horue.

<sup>40</sup> Inhoi kokala mi, an kokala Ya'u haenhi, la inhoi kokala Ya'u, an kokala Makromod Lalap man hopon Ya'u mai eni.

<sup>41</sup> Inhoi kokala nabi ono ai namwali ma nodi Makromod Lalap Lirna kokkoo, Makromod Lalap herre walha nin hini'i man wa'an onne namnenehe noro nabi onne haenhi. Enla inhoi kokala ri man wa'an ono ri onne akin mou, Makromod Lalap herre walha nin hini'i onne namnenehe noro ri man wa'an onne.

<sup>42</sup> Loi honorok wawa'an Ainu'u panaeku ma na'ono eniyeni: Inhoi paku ri yakyak halhala ono an lernohi Ya'u, Makromod Lalap herre walha nin hini'i wawa'an onne, kade ai nala oir lali'oir raram mehe nomun."

## 11

*Yesus na'uli Yohanis nin honowoknair*

(Luk. 7:18-35)

<sup>1</sup> Yesus nounaku Nina man lernohi pakunohi idaweli woro'o enihe horu, hi rahina'ar. Enla An laa loikaru Makromod Lalap Nina nou eni lolo leke-leke ma na'uranrani lolo onne.

<sup>2</sup> Lere onne Yohanis man ulutade ri aile bui raram. An derne ha wo'ira na'akeme Kristus (Mesias) hihi'i eni ne, an hopon nina man lernohi ri ida woro'o

\* **10:35-36** Mik. 7:6 ‡ **10:38** Ee, 'Inhoi namhene na'uwaru nin au kekiyowok la lernohi Ya'u,...'

<sup>3</sup> laa ra'ukani, "Pape pena man Makromod Lalap nouwedi mai noho wawan, ee am newek ri namehin?"

<sup>4</sup> An walhe na'henia, "Wali here! Lam konohi Yohanis inhawe mi mehem derne la mehem do'on:

<sup>5</sup> Ri man makan tokedi, makan mouwedi;

ri ma ka nauroin nala'a, nala'ala'edi;

ri man ulik yak hi'ie, wa'anedi;

ri man rohedi, derne wali'uredi;

ri man makiyedi, mori wali'ur;

la Makromod Lalap Lirna Wawa'an eni rodi laa loikaru ri ma na'alehe naulinu.\*

<sup>6</sup> Konohi ai haenhi na'henia, 'Ri ma namkene akin naili'il Ya'u, ai akin nahuwa'anedi.' "

<sup>7</sup> Yohanis nin man lernohi onnenihe rala'edi ne, Jesus wakunu Yohanis nina hini'i man wa'an laa heri onne. Ai na'heni, "Minim panaeku inhawa mim laa noho mamun ma napro'uk leke derne Yohanis wakukue? Lo'o mim laa leke po'on ri ma akin ka namkene naisa penek larlari man anna huhue?

<sup>8</sup> Lo'o mi raram nodi lam po'on inhawa lolo enne? Ri man nair nainair ma'aruru harome? Ka! Ri man nair nainair ma'aruru nadedem min rai nina nakar!

<sup>9</sup> Ende hi'ihepenia mi raram nodi laa enne? Lo'o mi raram nodi lam po'on nabie? Namlolo kokkoo mim

do'onedi nabi, maa nabi onne namwali nabi man kulu narehi nabi nadedem!

<sup>10</sup> Nonolu eni Makromod Lalap wekel Yohanis ma namwali Nin hophopon eni lolo Horok Lap na'henia, 'Ya'u hopon Ainu'u ma nodi Lir'u nolu mai na'ahari kalla leke Om lole.' \*

<sup>11</sup> Yesus na'heni wali'ur, "Loi honorok wawa'an Ainu'u panaeku ma na'ono eniyeni: Rakan lere eni, lolo noho wawan na'akeme ri kaale man kulu narehi Yohanis man ulutadeni. Maa nano lere eni ri na'akeme man Makromod Lalap nodi molollo, kade hi onne tana rehi, hir lernala rere'e haru narehi ai.

<sup>12</sup> Nano lere Yohanis loikaru panaeku ma na'ono hi'ihehewi Makromod Lalap nodi molollo ri mormori rakan lere eniyeni, ri man ailanna rodi rurilai rahehe ewekala kawala Makromod Lalap Nin molollo ri mormoriyaneni.\*

<sup>13</sup> Nano nonolu rakan Yohanis nin mamai eni, Musa noro nabi-nabi rir horok na'akeme konohiyedi kokkoo inhawa ma namwali lere Makromod Lalap nodi molollo ri mormori.

<sup>14</sup> Lo'o mi me'e kokale, Yohanis onneni penia nabi Elia man ra'anouwedi nano nonolu me'e, de mi akim naili'il, leke! \*

<sup>15</sup> Inhoi kilinna aile, derne nakani!"

\* **11:5** Yes. 35:5-6, 61:1 \* **11:10** Mal. 3:1 \* **11:12** Napa'ahne namehin aile: Nano Yohanis nina lere dedesne an loikaru panaeku ma na'ono hi'ihehewi Makromod Lalap nodi molollo ri mormori rakan lere eni, ri nammori rahehe ramwali Makromod Lalap Nin ri. \* **11:14** Mal. 4:5

*Yahudi enihe kar kokala  
Yohanis lirna man werek  
noro idewe Yesus Lirna ma  
nuhuwa'an ri akin*

<sup>16</sup> "Ya aho'ok ri mormori  
ku eniyeni noro inhawe?  
Hi raisa tatana man ha'ar  
ramwali muku woro'o ma  
naikoro ra'aromo lolo pasar  
raram,

<sup>17</sup> la muku ida napopolu  
muku namehin ra'aheni, 'Ai  
mahinara hanara man hi'i ri  
nahere, maa mi mamhene  
mahere moro mayai! Enla ai  
mou poloit modi mahinara  
soksok murmura, maa mi  
mamhene pe'uk waur moro  
mayai.'

<sup>18</sup> Ri ku eniyeni namnehe  
noro onne. Lere Yohanis mai  
wakuku ri, ai ka nomun arak,  
la lere romromo ka na'ak. Hi  
ra'aheni, 'Ai onne hayakyaka  
hu'uhu'ur raramne.'

<sup>19</sup> Enla Ya'u ma namwali Ri  
Mormori Anan mai, Ya a'ak  
Yo omun mamani, maa hi  
ramhene kokala Ya'u haenhi  
la ra'aheni, 'Po'onala ri onne!  
An suk na'ak nammori,  
nomun manha mamani, Ai  
nawaaur noro ri man ra'uk  
paipaire, la minwuku noro ri  
man hi'i dohohala mamani!'  
Kade hi ramhene kokala  
Maya'u, maa ik kauroin  
Makromod Lalap Nin hon  
orok panaeku namlolo, ono  
ik do'on honorok panaeku  
onne ihin ennen."

*Makromod Lalap hukumesne  
ri ma nodi nina kalla aimehi  
(Luk. 10:13-15)*

<sup>20</sup> Onne horu, Yesus  
dadiyala ri Yahudi man  
minle kota-kota lolo Galilea,  
ono An hi'i tanada nammori

ri kan dodo'onnale makun,  
maa hi ramhene herre rir  
morimori, lernohi Makro  
mod Lalap Nin panaeku.

<sup>21</sup> Ai nawuhur hi na'aheni,  
"Mi manin Korazim noro  
Betsaida, mim mayo'o. Ya'u  
hi'iyedi tanada nammori ri  
kan dodo'onnala makun mi  
herne kalarna, maa kam  
kokala Maya'u. Lo'o Ya'u  
hi'i tanada rahu onne lolo  
ri manina kota Tirus noro  
Sidon (ri ma ka namwali  
Yahudi enihe), hir nairedi  
homnono yak, loiyedi apu  
hi uluwakun leke namwali  
tanada hir herredi rira mo  
rimori ma ka namlolo me'e,  
la derne rakani Makromod  
Lalap Nin panaeku me'e.\*

<sup>22</sup> Horhorok, rakan lere  
alam Makromod Lalap  
naho'ok nakail ri na'akeme,  
ri manina kota Tirus noro  
Sidon rira hunukum nam  
rana narehi mi!

<sup>23</sup> Mi manin Kapernaum,  
mi mauroin lo'o ra'uli rasa'a  
mi lolo a'am raram? Ka!  
Makromod Lalap sopol mi  
laa kawali pire ai porom  
raram. Ya'u hi'iyedi tanada  
nammori ri kan dodo'onnala  
makun lolo mi kalarum,  
maa mi mamhene Maya'u.  
Nonolu eni lo'o Sodom do'on  
Ya'u hi'i ha lewlewen onne  
lolo hi, hir herredi rira  
morimori de rorroro ika  
makun.

<sup>24</sup> Ende horhorok, rakan  
lere Makromod Lalap  
naho'ok nakail ri mormori  
na'akeme, Ai nala hunukum  
mi man werek narehi Sodom  
onne."

*Yesus lariyala ri na'akeme,*

\* **11:21** Yes. 23:1-18; Yeh. 26:1–28:26; Yl. 3:4-8; Ams. 1:9-10; Zak. 9:2-4

*"Mai leke Ya a'aranala minim yodiwara"*

(Luk. 10:21-22)

<sup>25</sup> Me'e'eni me'ede Jesus hi'i lir napanak Aman na'heni, "Papa, Makromod ma nodi molollo a'am noro noho wawan na'akeme, Ya apanak trimkasi nammori ono Om kukul ha wo'ira ri ma nin woroin kan kuku kan nokor, maa Om suwarala ha wo'ira nano orworoin roro ma nauroin ha wo'ira lolo noho wawan enihe."

<sup>26</sup> Pape, Num hini'i onne penia ma nahuwa'an O akim."

<sup>27</sup> Jesus na'heni heri wali'ur, "Ha wo'ire na'akeme Ya Am'u naledi Ya'u me'e. Ya Am'u mehe nauroin Ya'u ma namwali Ananne, ri namehin ka nauroin Ya'u, la Ya'u mehe auroin Ya Am'u. Enla inhoi-inhoi Ya ala woroin, hi rauroin Ya Am'u haenhi.

<sup>28</sup> Mi eniyeni man maha rehi la ma na'uwara yodi wewerek, mai leke I huriyedi mi nano minim yodi wewerek onne.

<sup>29</sup> Ma'uwara yodiwara Ya ala ki mi mehe. Mapanak Ya'u wakuku mi, leke mi ulla kawa'al namranedi, ono ka odi lira apipinha, ka'u holi kukulu lalap, la Ya ala aki ma namkene ki mi. \*

<sup>30</sup> Honowok Ya ala ki mi eni kan werek, la yodiwara Ya ala mi eni namrana."

## 12

*Jesus nodi molollo konohi ri hi'i inhawa Alam Renren*

*Warwarne*

(Mrk. 2:23-28; Luk. 6:1-5)

<sup>1</sup> Lerida, Yahudi nina Alam Renren Warwarna, Jesus noro Nina man lernohi pakunohi enihe rala'ala'a lolo gandum kirna ida. Hir rala'a lolo kirna onne, Nin man lernohi pakunohi enihe ramlara de reku gandum ra'an.\*

<sup>2</sup> Parisi enihe do'on hi reku gandum ra'an ne, re'el Jesus, "Po'onala Num man lernohi enihe! Iknik agame nina keneri hono'ok kan huri ika howok Alam Renren Warwarna, de kan wa'an hir howok reku gandum lere eniyeni."

<sup>3</sup> An walhala hi, "Lo'o mim lesedi Horok Lap Lirna man konohi inhawa namwaliyedi nonolu lere Daud noro nin man lernohi enihe ramlara, ee kaun?"

<sup>4</sup> Hi ramlara, de Daud laa Tenda ma namwali Makromod Lalap Nin miminbole raram, nala roti man luli hi ra'an. Roti onne nadedem rodi hoikani Makromod Lalap. Ende rir hini'i onne larlewenedi rir agame nin holoor halauk man huri imam mehe ra'ane, ri namehin ka. \*

<sup>5</sup> Lo'o mi kam lesala agame nina keneri hono'ok makun man konohi hi'ihehewi nonolu imam enihe howok mamani lolo Makromod Lalap Nin Romleu Lape kade rir lere nedille Alam Renren Warwarna. Rir hini'i onne larlewenedi keneri hono'ok me'e, maa kar sala.

\* 11:29 Yer. 6:16

\* 12:1 Ul. 23:25

\* 12:3 1Sam. 21:1-6

\* 12:4 Im. 24:9

<sup>6</sup> Ya'u konohi mi, ri ida ai lolo eni man kulu narehi nano Makromod Lalap Nina Romleu Lap eniyeni.

<sup>7</sup> Lolo Horok Lape raram Makromod Lalap na'aheni, 'Ya'u raram nodi mi ida man kukul aki man wa'an ida narehi nano mi mala honoi kanani Maya'u.' Lo'o mi mauroinedi panaeku onne wawa'an me'e, mi kam hukum ri ma kan sala enihe.

<sup>8</sup> Ya amwali Ri Mormori Ananne, eni penia Yo odi molollo hopon rin hi'i inhawa-inhawa Alam Renren Warwarna."

*Yesus hi'i wa'an ri man liman wali maki*  
(Mrk. 3:1-6; Luk. 6:6-11)

<sup>9</sup> Yesus namhara lolo onneni, An laa Yahudi rira kerei raram.

<sup>10</sup> Lolo onne mo'oni ida aile liman wali makiyedi. Ri ida woro'o namehin aile haenhi maha ranoin Yesus Nina sale, de ra'ukani, "Hi'ihehewi, iknik holoor halauk huri ika hi'i wa'an ri Alam Renren Warwarna, ee ka?"

<sup>11</sup> An walha na'ahenia, "Nano mi eniyenihe, lo'o ri ida nina pipi waku ida nediyawedi laa ku'il raram lolo Alam Renren Warwarna, orpipi lo'o nahehe nala mai paharne, ee ka?

<sup>12</sup> Ri mormori peni wa'an narehi ha mormori, de kan hi'i haida ika hi'i ha man wa'an lolo Alam Renren Warwarna."

<sup>13</sup> Horu ne, Yesus hopon ri man liman wali maki

onne na'aheni, "Ma'aloledi o limmu." Ri onne na'alolo liman ideweni ne, wa'anedi naisa liman walie.

<sup>14</sup> Enimaa ri Parisi enihe do'on ha ma namwali onne, hi ramhara laa paharne wakunu wuku leke resne Yesus.\*

*Makromod Lalap nilyedi  
Yesus namwali Nina hophopon*

<sup>15</sup> Yesus nauroin rira panaeku yakyaka penia Ai namhara lolo onne, la ri nammori lernohi. An hi'i wa'an ma nakni'ir na'akeme,

<sup>16</sup> la komdere hi, "Yono konohi ri, Ya'u eni inhoi."

<sup>17</sup> Ainin hini'i onne na'akuku na'anokor in-hawa Makromod Lalap na'aheniyedi lolo nabi Yesaya,

<sup>18</sup> "Ai eni penia Ya'u nilyedi namwali Ainu'u hophopon. Ya aramyaka la Ya akin nodi nale. Ya ala Ainu'u Roh Ai, la Ai penia man loikaru Ainu'u hono'ok kanail ma namlolo laa ri mormori noho wawan na'akeme.

<sup>19</sup> Ai ka nasesi, kan mehe wakaukau, la kan wakunu warei lolo kalla wawan leke ra'uli.

<sup>20</sup> Ai kan duni ta'al ri man akin ka naili'il wawa'an makun.

An paku na'alapa ri ma akin tana hehen nanumene rakan lere hair na'akeme kokala

\* **12:14** Lolo hirira agama nin holoor halauk, konomdere ida aile ma kan huri rin howok Alam Renren Warwarna. Ende ri Parisi onne ra'aheni Yesus larlewenedi holoor halauk ono An hi'i wa'an ri onne Alam Renren Warwarna.

Nina hono'ok kanail  
ma namlolo.

<sup>21</sup> Enla Ai onne penia ri  
mormori noho wawan  
lalapan." \*

*Yesus noro Beelzebul*  
(*Hayakyak Makromon*)

(*Mrk. 3:20-30; Luk. 11:14-23*)

<sup>22</sup> Lere onne, ri nodi ri ida  
laa Yesus. Ri onne makan  
tokedi, la hakukuwedi  
ono hayakyaka hu'uuhu'ur  
raramne. Yesus hi'i wa'anedi  
ri onne, de do'on la wakunu.

<sup>23</sup> Kame'ede na'akeme pol-  
letilu do'on Yesus Nina hini'i  
onne, de ida ma na'ukani  
ida na'ahenia, "Lo'o leher eni  
Daud Anan?"

<sup>24</sup> Parisi enihe derne onne,  
hi ra'aheni, "Beelzebul,  
Hayakyak Makromon onne,  
penia nala molollo Ai nohi  
hayakyaka nano ri raramne."

<sup>25</sup> Maa Yesus nauroiroin hi  
honorok akin de na'aheni,  
"Lo'o hair ida napye'er ono  
ida ma kan derne ida, de  
namwali muku woro'o, hair  
onne ra'akepered. Lo'o kote  
ida, meheromo ida, ee nakar  
raram, hi ida ma kan derne  
wawa'an ida, na'akeme  
nakperredi haenhi.

<sup>26</sup> Namnenehe Beelzebul  
nodi molollo nin noho. Lo'o  
hayakyaka ida pakuwala ri  
nohi hayakyaka namehin,  
nin nohe napye'eredi la ka  
naruri me'e.

<sup>27</sup> Mi ma'aheni Yo ohi  
hayakyaka ono Beelzebul  
nala molollo maya'u, de  
Ya a'ukani mi, 'Inhoi nala  
molollo minim man ler-  
nohi enihe, leke hi rohi  
hayakyaka?' Lo'o Beelzebul

harome? Ka! Ma namlolo,  
hi rodi molollo nano Makro-  
mod Lalap. Rir hini'i onne  
penia kukul nahenia minim  
tunum desne Maya'u onne,  
saledi.

<sup>28</sup> Maa Yo ohi hayakyaka  
odi molollo nano Makro-  
mod Lalap Nina Roh. On-  
neni namwali tanade nodi  
kunukunohi nahenia lere  
alam Makromod Lalap nodi  
molollo ri mormori maiyedi  
me'e.

<sup>29</sup> Hi'ihehewi? Lo'o rin  
paeku laa ornakar ma naruri  
ida nina nakar namna'a  
hahaa, maa kan kele wuku  
ornakar ma naruri onne  
makun, ka namwali namna'a  
nin hahaa.

<sup>30</sup> Ri ma ka nodi Maya'u, ai  
onne namwali Ainu'u arwali,  
la ri ma kan paku Ya'u, ai  
onne ma nano'onyaka Ainu'u  
honowoke.

<sup>31</sup> Ende Ya'u konohi mi, lo'o  
rin hi'i dohohala la na'ihoru  
na'idaru Ya'u, Makromod  
Lalap nala ampun, maa  
lo'o rin na'ihoru na'idaru  
Makromod Lalap Nina Roh,  
Ai ka nala ampun.

<sup>32</sup> Makromod Lalap nala  
ampun ri ma na'ihoru  
na'idaru Ri Mormori Anan,  
maa Ai ka nala ampun ri ma  
na'ihoru na'idaru Nin Roh,  
lere eniyeni noro idewe lere  
man maie."

*Au'ono noro woини*  
(*Luk. 6:43-45*)

<sup>33</sup> "Lo'o au'ono ida ka  
namnoro nahuwa'an, ik kak  
lernala au woини man wa'an.  
Lo'o au'ono ka namnoro  
nahuwa'an, woини kan  
wa'an. Ik po'onala au woини ik

\* **12:21** Yes. 42:1-4

kauroin idewe, au'ono onne namnoro nahuwa'an, ee ka!

<sup>34</sup> Maa, mi ri man ailanna! Mi kam paekunala wakunu panaeku man wa'an ida ono inhawe man mim wakunu, onne namhara nano mi honorok akim man ailanna onne.

<sup>35</sup> Ri man wa'an, nin honorok aki wa'an, de an wakunu panaeku man wa'an mamani. Ri man yaka, nin honorok aki yaka, de an wakunu panaeku man yaka.

<sup>36</sup> Ende horhorok! Rakan Lere Alam Ho'ok Kail ri na'akeme, hi dohdoho meher konohi Makromod Lalap rir wanakunu ma kan min haida!

<sup>37</sup> Minima wanakunu mehe nala kenekrohu mim saledi, ee ka!"

*Ri Parisi rapanak Yesus hi'i tanada ri kan dodo'onnala makun*

(Mrk. 8:11-12; Luk. 11:29-32)

<sup>38</sup> Horu ne, meser Horok Lap ida woro'o noro ri Parisi enihe ra'aheni, "Pap Meser, am suk po'onala Pape hi'iyala tanada ri kan dodo'onnale makun."

<sup>39</sup> Yesus walhe na'ahenia, "Kulere alam eni ailanna la akinhe ka namkene naili'il Makromod Lalap. Mi mapanak Ya'u hi'i tanada man ri kan dodo'onnale makun, maa Ka'u hi'i haida mim do'on, naukara inhawa ma namwali noro nabi Yunus mehe.

<sup>40</sup> An minle i'in lape konoin lere wokelu alam wokelu, nammenehe noro Ri Mormori

Ananne. An maki minle noho wi'in lere wokelu alam wokelu haenhi. \*

<sup>41</sup> Rakan Lere Alam Ho'ok Kail ri na'akeme, ri man maki lolo kota Niniwe mori wali'ur, de ramriri roro ku enie kuku sala mi, ono lere hir derne Yunus nina wanakunu, hir herredi rir morimori ma ka namlolo, la derne rakaniyedi Makromod Lalap me'e. Lere eni ri man kulu narehi Yunus aile, maa mi akim kerhe.

<sup>42</sup> Lere Alam Ho'ok Kail ri na'akeme, rai maeke nano noho wali karanna<sup>†</sup> mori wali'ur, la mai namriri noro ku enie kuku sala mi, ono nonolu ai nala'a kalla man ko'u mai leke derne nakani rai Salomo nina wanakuku. Kade lere eniyeni ri ida aile man kulu narehiyedi rai Salomo, maa mi kam derne makani Ai!" \*

*Hayakyaka namhara ri ida la hu'ur wali'ur ri onne raramne*

(Luk. 11:24-26)

<sup>43</sup> Yesus na'aheni wali'ur, "Lo'o hayakyaka ida namharedi ri raram, an lalaa mamai noho mamun nanoin onno man wa'an leke holi, maa kan lernala.

<sup>44</sup> Ende ai nala kenekrohu wali wali'ur laa onno dedesneni. Rakanedi an do'on ri onne naise nakar man mammamu, sapu moumouwedi la ra'akene wawa'anedi me'e,

<sup>45</sup> de ai noro hayakyaka wo'ikku man ailanna narehi ai, hu'ur ri onne raramne wali'ur. Ende ri onne

\* 12:40 Yun. 1:17 \* 12:41 Yun. 3:5

Syeba. \* 12:42 1Rai 10:1-10, 2Taw. 9:1-12

† 12:42 Noho wali karanna onne noho

nina morimori eren yayaka narehi nonolu eni. Onne lo'o namwali ri mormori man ailanna ku eni haenhi."

*Yesus walihne*  
(*Mrk. 3:31-35; Luk. 8:19-21*)

<sup>46</sup> Yesus wakunkunu heri kalarna makun, inne noro mo'oniwalinhe mai ramriri lolo paharne, rapanak roro Yesus wakunu.

<sup>47</sup> Rin laa kukunohi Ai na'henia, "Papa Meser, Num mame noro mo'oniwallumhe aile paharne. Hi raram nodi roro Papa wakunu."

<sup>48</sup> An walha na'henia, "O mauroin Yi in'u la I mo'oniwal'uhe inhoi?"

<sup>49</sup> Horu ne, An kukuwala liman Nina man lernohi pakunohi enihe la na'heni, "Hi penia Yi in'u noro I mo'oniwal'uhe.

<sup>50</sup> Ri man lernohi la derne nakani Ya Am'u man aile a'am raram, hi onne penia Yi in'u, I nar'u, la I mo'oniwal'uhe."

## 13

*Ri man wahair wini hawono*

(*Mrk. 4:1-9; Luk. 8:4-8*)

<sup>1</sup> Lere onne me'ede Yesus namhara nakar onne laa naikoro oir lapa arkanne.

<sup>2</sup> Heri rahu mai lupurala Yesus, de An ha'a laa korkoro ida wawanne, naikoredi. Heri onnenihe ramriri heraram. <sup>3</sup> Ai nodi wanakunu naho'ok wakuku panaeku nammori na'henia,

"Ler ida, man howok kirna ida nodi wini hawono lan wahair nin kirna.

<sup>4</sup> An wahair ne, wini heruwali nadiyaur kalla wawan, de manu liqliwar mai na'an mouwedi.

<sup>5</sup> Heruwali nadiyaur elimo'o wakwaku. Memen pelek mori ono elimo'o tarana mehe,

<sup>6</sup> maa rakan lere ulu, namlau napro'ukedi ono ka na'a'ar.

<sup>7</sup> Wini namehin nadiyaur ruri roke raram, mori, maa ruri roke eren lolode, de elewesnedi.

<sup>8</sup> Maa, ma nadiyaur elimo'o man meur na'ihiyedi, de ihin ennen lernala rewen welikelu, welneme, rakan rahu rehi.

<sup>9</sup> Ende lo'o mi kilinum aile, makani wawa'an."

*Yesus kukunohi hi'ihepe*  
*An nair wanakunu naho'ok*  
(*Mrk. 4:10-12; Luk. 8:9-10*)

<sup>10</sup> Man lernohi pakunohi Yesus mai ra'ukani Ai, "Alhi'ihepe nair wanakunu naho'ok noro herie?"

<sup>11</sup> Yesus walha na'henia, "Makromod Lalap nala woroin mi leke mauroin hi'ihehewi Ai nodi molollo ri mormori. An hi'i mi mauroin panaeku ma nasinuwar onne, ri namehin, ka.

<sup>12</sup> Ri ma nauroinedi Ainu'u wanakuku wawa'an taran me'e, lo'o ra'uwali woroin narehi nalewen makun, maa ri ma kan peinohi Ainu'u wanakuku onne, nin woroin taran man aile, lo'o rala wali'uredi.

<sup>13</sup> Enpenia Ya'u nair wanakunu naho'ok eniyeni wakuku herie ono:  
'Hir do'odo'one, maa naise ri ma kan do'on,

hir derderne, maa naise ri  
ma kan derne,  
la ka rauroin haida-haida.  
<sup>14</sup> Ende inhawa man Makromod Lalap konohiyedi lolo  
nabi Yesaya nonolu eni  
namwali noro hi,  
'Lo'o mim dederne mamani,  
maa ka mauroin  
haida.

Lo'o mim dodo'on mamani,  
maa ka mauroin in-  
hawa ma namwali,\*

<sup>15</sup> ono mi honorok akim  
kerhe,  
de mammene makani,  
mammene do'on, la  
mammene mauroin.  
Ende Ka'u huri mim do'on,  
derne, mauroin, la  
wali wali'ur Maya'u  
leke Ya'u hi'i wa'an mi.'

<sup>16</sup> Yesus na'aheni Nina man  
lernohi pakunohi enihe, "Mi  
akim nahuwa'anedi, ono  
mim do'on la derne kokkoo.  
"

<sup>17</sup> Loi honorok wawa'an  
Ainu'u panaeku ma na'ono  
eniyeni: Nonolu nabi-nabi  
roro ri nammori ma akin  
mou lolo Makromod Lalap  
kalarna, hi raram nodi do'on  
inhawa mim dodo'on lere  
eniyeni, la raram nodi derne  
inhawa mim dedernen, maa  
lere onne Ka'u mai noho  
wawan makun de hi kar  
do'on kar derne."

*Yesus napa'aha wanakunu  
ri man wahair wini hawono  
(Mrk. 4:13-20; Luk. 8:11-15)*

<sup>18</sup> "Derne wawa'an! Ya  
apa'aha wanakunu ma  
na'ono ri man wahair wini  
hawono eni.

<sup>19</sup> Wini ma nadiyaur kalla  
wawan naise ri man derne  
hi'ihehewi Makromod Lalap  
nodi molollo ri mormori,  
maa ka rauroin wawa'an.  
Hayakyak Makromon mai  
nahoredi wini man aiyedi ai  
akin me'e.

<sup>20</sup> Wini ma nadiyaur  
elimo'o wakwaku eni, naise  
ri man derne Makromod  
Lalap Lirna Wawan, la  
kokale noro wawa'an,

<sup>21</sup> maa lirna onne ka na'a'ar  
akin, de ka nalo'ol moluwedi.  
Lere an lernala apinpinha  
ono an derne nakani Makromod  
Lalap Lirna Wawan, an  
waliyedi kili'urne.

<sup>22</sup> Wini ma nadiyaur lolo  
ruri roko raram, naise ri  
man derne Makromod Lalap  
Lirna Wawa'an eni, maa  
an ma'irhu nin hehewek  
nainair akilere, la raram  
nodi lernala kanaru nam-  
mori penia kan ilitolle  
Makromod Lalap Lirna  
Wawa'an eni. Ende wini  
onne kan woi,

<sup>23</sup> maa wini ma nadiyaur  
elimo'o man meur onne  
na'ono ri man derne nakani  
la nauroin Makromod Lalap  
Lirna Wawan eni. Ende ihin  
ennen nammori, heruwali  
lernala ihin ennen rewen  
rahu ida, heruwali welneme,  
la heruwali welikelu."

*Penek hohore man morile  
gandum raram*

<sup>24</sup> Yesus nala wanakunu  
naho'ok ida wali'ur na'aheni,  
"Lere Makromod Lalap nodi  
molollo ri mormori, naho'ok  
naise ri man howok kirnida.  
Ri onne lan pekir ariyono

\* **13:14** Yes. 6:9-10 \* **13:16** Luk. 10:23-24

wini gandum man wa'an  
nina kirne.

<sup>25</sup> Alam ida, ri na'akeme  
ramkukuru ne, nina arwali  
mai wahair penek hohoro  
woi nina kirne raram mene  
nala'a.

<sup>26</sup> Lere wini hawonne mori  
la woin namhara, penek  
hohore mori wewerre noro  
gandum onne.

<sup>27</sup> Orkirne nina man  
howok enihe mai ra'aheni,  
'Pape, lere pekir ariyono  
wini nonolu eni, kirne  
ra'amouwedi la pape pekir  
ariyono wini man wa'an  
menee, alhi'ihepe penek  
hohoro mormori raram  
me'e?'

<sup>28</sup> Orkirne walha na'ahenia,  
'Onne ainu'u arwali nin  
hini'i.'

Nina man howok ra'ukani  
wali'ur, 'Lo'o pape ne'e, am  
laa he'uledi penek hohoro  
onne, ka?'

<sup>29</sup> An walha na'ahenia,  
'Yono, kalo'o gandum onno  
nahine'uledi haenhi.'

<sup>30</sup> Na'amolia mori wewerre  
rakan nina alam rerek  
mene ya'u konohi ma neku  
enihe ra'ukwuku penek  
hohore, leke harne. Onne  
horu, ra'ukwuku gandum  
rodi laa ra'akene lolo ainu'u  
na'akene onno.'

*Makromod Lalap nodi  
molollo ri mormori eren  
na'uawali*

(Mrk. 4:30-32; Luk. 13:18-  
19, 13:20-21)

<sup>31</sup> Yesus nala wanakunu  
naho'ok ida wali'ur heri onne  
na'aheni, "Lere Makromod  
Lalap nodi molollo ri mor  
mori lo'o naise wanakunu

naho'ok eniyeni. Ri ida nala  
wini au manu waku ida\* hap  
nin kirna.

<sup>32</sup> Wini au manu waku  
onne tutusiyana wake'e, maa  
an moriyedi, lapa narehi  
nano au or'oriyana man aile  
lolo onne na'akeme, penia  
namwali au'ono lape, de  
manu liwliwar mai hi'i rira  
wonne min hinan hanan."

<sup>33</sup> Yesus nala wanakunu  
naho'ok ida wali'ur heri  
onne na'aheni, "Lere Makromod  
Lalap nodi molollo ri  
mormori lo'o naise ha ma  
namwali lere maeke nodi  
ragi nawa'aha noro tapon  
terigu nammori (lo'o kilo  
werro'o woro'o). Nalo'oledi  
tarana mene na'akeme ha'a  
wawa'an."

*Alhi'ihepe Yesus wakuku  
nair wanakunu naho'ok ma  
mani?*

(Mrk. 4:33-34)

<sup>34</sup> Yesus wakuku heri  
panaeku rahu nair wanakunu  
naho'ok mamani.

<sup>35</sup> An wakuku heheni  
leke inhawa man nabi-nabi  
ra'aheniyedi nonolu eni  
namwali. Hi ra'aheni,  
"Ya'u nair wanakunu  
naho'ok mamani  
wakuku hi panaeku  
ma nasinuwaredi  
nano lere noho nina  
ma namwali." \*

*Yesus napa'aha wanakunu  
penek hohoro mori gandum  
raram*

<sup>36</sup> Onne horu, Yesus  
hoikaruwedi heri eni, wali  
laa nakar me'e. Nina  
man lernohi pakunohi  
enihe mai ra'aheni, "Pape  
kene ma'amou ma'aropo

\* 13:31 'Au manu waku' herre 'sasawi waku'. \* 13:35 Mzm. 78:2

wanakunu naho'ok 'penek hohoro man mori gandum raram' ke'e."

<sup>37</sup> An walha, "Ri man pekir ariyono wini man wa'an, Ai onne, Ri Mormori Ananne.

<sup>38</sup> Kirne onne, noho eni wawan. Wini man wa'an onne, ri ma namwaliyedi Makromod Lalap Nina ri me'e, la penek hohoro onne, ri man lernohi Hayakyak Makromon.

<sup>39</sup> Arwali man wahair penek horhoro woi onne, Hayakyak Makromon. Alam rerekku onne, lere alam man horu, la ri ma neku onnenihe ramwali hophopon a'am raram.

<sup>40</sup> Lere onne hi ra'ukwuku penek hohore leke harne, namnenehe noro noho wawan nin man horu.

<sup>41</sup> Lere onne Ri Mormori Ananne hopon Nina hophopon a'am raram enihe ra'ukwuku ri na'akeme man ailanna noro ma nakoko rin hi'i dohohala.

<sup>42</sup> Onne horu, man ailanna onnenihe sopol laedi kawali pire ai porom raram. Lolo aiye man mormori onne, hi raherhere mamani la apinha wake'e.

<sup>43</sup> Enla lere onne ri man akin mou lolo Makromod Lalap kalarne laa minle hi Aman Nin noho worworu, la hir siksik lerlere naise lere lolo onne. Ende mi kilinum aile derne makani!"

### *Linikir kanaru ma nasin-unuware*

<sup>44</sup> "Lere Makromod Lalap nodi molollo ri mormori lo'o naise linikir kanaru man wella ai wawan rawilo'edi elimo'o wi'in. Ler

ida ri ida mai do'onne, laa nawilo'edi wali'ur, la akin nahuwa'an rehi de wali laa na'olu mouwedi nina hahaa na'akeme nanumene mai nodi kupan onne weli noho onne."

### *Mutiyara man ma'aruru*

<sup>45</sup> "Lere Makromod Lalap nodi molollo ri mormori naho'ok naise ri ida ma nano'in mutiyara man wella ai wawan leke weli.

<sup>46</sup> Lere an do'on mutiyara man ma'aruru wake'en, ai na'oluwedi nina hahaa na'akeme leke nodi weli mutiyara onne."

### *Ri man nohu meki*

<sup>47</sup> "Lere Makromod Lalap nodi molollo ri mormori naho'ok naise ri ma nodi dari laa meki nano'in i'in, de lernala i'in warna-warna nammori.

<sup>48</sup> I'in nammoriyedi dari raram, de ma nohu meki eni ri'ik mai ro. I'in man wa'an eni, hir loiyedi lo'or raram, la ma kan wa'an sopoledi.

<sup>49</sup> Onne namnenehe noro lere alam noho nina man horu. Lere onne lo'o Makromod Lalap Nina hophopon a'am raram lan reiha'ar ri man ailanna nano ri ma akin mou lolo Makromod Lalap kalarna.

<sup>50</sup> Ri man ailanna, sopol laedi kawali pire ai porom raram. Lolo aiye man mormori onne, hi raherhere mamani la apinha wake'e."

### *Linikir kanaru naho'ok noro wanakuku man lo'olo'ol noro man worworu*

<sup>51</sup> Yesus na'ukani Nina man lernohi pakunohi enihe, "Lo'o mi mauroinedi

panaeku enihe na'akeme  
me'e?"

Hir walha, "Ai mauroinedi  
me'e, Pape."

<sup>52</sup> Ende Ai na'aheni wali'ur hi na'ahenia, "Meser Horok Lap ma nauroinedi hi'ihehewi Makromod Lalap nodi molollo Nin ri, hi onne naho'ok naise ri ornakar ida ma nala nin linikir kanaru lo'olo'ol noro worworu nano nina panaku onno mai paharne."

*Manina Nazaret kar  
kokala Yesus*  
(Mrk. 6:1-6; Luk. 4:16-30)

<sup>53</sup> Yesus loikaru wanakunu naho'ok onnenihe horu, Ai namharedi lolo onne

<sup>54</sup> wali wali'ur laa Nina lekloi. Rakanedi An wakuku ri lolo Yahudi nina kerei raram. Heri man derne Ainina wanakunu eni polletilu, la ida ma ne'el ida na'ahenia, "Ri eni lernala woroin noro molollo man lewlewen eni nano ewi?

<sup>55</sup> Nin pape tukan au, ee ka? Nin mame lo'o ma naran Maria onne, la Yakobus, Yusup, Simon noro Yudas onne mo'oniwalinhe, ee ka?

<sup>56</sup> La narna na'akeme holi mai eni haenhi. Ai nauroin ha rahu eniyeni nano ewi?"

<sup>57</sup> Ende hi ra'okuledi Yesus.

Enimaa Yesus na'aheniyedi hi na'ahenia, "Nabi ida lolo ewi-ewi ri nahiylene arore, maa lolo nina lekloi noro nakar raram, ka."

<sup>58</sup> Hi akin ka naili'il Ai, de Ai kan hi'i hahaa nammori ri kan dodo'onnala makun lolo onne.

## 14

*Yohanis man ulutada ri  
nina makmaki*  
(Mrk. 6:14-29; Luk. 9:7-9)

<sup>1</sup> Lere onne rai Herodes ma nodi molollo noho Galilea, derne Yesus Nina hini'i we-newhe rahue,

<sup>2</sup> la ne'el nina man hemen enihe na'ahenia, "Ai eni lo'o Yohanis man ulutada ri, de moriyedi ho'o me'e! Onne penia Ainina molollo aile hi'i ha man ri kan dodo'onnale makun."

<sup>3-4</sup> Nonolu Herodes hopon nina man hemen enihe kele Yohanis, wuku rala laedi bui raram me'e. Herodes hi'i heheni ono Yohanis dadiyaledi ai me'e na'ahenia, "Ikník agame nina holoor halauk na'aheni luli o moro Herodias ho." Ai na'aheni onne ono Herodias onne, Herodes mo'oniwalla Pilipus hono.\*

<sup>5</sup> Lere onne Herodes raram nodi nesne Yohanis, maa namka'uk heri onnenihe ono hi rauroin Yohanis onne nabi.

<sup>6</sup> Rakan lere Herodes nina lere alam momori, hir hi'i yapi. Herodias onne anan maekana lan waur lolo ri popolu lalariyala enihe kalarna. An waur ma'aruru rehi, de Herodes akin nahuwa'an wake'e.

<sup>7</sup> Ende Herodes kikan hopo na'aheni, "Inhawa o mapanak, ya ala."

<sup>8</sup> An derne inna nin honopon nanumene napanak na'ahenia, "Mala Yohanis uluwakun, loile ra'u lap, mala maya'u."

<sup>9</sup> Herodes derne napanak onne, akin woir rehi, maa an kikanedi hopo me'e lolo heri man penu-penu onne kalarna, de an hopon hi'i lernohi maekana onne nina napanak eni.

<sup>10</sup> An hopon ri laa bui raram peku Yohanis uluwakun.

<sup>11</sup> Horu ne, rala Yohanis uluwakun loile ra'u lap rodilaa raram kanile maekana onne, mene ai nodi laa innna.

<sup>12</sup> Onne horu, Yohanis nina man lernohi enihe derne, de mai rala ihin kemen rodilaa rawilo'edi nanumene lar konohi panaeku onne Yesus.

*Yesus nala hanana'an ri riwan wolima ra'an*  
(Mrk. 6:30-44; Luk. 9:10-

*17; Yoh. 6:1-14)*

<sup>13</sup> Yesus dernessi panaeku onneni, An ha'a laa korkoro ida namhara lolo onneni, hopol laa noho mamun ida. Maa heri onnenihe dernessi Ai nala'edi, de hi ramhara kota-kote, rala'ala'a ei lernohi Yesus lolo ro.

<sup>14</sup> Yesus rakanedi ro, An do'on heri rahu onneni ne, Ai raram penu rehi. Enime'ede An kopur laa ro, hi'i wa'an ri ma nakni'ir enihe.

<sup>15</sup> Lere na'ikeki helem ne, Yesus Nina man lernohi pakunohi enihe mai ra'aheni, "Pape, lere helem me'e. Mai eni noho mamun, de wa'an narehi Pape hopon heri rala'a here, leke lar weli hanana'an lolo leke-leke man ranrani eni, ra'an."

<sup>16</sup> Yesus na'aheni hi, "Yono hopon hi rala'a, mi mehe mala hanana'an hi ra'an."

<sup>17</sup> Hir walha, "Ainima roti kem wolima noro i'in kem woro'o mehe."

<sup>18-19</sup> An hopon hina'ahenia, "Modi mai, la hopon heri rahu onne raikoredi." Ai nala roti kem wolima noro i'in kem woro'o onne, niliha'a laa wawan mene napanak trimkasi Makromod Lalap. Horu, An a'un roti nala kanile Nin man lernohi pakunohi enihe leke ha'ar heri ra'an.

<sup>20</sup> Heri rahu onne na'akeme ra'an hehen nanumene pehur. Horu ne, Nina man lernohi pakunohi enihe ra'ukwuku hanana'an ma narehi, lunu idaweli woro'o penpenu.

<sup>21</sup> Ma na'ak lere onne lo'o mo'oni riwan wolima, kar aki maeke noro tatan'ukun.

*Yesus nala'ala'a lolo oir ulikne*  
(Mrk. 6:45-52; Yoh. 6:16-21)

<sup>22</sup> Onne horu, Yesus hopon Nina man lernohi pakunohi enihe ha'a korkore rolu laa oir lapa wali, la An hopon heri onneni rala'a here.

<sup>23</sup> Heri rahu onne rala'edi ne, Yesus wakiha'a wo'or ida man aile lolo onne hi'i lir napanak.

Alamedi me'e, Yesus mehe aile lolo onne makun, la

<sup>24</sup> man ha'a korkoro eni rakanedi oir lape toro me'e, maa anna nano kalari, de korkoro onne wo'o do'odewe.

<sup>25</sup> Na'ikeki nohoropeni, Yesus nala'ala'a lolo oir ulikne laa hi.

<sup>26</sup> Hir po'on Ai nala'ala'a lolo oir ulikne rahumarnedi. Hir pene'ek maki hamarane, de wakau ono ramka'uk rehi.

<sup>27</sup> Yesus walha hi,  
"Karkaramedi, Maya'u eni  
Yesus. Yono mamka'uk."

<sup>28</sup> Enime'ede Petrus  
na'aheni, "Makrom'u! Nam-  
lolo kokkoo ki O Yesus, hopon  
ya ala'ala'a lolo oir ulikne ki."

<sup>29</sup> Yesus walha, "Mai!"

Ende Petrus kopur nano  
korkore wawan nala'ala'a  
lolo oir ulikne laa Yesus.

<sup>30</sup> Maa Petrus po'onala  
kahi anna namansa, ai  
namka'uk, de keper-keper  
me'e. Enla wakau na'ahenia,  
"Makrom'ue, pakuwala'u!"

<sup>31</sup> Idewe Yesus nasala  
liman na'aheni, "Petrus,  
Petrus alhi'ihepe o akim  
tana! Alhi'ihepe kam pu'ik  
heli wawa'an Maya'ue?"

<sup>32</sup> Enime'ede woro'ohe ha'a  
laa korkore wawanne la kahi  
anneni namlinedi.

<sup>33</sup> Manin korkore raram  
ra'uli rasa'e ra'aheni,  
"Makromod, O penia nam-  
lolo kokkoo Makromod Lalap  
Ananne."

*Yesus hi'i wa'an ri ma  
nakni'ir lolo Genesaret*  
(Mrk. 6:53-56)

<sup>34</sup> Hir rakanedi oir lapa  
Galilea wali enne, hir kopur  
laa ro lolo Genesaret.

<sup>35</sup> Ri man holi lolo onne  
rahiyennaledi man mai  
onne Yesus ne, hir konohi ri  
na'akeme ma na'urani lolo  
onne. Enime'ede hi rodi rir  
ma nakni'ir nammori mai  
Yesus.

<sup>36</sup> Enla hi rapanak rehrehi  
lewlewen leke Yesus huri-  
nohi ma nakni'ir enihe  
tukulala Nin rain eni, kade  
rain honon me'e wa'an.  
Ende man tukul Nin rainne  
na'akeme wa'an mouwedi.

## 15

*Ri Parisi lernohi upun  
a'anhe rira noho honolla*  
(Mrk. 7:1-13)

<sup>1</sup> Ler onne ri Parisi roro  
meser Horok Lap ida woro'o  
ramhara Yerusalem mai  
pakromo noro Yesus. Hir  
ra'ukani Yesus ra'aheni,

<sup>2</sup> "Hi'ihepeni Numa man  
lernohi pakunohi enihe lar-  
lewenedi ik upud a'adhe rira  
holoor halauke? Hi kar ler-  
nohi agame nin holoor ha-  
lauke rawanedzi liman mene  
ra'ak."

<sup>3</sup> Yesus walha na'ahenia,  
"Mi me'ene larlewenedi  
Makromod Lalap Nina  
keneri hono'ok, ono mi modi  
rehirehi mi upum a'umhe  
rira holoor halauke.

<sup>4</sup> Makromod Lalap  
na'aheni, 'Horhawa min-  
ima ri leleher' la 'Inhoi  
ma nahopo nin ri leleher,  
hukumesnedie.' \*

<sup>5</sup> Maa mi mala nounaku  
namehin naise eniyeni: Lo'o  
ri ida paeku naramyaka nina  
ri leleher nala haida hi, mi  
ma'aheni, 'Yon me'e, lo'o  
wa'an rehi modi ha onne  
laa hoikaniyedi Makromod  
Lalap,' de ri leleher kan  
lernala haida.

<sup>6</sup> Ende ri onne kan  
horhawe nina ri leleher me'e,  
la mi ma'ihoru ma'idaru  
Makromod Lalap Nina  
nounaku, leke lernohi mi  
upum a'umhe rira holoor  
halauke.

<sup>7</sup> Mi eniyenihe ri man  
kokme'e mamwali ri  
molololo. Nonolu eni Yesaya  
wakunu namlolo kokkoo,  
lere an wekel mi na'ahenia,

\* 15:4 NN. 20:12, 21:17, Im. 20:9, Ul. 5:16

<sup>8</sup> 'Makromod Lalap na'aheni heheni:  
Ri onnenihe horhawa Ya'u rodi lirna mehe, maa akinhe ko'u wake'e Maya'u.' \*

<sup>9</sup> Hirira honoi kanani Maya'u kan min haida, ono hir nair ri mormori nina holoor halaauk mehe ra'aheni onne Ainu'u, maa ka nam-lolo.'

*Yesus wakuku ha man hi'i rin "morsو" lolo Makromod Lalap kalarne*  
(Mrk. 7:14-23)

<sup>10</sup> Horu ne, Yesus napolu heri onnenihe na'ahenia, "Derne makani, leke mauroin.

<sup>11</sup> Ha man laa ri wawan raram kan hi'i rin morso, maa ha ma namhara nano ri wawan penia man hi'i rin morso."

<sup>12</sup> Yesus Nina man lernohi pakunohi enihe mai ra'ukani ra'aheni, "Pape lo'o mauroin ri Parisi enihe ra'ahan? Hi kar suk derne Pape nin wanakunu enie."

<sup>13</sup> Yesus walha na'ahenia, "Au or'ori na'akeme man Ya Am'u man aile a'am raram kan kamane, lo'o he'uledi.

<sup>14</sup> Yono lernohi Parisi enihe. Hi onne ramwali uluwakun-uluwakun, maa makanhe tokedi. Enlo'o man maktoko norkaru maktoko, woro'ohe wau laedi moke raram."

<sup>15</sup> Petrus na'aheni Yesus, "Pape kene napa'aha wanakunu naho'ok onne mayai ke'e."

<sup>16</sup> An walha na'ahenia, "Emene mi na'akeme ka mauroin onne makun?"

<sup>17</sup> Mi ka mauroin nahenia ha man ik ka'an, keper la namhara wali'ur?

<sup>18</sup> Panaeku ma aile ri akin namhara nano ri nuran, onne penia man hi'i rin 'morsو'.

<sup>19</sup> Nano ri akin penia panaeku yakyaka mai pa-harne. Panaeku naise: ida ma nesne ida, lerpi'u lerwa'u, holi yak leke yak, poho mana'a, la wakunu nano'onyaka ri.

<sup>20</sup> Panaeku onnenihe penia man hi'i rin morso, maa lo'o ri na'ak ka nawana liman, onne kan hi'i rin morso."

*Maeke manina Kana'an ida akin naili'il Yesus kokkoo*  
(Mrk. 7:24-30)

<sup>21</sup> Horu ne, Yesus noro Nina man lernohi pakunohi enihe rala'a onnida ma na'urani lolo kota Tirus noro Sidon.

<sup>22</sup> Maeke Kana'an ida lolo onne mai Yesus, wakau na'ahenia, "Makrom'u, Daud Anan, maramyakala'u. Ya an'u maekanida hayakyaka huhu'ur raram, de apinha wake'e."

<sup>23</sup> Yesus kan walha maeke onne. Enime'ede Nina man lernohi enihe mai Yesus rapanak na'ahenia, "Pape, hopon maeke onne nala'a here ono na'o'o ika mamani."

<sup>24</sup> Yesus walha na'ahenia, "Makromod Lalap hopon Ya'u mai ri Israel mehe, ono hi raisa pipduma ma na'alehe man huri."

<sup>25</sup> Maeke onne mai kadi ein korno lolo Yesus kalarne

\* **15:8** Yes. 29:13

na'heni, "Makrom'u, pakuwala'u."

<sup>26</sup> An walha na'henia, "Lo'o kan wa'an rala tatan'ukun rira banana'an sopol laa ahu, na'an."

<sup>27</sup> Maeke onne walha na'henia, "Namlolo Makrom'u, maa ahu enihe peni ra'an ha mo'o ma nadiyaur nano makromon nina mei."

<sup>28</sup> Enime'ede Jesus na'heni, "Mame akin naili'il kokkoo, de num napanak eni na'ene namwaliyedi me'e." Lere onne me'ede, anan wa'anedi.

*Jesus hi'i wa'an ri nammori ma nakni'ir*

<sup>29</sup> Jesus namhara lolo onneni, nala'a nau洛hir oir lap Galilea arkanne. Enla An wakiha'a laa wo'or ida naikoredi lolo onne.

<sup>30</sup> Ri nammori mai rodi ri ma ein he'ehe'e, makan toko, naplu'uk nap'ekere, hakuku, la ri namansa man apinha namehin. Hir karu ma nakni'ir enihe Jesus kalarna, de Jesus hi'i wa'anedi na'akeme.

<sup>31</sup> Heri rahu man aile lolo onne polletilu, ono hir do'on man hakuku rau-roin wakunuwed, man ein he'ehe'e rala'a wawa'anedi, ma naplu'uk nap'eker lalaa mamaiyedi, la man makan toko do'onedi. Enime'ede hi na'akeme ra'uli rasa'a Israel rira Makromod Lalap.

*Jesus nala banana'an ri riwan wo'akka ra'an*  
(Mrk. 8:1-10)

<sup>32</sup> Enla Jesus napolu Nina man lernohi pakunohi enihe na'henia, "Ya'u raram penu

rehi heri rahu enie. Alam wokelu me'e hir lernohi Ya'u, ka rodi banana'an, de Ya amhene huri hi ramlarlara rala'a, kalo'o hir uma lolo kalla."

<sup>33</sup> Hi ra'ukani Jesus na'henia, "Am laa ewi leke lernala banana'an lolo noho mamun enie, heri rahu eni ra'ane?"

<sup>34</sup> Ai na'ukani hi wali'ur, "Minim roti kem wo'ira aile?"

Hir walha, "Kem wo'ikku noro i'in kemana woro'o wokelu."

<sup>35</sup> Kame'ede Jesus hopon heri rahu onne raikoredi,

<sup>36</sup> la Ai nala roti kem wo'ikku noro i'in. Ai napanak trimkasi Makromod Lalap horu mene An a'un roti la uku i'in onneni nala Nina ri mememen enihe ha'ar heri rahu ra'an.

<sup>37</sup> Heri rahu onne ra'an hehen nanumene pehuredi. Ra'ak horu Nin ri enihe ra'ukwuku banana'an rehin na'akeme lunu wo'ikku.

<sup>38</sup> Lere onne aki mo'oni ma na'ak enihe ri riwan wo'akka, kar aki maeke noro tatan'ukun.

<sup>39</sup> Onne horu, Jesus hopon heri rahu onne rala'a, la An ha'a laa korkoro ida hopol laa noho Magadan.

## 16

*Parisi enihe rapanak Jesus hi'i ha man ri kan dodo'onnale makun*

(Mrk. 8:11-13; Luk. 12:54-56)

<sup>1</sup> Ri ida woro'o nano muku Parisi noro muku Saduki mai Yesus leke ken patal Ai. Hi rapanak An hi'i ha man ri kan dodo'onnala makun ida leke namwali tanada

nahenia kokkoo An mai nano Makromod Lalap.

<sup>2</sup> An walhe na'ahenia, "Ler heheleme mim po'on a'am memere, mi ma'aheni noho lo'o mou,

<sup>3</sup> la al'alam mim po'on a'am memere la ma'uwendow, mi ma'aheni lo'o okon mai. Mi mauroin napa'aha a'am nina tanade, maa ku eniyeni nina tanade mi ka mauroin napa'ahe.

<sup>4</sup> Kulere enie ailanna la akinhe ka namkene naili'il Makromod Lalap. Mi mapanak Ya'u hi'i tanada man ri kan dodo'onnala makun, maa Ka'u hi'i haida mim do'on, naukara inhawa ma namwali noro nabi Yunus mehe."\* An wakunuwedui heheni nala'a me'e.

*Yesus dadiyala yon rakani  
Parisi roro Saduki enihe rira  
wanakuku*

(Mrk. 8:14-21)

<sup>5</sup> Yesus noro Nina man lernohi pakunohi hopol laa oir lapa wali, maa hir hamlinuwedi rodi roti.

<sup>6</sup> Ai na'aheni hi, "Nakinem ki mi! Madiyakyaka ri Parisi roro ri Saduki enihe ono rira wanakuku naisa ragi."

<sup>7</sup> Hir derne Nina wanakunu onne me'ede ida ma ne'el ida na'ahenia, "An wakunu heheni ono ka kodi roti."

<sup>8</sup> Ai nauroiroin rir wanakunu me'e, de na'aheni, "Hi'ihepenia mi mawalha lira ma'aheni ka modi roti? Mi na'akeme akim ka naili'il wawa'an.

<sup>9</sup> Mi ka mauroin makun! Hi'ihepenia mim hamlinuwedi roti kem wolima man Ya a'un, male ri riwan wolime ra'an? Mim ra'ukwuku roti ma narehi, lunu wo'ira?

<sup>10</sup> La hi'ihehewi noro roti kem wo'ikku mala ri riwan wo'akka onne ra'an? Mim ra'ukwuku hanana'an rehi, lunu wo'ira?

<sup>11</sup> Alhi'ihepe mi ka mauroin makun nahenia Ka'u wakunu roti mehe! Nakinem ki mi moro ri Parisi noro ri Saduki rira ragi."

<sup>12</sup> Enime'ede hir eremnala Ainin wañakunu onne ka na'ono ragi rodi ralha'a roti, maa ri Parisi noro ri Saduki rira wanakuku, de wa'an rehi hi rahaledi kemen nano wanakuku onneni.

*Petrus nauroinedi Yesus  
namwali Ri man Makromod  
Lalap kikan namwali Rai laa  
ewi-ewi*

(Mrk. 8:27-30; Luk. 9:18-21)

<sup>13</sup> Enla Yesus noro Nin man lernohi enihe rala'a rakanedi noho Kaisarea Pilipi, la Ai na'ukani hi na'ahenia, "Ri nadedem wekel Ri Mormori Anan onne inhoi?"

<sup>14</sup> Hir walha na'ahenia, "Ri aile ma na'aheni Ai onne Yohanis man ulutada ri, heruwali ra'aheni Elia, namehin ra'aheni Yeremia alka lo'o nabi namehin."

<sup>15</sup> Ai na'ukani hi wali'ur, "Emene lernohi minim panaeku, Ya'u eni inhoi?"

<sup>16</sup> Simon Petrus walha na'ahenia, "Papa penia Kris-tus man kikan namwali Rai,

\* **16:4** Wanakunu 'inhawa namwali noro nabi Yunus mehe' onne wekel lere Yunus min i'in konoin lere wokelu alam wokelu.

la O penia Makromod Lalap man mori laa ewi-ewi Anan."

<sup>17</sup> An walhe, "Simon, Yunus ananne, o akim nahuwa'anedi, ono ri mormori kan konohi panaeku eni ki o, maa Ya Am'u man aile a'am raram penia konohi o.

<sup>18</sup> Ya'u konohi o mamwali Petrus, ono o maise waku ma naruri. Lolo waku eni Ya ariri Ainu'u kerei, la Hayakyak Makromon ka naiye'er.

<sup>19</sup> Makromod Lalap Nina noho worworu nina konse Ya ala ki o. Inhawe kenekrohu mim hi'i lolo noho wawanne, Makromod Lalap hi'iyedi lolo a'am raram me'e. Lo'o mi ma'aheni, 'Yono,' Makromod Lalap na'aheniyedi, 'Yono,' haenhi. Lo'o mim hurinohi rin hi'i haida, Makromod Lalap hurinohiyedi haenhi."

<sup>20</sup> Onne horu, An hopon hi yono konohi ri nahenia Ai onne namwali Kristus man Makromod Lalap kikanedi namwali Rai laa ewi-ewi.

*Yesus wakunu mouropo  
Nina wewerek pananaka noro  
nina makmaki*  
(Mrk. 8:31–9:1; Luk. 9:22–27)

<sup>21</sup> Nano lere onne me'ede, Yesus konohi mouropo Nina man lernohi pakunohi enihe nahenia Makromod Lalap Nin panaeku Ai nala'a laa Yerusalem. Laa enne An lernala wewerek pananaka nano Yahudi rir leleher lalap, imam lalapa roro meser Horok Lap enihe. Lo'o resne

Ai, maa rakan lere wokelu An mori wali'ur.

<sup>22</sup> Enime'ede Petrus ni'ik Ai laa herne dadiyale na'ahenia, "Alhi'ihepe wakunu heheni? Ya apanak Makromod Lalap nako'u nahaledi panaeku onne leke yono na'ene namwali Makrom'u kemen."

<sup>23</sup> Yesus po'onala ai na'aheni, "Hayakyak Makromon o! Mala'a here. O mamwali our heliyowok au heliyowok Maya'u. Num panaeku onne ri mormori nine, Makromod Lalap ka."

*Ri man raram nodi lernohi  
Yesus*

<sup>24</sup> Onne horu, Yesus na'aheni Nina man lernohi pakunohi enihe, "Ri man raram nodi lernohi Ya'u, yon nodi nina raram nodi aimehi, maa na'uwaru nina au kekiyowok la lernohi Ya'u.<sup>†</sup>

<sup>25</sup> Ya a'aheni eniyenri ono inhoi namka'uk ihin kemen maki de namhene huri nin morimori lolo noho wawan eni, ai onne kan lernala or'ori dardari ma namlolo. Maa ri man huriyedi nin morimori lolo noho wawan eni leke lernohi Ya'u, ai onne lernala or'ori dardari ma namlolo ma kan horu.

<sup>26</sup> Lo'o ri ida manarna noho wawan nin ha wo'ira na'akeme, maa kan lernala or'ori dardari ma kan horu, nin panaeku onne kan min haida. Ai lo'o nala inhawe leke lernala or'ori dardari ma kan horu?

<sup>†</sup> **16:24** Wanakunu 'na'uwaru nin au kekiyowok la lernohi Ya'u' napa'ahne, 'namkene lernala apinpinha la maki leke lernohi Ya'u.'

<sup>27</sup> Ri Mormori Anan noro Nina hophopon a'am raram mai rodi Aman Nin molollo ma narehi ma nalewen. Lere onne me'ede An mai herre walha ri dohodoho nina hini'i weneewhe. \*

<sup>28</sup> Horhorok Ainu'u nou ma na'ono eniyeni: Lolo mi eniyeni man min lolo eni, heruwali kam maki hehen nanumene mim do'on Ri Mormori Anan nodi molollo namwali Rai noho wawan."

## 17

*Yesus noro Musa, Elia wakunkunu*

(Mrk. 9:2-13; Luk. 9:28-36)

<sup>1</sup> Yesus wakunu na'akeme onne horu, nakawedi lere woneme ne, Ai napolu Petrus, Yakobus noro mo'oniwalla Yohanis lernohi Ai wakiha'a laa wo'or kukulu ida. Hir memehedi lolo onne,

<sup>2</sup> la hir po'on Yesus kemen namehiyedi me'e, oin makan siksika naise lere, la Nin rain wawarha allelle. <sup>3</sup> Hi ramlilinnohi do'on Musa noro Elia hariyedi roro Yesus wakunkunu.

<sup>4</sup> Enime'ede Petrus na'heni, "Makrom'u, ma'aruru rehi ik min mai eni, de lo'o Papa raram nodi ya a'ariri heuheu wokelu lolo eni, ida Makrom'u nine, ida Musa nine, la ida Elia nine."

<sup>5</sup> An wakunkunu makun, kakam yorno ida mai pupinala hi. Hir derne lira ida nano kakam onne raram na'heni, "E'eni Ya An'u, Ya amre'e Ya amharu Ai, la An hi'i Ya akin nahuwa'an. Mim derne makani Ai!"

<sup>6</sup> Hir derne lir onne, hi ramka'uk rehi me'e, de ralwali yawa,

<sup>7</sup> maa Yesus mai roul hi na'aheni, "Mamririyedi, yono mamka'uk."

<sup>8</sup> Hir po'on wali'ur ne, kar do'on ri namehin onnenihe me'e, la Yesus memehedi me'e.

<sup>9</sup> Onne horu, hir kopkopur lolo wo'or laa yawa, la Yesus nou hi na'ahenia, "Yom konohi ri inhwae mim dodo'on eni hehen nanumene Ya'u ma namwali Ri Mormori Ananne maki la mori wali'ur."

<sup>10</sup> Enine hi ra'ukani Ai, "Alhi'ihepenia meser-meser Horok Lap ra'aheni Elia mai nolue?" \*

<sup>11</sup> An walhe na'ahenia, "Memen namlolo, Elia mai nolu na'akene ha rahu namkene.

<sup>12</sup> Ya'u konohi mi nahenia Elia maiyedi me'e, maa ri ka nahiyyennale. Hi rodi rira suke hi'i sus Elia naise lere man mai hir hi'i sus Ri Mormori Ananne haenhi."

<sup>13</sup> Eni nanumene hi rauroin Yesus Nin wanakunu onne na'ono Yohanis ma nodi oir ulutada ri eni.

*Yesus nohi hayakyaka man hu'ur tatan ida raramne*  
(Mrk. 9:14-29; Luk. 9:37-43a)

<sup>14</sup> Yesus noro ri wokelu enihe kopuredi wo'or eni po'on ri nammori, la mo'oni ida mai kadi ein korno Yesus kalarna

<sup>15</sup> na'aheni, "Pape, maramyakala ya an'u ke'e. An apinha pipi haha'al, de ai

\* 16:27 Mzm. 62:12 \* 17:10 Mal. 4:5

nadedem nediyawa ai laur  
noro oir raram.

<sup>16</sup> Yo odi laedi Pape Nina  
man lernohi pakunohi enihe  
me'e, maa kar paekunale hi'i  
wa'an."

<sup>17</sup> Yesus walha na'ahenia,  
"Eih! Mi ku eniyeni kam  
derne makani la mi akim ka  
naili'il kokkoo. Yo oro mi  
nalo'oledi me'e, maa mi akim  
ka naili'il Maya'u wawa'an  
makun! Rakan ma'anana  
ho'o Ya'u kerhu oro mi mene  
mi akim naili'il kokkoe?  
Modi tatana onne mai."

<sup>18</sup> Enime'ede An hopon  
hayakyaka man aile tatana  
onne raram namharedi. Lere  
onne me'e, hayakyaka  
namhara, la tatana wa'anedi.

<sup>19</sup> Horu ne, Nina man  
lernohi pakunohi enihe hoi  
na'urani, ra'ukani na'ahenia,  
"Hi'ihepenia ai kam paeku-  
nala mohi ha yakyaka onne?"

<sup>20</sup> An walha na'ahenia,  
"Horhorok! Mi kam paeku-  
nala mohi hayakyak onne  
ono mi akim ka naili'il  
wawa'an Ya'u makun. Loi  
honorok wawa'an Ain'u  
panaeku ma na'ono eniyeni:  
Lo'o mi akim naili'il Makro-  
mod Lalap, kade tarana  
mehe naise aukawi waku  
man tutusiyane, maa mim  
paekunala hopon wo'or eni  
hoi laedi onno namehin,  
wo'or eni lernohi minim  
honopon onne de hoi laa.  
Inhawa memehe mim paeku  
hi'i, onne namwali. [

<sup>21</sup> Enla hayakyaka naise  
enie mi modi molollo mohie,  
horo ma'aluli kemen ka

ma'ak nanumene hi'i lir na-  
panak Makromod Lalap.]"<sup>\*</sup>

*Yesus wakunu Nina mak-  
maki*  
(Mrk. 9:30-32; Luk. 9:43b-  
45)

<sup>22</sup> Enla Yesus Nina man  
lernohi pakunohi enihe  
pakromo wuku lolo Galilea  
ne, Yesus na'aheni hi, "Ka  
nalo'ol me'e ri na'olu Ri  
Mormori Ananne kanile ri  
mormori liman raram.

<sup>23</sup> Hi lo'o resnedi, maa  
rakan lere alam wokelu An  
mori wali'ur." Hir derne ne,  
akinhe woir wake'e.

*Makromod Lalap Nina  
Romleu Lapa nina paipair*

<sup>24</sup> Yesus noro Nina man ler-  
nohi pakunohi enihe rakan  
Kapernaum, man ra'uk  
paipair ida mai na'ukani  
Petrus na'ahenia, "Minim  
Meser nadedem pair Makro-  
mod Lalap Nin Romleu Lape  
nin paipair, ee ka?" \*

An walha, "An paire."

<sup>25</sup> Petrus wali laa nakar  
ne, idewe Yesus na'ukani,  
"Simon, hi'ihewiyala numa  
panaekue? Lo'o rai noho  
wawan enihe rapanak  
paipair nano inhoi? Nano  
riria ri, ee ri ma nano pa-  
harne?"

<sup>26</sup> Petrus walha, "Ri ma  
nano noho paharne."

Yesus na'aheni ai, "Ende  
yon rai nin ri pair me'e.

<sup>27</sup> Maa yono ik hi'i ri on-  
nenihe akin yaka, de mala'a  
oir lap ma'il i'in. Om lae  
ne, i'in om wowo'ok dedesne,  
hari wawan. Lo'o om do'on

\* **17:21** Horok man aile lolo tanada [ ] raram, kaale lolo horok Yunani dedesne  
heruwali. \* **17:24** Kel. 30:13, 38:26

kupan man noknokor rodi pair ikroko nika paipair, de mala kupan onne modi lam pair iknika paipair onne.”

## 18

*Inhoi man kulu narehi*  
(Mrk. 9:33-37, 9:42-48;  
Luk. 9:46-48, 17:1-2)

<sup>1</sup> Lere onne man lernohi pakunohi Yesus enihe mai ra'ukani Ai na'ahenia, “Nano mayai eniyenihe inhoi man kulu narehi lolo Makromod Lalap Nina ri na'akeme?”

<sup>2</sup> Kame'ede Yesus napolu tatanida mai napanak namriri hi kalarua.

<sup>3</sup> Eni nanumene Ai ne'el hi na'ahenia, “Loi honorok wawa'an Ainu'u panaeku ma na'ono eniyeni: Lo'o mi kam herre minim morimori, leke maise tatana eniyeni, Makromod Lalap kan huri mi laa onno man Ai nodi molollo raram.

<sup>4</sup> Ende inhoi nin morimori naise tatana eniyeni de kan holi kukulu lalap, ai penia man kulu narehi lolo Makromod Lalap Nin ri.

<sup>5</sup> Enla inhoi kokala tatanida naise eniyeni ono hir lernohi Ya'u, hi onne kokala Ya'u haenhi.

<sup>6</sup> Maa inhoi nakoko tatana ma akin naili'il Ya'u hi'i dohohala, wa'an rehi wairredi waku lapida ri onne kelenne la rodi laa ra'akeperedi heleken.

<sup>7</sup> Lere man mai noho wawan eniyeni mayo'o ono kenen panatal aile ma nakoko ri hi'i dohohale mamani. Lolo noho wawan

eni kenen panatal nammori aile, maa ri man ken patal ri namehin de nakoko hi'i dohohala, ai onne mayo'o narehi!

<sup>8</sup> Lo'o mi liman ein nakoko mi hi'i dohohala, heru sopoledi. Yonde mi liman ein wawa'an, maa nakoko mi laa kawali pire ai porom raram laa ewi-ewi. Wa'an rehi mi liman ein wali kaale, maa mim lernala or'ori dardari ma kan horu.

<sup>9</sup> Lo'o mi makum wali nakoko mi hi'i dohohala, hidue sopoledi. Yonde mi makam wa'awa'an, maa hi'i mi laa kawali pire ai porom raram. Wa'an rehi mi makam wali mehe, maa mim lernala or'ori dardari ma kan horu.”

*Wanakunu pipduma man molu*

(Luk. 15:3-7)

<sup>10</sup> “Ya'u konohi mi! Yono mim hadwei ri ida nano tatana eniyenihe ono hirira hophopon a'am raram namkenkene aile Makromod Lalap herne kalarua lolo a'am raram.

[  
<sup>11</sup> Ya'u, Ri Mormori Ananne, mai leke ri ma nako'uwedi Ya'u lernala or'ori dardari ma kan horu.]\*

<sup>12</sup> Ri ida nina pipduma waku rahu ida, la pipi waku ida nahineiredi. Ri onne lo'o paeku hehewi? Ai lo'o hoikaruwedi welihii wohii lolo wo'or, laa nanoin ma nahineiredi eni.

<sup>13</sup> Loi honorok wawa'an Ainu'u panaeku ma na'ono eniyeni: Ai akin nahuwa'an

\* **18:11** Horok man aile lolo tanada [ ] raram, kaale lolo horok Yunani dedesne heruwali.

ono nin pipduma welihii wohii kar molu, maa lere an holikuku pipduma man molu onne, ai akin nahuwa'an wake'e.

<sup>14</sup> Mi Aman man aile a'am raram naise man huri pipi onne. Ai namhene tatanida nako'u nano Ai."

*Walin man hi'i yaksala noro mi*

<sup>15</sup> "Lo'o mi wallum ida hi'i yaksala noro mi, laa moro ai wakunu mehe, leke kukunohi ainina saleni. Lo'o an derne nakani, more mahuwa'an wali'uredi,

<sup>16</sup> maa lo'o kan derne, moro wallumhe man ler-nohi Yesus ida woro'o laa lekpananne ramwali man kukumaka num wanakunu, ewi man sala la ewi ma namlolo.\*

<sup>17</sup> Lo'o ri onne kan derne nakani makun, lam konohi kerei raramne. Lo'o namhene derne wali'ur, yon mawaur noro ai naise mi ka madedem mawaur noro man ra'uk paipaire noro ri ma ka nauroin Makromod Lalap.

<sup>18</sup> Horhorok Ainu'u nou ma na'ono eniyeni: Inhawe kenekrohu mim hi'i lolono ho wawanne, Makromod Lalap hi'iyedi lolon a'am raram me'e. Lo'o mi ma'heni, 'Yono' Makromod Lalap na'aheniyedi, 'Yono' haenhi. Lo'o mim hurinohi rin hi'i haida, Makromod Lalap hurinohiyedi haenhi.

<sup>19</sup> Ya'u konohi mi wali'ur, nano mi man minle noho wawan eniyeni, lo'o ri ida woro'o lawuku aki panaeku

ida la hi'i lir napanak, in-hawe mi mapanak Makromod Lalap man minle a'am raram, Ai nala ki mi.

<sup>20</sup> Lo'o ri woro'o wokelu minwuku lolo onnida ono hir lernohi Maya'u, Ya'u aile lolo onne haenhi."

*Yesus wakuku hi'i hehewi rala ampun ri*

<sup>21</sup> Kame'ede Petrus mai Yesus na'ukani, "Lo'o ya ala ampun rew'ira i wal'u man hi'i sala maya'u? Lo'o rew'ikku?"

<sup>22</sup> Enine An walhale na'ahenia, "Rew'ikku ka! Maa wel'iikku nala rew'ikku!"

<sup>23</sup> Ya aheni heheni ono lere Makromod Lalap nodi molollo ri mormori naho'ok naise rai ida ma nala kenekrohu ra'ukwuku nin man howok enihe rira okon raka na'akeme.

<sup>24</sup> Ler ida rai onne mahan ra'ukwuku okon raka onneni, nin ri rodi nin man howok ida mai. Nonolu eni ai napanak kupan nammori rehi, maa kan herre makun.

<sup>25</sup> Ri onneni kan paekunala herre nin kupan napapanak onneni, de rai hopon ra'olu ai noro hono ananhe noro rira hahaa na'akeme leke herre kupan onneni.

<sup>26</sup> Maa nin man howok onne lan kadi ein korno rai eni kalarna napanak na'ahenia, 'Papa raie, ya apanak ke'e de, mala leken taran maya'u mene ya'u herre kupan onneni.'

<sup>27</sup> Enime'ede rai nararamyakale, de nala ampun la namhene an herre kupan onne me'e.

\* **18:16** UL. 19:15

<sup>28</sup> Enla ri onne namhara nano rai lan pakromo noro man howok wali man nonolu napanak ainin kupan tarana, maa kan herre makun. An ramhala kelen la hopon, 'Herre ainu'u kupan here!'

<sup>29</sup> Man howok wali onne kadi ein korno kalarna napanak rala leken tarana mene herre kupan onne,

<sup>30</sup> maa ai namhene. Ende hopon kele ri onne rodi laedi bui raram hukum hehen nanumene an herre kupan onneni.

<sup>31</sup> Ri man howok namehin po'on inhawa ma namwali onneni, hir hehel rehi de lar konohi rai eni.

<sup>32</sup> Ende rai napolu nin man howok onne mai ne'el na'ahenia, 'Om ailanna wake'e! Ya'u huriyedi o nano num okon raka rahu eni ono mapanak ampun de ya araramyaka o.

<sup>33</sup> Alhi'ihepe ka mararamyaka ri namehin naise ya araramyaka o eni?'

<sup>34</sup> Rai na'ahan rehi de nala ri onne laa ma nadiyaka ri ma nahinukum enihe leke lernala hunukum hehen nanumene herre nin okon raka horu.

<sup>35</sup> Ende lo'o mi ida ma ka nala ampun ida modi aki man mou, Ya Am'u man minle a'am raram hi'i heheni noro mi haenhi."

## 19

Yesus nounaku ma  
namhene hono  
(Mrk. 10:1-12)

<sup>1</sup> Yesus nala wanakunu onne horu ne, ai namhara

Galilea nala'a noho Yudea man aile oir wauwau Yordan wali enne.

<sup>2</sup> Heri rahu lernohi, la An hi'i wa'an ma nakni'ir nano heri onneni.

<sup>3</sup> Ri Parisi ida woro'o mai leke ken Ai de ra'ukani, "Lo'o iknika agame nina holoor halauk hurinohi mo'oni reiha'ar noro hono?"

<sup>4</sup> An walhe na'ahenia, "Mim lesedi Horok Lapeni, ee ka? Horhorok aile Horok Lapeni ma na'aheni, 'Lere nonolu me'ede, Makromod Lalap umupala ri mormori, mo'oni noro maeke.'"

<sup>5-6</sup> Horu Makromod Lalap na'aheni,  
'Onne penia mo'oni hoikaruwedini  
inna aman leke noro hono minwuku, de  
woro'ohi ramwali mahaku.'

Ende inhoi-inhoi Makromod Lalap kali wukuwedi me'e, yono ri mahaku reiha'ar ono hi penia ka ramwali woro'o, maa ramwaliyedi mahaku me'e."\*

<sup>7</sup> Hi ra'ukani Ai wali'ur, "Alhi'ihepe Musa hurinohi mo'oni hi'i horok reiha'ar nala hono, la hopon ai nala'a here?"\*

<sup>8</sup> An walhe, "Musa nala leken reiha'ar ono mi akim kerhe rehi, maa nano lere dedesne Makromod Lalap kan paeku heheni.

<sup>9</sup> Ya'u konohi mi na'akeme, Makromod Lalap kan huri ri reiha'ar noro hono, ono lo'o ai namhene hono lan ho maeke namehin, an lerwau

\* 19:4 NN. 1:27, 5:2 \* 19:5-6 NN. 2:24

\* 19:7 Ul. 24:1-4

hailai. Maa lo'o hono lerwa'u noro mo'oni namehin mene huri hi reiha'ar."

<sup>10</sup> Yesus Nin man lernohi pakunohi enihe ra'ukani na'ahenia, "Hi'i heheni ne, wa'an rehi yono ho me'e!"

<sup>11</sup> Yesus na'aheni, "Ri na'akeme kar kokala panaeku onneni, kokoko ri man Makromod Lalap niliyedi me'e.

<sup>12</sup> Heruwali mori me'ede oplori maekedi, heruwali rin hi'i oplori maekedi de kar ho ri, la heruwali rala kenekrohu kar ho leke lernohi Makromod Lalap mehe. Ende inhoi paekunala kokala wanakuku eniyeni, kokala wawa'anedi."

*Yesus namre'e namharu tatan'ukun*  
(Mrk. 10:13-16; Luk. 18:15-17)

<sup>13</sup> Enla ri heruwali rorkaru tatan'ukun mai Yesus leke An kemenala liman hi la hi'i lir napanak, maa Nin man lernohi pakunohi enihe ra'ahan de dadiyala ma norkaru tatan'ukun onnenihe.

<sup>14</sup> Enimaa Yesus na'aheni, "Hurinohi tatana onnenihe mai Maya'u! Yom kawala hi ono Makromod Lalap nodi molollo ri ma naise tatana eniyenihe."

<sup>15</sup> Ende An kemenala liman tatan'ukun la namre'e namharu hi horu mene namhara lolo onne.

*Orkanaru man raram nodi laa a'am raram*  
(Mrk. 10:17-31; Luk. 18:18-30)

<sup>16</sup> Lerida ma na'ikaka ida mai Yesus na'ukani, "Pap

Meser, lo'o ya'u hi'i inhawa hini'i wenewhe man wa'an leke lernala or'ori dardari ma kan horu?"

<sup>17</sup> Yesus na'ukaniyale, "Alhi'ihepe ma'ukani Ya'u inhawa man wa'ane? Ida mehe aile man wa'an! Lo'o o raram nodi lernala or'ori dardari ma kan horu, lernohi ik Makromod Lalap Nin keneri hono'ok na'akeme."

<sup>18</sup> Ri onne na'ukani wali'ur, "Ya'u lernohi inhawa keneri hono'ok ho'o?"

An walhale, "Yono mesne ri, yon lerpi'u lerwa'u, yon mamna'a, la yon modi poho tumdesne ri lolo hono'ok kanail onno."

<sup>19</sup> Horhawa o inum, o ammu, la maramyaka numa ri mormori wali, naise o maramyaka o kemmu." \*

<sup>20</sup> Ma na'ikaka onne walha, "Ya'u lernohiyedi keneri hono'ok onne na'akeme me'e, de ya'u hi'i inhawa ma kan kuku kan nokor makun?"

<sup>21</sup> Yesus na'aheni wali'ur, "O raram nodi num hini'i wenewhe kukuku noknokor lolo Makromod Lalap kalarna, laa ma'oluwedi num ha wo'ira na'akeme, male ma na'alehe haida-haida nanumene mam lernohi Ya'u. Lo'o om hi'i heheni, om lernala kanaru man aile a'am raram!"

<sup>22</sup> Enimaa ri onneni derne Nina wanakunu eni hehel rehi, ono ai onneni ri orkanaru wake'e, de nala'a me'e.

<sup>23</sup> Enime'ede Yesus ne'el Nin man lernohi pakunohi enihe na'ahenia, "Loi honorok wawa'an Ainu'u panaeku ma na'ono eniyeni:

\* **19:18** Kel. 20:12-16, Ul. 5:16-20 \* **19:19** Kel. 20:12, Im. 19:18, Ul. 5:16

Sus wake'e orkanaru laa onno man Makromod Lalap nodi molollo raram.

<sup>24</sup> Ya'u konohi mi wali'ur: Sus wake'e unta waku ida lolala wanaka ku'il, maa man sus narehi onne, orkanaru ida laa minle onno man Makromod Lalap nodi molollo."

<sup>25</sup> Hir derne Nina loloi kakaru ne, hir mehe kakaiyedi la ra'ukani, "Ende inhoi man lernala or'ori dardari ma kan horue?"

<sup>26</sup> An po'onalaha na'aheni, "Ri mormori kan paekunala hi'i ha onneni namwali, maa Makromod Lalap mehe paekunala hi'i ha wo'ira na'akeme namwali."

<sup>27</sup> Kame'ede Petrus na'ukani Ai, "Mayai eniyenihe, am hoikaruwedhi ha wo'ire na'akeme me'e leke lernohi Pap Meser, de lo'o am lernala inhawa?"

<sup>28</sup> An walhale na'ahenia, "Horhorok Ainu'u nou ma na'ono eniyeni: Lere man mai Makromod Lalap hi'i ha rahu na'akeme worworu. Lere onne Ri Mormori Ananne naikoro lolo Nin onno man siksik lerlere, la mi man lernohi Ya'u enihe maikoro onno kukulu idaweli woro'o leke ho'ok kail Israel nin luhu idaweli woro'o enihe.

<sup>29</sup> Enla inhoi man hoikaruwedhi inna, aman, lodon walin, ananhe, noro nina kirne nakar leke lernohi Ya'u, ri onneni lernala wali'ur rewen rahu ida, la ai onne lernala or'ori dardari ma kan horu.

<sup>30</sup> Maa ri nammori ma namwali man panulu lere eniyeni, lere man mai

ramwali man lolo yawa. Ri nammori ma namwali man lolo yawa lere eniyeni, lere man mai ramwali man panulu."

## 20

*Wanakunu man howok kirna anggure*

<sup>1</sup> Yesus nala wanakunu naho'ok konohi hi'ihehewi Makromod Lalap nodi molollo rimormori na'ahenia, "Al'alam lerida orkirna ida namhara laa nanoin man howok leke howok nina kirna.

<sup>2</sup> An lernaledi ri, la ne'e pair man howok onnenihe alam ida kupan pere ida, la hopon hi lar howok me'e.

<sup>3</sup> Riuk wohii an laa pasar do'on ri ida woro'o ra'aroromo,

<sup>4</sup> de napanak hi lar howok nina kirne haenhi, la nou nala naiwe'el ma namlolo hi, de lar howok me'e.

<sup>5</sup> Riuk idaweli woro'o, noro riuk wokelu (lere mamamal) namhara wali'ur nanoin man howok.

<sup>6</sup> Riuk wolima (na'akeki lere helem) namhara ho'o me'e, la an do'on ri ida woro'o ra'alehe honowok, de na'ukanihe, 'Alhi'ihepenia lere eniyenia ma'aromo manani la kam howok haidahai?

<sup>7</sup> Enine hir walha ra'ahenia, 'Ri ka nala honowok mayai.'

Orkirna na'aheni, 'Lam howok ainu'u kirna enne.'

<sup>8</sup> Rakan lere helem orkirne onne hopon nin ma namwali uluwakun man howok enihe napolu man howok kirna enihe maiwuku leke pair rira

maha-mahe. An pair man howok kauli'ur nolu, mene pair ma nolu eni.

<sup>9</sup> Man howok kauli'ur enihe kokala kupan pere ida.

<sup>10</sup> Ende man mai nolu howok, pene'ek lo'o pair hi narehi man kauli'ur, maa mai ne kokala kupan pere ida haenhi.

<sup>11</sup> Enpenia man howok nolu onnenihe akin apinhan, de rawalha lira noro orkirna eni ra'aheni,

<sup>12</sup> 'Alhi'ihepenia ri eniyenihe howok jam ida mehe, maa pair hi namnenehe noro mayai? Am howok lere kekeme lolo lere manmanha raram!

<sup>13</sup> Orkirne onneni walhala man howok ida na'ahenia, 'Ya'u ka'u hi'i sala ida noro i wal'u. O me'e kokala kupan pere ida penia mam howok.

<sup>14</sup> Kokala kupan eniyeni la mala'a here. Ya'u raram nodi pair man mai howok kauli'ur namnenehe noro o.

<sup>15</sup> Yo odi ainu'u kupan pair, de menmololla'u. Lo'o makehen ono ya'u hi'i ha man wa'an noro hie?"

<sup>16</sup> Yesus na'aheni wali'ur, "Ende man kauli'ur namwali ma nolu, la ma nolu namwali man kauli'ur."

*Yesus wakunu Nin mak-maki*  
(Mrk. 10:32-34; Luk. 18:31-34)

<sup>17</sup> Yesus noro Nina man lernohi pakunohi idaweli woro'o enihe rala'a laa Yerusalem. Ahille kalla makun, An kukunohi hi na'ahenia,

<sup>18</sup> "Makaniyala! Lere eni ik kala'a mamani laa Yerusalem. Ik rakan enne, ri na'olu Ya'u, ma namwali Ri Mormori Anane, nala kanile imam lalape roro meser Horok Lap enihe mene hir hukumnesnA'u,

<sup>19</sup> la rala Ya'u kanile ri ma ka namwali Yahudi enihe. Hir ilnohi ralnohi Ya'u, riuk rerhe Ya'u\*, la wairesne Ya'u lolo au kekiyowok. Maa alam wokelu Ya'u mori wali'ur."

*Man panulu ilitolle ri namehin*  
(Mrk. 10:35-45)

<sup>20</sup> Yakobus, Yohanis, noro inna (hono naran Zebedeus) mai Yesus. Inna kadi ein korno Ai kalarna leke napanak haida.

<sup>21</sup> Yesus na'ukani ai, "Mame nina panaeku in-hawe?"

Ai na'aheni, "Ya apanak lere Makrom'u mamwali Rai, ya an'u woro'o enihe raikorala herum mariri malanna."

<sup>22</sup> Maa Yesus ne'el ai, "O ka mauroin inhawe man mapapanak onneni." Yesus po'onala anan woro'ohe, na'ukani, "Mi lo'o mamkene momun oir man meru<sup>†</sup> nano cawan ma ka nalo'ol Yo omune?"

Hir walha, "Ai mamkene, Pape."

<sup>23</sup> Yesus ne'el, "Namlolo, mi lo'o momun oir man meru nano Ainu'u cawan, maa Ka odi molollo wekel inhoi naikoro Ya'u herne mariri malanna. Ya Am'u niliyedi ri man Ai raram nodi naikoro

\* **20:19** Nadedem hi rodi arpau ulikin man nair kimiruwana aile honon riuk rerhe ri. † **20:22** 'Oir man meru' nin panaeku apinpinha wo'operperi man Yesus lo'o lernala.

lolo onne, la na'akenedi rir onno me'e."

<sup>24</sup> Man lernohi pakunohi idaweli namehin derne woro'ohe rira napanak eni ne, hi ra'ahan.

<sup>25</sup> Enime'ede Yesus napolu hi na'akeme maiwuku, na'aheni, "Mi mauroin nahenia hair-hair rira rai-rai roro rir uluwakun lalapa ma ka nauroin Makromod Lalap enihe, rodi molollo kerne dalha ri mormoriyane,

<sup>26</sup> maa yom hi'i heheni. Inhoi raram nodi namwali man panulu lolo mi, ai namkene ilitolle mi.

<sup>27</sup> Inhoi raram nodi namwali ma nolu, ai onne helkaki namdaru namkene namwali hophopon wahwan ki mi,

<sup>28</sup> leke maise Maya'u ma namwali Ri Mormori Anane. Ka'u mai leke rin ilitolle Maya'u, maa Ya'u mai leke ilitolle ri la ala I kem'u resne leke huri we'er ri nammori nano rira dohohale."

*Yesus hi'i wa'an maktoko  
woro'o minle Yeriko  
(Mrk. 10:46-52; Luk. 18:35-43)*

<sup>29</sup> Yesus noro Nina man lernohi pakunohi enihe ramhara nano Yeriko, ri namansa lernonohi hi.

<sup>30</sup> Lolo kalla, ri maktoko woro'o raikoro aile kalla arkanne. Hir derne Yesus lo'o lole kalla onneni, de wakau ra'aheni, "Makromod Yesus, Daud Anan,<sup>‡</sup> maramyakala mayai ke'e!"

<sup>‡</sup> **20:30** Ri Yahudi rauroin nahenia lerida ri ida mai nano Makromod Lalap man An kikan namwali Rai laa ewi-ewi de nodi molollo hi naise nonolu eni Daud nodi molollo hi upun a'an. Lere mak toke onne rapolu Yesus, "Daud Anan," hi rauroin Yesus namwali Rai laa ewi-ewi man hir lalapan eni.

<sup>31</sup> Heri rahu onnenihe dadiyala woro'ohe, "Karkaramedi!

Maa hir wakau eren raru-ruri, "Makromod, Daud upun anan, maramyakalai ke'e!"

<sup>32</sup> Yesus rakanedi woro'ohe miminlolani ne, Ai namririyala, napolu woro'ohe la na'ukani, "Mi raram nodi Ya'u hi'i inhawa ki mie?"

<sup>33</sup> Hir walhe, "Makromod, ai raram nodi do'onedi here!"

<sup>34</sup> Yesus nararamyakala woro'ohe, de kemenala liman makanhe. Idewe woro'ohe makan mouwedi la lernohi Yesus.

## 21

*Yesus laa Yerusalem  
(Mrk. 11:1-11; Luk. 19:28-40; Yoh. 12:12-19)*

<sup>1</sup> Yesus noro Nina man lernohi pakunohi enihe ra'uraniyedi Yerusalem, na'akeki rakan lekida naran Betfage man aile wo'or Zaitun leren. Yesus hopon Nina ri woro'o rolu

<sup>2</sup> laa leke onne la Ai na'aheni, "Lolo onne mim do'on keledei ida na'inonorok noro anan, de we'er modi woro'ohe mai.

<sup>3</sup> Lo'o ri na'ukani na'ahenia, 'Maham hi'i inhawa?' ma'aheni, 'Makromod hopon mayai mai mala keledei enihe.' Mi ma'aheni heheni, hir hurinohi mi'ik modi mai."

<sup>4</sup> Panaeku eniyeni namwali leke na'akuku na'anokor inhawé man nonolu nabi ida na'aheni,

“Konohi ri man minle kota  
Sion heheni, ‘Po’onalal,  
5 minim Rai mai me’e. Ai  
lo’o mai helkaki namdaru,  
naikoro keledei anan.’ ”\*

6 Kame’ede woro’ohe  
lernohi inhawe man An  
kononohi, de rala’ a me’e.

7 Hir wali mai riri’ik  
keledei noro anan onne mai  
Yesus, la ruri rira rain rodi  
pakpake leke naikorole.

8 Ai naikoredi keledei anan  
eni, heri nammori ruri rira  
rain rala werre calle wawan,  
la heruwali peku aukawi  
wakal calle haenhi leke  
namwali tanada nahenia hir  
kokala Ai noro wawa'an.

9 Enla heri onnenihe ma  
nolu man kauli'ur wakau  
ra'aheni,

“Hosana! Ka’uli kasa'a  
Daud Anan!

Makromod Lalap namre'e  
namharu Ai man mai nodi  
Makromod Oin Naran man  
kulu narehi!

Ka’uli kasa'a Makromod  
Lalap man aile a'am raram”  
\*

10 Yesus rarakan kote  
ne, Yerusalem ne'en raram  
na'akeme derne mouwedi la  
ramhara ra'ukani, “Ri onne  
inhol?”

11 Heri man lernohi enihe  
walha ra'aheni, “Ai penia  
Yesus, ma namwali nabi ma  
nano Nazaret noho Galilea.”

*Yesus nohi ma na'olu  
hahaa lolo Makromod Lalap  
Nina Romleu Lap*

(Mrk. 11:15-19; Luk.  
19:45-48; Yoh. 2:13-22)

12 Yesus rakanedi Makro-  
mod Lalap Nina Romleu  
Lapa nin nikoin, Ai nohi ri  
ma na'iwali lolo waliwali

onnenihe. Ai nawaliyedi  
mei man rodi herre kupan la  
nawaliyedi awana ma na'olu  
merpati enihe raikorkorole.

13 Ai ne'el heri onne  
na'ahenia, “Lolo Horok Lap  
raram, Makromod Lalap  
konohi, ‘Ainu'u Romleu  
Lapeni namwali onno rin  
mai leke hi'i lir napanak,  
maa mim hi'i namwali ma  
namna'a hahaa rir sunuwar  
onno.’ ”\*

14 Yesus aile nikoin makun,  
ri man mak toko roro ma ein  
he'ehe'e mai, la An hi'i wa'an.

15 Imam lalapa roro meser  
Horok Lap enihe ra'ahan ono  
do'on Yesus hi'i ha ri kan  
dodo'onnala makun onne,  
la derne tatan'ukun maha  
ra'uli rasa'a Ai lolo onne  
ra'aheni, “Ai ma'uli masa'a  
Daud Ananne!”

16 Ende hi ra'ukani Yesus  
na'ahenia, “Om derne tatana  
eniye nihe rira ul'uli sasa'eni,  
ee ka?”

An walha na'ahenia,  
“Ya'u derderne. Lo'o kam  
lesala Horok Lape Lirna  
ma na'ahenia, ‘Om hi'i  
tatan'ukun roro tatana man  
huhuhu makun ra'uli rasa'a  
O Oin Naran wawa'an.’ ”\*

17 Kame’ede An hoikaruwedidi  
hi, la namhara kote nala'a  
leke Betania, namkuru lolo  
onne.

*Ara ono ma kan woi  
(Mrk. 11:12-14, 20-24)*

18 Nohoropo Yesus wali  
wali'ur laa Yerusalem, kan  
rakan makun namlaredi  
me'e.

19 An do'on ara onida  
aile kalla arkanne, de laa  
na'urani ara onne na'inau

\* 21:5 Zak. 9:9 \* 21:9 Mzm. 118:25-26  
Mzm. 8:2

\* 21:13 Yes. 56:7, Yer. 7:11 \* 21:16

ke'ede, woi, ee ka. Maa kan woi, kawin mamani, de Ai nakineri ara onne na'henia, "Kam woi laa ewi-ewi me'e!" Idewe ara onne namlau la makiyedi.

<sup>20</sup> Yesus Nina man lernohi pakunohi enihe po'on ara onneni, hir polletilu de ra'ukani na'henia, "Heih! Alhi'ihepenia ara onne idewe napro'ukedie?"

<sup>21</sup> Enime'ede Yesus walhala hi na'henia, "Horhorok Ainu'u nou ma na'ono eniyeni: Lo'o mi akim naili'il wawa'an la makkene lernohi ik Makromod Lalap, mim hi'i panaeku ma naise eni haenhi. Enla lo'o mim hopon wo'or eniyeni na'henia, 'Laedi kahi raram!' wo'or eni laa.

<sup>22</sup> Ende inhawe mi mapanak lolo lir napanak, mim lernala horo mi akim naili'il kokkoo."

*Ri na'ukani Yesus An lernala molollo nano inhoi  
(Mrk. 11:27-33; Luk. 20:1-8)*

<sup>23</sup> Yesus wali wali'ur laa Makromod Lalap Nina Romleu Lapa nin nikoin mahan wakuku ne, imam lalap roro Yahudi rir leleher lalap enihe mai ra'ukani Ai na'henia, "Inhoi nala molollo ki O, penia mam hi'i ha eniyeni na'akeme?"

<sup>24</sup> An walha hi na'henia, "Lo'o Ya a'ukaniyala paphe na'ukankani ida nanu. Ya'u konohi mi Yo odi molollo nano ewi hi'i ha eniyenihe, horo nahenia paphe walha Ainu'u na'ukankani eni namlolo kokkoo:

<sup>25</sup> Yohanis onne lernala molollo nano ewi nodi oir

ulutada ri? Nano Makromod Lalap, ee nano ri mormorie?"

Kame'ede ida ma nawalha lira noro ida ra'ahenia, "Ik ka'aheni nodi Makromod Lalap Nina molollo, enlo'o na'ukani ik, 'Alhi'ihepe mi akim ka naili'il Yohanis nina wanakunue?"

<sup>26</sup> Maa lo'o ik ka'aheni, 'Nodi ri mormori nina molollo, kamka'uk heri onne, ono hi rauroinedi Yohanis onne nabi.'

<sup>27</sup> Ende hir walha ra'ahenia, "Ai ka mauroin."

Yesus na'aheni, "Ka'u konohi mi inhoi nala molollo Maya'u hi'i ha eniyeni haenhi."

*Yesus naho'ok man derne rakani Makromod Lalap noro ma kan derne rakani*

<sup>28</sup> Yesus na'aheni wali'ur, "Derne makani wawa'an wanakunu eniyeni:

Papa ida anan mo'oni woro'o. Ai lan hopon anulu na'ahenia, 'Pa'e, lere eni om laa kirne howokala.'

<sup>29</sup> Anan walha, 'Ka'u laa me'e,' maa nahinorokala wali'ur de nala'a kirna me'e.

<sup>30</sup> Papa onne hopon anan karuri laa kirna haenhi.

Anan walha, 'Wa'an pape,' maa kan laa kirna.

<sup>31</sup> Nano tatana woro'o onne inhoi lernohi aman nin akie?"

Hir walha, "Anulu eni."

Yesus ne'el imam lalap roro Yahudi rir leleher lalap onnenihe na'ahenia, "Horhorok Ainu'u nou ma na'ono eniyeni: Ri man ra'uk noho nin paipaire noro maeke man holi yaka leke yaka enihe laa onno

man Makromod Lalap nodi molollo raram rolu mi.

<sup>32</sup> Yohanis mai leke wakuku mi kalla ma namlole, maa mi akim ka naili'il nina wanakuku eni. Enimaa man ra'uk paipair noro maeke man holi yaka leke yaka derne rakaniyedi me'e. Kade mim do'onedi hi me'e, maa kam herre minim honorok panaeku la mi akim ka naili'il Makromod Lalap."

*Wanakunu man howok kirne*

(Mrk. 12:1-12; Luk. 20:9-19)

<sup>33</sup> Yesus nala wanakunu naho'ok ida wali'ur na'aheni,

"Orkirna ida lan kaman anggur kirna ida. An takin laliweweredi, na'ir lo'o rodi ramha anggur woin, la na'ariri he'u-he'u man kulu ida rodi radiyaka. Horu, ai nala kirna onne man howok kirna ida woro'o sewa, mene an laedi onno namehin.

<sup>34</sup> Rakan lere ra'ili radai nina kirna raramne, an hopon nin hophopon ri wokelu laa kokala ainin hana'are.

<sup>35</sup> Enimaa man howok kirna onnnenihe kele wokeluhe, de nukur ida, resne ida, la rodi waku wasle ida.

<sup>36</sup> An hopon ri namehin, lo'o wo'akka wolima, laa rapanak nina hana'are, maa man howok kirna onne hi'i ha ma namnenehe wali'ur.

<sup>37</sup> Kame'ede an hopon anan mememen laa napanak, ono nahinorok naheenia lo'o anan de hir horhawе.

<sup>38</sup> Maa man howok kirna enihe do'onedi orkirne anan ne, hi ida ma ne'el ida na'ahenia, 'Ai eni penia man manarna kirna enie de kesnedi leke ik manarnedi.'

<sup>39</sup> Hir kele tatana onne rodi laedi kirne paharne mene resne."

<sup>40</sup> Yesus na'ukani, "Ende orkirna onne wali mai lo'o ai nala inhawa panaeku man howok kirna onnnenihe?"

<sup>41</sup> Hir walha, "Ai lo'o nesnedi ri man ailanna onnnenihe la nala kirna ri namehin howok leke rakan lere ra'ili radai ihin ennen haromo, rala nina hana'are idewe."

<sup>42</sup> Yesus na'ukani hi, "Lo'o kam lese Horok Lape lirna makun ma na'ahenia, 'Waku man ma nayapi nakar sopoledi me'eni,

Makromod Lalap hi'iyedi namwali waku na'a'ar ma na'ono.

Makromod Lalap hi'i onne namwali,

la ik do'on ma'aruru la wa'an wake'e.'\*\*

<sup>43</sup> Ende horhorok! Mi mamhene hurinohi Makromod Lalap nodi molollo mi, de An hi'i ri noho namehin ramwali Nin ri, ono hi penia derne rakani Nin konomdere. [

<sup>44</sup> Inhoi nediyawa lolo waku eni, ihin kemen namno'o horu la maki, la inhoi waku dunie lo'o namwaliyedi elimo'o hapu.]"

<sup>45</sup> Imam lalapa roro ri Parisi enihe derness Yesus

\* **21:42** Yesus namwali waku na'a'ar ma na'ono onne. \* **21:42** Mzm. 118:22-23

† **21:44** Horok man aile lolo tanada [ ] raram, kaale lolo horok Yunani dedesne heruwali.

Nin wanakunu naho'ok onneni ne, hi rauroinedi me'e nahenia wanakunu onne na'ono hi.

<sup>46</sup> Ende hir paeku leke kele Ai, maa ramka'uk heri onne ono rauroinedi Jesus onne nabi.

## 22

### *Wanakunu yapi hohoo* (Luk. 14:15-24)

<sup>1</sup> Yesus nala wanakunu naho'ok wali'ur hi na'aheni,

<sup>2</sup> "Lere Makromod Lalap nodi molollo ri mormori naho'ok naise wanakunu eniyeni: Rai ida hi'i anan mo'oni nina yapi hohoo.

<sup>3</sup> An hopon nina man howok enihe laa polu ri man lernala popolu lalariyala enihe, maa ramhene mai.

<sup>4</sup> Kame'ede an hopon nin man howok namehin na'ahenia, 'Lam kunukunohi hi ma'aheni, "Ai mesnedi arpau noro sapiyana ida woro'o ma'akene namkenedi me'ede, lariyala."\*

<sup>5</sup> Maa ri man lernala kunukunohi onnenihe kar peinohi de heruwali rala'a rira kirne, la heruwali laa ra'olu rira hahaa me'e.

<sup>6</sup> Enla namehin kele rai nina man howok onnenihe nukur la resnedi.

<sup>7</sup> Rai derne panaeku ma namwali onneni, an ma'ara wake'e de hopon nina ma nasala ke'urauk enihe laa enne resnedi ri man ailanna onnenihe la harnedi rira kote.

<sup>8</sup> Enla an konohi nina man howok na'ahenia, 'Ha rahu na'akeme namkenedi me'e, maa ri man ya'u poluwedi onnenihe, kan wa'an polu wali'ur me'e.

<sup>9</sup> Ende mala'a kalla lapa leke moro inhoi-inhoi pakromo lariyala mai yapi eni.'

<sup>10</sup> Kame'ede hi rala'a me'e. Roro ri pakromo raka'uk, ri wawa'an noro ri ailanna, de onno man ra'akene yapi hohoo onne penuwedi me'e.

<sup>11</sup> Rai lan po'onnala ri lalariyala onnenihe, an do'on ri ida nina nainair ka nakoknohiyala wake'e ri man laa yapi hohoo.†

<sup>12</sup> Rai na'ukani ri onne na'ahenia, 'I wal'u, hi'ihehewi mai raram ler-nohi yapi eni nair nainair man namehiyale?' Maa ri onne ka na'oho wake'e.

<sup>13</sup> Enime'ede rai hopon nina man howok enihe kele ai wukuwedi liman ein la rodi laedi paharne laa noho momohon eni. Lolo onne rin lernala apinpinha wake'e la raherhere mamani.

<sup>14</sup> Makromod Lalap polu lariyala ri nammori, maa An nili ri tarana mehe ramwali Nin ri."

### *Wanakunu man pair noho nin paipaire*

(Mrk. 12:13-17; Luk. 20:20-26)

<sup>15</sup> Ka nalo'ol ne, ri Parisi enihe laa rahinopun ra'ukani Yesus leke koko Ai wakunu sala.

\* **22:4** Hi nadedem wa'an sapi anan leke poir wake'e mene resne ra'ane ma'aruru.

† **22:11** Ri heruwali man wakuku Horok Lap pene'ek nahenia rai naledi rain hohoo ri na'akeme man ai napolu, maa ri onne namhene nair rain onne ono kan horhawe rai, de rai na'ahan ai.

<sup>16</sup> Hir hopon rira ri ida woro'o roro Herodes nin muku heruwali laa ra'ukani na'ahenia, "Pap Meser, ai mauroin Pape akin ma nadudu de wakuku panaeku ma namlolo mamani, la ai mauroin Pape wakuku hi'ihehewi Makromod Lalap nodi molollo ri mormori lernohi honorok panaeku ma namlolo. Enla Papa mamkene mehe derne Makromod Lalap, ri mormori ka, ono Om horhawa ma na'alehe haida-haida namnenehe noro orkanaru.

<sup>17</sup> Ende ai ma'ukaniyala Pape haida ke'e: Lernohi iknika agame nina holoor halauk, lo'o wa'an ik pair noho nin paipaire laa hair Roma nina rai lalap, ee ka?"

<sup>18</sup> Maa Yesus nauroin-naledi rira panaeku yake onne me'e, de na'aheni, "Eih! Ri man kokme'e mammwali ri molololo mi! Alhi'ihepeni mim ken kokwudi Ya'ue?"

<sup>19</sup> Ken mala minim kupan modi lam pair noho nin paipaire onne I po'onale ke'e." Hi rala kupan pere ida An po'on ne,

<sup>20</sup> na'ukani, "Inhoi oin makan la inhoi naran melle kupan eniyeni?"

<sup>21</sup> Hir walhe, "Kaisar."

Ende Ai na'aheni, "Inhawa man Kaisar nina, mala Kaisar, la inhawa man Makromod Lalap Nina, mala Makromod Lalap."

<sup>22</sup> Hir derne Nina wanakunu eniyeni, hir mehe nanana mouwedi la rala'a me'e.

*Ri man makiyedi mori wali'ur*  
(Mrk. 12:18-27; Luk. 20:27-40)

<sup>23-24</sup> Lere onne me'ede, ri Saduki ida woro'o aile lolo onne haenhi. Heri Saduki onne rira honorok panaeku ri man makiyedi kar mori wali'ur. Hir mai Yesus ra'aheni, "Pap Meser, nonolu eni Musa hopon nahenia lo'o mo'oni ida ho, maa makiyedi na'alehe tatana, walin ho wali'ur orno onneni leke lernala tatana nahinerre walla man maki eni.\*

<sup>25</sup> Enla nano mayai eni ri wo'ikku aile ma na'umo'oniwali. Anulu ho, maa makiyedi na'alehe tatana, penia maeke ho wali'ur walin leke lernala tatana nahinerre walla man maki eni,

<sup>26</sup> maa walla onne maki wali'uredi. Panaeku eni namwali lolo ri wo'ikku onnnenihe.

<sup>27</sup> Man horue, maeke onne makiyedi haenhi.

<sup>28</sup> Ende lere ri man makiyedi mori wali'ur, nano mo'oni wo'ikku enihe, inhoi namwali ai hono?"

<sup>29</sup> Yesus walha hi na'ahenia, "Memen mim sala wake'e, ono ka mauroin Makromod Lalap Lirna Wawan noro Nina ke'eke'el an'anhe.

<sup>30</sup> Rakan lere ri man makiyedi mori wali'ur, hir mori naise Makromod Lalap Nina hophopon a'am raram, de kar ho me'e.

<sup>31</sup> Enimaa lo'o kam lesale Makromod Lalap Lirna ma

\* 22:23-24 Ul. 25:5

na'ono 'ri man maki mori wali'ur' makun. Ai na'heni,

<sup>32</sup> 'Ya amwali Makromod Lalap man Abraham, Isak, noro Yakup ra'ul'uli rasa'sa'a rakan lere eniyeni.' Ri man makiyedi ka ra'uli rasa'a Makromod Lalap, maa ri man mori penia ra'uli rasa'e!"‡\*

<sup>33</sup> Heri man derne onnenihe aki'aki ulla ono raram nodi rehi Ainina wanakuku eni.

*Makromod Lalap Nin keneri hono'ok ma na'ono*  
(Mrk. 12:28-34; Luk. 10:25-28)

<sup>34</sup> Lere muku Parisi derne Jesus wakunu hi'i muku Saduki enihe ka rauroin wakunu me'e, hir lawuku,

<sup>35</sup> la rir meser ida ma nau-roin Makromod Lalap Nin keneri hono'ok wawa'an laa na'ukani Yesus leke kene.

<sup>36</sup> Ai na'heni, "Pap Meser, lolo Makromod Lalap Nina keneri hono'ok na'akeme, ewi penia ma na'ono narehi?"

<sup>37</sup> Yesus walha hi na'henia, "Modi mi honorok akin, mi irhun raramne noro minim ruri pe'el na'akeme maramyaka Makromod Lalap ma namwali Makrommu." \*

<sup>38</sup> Onne penia Makromod Lalap Nina keneri hono'ok ma na'ono la ma nolu!

<sup>39</sup> Rewro'o nine namnenehe: Maramyaka minim ri mor-mori wali naise maramyaka mi kemmu. \*

<sup>40</sup> Ende Makromod Lalap Nina keneri hono'ok na'akeme noro nabi rira wanakuku enihe, melle keneri hono'ok woro'o eniyeni."

*Yesus namwali Daud Anan noro idewe Daud Makromon*  
(Mrk. 12:35-37; Luk. 20:41-44)

<sup>41</sup> Parisi enihe ka rahina'ar lolo onne makun, Yesus na'ukani hi,

<sup>42</sup> "Menmelollo minim honorok panaeku, Mesias (Kristus) man Makromod Lalap kikan namwali Rai laa ewi-ewi onne inhoi ananne?"

Hir walha, "Daud Anan."

<sup>43</sup> Ai na'ukani wali'ur na'henia, "Alhi'ihepe Daud napolu Ai onne, 'Makrom'u,' lere Roh Kudus nodi molollo aie? Lere onne Daud na'henia lolo Horok Lape,

<sup>44</sup> 'Makromod Lalap ne'el i Makrom'u na'henia: Maikoro I her'u malanne hehen nanumene Ya'u hi'i Num arwali enihe lolo yawa ki O.' \*

<sup>45</sup> Ende lo'o Daud napolu Ai 'Makrom'u', hi'ihehewi namwali anan mememen?"

<sup>46</sup> Ri mahaku ka nauroin walha, la nano lere onne me'ede ri namka'uk na'ukani haida-haida Ai me'e.

‡ 22:32 Onneni nin panaeku nahenia ri wokelu onnenihe mormori makun ono ri man makiyedi ka ra'uli rasa'a Makromod Lalap. An wakunu heheni ono lere onne Abraham, Isak, noro Yakup makiyedi lolo noho wawan, maa mori wali'ur lolo a'am raram. \* 22:32 NN. 3:6, 15 \* 22:37 Ul. 6:5 \* 22:39 Im. 19:18

\* 22:44 Mzm. 110:1

**23**

*Yahudi rir man panulu lernala hunukum*  
(*Mrk. 12:38-39; Luk. 11:43, 46, 20:45-46*)

<sup>1</sup> Yesus ne'el heri onnenihe noro Nina man lernohi pakunohi enihe

<sup>2</sup> na'aheni, "Meser-meser Horok Lap noro ri Parisi rodi molollo ra'amou ra'aropo agame nina keneri hono'ok.

<sup>3</sup> Inhawe man hir wakuku la hopon hi'ie, lernohi na'akeme, maa yono lernohi rira hini'i wenewhe, ono hir wakuku ri, maa rira hini'i wenewhe kan lernohi rira wanakuku eni.

<sup>4</sup> Hi rodi yodiwara man werek duni ta'al ri leke lernohi kenekrohu hi raralen, maa hi me'ene, kar paku ri lernohi rira kenekrohu onneni.

<sup>5</sup> Hir hi'i ha wo'ira na'akeme leke rin po'on ra'uli rasa'ahe. Po'onala, hir loile Makromod Lalap Lirna dosi man lapa tarana raram lawuku lerene noro liman apun mariri, la hi'i ho'ir man harna naru rodi hi'i lir napanak leke rin po'on ra'uli rasa'a. \*

<sup>6</sup> Hir laa Yahudi rira kerei raram suk raikoro kalari. Hir laa yapi suk raikoro mei uluwakun.

<sup>7</sup> Lo'o hir pakromo ri lolo kalla, lolo pasar, hir suk lernala honoor hanawa la suk ri napoluhe 'pap mesere'.

<sup>8</sup> Maa yono raram nodi ri napolu mi 'papa meser', ono mi eniyenihe ma na'umo'oniwali la minim Meser ida mehe.

<sup>9</sup> Lolo noho eni wawan yono mapolu ri, 'ame', ono Makromod Lalap man aile a'am raram mehe namwali mi Ammu,

<sup>10</sup> la yono raram nodi ri napolu mi 'man panulu', ono minima Man Panulu ida mehe, onneni Mesias man Makromod Lalap kikanedi namwali Rai laa ewi-ewi eni.

<sup>11</sup> Nano mi eniyenihe inhoi namwali man panulu, ai onne ilitolle ki mi.

<sup>12</sup> Enpenia inhoi holi kukulu lalapa lo'o ra'idaruwed, la inhoi helkaki-namdaru lo'o ra'akulu ra'alapedie."

*Yahudi rira man panulu mayo'o ono kokpoho*

(*Mrk. 12:40; Luk. 11:39-42, 44, 47-52, 20:47*)

<sup>13</sup> Enla Yesus konohi meser Horok Lap roro ri Parisi enihe na'ahenia, "Mi man kokme'e mamwali ri molololo mi! Mim mayo'o! Mi me'ene mamhene hurnohi Makromod Lalap nodi molollo mi, la mim kawala ri man raram nodi namwali Nin ri haenhi!

[

<sup>14</sup> Mi man kokpoho mie! Mim mayo'o wake'e, ono mahoro maeke walwalum rira hahaa noro rira nakar, maa kokme'e mamwali ri man wa'an de hi'i lir napanak ma nalo'ol leke ri na'uli nasa'a mi.]\*

<sup>15</sup> Mi man kokme'e mie! Mim mayo'o, ono mim lalaa mamaiyala lolo lour lolo ro, manoin ri ida mim paekunala wakuku leke akin

\* **23:5** Bil. 15:38, Ul. 6:8 \* **23:14** Horok man aile lolo tanada [ ] raram, kaale lolo horok Yunani dedesne heruwali.

namrana lernohiyedi minim holoor halauk na'akeme. Mim hi'i ai ailanna narehi mi penia namlolo kokkoo an laa kawali pire ai porom raram.

<sup>16</sup> Mi mamwali man panulu man makan tokedi, de mim mayo'o, ono mim wakuku ha ma ka namlolo ma'heni, 'Inhoi kikan hopo wekel Makromod Lalap Nina Romleu Lapa, ai onne nina hopo ka naruri, ma inhoi kikan hopo wekel mahe man aile Makromod Lalap Nin Romleu, ai onne ka nahinuri nano nina hopeni.'

<sup>17</sup> Mi ka mauroin haida! Makromod Lalap Nin Romleu Lapa namwali ha ma na'ono narehi maha man aile Romleu raram onne. Romleu onne penia ma na'amou na'adewe maha onneni.

<sup>18</sup> Mim wakuku haenhi ma'heni, 'Inhoi kikan hopo wekel honoi kanani onno lolo Makromod Lalap Nina Romleu, nin hopo ka naruri, maa lo'o an wekel nina honoi kanani man aile lolo honoi kanani onno onne wawan, Makromod Lalap kan huri ai hamlinu nin hopeni.'

<sup>19</sup> Heih, maktoko mie! Ma'alehe honorok aki! Honoi kanani onno onne na'ono narehi ha ma namwali honoi kanani onne. Honoi kanani onno onne penia ma na'amou na'adewe ri nin honoi kanani onne.

<sup>20</sup> Ende inhoi kikan hopo wekel honoi kanani onno, ai onne kikan hopo noro idewe hahaa na'akeme man aile lolo honoi kanani onno onne wawan,

<sup>21</sup> la inhoi kikan hopo wekel Makromod Lalap Nin Romleu Lape ai onne kikan hopo noro idewe Ri man holi Romleu onneni,

<sup>22</sup> la inhoi kikan hopo wekel a'am raram, ai onne kikan hopo Makromod Lalap Nina naikoronno noro idewe Ma naikoro lolo onne!

<sup>23</sup> Heih, meser-meser Horok Lap noro ri Parisi mie! Mim mayo'o. Mim kokme'e mamwali ri molololo manmani ono mi mala Makromod Lalap Nin hana'are, persen idaweli nano minima rampa-rampa ma naise: ta'arutuk, lahono, limarra, lakwahi. Maa ha ma na'ono lolo Makromod Lalap Nina keneri hono'ok mim hamlinuwedi naise: ho'ok kail ri modi honorok akin man mou, ida man kukul aki man wa'an ida, la mamkene lernohi Makromod Lalap mamani. Ha ma na'ono onnenihe mi akim ka na'in'i'ik wake'e. Wa'an rehi mim ilitolle ha ma na'ono onne noro idewe hi'i namehin onne haenhi.\*

<sup>24</sup> Heih, ma na'alehe honorok aki mie! Mi maisa ri man ka'i paripari romok man kaile minim nonomun onno mene momune, maa ha mor-mori unte mim kelledi, kam eremnala haida. Ha ma ka na'ono mim loi honorok, maa ha ma na'ono ka.

<sup>25</sup> Heih, meser Horok Lap noro ri Parisi mie! Mim mayo'o ono kokme'e mamwali ri molololo manmani. Mi mahoro ri namehin rira hahaa la horok mi kemen mehe, maa mim hi'i

\* 23:23 Im. 27:30

ha wo'ira leke rin do'on rauroin mi mamwali ri ma akin mou. Mi maisa nonomun onno noro ra'u man ri nawana paharne mehe, maa raram mormorso noro ha ma namehiyala wake'e.

<sup>26</sup> Heih, maktok mi, ma'alehe honorok aki! Ma'amou nonomun onno noro ra'u raram nolu, leke paharne mou haenhi.

<sup>27</sup> Mi Parisi moro meser Horok Lap man kokme'e mamwali ri molololo enihe! Mim mayo'o wake'e, ono mi eniyenihe maisa lunna man mesel la ra'awarhedi. Rin po'on pene'ek onne ma'aruru, maa lolo raram maki ruri la ha ma na'itehedi me'e.

<sup>28</sup> Mi maise onneni, ono mim posい paharne rin po'on minim morimori ma'aruru la ra'aheni, 'Ri onne hi'i ha ma namlolo lolo Makromod Lalap kalarna,' maa hi kar do'on lolo mi honorok akin panaeku yaka mamani.

<sup>29</sup> Mim lernala hunukum man werek ono kokme'e mamwali ri molololo. Mim mesel nabi-nabi roro ri ma akin mou rira lunne, hi'i kulu la ma'akeki ma'aruru.

<sup>30</sup> Enla mi ma'ahenia, 'Lo'o am mori wewerre noro ai upun a'um nonolu eni, ai kam lernohi hi mesne nabi onnenihe!'

<sup>31</sup> Enpenia nano minima wanakunu onneni mehe kuku maka nahenia mi mamwali ma nesne nabi onnenihe upun anan.

<sup>32</sup> Ende lam hi'i na'ahoruwediacipolu mi mai leke leluwai makrana naise manu orana man rawa ananne, maa mamhene mai.

### *Makromod Lalap lo'o nala hunukum meser Horok Lap noro ri Parisi*

<sup>33</sup> "Heih, ri man ailanna ihin rarna mi. Mi maise haimoke! Yom pene'ek maha la mi nano kawali pire ai porom raram!

<sup>34</sup> Lere man mai Ya'u lo'o hopon nabi-nabi, ri ma nauroin, noro meser-meser mai ki mi, maa mi lo'o mesne heruwali, namehin wairesne lolo au kekiyowok, heruwali hi'i apinpinha kemen, la heruwali mohi ramhara laa kote namehin.

<sup>35</sup> Onne penia Makromod Lalap nala hunukum mi. Onne kan mehe, maa ri man hi'i ha ma namlolo na'akeme man mi upum a'umhe resnedi nonolu nano Habel rakan man kauli'ur Barekya ananne Zakaria, hi na'akeme ramwali minim yodiwara haenhi. (Zakaria onne hi resne lolo Makromod Lalap Nin Romleu Lape noro honoi kanani onno leken.)

<sup>36</sup> Horhorok Ainu'u nou ma na'ono eniyeni: Memen ma'uwaru yodiwara ha man yaka onne na'akeme, la Makromod Lalap lo'o hukum mi ku eniyeni."

*Yesus raram penu po'on  
Yerusalem ne'en raram  
(Luk. 13:34-35)*

<sup>37</sup> Yesus na'aheni wali'ur, "Yerusalem mie, mi mesne nabi enihe la wadesne hophopon wahwahan man Ya'u hopon mai ki mi eni. Ler romromo Ya'u raram nodi makrana naise manu orana man rawa ananne, maa mamhene mai.

<sup>38</sup> Enpenia minima Romleu  
Lape lo'o hoikaruwedi den  
māmu.

<sup>39</sup> Enla Ya'u konohi mi,  
nano lere eniyeni me'ede  
kam do'on Ya'u hehen  
nanumene rakan lere mi  
ma'heni,

'Makromod Lalap namre'e  
namharu Ai man mai nodi  
Naran man kulu narehi!' ” \*

## 24

*Arwali lo'o naiye'er  
Makromod Lalap Nina Rom-  
leu*

(Mrk. 13:1-2; Luk. 21:5-6)

<sup>1</sup> Yesus wakunu onne  
na'akeme horu, hi ramhara  
nano Romleu Lap onne  
kan ko'u makun, man ler-  
nohi pakunohi enihe laa  
ra'urani Ai la kukulle Romleu  
Lapa noro nin romo ma  
aile na'uranrani onnenihe  
ra'henia, "Po'onala, Pape,  
onne ma'aruru wake'e!"

<sup>2</sup> Maa Yesus ne'el hi  
na'henia, "Horhorok Ainu'u  
nou ma na'ono eniyeni:  
Lere eniyeni mim po'on  
ha onnenihe na'akeme  
ma'aruru, maa lere man  
mamai eni arwali mai de  
raiye'er mouwedi Romleu  
Lap onne de nina waku  
danaran na'akeme ida ka  
nadinara ida me'e."

*Wewerek pananaka lere  
man mai*

(Mrk. 13:3-13; Luk. 21:7-  
19)

<sup>3</sup> Horu ne, Yesus noro Nina  
man lernohi pakunohi enihe  
rala'a wo'or Zaitun raikoro  
wukuwedi la ra'ukani  
Yesus na'henia, "Ken Pape  
konohiyala mayai ke'e, ha

eniye nihe lo'o ma'anana  
namwali? Am lernala  
inhawa tanada man kukul  
mayai lere Pap mai wali'ur,  
la noho nin lere alam man  
horu."

<sup>4</sup> Yesus walha na'ahenia,  
"Nakinemen ki mi, kalo'o rin  
paipudi mi,

<sup>5</sup> ono ri nammori lo'o rodi  
I naran mai ra'ahenia, 'Ya'u  
eni, Kristus man Makromod  
Lalap kikan namwali Rai!' de  
paipudi ri nammori.

<sup>6</sup> Mi lo'o derne ara mamani  
noro lir anna are lolo ewi-  
ewi, maa yon mamkauk.  
Ha eniyenihe na'akeme  
namwali, maa yono pene'ek  
rakanedi noho nin lere alam  
man horu.

<sup>7</sup> Noho pa'i'ik rai pakakar  
lo'o ida ma na'ara noro  
ida, hair noro hair, la noho  
wawan na'akeme lernala  
roulara noro rururuwai  
lalap.

<sup>8</sup> Wewerek pananaka  
onnenihe ha ma namwali  
nolu, maa lere alam man  
horu onne na'urani ne, eren  
apipinha.

<sup>9</sup> Lere onne rin kele mi leke  
hi'i apinpinha, resne, la ri  
noho wawan na'akeme kar  
suk mi, ono mim lernohi Ya'u.

<sup>10</sup> Ri ma akin naili'iledi  
Ya'u me'e, hoi kili'urn kani  
ko'oredi Ya'u, la ida ma  
ka naramyak ida, ida ma  
na'okul ida laa arwalie.

<sup>11</sup> Ri nammori kokme'e mai  
rodi Ya'u naran paipudi ri  
nammori.

<sup>12</sup> Lere onne, ida ma kan  
holi wawa'an noro ida me'e,  
ono lolo ewi-ewi ri ailanna  
aile.

\* 23:39 Mzm. 118:26

<sup>13</sup> Maa inhoi namkene lernohi Ya'u rakan nina lere horu, ai onne lernala or'ori dardari ma kan horu.

<sup>14</sup> Lolo noho wawan na'akeme, rin loikaru Makromod Lalap Lirna Wawa'an ma na'ono hi'ihehewi Ai nodi molollo ri mormori eni. Lirna onne ri mormori lolo noho wawan na'akeme derne mouwedi nanumene lere alam nina man horu."

*Wewerek pananaka man werek narehi*

(Mrk. 13:14-23; Luk. 21:20-24)

<sup>15</sup> "Lere onne mim do'on 'Ha Man Ailanna ma na'ihoru na'idaru Makromod Lalap mamani' namriri lolo Moumou Dewdewe Onno.\* Nonolu nabi Daniel konohiyedi ha onne namwali. (Ri man lese horok eniyeni loi honorok wawa'an panaeku eniyeni.) \*

<sup>16</sup> Lere onneni ri ma aile Yudea lari mouwedi laa wo'or!

<sup>17</sup> Ri ma aile nakar wuwane kopur pelekleke, maa yon laa romleher nala haida,

<sup>18</sup> la ri man aile kirna yono wali laa nakar rala rira nainaire.

<sup>19</sup> Lere onne maeke ma nornoro raramne, man anan huhuhu makun, apinpinha nore!

<sup>20</sup> Ende hi'ilir napanak leke panaeku onne yono namwali lere noho ma'urinrinna me Alam Renren Warwarne.

<sup>21</sup> Lere onne, ri mormori lernala wewerek pananaka wake'e. Nano noho namwali

me'ede rakan lere eniyeni ri kan do'onala wewerek pananaka ma naise onneni makun, la ka namwali wali'ur naise onne me'e.\*

<sup>22</sup> Lo'o Makromod Lalap ka na'adeul lere alam onneni, ri na'akeme lo'o maki mouwedi. Ai na'adeul lere alam onne ono Ai nararamyaka Nina ri ninili enihe.

<sup>23</sup> Lere onne lo'o ri ne'el mi na'ahenia, 'Po'onala! Kristus man Makromod Lalap kikan namwali Rai aile mai eni, ee aile lolo onne,' yono derne makanie.

<sup>24</sup> Lere onne ri ma nodi konoko wunudi heruwali ra'aheni hi ramwali Kristus, la heruwali ramwali nabiniabi ma ka namlolo. Hi lo'o mai hi'i tanada lewlewen noro ha ri kan dodo'onnala makun haenhi leke kene paipudi ri nammori. Hir kene paipudi ri man Makromod Lalap niliyedi me'e haenhi, maa lo'o ka namwali.

<sup>25</sup> Ende loi honorok memen! Ya'u konohiyedi mi ha eniyenihe na'akeme nolu mene namwali.

<sup>26</sup> Ende lo'o ri konohi mi na'ahenia, 'Kristus aile noho mamun,' yono mim laa enne, la lo'o ra'aheni, 'Aile mai lolo kamar raram,' yono derne makanie.

<sup>27</sup> Lere Ya'u ma namwali Ri Mormori Anan mai wali'ur rin do'on naise noho lerlere nano kimur hikkan rakan idewe warak.

<sup>28</sup> Lo'o mim do'on tanada onne na'akeme mi mauroin nahenia lere Ya'u wali mai

\* **24:15** 'Moumou Dewdewe Onno' wekel Makromod Lalap Nin Romleu Lape.

\* **24:15** Dan. 9:27, 11:31, 12:11 \* **24:21** Dan. 12:1, Why. 7:14

wali'ur na'uranraniyedi  
me'e, naise mim do'on manu  
arpau nemmori luplupur  
onnida, mi mauroin lolo  
onne ya'anne aile."

*Yesus wali mai noho  
wawan*  
(Mrk. 13:24-27; Luk.  
21:25-28)

<sup>29</sup> "Rakan lere alam wewerek pananake man werek onne horu, lere kan hari, wollo kan ropo, kaliyore nadiya'ur nahoho'ok nano a'am, la hahaa na'akeme man aile a'am narururu." \*

<sup>30</sup> Lere onne mene do'on tanadida lolo a'am man kukul nahenia Ri Mormori Ananne mai me'e, de ri mormori noho wawan na'akeme sus mak oir mamani. Enlahir do'on An mai lolo hulik poloi kakam palari nodi Nina ke'eke'el ar'anha noro siksika lerlere man ma'aruru wake'e. \*

<sup>31</sup> Lere onne, derne kowuri man lirna lap wake'e, la An hopon Nina hophopon a'am raram lar polu ri mormori na'akeme man Makromod Lalap niliyedi lolo noho huhun wo'akkenihe, nano a'am ki'ile rakan a'am ulla maiwuku."

*Wanakuku nano ara ono*  
(Mrk. 13:28-31; Luk.  
21:29-33)

<sup>32</sup> Yesus wakunu wali'ur na'ahenia, "Mala wanakuku nano ara ono. Rakan lere hinan hanan napupul naweti la moko, mi mauroin nahenia

ka nalo'ol me'e ara ono<sup>†</sup> onne lo'o woi me'e.‡

<sup>33</sup> Nammenehe noro ara ono onne, lere mim do'on ha-haa onne na'akeme namwali, mi mauroinedi nahenia Ainu'u lere alam mai wali'ur wakuraniyedi me'e.

<sup>34</sup> Horhorok Ainu'u nou ma na'ono eniyeni: Ha eniyeni na'akeme namwali mouwedi nolu mene kulere eniyeni maki horu.

<sup>35</sup> A'am noro noho lo'o moluloin, maa I Lir'u eni kan molu laa ewi-ewi."

*Ri ka nauroin lere alam  
Yesus mai wali'ur*  
(Mrk. 13:32-37; Luk.  
17:26-30, 34-36)

<sup>36</sup> "Ri mahaku ka nauroin ma'anana lere alam onneni namwali. Maya'u, hophopon a'am raram, la ri mormori na'akeme ka rauroin. Ya Am'u, Makromod Lalap mehe nauroin.

<sup>37</sup> Lere Ya'u ma namwali Ri Mormori Anan mai wali'ur, ri mormori rir hini'i wenewhe ailanna naise ik upud a'ad Nuh nin kulere nonolu eni. \*

<sup>38</sup> Lere oir rulu lape kan mai makun, ri mormori onne lawuku hi'i ya'an yomun noro yapi hohoo mamani rakan lere Nuh laedi kapal raram,

<sup>39</sup> la hi kar eremnala haida hehen nanumene okon noro oir rulu lape nakliu pupin mouwedihe de ka naurehiyala haida. Onneni namwali lere Ri Mormori Anan mai noho wawan haenhi.

\* 24:29 Yes. 13:10, 34:4, Yeh. 32:7, Yl. 2:10, 31, 3:15, Why. 6:12-13  
Dan. 7:13, Zak. 12:10-14, Why. 1:7 † 24:32 Ara ono lolo Yotowawa ka namnehe noro ara ono lolo Israel. Kene po'onala lolo kamus ma aile Horok Lap eni honon.

‡ 24:32 Po'onala Mrk. 13:28 nin catatan kaki. \* 24:37 NN. 6:5-8

<sup>40</sup> Lere onne ri woro'o mahar howok aile kirna, ida nakinikan laa wawan la ida hoikaruwedi,

<sup>41</sup> la maeke woro'o mahar wain kele'uk, ri ida hoikaruwedi la ida nakinikanedi.

<sup>42</sup> Mi ka mauroin lere alam Ya'u ma namwali mi Makrommu mai wali'ur noho wawan, de mamkene madiyaka wawa'an.

<sup>43</sup> Lo'o ornakar ida nau-roinedi ma'anana ri ma namna'a mai nakar, ai nadiyaka wawa'an leke yono mai raram.

<sup>44</sup> Ende ma'akenkene mi mamani, ono lere alam Ri Mormori Anan mai, ka mau-roin."

*Yom mammali ma kan howok wawa'an*  
(Luk. 12:41-48)

<sup>45</sup> Yesus na'heni wali'ur, "Lo'o man howok ida nampe'el la nauroin, ai onne penia makromon kikan namwali uluwakun nin man howok na'akeme, leke kakar hanana'an man howok onnenihe ra'an.

<sup>46</sup> Enla lere makromon mai wali'ur do'on nin man howok onne mahan howok, man howok onne akin nahuwa'anedi.

<sup>47</sup> Loi honorok wawa'an Ainu'u panaeku ma na'ono eniyeni: Makromon onne kikan nin ri onne nadiyaka nina linikir kanaru na'akeme.

<sup>48</sup> Maa lo'o man howok onne hi'i ailanna, la nahinorok lolo akin na'henia,

<sup>49</sup> 'Makromon nalo'ol mene mai,' de an nukur man howok wali la na'an nomun noro ri ma nomun arak manha mamani,

<sup>50</sup> namlilinnohi makromon wali mai lere alam man howok onne ka nauroin.

<sup>51</sup> An daresne man howok onne la sopoledi laa onno ri man kokme'e ramwali ri molololo enihe miminle. Lolo onne rin lernala apin-pinha la sus mak oir kan horu."

## 25

*Wanakunu naho'ok  
maekrara ma nauroin noro  
ma naploo*

<sup>1</sup> Yesus wakunu wali'ur na'ahenia, "Lere onne, Makromod Lalap Nin molollo naise wanakunu naho'ok eniyeni:

Maekrara idaweli ra'akene obor rodi laa kokala man ho mo'oni ida.

<sup>2</sup> Nano maekrara idaweli onnenihe, wolima rauroin la wolima raploedi.

<sup>3</sup> Maeke ma naploo onne, rodi obor, maa ka ra'akene mintana aimehi loile potol,

<sup>4</sup> la maeke wolima ma nauroin onnenihe ra'akene mintana aimehi rodi.

<sup>5</sup> Enla newek man ho nalo'oledi mene mai, de makanhe nasoi me'ede, ramkuru mahaledi.

<sup>6</sup> Ende rakan alam torowali mene derne ri ida wakau na'ahenia, 'Man ho meneni me'e de mam kokala here.'

<sup>7</sup> Idewe ramaka po'on rir obor morna ma'uledi me'e, de ra'akene rir obor leke moriyala wawa'an.

<sup>8</sup> Enine maeke wolima ma ka nodi mintana enihe rapanak ma nodi onne ralala tarana loiyale rira obor here ono rira mintana horuwedi me'e.

<sup>9</sup> Maeke man rira mintana aile onne ra'heni, 'Kan yadi, kalo'o kan nokor mayai. Wa'an rehi mala'a tokue weliyalida.'

<sup>10</sup> Kame'ede hir laa me'e. Hi rala'a, kan maha ne, man ho rakanedi, de maekrara man rira obor mormori onnenihe kokale la rore ra'alono laa nakar man korowuku ra'ukwuku onne raram nanumene elekedi nike, laa ra'an romun wewerre!

<sup>11</sup> Maeke man weli mintana onnenihe wali laa, rapolu na'ahenia, 'Makrom'u, hariyedi nike mayai ke'e.'

<sup>12</sup> Man ho onne walha na'ahenia, 'Ya'u konohi mi namlolo kokoo: Ka auroin mi!' "

<sup>13</sup> Ende Yesus na'aheni, "Onne penia Ya'u nounaku mi, madiyakyaka mamani ono ka mauroin ors, jam, me lere alam Ya'u mai wali'ur!"

*Wa'an rehi man howok nampe'el paku makromon*

(Luk. 19:11-27)

<sup>14</sup> "Enla lere Makromod Lalap nodi molollo ri morriyaneni, naho'ok naise wanakunu eniyeni: Ri ida na'akene nala'a noho man koko'u de hopon nina man howok radiyaka nina linikir kanaru.

<sup>15</sup> Ende ai nala kupan man howok wokelu nodnohi rira woroin. Enpenia nala ri ida kupan mahe riwan wolima, ri ida kupan mahe riwan woro'o, la ri ida kupan mahe riwan ida. Horu ne, ai nala'a.

<sup>16</sup> Kame'ede man lernala kupan mahe riwan wolima onne namhara laa nahehe

nina ma na'ikar la ma na'uwali. Ainina nahehe onne lernala na'uwalin riwan wolima wali'ur.

<sup>17</sup> Man lernala mahe riwan woro'o eni nala'a, an lernala na'ikar na'uwali riwan woro'o haenhi.

<sup>18</sup> Maa man lernala kupan mahe riwan ida onne, laa na'ir lo'o suwaredi.

<sup>19</sup> Enla makromon onne nalo'oledi mene wali laa nakar. Lere an rakan nakar, napanak hi rala rira honowok man rahehehe noro na'ikar na'uwalla.

<sup>20</sup> Ri man lernala kupan mahe riwan wolima onne nodi nina mai na'aheni, 'Makrom'u po'on! Kupan man mala maya'u, na'ikar na'uwali riwan wolima de na'akeme riwan idaweli.'

<sup>21</sup> Makromon na'aheni, 'Onuma nahehe onne ma'aruru. O mamwali man howok man wa'an! O mamkene paku ya'u. Nonolu ya ala honowok tarana, o madiyaka wawa'an, de ya ala yodiwara nammori ki o. Lariyala mai raram min noro maya'u, la akim nahuwa'anedi here.'

<sup>22</sup> Onne horu, man lernala kupan mahe riwan woro'o mai na'aheni, 'Makrom'u, po'on! Kupan mahe riwan woro'o man mala maya'u, na'ikar na'uwali riwan woro'o de na'akeme kupan riwan wo'akka.'

<sup>23</sup> Enpenia makromon na'aheni, 'Onuma nahehe onne ma'aruru la o mamwali man howok man wa'an! O mamkene paku ya'u. Nonolu ya ala honowok tarana ki o, la madiyaka wawa'an, de

ya ala yodiwara nammori ki o. Lariyala mai raram min noro maya'u, la akim nahuwa'anedi here.'

<sup>24</sup> Enla man lernala kupan mahe riwan ida onne mai ne'el na'henia, 'Makrom'u, ya auroin nahenia makrom'u ri man owok, ono makrom'u naise ri ma na'ilil nadai ha ma kan pepekir ariyoyone. Ri namehin howok mene papa lernala ihih ennen.

<sup>25</sup> Onne penia ya amka'uk, de laa a'ir lo'o suwaredie. Ende kokala wali'ur makrom'u nina kupan eni.'

<sup>26</sup> Makromon walha na'henia, 'O maprehenne! O ma'heni ya a'ili adai banana'an lolo onno man ka'u pekir ariyone la loiwuku banana'an man ri namehin pekir ariyone.

<sup>27</sup> Alhi'ihepe ka manoin ri mala kupan herre leke ya'u wali mai wali'ur ne, kokala noro dipin woin?'

<sup>28</sup> Makromon onne hoppo man howok namehin na'henia, 'Mala nin kupan onne kanile ri ma nina kupan mahe riwan idaweli onne,

<sup>29</sup> ono inhoi nina aiyedi me'e, lo'o lernala nammori la narehi nalewen, maa inhoi nina taran mehe aile, raledi haenhi.

<sup>30</sup> Enla sopoledi ri ma naprehen onne laa noho momohon leke min enne lernala apinpinha noro sus mak oir mamani.'"

*Lere ho'ok kail ri na'akeme*

<sup>31</sup> "Lere Ri Mormori Anan mai noro wewerre Nina hophopon a'am raram na'akeme, Ai nodi ke'eke'el an'anya ma narehi nalewen.

Lere onne Ai naikoro Nina naikoro onno man moumou dewdewe namwali Rai noho wawan na'akeme.

<sup>32</sup> Enla ri lolo noho wawan na'akeme lawuku herne kalarna leke Ai naheir hi namwali muku woro'o, naise man huri pipi naheir pipdume nano ketawe,

<sup>33</sup> leke pipdum enihe minnedi herne malanna la pipi ketawa enihe laedi herne mariri.

<sup>34</sup> Enla Rai ne'el hi man minle herne wali malanna enihe na'henia, 'Mi man Makromod Lalap namrere'e namhaharu, mai here leke manarna noho worworu man Ya Am'u na'akenedi nala mi nano noho eniyeni nina ma namwali me'e.

<sup>35</sup> Mi manarna noho worworu eni, ono lere Ya amlara mi mala ha Yo o'on, lere Ya'u marou mala oir Yo omun, la lere Ya amwali do'on awan mim kokalA'u lolo minim nakar.

<sup>36</sup> Lere Ya alehe nainair mala nainair Ya'u, Ya akni'ir mim ilitolle Maya'u, la Ya'u aile bui raram mim ka'aka'ar Ya'u.'

<sup>37</sup> Enine ri ma namlolo onnenihe walha ra'aheni, 'Makrom'u, ma'ananahe am do'on Makrom'u namlara la ai mala banana'an mo'on, la marou ai mala oir momun?

<sup>38</sup> Enla ma'ananahe am do'on Makrom'u namwali do'on awan am lariyala mai ainima nakar? Makrom'u na'alehe nainair, la ai mala nainair?

<sup>39</sup> La ma'ananahe am do'on Makrom'u nakni'ir am ilitolle, la aile bui raram am ka'are?

<sup>40</sup> Rai onne walha hi

na'ahenia, 'Loi honorok wawa'an Ainu'u panaeku ma na'ono eniyeni: Mim hi'i wewhedi haida man wa'an I wal'u ida man lolo yawa walin namehin me'e de, minim hini'i wenewhe onne naisa mim hi'i wewhedi Maya'u haenhi.'

<sup>41</sup> Enla Ai ne'el hi man minle herne mariri na'ahenia, 'Mim lernala hunukum man werek! Mamharedi lolo eni, laedi aiye man mori laa ewi-ewi eni. Aiye man mormori onne ra'akenedi Hayakyak Makromon noro nina hophopon wali minle raram.

<sup>42</sup> Lam minle aiye raram ono lere Ya amlara ka mala banana'an Yo o'on, la marou ka mala oir Yo omun,

<sup>43</sup> lere Ya amwali do'on awan ki minim nakar kam kokalA'u, la lere Ya alehe nainair ka mala nainair Maya'u. Ya akni'ir kam ilitolle Maya'u, la Ya'u aile bui raram kam ka'ar Ya'u.'

<sup>44</sup> Enime'ede hir walha ra'aheni, 'Ma'ananahe am do'on Makrom'u namlara, marou, mamwali do'on awan, ma'alehe nainair, makni'ir, la minle bui raram la kam ilitolle?'

<sup>45</sup> An walha hi, 'Loi honorok wawa'an Ainu'u panaeku ma na'ono eniyeni: Lere mamhene paku ilitolle i wal'u ida man lolo yawa walin namehin, onne naisa kam paku Ya'u haenhi.'

<sup>46</sup> Enpenia Makromod Lalap hukum hi de lernala apinpinha laa ewi-ewi, maa ri ma namlolo lolo Ai

kalarna, hir kokala or'ori dardari ma kan horu eni."

## 26

*Yahudi rir man anulu panulu paeku resne Yesus  
(Mrk. 14:1-2; Luk. 22:1-2;  
Yoh. 11:45-53)*

<sup>1</sup> Yesus nala wanakuku onne horu, Ai ne'el Nin man lernohi pakunohi enihe na'ahenia,

<sup>2</sup> "Lo'o mauroinedi me'e, inworo'o ik lernohi Paska, iknik lere alam lalap onneni. Enla lere onne kele Ya'u ma namwali Ri Mormori Anan, ralle leke wairesne lolo au kekiyowok." \*

<sup>3</sup> Enime'ede imam lalap roro Yahudi rira leleher lalap enihe lawuku hopun lolo Kayapas nina nakar. (Ai onne namwali imam man kulu narehi).

<sup>4</sup> Hir hopun leke ranoin kalla suwsuwar ida kele Yesus hukumesne.

<sup>5</sup> Enimaa ida ma ne'el ida, "Yono ik hi'i panaeku eniyeni iknik lere alam lalap, kalo'o nakoko man suk derne Yesus Nin wanakuku hi'i wowo'o ar'arra."

*Maeke ida nala wuru wola'ula'u halle Yesus uluwakun*

*(Mrk. 14:3-9; Yoh. 12:1-8)*

<sup>6</sup> Lere Yesus aile Betania, An minle Simon nina nakar. Simon onne, ri napolu 'Simon man ulik yak hi'ie,' ono nonolu eni an lernala apinhanne.

<sup>7</sup> Yesus nana'ak ne, maeke ida mai nodi wuru wola'ula'u potol ida man wella ai

\* **26:2** Kel. 12:1-27

wawan wake'e nala halle  
Yesus uluwakun.

<sup>8</sup> Man lernohi pakunohi  
enihe po'on maeke onne  
nina hini'i eni hi ra'ahan la  
ida ma ne'el ida ra'aheni,  
"Alhi'ihepenia nano'onyaka  
wuru man wella ai wawan  
onne?"

<sup>9</sup> Wa'an rehi rodi laa ra'olu,  
leke nina kupan nalle ma  
na'alehe haida-haida!"

<sup>10</sup> Yesus nauroin rira  
panaeku de na'aheni, "An  
hi'i ha man wa'an Maya'u  
menee, alhi'ihepenia mim  
hi'i yakyaka maeke enie?

<sup>11</sup> Ma na'alehe haida-haida  
aile mi leken kalarna ma-  
mani, maa ka nalo'ol Ya'u eni  
ka oro mi me'e.

<sup>12</sup> Ai nala wuru halle  
Ya'u kemen eniyeni nodi  
na'akenala I kem'u leke laa  
lunne raram.

<sup>13</sup> Horhorok Ainu'u nou ma  
na'ono eniyeni: Lolo ewi  
ewi Makromod Lalap Lirna  
raderre radaulle, maeke eni  
nina hini'i wenewhe onne  
loikaru haenhi, de ri kan  
hamlinu ai."

*Yudas paeku kele Yesus  
kanile Nin arwali*

(Mrk. 14:10-11; Luk. 22:3-  
6)

<sup>14</sup> Kame'ede ri ida nano  
man lernohi pakunohi  
idaweli woro'o onnenihe  
naran Yudas Iskariot nala'a  
laa imam lalap enihe

<sup>15</sup> na'aheni, "Lo'o mala  
inhawa maya'u leke ya ala  
Yesus kani paphe?"

Enime'ede imam lalap on-  
nenihe aki kupan pere we-  
likelu rala ai. \*

<sup>16</sup> Nano lere onne me'ede  
ai nanoin leken paharin  
leke kani Yesus laa hi liman  
aram.

*Yesus noro man lernohi  
pakunohi lernohi Paska ra'an  
romun*

(Mrk. 14:12-21; Luk. 22:7-  
14, 21-23; Yoh. 13:21-30)

<sup>17</sup> Rakan Lere Alam Lalap  
'Ra'an Roti Ma Na'alehe  
Ragi' nin lere dedesne, man  
lernohi pakunohi enihe  
ra'ukani, "Papa raram nodi  
am laa ewi ma'akene Paska\*  
nina ya'an yomun leke Pap  
na'ane?"

<sup>18</sup> Yesus walha, "Mala'a  
laa ri ida man min lolo kote  
raram ma'aheni, 'Ainima  
Pap Meser nahenia Nin lere  
alam rakanedi me'e, de Ai  
raram nodi hi'i Paska nin  
ya'an yomun noro Nin man  
lernohi pakunohi enihe lolo  
num nakar' "

<sup>19</sup> Ende hir hi'i na'akeme  
man Ai na'aheheni eni,  
de laa ra'akene hanana'an  
nonomun me'e.

<sup>20</sup> Lere helem ne, Yesus  
noro Nina ri mememen  
enihe raikoro wuku ra'an  
romun.

<sup>21</sup> Mahanoro ra'an romunu  
makun, Ai ne'el hi na'ahenia,  
"Horhorok Ainu'u nou ma  
na'ono eniyeni: Nano mi  
eniye nihe ri ida aile ma  
na'olu Ya'u, kanile ri leke  
resnA'u."

\* **26:15** Zak. 11:12 \* **26:17** Lere alam 'Paska' onne namwali Yapi 'Ra'an Roti Ma Na'alehe Ragi' nina lere dedesne. Ri nadedem resne pipdumana ra'an leke ra'ori honorok lere hi upun a'anhe minle Mesir makun. Lere onne hi resne pipdumana rala rarna sorule nike wawan noro herne wali-wali leke hophopon a'am raram man do'on tanada onne 'lewenedi' nakar onne me'e de ka nesne tatan anulu lolo nakar raram. Wanakunu lirna 'Paska' napa'ahne, 'lewenedi'.

<sup>22</sup> Hir derne Nina wanakunu onneni, hi raram penu rehi, la dohdoho ra'ukani Ai, "Pape! Lo'o maya'u, ka?!"

<sup>23</sup> Yesus walha, "Man kani Ya'u laa arwali onne ri ma noro Ya'u remen roti manuk raram wewerre."

<sup>24</sup> Ri Mormori Anan lo'o maki naise horhorok man aile Horok Lapeni, maa ri man kani Ai laa arwali onne mayo'edi me'e. Wa'an rehi ri onne inna aman kar morie."

<sup>25</sup> Enine Yudas ma nahinorok kani Yesus laa arwali onne na'ukani, "Pap Meser, maya'u, ka?"

Yesus walha, "Naisa o lirum eni."

*Yesus nala roti noro anggur Nin man lernohi pakunohi ra'an romun*

(Mrk. 14:22-26; Luk. 22:14-20; 1Kor. 11:23-25)

<sup>26</sup> Mahanoro ra'an romun ne, Yesus nala roti napanak trimkasi Makromod Lalap nanumene a'un, ha'arle Nina ri mememen enihe na'aheni, "Kokale la mo'one, roti eniyeni Yi ihin kem'u."

<sup>27</sup> Onne horu, Ai nala anggur cawan ida napanak trimkasi nanumene nale hi romun la na'aheni, "Mi na'akeme momune,

<sup>28</sup> ono anggur eniyeni Ya'u rarna man wui man kolo eni na'ono nawinau Makromod Lalap Nin nou man du'ul kali ri nammori roro Ai, la na'ohu nahala hi nano rira dohohale."

<sup>29</sup> Ya'u konohi mi, nano lere eni me'ede, ka omun anggur eni hehen nanumene rakan

lere Yo oro mi komun anggur worworu lolo Ya Am'u Nina noho worworu."

<sup>30</sup> Kame'ede hi rahinara hanara ida ra'uli rasa'a Makromod Lalap. Horu ne, hi rala'a laa wo'or Zaitun.

*Man lernohi pakunohi konohi nahenia hi ramkene lernohi Yesus mamani*  
(Mrk. 14:27-31; Luk. 22:31-34; Yoh. 13:36-38)

<sup>31</sup> Enla Yesus ne'el Nina man lernohi pakunohi enihe na'ahenia, "A'alam eni me'ede mi na'akeme lo'o hoikaruwedi Maya'u me'e, ono horhorok aile Horok Lape ma na'aheni, 'Ye esne man huri onne, la Nina pipdum ukun lariye'er rarari.'

<sup>32</sup> Maa lere Makromod Lalap na'amori Ya'u wali'ur nano maki-maki eni Yo olu mi laa Galilea."

<sup>33</sup> Petrus na'aheni, "Lo'o hi na'akeme hoikaruwedi Pape, maa maya'u ka!"

<sup>34</sup> Yesus na'aheni, "Horhorok Ainu'u nou ma na'ono eniyeni: A'alam eni me'ede manu kan kokoroi makun, o ma'aheniyedi ka mauroin Ya'u rewkelu me'e."

<sup>35</sup> Enimaa Petrus walha na'ahenia, "Kade yo oro Papa maki wewerre, maa ya'u ka a'aheni ka auroin Papa!" La man lernohi pakunohi namehin enihe ra'aheni heheni haenhi.

*Yesus hi'i lir napanak minle Getsemani*

<sup>36</sup> Onne horu, Yesus noro Nina man lernohi pakunohi enihe rakanedi wo'or Zaitun

\* 26:23 Mzm. 41:10 \* 26:28 Kel. 24:8, Yer. 31:31-34 \* 26:31 Zak. 13:7

laa onnida naran Getsemani. Ai ne'el hi na'henia, "Maikoredi lolo eni la Ya'u laa enne hi'i lir napanak."

<sup>37</sup> Ai naka'uk Petrus noro Zebedeus anan woro'o enihe ra'alono laa, la Ai akin woir la rase sus rehi.

<sup>38</sup> Enime'ede An konohi wokeluhe na'henia, "Ya akin woir rehi naise I maki me'e, de moro Maya'u madiyakyaka mai eni."

<sup>39</sup> Ende An laa kalaritara, nala kemen wali yawa nahinononow hi'i lir napanak na'henia, "Papee! Ya apanak lo'o Papa ne'e, huriyedi Ya'u nano wewerek pananaka eniyeni. Enimaa yono hi'i lernohi Ainu'u honorok panaeku eni, maa lernohi Papa Nina honorok panaeku mehe."

<sup>40</sup> An hi'i lir napanak horu, wali laa Nin ri wokelu enihe, hi ramkukuru. Ende Ai ne'el Petrus, "Alhi'ihepe kam kerhu madiyaka jam ida moro Maya'ue?"

<sup>41</sup> Madiyakyaka mi la hi'i lir napanak leke yono mi madiyaur kenene panatal de hi'i sala. Mi honorok akim namrana lernohi Ya'u, maa mi ihin kemen ka naruri."

<sup>42</sup> Yesus lan hi'i lir napanak rewro'o nina na'henia, "Ya Am'u, lo'o kalla namehin kaale, Ye e'e odi a'uwarawewerek pananaka eni. Ya apanak Ya Am'u Nina honorok panaeku namwali!"

<sup>43</sup> Horu An wali wali'ur tolle wokeluhe ramkukuru wali'ur ono makanhe nasoi rehi.

<sup>44</sup> An hoikaruwedhi hi lan hi'i lir napanak wali'ur. Nina

napanak rewkelu onne lirna namnenehe haenhi.

<sup>45</sup> Horu ne, An wali laa hi. Ai ne'el hi na'henia, "Mamkukuru makun? Rakanedi Ainu'u lere alam rala Ya'u ma namwali Ri Mormori Anan, kanile man hi'i dohohala liman raram me'e."

<sup>46</sup> Mamakedi! Mai kala'a here! Ri ma nodi honorok yaka Maya'u eni mai me'e!"

*Agame nina man panulu hopon ri kele Yesus*

(Mrk. 14:43-50; Luk. 22:47-53; Yoh. 18:3-12)

<sup>47</sup> Yesus wakunkunu makun, ri ida nano Nin ri idaweli woro'o, ma naran Yudas noro ri nammori mai rodi ilak raa noro au deul. Imam lalap roro Yahudi rira leleher lalapa enihe hopon hir laa kele Yesus.

<sup>48</sup> Yesus walin ma na'olu Ai onne, an kukunohiyedi heri onnenihe me'e na'henia, "Ya'u nair tanada eni, de ri man ya'u masi onne, mim kele here!"

<sup>49</sup> Enime'ede Yudas laa Yesus napolu, "Pap Meser," nanumene masiyedi.

<sup>50</sup> Yesus na'heni, "I wal'u, paeku inhawa penia maie?"

Idewe heri onnenihe lar kele Yesus wukuwedie,

<sup>51</sup> maa man lernohi Yesus ida lehu nin raa dara imam man kulu narehi nina hophopon ida kilinna me'ede kaprosuwedi.

<sup>52</sup> Yesus ne'el man lernohi onneni, "Kowosedi num raa wali'ur ono 'inholi nodi raa na'aromo, resne ai rodi raa haenhi."

<sup>53</sup> Om pene'ek Ya a'alehe molollo apanak Ya Am'u

hopon Nina hophopon a'am raram riwriwan halhalle mai paku Ya'ue?

<sup>54</sup> Maa panaeku eniyeni na'akeme namwali leke na'akuku na'anokor inhawa man nabi-nabi horokedi lolo Horok Lape raram me'e."

<sup>55</sup> Enla Jesus ne'el heri onnenihe na'ahenia, "Enlo'o Ya'u eni ri man ailanna penia modi kere, raa, au deul mam kele Ya'ue? Akilere Ya'u aikoro lolo Makromod Lalap Nina Romleu Lapa raram wakuku, maa mi kam kelA'u,

<sup>56</sup> maa eni na'akeme namwali leke na'akuku na'anokor inhawa man nabi-nabi horokedi lolo Horok Lape raram me'e." Lere onne man lernohi pakunohi enihe ramka'uk kelehe, de lari mouwedi.

*Rodi Jesus laa nakpali agame nina man ho'ok kail enihe*

(Mrk. 14:53-65; Luk. 22:54-55, 63-71; Yoh. 18:13-14, 19-24)

<sup>57</sup> Hir kele Jesus horu, hi rorkaru laa nakpali Kayapas ma namwali imam man kulu narehi. Lolo onne meser Horok Lap roro Yahudi rira leleher lalapa lawukuwedie me'e.

<sup>58</sup> Petrus lernohi Jesus lolo kili'ur nano ko'u rakan imam man kulu narehi onne nina nikoin. An laa naikoredi ma nadiyaka nakar enihe leken, leke derne man ho'ok kail enihe rala inhawa kenekrohu man horue.

<sup>59</sup> Imam lalapa roro agame nina man ho'ok kail na'akeme ranoin man kuku maka wakunu ha man sala

leke tumdesne Yesus la hukumesne.

<sup>60</sup> Ende ri nammori wakunu poho, maa kar lernala wanakunu ma na'ono ida hehen nanumene ri woro'o laa kalari

<sup>61</sup> ra'aheni, "Ri eni na'aheni Nin molollo aile naiye'eredi Makromod Lalap Nina Romleu Lapeni la alam wokelu na'ariri wali'ur."

<sup>62</sup> Idewe imam man kulu narehi onne namriri na'ukani, "Man kuku maka eniyenihe wakunu tumdesne O. Alhi'ihepenia O kam walhe rira wanakunu ma nano'onyak O?"

<sup>63</sup> Enimaa Jesus ka na'oho, de ai na'aheni wali'ur, "Ya'u hopon Om walha mouropo. Lo'o ka, ya apanak Makromod Lalap man mormori hukum O. Ende kukunohi mayai lo'o mamwali Kristus, Makromod Lalap Anan, ee ka?"

<sup>64</sup> Yesus walha, "Molmolo o lirum eni, maa Ya'u konohi mi, nano lere eni me'ede mi lo'o do'on Ya'u, ma namwali Ri Mormori Anan, naikoro lolo Makromod Lalap Ma Narehi Ma Nalewen herne malanna, la mim do'on Ya'u mai wali'ur lolo hulik loiloi kakam larlarie!" \*

<sup>65</sup> Enime'ede imam man kulu narehi onne sirrikiyedi rainne na'aheni, "Ai na'ihoru na'idaru Makromod Lalap me'e, de yono kanoin man kuku maka namehin me'e. Mi na'akeme dernessi Ainina wanakunu ma na'ihoru na'idaru Makromod Lalap!"

<sup>66</sup> Ende mala inhawa kenekrohu?"

\* **26:64** Dan. 7:13

Hir walha, "An sale wake'e,  
de hukumesne here!"

<sup>67</sup> Ende hir saprui apar  
Jesus oin makan, hudi,  
pahare,<sup>\*</sup>

<sup>68</sup> la ra'henia, "Heih,  
lo'o mamwali Kristus man  
Makromod Lalap kikanedi  
namwali Rai laa ewi-ewi eni,  
kene kukunohi mayai inhoi  
man pahar O?"

*Petrus konohi ri ai ka nau-roin Yesus*

(*Mrk.* 14:66-72; *Luk.*  
22:56-62; *Yoh.* 18:15-18, 25-  
27)

<sup>69</sup> Lere onne Petrus  
naikokoro aile nikoin, la  
man howok maeke ida laa  
na'heni, "Om lernohi Yesus  
ri Galilea onne haenhi!"

<sup>70</sup> Maa an konohi heri onne  
na'henia, "Ya'u ka auroin  
onuma panaeku onne."

<sup>71</sup> Enine ai nala'a nika lapa  
makan, man howok maeke  
namehin aile lolo onne do'on  
ai, de konohi ri man aile lolo  
onne na'henia, "Ri eni idedi  
noro Yesus ra'alono rano  
Nazaret."

<sup>72</sup> Enine an kikan hopo  
na'henia, "Makromod  
mehen do'on, ya'u ka auroin  
ri onne."

<sup>73</sup> Ka nalo'ol ne, ri man  
aile lolo onne re'el Petrus  
na'henia, "Memen o eni,  
ri nano hi haenhi, ono  
onuma wanakunu naise  
hirira wanakunu."

<sup>74</sup> Enime'ede Petrus na-  
hopo wali'ur na'henia,  
"Makromod Lalap mehen  
do'on ka auroin ri onneni!"  
Idewe manu kokoroiyedi.

<sup>75</sup> Enime'ede Petrus  
horoknala inhawa man  
Yesus na'aheheni, "Manu

kan kokoroi makun, o  
ma'aheniyedi ka mauroin  
Ya'u rewkelu me'e." Ai  
raram penuwale me'e de  
nala'a paharne la nahere  
maheruheru.

## 27

*Rodi Yesus laa nakpali Pi-latus*  
(HN. 1:18-19)

<sup>1</sup> Noho kan ropo wawa'an  
makun, imam lapa na'akeme  
roro Yahudi rira leleher lalap  
rala keneckrohu resne Yesus.

<sup>2</sup> Hir wukuwedi Yesus rodi  
laa kanile Pilatus. Pilatus  
onne, Roma nin rai lalap  
kikan namwali gubernur lolo  
onne.

*Yudas mehen wairesne*

<sup>3</sup> Lere Yudas ma nodi  
panaeku yaka onne, derne  
Yesus lernaledi keneckrohu  
hukumesne, an hehel rehi  
de nala wali'ur kupan pere  
welikelu onne imam lalape  
noro Yahudi rir leleher lalap  
enihe.

<sup>4</sup> Yudas na'heni, "Ya'u  
hi'iyedi dohohala me'e, ono  
ya a'oluwedti ri ma na'alehe  
sala."

Maa hir walhe, "Ai ka modi  
ma'uwaru num panaeku  
onne. Onne onum panaeku  
aimehi!"

<sup>5</sup> Enime'ede Yudas sopoledi  
kupan onne lolo Makromod  
Lalap Nin Romleu Lap raram  
la namhara lolo onne lan  
mehen wairesne.

<sup>6</sup> Imam lalap enihe rala ku-  
pan onne la ra'heni, "Iknika  
agame nina holoor halauk  
luli nair kupan onneni ono  
namwali kupan rodi pair ma

\* **26:67** Yes. 50:6

nesne ri, de kan wa'an kala kupan onne rodi rawa'aha kupan man aile oplaha rodi hohoi kakani Makromod Lalap!"

<sup>7</sup> Hi rala keneckrohu rodi kupan onne weli lari ipida nano ri ida ma nauroin hi'i randale. Lari ipa onneni hir weli leke namwali do'on awan rira makileke.

<sup>8</sup> Rakan lere eni, waki lari ip onne ra'ahenia, 'Lari Ipa Rare' ono kupan onne rodi resne ri.

<sup>9-10</sup> Nonolu nabi Yeremia na'aheni, "Hir kokala kupan pere welikelu, ono ri Israel re'e pair onne leke rodi weli Ai. Enla hi rodi kupan onne weli lari ipida nano ri man hi'i randale. Ha wo'ira onne namwali lernohi Makromod Lalap Nin konomdere maya'u." \*\* Lere imam lalap onnenihe weli lari ip onne hi ra'akuku ra'anokor Yeremia nin wanakunu onne.

*Pilatus ho'ok kail Yesus  
(Mrk. 15:2-5; Luk. 23:3-5;  
Yoh. 18:33-38)*

<sup>11</sup> Enla Yesus namriri lolo Pilatus ma namwali gubernur kalarne ne, Pilatus na'ukani Ai na'ahenia, "O penia ma namwali Rai Yahudie?"

An walha, "Namlolo, naise ma'aheheni eni."

<sup>12</sup> Enime'ede imam lalap roro Yahudi rir leleher lalap tumdesne Ai, maa kan walha wanakunu ida.

<sup>13</sup> Pilatus na'ukanie, "Kam derne rira wanakunu rodi tumdesne Oe?"

<sup>14</sup> Maa Yesus kan walha wake'e, de Pilatus mehe nanana me'e.

*Yesus lernala kenekrohu hunukum makmaki  
(Mrk. 15:6-15; Luk. 23:13-25; Yoh. 18:39-19:16)*

<sup>15</sup> Nadedem rakan Lere Alam Lalap Paska, gubernur huri ri ida nano nin hunukum, la nala leken heri Yahudi enihe nili ri onne.

<sup>16</sup> Lere onne ri ida aile bui raram naran Yesus Barabas. Ai onne ailanna wake'e de naran pe'eredi me'e.

<sup>17</sup> Heri lawukuwedni me'e, Pilatus na'ukani hi, "Minim suke ya'u huri inhoi? Yesus Barabas, ee Yesus man rapolu, 'Kristus' eni?"

<sup>18</sup> Pilatus na'ukani heheni ono nauroiroin Yahudi rir man panulu enihe kele Yesus rodi mai ono hir kehekehen Ai.

<sup>19</sup> Pilatus naikokoro aile kadere rodi ho'ok kail ri makun, hono aku lir ma na'ahenia, "Yom hi'i haida-haida ri ma na'alehe sala onne, ono alam eni apinpin-hedi lolo ainu'u mi lo."

<sup>20</sup> Maa imam lalapa roro Yahudi rir leleher lalap rawa'u heri onnenihe leke rapanak Pilatus huriyedi Barabas la hukumesnedi Yesus.

<sup>21</sup> Enine gubernur na'ukani heri wali'ur, "Nano ri woro'o eniyeni, minim suke ya'u huri inhoi?"

Hir walha, "Barabas!"

<sup>22</sup> Pilatus na'ukani, "Ende minim suke ya'u hi'i inhawa noro Yesus man rapolu 'Kristus'?"

\* **27:9-10** Po'onala Yer. 19:1-13; 32:6-9.

\* **27:9-10** Zak. 11:12-13

Hi na'akeme walha, "Male, wairesne au kekiyowok here!"

<sup>23</sup> Pilatus na'ukani, "Alhi'ihepe? Nina inhawa sala pe?"

Maa hir eren wakaukau raruri ra'heni, "Wairesnedie lolo au kekiyowok here!"

<sup>24</sup> Pilatus nina panaeku huri Yesus, maa heri onnenihe lo'o hi'i wowo'o ar'arra de ka namwali. Enpenia ai nala oir nodi wuri liman lolo heri kalarna na'aheni, "Ya'u ka a'uvara Ri eni Nina maki-maki, de minima panaeku aimehie!"

<sup>25</sup> Heri onnenihe na'akeme walha, "Na'amolia rarna ai ma'uware, moro idewe ai upum anumhe."

<sup>26</sup> Ende Pilatus huriyedi Barabas la hopon nin ma nasala ke'urauk enihe riuk rerhe Yesus horu mene rodi laa leke roho waire lolo au kekiyowok eni.

*Ke'urauk hadwei hadwokor Yesus*  
(Mrk. 15:16-20; Yoh. 19:2-3)

<sup>27</sup> Pilatus nin ma nasala ke'urauk enihe rodi Yesus laa gubernur nina rom rodi ho'ok kail ri raram, la nin ke'urauk na'akeme olokedi.

<sup>28</sup> Hir ruriyedi Yesus Nina nainair la rala rai nin nainair nanaru mere mohmohon ida An nair.

<sup>29</sup> Hir nanau dupal rururi ida nanumene rala loile uluwakun la rala our deul ida loile liman malanneni. Enla hir kadi ein korno Ai kalarna la hadwei hadwokor ra'aheni, "Hiyene arore ki O, Rai Yahudi O!"

<sup>30</sup> Hir saprui saworno Yesus la rala our deul onne rodi nukur uluwakun.

<sup>31</sup> Hadwei hadwokor Yesus horu, hir herre wali'uredi rai nin nainair nanaru hi rara leni, la rala Ainina nainair wali'ur. Horu ne, hi rodi laa kota paharne leke rohe wairesne lolo au kekiyowok eni.

*Rodi Yesus laa rohe au kekiyowok*

(Mrk. 15:21-32; Luk. 23:26-43; Yoh. 19:17-27)

<sup>32</sup> Hi ramhara kota onne, pakromo noro ri ida nano kota Kirene naran Simon. Hi rakernne ai na'uvara au kekiyowok eni.

<sup>33</sup> Kame'ede hir rakan wo'or ida naranne Golgota napa'ahne, 'onno ma naisa uluwaku rurna',

<sup>34</sup> la rala anggur rawa'aha noro ha man mermeru rala Yesus nomun, maa An kenedi ne, namhene nomun me'e. \*

<sup>35</sup> Roho wair Yesus horu, hir hi'i undi leke ha'ar Yesus Nina nainair eni. \* <sup>36</sup> Horu ne, hi raikoro lolo onne radiyaka.

<sup>37</sup> Enla hi rala papan ida loile Yesus uluwakun wawan. Hir horok rodi tunum desne Ai lolo papan onne nahenia:

ENI PENIA YESUS, YAHUDI RIR RAI.

<sup>38</sup> Lere onne ri man ailanna woro'o roho wairesne wewerre noro Yesus, ida minle herne malanna la ida minle herne mariri.

<sup>39</sup> Heri man min lolo onne hadwei hadwokor Ai, la rado'do'o uluwakun

\* 27:34 Mzm. 69:22 \* 27:35 Mzm. 22:18

40 ra'ahenia, "Heih,  
O ma'aheni maiye'eredi  
Makromod Lalap Nina Rom-  
leu Lapa la alam wokelu  
ma'ariri wali'ure? Makro-  
mod Lalap Anan O kokkoo,  
ma'ohu mahaledi O kopuredi  
nano au kekiyowok onneni."

41 Imam lalap, meser  
Horok Lap roro Yahudi rira  
leleher lalap enihe hadwei  
hadwokor Yesus ra'aheni,

42 "Ai na'ohu nahala ri  
namehin nano rir apinpinha,  
maa Ai kemen ne, ka. Lo'o Ai  
namwali Rai Israel haromo,  
kopuredi nano au kekiyowok  
leke ik akin naili'il Ai.

43 Ai akin naili'il Makro-  
mod Lalap, la Ai na'aheni,  
'Ya'u Makromod Lalap Anan,'  
de ik po'on ke'ede lere eni  
Makromod Lalap na'ohu na-  
hala Ai kemen, ee ka?"

44 Ri man ailanna ma noro  
Yesus wairesne onnenihe  
hadwei hadwokor Ai haenhi.

### *Yesus aran horu*

(Mrk. 15:33-41; Luk.  
23:44-49; Yoh. 19:28-30)

45 Nano lere ulu (riuk  
idaweli woro'o) rakan lere  
mamamal (riuk wokelu)  
noho metek lolo noho onne  
na'akeme.

46 Rakanedi lere mama-  
mal eni ne, Yesus wakau  
naruri na'ahenia, "Eloi,  
Eloi, lama sabaktani?"  
Napa'ahne 'Makrom'u  
Lalap, Makrom'u Lalap,  
alhi'ihepenia hurikaruwedidi  
Ya'ue?" \*

47 Ri man aile lolo onne  
derne Ai Lirn onne, ra'aheni,  
"Ai maha napolu Elia."

48 Enime'ede ri ida nano hi  
larlari laa nala sawar wukule  
au ida nala ku'ule anggur  
ma'alinlinu mene nala loile  
Yesus nuranne,

49 maa ri namehin  
ra'aheni, "Yono! Wa'an rehi  
ik po'on lo'o Elia man huri  
nano au kekiyowok eni, ee  
ka?"

50 Yesus wakau naruri,  
idewe aran horuwedi.

51 Idewe tapi rodi  
kawkawa Makromod Lalap  
Nina Romleu Lap raram  
onne, nahinarukedi nano  
wawan laa yawa namwali  
woro'o me'e, la noho naru-  
ruru de waku ma aile wo'or-  
wo'or pa'ahedi.\*

52 Lunna-lunna nahinari  
horu, la Makromod Lalap  
Nin ri man maki nonolue eni,  
mori wali'ur.

53 Rakan lere Yesus mori  
wali'ur mene man mori  
wali'ur onnenihe ramhara  
rala'a Yerusalem, la ri nam-  
mori do'on hi lolo onne.

54 Uluwakun ke'urauk ma  
nadiyaka Yesus noro ma  
nasala ke'urauk namehin,  
hir rase rururuwai noro ha  
ma namwali onne me'e, de  
ramka'uk wake'e la ra'aheni,  
"Namlolo kokkoo, Ai onne  
Makromod Lalap Ananne."

55 Lolo onne maeke nam-  
mori aile mahar popo'on  
nano ko'uko'u. Hir ler-  
nohiyedi Yesus nano Galilea  
leke ilitolle.

56 Maria Magdalena, Maria  
(Yakobus noro Yusup inna),  
noro Zebedeus hono aile  
maeke onnenihe raram.

*Yusup nano Arimatea*

\* 27:46 Mzm. 22:1 \* 27:51 Kel. 26:31-33

*karu Yesus*

(*Mrk. 15:42-47; Luk. 23:50-56; Yoh. 19:38-42*)

<sup>57</sup> Na'ikeki na'umetek, ri orkanaru ida nano Arimatea naran Yusup laa Pilatus. Ai namwali Yesus Nina man lernohi haenhi.

<sup>58</sup> An laa nakpali Pilatus napanak Yesus ihin kemen. Ende Pilatus hopon rala Ai ihin kemen Yusup.

<sup>59</sup> Yusup kokale la nodi tapi lenan worworu nanaru ida komonedie.

<sup>60</sup> Ai nodi Yesus ihin kemen laa na'akene manaku lolo nina ku'il worworu man hi'iyedi me'e lolo wo'or waku herne. Ai nala ihin kemen laa ku'il raram horu, poi waku lapida nodi elekedi nikeni la nala'a me'e.

<sup>61</sup> Maria Magdalena noro Maria namehin raikoro rak-paliyedi ku'il onne.

*Ke'urauk radiyaka ku'il man ra'akene manaku Yesus ihin kemen eni*

<sup>62</sup> Rakan oreki, Alam Renren Warwarna, imam lalap roro ri Parisi enihe laa rak-pali Pilatus

<sup>63</sup> ra'aheni, "Makrom'u, am horhorok lere ri ma napoho onne mori-mori makun Ai na'aheni, 'Alam wokelu Ya'u mori wali'ur.'

<sup>64</sup> Ende hopon ri nadiyaka ku'il wawa'an hehen nanumene rakan alam wokelu leke yono Nina man lernohi pakunohi enihe mai ramna'a, la konohi ri nahenia mori wali'uredi me'e. Yon hi'i nahenia poho man kauli'ur eni yaka narehi poho ma nolu eni."

<sup>65</sup> Pilatus hopon na'ahenia, "Moro ainu'u ma nasala ke'urauk heruwali laa madiyaka ku'il wawa'anedi."

<sup>66</sup> Kame'ede hi rala'a me'e. Hir rakan ku'il onne, rala tanadida loile waku rodi e'elek ku'il onne leke lo'o ri nawolle haromo, hi rauroiroin, la ma nasala ke'urauk enihe minedi kalarna.

## 28

*Yesus mori wali'ur*

(*Mrk. 16:1-10; Luk. 24:1-12; Yoh. 20:1-10*)

<sup>1</sup> Alam Renren Warwarna horu, domeku al'alam wake'e, Maria Magdalena noro Maria namehin eni lar tolle ku'il eni.

<sup>2</sup> Lere onne me'ede rururuwai lape, la hophopon a'am raram ida kopur mai nano a'am raram lan poiyedi waku lapa man min nikeni, la naikoredi waku wawan.

<sup>3</sup> Oin makan siksika lerlere la nina nainair wawarha wake'e.

<sup>4</sup> Ma nasala ke'urauk ma nadiyaka lunna onne raru-ruru la ramka'uk wake'e de ralwali yawa naise makiyedi me'e.

<sup>5</sup> Maa hophopon a'am raram onne ne'el maekenihé, "Yono mamka'uk! Ya au-roiroin mim mai manoin Yesus man wairesnedi lolo au kekiyowok onne.

<sup>6</sup> Ai kan min mai eni, An mori wali'uredi me'e naise nonolu An kukunohi mi eni. Mam po'onnala Nin namkuru onneni,

<sup>7</sup> la halhala lam kukunohi Nina man lernohi pakunohi enihe, 'An mori wali'uredi me'e, la noluwed mi laa

Galilea me'e, de mala'a enne leke mim do'on Ai! Horhorok inhawe man ya'u kukunohi mi eni."

<sup>8</sup> Kame'ede hi ramka'uk maa akinhe nahuwa'an haenhi, de pelekleke lar kukunohi Yesus Nina man lernohi pakunohi enihe inhawe ma namwali eni.

<sup>9</sup> Hi ka rala'a ko'u makun, ramlilinnohi Yesus mai pakromo noro hi nahuwo'okedi na'heni, "Hi'ihewiyala? Wa'wa'an, ee ka?" Hir mai raurukuwala ein la ra'uli rasa'e.

<sup>10</sup> Yesus konohi hi na'henia, "Yono mamkauk, mala'a here, lam konohi I wal'uhe rala'a Galilea leke do'onala Ya'u."

*Ma nasala ke'urauk ma nadiyaka enihe konohi ha ma namwali*

<sup>11</sup> Maeke onnenihe aile kalla makun, ke'urauk ma nadiyaka ku'il heruwali wali laa kote kukunohi imam lalapa enihe ha ma namwali lolo onne.

<sup>12</sup> Ende imam lalap noro Yahudi rira leleher lalap enihe lawuku, rala kupan nammori ke'urauk ma nadiyaka onnenihe.

<sup>13</sup> Enla hir nou ke'urauk enihe, "Lo'o rin mai na'ukani mi Yesus ihin kemen ai ewi, mi ma'henia, 'Man lernohi pakunohi Yesus enihe rodi a'alam mai ramna'edi me'e. Hir mai ne, ai mamkukuru.'

<sup>14</sup> Lo'o gubernur derne panaeku eniyeni, am wakunu noro ai leke yono hukumesne mi."

<sup>15</sup> Ende hir kokala kupan onne la hi'i naise nonou eni. Enpenia rakan lere eni

wanakunu onne ri Yahudi maha raderre radaul.

*Yesus nalhari kemen Nina man lernohi pakunohi enihe*

(Mrk. 16:14-18; Luk. 24:36-49; Yoh. 20:19-23; HN. 1:6-8)

<sup>16</sup> Ri idaweli ida man lernohi Yesus enihe rala'a Galilea, hir wakiha'a laa wo'or man Yesus konohiyedi hi me'eni.

<sup>17</sup> Lere onne hir do'on Yesus, la hi ra'uli rasa'e, maa heruwali akin ka namkene.

<sup>18</sup> Yesus na'urani hi na'heni, "Molollo a'am raram noro noho wawan na'akeme raledi Maya'u me'e.

<sup>19</sup> Ende mi lam konohi I Lir'u ri mormori noho wawan na'akeme leke hi ramwali man lernohi Ya'u, la moro hi laa oir raram ulutade rodi Makromod Lalap, Anan, noro Roh Kudus Oin Naranne.

<sup>20</sup> Wakuku hi leke derne rakani lernohi wanakuku na'akeme man Ya aledi ki mi me'e. Enla Yo orole'ule'u orowaliwali mi mamani rakan noho nin man horu."

# Markus

## *Horok Lirna La'an*

Ri Kristen man minle nonolu enihe ra'aheni ri ma naran Markus man hi'i horok eniyeni. Markus eni lernohi Petrus lere Petrus laliwewer loikaru Makromod Lalap Lirna Wawa'an. Markus horok inhawa lira an derne nano Petrus.

Lolo horok eni, Markus konohi Yesus Nin hini'i wenewhe noro Nin wanakuku man Ai nala Nin man lernohi pakunohi enihe. Yesus loikaru Lirna Wawa'an ma nahenia lere Makromod Lalap nodi molollo ri morimori noho wawan maiyedi me'e (1:14-15). Yesus nodi molollo hi'i wa'an ri ma nakni'ir la rohiyedi hayakyak man huhu'urle ri raram.

Yahudi rir man panulu ra'okuledi Ai la lawuku panaeku leke resne (3:6). Ai nauroin rir panaeku, de kukunohi nahenia ka nalo'ol hir resne Ai (8:31, 9:31, 10:33-34). Kade Ai nauroin rir panaeku onne, maa An laa Yerusalem mamani, ono Nin panaeku nala kemen hi resne leke huri we'er ri morimori nano rir dohohala nin hunukum makmaki (10:45). Hi resne Ai, maa An mori wali'ur.

Markus hi'i horok eni leke ik kauroin namlolo kokkoo nahenia Yesus eni Makromod Lalap Ananne, la Makromod Lalap kikan Ai namwali Rai laa ewi-ewi (1:1, 11, 24; 3:11; 5:7; 8:29; 9:7; 14:61-62; 15:39). Markus nin

panaeku na'alap ik akin leke ik kamkene lernohi Yesus mamani (8:34-38; 10:29-31).

## *Horok Ihin*

1. Yesus hi'i Nin honowok man dedesne (1:1-13).
2. Yesus wakuku la kukul Nin ke'ekel' an'anha lolo noho Galilea hehen nanumene Yahudi rir man panulu paeku resne Ai (1:14-3:6).
3. Yesus wakuku la ilitolle ri mamani lolo noho Galilea (3:7-6:13).
4. Yesus wakuku ri la kukul Nin ke'ekel' an'anha lolo kota-kota man aile noho Galilea (6:14-8:30).
5. Yesus nala'a nano Galilea laa kota Yerusalem leke nala kemen maki (8:31-10:52).
6. Yesus wakuku la ilitolle ri lolo kota Yerusalem (pnk. 11-13).
7. Hir kele Yesus la wairesne (pnk. 14-15).
8. Yesus mori wali'ur (pnk. 16).

*Yohanis man ulutade ri lolo oir wauwau Yordan*  
(Mat. 3:1-12; Luk. 3:1-18;  
Yoh. 1:19-28)

<sup>1</sup> Horok eniyeni Lira Wawa'an ma na'ono Yesus Kristus, Makromod Lalap Anan.

<sup>2</sup> Hari Lira Wawa'an eniyeni nammenehe nabi Yesaya nin horok ma na'ahenia,

"Makromod Lalap na'aheni,  
'Ya'u hopon Ainu'u ma  
nodi lira na'ahari kalla  
nolu mai\* leke hari  
kalla ki O."

\* 1:2 Mal. 3:1

<sup>3</sup> Ri ida aile lolo noho mamun ma napro'uk wakaukau na'henia: Ma'ahari kalla la ma'anehe, leke Makromod lole.' ” \*

<sup>4</sup> Enpenia Yohanis ma nodi oir ulutada ri min lolo noho mamun ma napro'uk. Lolo onne an loikaru lir ri na'akeme na'henia, "Herredi minim morimori ma ka namlolo eni, mai derne makani Makromod Lalap, la mala mi kemmu ulutade leke namwali tanada nahenia Makromod Lalap na'ohu nahaledi minim dohohala me'e."

<sup>5</sup> Ende ri nammori rano Yudea ulla ki'il lolo waliwali noro kota Yerusalem ne'en raram na'akeme maiwuku, derne Yohanis. Hi meririi werre akin kukunohi rira dohohale nanumene Yohanis norhe laa oir wauwau Yordan raram ulutade.

<sup>6</sup> Yohanis nair nainair rodi unte wulu hi'ie noro kali ehe rodi ha mormori ulikne hi'ie, la nina nana'an nonomun poreke noro wani oir.

<sup>7</sup> Yohanis konohiyedi ri na'henia, "Yo oluwedri Ri ma nodi molollo narehi ya'u mai. Ainina pakpak ei nin kali me'ene kan wa'an ya'u we'er.

<sup>8</sup> Yo odi oir ulutada mi, maa An ulutada mi nodi Roh Kudus."

*Yohanis nodi oir ulutada Yesus*

(Mat. 3:13-17; Luk. 3:21-22)

<sup>9</sup> Lere onneni Yesus mai oir wauwau Yordan nano Nin leke Nazaret lolo noho

Galilea, de Yohanis ulutada Ai lolo oir onne.

<sup>10</sup> Yesus namharedi oir eni ne, An po'on laa wawan, a'am nahinariyedi, la Roh Kudus molmolo merpati ida kopur mai Ai wawan. <sup>11</sup> Onne horu, derne lira ida namhara a'am raram na'henia, "Ya An'u O! Ya amre'e amharu O. Om hi'i Ya akin nahuwa'an rehi!"

*Hayakyak Makromon ken patal Yesus*

(Mat. 4:1-11; Luk. 4:1-13)

<sup>12</sup> Lere onne me'ede, Roh Kudus norkaru Yesus laa noho mamun ma napro'uk.

<sup>13</sup> An min lolo onne alam wel'i akka la Hayakyak Makromon mai kene patal Ai. Lolo onne ha mormori merwui naworo nawa'aha noro Ai, la hophopon a'am raram mai wayahu wadane.

*Yesus rakan noho Galilea napolu Nina man lernohi pakunohi dedesne*

(Mat. 4:12-22; Luk. 4:14-15, 5:1-11)

<sup>14</sup> Kele Yohanis rala laedi bui raram ne, Yesus laa noho Galilea loikaru Makromod Lalap Lirna Wawa'an eni.

<sup>15</sup> Ai na'heni, "Lere Makromod Lalap nodi molollo ri mormori na'uraniyedi me'e. Herredi minim morimori ma ka namlolo eni, la derne makani Makromod Lalap Lirna Wawa'an eni."

<sup>16</sup> Ai nala'ala'a lolo oir lap Galilea arkanne, An do'on ma nohu meki woro'o, Simon noro mo'oniwalla Andreas mahar sopol diyale.

<sup>17</sup> Yesus naka'uk hi na'henia, "Mam lernohi Ya'u leke Ya'u wakuku mi

\* 1:3 Yes. 40:3

manoin ri mormori naise manoin i'in."

<sup>18</sup> Idewe hir hoikaruwediri diyaleni, laa lernohi Ai me'e.

<sup>19</sup> Hi rala'a laa kalari tarana, Yesus do'on Yakobus noro mo'oniwalla Yohanis noro aman Zebedeus mahar tapil dari aile korkore wawan.

<sup>20</sup> Ai napoluwedi hi, idewe hir hoikaruwediri aman noro nina man howok enihe, laa lernohi Ai me'e.

*Yesus nohi hayakyaka man huhu'urle ri ida raram*  
(Luk. 4:31-37)

<sup>21</sup> Yesus noro Nina man lernohi pakunohi rakan kota Kapernaum nediyale Yahudi nina Alam Renren Warwarna, de Yesus laa Yahudi nina kerei raram wakuku.

<sup>22</sup> An wakuku ne, heri mehe nanana mouwedi la aki'aki uluwakun derne Nina wanakukue, ono Ai kan wakuku naise hirira meser Horok Lap enihe, maa An wakuku naise ma nodi molollo.

<sup>23</sup> Ai mahan wakuku, ri ida mai kerei raram, hayakyaka hu'uhu'ur raramne. Maiyedi kerei raram ne, an wakau Yesus na'henia,

<sup>24</sup> "Oih! Yesus! Nazaret O. Onuma inhawa panaeku noro mayai? O mam mesne mayai? Ya auroinedi O me'e. O penia Makromod Lalap Nin Hophopon mememen man moumou dewdewe."

<sup>25</sup> Yesus dadiyale, "Karkaramene Mamharedi ai raram here!"

<sup>26</sup> Hayakyaka onne do'odewe ri onne me'ede, kais makin la namhara.

<sup>27</sup> Idewe na'akeme polletilu. Ida ma na'ukani ida na'ahenia, "Eih! Ha eni inhawpe? Ma namwali eni lo'o wanakuku worworu. Ai nodi molollo hayakyaka enihe penia hir derne rakani Aie!"

<sup>28</sup> Enime'ede lira ma na'ono Yesus Nin hini'i eni pelek raderre radaul lolo Galilea ne'en raram na'akeme.

*Jesus hi'i wa'an ri nammori*

(Mat. 8:14-17; Luk. 4:38-41)

<sup>29</sup> Kerei namharedi ne, Yesus, Yakobus noro Yohanis ra'alono laa Simon noro Andreas rira nakar.

<sup>30</sup> Lere onne Simon paninne maeke nakni'ir rinna manha, de namkukuru lolo nakar. Hir rakan nakar, manin nakar konohi Yesus na'ahenia, "Pape, mama ornakar nakni'ir rinna manha."

<sup>31</sup> Enine An laa roulle li-man namake. Ideweni ne, nin kini'ir wa'anedi. Horu ne, ai na'akene hanana'an hi ra'an.

<sup>32</sup> Lere helemedi ri nodi ma nakni'ir noro man hayakyaka hu'uhu'ur raram na'akeme mai Yesus me'e.

<sup>33</sup> Ri nammori man holi kota onneni mai nakar onne.

<sup>34</sup> Enime'ede An hi'i wa'an apinha rahu eni, la nohi hayakyaka man hu'uhu'ur ri raram enihe. Enimaa, Yesus ka nala leken hayakyaka wakunu, ono hi rauroinedi me'e Ai onne Makromod Lalap Anan.

*Jesus wakuku leke-leke namehin lolo Galilea*  
(Luk. 4:42-44)

<sup>35</sup> Rakan noho roropo Ai namaka laa paharne. Ai namhara leke laa onno ma namrina namkai hi'i lir napanak,

<sup>36</sup> maa Simon noro nina mukue laa ranoin Yesus.

<sup>37</sup> Pakromedi ne, hi ra'heni, "Eih! Pape, ri nammori maha ranoin Papa!"

<sup>38</sup> Enine Ai na'heni, "Mai kala'a leke-leke ma na'uranrani eni leke Ya'u loikaru Lira Wawa'an lolo enne haenhi. Onne penia Ainu'u panaeku mai noho wawan eni."

<sup>39</sup> Enime'ede An laliwewer Galilea raramne laa Yahudi rira kerei-kerei loikaru Lira Wawa'an onne, la nohi hayakyaka man aile ri raramne.

*Yesus hi'i wa'an ri man ulik yaka hi'ie*

(Mat. 8:1-4; Luk. 5:12-16)

<sup>40</sup> Ler ida mo'oni ida man ulik yak hi'ie mai Yesus kadi ein korno kalarna na'heni, "Papa ne'e harome hi'i wa'anedi ainu'u apinha ke'e."

<sup>41</sup> Enime'ede Yesus naramyakale, de kemenala liman laa ri onneni na'heni, "Ye e'e! Wa'anedi here!"

<sup>42</sup> Me'e'eni me'e'ede nina ulik yake moluwedi, de wa'anedi.

<sup>43</sup> Horue ne, Yesus hopon ai na'henia,

<sup>44</sup> "Yom konohi ri ha ma namwali o kemmu eniyeni, maa mala'a laa imam nanu leke an po'onala o kemmu, nauroin nahenia om wa'anedi me'e, la modi onum honoi kanani\* mala

ai leke lernohi agame nina holoor halauk eni. Hi'i onne leke namwali tanada nahenia om wa'anedi kokkoo me'e."

<sup>45</sup> Enimaa, ri onne nala'a ka nodi nou onneni, ono an wakunu laliwewer panaeku ma namwali kemen eni. Enpenia ka namwali Yesus laa leke-leke nin leke raram, de minle leke paharne lolo onno ma namrina namkai. Min lolo onne maa, ri nammori lolo waliwali mai leke dernala.

## 2

*Yesus hi'i wa'an mo'oni ida ma naplu'uk nap'eker*

(Mat. 9:1-8; Luk. 5:17-26)

<sup>1</sup> Nakawedi alam ida woro'o ne, Yesus nala'a Kapernaum wali'ur. Enpenia raderre radauledi nahenia An minle nakar ida.

<sup>2</sup> Enime'ede heri maiwuku ho'o me'e, hir penuwuku lolo onne penia onno kan nokor. Nika makan penpenu ri mormori. Enine Yesus loikaru Makromod Lalap Lirna Wawan ri onnenihe.

<sup>3</sup> An wakunkunu ne, ri wo'akka rodi ma naplu'uk nap'eker ida mai Yesus.

<sup>4</sup> Ri nammori rehi, de leken kaale laa wakurani Yesus miminlole. Ende hir raiye'er nakar wawan nanumene hi rala kopur ri onne noro nin namkuru onno laa Yesus kalarna.

<sup>5</sup> Yesus po'on nauroin nahenia ri onnenihe akin naili'il kokkoo, de ne'el man apinha onne na'henia,

\* **1:44** Po'onala Im. 14:2-32. Honoi kanani onne namwali manu woro'o naisa orpopo'o.

“Pa'e, Ya a'ohu ahaledi onuma dohohale me'e.”

<sup>6</sup> Maa, meser Horok Lape woro'o wokelu raikokoro aile lolo onne roro akin wakunu na'ahenia,

<sup>7</sup> “Alhi'ihepenia ri eni wakunu heheni? Ai na'ihoru na'idaruwedi Makromod Lalap me'e. Inhoi nodi molollo na'ohu nahala dohohala? Makromod Lalap mehe!”

<sup>8</sup> Yesus nauroinedi hi honorok akin me'e, de na'ukani hi na'ahenia, “Hi'ihepeni mim kikan panaeku eni mi raramne?

<sup>9</sup> Ewi man sus rehi? Ya aheni ma naplu'uk nap'eker eniyeni Ya a'ohu ahaledi nin dohohala, ee Ya'u hopon ai namakedi, la kikan nina namkuru onno, wali laa nin nakar here!

<sup>10</sup> Ya'u hi'i wa'an ri eni leke mi mauroin mouropo na'ahenia Ya'u eni ma namwali Ri Mormori Anan, la Yo odi molollo lolo noho wawan a'ohu ahala ri nina dohohala!” Enime'ede Yesus hopon ri ma naplu'uk nap'eker onne,

<sup>11</sup> “Mamakedi! Modi num namkuru onno, wali laa num nakar here!”

<sup>12</sup> Ai namririri, kikan nina namkuru onno, nodie namhara. Heri man po'on mo'oni man wa'anedi onne na'akeme polletilu. Hi ra'uli rasa'a Makromod Lalap ra'aheni, “Makromod Lalap Ma Narehi Ma Nalewen! Ai kam do'onala ha nais eni makun.”

*Yesus napolu Lewi  
(Mat. 9:9-13; Luk. 5:27-32)*

<sup>13</sup> Yesus wali wali'ur laa oir lap Galilea, la ri nammori mai de Yesus wakuku hi.

<sup>14</sup> Hi rala'ala'a ne, An do'on Alfeus anan Lewi naikokoro lolo onno rodi ra'uk paipair. Yesus na'aheni, “Mam lernohi Ya'u.” Enime'ede Lewi namriri lernohi Yesus.

<sup>15</sup> Ka nalo'ol Lewi lariyala Yesus noro Nin man lernohi pakunohi rala'a nina nakar, ra'ak. Man ra'uk paipairi noro ‘man hi'i dohohala’ nammori raikoro wuku roro Yesus noro Nin man lernohi pakunohi, la ra'ak wewerre ono ri nammori lernohiyedi Yesus me'e.

<sup>16</sup> Meser Horok Lap nano muku Parisi ida woro'o mai do'on Yesus na'akwuku noro man ra'uk paipair noro ‘man hi'i dohohala’ enihe. Hi ra'ukani Yesus Nina man lernohi pakunohi enihe ra'aheni, “Hi'ihepenia minim Meser eni ra'ak wewerre noro man ra'uk paipair roro man hi'i dohohala enihe?”

<sup>17</sup> Yesus dederne rira na'ukankani onnneni, de An walha na'ahenia, “Ma kan apinha ka nanoin ma na'inapin. Man apinha mehe nanoin ma na'inapin. Ka'u mai apolu ri man hi'i ha ma namlolo mamani, maa Ya'u mai apolu ri man hi'i dohohala.”

*Ri na'ukani Yesus alhi'ihepenia ka na'aluli kemen ka na'ak nomun?  
(Mat. 9:14-17; Luk. 5:33-39)*

<sup>18</sup> Ler ida Yohanis man ulutada ri nin man lernohi ida woro'o roro Parisi enihe mahanoro ra'aluli kemen ka ra'ak romun. Ende rin mai

na'ukani Yesus, "Hi'ihepenia Yohanis nina man lernohi enihe roro Parisi enihe lernohi Yahudi nina holoor halaauk, de ka ra'ak romun, maa Onuma man lernohi enihe kae?"

<sup>19</sup> Yesus walha na'ahenia, "Ik min hohoo, popolu lalariyala enihe ka ra'ak romun? Ka! Mo'oni man ho eni nornore makun, hi ra'ak romun mamani!"

<sup>20</sup> Enimaa rakan orekiyedi ri namehin mai rala man ho eni nano hi leken kalarne nanumene hi ra'aluli kemen ka ra'ak.

<sup>21</sup> Ri kan tapil nainair lo'olo'ol nodi tapi a'un worworu, kalo'o tapi a'un rodi tatapil onne hi'i riki nainair onne eren lalapa.

<sup>22</sup> Namnenehe onne ri ka nadedem nala anggur worworu halle sak ulik lo'olo'ole, kalo'o anggur worworu eni hi'i sak ulik lo'olo'ole napriki de anggur noro sak ulik yakedi, kar nair me'e. Maa ri nadedem nala anggur worworu halle sak ulik worworu."

(Ai nodi wanakunu naho'ok eniyeni leke nounaku hi yono lernohi wanakuku nonolu eni, maa lernohi Makromod Lalap Nina wanakuku worworu eni.)

*Yesus nodi molollo Yahudi nina Lere Alam Renren Warwarna*

*(Mat. 12:1-8; Luk. 6:1-5)*

<sup>23</sup> Ler ida, Yahudi nin Alam Renren Warwarna, Yesus noro Nin man lernohi pakunohi enihe rala'a lolo gandum kirna ida. Maie ne,

man lernohi pakunohi enihe reku gandum.

<sup>24</sup> Ri Parisi ida woro'o ma aile lolo onne do'odo'on, de ra'ukaniyale, "Hi'ihepenia Onuma man lernohi pakunohi enihe larlewenedi iknik agame nina holoor halaauk me'e?" Hi ra'ukani heheni ono hir pene'ek reku gandum onne namwali honowok man luli hi'i lolo Alam Renren Warwarna.

<sup>25-26</sup> Yesus walhe na'ahenia, "Lo'o mi kam lesala in-hawa ik upud Daud hihi'i lere ai noro nina kalla wali ra'alehe banana'an de ramlara me'e! Lere onne Abyatar namwali Makromod Lalap Nina imam man kulu narehi. Daud laa Tenda ma namwali Makromod Lalap Nin miminbole raram na'an roti man luli ra'an ono rodi hoikani Makromod Lalap. Makromod Lalap Nin holoor halaauk hurinohi imam mehe ra'an roti onne, ri namehin ka. Maa Daud nala roti ha'ar nina muku ra'an haenhi, ono Daud nauroin nahenia Makromod Lalap naramyaka ri mormori narehi Ai naramyaka Nina holoor halaauk onneni.

<sup>27</sup> Alam Renren Warwarna nin holoor halaauk eni peni ra'akene leke paku ri mormori, ka nahenia hi'i ri mormoriyana leke derne rakani Alam Renren Warwarna nin holoor halaauk eni.

<sup>28</sup> Ya'u, ma namwali Ri Mormori Anan, odi molollo hopon rin hi'i ha wo'ira Alam Renren Warwarna."

### 3

*Yesus hi'i wa'an mo'oni ida*

*Alam Renren Warwarna*  
(Mat. 12:9-14; Luk. 6:6-11)

<sup>1</sup> Lere namehin Yesus wali wali'ur laa Yahudi nina kerei raram. Lae ne, holikuku mo'oni ida liman wali makiyedi.

<sup>2</sup> Lere onne Parisi ida woro'o aile lolo onne maha ranoin Yesus Nina sale, leke hir kele la kalake. Hir kokolole ke'ede, lo'o An hi'i wa'an mo'oni man liman wali maki eni Alam Renren Warwarneni, ee ka.

<sup>3</sup> Yesus ne'el mo'oni man liman maki onne na'ahenia, "Mai mamririyedi heri kalarna."

<sup>4</sup> An maiyedi kalarie ne, Yesus na'ukani Parisi man aile lolo onnenihe na'ahenia, "Iknik holoor halauk hurnohi ika hi'i inhawa Alam Renren Warwarna? Hi'i ha wawa'an, ee hi'i ha yakyake? Hi'i ri man apinha wa'an, ee reden ri?"

Maa, hi na'akeme ka ra'oho ono ka rauroin walha me'e.

<sup>5</sup> Yesus nodi oi mahu po'on waliwali la na'ahan haenhi ono Ai nauroin ri enihe ra'uluwaku kekerhe la honorok akin kiki'il. Enime'ede Ai ne'el ri man liman maki eni na'ahenia, "Ma'aloledi o limmu." Ri onne na'aloledi liman, idewe liman wa'anedie.

<sup>6</sup> Ende me'e'eni me'ede, ri Parisi enihe ramhara kerei korowuku ra'ukwuku roro ri woro'o wokelu man kuku leu Herodes leke ranoin kalla man wa'an resne Yesus.

*Yesus hi'i wa'an ri nammori oir lap Galilea arkan*

<sup>7</sup> Enime'ede Yesus noro Nina man lernohi pakunohi ramhara leke onne laa oir lap Galilea. Lere onne

ri nammori nano Galilea lernohi haenhi.

<sup>8</sup> Yesus naran pe'eredi me'e, de rin maiyedi nano kota Yerusalem wali karanna, Yudea, noro Idumea. Heruwali mai nano oir wauwau Yordan wali kimur, la heruwali mai nano Tirus noro Sidon wali ra'i. Hi na'akeme mai Yesus ono hir dernedi Ainina hini'i rahu me'e.

<sup>9</sup> Ri nammori rehi mai lupurale, de Yesus hopon Nin man lernohi pakunohi enihe ra'akene korkoro ida leke yon heri rahu onne rokul Ai laa oir lap raram. Heri onne luplupurale ono

<sup>10</sup> An hi'i wa'anedi ri nammori me'e. Lolo heri onne raram ri man apinha noro ma nakni'ir nammori hi ida ma nokul ida laa kalari leke tukulala Nin rain.

<sup>11</sup> Lere onne lo'o hayakyaka man huhu'urle ri raramne enihe do'on Yesus, ri onnenihe ne'e namhene laa Yesus kalarna awikorno wakau na'ahenia, "O penia Makromod Lalap Ananne."

<sup>12</sup> Maa An kawala hayakyak onnenihe na'aheni, "Yono konohi ri Ya'u eni inhoi."

*Yesus nili ri idaweli woro'o leke lernohi Ai*

(Mat. 10:1-4; Luk. 6:12-16)

<sup>13</sup> Yesus namhara oir lapa arkanne wakiha'a wo'or ida napolu ri man Ai raram nodie. Ri onnenihe mai ne,

<sup>14</sup> An kikan ri idaweli woro'o nano hi ramwali Nin hophopon ma nodi Lirna Wawa'an enihe. Ai na'ahenia, "Ya'u nili mi leke lernohi Ya'u, leke mi

maderre madaul I Lir'u laa  
ri mormori,

<sup>15</sup> la Ya ala molollo mi mohi  
hayakyaka."

<sup>16</sup> Ri idaweli woro'o enihe  
naran me'eni:

Simon (Jesus waki naran  
Petrus haenhi),

<sup>17</sup> Yakobus noro mo'oniwalla  
Yohanis, Zebedeus  
ananhe. (Jesus waki  
hi naran 'Boanerges'  
haenhi. Naran onne  
napa'ahne, 'rir morimori  
naisa ilak waslene').

<sup>18</sup> Andreas,  
Pilipus,  
Bartolomeus,  
Matius,  
Tomas,  
Yakobus (Alfeus anan),  
Tadeus,  
Simon (nano muku Zelot),\*

<sup>19</sup> la Yudas (ma na'olu  
Yesus).

Meser Horok Lape  
ra'heni Hayakyak Makromon  
huhu'urle Yesus raramne  
(Mat. 12:22-32; Luk.  
11:14-23, 12:10)

<sup>20</sup> Horu ne, An wali laa  
nakar miminle, la ri nam-  
mori mai wali'ur penia Ai  
noro Nina man lernohi  
pakunohi ra'alehe leken  
ra'ak romun.

<sup>21</sup> Ainina nakar raram  
derne lira anna na'ahenia,  
"Yesus ka na'ak, de lo'o Ai  
honorok akin ka namlolo  
me'e," penia walinhe lar  
polu.

<sup>22</sup> Meser Horok Lap  
enihe rano Yerusalem  
mai ra'aheni, "Beelzebul  
ma namwali Hayakyak  
Makromon eni hu'uredi

raramne me'e, de nala  
molollo Ai nohi hayayaka  
nano ri raramne."

<sup>23</sup> Enpenia Yesus napolu  
heri mai mene nala  
wanakunu naho'ok ida  
woro'o. Ai na'ukaniyala  
hi na'ahenia, "Hi'ihehewi  
hayakyak ida nohi hayakyaka  
namehin?"

<sup>24</sup> Lo'o hair ida napye'er  
namwali muku ida woro'o, la  
ida ma kan derne ida, hair  
onne lo'o keperedi.

<sup>25</sup> Lo'o meheromo ida man  
holi iw'iwar wo'owo'or noro  
ida ka namwali haida, maa  
keperedi.

<sup>26</sup> Namnenehe Hayakyak  
Makromon nina ma nodi  
molollo. Lo'o ida ma na'okul  
ida, molollo onne lo'o molou  
loinedi.

<sup>27</sup> Lo'o rin paeku laa  
ornakar ma naruri ida nina  
nakar namna'a hahaa, maa  
ai kan kele wuku ma naruri  
onne makun, ka namwali  
nala nin hahaa.

<sup>28</sup> Loi honorok wawa'an  
Ainu'u panaeku ma na'ono  
eniyen: Makromod Lalap  
na'ohu nahala ri nin doho-  
hale noro wanakunu ma  
na'ihoru na'idaru na'akeme,†

<sup>29</sup> maa inhoi ma na'ihoru  
na'idaru Roh Kudus, Makro-  
mod Lalap ka na'ohu nahala  
nin dohohala onne laa ewi-  
ewi."

<sup>30</sup> Yesus na'aheni heheni  
ono ri na'ahenia, "Hayakyaka  
hu'ur Ai raramne."

Yesus inna noro walinhe  
(Mat. 12:46-50; Luk. 8:19-  
21)

\* **3:18** Muku Zelot onne ramhene noho Roma nodi molollo Israel. † **3:28** Ee,  
wanakunu na'akeme 'ma na'ihoru na'idaru Makromod Lalap'.

<sup>31</sup> Ende Yesus inna noro mo'oniwalinhe mai. Hir lapan paharne, la hopon ri lan polu Yesus.

<sup>32</sup> Lere onne ri nammori raikoro lolowewer Yesus. Hir konohie ra'heni, "Papee, O inum noro mo'oniwallumhe aile paharne. Hir maha ranoin Papa."

<sup>33</sup> Enine An walha na'henia, "Yi in'u inhoi? I mo'oniwal'uhe inhoi?"

<sup>34</sup> Enime'ede An po'onala ma naikoro lolo herne waliwali na'heni, "E'eni penia Yi in'u la I mo'oniwal'uhe.

<sup>35</sup> Ri man derne rakani Makromod Lalap Nina panaeku, onne penia Yi In'u, I nar'u, la I mo'onwal'u."

## 4

*Yesus loikaru wanakunu naho'ok man pekir ariyono*

(Mat. 13:1-17; Luk. 8:4-10)

<sup>1</sup> Ler ida Yesus wakuku wali'ur lolo oir lap Galilea arkan. Ri nammori mai lupurale, de An ha'a korkoro ida man palpali lolo onne, naikoro wawanne mene wakuku heri lape man aile lolo onne.

<sup>2</sup> Ai nodi wanakunu naho'ok leke wakuku panaeku nammori heri onne, la lolo Nin wanakuku Ai na'heni,

<sup>3</sup> "Makaniyala! Ler ida ri man howok kirna nodi wini hawonne lan wahaire. <sup>4</sup> An wahair ne, wini heruwali nadiyaur kalla wawan. Ende manu liwliwar mai na'an moumouwedi.

<sup>5</sup> Heruwali nadiyaur elimo'o wakwaku. Memen

pelek mori ono elimo'o tarana mehe,

<sup>6</sup> maa rakan lere ulu, lupun napro'ukedi ono ka na'a'ar.

<sup>7</sup> Wini namehin nadiyaur ruri roke raram, mori maa ruri roke eren lolode, elewesnedi de ka na'ihi.

<sup>8</sup> Wini ma nadiyaur elimo'o man meur onne mori wawa'anedi. Ende dipi woi nammori, de lernala rewen welikelu, welinememe, rakan rahu rehi."

<sup>9</sup> An loikaru panaeku onne horu, Ai na'heni, "Lo'o mi kilinum aile, makaniyala wawa'an!"

<sup>10</sup> Yesus memehedi onnida ne, ri man dernedi Ainin wanakuku eni roro ri idaweli woro'o man lernohi pakunohi enihe mai ra'ukani Ai na'henia, "Wanakunu naho'ok man Papa loikaruwedi me'eni nin panaeku inhawe?"

<sup>11</sup> An konohi hi na'henia, "Makromod Lalap nala woroin mi leke mauroin hi'ihehewi Ai nodi molollo ri mormori, maa rakan lere eniyeni mene ri mormori nauroin panaeku onne. Enimaa Yo odi wanakunu naho'ok wakuku ri ma kan peinohi Makromod Lalap Nin wanakuku wanayo'o leke,

<sup>12</sup> 'Hir do'odo'on, maa ka rauroin inhawa namwali. Hi rakani mamani, maa ka rauroin panaeku ida. Eni namwali leke yon hir wali wali'ur mai Makromod Lalap de Ai

na'ohu nahala hirira dohohale.'’ \*

*Yesus napa'aha wanakunu ma na'ono ri man wahair wini hawono*

(Mat. 13:18-23; Luk. 8:11-15)

<sup>13</sup> Enine Ai na'aheni, "Lo'o mi ka mauroin wanakunu naho'ok eniyeni, hi'ihehewi leke mauroin wanakunu naho'ok namehin?"

<sup>14</sup> Man wahair wini havonne onneni naise ri manaderre nadaul Makromod Lalap Lirna Wawan.

<sup>15</sup> Wini ma nadiyaur kalle molmolo ri mormori man akin naise elimo'o kekerhe, de lere hir derne Makromod Lalap Lirna Wawan eni, Hayakyak Makromon mai naledi nano hi akin.

<sup>16</sup> Wini ma nadiyaur elimo'o wakwaku eni, naise ri man derne Makromod Lalap Lirna Wawan, la kokale noro wawa'an,

<sup>17</sup> maa lirna onne ka na'aar hi akin, de ka nalo'ol moluwedi. Lere hir nehule ew'ewek kawkawe ono derne rakani Lirna onne, hir waliyedi kili'urnne.

<sup>18</sup> Wini ma nadiyaur ruri roko raram naisa ri man dernessi Makromod Lalap Lirna Wawan eni,

<sup>19</sup> maa pelek akin tana, la akin ni'ik kanaru noho wawan mamani. Akin ma ni'ik mouwedi noho wawan nin ha rahu eni penia namwali ruri roko man ewek kawala Lirneni. Ende wini onne kan woi.

<sup>20</sup> Enimaa, wini ma nadiyaur elimo'o man meur na'ono ri man derne Makromod Lalap Lirna Wawan la

kokala wawa'an, penia na'ili nadai ihin ennen nammori, de heruwali lernala rewen welikelu, heruwali lernala rewen welineme, la heruwali lernala rewen rahu."

*Inhoi ma nauroin Makromod Lalap Lirna La'an, yono suwarale akin*  
(Luk. 8:16-18)

<sup>21</sup> Onne horu Yesus na'ukani wali'ur, "Nadedem ri lokon wadu nodi ra'u lapa honow, ee nala loile leu leherne? Ka menee! Lo'o rala loile wadu onno man kulu leke ropo waliwali.

<sup>22</sup> Inhawe man suwsuwar lere eniyeni, hari mouwedi lere man mai.

<sup>23</sup> Ende mi kilinum aile, derne makaniyal!"

<sup>24</sup> An wakunu wali'ur na'ahenia, "Loi honorok wawa'an inhawa man mim dederne eniyeni! Hono'ok mim nanair modi ho'ok kail ri namehin, Makromod Lalap lo'o nairre nodi ho'ok kail mi wali'ur, la lo'o narehi makun.

<sup>25</sup> Ri ma nauroin Ainu'u wanakuku wa'an tarana me'e, lo'o ra'uwali woroin narehi nalewen makun, maa ri ma kan peinohi Ainu'u wanakuku, nina woroin tarana man aile lo'o rala wali'uredi."

*Ik ka kauroin hi'ihehewi Makromod Lalap nodi molollo, maa Nin molollo onne aile kokkoo*  
(Mat. 13:31-34; Luk. 13:18-19)

<sup>26</sup> Yesus na'ikar na'uwali Nina panaeku wali'ur, "Lere Makromod Lalap nodi molollo ri mormori naho'ok

naise ri man pekir ariyono  
wini hawonne.

<sup>27</sup> A'alam ai namkuru,  
lelere namaka, ka nauroin  
nahenia wini hawonne  
mori eren lalapa. Wini  
mormorna, ai me'e ne ka  
nauroin.

<sup>28</sup> Elimo'o mehen hi'i wini  
hawonne mori, dedesne  
ollo, horu kaki, horu woi  
la na'ihi hehen nanumene  
napro'uk.

<sup>29</sup> Woin onne napro'ukedi  
ne, ai nodi kuri rosu, ono  
rakanedi lere alam ra'il  
radai me'e.\*

*Makromod Lalap Nin  
molollo naho'ok noro au  
manu waku ida man mori  
eren lalapa narehiyedi au  
or'oriyana namehin*

(Mat. 13:31-34; Luk.  
13:18-19)

<sup>30</sup> Yesus na'ukani wali'ur,  
“I kodi inhawa wanakunu  
leke ka'amou ka'arope  
hi'ihewi Makromod Lalap  
nodi molollo ri mormori?

<sup>31</sup> Nina molollo eni mol-  
molo wini man tutusiyana  
wake'e naise wini au manu  
waku ida ri nala loile elimo'o  
eni. Kade wini onne tu-  
tusiyana,

<sup>32</sup> maa moriyedi eren  
lalapa narehi au or'oriyana  
man minwuku lolo onneni.  
Hinan hanan nammori, de  
manu merwui mai kaile, hi'i  
rira wonne nahirei kakan.”

<sup>33</sup> Ende Yesus loikaru  
Horok Lap Lirna La'an ri  
nodi wanakunu naho'ok  
naise onneni namnenehe  
rira woroin.

<sup>34</sup> Yesus nodi wanakunu  
naho'ok mamani leke

wakuku heri onneni. Maa,  
Ai noro Nina man lernohi  
pakunohi enihe mehe min-  
wuku nanumene Ai na'amou  
na'ropedi Nina wanakunu  
eni.

*Yesus na'alina kahi anna*  
(Mat. 8:23-27; Luk. 8:22-  
25)

<sup>35</sup> Lere onne, lere helem  
me'e, de Yesus naka'uk  
Nina man lernohi pakunohi  
na'ahenia, “Mai ika ha'a  
korkore hopol laa oir lapa  
wali enne.”

<sup>36</sup> Enime'ede hir hoikaruwed  
heri rahu onnenihe la ha'a  
rir korkoro, la roro korkoro  
namehin ra'alono hopol  
me'e.

<sup>37-38</sup> Hopol ne, Yesus nodi  
luni, de namkuru mahal lolo  
korkoro li'ur. Rakan heleken  
hir lernala kahi anna lapa.  
Eih! Kili'uru kalari wawarhe  
mamani! Man lernohi Yesus  
lari laa ramaka Ai, “Papa  
Meser, mamakedi nanu,  
kalo'o ika keper lolo eni  
me'e.”

<sup>39</sup> Kame'ede Yesus namaka  
komdere na'ahenia, “Kahi  
anna o, mamlinedi here.”  
Idewe kahi anna namrina  
namkaiyedi.

<sup>40</sup> Enine Ai na'ukaniyalaha  
na'ahenia, “Alhi'ihepenia mi  
akim tana rehie? Mi akim ka  
naili'il Maya'u makune?”

<sup>41</sup> Enime'ede hi eren  
ramkaka'uk, ida ma na'ukani  
ida na'ahenia, “Leher eni  
inhol, penia kahi anna lapa  
derne nakani Aie?”

\* <sup>4:29</sup> Lolo noho Israel man howok kirna radedem rosu gandum me aliwerhe  
lollo nanumene reku woin.

## 5

*Yesus nohiyedi hayakyak  
man minle ri raram  
(Mat. 8:28-34; Luk. 8:26-39)*

<sup>1-3</sup> Yesus noro man lernohi pakunohi enihe rakanedi oir lap Galilea wali enne lolo leke Gerasa ne, hi pakromnala mo'oni ida man hayakyaka huhu'urle raram. Ai nadedem holi ku'il-ku'il man aile makileke. Ai onne naruri rehi, de ri nodi rantan wuku me'ene, kan yadi.

<sup>4</sup> Lere romromo hi rodi rantan wuku liman ein, maa ma na'iseri eni hi'i rohuwedi, ri kan rehinale wake'e.

<sup>5</sup> Lelere a'alam an wakaukau mamani, nala waku nodi kuku tehteh kemen.

<sup>6</sup> An po'on Yesus lolo ko'u makun, an larlari la awikorno Yesus kalarna, ono hayakyaka man huhu'ur raramne nauroinedi Yesus me'e.

<sup>7-8</sup> Yesus hopon hayakyak onne na'henia, "Hayakyak o, mamharedi ri eni raram here!"

Hayakyak onneni wakau naruri na'henia, "Yesus, Makromod Lalap Ma Narehi Ma Nalewen Anan O! Num panaeku inhawa noro maya'u? Yon hi'i apinpinha maya'u."

<sup>9</sup> Yesus na'ukaniyale, "O naram inhoi?"

An walhe na'henia, "I naran 'Legiun,' ono mayai eniyenihe riwriwan rahrahu."

<sup>10</sup> Hi rapanak Yesus rewen wo'irha ra'heni, "Yono mohi yai mamhara leke eniyeni."

<sup>11</sup> Lere onne me'ede, wawi ukun aile maha ranoin ya'an lolo wo'or leren kan ko'uwala.

<sup>12</sup> Hayakyak onnenihe rapanak Ai na'henia, "Hopon mayai laa hu'urle wawi onnenihe raramne."

<sup>13</sup> Yesus hurinohi hi rala'a. Idewe ne, hayakyak onnenihe lar hu'urle wawi onne raram. Oih! Wawi lo'o riwan woro'o rapaililili lolo wo'or leren idewe laa oir lap Galilea raram, de maki mouwedi.

<sup>14</sup> Enime'ede man wa'an wawi onnenihe wali lari laa leke raram raderre radaul Yesus Nin hini'i eni, penia ri na'akeme lari lar do'on in-hawa ma namwaliyedi eni.

<sup>15-17</sup> Hir lae ne, lupurala Yesus noro mo'oni man wa'anedi me'e onne. Hir po'one, mo'oni onne naikokoro, ka na'oho, naspolo rainedi me'e. Enla ri man idedi do'on Yesus, mahanoro konohi heri onnenihe na'henia, "Idedi ai lam po'on Yesus nohiyedi hayakyaka manin mo'oni onne raramne. Enla hayakyaka onnenihe lar hu'ur wawi ma aile wo'or leren raramne. Idewe ne, wawi onnenihe lari laa oir lapa raram, de maki mouwedi." Ende na'akeme ramka'uk, rapanakala Yesus na'henia, "Pape, wa'an rehi Papa laa onno namehin here!"

<sup>18</sup> Kame'ede An ha'a laa korkoro wawan wali'ur, mo'oni man idedi hayakyaka huhu'urle raramneni mai napanak Yesus, "Pape, ya'u lernohi haenhi."

<sup>19</sup> Enimaa, Yesus namhene. Ai na'ahenia, "O mala'a here! Lam do'on o wallumhe konohi hi na'ahenia, 'Makromod naramyaka ya'u, de hi'i wa'anedi ya'u me'e.'"

<sup>20</sup> Ende mo'oni onne kuli kuli leke idaweli lolo noho ma naran Dekapolis kukunohi inhawa man Yesus hi'i ai kemen. Enpenia na'akeme man derne polletilu.

*Jesus hi'i wa'an maeke ida nina apinha la na'amori Yairus anan maekana*

(Mat. 9:18-26; Luk. 8:40-56)

<sup>21</sup> Yesus hopol wali'ur laa oir lap Galilea wali. An rakan ne, ri nammori mai lupurale lolo oir lap arkanne.

<sup>22</sup> Kan maha ne, uluwakun Yahudi rir kerei ida naran Yairus mai oir lapa arkan onneni. An do'onedi Yesus ne, lan awikorno Yesus kalarna.

<sup>23</sup> Ai napanak an'anhedi na'ahenia, "Papee, ya an'u maekane nin kini'ir werek wake'e, na'akeki maki me'e. Papa laa roulale leke wa'an. Alkalo'o ka noro ika me'e."

<sup>24</sup> Enime'ede Yesus noro Yairus ra'alono rala'a.

Ri nammori lernohi la lupurale lolo waliwali.

<sup>25</sup> Maeke ida man lernohi nina apinha rare wau anna idaweli woro'o me'e.

<sup>26</sup> Ainin apinha werek wake'e penia ai na'ahoruwedii kupan rahu ono nale ma na'inapin nammori me'e, maa nin apinhe kan wa'ane, eren wewerek.

<sup>27-28</sup> An derne Yesus eni penia hi'i wa'anedi ri nammori me'e, de ai nahehe

na'urani lolo Yesus kili'urne, ono ainina panaeku nahenia lo'o tukulala Yesus Nina rain ke'e de nin apinha wa'anedi me'e.

<sup>29</sup> Ende an tukuledi Yesus Nina raine eni ne, idewe ai nauroin nina apinha wa'anedi me'e.

<sup>30</sup> An tukuledi Nina raine me'e ne, Yesus nauroin nahenia Nina ke'eke'el an'anhe tarana namharedi raramne me'e, de An wali kili'urne na'ukani, "Inhoi man tukul Ainu'u raine?"

<sup>31</sup> Enine man lernohi pakunohi ra'aheni, "Eih! Papa mehen do'on ri rahu eni, rasessese, de ai kam do'on inhoi man tukul Pape."

<sup>32</sup> Enimaa Yesus koklolo waliwali nanoin inhoi man tukule.

<sup>33</sup> Ri maeke onneni nau-roin ha ma namwali kemen eni, de nodi kemen ma narururu mai nalwali yawa Yesus kalarna konohi inhawa ma namwali ai kemen eni.

<sup>34</sup> Horu ne, Yesus na'aheni, "Ya an'u, o akin naili'il Maya'u, de num apinha wa'anedi me'e, mala'a wawa'anedi."

<sup>35</sup> Yesus wakunkunu ne, hophopon wahwahan nano uluwakun kerei Yairus nina nakar mai konohi Yairus na'ahenia, "Pape, tatana maekane aran horuwedi me'e, de yono ma'o'o Pap Meser me'e."

<sup>36</sup> Enimaa Yesus kan peinohi rira wanakunu onne, de Ai ne'el Yairus na'ahenia, "Yono mamka'uk, maa akim naili'il Maya'u mehe!"

<sup>37</sup> Ende Yesus nala'a me'e, la namhene rin lernohie

kokoko Petrus, Yakobus noro mo'oniwalla Yohanis.

<sup>38</sup> Hir rakanedi Yairus nina nakar ne, Yesus do'on heri rusu arra wake'e la derne kananhi dududum.

<sup>39</sup> An laa romleher na'ukani hi na'ahenia, "Alhi'ihepenia mim arra la mahere? Tataneni kan maki, maa namkukuru."

<sup>40</sup> Man penpenu onne ralau Yesus.

Enime'ede An hopon heri onne laa mouwedi paharne. Enla Ai noro tatana onne inna aman noro ri wokelu man lernohi pakunohi laa tatana onne nina kamar.

<sup>41</sup> An roulle tatana liman na'aheni, "Talita kum!" Napa'ahne, "Inaye, ma-makedi!"

<sup>42</sup> Idewe inai onne namaka, nala'al'a. Nina anna idaweli woro'o me'e. Ri man aile kamar onne do'on ha ma namwali eni polletilu.

<sup>43</sup> Enla Yesus nala konomdere hi na'ahenia, "Yono wakunu ha eniyeni ri." Enla An hopon inna aman na'ahenia, "Mala hanana'an tarana na'an."

## 6

*Manin Nazaret ra'okuledi Yesus*

(Mat. 13:53-58; Luk. 4:16-30)

<sup>1</sup> Yesus noro Nina man lernohi pakunohi enihe ramhara lolo onne (Kaper-naum) wali wali'ur laa Nina leke Nazaret.

<sup>2</sup> Enla rakan Yahudi nina Alam Renren Warwarna, An laa rira kerei wakuku.

Ri nammori derne Nina wanakuku eni polletilu, ra'aheni, "Ri eni lernala

panaeku na'akemeni nano ewi? An lernala woroin eni nano ewi penia Ai nauroin hi'i tanada ri kan dodo'onnala makun?"

<sup>3</sup> Ida ma na'ukani ida, "Namlolo, ka? Ai onne namwali tukan aue? Inna Maria, la mo'oniwalinhe Yakobus, Yoses, Yudas, noro Simon? Narnhe aile mai eni, haenhi." Enpenia hi ramhene derne rakani Ai.

<sup>4</sup> Enine Yesus na'aheni, "Nadedem rin horhawa nabi lolo ewi-ewi, maa mai lolo nina lekloi ai lodon walinhe noro nakar raram memen ka rahiyyene arore."

<sup>5</sup> Ende lolo onne Ai kan hi'i ha man ri kan do'onala makun nammori, kokoko roulle ri ida woro'o liman hi'i wa'an.

<sup>6</sup> An hehel rehi hi akin ka naili'ile.

*Yesus hopon Nin ri idaweli  
woro'o laa loikaru Lirna  
Wawa'an ri*  
(Mat. 10:5-15; Luk. 9:1-6)

Ai namhara nano Nazaret laa wakuku ri ma aile leke-leke lolo onne.

<sup>7</sup> Enla Ai napolu Nin ri idaweli woro'o man lernohi pakunohi enihe, hopon hi wororo'o laa leke-leke lolo onne, la Ai nala molollo hi rohi hayakyaka.

<sup>8</sup> An nou hi na'ahenia, "Mala'a, maa yono modi haida-haida, oir wa'alehere, kupan, me rou soke.

<sup>9</sup> Modi au ke'ke'en, pakpak ei, maa yon modi nainair herherre.

<sup>10</sup> Mim laa onnida, nakar ida kokaledi mi, mamkene lolo onne hehen nanumene mi mamhara leke onne.

<sup>11</sup> Enimaa, mim laa onno namehin lo'o ri namhene kokala mi, mamharedi lolon onne. Mamharedi ne, disnedi elimo'o hapu man aile mi eium raram, leke namwali tanada hi nahenia mi ka modi yodiwara ida hi me'e."

<sup>12</sup> An wakunu horu ne, hir laa loikaru Makromod Lirna ri, leke herredi rir morimori ma ka namlolo eni, la derne rakani Makromod Lalap Lirna Wawan eni.

<sup>13</sup> Hi rohi hayakyaka nammori nano ri raram, rala wuru sapu ma nakni'ir, la hi'i wa'anedie.

*Ri nesne Yohanis man ulutada eni*

(Mat. 14:1-12; Luk. 9:7-9)

<sup>14</sup> Enime'ede rai Herodes dernedi wanakunu ma na'ono Yesus Nina hini'i wenewheni, ono Yesus naran pe'er wake'edi me'e. Ri heruwali ra'aheni Ai onne Yohanis ma nodi oir ulutada ri, mori wali'uredi me'e, penia Nina molollo aile hi'i tanada ri kan do'onala makun,

<sup>15</sup> maa ri namehin ra'aheni Ai onne, Elia. Ri namehin ra'aheni wali'ur Ai onne nabi ma nodi Makromod Lalap Lirna Wawan nonolu eni.

<sup>16</sup> Ende Herodes derne panaeku onneni an kernala na'ahenia, "Ka! E'eni, Yohanis man nonolu ya'u hopon peku uluwakun eni. Ai peni mori wali'uredi me'e."

<sup>17</sup> An wakunu heheni ono lere nonolu an hopon ri lan kele Yohanis rodi laa bui raram. Yohanis eni tumdesne mamani ono an ho'edi noro mo'oniwalla Pilipus hono naran Herodias.

<sup>18</sup> Ler onne Yohanis ne'el Herodes na'ahenia, "Om larlewenedi Makromod Lalap Nina keneri hono'ok me'e, ono o moro mo'oniwallum hono Herodias ho."

<sup>19</sup> Enpenia Herodias nala panaeku wo'ira loiyedi akin, de nahehe nanoin kalla nesne Yohanis.

<sup>20</sup> Maa, rai Herodes kawkawala hono leke yono nesne Yohanis, ono ai nauroin Yohanis ri man akin moumou dewdewe, la namwali ri molololo Makromod Lalap kalarna haenhi, de horhawe. Herodes hopon ri lan kele Yohanis wuku rodi laa bui raram, la radiyaka wawa'an leke yono rin hi'i suse. Lere romromo ne, rai Herodes hopon rala Yohanis mai paharne, leke woro'ohe wakunu ono Herodes nina suk nakanie, kade nin wanakunu onne hi'i Herodes akin ka namkene.

<sup>21</sup> Kame'ede rakan Herodes nin lere alam momori mene Herodias lernala leken paharlin nesne Yohanis. Lere onne rai Herodes hi'i yapi lapa. Lariyala nina muku uluwakun ma nodi molollo noro uluwakun-uluwakun ke'urauk, roro leleher lapa Galilea mai.

<sup>22-23</sup> Enpenia lere onne Herodias nahehe paipudi hono lolo yapi, de hopon anan maekane lan waur heri onne kalarna. An waur ma'aruru, de rai Herodes nala lira nahenia turanne, "O mapanak inhawa, ya ala ki o, kade leke a'un wali ya ala ki o."

<sup>24</sup> Enime'ede an laa na'ukani inna na'ahenia,

"Mame, ya apanak inhawa?"  
Inna walhe na'ahenia,  
"Laa mapanak Yohanis  
uluwakun."

<sup>25</sup> Idewe ne, an laa napanak na'ahenia, "Pape, ya apanak lere eni me'ede, mala Yohanis uluwakun loile ra'u lape mala maya'u."

<sup>26</sup> Herodes derne napanak onneni akin woiredi. Enimaa na'okul hehewi ho'o, ono an loiyedi lira hopo popolu lalariyala enihe kalarna me'e.

<sup>27</sup> Ende ne'e namhene hopon nin ri laa bui raram peku Yohanis uluwakun nodi mai. An peku Yohanis uluwakun horu,

<sup>28</sup> nodi mai nala kani maekana onneni. Horue ne, nodi laa inna.

<sup>29</sup> Kame'ede Yohanis nina man lernohi pakunohi derne ha onne, hir laa rala Yohanis ihin kemen rodi loile ku'il ida ma namwali lunne raram.

*Jesus nala banana'an ri riwan wolima ra'an*  
(Mat. 14:13-21; Luk. 9:10-17; Yoh. 6:1-13)

<sup>30</sup> Yesus Nina hophopon man laa raderre radauledi Lirna Wawa'an enihe wali mai roro Yesus pakromomo wuku wali'ur, leke loikaru rira nala'la'a lirna la'an.

<sup>31</sup> Hir waliyedi ne, ri nammori mai mamani, de kar lernala leken ra'ak romun. Ende Yesus naka'uk hi, "Pap mie, mai kala'a onno ma namlina namkai, warnala tarana."

<sup>32</sup> Ende hir ha'a laa kor-koro wawan hopol laa on-nida man ri kan holie.

<sup>33</sup> Enimaa ri nammori po'on hirala'a. Enime'ede ida man konohi ida na'ahenia, "Yesus hopoledi me'e. Mai ik lolo kalla ro kala'a halhala leke ik koluwedii Yesus la onno man hir lalaa eni."

<sup>34</sup> Yesus rakanedi ro, An do'on heri rahu onneni ne, Ai raram penu rehi ono hi raisa pipduma ma na'alehe man hurie. Ende An min lolo onne, An wakuku Makromod Lalap Lirna Wawan nammori hi.

<sup>35</sup> Rakan lere na'akeki helem me'e, Yesus Nina man lernohi pakunohi mai ra'ahenia, "Pape, lere helem me'e. Mai eni noho mamun,

<sup>36</sup> de wa'an rehi hopon heri rala'a here, leke lar weli hanana'an leke-leke man ranrani eni, ra'an."

<sup>37</sup> Enimaa Yesus na'aheni, "Mi mehe mala hanana'an, hi ra'ane."

Hir polletilu ra'ahenia, "Idei! Aanim kupan kan nokor lam weli roti hi na'akeme ra'an! Lo'o ik na'akeme howok rakan wollo ida mene ik lernala kupan\* man nokor laa weli roti heri rahu eni ra'ane."

<sup>38</sup> Ai na'ukani hi na'ahenia, "Roti aile, ka? Mim lam tolle ke'e."

Ende hi lar tolle, wali mai konohi Yesus, "Roti kem wolima noro i'in kem woro'o mehe."

<sup>39</sup> Kame'ede Yesus hopon heri onnenihe raikoro penek wawanne, hi'i lopun-lopun.

<sup>40</sup> Lopun heruwali muku ri wellima, lopun heruwali ri rahu ida.

\* **6:37** Wanakunu Yunani na'ahenia, "pere rahu woro'o". Kupan onne nammenehe ri ida nina naiwe'el anna ida.

<sup>41</sup> Enime'ede Yesus nala roti kem wolima noro i'in kem woro'o onne, niliha'a laa wawan napanak trimkasi Makromod Lalap. Horu, An a'un roti nala kanile Nin man lernohi pakunohi enihe leke ha'ar heri ra'an. An uku i'in kem woro'o heri na'akeme ra'an haenhi.

<sup>42</sup> Ende heri na'akeme ra'an hehen nanumene pehur mouwedi.

<sup>43</sup> Horu ne, man lernohi pakunohi ra'ukwuku roti noro i'in ma narehi lunu idaweli woro'o penpenu.

<sup>44</sup> Lere onne aki mo'oni ma na'ak enihe mehe riwan wolima (maeke noro tatan'ukun kar aki makun).

*Jesus nala'ala'a lolo oir ulikne*  
(Mat. 14:22-33; Yoh. 6:16-21)

<sup>45</sup> Hi ra'ak horu ne, An hopon Nin man lernohi pakunohi ha'a laa korkore hopol rolu laa leke Betsaida ma aile oir lapa wali. Enla An hopon heri onneni wali wali'ur laa rir lekloie.

<sup>46</sup> Hi rala'edi mene Yesus wakiha'a laa wo'or ida leke hi'i lir napanak Makromod Lalap.

<sup>47</sup> Alamedi me'e, korkoro man lernohi pakunohi haha'ale aiyedi oir lapa toro me'e, la Yesus memehedi lolo ro makun.

<sup>48</sup> An po'onala hi kar wainnala korkoro me'e onno kahi anne nammori rehi kukuwala hi. Ende rakan noho roropeni, Yesus nala'ala'a lolo oir ulikne mai wakuraniyedi rir korkoro eni me'e.

<sup>49-50</sup> Ai na'akeki lewenedi rir korkoro mene hir do'on Ai nala'ala'a lolo oir ulikne. Hir do'on ne, hi ramka'uk rehi ono hir pene'ek hir do'on maki hamarane.

Ai ne'el hi, "Karkaramedi! E'eni Maya'u. Yono mamka'uk!"

<sup>51</sup> An ha'a laa korkoro wawan, ideweni kahi anne namlinedi. Hir polletilu ra'aheni, "E'eni inhoi pe?"

<sup>52</sup> Kade eni nanumene hir do'on Yesus nala roti tarana hi'i namwali nammori, maa hi ka rahinoroknala panaeku onne wake'e ono hi akin kerhe.

*Jesus rakan Genasaret hi'i wa'an man apinha*  
(Mat. 14:34-36)

<sup>53</sup> Rakanedi oir lap Galilea wali ne, hir pali lolo her Genasaret.

<sup>54</sup> Paliyedi ne, hir kopur laa ro, la ri man aile lolo onne rahiyyennaledi Yesus me'e, de

<sup>55</sup> hir lari laa leke-leke ma aile waliwali onnenihe wakau na'ahenia, "Yesus maiyedi me'e. Modi ma nakni'ir laa here!" Enime'ede hi rodi ma nakni'ir rala loile pik'i, rodi laa Yesus.

<sup>56</sup> Ende An laa ewi-ewi rin lernonohie, laa leke-leke, laa wo'or-wo'or, ri nodi ma nakni'ir mai pasar leke rapanak An hi'i wa'an. Ende hi rapanak rehrehi lewen leke Yesus hurinohi ma nakni'ir enihe tukulala Nin rain eni, kade rain honon me'e wa'an. Enla man tukul rainne na'akeme wa'an mouwedi.

## 7

*Panaeku ma namhara ri  
akin nodi mo'mo'ol mermoru  
(Mat. 15:1-9)*

<sup>1</sup> Ler ida ri Parisi enihe roro meser Horok Lape ida woro'o rano Yerusalem mai pakromo noro Yesus.

<sup>2</sup> Hir do'on Nina man lernohi pakunohi enihe kar lernohi agame Yahudi nina holoor halauk man hopon ri nawanedi liman, mene na'ak.

<sup>3</sup> Ri Parisi roro Yahudi namehin na'akeme rasala kerkerhe upun a'anhe rira noho honolla ma na'ono rawana liman mouwedi mene ra'ak.

<sup>4</sup> Enla inhawa hir weli pasar hi radedem rodi oir wuriyedi mene ra'an.\* Onne kan mehe, maa hi rasala kerkerhe rira holoor halauk ma na'ono rawana ra'u noro ha man rodi hi'i ya'an yomun.

<sup>5</sup> Enpenia ri Parisi roro meser Horok Lape enihe ra'ukani Yesus, "Alhi'ihepenia Numa man lernohi pakunohi kar lernohi ik upud a'ad rira holoor halauk de rawanedi liman mene ra'ake?"

<sup>6</sup> Enine Yesus walhe na'ahenia, "Eih! Mi ri man kokme'e ramwali ri molololo mie! Nonolu eni Yesaya wakunu namlolo kokkoo, lere an wekel mi na'ahenia, 'Makromod Lalap na'aheni

heheni,

Ri onnenihe horhawa Ya'u rodi lirna mehe, maa

akinhe ko'u wake'e Maya'u.

<sup>7</sup> Hirira honoi kanani Maya'u kan min haida, ono hir nair ri mormori nina holoor halauk mehe la ra'aheni onne Ainu'u, maa ka nam-lolo.\*

<sup>8</sup> Mim kemenedi Makromod Lalap Nina keneri hono'ok la masala kerkerhe ri mormori nina.

<sup>9</sup> Mi mauroin wawa'an ma'okul Makromod Lalap Nina keneri hono'ok leke mi masala ri mormori nina.

<sup>10</sup> Musa loikaruwedie honopon me'e na'ahenia, 'Horhawe mi inum ammu.' Enla, 'Inhoi warei yakyaka inna-aman, hukumesnedie.'

<sup>11-12</sup> Maa mim wakuku nahenia kan hi'i haida rin wakunu noro inna aman na'ahenia, 'Yono ya ala haida paku mi leke mim mori wawa'an, maa lo'o wa'an rehi ya ala hahaa rodi paku mi onne, odi laa hoikani Makromod Lalap.'

<sup>13</sup> Ende mi ma'okuledi la larlewenedi Makromod Lalap Nina keneri hono'ok me'e, leke masala kerkerhe mi upun a'anhe rira noho honolla. Onne kan mehe, maa mim hi'i yaksala namehin nammori haenhi."

*Ha man hi'i rin morso  
(Mat. 15:10-20)*

<sup>14</sup> Horu, Yesus napolu wali'ur heri rahu onneni na'ahenia, "Derne

\* 7:4 Ee, 'Enla lo'o hir laa pasar weli banana'an wali mai nakar, hi radedem lernohi noho honolla ma na'ono rawana liman mene ra'an.' \* 7:7 Yes. 29:13

\* 7:10 Kel. 20:12, 21:17, Im. 20:9, Ul. 5:16

makaniyala leke mauroin  
Ainu'u panaeku eniyeni:

<sup>15</sup> Ha man laa ri raram kan  
hi'i rin morso, maa ha ma  
namhara nano ri akin penia  
hi'i rin morso. [

<sup>16</sup> Ende mi kilinum aile der-  
nala.]†

<sup>17</sup> An wakuku horu ne,  
Ai noro Nina man lernohi  
pakunohi hoikaruwedi heri  
onne rala'a romleher me'e.  
Hi ra'ukanie, "Wanakunu  
naho'ok idedi eni nina  
panaeku inhawe?"

<sup>18</sup> Enine An walhe,  
"Alhi'ihepenia mi ka mau-  
roin wanakunu onne  
makun? Hanana'an man ri  
na'an laa ri raram mehe, la  
kan hi'i rin morso.

<sup>19</sup> Hanana'an man laa ri  
raram onne penia kan laa  
ri akin, maa lolo ri konoin  
mene namhara mai pa-  
harne." (Ende Jesus na'heni  
banana'an na'akeme wa'an,  
kan hi'i rin morso.)

<sup>20</sup> Enine Jesus na'uwalii  
wali'ur na'henia, "Ik  
honorok akin penia ma  
na'amo'ol na'ameru iknik  
mormori,

<sup>21</sup> ono nano ri akin penia  
namhara panaeku yaka noro  
ha ma ka namlolo naise:  
lerpi'u lerwa'u, ramna'a,  
resne ri,

<sup>22</sup> rakmanni ri nina ha-  
haa, ka rauroin honoli,  
wukupoho ri, hi'i ha ma kan  
lolo ri honorok akin, kunuke-  
hen ri, wakunu nano'onyak  
ri, holi kukulu lalapa, noro  
hi'i ha ma naploo naplakar.

<sup>23</sup> Panaeku wo'ira ma  
namhara ri irhun raramne  
eni penia hi'i rin morso."

*Maeke ma ka namwali*  
*Yahudi ida akin naili'il Yesus*  
(Mat. 15:21-28)

<sup>24</sup> Horu, Yesus lolo Galilea  
laa onnida na'uranrani  
Tirus. An rakan nakar ida, Ai  
namhene ri nauroin nahenia  
An min lolo onne, maa Nina  
maimai onne ka nasinuwari,  
de ri nammori mai.

<sup>25-26</sup> Maeke ida derne  
Yesus aile ne, an mai wali  
kemen yawa Yesus kalarna  
na'heni, "Ya apanak Papa  
hi'i wa'an ya an'u maekana,  
ono hayakyaka hu'uhu'ur  
raramne." Maeke onne ka  
namwali ri Yahudi, maa  
namhara leke Penisia, lolo  
noho Siria.

<sup>27</sup> Enpenia Yesus na'heni,  
"Ka nadedem rala tatan'ukun  
nin hanana'an sopol laa ahu,  
maa rala tatan'ukun ra'an  
nolu."‡

<sup>28</sup> An walhe na'henia,  
"Kokkoo Makrom'u, maa ahu  
enihe peni ra'an tatan'ukun  
rir ha mo'o ma nadiyaur mei  
leherne haenhi."

<sup>29</sup> Enime'ede Yesus  
na'heni ai, "Onuma  
wanalhe ma'aruru, de mala'a  
wawa'anedi. Hayakyaka  
namharedi anum raram  
me'e."

<sup>30</sup> An wali laa nakar  
po'onala ananne aile  
leu wawan namkuru  
karkaramedi la hayakyak  
onne kaale me'e.

*Jesus hi'i wa'an ri man  
roho la hakuku*

† 7:16 Horok man aile lolo tanada [ ] raram, kaale lolo horok Yunani dedesne heruwali. ‡ 7:27 Wanakunu lirna 'tatan'ukun' wekel ri Yahudi, la wanakunu lirna 'ahue' naho'ok ri ma ka namwali Yahudi enihe.

<sup>31</sup> Yesus namhara nano onno ma na'urani Tirus nala'a laa ra'i lolala kota Sidon mene wali wali'ur laa karanna lolo Dekapolis (leke Idaweli) mai oir lap Galilea.

<sup>32</sup> An rakan lolo onne, ri ida woro'o rodi mo'oni ida roho hakukuwedi mai rapanak Yesus loiyala liman leke wa'anedi.

<sup>33</sup> Enime'ede Yesus ni'ik ri onne nahaledi heri eni. Hir memehedi nanumene nala liman ra'an loile ri onne kilinna ku'il woro'o enihe, mene saprui aparne liman ra'ane nodi patal ri onne namalle,

<sup>34</sup> la Yesus niliha'a laa wawan, warnedi enu, la na'aheni, "Epata". Napa'ahne, 'Mahinari here.'

<sup>35</sup> Idewe kilinna nahnariyedi, namal mamaledi, la an derne wakunu wawa'anedi me'e.

<sup>36</sup> Enla Yesus nouwala hi na'akeme na'ahenia, "Yono konohi ri ha ma namwali eniye." Yesus eren nonou hi, maa hir eren wakukunu laliwewer.

<sup>37</sup> Ende man derne na'akeme polletilu, ra'aheni, "Ainin hini'i wenewhe na'akeme ha wawa'an manani. Man roho derne, man hakuku wakunu."

## 8

*Yesus nala banana'an ri riwan wo'akka ra'an  
(Mat. 15:32-39)*

<sup>1</sup> Nakawedi lere ida woro'edi ri nammori mai Yesus ho'o me'e. Maa, rira oir wa'aleher horu penia Yesus napolu Nina man lernohi pakunohi na'ahenia,

<sup>2</sup> "Ya'u raram penu heri eniye. Hir lernohi Ya'u lere wokelu me'e, la rira banana'an horuwedi me'e.

<sup>3</sup> Lo'o Ya'u hopon heri eni ramlarlara rala'a lo'o hir uma lolo kalla, ono heruwali ho'o ne holi ko'uwedi."

<sup>4</sup> Man lernohi pakunohi ra'ahenia, "Meneni ika mai noho kili'urne, de lernala banana'an ewi heri rahu eni ra'ane?"

<sup>5</sup> Yesus na'ukani, "Mi modi roti kem wo'ira?"

Hir walhe, "Keme wo'ikku."

<sup>6</sup> Kame'ede Yesus hopon heri rahu onne raikoredi nanumene nala roti onneni napanak trimkasi Makromod Lalap. Horu An a'un roti nala kani Nin man lernohi pakunohi leke ha'are, na'akeme ra'an.

<sup>7</sup> Enla hirira i'in kemana ida woro'o aile haenhi. Ai napanak trimkasi Makromod Lalap la kani Nina man lernohi pakunohi leke ha'are ho'o, de

<sup>8</sup> heri onne na'akeme ra'an pehur. Ra'ak horu, Nin ri enihe ra'ukwuku banana'an rehin na'akeme lunu wo'ikku.

<sup>9</sup> Ma na'ak mo'oni riwan wo'akka. Enla An hopon hi na'akeme wali laa nakar,

<sup>10</sup> nanumene Ai noro Nina man lernohi pakunohi ha'a laa korkoro wawan hopol laa Dalmanuta.

*Parisi enihe rapanak Yesus hi'i tanada man ri kan dodo'onnala makun  
(Mat. 16:1-12)*

<sup>11</sup> Ri Parisi ida woro'o mai leke rawalha lira noro Yesus.

Hirira panaeku ken Ai de rapanak An hi'i tanadida nodi kunukunohi nahenia An mai nano a'am raram.

<sup>12</sup> Yesus heheledi la na'aheni, "Alhi'ihepenia ri ku eniyeni rapanak ya'u hi'i ha ri kan dodo'onale? Loi honorok wawa'an Ainu'u panaeku ma na'ono eniyeni: Ka'u hi'i haida-haida ri eniyeni do'on."

<sup>13</sup> Horu ne, Yesus hoikaruwedi heri onne, la ha'a laa korkoro wawan hopol laa oir lapa wali.

<sup>14</sup> Hir hopol ne, man lernohi pakunohi enihe hamlinuwedi rodi oir wa'aleher, la roti kem ida mehe aile korkoro wawan.

<sup>15</sup> Yesus konohie na'ahenia, "Nakinemen ki mi! Herodes noro ri Parisi enihe rira wanakuku naise ragi rodi ralha'a taponne."

<sup>16</sup> Enpenia man lernohi pakunohi ida ma na'ukani ida ra'aheni, "Alhi'ihepenia An wakunu heheni? Lo'o An wakunu heheni ono ika hamlinuwedi kodi roti harome."

<sup>17</sup> Enine Yesus nauroin-naledi rira wanakunu me'e, de Ai na'ukani hi, "Hi'ihepenia mawalha lira ma'aheni, 'Ik hamlinuwedi kodi rotie?' Ya'u hehel rehi! Alhi'ihepenia mi honorok akim makiyedi?

<sup>18</sup> Hi'ihepenia mi makum aile, maa mi kam do'on, mi kilinum aile, maa mi kam derne? Lo'o mim hamlinuwedi ha ma namwali

<sup>19</sup> lere Yo odi roti keme wolima ha'ar leke ri riwan wolima ra'ane? Emene rehin

mim loiwuku lunu penpenu wo'ire?"

Hir walha, "Lunu idaweli woro'o, Pape."

<sup>20</sup> Yesus na'ukani hi wali'ur, "Lo'o mim hamlinuwedi lere Yo odi roti keme wo'ikku ala ri riwan wo'akka leke ra'ane? Emene rehin mim loiwuku lunu lapa wo'ira?"

Hir walha ra'ahenia, "Lunu lapa wo'ikku, Pape."

<sup>21</sup> Yesus na'ukani hi wali'ur na'ahenia, "Hi'ihepenia mi ka mauroin makun?"

*Jesus hi'i wa'an ri makan tokedi*

<sup>22</sup> Yesus noro Nina man lernohi pakunohi rakan Betsaida, ri nodi mo'oni ida man makan tokedi mai Yesus. Man makan toko onne napanak Ai, "Papee, ya apanak Papa rouwalle i mak'u leke hi'i wa'anedi ke'e."

<sup>23</sup> Enine Yesus nasala liman nodi laa leke paharne mene An saprui ri onne makan. Horu kemenala liman ri onneni makan la na'ukani na'ahenia, "Om do'on haida me'e, kaunu?"

<sup>24</sup> Enine ri onne po'onala Yesus na'aheni, "Ya'u do'on ri, maa kan mouropo makun. Ya'u po'on ri naise au'ono ma nala'ala'a."

<sup>25</sup> Enime'ede Yesus nodi liman kemenala ri onne makan wali'ur. Idewe an do'on ha wo'ira na'akeme mouwedi me'e.

<sup>26</sup> Horu Yesus hopon ai na'ahenia, "Wali laa nakar here! Yom lolo leke onne me'e."

*Petrus nauroin Yesus eni  
Makromod Lalap kikanedi  
namwali Rai laa ewi-ewi  
(Mat. 16:13-20; Luk. 9:18-  
21)*

<sup>27</sup> Enla Yesus noro Nina man lernohi pakunohi laa leke-leke man aile na'uranrani kota Kaisaria Pilipi. Rakan kalla toro ne, Ai na'ukanihe, "Ri na'aheni Ya'u eni inhoi?"

<sup>28</sup> Hir walha, "Heruwali ra'aheni Yohanis ma nodi oir ulutade (man makiyedi me'eni), heruwali ra'aheni Elia, heruwali ra'aheni nabi."

<sup>29</sup> Horu ne, Ai na'ukani hi wali'ur, "Emene lernohi minim panaeku, Ya'u eni inhoi?"

Petrus walhe, "Papa eni pena Kristus man Makromod Lalap kikan namwali Rai laa ewi-ewi."

<sup>30</sup> Enla Yesus hopon hi yono konohi ri Ai onne inhoi.

*Yesus konohi Nina makkabi Nin man lernohi pakunohi enihe*

*(Mat. 16:21-28; Luk. 9:22-  
27)*

<sup>31</sup> Onne horu Yesus wakukuwala Nina man lernohi pakunohi enihe na'ahenia, "Ya'u, ma namwali Ri Mormori Anan, lernala wewerek pananaka rahu. Enla Yahudi rir leleher lalapa, imam lalapa, roro meser Horok Lap enihe kar kokala Ya'u, de resnedi Ya'u. Enimaa rakan lere wokelu Ya'u mori wali'ur."

<sup>32</sup> An wakuku hi nodi wanakunu man mouropo.

Enimaa Petrus ni'ik Yesus laa herne dadiyale

na'ahenia, "Papa, yono wakunu heheni."

<sup>33</sup> Enine Jesus nadivali po'onala man lernohi pakunohi enihe mene dadiyala Petrus na'ahenia, "Hayakyak Makromon o! Mala'edi here! Onuma panaeku onne ri mormori nine, Makromod Lalap, ka."

<sup>34</sup> Kame'ede Jesus napolu Nina man lernohi pakunohi noro ri nammori man aile lolo onneni mai, leke wakuku hi na'ahenia, "Ri man raram nodi lernohi Ya'u, yon nodi nina raram nodi aimehi, maa na'uwara nina au kekiyowok la lernohi Ya'u.\*

<sup>35</sup> Ya a'aheni eniyeni ono inhoi namka'uk ihin kemen maki, de namhene huri nin morimori lolo noho wawan eni, ai onne kan lernala or'ori dardari ma namlolo. Maa ri man huriyedi nin morimori lolo noho wawan eni leke lernohi Ya'u noro Makromod Lalap Lirna Wawa'an eni, ai onne lernala or'ori dardari ma namlolo ma kan horu.

<sup>36</sup> Lo'o ri ida manarna noho wawan nin ha wo'ira na'akeme, maa kan lernala or'ori dardari ma kan horu, nin panaeku onne kan min haida.

<sup>37</sup> Ai lo'o nala inhawe leke lernala or'ori dardari ma kan horu?

<sup>38</sup> Ri mormori lere alam eniyeni kar derne rakani Makromod Lalap Nina nounaku, maa hir derne rakani ri namehin la hi'i do-hohala mamani. Horhorok! Inhoi nawawa Maya'u de namhene konohi ri man

\* **8:34** Wanakunu 'na'uwara nin au kekiyowok la lernohi Ya'u' napa'ahne, 'namkene lernala apinpinha la maki leke lernohi Ya'u.

ailanna onne na'ahenia, 'Ya'u lernohi Yesus noro Nina wanakuku eni,' na'amoli Ya awawa nala ai haenhi. Lere Yo odi Ya Am'u Nina ke'eke'el an'anhe ma narehi nalewen oro hophopon a'am raram man moumou dewdewe kopur mai noho wawan, Ya awawa nala ai haenhi."

## 9

<sup>1</sup> Horu ne, Yesus na'aheni, "Horhorok Ainu'u nou ma na'ono eniyeni: Nano mi man min lolo eni heruwali kam maki makun, mim do'on mauroin hi'ihewi Makromod Lalap nodi molollo mai noho wawan eni noro idewe Nina ke'eke'el an'anhe."

*Makromod Lalap na'akulu na'alapa Yesus*

(Mat. 17:1-13; Luk. 9:28-36)

<sup>2-3</sup> Nakawedi lere woneme ne, Yesus, Petrus, Yakobus noro mo'oniwalla Yohanis ra'alono wakiha'a wo'or kukulu ida. Hir mehe min lolo onne.

Hi ramririri ra'uranrani Yesus, idewe Yesus kemen namehiyedi la oin makan noro Nina rain siksika lerlere, la Nina rain wawarha narehiyedi ha wawarha na'akeme noho wawan.

<sup>4</sup> Horu ne, hi ramlilinnohi do'on Yesus wakunkunu noro Elia noro Musa.

<sup>5</sup> Enine Petrus na'ukani Ai na'ahenia, "Hi'ihewi Pap Meser, ika min mai eni ma'aruru rehi, de lo'o wa'an rehi ai ma'ariri heuheu wokelu lolo eni, ida Makrom'u nine, ida Musa nine, la ida Elia nine."

<sup>6</sup> Petrus na'ukani heheni ono ai noro walin ramka'uk rehi.

<sup>7</sup> Enime'ede kakam ida mai pupinala hi, derne lira ida aile kakam raram na'ahenia, "E'eni Ya An'u, Ya amre'e Ya amharue, de mim derne makanie."

<sup>8</sup> Horu, hir po'on waliwali kar do'on ri woro'o onne me'e, do'on Yesus mehe.

<sup>9</sup> Hir kopkopur lolo wo'or laa yawa An nou hi na'ahenia, "Yom konohi ri inhawa man mim dodo'on lolo wo'or eni, hehen nanumene Ya'u ma namwali Ri Mormori Anan, maki la mori wali'ur."

<sup>10</sup> Ende hir lernohi Yesus Nina nou eni, maa ida ma na'ukani ida na'ahenia, "Ainin panaeku inhawa na'aheni An maki, maa mori wali'ur?"

<sup>11</sup> Enine hi ra'ukani Ai na'ahenia, "Alhi'ihepenia meser Horok Lape enihe ra'aheni Elia mai noho wawan nolu mene ri ma namwali Ri Mormori Anan maie?"

<sup>12</sup> Yesus walhe, "Hir wakunu namlolo, Elia nolu mai na'akene ha wo'ira namkene. Eni-maa hi'ihewi noro Ya'u ma namwali Ri Mormori Anan onne!?" Yon hamlinu horhorok aile Horok Lape raram ma na'aheni rin hi'i apinpinha la ra'okul Ri Mormori Anan onne!"

<sup>13</sup> Enimaa Ya'u konohi mi, Elia maiyedi me'e,\* la hir lernohi rira suk hi'i apinpinha Elia naise Horok Lape Lirna na'aheniyedi me'e."

\* 9:13 Mat. 17:13 Elia eni kukul Yohanis man ulutade.

*Yesus nohi hayakyaka  
man hu'ur tatana idararamne  
(Mat. 17:14-21; Luk. 9:37-43a)*

<sup>14</sup> Yesus noro wokelu enihe waliyedi nano wo'or rakan yawa ne, hir po'on ri nammori lupurala walinhe ma noro meser Horok Lape enihe rasesesi.

<sup>15</sup> Heri onne do'onedi Yesus ne, hi rahumarnedi, la lar kokale.

<sup>16</sup> Enine Yesus na'ukani man lernohi pakunohi na'henia, "Moro hi masesi inhawa?"

<sup>17</sup> Ri ida aile heri onne walhe, "Papa Meser, yo odi ya an'u mai Papa ono hayakyaka huhu'urle raram de hakukuwedie.

<sup>18</sup> Lere hayakyak onne hu'ur raramne, nale wali yawa, ukumwukuwedi nihin wawan, aparne nawurwuri, idewe liman ein lapekiredi. Ende ya apanak Papa Nina man lernohi pakunohi enihe rohi hayakyaka man aile raramne, maa kar paekunale."

<sup>19</sup> Enine Yesus na'heni, "Heih! Mi ri ku eniyeni! Mi kam derne makani Ya'u la mi akim ka naili'il kokkoo. Yo oro mi nalo'oledi me'e, maa mi akim ka naili'il Ya'u wawa'an makun! Rakan ma'anana ho'o Ya'u kerhu oro mi mene mi akim naili'il kokkoo? Modi tatana onne mai."

<sup>20</sup> Ende hi rodi tatana onne lae ne, hayakyak onne do'on Yesus, an hi'i tatana onne liman ein lapekir, de laedi yawa, idewe napoitititie la aparne nawurwuri.

<sup>21</sup> Enine Yesus na'ukani tatana aman na'henia, "Ma'ananahe me'e an hi'i heheni?"

An walhe na'henia, "Nano tatana me'e."

<sup>22</sup> Lere romromo hayakyak onne nahehe nesne de nodi la wakale aiye raram me oire raram. Enpenia ya apanak Papa naramyakala ke'e. Yonde Papa paekunala haromo, hi'i wa'anedi ya an'u ke'e."

<sup>23</sup> Yesus walhe, "Alhi'ihepe O ma'heni, 'Yonde Ya'u paekunale haromo?' Ha wo'ira namwali horo nahenia ri akin naili'il Makromod Lalap."

<sup>24</sup> Tatana onne aman wakau na'henia, "Makrom'u, ya akin naili'il Makromod Lalap, maa kekekiyana makun. Pakuwala'u leke ya akin naili'il wawa'an."

<sup>25</sup> Yesus po'on ri nammori larlari maie ne, An komdere hayakyak onne na'henia, "Hayakyaka o! Mamharedi nano tatana eniyeni, la yom kene hu'ur raramne wali'ur."

<sup>26</sup> Enime'ede hayakyak onne wakau la hi'i orok ni'ini'ik wake'e mene namhara. Man aile lolo onne do'on tatana onne naise makiyedi me'e, de hi ra'heni, "Aran horuwedi me'e."

<sup>27</sup> Enima Yesus roulle liman paku leke namriri. Enime'ede tatana onne namriyedi.

<sup>28</sup> Yesus noro Nina man lernohi pakunohi enihe rakanedi nakar ne, ri ida na'ukani Ai na'henia, "Hi'ihepenia ai kam paekunala mohi hayakyak onne?"

<sup>29</sup> An walhe, "Mi kam paekunala ono hayakyaka naise onneni ka rodi haida-haida rohi, kokoko mim hi'i lir napanak nolu."

*Yesus wakunu Nina Mak-makie*  
(Mat. 17:22-23; Luk. 9:43b-45)

<sup>30</sup> Yesus noro man lernohi pakunohi enihe ramharedi lolo onne ne, hir lolala Galilea rahaledi kemen leke yono ri nauroin hirira miminlole.

<sup>31</sup> An hi'i onne leke nounakuwala Nina man lernohi pakunohi enihe. An nou hi na'henia, "Ka nalo'ol me'e ri na'olu Ya'u ma namwali Ri Mormori Ananne, kanile ri mormori liman raram resne, maa alam wokelu Ya'u mori wali'ur."

<sup>32</sup> Enimaa hi honorok akin ka nala Nina wanakunu eni, la ramka'uk ra'ukani Ai ono hi rawawa.

*Inhoi man kulu narehi*  
(Mat. 18:1-5; Luk. 9:46-48)

<sup>33</sup> Yesus noro man lernohi pakunohi mai Kapernaum. Rakanedi nakar ne, Ai na'ukani hi, "Idedi mi masesi inhawa lolo kalla?"

<sup>34</sup> Enimaa, hi ka ra'oho, ono idedi hi rasesi inhoi man kulu narehi.

<sup>35</sup> Enine Yesus naikoro la napolu ri idaweli woro'o onnenihe mai na'henia, "Inhoi raram nodi namwali man kulu narehi, wa'an rehi namwali ri man lolo yawa la ri man lolo honopon heri na'akeme."

<sup>36</sup> Enla Yesus napanak tatanida mai namrirri hi kalarna mene Ai naurukue. An konohi hi na'henia,

<sup>37</sup> "Inhoi kokala tatana naise eniyeni ono hir lernohi Ya'u, kokaledi Ya'u haenhi, la ai kan kokala Ya'u mehe, maa kokala Makromod Lalap man hopon Ya'u mai haenhi."

*Inhoi ma ka na'okul ika, onne iknika muku*  
(Luk. 9:49-50)

<sup>38</sup> Horu ne, Yohanis konohi Yesus na'ahenia, "Pap Meser, am do'on ri ida nohi hayakyaka nodi Papa naran, maa am kawale ono ri onne iknik ri, ka."

<sup>39</sup> Enine Yesus walhe, "Yom kawale! Lo'o ri nodi I naran hi'i tanade man ri kan dodo'onnala makun, kan idewe wakunu warei yakyaka Maya'u,

<sup>40</sup> ono inhoi kan ewek kawala ika, onne iknika muku.

<sup>41</sup> Loi honorok wawa'an Ainu'u panaeku ma na'ono eniyeni: Inhoi paku mi ono mim lernohi Ya'u man Makromod Lalap kikanedi namwali Rai, an kokala nina wanahane, kade nala oir mi momun mehe."

*Ri man hi'i ri namehin nadiyaur dohohala sopoledi kawali pire ai porom raram*  
(Mat. 18:6-9; Luk. 17:1-2)

<sup>42</sup> Yesus wakunu wali'ur na'ahenia, "Inhoi hi'i tatana ma akin naili'il Ya'u nadiyaur dohohale, wa'an rehi wairedi waku lapida kelenne, rodilaa auredi heleken."

<sup>43</sup> Enla lo'o limmu hi'i o madiyaur dohohala, heruwedi, kalo'o o limmu woro'o enihe nodi o laa kawali pire ai porom raram. Wa'an rehi o limmu wali

kaale, maa mori wewerre  
noro Makromod Lalap, [

<sup>44</sup> ono lolo kawali pire ai  
porom onne aiye noro orre  
kan maki.]†

<sup>45</sup> Lo'o o eum hi'i  
o madiyaur dohohala,  
heruwedi! Kalo'o o eum  
woro'o enihe wakal o laa  
kawali pire ai porom raram.  
Wa'an rehi o eum wali kaale,  
maa mori wewerre noro  
Makromod Lalap, [

<sup>46</sup> ono lolo kawali pire ai  
porom onne aiye noro orre  
kan maki.]

<sup>47</sup> Lo'o o makum hi'i  
o madiyaur dohohala,  
hiduwedi, kalo'o makum  
woro'o enihe wakal o laa  
kawali pire ai porom raram.  
Wa'an rehi o makum wali  
kaale, maa om laa onno  
man Makromod Lalap nodi  
molollo raram,

<sup>48</sup> ono lolo kawali pire ai  
porom onne aiye noro orre  
kan maki.\*

<sup>49</sup> Rodi aiye ra'amou  
ra'adewe ri mormori  
na'akeme naise ri nala asir  
loile mahin leke yon yaka.

<sup>50</sup> Asir penia wa'an,  
maa asir ma ka nam'arha  
me'e, rodi inhawa leke hi'i  
nam'arha wali'ur? Ende  
yon mi maise asir ma ka  
nam'arha de sopoledi me'e,  
maa wa'an rehi mi mamwali  
asir ma nam'arha leke mi  
ida man mori wawa'an noro  
ida."

## 10

*Yon ri man hoedi reiha'ar  
(Mat. 19:1-12; Luk. 16:18)*

† 9:44 Horok man aile lolo tanada [ ] raram, kaale lolo horok Yunani dedesne heruwali. \* 9:48 Yes. 66:24 \* 10:4 Ul. 24:1-4 \* 10:6 NN. 1:27, 5:2 \* 10:8-9 NN. 2:24

<sup>1</sup> Enla Yesus noro Nina  
man lernohi pakunohi  
ramhara Kapernaum laa  
leke-leke man aile noho  
Yudea noro leke-leke man  
aile oir wauwau Yordan wali.  
Hir lae ne, ri nammori mai  
lupurale, la An wakuku hi  
naise nadedem eni.

<sup>2</sup> Ri Parisi ida woro'o mai  
leke ken Ai ra'ukani, "Lo'o  
iknika agame nina holoor ha-  
lauk hurihira mo'oni reiha'ar  
noro hono, ee ka?"

<sup>3</sup> Enine Yesus walhale  
na'ahenia, "Musa nala in-  
hawa keneri hono'ok ki mi?"

<sup>4</sup> Hir walhe, "Musa huri-  
nohi mo'oni namhenedi  
hono, horo nahenia hi'i  
horok reiha'ar nolu mene  
hopon hono nala'a." \*

<sup>5</sup> Maa Yesus walhe,  
"Hi'ihepenia Musa hopon mi  
hi'i horok reiha'ar onneni?  
Musa hi'i holoor halauk  
eniye ni ono mi akim kerhe  
rehi.

<sup>6</sup> Maa nano dedesneni,  
'Makromod Lalap umupaledi  
ri mormori, mo'oni noro  
maeke,\*

<sup>7</sup> penia mo'oni hoikaruwedi  
inna aman leke noro hono  
minwuku,

<sup>8-9</sup> de woro'ohe ramwali  
mahaku.' Ende inhoi Makro-  
mod Lalap kali wukuwedi  
me'e, yono ri mahaku  
reiha'ar, ono hi ka ramwali  
woro'o, maa ramwaliyedi  
mahaku me'e." \*

<sup>10</sup> Hir wali laa nakar ne,  
Nina man lernohi pakunohi  
ra'ukani panaeku eni wali'ur.

<sup>11</sup> Enine An konohi hi  
na'ahenia, "Inhoi namhene

maekleher, lan ho noro maeke namehin, ai onne lerwa'uwedi me'e la hi'i yaksala nin maekleher dedesneni.

<sup>12</sup> Enla lo'o maeke ida namhenedi nin mo'onleher, lan ho noro mo'oni namehin, an lerwa'uwedi me'e la hi'i yaksala nina mo'onleher dedesneni."

*Jesus nala rere'e haharu tatan'ukun*  
(Mat. 19:13-15; Luk. 18:15-17)

<sup>13</sup> Ri nodi tatan'ukun mai Jesus leke An kemenala liman hi, maa man lernohi pakunohi enihe dadiyala hi.

<sup>14</sup> Enimaa Jesus do'on rir hini'i eniyeni, na'ahan de na'heni, "Hurinohi tatana onnenihe mai Maya'u! Yom kawala hi ono Makromod Lalap nodi molollo ri naise tatana eniyenihe.

<sup>15</sup> Loi honorok wawa'an Ainu'u panaeku ma na'ono eniyeni: Inhoi ma akin ka naili'il Makromod Lalap naise tataneni, kan laa onno man Makromod Lalap nodi molollo raram."

<sup>16</sup> An wakunu horu, Ai nau-rukuwala tatana onnenihe, la kemenala liman tatana onnenihe dohodoho napanak Makromod Lalap nala Nina rere'e haharu la norle'ule'u norwaliwali hi.

*Ri orkanarue*  
(Mat. 19:16-30; Luk. 18:18-30)

<sup>17</sup> Yesus na'akene nala'a, mo'oni ida lari mai awikor-nro kalarne na'ukani, "Pap Meser man wa'an, ya'u hi'i

inhawa leke lernala or'ori dardari ma kan horue?"

<sup>18</sup> Enine Jesus na'ukani ai, "Hi'ihepenia o ma'aheni Ya'u wa'anA'u? Ri mahaku kan wa'an! Makromod Lalap mehe man wa'an.

<sup>19</sup> O mauroinedi Makromod Lalap Nina keneri hono'ok ma na'anou na'anaku nahenia: Yono mesne ri, yon lerpi'u lerwa'u, yon mamma'a, la yon modi poho tumdesne ri lolo hono'ok kanail onno, yono paipudi ri namehin, la horhawa o inum, o ammu."\*

<sup>20</sup> Ri onne walhe, "Pap Meser, keneri hono'ok onne na'akeme ya'u lernohiyedi nano tatana'u rakan lere eniyeni."

<sup>21</sup> Yesus po'one raram penuwale me'e na'aheni, "Enimaa, ha ida o kam hi'i makun. Laa ma'olu onuma hahaa na'akeme, mala kupan ha'ar ri ma na'alehe haida-haida, mene mam lernohi Ya'u, leke om lernala kanaru ma aile a'am raram."

<sup>22</sup> An derne Yesus wakunu heheni, akin werek rehi, de nala'a me'e ono ai orkanaru wake'e.

<sup>23</sup> Enla Yesus po'on wali-wali konohi Nina man lernohi pakunohi enihe na'ahenia, "Sus wake'e orkanaru laa onno man Makromod Lalap nodi molollo raram."

<sup>24</sup> An wakunu horu, man lernohi pakunohi polletilu. Enimaa Yesus wakunu wali'ur na'ahenia, "Ya an'u

\* **10:19** Kel. 20:12-16, Ul. 5:16-20 \* **10:24** Horok dedesne heruwali ra'aheni 'rin' eni wekel 'ri ma akin ka nahinuri nin linikir kanaru.'

mie, sus wake'e rin\* laa onno man Makromod Lalap nodi molollo raram.

<sup>25</sup> Sus wake'e unta waku ida lolala wanaka ku'il, maa man sus narehi onne, orkanaru laa onno man Makromod Lalap nodi molollo raram."

<sup>26</sup> Enime'ede hir eren polletilu, ida ma na'ukani ida na'ahenia, "Lo'o hi'i hehenine, inhoi lernala or'ori dardari ma kan horu onne?"

<sup>27</sup> Jesus po'onalahe na'aheni, "Ri mormori kan paekunala hi'i ha onneni namwali, maa Makromod Lalap mehe paekunala hi'i ha wo'ira na'akeme namwali."

<sup>28</sup> Enine Petrus na'aheni, "Emene mayai hi'ihehewi ho'o? Am kemenedi ainim ha wo'ira na'akeme me'e leke lernohi Pape."

<sup>29</sup> Jesus walhe, "Loi honorok wawa'an Ainu'u panaeku ma na'ono eniyeni: Ri man hoikaruwedi nina nakar, mo'oniwalla, narna, inna aman, anan, la nina kirna, leke lernohi Ya'u la derne nakani Makromod Lalap Lirna Wawa'an eni,

<sup>30</sup> lere man mai ri onne lernala nakar, mo'oniwalla, narna, inna aman, anan, kirna riwriwan rahrahu. Enimaa an lernala wewerek pananaka haenhi. Enla rakan lere man mai eni, ri onne lernala or'ori dardari ma kan horu.

<sup>31</sup> Enimaa ri nammori ma namwali man panulu lere eniyeni, lere man mai, ramwali ri man lolo yawa. Enla ri nammori man lolo

yawa lere eniyeni, lere onne ramwali ri man panulu."

*Jesus loikaru Nina mak-maki rewkelu nina*  
(Mat. 20:17-19; Luk. 18:31-34)

<sup>32</sup> Yesus noro man lernohi pakunohi rala'ala'a laa Yerusalem, la Yesus noluwedti laa kalari tarana. Nin man lernohi pakunohi hehel Nin wanakunu idedi eni,<sup>†</sup> la ri man lernohi nano kili'urn ramka'uk. Enine Yesus napolu Nina ri idaweli woro'o enihe maiwuku mene An konohi hi wali'ur lo'o inhawe namwali Ai kemen eni.

<sup>33</sup> Ai na'aheni, "Makaniyala! Lere eni ik kala'a mamani laa Yerusalem. Ik rakan enne, Ya'u ma namwali Ri Mormori Anane, rin na'olu, nala kanile imam-imam lalape roro meser Horok Lap enihe. Hir hukumesne Ya'u, la rala Ya'u kanile ri ma ka namwali Yahudi enihe,

<sup>34</sup> la hir ilnohi ralnohi Ya'u, saprui saworno Ya'u, riuk rerhe Ya'u,<sup>‡</sup> la resne Ya'u haenhi, maa rakan lere wokelu Ya'u mori wali'ur."

*Yakobus noro Yohanis rira napanak*  
(Mat. 20:20-28)

<sup>35</sup> Zebedeus ananne Yakobus noro Yohanis, laa ra'urani Yesus ra'aheni, "Papa Meser, am mai Papa mapanak ke'e de malala haida mayai."

<sup>36</sup> Enine Yesus na'ukani hi, "Mi raram nodi ya ala inhawa ki mi?"

<sup>37</sup> Hir walhe, "Rakan lere Papa nodi molollo lolo onno

<sup>†</sup> 10:32 hehel, ee rahumarna    <sup>‡</sup> 10:34 Po'onala catatan kaki ma aile Mat. 20:19.

man kukulu lalape, ai raram nodi maikoro lolo Papa herne mariri la malanna.”

<sup>38</sup> Enimaa, Yesus walhe, “Mi mapanak, maa mi ka mauroin minim napanpanak onneni inhawa. Mi lo'o paekunala momun oir man meru nano cawan Yo omun eni, ee ka? Mim paekunala rin ulutada mi noro unulu tanada maki naise hir ulutada Ya'u, ee ka?”

<sup>39</sup> Hir walhe, “Am paekunala.”

Enine An konohi hi na'ahenia, “Namlolo! Lo'o oreki mi momun oir man meru nano cawan Yo omun eni, la mim lernala apinpinha naise Ya'u haenhi,

<sup>40</sup> maa Ka odi molollo wekel inhoi naikoro Ya'u herne mariri malanna. Makromod Lalap mehen niliyedi ri man Ai raram nodi naikoro lolo onne, la na'akenedi rir onno me'e.”

<sup>41</sup> Man lernohi pakunohi idaweli namehin derne Yakobus noro Yohanis rira napanak eni ne, hi ra'ahan.

<sup>42</sup> Ende Yesus napolu hi na'akeme maiwuku, nala wanakunu na'ahenia, “Mi mauroin hair-hair rir rai noro rir uluwakun lalapa ma ka nauroin Makromod Lalap enihe, rodi molollo kerne dalha ri mormoriyaneni,

<sup>43</sup> maa yom hi'i heheni. Inhoi raram nodi namwali man panulu lolo mi, ai namkene ilitolle mi.

<sup>44</sup> Inhoi raram nodi namwali ma nolu, ai onne helkaki namdaru namwali hophopon wahwahan ri na'akeme.

<sup>45</sup> Ya'u ma namwali Ri Mor mori Anan penia ka'u mai leke rin ilitolle Maya'u, maa Ya'u mai leke ilitolle ri, la ala I kem'u resne leke huri we'er ri nammori nano rira dohohale.”

*Yesus hi'i wa'an Bartimeus man makan tokedi (Mat. 20:29-34; Luk. 18:35-43)*

<sup>46</sup> Yesus noro Nina man lernohi pakunohi roro heri ra'alono lolala kota Yeriko. Ramharedi ne, pakromonala mo'oni ida. Ai onne Timeus anan ma naran Bartimeus, makan tokedi la nadedem naikoro kalla arkan mehe napapanak.

<sup>47</sup> An derne nano man lolo onnenihe Yesus manin Nazaret eni maiyedi me'e. An wakau na'ahenia, “Yesus, Daud upun anane, maramyakala'u ke'e!”

<sup>48</sup> Enimaa ri nammori dadiyale, hopon na'ahenia, “Karkaramedi!”

Maa, ai namhene, wakaukau eren naruri na'ahenia, “Daud upun anane maramyakala'u ke'e!”

<sup>49</sup> Enime'ede Yesus derne namririyalala, na'aheni, “Lam polu ri onne more mai.”

Hir laa ra'aheni, “Papee, akim namranedi. Mamririayedi! Leher napolu o.”

<sup>50</sup> Idewe an ruriyedi nina raine nanaru eni wakaledi lolo onne, la nehu wawan nala'a laa Yesus.

<sup>51</sup> An lae ne, Yesus na'ukanie, “O raram nodi Ya'u hi'i inhawa ki o?”

Ai na'aheni, “Pap Meser, ya apanak hi'i i mak'u wa'anedi ke'e.”

52 Enine Yesus na'aheni, "Mala'a here! O akim naili'il Maya'u, de om wa'anedi me'e." Idewe ai makan wa'anedi, de lernohi Yesus rala'a.

## 11

*Lere Yesus laa Yerusalem ri nammori ra'uli rasa'e*  
(Mat. 21:1-11; Luk. 19:28-40; Yoh. 12:12-19)

<sup>1</sup> Yesus noro Nina man lernohi pakunohi enihe ra'uraniyedi Yerusalem me'e. Na'akeki rakan leke Befage noro leke Betania ma aile wo'or Zaitun leren, An hopon Nin ri woro'o rolu

<sup>2</sup> na'ahenia, "Mala'a laa leke man aile kalari onne. Rakanedi leke raram ne, keledei ida man ri ka naikorala makun na'inonorok aile lolo onne. We'ere, modi mai Ya'u.

<sup>3</sup> Enimaa lo'o ri lolo onne ra'uhoi mi na'ahenia, 'Hi'ihepenia mim we'er keledei onne,' konohi hi nahenia Makromod Nina panaeku tarana aile de nairale. Ka nalo'ol ai modi mai wali'ur."

<sup>4</sup> Ende woro'ohe lar do'on keledei onne na'inonorok lolo nakar ida nin nika makan ai kalla arkanne. Hi mahar we'er ne,

<sup>5</sup> ri ida woro'o ai lolo onne ra'ukanihe na'ahenia, "Mim hi'i inhawa, pe? Hi'ihepeni mima we'er keledei onne?"

<sup>6</sup> Enine woro'ohe walha naise Yesus Nina noue, penia hir re'enozi woro'ohe rodi keledei rala'a.

<sup>7</sup> Ende hi rodi keledei onne laa rakan Yesus, la ruri rira

rain nanaru rodi pakedi keledei ko'orne mene Yesus naikore.

<sup>8</sup> Enla ri nammori ruri rira rain nanaru werre kalla wawan, la heruwali peku au hana lolo kirna rodi mai wakale kalla wawan leke horhawa Ai.

<sup>9</sup> Heri man lernohi nano kili'ur na'akeme wakaukau ra'aheni,

"Hosana! Ka'uli kasa'a Makromod Lalap!"

Makromod Lalap namre'e namharu O man mai nodi Ai Oin Naran! \*

<sup>10</sup> Na'amoli Makromod Lalap namre'e namharu O lere modi molollo naisa ika upud a'ad Daud nonolu eni.

Mai ka'uli kasa'a Makromod Lalap man aile onno man kulu narehi eni."

<sup>11</sup> Rakan kota Yerusalem ne, Yesus nala'a laa Makromod Lalap Nina Romleu Lape, lalaa mamai po'onala waliwali ha wo'ira man ai lolo onneni. Enimaa lere na'akeki helem me'e, de noro Nin ri idaweli woro'o enihe wali wali'ur laa leke Betania.

*Yesus nakineri ara onida*  
(Mat. 21:18-19)

<sup>12</sup> Rakan nohoropo Yesus noro Nina man lernohi pakunohi ramhara Betania rala'a rakan kalla toro ne, Yesus namlaredi me'e.

<sup>13</sup> Nano ko'u makun An po'on ara onida,\* kawin aile de, Ai lan na'inau ke'e lo'o woin aile, ka. Enimaa rakan ara ono, An po'on woin kaale, kawin mamani, ono kan

\* 11:9 Mzm. 118:25, 26 \* 11:13 Israel nin ara ono woin ri na'an. Po'onala lolo kamus.

rakan ara nina lere dipi woi makun.

<sup>14</sup> Enine Yesus nakineri ara ono onne na'ahenia, "Nano lere eniyeni me'ede, ri ka na'an o dipin woin me'e." Enla Nin man lernohi pakunohi enihe derderne Ai lirna keneri onnneni.

*Yesus na'amou na'adewe Makromod Lalap Nina Romleu Lape*

(Mat. 21:12-17; Luk. 19:45-48; Yoh. 2:13-22)

<sup>15</sup> Yesus rakanedi Yerusalem, An laa Makromod Lalap Nina Romleu Lape raram. Rakanedi Romleu onne nin nikoin, Ai nohi ri ma na'iwali lolo waliwali onnnenihe. Enla Ai nawali mei rodi heherre kupan la nawali ma na'olu merpati rir awana na'akeme,

<sup>16</sup> la An kawala ri nodi inhawa memehe mai lolo Makromod Lalap Nina Romleu Lapa nin nikoin.

<sup>17</sup> Horu An konohi hi na'ahenia, "Makromod Lalap Lirna aile ma na'aheni, 'Ainu'u Romleu Lapeni namwali onno rin lolo noho ulik rai wawan mai leke hi'i lir napanak, maa mim hi'i namwali ri ma namna'a hahaa nin sunuwar onno.' " \*

<sup>18</sup> Ende imam-imam lalap noro meser Horok Lap man aile lolo onnnenihe dederne wanakunu onne ne, hi ranoin kalla resne Yesus. Maa hir mahini'i la ramka'uk Ai ono heri rahu eni derne Yesus Nina wanakukue de mehe nanana mouwedi.

<sup>19</sup> Rakan lere helem Yesus noro man lernohi pakunohi ramhara Yerusalem wali'ur.

*Ara ono ma napro'ukedi*  
(Mat. 21:20-22)

<sup>20</sup> Rakan oreki al'alam hir lolala ara ono onne, po'one, napro'uk wake'edi me'e.

<sup>21</sup> Enime'ede Petrus horokale ha ma namwali oirawi eni, an konohi Yesus na'ahenia, "Papa Meser, kene po'onala ara ono man papa nakineneri onne, napro'ukedi me'e."

<sup>22</sup> Yesus walhe, "Hi'i mi akim naili'il Makromod Lalap kokkoo!

<sup>23</sup> Loi honorok wawa'an Ainu'u panaeku ma na'ono eniyeni: Inhoi akin naili'il Makromod Lalap kokkoo nin molollo aile hopon wo'or ida na'ahenia, 'Laedi kahi raram!' Idewe panaeku onne namwali ki mi horo nahenia yono mi akim towor, maa mi akim naili'il kokkoo inhawa mim wakunu namwali.

<sup>24</sup> Ende Ya a'ori honorok mi nahenia lo'o mi mapanak haida nano Makromod Lalap, mim lernale, horo nahenia mi akim naili'il kokkoo Makromod Lalap, la mi mauroin kokkoo Ai nala ha onne ki mi.

<sup>25</sup> Enla lo'o mim hi'i lir napanak Makromod Lalap, maa mi moro ri namehin ma'ahan, mala ampun ai, leke minim Ame man aile a'am raram nala ampun minim dohohale haenhi. [

<sup>26</sup> Lo'o mi ka mala ampun ri namehin man hi'i dohohale ki mi, minim Ame man aile

\* <sup>11:17</sup> Yes. 56:7, Yer. 7:11 † <sup>11:26</sup> Horok man aile lolo tanada [ ] raram, kaale lolo horok Yunani dedesne heruwali.

a'am raram ka nala ampun  
minim dohohale haenhi."<sup>1†</sup>

*Yahudi enihe ra'ukani  
Yesus Nina ke'eke'el an'anhe  
(Mat. 21:23-27; Luk. 20:1-8)*

<sup>27</sup> Yesus noro Nina man lernohi pakunohi rakan Yerusalem wali'ur ne, Ai nala'ala'a lolo nikoin man aile Makromod Lalap Nina Romleu Lapa onno. Enime'ede imam lalapa, meser Horok Lap noro Yahudi rir leleher lalapa lolo onnenihe mai.

<sup>28</sup> ra'ukanie, "Inhoi nala molollo ki O, penia mam hi'i ha eniyeni na'akeme?"

<sup>29</sup> An walhe, "Ya a'ukaniyal a mi na'ukankani ida nanu, la lo'o paphe walha Ain'u na'ukankani eni mene Ya'u walha paphe rir naukankani haenhi."

<sup>30</sup> Enine Yesus na'ukani hi na'ahenia, "Yohanis ma nodi oir ulutade ri, nodi molollo nano inhoi, Makromod Lalap, ee ri mormori?"

<sup>31</sup> Kame'ede ida ma nawalha lira noro ida na'ahenia, "Ik ka'aheni nodi Makromod Lalap Nina molollo, enlo'o Ai na'ukani ika, 'Alhi'ihepe mi akim ka naili'il Yohanis nina wanakunue?"

<sup>32</sup> Maa, lo'o ik ka'aheni Ai nodi molollo nano ri mormori. Lo'o ri nammori rawuhur maika ono hi rauroin Yohanis onneni namwali nabi."

<sup>33</sup> Ende hir walhe, "Ai ka mauroin."

Yesus na'aheni, "Ka'u konohi mi inhoi nala molollo Maya'u hi'i ha eniyeni haenhi."

## 12

*Wanakunu naho'ok ma na'ono man howok kirna  
(Mat. 21:33-46; Luk. 20:9-19)*

<sup>1</sup> Yesus nodi wanakunu naho'ok wakunu noro imam-imam, meser-meser agame roro Yahudi rir leleher lalap onnenihe na'ahenia, "Ri ida lan kaman anggur kirna ida. An takin laliweweredi kirna onneni, mene na'ir lo'o rodi ramha anggur woin, la na'ariri heuheu man kulu ida rodi radiyaka kirna. Horu, ai nala nin kirna onne man howok kirna ida woro'o sewe, la nala'a laa onno namehin me'e.

<sup>2</sup> Rakan lere ra'ili radai nin kirna raramne, an hopon nina hophopon ida laa kokala nina hana'are.

<sup>3</sup> Enima, man howok kirna onnenihe kele ri onne, nukure, hopon wali nalalaliyedi.

<sup>4</sup> Enime'ede orkirna hopon nin hophopon namehin laa wali'ur, maa man howok onnenihe riuk uluwakun, la warei yakyaka ai.

<sup>5</sup> Orkirna hopon ri namehin laa wali'ur, maa hi resnedi ri onne. Kame'ede an hopon ri nammori laa, maa heruwali hir nukure, la heruwali hir resnedi.

<sup>6</sup> Orkirna onne na'alehe ri hophopon me'e, kokoko ri ida mehe aile. Ri onne anan mo'oni mememem man ai naramyaka rehi. Kame'ede an hopon anan laa enne, ono nahinorok nahenia, 'Lo'o Ya'u hopon ya an'u mememem laa, hir horhawe harome.'

<sup>7</sup> Enimaa man howok kirna enihe, ida ma ne'el ida na'ahenia, 'Lo'o aman makiyedi, ri enie lo'o namwali orkirna. Mai ik kesnedi anan leke ika manarnedi kirna eniyeni.'

<sup>8</sup> Ende hir kele ai, resnedi la sopoledi laa kirna paharne."

<sup>9</sup> Yesus na'ukani hi na'ahenia, "Lo'o orkirna derne ha ma namwali onneni, an hi'i inhawe? Memen an mai nesne mouwedi man howok kirna onneni mene nala ri namehin howok wali'ur.

<sup>10</sup> Lo'o mim lesedi wanakunu ida lolo Horok Lape ma na'ahenia,  
'Waku man ma nayapi nakar sopoledi me'eni,

Makromod Lalap hi'iyedi namwaliyedi waku na'a'ar ma na'on. \*

<sup>11</sup> Makromod Lalap hi'i onne namwali,  
la ik do'on ma'aruru la wa'an wake'e.'

<sup>12</sup> Ma nodi molollo Yahudi onnenihe rauroin Nina wanakunu naho'ok onneni nala hi kemenhe de ranoin kalla kele Ai, maa ramka'uk heri enihe de hoikaruwedii Yesus, rala'a me'e.

*Ri Parisi ra'ukani Yesus panaeku ma na'ono noho nin paipair*

(Mat. 22:15-22; Luk. 20:20-26)

<sup>13</sup> Ka nalo'ol ma nodi molollo Yahudi onnenihe hopon ri Parisi ida woro'o roro Herodes nina ri ida woro'o haenhi rala'a laa Yesus ra'ukani leke kokwudi Ai ranoin Nina sale.

<sup>14</sup> Hir laa ra'aheni, "Pap Meser, ai mauroin Papa akin ma namdudu de wakuku panaeku ma namlolo manani. Papa namkene mehe derne Makromod Lalap, ri mormori ka, la ka ma'ili maloho ri ono Om horhawa ma na'alehe haida-haida namnenehe noro orkanaru. Enla Papa wakuku hi'ihehewi Makromod Lalap nodi molollo ri mormori lernohi honorok panaeku ma namlolo. Ende lo'o Papa konohiyala ke'e, lernohi iknika agame nina holoor halauk, lo'o wa'an ik pair noho nin paipaire laa Roma nina rai lalap, ee ka?"

<sup>15</sup> Ika pair, ee yono me'e?"

Enimaa Yesus nauroinedi hi onne man kokme'e, de An walhe na'ahenia, "Alhi'ihepenia mim ken kokwudi Ya'u? Modi Roma nin kupan pere waku ida mai I po'onale."

<sup>16</sup> Enine hi rale kupan pere waku ida. Yesus na'ukani hi, "Inhoi oin makan la inhoi naran melle kupan eniyeni?"

Hir walhe, "Kaisar."

<sup>17</sup> Ende Yesus na'aheni, "Inhawe man Kaisar nina, mala Kaisar, la inhawe man Makromod Lalap Nina, mala Makromod Lalap." Hir derne Nina wanakunu eniyeni hir mehe nananedii.

*Rin maki, maa mori wali'ur*

(Mat. 22:23-33; Luk. 20:27-40)

<sup>18</sup> Lere onne me'ede, ri Saduki ida woro'o mai leke ra'ukani Yesus

\* **12:10** Mzm. 118:22-23

rir na'ukankani haenhi.  
Heri Saduki rira honorok  
panaeku ri man makiyedi  
kar mori wali'ur.

<sup>19</sup> Hi ra'heni, "Pap Meser,  
nonolu Musa horokedi  
nounaku nahenia lo'o mo'oni  
ida ho, maa an maki  
na'alehe tatana, wa'an rehi  
mo'oniwalin ho wali'ur orno  
onneni leke lernala tatana  
nahinerre walla man maki  
eni."\*

<sup>20</sup> Wanakunu ida aile  
ma na'henia: Ri wo'ikku  
ra'umo'onwali, anulu ho,  
maki na'alehe ananne,

<sup>21</sup> de mo'oniwalla man  
lernohi anulu eni ho noro  
orno waluwalam eni, maki  
na'alehe ananne haenhi.  
Enla mo'oniwalla man  
lernohi eni ho noro orno  
waluwalam eni, maki  
na'alehe ananne haenhi.

<sup>22</sup> Kame'ede mo'oni  
wo'ikku na'akeme ho noro  
maeke onneni, la maki  
mouwedi ra'alehe anane  
nanumene maeke onne maki  
haenhi.

<sup>23</sup> Ende rakan lere alam  
rin mori wali'ur, maeke onne  
namwali inhoi hono? Mo'oni  
wo'ikku na'akeme penia  
hoedi noro ai me'e."

<sup>24</sup> Enine Jesus walhe, "Mim  
saledi me'e ono mi ka mauroin  
Makromod Lalap Lirna  
Wawan noro Nina ke'eke'el  
an'anhe.

<sup>25</sup> Rakan lere ri man  
makiyedi mori wali'ur, hir  
mori naise Makromod Lalap  
Nina hophopon a'am raram,  
de kar ho me'e.

<sup>26</sup> Enimaa mi ka mauroin  
panaeku ma na'henia, 'ri  
man maki, mori wali'ur,' ono  
lo'o mi kam lesala Musa nina

horok man konohi inhawe  
namwali lolo au um'umu  
man lerlere onne? Horok  
onne lirna na'henia,  
'Makromod Lalap na'heni

Musa: Ya amwali  
Makromod Lalap  
man Abraham, Isak,  
noro Yakup ra'u'l'uli  
rasa'asa'a rakan lere  
eniyeni.'\*

Ri man makiyedi ka ra'uli  
rasa'a Makromod Lalap, maa  
ri man morimori mehe man  
ra'uli rasa'e!

<sup>27</sup> Makromod Lalap ka  
namwali ri man makiyedi  
nin Makromod Lalap, maa  
Ai namwali ri man mormori  
rir Makromod Lalap. Mim  
sala wake'edi me'e ono mi  
ka mauroin nahenia ri man  
maki mori wali'ur."

*Keneri hono'ok ma na'ono  
wake'e*  
(Mat. 22:34-40; Luk.  
10:25-28)

<sup>28</sup> Enime'ede meser Horok  
Lapida derderne Yesus noro  
Saduki enihe rawalha lira  
panaeku onne, la derne  
Yesus Nina wanalha man  
wa'an, de na'ukani Yesus  
na'henia, "Pap Meser,  
lolo Makromod Lalap Nina  
keneri hono'ok na'akeme,  
ewi penia ma na'ono  
narehi?"

<sup>29</sup> Enine Jesus walhe,  
"Keneri hono'ok ma na'ono  
dedesne na'ahenia,  
'Israel ne'en raram, makaniyalal!  
Makromod eniyeni,  
Makromod Lalap.  
Makromod eni ma-  
haku mehe."\*

<sup>30</sup> Modi mi honorok akin,  
mi irhun raramne

\* 12:19 Ul. 25:5 \* 12:26 Kel. 3:6, 15

\* 12:29 Ul. 6:4-5

noro minim ruri pe'el  
na'akeme maramyaka  
Makromod Lalap ma  
namwali Makrommu.'

<sup>31</sup> Keneri hono'ok rewro'o  
nina na'ahenia,

'Maramyaka minim ri  
mormori wali naise  
maramyaka mi  
kemmu haenhi.'

Keneri hono'ok woro'o  
eniyeuhe, ma na'ono narehi  
keneri hono'ok namehin." \*

<sup>32</sup> Enine meser Horok  
Lape eni walhe, "Pap Meser  
wakunu namlolo kokkoo  
ma'aheni: Ik Makromod,  
Makromod Lalap ida mehe,  
Makromod Lalap namehin  
kaale.

<sup>33</sup> Enla lo'o ri nodi hono  
rrok akin, irhun raramne  
noro rir ruri pe'el na'akeme  
raramyaka Makromod Lalap  
ma namwali hi Makromon,  
la lo'o hi raramyaka hirira  
ri mormori wali naise  
raramyaka hi kemen aimehi,  
hir hi'i ha ma na'ono wake'e.  
Panaeku onne penia ma  
na'ono narehi nano ri nasala  
kerkerhe keneri hono'ok  
man hopon harna honoi  
kanani nala Makromod  
Lalap noro ha namehin  
haenhi." \*

<sup>34</sup> Yesus derne meser  
Horok Lap onneni nodi nina  
woroin wakunu wa'an de  
Ai na'aheni, "Pap na'akeki  
namwali ri man Makromod  
Lalap nodi molollo me'e."  
An wakunu horu ne, hi  
ramka'uk ra'ukani Yesus  
haida-haida me'e.

*Yesus na'aheni Kristus  
man Makromod Lalap kikan  
namwali Rai laa ewi-ewi*

\* 12:31 Im. 19:18 \* 12:33 Hos. 6:6

(Mesias) namwali Daud upun  
anan noro idewe Makromon  
haenhi

(Mat. 22:41-46; Luk. 20:41-44)

<sup>35</sup> Yesus mahan wakuku  
lolo Makromod Lalap Nina  
Romleu Lape, Ai na'ukani  
hi na'ahenia, "Alhi'ihepenia  
meser Horok Lape enihe  
ra'aheni Mesias (Kristus)  
namwali Daud upun anan?

<sup>36</sup> Enima nonolu eni Roh  
Kudus nodi molollo Daud pe  
nia wakunu na'ahenia,  
'Makromod Lalap ne'el i  
Makrom'u na'ahenia:  
Maikoro I her'u malanne  
hehen nanumene  
Ya'u hi'i Num arwali  
enihe lolo yawa ki O.'  
\*

<sup>37</sup> Daud mehe napolu Ai,  
'I Makrom'u,' de hi'ihehewi  
namwali anan mememen?"

Ri nammori lolo onne  
akinhe nahuwa'an wake'e  
derne Nina wanakunu eni.

*Madiyakyaka mi nano  
meser-meser Horok Lap*  
(Mat. 23:1-36; Luk. 20:45-  
47)

<sup>38</sup> Enla Yesus wakuku hi  
na'ahenia, "Madiyakyaka  
mi nano meser Horok Lap  
eniyeuhe, ono hir suk nair  
rain nanaru lalaa mamai  
leke rin po'on de rauroin  
hi eni man panulu, la hir  
suk laa pasar raram leke rin  
horhawe.

<sup>39</sup> Hir laa Yahudi nina  
kerei raram ne, suk raikoro  
kalari, la lere hir laa yapi,  
suk raikoro mei uluwakun  
haenhi.

<sup>40</sup> Enla hir wukupodo  
maeke waluwalum, leke

\* 12:36 Mzm. 110:1

rahoro rira nakar, la hir hi'i lir napanak nanaru rodi pupin aduwala rir poheni. Ri eniyenihe lernala hunukum man werek wake'e."

*Maeke walwalum nala nina kupan*  
(Luk. 21:1-4)

<sup>41</sup> Yesus naikorkoro nohi Romleu Lap nin honoi kanani onno. An po'on heri ma nala kupan loile honoi kanani onno raram. Orkanaru nammori mai rala kupan namansa loile honoi kanani onno eni.

<sup>42</sup> Rakan maeke walwalum ida ma na'alehe haida-haida mai nala kupan pere waku woro'o loile honoi kanani onno eni.

<sup>43</sup> Enine Yesus napolu Nina man lernohi pakunohi na'ahenia, "Loi honorok wawa'an Ainu'u panaeku ma na'ono eniyeni! Maeke walwalum ma na'alehe haida-haida onne loile kupan nammori narehiyedi ri orkanaru na'akeme,

<sup>44</sup> ono nina kupan nodi mori akilere na'akeme loile honoi kanani onno eni, maa ri namehin rala rira kanaru heruwali mehe loile."

## 13

*Yesus konohi nahenia lere man mai Makromod Lalap Nina Romleu Lape napye'eredi*

(Mat. 24:1-2; Luk. 21:5-6)

<sup>1</sup> Yesus noro Nina man lernohi pakunohi enihe ramharedi Makromod Lalap Nina Rom Lapeni ne, Nina man lernohi pakunohi

ida po'onala waliwali na'aheni, "Pap Meser, ken po'onala rom-rom eniyenihe ma'aruru wake'e. Hi rodi waku lalapa mamani hi'ie."

<sup>2</sup> Yesus walhe, "Nam-lolo, lere eniyeni om po'on ma'aruru, maa lere man mamai eni arwali mai de naiye'er mouwedi Romleu Lap onne nina waku danaran na'akeme de ida ma ka nadinara ida wawan me'e."

*Yesus konohi wewerek pananaka dedesne ma namwali lere li'ur*

(Mat. 24:3-14; Luk. 21:7-19)

<sup>3</sup> Horu ne, Yesus noro Nina man lernohi pakunohi enihe rala'a laa wo'or Zaitun raikoro onnida ma nakpali Makromod Lalap Nina Romleu Lape onne. Enine Petrus, Yakobus, Yohanis noro Andreas rodi rira panaeku aimehi laa roro Yesus wakunu ra'aheni,

<sup>4</sup> "Ken Papa konohi yai ke'e ma'anana ha eniyeni namwali? Enla am lernala inhawa tanade leke ai mauroin nina lere alam na'uraniyedi me'e."

<sup>5</sup> Enine Yesus walhe na'ahenia, "Nakinemen ki mi, kalo'o rin paipudi mi.

<sup>6</sup> Ri nammori rodi I naran mai ra'aheni, 'Ya'u eni Kris-tus!\*\* de hir paipudi ri nam-mori.

<sup>7</sup> Lo'o mim derne lira are noro lira anna ara lolo waliwali, maa yono mi mamka'uk ono panaeku rahu onne namwali. Yom pene'ek nahenia rakanedi

\* 13:6 Wanakunu Yunani herre 'Kristus' na'aheni 'Ai'.

noho nin lere alam man horu  
me'e.

<sup>8</sup> Noho pa'i'ik rai pakakar  
lo'o ida ma na'ara noro  
ida, hair noro hair, la noho  
wawan lernala rururuwai  
noro roulara lolo ewi-ewi.  
Ha wo'ira eniyenihe hi'i noho  
wawan apinha rehi, naise  
maeke man apun la rakanedi  
nin lere alam de apinpinha  
wake'e.

<sup>9</sup> Ende nakinemen ki mi,  
ono na'amoli hir kele mi rodi  
laa makpali leleher lalapa  
lolo hono'ok kanail onno.  
Hir nukur mi lolo Yahudi rir  
kerei raram, la hi rodi mi laa  
hair-hair rir ma nodi molollo  
roro rai-rai ma nodi molollo  
kalarna, ono mim lernohi  
Ya'u. Lere onne me'ede, mim  
lernala leken loikaru I Lir'u  
hi kalarna.

<sup>10</sup> Ri nodi Makromod  
Lalap Lirna Wawa'an eni  
raderre radaul noho ulikne  
rai wawan nolu mene ha  
onne namwali.

<sup>11</sup> Enla lo'o rin kele mi rodi  
la leleher lalapa ma nasala  
hono'ok kanail enihe leke  
ho'ok kail mi, yom mahini'i  
inhawa mim wakunu lere  
onne, maa loikaru inhawa  
wanakunu man Ya ala ki mi.  
Hi'i heheni leke inhawa mim  
loloi kakaru eni ka namwali  
minim wanakunu aimehi,  
maa Roh Kudus Nina.

<sup>12</sup> Ri mehen kuku sala  
mo'oniwalla penia ri nesne.  
Onne namwali papa noro  
ananne haenhi. Enla tatana  
lalapanan kar derne rakani hi  
inna aman me'ede nakoke ri  
nesne.

<sup>13</sup> Ri na'akeme kar suk  
mi, ono mim lernohi Ya'u.  
Enimaa inhoi akin namkene  
naili'il Ya'u rakan nin lere  
man horue, an lernala or'ori

dardari ma kan horu."

*Yesus konohi wali'ur apin-  
pinha ma namwali lere man  
mai*

(Mat. 24:15-28; Luk. 21:20-24)

<sup>14</sup> "Lere man mai mim  
do'on 'Ha Man Ailanna ma  
na'ihoru na'idaru Makromod  
Lalap mamani' namririri  
onno man luli lolo Makro-  
mod Lalap Nina Romleu  
Lapa. Lere onneni inhoi  
aile Yudea lari mouwedi laa  
wo'or! (Ri man lese horok  
eniyeni loi honorok wawa'an  
wanakunu eni.)

<sup>15</sup> Ri ma aile nakar  
nuwane kopur pelekkleke,  
maa yon laa romleher nala  
haida.

<sup>16</sup> Ri ma aile kirna yon wali  
laa nakar rala rir nainair.

<sup>17</sup> Heih! Lere onne maeke  
ma nornoror raramne roro  
man anan huhuhu makun,  
apinpinha nore!

<sup>18</sup> Hi'i lir napanak leke  
panaeku onne yono nedile  
lere alam noho ma'urinrinna  
leke yono eren apinpinha.

<sup>19</sup> Lere onne, ri mormori  
lernala wewerek pananaka  
wake'e. Nano lere Makromod  
Lalap nakuku naleu  
noho wawan rakan lere  
eniyeni ri kan do'onala  
wewerek pananaka ma  
naise onneni makun, la  
ka namwali wali'ur naise  
onneni.

<sup>20</sup> Lo'o Makromod Lalap  
ka na'adeul lere alam on-  
neni, ri na'akeme lo'o maki  
mouwedi. Maa, Ai na'adeul  
lere alam onne leke ri man  
Makromod Lalap niliyedi  
me'e yono lernala wewerek  
pananaka nammori rehi.

<sup>21</sup> Lere onne lo'o ri ne'el ki mi na'henia, 'Po'onala, Kristus aile mai eni me'e, ee 'Po'onale, aile lolo onne!' Yono mim derne makani ri onneni.

<sup>22</sup> Rin mai kokwudi mi ra'heni hi ramwali Kristus, ee nabi namehin, maa ka namlolo. Hir hi'i tanada lewlewen noro ha man ri kan dodo'onnala makun haenhi leke kene paipudi ri nammori. Hir kene paipudi ri man Makromod Lalap niliyedi me'e haenhi, maa lo'o ka namwali.

<sup>23</sup> Ende loi honorok memen! Ya'u konohiyedi mi ha eniyenihe na'akeme nolu mene namwali."

*Yesus kukukonohi Nin mai noho wawan*  
(Mat. 24:29-36; Luk. 21:25-33)

<sup>24</sup> "Rakan lere alam wewerek pananake man werek onne horu ne, lere kan hari, wollo kan ropo,

<sup>25</sup> la kaliyore nadiya'ur nahoho'ok la hahaa na'akeme man aile a'am narururu.

<sup>26</sup> Lere onneni rin do'on Ya'u, ma namwali Ri Mormori Ananne, mai lolo hulik poloi kakam palari. Lere onne Yo odi ke'ek'e'l an'anhe ma narehi nalewen, la rin po'on Ya'u siksika lerlere.\*

<sup>27</sup> Ya'u maie ne, Ya'u hopon Ainu'u hophopon a'am raram laa poluwuku Ainu'u ri man Makromod Lalap niliyedi enihe nano noho huhun wo'akka enihe,

la nano noho ulla rakan a'am ki'ilne.

<sup>28</sup> Loi honorok wawa'an panaeku ida nano ara ono: Rakan lere are napupul naweti lan moko, mi mauroin nahenia ka nalo'ol me'e ara ono onne woi me'e.†

<sup>29</sup> Namnenehe noro ara ono onne, lere mim do'on ha onneni namwali mi mauroinedi nahenia Ainu'u lere alam mai wali'ur wakuraniyedi me'e.

<sup>30</sup> Horhorok Ainu'u nou ma na'ono eniyeni: Ha eniyeni na'akeme namwali mouwedi nolu mene kulere eniyeni maki horu.

<sup>31</sup> A'am noro noho molu-loin, maa I Lir'u eni kan molu laa ewi-ewi."

*Ri mahaku ka nauroin ma'anana Yesus mai wali'ur*  
(Mat. 24:36-44)

<sup>32</sup> "Ri mahaku ka nauroin ma'anana lere alam onneni namwali. Maya'u, hophopon a'am raram, la ri mor-mori na'akeme ka rauroin. Ya Am'u, Makromod Lalap, mehe nauroin.

<sup>33</sup> Ende madiyakyaka mi mamani, ono ka mauroin Ainu'u lere alam mai wali'ur noho wawan.

<sup>34</sup> Eni molmolo ri man hoikaru nina nakar nala'a kalla koko'u. An hopon nina hophopon radiyaka nina nakar eni. Enla an ha'aredi honowok hi dohodoho, la an nou ma nadiyaka nikenihe radiyaka wawa'an.

<sup>35</sup> Ende madiyaka mi memen, ono ka mauroin ma'anana Ya'u ma namwali

\* **13:26** Dan. 7:13    † **13:28** Wanakunu Yunani na'ahenia, "Ara ono napupul naweti lan moko, mi mauroin nahenia lere alam na'urani lere manha me'e," de ka namnenehe noro noho Yotowawa nin noho kenerne.

ornakar eni wali mai, lere helhelem, ee alam tortoro, ee noho roropo, ee al'alam wake'e.

<sup>36</sup> Yon hi'i de mamlilin-nohi Ya'u mai holikuku mi mamkukuru makun.

<sup>37</sup> Enpenia Ya'u konohi mi noro ri na'akeme, 'Madiyakyaka mi mamani.' "

## 14

*Yahudi rir man panulu paeaku kele Yesus*

(Mat. 26:1-5; Luk. 22:1-2; Yoh. 11:45-53)

<sup>1</sup> Inworo'o mene rakan Lere Alam Lap Paska\* noro Lere Alam Ra'an Roti Ma Na'alehe Ragi.<sup>†</sup> Enine imam-imam lalap noro meser Horok Lape onnenihe ranoin kalla ma nasinuwar kele Yesus, resne.

<sup>2</sup> Enimaa ida ma ne'el ida, "Yono ik hi'i panaeku eniyeni iknik lere alam lalap, kalo'o nakoko man suk derne Yesus Nin wanakuku hi'i wowo'o ar'arra."

*Maeke ida nodi wuru wala'ula'u halle Yesus uluwakun*

(Mat. 26:6-13; Yoh. 12:1-8)

<sup>3</sup> Lere Yesus aile Betania An minle Simon nina nakar. Simon onne, ri napolu 'Simon man ulik yak hi'ie' ono nonolu eni an lernala apinha onne, maa ors eni wa'anedi me'e. Yesus nana'ak ne, maeke ida mai nodi wuru wala'ula'u man aile potol ma'aruru ida. Potol onne rodi waku marmer hi'ie.

Wuru eni wella ai wawan wake'e. An hi'i yaki potol nurane mene halla wuru Yesus uluwakun.

<sup>4</sup> Enime'ede ri ida woro'o ai lolo onne ra'ahan maeke onneni, la ida ma ne'el ida, "Alhi'ihepenia wuru wala'ula'u onneni kolo nam'onyake?

<sup>5</sup> Wuru eniyeni ra'olu wella kupan pere rahu wokelu rehi. Wella onne namnenehe noro ri nina naiwe'el annida. Wa'an rehi kupan eni ha'arle ma na'alehe haida-haida." Enla hi rodi lir apinha dadiyale.

<sup>6</sup> Enimaa, Yesus na'aheni, "Na'amoli ke'e! Yom dadiyala maeke eniyeni! An hi'i ha man wa'an noro Ya'u menee.

<sup>7</sup> Akilere mim holiwuku noro ma na'alehe haida-haida enihe. Ende ma'anana-ma'anana mi raram nodi paku hi, pakuwala ke'e, maa Ya'u eni ka oro mi nalo'ol.

<sup>8</sup> Maeke eni hi'i ha man wa'an eni leke paku Ya'u, ai ka nauroin hi'i inhawa ikara. An hi'i ha eniyeni leke rakan Ainu'u lere alam I maki, Ya'u ihin kemen ra'akenedi me'e.

<sup>9</sup> Horhorok Ainu'u nou ma na'ono eniyeni: Lolo ewi-ewi Makromod Lalap Lirna Wawa'an raderre radaulle, maeke eni nina hini'i wenewhe onne loikaru haenhi de ri kan hamlinu ai."

*Yudas nanoin leken paha-harin na'olu Yesus*

(Mat. 26:14-16; Luk. 22:3-6)

<sup>10</sup> Kame'ede Yudas Iskariot ma namwali ri ida nano man

\* **14:1** Paska eni po'onala Kel. 12 noro Mrk. 14:12. † **14:1** Lere Alam Lapa Ra'an Roti onne hir hi'i yapi lere alam wo'ikku mene horu, la Lere Alam Paska alam ida mehe la nedile alam dedesne Lere Alam Ra'an Roti onne.

lernohi pakunohi idaweli woro'o onnenihe laa imam lalap leke na'olu Yesus.

<sup>11</sup> Iman lalap onne raram nahuwa'an derne nina panaeku onneni, de hir noue nahenia rala kupan ai. Enpenia Yudas nanoin leken paharin leke kani Yesus hi liman raram.

*Yesus noro man lernohi pakunohi ra'ak romun Paska*  
(Mat. 26:17-25; Luk. 22:7-14, 21-23; Yoh. 13:21-30)

<sup>12</sup> Rakan Lere Alam Lalap 'Ra'an Roti Ma Na'alehe Ragi' nin lere dedesne (dere onne Alam Paska de ri Yahudi radedem resne pipdumana leke rodi hoikani Makromod). Yesus Nin man lernohi pakunohi ra'ukanie na'henia, "Pap raram nodi am laa ewi ma'akene Paska‡ nina ya'an yomun leke Pap na'ane?"

<sup>13</sup> Enine Yesus hopon man lernohi pakunohi ri woro'o na'henia, "Mala'a laa kota Yerusalem raram. Rakanedi ne, mim holikuku mo'oni ida ma na'uwarwara oir e'en de lernohie laa nakar an lalaeni.

<sup>14</sup> Ma'heni ornakar lolo onne na'henia, 'Pap Meser na'ukani: Lo'o Yo oro Ainu'u man lernohi pakunohi enihe mo'on momun Paska lolo onno ewi?'

<sup>15</sup> Enlo'o ornakar onne kukul onno ma naphari ida ki mi aile danaran wawan man ai na'akenedi me'e, de miro laa ma'akene nana'an nonomun lolo onne."

<sup>16</sup> Ende woro'ohe rala'a. Hir rakan kote raram, do'on

ha wo'ira na'akeme naise Yesus konohiyedi hi eni. Idewe hi ra'akene hanana'an Paska.

<sup>17</sup> Horu ne hir wali laa Betania.

Rakan lere helemedi Yesus noro Nina man lernohi pakunohi idaweli woro'o ra'alono laa nakar onneni.

<sup>18</sup> Hi raikoro maha ra'ak, Yesus na'ahenia, "Horhorok Ainu'u nou ma na'ono eniyeni: Nano mi ma naikoro wuku mo'on momun eniyeni, ri ida aile ma na'olu Ya'u, kanile ri leke resnA'u."

<sup>19</sup> Hir derne Nin wanakunu onneni hi akinhe woiredi, la dohdoho ra'ukani Yesus ra'aheni, "Pape, lo'o maya'u, ka!?"

<sup>20</sup> Enine An walhe na'ahenia, "Nano mi ri idaweli woro'o eniyenihe ri onne aile, la noro Maya'u remen roti wewerre lolo manuk raram.

<sup>21</sup> Ri Mormori Anan lo'o maki naise horhorok aile Horok Lapeni, maa ri man kani Ai laa arwali onne mayo'edi me'e. Wa'an rehi ri onne inna aman kar morie."

*Yesus nala roti noro anggur Nin man lernohi pakunohi ra'an romun*

(Mat. 26:26-30; Luk. 22:14-20; 1Kor. 11:23-25)

<sup>22</sup> Hi ra'ak larlari, Yesus nala roti kem ida, napanak trimkasi Makromod Lalap nanumene a'un, ha'arle Nina ri mememen enihe, na'aheni, "Kokala la mo'on, roti eniyeni Yi ihin kem'u."

‡ **14:12** Alam Paska onne ri nadedem resne pipdumana ra'an leke ra'ori honorok Makromod Lalap Nin hini'i lere man laedi me'e. Lere onne An hi'i hi upun a'anhe ramhara nano Mesir.

<sup>23</sup> Horu ne, Ai nala anggur cawan ida, napanak trimkasi nanumene nale hi romun, la na'akeme romun anggur onne.

<sup>24</sup> Ai na'heni, "Anggur eniyeni Ya'u rarna man wui man kolo la ma na'ono nawinau Makromod Lalap Nin nou worworu man du'ul kali ri nammori roro Ai laa ewi-ewi.

<sup>25</sup> Horhorok Ainu'u nou ma na'ono eniyeni: Nano lere eni me'ede ka omun anggur eni hehen nanumene rakan lere Yo oro mi komun anggur worworu lolo Makromod Lalap Nina noho worworu."

<sup>26</sup> Kame'ede hi rahinara hanara ida, ra'uli rasa'a Makromod Lalap. Horu ne, hi rala'a laa wo'or Zaitun.

*Yesus konohi Petrus, "Ka nalo'ol me'e ma'okul Ya'u"*

(Mat. 26:31-35; Luk. 22:31-34; Yoh. 13:36-38)

<sup>27</sup> Enine Yesus konohi hi na'henia, "Ka nalo'ol mi na'akeme lari hoikaruwedti Maya'u me'e, ono horhorok aile Horok Lape ma na'henia,

'Ye esne man huri onne, la nina pipdum ukun lariye'er rarari.\*

<sup>28</sup> Maa lere Makromod Lalap na'amori Ya'u wali'ur nano maki-maki eni, Yo oluwedti mi laa Galilea."

<sup>29</sup> Petrus na'heni, "Lo'o hi na'akeme hoikaruwedti Pape, maa maya'u ka!"

<sup>30</sup> Enla Yesus na'heni, "Horhorok Ainu'u nou ma na'ono eniyeni: A'alam eni manu kan kokoroi rewro'o

makun, o ma'aheniyedi ka mauroin Ya'u rewkelu me'e."

<sup>31</sup> Enimaa Petrus walha naruri na'henia, "Kade yo oro Papa maki wewerre, maa ya'u ka a'heni ka auroin Papa!" Enla man lernohi pakunohi namehin enihe ra'aheni heheni haenhi.

*Yesus hi'i lir napanak lolo Getsemani*  
(Mat. 26:36-46; Luk. 22:39-46)

<sup>32</sup> Hi rala'a laa onnida naran Getsemani. Rakanedi ne, Yesus hopon Nin man lernohi pakunohi na'henia, "Maikoro lolo eni, Ya'u laa enne hi'i lir napanak."

<sup>33</sup> Enine Ai naka'uk Petrus, Yakobus noro mo'oniwalla Yohanis ra'alono laa. Hi rala'a ne, Yesus akin woir la sus rehi.

<sup>34</sup> Enime'ede An konohi wokeluhe na'henia, "Ya akin woir rehi naise I maki me'e, de mim min lolo eni la madiyakyaka."

<sup>35</sup> Horu ne, Ai nala'a kalari tarana wali kemen yawa nahinononow hi'i lir napanak na'henia, "Lo'o wa'an rehi yono Ya a'uware wewerek pananaka man mai eniyeni.

<sup>36</sup> Papa, Ya Am'u, peni paekunala hi'i ha wo'ira na'akeme de Ya apanak Papa leke yon Ya a'uware wewerek pananaka onneni. Enimaa yono hi'i lernohi Ainu'u honorok panaaku aimehi, maa lernohi Papa Nina honorok panaaku mehe."

\* 14:27 Zak. 13:7

<sup>37</sup> Horu An wali laa, Nin ri wokelu onne ramkukuru me'e. Enine Ai ne'el Petrus na'henia, "Simon, mamkukuru me'e? Kam kerhu madiyakala jam ida?"

<sup>38</sup> Madiyaka la hi'i lir napanak leke yono mi madiyaur kenene panatal! Mi honorok akin namrana lernohi Ya'u, maa mi ihin kemen ka naruri."

<sup>39</sup> An wali wali'ur lan hi'i lir napanak nodi panaeku mahaku eni.

<sup>40</sup> Horu An wali wali'ur tolle wokeluhe ramkukuru ho'o me'e ono makanhe nasoi rehi. Ai na'ukani hi wali'ur, maa hi ka rauroin walha haida.

<sup>41</sup> Yesus wali wali'ur rewkelu nina eni, hi ramkukuru wali'ur. Ai na'ukani hi na'henia, "Mi mamkukuru makun? Wa'anedi me'e. Rakanedi Ainu'u lere alam me'e. Ya'u, ma namwali Ri Mormori Anan, rala kanile ri man hi'i dohohala liman raram.

<sup>42</sup> Mamakedi! Mai, kala'a here! Po'onala man koklira Maya'u mai me'e."

*Yudas noro ri nammori mai kele Yesus*

(Mat. 26:47-56; Luk. 22:47-53; Yoh. 18:3-12)

<sup>43</sup> Yesus wakunkunu makun, Yudas, ri ida nano Nin ri idaweli woro'o onne, noro ri nammori mai rodi ilak raa noro au deul. Imam-imam lalap roro Yahudi rira meser-meser Horok Lap roro rira leleher lalapa enihe hopon hir laa kele Yesus.

<sup>44</sup> Yesus walin ma na'olu Ai onne, an kukunohiyedi heri onnenihe me'e na'henia, "Ya'u nair tanada eni de ri

man ya'u masi onne, mim kele here!"

<sup>45</sup> Enime'ede Yudas laa Yesus napolu, "Pap Meser," nanumene masie.

<sup>46</sup> Idewe ne, heri onne kele Yesus lawukuwedie.

<sup>47</sup> Enimaa ri ida lolo onne lehu nin raa dara imam man kulu narehi nina hophopon ida kilinna me'ede kaprosu wedi.

<sup>48</sup> Ende Yesus ne'el heri onnenihe na'henia, "Enlo'o Ya'u eni ri man ailanna penia modi ilak raa noro au deul mam kele Ya'u?

<sup>49</sup> Akilere Ya'u wakuku mi lolo Makromod Lalap Nina Romleu Lapa raram, maa mi kam kelA'u. Enimaa eni na'akeme namwali leke na'akuku na'anokor inhawa man horokedi aile Horok Lape raram me'e."

<sup>50</sup> Hir keledi Yesus ne, Nina man lernohi pakunohi lari moumouwedi, kokoko ma na'ikaka ida man lernohi lolo kili'ur, la

<sup>51</sup> ri onne sawisawik homnono. Heri onne kene kele

<sup>52</sup> maa, ai nawe'ul la huriyedi nina homnono, de nadlewlewe lari me'e.

*Yesus nakpali Yahudi nina muku man ho'ok kail*

(Mat. 26:57-68; Luk. 22:54-55, 63-71; Yoh. 18:13-14, 19-24)

<sup>53</sup> Ende man kele Yesus rodi laa imam man kulu narehi nina rom. Laa enne, imam-imam lalap roro meser-meser Horok Lape roro Yahudi rir leleher lalap onnenihe mahanoro hopun pepen.

<sup>54</sup> Petrus lernohi hi nano ko'u. Rakan imam man kulu narehi eni nina nikoin, ai

naikoro namrinnu ai noro  
ma nadiyaka enihe.

<sup>55</sup> Imam lalap enihe roro  
Yahudi rir muku man ho'ok  
kail eni rahehe ranoin man  
kuku maka man wakunu  
ha man sala leke tumdesne  
Yesus la hukumesne, maa kar  
lernala.

<sup>56</sup> Ende polu ri nammori  
mai rala panaeku leke rodi  
kuku sala Yesus, ma rira  
panaeku eni ka namnehe.

<sup>57</sup> Horu ne, ri ida woro'o  
man aile lolo onne ram-  
rirri rala wanakunu poho,  
tumdesne Yesus ra'heni,

<sup>58</sup> "Am derne Ai na'henia,  
'Ya aye'er Makromod Lalap  
Nina Romleu Lape  
man ri mormori hi'i  
eniye, la lere wokelu  
Ya'u wanna worworu  
ri mormori kan hi'i."

<sup>59</sup> Enimaa rira wanakunue  
ida ma ka namnenehe noro  
ida.

<sup>60</sup> Enime'ede imam man  
kulu narehi eni namriri  
hi kalarna na'ukani Yesus  
na'henia, "Man kuku maka  
eniye, wakunu tumdesne  
O. Alhi'ihepenia O kam  
walhe?"

<sup>61</sup> Maa, Yesus ka na'oho.

Ende imam onne na'ukani  
Yesus raram wali'ur, "Nam-  
lolo, O eniye Kristus,  
Makromod Lalap Ma Narehi  
Ma Nalewen Ananne?"

<sup>62</sup> Yesus walhe na'henia,  
"Ya'u eni Ai, la na'amoli mi  
na'akeme do'on Ya'u, ma  
namwali Ri Mormori Anan,  
aikoro Makromod Lalap Ma  
Nodi Molollo Narehi Ma  
Nalewen na'akeme herne  
malanna. Enla lere man

mai mim do'on Ya'u mai  
wali'ur lolo hulik loiloi  
kakam larlarie!"\*

<sup>63</sup> Ideweni ne, imam man  
kulu narehi onne sirriki nina  
rain kemen la na'henia,  
"Yono kanoin man kuku  
maka namehin me'e.

<sup>64</sup> Ende minim panaeku  
hi'ihehewi? Mim dernedi Ai  
na'ihoru na'idaru Makromod  
Lalap me'e, de mala inhawa  
kenekrohu?"

Hi rala kenekrohu  
ra'heni, "An sale wake'e, de  
hukumesne here."

<sup>65</sup> Enime'ede heruwali  
saprui saworno Ai, hir  
pasunedi oin makan mene  
hudi la pahar. Hi ra'heni,  
"Heih, kene kukunohi yai  
inholi man hudi pahar O."  
Horue ne ma nadiyaka lolo  
onne riuk Ai haenhi.

*Petrus na'okuledi Yesus*  
(Mat. 26:69-75; Luk.  
22:56-62; Yoh. 18:15-18, 25-  
27)

<sup>66-67</sup> Hir maha ra'ukani  
Yesus romleher ne, Petrus  
aile nikoine. Enine maeke  
ida ma namwali man howok  
lolo imam man kulu narehi  
onne nina nakar mai do'on  
Petrus mahan namrinna  
aiye. Ai nahiyennale Petrus  
de na'heni, "O penia nad-  
edem moro Yesus ma nano  
Nazaret onne."

<sup>68</sup> Maa Petrus nawali eke-  
male la na'heni, "Ka auroin  
ri onne inholi, ka auroin on-  
uma panaeku inhawa."

Enime'ede Petrus nala'a  
lolo nika lapa makan, [idewe  
manu kokoroiyedi.]§

\* <sup>14:62</sup> Mzm. 110:1; Dan. 7:13      § <sup>14:68</sup> Horok man aile lolo tanada [ ] raram,  
kaale lolo horok Yunani dedesne heruwali.

<sup>69</sup> Ka nalo'ol maeke onne do'on Petrus ho'o me'e. Enime'ede an konohi man min lolo onne na'henia, "Ri eni peni namwali man lernohi pakunohi ri man ai raram onne."

<sup>70</sup> Petrus derne, maa ai nawali ekemale wali'ur.

Kan mahala ne, ri man min lolo onne re'el Petrus na'henia, "Lo'o namlolo, o mamwali man lernohi hi haenhi ono onum wanakunu lirna mehe nodi kunukunohi nahenia o eni manin Galilea."

<sup>71</sup> Enine Petrus nahopo me'e, "Ka auroin ri mim wewekel onneni!"

<sup>72</sup> Idewe manu kokoroi rewro'o nina. Enime'ede Petrus horoknala Yesus Nina wanakunu: "Manu kan kokoroi rewro'o nina makun, o ma'heni ka mauroin Ya'u rewkelu me'e." Idewe ai nahere Maheruheru.

## 15

*Rodi Yesus la Pilatus kalarne  
(Mat. 27:1-2, 11-31; Luk. 23:1-5, 13-25; Yoh. 18:28-19:16)*

<sup>1</sup> Noho kan ropo wawa'an makun, Yahudi rir imam lalap, leleher lalapa roro meser Horok Lap ma namwali Yahudi rira muku man ho'ok kail agame enihe rala kenekrohu resne Yesus. Raledi kenekrohu resne Yesus ne, hir wukuwedi Yesus rodi laa kanile Pilatus (Roma nina gubernur).

<sup>2</sup> Yesus rakanedi Pilatus kalarne ne, Pilatus na'ukanie, "O penia ma namwali Rai Yahudie?"

An walha, "Namlolo, naisa ma'aheheni eni."

<sup>3</sup> Enime'ede Yahudi rir imam lalap enihe loikaru kalaklaka nammori Ai kemen.

<sup>4</sup> Pilatus na'ukanie wali'ur na'henia, "Hi'ihepenia ka ma'ohe. O mehe makani rira kalaklake nahenia Om hi'i yaksala nammori."

<sup>5</sup> Maa Yesus kan walha wake'e, de Pilatus hehel rehi.

<sup>6</sup> Nadedem rakan Yahudi nina Lere Alam Lalape Paska, Yahudi enihe nili ri ida man aile bui raram leke ma nodi molollo Roma huri nano nina hunukum.

<sup>7</sup> Enla ri ida naran Barabas aile bui raram noro ri woro'o wokelu namehin ma namhene derne rakani Roma nina molollo me'e, de resnedi ri lolo rusrusu ar'arra.

<sup>8</sup> Ende ri nammori mai rapanak Pilatus ra'heni, "Aki anna papa nadedem huri ri ida nano hunukum, de lo'o lere eni papa huri ri, ee ka?"

<sup>9</sup> Pilatus na'ukani hi na'henia, "Minim suk ya'u huriyedi ri ma na'heni Ai namwali Rai Yahudi eni?"

<sup>10</sup> Ai na'ukani onne ono nauroiroin imam lalap onnenihe kele Yesus rodi mai ono hi kehekehen Ai.

<sup>11</sup> Enimaa man panulu onnenihe rawa'u heri eni leke rapanak Pilatus huriyedi Barabas, maa Yesus ne, yono.

<sup>12</sup> Enla Pilatus na'ukani hi, "Emene, mi raram nodi ya'u hi'i inhawa noro ri man wewekel Rai Yahudi eniyeni?"

<sup>13</sup> Idewe ne hir wakau raruri ra'heni, "Rodi laa wairesne au kekiyowok here!"

<sup>14</sup> Pilatus na'ukani, "Alhi'ihepe? Nina inhawa sala pe?"

Enimaa hir eren wakaukau raruri ra'aheni, "Wairesnedie lolo au kekiyowok here!"

<sup>15</sup> Pilatus nin panaeku nahuwa'annala heri akinhe, de an huriyedi Barabas, maa hopon nin ma nasala ke'urauk enihe riuk rerhe Yesus horu mene kanile ke'urauk leke rodi laa roho waire lolo au kekiyowok me'e.

<sup>16</sup> Enime'ede ma nasala ke'urauk enihe rodi Yesus laa Pilatus nina rom rodi ho'ok kail raram mene rapolu rira ke'urauk na'akeme mai.

<sup>17</sup> Hir maie ne, rodi rai nin nainair nanaru man mere au'au leke Yesus nairi. Enla hir nanau dupal rururi ida nanumene rala loile Yesus uluwakun.

<sup>18</sup> Onne horu, hir kokme'e rala honoor hanawe ra'aheni, "Hiyene arore ki O, Rai Yahudi O!"

<sup>19</sup> Hi rodi our deul ida taka uluwakun mamani, saprui saworno, la hir kadi ein korno yawa, kokme'e rahuwo'ok Ai.

<sup>20</sup> Hadwei hadwokor Yesus horu, hir herre wali'uredi rai nin nainair nanaru onne, la rala Nina nainair wali'ur. Horu ne, hi rodi laa kota paharne leke rohe, wairesne lolo au kekiyowok.

*Wairesne Yesus lolo au kekiyowok*

(Mat. 27:32-44; Luk. 23:26-43; Yoh. 19:17-27)

<sup>21</sup> Hir laa kota paharne, Yesus noro ma nasala

ke'urauk onnenihe holikuku mo'oni ida man eninanu mai nano leke Kirene nala'a Jerusalem. Mo'oni onneni naran Simon, (Aleksander noro Rufus aman). Ma nasala ke'urauk rakerne ai na'uwara au kekiyowok eni.

<sup>22</sup> Ende rodi Yesus la wo'or ida naranne Golgota, napa'ahne, 'onno ma naisa uluwaku rurna.'

<sup>23</sup> Rakanedi ne, ke'urauk wa'aha anggur noro wuru awa'ar naran mur rale nomun leke yono kemen apinha rehi, maa Ai namhene nomune.

<sup>24</sup> Horu, hir roho, waire lolo au kekiyowok. Horu ne, hir hi'i undi leke kukul inhoi lernala Yesus Nina ninaire.

<sup>25</sup> Roho wair Yesus au kekiyowok eni ri'uk wohii orereki.

<sup>26</sup> Hir horok Yahudi rira kalaklake lolo au kekiyowok wawan na'ahenia: ENI RI YAHUDI RIR RAI.

<sup>27</sup> Lere onne hir roho wair ri woro'o man ailanna lolo au kekiyowok haenhi, ida man minle herne malanna la ida man minle herne mariri. Woro'ohé ramwali ri ma namna'a. \*

<sup>28</sup> Onneni na'akuku na'anokor Horok Lap Lirna ma na'ahenia, "Hi rahinorok Ai nornoro ri man ailanna."]\*

<sup>29</sup> Ende heri man laa ki laa mai lolo onne po'one, rado'do'o uluwakun ilnohi ralnohi ra'aheni, "Eih! Openi ma'aheni maiye'er Makromod Lalap Nina Romleu Lape, la lere wokelu raram ma'ariri wali'ur.

\* <sup>15:27</sup> Yes. 53:12 \* <sup>15:28</sup> Horok man aile lolo tanada [ ] raram, kaale lolo horok Yunani dedesne heruwali.

<sup>30</sup> Ende mehe mala kopur O kemmu nano au kekiyowok mai yawa ke'e."

<sup>31</sup> Enla imam-imam lalap noro meser Horok Lap onnenihe ilnohi ralnohi naise hi, ida ma na'aheni ida, "Eih! Ai onne nauroin na'ohu nahala ri nammori nano rir apinpinha, maa alhi'ihepe kemen mememen ka nauroin na'ohu nahale?"

<sup>32</sup> Ai penia na'aheni Ai namwali Kristus man Makromod Lalap kikanedi namwali Israel nin Rai laa ewi-ewi. Ende alhi'ihepe Ai kan kopur nano au kekiyowok eni leke ik po'one la ik akin naili'il Ai."

Enla ri woro'o man aile herne mariri malanna ilnohi ralnohi Yesus haenhi.

### *Yesus aran horu*

(Mat. 27:45-46; Luk. 23:44-49; Yoh. 19:28-30)

<sup>33</sup> Rakan lere ulu noho onne na'akeme na'umetekedi hehen nanumene riuk wokelu lere mamamal.

<sup>34</sup> Rakanedi lere mama-mal eni ne, An wakau naruri na'ahenia, "Eloi, Eloi, lama sabaktani?" Napa'ahne: "Makrom'u Lalap, Makrom'u Lalap! Alhi'ihepe hoikaruwedi Ya'ue?" \*

<sup>35</sup> Ri man aile lolo onne dederne lirna onne ne heruwali ra'aheni, "Makaniyala! Ai maha napolu Elia."

<sup>36</sup> Enime'ede ri ida larlari, nala sawar koun anggur ma'alini mene naloile au ko'oko'ol ida honon, kani laa Yesus nuranne. Enimaa ri ida na'aheni, "Ika lapanala ke'e. Yon hi'i de taikarala Elia mai nalkopur Ai nano au kekiyowok eni harome."

<sup>37</sup> Enine Yesus wakau naruri, la aran horuwedi.

<sup>38</sup> Idewe tapi rodi kawkawa Makromod Lalap Nina Romleu Lap raram eni nahinarukedi nano wawan idewe laa yawa namwali woro'o me'e.† <sup>39</sup> Enine ke'urauk ida ma namwali uluwakun ke'urauk rahu ida ma namriri Yesus kalarne po'on hi'ihewi Yesus aran horuwedi, ai na'aheni, "Namlolo kokkoo, ri eniyeni Makromod Lalap Ananne."

<sup>40-41</sup> Lolo onne maeke nammori aile mahar popo'on nano ko'uko'u. Maria Magdalena, Salome, noro Maria (ma namwali Yoses noro mo'oniwalla karuri Yakobus inna) aile maeke onnenihe raramne. Maeke onnenihe radedem lernohi Yesus lolo Galilea la ramwali man ilitolle Ai. Hi roro maeke nammori ra'alono roro Yesus laa kota Yerusalem de ramriri ko'uko'u po'one.

### *Ra'akene manaku Yesus ihin kemen*

(Mat. 27:57-61; Luk. 23:50-56; Yoh. 19:38-42)

<sup>42</sup> Lere onne ri Yahudi rira Alam Ra'akekene hanana'an

\* <sup>15:34</sup> Mzm. 22:1 † <sup>15:38</sup> Po'onalal Kel. 26:31-33. Tapi onne ha'ar Makromod Lalap Nina Romleu Lape namwali onno woro'o. Onno man raram wake'e onne Makromod Lalap Nin onno moumou dewdewe wake'e la Yahudi rir imam lalap ida mehe huri laa raram annida raram leke nodi nala ri Israel lolo Makromod Lalap kalarne. Yesus makiyedi nanumene kanawan onne hariyedi de kalla nahinariyedi leke ri idewe laa Makromod Lalap leken kalarne.

## 16

*Yesus mori wali'ur*

*(Mat. 28:1-8; Luk. 24:1-12;  
Yoh. 20:1-10)*

ono oreki Alam Renren Warwarna, la lere na'ikeki helem me'e, de na'uraniyedi Alam Renren Warwarna me'e.

<sup>43</sup> Enpenia Yusup man holi leke Arimatea mai leke na'akene manaku Yesus ihin kemen.<sup>‡</sup> Ai onneni naikorole agame Yahudi nina muku man ho'ok kail, de ri nahiyyene arore, la an weilapan lere alam Makromod Lalap nodi molollo haenhi. Ai mehe na'alapa akin leke ka namka'uk nakpali Pilatus napanak nala kopur Yesus ihin kemen nano au kekiywok eni.

<sup>44</sup> Ai napanakedi ne, Pilatus hehel rehi derne nahenia Yesus lo'o makiyedi me'e. Enime'ede ai napolu nina uluwakun ma nasala ke'urauk ri rahu ida onne na'ukanie, "Yesus makiyedi me'e kokkoo, ee ka?"

<sup>45</sup> Uluwakun onne konohi Pilatus na'ahenia, "Nam-lolo kokkoo, pape. Aran horuwedi me'e." Kame'ede Pilatus ne'enohi Yusup nala kopur Yesus ihin kemen nano au kekiywok eni.

<sup>46</sup> Enime'ede ai lan weli tapi lenan mene nala kopur Yesus kemen. Enine ai nodi tapi onne komon Yesus ihin kemen, nodi la wo'or leren karule ku'il ida ma namwali lunne. Karu horue ne, an poi waku lapa ida nodi elekedi ku'il nina nika.

<sup>47</sup> Maria Magdalena noro Maria, Yoses inna do'odo'on hi rala Yesus loile lolo onne.

<sup>1</sup> Ende lewenedi Alam Renren Warwarna, lere helemedi, mene Maria Magdalena, noro Yakobus inna Maria, noro Salome ra'alono laa weli wuru wala'ula'u noro rampa-rampa leke rodi laa ra'akene manaku Yesus ihin kemen.

<sup>2</sup> Rakan domeku al'alam, lere ha'edi, hi rodi wuru noro rampa-rampeni rala'a Nin ku'il me'e.

<sup>3</sup> Rakan kalla toro, hi ida ma ne'el ida, "Ika rakanedi, inhoi paku ika poi waku rodi el'elek ku'il nina nike?"

<sup>4</sup> Hir rakanedi ku'il ne, do'on waku onne napoiyedi me'e de polletilu ono waku onne lape rehi.

<sup>5</sup> Ende hir laa ku'il raram, do'on ma na'ikaka ida rain wawarhe sor-sorue naikokoro aile ku'il herne malanna, idewe hi ramka'ukedi.

<sup>6</sup> Mo'oni onne konohi hi na'ahenia, "Yon mamka'uk, ya auroiroin mi manoin Yesus ri Nazaret man wairesnedi lolo au kekiywok onne, maa An mori wali'uredi me'e. Po'onala, hir karu lolo eni, maa kaale me'e."

<sup>7</sup> Lere eni me'e de, lam kukunohi Petrus noro Nin man lernohi pakunohi namehin na'ahenia, 'Yesus noluwedi mi laa Galilea me'e, de mala'a enne leke mim do'on Ai naise, Ai na'aheniyedi ki mi me'e.'

<sup>‡</sup> **15:43** Yusup mai leke pelek na'akene Yesus ihin kemen ono Yahudi rira noho honolla hopon yono rin karu maki Alam Renren Warwarna.

<sup>8</sup> Enime'ede hi rahumarna ramka'ukesne me'e. Hi ramhara ku'il idewe lari nano lolo onne ono ramka'uk de kar wakunu haida-haida noro ri.

*Jesus mori wali'uredi ne,  
pakromo noro Nin ri mene  
nakinikan laa a'am raram  
(Mat. 28:9-10, 16-20; Luk.  
24:13-53; Yoh. 20:11-23; HN.  
1:6-11)*

[  
<sup>9</sup> Lere Jesus mori wali'ur, domeku al'alam wake'e, An pakromo dedesne noro Maria nano Magdala. Lere man laedi Jesus nohi hayakyaka wo'ikku nano Maria raramne.

<sup>10</sup> Idewe ai lan konohi ri man lernohi Jesus man mahar sus mak oir enihe na'henia, "Jesus mori wali'uredi me'e. Idedi eni yo oro Ai pakromo."

<sup>11</sup> Maa hi kar derne rakani ai.

<sup>12</sup> Horu ne mo'oni woro'o ma nadedem derne Jesus Nin wanakuku, wali rano Yerusalem laa rira leke (Emaus). Rakan kalla toro hir pakromo roro Jesus de ra'alono rala'a. Hi kar pelek rahiyyennale ono oin makan namehiyedi me'e, maa Jesus nalhari kemen hi.

<sup>13</sup> Kame'ede hir wali wali'ur la Yerusalem konohi rir mukue ha ma namwali nahenia hi roro Jesus pakromo, maa rira mukue kar derne rakani hi haenhi.

<sup>14</sup> Lere li'ur ri idaweli ida man lernohi pakunohi maha rara'ak, ramlilinnohi Jesus mai nalhari kemen hi la na'ukani, "Alhi'ihepenia mi

akim ho'o ne na'akekeme la mi uluwakum kerhe rehi, penia mi mamhene derne makani ri man do'on Ya'u ra'aheni Ya'u mori wali'uredi me'e?"

<sup>15</sup> Horu ne, Jesus hopon na'henia, "Mi mala'a noho wawan la maderre madaul Makromod Lalap Lirna Wawa'an eni ri mormori na'akeme.

<sup>16</sup> Inhoi ma akin naili'il Ya'u la napanak ri nodi oir ulutade, ai penia nahinuriyedi nano nina hunukum makmaki, maa inhoi akin ka naili'il Ya'u lernala hunukum makmaki laa ewi-ewi.

<sup>17</sup> Ri ma akin naili'il onne paekunala hi'i tanada naise: rodi I naran rohi hayakyaka, rauroin wanakunu man worworu,

<sup>18</sup> la lo'o rasala haimoke, ee romun awa'ar man merumeru, maa kar maki, la kemenala liman ma nakni'ir, idewe wa'anedi."

<sup>19</sup> Makromod Jesus wakunu noro man lernohi pakunohi enihe horu ne, Ai nakinikan laa a'am raram, laa enne naikoro Makromod Lalap herne malanna leke rodi molollo wewerre.

<sup>20</sup> Enime'ede man lernohi pakunohi enihe laliwewer noho wawan loikaru Makromod Lalap Lirna Wawa'an eni, la Makromod norle'ule'u norwaliwali hi. Ai nala ke'ek'e'l an'anha hi rodi hi'i tanada nammori leke nodi kunukunohi nahenia Lirna Wawa'an eniyeni namlolo kokkoo.]\*

\* **16:20** Lisir eniyeni kaale lolo Horok Lape dedesne heruwali. Wanakunu lirna la'an eni ra'ikar ra'uwali lere li'ur.

# Lukas

## *Horok Lirna La'an*

Lukas eni namwali dokter la an lernohi Paulus lar loikaru Makromod Lalap Lirna Wawa'an (Kol. 4:14; 2Tim. 4:11; Plm. 24). An loi-wuku wanakunu ma na'ono Yesus nano ri nammori ma nauroin kokkoo inhawa namwali noro Yesus lere onne mene kakar hi'i horok eniyeni (1:1-2).

Lolo horok eni Lukas konohi Yesus Nin panaeku An mai noho wawan. Ai na'heni Yesus mai nanoin ri man ko'u Makromod Lalap leke huri we'er hi nano rir dohohala nin molollo (19:10). Yesus mai noho wawan leke nala or'ori dardari ri na'akeme ma akin naili'il Ai, ri Yahudi noro idewe ma ka namwali Yahudi (2:10; 2:30-32; 3:6; 24:47).

Lolo horok eni ik lese hi'ihehewi Yesus naramyak ri ma na'alehe haida-haida noro ri man susa (6:20; 7:22; 14:11-13; 21:1-4), ik les hi'ihehewi Ai naramyaka ri man hi'i dohohala (5:30; 7:37-50; 15:1-2), la hi'ihehewi Ai naramyaka maeke (7:11-17; 8:2-3; 10:38-42; 13:10-13; 21:1-4; 23:27-31), noro tatan'ukun (8:41-42; 54-55; 9:38-42; 9:46-48; 18:15-17).

## *Horok Ihin*

1. Lukas nala wanakunu man hari horok eni (1:1-4).
2. Lukas wakunu mori Yohanis man ulutade ri noro mori Yesus (1:5-2:52).
3. Yesus hi'i Nin honowok dedesne (3:1-4:13).

4. Yesus hi'i Nin honowok lolo noho Galilea (4:14-9:50).
5. Yesus hi'i Nin honowok lolo Nin nala'al'a laa Yerusalem (9:51-19:27).
6. Lukas konohi inhawa namwali Yesus Nin domeku man horu lolo kota Yerusalem (19:28-23:56).
7. Yesus mori wali'ur la nalhari kemen Nin man lernohi (pnk. 24).

## *Lukas nin panaeku hi'i horok eniyeni*

<sup>1</sup> I wal'u Teopilus man rin horhawe!

Ri nammori ken hi'iyedi horok ma na'ono Yesus Nin panaeku wo'ira ma namwaliyedi lolo mayai herne kalaruna nonolu me'e.

<sup>2</sup> Lolo rir horok onne hi rodi panaeku man am dernedi nano ri man mehe rodi oin makan do'on Yesus Nin morimori. Ri man meher do'on Yesus Nin morimori onnenihe penia do'on Nin hini'i wenewhe na'akeme la hi me'ene ramwaliyedi ma nodi Ai Lirna Wawa'an eni loikaru ri namehin haenhi.

<sup>3</sup> Ya'u mehe a'inauwedi wawa'an panaeku wo'ira na'akeme onne nano lere dedesne me'e de ya aledi kenekrohu nahenia wa'an rehi ya'u kakar panaeku wo'ira wawa'an lolo horok ida aku ki makrom'u, Teopilus.

<sup>4</sup> Ya'u hi'i heheni leke makrom'u nauroin inhawen man rin wakukuwedi makrom'u me'e, onneni namwali panaeku ma nam-lolo kokkoo.

*Hophopon a'am raram  
man konohi Zakaria nahenia  
ai hono lo'o moriyana*

<sup>5</sup> Lere Herodes namwali rai lolo Yudea, imam ida aile naran Zakaria. An howok wewerre noro imam-imam rira muku ida rapolu muku Abia. Hono naran Elisabet, la ai namwali Harun upun anan haenhi.

<sup>6</sup> Hirira morimori namlololo Makromod Lalap kalarna ono woro'ohne derne rakani Nin keneri hono'ok noro Nin holoor halaauk na'akeme.

<sup>7</sup> Maa woro'ohne ka ra'ori tatana ono Elisabet tatane kaale raramne, la hi ra'ileheredi me'e.

<sup>8</sup> Ler ida, Zakaria nina muku enihe rira lere alam ilitolle Makromod Lalap Nin honowok de ai mahan ilitolle Nin honowok lolo Makromod Lalap Nin Romleu Lape.

<sup>9</sup> Lere onne imam man howok onnenihe radedem hi'i undi leke nili inhoi man laa onno man moumou dewdewe lolo Makromod Lalap Nin Romleu Lape raram harna honoi kanani man wala'ula'u. Hi'iyedi undi horu, Zakaria lernale.

<sup>10</sup> Ende an laedi raram mahan harna honoi kanani onne, la lolo paharne ri nammori mahar hi'i lir napanak.

<sup>11</sup> Enime'ede Zakaria onne, namlilinnohi Makromod Lalap Nin hophopon a'am raram ida nalhari kemen ai. Hophopon onne namriri lolo honoi kanani onno rodi haharna au hairne wala'ula'u herne malanna.

<sup>12</sup> Zakaria do'onedi hophopon onneni ne, ai nahumarnedi la namka'uk rehi.

<sup>13</sup> Enimaa hophopon a'am raram onne ne'el Zakaria na'ahenia, "Yono mamkauk! Makromod Lalap dernedi numa lir napanak me'e. Na'amoli o houm Elisabet moriyana tatana mo'oni ida, la om waki naran Yohanis.

<sup>14</sup> Na'amoli an hi'i mi akim nahuwa'an wake'e, la lere mori ai, ri nammori akinhe nahuwa'an haenhi,

<sup>15</sup> ono ai namwali ri lalapa lolo Makromod kalarna. Yon ai nomun anggur me arak, la nano nin lere momori me'ede Roh Kudus na'aromromo irhun raramne.

<sup>16</sup> Enla lere Israel upun ananhe derne ai lirna, hi nammori wali wali'ur mai hi Makromon, Makromod Lalap!

<sup>17</sup> Ainin molollo namnenehe nabi Elia la Roh Kudus nala molollo ai naise nonolu nala Elia haenhi. Ende ai noluwedie Makromod hari kalla leke ri Israel akinhe ramkenedi lere Makromod mai eni. An hi'i ri leleher roro tatan'ukun ramwali mahaku. Enla ri ma kan derne rakani Makromod enihe, an wakuku hi leke rauroin derne rakani Makromod la ramwali ri molololo Makromod Lalap kalarna. An hi'i panaeku eni na'akeme leke hi'i ri mormori akinhe ramkene kokala Makromod."\*

<sup>18</sup> Zakaria na'ukani hophopon a'am raram onne na'ahenia, "Hi'i hehewi ya auroin num wanakunu eni

\* **1:17** Mal. 4:5-6

namlolo? Ya'u eni a'ileheredi me'e, la ainu'u maekleher na'ileheredi me'e haenhi."

<sup>19</sup> Enime'ede hophopon onne na'ahenia, "Ya'u eni Gabriel, Makromod Lalap Nin hophopon wahwahan ma namrirri Ai leken kalarna. Ai penia hopon yo odi lira wawa'an eni mai loikaru ki o.

<sup>20</sup> Horhorok! Rakan nin lere alam, ainu'u wanakunu eni na'akeme namwali kokkoo. Maa o eni kam derne makani ainu'u wanakunu eni, de om hakukuwedì hehen nanumene ainu'u wanakunu eni namwali."

<sup>21</sup> Zakaria aile Makromod Lalap Nin Romleu Lape raram makun ne, ri nammori mahar lalapan ai namhara mai paharne. Hir mehe kakaiyedi ono ai nalo'oledi Romleu raram onne me'e.

<sup>22</sup> Enla an mayiedi paharne ne, ai kan wakunu haida ono ka nauroin wakunu me'e. Hir do'on ai nodi liman mehe herre wanakunu mene hi rauroin ai lo'o mehen do'onedi haida lolo Makromod Lalap Nin Romleu Lape raram me'e.

<sup>23</sup> Ainin lere alam howok lolo Romleu Lape horuwedi ne, an wali laa nin nakar me'e.

<sup>24</sup> Ka nalo'ol ne, hono Elisabet ap'apun me'e, la ka namhara nin nakar wollo wolima raramne.

<sup>25</sup> Ai na'aheni, "Eni mene Makromod kukule akin man wa'an paku maya'u. Ende ka awawa lolo heri kalarna me'e ono Ai nala tatana ya'u moriyane."

*Hophopon a'am raram man konohi Maria an*

*moriyana tatana mo'oniyana*

<sup>26</sup> Lere Elisabet nornoro raramne wollo woneme ne, Makromod Lalap hopon Nin hophopon a'am raram ma naran Gabriel nala'a noho Galilea lolo kota Nazaret

<sup>27</sup> pakromo noro maeke ida naran Maria. Ai noro Yusup rira honorok aki namnehe na'alonedi me'e leke woro'ohe ho, maa lere onne ka ramkuru wuku makun. Yusup onne rai Daud upun anan.

<sup>28</sup> Hophopon a'am raram onne ne'el Maria na'ahenia, "Heih, Maria! Akim nahuwa'anedi ono Makromod namre'e namharu o rehi, Ai norle'ule'u norwaliwali o mamani."

<sup>29</sup> Maria derne hophopon onne lirna, idewe an polletilu la namka'uk de lolo akin na'aheni, "Lira eni nina panaeku inhawe?"

<sup>30</sup> Enimaa hophopon onne na'aheni, "Maria, yono mamkauk! Makromod Lalap naledi kenekrohu nala rere'e haharu man lap la ma'aruru wake'e ki o.

<sup>31</sup> Ka nalo'ol mormoro o raram me'e, la tatana ma namwali lolo o ihin kemen onne mo'oniyane. Na'amoli waki tatana onne naran Jesus.

<sup>32</sup> Ai onne namwali ri lalapa la rin wekel Makromod Lalap Man Kulu Narehi Man Lap Narehi Ananne, la Makromod Lalap mehe kikan Ai namwali Rai naise upun a'an rai Daud.

<sup>33</sup> Enla Ai nodi molollo Israel upun ananhe rakan laa ewi-ewi."

<sup>34</sup> Maria na'ukani hophopon a'am raram onne na'ahenia, "Hi'ihehewi ha eniyenihe namwali? Ya'u ka oro mo'oni amkuruwala makun."

<sup>35</sup> An walhe, "Na'amolia Makromod Lalap huri wali Nina Roh mai ki o. Makromod Lalap Man Kulu Narehi Man Lap Narehi Nin ke'ek'e'l an'anha norle'ule'u norwaliwali o de anum man om momori onne moumou dewdewe la rin wekel Ai onne Makromod Lalap Anan.

<sup>36</sup> O mehem po'on we'ekwallum Elisabet, kade ai onne na'ileheredi me'e la ri na'aheni tatane kaale raramne me'e ne, ors eni nornoro raramne wollo woneme me'e,

<sup>37</sup> ono Makromod Lalap mehe nauroin hi'i ha wo'ira na'akeme namwali."

<sup>38</sup> Maria na'aheni, "Ya amkene hi'i lernohi Makromod Lalap Nina honorok aki! Inhawe man Makromod na'aheni onne ya amkene kokale lolo i kem'u ono ya amwali Nina hophopon." Enime'ede hophopon a'am raram onne nala'a me'e.

### *Maria lan ka'ar we'ekwalla Elisabet*

<sup>39</sup> Ka nalo'ol ne, Maria na'akenedi nin hahaa la idewe nala'a laa leke ida ma aile Yudea nin wo'or. Lolo onne wo'or mamani.

<sup>40</sup> Rakanedi enne ne, ai nala'a laa Zakaria nin nakar, napoluwala la nala hiyene arore Elisabet.

<sup>41</sup> Elisabet dernessi Maria lirna ne, tatana man minle konoin raram nawolwollo wake'e, la Roh Kudus

na'aromromo lolo Elisabet raramne.

<sup>42</sup> Enime'ede Elisabet wakau naruri na'ahenia, "O penia Makromod Lalap namre'e namharu o narehi maeke rahu na'akeme, la Ai namre'e namharu tatana man aile o raramne!

<sup>43</sup> Maya'u eni inhoi pena Makrom'u inna mam ka'ara'ue?

<sup>44</sup> Ya auroin Makrom'u aile o raramne ono ya'u derne num napolpolu idediyeni ne, idewe tatana man minle i kono'u raram nawolwollo wake'e ono ai akin nahuwa'an rehi.

<sup>45</sup> Om lernala rere'e harhu man lapa ono o akim naili'iledi nahenia Makromod lo'o hi'i inhawa An konohiyedi me'eni."

### *Maria na'uli nasa'a Makromod Lalap*

<sup>46</sup> Enla Maria na'uli nasa'a Makromod Lalap na'ahenia, "Yo odi i honorok akin penpenu kemkeme a'uli asa'a i Makrom'u.

<sup>47</sup> Ya akin nahuwa'an wake'e ono Makromod Lalap huri we'er ya'u nano ainu'u dohohala nin molollo.

<sup>48</sup> Ai penia kan hamlinu ya'u ma namwali Nin hophopon wahwahan man lolo yawa eni.

Nano lere eniyeni ri na'akeme ra'aheni ya amwali maeke man Makromod Lalap namre'e namharu narehi,

<sup>49</sup> ono Makromod Lalap Ma Nodi Molollo Ma Narehi Na'akeme

hi'iyedi panaeku man  
ma'aruru maya'u.

Ai Oin Naran penia  
nahineiredi nano naran  
namehin na'akeme.

<sup>50</sup> Ku herre ku An kukul  
aki man wa'an ri ma  
namka'uk Ai.

<sup>51</sup> Ai nodi Nin ke'eke'el  
an'anha hi'i hini'i man  
lewlewen.

An reiye'er kope'eredi ri  
man holi kukulu lalap,  
leke rir panaeku yon  
namwali.

<sup>52</sup> Ai nalkopuredi rai-rai nano  
rir kadere de ka rodi  
molollo me'e,  
maa An kikan ri ma kan  
holi kukulu lalap.

<sup>53</sup> Ai nala hanana'an man  
wa'an na'apehur ri ma  
namlara,  
maa An hopon ri orka-  
naru enihe rala'a  
ra'alehe haida-haida.

<sup>54-55</sup> An kukul aki man wa'an  
maika, Israel upun  
ananhe ma namwali  
Nin hophopon wah-  
wahan enihe.

An paku ika naisa An  
nouwedi ik upud a'ad  
nonolu eni.

Ai kan hamlinu Nin nou  
man An hi'iyedi noro  
Abraham noro upun  
ananhe laa ewi-ewi."

<sup>56</sup> Maria nin ul'uli sasa'e  
horu an minle noro Elisabet  
wollo wokelu mene wali laa  
nina nakar.

### Mori Yohanis

<sup>57</sup> Rakanedi Elisabet nina  
lere alam moriyana, an mori  
mo'oniyanaida.

<sup>58</sup> Nin nakar wali noro  
lodon walinhe dernedi

hi'ihehewi Makromod Lalap  
kukul Nin aki man wa'an  
wake'e Elisabet me'e, de  
roro ai akinhe nahuwa'an  
wewerre.

<sup>59</sup> Tatana onne nina alam  
wo'aedi ne, nin nakar wali  
roro lodon walinhe mai leke  
sunate, la ai lodon walinhe  
rir panaeku waki tatana  
onne naran lernohi aman  
naran Zakaria.

<sup>60</sup> Enimaa inna namhene la  
na'aheni, "Yono! Am waki  
naran Yohanis!"

<sup>61</sup> Hi re'el ai na'ahenia,  
"Hi'ihepe? O upun a'anhe kar  
wawa naran eni menee!"

<sup>62</sup> Enime'ede hi rodi liman  
herre wanakunu ra'ukani  
Zakaria na'ahenia, "Tatane  
waki naran inhoi?"

<sup>63</sup> Kame'ede Zakaria nodi  
liman herre wanakunu  
napanak waku man rodi hi'i  
horok\* leke an horok tatana  
naran. An horok na'ahenia,  
"Ai naran Yohanis." Hi  
na'akeme mehe nananedi.

<sup>64</sup> Lere onne me'ede  
Zakaria nauroin wakunu  
wali'uredi la na'uli nasa'a  
Makromod Lalap.

<sup>65</sup> Rir nakar wali na'akeme  
ramka'uk rehi, la panaeku  
onne naderre nadaul lolo ri  
man minle Yudea nin wo'or-  
wo'or na'akeme.

<sup>66</sup> Ri man derne panaeku  
onne na'akeme roro akin  
wakunu na'ahenia, "Tata-  
neni lo'o namwali inhawa?"  
ono hir do'on rauroinedi  
Makromod norle'ule'u nor-  
waliwali ai.

<sup>67</sup> Enime'ede Roh Kudus  
nodi molollo Yohanis aman  
Zakaria de an wakunu in-  
hawa ma namwali lere man  
mai. Ai na'ahenia,

\* **1:63** Waku onne rodi wanakunu Malay "batu tulis". Lere nonolu onne ri Yahudi  
nadedem nair papan tulis rodi au hi'ie noro ha naisa kertas nam'awal rodi pake.

- 68 "Mai ka'uli kasa'a Makromod, Israel nina Makromod Lalap, ono An mai leke huri we'er Nin ri nano rir dohohala nin hunukum makmaki.
- 69 Ai nala Ri lewlewen ida mai huri we'er ika nano iknik dohohala nin molollo. Ai onne, Makromod Lalap Nin hophopon wahwahan Daud upun anan.
- 70 Panaeku ma namwali eni naise inhawa man nonolu eni Makromod nouwedi lolo Nin nabi mememen enihe.
- 71 Ai nala Ri man lewlewen onne mai huri we'er ika nano iknik arwali, leke ma kan suk maika yon rodi molollo maika me'e.
- 72 An kikan Ri man lewlewen onne leke kukul aki man wa'an ik upud a'ad Abraham, Isak, noro Yakup, ono Ai kan hamlinu Nin nou man Ai mehe naledi hi me'eni.
- 73 An kikan hopo na'akerhe Nin nou ma namkene noro ik upud a'ad Abraham
- 74 nahenia Ai lo'o huri we'er ika nano iknik arwali lekpananne yon kamka'uk ilitolle Ai,
- 75 leke ik kamwali Nin ri ma na'alehe dohohala, la hi'i ha ma namlolo lolo Ai leken kalarna manani rakan iknik lere horu.
- 76 Enla ya an'u Yohanis o, na'amoli rin wekwekel o nabi man ilitolle Makromod Lalap Man

Kulu Narehi Man Lapa Narehi eni, ono o penia moluwedi Makromod leke ma'ahari la ma'akene kalla An lole.

77 O penia man kukul kalla man wa'an Nin ri eni, leke hi rauroin Makromod Lalap Nin panaeku nala or'ori dardari ma kan horu hi, ono na'ohu nahala rir dohohala.

78 Makromod Lalap hi'i onne ono An kukul aki man wa'an wake'e maika. Onne penia Nin Ropropeni na'akeki mai leke paku maika.

An mai nano a'am raram nala ropropo naisa lere man ha'a orerek,

79 leke na'aropedi ri man minle kalkale roro ri ma namka'uk makmaki eni.

Ai penia man kukul kalla maika leke koro Makromod Lalap holi moiiliwi mahuwele."

80 Zakaria anan eni, eren lalapa, ai honorok akin eren narururi haenhi. Lapedi ne, an holi lolo noho mamun ma napro'uk hehen nanumene rakan lere an mai nalhari kemen ri Israel enihe.

## 2

*Mori Yesus  
(Mat. 1:18-25)*

<sup>1</sup> Lere onne Kaisar Agustus nodi molollo noho Roma de an komdere nina man howok enihe horok hair Roma ne'en raram na'akeme naranhe.

<sup>2</sup> (Lere onne hi kar horok ri na'akeme naran makun, de eniyeni dedesne wake'e. Hir hi'i horok eni lere Kirenius namwali gubernur lolo noho Siria.)

<sup>3</sup> Ainina konomdere onne hopon ri na'akeme wali laa rira lekloi mememen leke horok naranhe.

<sup>4-5</sup> Ende Yusup noro Maria ramhara Nazaret ma aile noho Galilea wali laa kota Betlehem ma aile noho Yudea leke horok naranhe. Hir wali laa enne ono Yusup upun a'an rai Daud nonolu morie lolo kota onneni. Lere onne Yusup noro Maria lawukuweddi honorok aki leke woro'ohe ho me'e, la Maria nornoro raramne me'e.

<sup>6</sup> Hir minle Betlehem makun, Maria nina lere alam nokoredi me'e de karuwana me'e.

<sup>7</sup> An mori tatana anulu eniyeni, mo'oniyane. Maria nodi tapi a'un ho'ihoir la na'aduduweddi ha mormori nina nana'an onno, ono kar lernala onno lolo nakar paipair.

### *Man huri pipduma do'on hophopon a'am raram*

<sup>8</sup> A'alam onne man huri pipduma maha radiyaka rira pipi ukun kan ko'uwala nano kota onne.

<sup>9</sup> Ramlilinnohi Makromod Lalap Nin hophopon a'am raram ida nalhari kemen hi, la Makromod Nina siksika lerlere ropa'ahedi lolo onne de ramka'uk rehi.

<sup>10</sup> Maa hophopon a'am raram onne ne'el hi na'ahenia, "Yono mamkauk! Ya'u mai leke kukunohi mi

Lira Wawa'an man hi'i ri na'akeme akin nahuwa'an rehi.

<sup>11</sup> Lere eni tatanida moriyedi mai lolo rai Daud nina lekloi Betlehem me'e. Tatana onne penia man huri we'er ri mormori nano rira dohohale nin molollo. Ai namwali Kristus, ik Makromod man Makromod Lalap kikan namwali Rai laa ewi-ewi.

<sup>12</sup> Mi mauroin ainu'u wanakunu eni namlolo kokkoo nano tanada eniyeni: Mim laa enne mim do'on Tatana man idedi nanumene morie la rodi tapi a'un ho'ihoir la ra'adudu aile ha mormori nina nana'an onno raram."

<sup>13</sup> Enla ramlilinnohi hophopon a'am raram nammori rehi mai roro hophopon idediyeni minwuku, ra'uli rasa'a Makromod Lalap ra'ahenia,

<sup>14</sup> "Ka'uli kasa'a Makromod Lalap man aile onno man kulu narehi lolo a'am raram. Ai penia ma nala moiawi mahuwele ri mormori ma nahuwa'an Ai akin lolo noho wawan."

<sup>15</sup> Hophopon a'am raram onnenihe hoikaruweddi man huri onnenihe la wali wali'uredi laa a'am raram ne, man huri onnenihe ida ma ne'el ida na'ahenia, "Mai ik kala'a laa Betlehem leke do'on panaeku man idedi nanumene Makromod kukunohi maikeni."

<sup>16</sup> Kame'ede hir pelek-leke rala'a laa kote raram pakromnala Maria, Yusup noro Tatana man idedi nanumene momorie, la

ra'adudue aile ha mormori  
nina nana'an onno raram.

<sup>17</sup> Hir laa do'onedi tatana  
onneni ne, hir kukunohi ri  
na'akeme lolo onne panaeku  
ma na'ono Tatana man  
hophopon a'am raram onne  
kononohi hi eni.

<sup>18</sup> Ri na'akeme man derne  
man huri rira wanakunu eni,  
hir mehe nanananedi,

<sup>19</sup> maa Maria loi honorok  
panaeku onne na'akeme la  
na'akenedi lolo honorok akin  
me'e.

<sup>20</sup> Kame'ede man huri  
onnenihe wali wali'ur laa rir  
miminbole, la hi na'akeme  
ra'uli rasa'a Makromod  
Lalap la ra'akulu ra'alapa Ai  
Naran mamani ono ha wo'ira  
na'akeme man hir dodo'on  
dederne onne namwali ler-  
nohi hophopon a'am raram  
nin wanakunu onneni.

### Rodi Yesus kanile Makro- mod Lalap la sunate

<sup>21</sup> Lernohi ri Yahudi rira  
noho honolla, Tataneni Nin  
alam wo'aa ne, hi rodi laa  
sunate, la waki naran Yesus.  
Naran onne penia hophopon  
a'am raram nale lere Maria  
kan apun makun.

<sup>22-24</sup> Rakanedi lere alam  
man kuku nokor me'e,  
Yusup noro Maria rala'a  
laa Yerusalem leke ra'amou  
kemenhe lernohi Musa nin  
keneri hono'ok ma na'ono  
ri man moriyana. Keneri  
hono'ok onne hopon rin nala  
orpopo'o kem woro'o, ka eni,  
merpatiyana kem woro'o  
rodi hoikani Makromod.

Onne kan mehe, maa hi  
rodi Tatana laa haenhi leke  
rale kanile Makromod ler-  
nohi Makromod Nin keneri

hono'ok ida man hopon  
na'ahenia, "Mala minim  
tatana mo'oni dedesne  
na'akeme kanile Makro-  
mod leke namwali Nin ri  
mememen." \*

<sup>25</sup> Lere hir minle Yerusalem  
ri ida aile naran Simeon.  
Ai onne ri molololo la akin  
ka nahinuri Makromod. Ai  
mahan lalapan lere Makro-  
mod Lalap huri we'er Israel  
nano rir arwali, la Roh Kudus  
norle'ule'u norwaliwali ai  
mamani.

<sup>26</sup> Enla Roh Kudus kukuno-  
hiyedi ai me'e nahenia ai lo'o  
do'on Kristus man Makro-  
mod Lalap kikanedi namwali  
Rai laa ewi-ewi nanumene an  
maki.

<sup>27</sup> Lere onne Roh Kudus  
nodi molollo ai penia an mai  
Romleu Lap raram. Lolo  
onne an holikuku Yusup  
noro Maria maha rodi Anan  
Yesus mai leke hi'i wewhe  
lernohi Musa nin holoor  
halauk.

<sup>28</sup> Enime'ede Simeon nala  
Tatane nomonedi la na'uli  
nasa'a Makromod Lalap  
na'ahenia:

<sup>29-30</sup> "Makrom'uee! Lere  
eniyeni O ma'akuku  
ma'anokoredi Num  
nou maya'u ma  
namwali Num hophopon  
wahwahan me'e,  
de ya akin nahuwa'anedi  
la ya amkene maki,

ono ya'u mehe odi i mak'u  
do'onedi Ri man Om  
niliyedi namwali man  
huri we'er ri nano rir  
dohohala nin molollo.

<sup>31</sup> I Makrom'u na'akenedi Ai  
man huri we'er hair  
rahu na'akeme nano

\* 2:22-24 Kel. 13:2, 12; Im. 12:6-8

dohohala nin molollo  
me'e.

<sup>32</sup> Ai eni naise ropropo ma  
na'amou na'ropo ri  
ma ka namwali Yahudi  
akinhe leke hi rauroin  
O.

Enla nano Nin hini'i we-  
newhe de ri na'akeme  
horhawa mayai ma  
namwali Israel upun  
ananhe, Num ri  
mememen.\*

<sup>33</sup> Tatana onne inna noro  
aman hehel rehi derne  
Simeon nin wanakunu man  
ma'aruru ma na'ono hi anan  
eni.

<sup>34</sup> Simeon napanak Makro-  
mod Lalap namre'e namharu  
hi la ne'el Maria na'ahenia,  
"Tatana eniyeni, Makromod  
Lalap niliyedi leke na'idaru  
Israel upun ananhe nam-  
mori ma kan derne nakani  
Ai, maa na'akulu na'alapa  
ri nammori ono hir derne  
rakani Ai haenhi. Enla ri  
nammori lo'o do'on Nin  
hini'i wenewhe la derne  
rakani Nin wanakunu ma  
na'ono Makromod Lalap  
Nin honorok panaeku, maa  
ri nammori lo'o ra'okul Ai  
haenhi.

<sup>35</sup> Makromod Lalap hi'i  
heheni leke nalhari ri nam-  
mori honorok akin leke ri  
namehin rauroin haenhi.

Enla Maria, o akin woir  
wake'e naisa rin nodi raa ma  
namlorno kadie haenhi."

<sup>36</sup> Lolo onne nabi maeke  
ida naran Hana ma  
na'ileheredi me'e aile haenhi.  
Aieni Panuel anan nano luhu  
Aser. An ho anna wo'ikku  
mehe ne, nin mo'onleher  
maki,

<sup>37</sup> de ai namwalum  
nalo'oledi me'e, ono nin anna  
weli'aa wo'akkedi me'e. Ai  
namkene lolo Makromod  
Lalap Nin Romleu Lape  
mamani. Lelere al'alam  
an hi'i lir napanak la ka  
na'ak, ono an hi'i lir napanak  
la na'uli nasa'a Makromod  
Lalap mamani.

<sup>38</sup> Simeon wakunu horu  
ne, maeke onne mai de  
na'uli nasa'a Makromod  
Lalap. Lolo onne ri nam-  
mori aile mahar lalapan  
lere Makromod Lalap huri  
we'er Yerusalem nano ri  
man kerne dalhe, la Hana  
konohi hi na'akeme panaeku  
nammori ma na'ono Tatana  
onne.

*Hir wali wali'ur laa leke  
Nazaret*

<sup>39</sup> Yusup noro Maria hi'i  
wewhedi lernohi Makromod  
Lalap Nin holoor halauk eni  
horu ne, hir wali wali'ur laa  
rir lekloi Nazaret man aile  
noho Galilea.

<sup>40</sup> Tatan onne eren lalap,  
eren narururi, la eren nau-  
roroin. Enla Makromod  
Lalap namre'e namharu Ai  
mamani.

*Kade Yesus tatana makun,  
maa noro meser agame ra-  
herre honorok panaeku lolo  
Romleu Lap raram*

<sup>41</sup> Aki anne Yesus Nin ri  
leleher laa Yerusalem leke  
lernohi Yahudi rira Lere  
Alam Lapa Paska ma na'ori  
honorok hi lere ramharedi  
Mesir nonolu eni.

<sup>42</sup> Rakan Yesus Nin anna  
idaweli woro'one, An lernohi  
Nin ri leleher laa Yerusalem  
leke lernohi lere alam lap  
onne naise nadedem.

\* **2:32** Yes. 42:6, 49:6, 52:10

<sup>43</sup> Lere Paska eni horu, hir wali wali'ur, maa Yesus kan lernohi hi. An minle Yerusalem, maa Nin ri leleher ka rauroini.

<sup>44</sup> Hi rauroin nahenia an lernohi rir kalla wali enihe de rala'edi lerida mene ranoin. Hi ranoin lolo lodon walinh roro rira ri orwali,

<sup>45</sup> maa kar do'one de wali wali'ur laa Yerusalem leke ranoin Ai.

<sup>46</sup> Alam wokelu horu mene pakromnale aile Makromod Lalap Nin Romleu Lape raram naikokoro mahan nakani meser agamenihe rira wanakunu la na'ukani hi na'ukankani nammori.

<sup>47</sup> Heri man derne Ainin wanakunu polletilu ra'aheni, "Hoih! Tataneni nauroin! Nin wanalhe lewlewen!"

<sup>48</sup> Nin ri leleher do'onedi Ai, hir hehel rehi. Inna ne'el Ai na'ahenia, "Pa'e, hi'ihepenia Om hi'i heheni mayaie? Yo oro Num papa sus wake'e manoin O."

<sup>49</sup> Yesus walhe, "Mame, hi'ihepenia moro papa sus wake'e manoin Ya'ue? Mi lo'o ka mauroin Ya amkene lolo Ya Am'u nin Romleu?"

<sup>50</sup> Maa hi ka rauroin Nina wanakunu eni nin panaeku.

<sup>51</sup> Kame'ede Yesus noro Nin ri leleher wali laa Nazaret, la An derne nakani hi mamani. Inna na'akenedi panaeku onnenihe na'akeme akin.

<sup>52</sup> Yesus eren lalap, eren nauroroin la eren nahuwawa'an Makromod Lalap noro ri mormori akinhe.

### 3

*Yohanis ma nodi oir ulutade ri loikaru Makromod*

*Lirna Wawan*

(Mat. 3:1-12; Mrk. 1:1-8;  
Yoh. 1:19-28)

<sup>1</sup> Kaisar Tiberius nodi molollo Roma anna idaweli wolima mene Pontius Pilatus namwali gubernur lolo Yudea. Lere onne rai Herodes nodi molollo Galilea, mo'oniwalla Pilipus nodi molollo Iturea noro Trakonitis, la Lisanias nodi molollo Abilene.

<sup>2</sup> Enla ma namwali imam man kulu narehi, Hanas noro Kayapas. Lere onne Makromod Lalap nalhari Lirna Zakaria anan Yohanis lolo noho mamun ma napro'uk.

<sup>3</sup> Ende an laa oir wauwau Yordan arkan wali-wali loikaru Makromod Lalap Lirna Wawan. Yohanis wakau na'ahenia, "Heih! Herredi minim morimori ma ka namlolo, wali derne makani Makromod Lalap, la mai mapanak yo odi oir ulutada mi leke Makromod Lalap na'ohu nahala minim dohohale."

<sup>4</sup> Yohanis onne na'akuku na'anokor horhorok ma aile nabi Yesaya nina horok ma na'ahenia,

"Ri ida aile lolo noho mun ma napro'uk wakaukau, na'aheni,  
'Ma'ahari kalla, la ma'anehe, leke Makromod lole.'

<sup>5</sup> Onno ma na'umokmoko ra'enuwedi, ma nawo'wo'or ra'anehedi. Kalla ma naple'ule'u ra'aduduwedidi la kalla ma na'ohu nakepe ra'anehedi.

<sup>6</sup> Hi'i heheni leke ri na'akeme lolo noho wawan do'on rauroin hi'ihewi Makromod Lalap huri

we'er ri nano doho-hala nin molollo.' ”\*

<sup>7</sup> Ri nammori mai Yohanis leke ulutade, la ai na'aheni, "Heih, mi eniyenihe ailanna maisa haimoke! Yon makoto nahenia lo'o mim mai ulutade leke mahinuriyedi nano hunukum lere man mamai eni,

<sup>8</sup> maa lam hi'i ha man wa'an leke ri nauroin kokkoo mim herredi minima morimori ma ka namloleni, la lernohi Makromod Lalap Nin honorok panaeku mehe. Yon pene'ek mi mamwali Abraham upun ananne de kam lernala hunukum. Makromod Lalap peni nodi molollo hi'i waku eniyenihe herre mi namwali Abraham upun anan.

<sup>9</sup> Makromod Lalap Nin hunukum na'akeki rakan me'e. Lere eni Ai na'akenedi Nin he'i aile au onno me'e. Inhawa au'ono ma woin ka namlolo, An keri, sopol laedi akiye raram."

<sup>10</sup> Ri nammori ra'ukani Yohanis, "Ende lo'o am hi'i inhawa?"

<sup>11</sup> Yohanis walha, "Ri ma nin rain woro'o aile, nala ida laa ri ma na'alehe, la ma nin banana'an aile, ha'ar noro ri ma na'alehe."

<sup>12</sup> Man ra'uk paipaire me'e ne mai Yohanis leke ulutade lolo oir. Hi ra'ukani, "Papa Meser, lo'o am hi'i inhawa?"

<sup>13</sup> An walhe, "Lere mim ra'uk paipaire, yon larlewen ma nodi molollo paipair nin kenekrohu."

<sup>14</sup> Ma nasala ke'urauk mai haenhi, ra'ukanie, "Emene am hi'i inhawa ho'o?"

An walhe, "Yon kerne dalha ri leke hi rala kupan ki mi, yon kuku sala ri ma kan hi'i yaksala leke lernala kupan, maa modi aki ma namkene mori noro minim naiwe'el herme'e."

<sup>15</sup> Lere onne ri nammori mahar lalapan Ai man Makromod Lalap kikanedi namwali Rai laa ewi-ewi, de hir derne Yohanis nina wanakunu eni ne, lolo akinhe ra'aheni, "Ai eni lo'o Kristus man Makromod Lalap nouwedi maika eni."

<sup>16</sup> Onne penia Yohanis walhe na'ahenia, "Ka nalo'ol Ri ma nodi molollo narehi ya'u mai, Nin pakpak ei nin kali me'ene, kan wa'an ya'u we'er. Yo odi oir ulutada mi, maa Ri man mamai onne nodi Roh Kudus noro aiye ulutada mi.

<sup>17</sup> Ai nodi kokopo ka'i na'amou Nina gandum, loiwuku ihin dakar raram, la osorne, sopol laedi aiye man mori mamani raram."

<sup>18</sup> Yohanis nodi panaeku ma naise onne nammori nounaku heri lere ai na'amou na'aropo Lira Wawa'an hi.

<sup>19</sup> Enimaa ler ida Yohanis dadiyala rai Herodes ma nodi molollo Galilea ono an ho mo'oniwalla Pilipus hono Herodias, la hi'i panaeku namehin man ailanna haenhi.

<sup>20</sup> Herodes kan ren nin ailanna, maa hi'i eren ailalanna, de kele Yohanis nale laa bui raram.

*Yohanis nodi oir ulutada*

\* 3:6 Yes. 40:3-5

**Yesus**

(Mat. 3:13-17; Mrk. 1:9-11)

<sup>21</sup> Lere Yohanis mahan ulutade ri nammori lolo oire, Yesus mai napanak ulutade haenhi. (Lere onne Herodes kan kelewuku Yohannis makun.) Ai mahan hi'i lir napanak, a'am nahinariyedi,

<sup>22</sup> la Roh Kudus molmolo merpati ida kopur mai Yesus wawan. Enla lira ida namhara a'am raram na'ahenia, "Ya An'u O! Ya amre'e amharu O rehi. Om hi'i Ya akin nahuwa'an rehi!"\*

*Jesus upuna'an kanakarne*  
(Mat. 1:1-17)

<sup>23-38</sup> Lere Jesus naderre nadaul Makromod Lalap Lirna Wawan dedesne Aininna anna lo'o welikelu la rin pene'ek Ai onne Yusup anan la Eli upun.

Eli aman Matat, Matat aman Lewi,

Lewi aman Malki, Malki aman Yanai,

Yanai aman Yusup, Yusup aman Matica,

Matica aman Amos, Amos aman Nahum,

Nahum aman Hesli, Hesli aman Nagai,

Nagai aman Ma'at, Ma'at aman Matica,

Matica aman Simei, Simei aman Yosek,

Yosek aman Yoda, Yoda aman Yohanana,

Yohanana aman Resa, Resa aman Zerubabel,

Zerubabel aman Sealtiel, Sealtiel aman Neri,

Neri aman Malki, Malki aman Adi,

Adi aman Kosam, Kosam aman Elmadam,  
Elmadam aman Er, Er aman Yesua,  
Yesua aman Eliezer, Eliezer aman Yorim,  
Yorim aman Matat, Matat aman Lewi,  
Lewi aman Simeon, Simeon aman Yehuda,  
Yehuda aman Yusup, Yusup aman Yonam,  
Yonam aman Eliyakim, Eliyakim aman Melea,  
Melea aman Mina, Mina aman Matata,  
Matata aman Natan, Natan aman Daud,  
Daud aman Isai, Isai aman Obet,  
Obet aman Boas, Boas aman Salmon,  
Salmon aman Nahason, Nahason aman Ami-nadab,  
Aminadab aman Admin, Admin aman Arni,  
Arni aman Hezron, Hezron aman Peres,  
Peres aman Yehuda, Yehuda aman Yakup,  
Yakup aman Isak, Isak aman Abraham,  
Abraham aman Tera, Tera aman Nahor,  
Nahor aman Seruk, Seruk aman Rehu,  
Rehu aman Peleg, Peleg aman Eber,  
Eber aman Salmon, Salmon aman Kenan,  
Kenan aman Arpaksad, Arpaksad aman Sem,  
Sem aman Nuh, Nuh aman Lamek,  
Lamek aman Metusalah, Metusalah aman Henok,

\* **3:22** NN. 22:2, Mzm. 2:7, Yes. 42:1, Mat. 3:17, Mrk. 1:11, Luk. 9:35

Henok aman Yared, Yared  
aman Mahalaleel,  
Mahalaleel aman Kenan,  
Kenan aman Enos,  
Enos aman Set, Set aman  
Adam.  
Adam aman Makromod  
Lalap.

## 4

*Hayakyak Makromon ken  
patal Yesus*

(Mat. 4:1-17; Mrk. 1:12-  
15)

<sup>1</sup> Lere Yesus namhara oir  
wauwau Yordan onne, Roh  
Kudus minle Ai raramne la  
norkaru Ai laa noho mamun  
ma napro'uk.

<sup>2</sup> Min lolo onne Hayakyak  
Makromon man kene patal  
Yesus lere weli'akka raram.  
Lelere a'alam ka na'an haida  
de rakan alam weli'akka  
horu, Ai namlara wake'e.

<sup>3</sup> Enime'ede Hayakyak  
Makromon mai ne'el Ai  
na'henia, "Lo'o namlolo  
kokkoo Makromod Lalap  
Anan O, hopon waku eni  
namwali hanana'an."

<sup>4</sup> Enimaa Yesus walhe  
na'henia, "Makromod Lalap  
na'heniyedi lolo Horok Lap  
raram, 'Ri kan mori nano  
banana'an mehe.' " \*

<sup>5</sup> Horu ne, Hayakyak  
Makromon nodi Yesus  
laa wo'or man kulu rehi.  
Me'e'eni me'ede an kukul  
Yesus noho wawan nin hair-  
hair na'akeme.

<sup>6</sup> Ai ne'el Yesus na'heni,  
"Ya ala hair-hair noro rir  
linikir kanaru na'akeme ki  
O leke modi molollo. Ainu'u  
molollo aile hi'i onne ono ha  
wo'ira na'akeme onne raledi

ya'u me'e de ya ale inhoi-  
inhol menmolollo ainu'u  
suke.

<sup>7</sup> Ende ya ala ha wo'ira  
na'akeme onne Om man-  
arne horo nahenia O ma'uli  
masa'a ya'u nanu."

<sup>8</sup> Enimaa Yesus walha  
na'henia, "Horhorok aile  
man hopon Makromod Lalap  
Nin ri na'henia, 'Ma'uli  
masa'a Makrommu, Makro-  
mod Lalap, la derne makani  
Ai mehe.' " \*

<sup>9</sup> Onne horu, Hayakyak  
Makromon nodi Ai laa kota  
Yerusalem laa onno man  
kulu wake'e lolo Makromod  
Lalap Nin Romleu Lape,  
la na'heni, "Lo'o namlolo  
kokkoo Makromod Lalap  
Ananne O, nehu laa yawa,

<sup>10</sup> ono horhorok aile Horok  
Lapeni ma na'henia,  
'Makromod Lalap hopon Nin  
hophopon a'am raram  
mai leke radiyaka O  
wawa'an. \*

<sup>11</sup> Hir mai kokala O leke yon  
mediyawa la yon eum  
tukul wakue.' " \*

<sup>12</sup> Yesus walha na'henia,  
"Maa horhorok aile haenhi  
man hopon Makromod Lalap  
Nin ri na'henia, 'Yon hi'i ha  
ma kan min haida modi kene  
Makromod Lalap Ma Narehi  
Ma Nalewen.' " \*

<sup>13</sup> Hayakyak Makromon  
nodi kalla wo'ira kene  
patal Yesus horu ne, an  
hoikaruwedii Yesus la lapan  
leken paharin wali'ur.

<sup>14</sup> Kame'ede Yesus wali  
laa Galilea la Roh Kudus  
na'aromromo raramne  
de Nin ke'eke'el an'anha

\* 4:4 Ul. 8:3 \* 4:8 Ul. 6:13 \* 4:10 Mzm. 91:11 \* 4:11 Mzm. 91:12 \* 4:12  
Ul. 6:16

norle'ule'u norwaliwali Ai mamani. Yesus naran pe'eredi lolo noho onne na'akeme.

<sup>15</sup> An wakuku lolo Yahudi rir kerei-kerei la ri na'akeme ra'uli Ai.

*Manin Nazaret ra'okul Yesus*  
(Mat. 13:53-58; Mrk. 6:1-6)

<sup>16</sup> Enime'ede Yesus wali laa Nin leke Nazaret. (Nano tatana rakan lapa, Ai noro Nin ri leleher minle leke onne.) Rakanedi Yahudi nin Alam Renren Warwarna, An laa Yahudi rir kerei raram naisa nadedem. Ai namriri leke lese Horok Lape,

<sup>17</sup> la hi rala nabi Yesaya nin horok An lese. An hari horok lunlunna onne nano in lisar ida woro'o leke lese heri kalarna. Lisar onne lirna na'ahenia,

<sup>18</sup> "Makromod Lalap Nin Roh aile Maya'u raram, ono Ai na'onedi Maya'u leke aderre adaul Lirna Wawa'an laa ri ma na'alehe haidahaida.

Makromod Lalap hopon Ya'u mai kukunohi Lirna Wawa'an onne laa ri ma aile kali wunuku dadal rai raram, leke hi rahinuri rawine'eredi.

An hopon Ya'u mai leke hi'i man makan toko wa'anedi la huri we'er ri man aile kenerne danalha raram.

<sup>19</sup> An hopon Ya aderre adaul Ai Lirna ma na'ahenia lere alam man An kukul Nin rere'e

haharu ri mormori rakanedi me'e."\*

<sup>20</sup> Lese horu, Yesus lunne horok onne wali'ur, nala kanile wali'ur laa man howok kerei onne la naikoredi leke wakuku kerei raramne. Man penpenu kerei raram onnenihe po'on kakane.

<sup>21</sup> Enime'ede An kukunohi hi na'ahenia, "Lere eniyeni Horok Lap Lirna man mim dederne idedi eni namwaliyedi me'e!"

<sup>22</sup> Heri man derne Ainina wanakunu eni mehe nanana mouwedi, la ra'uli Ai ra'aheni, "Nin wanakunu ma'aruru wake'e!" Kak dernala wanakuku man mou heheni makun! Maa ida ma ne'el ida na'ahenia, 'Ri eni Yusup anan menee!"

<sup>23</sup> Yesus ne'el heri onne na'ahenia, "Ya auroin mi kam hamlinu wanakunu naho'ok eniyeni: Lo'o o mamwali dokter kokkoo, ken ma'inapin o kemen\* nanu! Mi raram nodi hopon Ya'u hi'i heheni. Mi mahinorok nahenia lo'o Ya amwali nabi kokkoo, wa'an rehi Ya'u hi'i ha man ri kan dodo'onnala makun lolo iknik leke eni naisa mim dederne Ya'u hi'iyedi lolo Kapernaum.

<sup>24</sup> Horhorok Ainu'u panaeku eniyeni: Ri ka nadedem kokala nabi ida lolo nina leke mememen.

<sup>25</sup> Derne makaniyala Ainu'u wanakunu ma namlolo eniyeni ono panaeku ma naise onne namwaliyedi nabi Elia nin lere nonolu eni. Lere onne a'am na'inelekedi

\* 4:19 Yes. 61:1-2

\* 4:23 Lolo wanakunu naho'ok eniyeni 'o kemen' wekel ri man minle leke Nazaret ono leke Nazaret onne namwali Yesus Nin leke haenhi.

anna wokelu wollo woneme raramne de roulara lape lolo noho onne na'akeme, la maeke walwalum nammori aile noho Israel.

<sup>26</sup> Kade onne namlolo, maa Makromod Lalap kan hopon Elia laa maeke ida nano hi, maa hopon nala'a laa maeke walwalum ida ma aile Sarfat lolo Sidon.<sup>†</sup>

<sup>27</sup> Ha naisa onne namwali nabi Elisa nin lere nonolu eni haenhi. Lolo Israel ri nammori ulik yak hi'ie, maa Elisa kan hi'i wa'an ri mahaku nano hi. An hi'i wa'an Na'aman mehe, ai onne ri manin Syria."

<sup>28</sup> Man min lolo kerei raram onne na'akeme derne Nin wanakunu onnneni ne, hi ra'ahan rehi.

<sup>29</sup> Hi ramriri, rohi Jesus namhara kote, rodie laa wo'or kekin ma na'uranrani kota onne leke rokul lolo wo'or kekin laa yawa.

<sup>30</sup> Enimaa Jesus loledi heri leken de nala'a me'e.

*Jesus Nin molollo nohi hayakyaka nano ri*

(Mrk. 1:21-28)

<sup>31</sup> Horu ne, Jesus nala'a laa kota Kapernaum lolo noho Galilea. Rakan Alam Renren Warwarna An wakuku ri nammori lolo onne.

<sup>32</sup> Heri man min lolo onnnenihe mehe nanana mouwedi la aki'aki uluwakun derne Nina wanakukue, ono Nin wanakuku nodi molollo la nedille hi akin.

<sup>33</sup> Lolo Yahudi rira kerei raram ri ida aile man hayakyak hu'uuhu'ur raramne. An wakau na'ahenia,

<sup>34</sup> "Heih! Yesus! Nazaret O. Om paeku inhawa noro mayai? Om mai leke mano'onyaka mayai me'e? Ya auroinedi O me'e. O penia Makromod Lalap Nin Hophopon mememen Man Moumou Dewdeweni!"

<sup>35</sup> Yesus komdere na'ahenia, "Karkaramedi! Mamharedi ai raramne here!" Enime'ede hayakyak onne hi'i ri onne nalwali yawa lolo heri kalarna la idewe namharedi ai, maa kan hi'i apinpinha ai.

<sup>36</sup> Heri na'akeme polletilu la ida ma ne'el ida na'ahenia, "Wanakuku eni ra'ahewi pe? Ai nodi molollo noro ke'eke'el an'anha hopon hayakyaka me'ene, hir derne rakani de ramharedi!"

<sup>37</sup> Kame'ede panaeku ma na'ono Yesus Nin hini'i eni naderre nadaul lolo leke-leke ma aile lolo onne na'akeme.

*Jesus hi'i wa'an ri nammori*

(Mat. 8:14-17; Mrk. 1:29-39)

<sup>38</sup> Yesus namharedi Yahudi rira kerei ne, idewe laa Simon nin nakar. Rakanedi nakar ne, hir do'on Simon panin nakni'ir rinna manha de rapanak Yesus paku ai.

<sup>39</sup> Enime'ede Yesus na'uraniyedi nin namkuru onno la nohiyedi nin kini'ir rinna manha me'e de moluwedi. Ideweni ne maeke onne namaka la na'akene hanana'an hi ra'an.

<sup>40</sup> Lere na'ikeki helem eni ne, ri nodi ma nakni'ir nammori mai Yesus. Hirira apinha wo'ira aile. Enla Yesus kemenala liman hi dohodoho me'ede hir wa'an mouwedi.

<sup>†</sup> 4:26 Noho Sidon noho namehin, Yahudi ka.

<sup>41</sup> Ri heruwali hayakyaka hu'uhu'ur raramne, la Yesus hopon hayakyaka namharedi hi raram here. Ramharedi ne, hir wakau ra'heni, "Ai mauroinedi Makromod Lalap Anan O." Maa Yesus ka nala leken wake'e hayakyaka wakunu, ono hi rauroinedi me'e Ai onne Kristus man Makromod Lalap kikanedi namwali Rai laa ewi-ewi eni.

<sup>42</sup> Rakan oreki nohoropo Yesus nala'a laa onno ma namlina namkai lolo leke paharne. Heri laliwewer ranoin Ai, de maiyedi Nin miminbole, rahehe kawala Ai leke yon laa onno namehin me'e.

<sup>43</sup> Enimaa Ai na'heni, "Ya'u mai leke loikaru Lir Wawa'an man kukunohi ri hi'ihehewi Makromod Lalap nodi molollo ri man derne nakani Ai. Ende Ka'u loikaru ki mi mehe, maa loikaru leke-leke namehin haenhi. Onne penia Makromod Lalap hopon Ya'u mai noho wawan eni!"

<sup>44</sup> Ende An kuli kerei laa kerei lolo noho Yudea na'akeme leke loikaru Makromod Lalap Lirna Wawa'an eni.

## 5

*Yesus nili man lernohi pakunohi dedesne*

(Mat. 4:18-22; Mrk. 1:16-20)

<sup>1</sup> Ler ida Yesus mahan wakuku lolo oir lap Galilea arkan, la ri nammori mai lupurale leke derne Makromod Lalap Lirna Wawan.  
<sup>2</sup> Yesus do'on ma nohu meki rir korkoro woro'o palipali

aile oir arkan, la An do'on ma nohu meki enihe kopuredi maha ra'amou darie lolo herre raram.

<sup>3</sup> Enime'ede Yesus ha'a korkoro ida man Simon nine, la napanak Simon rokul laedi roromne nanumene naikoredi wawan la wakuku heri onnenihe.

<sup>4</sup> Wakuku horu ne, Ai ne'el Simon, "Ik kala'a laa onno man rorom la kaki dari lolo onne leke lernala i'in."

<sup>5</sup> Simon walhe, "Makrom'u, alam eni am kaki dari alam kekeme, maa ai kam lernala i'in kem mahaku. Enimaa Papa Meser napanak kaki dari de ya'u kenala ke'e!"

<sup>6</sup> Hir laa kakiyedi dari horu ne, ri'ik wali'ur, i'in penuwedi dari me'e de dari napriki me'e.

<sup>7</sup> Ende Simon nodi liman aun walin manina korkoro namehin mai paku ra'uk i'ine rala loile rir korkoro hehen nanumene korkoro woro'o onnenihe na'ikeki keper.

<sup>8</sup> Simon Petrus po'on panaeku onneni ne, an rawa yawa Yesus kalarina na'ahenia, "Makrom'u, ya'u eni man hi'i dohohale de wa'an rehi yon moro ya'u min mai eni me'e."

<sup>9</sup> Ai na'aheni onne ono eni nanumene ai noro nin man howok wali enihe lernala i'in nammori rehi naiseni de hir hehel rehi.

<sup>10</sup> Simon nin man howok wali Yakobus noro Yohanis, Zebedeus ananhe, hehel rehi haenhi.

Enime'ede Yesus ne'el Simon, "Yon mamkauk Simon! Nano lere eniyeni o mauroin manoin ri mormori naisa o manoin i'in haenhi."

<sup>11</sup> Ende hir wokedi rir korkoro eni, hoikaruwediri ha wo'ira na'akeme, la lernohi Yesus.

*Yesus hi'i wa'an ri man ulik yak hi'ie*

(Mat. 8:1-4; Mrk. 1:40-45)

<sup>12</sup> Ler ida Yesus aile leke namehin. Lolo onne mo'oni ida aile ulik yak hi'ie de kemen yak wake'e. An do'onedi Yesus ne, an mai kadi ein korno kalarna, napanak an'anhedi, "Papa ne'e harome hi'i wa'anedi ainu'u apinha ke'e."

<sup>13</sup> Enime'ede Yesus kemanala liman laa ri onneni, na'aheni, "Ye e'e! Wa'anedi here!" Me'e'eni me'ede ri onne nina ulik yake wa'anedi.

<sup>14</sup> Horu ne, Yesus hopon na'ahenia, "Yom konohi ri ha ma namwali o kemen eniyeni, maa mala'a laa imam nanu leke an po'onala o kemmu, nauroin nahenia om wa'anedi me'e. Modi onum honoi kanani\* laa mala ai leke lernohi agame nina holoor halauk eni. Hi'i onne leke namwali tanada nahenia om wa'anedi kokkoo me'e."

<sup>15</sup> Enimaa Yesus Nin hini'i onne naderre nadaul eren koko'u penia ri nammori mai leke derne Nin wanakuku la rapanak An hi'i wa'an rira apinha.

<sup>16</sup> Kade onne namlolo, maa lere romromo Yesus nahaledi kemen laa noho mamun leke hi'i lir napanak.

*Yesus hi'i wa'an ma naplu'uk nap'eker*

(Mat. 9:1-8; Mrk. 2:1-12)

<sup>17</sup> Ler ida nine Yesus mahan wakuku lolo onnida, la ri Parisi noro meser-meser Horok Lap raikokoro lolo onne. Heruwali rano Yerusalem mai, heruwali mai nano leke na'akeme ma aile Yudea noro Galilea. Ke'eke'el an'anhe nano Makromod Lalap aile Yesus raramne de Ai nodi molollo hi'i wa'an ma nakni'ir.

<sup>18</sup> Lere onne ri ida woro'o le'u mo'oni ma naplu'uk nap'eker ida noro nin namkuru onno mai. Hi rahehe rodi mo'oni onne laa romleher leke loile Yesus kalarne,

<sup>19</sup> maa ri nammori rehi de kar lernala kalla rodi ma nakni'ir laa raram, de hir ha'a laa nakar wawan, raiye'er nakar wawan mene rala kopur ma nakni'ir noro nin namkuru onno idewe laa Yesus kalarne.

<sup>20</sup> Yesus po'on nauroinedi nahenia ri onnenihe akin naili'il kokkoo, de ne'el man apinha onne na'ahenia, "I wal'u, Ya a'ohu ahaledi onuma dohohale me'e."

<sup>21</sup> Enime'ede meser Horok Lap noro ri Parisi enihe roro akin wakunu ra'ahenia, "E'eni inhoi penia wakunu heheni? Ai na'ihoru na'idaruwediri Makromod Lalap me'e ono Makromod Lalap mehe nodi molollo na'ohu nahala dohohala!"

<sup>22</sup> Enimaa Yesus nau-roinedi hi honorok akinhe me'e de na'ukani hi na'ahenia, "Hi'ihepeni mim kikan panaeku eni mi raramne?

<sup>23</sup> Ewi man sus rehi? Ya

\* **5:14** Im. 14:2-32 Honoi kanani onne namwali manu woro'o naisa orpopo'o.

a'ohu ahala ri eniyeni nin dohohala, ee Ya'u hi'i ai nala'ala'edi?

<sup>24</sup> Enimaa Ya'u hi'i wa'an ri eni leke mi mauroin mouropo nahenia Ya'u eni ma namwali Ri Mormori Anan,<sup>†</sup> la Yo odi molollo lolo noho wawan a'ohu ahala ri nina dohohala!" Enime'ede Yesus hopon ri ma naplu'uk nap'eker onne, "Mamakedi! Modi num namkuru onno, wali laa num nakar here!"

<sup>25</sup> Lere onne me'ede ai namaka lolo heri kalarua, na'uvara nin namkuru onno wali laa nina nakar. Ai nala'a ne, na'ul'uli nasasa'a Makromod Lalap.

<sup>26</sup> Enla heri man min lolo onne polletilu la ra'uli rasa'a Makromod Lalap haenhi. Hi ramka'uk la ra'aheni, "Lere eni ika do'onedi ha man ri kan dodo'onnala makun."

*Jesus napolu Lewi*  
(Mat. 9:9-13; Mrk. 2:13-17)

<sup>27</sup> Horu ne, Yesus namhara nakar onne, do'on mo'oni ida naran Lewi. Lere onne ai naikokoro lolo onno ai nadedem ra'uk paipaire. Yesus napolu ai, "Mam lernohi Ya'u."

<sup>28</sup> Kame'ede ai namriri hoikaruwedni nin ha wo'ira na'akeme la lernohi Yesus.

<sup>29</sup> Enime'ede Lewi hi'i ya'an yomun lolo nin nakar, la lariyala nina muku man ra'uk paipaire enihe roro ri namehin nammori, leke hi na'akeme mai roro Yesus ra'ak romun wewerre.

<sup>30</sup> Enimaa ri Parisi noro rira meser-meser Horok

Lap enihe kar suk nin hini'i onne de ra'ukani man lernohi pakunohi Yesus enihe, "Hi'ihepeni moro man ra'uk paipaire la moro man hi'i dohohala enihe ma'ak wewerre?"

<sup>31</sup> Yesus walhe na'ahenia, "Ma kan apinha, ka nanoin ma na'inapin, maa man apinha penia nanoin ma na'inapin.

<sup>32</sup> Ka'u mai apolu ri man hi'i ha ma namlolo mamani, maa Ya'u mai apolu ri man hi'i dohohala, leke herredi rir morimori ma ka namlolo eni, mai lernohi Ya'u."

*Jesus Nin wanakuku worworu eni ka namnehe noro Yahudi rir agame nin wanakuku nonolu eni*  
(Mat. 9:14-17; Mrk. 2:18-22)

<sup>33</sup> Ri Parisi enihe re'el Yesus na'ahenia, "Lere romromo Yohanis nin man lernohi enihe ra'aluli kemen ka ra'ak romun leke hi'i lir napanak Makromod Lalap naisa ainim man lernohi haenhi, maa Num man lernohi enihe ra'ak romun mamani."

<sup>34</sup> Yesus nodi wanakunu naho'ok ida walhe na'ahenia, "Lo'o ik min hohoo ida, polpolu larlariyala radedem ra'aluli kemen ka ra'ak romun, pe? Ka! Hi ra'ak romun mamani.

<sup>35</sup> Enimaa rakan orekiyedi, ri namehin mai rala man ho nano hi leken kalarne. Lere onne mene hi ra'aluli kemen ka ra'ak romun."

<sup>36</sup> Horu ne, Yesus nala wanakunu naho'ok ida

<sup>†</sup> 5:24 Wanakunu 'Ri Mormori Anan' onne wekel Mesias (Kristus) man nonolu eni Daniel wekeledi lolo nin horok me'e (Dan. 7:13-14).

woro'o wali'ur. Ai na'aheni, "Ri ka nadedem sirriki rain worworu leke tapil rain lo'olo'ol ma naprikiyedi me'e, kalo'o ai nano'onyaka rain worworu onne noro idewe rain lo'olo'ol haenhi. An hi'i rain lo'olo'ol onne yakedi ono tapi nano rain worworu onne ka namnehe noro tapi nano rain lo'olo'ol.

<sup>37</sup> Onne namnenehe panaeku eniyeni: ri ka nadedem nala anggur worworu halle sak ulik lo'olo'ole, kalo'o anggur woruworu eni hi'i sak ulik lo'olo'ol onne naprikiyedi de anggur halle mouwedi,

<sup>38</sup> maa ri nadedem nala anggur worworu halle sak ulik worworu.

<sup>39</sup> Enla ri ma nadedem nomun anggur lo'olo'ol kar suk romun anggur worworu ono hir pene'ek lo'olo'ol nine pena man wa'an narehi."

## 6

*Yesus nodi molollo Alam Renren Warwarna*  
(Mat. 12:1-14; Mrk. 2:23-28, 3:1-6)

<sup>1</sup> Alam Renren Warwarna ida, Yesus noro Nin man lernohi pakunohi enihe rala'ala'a lolo gandum kirna ida reku gandum wurna, ra'adi, de ra'an.

<sup>2</sup> Ri Parisi heruwali ma aile lolo onne do'odo'on, de ra'ukaniyale ra'aheni, "Lere eniyeni Alam Renren Warwana! Emene hi'ihepenia mim larlewenedi iknik agame nina holoor halaauk penia mim hi'i honowok naise onneni?"

<sup>3</sup> Yesus walha hi na'ahenia, "Mim lesedi inhawa ik upud a'ad Daud hihi'i lere ai noro nina kalla wali ramlara wake'e harome!?

<sup>4</sup> Lere onne Daud laa Tenda ma namwali Makromod Lalap Nin miminbole raram na'an roti man luli ra'an ono rodi hoikani Makromod Lalap, la nala nin muku ra'an haenhi. Makromod Lalap Nin holoor halaauk hurinohi imam mehe ra'an roti onne, ri namehin ka, maa mi ka mala sala Daud, de hi'ihepe mala sala Maya'u?

<sup>5</sup> Ya a'aheni heheni ono Ya'u, ma namwali Ri Mor-mori Ananne, odi molollo hopon rin hi'i inhawa-inhawa Alam Renren Warwarna."

<sup>6</sup> Alam Renren Warwarna wali'ur, Yesus laa wakuku lolo Yahudi rir kerei raram. Laedi kerei raram ne, An do'on mo'oni ida man liman wali malanne makiyedi.

<sup>7</sup> Lere onne meser-meser Horok Lap roro Parisi ida woro'o aile lolo onne maha ranoin Yesus Nina sale, leke kele rodi laa hono'ok kanail onno, kalake. Hi radiyake leke rauroin An hi'i wa'an mo'oni man liman maki eni Alam Renren Warwarna, ee ka.

<sup>8</sup> Enimaa Yesus nauroinedi hi honorok akin me'e de ne'el mo'oni man liman maki onne, "Mamririyedi! Mai mamririri heri kalarna." Enime'ede mo'oni onne mai namririyedi heri kalarna.

<sup>9</sup> Yesus wakunu noro ri man aile lolo onne na'ahenia, "Ainu'u na'ukankani aile. Iknik holoor halaauk hurinohi ika hi'i inhawa Alam Renren Warwarne? Hi'i ha wawa'an,

ee hi'i ha yakyaka? Hi'i ri man apinhan wa'an, ee kesne ri?"

<sup>10</sup> An po'on heri onnenihe dohodoho horu mene ne'el ma liman maki onne, "Ma'aloledi o liman, pa'e."

Kame'ede ai na'aloledi liman, idewe liman wa'anedi.

<sup>11</sup> Onne penia meser-meser roro Parisi enihe eren ra'aahan de hir wakunu wuku leke rala kenekrohu hi'i inhawa noro Yesus.

*Yesus polu Nin hophopon ma nodi Lirna Wawa'an idaweli woro'o*  
(Mat. 10:1-4; Mrk. 3:13-19)

<sup>12</sup> Ler ida Yesus wakiha'a wo'or ida leke hi'i lir napanak. A'alam kekeme ida An hi'i lir napanak Makromod Lalap.

<sup>13</sup> Rakan nohoropo ne, Ai napolu man lernohi enihe mai leke nili ri idaweli woro'o nano hi na'akeme. An kikan hi leke ramwali Nina hophopon ma nodi Lirna Wawa'an enihe.

<sup>14</sup> Ri onnenihe naran:  
Simon (man An waki naran Petrus) noro mo'oniwalla Andreas,

Yakobus noro Yohanis,  
Pilipus noro Bartolomeus,

<sup>15</sup> Matius noro Tomas,  
Yakobus (Alfeus anan) noro Simon--rapolu ri

Zelot (napa'ahne, 'ri ma namhene hair Roma nodi molollo Israel'),

<sup>16</sup> Yudas (Yakobus anan) noro Yudas Iskariot (ma na'olu Yesus).

*Yesus hi'i wa'an ma nakni'ir la wakuku ri nammori*  
(Mat. 4:23-25)

<sup>17</sup> Kame'ede Yesus noro Nin man lernohi pakunohi enihe kopur wo'or onne laa kauhu ida. Lolo onne nin man lernohi nammori aile roro idewe ri nammori ma nano Yudea, Yerusalem, la nano kota Tirus noro Sidon ma aile Kahi Lapa herraram.

<sup>18</sup> Hi na'akeme mai leke derne Yesus Nin wanakuku la rapanak An hi'i wa'an rira apinhan. Ri man hayakyaka huhu'ur raramne mai haenhi la An nohi hayakyak nano hi haenhi.

<sup>19</sup> Heri onnenihe rahehe leke tukulala Yesus ono ke'eke'el an'anha man hi'i wa'an rira kini'ir na'akeme namhara nano Ai kemen.

*Yesus wakuku inhawa ma nala rere'e haharu man lap ri ma akin naili'il Ai*  
(Mat. 5:1-12)

<sup>20</sup> Kame'ede Yesus po'onalala Nin man lernohi pakunohi enihe la na'ahenia, "I wal'uhe ma na'alehe haida-haida, mi akim nahuwa'anedi ono mi mamwali Makromod Lalap Nin ri la Ai namwali minim Rai.

<sup>21</sup> Mi ma namlara lere eniyeni, mi akim nahuwa'anedi ono lere man mai mim lernala ha man kukkuku noknokor de mi akim namkene.

    Mi ma naherhere lere eniyeni, mi akim nahuwa'anedi ono lere man mai Makromod Lalap hi'i mi malau mamani.

<sup>22</sup> Lere ri kan suk mi, de ra'okul mi, ilnohi ralnohi mi, la ra'ihoru ra'idaru mi ono mi

akim namkene ler-nohi Ri Mormori Anan eni, mi akim nahuwa'anedi,

<sup>23</sup> ono hi upun a'anhe penia hi'i heheni nabi-nabi nonolu eni.

Ende lere mim lernala apinpinha onne, mahuwa'anedi mi akim la sokmura mamani ono Makromod Lalap na'akenedi minim mahmaha kolkoli ihin ennen man lap aiyedi a'am raram me'e.

<sup>24</sup> Enimaa apinha wake'e ki mi ma namwali orkanaru lere eniyeni, ono mim lernaledi ha wo'ira ma nahuwa'an mi akim me'e.

<sup>25</sup> Apinha wake'e ki mi man pehur lere eniyeni, ono na'amoli mi mammara.

Apinha wake'e ki mi man sokmura lere eniyeni, ono na'amoli mi lo'o sus mak oir la mahehere.

<sup>26</sup> Apinha wake'e ki mi lere ri na'akeme ra'uli mi ono naise onne haenhi mi upum a'umhe ra'uli nabi-nabi ma ka namlolo nonolu eni."

*Ik karamyaka iknik arwali  
(Mat. 5:38-48, 7:12a)*

<sup>27</sup> "Enimaa mi ma nakani Ya'u mai eni, makaniyala Ainu'u nounaku eniyeni: Maramyaka minim arwali, la hi'i ha man wa'an ri ma kan suk mi.

<sup>28</sup> Mapanak Makromod Lalap namre'e namharu ri man lokor hauk mi, la hi'i lir napanak ri man hi'i yakyaka mi.

<sup>29</sup> Lo'o rin pahar mi mu-man wali, mala wali pahar wali'ur. Lo'o ri napanak num rain sorsoru eni, male num rain dedeul haenhi.

<sup>30</sup> Lo'o rin napanak haida nano mi, male hi, la lo'o rin nala minim hahaa, yono mapanak nale wali'ur.

<sup>31</sup> Inhawa hini'i wenewhe mi raram nodi rin hi'i ki mi, hi'i onne laa hi haenhi.

<sup>32</sup> Lo'o mi maramyaka mehe ri ma nadedem naramyaka mi, yom pene'ek Makromod Lalap na'akene haida man wa'an herre walha minim hini'i wenewhe onne ono ri man hi'i dohohala me'ene raramyaka ri ma naramyaka hi haenhi.

<sup>33</sup> Lo'o mim hi'i ha wawa'an laa ri man hi'i wawa'an ki mi, Makromod Lalap ka na'uli mi, ono ri man hi'i dohohale me'ene hi'i heheni haenhi.

<sup>34</sup> Lo'o mi mala kupan ri ma nin panaeku herre kupan onne wali'ur mehe, Makromod Lalap ka na'uli mi, ono ri man hi'i dohohala me'ene rala kupan rir ri orwali horo nahenia hir herre wali'ur.

<sup>35</sup> Yon hi'i heheni, maa maramyaka minim arwali la hi'i ha man wa'an hi. Lo'o mala haida ri yon mim keker henerunne. Lo'o mim hi'i ha man wa'an eniyeni, mim lernala wanalhanne man lap, la mim kukul nahenia mamwali Makromod Lalap Man Kulu Narehi Man Lapa Narehi ananhe. Ai penia kukul aki man wa'an ri ma ka napanak trimkasi Ai noro idewe ri man ailanna.

<sup>36</sup> Ende kukul aki man

wa'an minim ri heri ri wali  
naisa mi Ammu, Makromod  
Lalap man aile a'am raram,  
kukul aki man wa'an ki mi."

*Yono ho'ok kail minim ri  
heri ri wali, maa mampe'el  
herre minim morimori man  
sale aimehi*

(Mat. 7:1-5)

<sup>37</sup> "Yom ho'ok kail ri namehin, leke yono Makromod Lalap ho'ok kail mi. Yon suk mala hunukum ri namehin, leke yon Makromod Lalap nala hunukum mi. Enimaa mala ampun ri man hi'i yaksala ki mi, leke na'amoli Makromod Lalap na'ohu nahala minim dohohala haenhi.

<sup>38</sup> Mala inhawa-inhawa leke paku ri namehin. Na'amoli mi lo'o kokala wanalhanne ma narehi nalewen inhawa man mi mamala onne. Enla hono'ok mim nanair leke mala hahaa ri namehin onne, Makromod Lalap lo'o nairre nala ki mi wali'ur."

<sup>39</sup> Enla Yesus nodi wanakunu naho'ok ida woro'o wali'ur na'ahenia, "Hi'ihehewi, lo'o maktoko ida ni'ik makteke namehin wa'an, ee ka? Ka! Lo'o ida ma ni'ik ida, woro'ohe rediyedi laa moke raram.

<sup>40</sup> Pudpude ka nauroin narehi nin meser, maa lo'o pudpude ida nampe'el wakuku hehen nanumene nin wanakuku horu, ai onne noro nin meser namnenehe.

<sup>41</sup> Hi'ihepenia mim do'odo'on au mo'anida man minle mi wallum makan raram, maa au lapa man aile mi makan raram kam talukire?

<sup>42</sup> Hi'ihepenia me'el mi wallum ma'ahenia, 'Mai, ya aledi au mo'o onne nano makum,' maa mi makan me'ene au lapida aile kam do'one? Man kokme'e mamwali ri molololo mie! Maledi au lap man aile mi makan raram leke mim do'on wawa'an nanumene mi mala au mo'o man aile mi wallum makan mai paharne."

*Ik do'on ri ida nin hini'i  
wenewhe ik kauroin idewe ai  
akin mou, ee ailanna*

(Mat. 7:16-20, 12:33-35)

<sup>43</sup> "Au'ono man meur ka nadedem woi woin ma kan wa'an, la au'ono ma kan meur kan woi woin man wa'an.

<sup>44</sup> Lo'o ik do'on au'ono ida woini, ik kauroin idewe onne inhawa au'ono. Ri ka neku ara woi lolo ruri roke raram, la ri ka neku anggur lolo au um'umu.

<sup>45</sup> Ri man wa'an, nin honorok aki wa'an, de wakunu panaeku man wa'an mamani. Ri man yaka, nin honorok aki yaka, de wakunu panaeku man yaka, ono inhawa ma namhara ik nuran, mai nano ik irhun raramne."

*Ri man lernohi Makromod  
Lalap Lirna mamani naho'ok  
naisa ri ma na'ariri nin nakar  
waku wawan*

(Mat. 7:24-27)

<sup>46</sup> "Alhi'ihepenia mi mapolu Ya'u, 'Makromod, Makromod,' maa kam hi'i lernohi inhawe Ya a'aheheni ki mie?

<sup>47</sup> Ya ala wanakunu naho'ok ida ma na'ono ri ma nauroin na'ariri nakar wawa'an noro ri ma ka

nauroin wake'e. Ri man mai Maya'u, la derne Ainu'u wanakunu de lernohie, ai onne naisa

<sup>48</sup> ri ma nauroin na'ariri nakar wawa'an. Ai na'ir onno rorom leke na'ariri nakar onne lolo waku na'a'ar ma namlolo. Ende lere oir rulu lape mai na'o'e, nakar onne ka nawollo ono waku na'a'ar naruri memen.

<sup>49</sup> Enimaa ri man derne Ainu'u wanakunu eni, la kan lernohie, ai onne naise ri ma ka nauroin na'ariri nakar wawa'an, de ka na'aririe lolo waku na'a'ar. Ende lere oir rulu lapa mai na'o'e nakar onne, pelek nadiporedi de yaka mouwedi."

## 7

*Jesus hi'i wa'an uluwakun ke'urauk nin man howok  
(Mat. 8:5-13)*

<sup>1</sup> Jesus wakuku heri onnenihe horu, An laa kota Kapernaum.

<sup>2</sup> Lolo onne Roma nin uluwakun arida aile la nina man howok ida man ai naramyaka rehi nakni'ir, na'akeki maki me'e.

<sup>3</sup> An durnedi Jesus ai lolo onne ne, an hopon Yahudi rira leleher lalap ida woro'o laa rapanak Jesus mai hi'i wa'an nin man howok eni.

<sup>4</sup> Hir mai ne, rapanak an'anchedi ra'aheni, "Papee! Ai mauroin uluwakun ke'urauk ida nin man howok nakni'ir de yon hi'i nahenia Papa raram nodi pakuwala harome, ai mapanak Papa lan hi'i wa'an ke'e ono uluwakun onne ri wawa'an,

<sup>5</sup> la ai naramyaka iknik hair de na'ariri yedi ainim kerei me'e."

<sup>6</sup> Kame'ede Jesus noro man lariyala onnenihe laa wewerre. Hi lar wakuraniyedi uluwakun ke'urauk nina nakar ne, uluwakun onne hopon nina ri orwali ida woro'o rodi ai lirna laa kukunohi Yesus na'ahenia, "Eih! Yon Pape ki nakar me'e, ono ya'u inhoi penia Pape ki ainu'u nakar.

<sup>7</sup> Ya'u eni man lolo yawa Pape, de kan wa'an ya'u laa pakromo noro Papa, maa lo'o Pape wekelle wanakunu lisir ida woro'o mehe, ainu'u ma nakni'ir wa'an edi me'e.

<sup>8</sup> Ya auroin Papa nodi molollo hi'i wa'an ai, ono ya'u me'ene man derne nakani ri ma nodi molollo maya'u, la yo odi molollo ri namehin haenhi. I hopon ainu'u ma nasala ke'urauk, 'Mala'a here!' Hi rala'a. Ya'u polu mai, hir mai. Ya'u hopon ainu'u hophopon lolo nakar hi'i haida, hir hi'ie."

<sup>9</sup> Jesus derne nina wanakunu onneni, heheledi de, ne'el heri man lernohi onnenihe na'ahenia, "Loi honorok wawa'an panaeku eniyeni! Ri ma ka namwali Yahudi eniyeni, akin naili'il kokkoo! Lolo Israel ne'en raram Ka'u pakromala noro ri ma naisa eniyeni makun."

<sup>10</sup> Onne horu, man lolo honopon onnenihe wali laa uluwakun ke'urauk onne nin nakar, la ma nakni'ir onne wa'an edi me'e.

*Jesus hi'i maeke walwalum ida anan mori wali'ur*

<sup>11</sup> Ka nalo'olala, Yesus noro Nina man lernohi pakunohi ramhara lolo onne rala'a laa leke ida naran Nain, la ri nammori lernohi Ai haenhi.

<sup>12</sup> Wakuraniyedi leke onne nin nika lape ne, hir holikuku ri man le'u maki lolo nika lape mai paharne. Man maki onne tatana mo'oni mahaku aloloi, la inne namwalumedi me'e. Ri nammori nano leke onne lernohi maeke walwalum onne.

<sup>13</sup> Makromod Yesus po'onedi maeke walwalum onneni ne, raram penuwedi ono naramyake de ne'el na'henia, "Yon mahere, ine!"

<sup>14</sup> Enime'ede An laa na'urani maki eni la tukul nin daira'e. Man le'u enihe ramririyalala Yesus na'heni, "Heih! Ma na'ikake, mamakedi!"

<sup>15</sup> Me'e'eni me'ede ma na'ikaka onne namaka, naikoredi, la wakunkunu me'e. Kame'ede Yesus ne'el nin mame, "Ine, o anum eni moriyedi wali'ur me'e de mala'a wawa'anedi!"

<sup>16</sup> Heri onnenihe ramka'uk rehi la ra'uli rasa'a Makromod Lalap ra'aheni, "Nabi lalapida maiyedi ika leken kalarna me'e! Makromod Lalap maiyedi leke paku Nin ri me'e."

<sup>17</sup> Lirna ma na'ono Yesus Nin hini'i onneni raderre radaul lolo Yudea ne'en raramne na'akeme noro leke-leke ma aile herne waliwali na'akeme.

*Yohanis hopon nin man lernohi laa ra'ukani Yesus  
(Mat. 11:2-19)*

<sup>18</sup> Yohanis nin man lernohi enihe do'odo'on Yesus haenhi, de wali mai konohi Yohanis Yesus Nin hini'i na'akeme. Ende ai napolu nin man lernohi woro'o,

<sup>19</sup> hopon hir laa ra'ukani Makromod Yesus na'ahenia, "Makromod penia man Makromod Lalap nouwedi mai noho wawan, ee am lapan ri namehin?"

<sup>20</sup> Ende ri woro'o onnenihe rakanedi Yesus ne, hi ra'ukani, "Makromod, Yohanis ma nodi oir ulutade ri hopon mayai mai ma'ukani Papa na'ahenia, 'Papeni penia man Makromod Lalap nouwedi mai noho wawan, ee am lapan ri namehin?'"

<sup>21</sup> Lere onne me'e de Yesus hi'i wa'an ri nammori ma nakni'ir noro rir apinha warna-warna. Ai nohiyedi hayakyaka nano ri raramne, la hi'i wa'an maktoko de do'on wali'ur.

<sup>22</sup> Ende Yesus walha hi na'ahenia, "Wali lam konohi Yohanis inhawe mim derne la do'onedi me'e.

'Ri man makan tokedi,  
makan mouwedi;  
ri ma ka nauroin nala'a,  
nala'ala'edi,  
ri man ulik yaka hi'ie,  
wa'anedi,  
ri man rohedi, derne  
wali'uredi,  
ri man makiyedi, mori  
wali'ur,

la Makromod Lalap Lirna  
Wawa'an Eni rodi laa  
loikaruwedii ri ma  
na'alehe naulinu me'e.

\* 7:23 Yes. 35:5-6, 61:1

23 Enla ri ma namkene akin naili'il Ya'u, ai akin nahuwa'anedi.' ”\*

24 Yohanis nin hophopon onne waliyedi ne, Yesus konohi heri onne panaeku ma na'ono Yohanis. Ai na'heni, "Minim panaeku inhawa mim laa noho mamun ma napro'uk derne Yohanis wakukue? Lo'o mim laa leke po'on ri ma akin ka namkene naisa penek larlari man anna huhue?

25 Lo'o mi raram nodi lam po'on inhawa lolo enne? Lo'o mi lam leke po'on ri man nair nainair ma'aruru harome? Ka! Ri man nair nainair ma'aruru la manin morimori karu, nadedem min rai nina nakar!

26 Ende hi'ihepenia mi raram nodi laa enne? Lo'o mi raram nodi lam po'on nabie? Namlolo kokkoo mim do'onedi nabi, maa nabi onne namwali nabi man kulu narehi nabi nadedem.

27 Nonolu eni Makromod Lalap wekel Yohanis ma namwali Nin hophopon lolo Horok Lap na'henia, 'Ya'u hopon Ainu'u ma nodi lira na'ahari kalla nolu mai leke hari kalla ki O.' ”\*

28 Yesus na'heni wali'ur, "Horhorok! Rakan lere eni, lolo noho wawan na'akeme ri kaale man kulu narehi Yohanis man ulutadeni, maa nano lere eniyeni ri na'akeme man Makromod Lalap nodi molollo, kade hi onne tana rehi, hir lernala rere'e haharu narehi ai."

29 Heri noro idewe man ra'uk paipair enihe derne Nin wanakunu ma na'ono

Yohanis onneni ne, hir kokala wawa'an Makromod Lalap Lirna, ono nonolu hi raledi kemen Yohanis ulutade.

<sup>30</sup> Enimaa ri Parisi roro meser-meser ma nauroin keneri hono'ok wawa'an ra'okuledi Makromod Lalap Nin panaeku ma na'ono hi kemen, ono hi penia ramhene rala kemen Yohanis ulutade haenhi.

<sup>31</sup> Yesus wakunu wali'ur na'ahenia, "Ya aho'ok ri mormori ku eniyeni noro inhawe? Hi raisa inhawe?

<sup>32</sup> Hi raisa tatana man ha'ar ramwali muku woro'o ma naikoro ra'aromo lolo pasar raram, la muku ida napopolu muku namehin ra'aheni, 'Ai mou poloit modi mahinara soksok murmura, maa mi mamhene moro mayai pe'uk waur. Enla ai mahinara hanara man hi'i ri nahere, maa mi mamhene mahere moro mayai!'

<sup>33</sup> Namnehe noro onne, lere Yohanis ma nodi oir ulutada mai wakuku ri, ai na'aluli kemen ka na'ak, la ka nomun arak. Enla mi mamhene kokale la ma'aheni, 'Ai onne, hayakyaka hu'uhu'ur raramne.'

<sup>34</sup> Enla Ya'u, Ri Mormori Anan mai, Ya a'ak Yo omun mamani, maa mi mamhene kokala Ya'u haenhi ma'aheni, 'Po'onala ri onne! An suk na'ak nammori, nomun manha mamani, Ai nawaur noro ri man ra'uk paipaire, la minwuku noro ri man hi'i dohohala mamani!'

<sup>35</sup> Kade mi mamhene kokala mayai, maa ik kau-

\* 7:27 Mal. 3:1

roin Makromod Lalap Nin honorok panaeku mou ono ik do'on Nin man lernohi rir morimori ma'aruru la namlolo."

*Maeke man holi yak leke yak ida mai nodi wuru wala'ula'u halle Yesus ein*

<sup>36</sup> Ler ida ri Parisi ida naran Simon lariyala Yesus mai nore na'ak. Yesus mai nin nakar de ra'ak wewerre.

<sup>37</sup> Lolo kota onne, maeke ida aile man hi'i dohohala nammori. An dederne Yesus maha na'ak aile ri Parisi onne nin nakar, de an mai nodi wuru wala'ula'u ra'akekene lolo potol rodi waku hi'ie. Wuru noro potol onne wella ai wawan wake'e.

<sup>38</sup> Maie ne, ai namriri Yesus kili'urne na'urani ein, mene awikorno nahere de makan oron napa'uk Yesus ein. Enime'ede ai nodi nina muruk soru na'akisi. Horune, an masi ein la nodi wuru wala'ula'u onne halle Yesus ein.

<sup>39</sup> Ri Parisi man lariyala Yesus eni po'onedi panaeku onneni ne, noro akin wakunu na'aheni, "Lo'o Yesus namwali nabi kokkoo, hi'ihepe Ai ka nauroin maeke man tukul Ai eni, inhoi? Ai eni maeke man hi'i dohohala nammori menee!"

<sup>40</sup> Enime'ede Yesus ne'el ai na'ahenia, "Simon, I raram nodi kukunohi panaeku ida woro'o ki o."

Simon walhe, "Kukunohi ke'e, Papa Meser."

<sup>41</sup> Yesus na'aheni, "Ri woro'o herre ri ida nin kupan de rir okon raka aile. Nano woro'ohe, ri ida nin okon raka alam rahu wolima nin

naiwe'el, la namehin eni nin okon raka alam wellima nin naiwe'el.

<sup>42</sup> Lere alam pair rir okon raka rakanedi ne, rir kupan kaale de kar paekunala paire or'okon raka onne wali'ur. Enimaa or'okon raka na'aheni, 'Na'amoli ke'e, yon paire me'e.' Ende nano woro'ohe, inhoi ma naramyaka or'okon raka onne narehi?"

<sup>43</sup> Simon walha, "Ya ahinorok manin okon raka nammori rehi eni lo'o naramyak rehi or'okon onne."

Yesus na'aheni, "Num panaeku namlolo."

<sup>44</sup> Yesus wali kemen laa po'onala maeke onne la ne'el Simon na'ahenia, "Po'onala maeke enie! Ya'u mai num nakar, ka mala oir modi wuri Ye ei'u, maa ai nodi makan oron wuri Ye ei'u la nodi nin murukne soru na'akisi.

<sup>45</sup> Idediyeni Ya'u mai num nakar, o kam masi Ya'u, maa maeke eni kan ren masi Ye ei'u.

<sup>46</sup> Ka mala wuru loile Yu uluwak'u leke horhawa Ya'u, maa maeke eni halledi wuru wola'ula'u soruwedi Ye ei'u me'e.

<sup>47</sup> Ende Ya'u konohi o, ainin raramyak man lap onne kukul nahenia an lernala ampun nin dohohala rahu onne, maa ri ma nin raramyak tarane kukul nahenia an lernala ampun tarana haenhi."

<sup>48</sup> Enime'ede Yesus na'aheni maeke onne na'ahenia, "Inai, num dohohala Ya a'ohu ahaledi me'e."

<sup>49</sup> Ri ma noro Yesus ra'ak wewerre onnnihe ida ma ne'el ida na'ahenia, "Ri eni

inholo penia Nin molollo aile na'ohu nahala ri nin dohohala?"

<sup>50</sup> Kame'ede Yesus ne'el maeke onne na'ahenia, "O akim naili'il Ya'u de Makromod Lalap na'ohu nahaledi o nano num dohohala nin molollo me'e. Mala'a wawa'anedi!"

## 8

### *Maeke wo'iraha man lernohi ilitolle Yesus*

<sup>1</sup> Ka nalo'ol ne Yesus lan kuli leke-leke noro kota-kota loikaru Lira Wawa'an konohi hi'ihehewi Makromod Lalap nodi molollo ri mormori. Enla man lernohi pakunohi idaweli woro'o enihe roro Yesus laa wewerre,

<sup>2</sup> noro idewe maeke wo'irha man Yesus hi'i wa'anedi nano rir apinha me'e me nohiyedi hayakyaka nano raramne. Maeke man lernohi Yesus mamani onnenihe: Maria ma nadedem rapolu Magdalena man Yesus huriyedi nano hayakyaka wo'ikku man minle raramne,

<sup>3</sup> Yohana (Khusa hono), Susana noro maeke nammori namehin. (Khusa onne namwali uluwakun ri man howok lolo rai Herodes nin nakar.) Maeke onnenihe na'akeme lernohi Yesus, la rodi rir kupan aimehi ilitolle Ai noro Nin man lernohi pakunohi enihe.

<sup>4</sup> Nadedem ri nammori nano leke-leke mai rawaur noro Yesus, de ler ida Yesus wanakunu nodi wanakunu naho'ok ida na'ahenia,

<sup>5</sup> "Man howok kirna ida nodi wini hawono lan wahair kirna. An wahair ne,

wini heruwali nadiyaur kalla wawan de rin hihir hamar la manu liwliwar mai ra'an mouwedi.

<sup>6</sup> Heruwali nadiyaur elimo'o wakwaku, de moriyedi, maa pelek namlau ono elimo'o napro'ukedi me'e.

<sup>7</sup> Wini namehin nadiyaur ruri roke raram, de mori, maa ruri roke eren lolode de elewesnedi.

<sup>8</sup> Enimaa, wini heruwali nadiyaur laa elimo'o man meur, de mori wawa'anedi rakan ihin ennen rewen rahu." An loikaru panaeku onne horu, wakau na'ahenia, "Lo'o mi kilinum aile, makaniyala wawa'an!"

*Jesus na'amou na'aropedi  
Nin wanakunu naho'ok Nin  
man lernohi pakunohi enihe  
(Mat. 13:10-23; Mrk. 4:10-  
20)*

<sup>9</sup> Nin man lernohi pakunohi enihe ra'ukani Ai wanakunu naho'ok onne nin panaeku inhawa.

<sup>10</sup> Ende An walhe na'ahenia, "Makromod Lalap nala woroin mi leke mauroin hi'ihehewi Ai nodi molollo ri mormori. Enimaa Ya'u nair wanakunu naho'ok eniyeni wakuku ri ma akin ka naili'il leke,

'Hir do'odo'one, maa ka rauroin inhawa hir dodo'on;  
hir derderne, maa ka rauroin panaeku ida.' \*

<sup>11</sup> Wanakunu naho'ok idedi eni nin panaeku hi'i heheni: Wini hawono onne Makromod Lalap Lirna Wawan.

\* **8:10** Yes. 6:9-10

<sup>12</sup> Wini ma nadiyaur kalla wawan onne, naisa ri man dernedi Makromod Lalap Lirna me'e, maa Hayakyak Makromon mai nala wali'ur nano akinhe leke yon akin naili'il la yon hi rahinuri nano rir dohohala nin molollo.

<sup>13</sup> Wini ma nadiyaur lolo elimo'o wakwaku onne, naisa ri man dernedi Lir Wawa'an eni, la kokale noro wawa'an, maa ka na'a'ar akinhe. Onne penia lere Hayakyak Makromon mai ken patal, hir waliyedi kili'urne.

<sup>14</sup> Wini ma nadiyaur lolo ruri roko raram onne, naisa ri man dernedi Lirna Wawan me'e, maa hir ma'irhu rira morimori lolo noho wawan eni, la ranoin noho wawan eni nin linikir kanaru noro nin soksok murmura mamani. Onne penia hi kar kokala Makromod Lalap Lirna wawa'an, de hi raisa wini ma kan woi wawa'an.

<sup>15</sup> Enimaa wini ma nadiyaur lolo elimo'o ihi man meur na'ono ri man derne Makromod Lalap Lirna, la rasale rodi aki ma namdudu la man mou. Rir hini'i wenewhe man wa'an onne nodi kunukunohi nahenia hi ramkene lernohi Makromod Lirna mamani."

*Derne makani Makromod Lirna wawa'an leke mauroin panaeku ma namlolo*

(Mrk. 4:21-25)

<sup>16</sup> "Ri kan lokon wadu moriyedi nanumene nodi e'enoir honowale, ka eni nale loiyedi leu lehern, maa ai nala loile wadu onno man kulu leke ri na'akeme man

mai nakar raram do'on nin roprope. <sup>17</sup> Makromod Lalap Lirna namwali ropropo, de ik kauroin nahenia ha wo'ira na'akeme man suwsuwar na'amoli rin do'on rauroinedi, la panaeku ma kan mou makun na'amoli ralhari mouwedi.

<sup>18</sup> Onne penia Ya a'aheni madiyaka wawa'an hi'ihewi mim loi honorok Makromod Lalap Lirna Wawan, ono ri man kokala Ai Lirna wawa'an, eren rauroroin, maa ri ma kan kokala Makromod Lalap Lirna Wawan, rir woroin ma aile, raledi me'e."

*Ri man derne Makromod Lalap Lirna la hi'i wewhe, ramwali Yesus Nin mame noro walinhē*

(Mat. 12:46-50; Mrk. 3:31-35)

<sup>19</sup> Ler ida nine Yesus inna noro mo'oniwalinhe mai leke rore pakromala, maa kar paekunale wakurani Ai ono ri namansa rehi.

<sup>20</sup> Rin laa kukunohi Ai na'ahenia, "Papa Meser, Num mame noro mo'oniwallumhe aile paharne. Hi raram nodi roro Papa pakromala."

<sup>21</sup> An walhale na'ahenia, "Inhoi man derne Makromod Lalap Lirna Wawan la hi'i wewhe, ai onne Ainu'u mame noro I mo'oniwal'u."

*Yesus na'alina kahi anna lapa*

(Mat. 8:23-27; Mrk. 4:35-41)

<sup>22</sup> Ler ida wali'ur Yesus ne'el Nin man lernohi pakunohi enihe, "Mai, ik ha'a korkore hopol laa oir lape wali." Kame'ede hir ha'a

korkore wawan ne, hopol me'e.

<sup>23</sup> Hir rakanedi heleken ne, Yesus namkukuru me'e. Ramlilinnohi kahi anna lapa mai nalwalile korkore de naheri nawali, la wo'o ha'a na'enu korkoro me'e de na'ikeki keper me'e.

<sup>24</sup> Enime'ede man ler-nohi pakunohi laa ramake, ra'heni, "Makromueee! Peleke mamaka! Pakuwala yai nanu, kalo'o ik maki me'e!"

Yesus namriri komdere kahi anna lapa na'henia, "Heih! Kahi anna lapa, mamlinedi here!" Idewe kahi anna lapa onne namlina namkaiyedi.

<sup>25</sup> Horu ne, ne'el hi, "Alhi'ihepe mi akim ka naili'il Maya'ue?"

Hi na'akeme polletilu la ramka'uk rehi, la ida ma na'ukani ida na'henia, "Leher eni inhoi, penia Ai nodi molollo komdere kahi anna lapa heheni?"

*Minle Gerasa Yesus nohi hayakyaka nano ri ida raramne*

(Mat. 8:28-34; Mrk. 5:1-20)

<sup>26</sup> Yesus noro Nin man lernohi pakunohi enihe hopol mamani rakan manin Gerasa nin nohe ma aile oir lap Galilea wali kimur karanna.

<sup>27</sup> Yesus kopuredi laa herre raram ne, mo'oni ida nano leke onne mai pakromo noro Ai. Mo'oni onne, hayakyaka huhu'ur raram nalo'oledi me'e, de kan nair nainair la kan minle nin nakar, maa

nadedem holi ku'il-ku'il ma namwali makileke.

<sup>28</sup> An do'onedi Yesus ne, an wakau nanumene nahi-nonowedi Yesus kalarna la wakau naruri na'henia, "Yesus, Makromod Lalap Ma Narehi Ma Nalewen Anan O! Num panaeku inhawa noro maya'u? Ya apanak yon hukuma'u."

<sup>29</sup> An wakunu heheni ono Yesus hoponedi hayakyaka man huhu'ur raramne namharedi. Kade ri name-hin rodi rantan dasledi la radiyaka mo'oni onne mamani, maa lere romromo hayakyak onne nale ke'eke'el an'anha noro rurilai leke we'eredi rantan onne, la rakerne ai lari laa noho mamun.

<sup>30</sup> Kame'ede Yesus na'ukaniyale, "O naram inhoi?"

An walhe na'henia, "I naran 'Legiun' (napa'ahne, 'riwriwan rahrahu')," ono hayakyaka nammori hu'uhu'ur raramne.

<sup>31</sup> Hayakyaka onnenihe rapapanak an'anchedi Yesus leke yono hopon hi laa Lo'o Lalap man roromne kar ho'oknale.

<sup>32</sup> Lere onne wawi ukun lap aile wo'or leren kan ko'uwala maha ranoin ya'ane. Hayakyaka onnenihe rapapanak Yesus hurinohi hi laa hu'urle wawi onnenihe raramne. Kame'ede Yesus hurinohi.

<sup>33</sup> Ende hayakyak onnenihe ramharedi ri onne lar hu'urle wawi onnenihe raram. Ideweni ne, wawi ukun onne lari laa wauwedi werne oir lap Galilea raram, de maki mouwedi.

<sup>34</sup> Man wa'an wawi onnenihe do'onedi inhawa ma namwali onneni ne, hir lari-wewer leke-leke lolo onne rakan kote raram raderre radaul Yesus Nin hini'i enilaar ri na'akeme.

<sup>35</sup> Ende ri nammori mai leke meher po'on inhawa ma namwaliyedi eni. Rakanedi ne, hir do'on mo'oni man idedi hayakyaka huhu'ur raramne, naikokoro aile Yesus kalarna. An nairedi nainair la ka na'iseri me'e, de heri onne ramka'uk rehi.

<sup>36</sup> Enla ri man do'odo'on panaeku ma namwali onne kukunohi heri onne hi'ihehewi Yesus hi'i wa'an ri man hayakyak huhu'ur raram onne.

<sup>37</sup> Kame'ede manina Gerasa na'akeme laa rapanak Yesus pelek namhara lolo onne ono ramka'uk rehi. Ende Yesus ha'a laa korkoro wawan la hopol wali'ur.

<sup>38</sup> Kan hopol makun, ri man idedi hayakyaka huhu'ur raram onne laa napanak lernohi Yesus, maa kan hurinohie la hopon na'ahenia,

<sup>39</sup> "Wali laa num nakar here. Rakanedi ne, kukunohi ha wo'ire man Makromod Lalap hi'iyedi ki o me'eni."

Enime'ede ri onne lali-wewer nin leke raram konohi inhawe man Yesus hi'i namwaliyedi ai kemen me'eni.

*Yesus na'amori Yairus  
anan la hi'i wa'an maeke man  
rare wuae*

(Mat. 9:18-26; Mrk. 5:21-43)

<sup>40</sup> Yesus waliyedi nano oir lapa wali ne, ri nammori kokale noro wawa'an ono mahar lalapan Ai.

<sup>41</sup> Enime'ede uluwakun Yahudi rir kerei ida ma naran Yairus mai rawa Yesus kalarna napanak an'anhed leke An mai nin nakar,

<sup>42</sup> ono anan maeke mahaku, nakni'ir de na'akeki maki me'e. Anan onne nin anna idaweli woro'o.

Yesus kan rakan nin nakar makun ne, ri nammori lernohi la lupurale rasese wake'e lolo kalla.

<sup>43</sup> Lere onne maeke ida aile man lernohi haenhi, la nina apinha rare wau anna idaweli woro'o me'e. [Kade ai na'oluwedni nin hahaa wo'ire nodi pair ma na'notin enihe],\* maa ri mahaku kan paekunala hi'i wa'an ai.

<sup>44</sup> An paeku nahenia lo'o an tukulala Yesus Nin rain mehe, nin apinhe wa'anedi. Ende an laa na'urani Yesus lolo kili'urne, tukulala Nin rain nanaru ki'il. Me'e'eni me'ede nina rara wauwau onne nekedi de wa'anedi me'e.

<sup>45</sup> Yesus na'ukani, "Inhoi man tukulA'u?"

Ri mahaku ka na'aheni hir tukulale de Petrus na'ahenia, "Papa Meser, ri nammori sese Pape meneel!"

<sup>46</sup> Yesus na'aheni, "Maa ri ida tukuledi Ya'u me'e ono Ya auroroin ke'eke'el an'anha heruwali namharedi I kem'u me'e."

<sup>47</sup> Maeke onne nauroin nin hini'i onne kan suwarala de nodi kemen ma narururu

\* **8:43** Horok man aile lolo tanada [ ] raram, kaale lolo horok Yunani dedesne heruwali.

mai nalwali yawa Yesus kalarna. Lolo heri onne kalarna an konohi hi'iheheni an tukul Yesus, la hi'ihehewi nin kini'ir onne idewe wa'anedi me'e.

<sup>48</sup> Horu ne, Yesus na'aheni, "Mame, o akin naili'il Maya'u, de onuma appinha wa'anedi me'e, mala'a wawa'anedi."

<sup>49</sup> Yesus wakunkunu ne, Yairus ma namwali uluwakun kerei onne nina hophopon wahwahan ida mai konohi Yairus na'ahenia, "Pape, tatana maekane aran horuwedi me'e, de yono ma'o'o Pap Meser me'e."

<sup>50</sup> Dernedi onne, Yesus konohi Yairus na'ahenia, "Yono mamka'uk, maa akim naili'il Maya'u mehe, la o anum wa'an wali'ur."

<sup>51</sup> Hir rakanedi Yairus nin nakar ne, Yesus namhene ri noro Ai laa romleher, naukara Petrus, Yohanis, Yakobus, noro tatana inna aman mehe rore laa raram.

<sup>52</sup> Heri na'akeme raherhere kanihi tatana onne, maa Yesus hopon na'ahenia, "Yon mahere! Ai kan maki, maa namkuru mehe."

<sup>53</sup> Enimaa heri ralau Ai ono rauroin nahenia tatane makiyedi me'e.

<sup>54</sup> Kame'ede Yesus nasala tatana onne liman na'aheni, "Inaiye, mamakedi!"

<sup>55</sup> Tatana aran wali wali'ur la me'e'eni me'ede namaka namririyedi. Enime'ede Yesus hopon hi rala hanana'an ai na'an.

<sup>56</sup> Inna aman hehel rehi, maa Yesus hopon hi yon kukunohi ha ma namwali eni ri namehin.

## 9

*Yesus hopon Nin ri idaweli  
woro'o enihe laa loikaru  
Makromod Lalap Lirna  
Wawa'an*

(Mat. 10:5-15; Mrk. 6:7-13)

<sup>1</sup> Yesus poluwedi Nin man lernohi pakunohi idaweli woro'o maiwuku ne, Ai nala ke'ke'el an'anha noro molollo hi leke rohi hayakyaka nano ri raram la hi'i wa'an kini'ir warnawarna.

<sup>2</sup> An hopon hi laa loikaru lirna man konohi hi'ihehewi Makromod Lalap nodi molollo ri mormori la hi'i wa'an ma nakni'ir.

<sup>3</sup> An nou hi na'ahenia, "Mala'a, maa yono modi haida-haida me'e. Yon modi au ke'ke'en, oir wa'alehere, kupan, rou soke, me nainair herherre.

<sup>4</sup> Lo'o mim laa nakar ida haromo, mamkene lolo onne hehen nanumene mamhara leke onne.

<sup>5</sup> Enla lo'o leke ida kar kokala mi, mamharedi leke onne. Mamharedi leke onneni ne, disnedi elimo'o hapu man aile mi eium raram, leke namwali tanada nahenia mi ka modi yodiwara ida ono leke onne raramne kar kokala mi."

<sup>6</sup> Yesus nounaku hi horu, hi rala'a laliwewer leke-leke raderre radaul Makromod Lalap Lirna Wawa'an eni la hi'i wa'an ma nakni'ir lolo ewi-ewi.

*Herodes ka nauroin Yesus  
onne inhoi*

(Mat. 14:1-12; Mrk. 6:14-29)

<sup>7</sup> Lere onne rai Herodes nodi molollo Galilea. An

dederne Yesus Nin hini'i na'akeme onneni ne, mehe kakaiyedi ono ri heruwali ra'aheni, "Yohanis ma nodi oir ulutade ri, mori wali'uredi me'e."

<sup>8</sup> Heruwali ra'aheni, "Elia hariyedi ho'o me'e," la ri namehin ra'aheni, "Ai onne namwali nabi ida nano nabi nonolu enihe man mori wali'uredi me'e."

<sup>9</sup> Herodes na'aheni, "Yohanis eni, ya'u pekuwedi uluwakun me'e, de ri man ya'u derderne eni inhoi penia hi'i panaeku rahu man lewlewen enie?" Onne penia nahehe leke noro Yesus pakromo.

*Yesus nala hanana'an ri riwan wolima rehi ra'an  
(Mat. 14:13-21; Mrk. 6:30-44; Yoh. 6:1-14)*

<sup>10</sup> Rakanedi lere Yesus Nin hophopon ma nodi Makromod Lalap Lirna enihe wali mai ne, hir kukunohi Yesus inhawa hir hi'iyedi me'eni. Horu ne, Yesus noro hi laa onnida man ri ka nadedem minle na'uranrani leke ida naran Betsaida.

<sup>11</sup> Enimaa ri nammori dederne rauroiroin rira lalaa eni de lar lernohi Yesus. Hir rakanedi Yesus ne, An kokala hi la wakuku hi panaeku ma na'ono hi'ihehewi Makromod Lalap nodi molollo ri mormori. Enla An hi'i wa'an ma nakni'ir haenhi.

<sup>12</sup> Na'ikeki lere helem me'e, man lernohi pakunohi idaweli woro'o enihe mai Yesus ra'aheni, "Pape, mai eni noho mamun la nako'uwedi leke-leke, de hopon heri eni rala'a ranoin hanana'an noro onno

ramkuru lolo leke-leke noro awak-awak ma aile waliwali eni."

<sup>13</sup> Maa Yesus na'ahenia, "Mi mehe mala hanana'an hi ra'an."

Hir walhe, "Ainima roti kem wolima noro i'in kem woro'o mehe. Lo'o Onum panaeku am laa weli hanana'an noknokor heri rahu eni ra'ane?"

<sup>14</sup> Lere onne aki mo'oni mehe ri riwan wolima.

Enime'ede Yesus ne'el hi na'ahenia, "Hopon hi raikoro hi'i lopun-lopun, lopun ida lo'o muku ri wellima."

<sup>15</sup> Enime'ede hir lernohi Yesus Nin honopon.

<sup>16</sup> Heri onnenihe raikoredi ne, Ai nala roti kem wolima noro i'in kem woro'o onne, niliha'a laa wawan mene napanak trimkasi Makromod Lalap. Onne horu, An a'un roti la uku i'in onne nala kanile Nin man lernohi pakunohi enihe leke ha'ar heri ra'an.

<sup>17</sup> Ende heri na'akeme ra'an hehen nanumene perhur mouwedi. Horu ne, man lernohi pakunohi ra'ukwuku hanana'an ma narehi onne lunu idaweli woro'o.

*Petrus na'aheni Yesus namwali Kristus man Makromod Lalap kikan namwali Rai*

*(Mat. 16:13-19, 21-28;  
Mrk. 8:27-29; 8:31-9:1)*

<sup>18</sup> Lerida Yesus noro Nin man lernohi pakunohi memehedi lolo onnida, la Yesus mahan hi'i lir napanak. Horu ne, Ai na'ukanihe na'ahenia, "Heri ra'aheni Ya'u eni inhoi?"

<sup>19</sup> Hir walha na'ahenia, "Heruwali ra'aheni Yohanis ma nodi oir ulutada ri,

heruwali ra'aheni Elia, la heruwali ra'aheni nabi ida nano nonolu eni man mori wali'uredi me'e."

<sup>20</sup> Ai na'ukani hi wali'ur na'ahenia, "Emene lernohi minim panaeku, Ya'u eni inhoi?"

Petrus walhe na'ahenia, "Papa penia Kristus man Makromod Lalap kikan namwali Rai laa ewi-ewi."

<sup>21</sup> Kame'ede Yesus nou an'anchedi hi na'ahenia, "Onne namlolo, maa yom konohi ri Ya'u eni inhoi!"

<sup>22</sup> Horhorok! Ya'u ma namwali Ri Mormori Anan, na'amoli lernala wewerek pananaka rahu, la Yahudi rir leleher lalapa, imam, roro meser Horok Lap enihe kar kokala Ya'u, de resne Ya'u. Enimaa rakan lere wokelu Ya'u mori wali'ur."

<sup>23</sup> Onne horu, Yesus na'aheni ri na'akeme lolo onne na'ahenia, "Ri man raram nodi lernohi Ya'u, yon nodi nina raram nodi aimehi, maa na'uwhara nina au kekiyowok akilere, la lernohi Ya'u.\*

<sup>24</sup> Ya a'aheni eniyeni ono inhoi namka'uk ihin kemen maki de namhene huri nin morimori lolo noho wawan eni, ai onne kan lernala or'ori dardari ma namlolo. Maa ri man huriyedi nin morimori lolo noho wawan eni leke lernohi Ya'u, ai onne lernala or'ori dardari ma namlolo ma kan horu.

<sup>25</sup> Lo'o ri ida manarna noho wawan nin ha wo'ira na'akeme, maa kan lernala or'ori dardari ma kan horu,

nin panaeku onne kan min haida.

<sup>26</sup> Inhoi nawawa konohi ri namehin na'ahenia, 'Ya'u lernohi Yesus noro Nina wanakuku eni,' lere Ya'u ma namwali Ri Mormori Anan wali wali'ur mai noho wawan eni, Ya awawa ai haenhi. Lere onne Yo odi Ainu'u ke'eke'el an'anhe noro Ya Am'u Nine ke'eke'el an'anha ma narehi nalewen, la Yo oro Hophopon a'am raram man moumou dewdewe enihe kopur mai noho wawan.

<sup>27</sup> Horhorok Ainu'u nou ma na'ono eniyeni: Mi ri man min lolo eni heruwali kam maki makun, mim do'on mauroin hi'ihehewi Makromod Lalap nodi molollo mai noho wawan eni."

*Jesus ra'akulu ra'alapedi lolo wo'or tilu*  
(Mat. 17:1-8; Mrk. 9:2-8)

<sup>28</sup> Ai nala wanakuku eni horu ne, lo'o domeku ida wali'ur Yesus naka'uk Petrus, Yohanis, noro Yakobus wakiha'a wo'or ida leke hi'i lir napanak.

<sup>29</sup> Rakanedi wo'or tilu ne, Yesus mahan hi'i lir napanak, oin makan namehiyedi la Nina nainaire nahinerredi namwali wawarhe la siksika naise noho lerlere.

<sup>30</sup> Ramlilinnohi ri woro'o aile roro Ai wakunkunu. Ri woro'o onne Musa noro Elia.

<sup>31</sup> Hir mai ralhari kemen lolo siksika lerlere man mai nano a'am raram la wakunkunu Yesus Nin makmaki ma ka nalo'ol me'e namwali lolo kota Jerusalem eni.

\* <sup>9:23</sup> Wanakunu 'na'uwhara nin au kekiyowok la lernohi Ya'u' napa'ahne, 'namkene lernala apinpinha la maki leke lernohi Ya'u.'

32 Mahan wakunkunu ne, Petrus noro nin kalla wali enihe ramkukuru, maa ramaka de po'on Jesus Nin siksika lerlere man ma'aruru wake'e la mahanoro ri woro'o wakunkunu.

33 Ri woro'o enihe na'ikeki rala'a ne, Petrus ne'el Jesus, "Papa Meser, wa'an rehi ik min mai eni me'e, de lo'o wa'an rehi ai ma'ariri heuheu wokelu lolo eni: ida Papa Meser Nine, ida Musa nine, la ida Elia nine." Maa Petrus wakunu mehe, ono ai ka nauroin ha ma namwali onne inhawa.

34 Mahanoro wakunu ne, kakam ida mai pupinalahe de ramka'uk rehi.

35 Hir derne lirida nano kakam raram na'aheni, "E'eni Ya An'u, Ya'u mehe nili!<sup>†</sup> Derne makani Ai."

36 Dernedi lira onne horu, hir po'on Jesus memehedi me'e. Lere onne man lernohi pakunohi onnenihe suwarala panaeku ma namwali onne de kar konohi ri namehin.

*Jesus hi'i wa'an tatana man hayakyaka huhu'urle raramne*

(Mat. 17:14-18; Mrk. 9:14-27)

37 Rakan oreki, hir kopuredi nano wo'or ne, ri nammori aile mahar lalapan pakromo noro Jesus.

38 Lolo heri onnenihe, ri ida aile wakaukau na'ahenia, "Papa Meser, ya apanak ke'e de mam pakuwala ya an'u ke'e ono ya an'u mahaku mehe!"

39 Lere romromo hayakyaka hu'uredile raramne ne, an wakau naruri, kemen narururu, la aparde nawurwuri. Nalo'ol mene hayakyak onne namhare la nin panaeku nano'onyaka ainu'u tatane!

40 Ya apanakedi Papa Nina man lernohi pakunohi enihe rohi hayakyaka man aile raramne, maa kar paekunala rohie."

41 Enine Jesus walha na'ahenia, "Hoih, mi ri ku eniyeni! Mi kam derne makani la mi akim ka naili'il kokkoo. Yo oro mi nalo'oledi me'e, maa mi akim ka naili'il Ya'u wawa'an makun! Rakan ma'anana ho'o Ya'u kerhu oro mi mene mi akim naili'il kokkoe? Modi num tataneni mai."

42 Hi roro tatana onne mai ne, hayakyaka walikore laa elimo'o wawan la kemen narururu, maa Jesus dadiyale na'ahenia, "Heih! Hayakyak o, mamhareti tatane here!" Me'e'eni me'ede hayakyak onne namharedie la tatana onne wa'anedi. Horu ne, Jesus nala kanile aman wali'ur.

43 Heri onnenihe po'onedi Makromod Lalap Nina ke'eke'el an'anhe me'e de hir polletilu.

Hir mahar polletilu Jesus Nin hini'i onne, Ai ne'el Nin man lernohi pakunohi enihe na'ahenia,

44 "Loi honorok wawa'an Ainu'u wanakunu eniyeni: Ka nalo'ol me'e ri na'olu Ya'u ma namwali Ri Mormori

<sup>†</sup> 9:35 Wanakunu lirna ma na'aheni 'mehe nili' onne nin panaeku Makromod Lalap kikan Jesus namwali Rai laa ewi-ewi (Kristus).

Ananne kanile ri mormori liman raram."

<sup>45</sup> Enimaa hi ka rau-roinnala Nina wanakunu onneni nin panaeku ono nasisinuwari hi. Enla hi ramka'uk de ka ra'ukani Ai panaeku onne me'e.

*Inhoi man kulu narehi*  
(Mat. 17:22-23; Mrk. 9:30-32)

<sup>46</sup> Yesus Nin man lernohi pakunohi enihe ida ma nasesi noro ida panaeku ma na'ono inhoi man kulu narehi.

<sup>47</sup> Yesus nauroiroin rir honorok panaeku de napapanak tatana tutusiyaniada mai namriri herne.

<sup>48</sup> Ai ne'el hi na'ahenia, "Inhoi kokala tatana ma naise eniyeni ono an lernohi Ya'u, an kokaledi Ya'u me'e haenhi. Enla inhoi kokala Ya'u, an kokaledi Makromod Lalap man hopon Ya'u mai haenhi. Onne namlolo ono man tana narehi, penia namwali man lap narehi."

*Ri ma ka namwali Yesus  
Nin man lernohi pakunohi  
nohi hayakyaka*

(Mrk. 9:38-40)

<sup>49</sup> Horu ne, Yohanis konohi Yesus na'ahenia, "Makrom'u, am do'on ri ida nohi hayakyaka nodi Papa naran, maa am kawale ono ri onne iknik ri, ka."

<sup>50</sup> Maa Yesus na'aheni, "Yon mim kawale ono inhoi kan ewek kawala mi, onneni minim mukue."

*Samaria nin leke ida  
ramhene kokala Yesus*

<sup>51</sup> Na'ikeki rakan lere alam Yesus nakinikan laa a'am raram Ai mehe nala kenekrohu nala'a laa Yerusalem la namhene wake'e haida kawala Nin kenekrohu onne.

<sup>52</sup> Hi rala'a ne, An hopon Nin ri heruwali rolu laa lekida lolo Samaria leke ra'akenedi mene An rakan lolo onne.

<sup>53</sup> Enimaa manin leke onne dernedi Ainin panaeku laa Yerusalem<sup>‡</sup> de ramhene kokale.

<sup>54</sup> Man lernohi pakunohi woro'o, Yakobus noro Yohannis, do'on rauroin onneni ne, hir ra'ukani, "Makromod, lo'o Pape raram nodi ai mapanak aiye nano a'am mai harnedi ri eniyenihe?"

<sup>55</sup> Enimaa Yesus po'onalehe la dadiyala hi.

<sup>56</sup> Onne horu, hi rala'a laa leke namehin.

*Ri man raram nodi lernohi  
Yesus*  
(Mat. 8:19-22)

<sup>57</sup> Hi rala'ala'a ne, ri ida ne'el Yesus na'ahenia, "Pape, ya'u raram nodi lernohi Papa laa ewi-ewi!"

<sup>58</sup> Yesus na'aheni, "La'u nina ku'il aile, manu liwliwar nina wonno aile, maa Ya'u, Ri Mormori Anane, Ya a'alehe nakar leke ren warnala."

<sup>59</sup> Kame'ede Ai ne'el ri ida wali'ur na'ahenia, "Lernohi Ya'u."

Maa ri onne na'aheni, "Makrom'u, mala leken ya'u ke'e de waliyala laa nakar karuwedi ainu'u papa nanumene i wali mai lernohi Papa wali'ur."

<sup>‡</sup> 9:53 Manin Samaria rauroin Samaria onne onno ma na'ono wake'e rodi hoikani Makromod Lalap, Yerusalem ka.

<sup>60</sup> Enimaa Yesus na'heni, "Na'amoli ri man maki meher karu rira makie! Lam wakuku ri hi'ihehewi Makromod Lalap nodi molollo Nin ri!"

<sup>61</sup> Ri namehin na'heni wali'ur, "Makrom'u, i raram nodi lernohi Makrom'u, maa malala leken maya'u la'u konohiyala ainu'u nakar raram nanu."

<sup>62</sup> Maa Yesus na'heni, "Ri ma namkene howok kirna yon hurinohi panaeku namehin kawale. Onne namnenehe noro ri man ilitolle Makromod Lalap Nin honowok la raram nodi Makromod Lalap namwali nin Rai. Lo'o ai nahinorok nin ri leleher me nin linikir kanaru mehe, ai ka namkene lernohi Makromod Lalap de nin honowok ka namlolo."

## 10

*Yesus nili ri weli'ikku leke laa konohi ri hi'ihehewi Makromod nodi molollo ri*

<sup>1</sup> Horu ne, Makromod nili ri weli'ikku\* nano ri man lernohi Ai, la hopon hi roluwedi Ai laa leke-leke noro onno na'akeme man An paeku lalaa enihe. Rira lalaeni nakakar ri wororo'o lolo kalla ida.

<sup>2</sup> Ai ne'el hi na'henia, "Noho ihih ennen nammori, maa ma na'ilii nadai tarana mehe. Ende kapanak Orkirenni, Makromod Lalap, leke nala man howok mai na'ilii nadai Nina kirna raram.

<sup>3</sup> Mala'a here, maa horhorok! Ya'u hopon mim laa mamkene noro ri man ailanna, de mi maise

pipdumana man minwuku noro ahu merwui.

<sup>4</sup> Mim laa, yon modi rakuraku kupan, rousoke, me pakpak ei leke herre, la yon moro ri wakunu nalo'ol lolo kalla wawan.

<sup>5</sup> Mim laa ri nina nakar ma'heni, 'Moiliwi mahuwele mai nakar raram eniyeni.'

<sup>6</sup> Lo'o man minle nakar onne kokala mi noro wawa'an, hir lernala moiliwi mahuwele man mi mamala onne, maa lo'o kar kokala mi wawa'an, hi kar lernala moiliwi mahuwele onne.

<sup>7</sup> Lo'o rin kokala mi minle nin nakar, mo'on momun inhawa hi rarala ki mi, ono wa'an rehi ri man howok kokala mahmaha awenne ihih ennen nano rir honowok onne. Enla mamkene lolo nakar onne, yom laa nakar namehin.

<sup>8</sup> Lo'o mim rakan leke ida, la leke onne ne'en raramne kokala mi, mo'on momun inhawa hi rarala ki mi!

<sup>9</sup> Hi'i wa'an ma nakni'ir lolo leke onne la konohi leke raramne na'henia, 'Lere alam Makromod Lalap nodi molollo ri mormori na'uraniyedi me'e.'

<sup>10</sup> Enimaa lo'o mim rakan lekida, la leke raramne kar kokala mi, mala'a lolo leke onne nin kalla lape ma'heni,

<sup>11</sup> 'Heih! Am disnedi leke eni nina elim'o hapu ma aile ai eum raram lolo mi kalarum leke na'ori honorok mi na'henia mi ma'okuledi mayai. Maa yon hamlinu! Lere alam Makromod Lalap nodi molollo ri mormori

\* **10:1** Horok Lap dedesne heruwali ra'heni weli'ikku woro'o.

na'uraniyedi me'e.'

<sup>12</sup> Horhorok! Rakan lere alam Makromod Lalap hukum ri na'akeme, manin leke onne lernala hunukum man werek narehi nano manin kota Sodom nonolu eni."

*Kota-kota ma kan derne rakani lernala hunukum man werek*

(Mat. 11:20-24)

<sup>13</sup> "Mi manin Korazim noro Betsaida, mim mayo'o wake'e. Ya'u hi'iyedi tanada nammori ri kan dodo'onnala makun mi herne kalarna, maa mi kam herre minim morimori ma ka namloleni, mai derne makani Makromod Lalap Nin panaeku. Lo'o Ya'u hi'i tanada rahu onne lolo ri manin kota Tirus noro Sidon, ri ma ka namwali Yahudi enihe, hir nairedi homnono yak, loiyedi apu hi uluwakun leke namwali tanada hir herredi rira morimori ma ka namlolo me'e, la derne rakani Makromod Lalap Nin panaeku me'e.

<sup>14</sup> Horhorok! Rakan lere alam Makromod Lalap naho'ok nakail ri na'akeme, ri manina kota Tirus noro Sidon rira hunukum namrana narehi mi!

<sup>15</sup> Mi manin Kapernaum, mi mauroin lo'o ra'uli rasa'a mi lolo a'am raram? Ka! Makromod Lalap sopol mi laa kawali pire ai porom raram."

<sup>16</sup> Enime'ede Jesus konohi Nin man lernohi enihe na'ahenia, "Inhoi man derne nakani mi, an derne nakani Maya'u, la inhoi ma na'okul mi, na'okuledi Maya'u. Enla

ri ma na'okul Ya'u onne, na'okuledi Makromod Lalap man hopon Ya'u mai eni."

*Ri weli'ikku man Yesus hopon laa onnenihe wali mai*

<sup>17</sup> Kame'ede man lernohi weli'ikku onnenihe lar lernohi Yesus Nin honopon, la wali mai rodi aki ma nahuwa'an rehi la ra'aheni, "Makromodee! Am lae ne, hayakyaka me'ene derne rakani mayai ono ai modi O Oin Naranne!"

<sup>18</sup> Yesus na'aheni, "Ya'u do'onedi Hayakyak Makromon nadiyaur nano a'am raram laa yawa naise noho lerlere.

<sup>19</sup> Ya aledi molollo ki mi leke hamarala haimoke noro sayorne, la rehiyedi minim arwali nin ke'ek'e'l an'anhe haenhi. Haida kan hi'i apinha mi.

<sup>20</sup> Enimaan yono sokmura ono mi modi molollo hayakyaka enihe, maa wa'an rehi sokmura ono mi naramne horokedi aile a'am raram me'e."

*Jesus na'uli nasa'a Makromod Lalap*

(Mat. 11:25-27, 13:16-17)

<sup>21</sup> Me'e'eni me'ede Roh Kudus nodi molollo Yesus penaia Ai akin nahuwa'an rehi de kikan lirna laa Makromod Lalap na'aheni, "Ya Am'u, ma nodi molollo a'am noro noho wawan na'akeme, Ya apanak trimkasi nammori ono Om kukul ha wo'ira ri ma nin woroin kan kuku kan nokor, maa Om suwarala ha wo'ira nano orworoin roro ma nauroin ha wo'ira lolo noho wawan enihe. Pape, num hini'i onne nahuwa'an O akim."

<sup>22</sup> An hi'i lir napanak horu ne, Yesus na'aheni heri wali'ur, "Ha wo'ire na'akeme Ya Am'u naledi Ya'u me'e. Ya Am'u mehe nauroin Ya'u ma namwali Ananne, ri namehin, ka. Ya'u mehe auroin Ya Am'u, la inhoi-inhoi Ya ala woroin, hi rauroin Ya Am'u haenhi."

<sup>23</sup> Horu ne, Yesus wali po'onala Nin man lernohi pakunohi enihe na'aheni, "Mim kokaledi rere'e harhu man lapa narehi ono mim do'onedi Ainu'u hini'i na'akeme me'e.

<sup>24</sup> Horhorok! Nonolu nabnabi roro rai-rai nammori, hi raram nodi do'on inhawa mim dodo'on lere eniyeni, la raram nodi derne inhawa mim dedernen, maa lere onne Ka'u mai noho wawan makun de kar do'on la kar derne."

### *Inhoi namwali iknik 'ri mormori wali'*

<sup>25</sup> Ler ida meser ida ma nauroin Makromod Lalap Nin keneri hono'ok wawa'an mai ken Yesus leke kuku sala Ai. Ai namriri na'ukani, "Pap Meser, ya'u hi'i inhawa leke lernala or'ori dardari ma kan horu?"

<sup>26</sup> Yesus walha na'ahenia, "Horhorok man aile lolo Horok Lap raram wakuku inhaw? Om lese onne mauroin inhawa panaeku?"

<sup>27</sup> Meser onne walhe, "Modi mi honorok akin, mi irhun raramne noro minim ruri pe'el na'akeme maramyaka Makromod Lalap ma namwali Makrommu. Enla maramyaka minim ri mormori wali naise

maramyaka mi kemmu haenhi."\*

<sup>28</sup> Yesus walhe, "Num wanalha onne namlolo de hi'i wewhe lernohie leke om lernala or'ori dardari."

<sup>29</sup> Maa meser onne raram nodi ri nauroin ai onne ri ma namlolo de na'ukani Yesus wali'ur, "Ainu'u ri mormori wali onne inhoi?"

<sup>30</sup> Yesus nala wanakuunu naho'ok ida walhe na'ahenia, "Mo'oni ida kopur nano Yerusalem laa Yeriko. An rakanedi kalla toro ne, pakromo noro ri man ailanna. Hi rahoredi nin hahaa na'akeme noro idewe nin nainaire, la nukure hehen nanumene na'ikeki maki mene hoikaruwed, rala'a me'e.

<sup>31</sup> Ka nalo'ol ne, Yahudi rir imam ida mai lolo kalla onne. An do'onedi ma namno'no'o onneni ne, an larlewenedi la loledi kalla wali.

<sup>32</sup> Namnenehe noro ri Lewi ida (ma nadedem howok lolo Makromod Lalap Nin Rom-leu Lape). An mai do'onedi ma namno'o onneni ne, larlewenedi la loledi kalla wali haenhi.

<sup>33</sup> Enimaa ka nalo'olala, manin Samaria ida (ma nadedem ri Yahudi mahalarna) mai. An do'on ma namno'o onne, ai raram penu me'e,

<sup>34</sup> de nala wuru noro arak nodi na'inapin nin no'o enihe, la nodi tapi wukuwedi nin no'o enihe nanumene nalha'e laa nina keledei wawan la nodi laa nakar ida ma nadedem rin pair namkuru onno. Rakanedi nakar onne ne, an ilitolle wali'ur.

\* **10:27** Im. 19:18, Ul. 6:5

## 11

*Yesus wakuku hi'i lir napanak*

*(Mat. 6:9-13, 7:7-11)*

<sup>35</sup> Rakan oreki ai nala kupan pere woro'o (alam woro'o nin paipaire) ornakar onne la ne'el na'ahenia, 'Ilitolle ri eniyeni. Na'amoli i wali mai mene ya'u pair wali'ur kupan ma kan nokor makun eni.'

<sup>36</sup> Yesus nala wanakunu onne horu, ai na'ukani meser onne, "Nano ri wokelu enihe, inhoi namwali nin ri mormori wali man wa'an?"

<sup>37</sup> Meser onne walha, "Ma naramyaka ma namno'o onne."

Kame'ede Yesus na'aheni, "Namlolo! Lam hi'i wewhe naisa onne haenhi."

*Yesus lan ka'ar Maria noro Marta*

<sup>38</sup> Onne horu, Yesus noro Nin man lernohi pakunohi enihe rala'ala'a rakan lekida. Lolo leke onne maekida naran Marta lariyale laa nina nakar.

<sup>39</sup> Maeke onne we'ekwalla ida aile naran Maria. Maria eni naikoro wakurani Makromod Yesus ein nakani Nin wanakunu.

<sup>40</sup> Enimaa Marta eni, nin honowok nammori ono maham ilitolle peina'a enihe de an mai na'aheni, "Makrom'u, honowok nammori de hi'ihepe Pape hurinohi Maria naikoro nakani mamani! Hopon ai man pakuwala'u ke'e!"

<sup>41</sup> Kame'ede Yesus na'aheni, "Marta, Marta, o ma'irhu panaeku rahu enihe,

<sup>42</sup> maa panaeku ida aile ma na'ono narehi. Panaeku onne, Maria niliyedi me'e de ka rala nano ai me'e."

<sup>1</sup> Ler ida Yesus mahan hi'i lir napanak lolo onnida. Hi'i lir napanak horu ne, Nin man lernohi pakunohi ida ne'el Ai na'ahenia, "Makromod, wakukuwala mayai hi'i lir napanak ke'e, naisa Yohanis wakuku nin man lernohi enihe haenhi."

<sup>2</sup> Enime'ede Yesus wakuku hi na'ahenia, "Lere mim hi'i lir napanak ma'aheni,

'Papa,\*

Na'amoli ri na'akeme horhawe O naran man moumou dewdewe.

Mawali Rai ma nodi molollo ri noho wawan na'akeme.

<sup>3</sup> Mala hanana'an man kukkuku noknokor mayai akilere,

<sup>4</sup> la malala ampun ainima do-hohala  
ono ai maledi ampun ri man hi'i sala mayai.

Morle'ule'u morwaliwali yai leke yono hayakyaka ken patal ai.' "

<sup>5</sup> Horu, Yesus nala wanakunu naho'ok ida hi wali'ur na'ahenia, "Nano mi eniyenihe, lo'o ri ida nala'a nin yore nin nakar alam tortoro napanak heheni: 'Yore, ya apanakala roti keme wokelu ya'u herrale ke'e,

<sup>6</sup> ono idedi nanumene ainu'u na'aromwali ida man lolo kalle mene lolala ainu'u nakar, maa ainu'u haida kaale odi ahinoi amkauwale.'

\* **11:2** Horok Lap dedesne heruwali ra'uwali 'ma aile a'am raram'.

<sup>7</sup> Ik kauroin nin yoro onne lo'o walhe na'henia, 'Ei! Yon ma'o'o ya'u, nike elekedi me'e! Yo oro ya an'uhe amkukuru me'e de ka amaka ala haida ki o me'e.'

<sup>8</sup> Kade mi ida ma nayoro noro ida, maa ai ka namaka nala haida ki mi. Enimaa Ya'u konohi mi, lo'o ka mawawa mapanak mamani, ai lo'o namaka nala inhawa man mi mapapanak eni.

<sup>9</sup> Ende Ya'u konohi panaeku ma na'ono ki mi. Mapanak ik Makromod Lalap, leke mim kokala, manoin leke lernale, la disna nika leke hari nika.

<sup>10</sup> Hi'i heheni ono inhoi ma napanak, Makromod Lalap nale ai, inhoi ma nanoin, an lernale, la inhoi man disna nika, nahinari ai.

<sup>11</sup> Mi ri mormori eniyenihe lo'o mi anum napanak i'in, mi kam herre i'in onne mala nee ai na'an!

<sup>12</sup> Alka eni, napanak manu kerre na'an, ka mala sayorne na'an.

<sup>13</sup> Kade mi mamwali man hi'i yaksala, maa mi mauroin mala ha man wa'an mi anume. Emene mi Ammu man aile a'am raram, lo'o nauroin nala ha man wa'an narehi mi! Ai nala Nin Roh Kudus inhoi-inhoi ma napanak Ai."

*Rin kuku sala Yesus  
ra'heni Ai noro Beelzebul  
howok wewerre*

(Mat. 12:22-30; Mrk. 3:20-27)

<sup>14</sup> Ler ida Yesus nohi hayakyaka man hi'i mo'oni ida hakukuwedi. Hayakyaka onne namharedi ne, idewe ri

onne nauroin wakunuwedi de heri lolo onne polletilu.

<sup>15</sup> Enimaa ri heruwali ra'heni, "Beelzebul ma namwali Hayakyak Makromon penia nala molollo Yesus nohi hayakyaka nano ri raramne."

<sup>16</sup> Enla ri namehin mai leke ken Yesus de rapanak An hi'i tanadida ri kan dodo'onnala makun leke hi rauroin An mai nano Makromod Lalap, ee ka.

<sup>17</sup> Enimaa Yesus nau-roiroin hi honorok akin de na'heni, "Lo'o hair ida napye'er namwali muku woro'o ono ida ma kan derne ida, lo'o hair onne ra'akeperedi. Enla lolo nakar raram, lo'o ida ma kan derne nakani ida, nakar raram onne namderredi.

<sup>18</sup> Onne namnenehe Hayakyak Makromon nodi molollo nin noho. Lo'o hayakyaka muku ida nohi hayakyaka muku namehin, nin molollo napye'eredi la ka naruri me'e. Ya a'heni heheni ono mi ma'heni Yo ohi hayakyak odi Beelzebul nin molollo.

<sup>19</sup> Enimaa minim man howok wali aile ma nohi hayakyaka nano ri haenhi. Hi rodi inhoi nin molollo rohi hayakyak onne? Ma namlolo, hi rodi molollo nano Makromod Lalap. Rir hini'i onne penia kukul nahenia minim tunum desne Maya'u onne saledi,

<sup>20</sup> maa Yo odi Makromod Lalap Nina molollo ohi hayakyak onne. Onneni namwali tanade nahenia lere alam eniyeni Makromod Lalap nodi molollo ri mor-

mori me'e.

<sup>21</sup> Hayakyakeni naho'ok  
naisa ri ma naruri ida. Ai  
nodi ilak raa wo'ira nadiyaka  
nin nakar, de ri mahaku kan  
mai namna'e nin hahaa.

<sup>22</sup> Enimaa lo'o ri ma naruri  
narehi ri onne mai na'okul  
la rehiyedi, ma naruri  
narehi onne nahoredi nin  
ilak rae man ai nahinorok  
nodi nadiyaka nin hahaa  
onne, la ha'aredi nin hahaa  
na'akeme me'e. Ende lo'o  
Yo ohi hayakyaka eni, onne  
nin panaeku ainu'u molollo  
narehi hayakyaka nine.

<sup>23</sup> Horhorok! Inhoi kan ler-  
nohi Ya'u, ai onne namwali  
Ainu'u arwali! Enla inhoi  
kan paku Ya'u lolo Ainu'u  
honowok, ai onne penia  
ma nano'onyaka Ainu'u  
honowok."

*Lo'o Makromod Lalap  
huriyedi ika nano apinpinha,  
maa ik kak hurinohi An minle  
ik raram, ik lernala apinpinha  
eren wewerek*

(Mat. 12:43-45)

<sup>24</sup> Yesus na'heni wali'ur,  
"Lo'o hayakyaka ida  
namharedi ri raram, an lalaa  
mamai noho mamun nano'in  
onno man wa'an leke holi,  
maa kan lernale. Ende ai  
nala kenekrohu wali wali'ur  
laa onno dedesneni.

<sup>25</sup> Rakanedi an do'on ri  
onne naise nakar man sapu  
moumouwedi la ra'akene  
wawa'anedi me'e,

<sup>26</sup> de an laa nala hayakyaka  
wo'ikku man ailanna narehi  
ai, leke noro hi hu'urle ri  
onne raramne wali'ur. Ende

ri onne nina morimori eren  
yayaka narehi nonolu eni."

*Ri ma akin nahuwa'an  
wake'e*

<sup>27</sup> Yesus mahan wakukunu  
panaeku onne, maekida  
ma aile heri onne raramne  
wakaukau na'ahenia, "O  
inum man mori O la ma nala  
huhu Om huhu, ai onne akin  
nahuwa'an wake'e."

<sup>28</sup> Enimaa Yesus na'aheni,  
"Ma namlolo, inhoi man  
derne Makromod Lalap  
Lirna Wawan la hi'i we-  
whe, ai penia man akin  
nahuwa'an narehi."

*Ri nammori rapanak  
Yesus hi'i ha man ri kan  
dodo'onnala makun*  
(Mat. 12:38-42)

<sup>29</sup> Lere onne ri nammori  
mai lupurala Yesus ne, Ai  
na'aheni, "Ku lere alam  
enie ailanna. Mi mapanak  
Ya'u hi'i tanada man ri  
kan dodo'onnale makun,  
maa Ka'u hi'i haida mim  
do'on, naukara inhawa ma  
namwali noro nabi Yunus  
mehe.

<sup>30</sup> Yunus man minle i'in  
konoin onne penia namwali  
tanada man lewlewen manin  
kota Ninewe. Ya'u, ma  
namwali Ri Mormori Anan,  
amwali tanada ku eniyeni  
naise onne haenhi.<sup>†</sup>

<sup>31</sup> Lere Alam Ho'ok Kail ri  
na'akeme, rai maeke nano  
noho wali karanna mori  
wali'ur, la an mai namriri  
noro ku eniyeni kuku sala  
hi. An kuku sala hi ono  
nonolu eni ai nala'a kalla  
man ko'u mai leke derne  
nakani wanakuku nano rai  
Salomo manin woroin lap

<sup>†</sup> **11:30** Yunus minle i'in konoin alam wokelu mene i'in namokedie lolo ro. Yesus  
maki maa alam wokelu eni An mori wali'ur naise onne haenhi.

narehi. Kade lere eniyeni ri ida aile man kulu narehiyedi rai Salomo, maa mi kam derne makani Ai!

<sup>32</sup> Lere Alam Hono'ok Kanail onne, ri Niniwe mori wali'ur, la mai ramriri kuku sala ri mormori ku enie, ono hir herredi rir morimori ma ka namlolo lere Yunus loikaruwed Makromod Lalap Lirna Wawan hi. Kade Ya amwali man lap narehi Yunus, maa mi kam derne makani Ya'u la kam herre minim morimori ma ka namloleni."

*Makromod Lalap Lirna  
naisa wadu man lerlere*

(Mat. 5:15, 6:22-23)

<sup>33</sup> "Ri man lokon wadu horu kan suwarale, la ka nodi lunu honowale, maa ai nala loile onno man kulu leke ri man mai romleher do'on nin ropropeni.

<sup>34</sup> Makum namwali wadu mi kemmu. Lo'o mi makum mou, mim do'on mauroin wawa'an naise ri man minle ropropo, maa lo'o mi makum kan mou, mi kam do'on mauroin haida naisa ri man min lolo noho momohon.

<sup>35</sup> Ende loi honorok wawa'an. Yon hi'i de mauroin nahenia ropropo aile mi raram, maa man minle mi raram onne metmetek nine.

<sup>36</sup> Ende lo'o mi kemen na'akeme ropo mamani la metmetek nine kaale mi kemen, onne nin panaeku minim morimori eni ropa'ahedi naise wadu man mori na'aropo man minle nin ropropeni."

*Ri Parisi noro meser-  
meser agama enihe lernala*

*hunukum man werek*  
(Mat. 23:1-36; Mrk. 12:38-40)

<sup>37</sup> Yesus wakukuwedi horune, ri Parisi ida lariyale laa nin nakar ra'ak wewerre. Ende Yesus lernohi ai laa nin nakar, la idewe naikoro leke na'ak.

<sup>38</sup> Ri Parisi onne heheledi ono po'on Yesus ka nawana liman mene na'ak de larlewenedi Yahudi rir holoor halauk me'e.

<sup>39</sup> Enime'ede Makromod Yesus ne'el ai na'ahenia, "Kokkoo, mi Parisi enihe, minim morimori naise nonomun onno noro ra'u man paharne mehe rawana, maa raramne morso makun. Mi madiyaka wawa'an leke ri do'on nauroin nahenia minim morimori mou, maa raramne ailanna wake'e, ono mi mahehe mahoro ri namehin rira hahaa la ilitolle mi kemen mehe, ri namehin ka.

<sup>40</sup> Heih, ri ma naploo mi! Ka mauroin Makromod Lalap man hi'i ri kemen penia hi'i hi raramne haenhi.

<sup>41</sup> Enimaa modi aki man mou mala hahaa laa ri ma na'alehe naulinu enihe, leke minim morimori man rin po'on enie noro idewe mi raramne ra'amou ra'adewed.

<sup>42</sup> Heih, ri Parisi mie! Mim mayo'o wake'e. Kade mi mala Makromod Lalap persen idaweli nano minima rampa-rampa naise ta'arutuk, lahono, aukawi warna-warna, maa mim hamlinuwedi panaeku ma na'ono naise maramyaka Makromod Lalap la hi'i wewhe ha ma namlolo noro

minim ri heri ri wali. Ha ma na'ono onnenihe, mi akim ka na'ini'ik wake'e. Wa'an rehi mim ilitolle panaeku ma na'ono onne noro idewe hi'i ha naise nala Makromod Lalap Nin persen haenhi.

<sup>43</sup> Mi ri Parisi mayo'o wake'e. Lere mim laa Yahudi rira kerei raram mi raram nodi maikoro kalar, la lo'o moro ri pakromo lolo pasar mi raram nodi lernala hirira hiyene arore.

<sup>44</sup> Aduu! Mi mayo'o wake'e. Mi man kokme'e nahenia mamwali ri molololo maa mi raramne ailanna mamani. Ende mi maisa lunna manin tanade kaale de ri nala'a lolo wawan, maa ka rauroin lunna man penpenu ha man poppopo aile lolo yawa."

<sup>45</sup> Kame'ede meser ida ma nauroin Makromod Lalap Nin keneri hono'ok wawa'an ne'el Yesus na'ahenia, "Papa Meser wakunu heheni, ma'ihoru ma'idaru mayai haenhi."

<sup>46</sup> Yesus walhe, "Mim mayo'o haenhi, ono mi mala yodi man werek rehi mala ri na'uware, maa kam paku hi lernohi num wanakuku onne.

<sup>47</sup> Mim lernala hunukum man werek ono mim kokme'e horhawa nabi-nabi de mim mesel rira lunne hi'i kulu, maa mi maisa mi upum a'um ma nesnedi nabi onnenihe nonolu eni.

<sup>48</sup> Kade mim mesel nabi onnenihe rir lunne, maa mi raram nodi mesne Makromod Lalap Nin nabi-nabi naise mi upum a'umhe nonolu eni.

<sup>49</sup> Onne penia Makromod Lalap ma nauroin ha wo'ira

na'akeme na'ono mi upum a'um na'aheni, 'Ya'u hopon nabi-nabi roro ri ma nodi I Lir'u enihe laa hi, la heruwali hi resnedi, heruwali hir hi'i apinpinha.'

<sup>50</sup> Ende Makromod Lalap nala hunukum ki mi. Onne kan mehe, maa nabi-nabi man mi upum a'umhe resnedi nano noho nina ma namwali rakan lere eniyeni, hi rarna namwali yodiwara ki mi haenhi.

<sup>51</sup> Ende nano Habel rakan man kauli'ur Barekyu ananne Zakaria, hi na'akeme ramwali minim yodiwara haenhi. (Zakaria onne hi resne lolo Makromod Lalap Nin Romleu Lape noro honoi kanani onno leken.) Memen mi ma'uwarra yodiwara ha man yaka onne na'akeme, la Ya'u nou mi na'ahenia na'amoli Makromod Lalap nala hunukum man werek mi man mori ku eniyeni.

<sup>52</sup> Mi meser ma nauroin Makromod Lap Nin keneri hono'ok wawa'an, mi mayo'o wake'e ono masala konse rodi hari ri honorokne leke rauroin Makromod Lalap Nin wanakuku, maa mim sopoledi kons onne me'e. Mi mehe mauroin Makromod Lalap Nin kalla, maa ka mahehe lolala kalla onne, la mi mehem kawala ri namehin man raram nodi lolale haenhi."

<sup>53</sup> Kame'ede Yesus namhara lolo onne, la nano lere onne me'ede ri Parisi roro meser Horok Lap enihe ra'ahan Ai de rodi na'ukankani warna-warna ra'o'e.

<sup>54</sup> Hi ra'ukani heheni leke  
An walha sala harome, hir  
kele wukue.

## 12

*Yon hi'i lernohi Parisi  
enihe rir hini'i wenewhe  
(Mat. 10:26-27)*

<sup>1</sup> Lere onne ri riwriwan rahrahu mai lupurala Yesus rasessese wake'e. Ai nala wanakuku Nina man lernohi pakunohi enihe na'ahenia, "Madiyaka ri Parisi enihe! Hir kokme'e hi'i ha man wa'an, maa hir hi'i ha man ailanna mamani. Rir hini'i onne naise ragi rodi ralha'a taponne. Kade nair taran mehe, maa hi'i taponne na'akeme ha'a mouwedi.

<sup>2</sup> Lere eniyeni hirira hini'i wenewhe suwsuware, maa lere man mai na'akeme ralhari mouwedi.

<sup>3</sup> Ende panaeku na'akeme man mim konohi ri a'alam, rakan nohoropo ri na'akeme rauroin, la panaeku man mi malpupu ri kilinna lolo kamar raram man konsedi raderre radaul laa ewi-ewi."

*Mamka'uk Makromod mani  
(Mat. 10:19-20, 28-33,  
12:32)*

<sup>4</sup> "Horhorok, i wal'u na'ahoru! Yon mamka'uk ri man suk nesne mi. Hi rodi molollo resne ri ihin kemen mehe, ka rodi molollo hi'i ha namehin.

<sup>5</sup> Enimaa Ya'u kukunohi mi mamka'uk inhoi. Mamka'uk Makromod Lalap ono Ai penia ma nodi molollo nesne mi ihin kemen nanumene nala mi sopol laa kawali pire aiye porom raram. Namlolo! Ai onne penia mamka'uk!

<sup>6</sup> Ra'olu nurn wolima wella yawa wake'e, maa Makromod Lalap kan hamlinu nurn kemida.

<sup>7</sup> Ai penia nauroinedi minima muruk lawanne me'e. Ende yono mamka'uk, ono Ai naramyaka mi narehi nalewen nurn onnenihe.

<sup>8</sup> Ya'u konohi mi inhoi ma ka namka'uk konohi ri namehin na'ahenia, 'Ya'u lernohi Yesus,' Ya'u ma namwali Ri Mormori Anan amkene konohi Makromod Lalap Nin hophopon a'am raram enihe na'ahenia, 'An lernohi Ya'u.'

<sup>9</sup> Enimaa inhoi wiuk namhene Ya'u de na'aheni ai kan lernohi Ya'u lolo ri mormori leken kalarna, Ya'u wiuk amhenedi lolo Makromod Lalap Nin hophopon leken kalarna haenhi.

<sup>10</sup> Makromod Lalap nala ampun ri na'akeme ma na'ihoru na'idaru Ri Mormori Anan, maa ri ma na'ihoru na'idaru Nin Roh, Ai ka nala ampun wake'e.

<sup>11</sup> Lere rin nodi mi laa Yahudi rir kerei leke ho'ok kail mi, ee nodi mi laa makpali man panulu noro ma nodi molollo hair-hair, yono mamka'uk mim walha inhawa hi,

<sup>12</sup> ono lere onne Roh Kudus mehen wakuku mi inhawa man wa'an mim walha onneni."

*Orkanaru ma kan peinohi  
Makromod Lalap*

<sup>13</sup> Ri ida nano heri rahu onnenihe ne'el Yesus na'ahenia, "Papa Meser! Hopon i mo'oniwal'u ha'ar hahaa man ainim ri leleher rala

mayai eni, leke nala heruwali maya'u."

<sup>14</sup> Yesus walhe, "I wal'u, inhoi kikan Ya amwali ma nodi molollo ha'ar minim pusake?!"

<sup>15</sup> Horu ne An wakuku hi na'henia, "Madiyakyaka mi, yon hi'i de mi mamwali ri man makiyala linikir kanaru mamani. Kade iknik linikir kanaru nammori, maa linikir kanaru onne kan hi'i ik mori wawa'an, ono iknik morimori ka nawinair kanarue."

<sup>16</sup> Onne horu Ai nala wanakunu naho'ok wali'ur hi na'henia, "Orkanaru ida nin kirna ma na'ihi de lernala ihin ennen nammori.

<sup>17</sup> Ai nahinorok lolo akin na'henia, 'Lo'o ya'u hi'i inhawa? Ainu'u nakar rodi ra'akene ainu'u kirne raramne kan nokor me'e.'

<sup>18</sup> Enine ai na'heni, 'Ya'u lo'o aye'eredi onno-onno rodi ra'akene ainu'u banana'an eniyeni, la hi'i onno woruworu man lap narehi leke a'akene ainu'u banana'an noro linikir kanaru namehin haenhi.

<sup>19</sup> Ya'u hi'i onne horu, ka'u howok me'e ono ainu'u banana'an man noknokor anna laa anna. Ende ya'u aikoro lolo nakar mehe, a'ak omun, la hi'i inhawa man hi'i i raram nahuwa'an.'

<sup>20</sup> Maa Makromod Lalap na'heni ri onne na'henia, 'Heih! O maploedi! A'alam eni Ya aledi o aran me'e de hahaa rahu ma'akekene eni, inhoi man manarne?'

<sup>21</sup> Onneni namwali noro ri ma nanoin noho wawan nina linikir kanaru mamani, maa ka nanoin kanaru ma

namlolo lolo Makromod Lalap kalarne."

*Yon mi akim tana, maa mi mamkene akin naili'il Makromod Lalap*

(Mat. 6:19-21, 25-34; 24:45-51)

<sup>22</sup> Enine Yesus nounaku Nin man lernohi pakunohi enihe na'henia, "Onne penia Ya'u konohi mi, yon ma'irhu minim morimori akilere. Yon ma'aheni, 'Lo'o ai mo'on inhawa?' ee, 'Lo'o am hewek nair inhawa?'

<sup>23</sup> ono ha ma na'ono lolo minim morimori eni ka namwali banana'an noro nainair mehe.

<sup>24</sup> Po'onala manu arpau me'ene, kar howok kirna, ka ra'ili radai banana'an, la ra'alehe onno rodi ra'akene rir banana'an, maa Makromod Lalap leluwai makrana hi. Emene mi eniyenihe, Makromod Lalap peni na'ono mi narehiyedi manu merwui enihe.

<sup>25</sup> Mi eniyenihe, kade ma'irhu la loi honorok ha wo'ira mamani, maa onne kan paku mi ma'uwali lere ida lolo minim lere alam mormori.

<sup>26</sup> Enla lo'o kam paekunala hi'i ha tatana naisa na'uwali lerida minim morimori, hi'ihepenia mi ma'irhu noro ha namehin enie?

<sup>27</sup> Po'onala au dipi man minle wo'or au tilu. Au dipi onne kar howok, la kar kenna mair, maa horhorok, rai Salomo ma namwali orkanaru wake'e kan nair nainair ma'aruru naise au dipi onnenihe.

<sup>28</sup> Penek man minle wo'or au tilu Makromod Lalap

na'akeki ma'aruru, kade mori lere eniyeni, maa oreki harnedi! Emene maika ho'o? Ai na'akeki ika narehi nalewenedi penek onne, maa mi akim ka naili'il wawa'an makun!

<sup>29</sup> Yon mahinorok minim nana'an nonomun mamani la yon mim ma'irhu.

<sup>30</sup> Panaeku rahu eni, ri ma ka nauroin ik Makromod Lalap rahinorok manmani. Yon mi ma'irhu panaeku rahu onneni, ono mi Ammu nauroinedi minim hewhewek nainair ma kan kuku kan nokor makun.

<sup>31</sup> Ai na'uwalí ha wo'ira onneni ki mi, horo nahenia mi mahehe leke Makromod Lalap nodi molollo mi manmani.

<sup>32</sup> Kade mi man lernohi Ya'u ka nammori, maa yon mamka'uk ono minim Pape akin namrana nala molollo mi leke more modi molollo wewerre.

<sup>33</sup> Ende ma'olu minim ha wo'ira la mala kupan onne ma na'alehe haida-haida. Hi'i heheni leke ma'akene linikir kanaru ma namkene laa ewi-ewi. Onneni naisa mi ma'akene linikir kanaru lolo rakraku ma ka napriki laa ewi-ewi, ono ri mahaku ka namna'a la serurau ka na'an.

<sup>34</sup> Ende ma'akene hahaa lolo a'am raram ono minim linikir kanaru nin miminlole namwali mi akim nin miminlole haenhi."

*Wanakunu naho'ok  
ma na'ono hophopon ma  
nadiyaka wawa'an*

<sup>35-36</sup> "Yon mi kemen naprehen, maa mamkene madiyakyaka la lapan Ya'u mai wali'ur. Wa'an

rehi mi mamkene naisa hophopon man lapan hi makromon wali mai nano hohoo nin ya'an yomun. Hophopon onnenihe, rir nainaire namkenkene la rira wadu mormori manani lekpananne lere hi makromon mai disne nike ne, hi ramkene hari nika hi makromon.

<sup>37</sup> Hophopon onnenihe kokala rere'e haharu lalap ono lere hi makromon mai, ka ramkuru, maa radiyaka wawa'an. Loi honorok wawa'an Ainu'u panaeku ma na'ono eniyeni: Makromon onne herredi nin nainair leke namkene ilitolle hophopon onnenihe, la an lariyala hi raikoro ra'ak nanumene ilitolle hi.

<sup>38</sup> Lo'o makromon onne mai alam toro me na'ikeki nohoropo, la nin hophopon onnenihe maha radiyaka la lapan ai, hir kokala rere'e harharu man lap wake'e!

<sup>39</sup> Loi honorok wawa'an wanakunu naho'ok eniyeni. Lo'o ornakar ida nauroinedi ma'anana ri ma namna'a mai nin nakar, ai nadiyaka wawa'an leke yono ma namna'a mai raram.

<sup>40</sup> Mim hi'i naise onne haenhi. Ma'akenkene mi mamani, ono lere alam Ri Mormori Anan mai, ri ka nauroin."

<sup>41</sup> Petrus na'ukani Yesus, "Makrom'u, wanakunu naho'ok eni mala mayai mehe, ee ri na'akeme?"

<sup>42</sup> Makromod walhe, "Lo'o man howok ida nampe'el la nauroin, ai onne penia makromon kikan namwali uluwakun nin man howok

na'akeme, leke kakar hanana'an man howok onnenihe ra'an.

<sup>43</sup> Enla lere makromon eni mai wali'ur do'on nin man howok onne mahan hi'i nin honowok wawa'an, man howok onne akin nahuwa'anedi.

<sup>44</sup> Loi honorok wawa'an Ainu'u panaeku ma na'ono eniyeni: Makromon onne kikan nin ri onne nadiyaka nina linikir kanaru na'akeme.

<sup>45</sup> Enimaa lo'o man howok onne ailanna, la nahi-norok lolo akin na'ahenia, 'Makromon nalo'ol mene mai,' la an nukur nin man howok wali enihe la na'an nomun noro ri ma nomun arak manha mamani.

<sup>46</sup> Namlilinnohi makromon wali mai lere alam man ai ka nauroin. Ende an daresne nin man howok onne la sopoledi laa onno ri ma akin ka naili'il enihe miminle.

<sup>47</sup> Hophopon ma nauroin makromon honorok akin, maa ka na'akenkene kemen la kan hi'i wewhe lernohi makromon honorok akin, ai onne lernala riuriuk rerrerhe nammori.

<sup>48</sup> Enimaa ri ma ka nauroin makromon honorok akin de hi'i ha man sala, ai onne lernala riuriuk tarana mehe. Inhoi man kokaledi nammori, nin yodiwara nammori rehi ri namehin ma kan kokala nammori."

*Yesus mai noho wawan nodi wanaku man hi'i ida ma na'okul ida*  
(Mat. 10:34-36)

\* **12:49** Wanakunu ma na'aheni: 'Ya'u mai leke odi aiye lolo noho wawan eni,' nin panaeku, 'Ya'u mai noho wawan odi wanaku ma naise aiye man hi'i ida ma na'okul ida.'

<sup>49</sup> "Ya'u mai leke odi aiye lolo noho wawan eni,\* la I raram nodi aiye onne mor-mori me'e!

<sup>50</sup> Ya'u mehe lernala unulu tanade apinpinha noro makmaki. Yi irhun raram ka namkene ono apinpinha onne ka namwali makun.

<sup>51</sup> Lo'o mim pene'ek Ya'u mai noho wawan eni odi moiliwi mahuwele? Ka! Ya'u mai eni hi'i ri mormori ida man sopuse'er ida.

<sup>52</sup> Nano lere eniyeni lo'o ri wolima aile nakar ida, wokelu ra'okul woro'o, ee woro'o ra'okul wokelu, de ka ramwali mahaku me'e.

<sup>53</sup> Aman noro anan mo'oni, ida ma na'okul ida, la inna noro anan maeke, ida ma na'okul ida. Ine noro panin maeke, ida ma na'okul ida haenhi."

*Yesus Nin hini'i noro wanakunu nodi kunukunohi Ai onne Kristus man Makromod Lalap kikan namwali Rai Ma Nala or'ori dardari*  
(Mat. 16:2-3)

<sup>54</sup> Yesus wakunu noro heri onnenihe na'ahenia, "Mim po'on noho ha'aha'a ha'a lolo warak eni ne, ma'aheni, 'Okon lo'o mai me'e.' Memen okon mai.

<sup>55</sup> Enla mim po'on anna karanna huu ma'aheni, 'Lere lo'o manha wake'e.' Memen namwali.

<sup>56</sup> Mi man kokme'e mauroin Makromod Lalap Nin kalla, maa mi ka mauroin! Mi mauroin mapa'aha a'am nina tanade, maa lere mim do'on Ainu'u hini'i la

derne Ainu'u wanakuñu alhi'ihepe mi ka mauroin nina panaekue?"

*Pelek ka'alolo iknik sala ono iknik Man Ho'ok Kail aile (Mat. 5:25-26)*

<sup>57</sup> "Alhi'ihepenia mi ka mala keneckrohu inhawa ma namlolo la hi'i wewhe?!"

<sup>58</sup> Lere ri man tumdesne mi nodi mi makpali man ho'ok man kail eni, wa'an rehi mi manoin kalla leke mahuwa'anedi noro ai lolo kalla toro, leke yon ai lan kalaka mi man ho'ok kail eni kalarna. Yon hi'i de man ho'ok kail onne huri mi laa polisi, la polisi onne rala mi nahan bui raram.

<sup>59</sup> Horhorok, lo'o mi ka mahuwa'an noro ai nolu, hi kar huri mi nano bui raram hehen nanumene minim sala onne pair mouwedi."

## 13

*Ri ma namhene huri sopol nin morimori ma ka namlolo eni, kar huri we'er nano hunukum makmaki*

<sup>1</sup> Lere onne ri ida woro'o rodi lira mai konohi Yesus hi'ihehewi gubernur Pilatus hopon resnedi ri manin Galilea wo'irha lere hi maha rala rir honoi kanani Makromod Lalap.

<sup>2</sup> Yesus dernessi rira wanakunu eni ne, ai ne'el hi na'ahenia, "Lo'o mi mahinorok ri Galilea onnenihe rira dohohale lap narehi manin Galilea namehin penia resnedi hi?"

<sup>3</sup> Lo'o mahinorok heheni, mim saledi! Maa horhorok!

Lo'o mi kam herre minim morimori ma ka namlolo eni, la derne makani Makromod Lalap, mi na'akeme lernala hunukum makmaki haenhi.

<sup>4</sup> Horhorok! Lere manara man aile Siloam nadiporo duniyesnedi ri idaweli wo'aa, hi'ihehewi? Lo'o hirira dohohala lap narehi ri namehin man minle Yerusalem penia onne namwali hi?

<sup>5</sup> Ka menee! Maa lo'o mi kam herre minim morimori ma ka namlolo eni, mai derne makani Makromod Lalap, mi na'akeme lernala hunukum makmaki haenhi."

*Ri ma kan huri sopol rir morimori ma ka namlolo la hi'i ha man wa'an, naho'ok naisa ara ono ma kan woi de rin keriyedi*

<sup>6</sup> Horu ne, Yesus nala wanakunu naho'ok wali'ur. Ai na'aheni, "Orkirna kaman ara onida\* lolo nin kirna anggur. Lerida orkirna onne laa kirna raram koklolo na'inau ara woin, maa kan do'one.

<sup>7</sup> Kame'ede an ne'el ma nadiyaka anggur kirna onne na'ahenia, 'Anna wokelu raram me'e ya'u mai anoin ara woin, maa ka'u do'on wake'e. Ende keriyedi ke'e! Wa'an rehi ik kaman au'ono namehin man mori wawa'an leke yon holo onno lolo iknik kirna eni!'

<sup>8</sup> Enimaa ma nadiyaka kirne walhale na'ahenia, 'Makrom'ue! Yono keri! Hurinohi ya'u de adiyakale annida raram ikar. Na'amolia

\* **13:6** 'Ara ono' ma aile Yotowawa ka namnenehe ara ono ma aile Israel. Israel nin ara woin lapan naise Yotowawa nin pese woin la namina naise onne haenhi.

ya a'irala au'ono eni wali-wali, la ala pipi koi loiyale.

<sup>9</sup> Lo'o anna kalari ara woin ma'aruru, onne wa'an, maa lo'o woin kaale makun, ik keriyedi here.' "

*Alam Renren Warwarna  
Yesus hi'i wa'an maeke ida  
man ko'ko'or wake'e*

<sup>10</sup> Alam Renren Warwarna ida, Yesus mahan wakuku lolo Yahudi rir kerei ida raram.

<sup>11</sup> Lolo onne maekida aile nakni'ir anna idaweli wo'aa me'e ono hayakyaka huhu'urle raramne. Maeke onne ko'oko'or wake'e la ka nauroin na'alolo nelhen me'e.

<sup>12</sup> Yesus do'onedi maeke onne ne, napolu na'ahenia, "Mame, mai nanu owe!" An maie ne, Ai na'aheni, "Ya'u huri o nano num apinhe."

<sup>13</sup> Kame'ede An kemenala maeke onne. Me'e'eni me'e'ede nin apinha onne wa'anedi me'e de namriri wawa'an la na'uli NASA'a Makromod Lalap.

<sup>14</sup> Enimaa man panulu lolo Yahudi rir kerei onne nawuhur ono Yesus hi'i wa'an man apinha Alam Renren Warwarna. Ai ne'el ri na'akeme lolo onne na'ahenia, "Heih! Alam woneme aile leke howok, de lolo alam woneme raram onne mai leke hi'i wa'an minim apinha, yono lapan Alam Renren Warwarne mene hi'i wa'an minim apinhe."

<sup>15</sup> Enime'ede Makromod na'aheni, "Eih! Mi man kokme'e mamwali ri molololo, maa kam peinohi

ha ma namlolo! Alam Renren Warwarna me'ene, mi modi minim kude arpau laa romun oir menee.

<sup>16</sup> Maeke eniyeni, Abraham upun anan man hayakyake wuku worre anna idaweli wo'aa raram me'e! Hi'ihepeni mi ma'aheni ik hi'i sala ono ik huri we'er ai nano nina kali wunuku wonorre Alam Renren Warwarne?!"

<sup>17</sup> Yesus Nin wanakunu onne hi'i wawwawa ri ma na'okul Ai enihe, maa ri namehin raram nodi wake'e do'on rauroin Nin hini'i man lewlewen onnenihe.

*Wanakunu naho'ok  
woro'o man kukul nahenia  
Makromod Lalap Nin ri eren  
nalolo ol eren nammomori*  
(Mat. 13:31-33; Mrk. 4:30-32)

<sup>18</sup> Yesus na'ukani wali'ur, "I kodi inhawa wanakunu leke ka'amou ka'arope hi'ihehewi Makromod Lalap nodi molollo ri mormori? Ya aho'ok onne noro inhawe?"

<sup>19</sup> Nina molollo eni naho'ok naisa wini au manu waku ida man ri hap nin ki raram. Wini onne mori namwali au'ono lap, la manu merwui man kaile hinan hanan, hi'i rira wonne nahirei kakan."

<sup>20</sup> Yesus na'ukani wali'ur na'aheni, "Yo odi wanakunu naho'ok inhawa a'amou hi'ihehewi Makromod Lalap nodi molollo ri mormori?"

<sup>21</sup> Onneni naisa ha ma namwali lere maeke nodi ragi nawa'aha noro tapon terigu nammori (lo'o kilo werro'o woro'o).<sup>†</sup> Nalo'oledi tarana mene na'akeme ha'a wawa'an."

<sup>†</sup> 13:21 'Kilo werro'o woro'o', ee 'liter weli'akka'.

*Mahehe leke lolala nike mamarke*  
(Mat. 7:13-14, 21-23)

<sup>22</sup> Yesus nala'a laa Yerusalem, An kuli kuli kota-kota noro leke-leke wakuku ri.

<sup>23</sup> Ri ida na'ukani, "Makrom'u, lo'o ri taran mehe lernala or'ori dardari ma kan horu eni?"

Yesus walha heri na'ahenia,

<sup>24</sup> "Ri man lernala or'ori dardari ma kan horu enihe naho'ok naisa ri man lolala nika mamarke. Ende ma-hehe kokkoo leke lolale nike man mamarke laa raram, ono ri nammori rahehe laa raram, maa ka namwali.

<sup>25</sup> Rakan lere Ornakkar onne namaka, elekedi nike, lo'o mi aile paharne makun, mi mamriri disne nike mehe, la ma'aheni, 'Makromod, hariyala nike mayai ke'e!'

Enimaa Ai onne lo'o na'aheni, 'Ka auroin mi.' Ka eni, 'Ka auroin mano ewi mai!'

<sup>26</sup> Kame'ede mi ma'aheni, 'Ka mauroin mayai? Ai moro O mo'on momun wewerre, la Makrommu mehen wakuku lolo ainim leke raram.'

<sup>27</sup> Enimaa An walhe, 'Ka auroin mi la ka auroin mim mai nano ewi! Mim ailanna de mamharedi lolo eni here!'

<sup>28</sup> Lere onne mi mahehere la apinpinha mamani, ono mim do'on Abraham, Isak, noro Yakup noro idewe nabi-nabi na'akeme akinhe rahuwa'anedi raikoro wuku lolo onno man Makromod Lalap nodi molollo eni, maa mi me'e ne sopoledi laa paharne.

<sup>29</sup> Lere onne ri nammori rano noho-noho wali kimur,

wali warak, wali ra'i, la wali karanna mai raikoro wuku ra'ak romun lolo onno man Makromod Lalap nodi molollo onne.

<sup>30</sup> Namlolo kokkoo lere man mai ri man kauli'ur ramwali ri man dedesne, la ri man dedesne lere eniyeni ramwali man kauli'ur lere man mai onne."

*Yesus po'on kota Yerusalem akin woir wake'e*  
(Mat. 23:37-39)

<sup>31</sup> Lere onne ri Parisi ida woro'o mai re'el Yesus na'ahenia, "Mala'a onno namehin here, yono min lolo eni me'e kalo'o Herodesnes O."

<sup>32</sup> Yesus walha hi na'ahenia, "Lam kukunohi man wukupoho onne nahe-nia lere eni noro orekie Yo ohi hayakyaka enihe la hi'i wa'an ri mamani, la rakan alam wokelu nina mene Ainu'u honowok horu.

<sup>33</sup> Enimaa lere eni, oreki, noro inworo'o Ya ala'a mamaani laa Yerusalem ono kan wa'an resne nabi lolo kote namehin, ono nadedem resne lolo kota Yerusalem raram."

<sup>34</sup> Ai na'aheni wali'ur, "Yerusalem mie, mi mesne nabi enihe la wadesne hophopon wahwahan man Ya'u hopon mai ki mi eni. Ler romromo Ya'u raram nodi apolu mi mai leke leluwai makrana naise manu orana man rawa ananne, maa mamhene mai."

<sup>35</sup> Enpenia Makromod Lalap hoikaruwed mi de rin mai nano'onyaka minim Romleu Lape. Enla Ya'u konohi mi, nano lere eniyeni me'ede kam do'on Ya'u hehen

nanumene rakan lere mi  
ma'aheni,  
'Makromod Lalap namre'e  
namharu Ai man mai  
nodi naran man kulu  
narehi! Mai ka'uli  
kasa'e!' " \*

## 14

*Yesus hi'i wa'an ri Alam  
Renren Warwarna*

<sup>1</sup> Alam Renren Warwarna  
ida, Parisi rir man panulu ida  
lariyala Yesus laa nin nakar  
leke ra'ak. Yesus laedi rom-  
leher ne, man panulu ma aile  
lolo onne radiyakyaka Ai ma-  
mani.

<sup>2</sup> Lolo Yesus kalarina ri ida  
aile man apinha penu de li-  
man ein pekpeken wake'e.

<sup>3</sup> Enine Yesus ne'el meser-  
meser ma nauroin keneri  
hono'ok wawa'an roro ri  
Parisi enihe na'ahenia,  
"Hi'ihehewi? Lo'o iknik  
agame nin holoor halaauk  
hurinohi ika hi'i wa'an ri  
Alam Renren Warwarne, ee  
ka?"

<sup>4</sup> Maa hi na'akeme ka  
ra'oho.

Kame'ede Yesus kemenala  
liman man apinha onne la  
hi'i wa'anedi nanumene ho-  
pon nala'a here.

<sup>5</sup> Horu ne, Ai na'ukani hi  
na'ahenia, "Mi eniyenihe,  
lo'o mi anum me minim  
arpau nediyawedi laa oir  
makan raram Alam Renren  
Warwarna, mi lo'o mahehe  
mala mai paharne, ee ka?"

<sup>6</sup> Hi ka ra'oho wake'e.

*Yon holi kukulu lalapa*

<sup>7</sup> Yesus po'opo'on hi'ihehewi  
peina'a heruwali mai rahehe  
raikoro onno man minle  
kalari leke rin horhawe, de

Ai nala wanakunu naho'ok  
ida hi na'ahenia,

<sup>8</sup> "Lo'o rin lariyala mi  
laa hohoo haromo, yono  
manoin naikoro onno man  
ma'aruru rehi, kalo'o or-  
nakar lariyaledi ri namehin  
man lap narehi mi.

<sup>9</sup> Lo'o hi'i heheni, ornakar  
man lariyala mi eni mai  
na'aheni, 'Mala kadere eni  
ri eniyeni naikoro.' Enine  
mi mawawedi me'e de ne'e  
namhene, maikoro onno  
man minle kili'ur honon  
wake'e.

<sup>10</sup> Enimaa, lo'o rin lariyala  
mi haromo ne, wa'an rehi  
laa maikoro onno man aile  
kili'ur honon wake'e. Ende  
lo'o ornakar mai harome  
ne, na'aheni, 'Pape, lariyala  
mai kaikoredi kalari eni.'  
Lo'o hi'i heheni, mim lernala  
honoor hanawa nano peina'a  
na'akeme,

<sup>11</sup> ono inhoi mehe na'akulu  
kemen lo'o ra'idaru, la inhoi  
mehe helkaki namdaru ke-  
men lo'o ra'akulu."

*Hi'i panaeku man wa'an  
ri ma kan paekunala herre  
walha minim hini'i'man wa'an  
onne*

<sup>12</sup> Horu ne, Yesus ne'el  
ornakar man lariyaleni,  
"Lo'o om hi'i ya'an yomun,  
yom lariyala num ri heri ri  
wali, o lodon wallumhe, me  
ri orwali man karu enihe,  
ono lere namehin hir herre  
walha num lalariyale wali'ur.

<sup>13</sup> Maa lo'o om hi'i ya'an  
yomun, lariyala ri ma  
na'alehe naulinu, man liman  
yaka ein yaka, ma naplu'uk  
nap'eker, noro man oitoko  
maktoko enihe.

\* 13:35 Mzm. 118:26

<sup>14</sup> Lo'o om hi'i heheni, Makromod Lalap namre'e namharu o, ono hi kar paekunala herre walha num wawa'an eni. Rakan lere alam ri molololo Makromod Lalap kalaruna mori wali'ur, Makromod Lalap mehen herre walha num hini'i man wa'an onne."

*Yesus wakuku nahenia  
Makromod Lalap lariyala ri  
Yahudi na'akeme mai, maa  
nammori ramhene*

(Mat. 22:1-10)

<sup>15</sup> Hi maha ra'ak, peina'a ida dederne Yesus Nin wanakunu onne de ne'el Ai na'ahenia, "Ri ma noro Makromod Lalap ra'ak wewerre lolo Nin onno man Ai nodi molollo eni, ai onne lernala rere'e haharu man lap narehi."

<sup>16</sup> Enimaa Yesus walha na'ahenia, "Ler ida, ri ida hi'i ya'an yomun lalap la lariyala ri nammori mai.

<sup>17</sup> Rakanedi lere alam ya'an yomun eni ne, an hopon nin hophopon ida lan konohi popolu lalariyala enihe na'ahenia, 'Ha wo'ira namkenedi me'e de lariyala.'

<sup>18</sup> Enimaa popolu lalariyala enihe na'akeme hehelala. Ida na'heni, 'Eni nanumene ya'u weli lari ipida, de ka namwali ya'u ki ono lo'o la'u tollala. Yon ma'ahan, pape!'

<sup>19</sup> Ri namehin na'aheni, 'Eni nanumene ya'u weli arpau kem idaweli de ka namwali ya'u ki ono lo'o la'u po'onale nanu. Yon ma'ahan, pape.'

<sup>20</sup> Ri namehin wali'ur na'aheni, 'Eni nanumene

ya'u hohoo de ka namwali ya'u ki. Yon ma'ahan, pape!'

<sup>21</sup> Enime'ede hophopon onne lan konohi makromon na'ahenia, 'Pape, na'akeme hehelala de kar mai.' Enine ornakar onne nawuhur la hopon nin hophopon na'ahenia, 'Mala'a halhala laa koteni nin kalla lapa noro idewe kalla hanana na'akeme lariyala ma na'alehe naulinu, man liman yaka ein yaka, man oitoko maktoko, noro ma naplu'uk nap'eker na'akeme mai leke ra'ak mai eni.'

<sup>22</sup> An lae ne, hi'i lernohi makromon nin hophopon eni, wali mai na'aheni, 'Makrom'u, popolu lalariyala enihe na'akeme raikoredi me'e, maa naikoro onno heruwali mammamu makun.'

<sup>23</sup> Kame'ede makromon onne hopon nin hophopon na'ahenia, 'Mala'a laa kalla lap noro idewe kalla hanana na'akeme ma aile kote parhne mapanak an'anchedi tatana lalapa mai leke ainu'u nakar penuwedi.

<sup>24</sup> Horhorok, ri mahaku nano ri man dedesne ya'u lariyala onnenihe ka noro ya'u ra'ak wewerre lolo ya'an yomun eniyeni.' "

*Man raram nodi lernohi  
Yesus lernala apinpinha*

(Mat. 10:37-38)

<sup>25</sup> Ri nammori roro Yesus ra'alono rala'a, An wali kili'ur po'onala hi na'ahenia,

<sup>26</sup> "Inhoi raram nodi lernohi Maya'u, maa ka naramyaka Ya'u narehi inna, aman, hono, anan,

mo'oniwalla, narna, noro idewe kemen mememen, ai ka namwali Ainu'u man lernohi.

<sup>27</sup> Inhoi namhene na'uwara nin au kekiyowok\* la lernohi Ya'u, ai onne ka namwali Ainu'u man lernohi.

<sup>28</sup> Lo'o ki mi ri ida raram nodi na'ariri nakar man lapa, ai nakakar nakar onne nin ha wo'ira wella nanu leke nau-roin nin kupan nokor, ee ka.

<sup>29</sup> Kalo'o an hi'i pondasi horu, nin kupan horuwedi me'e de rin mai nalau ai,

<sup>30</sup> na'aheni, 'Papa onne nin panaeku na'ariri nakar lalapa, maa nin kupan kan nokor.'

<sup>31</sup> Ka eni, hi'ihehewi rai ida man paeku laa ra'ara noro rai namehin. Ai lo'o naikoro wuku nanu leke naho'ok nakailale ke'ede nin ke'urauk riwan idaweli rira ruri noknokor rehiyedi ara noro nin arwali ma nin ke'urauk riwan werro'o, ee ka?

<sup>32</sup> Yon hi'i nahenia ka nakinuku noro nin arwali, hir min ko'u makun an hoppo nina ri laa leke napanak rahuwa'an here.

<sup>33</sup> Wanakunu naho'ok eni namnenehe noro mi haenhi. Ende loi honorok wawa'an nanu, ono inhoi kan wiuk namhene nina hahaa wo'ireni, ka namwali Ainu'u man lernohi."

*Raho'ok ri ma ka namkene lernohi Jesus naisa asir ma ka nam'arha me'e*

(Mat. 5:13; Mrk. 9:50)

<sup>34</sup> "Asir ma nam'arha penia wa'an, maa lo'o ka nam'arha

me'e, rodi inhawa leke hi'i nam'arha wali'ur?

<sup>35</sup> Kar nair me'e. Kan wa'an rodi hi'i pupuk man ri nala loile kiraram leke meur, de sopoledi ke'e.

Lo'o mi kilinum aile, makaniyala here."

## 15

### *Pipduma man molu*

<sup>1</sup> Lerida ri nammori man ra'uk paipair roro ri name-hin man rin wekel 'man hi'i dohohala' mai leke derne Jesus Nin wanakunu.

<sup>2</sup> Ri Parisi roro Yahudi rir meser Horok Lap enihe ra'alolo ra'aheni, "Eih! Po'onala! Ri eni nawaur noro ri man hi'i dohohala, la noro hi ra'ak romun wewerre."

<sup>3</sup> Onne penia Jesus nala wanakunu naho'ok ida hi na'ahenia,

<sup>4</sup> "Lo'o mi ri ida nina pip-duma waku rahu ida, la pip-duma waku ida moluwedi. Ai lo'o hoikaruwedi welihii-wohii mehe ra'an penek lolo onno man wa'an, laa nanoin man moluwedi eni hehen nanumene do'oniedie. <sup>5</sup> An do'onedi man molu eni ne, akin nahuwa'an wake'e la na'aware wali laa nakar.

<sup>6</sup> Rakanedi nin nakar ne, ai napolu nin na'aromwali roro nakar wali enihe na'aheni, 'Mai moro ya'u soksok mur-murala ono ya'u do'onedi ainu'u pipduma man molu me'e.'

<sup>7</sup> Horhorok! Lolo a'am raram ha ma naise onne namwali haenhi. Lo'o man hi'i dohohala ida herredi nin morimori ma ka namloleni,

\* **14:27** Wanakunu: 'Inhoi namhene na'uwara nin au kekiyowok' nin panaeku, 'Inhoi namhene lernala apinpinha la namhene maki.'

Makromod Lalap noro Nin hophopon a'am raram rir soksok murmure lap narehi ri welhii wohii man rira morimori namloledi me'e."

*Kupan pere man molu*

<sup>8</sup> Onne horu Yesus nala wanakunu naho'ok namehin na'ahenia, "Mama ida nin kupan pere idaweli," la lere ida nin kupan pere ida moluwedi. Ende ai lo'o hi'i inhawé? Ai lo'o lokon wadu la sapu nakar raram na'akeme leke na'inau wawa'an hehen nanumene do'onedi.

<sup>9</sup> An do'onedi kupan onne ne, ai napolu nin na'aromwali noro nakar wali enihe na'ahenia, 'Mai moro ya'u soksok murmurala nanu ono ya'u do'onedi kupan man molu onne me'e.'

<sup>10</sup> Lolo a'am raram ha ma naise onne namwali haenhi. Makromod Lalap noro Nin hophopon a'am raram enihe sok mur rehi lere ri man hi'i dohohala herredi nin morimori ma ka namloleni la derne nakani Makromod Lalap, kade ri ida mehe."

*Papa ida akin nahuwa'an ono anan mo'oni man molu wali mai wali'ur*

<sup>11</sup> Yesus nala wanakunu naho'ok ida wali'ur na'ahenia, "Papa ida anan mo'oni woro'o.

<sup>12</sup> Ler ida anan karuri mai napanak aman na'ahenia, 'Pape, ha'ar num linikir kanaru mala ainu'u hana'ar maya'u ke'e!' Enime'ede aman ha'ar nin linikir kanaru noro nin nohana

raiyaná nala anan woro'o enihe me'e.

<sup>13</sup> Ka nalo'olala anan karuri eni na'akenedi nin hahaa, la na'oluwedí nin hana'ar leke nala'a laa noho man ko'u. Minle enne ai nodi nin kupan na'akeme hi'i ha ma kan min haida lernohi nina suk aimehi.

<sup>14</sup> Lere nin kupan na'akeme horu mouwedi, noho an miminle onne lernala roulara lapa de nin morimori sus rehi.

<sup>15</sup> Ende an laa nanoin honowok ri ornoho ida. Enine ri onne kokale de hopon wa'an nin wawi.

<sup>16</sup> Mo'oni onne namlara wake'e, maa ri mahaku ka nala haida ai na'an, de raram nodi na'an wawi onne rir banana'an.

<sup>17</sup> Kame'ede ai nahinorokala me'e, de noro akin wakunu na'ahenia, 'Eih! Lolo ainu'u papa nin nakar ri man howok na'akeme lernala banana'an ra'an pehur, maa lo'o ya'u min mai eni i maki lare me'e.

<sup>18</sup> Wa'an rehi ya'u wali wali'ur laa ainu'u pape konohi ai nahenia ya'u hi'iyedi sala lape Makromod Lalap noro papa me'e,

<sup>19</sup> de kan wa'an ya amwali papa anan me'e, maa wa'an rehi ya amwali papa nin man howok lolo nakar me'e wa'an!'

<sup>20</sup> Ai nahinorok heheni horu, an wali laa aman nin nakar me'e.

Ai nalko'u makun aman do'onedi me'e, la raram penuwala, naramyakale de

\* **15:8** Lere onne kupan pere ida namnenehe ler ida nin naiwe'el.

lari laa noro anan pakromo naurukuwale la masie.

<sup>21</sup> Enime'ede anan ne'el aman na'ahenia, 'Papa, ya'u hi'iyedi dohohala papa noro Makromod Lalap me'e de kan wa'an papa napolu ya'u ananne me'e.'

<sup>22</sup> Enimaa aman napolu nin hophopon wahwahan enihe na'ahenia, 'Pelek mala nainair man ma'aruru modi mai an naire. Mala deli noro pakpak ei an nair haenhi.

<sup>23</sup> Onne horu, modi sapiyana poipoir ida mai mesne leke ka'an la kore soksok murmurala,

<sup>24</sup> ono ya an'u eni naise an makiyedi me'e, maa lere eni mori wali'uredi me'e! Nonolu penia an molu, maa lere eni ya'u do'on wali'uredi me'e!' Ende hir lernohi nin honopon hi'i ya'an yomun la soksok murmura me'e.

<sup>25</sup> Mahar hi'i ya'an yomun ne, mo'oniwalla anulu aile kirna mahan howok. Howok horu an wali laa nakar. Na'uranrani nakar ne, an derne poloit, hitare, keki ra'a lirlira, mahar pe'uk waur.

<sup>26</sup> Ende ai napolu hophopon wahwahan ida na'ukani, 'Mahar hi'i inhawa ai nakar?'

<sup>27</sup> Hophopon wahwahan onne walha na'ahenia, 'Makrom'u, ammu hopon resne sapiyana man poipoir ida hi'i yapi lalap ono mo'oniwallum karuri ma nala'a nohide, haida kan hi'i de, wali mai wali'uredi me'e!'

<sup>28</sup> An dernedi ne, na'ahan rehi de namhene laa nakar raram me'e. Ende aman pelek laa paharne nori leke laa raram,

<sup>29</sup> maa ai ne'el aman, 'Pape, ken pape nahinorokala nanu! Anna laa anna ya ampe'el ilitolle papa nin honowok. Ya'u derne akani papa nin honopon mamani. Kade ya'u howok wewerek, maa pape ka nala sapiyana ida yo odi hi'i yapi soksok murmur noro ainu'u na'aromwali enihe menee.

<sup>30</sup> Maa papa anan man laa na'ahoruwedidi num kupan nodi na'aromo noro maekyaka wali mai nakar, papa nesne sapiyana man poipoir ida hi'i yapi lalap noro ai!'

<sup>31</sup> Aman na'aheni, 'Pa'eee! Moro ya'u mamani la ainu'u ha wo'ira onume.

<sup>32</sup> Enimaa lere eniyeni wa'an rehi ik hi'i yapi leke soksok murmura ono o mo'oniwallum karuri eniyeni, an maki maa mori wali'uredi me'e, an molu maa do'on wali'uredi me'e.' "

## 16

*Yesus wakuku ika kodi iknik kupan noro ik woroin wawa'an leke paku ri rauroin Makromod Lalap Nin kalla*

<sup>1</sup> Onne horu Yesus na'uwali wanakunu naho'ok ida wali'ur Nina man lernohi pakunohi enihe na'ahenia, "Orkanaru ida nala naiwe'el ri ida leke namwali nin ma nasala kupan noro kakar nina linikir kanaru. Ler ida orkanaru onne derne nahenia nina man howok onne ka nadiyaka nin kanaru wawa'an."

<sup>2</sup> Ende ai napolu man howok onne mai na'ahenia, 'Alhi'ihepe ya'u derne o ka

madiyaka ainu'u kanaru wawa'an!? Me'e'eni me'ede laa mala horok rodi kakar ainu'u kupan herherre noro kanaru eni modi mai ya'u po'onale, ono ya amhene om howok me'e.'

<sup>3</sup> Man howok onne dernedi heheni ne, nahinorokala me'e la noro akin wakunu na'henia, 'Lo'o ya'u howok inhawa? Ya asala saplai, ka aruri, la ya amwali ri man mehe napanpanak, ya awawa.

<sup>4</sup> Ah, ya auroin kalla man wa'an lole leke rakan ainu'u honowok eni horu, ri nammori kokala ya'u lolo rir nakar.'

<sup>5</sup> Kame'ede an polu ri na'akeme ma nin okon raka aile makromon mai. Ai na'ukani ri man mai dedesne na'henia, 'O numa okon raka wo'ira aile i makrom'u?'

<sup>6</sup> Ri onne walha, 'Ainu'u okon raka wuru zaitun uhi rahu ida.'

Ma nasala kupan na'aheni ai, 'Mala num horok okon raka onne herredi uhi rahu ida onne horok uhi wellima herme'e.'

<sup>7</sup> Onne horu ai na'ukani ida ho'o me'e na'henia, 'Num okon raka wo'ira?'

An walha, 'Ainu'u okon raka aliwerhe kaduk riwan ida.'

Ma nasala kupan onne na'aheni, 'Mala num horok okon raka herredi kaduk riwan ida onne horok kaduk rahu wo'aa herme'e.'

<sup>8</sup> An hi'i heheni mamani. Kade makromon po'on nau-roin nin pohe onne, maa ai na'uli ai ono nahehe lernala kalla man wa'an an lole lere nin honowok horu, leke

ri aile man kokale noro wawa'an."

Enime'ede Yesus na'aheni wali'ur ri man dederne enihe na'ahenia, "Ya ala wanakunu naho'ok eni leke kukul nahe-nia ri ma ka nauroin Makromod Lalap rauroin kakar rir morimori noro rir ri heri ri wali leke kokala wawa'an rara'e wa'an narehi ri ma aiyedi ropropo me'e.

<sup>9</sup> Ende mahinorok wawa'an! Wa'an rehi modi minim linikir kanaru lolo noho wawan eni paku ri leke mi wallum aile ma naramyak mi. Hi'i heheni lekpanane lere minim kanaru horu la mim makiyedi me'e, Makromod Lalap kokala mi wawa'an lolo miminbole ma namkene laa ewi-ewi."

### *Makromod Lalap do'on nauroin inhoi akin mou*

<sup>10</sup> "Ri ma nodi aki man mou kakar hahaa tarana, ik kau-roin ai nodi aki man mou kakar hahaa nammori. Maa lo'o ri ka nodi aki man mou kakar hahaa tarana, ik kau-roin ai kan kakar hahaa nam-mori wawa'an haenhi.

<sup>11</sup> Lo'o mi modi noho wawan nin linikir kanaru hi'i ha ma ka namlolo, onne nin panaeku mi modi a'am raram nin linikir kanaru hi'i ha ma ka namlolo haenhi.

<sup>12</sup> Enla lo'o ri nala hahaa mi madiyaka lolo noho wawan, maa mi modi rir hahaa onne hi'i ha ma ka namlolo, lo'o inhoi raram nodi nala ha-haa mi manarna lolo a'am raram?

<sup>13</sup> Hophopon wahwahan kan paekunala namwali man howok ilitolle makromon woro'o, kalo'o nalida wa'an, la namehin yaka, ee

namkene lernohi ida, la ida ka. Kam paekunala mamwali Makromod Lalap Nin man howok noro idewe man howok nanoin kupan mamani."

*Yesus na'uwali wanakuku ida woro'o*  
(Mat. 11:12-13, 5:31-32;  
Mrk. 10:11-12)

<sup>14</sup> Ri Parisi enihe dernedi Nin wanakunu onneni ne, ralau Ai ono hi raram nodi ranoin kupan mamani.

<sup>15</sup> Enimaa Yesus ne'el hi na'ahenia, "Mi ma'aheni mi ihin kemen mou lolo ri kalarna, maa mi kam mou lolo Makromod Lalap kalarna, ono Ai penia nau-roiroin mi akim man ailanna onne. Panaeku man ri mormori horhawe narehi, Makromod Lalap kan suk wake'e.

<sup>16</sup> Nano nonolu rin wakuku Makromod Lalap Nin keneri hono'ok noro nabi-nabi rira wanakuku. Hir wakuku hehen nanumene Yohanis ma nodi oir ulutade mai, maa nano Yohanis nin lere onne, Lira Wawa'an ma na'ono hi'ihehewi Makromod Lalap nodi molollo ri mormori raderre radaul mamani. Enla ri nammori kar ren ranoin kalla leke ramwali Makromod Lalap Nin ri.

<sup>17</sup> Kade onne namlolo, maa Makromod Lalap Nin keneri hono'ok onneni kan molu laa ewi-ewi. Keneri hono'ok onne nin hurup noro titik na'akeme namkene nalo'ol rehi noho wawan noro a'am eni.

<sup>18</sup> Inhoi namhene nin maekleher, lan ho noro maeke namehin, ri onneni lerwa'u hailaiyedi me'e, la

inhoi man ho noro maeke man reiha'aredi noro hono, an lerwa'u hailai haenhi."

### *Orkanaru noro Lazarus*

<sup>19</sup> Yesus nala wanakunu ida wali'ur na'ahenia, "Orkanaru ida aile nin nainair naisa rai nine, na'akeme ma'aruru mamani, la nin morimori naisa ri man lernohi yapi ra'an romun mamani.

<sup>20</sup> Akilere ri nala mo'oni ida ma na'alehe haida-haida naran Lazarus loiyedi lolo orkanaru onne nin nika lapa makan. Lazarus onne no'o penpenu kemen,

<sup>21</sup> la ai raram nodi na'anal a orkanaru onne nin ha rehin ma nadiyaur nano nin mei. Onne kan mehe, maa ahu-ahu mai poho kemen ma namno'ono'o eni.

<sup>22</sup> Ka nalo'ol ne, ri ma na'alehe haida-haida onne makiyedi, la Makromod Lalap Nin hophopon a'am raram mai nale laa a'am raram leke naikoro wewerre noro Abraham. Enla orkanaru onne maki la rawilo'edi me'e haenhi.

<sup>23</sup> Minle kawali pire ai porom raram, an lernala apinpinha mamani, la an po'on laa wawan do'on Abraham lolo onno man ko'u, la do'on Lazarus aile Abraham herne haenhi.

<sup>24</sup> Enine an wakau na'ahenia, 'Papa Abraham-eee! Maramyakala'u ke'e! Hopon Lazarus nala liman ra'an remenala oir mai napa'ukala i namal honon me'e wa'anee. Ya'u apinha wake'e lolo aiye raram.'

<sup>25</sup> Maa Abraham walha na'ahenia, 'Pa'e, mahinorokala nanu! Lere om mori lolo noho wawan om lernala ha wawa'an mamani, maa Lazarus lernala ha man namehiyala mamani. Enimaa, mai eni ai akin nahuwa'anedi, la om lernala apinpinha mamani.

<sup>26</sup> Onne kan mehe, maa ka namwali ya'u paku o ono moko ma naphari man rorom wake'e aile ik leken de kalla kaale leke om mai eni, ee am ki enne.'

<sup>27</sup> Kame'ede orkanaru onne na'aheni, 'Lo'o onne namlolo, ya apanak papa hopon Lazarus laa ainu'u pape nin nakar,

<sup>28</sup> ono mo'onwal'u wolima aile makun. Hopon Lazarus laa na'ori honorok hi leke yon hi'i de hir mai onno man apinpinha eniyeni haenhi.'

<sup>29</sup> Maa Abraham ne'el ai na'ahenia, 'Pa'e, hirira horok-horok aile man Musa noro nabi-nabi horokedi me'e! Na'amoli hir lernohi horhorok ma aile horok onnenihe ke'e!'

<sup>30</sup> Maa orkanaru onne napanak an'anchedi Abraham na'ahenia, 'Papa Abraham, onne kan nokor makunee! Maa lo'o ri man maki mori wali'ur lan konohi hi mene hir herre rir morimori ma ka namlolo, la derne rakani Makromod!'

<sup>31</sup> Kame'ede Abraham walha na'ahenia, 'Lo'o hi kar derne rakani Musa noro nabi enihe lirna, hi kar derne rakani ri namehin haenhi, kade an maki la mori wali'ur lan konohi hi.'

## 17

*Yesus Nin wanakuku ma na'ono dohohala  
(Mat. 18:6-7, 21-22; Mrk. 9:42)*

<sup>1</sup> Yesus ne'el Nin man lernohi pakunohi enihe na'ahenia, "Panaeku ma nakoko ri nadiyaur dohohala aile, maa mayo'o wake'e ri ma nodi panaeku ma nakoko ri nadiyaur dohohala.

<sup>2</sup> Wa'an rehi wairedi waku lapida kelenne, rodi laa auredi heleken leke yon an mori de hi'i Ainu'u tatanida nadiyaur dohohale.

<sup>3</sup> Ende madiyaka mi kemen wawa'an leke yono hi'i ri nadiyaur dohohala!

Lo'o mi wallum hi'i dohohala, dadiyale. Enlo'o an herredi nin morimori ma ka namlolo onne, mala ampun ai.

<sup>4</sup> Enla lo'o an hi'i sala ki mi rew'ikku lere ida, la an mai rew'ikku na'ahenia, 'Ya'u hi'iyedi sala me'e de ya apanak malala ampun ya'u ke'e owe.' Enine yon horhorok nin yakyak salsala onne me'e, maa mala ampun ai mamani."

*Yesus Nin wanakuku ma na'ono aki ma naili'il*

<sup>5</sup> Ler ida Yesus Nin hophopon ma nodi Lirna Wawa'an enihe rapanak Ai na'ahenia, "Makromod, paku mayai leke ai akim namkene naili'il Makromod!"

<sup>6</sup> An walhe, "Lo'o mi akim naili'il Makromod Lalap, kade tarana mehe naisa aukawi waku man tutusiyane, mi lo'o paekunala hopon nunu ono lapida

nahine'uledi nano elimo'o hoi laedi kahi raram, la au'ono onne idewe lernohi minim honopon onne."

*Yesus Nin wanakuku ma na'ono Nin man lernohi rir morimori*

<sup>7</sup> Yesus nala wanakuku wali'ur na'henia, "Lo'o mim hopon minim hophopon wahwahan ida laa na'alarna kirna, ee lan huri pipi lolо wo'or. An hi'i nin honowok onne horu an wali laa nakar. Waliyedi laa nakar ne, mi kam lariyala, 'Pelek mai na'ak,'

<sup>8</sup> maa mi lo'o ma'heni, 'Mapali ai here! Onne horu herredi num nainair man morso onne ma'akene banana'an yo o'on. Ya a'ak horu mene o ma'ak here!'

<sup>9</sup> Kade nin hophopon wahwahan onne derne nakani ai wawa'an, maa makromon ka napanak trimkasi ai ono onne penia namwali nin honowok.

<sup>10</sup> Onne namnenehe noro mi haenhi. Lo'o mim hi'i konomdere na'akeme man Makromod Lalap nanale horuwedi, wa'an rehi mi ma'heni, 'Ai mamwali hophopon wahwahan man hi'i lernohi ai makrommu nin honopon mehe, ono onne penia namwali ainim honowok.'

*Yesus hi'i wa'an ri idaweli man ulik yak hi'ie*

<sup>11</sup> Yesus nala'la'a laa Yerusalem, An lolo kalla ma aile Samaria noro Galilea leken.

<sup>12</sup> An rakan leke ida, ri idaweli man ulik yak hi'ie mai ramririri rako'u Yesus.

<sup>13</sup> Hir wakau ra'henia, "Yesus, Makrommu-ee! Maramyakalai ke'e!"

<sup>14</sup> An do'onedi hi, hopon na'henia, "Lam, kukul mi kemen laa imam enihe!" Man apinha onne aile kalla makun, rir apinha wa'anedi me'e.

<sup>15</sup> Ri ida nano ri idaweli onnenihe do'on nauroin kemen wa'anedi ne, an wali wali'ur laa Yesus wakaukau na'ul'uli nasa'sa'a Makromod Lalap.

<sup>16</sup> An rakanedi Yesus ne, ai nahinononow kalarne mene napanak trimkasi Ai. Ri onne ka namwali ri Yahudi, maa manin Samaria.

<sup>17</sup> Enine Yesus na'ukani ai, "Idedi Ya'u hi'i wa'an ri idaweli, emene wohii aile ewi?"

<sup>18</sup> Alhi'ihepe ma nano noho namehin mehe wali mai na'uli nasa'a Makromod Lalap?"

<sup>19</sup> Kame'ede Yesus na'heni ri onne, "Mamriri here, mala'a wawa'anedi! Om wa'anedi me'e ono akim naili'il Maya'u."

*Ri Parisi na'ukani ma'anana Makromod Lalap mai nodi molollo ri mormori (Mat. 24:23-28, 37-41)*

<sup>20</sup> Ler ida ri Parisi ida woro'o mai ra'ukani Yesus na'henia, "Pap Meser! Ma'anana Makromod Lalap mai nodi molollo mai noho wawan eni?"

Yesus walhe, "Lere Makromod Lalap mai nodi molollo noho wawan ri kan do'on tanada man kukul An mai.

<sup>21</sup> Enla ri ka na'heni, 'Heih! Makromod Lalap Nin molollo onno aile mai eni, ee aile lolo onne.' Hi

kar wakunu heheni ono Makromod Lalap Nin lere nodi molollo rakanedi me'e, aiyedi mi leken kalarne me'e."\*

<sup>22</sup> Horu ne, An konohi Nin man lernohi pakunohi enihe, "Lere man mai mi raram nodi min wewerre noro Ya'u ma namwali Ri Mormori Anan, kade alam ida mehe, maa, kam do'on Ya'u.

<sup>23</sup> Lere onne ri lo'o ra'aheni, 'Eih! Po'on lolo onne,' ee 'Po'on mai eni, Ri Mormori Anan maiyedi me'e!' Maa yon lari lernohi hi,

<sup>24</sup> ono Ri Mormori Anan nin maimai eni ka naisa onne. Nin maimai onne naisa noho lerlere man siksik ropedi nano a'am honon wali rakan honon wali de ri na'akeme do'odo'one mouropo.

<sup>25</sup> Enimaa onne ka namwali hehen nanumene ku eniyeni hi'i Ya'u ma namwali Ri Mormori Anan lernala apinpinha man werek wake'e la ra'okuledi Ya'u.

<sup>26</sup> Lere Ya'u, Ri Mormori Anan, mai wali'ur onne, ri mormori lolo noho wawan eni rir hini'i wenewhe namnenehe ik upud a'ad Nuh nin kulere nonolu haenhi. \*

<sup>27</sup> Lere onne ri mormori lawuku mahar hi'i ya'an yomun noro yapi hohoo mamani rakan lere Nuh laedi kapal raram. Lere onne me'ede oir rulu lape mai na'akeperedi hi na'akeme. \*

<sup>28</sup> Enla lere Ya'u wali mai eni, ri mormori rir morimori naise manin kota Sodom lere Lot min lolo onne haenhi. Lere onne hi ra'an romun, ra'iwali hahaa, howok kirna la ra'ariri nakar-nakar. \*

<sup>29</sup> Maa lere Lot namhara Sodom, lere onne me'e de aiye noro lali nadiyaur nano a'am naisa okon harnesne mouwedi hi.

<sup>30</sup> Ende lere Ya'u ma namwali Ri Mormori Anan mai wali'ur, ri mormori noho wawan rir morimori naise onne haenhi.

<sup>31</sup> Lere onne ri ma aile nakar wuwanne, yono laa romleher rala rir hahaa, la ri man howok lolo kirna yon wali laa nakar.

<sup>32</sup> Horhorok inhawa ma namwali noro Lot hono nonolu eni. An po'on kili'ur de maki! \*

<sup>33</sup> Ri ma namhene huri nin morimori lolo noho wawan eni kan lernala or'ori dardari ma kan horu. Enimaa ri man hurinohi Makromod Lalap nodi molollo nin morimori lolo noho wawan eni, ai onne lernala or'ori dardari ma kan horu.

<sup>34</sup> Derne wawa'an! Lere Ya'u wali mai wali'ur, alam onne ri woro'o ramkukuru aile namkuru onnida, ramlilinnohi Makromod Lalap kikanedi man lernohi Ya'u, maa walin ma akin ka naili'il Ya'u hoikaruwedi.

<sup>35</sup> Lo'o maeke woro'o mahar wain kele'uk, ida hoikaruwedi la ida nakinikanedi.

<sup>36</sup> [Ri woro'o mahar howok wewerre aile kirna, Makro-

\* **17:21** Tafsiran namehin herre 'aiyedi mi leken kalarna me'e' noro 'aiyedi ri mormori irhun raramne me'e.' \* **17:26** NN. 6:5-8 \* **17:27** NN. 7:6-24 \* **17:28**

mod Lalap kikan ida la hoikaruwedi ida.”<sup>†</sup>

<sup>37</sup> Enime'ede man lernohi pakunohi ra'ukani, “Rin po'on Papa Nin maimai lolo ewi?”

Yesus walha nodi wanakunu naho'ok eni, “Lo'o mim do'on manu arpau nammori lupilupur onnida, mi mauroin ha mormori man maki aile lolo onne. Onne penia naisa lere Ya'u wali mai wali'ur, Ka'u suwarala Ainu'u maimai eni, maa ri na'akeme po'on rauroini.”

## 18

*Ik kamkene hi'i lir napanak mamani, yon ik akin tana*

<sup>1</sup> Enime'ede Yesus nala wanakunu naho'ok ida wakuku Nin man lernohi pakunohi enihe leke hi ramkene hi'i lir napanak Makromod Lalap mamani, la yon ren hi'i lir napanak ono rahinorok nahenia Makromod Lalap kan derne rir lir napanak me'e.

<sup>2</sup> Ai na'aheni, “Lolo kote ida, man ho'ok kail ida aile ma ka namka'uk Makromod Lalap la kan peinohi nin ri heri ri wali enihe.

<sup>3</sup> Lolo onne maeke walwalum ida aile haenhi. Akilere an mai napanak man ho'ok kail onne na'ahenia, ‘Pape, pakuwala'u akpali ainu'u arwali.’

<sup>4</sup> Lere dedesne an laa napanak, man ho'ok kail onne namhene kokala nin napanak onne, maa akilere an mai mamani. Kame'ede man ho'ok kail noro akin wakunu

na'ahenia, ‘Ya'u ka amka'uk Makromod Lalap me ri mor-mori,

<sup>5</sup> maa akilere maeke eni mai na'o'o ya'u, de wa'an rehi ya'u paku ai, kalo'o an mai mamani de hi'i ya a'iseri noro nin napapanak eni!”

<sup>6</sup> Enine Makromod na'aheni, “Loi honorok wawa'an man ho'ok kail man ailanna onne nina wanakunu eni!

<sup>7</sup> Lo'o man ailanna onne paku maeke walwalum onneni, emene hi'ihehewi noro Makromod Lalap? Namlolo kokkoo Ai nodiyala Nin ri mememem man hi'i lir napanak lelere a'alam. Ai ka na'aromromo noro hi, maa Ai namkene paku hi!

<sup>8</sup> Loi honorok wawa'an! Makromod Lalap memen pelek walha rira lir napanak de nala ha ma namlolo hi. Enimaa Ya'u ma namwali Ri Mormori Anan a'ukani eniyeni, ‘Lere Ri Mormori Anan wali mai noho wawan wali'ur lo'o An pakromo noro ri ma akin namkene naili'il Ai, ee ka?’”

*Ri Parisi ida noro man ra'uk paipair ida lar hi'i lir napanak*

<sup>9</sup> Yesus nala wanakunu naho'ok ida wali'ur ma na'ono ri ma nauroin hi ramwali ri molololo de holi kukulu lalap la po'on lewen ri namehin. Ai na'aheni,

<sup>10</sup> “Ler ida pap woro'o rala'a laa Makromod Lalap Nin Romleu Lape raram leke hi'i lir napanak. Ida namwali

<sup>†</sup> 17:36 Lisir eniyeni aile Horok Lap dedesne (naska) heruwali mehe.

ri Parisi la ida man ra'uk paipair.

<sup>11</sup> Ri Parisi onne mehe namriri la hi'i lir napanak ma na'ono ai kemen mehe na'ahenia, ‘Makromod Lalape! Trimkasi Makrom'u ono ka'u hi'i dohohala naise ri namehin, rehirehi man ra'uk paipair man aile lolo onne! Ya'u peni ka amna'a ri nin hahaa, ka'u hi'i yak yak salsala, ka'u holi yak leke yak,

<sup>12</sup> ya a'aluli kem'u ka a'ak rewro'o domeku ida, la nano ainu'u mahmaha awenne ihin ennen na'akeme ya ala persen idaweli laa kerei mamani.’

<sup>13</sup> Enimaa man ra'uk paipair onne namririri ko'u lolo kili'ur ono nauroinedi an hi'i dohohala, la namka'uk wanna ha'a oin makan po'on laa wawan. An sapsapu irhun na'ahenia, ‘Makromod Lalapee, mala ampun maya'u. Ya'u eni man hi'i dohohala.’”

<sup>14</sup> Horu ne, Yesus konohi, “Derne makani eniyeni, man ra'uk paipair eni wali laa nin nakar akin nahuwa'anedi noro Makromod Lalap, maa Parisi onne, ka, ono Makromod Lalap na'ihoru na'idaru ri man holi kukulu lalapa la na'akulu na'alapa ri man helkaki namdaru.”

*Yesus namre'e namharu tatan'ukun*

(Mat. 19:13-15; Mrk. 10:13-16)

<sup>15</sup> Lere onne ri nodi tatana mai Yesus leke kemenala li-man la namre'e namharu hi haenhi. Nin man lernohi pakunohi do'onedi ma nodi

tatana onnenihe mai ne, hi ra'ahan de dadiyale.

<sup>16</sup> Enimaa Yesus napolu tatana onne mai la ne'el Nin man lernohi pakunohi enihe, “Hurinohi tatana onnenihe mai Maya'u! Yom kawala hi ono Makromod Lalap nodi molollo ri ma naise tatana eniyenihe.

<sup>17</sup> Loi honorok wawa'an Ainu'u panaeku ma na'ono eniyeni: Inhoi ma akin ka naili'il Makromod Lalap naise tatana eniyenihe, ai kan laa onno man Makromod Lalap nodi molollo raram.”

*Sus mene orkanaru  
re'enozi Makromod nodi  
molollo hi*  
(Mat. 19:16-30; Mrk. 10:17-31)

<sup>18</sup> Yahudi rir uluwakun ida mai Yesus na'aheni, “Pap Meser man wa'an! Ya'u hi'i inhawa leke ya'u mori laa ewi-ewi?”

<sup>19</sup> Yesus walhe, “Hi'ihepenia o ma'aheni Ya'u wa'an A'u? Ri mahaku kan wa'an! Makromod Lalap mehe man wa'an.

<sup>20</sup> O mehe mauroinedi Makromod Lalap Nina keneri hono'ok na'aheni: ‘Yon lerwa'u hailai, yon mesne ri, yon mamma'a, yon modi poho tumdesne ri lolo hono'ok kanail onno, la horhawa o inum, o ammu.’ ”\*

<sup>21</sup> Enime'ede ri onne ne'el Yesus na'ahenia, “Pape, keneri hono'ok onne na'akeme ya'u lernohiyedi nano tatana'u me'e de rakan lere eniyeni.”

\* **18:20** Kel. 20:12-16, Ul. 5:16-20

<sup>22</sup> Yesus derne onne ne, na'heni, "Maa, ha ida o kam hi'i makun. Laa ma'olu onuma hahaa na'akeme, mala kupan ha'arle ma na'alehe haida-haida nanumene mam lernohi Ya'u, leke om lernala kanaru ma aile a'am raram."

<sup>23</sup> An dernedi onneni ne, akin woir rehi, ono nin kanaru lap rehi.

<sup>24</sup> Yesus po'opo'on ri onne la na'heni, "Sus wake'e ri orkanaru laa onno man Makromod Lalap nodi molollo raram."

<sup>25</sup> Horhorok! Sus wake'e unta waku ida lolala wanaka ku'il, maa man sus narehi onne, orkanaru laa onno man Makromod Lalap nodi molollo raram."

<sup>26</sup> Ri man dederne Yesus Nin wanakunu onne ra'ukani na'henia, "Lo'o hi'i heheni ne, inhoi penia nahinuriyedi nano hunukum makmaki leke lernala or'ori dardari ma kan horu onne?"

<sup>27</sup> Yesus walhe, "Ri mor-mori kar paekunala mehe raha la kemen nano hunukum, maa Makromod Lalap mehe nodi molollo huri we'er ri nano hunukum."

<sup>28</sup> Kame'ede Petrus na'heni, "Am hoikaruwedi anim ha wo'ira na'akeme me'e leke lernohi Pape."

<sup>29</sup> Yesus walhe, "Loi honorok wawa'an Ainu'u panaeku ma na'ono eniyeni: Ri man hoikaruwedi nin nakar, hono, walinhe, ri leleher, ananhe lan ilitolle Makromod Nin honowok leke paku ri rauroin hi'ihehewi Makromod Lalap nodi molollo hi,

<sup>30</sup> ai onne lernala wanalha lolo noho wawan eni man wa'an narehi nalewen hahaa an hoikakaruwedi onne. Onne kan mehe, maa lere man mai, ai noro Makromod mori wewerre laa ewi-ewi."

*Yesus wakunu Nin mak-maki rewkelu nine  
(Mat. 20:17-19; Mrk. 10:32-34)*

<sup>31</sup> Enine Yesus napolu Nina ri idaweli woro'o man lernohi pakunohi enihe maiwuku memehedi on-nida nanumene na'heni, "Makaniyal! Lere eni ik kala'a mamani laa kota Yerusalem. Ik rakan enne, panaeku na'akeme ma na'ono Ri Mormori Anan man nabi-nabi nonolu eni horokedi, lo'o namwali Maya'u.

<sup>32</sup> Hi rala Ya'u kanile ri ma ka namwali Yahudi enihe. Hir hadwei hadwokor Ya'u, ra'ihoru ra'idaru Ya'u, la saprui saworno Ya'u. Hir riuk rerhe Ya'u,\* la resnA'u,

<sup>33</sup> maa rakan lere wokelu, Ya'u mori wali'ur."

<sup>34</sup> Enimaa lirna onne nin panaeku suwsuwar nano Nin man lernohi pakunohi enihe de ka rauroin Nin wanakunu onne nina panaeku wake'e.

*Yesus hi'i wa'an ri mak-toko ida  
(Mat. 20:29-34; Mrk. 10:46-52)*

<sup>35</sup> Hi rala'a laa Yerusalem na'ikeki rakan kota Yeriko ne, hir holikuku ri maktoko ida naikoro mehe napanpanak aile kalla arkanne.

<sup>36</sup> An derne ri namansa lolohi ai, de na'ukani, "Oih! In-hawa aile lolo eni?"

\* **18:32** Po'onala catatan kaki ma aile Mat. 20:19.

<sup>37</sup> Rin konohie na'ahenia, "Yesus ma nano Nazaret lolo eni."

<sup>38</sup> An dernedi onneni ne, wakau naruri na'ahenia, "Yesus, Daud upun anan Owe, maramyakala'u ke'e!"

<sup>39</sup> Enime'ede ri ma nolu rakan maktoko onne ra'ahan de dadiyale ra'aheni, "Karkaramedi!" Maa, ai namhene, wakau eren narururi na'ahenia, "Daud upun anane maramyakala'u ke'e!"

<sup>40</sup> Yesus derne lirna onneni, namririyala la hopon ri laa ni'ik maktoko onne nore mai. An rakanedi ne, Yesus na'ukanie,

<sup>41</sup> "O raram nodi Ya'u hi'i inhawa ki o?"

Ai na'ahenia, "Makromod, i raram nodi i mak'u do'onedi ke'e."

<sup>42</sup> Enine Yesus na'aheni, "Wa'an, o makum wa'anedi me'e! O akim naili'il Maya'u de om wa'anedi me'e."

<sup>43</sup> Ideweni ne, ai makan mouwedi la an lernohi Yesus. Hir rala'a ne, ai na'uli nasa'a Makromod Lalap. Heri man po'on hini'i onne na'akeme ra'uli rasa'a Makromod Lalap haenhi.

## 19

Jesus noro Zakeus  
pakromo

<sup>1</sup> Enime'ede Yesus lan lolale kota Yeriko.

<sup>2</sup> Lolo kota onne uluwakun man ra'uk paipair man karu ida aile. Ri onne naran Zakeus.

<sup>3</sup> Zakeus raram nodi do'onala Yesus, maa ri namansa rehi de kan do'on wawa'an ono kemen dedeu-lanedi.

<sup>4</sup> Ende an lari noluwedri ri na'akeme ha'a laedi ara ono lalapida lolo kalla arkan leke do'on Yesus.

<sup>5</sup> Yesus rakanedi ara ono onneni, An po'on laa wawan ne, do'on Zakeus la hopon na'ahenia, "Zakeus! Kopur here! Lere eni Ya'u minle onum nakar."

<sup>6</sup> Enime'ede Zakeus pelek kopur la akin nahuwa'an wake'e de norkaru Yesus laa nin nakar me'e.

<sup>7</sup> Ri namansa do'odo'on onneni ne, kar suk de ra'aheni, "Heih! Zakeus onne ri man hi'i dohohala menee! Hi'ihepenia Yesus noro ai laa nin nakar?"

<sup>8</sup> Hir rakanedi Zakeus nin nakar ne, ai namriri lolo onne konohi Makromod na'ahenia, "Makrom'u, nano lere eni me'ede lo'o ha'ar ainu'u linikir kanaru namwali woro'o, ya ala hana'arne ida laa ma na'alehe haida-haida, la lo'o ya'u ra'ukedi paipair nano ri narehiyedi me'e, ya ala wali'ur rew'akka nine hi."

<sup>9</sup> Yesus ne'el ai na'ahenia, "Lere eni me'ede o moro num nakar raram na'akeme lernaledi or'ori dardari ma kan horu me'e, ono akim naili'il Makromod naise ik upud a'ad Abraham.

<sup>10</sup> Ya'u, ma namwali Ri Mormori Anan, peni mai noho wawan anoin ri man molu la ma ka nauroin Makromod Nin kalla leke huri we'er hi nano rir dohohala nin molollo."

*Wanakunu naho'ok ma na'ono kupan mahe  
(Mat. 25:14-30)*

<sup>11</sup> Yesus nala'a na'akeki rakan Yerusalem la ri nammori pene'ek nahenia lo'o Makromod Lalap niliyedi lere alam eniyeni leke kikan Ai namwali Rai mai noho wawan eni. Ende Ai nala wanakunu naho'ok ida wali'ur heri ma nore ra'alono la rakakani Nin wanakuku mamani.

<sup>12</sup> Ai na'heni, "Marna ida nin panaeku laa hair namehin man ko'u leke rai man kulu narehi kikan ai namwali rai nanumene wali wali'ur mai nodi molollo nina nohe onne.

<sup>13</sup> Maa kan laa makun, ai napolu nin hophopon wahwahan idaweli maiwuku la nala hi dohodoho kupan mahe ida.\* Nala kupan horu, an hopon na'henia, 'Modi kupan onne lam weli hahaa, ma'olu hehen nanumene ya'u wali mai.' Kame'ede ai nala'a me'e.

<sup>14</sup> Enimaa marna onne nin nohe ne'en raram kar suk ai. Ende ai nala'edi ne, hir hopon rin lernohi rodi lira ma na'heni, 'Ai mamhene marna onne namwali ainima rai!'

<sup>15</sup> Kade hir hi'i heheni, maa kikan marne onne namwali rir rai nanumene wali mai nin nohe. Waliyedi laa nin nohe ne, ai napolu nin hophopon wahwahan enihe mai rakpalie leke nauroin hir lernaledi kupan mahe ai nanala nonolu eni ihiin ennen wo'ira me'e.

<sup>16</sup> Hophopon dedesne nine man konohi, 'Papa rai! Kupan mahe mamala maya'u

onne na'uwalijedi idaweli wali'ur me'e.'

<sup>17</sup> Makromon na'heni, 'Ma'aruru! O mamwali hophopon wahwahan man wa'an. O mamkene howok kakar tarana modi aki ma namdudu de ya'u kikan o modi molollo kote idaweli.'

<sup>18</sup> Hophopon wahwahan woro'o nine na'heni, 'Papa rai! Kupan maha mamala maya'u onne, ya a'uwalijedi wolima wali'ur me'e.'

<sup>19</sup> Makromon walhe na'henia, 'Wa'an, modi molollo kote wolima!'

<sup>20</sup> Onne horu nin hophopon wahwahan namehin mai na'heni, 'Papa rai! Num kupan mahe meneni, ya a'akene wawa'anedi lolo tapi ida de kan molu!

<sup>21</sup> Ya amka'uk pap rai ono ya auroin papa owok. Enla papa lernala wawa'an nano ri namehin nin honowok man werek, la ma'ili madai inhawa man kam pekir ariyone.'

<sup>22</sup> Makromon walhe, 'Ri ailanna o! Onum wanakunu mehen hukum o kemen. Lo'o mauroin ya'u eni owok, la ya ala wawa'an nano ri namehin nin honowok, la a'ili adai inhawa ka'u pekir ariyono,

<sup>23</sup> alhi'ihepe ka modi kupan onne laa pakuwedi lolo kupan onno leke ya'u wali mai kokala kupan eni noro dipin woini?'

<sup>24</sup> Kame'ede rai onne komdere ri ma namriri lolo onne na'henia, 'Mala nin kupan mahe onne, kanile

\* **19:13** Lere onne kupan mahe ida namnenehe noro alam rahu ida nin naiwe'el.

man lernala kupan ihin  
ennen nalrewen idaweli  
onne!"

<sup>25</sup> Maa hi ra'heni, 'Pap rai,  
ainin kupan mahe idaweli  
aiyedi me'e menee!'

<sup>26</sup> Maa rai onne walhe,  
'Horhorok! Ri ma nadiyaka  
wawa'an inhawa man rarala  
ai, rala na'ikar na'uwalai ai.  
Maa inhoi ma ka nadiyaka  
wawa'an inhawa man rarala  
ai, nin hahaa tarana ma aile  
rala mouwedi.

<sup>27</sup> Enla ors eni modi ainu'u  
arwali ma namhene ya  
amwali rai mai eni here!  
Mesne mouwedi i kalar'u!"

*Ri nammori ra'uli rasa'a  
Yesus lere An laa Yerusalem  
raram*

(Mat. 21:1-11; Mrk. 11:1-  
11; Yoh. 12:12-19)

<sup>28</sup> Yesus wakuku onne  
horu, Ai noluwedie heri nala'a  
mamani laa kota Yerusalem.

<sup>29</sup> Na'ikeki rarakan leke  
Betfage noro Betania ma  
aile wo'or Zaitun, An hopon  
Nin man lernohi pakunohi  
woro'o na'ahenia,

<sup>30</sup> "Mala'a laa leke man aile  
kalari onne. Rakanedi leke  
raram lo'o mim do'on keledei  
ida man ri ka naikoralia  
makun na'inonorok aile lolon  
onne. We're, modi mai  
Ya'u. <sup>31</sup> Enimaa lo'o ri lolon  
onne ra'uholi mi ra'heni,  
'Hi'ihepenia mim we'er  
keledei onne,' konohi hi  
na'ahenia, 'Makromod Nina  
panaeku aile nairale!'"

<sup>32</sup> Enime'ede woro'ohe  
rala'a do'on na'akeme naise  
Yesus na'aheheni eni.

<sup>33</sup> Hir wewe'er keledei  
nin kali onneni, orkeledei  
onnenihe ra'uholi, "Heih!

Hi'ihepeni mima we'er  
keledei onne?"

<sup>34</sup> Hir walhe, "Ik Makro-  
mod napanak nairrel!"

<sup>35</sup> Kame'ede hi ri'ik keledei  
onne mai Yesus, la ruri rira  
rain nanaru rodi pakala  
keledei ko'orne mene paku  
Yesus naikore wawan.

<sup>36</sup> Ai naikoredi keledei ne,  
ri nammori ruri rira rain na-  
naru werre kalla wawan leke  
An lole.

<sup>37</sup> An kopkopur wo'or Za-  
itun na'uraniyedi Yerusalem  
ne, Ainin man lernohi  
nammori aile, la hi akinhe  
rahuwa'an rehi, de wakau  
raruri ra'uli rasa'a Makro-  
mod Lalap ono hir do'onedi  
Yesus hi'i tanada man hi kar  
dodo'onnale makun. Hir  
wakau wewerre ra'aheni,

<sup>38</sup> "Makromod Lalap namre'e  
namharu Rai man mai  
nodi Ai Oin Naran.  
Lere eni ri mormori  
roro Makromod Lalap  
ma aile a'am raram  
rahuwa'an wali'uredi  
me'e. Mai ka'uli kasa'a  
Makromod Lalap Man  
Kulu Narehi Man Lap  
Narehi!" \*

<sup>39</sup> Ri Parisi ida woro'o  
ma aile heri onne raram  
re'el Yesus, "Papa Meser!  
Dadiyala Num man lernohi  
enihe leke karkaramedi!"

<sup>40</sup> Maa An walhe na'ahenia,  
"Yom dadiyalaha! Ya'u  
konohi mi! Lo'o hir  
karkaramedi, waku eniyenihe  
herre hi wakaukau ra'uli  
rasa'a Makromod!"

*Yesus do'on Yerusalem ne,  
akin woir*

\* 19:38 Mzm. 118:26

<sup>41</sup> Yesus na'uraniyedi Yerusalem ne, An po'on kota onne nahere me'e.

<sup>42</sup> Ai na'aheni, "Aduu, Yerusalem mie! I raram nodi wake'e mi mehe mauroin hi'i hehewi leke lernala aki man moiliwi mahuwele, maa ors eni moiliwi mahuwele onneni suwaredi nano mi de kam do'on mauroin me'e.

<sup>43</sup> Rakan ler ida minim arwali mai olok o la hi'i lukur man kulu lolo o herne waliwali leke yon ri mahaku lari.

<sup>44</sup> Hi raiye'er o la resne mouwedi num ri mormori na'akeme.<sup>†</sup> Hi ra'anehe kote na'akeme, penia waku ka nadinara me'e la resne mouwedi num ri ono ka mahiyenala Makromod Lalap lere An mai leke nala or'ori dardari ma kan horu mi."

*Yesus nohiyedi ma na'olu hahaa nano Makromod Lalap Nin Romleu Lape raram*

(Mat. 21:12-17; Mrk. 11:15-19; Yoh. 2:13-22)

<sup>45</sup> Yesus nala'a laa Makromod Lalap Nina Romleu Lape. An rakan Romleu nin nikoin, Ai nohiyedi ri ma na'olu hahaa lolo waliwali na'akeme. <sup>46</sup> Enla Ai na'aheni, "Lolo Horok Lap raram, Makromod Lalap konohi,

'Ainu'u Romleu Lapeni namwali onno rin mai leke hi'i lir napanak, maa mim hi'i namwali ri ma namna'a onno." \*

<sup>47</sup> Akilere Yesus wakuku lolo Romleu Lap onne. Enla

imam-imam lalap, meser-meser Horok Lap roro Yahudi rir man panulu ranoin kalla leke resne Ai,

<sup>48</sup> maa kar lernala, ono ri namansa mai mamani leke rakani Nin wanakuku ma nedille hi akinhe.

## 20

*Parisi enihe ra'ukani Yesus, inhoi nala molollo Ai hi'i Nin hini'i wenewheni (Mat. 21:23-27; Mrk. 11:27-33)*

<sup>1</sup> Ler ida Yesus mahan wakukuku Makromod Lalap Lirna Wawa'an lolo Nina Romleu Lapa nin nikoin ne, imam-imam lalap roro meser-meser Horok Lap roro Yahudi rir leleher lalap enihe mai

<sup>2</sup> ra'ukani Ai ra'aheni, "Inhoi nala molollo ki O, penia mam hi'i ha eniyeni na'akeme?"

<sup>3</sup> Yesus walha hi na'ahenia, "Ya a'ukaniyala paphe na'ukankani ida haenhi. Konohi Ya'u,

<sup>4</sup> Yohanis ma nodi oir ultade ri eni, nodi molollo nano inhoi, Makromod Lalap, ee ri mormori?"

<sup>5</sup> Kame'ede hi ida ma nawalha lira noro ida ra'aheni, "Lo'o ik ka'aheni Yohanis nodi Makromod Lalap Nina molollo, enlo'o Ai na'ukani alhi'ihepenia ik akin ka naili'il Yohanis nin wanakunu?

<sup>6</sup> Maa, lo'o ik ka'aheni ai nodi ri mormori nin molollo, heri na'akeme ma aile mai eni lo'o rodi waku waslesne

<sup>†</sup> 19:44 Panaeku eni namwaliyedi lo'o anna weli'ikku nano Yesus Nin alam momori. Lere onne Roma nodi molollo makun. \* 19:46 Yes. 56:7, Yer. 7:11

maika, ono hi rauroin Yohannis onne nabi!"

<sup>7</sup> Ende hi re'eno hi walha Yesus na'ahenia, "Ai ka mauroin an lernala molollo onne nano ewi."

<sup>8</sup> Yesus na'aheni, "Ka'u konohi mi inhoi nala molollo Maya'u haenhi."

*Yesus nala wanakunu naho'ok ma na'ono hi'i hewi Makromod Lalap nala hunukum ri ma namhene Ai*  
(Mat. 21:33-46; Mrk. 12:1-12)

<sup>9</sup> Enine Yesus nala wanakunu naho'ok ida wali'ur heri na'ahenia, "Ri ida lan kaman anggur kirna ida. Horu, ai nala nin kirna ri woro'o wokelu howok leke hir ha'ar ihin ennen rala heruwali wali'ur ai. Kame'ede, ai lan min nalo'ol onno namehin.

<sup>10</sup> Rakan lere ra'ili radai nin kirna raramne, an hopon nina hophopon ida laa kokala nina hana'arne nano man howok kirna onneni, maa man howok kirna enihe nukure, hopon nalalaliyedi wali wali'ur.

<sup>11</sup> Enime'ede orkirna hopon nin hophopon namehin laa wali'ur, maa man howok onnenihe nukur la ilnohi ralnohi ai haenhi, mene hopon nalalaliyedi wali wali'ur.

<sup>12</sup> Horu, orkirna hopon nin hophopon rewkelu nine laa enne, maa hir nukur hehen nanumene namno'edi la kele, sopol laedi kirna paharne.

<sup>13</sup> Orkirna onne noro akin wakunu na'ahenia, "Ya'u lo'o hi'i inhawa ho'o? Wa'an rehi ya'u hopon ya an'u man ya

aramyake laa enne me'e. Lo'o hir horhawe la kokale wawa'anedi.' Kame'ede an hopon anan laa enne.

<sup>14</sup> Enimaa, man howok kirna enihe do'onedi orkirne ananne, hi ida ma ne'el ida na'ahenia, 'Lo'o aman makiyedi ai namwali orkirna. Mai ik kesnedi anan leke ika manarnedi kirna enie.'

<sup>15</sup> Ende hir kele ai, sopoledi laa kirna paharne mene resne."

Yesus na'ukani hi na'ahenia, "Lo'o orkirna derne ha ma namwali onneni an hi'i inhaw?"

<sup>16</sup> Memen an mai nesne mouwedi man howok kirna onneni mene nala nin kirne ri namehin howok."

Heri derne Yesus Nin wanakunu ne, ra'aheni, "Yono hi'i de namwali heheni!"

<sup>17</sup> Yesus po'on desnala hi na'aheni, "Mi ma'aheni, 'Yono hi'i de namwali heheni', maa onne lo'o namwali me'e. Onne penia wanakunu aile Horok Lape raram ma naho'ok Ya'u noro waku na'a'ar. Horok Lap Lirna onne na'ahenia, 'Waku man ma nayapi nakar sopoledi me'en, Makromod Lalap hi'iyedi namwali waku na'a'ar ma na'ono.'\*

<sup>18</sup> Inhoi nediyawa lolo waku onne wawan, ai onne lernala apinpinha, la inhoi waku onne dunie, lo'o namwaliyedi elimo'o hapu."

<sup>19</sup> Meser-meser Horok Lap roro imam lalap onnenihe rauroin Nina wanakunu

\* 20:17 Mzm. 118:22

naho'ok onneni nala hi kemenhe de ranoin kalla leke idewe kele Ai, maa hi ramka'uk heri enihe.

*Ri Parisi rodi na'ukankani ken Yesus ra'heni, "Pair kupa rala inhoi?"*

(Mat. 22:15-22; Mrk. 12:13-17)

<sup>20</sup> Ende hi radiyaka Ai mamani. Hir hopon ri man koklolo na'inau laa ranoin Yesus Nin sala. Ri eniyenihé kokme'e ramwali ri ma akin mou la ra'ukani Yesus na'ukankani wo'ira leke An wakunu ha man sala. Hir ken paipudie leke yon hi'i de An wakunu ha man sala haromo ne, hir tumdesne lolo gubernor kalarne.

<sup>21</sup> Ende man koklolo na'inau onnenihé laa ra'ukani Yesus ra'heni, "Pap Meser, ai mauroin Pape akin mou la mehem wakunu panaeku ma nam-lolo mamani la kan wakuku ha man sala ida. Papa ka na'ili nalo ho ri, maa Papa wakuku Makromod Lalap Nin kalla lernohi panaeku ma namlolo.

<sup>22</sup> Ende ai ma'ukaniyala Pape panaeku ida ke'e! Lernohi iknika agame nina holoor halauk, lo'o wa'an ik pair Roma nin paipaire laa rai Kaisar, ee ka?"

<sup>23</sup> Maa Yesus nauroinedi hi akin kan mou de na'aheni,

<sup>24</sup> "Mala kupa pere ida modi mai I po'onale." Hi rala kupa pere ida mai An po'onedi mene na'ukani, "Inhoi oin makan noro naran melle kupa enie?"

<sup>25</sup> Hir walhe, "Kaisar."

Ende Yesus na'aheni, "Inhawe man Kaisar nine, male Kaisar, la inhawe man Makromod Lalap Nine, male Makromod Lalap."

<sup>26</sup> Ende kar paekunala paipudi Ai lolo heri kalarne. Hir dernessi Nin wanalheni mehe nanana mouwedi de ka ra'oho me'e.

*Yesus wakunu panaeku ri man makiyedi mori wali'ur noro panaeku ri man ho*

(Mat. 22:23-33; Mrk. 12:18-27)

<sup>27</sup> Enime'ede ri Saduki ida woro'o mai ra'ukani Yesus haenhi. Heri Saduki rira honorok panaeku ri man makiyedi kar mori wali'ur.

<sup>28</sup> Hi ra'aheni, "Pap Meser, nonolu Musa horokedi nounaku nahenia lo'o mo'oni ida ho, maa an maki na'alehe tatana, wa'an rehi mo'oniwalin ho wali'ur orno onneni leke lernala tatana nahinerre walla man maki eni." \*

<sup>29</sup> Ende hi rala wanakunu eniyeni, "Lerida ri wo'ikku ma na'umo'oniwali aile, la anulu hoedi, maa maki na'alehe ananne.

<sup>30</sup> Enime'ede walin man lernohi ai ho wali'ur orno, maa ka nalo'ol maki na'alehe ananne haenhi.

<sup>31</sup> Onneni namwali noro walin wokelu nine wali'ur. Hi'i heheni hehen nanumene mo'oniwalla man karuri maki haenhi.

<sup>32</sup> Kame'ede maeke onne maki na'alehe anan mahaku haenhi.

<sup>33</sup> Ende rakan lere alam rin mori wali'ur, maeke onne namwali inhoi hono? Mo'oni

wo'ikku eniyeni na'akeme  
penia hoedi noro ai me'e."

<sup>34</sup> Yesus walhe na'ahenia,  
"Ri man mori mai noho  
wawan eni, hir ho,

<sup>35</sup> maa ri man Makromod  
Lalap mehen nili de na'amori  
wali'ur minle a'am raram kar  
ho me'e,

<sup>36</sup> ono hir mori raisedi  
Makromod Lalap Nin hopho-  
pon a'am raram, de kar  
maki me'e. Hi ramwali  
Makromod Lalap ananhe  
ono Ai na'amoriyedi hi nano  
makmaki me'e.

<sup>37</sup> Mi akim ka naili'il  
nahenia ri man maki mori  
wali'ur, maa Musa mehen  
wakunu mouropo lolo nin  
horok nahenia ri man maki  
mori wali'ur. Ik kauroin onne  
ono an horokedi Makromod  
lirna man an dederne lere an  
do'on aiye man lerlere lolo au  
um'umu raram. Lirna onne  
na'aheni, 'Ya amwali Makro-  
mod Lalap man Abraham,  
Isak, noro Yakup ra'u'l'uli  
rasa'sa'a rakan lere eniyeni.'  
\*

<sup>38</sup> Ri man makiyedi ka  
ra'uli rasa'a Makromod  
Lalap, maa ri man mori  
penia ra'uli rasa'e, la Makro-  
mod Lalap mehe nauroin  
ri na'akeme man makiyedi  
mori wali'ur lolo Ai leken  
kalarna."

<sup>39</sup> Derne Yesus Nin  
wanakunu onneni ne, meser  
Horok Lape walhe ra'aheni,  
"Papa Meser Nin wanalha  
onne namlolo wake'e!"

<sup>40</sup> Nano lere onne me'ede  
ri namka'uk ra'ukani haida-  
haida Yesus me'e.

*Kristus namwali Daud*

*upun anan la Ai namwali  
Daud Makromon haenhi*  
(Mat. 22:41-46, 23:1-36;  
Mrk. 12:35-40)

<sup>41</sup> Enime'ede Yesus  
na'ukani hi, "Alhi'ihepenia  
meser agame enihe ra'aheni  
Kristus namwali Daud upun  
ananne?

<sup>42</sup> Daud mehen horok  
Makromod Lalap Lirna ma  
na'ono Mesias lolo horok  
Mazmur na'ahenia,  
'Makromod Lalap ne'el i  
Makrom'u na'ahenia:  
Maikoro I her'u  
malanne

<sup>43</sup> hehen nanumene Ya'u hi'i  
Num arwali enihe lolo  
yawa ki O.\*

<sup>44</sup> Ende lo'o Daud napolu  
Kristus, 'Makrom'u', hi'ihehewi  
namwali upun anan  
mememen haenhi?"

<sup>45</sup> Heri rakankani Yesus  
Nin wanakunu eni ne,  
Ai ne'el Nin man lernohi  
pakunohi enihe na'ahenia,

<sup>46</sup> "Lere moro meser Horok  
Lap eniyenihe minwuku,  
madiyaka mi memen leke  
yon lernohi rir hini'i we-  
newhe ma ka namlolo, ono hi  
raram nodi nair rain nanaru  
lalaa mamai leke rin po'on de  
rauroin hi eni man panulu,  
la hi raram nodi laa pasar  
raram leke rin horhawe. Hir  
laa Yahudi rira kerei raram  
ne, suk raikoro kalari, la lere  
hir laa yapi kalla, suk raikoro  
mei uluwakun haenhi.

<sup>47</sup> Enla hir wukupodo  
maeke walwalum enihe,  
leke rahoro rira nakar, maa  
hir hi'i lir napanak nanaru  
rodi pupin aduwala rir hini'i  
wenewhe ma ka namlolo. Ri

\* 20:37 Kel. 3:6 \* 20:43 Mzm. 110:1

eniye nihe lernala hunukum  
man werek wake'e."

## 21

*Kade maeke walwalum  
ma na'alehe haida-haida nina  
kupan tarana mehe, maa  
nahuwa'an Makromod Lalap  
akin*

(Mrk. 12:41-44)

<sup>1</sup> Yesus mahan wakuku lolo Makromod Lalap Nin Romleu Lap eni, An po'on orkanaru ida woro'o rodi rira kupan mai loile honoi kanani onno raram.

<sup>2</sup> An po'on maeke walwalum ida ma na'alehe haida-haida mai nala doit waku woro'o loile honoi kanani onno haenhi.

<sup>3</sup> Yesus konohi Nin man lernohi pakunohi enihe na'ahenia, "Loi honorok wawa'an! Maeke walwalum ma na'alehe haida-haida onne loi kupan nammori narehi ri namehin na'akeme,

<sup>4</sup> ono nina kupan nodi momori akilere na'akeme loile honoi kanani onno eni, maa ri namehin rodi tarana mehe nano rira kanaru man lapa."

*Makromod Lalap Nin  
Romleu Lape raiye'eredi*

(Mat. 24:1-2; Mrk. 13:1-2)

<sup>5</sup> Lere onne Yesus Nin man lernohi pakunohi heruwali po'onala Makromod Lalap Nina Romleu Lapa ra'aheni, "Makromod Lalap Nin Romleu Lape eniye nihe ma'aruru wake'e, ono rodi waku man ma'aruru hi'ie, la rodi hahaa man ma'aruru namehin ra'akeki haenhi. Hahaa onneni ri nala rodi hoikani Makromod Lalap." Maa Yesus ne'el hi na'ahenia,

<sup>6</sup> "Rakan lere man Makromod Lalap mehen nili, ha mim po'opo'on eniye nihe, arwali mai raiye'er mouwedi de nin waku danaran na'akeme ida ma ka nadinara ida me'e."

*Yesus kukunohi inhawa  
namwali lere man mai*

<sup>7</sup> Horu ne, Yesus Nin man lernohi pakunohi enihe ra'ukani, "Pap Meser! Ha onneni ma'anana lo'o namwali? Am lernala inhawa tanade leke mauroin nahenia nina lere alam na'uraniyedi me'e."

<sup>8</sup> Yesus walhe, "Nakinemen ki mi, kalo'o rin paipudi mi, ono ri nammori lo'o rodi I naran mai ra'aheni, 'Ya'u eni, Kristus!' la, 'Noho nin man horu na'uraniyedi me'e.' Maa yon lernohi hi!

<sup>9</sup> Lo'o mim derne lira ara lolo ewi-ewi, yono mamka'uk, ono ha rahu onne namwali nolu, maa noho nin man horu onne kan rakan makun.

<sup>10</sup> Lolo noho pa'i'ik rai pakakar ida ma na'ara noro ida, hair ida na'ara noro hair ida.

<sup>11</sup> Enla noho wawan eni lernala rururuwai man lap narehi, roulara lalapa, noro apinha wo'operi man pelek rin nammori lernala. Lolo a'am mim po'on tanade man lewlewen man hi'i ri namka'uk rehi.

<sup>12</sup> Enimaahir kele mi la hi'i apinpinha mi nolu mene panaeku onne na'akeme namwali. Hi rodi mi laa makpali agame nina man ho'ok kail, la rala mi laa bui raram. Enla hi rodi mi laa makpali rai-rai noro ma

nodi molollo namehin ono  
mi akim naili'il Maya'u.

<sup>13</sup> Lere onne me'ede mim  
lernala leken loikaru I Lir'u  
hi kalarna.

<sup>14</sup> Ende hi'i mi akim  
namkene la yon ma'irhu  
inhawa mim walha modiyala  
mi kemmu lere rin tumdesne  
mi,

<sup>15</sup> ono Ya'u mehe ala  
wanakunu noro woroin ki  
mi leke modiyala mi kemmu,  
penia minim arwali enihe ka  
rauroin rawalha lir roro mi  
la kar lernala minim salida.

<sup>16-17</sup> Lere onne ri nammori  
kar suk mi, ono mim lernohi  
Ya'u. Mi inum ammu,  
mo'oniwallum, narum,  
meheromo raramne, lodon  
wallumhe noro minim  
na'aromwali me'ene ranoin  
kalla koklira ki mi, la hi resne  
mi heruwali haenhi.

<sup>18</sup> Maa minim muruk lisar  
ida me'e ne kan molu!\*

<sup>19</sup> Ende lo'o mi mamkene  
akin naili'il Ya'u mamani,  
mim lernala or'ori dardari  
ma kan horu."

*Yesus konohi Yerusalem  
nadiportedi lere man mai*

(Mat. 24:15-21; Mrk.  
13:14-19)

<sup>20</sup> "Lere mim do'on ma  
nasala ke'urauk nammori  
olokedi kota Yerusalem,  
mauroin nahenia ka nalo'ol  
nadiporo me'e.

<sup>21</sup> Lere onneni inhoi aile  
Yudea lari mouwedi laa  
wo'or! Man minle kote  
raram, lariyedi laa paharne!  
Enla man minle kote pa-  
harne yono laa kote raram.

\* **21:18** Wanakunu eniyeni napa'ahne, 'Kade hi resne mi kemen, maa kar kawala  
mi nano Makromod Lalap de more min wewerre laa ewi-ewi.' \* **21:22** Hos. 9:7

\* **21:25** Yes. 13:10, Yeh. 32:7, Yl. 2:31, Why. 6:12-13

<sup>22</sup> Lere onne penia  
hunukum man werek  
wake'e mai leke na'akuku  
na'anokoredi inhawa man  
nabi-nabi horokedi nonolu  
me'e.\*

<sup>23</sup> Ooih! Lere onne maeke  
ma nornororaramne roro  
man anan huhuhu makun,  
apinpinha nore! Manin  
Israel lernala apinpinha  
wake'e ono Makromod Lalap  
nawuhur hi.

<sup>24</sup> Arwali rodi raa daresne  
heruwali, kele heruwali  
wuku rodi laa hair-hair  
namehin na'akeme ma ka  
nauroin Makromod. Enla  
Makromod Lalap hurinohi ri  
ma ka namwali Yahudi enihe  
rodi rurilai kerne dalha  
manin Yerusalem hehen  
nanumene rakan lere alam  
An kukukule nokoredi me'e."

*Yesus kukunohi tanada  
leke ri nauroin nahenia  
na'ikeki An mai me'e*  
(Mat. 24:29-31; Mrk.  
13:24-27)

<sup>25</sup> "Lere onne manin  
noho wawan po'on tanada  
man ri kan dodo'onnala  
makun lolo lere, wollo, noro  
kaliyore. Enla lolo noho  
wawan ri na'akeme do'on  
derne kahi anna lapa wake'e  
de ramka'uk rehi la mehe  
kakaiyedi penia ka rauroin  
hi'i inhawa me'e.\*

<sup>26</sup> Ri mormori ramka'uk  
rehi penia heruwali oin  
makan metek ono ka rauroin  
inhawa lo'o namwali lolo  
noho wawan eni. Ha ma nodi  
molollo lolo a'am na'akeme  
narururu wake'e.

<sup>27</sup> Lere onneni rin do'on  
Ya'u ma namwali Ri Mormori

Ananne, mai lolo kakam odi ke'ek'e'l an'anhe ma narehi nalewen la hir po'on Ya'u sik-sika lerlere waliwali.\*

<sup>28</sup> Lere mim do'on tanada na'akeme onne namwali, wanna ha'edi mi uluwakun la mahuwa'anedi mi akim here, ono ka nalo'ol me'e Makromod huri we'er mi nano noho wawan nin apinpinha me'e."

*Wanakunu naho'ok au'ono*  
(Mat. 24:32-35; Mrk. 13:28-31)

<sup>29</sup> Yesus nala wanakunu naho'ok ida na'ahenia, "Po'onala ara ono noro au'ono namehin enihe.

<sup>30</sup> Mim po'on ara ono kawin mokon marra me'e, mi mauroin nahenia ka nalo'ol woi me'e.

<sup>31</sup> Naisa onne, lere mim do'on ha onne na'akeme namwali mi mauroinedi nahenia lere alam Makromod Lalap namwali rai ma nodi molollo mai noho wawan na'uraniyedi me'e.

<sup>32</sup> Loi honorok wawa'an Ainu'u panaeku ma na'ono eniyeni: Ku eniyeni<sup>†</sup> kar maki horu hehen nanumene ha eniyeni na'akeme namwali.

<sup>33</sup> A'am noro noho eniyeni lo'o moluloin, maa Ainu'u wanakunu eni kan molu laa ewi-ewi."

*Madiyakyaka mi wawa'an leke mamkene lere Yesus mai noho wawan wali'ur*

<sup>34</sup> "Madiyakyaka mi wawa'an ono mamlilinnohi Ya'u wali wali'ur mai noho wawan! Yon hi'i de mim hi'i

yapi ma'ak mamani, momun arak manha de hi'i ha man ailanna mamani, ee mahinorok minim popono orereki mamani penia maprehen hi'i panaeku ma nahuwa'an Makromod akin.

<sup>35</sup> Ainu'u mamai onne mamlilinnohi namwali ri na'akeme lolo noho wawan, naise honhonow man rodi kele manu de namlilinnohi honowedi manu me'e.

<sup>36</sup> Ende madiyakyaka mamani la yon ren hi'i lir napanak leke mim kerhu lolo sus onnenihe na'akeme. Enla mi akim namkene naili'il Ya'u mamani leke rakan lere Ya'u ma namwali Ri Mormori Anan eni mai wali'ur ho'ok kail ri mormori, ka mamka'uk mamriri Ya'u kalarna."

<sup>37</sup> Akilere Yesus wakuku lolo Makromod Lalap Nin Romleu Lape, maa lere helem ne, Ai namhara Yerusalem laa namkuru lolo wo'or Zaitun.

<sup>38</sup> Ende akilere al'alam wake'e ri na'akeme mai Romleu Lap eni leke derne Nin wanakuku.

## 22

*Yudas na'olu Yesus*

(Mat. 26:1-5, 14-16; Mrk. 14:1-2, 10-11; Yoh. 11:45-53)

<sup>1</sup> Yahudi rir Lere Alam Lalap 'Ra'an Roti Ma Na'Alehe Ragi' man wekel 'Lere Alam Lalap Paska'\* na'uraniyedi me'e.\*

<sup>2</sup> Lere onne imam-imam Lalap roro meser Horok Lap enihe maha ranoin kalla ma nasinuwar leke resne Yesus.

\* 21:27 Dan. 7:13, Why. 1:7    † 21:32 'Ku' panaeku namehin 'jaman' me 'ri Israel na'akeme'.    \* 22:1 Po'on Mrk. 14:1, 12.    \* 22:1 Kel. 12:1-27

Hi ramka'uk heri onnenihe ono heri onne raram nodi derne Nin wanakuku eni.

<sup>3</sup> Enime'ede Hayakyak Makromon hu'urle Yudas raramne. Ai onne rapolu Iskariot haenhi la namwali Yesus Nin man lernohi pakunohi ida nano ri idaweli woro'o enihe.

<sup>4</sup> Enpenia Yudas laa noro imam-imam lalap roro ri ma nadiyaka Romleu Lapa rir uluwakun enihe wakunu wuku leke rauroin lole inhawa kalla man wa'an nala Yesus mai kanile hi.

<sup>5</sup> Hir dernedi Yudas nin panaeku eni, hi akin nahuwa'an wake'e la ra'aheni, "O mala Yesus mayai, ai mala kupan ki o."

<sup>6</sup> Yudas ne'enohi rir panaeku de nanoin leken paharin nala Yesus hi leke yon heri rauroin.

### Ra'akene ra'an romun Paska

(Mat. 26:17-25; Mrk. 14:12-21; Yoh. 13:21-30)

<sup>7</sup> Enine Yahudi rir Lere Alam Lalap 'Ra'an Roti Man Na'alehe Ragi' nin lere dedesne rakanedi me'e. Lere onne Lere Alam Lalap Paska de hi radedem ra'akene pipdumana leke resne ra'an.

<sup>8</sup> Enime'ede Yesus hoppo Petrus noro Yohanis lar ra'akene Paska nin banana'an nonomun leke hir ra'an romun wewerre.

<sup>9</sup> Woro'ohe ra'ukani, "Pap raram nodi am laa ewi ma'akene Paska nina ya'an yomun?"

<sup>10</sup> An walhe, "Mim laedi Yerusalem raram ne, mim pakromo mo'oni ida nodnodi

oir e'en de lernohie laa nakar man an lalaa raram.

<sup>11</sup> Kukunohi ornakar nahenia Pap Meser na'ukani lo'o Ai noro Nin man lernohi pakunohi enihe ra'an romun Paska lolo onno ewi?

<sup>12</sup> Enla ornakar onne lo'o kukul onno lapa ida ki mi aile danaran wawan man ai na'akenedi me'e. Miro ma'akene nana'an nonomun Paska lolo onne."

<sup>13</sup> Hi rala'a laa rakan kote raram, do'on ha wo'ira na'akeme naise Yesus kono-hiyedi hi eni. Idewe hi ra'akene hanana'an Paska.

*Yesus noro Nin man lernohi pakunohi lernohi Paska ra'an romun*

(Mat. 26:26-30; Mrk. 14:22-26; 1Kor. 11:23-25)

<sup>14</sup> Rakanedi ya'an yomun Paska nin ors jam ne, Yesus noro Nina hophopon ma nodi Lirna Wawa'an enihe raikoro wuku ra'an romun wewerre.

<sup>15</sup> Yesus ne'el hi na'ahenia, "Ya akin namrana rehi oro mi aikoro wuku ka'an komun banana'an Paska eniyeni nanumene Ya'u lernala apinpinha.

<sup>16</sup> Derne makani Ya'u! Ilk ka'an komun eni horu, ka o'on omun naisa eniyeni hehen nanumene rakanedi Lere Alam Lalap Paska eni nin panaeku na'akuku na'anokoredi lolo Makromod Lalap Nin noho worworu eni."

<sup>17</sup> Enime'ede An roule cawan anggur, la napanak trimkasi Makromod Lalap. Horu, Ai na'aheni, "Mala eni mi dohodoho momun.

<sup>18</sup> Ya'u konohi mi, nano lere eni me'ede ka omun anggur

eni hehen nanumene Yo omun anggur worworu lere alam Makromod Lalap mai nodi molollo ri na'akeme."

<sup>19</sup> Onne horu, Ai nala roti napanak trimkasi Makromod Lalap nanumene a'un roti onne nala hi ra'an la na'aheni, "Roti eniyeni, Yi ihin kem'u man Ya ala leke paku mi. Hi'i heheni leke yono hamlinu Maya'u."

<sup>20</sup> Hi ra'an romun horu, naise idedi eni Ai nala anggur cawan onne wali'ur na'aheni, "Cawan ihin eniyeni naulinu nawali Nou Worworu man Makromod Lalap nanale man hi'i Ai noro ri mormori radinu'ul rakanaliyedi wali'ur. I rar'u ma nakliu lere Ya'u maki na'ono nawinau Nou ma namkene onne la huri we'er mi nano dohohala nin hunukum.

<sup>21</sup> Maa po'onala! Ri ma na'olu Ya'u kani laa Ainu'u arwali enihe koro wewerre ai lolo eni.

<sup>22</sup> Memen Ya'u, Ri Mormori Anan, maki ono Makromod Lalap hi'iyedi kenekrohu Ya'u maki me'e, maa ri man kani Ya'u laa arwali onnenihe mayo'o wake'edi me'e."

<sup>23</sup> Nin man lernohi pakunohi enihe dernedi Nin wanakunu eni, ida ma na'ukani ida leke rauroin inhoi man paeku heheni.

### *Inhoi man lap narehi*

<sup>24</sup> Yesus Nin man lernohi pakunohi enihe rasesi panaeku ma na'ono inhoi man lapa narehi nano hi onnenihe.

<sup>25</sup> Onne penia Yesus ne'el hi na'ahenia, "Lolo hair-hair

ma ka nauroin Makromod Lalap, rir rai enihe kerne dalha hirira ri mormoriyana mamani, maa hi me'ene ra'aheni hi ramwali man paku rir nohe ne'en raramne.

<sup>26</sup> Yon mim hi'i heheni, maa inhoi man kulu narehi wa'an rehi an holi naisa man lolo yawa. Enla ma nodi molollo eni wa'an rehi an holi naise hophopon wahwahan.

<sup>27</sup> Ken mahinorok, inhoi man kulu narehi? Ri ma naikoro mei na'ak, ee ri man lolo honopon wanahan ai? Ri na'akeme rauroin ma naikoro mei na'ak eni peni man kulu narehi! Maa Ya'u eni mai oro mi minwuku la ilitolle ki mi.

<sup>28</sup> Mi eniyenihe, moro Ya'u mamani lere Ya'u lernala appininha.

<sup>29</sup> Enla naisa Ya Am'u kikan Ya amwali Rai ma nodi molollo, na'amoli Ya'u kikan mi mamwali rai-rai ma nodi molollo haenhi,

<sup>30</sup> leke moro Maya'u kaikoro ka'an komun lolo mei man aile Ainu'u molollo onno la mi maikoro onno kukulu leke ho'ok kail Israel nin luhu idaweli woro'o enihe."

*Yesus kukunohi Petrus na'ahenia ka nalo'olo ai na'aheni ka nauroin Yesus  
(Mat. 26:31-35; Mrk. 14:27-31; Yoh. 13:36-38)*

<sup>31</sup> Enime'ede Yesus ne'el Simon Petrus na'ahenia, "Simonee! Makaniyala! Makromod Lalap hurinohi Hayakyak Makromon ken mi na'akeme naise ri man ka'i aliwerhe naheir ulikin nano ihin.

<sup>32</sup> Maa Ya'u hi'iyedi lir napanak ki o Simon leke yon o akim nahinuri Maya'u. Enla lere om wali wali'uredi Maya'u, ma'alapedi o wallum akinhe haenhi."

<sup>33</sup> Petrus walhe, "Lo'o ka, Makromod! Kade yo oro Pape laa bui raram, ee maki wewerre, maa ka'u huri Pape."

<sup>34</sup> Yesus na'ahenia, "Petrus! Makani wawa'an! A'alam eni me'ede manu kan kokoroi makun, o ma'aheniyedi ka mauroin Ya'u rewkelu me'e."

<sup>35</sup> Horu Yesus na'aheni, "Horokala! Lere Ya'u hopon mi lam loikaru lir wawa'an nonolu eni, ka modi kupan, tas, noro pakpak ei herherre. Hi'ihehewi, lere onne minim ha wo'ira noknokor, ee ka?"

Hir walhe, "Ha wo'ira noknokor, Pape!"

<sup>36</sup> Ai na'aheni, "Maa ors eni yom hi'i heheni me'e. Lo'o minim kupan me tas aile haromo, modie, la lo'o ma'alehe raa, ma'olu minim rain leke modi weli raa,

<sup>37</sup> ono Yesaya horokedi lira ma na'ono Ya'u na'ahenia, 'Hi rahinorok Ai namwali ri man aillanna.' \* Enla horhorok eniyeni namlolo kokkoo ra'akuku ra'anokoredi lolo I kem'u. Namlolo! Inhawa man horokedi lolo Horok Lape ma na'ono Ya'u, ik do'on namwali lere eniyeni."

<sup>38</sup> Nin man lernohi pakunohi enihe ra'aheni, "Makromod! Po'onala! Ai modmodi raa woro'o!"

Yesus walhe, "Yom wakunu onne me'e!"†

*Yesus hi'i lir napanak lolo wo'or Zaitun*  
(Mat. 26:36-46; Mrk. 14:32-42)

<sup>39</sup> Enime'ede Yesus namharedi Yerusalem nala'a laa wo'or Zaitun naise nadedem, la Nin man lernohi pakunohi enihe lernohi haenhi.

<sup>40</sup> Hir rakanedi lolo onne ne, Ai ne'el hi na'ahenia, "Hi'i lir napanak leke yono madiyaur kenene panatal de hi'i dohohala."

<sup>41</sup> Horu Ai nala'a kan ko'uwala, lo'o penere wellima nano hi, mene kadi ein korno hi'i lir napanak na'ahenia,

<sup>42</sup> "Papee! Ya apanak Om huriyedi Ya'u nano wewerek pananaka Ya a'uwarwara eniyeni. Maa yom hi'ilernohi Ainu'u honorok panaeku, maa hi'i lernohi Papa Nin honorok panaeku mehe!"

<sup>43</sup> [Enime'ede hophopon a'am raram ida mai na'aruriyala akin.

<sup>44</sup> Yesus nodi aki man woir wake'e hi'i lir napanak manani hehen nanumene ka naruri me'e la Nin awenne dupu laa yawa naise rare.]‡

<sup>45</sup> Hi'i lir napanak horu, An wali laa Nin man lernohi pakunohi enihe, maa hi ramkukuru mahaledi ono akin woir rehi.

<sup>46</sup> Ai napolu hi na'ahenia, "Alhi'ihepe mamkuru? Mamakedi here la hi'i lir napanak leke yono madiyaur

\* **22:37** Yes. 53:12    † **22:38** 'Yom wakunu onne me'e!' panaeku namehin, 'Nokoredi me'e!'    ‡ **22:44** Horok man aile lolo tanada [ ] raram, kaale lolo horok Yunani dedesne heruwalu.

lere mim lernala kenene panatal."

*Kele wuku Yesus  
(Mat. 26:47-56; Mrk. 14:43-50; Yoh. 18:3-11)*

<sup>47</sup> Yesus wakunkunu makun, ri nammori mai, la Yudas ma namwali Yesus Nin man lernohi pakunohi ida nano idaweli woro'o enihe ni'ik kalla hi. Hir mai ra'uraniyedi ne, Yudas lan masiyedi Yesus.

<sup>48</sup> Maa Yesus na'ukani Yudas na'ahenia, "Mam masi Ri Mormori Anan leke mala kanile laa Nin arwalie?!"

<sup>49</sup> Nin man lernohi pakunohi enihe do'on rau-roroin rir panaeku eni, hir ra'ukani Yesus na'ahenia, "Makrommu, lo'o ai modi raa eniyenihe daresne hi?"

<sup>50</sup> Kame'ede Nin man lernohi ida lehu nin raa dara imam man kulu narehi eni nina hophopon ida me'ede, kilinna wali malanna nadiyauredi.

<sup>51</sup> Maa Yesus na'aheni, "Wa'anedi me'e!" Enine An tukulala ri onne kilinna de hi'i wa'anedi wali'ur.

<sup>52</sup> Enime'ede Yesus ne'el imam-imam lalap roro ma nadiyaka Makromod Lalap Nin Romleu Lape rir uluwakun roro Yahudi rir leleher lalap enihe na'ahenia, "Mi mauroin Ya'u eni ri man ailanna penia modi ilak raa noro au deul mam kele Ya'ue?

<sup>53</sup> Akilere Ya'u wakuku mi lolo Romleu Lap raram, maa mi kam kelA'u. Enimaa lere eni me'ede Makromod Lalap hurinohi Hayakyak Makromon man howok lolo

noho momohon nodi molollo me'e."

*Petrus na'aheni ka nau-roin Yesus rewkelu  
(Mat. 26:57-58, 67-75; Mrk. 14:53-54, 65-72; Yoh. 18:12-18, 25-27)*

<sup>54</sup> Hir keledi Yesus ne, rodie laa imam man kulu narehi nin nakar. Enla Petrus ler-nohi lolo kili'ur ko'u tarana.

<sup>55</sup> Rakanedi nakar onne nin nikoin, hir hunuku aiye lolo nikoin toro la raikoro poloweweredi, la Petrus laa naikoro nohiyedi haenhi.

<sup>56</sup> Ka nalo'ol maeke hophopon wahwahan ida popo'on ai wawa'an de nahiyyennale la na'aheni, "Heih, ri eniyeni noro Yesus ra'alono wewerre haenhi!"

<sup>57</sup> Maa Petrus na'okuledi na'ahenia, "Ka! Ya'u ka au-roin Ri onne!"

<sup>58</sup> Kan maha ne, ri namehin do'on Petrus la na'aheni, "Heih! Memen o eni Yesus Nin ri!"

Maa Petrus na'aheni, "Ka, ka'u lernohi Ri onne."

<sup>59</sup> Lo'o jam ida wali'ur ri namehin ida na'aheni, "Woi! Ya auroiroin ri eniyeni man lernohi Yesus mamani ono ai eni manin Galilea."

<sup>60</sup> Maa Petrus walhe, "Papee! Ka auroin onum wanakunu onne nin panaeku!" An wakunkunu makun, manu kokoroyiedi.

<sup>61</sup> Kame'ede Yesus waliyedi oin makan po'onale Petrus. Enine Petrus horoknaledi Makromod Lirna ma na'ahenia, "A'alam eni me'ede manu kan kokoroi makun, o ma'aheniyedi ka mauroin Ya'u rewkelu me'e."

<sup>62</sup> Ai raram penuwale me'ede nala'a paharne na-here maheruheru.

<sup>63</sup> Ma nadiyaka Yesus enihe lupurale, hadwei hadwokor la nukure.

<sup>64</sup> Hir pasunala oin makan nanumene ra'heni, "Heih, nabi O! Ken konohi yai inhoi nukur O!"

<sup>65</sup> Hir warei diwar dawar rodi ra'ihoru ra'idaru Yesus mamani.

*Rodi Yesus mai nakpali agame Yahudi nin muku ma nadedem ho'ok kail enihe*

(Mat. 26:59-66; Mrk. 14:55-64; Yoh. 18:19-24)

<sup>66</sup> Al'alam makun Yahudi rira leleher lalap, imam-imam lalap roro meser-meser Horok Lap ma namwali Yahudi rir muku man ho'ok kail enihe hopun pepen leke ho'ok kail Yesus. Ma nadiyaka Yesus rodi Ai laa nakpali hi.

<sup>67</sup> Hi ra'heni, "Konohi yai, O eni Kristus, ee ka?"<sup>§</sup>

Jesus walhe, "Ya'u konohi mi maano mi akim ka naili'il Ya'u,

<sup>68</sup> la Ya a'ukani mi maano kam walha Maya'u.

<sup>69</sup> Maa nano lere eni me'ede Ya'u ma namwali Ri Mormori Anan, aikoro lolo Makromod Lalap Ma Nodi Molollo Narehi Nalewen Na'akeme herne malanna."

<sup>70</sup> Hi na'akeme ra'ukani, "O eni Makromod Lalap Ananne?"

An walha, "Namlolo! Mi mehe ma'aheniyedi onne me'e."

§ 22:67 'Kristus' onne namnenehe 'Mesias'. \* 23:5 Lolo lisir eni 'Yudea' kan wekel propinsi Yudea mehe, maa wekel ri Yahudi na'akeme, de wekel ri Yahudi nano propinsi Galilea haenhi.

<sup>71</sup> Kame'ede hi ra'aheni, "Ik mehe dernedi Nin wanakunu man kuku Ainin sala me'e, de yon kanoin man kuku maka namehin me'e!"

## 23

*Rodi Yesus laa nakpali Pilatus*

(Mat. 27:1-2, 11-26; Mrk. 15:1-15; Yoh. 18:28-19:16)

<sup>1</sup> Enime'ede Yahudi rira man ho'ok kail onnenihe na'akeme ramriri rodi Yesus laa nakpali Pilatus.

<sup>2</sup> Rakanedi Pilatus kalarne, hir tumdesne Ai ra'aheni, "Am do'onedi ri eni nawau' aanim ri leke yon derne rakani Rome nin ma nodi molollo me'e. Ai penia na'okul ri man pair paipair rale Kaisar la na'aheni Ai namwali Kristus man Makromod Lalap kikanedi namwali Rai laa ewi-ewi."

<sup>3</sup> Ende Pilatus na'ukanie na'ahenia, "O penia ma namwali Rai Yahudie?" An walha, "Namlolo, naisa ma'aheheni eni."

<sup>4</sup> Enime'ede Pilatus na'aheni imam-imam lalap noro heri rahu onneni na'ahenia, "Ka'u do'on Ri eniyeni Nin salida."

<sup>5</sup> Maa hirira ahan kan horu de wakunu man-mani ra'aheni, "Ai nodi Nin wanakuku nawau' noho Yudea ne'en raram na'akeme\* nano Galilea rakanedi mai Yerusalem eni me'e."

<sup>6</sup> Pilatus dernedi ne, na'ukanie, "Namlolo? Ri eniyeni nano Galilea?"

<sup>7</sup> Hir walhedi, “An mai nano Galilea.” Hi ra’aheniyedi heheni ne, Pilatus hopon rodi laa rai Herodes ono ai nodi molollo noho Galilea eni. Lere onne Herodes aile Yerusalem haenhi.

<sup>8</sup> Herodes do'onedi Jesus ne, ai raram nahuwa'an wake'e ono nalo'oledi me'e raram nodi rehi pakromo noro Yesus. Ai raram nodi do'on Yesus hi'i tanada man ri kan dodo'onnale makun, ono nadedem derderne Ri eni Nin hini'i wenehwe me'e.

<sup>9</sup> Enine Herodes na'ukani Ai warna-warna, maa Yesus kan walhala ida.

<sup>10</sup> Enimaa imam-imam lalap roro meser Horok Lap enihe na'akeme ramriri wewerre rai kalaruna tumdesne Yesus mamani.

<sup>11</sup> Kame'ede Herodes noro nin ke'urauk enihe hadwei hadwokor Ai. Hi rala rai nin nainair nanaru rodi rainedi Yesus nanumene hopon nin ke'urauk enihe rodi Ai wali'ur laa nakpali Pilatus.

<sup>12</sup> Nonolu, Herodes noro Pilatus ramwali arwali, maa lere onne me'e de woro'ohe rahuwa'an wali'ur.

<sup>13</sup> Enime'ede Pilatus poluwuku imam-imam lalap roro kote nin man panulu enihe roro idewe kote ne'en raram,

<sup>14</sup> la ne'el hi na'ahenia, “Mim tumdesne ri eniyeni ma'aheni Ai nawa'u ri leke yon derne rakani Roma nin ma nodi molollo enihe. Mi mehem do'onedi ya'u koklolo a'inauwedi Ai me'e, de mau-

roin ka'u do'on Nin salida molmolle mi ma'aheheni eni.

<sup>15</sup> Enla Herodes me'ene kan do'on Nin salida penia hopon wali mai eni nakpali ya'u wali'ur. Namlolo kokkoo, ri eni kan hi'i yak salida leke lernala hunukum makmaki.

<sup>16</sup> Onne penia ya'u lo'o riuk rerhe nanumene huriyedi wali'ur.”

<sup>17</sup> [Nadedem rakan Lere Alam Lalap Paska eni Pilatus huri ri ida man aile bui raram lernohi noho honolla.]<sup>†</sup>

<sup>18</sup> Hir dernedi onneni ne, ri na'akeme wakau wewerre ra'ahenia, “Resnedi Yesus la huriyedi Barabas mayai.”

<sup>19</sup> Barabas eni rala laa bui raram ono nesne ri la hi'i wowo'o ar'arra nawa'u kote raram leke yon derne rakani Roma nin molollo haenhi.

<sup>20</sup> Pilatus raram nodi huri Yesus, de noro hi wakunu wali'ur leke huri Ai,

<sup>21</sup> maa heri onne wakaukau mamani, “Wairesnedi here! Wairesnedi here!”

<sup>22</sup> Pilatus wakunu rewkelu nine na'ahenia, “Hi'ihepeni? An hi'i inhawa yaksala pe? Ka'u do'on Nin yaksalida ma namnehe na'alono noro hunukum makmaki. Ende ya'u hopon ri riuk rerhe mehe mene huri wali'uredi.”

<sup>23</sup> Enimaa hi rodi ahan wakaukau mamani ra'aheni, “Wairesnedie! Wairesnedie here!” Kame'ede rir wanakau eni kerne rehire-hiyedi Pilatus,

<sup>24</sup> de nala kenekrohu lernohi rir napanpanak eni.

<sup>25</sup> Pilatus huri we'eredi Barabas man hi rapanak huri

<sup>†</sup> 23:17 Lisir eniyeni kaale lolo Horok Lap dedesne (naska) heruwali.

eni, kade an minle bui raram  
ono nesne ri la nawa'u ri  
yon derne rakani Roma nin  
molollo, maa Pilatus nala  
Yesus kani hi leke rodi laa hi'i  
lernohi rir suk mehe.

*Wairesne Yesus lolo Au  
Kekiyowok*

(Mat. 27:32-44; Mrk.  
15:21-32; Yoh. 19:17-27)

<sup>26</sup> Hi rodi Yesus rala'a ne, holikuku manin Kirene ida naran Simon ma nin panaeku laa kote raram mehe. Hi rakerne paku na'uwara au kekiyowok onne nodi lernohi Yesus.

<sup>27</sup> Ri nammori rala'ala'a lernohi Yesus, la lolo heri onne maeke wo'iraha ma naherhere Yesus aile haenhi.

<sup>28</sup> Enime'ede Yesus wali oin makan po'onala hi na'aheni, "Heih, mama ma nano Yerusalem mie! Yon MaherA'u me'e, maa mahere mi kemen moro mi anumhe mehe,

<sup>29</sup> ono na'amoli rakan ler ida<sup>‡</sup> ri na'aheni, 'Idee! Maeke ma kan moriyana, lernala rere'e haharu narehi!'

<sup>30</sup> Lere onne ri napanak wo'or-wo'or man kulu noro man deul ra'ahenia,  
'Mapye'er here! Duniyesnedi  
yai ke'e!' \*

<sup>31</sup> Ya'u molmolle au'ono man mormori de sus mene aiyé na'ané, maa mi man hi'i dohohala maisa au'ono ma napro'ukedi me'e de rakan lere sopoledi aiyé raram, pelek na'an horu. Ya'a'aheni eni ono lo'o rin hi'i

heheni Maya'u ma na'alehe dohohala, hi lo'o hi'i ha man eren apipinha ki mi man hi'i dohohala. §"

<sup>32</sup> Lere onne hi rodi mo'oni woro'o man ailanna laa kote paharne hukumesne haenhi.

<sup>33</sup> Rakanedi onno man rin wekel 'Uluwaku Rurna', hir wairesne Yesus noro ri ailanna woro'o onnenihe, ida lolo Yesus herne malanna la ida minle herne mariri.

<sup>34</sup> Enime'ede Yesus hi'i lir napanak na'ahenia, "Papee!  
Mala ampun hi ono ka rauroin inhawa hir hihi'i eni." Ma nasala ke'urauk hi'i undi leke rauroin inhoi lernala Yesus Nin nainair. \*

<sup>35</sup> Ri nammori ramririri lolo onne po'onala ha ma namwali na'akeme onne, la Yahudi rir man panulu me'ene ilnohi ralnohi Ai ra'aheni, "Lo'o mamwali Kristus man Makromod Lalap kikanedi namwali Rai laa ewi-ewi, hi'ihepenia kam paekunala mahala O kemmu nano apinpinheni? Ri namehin me'ene Om ma'ohu mahaledi meneel!"

<sup>36</sup> Ma nasala ke'urauk enihe hadwei hadwokor Ai haenhi. Hir mai leke rala anggur ma'alino Ai nomun,

<sup>37</sup> la ra'aheni, "Lo'o mamwali Yahudi rira Rai, mahaledi O kemmu ke'e!"

<sup>38</sup> Lolo au kekiyowok honorokana ida aile Yesus uluwakun wawan ma na'ahenia:

ENI PENIA RI YAHUDI RIR RAI.

<sup>‡</sup> 23:29 'Ler ida onne' wekel lere hair Roma mai ollok Yerusalem raiye'eredi kote la resnedi kote ne'en raram na'akeme. \* 23:30 Hos. 10:8 § 23:31 Wanakunu Yunani na'aheni: 'Lo'o au man mormori me'ene, rin hi'i heheni, emene hi'ihehewi noro au ma napro'ukedi me'e?' \* 23:34 Mzm. 22:19

<sup>39</sup> Ri ida nano man ailanna woro'o onnenihe ilnohi nahnobi Yesus na'henia, "Lo'o O mamwali Kristus man Makromod Lalap kikanedi namwali Rai eni, mahaledi O kemmu noro mayai ke'e!"

<sup>40</sup> Maa man ailanna namehin eni dadiyale na'henia, "Hoi! Moro Ai lernala hunukum makmaki haenhi. Alhi'ihepenia ka mamka'uk Makromod Lalap Nin hunukum?!"

<sup>41</sup> Ikroko lernala hunukum ma namnehe na'alono noro iknik dohohala, maa Ai eni kan hi'i ha yakyak ida."

<sup>42</sup> Enime'ede ai ne'el Yesus na'henia, "Yesus, horhoroka'u lere Om mai mamwali Rai lolo Num nohe."

<sup>43</sup> Yesus walhe na'henia, "Horhorok Ainu'u nou ma na'ono eniyeni: Lere eni me'ede o moro Ya'u min wewerre Firdaus raram."

### Yesus Maki

(Mat. 27:45-56; Mrk. 15:33-41; Yoh. 19:28-30)

<sup>44</sup> Rakanedi lere ulu ne, noho onne na'akeme na'umetekedi hehen nanumene riuk wokelu lere mamamal,

<sup>45</sup> ono lere kan hari. Ideweni ne, tapi rodi kawkawa Makromod Lalap Nina Romleu Lap raram eni, nahinarukedi namwali woro'o.

<sup>46</sup> Enine Yesus wakau naruri na'henia, "Pape! Ya ala Ya'u hamaran kani O liman raram me'e." Na'aheni onne horu, aran horuwedi.

<sup>47</sup> Uluwakun ke'urauk eni do'odo'on ha ma namwali onneni ne, ai na'uli nasa'a

Makromod Lalap na'ahenia, "Memen namlolo kokkoo, Ri eniyeni Ri mololole!"

<sup>48</sup> Heri rahu man maiwuku lolo onne do'on ha wo'ira ma namwali onne horu ne, akinhe woir wake'e la rala'a me'e.

<sup>49</sup> Maa Yesus Nin heri man lernohi na'akeme, roro maeke-maeke man lernohi Ai nano Galilea, ramririri kan ko'uwala po'opo'on ha wo'ira na'akeme ma namwali eni.

### Karu Yesus

(Mat. 27:57-61; Mrk. 15:42-47; Yoh. 19:38-42)

<sup>50-51</sup> Ri ida aile naran Yusup. Ai namhara nano leke Arimatea man aile noho Yudea. Ai onne ri mololole la akin mou, la mahan weilapan Makromod Lalap Nin lere alam mai nodi molollo ri mormori. Ai noro Yahudi rir man panulu namehin enihe radedem hopun pepen lolo Sanhedrin nin honopun penepen haenhi.\* Enima a lere hi rala kenekrohu resne Yesus, ai ka ne'enohi rir panaeku onne.

<sup>52</sup> Enime'ede Yusup laa na panak Pilatus nala Yesus ihin kemen leke na'akene manaku.

<sup>53</sup> Ai nalkopuredi Yesus ihin kemen nano au kekiyowok, nodi tapi lenan komonedi la nodi laa loiyedi ku'il ma namwali lunna raram. Rin wakeke waku hi'iyedi ku'il onne me'e, maa ka rala maki loile makun.

<sup>54</sup> Lere Yesus maki onne lere alam ri Yahudi ra'akene

\* **23:50-51** Lolo Sanhedrin onne Yahudi rir man panulu ho'ok kail agame nin panaeku wo'ira. Po'onala 22:66 haenhi.

ha wo'ira leke yon howok rir  
Alam Renren Warwarna ma  
na'ikeki rakan me'e.

<sup>55</sup> Lere onne maeke manin  
Galilea man lernohi Yesus  
enihe mai lernohi Yusup leke  
po'on karu Yesus ihin kemen  
lolo ewi.

<sup>56</sup> Do'onedi Nin ku'il eni  
ne, hir wali laa nakar  
ra'akenkene rampa-rampa  
noro wuru wola'ula'u leke  
rodi laa ra'akene Yesus  
ihin kemen, maa rakanedi  
Alam Renren Warwarna, hir  
warnala lernohi Makromod  
Lalap Nin keneri hono'ok.

## 24

*Yesus mori wali'ur*

(Mat. 28:1-10; Mrk. 16:1-8;  
Yoh. 20:1-10)

<sup>1</sup> Rakanedi alam domeku  
nohoropo al'alam wake'e ne,  
maeke onnenihe rodi rampa-  
rampa noro wuru wola'ula'u  
onnenihe laa Nin ku'il me'e.

<sup>2</sup> Hir rakanedi ne, hir po'on  
waku lapa rodi el'elek ku'il  
onne napoiyedi laa herne  
me'e.

<sup>3</sup> Enime'ede hir laa ku'il  
raram, maa kar do'on Makromo-  
d Yesus ihin kemen,

<sup>4</sup> de ramririri mehe  
kakaiyedi. Ramlilinnohi  
mo'oni woro'o ma nair  
nainair wawarhe man siksik  
lerlere ramriririnohi.

<sup>5</sup> Ideweni ne hi ramka'uk  
rehi la kadi ein korno rawa  
yawa ri woro'o onne kalarna,  
maa mo'oni onnenihe re'el hi  
na'henia, "Hi'ihepenia mim  
mai manoin Ri man mormori  
lolo ri makmaki onno?

<sup>6</sup> Ai kan min mai eni,  
An mori wali'uredi me'e!  
Lo'o mim hamlinuwedi Nin  
wanakunu lere mi moro Ai  
min wewerre lolo Galilea?

<sup>7</sup> Lere onne Ai na'aheni Ri  
Mormori Ananne lo'o rala  
kanile man hi'i dohohala leke  
wairesne, la alam wokelu  
mori wali'ur."

<sup>8</sup> Enime'ede hir horoknala  
Yesus Nina wanakunu onne.

<sup>9</sup> Kame'ede hir wali laa  
nakar me'e. Rakanedi ne,  
hir wakunu ha ma namwali  
onne laa Yesus Nina Ri  
idaweli ida man loikaru  
Lirna Wawa'an eni noro  
idewe ri man lernohi Ai  
namehin na'akeme.

<sup>10</sup> Maeke ma nodi lira on-  
nenihe, Maria manin Mag-  
dala, Yohana, Yakobus inna  
Maria, noro maeke namehin  
makun.

<sup>11</sup> Yesus Nin ma nodi Lirna  
Wawa'an roro namehin  
enihe dernedi rir wanakunu  
onneni, maa rauroin rir  
wanakunu eni namwali koir-  
wakar ma kan min haida, de  
ka rakanie.

<sup>12</sup> Maa Petrus namriri la  
peleklek lari laa ku'il ma  
namwali Yesus Nin lunne.  
Rakanedi ne, an rawa po'on  
laa ku'il raram do'on tapi rodi  
kokomon mehe aile. Enine  
an wali me'e la noro akin  
wakunu na'ahenia, "Inhawa  
ma namwali enie?"

*Yesus nalhari kemen  
mo'oni woro'o ma nala'a laa  
Emaus*

(Mrk. 16:12-13)

<sup>13</sup> Lere onne mo'oni woro'o  
man lernohi Yesus rala'ala'a  
laa leke ida naran Emaus,  
ko'unne lo'o kilo idaweli ida  
nano Yerusalem.

<sup>14</sup> Hir rala'ala'a ne, hir  
wakunkunu panaeku ma  
namwaliyedi Yesus alam ida  
woro'o man laedi eni.

<sup>15</sup> Hir wakunkunu ne,  
Yesus mai noro hi ra'alono  
wewerre.

<sup>16</sup> Hir do'on Yesus, maa Makromod Lalap kawala hi honorok akin de ka rahiynale.

<sup>17</sup> Enime'ede Yesus na'ukaniyalhe na'ahenia, "Maham wakunu inhawe?"

Enine hi ramririyala la hi oin makan koko raram yakyakedi.

<sup>18</sup> Enime'ede ri ida nano woro'o onnenihe ma naran Kleopas na'ukaniyale, "O mamhara nano ewi pe, kam do'on mauroin ha ma namwali domeku man laedi eni?"

<sup>19</sup> Yesus na'ukani wali'ur, "Inhawa panaeku pe?"

Woro'ohe ra'heni, "Ka mauroin inhawa hir hihi'i lolo Yesus ma nano Nazaret onne? Ai onne Nabi man kukul Nin molollo lolo Nin wanakuku noro idewe hini'i man ri kan dodo'onnala makun. Ai nahuwa'anedi Makromod Lalap akin la ri nammori horhawe.

<sup>20</sup> Imam lalap roro ainim man panulu enihe rala Ai kanile man hukum de wairesnedi lolo au kekiyowok me'e.

<sup>21</sup> Nano nonolu me'ede, ai mauroin nahenia Ai penia man mai leke huri we'er maika, ri Israel, nano iknik arwali, maa onne ka namwali ono hi resnedi Ai alam wokelu man laedi me'e.

<sup>22</sup> Ainin man howok wali mama ida woro'o hi'i ahumarmarnedi mayai ono orereki al'alame hir laa ka'ar Nin ku'il,

<sup>23</sup> maa kar do'on ihin kemen me'e, de hir wali mai konohi nahenia hir do'onedi hophopon a'am raram woro'o me'e. Hophopon

onnenihe konohi hi nahenia Yesus mori wali'uredi me'e.

<sup>24</sup> Enime'ede ai walin ida woro'o laa Nin ku'il do'on ha wo'ira na'akeme naise maeke onnenihe wakunkunu eni, maa hi kar do'on Yesus haenhi."

<sup>25</sup> Enime'ede Yesus ne'el woro'ohe na'ahenia, "Eih, ri poloo mie, sus mene mim derne makani nabi-nabi lirna nonolu eni.

<sup>26</sup> Mi lo'o hamlinuwedi nabi-nabi nonolu eni konihiyedi nahenia panaeku onne namwali lere man maie? Hi ra'aheni Kris-tus man Makromod Lalap kikanedi namwali Rai eni lo'o lernala apinpinha wo'operperi nammori nanumene maki, maa An mori wali'ur la kokala Oin Naran kukulu lalapa."

<sup>27</sup> Onne horu Yesus na'amou na'aropo wanakunu man aile Horok Lap ma na'ono Ai kemen nano Musa nin horok rakan nabi-nabi namehin rir horok haenhi.

<sup>28</sup> Na'akeki rakan leke hir lalaa eni ne, manlo'o Ai nala'a mamani,

<sup>29</sup> maa mo'oni woro'o onne rapanak an'anchedi Yesus min wewerre noro hi me'e ono lere helem me'e. Ende Yesus ne'enohi de noro hi ra'alono leke minala wewerre a'alam onne.

<sup>30</sup> A'alam onne hi raikoro mei ne, Yesus nala roti napapanak trimkasi Makromod Lalap nanumene a'una'ahe nala hi ra'an.

<sup>31</sup> Ideweni ne hi makan mouwedi la rahiynnaledi Yesus me'e, maa mehe naplenedi wali'ur.

<sup>32</sup> Enine ida ma ne'el ida na'ahenia, "Idedi eni koro

Ai wakunu lolo kalla, Nin wanakunu ma na'amou na'aropo Horok Lap Lirna maika nedille ik akin penia ik akin nahuwa'an wake'e ho!"

<sup>33</sup> A'alam onne me'ede hir wali wali'ur laa Yerusalem. Rakanedi enne ne, hir laa pakromo noro Jesus Nin man lernohi pakunohi idaweli ida man maha raikoro wuku roro Nin man lernohi namehin enihe.

<sup>34</sup> Man lernohi onnenihe konohi mo'oni woro'o onne ra'heni, "Eih! Kokkoo! Makromod moriyedi me'e! Ai nalhariyedi kemen Simon Petrus me'e."

<sup>35</sup> Kame'ede mo'oni woro'o onnenihe wakunu inhawa ma namwali lolo kalla laa Emaus, la hi'ihehewi Jesus mahan a'un roti nanumene hi rahiyennale.

*Jesus nalhari kemen Nin man lernohi pakunohi enihe*

(Mat. 28:16-20; Mrk. 16:14-18; Yoh. 20:19-23; HN. 1:6-8)

<sup>36</sup> Hir wakunkunu panaeku ma namwali onne makun ne, ramlilinnohi Jesus namriri aile hi leken kalarna me'e la na'heni, "Moiliwi mahuwele ki mi!"

<sup>37</sup> Hi rahumarnedi la ramka'uk rehi ono hir pene'ek hir do'onedi maki hamarne me'e.

<sup>38</sup> Enime'ede Jesus ne'el hi, "Hi'ihepenia mamka'uk la mi akim ka namkene Maya'ue?

<sup>39</sup> Po'onala Ya'u liman ein, leke mauroin e'eni Maya'u. Ken rouwalle I kem'u ono maki hamarne na'alehe ihih kemen naisa i kem'u mim dodo'on eni."

<sup>40</sup> Wakunuweddi onneni ne, An kukul liman ein ma namno'ono'o hir po'on.

<sup>41</sup> Hi akin nahuwa'an wake'e, maa mehe kakaiyedi makun ono akinhe ka naili'il wawa'an makun. Enine Jesus na'ukani hi na'henia, "Minim hanana'an aile mai eni, ee ka?"

<sup>42</sup> Enime'ede hi rala i'in he'ihe'ik sidalida kani Ai na'an.

<sup>43</sup> Ai nalle na'an lolo hi kalarna.

<sup>44</sup> Na'an horu, Ai ne'el hi na'henia, "Nonolu lere Yo oro mi minwuku makun Ya'u konohiyedi mi nahenia ha wo'ira ma na'ono Ya'u kemen man horokedi aile Musa noro nabi-nabi rira horok noro horok Mazmур onne kan sala, maa namlolo kokkoo namwali."

<sup>45</sup> Horu ne, An hariyedi hi honorok akin leke rauroin Horok Lap Lirna La'an.

<sup>46</sup> Ai ne'el hi na'henia, "Horhorok aile ma na'henia, 'Kristus man Makromod Lalap kikan namwali Rai laa ewi-ewi eni lo'o lernala apinpinha wo'operperi mene maki, maa rakan lere wokelu nine, An mori wali'ur.

<sup>47</sup> Enla Rai onne Nin man lernohi rodi Nin molollo loikaru Ai Lirna Wawa'an la wakuku ri mormori nano Yerusalem rakan idewe noho wawan na'akeme leke hir herredi rir morimori ma ka namlolo eni, wali derne rakani Makromod Lalap la lernala ampun hirira dohohala.'

<sup>48</sup> Mi penia mammwali man kuku maka ha wo'ira na'akeme eni.

<sup>49</sup> Enla ka nalo'ol Ya'u aku Makromod Lalap Nin Roh

man Ya Am'u nouwedi nala  
ki mi. Ende mamkene lolo  
koteni hehen nanumene  
mim lernala Nin molollo  
onneni."

*Yesus nakinikan laa a'am  
raram*  
(*Mrk. 16:19-20; HN. 1:9-11*)

<sup>50</sup> Onne horu, Yesus noro hi  
laa kote paharne laa onnida  
na'uranrani leke Betania. Hir  
lae ne, An kikan liman leke  
namre'e namharu hi.

<sup>51</sup> Maha namre'e namharu  
hi makun, Ai nakinikan laa  
a'am raram me'e, de hir  
memehedi lolo onne me'e.

<sup>52</sup> Enine hir rawa la ra'uli  
rasa'a Ai me'e. Horu ne, hir  
wali laa Yerusalem rodi aki  
ma nahuwa'an wake'e.

<sup>53</sup> Akilere hir lawuku lolo  
Makromod Lalap Nin Rom-  
leu Lape ra'uli rasa'a Ai ma-  
mani.

## Yohanis

### *Horok Lirna La'an*

Ri man hi'i horok eniyeni rapolu 'Ai man Yesus naramyak', ee 'Yesus Nin man lernohi man Ai naramyak' (21:20-24; 13:23; 19:26; 20:2; 21:2-7). Men-melollo ri Kristen rir ri leleher nano nonolu eni me'enile Yohanis.

Yohanis na'aheni nin panaeku hi'i horok eni heheni: Lere onne Yesus nodi Makromod Lalap Nina ke'eke'el an'anha hi'i tanada man ri kan dodo'onnale makun nammori lolo man lernohi pakunohi enihe kalarna, maa tanada on-nenihe kar horok mai eni. Enimaa ri man hi'i horok eniyeni, horok tanada eniyenihe leke mi akim naili'il Yesus, leke mi mauroin nahenia Makromod Lalap kikanedi Ai namwali Rai laa ewi-ewi, leke mi mauroin Ai onne Makromod Lalap Anan haenhi. Enla mi na'akeme ma akin naili'il Ai eni, mim lernala or'ori dardari man kan horu (20:30-31).

Lolo panakan 1 rakan 12 ik les tanada man lewlewen wo'ikku man Yesus hi'ie. Tanada eniyeni kukul nahenia namlolo kokkoo Yesus namwali Makromod Lalap Anan.

Lolo horok eni Yesus rapolu Makromod Lalap Anan rew'ira (1:34; 1:49; 3:16-18; 5:23-25; 11:4; 11:27; 20:31).

Lolo horok eni Yesus hari panaeku nammori

ma na'ono Ai kemen nodi wanakunu lirna, 'Ya amwali...'

"Ya amwali hanana'an ma nala or'ori dardari!" (6:35)

"Ya amwali ropropo noho eni wawan!" (8:12)

"Ya'u penia amwali pipi ro'o nina nike." (10:7, 9)

"Ya'u eni man huri wawa'an." (10:11, 14)

"Ya amwali or'ori dardari onno!" (11:25)

"Yau eni penia amwali kalla." (14:6)

"Yau eni anggur ono ma namlole." (15:1)

Lolo horok eni Yesus na'ahenia, "Loi honorok wawa'an Ainu'u panaeku ma na'ono eniyeni: lere kar mori Abraham makun, Ya'u aiyedi me'e!" (8:58) Eniyeni kukunohi nahenia Ai namwali Makromod Lalap Anan man aile mamani nano lere dedesne wake'e rakan laa ewi-ewi.

### *Horok Ihin*

1. Man hi'i horok eni hi'i wanakunu dedesne (1:1-18).
2. Yesus hi'i tanada man ma'aruru wake'e la Ainin wanakuku nodi kunukunohi nahenia Ai penia namwali Makromod Lalap Ananne (1:19-12:50).
  - a. Yesus Nin honowok dedesne lolo noho wawan (1:19-4:54).
  - b. Yesus Nin hini'i wenewhe lolo kota Yerusalem Alam Ren-ren Warwarna (pnk. 5).
  - c. Yesus Nin hini'i wenewhe lolo noho Galilea Lere Alam Lalap Paska (pnk. 6).

- d. Yesus Nin hini'i wenewhe lolo noho Yudea nin Lere Alam Lalap Heuheu Man Ra'an Romunle Raram (7:1-10:21).
- e. Yesus Nin hini'i wenewhe naurani Lere Alam Lalap Paska (pnk. 11-12).
3. Nauraniyedi nin makmaki me'e, Yesus loikaru Nin wanakuku la nounaku man horu (pnk. 13-17).
4. Rin kele Yesus resne, la An mori wali'ur (18:1-20:29).
5. Man hi'i horok eni kukunohi horok eni nin panaeku (20:30-31).
6. Yesus nalhari kemen Nin man lernohi pakunohi wo'ikku (pnk. 21).
- nodi molollo ropropo onne me'e.
- <sup>6-7</sup> Enine Makromod Lalap hopon ri ida ma naran Yohanis mai noho wawan namwali ma na'amou na'aropo wanakunu ma na'ono ropropo onne, leke ri na'akeme man derne ainina wanakunu onne akinhe naili'il ropropo onne.
- <sup>8</sup> Yohanis ka namwali ropropo onne, maa an mai leke nala wanakunu ma na'ono ropropo onne.
- <sup>9</sup> Ropropo ma namlolo wake'e onne kopur mai noho wawan, la ropedi lolo ri mormori na'akeme me'e.
- <sup>10</sup> Ai ma nakuku nawa'u noho wawan eniyeni aiyedi mai noho wawan me'e, maa manin noho wawan eni ka rauroin Ai.

<sup>11</sup> An maiyedi Nina noho mememen, maa Nina ri mormori wali ka rauroin Ai, la kar kokale,

<sup>12</sup> maa inhoi-inhoi man kokale, la akin naili'il Ai Naran, hir lernala molollo ramwali Makromod Lalap ananhe de lernala mormori worworu.

<sup>13</sup> Rin lernala mormori ma nadedem nano noho wawan nin panaeku, ee ri mormori rir suk raram nodi aimehi, maa mormori worworu onne lernala nano Makromod Lalap ono Ai penia man hi'i hi ramwali Ai ananhe.

<sup>14</sup> Lirna Wawan onne namwali ri mormori naise maika, de Ai kemen naise ik kemen haenhi, la An mai nano a'am raram minle ik leken kalarna. Ik do'onedi Nina ke'ke'e'l an'anha man ma'aruru wake'e man An kokala ono namwali Anan

### *Yesus Kristus namwali Lirna Wawan noro ropropo noho wawan*

<sup>1</sup> Nonolu wake'e noho eni ka rakuku rawau makun, Ai ma namwali Lirna Wawan aiyedi me'e, la Ai noro Makromod Lalap aile wewerre, la Ai onne Makromod Lalap haenhi.

<sup>2</sup> Nano nonolu wake'e onne Ai noro Makromod Lalap aile wewerre.

<sup>3</sup> Ai nakuku nawau noho noro ne'en raram na'akeme, la hi'i ha wo'ira na'akeme.

<sup>4</sup> Ai onne or'ori dardari onno, la or'ori dardari onne namwali ropropo ma na'aropo ri mormori akin penia rauroin Makromod Lalap Nin ropropo.

<sup>5</sup> Ropropo onne ropedi lolo metmetek, la metmetek ka

Kuru Mehe Lai Mehe, la An mai nano Aman, Makromod Lalap. Nano Ai penia ik do'on kauroin inhawé ma namlolo kokkoo lolo Makromod Lalap leken kalarña, la ik do'on kauroin Nin rere'e harharu man penpenu kemkeme maika.

<sup>15</sup> Lere Yohanis mai wakunu ha ma na'ono Yesus, ai na'heni, "Nonolu eni ya'u wakunu nahenia ri ida mai. Ai onne na'ono narehi maya'u, la Ai onne maiyedi me'e. Yo oluwed Ai mai, maa Ai penia ma na'ono narehi maya'u, ono kar mori ya'u makun Ai onne aiyedi me'e."

<sup>16</sup> Ai onne Nin rere'e harharu lap narehi, la Ai nodi rere'e harharu onne nala panaeku nammori leke namre'e namharu maika mamani.

<sup>17</sup> Lere nonolu Makromod Lalap namre'e namharu maika ono nala Nin keneri hono'ok lolo Musa, maa lere eniyeni Ai nala Nin rere'e haharu ma narehi ma nalewen maika lolo Yesus Kristus, la hi'i ika kauroin mouropo panaeku ma namlolo kokkoo.

<sup>18</sup> Ri mahaku kan do'onala Makromod Lalap makun, kokoko Anan Kuru Mehe Lai Mehe. Ai onne Makromod Lalap, la An min wewerre noro Aman lolo a'am raram. Ai penia man loikaru Makromod Lalap Nina honorok panaeku maika, leke ik kauroin Makromod Lalap haenhi.

*Yohanis man ulutada ri mehen wakunu kemen  
(Mat. 3:1-12; Mrk. 1:1-8;  
Luk. 3:1-18)*

<sup>19</sup> Ler ida ri Yahudi rir man panulu man minle Yerusalem enihe hopon imam-imam roro ri Lewi laa ra'ukani Yohanis na'henia, "O eni inhoi?" \*

<sup>20</sup> Yohanis kan suwarala nin panaeku maa walha hi mouropo nahenia, "Ka amwali Kristus man Makromod Lalap kikan namwali Rai." \*

<sup>21</sup> Enime'ede hi ra'ukani wali'ur, "O eni inhoi? O eni Elia?"

Yohanis walhe na'henia, "Ka!"

Hi ra'ukani wali'ur, "O eni mamwali nabi man Makromod Lalap nonou lolo Musa nonolu eni?"

Maa Yohanis walhe na'henia, "Ka haenhi." \*

<sup>22</sup> Enine konohi yai o eni inhoi, lekpananne am wali wali'ur laa konohi ri man hopon mayai mai ma'ukani o eni. Papa wakunu inhawa ma na'ono o kemene?"

<sup>23</sup> Yohanis nodi nabi Yesaya lirna nonolu eni walha na'henia, "Ya'u eni amwali ri man wakaukau lolo noho mamun ma napro'uk ma na'heni,

'Ma'ahari kalla, la ma'anehe leke Makromod lole.' "

<sup>24</sup> Kame'ede ri Parisi rir hohopon onnenihe ra'ukani wali'ur ra'ahenia,

<sup>25</sup> "Pape lo'o ka mamwali Kristus, ka mamwali Elia,

\* <sup>1:19</sup> Ri Lewi onne nadedem ilitolle lolo Makromod Lapa Nin Romleu Lap.

\* <sup>1:20</sup> Mzm. 2:2 \* <sup>1:21</sup> Ul. 18:15, 18, Mal. 4:5 \* <sup>1:23</sup> Yes. 40:3

la ka mammwali nabi haenhi, emene alhi'ihepe Papa nodi oir ulutada rie?"

<sup>26</sup> Enime'ede Yohanis wal-hale, "Ya'u eni ulutada ri odi oir mehe, maa lolo mi leken kalarna ri ida aile mi ka mau-roin makun.

<sup>27</sup> Ya'u mai noluwed Ai, maa Ai narehi nalewen maya'u penia Nina pakpak ei me'ene kan wa'an yo ohu."

<sup>28</sup> Ha eniyeni na'akeme namwali lolo leke Betania, man aile lolo oir wauwau Yordan wali kimur.

*Yesus namwali Makromod Lalap Nin pipdumana ma na'ohu nahala ri mormori rira dohohale*

<sup>29</sup> Rakan oreki, Yohanis po'onale Yesus mai me'e, la na'aheni, "Po'onale! Makromod Lalap Nina Pipdumana ma na'ohu nahala ri mormori rira dohohaleni mai me'e!"

<sup>30</sup> Nonolu ya aheni, 'Ya'u mai nolu ri ida ma narehi nalewen maya'u. Ai man ya'u wekel lere onne me'eni me'e. An kulu narehi ya'u ono kar mori ya'u makun Ai aiyedi me'e.'

<sup>31</sup> Nonolu ka auroin inhoi man Makromod Lalap kikan namwali Rai laa ewi-ewi, maa ya'u mai odi oir ulutada ri leke ri Israel enihe rauroin Rai onne inhoi."

<sup>32-33</sup> Yohanis kukunohi wali'ur na'ahenia, "Nonolu ka auroin Yesus namwali Rai onne makun, maa Makromod Lalap man hopon yo odi oir ulutada ri konohi ya'u heheni, 'Lo'o om do'on Roh Kudus kopur nano a'am raram mai ri ida wawan, o mauroin nahenia Ai onne ma

nodi Roh Kudus ulutada ri.' Enla rakan lerida ya'u do'on Makromod Lalap Nina Roh kopur naise manu merpati mai Yesus uluwakun wawan.

<sup>34</sup> Ende yo odi mak'u mehe do'on auroin ha onne na'akeme, penia ya amwali man kuku maka nahenia Yesus onne Makromod Lalap Ananne."

*Ri man lernohi pakunohi Yesus dedesne*

<sup>35</sup> Rakan oreki, Yohanis noro nina man lernohi pakunohi woro'o aile lolo onno onne wali'ur.

<sup>36</sup> Yohanis do'on Yesus lol-nohi hirira miminle onneni, ai na'aheni, "Po'onale! Ai onne penia Makromod Lalap Nin Pipdumana eni!"

<sup>37</sup> Woro'ohe derness Yohanis nin wanakunu ne, hir laa lernohi Yesus me'e.

<sup>38</sup> Yesus wali kili'ur do'on wero'ohe mahar lernohi, na'ukani na'ahenia, "Mi maham manoin inhaw?" Woro'ohe walha ra'ahenia, "Papa Meser min ewi?"

<sup>39</sup> Yesus walha hi na'ahenia, "Mai lernohi Ya'u leke mehem do'on Ainu'u miminloreni." Ende hir lernohi mamani laa Yesus Nin miminlole. Hi roro Yesus min lolo onne nano lere mamal rakan lere helem.

<sup>40</sup> Nano ri wero'o man lernohi Yesus onnenihe, ida naran Andreas, Simon Petrus mo'oni walla. Woro'ohe lernohi Yesus ono derne Yohanis nin wanakunu ma na'ono Ai.

<sup>41</sup> Andreas noro Yesus wakunu horu ne, idewe lari lan konohi Simon na'ahenia, "Pa'e, am pakromo noredi Mesias man Makromod

Lalap kikan namwali Rai laa ewi-ewi. (Lolo wanakunu Ibrani 'Mesias' onne 'Kris-tus'.)"

<sup>42</sup> Kame'ede ai norkaru walla Simon laa Yesus. Enine Yesus po'onala ai na'ahenia, "O naran Simon, la o ammu naran Yohanis! Maa nano lere eniyeni waki o naran Kepas napa'ahne, 'waku ma naruri'!" (Naran 'Kepas' onne namnenehe noro naran 'Petrus' haenhi.)

*Yesus napolu Pilipus noro Nataniel lernohi Ai*

<sup>43</sup> Rakan oreki wali'ur Yesus Nin panaeku wali laa Galilea, de lan naka'uk Pilipus na'ahenia, "Mam lernohi Ya'u!"

<sup>44</sup> (Pilipus onne manina Betsaida, la Andreas noro Petrus ramhara nano leke onne haenhi.)

<sup>45</sup> Enla Pilipus lan pakromo noro Nataniel la konohi na'ahenia, "Am pakromedi noro ri man Makromod Lalap kikan namwali Rai laa ewi-ewi me'e. Nonolu Musa kukunohiyedi panaeku ma na'ono Ai lolo nin horok me'e, la nabi-nabi namehin loikaruwedie panaeku ma na'ono Ai haenhi. Ai onne naran Yesus, Yusup anan ma nano Nazaret."

<sup>46</sup> Enimaa Nataniel walha na'ahenia, "Hi'ihehewi ha man wa'an mai nano Nazaret?!"

Pilipus na'aheni, "Mam lernohi mayai, leke mehem do'on idewe!"

<sup>47</sup> Yesus do'odo'on Nataniel mai, Ai na'aheni, "Po'onala! Ri eniyeni ri Israel ma nam-lolo wake'e. Ai onne ka nau-roin napoho!"

<sup>48</sup> Enine Nataniel na'ukani Yesus, "Pape, hi'ihehewi Pape nauroiroin ainu'u morimorie?"

Yesus walha, "Eh, Pilipus kan ki napolu o makun, Ya'u do'onedi o lolo ara ono lehern me'e."

<sup>49</sup> Nataniel walha na'ahenia, "Papa Meser, O penia Makromod Anan ma namwali Rai Israel!"

<sup>50</sup> Yesus na'ahenia, "Hi'ihehewi? Lo'o o akim naili'i ledi me'e ono Ya'u konohi o na'aheni Ya'u do'onedi o lolo ara ono lehern me'e? Lere man mai om do'on panaeku namehin man wa'an narehi onne!"

<sup>51</sup> Enla Yesus na'aheni wali'ur, "Horhorok Ainu'u nou ma na'ono eniyeni: Lere man mai mim do'on a'am nahinari la Makromod Lalap Nina hophopon a'am raram mahar ha'a kopur Maya'u man mai nano a'am raram namwali Ri Mormori Anan."

## 2

*Rin hi'i yapi hohoo lolo Kana*

<sup>1</sup> Rakan alam woro'o wali'ur, rin hi'i hohoo lolo leke Kana minle noho Galilea, la Yesus inna aile lolo yapi hohoo onne haenhi.

<sup>2</sup> Yesus noro Nina man lernohi pakunohi enihe lernala larlariyala de laa haenhi.

<sup>3</sup> Lere onne man korowuku ra'ukwuku enihe rir anggur horuwedi, de Yesus inna lan konohi Ai, "Rira anggur horuwedi me'e!"

<sup>4</sup> Yesus na'ahenia, "Alhi'ihepe mame konohi Ya'ue? Kan rakan Ainu'u ors

Ya alhari I kem'u heri do'on makun."

<sup>5</sup> Enimaa Yesus inna ne'el man howok lolo onnenihe, "Hi'i lernohi inhawe man Ai na'aheheni ki mi eni."

<sup>6</sup> Lolo onne hi ra'akenedi uhi woneme leke rala oir loile de nair rawana liman lernohi Yahudi nin agame. Uhi ida raramne potol rahu rehi.

<sup>7</sup> Kame'ede Yesus ne'el man howok enihe na'ahenia, "Mala oir loile uhi woneme enihe." Ende hi rala oir loile uhi woneme onne penu mouwedi.

<sup>8</sup> Horu ne, Yesus hopon man howok enihe, "Mala oir tarana modi laa malle man panulu lolo hohoo eni kenala." Kame'ede hi rodi oir onne tarana laa me'e.

<sup>9</sup> Ai nomun oir ma namwaliyedi anggur onne, maa ka nauroin anggur onne nano ewi, ono man howok ma nala oir halle uhi onnenihe mehe rauroin. Kame'ede man panulu lolo hohoo onne laa na'uraniyedi mo'oni man ho onne,

<sup>10</sup> na'aheni, "Nadedem yapi heheni ne, ri nala anggur wawa'an rala peina'a romun nolu leke rira suk horuwedi mene rala ma nadedem, maa i wal'u lapan ors eni mene mala anggur man wa'an wake'e!"

<sup>11</sup> Tanada man ri kan dodo'onnala makun eni, namwali dedesne Yesus hi'i minle leke Kana lolo Galilea. Lolo tanada eniyeni, An kukul Nin ke'eke'el an'anha ma narehi ma nalewen,

penia Nina man lernohi pakunohi enihe akin naili'il Ai.

<sup>12</sup> Horu ne, Yesus noro Nin inne, mo'oniwalinhe, noro Nin man lernohi pakunohi enihe wali laa Kapernaum. Hir min lolo onne alam woro'o wokelu.

*Jesus nohiye'er rarari ma na'olu hahaa lolo Romleu Lape raram*

(Mat. 21:12-13; Mrk. 11:15-17; Luk. 19:45-46)

<sup>13</sup> Yahudi rira Lere Alam Lalap Paska na'uraniyedi me'e de Yesus nala'a laa Yerusalem.

<sup>14</sup> Rakanedi Makromod Lalap Nin Romleu Lape nina nikoin ne, An po'on ri nammori maha ra'olu pip-duma, sapi, manu merpati, la heruwali raikoro raherre kupan lolo mei-meい man minle nikoin eni.\*

<sup>15</sup> Yesus hi'i kali namwali losno nanumene nodi laa nohiye'er rarari ri onne noro rir pipi noro sapi haenhi, la Ai nawaliyedi mei-meい rodi raherre kupan onnenihe de rira kupan wahair re'er rarari horu.

<sup>16</sup> Ai ne'el ma na'olu manu merpati onnenihe na'ahenia, "Ra'uk minim hahaa mamharedi lolo eni here! Yono modi Ya Am'u Nina Romleu hi'i pasar!"

<sup>17</sup> Kame'ede man lernohi pakunohi Yesus enihe horokala Horok Lap Lirna ma na'ahenia, "Ya'u raram nodi rehi ri mormori nodi

\* **2:14** Musa Nin keneri hono'ok hopon ri Yahudi lernohi Lere Alam Lalap Paska onne la hopon hi hoikani ha mormori lere onne haenhi. Onne penia ri ra'olu ha mormori la herre ri nin kupan man mai nano noho namehin man ko'u (Ul. 16:1-8).

Onum Romleu Lalap hi'i lir napanak mamani! Enla onneni Ainu'u suk wake'e penia nakoko Ya akin woir la lo'o Ya'u maki!" \*

<sup>18</sup> Yahudi rir man panulu enihe ra'ahan Yesus de ra'aheni, "O modi inhawa molollo hi'i ha eniyeni!? Kene Om hi'iyala tanada ri kar dodo'onnale ida leke ai mauroin nahenia Numa molollo aile hi'i ha ma naise eniyenihe!"

<sup>19</sup> Kame'ede Yesus walhe, "Ya'u hi'i tanada eniyeni. Maye'eredi Makromod Lalap Nina Romleu eniyeni, la alam wokelu raramne Ya aririe wali'ur."

<sup>20</sup> Enine hi ra'ahenia, "Ik upud a'adhe howok Makromod Nina Romleu Lapeni anna weli'akka woneme raramne mene horu! Hi'ihehewi Om ma'ariri wali'ur alam wokelu raram mehe?"

<sup>21</sup> Enimaa hi ka rauroin nahenia Yesus kan wekel Romleu Lap hir dodo'on onne, maa An wekel Ai kemen.

<sup>22</sup> Ende Yesus mori wali'uredi nano Nin mak-maki eni, mene Nina man lernohi pakunohi enihe horoknala Ai Lirn eniyeni, de nano lere onne hi rauroin kokkoo la akin naili'il inhawe man aile Horok Lape raram noro Yesus Nin wanakunu eniyeni.

*Yesus nauroinedi ri mormori rir honorok akin*

<sup>23</sup> Lere onne Yesus aile Yerusalem makun leke lernohi Lere Alam Lalap Paska,

la ri nammori akin naili'il Ai ono do'odo'on An hi'i tanada ri kan dodo'onnala makun.

<sup>24</sup> Enimaa Ai me'ene akin ka naili'il hi ono nauroiroin rira honorok panaeku.

<sup>25</sup> Ai ka napanak rin konohi hi honorok akin, ono Ai mehe ma nauroin wake'e inhawe man aile ri mormori honorok akin.

### 3

*Yesus pakromo noro Nikodemus*

<sup>1</sup> Ri ida aile naran Nikodemus. Ai onne ri Parisi la ai namwali man panulu ida nano agame Yahudi rir muku man ho'ok kail.

<sup>2</sup> Ai nodi a'alam ida mai Yesus na'ahenia, "Pap Meser, ai mauroiroin nahenia Papa namwali Meser man mai nano Makromod Lalap, ono Pape hihi'i tanada ri kan dodo'onnale makun ma nodi kunukunohi nahenia Makromod Lalap mehe norle'ule'u norwalwali O."

<sup>3</sup> Yesus walhe, "Loi honorok wawa'an Ainu'u panaeku ma na'ono eniyeni: Lo'o ri ida aile, maa kar mori ai wali'ur, ai onne ka namwali Makromod Lalap Nin ri, ono Makromod Lalap ka nodi molollo ai."

<sup>4</sup> Nikodemus walha Yesus, "Papa Meser Nina panaeku hi'i hehewi? Hi'ihehewi ri na'ileheredi me'e wali wali'ur laa inna konoin leke mori wali'ur?"

<sup>5</sup> Yesus walhe wali'ur, "Loi honorok wawa'an Ainu'u panaeku ma na'ono eniyeni:

\* 2:17 Mzm. 69:8 \* 3:5 Ri ma nauroin wanakunu Yunani nammori ra'aheni 'mori rodi oir' wekel ulutada ri, la heruwali ra'aheni 'mori rodi oir' wekel morimori ma nadedem.

Inhoi kar mori rodi oir\* noro Roh Kudus, ai onne ka namwali Makromod Lalap Nin ri, de kan laa onno man Ai nodi molollo raram.

<sup>6</sup> Lolo noho eniyeni ik kemen iknik ine mori, maa iknik morimori worworu eniyeni mai nano Makromod Lalap Nina Roh.

<sup>7</sup> Ende yono mi mahumarna Ainu'u wanakunu ma na'ahenia, lo'o kar mori wali'ure mi, ka mamwali Makromod Lalap Nin ri!

<sup>8</sup> Wa'an rehi ik kaho'ok ha eniyeni noro anna huhuu. Ik ka kauroin anna man huhuu onne mai nano ewi la huu laa ewi, maa ik derne la rase de kauroin nahenia anna aile. Onne naise ri man mori wali'uredi nano Makromod Nin Roh. Ik ka kauroin hi'ihehewi Nin Roh nala morimori worworu onne, maa ik do'on Ainin honowok lolo ri man lernaledi morimori worworu onne."

<sup>9</sup> Nikodemus na'ukani ho'o me'e, "Hi'ihehewi Pape Nina panaeku eni namwali?"

<sup>10</sup> Yesus na'aheni, "O eni mamwali meser Israel enihe! Emene alhi'ihepe o ka mauroin Ainu'u wanakunu enie?

<sup>11</sup> Horhorok Ainu'u panaeku eniyeni: Am wakunu inhawe man Ai mauroiroin la Am konohi mi inhawa man Am do'odo'on, maa mi kam kokala A nimana wanakunu eniyeni.

<sup>12</sup> Mi akim ka naili'il Ainu'u wanakunu ma na'ono inhawe ma namwali lolo noho eniyeni, de hi'ihehewi mi akim naili'il Ainu'u

wanakunu ma na'ono inhawe ma namwali lolo a'am raram ho'o?

<sup>13</sup> Ri mahaku kan ha'a laa a'am raram, naukara Ya'u man mai nano a'am raram. Ya'u mehe auroin inhawe ma namwali lolo a'am raram ono Ya amwali Ri Mormori Anan.

<sup>14</sup> Nonolu lere Musa minle noho mamun ma napro'uk onne, ai nala nee man rodi pere hi'ie wair lolo au meriri nanumene kikan laa wawan. Ende inhoi wanna uluwakun po'on nee onneni, ai onne kan maki, kade nee man aile lolo onne ni'ie. \* Naise onne haenhi, nonolu Makromod Lalap konohiyedi naheenia lere man mai rin kikan Ya'u, Ri Mormori Anan, laa wawan, †

<sup>15</sup> leke inhoi man akin naili'il Maya'u man Makromod Lalap kikanedi, ai onne lernala morimori man ma'aruru la ma kan horu eni.

<sup>16</sup> Makromod Lalap hi'i heheni ono naramyaka rehi ri mormori noho wawan penia Ai nala Anan Kuru Mehe Lai Mehe leke inhoi akin naili'il Ai yono maki ko'u Makromod Lalap, maa lernala or'ori dardari ma kan horu.

<sup>17</sup> Makromod Lalap kan hopon Anan mai nala hunukum noho wawan eni, maa An hopon mai leke huri we'er ri mormori nano dohohala nin molollo.

<sup>18</sup> Inhoi akin naili'il Makromod Lalap Anan, ai kan lernala hunukum. Enimaa inhoi akin ka naili'il Ai, an lernaledi hunukum makimaki,

\* 3:14 Bil. 21:9 † 3:14 Panaeku 'kikan Ya'u, Ri Mormori Anan laa wawan' wekel lere Yesus maki lolo au kekiyowok, noro idewe lere An mori wali'ur ha'a laa A'am raram.

ono akin ka naili'il Makromod Lalap Anan Kuru Mehe Lai Mehe!

<sup>19</sup> Makromod Lalap ho'ok kail ri mormori heheni, ono Ai Anan nodi ropropo maiyedi noho wawan me'e, maa ri mormori suk rehi noho momohone nano ropropo ono hir hi'i ha man ailanna mamani.

<sup>20</sup> Ri na'akeme man hi'i ha man ailanna, kar suk ropropo. Hi ramhene ra'urani ropropo onne, kalo'o ropropo onne nalhari rir hini'i man ailanne.

<sup>21</sup> Enimaa inhoi man raram nodi hi'i ha ma namlolo, hi akin namrana mai ra'urani ropropo onne leke rin do'on rira hini'i wenewhe rauroin mouropo nahenia inhwae man hir hi'i onne lernohi Makromod Lalap Nin honorok panaaku."

### *Yesus nodi molollo narehi Yohanis*

<sup>22</sup> Onne horu, Yesus noro Nina man lernohi pakunohi enihe ramhara rala'a laa noho Yudea minala enne tarana, la rodi oir ulutada ri lolo noho onne.

<sup>23</sup> Lere onne Yohanis mahani ulutada ri lolo leke Ainon, ono lolo onne oir nammori aile, la akilere ri nammori mai leke ulutade. Leke Ainon onne na'uranrani leke Salim.

<sup>24</sup> Lere onne ka rala Yohanis laa bui raram makun.

<sup>25</sup> Enla lerida Yohanis nin man lernohi enihe roro ri Yahudi ida rasesi panaaku ma na'ono hi'ihehewi rodi oir ra'amou ra'adewe kemen lolo agame nina holoor halauk.

<sup>26</sup> Enla nin man lernohi enihe mai re'el Yohanis ra'aheni, "Papa meser, horokala lere nonolu papa kukul ri ida mayai lere minle oir Yordan wali? Po'onala! Lere eni Ai mahan ulutada ri nammori de kar mai pape me'e!"

<sup>27</sup> Enine Yohanis walha na'ahenia, "Lo'o ik ri mormori kak lernala ruri pe'el nano Makromod Lalap, ik ka kauroin hi'i haida-haida. Na'akeme man ik lernala, onne mai nano a'am raram.

<sup>28</sup> Mi mehem dernessi nano nonolu ya'u kukunohi mouropo nahenia ya'u eni ka amwali Kristus, maa Makromod Lalap hopon ya'u mai nolu hari kalla Ai.

<sup>29</sup> Ya ala wanakunu naho'ok nano hohoo. Lo'o mo'oni ida ho, ai onne ma na'ono, la maeke man ho namwali ai hono mehe, maa nin orwali akin nahuwa'an paku mo'oni man ho la raram nodi wake'e derne man ho onne lirna. Ors eni ya akin nahuwa'an, ono ya aise man ho nin orwali, la Yesus naise man ho. Ya akin nahuwa'an wake'e ono ya'u dernessi Ai lirna, la ri nammori lernohi Ai.

<sup>30</sup> Ai penia ma na'ono wake'e, de wa'an rehi Ai eren lalap la ya'u eren tatana.

<sup>31</sup> Ai onne mai nano a'am raram, de An kulu lapa narehi na'akeme. Ri man minle noho wawan mai nano noho eniyeni, de hi ramwali ri mormori ma nadedem la hir wakunu noho wawan nin panaaku mehe. Enimaa Ai man mai nano a'am

raram onne narehi nalewen na'akeme.

<sup>32</sup> An wakunu inhawe man An do'on la derne, maa ri mormori noho wawan eni ramhene rakani Ainina wanakunu.

<sup>33</sup> Enimaa inhoi kokala Ainin wanakunu, onne nodi kunukunohi nahenia ai nauroinedi mouropo Makromod Lalap Nin wanakunu na'akeme namlolo kokkoo.

<sup>34</sup> Onne namlolo ono Makromod Lalap hopon An mai leke wakunu nodi Lirna. Ai naledi Nina Roh nodi na'enuwedi Yesus akin me'e.

<sup>35</sup> Ik Amad, Makromod Lalap, naramyaka Anan Yesus, la naledi molollo penia ha wo'ira na'akeme lolo yawa Ai me'e.

<sup>36</sup> Inhoi man akin naili'il Makromod Lalap Anan onneni, ai onne penia man lernala or'ori dardari ma kan horu. Inhoi kan derne nakani Makromod Lalap Anan onneni, kan lernala or'ori dardari onne, la na'akene kokala Makromod Lalap Nina hunukum ma kan horu laa ewi-ewi."

## 4

### *Yesus wakunu noro maeke Samaria*

<sup>1</sup> Ka nalo'olo ri Parisi enihe dernessi nahenia ri nammori lernohiyedi Yesus, la rapanak An ulutada hi, penia ri man lernohi Yesus nammori rehi nano man lernohi Yohanis me'e.

<sup>2</sup> Yesus me'ene kan ulutade, maa Nina man lernohi pakunohi enihe penia man ulutade.

<sup>3</sup> Ende rakan lere Ai nau-roin ri Parisi derne ri nam-mori lernohiyedi me'e, Ai namharedi nano noho Yudea wali wali'ur laa Galilea,

<sup>4</sup> maa An lolo kalla man lole noho Samaria.

<sup>5</sup> Yesus rakan leke ida naran Sikhar, la leke eni kan ko'u nano lari ipida man nonolu Yakup nale anan Yusup.

<sup>6</sup> Lolo lari ip onne Yakup nin oir makan ida aile, de Yesus naikoro warnala lolo oir makan onne. An mae-hedi ono nala'a ko'u, la lere uluwedi me'e.

<sup>7</sup> Kan mahe ne, maeke Samaria ida mai nahur oir me'e. Yesus ne'el ai na'ahenia, "Mame, malala oir ida Yo omunale ke'e." <sup>8</sup> Nina man lernohi pakunohi enihe laedi kote leke weli banana'an me'e.

<sup>9</sup> Maeke Samaria onne ne'el Yesus, "Alhi'ihepe Papa manina Yahudi napanak oir maya'u manina Samaria?" Maeke onne wakunu heheni ono manina Yahudi ramhene rawaur noro manin Samaria.

<sup>10</sup> Yesus walhale, "Lo'o mauroinedi Makromod Lalap Nina rere'e haharu, la mauroin Maya'u eni inhoi, o mapanak Ya ala oir momun, la namlolo kokkoo Ya ala oir ma nala or'ori dardari ki o."

<sup>11</sup> Enla maeke onne ne'el Ai na'ahenia, "Pape, oir makan eni rorom, la Papa Nin kip-kali kaale, de hi'ihehewi leke mahur oir ma nala or'ori dar-darie?"

<sup>12</sup> Ai upme Yakup nala oir makan eni mayai man min lolo eniye nihe, la ai noro ananhe me'ene romun nano oir makan eni na'uwalii rir ha

mormori na'akeme haenhi! Alhi'ihepe Papa nauroin nahenia Papa kulu narehi nano ai upmu Yakup? Lo'o ri kaale ma nala oir man wa'an narehi man Yakup nala mayai!"

<sup>13</sup> Kame'ede Yesus na'aheni wali'ur, "Inhoi nomun oir eni ka nalo'olo marou wali'ur,

<sup>14</sup> maa inhoi nomun oir Ya a'ala, ai eni kan marou me'e, ono oir onne namwali oir makan ida ai raram de wau mamani, namwali morimori man ma'aruru ma kan horu."

<sup>15</sup> Maeke onne ne'el Yesus, "Pape, mala oir onne yo omun leke yono ya'u marou me'e, de yono mai ahur oir eni mamani."

<sup>16</sup> Yesus na'ahenia, "Lam polu num mo'onleher moro mai Ya'u nanu."

<sup>17</sup> Maeke onne walha na'ahenia, "I ho'u kaale." Yesus na'ahenia, "Onne namlolo,

<sup>18</sup> ono om hoedi rewlipa me'e, la orts eni om minwuku noro mo'oni ma ka namwali o houm haenhi! Onum wanakunu onne namlolo kokkoo!"

<sup>19</sup> Maeke onne na'aheni wali'ur, "Eni nanumene ya auroin Papeni nabi ida!"

<sup>20</sup> Mayai manina Samaria ai upme hoikaniyedi Makromod Lalap lolo wo'or eni me'e, maa Papa Nina ri Yahudi ramhene, la ra'aheni wa'an rehi hoikani Makromod Lalap lolo Yerusalem mehe."

<sup>21</sup> Yesus na'aheni, "Mame, Ya'u konohi o kokkoo, lere man mai lo'o ri hoikani ik Amad Makromod Lalap,

hi kar mai wo'or eni noro Yerusalem haenhi.

<sup>22</sup> Mi ri Samaria eni hoikani inhawa ma ka mauroin wawa'an makun, maa mayai Yahudi hoikani inhawa man ai mauroin wawa'anedi me'e, ono Makromod Lalap nalhariyedi Nin panaeku mayai la An nouwedi me'e nahenia Ri ida mai nano ri Yahudi man huri we'er hi nano dohohala nin molollo.

<sup>23</sup> Enima lere man mai Makromod Lalap Nin ri kan hoikani naise nonolu, maa hir hoikani la ra'uli rasa'a Ai rodi kalla ma namlolo, ono Roh Kudus nodi molollo hi penia hi rauroin ha ma namlolo wake'e, de hi onne rahuwa'an Makromod Lalap akin. Enla namlolo kokkoo lere onne rakanedi me'e.

<sup>24</sup> Makromod Lalap onne Roh, de inhoi raram nodi lolo kalla ma namlolo hoikani la ra'uli rasa'e, ai onne nodi Ainin Roh Nin molollo penia lernohi inhawa ma namlolo wake'e."

<sup>25</sup> Horu ne, maeke Samaria onne ne'el Yesus na'ahenia, "Ya auroinedi me'e nahenia ler ida Ri man Makromod Lalap kikan namwali Rai laa ewi-ewi (man rin wekwekel Kristus) onne lo'o mai. Na'amoli An mai mene kukunohi ha wo'ira na'akeme mayai."

<sup>26</sup> Yesus ne'el maeke onne, "Ya'u, ma noro o wakunu eni, penia Kristus onne!"

<sup>27</sup> Yesus wakunkunu noro maeke onne makun, Nina man lernohi pakunohi enihe wali mai. Hir do'on Yesus mahan wakunu noro maeke Samaria onne de hehel, maa

hi ri mahaku ka na'ukani maeke onne na'ahenia, 'O mapanak inhawe?' la ka ra'ukani Yesus na'ahenia, 'Alhi'ihepe moro maeke onne wakunu?'

<sup>28</sup> Kame'ede maeke onne nala nina oir onno loiyedi lolo onne nala'a leke raram lan kukunohi inhawe man Yesus wakukunu noro ai lolo oir makan onne.

<sup>29</sup> Ai ne'el leke raram na'ahenia, "Heih! Mai ik lak po'on ri ma nauroiroin ainu'u hini'i wenewhe na'akeme. Ai onne lo'o man Makromod Lalap kikanedi namwali Rai harome!"

<sup>30</sup> Leke raram dernedi ne, lari laa leke paharne leke pakromo noro Yesus me'e.

<sup>31</sup> Heri onnenihe kar rakan makun ne, Yesus Nin man lernohi pakunohi enihe ra'akenedi hanana'an me'e leke roro Yesus ra'ak. Hir lariyala, "Papa Meser, hanana'an namkenedi me'ede, mai ka'ak here."

<sup>32</sup> Enimaa Yesus ne'el hi na'ahenia, "Ainu'u hanana'an aile, maa mi ka mauroin hanana'an onne inhawe."

<sup>33</sup> Kame'ede ida ma na'ukani ida, "Lo'o ri nodi hanana'an mai nala Ai harome?"

<sup>34</sup> Yesus na'aheni, "Ya'u raram nodi lernohi Makromod Lalap man hopon Ya'u eni, la Ainu'u panaeku hi'i na'ahoruwedhi honowok man Makromod Lalap nanala Maya'u. Panaeku woro'o onnenihe namwali Ainu'u hanana'an man hi'i Ya akin nahuwa'an naise ri ma

namlara ma na'ak pehuredi me'e.

<sup>35</sup> Nadedem mi ma'aheni, 'Lo'o wolto wo'akka ikar rakan kirna nina na'ilili nadai me'e,' maa Ya apanak mim po'onala kirna ma na'ihiyedi lolo eniyeni me'e, leke rin mai ra'ili radai ihin ennen!\*

<sup>36</sup> Lere eniyeni ri ma na'ilili nadai lernala nin naiwe'el, la ihin ennen man an loiwuku onne kan horu laa ewi-ewi. Onne namwali leke man pekir ariyono noro ma na'ilili nadai woro'ohe akin nahuwa'an wewerre ono hir loiwukuwedi ihin ennen nammori, la ihin ennen onne wekel ri man lernala or'ori dardari ma kan horu.

<sup>37</sup> Wanakunu eniyeni nam-lolo kokkoo, 'Ida pekir ariyono, la namehin na'ilili nadai.'

<sup>38</sup> Ya'u hopon mi ma'ilili madai kirne man mi kam howok makun. Ri namehin mai nolu pekir ariyono, mene mim mai ma'ilili madai ihin ennen nano rir honowok lolo kirna onne. Ri namehin mai nolu loikaru Makromod Lalap Lirna, maa mim mai wakunu noro hi mene hi akin naili'il Maya'u."

<sup>39</sup> Lolo kota Samaria, ri nammori akin naili'il Yesus ono dernedi maeke idedi onne nin wanakunu ma na'ahenia, "Yesus nauroiroin ainu'u hini'i wenewhe na'akeme."

<sup>40</sup> Ende ri Samaria enihe mai pakromo noro Yesus la rapanak Ai norhe minala lolo onne alam ida woro'o.

Enpenia Yesus minle rir leke lere ida woro'o mene

\* <sup>4:35</sup> Yesus nin panaeku ri Samaria onnenihe raisa kirne ma namkene ra'ili radai me'e, ono rira panaeku akinhe naili'il Ai me'e.

nala'a, la

<sup>41</sup> nano Ainina wanakuku onne, ri eren namomori akin naili'il Ai.

<sup>42</sup> Hi re'el maeke onne na'henia, "Dedesne ik akin naili'il ono ik dernedi num wanakunu, maa ors eni ik akin eren nailili'il Ai, ono ai mehem derne Ai la mauroinedi nahenia Ai penia namwali Rai man mai noho wawan leke huri we'er ri nano rir dohohala nin molollo!"

### *Yesus wali laa Galilea*

<sup>43</sup> Rakan alam woro'edi Yesus wali wali'ur laa Nin noho Galilea.

<sup>44</sup> Yesus mehen na'aheniyedi, 'Nadedem ri ma namwali nabi, lolo nin nohorai mememen, ri kan horhawe.'

<sup>45</sup> Lere An rakan Galilea ri man min lolo onnenihe akin nahuwa'an kokala Ai. Hir pene'ek lo'o do'on An hi'i tanada man ri kan dodo'onala makun, ono oirawi inworo'ohi hi ri nammori min wewerre Yerusalem Lere Alam Paska onne de do'odo'on mouwedi Ainina hini'i wenewhe na'akeme me'e.

### *Yesus hi'i wa'an rai nina man howok ida anan*

<sup>46</sup> Kame'ede Yesus nala'a wali'ur laa leke Kana lolo Galilea. Nonolu lolo leke onne, An hi'i oir namwali anggur. Enla lere onne rai nina man howok ida aile man minle leke Kapernaum ma kan kou' nano Kana, la ai onne anan mo'oni nin kini'ir werek wake'e.

<sup>47</sup> Man howok onne nau-roinnala Yesus aiyedi mai Kana ne, an laa napanak Yesus lernohilaa Kapernaum

hi'i wa'an anan ono na'ikeki maki me'e.

<sup>48</sup> Ende Yesus ne'el ai na'ahenia, "Alhi'ihepe mi man minle noho eniyeni mapanak do'onala tanada man kukul Makromod Lalap Nina ke'eke'el an'anhe nanumene mi akim naili'il?"

<sup>49</sup> Enime'ede ri onne na'aheni, "Pape, halhala ik laa here, leke yono ya an'u maki!"

<sup>50</sup> Yesus ne'el ri onne na'ahenia, "Om wali here. Anum kan maki." Ri onne akin naili'il Yesus Nin wanakunu, de nala'a me'e.

<sup>51</sup> Rakan kalla toro pakromo noro nina man howok lolo nakar enihe. Hir mai leke kukunohi ai nahenia anan wa'anedi me'e.

<sup>52</sup> Kame'ede ai na'ukani hi, "Ma'ananahe wa'an?" Hir walha, "Oirawi lere u'ulu riuk ida, kan manha me'e."

<sup>53</sup> Ai nauroin nahenia oirawi lere u'ulue haenhi Yesus hopon wali here ono anan wa'anedi me'e. Lere onne me'ede ai noro hono ananhe nakar raram na'akeme akin naili'il Yesus.

<sup>54</sup> Tanada ri kan dodo'onnale makun onne namwali rewro'o nine man Yesus hi'i lolo Galilea lere An waliyedi nano Yudea.

## 5

### *Yesus hi'i wa'an ma nakni'ir minle oir kiliu Betseda*

<sup>1</sup> Onne horu, Yahudi rira lere alam lalapida na'urani me'e, de Yesus wali laa Yerusalem.

<sup>2</sup> Enla lolo Yerusalem nika ida aile ma nadedem rin wekel, 'Nika Pipdume'. Na'urani nika onne oir

kiliu lapida aile la rin hi'i henei wolima lolo oir onne herne. Ri nodi wanakunu Ibrani wekel oir kiliu onne 'Betseda'.

<sup>3</sup> Nadedem ri ma nakni'ir nammori ramkukuru lolo henei onnenihe, ri ma makan toko, ein he'ehe'e, noro ma naplu'uk nap'eker. [Hi eniyenihe na'akeme mahar lapan oir kiliu onne nawollo,

<sup>4</sup> ono lere romromo Makromod Lalap Nin hophopon a'am raram ida kopur mai nawollo oir onne, la inhoi ma nolu kopur laa oir raram wuwala kemen, idewe nina apinha onne wa'anedi.]\*

<sup>5</sup> Ende mo'oni ida aile naplu'uk nap'eker anna welikelu wo'aa me'e.

<sup>6</sup> Yesus po'on mo'oni onne lolo henei raram, la nau-roinedi ai nakni'ir nalo'ol me'e, de ne'el ai, "O raram nodi om wa'an, ee ka?"

<sup>7</sup> Ri onne walhe, "Papee, rakan lere oir nawollo, ri kaale man paku nala kopur ya'u laa oir raram. Ya'u na'ik laa, maa ri namehin noluwedi ya'u mamani."

<sup>8</sup> Yesus ne'el ai, "Mamakedi here! Lunna onuma piki luni, mala'a here!"

<sup>9</sup> Lere onne me'ede mo'oni onne nina apinhe moluwedi, de an lunna nina piki luni na'aware nala'a me'e. Lere Yesus hi'i wa'an mo'oni onne pakromnala Alam Renren Warwarna, la lolo agame Yahudi luli ri Yahudi howok lere alam onne.

<sup>10</sup> Enpenia Yahudi rir man panulu re'el mo'oni

idedi ra'aheni, "Heih! Yom ma'uwaru numa piki luni! Ka mauroin nahenia lere eni Alam Renren Warwarne, de luli om ma'uwaru numa piki luni?" \*

<sup>11</sup> Enimaa mo'oni onne walha na'ahenia, "Ri man hi'i wa'an ya'u hopon lunna ainu'u piki luni ya ala'a here."

<sup>12</sup> "Inhoi man hopon om lunna onuma piki luni mala'a?"

<sup>13</sup> Enimaa mo'oni onne ka nauroin inhoi man hi'i wa'an ainina apinhe onne naran, ono heri aile lolo onne, la Yesus nala'edi, de kan do'on me'e.

<sup>14</sup> Ka nalo'ol ne, Yesus pakromo wali'ur noro mo'oni onne lolo Romleu Lape nin nikoin la ne'el ai, "Makani wawa'an! Ors eni om wa'anedi me'e, maa yono om hi'i dohohala me'e, kalo'o om lernala wanalhanne man werek narehi nano num apinha nonolu eni!"

<sup>15</sup> Kame'ede mo'oni onne lan konohi ha ma namwali ai kemen laa Yahudi rir man panulu enihe na'ahenia, "Yesus penia man hi'i wa'an ainu'u apinhe!"

<sup>16</sup> Enime'ede man panulu Yahudi ken hi'i apinpinha Yesus mamani ono hi rau-roiroin Yesus hi'i wa'an ri Alam Renren Warwarna onne.

<sup>17</sup> Enimaa Yesus ne'el Yahudi enihe, "Ya Am'u me'ene howok mamani, ka nadedem warna, la Ya'u hi'i heheni haenhi."

\* **5:4** Horok man aile lolo tanada [ ] raram, kaale lolo horok Yunani dedesne heruwali. \* **5:10** Neh. 13:19; Yer. 17:21

<sup>18</sup> Onne penia Yahudi rir man panulu raram nodi rano'in kalla leke resne Jesus here. Hi ra'ahan ono Jesus hi'i wa'an ri Alam Renren Warwarne, maa hi ra'ahan wake'e ono Jesus na'aheni Makromod Lalap onne Ainina Papa mememen, penia Ai namnenehe noro Makromod Lalap.

*Jesus howok nodi Makromod Lalap Nina molollo*

<sup>19</sup> Onne penia Jesus ne'e'l hi na'ahenia, "Loi honorok wawa'an Ainu'u panaeku ma na'ono eniyeni: Ya'u, Makromod Lalap Anan, ka odi molollo howok haida lernohi Ainu'u suk aimehi, maa Ya'u hi'i inhawe man Ya'u po'on Ainu'u Pape hi'i mehe. Inhawe man Ya Am'u hi'ie, Anan hi'i lernohi haenhi,

<sup>20</sup> ono Ainu'u Pape naramyaka Ya'u ma namwali Ai Anan, la kukul Nin hini'i wenewhe na'akeme Maya'u haenhi. Ka nalo'ol, An kukul hini'i wenewhe ma narehi nalewen lolo tanada man Ya'u hi'iyedi, leke mim do'on la polletilu.

<sup>21</sup> Ainu'u Pape onne nodi molollo na'amori wali'ur ri man makiyedi, la Ai Anan hi'i heheni haenhi. Ya ala or'ori dardari ri na'akeme man Ya'u niliyedi.

<sup>22</sup> Ainu'u Pape kan ho'ok kail ri mormori me'e, maa Ai naledi molollo Maya'u, Ai Anan, ho'ok kail ri na'akeme,

<sup>23</sup> leke ri na'akeme horhawe la rahiylene aroro Ya'u namnenehe noro Ai haenhi. Inhoi kan horhawe Ya'u, Ai Anan, kan horhawe

Ya Am'u man hopon Ya'u mai noho wawan eniyeni.

<sup>24</sup> Loi honorok wawa'an Ainu'u panaeku ma na'ono eniyeni: Inhoi derne nakani Ainu'u wanakunu eni la akin naili'il Ainu'u Pape man hopon Ya'u mai noho wawan eniyeni, ai onne mori laa ewi-ewi la kan lernala hunukum makmaki me'e. Nonolu makmaki nodi molollo ai, maa ors eniyeni an lernaledi or'ori dardari ma kan horu me'e.

<sup>25</sup> Loi honorok wawa'an Ainu'u panaeku ma na'ono eniyeni: Ka nalo'olala ri ma akin ka naili'il Maya'u de mori naise man makiyedi me'e, derne Makromod Lalap Anan Lirna. Memen lere alam onne rakanedi me'e. Nano ri man makiyedi onne, inhoi man derne nakani Ai Lirna mori wali'ur.

<sup>26</sup> Ainu'u Papa penia or'ori dardari onno, la Ai nala molollo Maya'u, Ai Anan, namnenehe Ainina molollo leke Ya amwali or'ori dardari onno haenhi.

<sup>27</sup> Enla Ai nala molollo Anan leke ho'ok kail ri mormori na'akeme, ono Ya'u eni peni Ri Mormori Anan.

<sup>28</sup> Mim derne Ainu'u wanakunu eniyeni, yono mim polletilu! Ler man mai ri man makiyedi, derne I lir'u,

<sup>29</sup> la idewe hir mori wali'ur, la hi ramhara nano noho makmaki, leke lernala wanalhan nano rir hini'i wenewhe man hir hi'i nonolu lere hir mori lolo noho wawan. Ri man hi'i ha man wa'an, kokala or'ori dardari ma kan horu eni, maa ri man

hi'i ha man ailanna, kokala hunukum makmakie. \*

<sup>30</sup> Ka'u hi'i haida lernohi Ainu'u suk aimehi. Lere Ya'u ho'ok kail ri, Ya'u derne Makromod Lalap mamani. Ainu'u kenekrohu na'akemhe namlolo kokkoo, ono Ka'u lernohi Ainu'u panaeku aimehi, maa Ya'u lernohi Ainu'u Pape Nina panaeku mehe, ono Ai penia man hopon Ya'u mai."

*Ri Yahudi ramhene derne rakani wanakuku ma na'ono Yesus*

<sup>31</sup> Yesus wakunu wali'ur na'ahenia, "Lo'o Ya'u mehe wakunu panaeku ma na'ono Ya'u kemen, la man kuku maka namehin kaale, mi ka mauroin Ainu'u wanakunu onne namlolo, ee ka.

<sup>32</sup> Enimaa Makromod Lalap wakunu nala wanakunu ma na'ono Ya'u kemen, la Ya auroin Ainin wanakunu namlolo kokkoo.

<sup>33</sup> Mim hopon minim ri ida woro'o lar derne Yohanis man ulutade ri lirna me'e, la an konohi mi ha ma na'ono Maya'u haenhi, la ainin wanakunu namlolo kokkoo.

<sup>34</sup> Lo'o ri mormori man kuku maka ma na'ono Maya'u aile, wa'an, maa lo'o kaale, onne kan herre Ainu'u panaeku ida. Enimaa Ya a'ori honorok mi Yohanis nin wanakuku leke mi lo'o lernala or'ori dardari ono mi akim naili'il ainin wanakunu onne.

<sup>35</sup> Yohanis onne naise wadu man mormori leke mim do'on Makromod Nin kalla ma namlolo eni. Mi akim nahuwa'an derne ainin

wanakunu, maa ka nalo'olo mi kam derne ai lirna me'e.

<sup>36</sup> Enimaa Ainu'u man kuku maka ida ma na'ono narehi Yohanis aile, la onne Ainu'u hini'i wenewhe. Ya'u hi'i wewhe honowok man Ya Am'u nala Maya'u leke hi'i na'ahoruweddi lolo noho eniyeni. Hini'i wenewhe onne kukul nahenia Ya'u mai nano Ya Am'u, Makromod Lalap.

<sup>37</sup> Enla Ya Am'u man hopon Ya'u mai, Ai me'ene kuku maka ma na'ono Ya'u kemen haenhi, maa mi kam derne Ai lirna wake'e, la mi kam do'on oin makan haenhi.

<sup>38</sup> Ai Lirna kan minle mi raram, ono mi akim ka naili'il Maya'u, kade Ai penia man hopon Ya'u mai loikaru Ai Lirna onne.

<sup>39</sup> Mi na'akeme mampe'el wakuku Horok Lape manani, ono mauroin nahenia Horok Lape onne nala or'ori dardari ma kan horu ki mi, maa mi ka mauroin nahenia Horok Lap onne wakunu mouropo panaeku ma na'ono Ya'u kemen.

<sup>40</sup> Mim wakuku Horok Lap raram manani, maa mi mamhene mai Maya'u leke lernala or'ori dardari ma kan horu eni.

<sup>41</sup> Lo'o ri mormori ra'uli rasa'a Ya'u, ee ka, kan hi'i haida, ono ka anoin rir ul'uli sasa'e.

<sup>42</sup> Ya auroiroin mi akim, de Ya auroin nahenia Makromod Lalap Nin raramyaka kaale lolo mi raram.

<sup>43</sup> Ya'u mai odi Ainu'u Pape Naran, maa mi kam kokala Maya'u! Enimaa lo'o

ri namehin mai rodi rira panaeku aimehi, mi raram nodi kokale!

<sup>44</sup> Ki mi eniyenihe mi ida ma nanoin uli sa'a nano ida mamani, maa mi ka manoin uli sa'a nano Ai man mehe namwali Makromod Lalap ma namlolo kokkoo. Hi'ihehewi mi akim naili'il Maya'u?!

<sup>45</sup> Yon mim pene'ek Ya ala sala ki mi lolo Ainu'u Pape leken kalarna. Ka! Maa Musa penia ma nala sala ki mi ono mi ka mauroin nin wanakuku! Mim pene'ek nahenia mim lernala or'ori dardari ma kan horu ono hi'i wewhe Musa nin keneri hono'ok, maa Musa kan wakuku heheni!

<sup>46</sup> Ende lo'o mi akim naili'il Musa la mauroin nin wanakuku kokkoo, mi akim naili'il Ya'u haenhi, ono lolo Horok Lap raram Musa penia horok panaeku nammori ma na'ono Maya'u.

<sup>47</sup> Enimaal lo'o mi akim ka naili'il Musa nin horok ma na'ono Maya'u onne, hi'ihehewi mi akim naili'il Ainu'u wanakuku eniyeni?"

## 6

*Yesus nala banana'an ri namansa ra'an, aki mo'oni mehe riwan wolima*

(Mat. 14:13-21; Mrk. 6:30-44; Luk. 9:10-17)

<sup>1</sup> Ler ida woro'o wali'ur Yesus hopol deul oir lap Galilea laa wali. Oir lapa Galilea onne rin wekel oir lap Tiberias haenhi.

<sup>2</sup> Ri nammori lernohi Ai, ono hir do'onedi Ai nodi tanada man kukul Makromod Lalap Nin ke'eke'el

an'anha hi'i wa'an ma nakni'ir nammori.

<sup>3</sup> Enime'ede Yesus noro Nina man lernohi pakunohi enihe wakiha'a laa wo'or ida raikoro lolo onne.

<sup>4</sup> Lere onne Yahudi rira Lere Alam Lalap Paska na'uraniyedi me'e.

<sup>5</sup> Yesus po'on laa waliwali ne, do'on ri nammori mai me'e. Ende Ai ne'el Pilipus na'ahenia, "Lo'o ik laa ewi weli hanana'an nonomun leke kala heri eni ra'an?"

<sup>6</sup> Yesus mehe paeku nala hanana'an heri onne ra'an, maa Ai na'ukani heheni leke nodi kene Pilipus akin naili'il wawa'an kokkoo ee kaun?

<sup>7</sup> Kame'ede Pilipus na'ahenia, "Ik kala hanana'an noknokor heri rahu eni, na'an kupan namansa rehi! Kupan pere waku rahu woro'o kodi weli roti ha'ar heri ra'an maano kan nokor!"

<sup>8</sup> Enine Yesus Nina man lernohi pakunohi ida naran Andreas, Simon Petrus mo'oniwalla, na'ahenia,

<sup>9</sup> "Papa Meser, lolo eni tatana mo'oni ida nina roti waku wolima noro i'in kem woro'o aile, maa lo'o kan nokor heri rahu enihe ra'an."

<sup>10</sup> Kame'ede Yesus na'aheni, "Lam hopon na'akeme raikoro mouwedi." An hopon heheni ono lolo onne penek mamani, de na'akeme raikoro mouwedi. Aki mo'oni mehe ri riwan wolima, kar aki maeke noro tatan'ukun.

<sup>11</sup> Yesus nala roti wolima onne de napanak trimkasi Makromod Lalap nanumene An a'un roti onne ha'ar heri onne ra'an. An hi'i

namnenehe noro i'in kem  
woro'o onne haenhi, penia  
heri onnenihe ra'an hehen  
nanumene pehur.

<sup>12</sup> Heri onne pehur  
mouwedi, mene Yesus hopon  
Nina man lernohi pakunohi  
enihe loiwuku hanana'an ma  
narehi na'akeme leke yon  
sopol.

<sup>13</sup> Ende hir loiwuku  
hanana'an ma narehi  
na'akeme lunu idaweli  
woro'o penu mouwedi.

<sup>14</sup> Lere onne heri ma na'ak  
onnenihe do'on Yesus Nin  
hini'i ri kan dodo'onnala  
makun onne ra'aheni,  
"Namlolo kokkoo Ai onne  
Nabi man Makromod Lalap  
nouwedi mai noho wawan  
nano nonolu eni."

<sup>15</sup> Yesus nauroiroin nahenia  
heri onnenihe rira panaeku kikan Ai namwali  
rir Rai, de Ai mehen wakiha'a laa wo'or tilu.

*Yesus nala'ala'a lolo oir ulikin*  
(Mat. 14:22-33; Mrk. 6:45-52)

<sup>16</sup> Enla rakan lere helem,  
Yesus Nina man lernohi  
pakunohi enihe kopur laa oir  
lap Galilea,

<sup>17</sup> leke ha'a korkoro deul  
oir lape laa Kapernaum. Hir  
lapan Yesus, maa Ai kan mai  
de hi rala'a me'e ono alamedi  
me'e.

<sup>18</sup> Kan maha ne, anna  
lapa huu me'e, de oir lape  
nadiwo'owo'o me'e.

<sup>19</sup> Hir wohilo'o kiluwolima  
woneme na'ikeki rakan oir  
lape toro, mene po'onale  
Yesus nala'ala'a lolo oir  
ulikine mai rira korkoro  
me'e. Hir po'on ramka'uk  
rehi,

<sup>20</sup> maa Yesus na'aheni, "Eni  
Maya'u! Yon mamka'uk!"

<sup>21</sup> Kame'ede hi akin  
nahuwa'anedi la ralha'edi  
Yesus laa korkoro wawan, la  
idewe ramlilinnohi rakanedi  
Kapernaum herraram!

*Ri nammori ranoin Yesus*

<sup>22</sup> Rakan oreki heri man  
aile oir lape walie makun  
maha ranoin Yesus. Hi rau  
roin nahenia oirawi korkoro  
ida mehe, la Yesus kan ha'a  
wewerre noro Nin man ler  
nohi pakunohi enihe. Heri  
onne rauroin nahenia Nin  
man lernohi pakunohi enihe  
mehe rala'a, maa Yesus kan  
lernohi.

<sup>23</sup> Kame'ede, korkoro ma  
nano kota Tiberias mai  
paliyedi, na'uranrani onno  
man oirawi Yesus hi'i lir  
napanak ha'ar roti rala heri  
ra'an eni.

<sup>24</sup> Heri ranoin Yesus lolo  
onne, maa ka nalo'olo hi  
rauroin nahenia memen  
Yesus noro Nina man ler  
nohi pakunohi enihe kaale  
lolo onneni, de hir lernohi  
korkoro ma nano Tiberias  
onnenihe leke deul oir lape  
laa Kapernaum leke ranoin  
Yesus lolo enne.

*Yesus onne namwali  
hanana'an ma nala or'ori  
dardari ri*

<sup>25</sup> Hir rakanedi oir lap  
wali enne do'on Yesus la  
ra'ukanie, "Ma'ananahe Pap  
Meser rakan mai eni?"

<sup>26</sup> Enimaa Yesus walhe,  
"Loi honorok wawa'an  
Ainu'u panaeku ma na'ono  
eniyeni: Mi manoin Ya'u  
ono mi mo'on momun pehur  
mehe! Mi ka manoin Ya'u  
ono Ya'u hi'i tanada mi kam  
dodo'onnale makun man

kukul Makromod Lalap Nin  
ke'ek'e'l an'anha!

<sup>27</sup> Yon howok leke lernala  
banana'an man pelek horu,  
maa howok leke lernala  
banana'an ma nala or'ori  
dardari ma kan horu laa  
ewi-ewi. Ya'u, ma namwali  
Ri Mormori Anan, ala  
banana'an onne ki mi, ono  
Ya Am'u, Makromod Lalap,  
kikan la niliyedi Ya'u me'e, la  
Ya'u hi'i Ai akin nahuwa'an  
wake'e!"

<sup>28</sup> Enine hi re'el Jesus  
na'aheni, "Am hi'i inhawa  
leke hi'i wewhe Makro-  
mod Lalap Nin honowok?  
Hi'ihehewi am hi'i Ai akin  
nahuwa'an?"

<sup>29</sup> Jesus na'aheni, "Makro-  
mod Lalap napanak mim hi'i  
honowok eniyeni: Mi akim  
naili'il Maya'u man An hopon  
mai noho wawan eni."

<sup>30</sup> Enine hi ra'aheni, "Maa  
Om hi'i inhawa tanada leke  
am do'on de ai akim naili'il  
Oe?"

<sup>31</sup> Ai upme ra'an banana'an  
manna lere hir minle noho  
mamun naise horhorok  
man aile Horok Lape raram  
ma na'ahenia, 'Ai nala  
banana'an nano a'am raram  
leke hi ra'an.' " \*

<sup>32</sup> Jesus na'aheni, "Loi  
honorok wawa'an Ainu'u  
panaeku ma na'ono eniyeni:  
Musa ka nala banana'an  
nano a'am raram onne ki mi  
nonolu eni, maa Ainu'u Pape  
penia ma nala banana'an  
onne, la ors eniyeni Ainu'u  
Pape mahan nala banana'an  
ma namlolo wake'e nano  
a'am raram ki mi haenhi.

<sup>33</sup> Makromod Lalap Nin  
banana'an ma namlolo onne

me'eni Maya'u man kopur  
nano a'am raram mai leke  
nala noho wawan or'ori  
dardari ma kan horu!"

<sup>34</sup> Ende heri onne ra'aheni,  
"Pape, mala banana'an onne  
mayai mamani!"

<sup>35</sup> Jesus na'aheni, "Ya  
amwali banana'an ma nala  
or'ori dardari! Inhoi mai  
Maya'u eni ka namlara me'e,  
la inhoi akin naili'il Maya'u  
eni kan marou me'e laa ewi-  
ewi."

<sup>36</sup> Ya'u konohiyedi mi  
me'e nahenia mim do'onedi  
Maya'u me'e maa mi akim ka  
naili'il makun.

<sup>37</sup> Ri man akin naili'il  
Maya'u, hi onnenihe Ainu'u  
Papa naledi Maya'u, la  
namlolo kokkoo Ya'u kokala  
hi na'akeme. Inhoi-inhoi mai  
Maya'u, ka'u huri we'erala  
ida,

<sup>38</sup> ono Ka'u mai leke hi'i  
lernohi Ainu'u panaeku  
aimehi, maa Ya'u mai hi'i  
Ainu'u Papa man hopon Ya'u  
mai Nina panaeku.

<sup>39</sup> Ai man hopon Maya'u  
mai, Nina panaeku yon ri  
mahaku nano ri man Ai  
naledi Maya'u enihe maki  
nako'u Ai, la Ainina panaeku  
Ya a'amori hi na'akeme  
wali'ur lere noho eni nina  
man horu.

<sup>40</sup> Onne namlolo ono  
Ainu'u Pape raram nodi  
nahenia ri na'akeme man  
do'on Anan, la akin naili'il  
Ai, hi onnenihe lernala or'ori  
dardari ma kan horu eni,  
la Ya a'amori hi wali'ur lere  
noho nina man horu eni."

<sup>41</sup> Enine ri Yahudi hehel  
Jesus Nin wanakunu ma kan  
lolo ri raram ono Ai na'aheni,

\* **6:31** Kel. 16:4, 15; Mzm. 78:24

“Ya amwali hanana'an man mai nano a'am raram!”

<sup>42</sup> Ida ma ne'el ida na'henia, “Yesus eni Yusup anan, la Nina ri leleher kau-roiroin! Emene hi'ihepenia Ai na'heni, ‘Ya'u mai nano A'am raram?’”

<sup>43</sup> Enime'ede Yesus walha na'henia, “Yono mim hehel! Yon mi ida ma na'heni ida Ainu'u wanakunu eniyeni ka namlolo!

<sup>44</sup> Lo'o Ainu'u Papa man hopon Ya'u mai noho eni ka napolu mi mai Maya'u, mi ri mahaku kan lernala or'ori dardari. Enimaa ri na'akeme man Ai napolu, mai Maya'u, la Ya a'amori hi nano mak-maki lere noho nina man horu.

<sup>45</sup> Nonolu nabi-nabi horok lolo Horok Lap raram ra'heni, ‘Ler man mai Makromod Lalap wakuku hi na'akeme.’ \* Ende ri na'akeme man derne rakani Ainu'u Papa, la ri man wakuku nano Ai, hi onnenihe man mai Maya'u.

<sup>46</sup> Onne ka na'heni ri mor-mori do'onedi Makromod Lalap, ono ri mahaku kan do'on Ai, naukara Ya'u man mai nano Makromod Lalap, Ya'u mehe do'on Ai.

<sup>47</sup> Loi honorok wawa'an Ainu'u panaeku ma na'ono eniyeni: Inhoi ma akin naili'il Maya'u, ai onne lernala or'ori dardari ma kan horu laa ewi-ewi!

<sup>48</sup> Maya'u eni penia banana'an ma nala or'ori dardari.

<sup>49</sup> Kade mi upme ra'an banana'an manna minle

noho mamun, maa hir maki haenhi.

<sup>50</sup> Enimaa hanana'an ma nano a'am raram aile, la in-hoi na'an banana'an onne hi kar maki.

<sup>51</sup> Ya amwali banana'an man mai nano a'am raram ma nala or'ori dardari. Inhoi ma na'an banana'an ma namwali Ya'u ihin kemen eni, an mori laa ewi-ewi. Ya ala banana'an ma namwali Ya'u kemen eni leke ri noho wawan lernala or'ori dardari.”

<sup>52</sup> Hir derne Yesus Nina wanakunu onne ne, ida ma nasesi noro ida me'e ra'heni, “Hi'ihehewi Ri eni nala ihin kemen ik ka'ane?”

<sup>53</sup> Kame'ede Yesus na'heni, “Loi honorok wawa'an Ainu'u panaeku ma na'ono eniyeni: Lo'o mi ka mo'on Ri Mormori Anan ihin kemen la ka momun rarne, mi kam lernala or'ori dardari ma kan horu onne.

<sup>54</sup> Inhoi ma na'an Ya'u ihin kemen la ma nomun Ya'u rarna, ri onne lernala or'ori dardari ma kan horue la Ya a'amori wali'ur lere noho eni nina man horue,

<sup>55</sup> ono Ya'u ihin kemen noro Ya'u rarna enie namwali banana'an noro nonomun ma namlolo kokkoo.

<sup>56</sup> Inhoi ma na'an nomun onne nodi kunukunohi na-henia noro Maya'u ramwali mahaku.

<sup>57</sup> Ainu'u Pape mori laa ewi-ewi, la Ai onne penia man hopon Ya'u mai, la Ya'u mori naise Ai ono Ai penia man hi'i Ya'u mori. Nammenehe onne inhoi ma na'an Ya'u ihin kemen Ya ala or'ori dardari hi haenhi.

\* **6:45** Yes. 54:13

<sup>58</sup> Ya'u eni hanana'an man mai nano a'am raram. Hanana'an eni ka namnenehe noro manna mi upmu a'um rara'an onne ono rakan rir lere horu hir makiyedi, maa inhoi ma na'an hanana'an eniyeni, mori laa ewi-ewi."

<sup>59</sup> Yesus wakuku wanakuku eni na'akeme lolo Yahudi rir kerei man minle leke Kapernaum.

*Ri man lernohi Yesus enihe heruwali kar kokala Nin wanakuku*

<sup>60</sup> Lere onne, man lernohi enihe derne Yesus Nin wanakuku onneni, ri nammori hehel rehi de ida ma ne'e'l ida na'henia, "Wanakuku onne sus wake'e! Wanakuku eniyeni, ri ka nauroin de ri kan kokale!"

<sup>61</sup> Enine Yesus mehe nau-roiroin hi mahan ida man hehel ida, de Ai na'heni, "Alhi'ihepe mi ma'ahan derne Ainu'u wanakuku idedi eni? Lo'o panaeku eni ka nedille mi akim?"

<sup>62</sup> Ya aheni heheni me'ene mi ma'ahan! Hi'ihehewi lo'o mim po'on Ya'u, Ri Mormori Anan, ha'a wali'ur laa Ainu'u onno dedesne!?

<sup>63</sup> Makromod Lalap Nina Roh penia ma nala or'ori dardari! Ri mormori ka nodi molollo mehen nala or'ori dardari kemen. Ainu'u wanakunu eniyeni mai nano Makromod Lalap Nin Roh, la Ai penia ma nala or'ori dardari.

<sup>64</sup> Kade onne namlolo, maa mi heruwali akin ka naili'il Maya'u!" Yesus wakunu heheni ono nano dedesne Ai nauroinedi me'e inhoi penia

man akin ka naili'il Ai la inhoi lo'o lere li'ur na'olu Ai.

<sup>65</sup> Enla Yesus na'aheni wali'ur, "Onne penia nonolu Ya'u konohiyedi mi nahenia lo'o Ainu'u Papa kan paku napolu, ri mahaku kan mai Maya'u."

<sup>66</sup> Yesus na'aheni heheni me'e de ri nammori ma nadadem lernohi Ai onne kar lernohi me'e.

<sup>67</sup> Ende Yesus na'ukani ri idaweli woro'o ma namkene lernohi enihe na'henia, "Yonde mi mamhene lernohi Ya'u haenhi harome?"

<sup>68</sup> Enine Ainina man lernohi pakunohi ida naran Simon Petrus na'aheni, "Makromod, mayai lo'o lernohi inhoi ho'o? Makromod mehe Nina wanakuku ma nala or'ori dardari ma kan horue.

<sup>69</sup> Ai akim naili'il Makromod la mauroiroin nahenia O penia ma na'alehe dohohale wake'e, la O ma namwali Makromod Lalap Nin Hophopon mememen man An hopon mai noho wawan eniyeni."

<sup>70</sup> Enine Yesus na'aheni, "Eih! Ya'u mehe nili mi ri idaweli woro'o eniyenihe, maa ri ida aile lolo mi leken kalarna ma namwali nediyomon."

<sup>71</sup> Yesus Nin wanakunu onne wekel Simon Iskariot anan Yudas ono Yesus nau-roinedi nahenia lere man mai Yudas onne na'olu Ai, kade ai namwali ri ida nano ri idaweli woro'o onnnenihe.

<sup>1</sup> Onne horu, Yesus nala'a laliwewer noho Galilea onne. Ai namhene lan lolo Yudea ono Yahudi rir man panulu enihe mahar paeku leke resne.

<sup>2</sup> Enla lere onne Yahudi rira lere alam lalap man hir waki 'Heuheu Man Ra'an Romunle Raram' wakuraniyedi me'e.\*

<sup>3</sup> Ende Yesus mo'oniwalla mememen enihe rawalha lira Ai ra'aheni, "Alhi'ihepe min mai eni mehe. Wa'an rehi kala'a Yudea leke Num man lernohi pakunohi onnenihe do'on tanada Om hihi'i enihe.

<sup>4</sup> Ri ma nanoin naran kan suwar nina hini'i! Om hi'i tanada ri kan dodo'onnala makun, de wa'an rehi mala'a leke noho wawan do'on idewe Num hini'i wenewhe man lewlewen eni."

<sup>5</sup> Yesus mo'oniwalinhe wakunu heheni ono hi ka rauroin An mai nano Makromod Lalap, de hi akinhe ka naili'il Ai makun.

<sup>6</sup> Enine Yesus ne'el walinhe, "Wal'u mie, Ainu'u lere alam kan rakan makun, maa ki mi inhawa lere alam mi mala'a, namnenehe, kan hi'i haida.

<sup>7</sup> Ri man minle noho wawan enihe kar hadwei hadwokor mi, maa hi kar suk Maya'u ono nadedem Ya'u wakunu rira ailanne noro dohohala.

<sup>8</sup> Wa'an rehi mi mala'a here! Lam lernohi lere alam lalap onne. Ka'u laa makun ono Ainu'u lere alam kan rakan makun."

<sup>9</sup> Yesus wakunu heheni walinhe mene hi rala'a, la Ai ka namhara Galilea makun.

<sup>10</sup> Yesus walin enihe rala'edi leke lernohi lere alam lalap onne, mene Yesus lernohi laa enne, maa An lolo kalla suwsuwar, de ri mahaku ka nauroin.

<sup>11</sup> Yahudi rir man panulu maha ranoin Yesus lolo lere alam lalap onne ra'aheni, "Ri onne ai ewi?"

<sup>12</sup> Heri man minle rana'ukwuku onne wakunu ralpupupu panaeku ma na'ono Ai. Heruwali ra'aheni, "Ai onne ri wawa'an!" maa heruwali ra'aheni, "Ai onne ri yakyake ono An ken paipudi ri."

<sup>13</sup> Hir wakunu maa ramka'uk wekel Yesus naran leke yono rin derne ono hi me'ene ramka'uk Yahudi rir man panulu enihe.

### *Yesus mai wakuku ri lolo Makromod Lalap Nin Romleu Lape*

<sup>14</sup> Hirira lere alam lalap onne kan horu makun, Yesus lan wakuku lolo Makromod Lalap Nin Romleu Lap.

<sup>15</sup> Yahudi rir man panulu man min lolo onne polletilu, de ra'ahenia, "Yesus kan lernala agame nin wanakuku makun, maa Ai nauroin wanakuku man lewlewen!"

<sup>16</sup> Yesus walha hi na'ahenia, "Inhawe man Ya'u wakukuku enie Ainu'u wanakuku ka, maa Ai man hopon Ya'u mai penia Nina wanakuku.

<sup>17</sup> Ende inhoi raram nodi lernohi Makromod Lalap Nina panaeku, ai onne nauroin Ainu'u wanakuku eniyeni mai nano ewi-nano

\* 7:2 Im. 23:34, Ul. 16:13

Makromod Lalap, ee nano Maya'u mehe.

<sup>18</sup> Ri ma nodi nin wanakuku aimehi, nanoin naran aimehi haenhi, maa ri man Makromod Lalap hopon mai, ai onne raram nodi na'akulu na'alapa Makromod Lalap naran. An wakuku panaeku ma namlolo, la na'alehe salida.

<sup>19</sup> Mi mauroinedi Makromod Lalap Nina keneri hono'ok nano Musa me'e! Maa mi na'akeme kam lernohi keneri hono'ok onne. Alhi'ihepe mi manoin kalla mesne Ya'ue?"

<sup>20</sup> Enine hi re'el Jesus na'ahenia, "Inhoi raram nodi nesne o? Lo'o hayakyake hu'uredi o raram me'e harome!"

<sup>21</sup> Yesus walha na'ahenia, "Mi na'akeme polletilu ono Ya'u hi'i tanada man ri kan dodo'onnala lere Ya'u hi'i wa'an ri onne Alam Renren Warwarna.

<sup>22</sup> Enimaa mi me'e ne howok Alam Renren Warwarna haenhi leke lernohi Musa nina holoor halauk sunat mo'onyana, ono lo'o sunat onne nin lere alam nedille Alam Renren Warwarna, mim sunate. Ma namlolo, sunate onne kan mai nano Musa, maa ik upud a'ad Abraham, Isak noro Yakup penia hi'i dedesne.

<sup>23</sup> Ende lo'o mim hurinohi sunat ri, kade nedille Alam Renren Warwarna, leke lernohi Musa nin holoor halauk, emene alhi'ihepe mi ma'ahan Maya'u ono Ya'u hi'i wa'an ri ida kemen na'akeme lere alam warwarne?

<sup>24</sup> Yono modi panaeku

man rin dodo'on dederne mehe ho'ok kail Ya'u, maa wa'an rehi modi panaeku ma namlolo lolo Makromod Lalap leken kalarna leke ho'ok kail Ya'u."

*Ri na'ukani nahenia nam-lolo kokkoo Yesus onne man kikanedi namwali Rai laa ewi-ewi, ee ka?*

<sup>25</sup> Ri heruwali man minle Yerusalem enihe ra'ahenia, "Yonde Ai onne penia maha ranoin resne harome?

<sup>26</sup> An wakuku mouropo lolo heri kalarna, maa iknik man panulu enihe ka ra'uhoiyala Ai. Yonde hi rauroinedi nahenia Ai onne Kristus man Makromod Lalap kikanedi namwali Rai laa ewi-ewi harome?

<sup>27</sup> Enimaa ik kauroin nahenia lere Kristus onne mai, ri mahaku ka nauroin mai nano ewi, la kauroin Ai onne mai nano Galilea, de lo'o ka namwali Rai onne."

<sup>28</sup> Yesus mahan wakuku lolo Romleu Lape nina nikoini, la wakunu naruri na'ahenia, "Eh! Mi mauroin Maya'u eni inhoi? La amhara nano ewi? Ka'u mai odi Ainu'u panaeku aimehi. Ya'u mai ono Makromod Lalap hopon mai, la Ai penia ma namlolo kokkoo. Mi ka mauroin Ai,

<sup>29</sup> maa Ya auroiroin Ai ono Ya'u mai nano Ai, la Ai penia man hopon Ya'u mai."

<sup>30</sup> Enime'ede heri man derne Ainin wanakunu onnnenihe ra'akene kele me'e, maa ka namwali ono kan rakan Nina lere alam makun.

<sup>31</sup> Enimaa ri nammori aile lolo onne ma akin naili'il Ai la ra'aheni, "Ai eni namlolo

kokkoo Rai man Makromod Lalap kikanedi eni, ono inhoi lo'o hi'i tanada narehi Ainin hini'i eniyeni!"

*Hir paeku kele Yesus*

<sup>32</sup> Ri Parisi enihe derne ri man lolo onnnihe mahar wakunu ralpupupu panaeku ma na'ono Yesus, de roro imam lalap enihe hopon ri ma nadiyaka Romleu Lapa lar kele Yesus.

<sup>33</sup> Ende Yesus ne'el heri onnenihe na'ahenia, "Ors eni Yo or'oro mi, maa tarana ikar Ya'u wali laa Ai man hopon Ya'u mai eni.

<sup>34</sup> Lere onne lo'o mi manoin Ya'u, maa kak pakromo me'e, ono mi ka mauroin kalla man laa Ainu'u miminlole."

<sup>35</sup> Kame'ede Yahudi rir man panulu ma kar kokala Yesus enihe ida ma ne'el ida, "Lo'o ri eni nala'a ewi penia kak pakromo noro Ai me'e? Yonde An laa noro Yahudi man aile noho namehin enihe lawuku leke An wakuku ri ma ka namwali Yahudi harome?

<sup>36</sup> Ainin panaeku inhwae nahenia ik kanoin Ai, maa kak pakrome? Alhi'ihepe Ai na'aheni maika ka kauroin kalla man laa Ainin miminlole?"

*Roh Kudus naho'ok noro oir or'ori dardari*

<sup>37</sup> Lere alam lalap onne na'akeki horu, la alam man kauli'ur onne alam ma na'ono wake'e. Rakan lere alam onne Yesus namririyyedi nanumene wakunu naruri na'ahenia, "Inhoi man marou mai leke Ya ala oir nomun.

<sup>38</sup> Na'amoli ri ma akin naili'il Ya'u mai nomun. Ai onne naise horhorok man aile Horok Lap raram ma na'ahenia, 'Nin morimori ma'aruru wake'e, ono lolo ai raramne Ainu'u oir man wau mamani nala or'ori dardari ma kan horu.' "

<sup>39</sup> Lere Yesus wekel oir man wauwau onne, Ainin panaeku nahenia lere man mai inhoi ma akin naili'il Ai, Makromod Lalap Nina Roh mai ri onne. Lere An wakunu onne, Makromod Lalap Nina Roh kan mai noho wawan makun ono Yesus ka nakinikan laa a'am raram makun, la Makromod Lalap ka na'akulu na'alapa Ai lolo onne makun.

<sup>40</sup> Ri nammori mahar derne Yesus Nin wanakuku de heruwali ra'aheni, "Kokkoe! Eni lo'o Nabi man Makromod Lalap nonou eni!"

<sup>41</sup> Heruwali ra'aheni, "Ai eni lo'o Kristus man Makromod Lalap kikanedi namwali Rai eni!"

Maa heruwali ra'aheni, "Ka! Hi'ihehewi Kristus eni mai nano Galilea?"

<sup>42</sup> Horok Lape na'aheniyedi me'e Kristus onne Daud upun anan, de kan mai nano Galilea maa nano Betlehem, ono Betlehem onne Daud nina lekloi!" \*

<sup>43</sup> Kame'ede na'akeme ras-esikuli Ai ho'o me'e.

<sup>44</sup> Ri heruwali ra'akene kele Ai me'e, maa ri mahaku kan tukule.

*Yahudi rir man panulu akin ka naili'il Yesus*

<sup>45</sup> Kame'ede ma nadiyaka Romleu Lapa onnnihe wali

\* 7:42 2Sam. 7:12; Mik. 5:1

mai imam lalap roro Parisi man nonolu hopon hi lar kele Jesus onnenihe, maa kar kele Jesus makun. Imam-imam roro ri Parisi onnenihe ra'ukani, "Alhi'ihepe ka moro ri onne maie?"

<sup>46</sup> Enine ma nadiyaka onnenihe walha, "Eih! Ai kam dernala ri man wakunu naise Ai makun!"

<sup>47</sup> Enine ri Parisi enihe ra'ihoru ra'idaru hi ra'aheni, "Yonde ri onne wukupohedi mi me'e!"

<sup>48</sup> Kene mim po'on! Iknika man panulu roro ri Parisi enihe akin ka naili'il ri onne menee!

<sup>49</sup> Heri ma ka nauroin Musa nina keneri hono'ok mehe akin naili'il Jesus! Mayai ma nauroiroin, ka! Na'amoli heri onne mehe lernala Makromod Lalap nina keneri kanai!"

<sup>50</sup> Nikodemus aile lolo onne haenhi. Ai onne Yahudi rir man panulu ida man nonolu mai pakromo noredi Jesus me'e. Ai ne'el Parisi namehin enihe na'ahenia,

<sup>51</sup> "I wal'u na'ahoru, iknik holoor halauk hopon ika kala leken ri man sala leke na'amou na'aropo nina hini'i wenewhe noro wanakunu mene ik kala hunukum!"

<sup>52</sup> Ideweni ne Parisi enihe wahilei ra'idaru Nikodemus ra'aheni, "Eh! O eni ma nina Galilea haenhi? Lam wakuku Horok Lape raram wawa'an! Horok Lap ka na'aheni ri Galilea namwali nabi!"

*[Ri Parisi rodi maeke man hi'i sale laa Yesus]*

<sup>53</sup> Hir wakunu horu ne ri na'akeme wali laa rira nakar me'e,

## 8

<sup>1</sup> maa Jesus wakiha'a laa wo'or Zaitun.

<sup>2</sup> Rakan oreki al'alam wake'e An wali wali'ur laa Makromod Nina Romleu Lape nina nikoin la ri nammori mai lupurale. Enine Ai naikoredi wakuku hi.

<sup>3</sup> Ai mahan wakuku ne, meser Horok Lape roro ri Parisi enihe rodi maeke ida mai Jesus me'e. Kame'ede hir hopon maeke onne namririyedi lolo heri kalarna, ono rin lerkuku ai mahan hi'i sale noro mo'oni ma ka namwali hono.

<sup>4</sup> Ende hir mai re'el Jesus na'ahenia, "Papa Meser, am do'on maeke eni mahan hi'i sale.

<sup>5</sup> Musa nina keneri hono'ok hopon nahenia lo'o ik lerkuku maeke mahan hi'i sale naise eni, rodi waku wasle hehen nanumene makiyedi! Ende Papa Nina honorok panaaku hi'ihehewi?"

<sup>6</sup> Hi rodi na'ukankani onne kene Jesus ranoin Nin sale leke tumdesne la kele Ai. Jesus kan idewe walhe, maa nahirawa yawa nodi liman horok elimoe.

<sup>7</sup> Hi ra'ukani Jesus manani. Kame'ede Ai namriri na'ahenia, "Ki mi na'akeme, inhoi na'alehe dohohala mai nala waku nodi wasla maeke eni nolu."

<sup>8</sup> Horu ne, Jesus rawa yawa nodi liman ra'an horok elimoe wali'ur.

<sup>9</sup> Hir derne Yesus Nin wanakunu me'ede hi dohodoho rala'a me'e, ma na'ileheredi rala'a nolu mene namehin enihe lernohi. Heri onne rala'a mouwedi, Yesus noro maeke onne memehedi me'e.

<sup>10</sup> Kame'ede Yesus namriri wali'ur na'ukani maeke onne, "Naiye, heri na'akeme aile ewi me'e? Lo'o ri kaale man hukum o?"

<sup>11</sup> Maeke onne walhe, "Ri kaale me'e, Pape."

Enine Yesus na'aheni, "Ya'u ka'u hukum o haenhi, de mala'a here, maa yom hi'i dohohala me'e."]\*

*Yesus namwali ropropo noho wawan*

<sup>12</sup> Yesus ne'el heri onnenihe na'ahenia, "Ya amwali ropropo noho eni wawan! Inhoi man lernohi Ya'u, ai onne kan minle metmetek kalkala me'e, maa an mori lolo ropropo ma nala or'ori dardari ma kan horu!"

<sup>13</sup> Ende Parisi, enihe ra'ahan rehi ra'aheni, "Onum wanakunu ma na'ono O kemen ka namlolo, ono mehem kuku maka O kemen."

<sup>14</sup> Ende Yesus na'ahenia, "Kade Ya'u wakunu Ya'u kemen mehe, maa Ainu'u wanakunu eniyeni namlolo ono Ya auroiroin Ya'u mai nano ewi, la wali laa ewi haenhi! Maa mi eniyeni ka mauroin Ya'u mai nano ewi la wali laa ewi!"

<sup>15</sup> Lo'o mim hukum ri, mim lernohi ri mormori nina panaeku mehe, maa Ya'u ka'u hukum ri mahaku lolo noho eni wawan.

<sup>16</sup> Lo'o Ya ala hunukum, Ainu'u hunukum onne namlolo kokkoo ono Ka'u mehe ho'ok kail, maa Ya'u ho'ok kail ri oro wewerre Ainu'u Pape man hopon Ya'u mai eni.

<sup>17</sup> Minim keneri hono'ok ida na'aheni, 'Yon ho'ok kail ri rodi man kuku maka ida mehe, maa rodi ri woro'o ramwali man kuku maka leke rauroin kokkoo inhawe ma namlolo.'

<sup>18</sup> Ya amwali man kuku maka ida, la Ainu'u Papa namwali man kuku maka woro'o nine, de ri nauroin nahenia Ainu'u wanakunu eni namlolo."

<sup>19</sup> Enine hi ra'ukani Yesus, "Onum Pape aile ewi?" Yesus na'ahenia, "Mi ka mauroin Ya'u, de ka mauroin Ainu'u Pape haenhi! Lo'o mi mauroin Maya'u, mauroin Ainu'u Pape haenhi."

<sup>20</sup> Ler Yesus wakuku hi wanakuku eniyeni, Ai namriri na'urani oplaha rala kupan loloile man minle Romleu Lape paharne. Ri mahaku kan kele Ai ono kan rakan Nina lere alam makun.

*Ri ma akin ka naili'il Yesus, maki lolo rir dohohala, de ka rala ampun*

<sup>21</sup> Yesus ne'el ri Yahudi onnenihe na'ahenia, "Ka nalo'olo Ya ala'a me'e, la lo'o mi manoin Ya'u maano kam do'on Ya'u, ono mim maki lolo minim dohohale, de ka namwali mim lernohi Ya'u laa Ainu'u miminlole."

<sup>22</sup> Ende Yahudi rir man panulu ida ma na'ukani ida, "Yonde ri eni mehen nesne

\* **8:11** Horok man aile lolo tanada [ ] raram, kaale lolo horok Yunani dedesne heruwali.

kemen harome? Eni penia Ai na'heni ik kak lernohi Ai laa Nina miminlole."

<sup>23</sup> Yesus na'heni wali'ur, "Mi eniyeni mamwali ri ma nano yawa, ri ma nano noho wawan, maa Maya'u, ka! Ya ano wawan!"

<sup>24</sup> Enpenia Ya aheni lo'o mim maki lolo minim dohohale. Lo'o mi akim ka naili'il Ainu'u wanakunu man konohi Ya'u eni inhoi, namlolo kokkoo mim maki lolo minim dohohala."

<sup>25</sup> Hi ra'ukani Yesus wali'ur, "Ende ki O eni inhoi?"

Jesus walhe, "Ya'u wakunu inhawe noro mi ho'o?!"

<sup>26</sup> Ainu'u wanakunu nammori makun man kukul minim sala leke nodi ho'ok kail mi, maa Ka'u wakunu lernohi Ainu'u panaeku aimehi. Makromod Lalap man hopon Ya'u mai, Ai onne namlolo kokkoo. Ya'u konohi ri mormori noho wawan inhawe man Ya'u derne nano Ai!"

<sup>27</sup> Enimaa hi ka rauroin nahenia Ai mahan wakunu panaeku ma na'ono Ai Aman Makromod Lalap.

<sup>28</sup> Ende Yesus ne'el hi na'henia, "Lere man mai rin kikan Ya'u ma namwali Ri Mormori Anan laa wawan. Lere onne mene mauroin nahenia Ya'u eni amwali Ai man Ya'u konohiyedi mi me'e, la lere onne mi mau-roin nahenia Ka'u hi'i haida lernohi Ainu'u panaeku aimehi, maa Ya'u wakunu mehe inhawe man Ainu'u Pape wakukuwedi me'e."

<sup>29</sup> Ai man hopon Ya'u mai noho wawan norle'ule'u nor-waliwali Ya'u mamani, la Ai kan huri Ya'u memehedi, ono

Ainu'u hini'i wenewhe hi'i Ai akin nahuwa'an mamani."

<sup>30</sup> Lere Yesus wakunu heheni, ri nammori akinhe naili'il Ai.

*Ri ma akin naili'il Yesus nahinuriyedi nano dohohala nin molollo*

<sup>31</sup> Ende Yesus ne'el ri Yahudi man akin naili'iledi enihe na'henia, "Lo'o mi mamkene lernohi Ainu'u wanakuku eni, namlolo kokkoo mi mamwaliyedi Ainu'u man lernohi me'e, la

<sup>32</sup> mi mauroinedi wanakuku ma namlolo wake'e lolo Makromod Lalap kalarna, de mi mahinuriyedi nano dohohala nin molollo me'e."

<sup>33</sup> Enine hi re'el Yesus wali'ur, "Mayai eniyenihe Abraham upun ananhe, de Onum panaeku hi'ihehewi ma'aheni ai mahinuriyedi? Ri mahaku ka nodi molollo mayai me'e!"

<sup>34</sup> Yesus walha na'henia, "Loi honorok wawa'an Ainu'u panaeku ma na'ono eniyeni: Inhoi man hi'i dohohala, ai onne namwali dohohale nin hophopon, ono dohohala nodi molollo ai me'e."

<sup>35</sup> Ri ma namwali hophopon na'alehe onno ma namkene lolo nakar raram, maa ri ma namwali anan mememen nin onno namkene laa ewi-ewi.

<sup>36</sup> Ende lo'o Ya'u, Makromod Lalap Anan, huri we'er mi nano minim dohohale, mi mahinuriyedi kokkoo nano dohohale nin molollo me'e.

<sup>37</sup> Memen Ya auroiroin mi eniyenihe Abraham upun anan, maa mim ken mesne

Ya'u, ono mamhene kokala  
Ainu'u wanakuku.

<sup>38</sup> Inhawe man Ya'u  
do'onedi lere Yo oro Ya Am'u  
min wewerre, onne Ya'u  
konohi mi, maa mim hi'i  
ha man ailanna mamani  
lernohi inhawe man mim  
derne nano minim pape!"

<sup>39</sup> Enine hir walha Yesus,  
"Alhi'ihepe wakunu heheni?!"  
Aanim pape Abraham, name-  
hin ka!"

Enimaa Yesus walha  
na'ahenia, "Lo'o namlolo  
kokkoo Abraham namwali  
minim papa, mim lernohi  
nina hini'i,

<sup>40</sup> maa kam hi'i lernohi  
ainin hini'i ono mi ma-  
ham paeku mesne Maya'u,  
kade Ya'u mehe konohi mi  
panaeku ma namlolo man  
Ya'u dernedi nano Makro-  
mod Lalap! Abraham kan hi'i  
heheni!

<sup>41</sup> Minim hini'i wenewhe  
onne kan lernohi minim  
papa Abraham, maa lernohi  
minim papa aimehi!"

Enine hi re'el Yesus, "Mayai  
eniyeuhe tatana apun leke  
ka, la aanim Papa ida mehe,  
Makromod Lalap!"

<sup>42</sup> Enime'ede Yesus  
na'ahenia, "Lo'o Makro-  
mod Lalap namlolo kokkoo  
namwali minim Papa, mi  
maramyaka Ya'u, ono Ya'u  
mai nano Ai. Ya'u ka'u  
mai lernohi Ainu'u panaeku  
aimehi, Ya'u lernohi Ainu'u  
panaeku mamani, ono Ai  
penia man hopon Ya'u mai.

<sup>43</sup> Alhi'ihepe mi ka mau-  
roin Ainu'u wanakunue? Mi  
ka mauroin ono mamhene  
kokala Ainu'u wanakuku  
eniyeni.

<sup>44</sup> Mi eniyenihe, minim  
pape namwali Hayakyak  
Makromon, la mi raram  
nodi lernohi ainina panaeku  
man ailanna mamani. Nano  
dedesne ai raram nodi nesne  
ri, la napoho mamani ono  
panaeku ma namlolo ida  
kaale raramne! Nin hini'i  
wenewhe onne lernohi  
nin honoli wenewhe ma  
namehiyala wake'e, ono ai  
penia namwali poho rahu  
na'akeme onno, de napoho  
mamani!

<sup>45</sup> Onne penia Ya ala  
wanakuku ma namlolo ki  
mi, maa mi akim ka naili'il  
Maya'u.

<sup>46</sup> Nano mi eniyenihe, ri  
mahaku kan kukul mouropo  
na'aheni Ya'u hi'i dohohale,  
ono Ainu'u dohohala kaale!  
Ya'u wakunu ha ma nam-  
lolo, de alhi'ihepe mi akim ka  
naili'il Maya'u?

<sup>47</sup> Inhoi ma namwali  
Makromod Lalap Nin ri,  
ai onne raram nodi derne  
nakani la kokale Makromod  
Lalap Nina wanakuku. Eni-  
maa mi eniyenihe mamhene  
derne makani Makromod  
Lalap Nina wanakuku ono mi  
ka mamwali Nin ri."

*Yesus kulu narehi Abraham*

<sup>48</sup> Yahudi enihe re'el Yesus  
na'ahenia, "Ai ma'aheniyedi  
me'e O mano Samaria,  
la hayakyake hu'uredi  
O raramne, de aanim  
wanakunu onne namlolo  
kokkoo!"

<sup>49</sup> Yesus na'ahenia,  
"Hayakyaka kan hu'ur Ya'u  
raram! Ya'u horhawé Ainu'u  
Pape, maa mim ilinohi  
malnohi Ya'u.

50 Ya'u ka anoin ul'uli sasa'a nano ri mormori, maa Makromod Lalap Nin panaeku na'akulu na'alapa Maya'u, la Ai onne ma naho'ok nakail ri mormori.

51 Loi honorok wawa'an Ainu'u panaeku ma na'ono eniyeni: Inhoi derne nakani de hi'i lernohi Ainu'u wanakuku eni, ai onne kan maki, maa lernala or'ori dardari ma kan horu."

52 Enime'ede Yahudi enihe ra'aheni wali'ur, "Ai mauroin nahenia namlolo kokkoo hayakyake hu'uredi O raram me'e, ono am dernedi Onum wanakunu nahenia ri man lernohi O lo'o kan maki! Abraham noro nabi-nabi enihe makiyedi me'e, de hi'ihehewi Om wakunu heheni?"

53 Alhi'ihepe Om pene'ek Om kulu narehi Abraham noro nabi-nabi man makiyedi me'enihe? O eni inhoi penia wakunu heheni?!"

54 Jesus na'aheni, "Lo'o Ya'u mehe a'akulu a'alap Ya'u kemen, onne kan min haida, maa Ya Am'u penia ma na'akulu na'alap Maya'u, la mi me'ene ma'aheni Ya Am'u namwali minim Makromod Lalap!"

55 Mim wakunu heheni, maa namlolo kokkoo mi ka mauroin Ai! Ya auroiroin Ai, la lo'o Ya aheni ka auroin Ai, Ya amwali ma napoho naise mi haenhi, maa Ya auroiroin Ai, la Ya'u hi'i wewhe Ainin wanakuku mamanı.

56 Nonolu minim papa Abraham akin nahuwa'an ono ai nauroin lere man mai an do'on Ya'u mai noho

wawan, la ors eni an do'onedi de akin nahuwa'an wake'e!"

57 Kame'ede ri Yahudi man derne Yesus enihe ra'aheni, "Onum anna kan rakan wellima makun! Hi'ihehewi Om do'onedi Abraham me'e?"

58 Yesus na'aheni wali'ur, "Loi honorok wawa'an Ainu'u panaeku ma na'ono eniyeni: Lere kar mori Abraham makun, Ya'u aiyedi me'e!"

59 Idewe Yahudi enihe rala waku rodi wasla Yesus, maa Ai nahaledi kemen de namhara Romleu Lap onne.

## 9

*Yesus hi'i wa'an ri man makan toko*

1 Yesus nala'ala'a ne, An do'on mo'oni ida. Mo'oni onne lere mori me'ede makan tokedi memen.

2 Enine Nina man lernohi pakunohi enihe ra'ukani Ai, "Papa Meser, alhi'ihepe mori me'ede makan tokedi memen me'e? Inhoi nin dohohala nakoko penia makan toko? Ainina, ee inna amanhe?"

3 Yesus na'ahenia, "Ainina dohohala ka nakoko ai makan toko, la ai inna aman rira ka haenhi, maa ai makan tokedi leke rin do'on Makromod Lalap Nina ke'eke'el an'anhe namwali ri eni.

4 Ors eni lelere makun, de leken paharin aile ik hi'i wewhe Ai man hopon Ya'u mai Nin honowok, maa ka nalo'olo lo'o na'umetek me'e, de kak howok me'e!

5 Lere Ya'u mormori mai noho wawan eni makun, Ya amwali ropropo man ropedi

ri mormori man minle mai  
noho wawan eniyeni."

<sup>6</sup> Ai na'ahenia heheni  
horu, An sapruiyedi aparne  
napa'uk elimo'e nanumene  
nalsoru mo'oni onne makan.

<sup>7</sup> Horu ne, Jesus hopon  
maktoko onne na'ahenia,  
"Lam laruwedi o makam lolo  
oir kiliu Siloam (Siloam onne  
napa'ahne, 'hopon nala'a')."  
Ende maktoko onne lan laru  
makan horu ne, an wali la  
makan mouwedi me'e!"

<sup>8</sup> Enine maktoko onne  
nina nakar wali noro ma  
nadedem do'on ai naikokore  
mehe napanpanak, hi ida  
ma na'ukani ida na'ahenia,  
"Ai eni ri ma nadedem  
naikoro kalla wawan mehen  
napanpanak onne harome?"

<sup>9</sup> Ri heruwali ra'aheni,  
"Namlolo ai kokkoo," maa  
ri namehin ra'aheni, "Ai  
onne ka, maa oin makan  
namnenehe noro maktoko  
onne." Enimaa maktoko  
onne na'aheni mamani,  
"Ya'u penia maktoke man  
mehe napanpanak lolo kalla  
onne!"

<sup>10</sup> Ende hi ra'ukani  
ai, "Emene hi'ihepenia o  
makam mouwedi me'e?"

<sup>11</sup> Ai na'aheni, "Ri ida  
ma naran Jesus hi'i wa'an.  
An saprui aparne napa'uk  
elimo'e nanumene nalsoru  
ya'u makan, horu ne hopon  
la'u laru lolo oir Siloam eni,  
de ya'u laru horu ne, i mak'u  
mouwedi me'e!"

<sup>12</sup> Hi ra'ukani ai ra'aheni,  
"Ri onne aile ewi me'e?" An  
walhe, "Ka auroin."

*Parisi ra'ukani inhoi man  
hi'i wa'an maktoke*

<sup>13-14</sup> Lere Yesus hi'i wa'an  
man makan toko onne pakro-  
romnala Yahudi rir Lere  
Alam Renren Warwarne, de  
luli rin howok lere onne.  
Ende Yahudi enihe rodi man  
nonolu makan toko onne laa  
ri Parisi enihe.

<sup>15</sup> Enpenia ri Parisi enihe  
ra'ukani ai wali'ur na'ahenia,  
"Hi'ihehewi penia o makan  
mouwedi me'e?"

Ai na'aheni, "Ri onne nala  
elimo'o tehe soru ya'u makan  
nanumene la'u laru, idewe i  
mak'u mouwedi."

<sup>16</sup> Enine ri Parisi heruwali  
ra'aheni, "Ri man hi'i wa'an  
ai makan onne kan mai  
nano Makromod Lalap ono  
kan horhawa Alam Renren  
Warwarne."

Enimaa ri Parisi namehin  
ra'aheni, "Hi'ihehewi ri man  
hi'i dohohale nauroin hi'i  
tanada ri kan dodo'onnala  
makun ma nodi Makromod  
Lalap Nina ke'eke'el  
an'anha heheni!" Kame'ede  
na'akeme rasesi me'e.

<sup>17</sup> Ende ri Parisi enihe  
ra'ukani man nonolu makan  
toko onne ho'o me'e, "Kene  
konohi mayai, ri man hi'i  
wa'an o makan onne ri  
wawa'an, ee ri yakyaka?"

An walhe, "Ya auroin Ai  
onne nabi ida."

<sup>18</sup> Enimaa Yahudi rir man  
panulu enihe kar derne  
rakanie, de ra'aheni ai  
makan kan toko la Yesus kan  
hi'i wa'an, penia hir polu  
nina ri leleher mai.

<sup>19</sup> Hi ra'ukani, "Namlolo  
kokkoo mi anum eni mori  
me'e ede makan tokedi, ee  
ka? Hi'ihehewi penia makan  
mouwedi me'e?"

<sup>20</sup> Nina ri leleher walhe,  
"Namlolo kokkoo ai anum

eni mori me'ede makan tokedi memen me'e,

<sup>21</sup> maa ai ka mauroin hi'ihepenia ors eni makan mouwedi me'eni. Mayai me'ene ka mauroin inhoi man hi'i wa'an makan penia mouwedi me'e. An lapedi me'e de, ken pape mehe ra'ukani ai!"

<sup>22</sup> Man nonolu makan toko onne nina ri leleher ra'aheni heheni ono ramka'uk Yahudi rir man panulu onnenihe, ono hi raledi kenekrohu me'e nahenia rohiyedi ri na'akeme ma ne'enohi Jesus onne namwali Kristus man Makromod Lalap kikan namwali Rai laa ewi-ewi nano rir kerei.

<sup>23</sup> Onne penia hir walhe deudeul ra'aheni, "An lapedi me'e, de ken papa mehe ra'ukani ai."

<sup>24</sup> Kame'ede hi rapolu wali'ur man nonolu makan toko onne leke ra'ukani wali'ur, "Kikan hopo ma'aheni om wakunu ha ma namlolo lolo Makromod Lalap leken kalarla! Ai mauroiroin ri man hi'i wa'an o makam onne, ri man hi'i dohohale!"

<sup>25</sup> An walhe, "Ka auroin lo'o ri man hi'i ya'u wa'an onne man hi'i dohohale, ee ka, maa ya auroiroin nahenia nonolu i mak'u tokedi, maa ors eni i mak'u mouwedi me'e la ya'u po'onedi waliwali me'e!"

<sup>26</sup> Enine hi ra'aheni wali'ur, "An hi'ihewi o makan penia om do'onedi me'e? An hi'i inhawé?"

<sup>27</sup> An walhe, "Ya'u konohiyedi mi me'e, maa mamhene derne ainu'u wanakunu wake'e.

Alhi'ihepe ma'ukani ho'o me'e? Yon hi'i de mi raram nodi mamwali Nina man lernohi harome?"

<sup>28</sup> Ideweni ne, hir wahilei ra'idaru ai ra'aheni, "Eih! O penia mamwali man lernohi Ai, maa mayai eniyenihe lernohi Musa mehe.

<sup>29</sup> Ai mauroine Makromod Lalap wakunu noro Musa, maa ai ka mauroin ri onneni mai nano ewi."

<sup>30</sup> Mo'oni onne polletilu de na'aheni, "Eih! Ka auroin minim panaeku! Lere mori ya'u me'ede mak'u tokedi, maa An hi'i i mak'u mou penia ya'u do'onedi me'e! Hi'ihehewi mi ka mauroin Ai nano ewi?!"

<sup>31</sup> Ik kauroin Makromod Lalap kan derne ri man hi'i dohohala, maa An derne ri man horhawe la man lernohi Nina honorok panaeku manani.

<sup>32</sup> Nano noho eni nin ma namwali me'ede kak derne rin hi'i wa'an ri man mori me'ede makan tokedi.

<sup>33</sup> Lo'o Ri onne kan mai nano Makromod Lalap, Nin molollo kaale hi'i ha naise eniyeni!"

<sup>34</sup> Idewe Parisi enihe ra'aheni, "Lere num ine kan mori o makun, num dohohale nammoriyedi me'e, de hi'ihepenia om wakuku mayai?" Lere onne me'ede hir kawala ai leke yono laa rir kerei raram me'e.

<sup>35</sup> Yesus derne Yahudi enihe kawala man nonolu makan toko onne leke yon laa rira kerei raram me'e, de Ai nanoin la na'aheni, "O akin naili'il Ai man mai nano a'am raram namwali Ri Mormori Anan, ee ka?"

<sup>36</sup> Enine ai na'aheni, "Pape, Ai onne inhoi? Ya apanak Pape konohi maya'u leke ya akin naili'il Ai."

<sup>37</sup> Yesus walha na'ahenia, "Om do'onedi Ai me'e. O moro Ai maham wakukunue!"

<sup>38</sup> "Makrom'u, ya akin naili'il Makrom'u!" Idewe eni ai nahirawa Yesus kalarna.

<sup>39</sup> Yesus na'aheni, "Ya'u mai leke ho'ok kail ri mormori noho wawan eni. Ya'u mai leke hi'i maktoko do'onedi, la man dodo'on makan tokedi, ono ri ma na'aheni hir do'on mouropo kar do'on rauroin haida ma namlolo."

<sup>40</sup> Enla ri Parisi man aile lolo onnenihe heruwali derne Yesus Nin wanakunu ra'aheni, "Num panaeku mayai eniyenihe maktoke?"

<sup>41</sup> Kame'ede Yesus ne'el hi, "Lo'o mi mauroin nahenia mi makum tokedi ono ka mauroin inhawe ma namlolo, Makromod Lalap ka nala sala ki mi, maa mi mehe mauroin mi makum moumou la mauroin ha wo'ira na'akeme ma namlolo. Onne penia mim saledi."

## 10

### *Yesus namwali man huri wawa'an*

<sup>1-2</sup> Yesus na'aheni, "Loi honorok wawa'an Ainu'u panaeku ma na'ono eniyeni: Ri man huri pipduma nad-edem mai ro'o raram lolo takin nina nikeni, maa ri ma nodi kalla susuwar mai raram, ai onne ri ma namna'a la nahoro ri nin hahaa.

<sup>3</sup> Ri ma nadiyaka ro'o hari nike leke man huri onne laa raram, la nin pipdum enihe rauroiroin ai lirna, de lernohi ai. Ai napolu wekel do-hodoho naran mene lernohi laa paharne.

<sup>4</sup> Nina pipdum enihe laedi paharne mene ai noluwed\*, la nina pipdum enihe lernohi ono rauroiroin ai lirna.

<sup>5</sup> Hi ramhene lernohi ri namehin. Lo'o ri namehin napolu, hir lari, ono ka rau-roin lirne."

<sup>6</sup> Yesus wakunu lir naho'ok eniyeni, maa ri Parisi man derne enihe ka rauroin Ainin panaeku.

<sup>7</sup> Ende Yesus na'aheni wali'ur, "Loi honorok wawa'an Ainu'u panaeku ma na'ono eniyeni: Ya'u penia amwali pipi ro'o nina nike. <sup>8</sup> Ri man mai nolu Ya'u man hi'i kemen namwali man huri, hi onne ma namna'a, maa pipdum enihe kar derne rakani ma namna'a onnenihe lirna.

<sup>9</sup> Ya'u eni amwali nike, de inhoi mai raram lolo Maya'u, ai onne huri we'eredi nano nin dohohala nin hunukum makmaki, la lernala or'ori dardari ma kan horu. Enla ai onne naise pipduma man lolo nike laa raram mai pa-harne leke lernala hanana'an nonomun man wa'an.

<sup>10</sup> Ri ma namna'a onne mai leke namna'a, nesne, la nano'onyaka mamani, maa Ya'u mai leke ri mormori lernala or'ori ma namlolo man penpenu kemkeme.

<sup>11</sup> Ya'u eni amwali man

\* **10:4** Pipduma ma aile Yotowawa rir morimori ka namnenehe pipduma ma aile Israel. Nadedem man huri noluwed mene hir lernohi.

huri wawa'an. Ya ala I kem'u maki leke nahinerre Ainu'u pipdum enihe.

<sup>12</sup> Lo'o orpipi pair ri namehin namwali man huri, ri onne ka nadiyaka pipduma wawa'an naise orpipi mememen, ono pipduma onne ainine, ka. Ende lere ha mormori merwui mai tamak pipdum enihe, an lari me'e la kan peinohi pipdum enihe, penia lariye'er rarari.

<sup>13</sup> An lari ono nanoin naiwe'el mehe, la kan peinohi pipdum enihe.

<sup>14</sup> Ya'u eni man huri wawa'an. Ya auroiroin Ainu'u pipdum enihe, la pipdum enihe rauroiroin Ya'u haenhi.

<sup>15</sup> Onne namnenehe noro Yo oro Ainu'u Pape. Ai nau-roiroin Ya'u la Ya auroiroin Ainu'u Pape, la Ya ala I kem'u maki leke nahinerre Ainu'u pipdum enihe.

<sup>16</sup> Ainu'u pipduma namehin aile haenhi, maa kan minwuku noro pipduma ma aile ro'o eni, la Ainu'u panaeku Yo odi mai leke min wewerre noro Ainu'u pipdum enihe. Hi lo'o derne Ya'u lirna haenhi, leke Ainu'u pipi na'akeme minwuku ro'o ida la rir man huri ida mehe, ono Ya'u penia ma namwali rir man huri.

<sup>17</sup> Ainu'u Pape naramyaka Ya'u ono Ya ala I kem'u maki leke Ya'u mori wali'ur.

<sup>18</sup> Ri mahaku ka nodi molollo nesne Maya'u, maa Ya'u raram nodi ala I kem'u maki. Ainu'u molollo aile Ya ala I kem'u ri nesne la Ainu'u molollo aile Ya'u mori wali'ur. Onne penia

honowok man Ya'u kokale nano Ainu'u Pape."

<sup>19</sup> Yesus wakunu horu ne, ri Yahudi enihe rasesi wali'ur.

<sup>20</sup> Hi nammori ra'aheni, "Yono makani Ai! Hayakyake hu'uhu'ur raram de na'iseriyedi me'e!"

<sup>21</sup> Maa ri namehin ra'aheni, "Lo'o hayakyake hu'uhu'ur raramne, Ai kan wakunu heheni. Hayakyaka onne ka nadedem hi'i wa'an man makan toko!"

*Yahudi enihe kar kokala Yesus*

<sup>22</sup> Lere ri Yahudi hi'i yapi ra'aromo rira 'Romleu Lape Nin Ler Alam Man Horu' lolo Yerusalem rakanedi me'e, la lere onne noho rinrinne nina lere alam.

<sup>23</sup> Yesus mahan lalaa maa mai lolo Solomo Nin Henei man aile Romleu Lape.

<sup>24</sup> Lere onne ri Yahudi enihe lawuku lupurala Yesus la ra'aheni, "Ma'anana Om konohi mayai mouropo O eni inhoi? Yom hi'i yai ma'irhu! Lo'o mamwali Kristus man Makromod Lalap kikanedi namwali Rai eni, konohi mayai!"

<sup>25</sup> Kame'ede Yesus ne'el hi, "Ya'u konohiyedi mi me'e, maa mi akim ka naili'il Maya'u! Ainu'u hini'i wenewhe nodi kunukunohi nahenia Ya'u eni inhoi, la kukunohi nahenia Yo odi Makromod Lalap Nin ke'eke'el an'anha haenhi.

<sup>26</sup> Enimaa mi akim ka naili'il Maya'u ono mi ka mamwali Ainu'u pipduma hunuri.

<sup>27</sup> Ainu'u pipduma na'akeme rauroiroin Ainu'u

wanakunu. Ya auroiroin hi, la hir lernohi Ya'u.

<sup>28</sup> Ya ala or'ori dardari hi de kar makileken, maa hir mori laa ewi-ewi, la ri mahaku ka naruri nahoro hi nano Ya'u liman raram.

<sup>29</sup> Ainu'u Papa naledi hi na'akeme Maya'u me'e, la An lapa narehi na'akeme, de ri mahaku ka naruri nahoro hi nano Ainu'u Pape liman raram.

<sup>30</sup> Yo oro Ainu'u Pape mahaku."

<sup>31</sup> Enine Yahudi eni rala waku rodi wasla Yesus ho'o me'e,

<sup>32</sup> maa Yesus na'aheni, "Mim do'onedi tanada lalapa nammori me'e man Ainu'u Pape hopon Ya'u hi'i. Inhawa tanada namehiyala penia mim wasla Ya'u!"

<sup>33</sup> Kame'ede ri Yahudi enihe ra'aheni, "Ai ka ma'ahan ono Om hi'i tanada onnenihe, maa ai ma'ahan ono O ma'ihoru ma'idaru Makromod Lalap! O ri mormori mehe, maa O ma'aheni mamwali Makromod Lalap!"

<sup>34</sup> Yesus na'aheni wali'ur, "Lolo minim keneri hono'ok eni horhorok ma na'ono mi ri mormori aile ma na'aheni, 'Mi mammenehe Makromod Lalap ananhe.'\*

<sup>35</sup> Ik kauroiroin nahenia inhawe man horokedi lolo Horok Lap raram kar herre laa ewi-ewi, de lo'o Horok Lap na'aheni ri man mori nonolu onnenihe namnenehe Makromod Lalap ananhe, emene hi'ihehewi noro Maya'u ma namwali Ai Anan?"

<sup>36</sup> Makromod Lalap me'ene na'ono Maya'u la hopon Ya'u mai noho wawan eniyeni. Ende lo'o Ya aheni Ya amwali Makromod Lalap Anan, alhi'ihepe ma'aheni Ya a'ihoru a'idaru Ai naran?!

<sup>37</sup> Lo'o Ka'u hi'i honowok man Ainu'u Pape nala Maya'u eni, wa'an rehi yono mi akim naili'il Ya'u, maa Ya'u hi'i Nin honowok onne na'akeme.

<sup>38</sup> Kade mi akim ka naili'il Ainu'u wanakunu, maa wa'an rehi mi akim naili'il Ainu'u hini'i wenewhe onnenihe leke mim do'on mau-roin nahenia Ainu'u Papa minle Ya'u raram, la Ya'u minle Ainu'u Pape raram haenhi."

<sup>39</sup> Enine hir kene kele Yesus wali'ur, maa Ai nahala kemem nala'a me'e.

<sup>40</sup> Yesus wali wali'ur laa oir Yordan walie, la minle onno man nonolu Yohanis nodi oir ulutada ri eni.

<sup>41</sup> Ri nammori mai Yesus minwuku lolo onne la ra'aheni, "Kade Yohanis kan hi'i tanada ri kan dodo'onnala makun, maa ainina wanakunu ma na'ono ri eni na'akeme namwaliyedi me'e!"

<sup>42</sup> Ende ri nammori ma aile lolo onne akin naili'il Yesus.

## 11

### Lazarus nin makmaki

<sup>1</sup> Lere onne mo'oni ida aile naran Lazarus, la an minle leke Betania noro narna woro'o, ida naran Maria la ida naran Marta.

<sup>2</sup> Ma naran Maria eni penia ma nala wuru wola'ula'u halle Yesus ein la nodi nina

\* **10:34** Mzm. 82:6

muruk sorue. Enla lerida Lazarus onne nakni'ir,

<sup>3</sup> de narna woro'o enihe hoppo ri lan konohi Jesus nahenia hi narna man Jesus naramyake nakni'ir.

<sup>4</sup> Jesus dernedi ne na'heni, "Apinha onne kan hi'i den maki, maa kini'ir eniyeni namwali leke ik po'on Makromod Lalap Nin ke'ke'e'l an'anha ma narehi ma nalewen la Ya'u ma namwali Ai Anan lernala ul'uli sa'sa'a haenhi."

<sup>5</sup> Kade Jesus naramyaka Maria, Marta noro narna Lazarus,

<sup>6</sup> maa lere dernedi Lazarus nakni'ir, An min lolo onne alam woro'edi mene wali laa Betania.

<sup>7</sup> Ende nakawedi alam woro'o nanumene Jesus ne'el Nina man lernohi pakunohi na'henia, "Mai ik wali laa Judea here."

<sup>8</sup> Enine man lernohi enihe ra'heni, "Papa Meser, idedi nanumene Yahudi enihe manlo'o rodi waku wadesne Papa! Alhi'ihepe ik wali laa enne ho'o me'e!"

<sup>9</sup> Kame'ede Jesus nair wanakunu naho'ok na'henia, "Lere kekeme ida nin jam idaweli woro'o, namlolo, ee ka? Ende inhoi nala'a noro wewerre Maya'u kan wekur, ono ai nodi lelere leke do'odo'on kalla,

<sup>10</sup> maa inhoi ma nala'a a'alam lo'o wekur, ono ropropo kaale."

<sup>11</sup> Jesus wakunu heheni horu ne, na'heni wali'ur, "Ik walin Lazarus namkukuru, maa na'amoli ik laa mene Ya amake."

<sup>12</sup> Man lernohi pakunohi ra'heni, "Papa Meser, lo'o

Lazarus namkukuru, an pelek wa'an."

<sup>13</sup> Lere onne Jesus na'heni Lazarus namkukuru, maa Ainina panaeku Lazarus makiyedi me'e, maa Nin man lernohi pakunohi enihe ka rauroin Nin panaeku. Hir pene'ek Lazarus namkukuru naise ma namkuru nadedem mehe.

<sup>14</sup> Ende Jesus wakunu mouropo nahenia, "Lazarus makiyedi me'e,

<sup>15</sup> maa onne namwali leke mi akim naili'il Maya'u wawa'an, de wa'an rehi an makiyedi mene Ya'u rakan enne. Ende mai kala'a laa Betania here."

<sup>16</sup> Kame'ede Tomas (ma nadedem rin wekel Tatana Adodo'o) ne'el walin man lernohi Jesus enihe, na'henia, "Mai ik lernohi Jesus laa Judea, kade koro Ai maki wewerre!"

### *Jesus na'alap Marta noro Maria akin*

<sup>17</sup> Jesus rakanedi Betania ne, rin konohi Ai, "Lazarus makiyedi me'e, la ai modi la ma'akene manakuwedi ku'il raram alam wo'akkedi me'e."

<sup>18</sup> Leke Betania onne ko'u lo'o kilu wokelu nano Jerusalem.

<sup>19</sup> Ende Yahudi nammori mai ka'ar rahuwa'an Marta noro Maria akin ono narna makiyedi me'e.

<sup>20</sup> Marta derne Jesus maiyedi ne, idewe lan pakromo noro Jesus, maa Maria ka namhara nakar makun.

<sup>21</sup> Marta ne'el Jesus na'henia, "Makrom'ue! Lere onne Makrom'u aile mai eni manlo'o I nar'u kan maki,

<sup>22</sup> maa ya auroiroin nahe-nia ors eni me'ede inhawe O mapanak, Makromod Lalap nala ki O."

<sup>23</sup> Yesus na'aheni, "O narum eni mori wali'ur!"

<sup>24</sup> Marta na'ahenia, "Makrom'ue! Ya auroiroin Lazarus lo'o mori wali'ur noro ri man maki na'akeme lere noho nina man horue."

<sup>25</sup> Yesus na'aheni, "Ya amwali or'ori dardari onno! Ya'u penia ma na'amori ri man makiyedi me'e, la Ya ala or'ori dardari ma kan horu hi. Inhoi ma akin naili'il Maya'u, kade an maki, maa makmaki ka nodi molollo ai me'e, de mori wali'ur."

<sup>26</sup> Enla ri man lernala or'ori dardari, la ma akin naili'il Maya'u, ai onne kan maki, maa mori laa ewi-ewi! O akim naili'il Ainu'u wanakunu eni, ee ka?"

<sup>27</sup> Marta walha, "Makrom'u! Ya akin naili'il O, la ya auroin O penia Makromod Lalap Anan man kikanedi namwali Rai laa ewi-ewi eni, la ya auroin Makromod Lalap hopon O mai noho wawan eniyeni!"

<sup>28</sup> Marta na'aheni heheni horu ne, lan polu Maria. Ai nalpupu Maria na'ahenia, "Papa Meser maiyedi me'e la mahan na'ukani o."

<sup>29</sup> Maria nauroiroin Yesus maiyedi ne, idewe halhala lan pakromo noro Ai.

<sup>30</sup> Enimaa Yesus kan rakan leke raram makun, aile leke paharne lolo onno man idedi wakunu noro Marta onne.

<sup>31</sup> Ri Yahudi man minle Maria nina nakar onnenihe do'on Maria halhala laa paharn, de hir lernohi ono

rauroiroin nahenia Maria nala'a ku'il nahere.

<sup>32</sup> Maria laa na'urani Yesus, idewe kadi ein korno yawa la na'aheni, "Makrom'e! Lere onne Makrom'u aile mai eni manlo'o i nar'u kan maki."

<sup>33</sup> Yesus do'onedi Maria noro ri Yahudi enihe mai raherhere ne, idewe Ai honorok akin sus wake'e la hehel rehi.

<sup>34</sup> Kame'ede Ai na'ukani, "Mi ma'aken manakuwedi ihin kemen mala loile aile ewi?"

Hi ra'aheni, "Makrom'e, mam po'on."

<sup>35</sup> Ideweni Yesus nahere me'e.

<sup>36</sup> Enine Yahudi enihe ida ma ne'el ida, "Eih! Namlolo kokkoo Ai naramyaka rehi Lazarus!"

<sup>37</sup> Maa heruwali ra'aheni, "An hi'i wa'an man makan toko do'on wali'ur, emene hi'hepenia Ai kan hi'i wa'an Lazarus leke yon maki?"

*Yesus na'amori Lazarus nano makmaki*

<sup>38</sup> Kame'ede hi roro Yesus laa ku'il man rodi ra'akene manaku Lazarus ihin kemen. Hir rakanedi ne, Yesus akin woir wali'ur. Ku'il kalarna onne rodi waku lapa ida el'elek ku'il makan.

<sup>39</sup> Ende Yesus hopon poiyedi waku rodi el'elek onne.

Enine man maki narna Marta na'aheni, "Makrom'ue, hir loiyedi Lazarus ihin kemen lolo eni alam wo'akka me'e, de lo'o ihin kemen popedi me'e!"

<sup>40</sup> Yesus na'aheni, "Ya'u konohiyedi mi me'e nahenia lo'o mi akim naili'il mim do'on Makromod Lalap Nina

ke'ek'e'l an'anhe ma narehi  
ma nalewen!"

<sup>41</sup> Kame'ede hir poiyyedi  
waku onne laa herne, la  
Yesus niliha'a laa wawan la  
na'aheni, "Pape, Ya apanak  
trimkasi Pape ono dernedi  
Ya'u me'e.

<sup>42</sup> Ya auroin Pape derne  
Ya'u lirna mamani, maa Ya'u  
konohi ha eni na'akeme lolo  
heri eni kalarna leke akinhe  
naili'il la rauroin nahenia  
O penia man hopon Ya'u mai  
noho eni wawan."

<sup>43</sup> Onne horu ne, Yesus  
wakau naruri na'ahenia,  
"Lazarus, mamhara mai  
paharne here!"

<sup>44</sup> Idewe Lazarus man  
makiyyedi onne namhara  
nano ku'il mai paharn,  
liman ein rodi tapi lunlunne  
makun, la oin makan rodi  
tapi paspasun haenhi. Yesus  
na'ahenia, "Mim we'eredi  
tapi leke nauroin nala'a  
wawa'an."

*Yahudi rir man panulu  
paeku resne Yesus*

(Mat. 26:1-5; Mrk. 14:1-2;  
Luk. 22:1-2)

<sup>45</sup> Lere onne ri Yahudi  
nammori aile lolo onne, de  
na'akeme man lernohi Maria  
laa paharne do'onedi Yesus  
Nin hini'i onnenihe, penia hi  
nammori akin naili'il Yesus,

<sup>46</sup> maa heruwali lar konohi  
Yesus Nin hini'i onne ri Parisi  
enihe.

<sup>47</sup> Ende imam-imam lalap  
roro Parisi enihe polu wuku  
ri ma nadedem naikoro  
wuku ho'ok kail ri lernohi  
Yahudi rir agame nin holoor  
halauk enihe. Hi na'akeme  
ra'ahenia, "Lo'o ik hi'ihewi  
Ai?! Ai eni hi'i tanada

namansa man kukul Makromod  
Lalap Nin ke'ek'e'l  
an'anha!

<sup>48</sup> Lo'o maika kak kawala  
de An wakuku mamani, iknik  
ri na'akeme akin naili'il Ai,  
penia Roma nin ke'urauk mai  
rano'onyaka iknika Romleu  
Lape, la raiye'eredi iknik  
hair!"

<sup>49</sup> Lere onne nano ri man  
ho'ok kail onne ri ida aile  
naran Kayapas. Anna onne  
ai namwali imam man kulu  
narehi. Ai ne'el hi na'ahenia,  
"Heih! Mi ka mauroin haida-haida.

<sup>50</sup> Mi ka mauroin nahenia  
wa'an rehi ri ida maki leke  
yon iknik hair makileken."

<sup>51</sup> Kayapas pene'ek nodi  
nin panaeku aimehi wakunu  
heheni, maa ai ka nau-roin  
Makromod Lalap nodi  
nin wanakunu onne kukul  
panaeku namehin, ono anna  
onne ai penia ma namwali  
imam man kulu narehi.  
Enpenia Makromod Lalap  
nodi ainin wanakunu onne  
kukunohi nahenia Yesus  
maki leke ri Yahudi lernala  
or'ori dardari,

<sup>52</sup> la ka na'aheni Yahudi  
mehe, maa An maki leke  
Makromod Lalap Nina ri  
mormori na'akeme ma aile  
ewi-ewi lernala or'ori dar-  
dari haenhi leke na'akeme  
lawuku ramwali mahaku.

<sup>53</sup> Ende nano lere onne  
me'ede Yahudi rir man  
panulu enihe lawuku rala  
panaeku leke resne Yesus.

<sup>54</sup> Onne penia Yesus  
kan lalaa mamai lolo  
Yahudi kalarna me'e, maa  
namharedi Yudea nala'a leke  
ida naran Efraim. Leke onne  
na'urani noho mamun, la  
Yesus noro Nina man lernohi

pakunohi enihe min lolo onne.

<sup>55</sup> Lere onne Yahudi nina Lere Alam Lalap Paska na'uraniyedi me'e, de ri nammori nano lekleke mai Yerusalem leke ra'amou kemen nano dohohale lernohi Yahudi nin holoor halauk mene rakan lere alam lernohi Paska.

<sup>56</sup> Hi maha ranoin Yesus, de lere hir minwuku Rom-leu Lapa nina nikoin ida ma na'ukani ida, "Minim panaeku hi'ihehewi? Lo'o kan mai harome?"

<sup>57</sup> Hi ra'aheni heheni ono imam-imam lalapa noro ri Parisi enihe raledi kenekrohu la loikaruwedidi heri onne me'e nahenia inhoi nauroiroin Yesus Nin miminbole kukunohi leke lar kele.

## 12

*Maria nodi wuru wola'ula'u rala halla Yesus ein*

(Mat. 26:6-13; Mrk. 14:3-9)

<sup>1</sup> Yesus nala'a leke Betania la lere alam woneme wali'ur mene Yahudi rir Lere Alam Lalap Paska. Lazarus man Yesus na'amori nano mak-maki min Betania onne.

<sup>2</sup> Ende lolo Betania onne rin hi'i ya'an yomun rodi horhawe Yesus. Lere onne Lazarus noro heri man mai enihe ra'ak wewerre noro Yesus, la Marta penia ma nahinoi namkau hanana'an na'akeme hi ra'an.

<sup>3</sup> Ka nalo'ol ne, Maria nodi wuru Narwastu man wala'ula'u potol ida mai nala halla Yesus ein mene nodi nina muruk soru na'akisi. Wuru wola'ula'u onne wella ai wawan wake'e la ra'in

holkekeme nakar onne raram.

<sup>4</sup> Enime'ede Yesus Nina man lernohi ma naran Yudas Iskariot (ma na'olu Yesus), an hehel rehi do'on Maria nina hini'i onne de na'ahenia,

<sup>5</sup> "Heih! Hi'ihepenia ka ma'olu wuru onne leke mala nin kupan laa ma na'alehe haida-ha'ide? O ma'olu wuru onne wella kupan pere rahu wokelu menee!"

<sup>6</sup> Yudas wakunu heheni, maa nina panaeku ka na'ono ma na'alehe haida-haida enihe, ono ai onne nakmanna kupan. Ai namwali ma nasala ri idaweli woro'o enihe rira kupan, maa nadedem ai namna'a kupan nodi na'uwali nine haenhi.

<sup>7</sup> Enimaa Yesus dadiyale, "Yono kawala maeke eni nin hini'i Maya'u. An hi'i heheni Maya'u, leke I kem'u namkene rin na'akene manaku.

<sup>8</sup> Ri ma na'alehe haida-haida onnenihe nornoro mi mamani, maa ka nalo'ol Ya'u ka oro mi me'e."

<sup>9</sup> Ri nammori derne nahenia Yesus aile Betania de rala'a enne. Rira panaeku kar laa do'on Yesus mehe, maa rira panaeku laa do'on Lazarus man mori wali'uredi onne haenhi.

<sup>10</sup> Ende imam lalap enihe rala panaeku resne Lazarus haenhi,

<sup>11</sup> ono ri Yahudi nammori ma nano Yerusalem ramhene derne rakani hi me'e, maa hi akin naili'il Yesus ono hir do'on rauroin Lazarus maki la ra'amori wali'ur.

*Rinammori akin nahuwa'an  
ono Yesus mai Yerusalem  
(Mat. 21:1-11; Mrk. 11:1-  
11; Luk. 19:28-40)*

<sup>12</sup> Rakan oreki, ri nammori maiyedi Yerusalem me'e, leke lernohi Lere Alam Paska. Hir derne nahenia Yesus aile kalla toro, la na'uraniyedi Yerusalem me'e.

<sup>13</sup> Ende hir laa rala korma kawin rodi laa pakromomo Yesus, leke na'akeme sokmura lolo kalla, la hir wakau ra'heni,

"Ka'uli kasa'a Makromod Lalap!"

Na'amoli Makromod Lalap namre'e namharu O man mai nodi Ai Oin Naran!

Na'amoli Makromod Lalap namre'e namharu Makromod ma namwali Israel nina Rai!" \*

<sup>14</sup> Lere Yesus mai Yerusalem, An ha'a keledei anan ida man aile lolo kalla, la onne na'akuku na'anokor wanakunu man horokedi lolo Horok Lape raram ma na'ahenia,

<sup>15</sup> "Ri Sion mie! Yom mamka'uk! Po'onala! Minim Rai ha'aha'a keledei anan mai me'e!" \*

<sup>16</sup> Nano nonolu panaeku ma namwali noro Yesus eni horokedi lolo Horok Lape raram, maa lere onne Nin man lernohi pakunohi enihe ka rauroin nahenia ha ma namwali onne na'akuku na'anokor inhawe man horhorok ai Horok Lap raram. Enimaa rakan lere Makromod Lalap na'akulu

na'alap Yesus nano makmaki mene hir horoknala la rau-roin ha onne na'akeme.

<sup>17</sup> Ende heri man po'on Yesus napolu Lazarus namhara ku'il mai paharne onne laliwewer Yerusalem wakunu Yesus Nin hini'i onne.

<sup>18</sup> Enpenia ri nammori mai pakromo noro Yesus, ono hir derne nahenia Yesus hi'i tanada man ri kan dodo'onnala makun man kukul Makromod Lalap Nin ke'eke'el an'anha.

<sup>19</sup> Kame'ede ri Parisi enihe ida ma ne'el ida, "Ik ka karuri hi'i haida-haida me'e! Ik po'on mehe ri noho wawan na'akeme lari lernohi Ai me'e!"

*Jesus kukunohi Nina maki*

<sup>20</sup> Lere Alam Paska onne ri nammori mai Yerusalem leke hoikani Makromod Lalap, la lolo hi onne ri Yunani aile haenhi.

<sup>21</sup> Ende hir mai Pilipus manin Betsaida ma aile noho Galilea onne, la ra'ukani, "Pa'e, ainima panaeku pakromo norala Yesus."

<sup>22</sup> Kame'ede Pilipus lan konohi Andreas de woro'ohe laa konohi Yesus, "Pap Meser! Manina noho Yunani maha ranoin Papa Meser."

<sup>23</sup> Yesus ne'el hi na'ahenia, "Makromod Lalap Nin lere alam rakanedi me'e, leke Maya'u ma namwali Ri Mommori Anan ra'akulu ra'alapa.

<sup>24</sup> Loi honorok wawa'an Ainu'u panaeku ma na'ono eniyeni: Ik kaho'ok wini gandum waku ida ma nadiyaur

\* **12:13** Mzm. 118:25, 26 \* **12:15** Zak. 9:9

laa yawa la hapedi, naise I kem'u man makiyedi. Lo'o rin kan hape, wini gandum onne ka namwali haida-haida, maa lo'o wini onne nadiyaur la rin hape, wini onne mori, dipi, la woi leke eren nammomori.

<sup>25</sup> Inhoi nanoin nin wawa'an mamani, an makileken, maa inhoi namhene nanoin nin wawa'an aimehi lolo noho eniyeni, ai onne lernala or'ori dardari ma kan horue.

<sup>26</sup> Inhoi raram nodi ilitolle Ainu'u honowok, hi onnenihe lernohi Maya'u mamani, la Yo oro man howok onne min wewerre lolo Ainu'u miminbole. Enla Ainu'u Pape horhawe ri na'akeme ma namwali Ainu'u man howok."

### *Jesus wakunu Nin makkabi*

<sup>27</sup> "Ya akin woir rehi la Ka'u kerhu wewerek pananaka ma na'ikeki mamai enie, de ka auroin Ya a'aheni inhawa Ainu'u Pape! Manlo'o Ya a'aheni, 'Papa, mahaledi Ya'u nano wewerek pananaka eniyeni!' Maa Ya'u ka'u wakunu heheni ono panaeku lernala wewerek pananaka eni penia nakoko Ya'u mai noho wawan!"

<sup>28</sup> Ende Jesus hi'i lir napanak Makromod Lalap, "Pape mala hari Onuma ke'eke'el an'anhe ri mormori noho wawan do'on leke Pape Naran na'amoli ra'uli rasa'e!"

Jesus na'aheni onne horu, Lir ida nano a'am raram na'aheni, "Ya a'akulu a'alapedi Ya'u Naran me'e, la

Ainu'u panaeku Ya a'akulu a'alapala wali'ur."

<sup>29</sup> Ri nammori man min lolo onnenihe dederne Lir onne, la heruwali ra'aheni onne noho dildille, maa heruwali ra'aheni onne hophopon a'am raram lirna mai Yesus.

<sup>30</sup> Enimaa Yesus na'aheni, "Lir man mim dederne onne ka rala leke paku Maya'u, maa Lir onne rala leke paku mi.

<sup>31</sup> Lere eni me'ede Makromod Lalap naho'ok nakail ri mormori noho wawan eni, la Ai namkene nahoredi Hayakyak Makromon nina molollo lolo noho wawan eni me'e.

<sup>32</sup> Enla Maya'u, lere rin kikan Ya'u laa onno man kulu, lere onne Ya apolu ri na'akeme mai Maya'u!"

<sup>33</sup> Yesus na'aheni rin kikan Ai laa onno man kulu leke heri rauroin nahenia An maki lolo au kekiyowok.

<sup>34</sup> Enine ri man min lolo onne ra'aheni, "Lolo ainima keneri hono'ok, horhorok aile ma na'aheni, 'Kristus man Makromod Lalap kikan namwali Rai eni mori laa ewi-ewi!' Hi'ihepenia O ma'aheni, 'Ri Mormori Anan lo'o kikan laa onno man kulu! Ri Mormori Anan onne inhoi?!" \*

<sup>35</sup> Ende Jesus wakunu kemen na'ahenia, "Ka nalo'ol me'e ropropo man minle mi leken kalarneni moluwedi me'e, de modi ropropo eni mala'a here, leke yonde metmetek dawak mi. Ri ma nala'ala'a lolo metmetek raram kan do'on haida-haida

\* **12:34** Mzm. 110:4, Yes. 9:6, Yeh. 37:25, Dan. 7:14

de ka nauroin kalla.

<sup>36</sup> Lere eniyeni ropropo aile nornoro mi, de wa'an rehi mi akim naili'il ropropo onne, leke mi mammwali ropropo onne Nin ri!"

Yesus wakunu heheni horu, mene Ai nala'a, la ka nalhari kemen hi me'e.

*Yahudi nammori akin ka naili'il Yesus*

<sup>37</sup> Kade Yesus nodi Makromod Lalap Nin ke'ek'e'l an'anha hi'i tanada nammori man ri kan dodo'onnale makun, maa ri Yahudi enihe hi akin ka naili'il Ai.

<sup>38</sup> Ende onne na'akuku na'anokor nabi Yesaya lirna ma na'aheni,  
"Makromod, inhoi akin naili'il ainima wanakunu loloi kakarue?

Inhoi lo'o do'on Num ke'ek'e'l an'anha?  
Ri mahaku ka nauroin ha eniyeni na'akeme Onuma molollo!" \*

<sup>39</sup> Onne penia, hi akin ka naili'il, ono lolo horok Yesaya horhorok aile haenhi ma na'aheni,

<sup>40</sup> "Makromod Lalap na'aheni,

'Ya'u mehe hi'i hi makan toko la akin kerhe leke yono hir do'on la rauroin de yon hir wali mai Maya'u leke Ya'u hi'i wa'an wali'ur.' " \*

<sup>41</sup> Yesaya na'aheheni heheni ono lere nonolu onne an do'onedi Kristus Nina ke'ek'e'l an'anha ma narehi ma nalewen, la an konohi inhawé an do'onedi me'e.

<sup>42</sup> Kade Yahudi rir man panulu nammori akin kerhe, maa heruwali akin naili'il

Yesus haenhi.

Hi akin naili'il Yesus, maa hi ramhene wakunu ra'aheni Yesus eni man kikanedi namwali Rai laa ewi-ewi, ono hi ramka'uk lo'o ri Parisi enihe kawale kar laa rira Romleu Lap raram me'e!

<sup>43</sup> Hi ramka'uk wakunu nhenia hi akin naili'il Yesus ono hi raram nodi lernala ul'uli sasa'a nano ri mormori narehi lernala ul'uli sasa'a ma nano Makromod Lalap!

*Yesus Lirna namwali hon'ok kanail*

<sup>44</sup> Ende Yesus wakau naruri na'ahenia, "Inhoi akin naili'il Maya'u, ai onne akin naili'il idewe Ai man hopon Ya'u mai haenhi!

<sup>45</sup> Enla inhoi man do'onedi Ya'u me'e, ai onne do'onedi Ai man hopon Ya'u mai haenhi.

<sup>46</sup> Ya'u mai amwali ropropo noho wawan eniyeni, leke inhoi ma akin naili'il Maya'u kan min lolo noho metmetek me'e.

<sup>47</sup> Ka'u mai leke ho'ok kail ri ma kan hi'i wewhe Ainu'u wanakunu, kade loikaruwedhi hi, maa Ya'u mai leke huri we'er noho wawan nano rir dohohala nin molollo.

<sup>48</sup> Enimaa rakan noho eni nin man horu, Ya'u Lir'u penia namwali man ho'ok kail ri ma kan kokala Ainu'u wanakunu eni.

<sup>49</sup> Onne namlolo ono ka odi Ainu'u molollo aimehi, maa Yo odi Ainu'u Pape man hopon Ya'u mai noho eniyeni Nin molollo. Ai penia man hopon Ya'u wakunu ha wo'ire eniyeni ki mi leke mauroin.

\* 12:38 Yes. 53:1 \* 12:40 Yes. 6:10

<sup>50</sup> Enla Ya auroiroin nahenia Nin honopon man An hopon Ya'u konohi mi eniyeni nala or'ori dardari ma kan horu ki mi. Ende Ya'u mai konohi mi ha wo'ira na'akeme man Ainu'u Pape konohiyedi Maya'u me'eni."

## 13

*Yesus wuri man lernohi pakunohi enihe ein*

<sup>1</sup> Lere onne Lere Alam Paska na'uraniyedi me'e, la Yesus nauroiroin nahenia Nin lere alam rakanedi Ai namhara noho wawan eni wali laa Nina Pape. Lere Yesus minle noho wawan Ai naramyaka Nina ri man aile mai noho wawan enihe, la kan ren naramyaka hi hehen nanumene Nin lere alam mai noho wawan horu.

<sup>2</sup> Lere helem ne, Yesus noro Nina man lernohi pakunohi enihe ra'an romun wewerre. Enla lere onne Hayakyak Makromon howok lolo Yudas raramne, penia an paekuwedi na'olu Yesus laa Yahudi enihe. Yudas eni Simon Iskariot anan.

<sup>3</sup> Yesus nauroinedi Nina Pape naledi molollo na'akeme Ai me'e, la Ai nauroinedi An mai nano Makromod Lalap la wali wali'ur laa Makromod Lalap haenhi.

<sup>4</sup> Ende Ai namriri nano onno rara'ak onne la ruriyedi Nina rain nanaru la nala hai-warwara ida nodi wukuwedi nelhenne.

<sup>5</sup> Enine Ai nala oir halle ra'u lapa ida nanumene nodi wuri man lernohi enihe ein, la nodi haiawara onne soru na'akisi enihe.

<sup>6</sup> Rakan Simon Petrus ein ne, ai ne'el Yesus, "Makrom'u! Yono Makrom'u wuri ye ei'u!"

<sup>7</sup> Yesus na'aheni, "Ors eni o ka maurooin makun inhawe man Ya'u hihi'i eni, maa lere li'ur mene maurooin."

<sup>8</sup> Petrus na'aheni, "Yono Makrom'u! Kan wa'an wuri ye ei'u!"

Maa Yesus na'aheni, "Lo'o Ya'u ka'u wuri o eum, ikroko nik dunu'ul kanali kapro-huwedi me'e!"

<sup>9</sup> Ende Simon Petrus na'aheni, "Makrom'u! Yono wuri ye ei'u mehe, maa i lim'u noro ya'u uluwakun haenhi!"

<sup>10</sup> Yesus na'aheni, "Ri ma narohedi me'e, onne mouwedi me'e, de yono wuri kemen me'e naukara wuri ein mehe. Mi eniyenihe mouwedi me'e, maa lolo mi eniyenie ri aile ma kan mou!"

<sup>11</sup> Yesus na'aheni heheni ono Ai nauroinedi me'e inhoi man paeku na'olu Ai eni. Onne penia Ai na'aheni, "Mim mouwedi me'e maa lolo mi ri aile ma kan mou!"

<sup>12</sup> Kame'ede Yesus wuri na'akeme ein horu nanumene An nair wali'ur Nina rain nanaru eni laa naikoro wali'ur na'ukani hi, "Mi mauroiroin inhawe man Ya'u hihi'i eni, ee ka?

<sup>13</sup> Mi mapolu Ya'u 'Papa Meser' noro 'Makromod' la onne namlolo wake'e ono Ya'u penia ma namwali minim Meser noro Makrommu.

<sup>14</sup> Ende lo'o Ya'u ma namwali mi Makrommu noro minim Meser wuri mi ein, wa'an rehi mi ida man wuri ida ein haenhi.

<sup>15</sup> Ya'u kukul kalla ki mi de wa'an rehi mim teunohi Ainu'u hini'i onne, la ilitolle ri namehin naise Ya'u ilitolle mi haenhi.

<sup>16</sup> Loi honorok wawa'an Ainu'u panaeku ma na'ono eniyeni: Hophopon wah-wahan kan kulu narehi makromon, la ma nodi wanakunu kan kulu narehi ri man hopon an loikaru wanakunu onne.

<sup>17</sup> Lo'o mi mauroinedi ha wo'ire na'akeme man Ya'u konohi mi eniyeni la hi'i lernohie, Makromod Lalap nala rere'e haharu nammori ki mi."

*Yesus kukunohi nahenia  
Yudas na'olu Ai*

<sup>18</sup> "Ainu'u wanakunu onne ka na'ono mi na'akeme. Ya auroin eniyeni namlolo ono Ya'u nili mi, la Ya auroiroin kokkoo mi akim. Enimaa eniyeni namwali leke na'akuku na'anokor horhorok man aile Horok Lape raram ma na'ahenia, 'Ai ma noro Ya'u ra'akwuku wewerre, ai penia ma na'okuledi Maya'u." \*

<sup>19</sup> Lere eni Ya'u konohi mi inhawe ma namwali lere man mai leke lere mim do'on ha onne namwali, mim horokale de mi akim eren nailili'il Maya'u, la mi mauroin kokkoo nahenia Ya amwali Ai man 'Aile'!

<sup>20</sup> Loi honorok wawa'an Ainu'u panaeku ma na'ono eniyeni: Inhoi man kokala ri man Ya'u hohopon eni, an kokala Maya'u haenhi, la inhoi man kokala Ya'u, ai onne kokala Ai man hopon Ya'u mai haenhi."

\* **13:18** Mzm. 41:8

<sup>21</sup> Yesus wakunu onne horune, Ai honorok akin woir wake'e de konohi mouropo, "Loi honorok wawa'an Ainu'u panaeku ma na'ono eniyeni: Nano mi eniyenihe ri ida aile ma na'olu Ya'u kanile Ainu'u arwali enihe."

<sup>22</sup> Kame'ede man lernohi pakunohi enihe ida man po'onala ida la mehe kakaiyedi ono ka rauroin Yesus Nin wanakunu eni lo'o nala inhoi.

<sup>23</sup> Ler onne Nin man lernohi pakunohi man Yesus naramyake onne naikoro aile Yesus herne malanna.

<sup>24</sup> Enpenia Simon Petrus na'aromo makan laa man lernohi pakunohi onne leke na'ukani inhoi penia ma na'olu Yesus.

<sup>25</sup> Kame'ede man lernohi pakunohi onne hoi na'uraniyala Yesus mene na'ukani, "Makrom'u, lo'o inhoi man hi'i ha onne?"

<sup>26</sup> Yesus walha na'ahenia, "Na'amolia Ya ala roti eni remen Ainu'u manuk, mene Ya ala kani man hi'i ha onne." Kame'ede Yesus nala roti tarana remen Nin manuk nanumene kanile Yudas ma namwali Simon Iskariot ananne.

<sup>27</sup> Yudas kokaledi roti nano Yesus ne, idewe Hayakyak Makromon nodiyedi molollo kemen me'e. Horu ne, Yesus ne'el Yudas na'ahenia, "Inhawe man om paeku, hi'i here!"

<sup>28</sup> Yesus Nina man lernohi pakunohi ma na'ak wewerre onnenihe ka rauroin panaeku onne wake'e.

<sup>29</sup> Man lernohi pakunohi

onnenihe heruwali rauroin nahenia lo'o Jesus hopon Yudas laa weli hahaa leke ra'akene Lere Alam Lalap Paska onne, ka eni lo'o hopon ai nodi kupan nalle ri ma na'alehe haida-haida. Hir paeku heheni ono Yudas namwali rira ma nasala kupan.

<sup>30</sup> Yudas kokaledi roti nano Jesus ne, idewe namharedi laa paharn. Lere onne alamedi me'e.

*Jesus Nina keneri hono'ok worworu*

<sup>31</sup> Yudas namharedi laa paharne, Jesus na'ahenia, "Lere alam rakanedi me'e leke ri mormori do'on Makromod Lalap na'akulu na'alapa Maya'u ma namwali Ri Mormori Anan, la ri na'akeme lo'o ra'akulu ra'alap Makromod Lalap haenhi ono do'on inhawe ma namwali noro Maya'u.

<sup>32</sup> Enla Ainu'u hini'i wenewhe onne na'akulu na'alapa Makromod Lalap, la Ai na'akulu na'alap Maya'u haenhi, la ors eni ha onne na'akeme lo'o pelek namwali.

<sup>33</sup> Ya an'u na'ahoru man Ya aramyaka! Ka nalo'olo Ya ala'a me'e, de ka oro mi me'e! Lo'o mi manoin Maya'u, maa kam do'on, naise nonolu Ya'u konohiyedi leleher Yahudi enihe. Enla Ya'u konohi mi haenhi, 'Ka namwali mim lernohi Maya'u laa Ainu'u miminlole.'

<sup>34</sup> 'Ya ala keneri hono'ok worworu eniyeni ki mi: Mi ida ma naramyaka ida naise Ya aramyaka mi haenhi!

<sup>35</sup> Lo'o mi ida ma naramyaka ida, ri na'akeme rauroin nahenia mi mamwali man lernohi Maya'u!"

*Jesus na'ori honorok Petrus*  
(Mat. 26:31-35; Mrk. 14:27-31; Luk. 22:31-34)

<sup>36</sup> Kame'ede Simon Petrus na'aheni, "Makrom'u, lo'o mala'a ewi?"

Jesus na'aheni Petrus, "Ors eni ka namwali om lernohi Maya'u, maa lere man mai mene om lernohi haenhi."

<sup>37</sup> Petrus na'aheni, "Makrom'u, hi'ihepe ka'u lernohi ors enie? Ya'u eni, ya amkene maki herre Makrom'u!"

<sup>38</sup> Yesus na'ukani ai, "Nam-lolo Petrus, o me'e maki mahinerre Maya'u? Loi honorok wawa'an Ainu'u nou eniyeni: Manu kan kokoroi makun, o ma'aheni ka mauroin Maya'u rewkelu me'e!"

## 14

*Jesus namwali kalla laa Makromod Lalap*

<sup>1</sup> Yesus na'aheni, "Yono mamkauk! Yon mi akim werek! Wa'an rehi mi akim naili'il Makromod Lalap la mi akim naili'il Maya'u haenhi.

<sup>2</sup> Lolo Ainu'u Papa Nin nakar, onno miminlole nammori aile, la Ya ala'a enne leke Ya a'akene minim onno leke kokala mi. Lo'o eniyeni ka namlolo, Ya'u ka'u konohi mi heheni, maa namlolo kokkoo minim onno aile lolo enne.

<sup>3</sup> Ende Ya'u laa, leke a'akene minim onno onnenihe namkenedi mene

Ya'u wali wali'ur mai orokaru mi laa onno onneni, leke ik min wewerre lolo enne.

<sup>4</sup> Enla mi mauroinedi kalla man laa Ainu'u onno miminlole, la ka nalo'olo Ya'u laa enne me'e."

<sup>5</sup> Enimaa Tomas na'ukani, "Makrom'u, ai ka mauroin Makrommu laa ewi, de hi'ihehewi ai mauroin kalla?"

<sup>6</sup> Yesus walha na'ahenia, "Ya'u eni penia amwali kalla man laa Makromod Lalap. Ya'u penia amwali man wakuku mi panaeku ma namlolo kokkoo, la Ya'u penia amwali ma nala or'ori dardari ma kan horue ki mi. Ende inhoi raram nodi mai Ainu'u Pape Nina miminlole, ai onne mai lolo Maya'u leke rakan Ainu'u Pape Nin miminlole, kalla namehin kaale.

<sup>7</sup> Lo'o mi eniyenihe namlolo kokkoo mauroinedi Maya'u, onne nin panaeku nahenia mi mauroinedi Ainu'u Pape haenhi. Ende nano lere eniyeni mim do'onedi la mauroinedi Ai me'e."

<sup>8</sup> Pilipus na'aheni, "Makromod, kene kukul Papa eni mayai, leke am do'onedi de ai akim namkenedi."

<sup>9</sup> Enimaa Yesus ne'el ai, "Pilipus! Yo oro mi nalo'oledi me'e! Alhi'ihepe ka mauroin Maya'u makun?! Inhoi do'onedi Ya'u me'e, ai onne do'onedi Ainu'u Pape me'e haenhi! Alhi'ihepe o mapanak Ya'u kukul Ainu'u Papa mim do'one?"

<sup>10</sup> Pilipus, alhi'ihepe o akin ka naili'il Yo oro Ainu'u Pape mamwali mahakue? Yo oro Ainu'u Pape onne mahaku, de Ainu'u wanakunu man mim dederne onne Ainu'u wanakunu ka, maa Ainu'u Papa nine. Yo oro Ainu'u Papa mamwali mahaku, de Ainu'u hini'i wenewhe man ma'aruru na'akeme onne namwali Nin honowok man An hi'i lolo Maya'u.

<sup>11</sup> Wa'an rehi o akin naili'il nahenia Yo oro Ainu'u Pape mamwali mahaku, maa lo'o o akim ka nala Ainu'u wanakunu makun, hi'i mi akim naili'il Ainu'u hini'i wenewhe man kukul Makromod Lalap Nin ke'eke'el an'anza.

<sup>12</sup> Loi honorok wawa'an Ainu'u panaeku ma na'ono eniyeni: Ri na'akeme ma akin naili'il Maya'u, hi onne hi'i tanada ri kan dodo'onnala makun naise Ya'u hihi'i haenhi. Memen hir hi'i tanada man lo'o narehiyedi man Ya'u hihi'i eni, ono Ya'u laa min wewerre noro Ainu'u Papa.

<sup>13</sup> Enla inhawe man mi mapanak modi Ya'u naran, Ya ala ki mi, leke ri na'uli nasa'a Ainu'u Pape ono do'on rauroin nahenia Ya'u dernedi minim lir napanak me'e.

<sup>14</sup> Ende inhawe man mapanak modi Ya'u naran, Ya ala ki mi!"

*Jesus nou nahenia Roh Kudus mai leke nodi paku ri ma akin naili'il enihe*

<sup>15</sup> Yesus na'aheni, "Inhoi naramyaka Ya'u, ai onne man derne nakani Ainu'u keneri hono'ok."

<sup>16</sup> Enine Ya apanak Ainu'u Pape de nala Man Paku nahinerre Maya'u, la Man Paku onne norle'ule'u norwaliwali mi laa ewi-ewi.

<sup>17</sup> Man Paku onne namwali Makromod Lalap Nin Roh man kukunohi mi panaeku ma namlolo wake'e ma na'ono Makromod Lalap. Noho eni wawan kan kokala Ai ono hi kar do'on la ka rauroin Ai, maa mi mauroin Ai, ono ors eni An min wewerre noro mi la lere man mai moro Ai mamwali mahaku.

<sup>18</sup> Ya'u laa, maa Ka'u hoikaru mi naise tatana ana'a re'e. Lere man mai Ya'u wali wali'ur mai ki mi.

<sup>19</sup> Taran ikar noho wawan eniyeni kar do'on Maya'u me'e, maa mi mehe man do'on Ya'u wali'ur. Lere onne Ya'u mori wali'ur, de lere onne mim lernala morimori ma namlolo haenhi.

<sup>20</sup> Rakan lere Ya'u mori wali'ur mene mi mauroin nahenia Yo oro Ainu'u Pape mamwali mahaku, la Yo oro mi mamwali mahaku haenhi.

<sup>21</sup> Inhoi man derne Ainu'u keneri hono'ok, la hi'i lernohie, ai penia ma naramyaka Maya'u. Enla Ainu'u Pape naramyaka ai onne, la Ya aramyaka ai haenhi, la Ya alahari Ya'u kemen ai leke nauroin Maya'u."

<sup>22</sup> Kame'ede Yudas (ri namehin nano Yudas Iskariot) na'heni, "Yesus, hi'ihepenia Makrom'u nalhari kemen mayai mehe, la ri mormori noho wawan kae?"

<sup>23</sup> Enine Yesus walhe, "Inhoi naramyaka Ya'u, ai

onne hi'i lernohi Ainu'u wanakuku, la Ainu'u Pape naramyaka ai haenhi. Yo oro Ainu'u Pape manoin ai leke min wewerre noro Mayai.

<sup>24</sup> Inhoi ma ka naramyaka Maya'u, ai onne kan hi'i lernohi Ainu'u wanakuku. Enla wanakuku man mim dederne eni, Ainu'u ka, maa mai nano Ainu'u Papa man hopon Ya'u mai eni.

<sup>25</sup> Ha eni na'akeme Ya'u konohiyedi mi me'e lere ka'alonlono makun eni,

<sup>26</sup> maa ka nalo'olo Ya'u wali wali'ur laa Ainu'u Pape. Ler onne Ainu'u Pape nala Roh Kudus mai namwali Man Paku. Roh Kudus onne wakuku mi ha wo'ire na'akeme, la na'ori honorok mi inhawen Ya'u wakukuwedi me'eni, ono Ainu'u Papa hopon An mai nahinerre Maya'u.

<sup>27</sup> Na'amolia Ya'u hi'i mi akim namkene la namrina namkai naise Ya akin haenhi. Ya ala aki ma namrina namkai eni ki mi, ka naise noho wawan nina, ono noho wawan nina ka namkene. Ende yon ma'irhu la yon mamkauk haida-haida.

<sup>28</sup> Mim derne Ya a'aheniyedi me'e na'ahenia, 'Ya ala'a me'e, maa Ya'u wali wali'ur mai ki mi.' Lo'o mi maramyaka Ya'u kokkoo, wa'an rehi mi akim nahuwa'an hurinohi Ya ala'a Ainu'u Pape ono Ainu'u Pape kulu narehi lapa narehi Maya'u.

<sup>29</sup> Ha man Ya'u konohinohi mi eniyenihe ka namwali makun, maa Ya'u konohi mi leke lere mim do'on ha

eniyen'i namwali mi akim  
naili'il Maya'u kokkoo!

<sup>30</sup> Leken kame'el Ya'u  
wakunu noro mi, ono  
Hayakyak Makromon ma  
nodi molollo noho wawan  
eniyen'i na'akeki mai me'e. Ai  
ka nodi molollo Maya'u,

<sup>31</sup> maa ha eniyeni  
na'akeme namwali leke ri  
mormori noho wawan rau-  
roin nahenia Ya aramyaka  
Ainu'u Papa la Ya'u hi'i ha  
wo'ira na'akeme man Ainu'u  
Papa hopon Ya'u hi'i. Mai  
kamharedi onno eni kala'a  
here."

## 15

### *Yesus namwali anggur ono ma namlolo*

<sup>1</sup> Yesus nala wanakunu  
naho'ok na'ahenia, "Ya'u  
eni anggur ono ma namlole  
la Ainu'u Pape penia ma  
nadiyaka anggur kirna on-  
neni.

<sup>2</sup> Mi eniyenihe mamwali  
Ya'u hanan, la hanan ma kan  
woi Ainu'u Papa sopoledi, la  
hanan man woi, Ai na'amou  
leke eren wowoi.

<sup>3</sup> Enla mi eniyenihe mim  
mouwedi me'e, ono Ainu'u  
wanakunu man Ya ala ki mi  
na'amouwedi mi me'e.

<sup>4</sup> Yono mi mako'u nano  
Maya'u, la Ya'u ka ako'u  
mi haenhi. Lo'o auhana  
ida pakiyedi nano anggur  
onno, auhana onne kan woi  
me'e, maa auhana man minle  
anggur onno onne penia man  
woi eni. Namnenehe naise  
onne lo'o mi mako'uwedi  
Maya'u, minim hini'i we-  
newhe man wa'an kaale lolo  
Makromod Lalap kalarna,  
maa lo'o mamkene min

noro Maya'u, minim hini'i  
wenewhe man wa'an aile,  
de maise au hanan man woi  
ma'aruru.

<sup>5</sup> Ende Ya'u eni aise anggur  
onno la mi maise anggur  
hanan, de inhoi ma namkene  
minwuku noro Maya'u, la  
Ya amkene minwuku noro  
ai haenhi, ai onne hi'i ha  
man ma'aruru naise anggur  
hanan ma woin parinu.  
Lo'o mi kam minwuku noro  
Maya'u, mi kam hi'i haida  
man wa'an. <sup>6</sup> Inhoi ka  
namkene minwuku noro  
Ya'u, ai onne naise au hanan  
ma kan woi, de kekiyedi  
nano onno, na'amoli loi-  
wuku, napro'uk mene harne.

<sup>7</sup> Lo'o mi mamkene min-  
wuku noro Maya'u, la mim  
horhorok Ainu'u wanakunu  
man Ya'u wakukuwedi ki mi  
me'eni, inhawe man mi ma-  
panak nano Ainu'u Pape Ai  
nala.

<sup>8</sup> Mi maise au hanan man  
woi nammori onne, de lere  
ri mormori do'on minim  
morimori man ma'aruru, hi  
ra'uli rasa'a Ainu'u Papa, la  
minim morimori man wa'an  
naise onne nodi kunukunohi  
nahenia namlolo kokkoo mi  
mamwaliyedi ri man lernohi  
Maya'u me'e.

<sup>9</sup> Ainu'u Papa naramyaka  
Ya'u, la Ainu'u raramyaka ki  
mi naise Ainu'u Papa haenhi,  
de wa'an rehi mi mamkene  
lolo Ainu'u raramyake ma-  
mani haenhi.

<sup>10</sup> Lo'o mim hi'i wewhe  
Ainu'u keneri hono'ok,  
mi mamkene lolo Ainu'u  
raramyaka, naise Ya'u hi'i  
wewhedi Ainu'u Papa Nin  
keneri hono'ok la Ya amkene

lolo Ainina raramyaka haenhi.

<sup>11</sup> Ya'u konohi mi panaeku eni na'akeme leke mi akim nahuwa'an wake'e naisa Ya akin nahuwa'an wake'e haenhi, penia minim soksok murmura penpenu kemkemmen.

<sup>12</sup> Ainu'u keneri hono'ok heheni: Mi ida ma naramyaka ida naise Ya aramyaka mi haenhi.

<sup>13</sup> Inhoi ma ne'enohi nala kemen maki herre walin leke yon walin maki, ainin raramyaka walin onne narehi nalewen na'akeme.

<sup>14</sup> Lo'o mim hi'i wewhe Ainu'u keneri hono'ok eni, mi mamwaliyedi I walin me'e.

<sup>15</sup> Ka apolu mi hophopon me'e ono ri ma namwaliyedi hophopon onne ka nauroin makromon nin panaeku ida me'e, maa Ya apolu mi I wal'uhe, ono Ya'u konohiyedi mi me'e panaeku na'akeme man Ya'u derne nano Ainu'u Pape.

<sup>16</sup> Mi kam nili Ya'u, maa Ya'u nili mi, la Ya'u penia hopon mi lam hi'i hini'i wenewhe ma nodi ihin ennen man ma'aruru, naise auhana man meur de woiwoi mamani. Lo'o mim hi'i heheni, inhawe man mi mapanak modi Ya'u naran, Ainu'u Papa nala ki mi.

<sup>17</sup> Ende Ya ala ki mi keneri hono'ok eniyeni: Mi ida ma naramyaka ida."

*Noho wawan kar suk Yesus, de kar suk man lernohi enihe haenhi*

<sup>18</sup> "Lo'o noho wawan kar suk mi, yon hamlinu nahenia

nonolu eni noho wawan kar suk Ya'u haenhi.

<sup>19</sup> Lo'o mi eni mamwali noho nin ri, namlolo kokkoo noho wawan naramyaka mi. Enimaa Maya'u penia nili mi nano noho eni leke mi mamwali Ainu'u ri aimehi, la ka mamwali noho wawan nine, de noho wawan akin apinha ki mi mamani.

<sup>20</sup> Horhorok inhawe man Ya'u konohiyedi mi me'e, 'Ma namwali hophopon ka narehi nalewen makromon.' Ende lo'o rin hi'i apinpinhedi Ya'u mai noho eni wawan me'e, onne nin panaeku namlolo kokkoo hir hi'i apinpinha mi haenhi. Lo'o hir kokala Ainu'u wanakunu, onne nin panaeku hi lo'o kokala minim wanakunu haenhi.

<sup>21</sup> Hir hi'i apinpinha mi ono mim lernohi Ya'u ma namwali Makromod Lalap Anan. Hir hi'i heheni mi ono ka rauroin Ai man hopon Ya'u mai noho wawan eni.

<sup>22</sup> Lo'o Ka'u mai konohi Makromod Lalap Nina panaeku, Makromod Lalap ka nala sala hi, maa Ya'u mai noho wawan kono-hiyedi Makromod Lalap Nin panaeku hi me'e, maa ramhene kokale, de namlolo kokkoo hir sala.

<sup>23</sup> Inhoi namhene kokala Ya'u, namhene kokala Ainu'u Pape haenhi.

<sup>24</sup> Lo'o Ya'u ka'u hi'i tanada man ri kan dodo'onnale makun lolo hi kalarna eni, Makromod Lalap ka nala sala hi. Hir sala wake'e, ono do'onedi Ainu'u hini'i wenewhe nammori onne me'e, maa ramhene kokala

Yo oro Ainu'u Pape.

<sup>25</sup> Onne na'akeme namwali leke na'akuku na'anokor inhawe man horhorok aile hirira Horok Lape ma na'aheni, 'Ka'u hi'i salida hi, Ya'u hi'i ha man wa'an mamani, maa hi ramhene kokala Maya'u.' \*

<sup>26</sup> Lere man mai, Man Paku mi mai nano Makromod Lalap, la An konohi mi ha ma na'ono Maya'u. Ai onne namwali Roh Kudus, la Ya'u hopon An mai nano Makromod Lalap leke paku mi. An konohi mi panaeku ma namlolo wake'e, la An konohi mi ha ma na'ono Maya'u haenhi.

<sup>27</sup> Enla mi lam konohi ri ha ma na'ono Maya'u haenhi, ono nano lere dedesne Ya'u mai noho wawan, mi moro Ya'u ma'alono mamani."

## 16

<sup>1</sup> "Ya'u konohi ha eniyeni na'akeme ki mi leke yono mim lari nano minim aki ma naili'il Maya'u eni.

<sup>2</sup> Ka nalo'ol lo'o ri nohiyedi mi nano Yahudi rir kerei, la lere man mai ri ma nesne mi onnenihe pene'ek rir hini'i wenewhe onne ilitolle Makromod Lalap.

<sup>3</sup> Hir hi'i heheni ono ka rau-roin Ainu'u Pape, la ka rau-roin Ya'u haenhi.

<sup>4</sup> Enimaan Ya'u wakunu na'ono apinpinha wo'operperi ma na'ikeki mai onne, leke lere ha onne na'akeme namwali, mi ka mamka'uk ono Ya'u konohiyedi mi me'e."

*Roh Kudus nala ruri pe'el  
ri ma akin naili'il Kristus*

"Lere nonolu Ya'u ka'u konohi ha onneni ki mi ono Yo or'oro mi makun.

<sup>5</sup> Enimaan ors eni na'akeki Ya'u wali laa Ainu'u Pape man hopon Ya'u mai noho wawan, la nano mi na'akeme ri mahaku ka na'ukani Ya'u na'ahenia, 'Mala'a ewi?'

<sup>6</sup> Mi ka ma'ukani haida, maa mi akim woir rehi ono Ya'u konohiyedi mi Ya ala'a me'e.

<sup>7</sup> Enimaan Ya'u konohi mi ha ma namlolo kokkoo: Wa'an rehi Ya ala'a here, leke namwali ha man wa'an ki mi, ono lo'o ka ala'a, Roh Kudus kan mai paku mi. Maa lo'o Ya ala'a, Ya'u hopon Roh Kudus mai ki mi.

<sup>8</sup> Enla lere Roh Kudus mai An kukunohi noho wawan eniyeni inhawe ma namlolo noro inhawe man sala, leke hi rauroin hir sala ono hir hi'i dohohala, la hi rauroin inhawe ma namlolo lolo Makromod Lalap kalarna, noro inhawe ma namwali lere Makromod Lalap ho'ok kail ri mormori noho wawan na'akeme.

<sup>9</sup> An konohi nahenia ri mormori hi'iyedi dohohala me'e ono hi akin ka naili'il Maya'u.

<sup>10</sup> Enla An wakunu nahenia Ainu'u hini'i wenewhe namlolo kokkoo lolo Makromod Lalap kalarna. Enla rin do'on nahenia onne namlolo ono Ya ala'a leke min wewerre noro Ainu'u Papa, la lere onne mi kam do'on Ya'u me'e.

<sup>11</sup> Enla An kukunohi nahenia lere man mai Makromod Lalap ho'ok kail noho wawan

eni, ono naledi hunukum Hayakyak Makromon ma nodi molollo noho eni wawan.

<sup>12</sup> Ainu'u panaeku nammori aile man Ka'u wakunu ki mi makun, ono ors eni mi honorok akin ka naruri kokale, maa kan hi'i haida.

<sup>13</sup> Roh Kudus mai mene An kukunohi mi leke mauroiin panaeku ma namlolo na'akeme. Ai ka nodi Nin panaeku aimehi wakuku mi, maa An wakuku inhawe An dederne nano Makromod Lalap la kukunohi mi inhawe ma namwali lere man mai.

<sup>14</sup> Ai na'akulu na'alap Maya'u haenhi, ono An konohi mi Ainu'u wanakunu na'akeme.

<sup>15</sup> Ha wo'ire na'akeme Ainu'u Pape Nina, namwali Ainu'u haenhi. Onne penia Ya aheni inhawe man Roh Kudus konohi mi onne An kokale nano Maya'u."

### *Wewerek pananake noro aki ma nahuwa'an*

<sup>16</sup> "Ka nalo'ol mi kam do'on Ya'u me'e, maa ka nalo'ol nano lere onne, mim do'on Ya'u wali'ur."

<sup>17</sup> Yesus wakunu horu ne, Nina man lernohi pakunohi ida ma ne'el ida na'ahenia, "Hi'ihipenia Ai na'aheni, 'Ka nalo'ol kam do'on Ya'u me'e la ka nalo'ol nano lere onne do'on Ya'u wali'ur?" La hi'ihepenia Ai na'aheni wali'ur, 'Onne namlolo ono Ya ala'a Ainu'u Pape.'

<sup>18</sup> Man lernohi pakunohi ida ma na'ukani ida mamani na'ahenia, "Nin wanakunu, 'Ka nalo'ol me'e onne, ra'ahewie? Ai ka mauroin Ainin panaeku inhawe?"

<sup>19</sup> Yesus nauroin nahenia hi raram nodi ra'ukani Ainin wanakunu idedi onne nin panaeku inhawe, de Ai na'aheni, "Idedi Ya aheni, 'Ka nalo'ol lo'o kam do'on Ya'u me'e, maa ka nalo'ol nano lere onne mim do'onedi Ya'u wali'ur.' Mi lo'o ka mauroin panaeku onne makun?

<sup>20</sup> Loi honorok wawa'an Ainu'u panaeku ma na'ono eniyeni: Lere Ya ala'edi, mi akim sus wake'e la mi mahere, maa ri mormori noho wawan soksok murmura mamani. Lere onne lo'o mim sus rehi, maa mi akim man sus onne herre wali'ur namwali akin ma nahuwa'an wake'e!

<sup>21</sup> Ik kala wanakunu naho'ok nano maeke ma na'ikeki moriyana me'e. Ai kemen apinha wake'e de nahere wakaikau, maa moriyedi anan ne, an hamlinuwedi nin apinhe me'e, la ai akin nahuwa'an wake'e ono moriyedi anan me'e.

<sup>22</sup> Onne naise mi haenhi, ono ors eni mi akim sus rehi, maa lere Ya'u pakromo noro mi wali'ur, mi akim nahuwa'an wake'e, la ri mahaku ka naruri nahoro minim soksok murmure man aile mi akim me'e.

<sup>23</sup> Rakan lere onne mi ka ma'ukani Ya'u haida me'e. Horhorok Ainu'u nou ma na'ono eniyeni: Inhawe man mi mapanak nano Ainu'u Papa modi Ya'u naran, Ai nala ki mi.

<sup>24</sup> Nano nonolu rakan ors eni mi ka modi Ya'u naran mapanak haida nano Ainu'u Pape, maa ors eni mapanak here, la Ai nala ki mi leke mi akim penpenu kemkeme la

nahuwa'an wake'e.

<sup>25</sup> Ya'u konohiyedi mi ha eniyenihe na'akeme nair wanakunu naho'ok, maa ka nalo'ol Ka'u wakunu heheni me'e. Lere onne Yo odi wanakunu man mouropo konohi mi ha ma na'ono Ainu'u Pape.

<sup>26</sup> Rakan lere onne mi mehe modi Ya'u naran mapanak nano Ainu'u Papa. Lo'o Ka odi minim napanak laa Ainu'u Pape, kan hi'i haida,

<sup>27</sup> ono Ainu'u Pape naramyaka rehi mi. Ai naramyaka mi ono mi maramyaka Ya'u, la mi akim naili'il Ya'u de mauroin nahenia Ya'u eni mai nano Ai.

<sup>28</sup> Ya'u mai nano Ainu'u Papa leke minle noho wawan eniyeni, maa ors eni Ya amhara noho wawan wali laa Ainu'u Pape."

<sup>29</sup> Kame'ede man lernohi pakunohi enihe re'el Jesus, "Ma'aruru! Ors eni Papa wakunu ka nodi wanakunu naho'ok me'e, maa wakunu mouropo idewe!"

<sup>30</sup> Ai mauroin nahenia Papa nauroin ha wo'ira na'akeme, de lo'o ai ka ma'ukani haida makun, Papa nauroinedi ainim na'ukankani na'akeme. Onne nodi kunukunohi mayai nahenia namlolo kokkoo Papa mai nano Makromod Lalap!"

<sup>31</sup> Yesus walha na'ahenia, "Ende ors eni mauroin nahenia mi akim naili'iledi wawa'an me'e?"

<sup>32</sup> Horhorok! Lere man mai mi dohodoho lari wali wali'ur laa minim nakar,

maa Ka'u memehedi ono Ainu'u Pape norle'ule'u norwaliwali Ya'u mamani, la namlolo kokkoo lere onne rakanedi me'e.

<sup>33</sup> Ya'u konohi eni na'akeme ki mi leke mi akim namkenē la namlina namkai mamani. Memen lolo noho wawan eniyeni, mim lernala apinpinha wo'operperi mamani, maa ma'alapa mi akim la yon mamka'uk, ono Ya'u rehiyedi noho wawan nina molollo me'e!"

## 17

*Yesus hi'i lir napanak nina man lernohi pakunohi enihe*

<sup>1</sup> Yesus konohi ha wo'ire na'akeme onne horu, An niliha'a laa wawan la hi'i lir napanak na'aheni, "Pape, lere alam man Pape ninili rakanedi me'e! Ya apanak Pape ma'akulu ma'alapa Ya'u, Papa Anan, lolo ri mormori kalarna, leke Ya'u, Papa Anan, a'akulu a'alapa Papa haenhi.

<sup>2</sup> Pape kikanedi Ya'u leke odi molollo ri mormori noho eni wawan, leke Ya ala or'ori dardari ma kan horu hi man Pape naledi Maya'u me'eni.

<sup>3</sup> Or'ori dardari man ma'aruru ma kan horu nin panaeku heheni: Ri man lernala or'ori dardari ma kan horu rauroin kokkoo Makromod Lalap ma namlolo wake'e, la Ai onne ida mehe, namehin kaale. Enla hi rauroin Ya'u eni, Yesus Kristus man Makromod Lalap hopon mai eni.

<sup>4</sup> Pape, Ya a'akulu a'alapedi Pape lolo noho eni wawan ono Ya'u hi'i na'ahoruwedii

honowok man Pape hopon  
Ya'u hihi'i eni.

<sup>5</sup> Enla Ya apanak Pape  
ma'akulu ma'alap Maya'u  
lolo Papa leken kalarna,  
leke Ik min lolo siksika  
lerlere raram wali'ur naise  
nonolu lere noho wawan ka  
namwali makun.

<sup>6</sup> Pape naledi Num ri man  
minle noho wawan eniyeni  
Maya'u, la Ya'u konohiyedi  
hi panaeku ma na'ono  
Papa. Kokkoo, hi ramwali  
Num ri nano nonolu, la  
Papa nala hi Maya'u, la hir  
derne rakaniyedi Pape Lirna  
Wawan me'e.

<sup>7</sup> Ors eni hi rauroinedi  
nahenia ha wo'ira na'akeme  
man Papa nala Maya'u,  
namlolo kokkoo mai nano  
Papa,

<sup>8</sup> ono Ya ala hi wanakunu  
na'akeme man Papa nala  
Maya'u. Hir kokala wawa'an  
Ainu'u wanakunu onne, la  
rauroinedi kokkoo nahenia  
Ya ano Ainu'u Pape, la hi akin  
naili'il Ya'u de rauroinedi  
Pape man hopon Ya'u mai  
noho eni.

<sup>9</sup> Pape, Ya'u hi'i lir napanak  
hi mehe. Ya'u ka'u hi'i lir  
napanak noho eni na'akeme,  
maa Ya'u hi'i lir napanak  
mehe ri man Pape nanala  
Maya'u enihe, ono hi onne  
penia Pape Nina ri.

<sup>10</sup> Ainu'u ri na'akeme  
ramwali Papa Nin ri haenhi,  
la Papa Nin ri ramwali Ainu'u  
haenhi, la nano hi Ya'u  
lernala ul'uli sasa'a man lap  
narehi.

<sup>11</sup> Ors eni Ya'u mai Pape,  
de Ka'u minle noho wawan  
me'e, maa hi aile noho  
wawan makun. Pape

Man Moumou Dewdewe,  
Ya apanak Papa modi  
Papa Nin molollo man ma-  
malle Maya'u nadiyaka hi  
wawa'an, leke hi ramwali  
mahaku, naise Yo oro Pape  
mahaku haenhi.

<sup>12</sup> Ler Yo or'oro hi  
makun, Yo odi Papa Nin  
ke'ek'e'l an'anhe man Papa  
nala Maya'u leke adiyaka  
hi wawa'an, la nano hi  
ri mahaku kan molu,  
naukara ai man rakin-  
iyedi nano nonolu me'e.  
Ai onne moluwedi me'e,  
leke na'akuku na'anokor  
horhorok man aile Horok  
Lape raram.

<sup>13</sup> Ors eni Ya'u mai Pape,  
maa Ya'u wakunu ha eniyeni  
mene Ya amhara noho  
wawan eni, leke Ainu'u  
soksok murmura aile hi akin,  
de hi akin nahuwa'an wake'e  
naise Maya'u.

<sup>14</sup> Ya'u loikaruwedie Pape  
Lirna Wawa'an hi me'e, la  
noho wawan kar suk hi ono  
hi ka ramwali noho nine ri  
me'e, naise ka amwali noho  
nine ri haenhi.

<sup>15</sup> Ka apanak Pape naledi hi  
nano noho eni wawan, maa  
Ya apanak Pape nadiyaka hi  
wawa'an leke yon Hayakyak  
Makromon man ailanne  
onne nano'onyak hi.

<sup>16</sup> Hi ka ramwali noho eni  
nine, naise Ya'u ka amwali  
noho nine haenhi.

<sup>17</sup> Ya apanak Papa nodi  
Lirna Wawan ma namlolo  
wake'e hi'i hi ramwali Pap  
Nin ri mememen man  
moumou dewdewe.

<sup>18</sup> Pape hopon Ya'u mai  
noho wawan, de namnenehe  
Ya'u hopon hi laa ri mormori

noho wawan haenhi.

<sup>19</sup> Ya ala I kem'u Papa, la lernohi Pape Nina hon-orok aki mehe, leke hi onne ramwali Pape Nin ri mememen man lernohi O mamani, ono hi akin naili'il Pape Lirna Wawan ma namlolo eni."

*Yesus hi'i lir napanak ma akin naili'il lolo ewi-ewi*

<sup>20</sup> "Pape, Ya'u hi'i lir napanak hi, maa onne kan mehe, Ya'u hi'i lir napanak ri na'akeme ma akin naili'il Maya'u, la man derness Ainu'u man lernohi pakunohi enihe rir wanakunu ma na'ono Maya'u haenhi.

<sup>21</sup> Ya apanak Pape hi'i hi ramwali mahaku naise Yo oro Papa mamwali mahaku haenhi. Ya apanak hi roro Maika kamwali mahaku haenhi, leke noho wawan na'akeme rauroin nahenia Pape hopon Ya'u mai noho wawan.

<sup>22</sup> Ya a'akulu a'alap hi, naise Papa na'akulu na'alapedi Maya'u, leke hi ramwali mahaku naise Maika haenhi.

<sup>23</sup> Yo oro hi mamwali mahaku, la Yo oro Pape mahaku haenhi, leke namlolo kokkoo hi ramwali mahaku, de noho wawan eniyeni do'on rauroin nahenia Pape man hopon Ya'u mai, la Pape naramyak hi naise naramyaka Ya'u haenhi.

<sup>24</sup> Pape, Ya apanak leke ri man Pape nala Maya'u enihe, hir laa Ainu'u onno min wewerre noro Maya'u, leke hir do'on Ainu'u siksika

lerlere man Pape mehe nala Maya'u, ono Papa penia ma naramyak Maya'u nano lere noho eni ka namwali makun.

<sup>25</sup> Papa penia molololo onno! Kade noho wawan eniyeni ka rauroin Pape, maa Ya auroiroin Pape, la Ainu'u man lernohi pakunohi enihe rauroiroin nahenia Pape hopon Ya'u mai.

<sup>26</sup> Ya'u loikaruwedhi hi panaeku ma na'ono Pape me'e, la Ka'u ren hi'i onne, leke Papa Nin raramyaka Maya'u min hi raram, la Ya'u min hi raram haenhi, ono Yo oro hi mamwaliyedi mahaku me'e."

## 18

*Lere kele Yesus*

(Mat. 26:47-56; Mrk. 14:43-50; Luk. 22:47-53)

<sup>1</sup> Yesus hi'i lir napanak horu, Ai noro Nina man lernohi pakunohi enihe deul oir wauwau Kidron. Lolo enne kirkida aile man penpenu noro au'ono zaitun. Enime'ede Yesus noro Nina man lernohi pakunohi enihe rala'a kirne onne raram.

<sup>2</sup> Yudas ma na'olu Yesus onne nauroiroin kirna onne haenhi, ono Yesus noro Nina man lernohi pakunohi enihe radedem lawuku lolo onne.

<sup>3</sup> Ende imam-imam lalap roro ri Parisi enihe rapanak Roma rira ma nasala ke'urauk enihe muku ida noro idewe ma nadiayake rir Romleu Lap lar kele Yesus, la Yudas ma norkaru hi laa kirna onne. Hi na'akeme rodi ilak raa, obor, noro wadu.

<sup>4</sup> Yesus nauroinedi ha wo'ire ma namwali Ai kemen, de lan pakromo noro hi la na'ukani, "Mi manoin inhoi?"

<sup>5</sup> Hi ra'heni, "Ai manoin Yesus ri Nazaret onne."

Jesus walhe, "Ya'u eni Ai."

<sup>6</sup> Yesus wakunu heheni, idewe hi na'akeme so'o kilili'ur rala wali yawa.

<sup>7</sup> Kame'ede Ai na'ukani wali'ur, "Mi manoin inhoi?"

Hir walhe, "Ai manoin Yesus ri Nazaret onne."

<sup>8</sup> Yesus na'heni wali'ur, "Ya a'aheniyedi Ya'u eni Ai. Lo'o namlolo kokkoo manoin Ya'u, hurinohi Ainu'u man lernohi pakunohi enihe rala'a here."

<sup>9</sup> Onne namwali leke na'akuku na'anokor Yesus Nin wanakunu ma na'ahenia, "Ya adiyaka wawa'an ri na'akeme man O mala Maya'u, leke yon mahaku molu."

<sup>10</sup> Kame'ede Simon Petrus nasalsala nina raa de nodi dare imam man kulu narehi nin hophopon ida me'ede kilinna wali malanna nadiyauredi. (Hophopon onne naran Malkus.)

<sup>11</sup> Yesus ne'el Petrus, "Heih! Kowosedi numa rae! Lo'o ka mauroin nahenia Ye e'enohiyedi me'e kokala apinpinha wo'operperi man Ainu'u Pape naledi Maya'u me'e."

<sup>12</sup> Kame'ede Roma nina ma nasala ke'urauk enihe roro rira uluwakun noro idewe ri Yahudi ma nadiyaka Rom-leu Lape onnenihe, hir kele Jesus wukue.

<sup>13</sup> Hi rodi Yesus laa Hanas, ono Hanas onne Kayapas panin, la anna onne Kayapas

namwali imam man kulu narehi.

<sup>14</sup> Kayapas onne nonolu konohi Yahudi rir man panulu enihe nahenia wa'an rehi ri ida maki herre ri nammori.

*Petrus na'heni ka nau-roin Yesus*  
(Mat. 26:69-70; Mrk. 14:66-68; Luk. 22:55-57)

<sup>15</sup> Simon Petrus noro Yesus Nina man lernohi pakunohi ida lernohi Yesus lolo kili'urn. Lere onne imam man kulu narehi nauroinedi man lernohi pakunohi ida onne, de ainin ri hurinohi ai lernohi Yesus laa nin nikoin.

<sup>16</sup> Enimaa hi ka rauroin Simon Petrus, de an minedi paharne na'urani takin nin nika makan, hehen nanumene man lernohi pakunohi namehin onne lan napanak maeke ma nadiyaka nike, de hurinohi Petrus maiyedi raram haenhi.

<sup>17</sup> Kame'ede maeke onne ne'el Petrus na'ahenia, "Heih! O eni Yesus Nina man lernohi pakunohi haenhi?"

Petrus na'heni, "Ka! Ya'u ka!"

<sup>18</sup> A'alam onne noho rinna de ma nadiyaka enihe roro man howok lolo onne, hir hunuku aiye de ramririnu. Enla Petrus mai namrinu aiye wewerre.

*Imam lalape man kulu narehi na'ukani Yesus*  
(Mat. 26:59-66; Mrk. 14:55-64; Luk. 22:66-71)

<sup>19</sup> Enine imam man kulu narehi na'ukani Yesus, "In-hoi namwali O Num man lernohi pakunohi enihe? Om wakuku inhawa?"

<sup>20</sup> Ende Yesus walhe, “Ka'u suwarala Ainu'u wanakuku, maa nadedem Ya'u wakuku mouropo lolo heri kalarna ma nadedem lawuku lolo Yahudi rir kerei-kerei noro Makromod Lalap Nin Rom-leu Lap.

<sup>21</sup> Alhi'ihepe ma'ukani Ya'u heheni? Wa'an rehi ma'ukani ri man derne Ainu'u wanakuku onne. Hi rauroinedi inhawa ma nadedem Ya'u wakukue.”

<sup>22</sup> Yesus wakunu heheni horu, ma nadiyaka ida pahar Yesus oin makan la ne'el na'henia, “Alhi'ihepe Om wakunu heheni imam man kulu narehi eni!”

<sup>23</sup> Yesus walha, “Lo'o Ainu'u wanakunu eni saledi, kene kukul inhawe man sale, maa lo'o Ainu'u wanakunu eni namlolo, hi'ihepenia om pahar Ya'ue?”

<sup>24</sup> Kame'ede Hanas hopon rodi Yesus laa Kayapas ma namwali imam man kulu narehi, la Ai liman naw-inuknuku makun.

*Petrus na'aheni ka nau-roin Yesus wali'ur*  
(Mat. 26:71-75; Mrk. 14:69-72; Luk. 22:58-62)

<sup>25</sup> Petrus mahan namrinu aiyé makun, ri ne'el ai na'henia, “Yonde o eni Yesus Nina man lernohi pakunohi harome?”

Maa Petrus na'aheni, “Ka! Ya'u ka!”

<sup>26</sup> Enine imam man kulu narehi onne nin hophopon ida mai ne'el Petrus na'henia, “Idedi ya'u do'odo'on o moro Ai wewerre lolo kirna onne!” Hophopon onne walin penia man Petrus dara kilinneni.

<sup>27</sup> Petrus na'aheni, “Maya'u ka!” Idewe manu kokoroiyedi.

*Rodi Yesus laa Pilatus*  
(Mat. 27:1-2, 11-14; Mrk. 15:1-5; Luk. 23:1-5)

<sup>28</sup> Rakan oreki noho roropo ne, Yahudi enihe rodi Yesus nano Kayafas nin nakar laa gubernur Roma nina nakar. Lere onne Yahudi enihe ramhene laa gubernur nina nakar raram ono ai ka namwali ri Yahudi, de hi ramka'uk ha man luli aile lolo onne lo'o ra'amorso kemen. Rira agame nina holoor halauk hopon ri yon na'urani ri ma ka namwali Yahudi, kalo'o kar lernohi ya'an yomun Lere Alam Lalap Paska.

<sup>29</sup> Ende Pilatus laa paharne na'ukani ri Yahudi enihe na'henia, “Ri eni hi'i inhawe man sala, penia mim tumdesne Ai?”

<sup>30</sup> Hi ra'aheni, “Lo'o Ai kan sala, alhi'ihepe ai modi mai pape?”

<sup>31</sup> Enime'ede Pilatus na'aheni, “Mim mehe male leke moro laa kekrohu Nina sale lernohi minim agame nina keneri hono'ok.”

Enimaah hi ra'aheni, “Ainima molollo kaale hukumesne Ri eniyeni.”

<sup>32</sup> Onne namwali leke na'akuku na'anokor Yesus Nin wanakunu nonolu onne ma na'ono Nin makimaki.

<sup>33</sup> Kame'ede Pilatus wali laa raram, mene napolu Yesus mai na'ukanie, “Hi'ihewi? O eni Yahudi rira Raie?”

<sup>34</sup> Yesus na'aheni, “Papa na'ukani heheni nodi nin

panaeku mehe, ee ri name-hin rir panaeku?"

<sup>35</sup> Pilatus walhe, "Ka amwali ri Yahudi! Onum ri mememen noro num imam lalap enihe penia rodi O mai maya'u! Om hi'i inhawe penia rodi o maie?"

<sup>36</sup> Yesus na'aheni, "Ya amwali rai, maa ka odi molollo lolo noho eniwawan. Lo'o Ya amwali rai ma nodi molollo lolo noho wawan eniyeni, Ainu'u hophopon enihe hi'i ara leke yon ri Yahudi enihe kele Maya'u, maa Ainu'u molollo kan mai nano noho eniyeni."

<sup>37</sup> Enine Pilatus na'ukani wali'ur, "Ende O mamwali Rai?"

Jesus ne'el ai na'ahenia, "Pap mehe na'aheniyedi me'e Maya'u eni Rai. Onuma wanakunu namlolo. Mori Ya'u mai noho wawan amwali Rai leke kukunohi ri noho wawan eniyeni panaeku ma namlolo kokkoo lolo Makromod Lalap kalarna. Inhoi raram nodi derne panaeku ma namlolo, hi onne derne rakani Ainu'u wanakuku."

<sup>38</sup> Pilatus na'ukani, "Ik ri mormori mehe, de hi'ihehewi leke kauroin kokkoo inhawe ma namlolo enie?"

*Pilatus nahehe huriyedi Jesus, maa heri ramhene, de Yesus lernala hunukum makmaki*

(Mat. 27:15-31; Mrk. 15:6-20; Luk. 23:13-25)

Kame'ede Pilatus mai paharne ne'el Yahudi enihe na'ahenia, "Ya'u po'on ri eni nina sale kaale,

<sup>39</sup> maa nadedem rakan Lere Alam Lalap Paska mi mapanak ya'u huri ri ida namhara nano bui raram. Ende hi'ihehewi? Minim panaeku ya'u huri 'Yahudi Nin Rai' eniyeni ki mi, ee ka?"

<sup>40</sup> Ideweni na'akeme wakau ra'aheni, "Yono, yono huri Ai! Na'amoli huri Barabas! Barabas onne namwali ri ailanna ma nawa'u ri leke yon derne rakani Roma nina molollo."

## 19

<sup>1</sup> Pilatus noro Yahudi wakunu horu ne, an hopon ke'urauk enihe riuk rerhe Yesus.

<sup>2</sup> Enine ke'urauk onnenihe nanau dupal rururi ida nanumene rala loile Yesus uluwakun. Onne horu hi rala rai nina nainair nanaru mere au'au ida Yesus nair.

<sup>3</sup> Eni nanumene hir mai Yesus kalarne mamani ra'aheni, "Hiyene arore ki O, Rai Yahudi O!" Horu ne, hir pahar kili'ur kalari oin makan.

<sup>4</sup> Horu Pilatus laa paharne wali'ur na'aheni heri man minle paharn, "Po'onala! Na'amolia yo odi Ri eni mai ki mi leke mi mauroin kokkoo nahenia ka'u lernala Ri eni Nina sale!"

<sup>5</sup> Kame'ede Yesus laa paharne nairedi dupal rururi la rainedi rain nanaru mere au'au nanumene Pilatus na'aheni, "Po'onala, ri onne mai me'e!"

<sup>6</sup> Idewe imam-imam lalap roro ma nadiyaka Romleu Lapa enihe po'onedi Yesus ne, hir wakau, "Wairesne here! Wair lolo au kekiyowok here!"

Enimaa Pilatus na'aheni, "Mai mala Ai here leke mi mehe modi laa wairesne ono ya'u ka'u do'on ri eni nin salida!"

<sup>7</sup> Ri Yahudi enihe walhala Pilatus ra'aheni, "Lernohi ainim agame nin keneri hono'ok, kan wa'an ri na'aheni ai onne Makromod Lalap Anan. Keneri hono'ok ida aile man hopon resnedi ri onneni. Ende Ai onne sala wake'e ono na'aheni Makromod Lalap Anan Ai!"

<sup>8</sup> Pilatus derne hi ra'aheni heheni, idewe ai eren namkaka'uk me'e,

<sup>9</sup> de laa wali'ur raram na'ukani Yesus, "Kii O manina ewie?" Maa Yesus kan walhe.

<sup>10</sup> Pilatus na'ukani wali'ur, "Alhi'ihepe O kam wakunu! Lo'o ka mauroin yo odi molollo huriyedi O, la yo odi molollo wairesne O haehni?"

<sup>11</sup> Yesus na'aheni, "Lo'o Makromod Lalap ka nala molollo, onuma molollo kaale hi'i haida Ya'u kemen, de ri ma nala Ya'u kani ki o, hi onne rira dohohale nammori rehi ki o."

<sup>12</sup> Pilatus derne Yesus na'aheni heheni ne, idewe ai nanoin kalla leke huri Yesus, maa Yahudi enihe wakaukau mamani, "Makrom'e, makrom'e, lo'o om huri Ri onneni, makrom'u ka noro Kaisar lawuku me'e. Ri man mehen kikan kemen namwali rai, ai onne penia Kaisar nin arwali!"

<sup>13</sup> Pilatus derne Yahudi ra'aheni heheni, an hopon Yesus laa paharne namriri lolo heri kalarna mene ai naikoro lolo hono'ok kanail nin kadere leke nala nin

kenekrohu. Nin kadere rodi ho'ok kail onne aile lolo onno man wekel 'Onno Rodi Waku Hi'ie', la lolo wanakunu Ibrani wekel '*Gabata*'.

<sup>14</sup> Lere onne na'ikeki riuk idaweli woro'o lere u'ulu me'e, la ri maha ra'akene hanana'an ono oreki Lere Alam Lalap Paska.

Enine Pilatus ne'el Yahudi enihe na'ahenia, "Ai eni pena minim Rai."

<sup>15</sup> Enimaa hir wakau ra'aheni, "Mesnediye! Mesnediye! Rodi laa wairesnedie lolo au kekiy-woke here!"

Enine Pilatus wakunu wali'ur, "Mi mapanak ya'u wairesne minim Raie?"

Enimaa imam lalap enihe ra'aheni, "Ainima rai Kaisar mehe, namehin ka!"

<sup>16</sup> Kame'ede Pilatus nala Yesus kanile hi leke rodi laa roho wair lolo au kekiyowok.

*Wair Yesus lolo au kekiy-  
owok*

(Mat. 27:32-44; Mrk. 15:21-32; Luk. 23:26-43)

Ende ke'urauk onnenihe rala Yesus nano Pilatus rodi rala'a me'e.

<sup>17</sup> Yesus mehe na'uwara Nina au kekiyowok, la hi rala'a laa onno ma nadadem wekel 'Onno Ma Naisa Uluwaku Rurna' la lolo wanakunu Ibrani ra'ahenia 'Golgota'.

<sup>18</sup> Hir rakan Golgota mene hir wairesne Yesus noro ri woro'o haehni, Yesus minle toro la woro'o onnenihe ida min mariri la ida min malanna.

<sup>19</sup> Pilatus hopon horok lolo papan deulana ida wanakunu ma nahenia: YESUS MA NANO NAZARET,

YAHUDI RIR RAI. Horu ne, roho papan onne uluwakun wawan lolo Nina au kekiyowok eni.

<sup>20</sup> Ri Yahudi nammori lese honorokana onne ono hir wair Yesus lolo onno ma kan ko'u nano kote, la hir horok rodi wanakunu Ibrani, Latin noro Yunani.

<sup>21</sup> Enime'ede imam lalap enihe re'el Pilatus na'ahenia, "Yom horok heheni, maa wa'an rehi horok na'aheni, 'Ri eni na'aheni Ai namwali Yahudi Rir Rai.'

<sup>22</sup> Enimaa Pilatus na'ahenia, "Yono rin herre inhawe man ya'u hohorok eni."

<sup>23</sup> Ma nasala ke'urauk onnenihe wair Yesus horu ne, hi rala Nina nainair de hir ha'ar namwali wo'akka leke dohodoho lernala, maa kar ha'ar Nina rain nanaru ono ramhene sirriki. Rain nanaru onne ma'aruru la na'alehe honourn, ono kenne me'ede lisar mahaku mehe.

<sup>24</sup> Kame'ede ke'urauk onne ida ma ne'el ida, "Yono ik sirriki rain nanaru eni. Mai ik hi'i undi leke kauroin inhoi man lernale." Onne na'akeme namwali leke na'akuku na'anokor horhorok man aile Horok Lap raram ma na'ahenia,

"Na'amoli hir ha'ar Ainu'u nainair la hir hi'i undi leke rauroin inhoi lernala Ainu'u rain." \*

Ende ke'urauk onnenihe rodi Yesus Nin rain nanaru onne hi'i undi me'e.

<sup>25</sup> Enine Yesus inna, intono, Maria ma namwali Klopas hono, noro Maria Magdalena, hi ramririri ra'urani Yesus Nin au kekiyowok.

<sup>26</sup> Yesus do'on Nina mama noro Nin man lernohi pakunohi man Ai nararamyaka onne ramririri wewerre aile lolo onne, la Ai ne'el woro'ohe na'ahenia, "Mame, ai onne o anum."

<sup>27</sup> Kame'ede Yesus ne'el man lernohi pakunohi onne eni, "Pa'e, ai onne onum mame!" Nano lere onne me'ede, man lernohi pakunohi onne napanak Yesus ine min nin nakar.

### *Yesus maki*

(Mat. 27:45-56; Mrk. 15:33-41; Luk. 23:44-49)

<sup>28</sup> Onne horu, Yesus nauroin nahenia An hi'i na'ahoruwedti honowok na'akeme man Makromod Lalap naledi Ai me'eni, la Ainin panaeku na'akuku na'anokor inhawe man aile Horok Lap raram, de Ai na'aheni, "Ya'u marouwedi me'e."

<sup>29</sup> Lolo onne anggur man ma'alinu aile de hi rala sawar ku'ule nanumene wukule au hisop rala soru Yesus nuran.

<sup>30</sup> Yesus kimis anggur man ma'alinu onne la na'aheni, "Ainu'u honowok horuwedi me'e!" Enine An kani hamaran laa Makromod Lalap horu, idewe wawuluwedi uluwakun la aran horuwedi.

<sup>31</sup> Lere onne ri Yahudi ra'akekene hanana'an ono oreki Alam Renren Warwarna, la Alam Renren Warwarna onne ma na'ono wake'e ono Lere Alam Paska. Ri Yahudi rir agame nahenia kan wa'an ri man maki lolo au kekiyowok nawinainair Alam Renren Warwarna, de Yahudi rir man panulu

rapanak Pilatus leke hi'i yakiyedi ri ma nawinair onnenihe ein. Hir hi'i heheni leke pelek maki la rala kopuredi nano au kekiyowok mene rakan Lere Alam Paska onne.

<sup>32</sup> Ende ma nasala ke'urauk onnenihe laa hi'i yakiyedi ri woro'o onne ein nolu,

<sup>33</sup> maa rakan Yesus, hir po'on makiyedi me'e de kar hi'i yaki ein.

<sup>34</sup> Enimaa ke'urauk ida nodi kere kadi Yesus herne, de idewe rare noro oir namhara.

<sup>35</sup> Enla ai man mehen do'on ha ma namwali eniyenihe, ai penia man loikaru ki mi, la ai nauroin nahenia nin wanakunu namlolo kokkoo, ono ai mehe do'on ha onne namwali, de mi akim nala nin wanakunu, leke mi akim namkene naili'il Yesus haenhi.

<sup>36</sup> Ha onne na'akeme namwali leke na'akuku na'anokor horhorok man aile Horok Lap raram ma na'ahenia, "Nano Ai rurna na'akeme, mahaku kan paki." \*

<sup>37</sup> Horhorok namehin lolo Horok Lape raram na'aheni, "Hir do'onedi Ai man hir kakadi kemen me'e." \*

*Ra'akene manaku Yesus ihin kemen*

(Mat. 27:57-61; Mrk. 15:42-47; Luk. 23:50-56)

<sup>38</sup> Kame'ede Yusup manina Arimatea mai napanak Pilatus nala Yesus ihin kemen nodi laa ra'akene manaku lolo ku'il ma namwali lunne. Yusup eni man lernohi

Yesus haenhi, maa ai kan konohi ri ono ai namka'uk Yahudi rir man panulu enihe. Enine Pilatus ne'enohi ainina napanak eni, de Yusup nala Yesus ihin kemen laa na'akene manaku.

<sup>39</sup> Nikodemus man mai pakromo Yesus a'alam nonolu onne noro Yusup ra'alono laa rala Yesus ihin kemen. Nikodemus nodi rampa warna-warna man werekne lo'o kilu welikelu.

<sup>40</sup> Ende woro'ohe rodi tapi lenan laa komon Yesus kemen noro rampa-rampa onne lernohi Yahudi rir noho honolla.

<sup>41</sup> Lere onne kirna ida aile lolo onne ma na'uranrani onno wawair Yesus eni, la lolo kirne raram onne ku'il woruworu ida aile man ri ka nala maki loile makun.

<sup>42</sup> Ende Yusup noro Nikodemus rodi Yesus kemen laa loile lolo ku'il ma na'uranrani onne ono na'akeki rakanedi Alam Renren Warwarna me'e, de maha ra'akene ha wo'ira leke yon howok lere onne.

## 20

*Yesus mori wali'ur*  
(Mat. 28:1-8; Mrk. 16:1-8;  
Luk. 24:1-12)

<sup>1</sup> Domeku al'alam na'ulawlawak makun, Maria Magdalena nala'a ku'il onne, la an po'on waku lapa rodi el'elek ku'il makan onne napoiyedi laa herne me'e.

<sup>2</sup> Ende an lari laa nanoin Simon Petrus noro man lernohi pakunohi man Yesus nararamyake onne. Pakromedi ne, ai na'aheni,

\* 19:36 Kel. 12:46, Bil. 9:12 \* 19:37 Zak. 12:10

"Eih! Ri naledi Makromod ihin kemen me'e, ka auroin aile ewi me'e."

<sup>3</sup> Kame'ede Petrus noro man lernohi pakunohi onne laa tolle ku'il.

<sup>4</sup> Woro'ohe larlari, maa man lernohi pakunohi namehin onne pelek rehi, de rakan noluwedie Petrus laa ku'il.

<sup>5</sup> Rakanedi ne, an nahirawa po'on laa ku'il raram, do'on tapi man rodi komon Yesus kemen mehe aile, maa kan laa raram makun.

<sup>6</sup> Kan maha ne, Simon Petrus rakanedi la idewe laa ku'il raram. An do'on mehe tapi man aile lolo onne haenhi,

<sup>7</sup> la an do'on tapi deul rodi wuwuku Yesus uluwakun, maa tapi deul onne nadlun-lunna min aimehi.

<sup>8</sup> Kame'ede man lernohi pakunohi onne man rakan nolu laa raram haenhi, de do'on mouwedi ha onnenihe na'akeme mene akin naili'il nahenia Yesus mori wali'uredi me'e.

<sup>9</sup> Rakan lere onneni hi ka rauroin makun horhorok lolo Horok Lape raram ma na'ahenia, 'Yesus maki maa mori wali'ur.'

<sup>10</sup> Kame'ede woro'ohe wali laa rira nakar me'e.

*Yesus nalhari kemen  
Maria Magdalena*

(Mat. 28:9-10; Mrk. 16:9-11)

<sup>11</sup> Enimaa Maria Magdalena namriri ku'il kalarna nahehere la nahirawa po'on laa ku'il raram.

<sup>12</sup> Enine an do'on hophopon a'am raram woro'o man nair nainair wawarhe, la hi raikokoro aile Yesus Nin

namkukuru lole, ida naikoro uluwakun wawan la ida naikoro ein ki'il.

<sup>13</sup> Ende hophopon a'am raram onnenihe ra'ukani Maria, "Ine, hi'ihepenia ine nahere!"

Maria walha, "Ri naledi i Makrom'u ihin kemen me'e, la ka auroin loile ai ewi!"

<sup>14</sup> Maria na'aheni heheni horu ne, an wali kili'ur do'on Yesus namriri aile kili'urne, maa ai ka nauroin onne Yesus.

<sup>15</sup> Yesus na'ukani, "Ine, hi'ihepenia mahere? O manoin inhoi?" Maa Maria nauroin nahenia ri onne orkirne de na'aheni, "Pape, yono hi'i pape rei wali'uredi i Makrom'u ihin kemen nano mai eni me'e, Pape konohi ya'u leke laa ale."

<sup>16</sup> Kame'ede Yesus na'aheni, "Maria."

Idewe Maria po'onalala Yesus la na'aheni, "Raboni," napa'ahne, 'Papa Meser'.

<sup>17</sup> Yesus walha na'ahenia, "Ine, yom roule Maya'u, ono Ya'u ka'u ha'a laa wawan laa Ainu'u Pape makun. Wali here, lam konohi I walin na'akeme ma'aheni na'ikeki Ya'u ha'a laa wawan laa Ainu'u Pape ma namwali minim Pape haenhi, laa I Makrom'u ma namwali mi Makrommu haenhi."

<sup>18</sup> Kame'ede Maria wali lan konohi Yesus Nin man lernohi pakunohi enihe na'ahenia, "Heih! Ya'u mehe odi mak'u do'onedi Makromod Yesus. An mori wali'uredi me'e!" Enla an konohi hi ha wo'ira na'akeme man Yesus konohiyedi ai me'eni.

*Yesus nalhari kemen Nina man lernohi pakunohi enihe  
(Mat. 28:16-20; Mrk. 16:14-18; Luk. 24:36-49)*

<sup>19</sup> Lere onne Domeku, la na'ikeki lere helem me'e, Yesus Nina man lernohi pakunohi onnnihe minwuku aile nakar ida, la hir konkonso nike na'akeme ono ramka'uk Yahudi enihe. Ende ramlilinnohi Yesus namriri aile hi leken kalarna me'e, la na'heni, "Yon mamka'uk! Ya ala aki ma namlina namkai ki mi na'ahoru!"

<sup>20</sup> Horu ne, An kukul liman kawin noro herne ma namno'no'o hir do'on. Hir do'on rauroinedi Ai onne Makromod, de hi akin nahuwa'an wake'e.

<sup>21</sup> Enine Yesus na'aheni wali'ur, "Ya ala aki ma namlina namkai ki mi na'ahoru! Ya'u hopon mi lam hi'i Ainu'u panaeku lolo noho wawan, naise Ainu'u Pape hopon Ya'u mai noho wawan hi'i Ainin panaeku haenhi."

<sup>22</sup> Kame'ede An nou aran laa hi na'aheni, "Kokala Roh Kudus".

<sup>23</sup> Enla An hopon hi na'ahenia, "Lo'o mi mala ampun ri nin dohohala, onne nin panaeku Makromod Lalap naledi ampun rir dohohala haenhi. Lo'o mi ka mala ampun rir dohohala, onne nin panaeku Makromod Lalap ka nala ampun haenhi."

*Yesus nalhari kemen laa Tomas*

<sup>24</sup> Ler Yesus nalhari kemen onne, Tomas kaale. Tomas eni namwali man lernohi pakunohi ida nano ri idaweli

woro'o enihe haenhi, la ri nadedem rapolu ai 'Tatana Adodo'o'.

<sup>25</sup> Ende ai walin enihe ra'ahenia, "Am do'onedi Makromod me'e!"

Maa Tomas na'aheni, "Lo'o ka'u do'on liman man hir ro-roho eni noro herne man kakadi eni, la lo'o ka'u roulle Nina no'o man aile liman noro herne, ya akin ka naili'il makun."

<sup>26</sup> Nakawedi domeku ida wali'ur, man lernohi pakunohi enihe lawuku nakar onne wali'ur, la Tomas aile haenhi. Kade nika na'akeme konsedi me'e, maa ramlilinnohi Yesus namriri aile hi tore la na'aheni, "Ya ala aki ma namlina namkai ki mi na'ahoru."

<sup>27</sup> Enine, Yesus ne'el Tomas na'ahenia, "Tomas, mala o liman ra'an loile lolo eni, po'on Ya'u liman, la hapu dilhe man aile Ya'u herne eniyeni. Yon o akin ka namkene, maa naili'il Maya'u kokkoo!"

<sup>28</sup> Tomas na'aheni, "Makrom'u! O eni Ya'u Makromod Lalap!"

<sup>29</sup> Yesus na'aheni, "O akin naili'il ono om do'onedi Ya'u me'e. Onne wa'an, maa ri ma akin naili'il Ya'u nolu mene do'on, ai onne akin nahuwa'an wake'e."

*Horokeniyeni nin panaeku ma na'ono*

<sup>30</sup> Yesus nodi Makromod Lalap Nina ke'ke'e'l an'anha hi'i tanada namehin nammori man ri kan dodo'onnale makun lolo Nin man lernohi pakunohi enihe kalarna, maa tanada onnnihe kar horok mai eni.

<sup>31</sup> Enimaa ri man hi'i horok eniyeni, horok tanada

eniye nihe leke mi akim naili'il Jesus, leke mi mau-roin nahenia Makromod Lalap kikanedi Ai namwali Rai laa ewi-ewi, leke mi mauroin Ai onne Makromod Lalap Anan haenhi. Enla mi na'akeme ma akin naili'il Ai eni, mim lernala or'ori dardari ma kan horu.

## 21

*Jesus nalhari kemen laa  
Nina man lernohi pakunohi ri  
wo'ikku*

<sup>1</sup> Nakawedi domeku ida woro'o wali'ur, Jesus nalhari kemen wali'ur laa Nin man lernohi pakunohi enihe lolo oir lap Tiberias nin herraram. Ende wanakunu lere Ai nalhari kemen onne hi'i heheni:

<sup>2</sup> Simon Petrus, Tomas man rapolu Didimus (Tatana Adodo'o), Nataniel ma namhara nano leke Kana noho Galilea, Zebedeus ananhe, roro man lernohi pakunohi woro'o namehin, hir lawuku lolo herraram onne.

<sup>3</sup> Enla Simon Petrus ne'el man lawuku onnenihe na'ahenia, "Ya'u laa paharne leke sopol diyala."

Enime'ede hi na'akeme ra'aheni, "Am lernohi haenhi." Kame'ede hi na'akeme ha'a korkore laa paharne ranoin i'in me'e, maa alam kekeme onne rira diyale ka nalala i'in kem mahakue.

<sup>4</sup> Noho na'ikeki roropeni, hir po'on Jesus namriri aile herraram, maa ka rahiyen-nala ma namririri onne Jesus.

<sup>5</sup> Enine Jesus wakau hi na'ahenia, "I wal'u mie, lernala i'in me'e, ee kaun?"

Hir walhe, "Ai ka malalala i'in kem ida makun, Pape!"

<sup>6</sup> Jesus na'aheni, "Sopol minim diyale lolo korkore herne malanne leke mim lernala i'in." Kame'ede hir sopol diyala lolo korkore herne malanneni. Hir sopol ne, kar hedunale ono naledi i'in nammori me'e.

<sup>7</sup> Jesus Nin man lernohi pakunohi man Ai nararamyaka onne ne'el Petrus na'ahenia, "Ai onne, Makromod!" Petrus dernedi ne, an nairedi nin rain ono idedi kan rain. An rain horu mene nehu laa oir raram nanani laa herraram.

<sup>8</sup> Enla man lernohi pakunohi namehin enihe wohi korkore lernohi me'e ono kan ko'uwalla ro lo'o ko'unne meter rahu ida mehe. Ende hir tote rira diyale man i'in penpenu onne laa herraram me'e.

<sup>9</sup> Hir kopur korkore laedi herraram, la po'on i'in ailedi aiware wawan la roti aile haenhi.

<sup>10</sup> Jesus na'aheni, "Modi minim i'in mamala onne heruwali mai eni."

<sup>11</sup> Enine Petrus ha'a laa korkore hedu diyale mai herraram. Diyale onne nala i'in lape mamani, na'akeme kem rahu wellima wokelu. Kade diyale nala i'in rahu onne, maa lisar ida kan kaprosu.

<sup>12</sup> Jesus ne'el hi na'ahenia, "Mai ik ka'ak here!" Petrus noro walinhe rauroinedi Ai onne Makromod me'e de ramka'uk ra'ukani Ai, "Pape inhoi?"

<sup>13</sup> Enime'ede Yesus laa na'uraniyedi hi, nala roti noro i'in onne nalkani hi.

<sup>14</sup> Lere Yesus nalhari kemen onne namwali rewkelu nina nano lere Makromod Lalap na'amori Ai wali'ur nano Nin makmaki.

*Yesus noro Petrus wakunu*

<sup>15</sup> Hi ra'ak horu ne, Yesus ne'el Simon Petrus, "Simon, Yohanis anan o, lo'o maramyaka Maya'u narehi hi eniyenihe, ee ka?"

Simon Petrus na'heni, "Makrom'u! Makrom'u nau-roinedi me'e ya aramyaka Makrom'u."

Jesus ne'el ai na'henia, "Ilitolle Ainu'u pipduman enihe."

<sup>16</sup> Yesus na'ukani Petrus wali'ur, "Simon, Yohanis anan o, namlolo kokkoo o maramyaka Ya'u?"

Petrus na'heni, "Makrom'u! Makrom'u nau-roiroin ya aramyaka Makrom'u."

Jesus ne'el ai, "Ilitolle Ainu'u pipdum enihe."

<sup>17</sup> Yesus na'ukani rewkelu nine na'henia, "Simon, Yohanis anan o, maramyaka Ya'u, ee ka?"

Petrus akin woir wake'e, ono Yesus na'ukani ai rewkelu nina, penia Petrus na'heni, "Makrom'u nau-roinedi ha rahu na'akeme. Makrom'u nau-roiroin ya aramyaka Makrom'u."

Jesus na'heni, "Ilitolle Ainu'u pipdum enihe.

<sup>18</sup> Loi honorok wawa'an Ainu'u nou eniyeni: Lere eniyeni o ka ma'ileher makun, de om hi'i inhawa lernohi mehe num honorok panaeku, maa lere

ma'ileheredi, om kikan o limmu, la rin wuku o rodi rala'a, kade mamhene."

<sup>19</sup> Yesus Nina wanakunu eniyeni kukunohi Petrus hi'ihehewi an maki, la na'heni nin makmaki onne na'akulu na'alapa Makromod Lalap. An wakunu horu, na'henia, "Petrus, mai lernohi Ya'u!"

<sup>20</sup> Petrus po'on laa kili'ur ne, po'onala Yesus Nin man lernohi pakunohi man Ai nararamyaka onneni lernohi haenhi. (Nonolu, lere hir hi'i ya'an yomun Paska onne, ai ma naikoro na'urani Yesus, la Petrus hopon nalpupu Yesus, na'ukani na'henia, 'Inhoi ma na'olu Makrom'u?')

<sup>21</sup> Petrus po'on man lernohi pakunohi onneni ne, ai na'ukani Yesus, "Hi'ihehewi noro ai eniyeni?"

<sup>22</sup> Yesus walhe na'henia, "Yon mahinorok wallumhe namehin. Lo'o Ya'u hurinohi an mori hehen nanumene Ya'u wali mai noho wawan wali'ur, onne Ainu'u honorok panaeku mehe, onum panaeku ka. Mam lernohi Ya'u!"

<sup>23</sup> Onne penia lir anna pe'eredi nahenia man lernohi pakunohi onne kan maki, maa Yesus kan konohi Petrus heheni. Ai na'heni eni mehe, "Lo'o Ainu'u panaeku o wallum kan maki, maa mori hehen nanumene Ya'u wali mai noho wawan wali'ur, onne onum panaeku ka."

<sup>24</sup> Man lernohi pakunohi onneni mehen do'on ha wo'ira na'akeme eniyeni namwali, la ai penia man

horok ha eniyeni na'akeme  
lolo horok eniyeni, la ik  
kauroin nahenia ainin  
wanakunu eni namlolo  
kokkoo.

*Lir man horu*

<sup>25</sup> Yesus Nin hini'i we-newhe namehin nammori aile makun, de lo'o ik horok na'akeme lolo horok namehin, onno kan nokor lolo noho wawan leke ra'akene horok rahu onneni.

# Roh Kudus Nin Honowok Nair Lolo Hophopon Ma Nodi Yesus Lirnenihe

*Horok Lirna La'an*

Lolo horok eniyeni Lukas konohi maika hi'ihewi Roh Kudus nala molollo hophopon ma nodi Yesus Lirnenihe, leke hir loikaru Makromod Yesus Lirna Wawa'an lolo kota Yerusalem, noho Yudea, noho Samaria, noro idewe noho pa'i'ik rai pakakar (1:8).

Lere Yesus nakinikanedi laa a'am raram, Makromod Lalap nala Roh Kudus ri ma akin naili'il Yesus enihe, penia hi ka ramka'uk loikaru Yesus Lirna Wawa'an lolo ewi-ewi. Ende akilere man lernohi Yesus eren nammori.

Ler onne Yahudi ma akin naili'il Yesus heruwali ra'ahenia Makromod Lalap kan kokala ri ma kan sunat makun. Ende hir hopon ri ma ka namwali Yahudi enihe lar sunate nanu leke Makromod kokala hi noro wawa'an, maa lolo horok eniyeni Makromod Lalap kukunohi ri nahenia Ai namre'e namharu inhoi-inhoi man herre nin morimori, la akin naili'il Yesus. Inhoi akin naili'il Yesus, Ai nala Roh Kudus naikoro ai honorok akin leke nodi molollo ai. Ende nano horok eniyeni ik kauroin Ai kan hopon ika sunat nanu leke kamwali Ai anan.

Horok eniyeni konohi maika hi'ihewi ma akin

naili'il Yesus enihe rodi Makromod Lalap Lirna Wawa'an laa ri ma ka namwali Yahudi. Pilipus lan loikaru Horok Lap Lirna Wawa'an lolo Samaria (8:7-25). Petrus lan loikaru Makromod Lalap Lirna Wawa'an laa Cornelius, manin Roma (10:3-35). Paulus lan konohi ri lolo noho-noho ma kan derne Makromod Lalapa Lirna Wawa'an makun (13:28).

Horok eniyeni konohi inhawa ma namwali Paulus nano lere dedesne an pakromo Yesus lolo kalla man laa Damsyik, rakan lere ma nasala ke'urauk radiyaka ai lolo Roma. Roh Kudus nala molollo leke an loikaru Yesus Lirna Wawa'an laa ri na'akeme, ri Yahudi wa'ane, ri ma ka namwali Yahudi wa'ane.

Roh Kudus nodi molollo hophopon ma nodi Yesus Lirnenihe leke hir hi'i ha man ri kan dodo'onnala makun, la Ai nala molollo hi leke yon ramka'uk loikaru Makromod Yesus Lirna Wawa'an lolo ewi-ewi.

*Horok Ihin*

1. Hophopon ma nodi Yesus Lirnenihe loikaru Yesus Lirna Wawa'an lolo Yudea noro Samaria (1:1-8:3).
2. Hophopon ma nodi Yesus Lirnenihe loikaru Yesus Lirna Wawa'an lolo Yudea noro Samaria (8:4-12:25).
3. Paulus laa noho-noho namehin lolo kalla dedesne nina leke loikaru Yesus Lirna Wawa'an ri (13:1-14:28).

4. Man panulu lolo kerei hopun pepen lolo Yerusalem (15:1-15:35).
5. Paulus laa noho-noho namehin lolo kalla rewro'o nina leke loikaru Yesus Lirna Wawa'an ri (15:36-18:22).
6. Paulus laa noho-noho namehin lolo kalla rewkelu nina leke loikaru Yesus Lirna Wawa'an ri (18:23-21:16).
7. Rin kele Paulus lolo Yerusalem, Kaisarea, noro Roma (21:17-28:31).

*Yesus nakinikan laa a'am raram*

<sup>1</sup> Konohiyala i makrom'u Teopilus,

Lolo ain'u horok dedesne ihin,\* ya'u konohiyedi papa ha wo'ira man Yesus hi'i la wakuku nano lere dedesne An howok,\*

<sup>2</sup> rakan lere alam Ai nakinikan laa a'am raram. Lere Ai kan ha'a laa a'am raram makun, Ai nodi Roh Kudus Nin molollo kuku kalla Nina hophopon man An niliyedi nonolu enihe leke hi rodi Lirna Wawa'an loikaru ri.

<sup>3</sup> Enla An maki, maa mori wali'ur, la alam wel'iakka raram Ai nalhari kemen idewe-idewe pakromo noro Nin ri enihe, leke hi rauroin kokkoo An mori wali'uredi me'e, la An wakuku hi hi'ihewi Makromod Lalap nodi molollo Nin ri mormori.

<sup>4</sup> Lerida Ai noro hi maha ra'ak ne, An hopon hi, "Yon pelekleke mamhara

Yerusalem, maa mamkene lolo koteni newek Ya Am'u nala Roh Kudus ki mi lernohi Nin nou man Ya'u konohiyedi mi lere man laedi me'e.\*

<sup>5</sup> Nonolu eni Yohanis nodi oir ulutada mi, maa ka nalo'ol me'e Makromod Lalap nodi Roh Kudus ulutade mi."

<sup>6</sup> Ler namehin hi rore pakromo wali'ur ne, hi ra'ukanie, "Makrom'u, Num panaeku lere eni ma'akeperedi Romawi la ma'ariri noho Israel wali'ur leke mamwali Rai?"

<sup>7</sup> Yesus walhe, "Makromod Lalap mehe Nin molollo nala alam la nala leken. Ai kan huri mi mauroin onne,

<sup>8</sup> maa ka nalo'ol me'e, Makromod Lalap nala Roh Kudus naikoro mi hon-orok akin, de mim ler-nala Nin molollo mamwali Ain'u man kuku maka lolo Yerusalem, lolo noho Yudea noro Samaria ne'en raram na'akeme, rakan noho pa'i'ik rai pakakar."

<sup>9</sup> Ai na'aheniyedi eni horu, hir po'onala Ai nakinikan laa lanik hehen nanumene noho ha'aha'a pupinedie.

<sup>10</sup> Hi maha rahehe po'on Yesus ha'a laa lanik makun, ramlilinnohi mo'oni woro'o man nair nainair wawarhe ramririri kan ko'u hi.

<sup>11</sup> Woro'ohe ra'ahenia, "Heih, ri Galilea mie! Alhi'ihepenia mamriri lolo eni po'opo'on lanik enie? Yesus eniyeni man idedi eni mim po'on nakinikan, laedi a'am raram me'e. Lere man mai An wali mai wali'ur

\* **1:1** Horok dedesne onnneni horok 'Lukas'. \* **1:1** Luk. 1:1-4 \* **1:4** Luk. 24:49

naise idedi mim popo'on An ha'a laa a'am raram eni."

*Nili Matias Herre Yudas*

<sup>12</sup> Ler onne hir minle wo'or Au Zaitun de hir wali wali'ur laa Yerusalem. Wo'or onne lo'o kilu ida nano Yerusalem.<sup>†</sup>

<sup>13</sup> Hir rakanedi Yerusalem ne, laa nakar mene ha'a laa wawan laa kamar man hir miminle. Hi onnenihe:  
Petrus noro Yohanis,  
Yakobus noro Andreas,  
Pilipus noro Tomas,  
Bartolomeus noro Matius,  
Yakobus (Alfeus anan),  
Simon (ri ma namhene hair namehin nodi molollo hair Israel),

noro Yudas (Yakobus anan).

<sup>14</sup> Akilere hi na'ahoru lawuku aki mahaku hi'i lir napanak roro idewe maeke ida woro'o. Yesus inne Maria aile haenhi roro wewerre Yesus mo'oniwalinhe.

<sup>15</sup> Lerida Petrus namriri lolo walihne toro (hi na'akeme lo'o ri rahu ida werro'o.) Enla ai na'ahenia,

<sup>16</sup> "I wal'u na'ahoru! Nonolu eni Roh Kudus konohiyedi lolo Daud in-hawa ma namwali noro Yudas na'ahenia ai onne namwali ma norkaru ri man kele Yesus wukue. Ha na'akeme ma aile Horok Lap eni peni namwali, de lere eniyeni Daud nin horok onne namwaliyedi me'e.

<sup>17</sup> Nonolu eni Yudas onne namwali mahaku noro maika, la Yesus mehen nili ai leke lernohi maika kamwali Nin man lernohi pakunohi."

<sup>18</sup> Nano Yudas nin ailanne lere ai na'olu Yesus onneni, an lernala kupan rodi weli

lari ipida. Lolo nin lari ip onne ai nediyawa la konoin napriki penia konoin romok maiyedi paharne idewe makiyedi.

<sup>19</sup> Yudas nina makimaki eni pe'eredi ri manina Yerusalem na'akeme penia hi rodi rira wanakunu waki kirna onne naranne Akaldama, ma napa'ahne, 'Lari Ip Rare'.

<sup>20</sup> Petrus na'aheni wali'ur na'ahenia, "Panaeku eniyeni horokedi aile horok Mazmurm'e na'ahenia,  
'Na'amoliyedi nina nakar mamue,  
yon ri mahaku minle nakar onne.'\*

La horok aile haenhi ma na'ahenia,

'Enla na'amoli man panulu nala nin honowok ri namehin hi'ie.'

<sup>21-22</sup> Ende lere eni wa'an rehi ika nili ri ida herre Yudas, leke namwali man kuku maka na'aheni Makromod Lalap na'amoriyedi Yesus wali'ur nano Nin makimaki. Wa'an rehi ik nili ri ma nadedem lernohi ika mamani lere Makromod Yesus noro ika min wewerre, nano lere Yohanis nodi oir ulutade ri rakan lere Yesus nakinikan laa a'am raram nano ika kalarna."

<sup>23</sup> Ende hir nili ri woro'o: Yusup Barsabas (rapolu Yus-tus haenhi) noro Matias.

<sup>24</sup> Onne horu, hi na'akeme hi'i lir napanak ra'ahenia, "Makromod, O penia mau-roin ri mormori akin, de kukul mayai nano ri

<sup>†</sup> **1:12** Ri Yahudi rira holoor halauk kan huri ri nala'a ko'u rehi kilu ida Alam Renren Warwarna. \* **1:20** Mzm. 69:25 \* **1:20** Mzm. 109:8

woro'enihe inhoi Makromod nili,

<sup>25</sup> leke herre Yudas howok honowok eni, ono Yudas eni hoikaruwedi honowok eniyeni la lernaledi nina hunukum me'e."

<sup>26</sup> Hir hi'i lir napanak horune, rala ri woro'enihe naran leke nili. Matias penia ma naran namhara. Ende kikan ai namwali man howok wewerre noro hophopon idaweli ida ma nodi Yesus Lirna enihe.

## 2

*Makromod Lalap nala Roh Kudus naikoro ma akin naili'il Yesus honorok akin*

<sup>1</sup> Rakanedi lere alam lalapa ma naran Pentakosta ne, ri ma akin naili'il Yesus enihe na'akeme raikokoro wuku lolo onnida.

<sup>2</sup> Hi raikokoro wuku ne, ramlilinnohi hir derne haida neknekir nano wawan naisa opil lape. Ha hir dederne onne nekir mamani lolo nakar hir miminle raram na'akeme.

<sup>3</sup> Hir po'onnala haida naisa ailere man anna hu lalaa mamai nalwali hi dohdoho.

<sup>4</sup> Makromod Lalap nala Roh Kudus naikoro hi honorok akin, idewe Roh Kudus nala woroin hi leke wakunu noho-noho namehin rira wanakunu.

<sup>5</sup> Ler onne ri Yahudi ma namka'uk Makromod Lalap nano hair-hair lolo noho wawan na'akeme aile Yerusalem.

<sup>6</sup> Hir derne ha man neknekir onneni ne, hir maiwuku me'e. Hir derne ri ma akin naili'il Yesus enihe dohdoho wakunkunu hirira wanakunue, na'akeme

polletilu la mehe nanana mouwedi.

<sup>7</sup> Hi na'akeme hehel, la ida ma ne'el ida, "Heih! Ri man wakunkunu eniyenihe man-in Galilea, ee ka?

<sup>8</sup> Hi'ihepenia ika derne hir wakunu rodi iknika wanakunu rahue?

<sup>9</sup> Maika eniyenihe ri ma nano noho Patria, Media, noro Elam, ma nano noho Mesapotamia, Yudea, noro Kapadokia, ma nano noho Pontus noro Asia,

<sup>10</sup> ma nano noho Frigia noro Pamfilia, ma nano noho Mesir noro leke-leke lolo noho Libia ma na'uranrani leke Kirene, la maika heruwali mai nano Roma haenhi.

<sup>11</sup> Maika heruwali ri Yahudi la heruwali ri ma ka namwali Yahudi man lernohiyedi Yahudi rira agame me'e, la ik heruwali ma nano noho Kreta noro Arab haenhi. Ik derne ri man wakunu onnenihe dohdoho rodi iknika wanakunu ra'aheni, 'Makromod Lalap hi'iyedi ha man ik kak dedernale la kak dodo'onnale makun.'

<sup>12</sup> Hi na'akeme hehel rehi la mehe kakaiyedi, la ida ma na'ukani ida, "Ha ma namwali eniyenihe nina panaeku inhawe?"

<sup>13</sup> Maa ri aile haenhi mahar hadwei hi ra'ahenia, "Ah, ri eniyenihe nadoo romun arak, de manha mouwedi me'e menee!"

*Petrus loikaru Makromod Lalap Lirna Wawa'an eni*

<sup>14</sup> Petrus noro Yesus Nin hophopon idaweli ida ramririri wewerre, la an wakunu

naruri laa heri onnenihe na'ahenia, "I walin Yahudi roro walin namehin man minle Yerusalem na'ahoru! Makaniyala wawa'an, ya a'amou a'aropo ha man mim dodo'on eniyeni.

<sup>15</sup> Ri enihe ka romon arak, de kar manha naise mim pae'eku eni! Idedi nanumene riuk wohii al'alam menee!

<sup>16</sup> Ka! Ha ma namwali eniyeni, Makromod Lalap konohiyedi lolo Nin nabi Yoel na'ahenia,

<sup>17</sup> 'Rakan ku lili'ur Ya ala Ainu'u Roh ri mormori na'akeme leke:

Mi anum mo'oni maeke lo'o konohi mi inhawa namwali lere man mai,

la minim mo'oni ma na'ikaka makun meher do'on haidahaida,

la minim ri leleher ramrmi.

<sup>18</sup> Ler onne, Ya ala Roh Kudus ki Ainu'u hophopon wahwahan--mo'oni maeke, leke hir konohi ri namehin inhawa Ya'u pae'eku eni.

<sup>19</sup> Ya'u hi'i tanada ri ka nadedem do'on lolo a'am eni, noro tanada ri ka nadedem do'on lolo noho wawan haenhi, rara noro aiye, la ai mahu namansa haenhi.

<sup>20</sup> Lere onne lere maki, la wollo namwali mere naisa rare.

Eniyeni namwali nolu mene Ainu'u Ler Alam Lalapa man ma'aruru wake'e mai.\*

<sup>21</sup> Enla inhoi napanak Maya'u pakue,  
ai onne lernala Ainu'u or'ori dardari ma kan horu.\*

<sup>22</sup> I wal'uhe ri Israel na'ahohoruwedi! Makaniyala wawa'an ainu'u panaeku eniyeni: Yesus, manin Nazaret onne, ik Makromod Lalap hopon mai min noro maika. Ik kauroin panaeku onne, ono Makromod Lalap nala molollo Ai leke An hi'iyedi ha man lewlewen noro tanada nammori man ik kak dodo'onnala makun. Ha onne na'akeme An hi'iyedi lolo mi herne kalarne, de i wal'uhe do'on la mauroinedi me'e.

<sup>23</sup> Yesus onne, Makromod Lalap nala ki mi, maa mi mesnedie, mala kani ri man ailanna leke waire lolo au kekiyowok. Panaeku onne na'akeme Makromod Lalap nakakaredi nano nonolu me'e.

<sup>24</sup> Enimaa Makromod Lalap huri Yesus nano makmaki nin apinpinha wo'operperi, ono makimaki ka naruri nodi molollo Yesus mamani.

<sup>25</sup> Nonolu eni ik upud a'ad Daud konohiyedi ha ma namwali noro Yesus heheni, 'I do'on Makromod Lalap lolo Ya'u kalarna mamani, Ai norle'ule'u norwali-wali Ya'u de, haida ka na'o'o nadewe Ya'u.

<sup>26</sup> Enpenia Ya akin nahuwa'an, Ya a'uli asa'e mamani,

\* **2:20** Lere onne An ho'ok kail ri mormori na'akeme. \* **2:21** Yl. 2:28-32

la ka amkauk inhawa  
namwali I kem'u ono  
Ya akin naili'il O.

27 O kam huri we'er Ya'u  
minle makimaki onno  
mamani,  
la kam hoikaru Num  
Man Moumou Dewdewe  
kemen popo.

28 Papa kukuwed i kalla or'ori  
dardari Ya'u me'e,  
la morle'ule'u morwal-  
wali Ya'u penia Ya akin  
nuhuwa'an wake'e.\*

29 Konohiyala I wal'u  
na'ahoru, nano Daud lirna  
nonolu onne, ik kauroin  
mouropo ai kan wakunu ha  
ma namwali ai kemen mehe,  
ono Daud onne makiyedi  
me'e, la nina lunne aile noho  
eni makun.

30 Daud namwali nabi,  
de ai nauroin nahenia  
Makromod Lalap kikan  
hopo na'akerhe Nin nou ma  
na'ahenia nano ai upun anan  
Ri ida kikan namwali Rai  
naise Daud haenhi.\*

31 Enpenia Daud nau-  
roinedi ha ma namwali lere  
li'ur penia na'aheni, 'Kristus  
onne, Makromod Lalap  
kikan namwali Rai laa ewi-  
ewi, la An maki, maa mori  
wali'ur.' Daud na'ahenia  
An maki laedi lunne raram,  
maa Makromod Lalap kan  
hoikaru Ai minle makimaki  
onno, la Ai kemen kan popo  
lunne raram.\*

32 Yesus eni penia Makro-  
mod Lalap na'ori wali'ur  
nano makimaki. Mayai  
na'akeme mehem do'onedi  
panaeku onne me'e.

33 Makromod Lalap kikan  
Ai naikoro onno man kukulu  
lalapa lolo Ai herne malanna.  
Ai Aman nala Roh Kudus Ai  
naise An nonou eni, de ha mi  
mehem do'odo'on dererde  
eniyen i namwali ono Yesus  
naledi Roh Kudus onne  
naikoredi mayai honorok  
akin me'e.

34 Ik kauroin onne, ono  
Daud kemen kan ha'a laa  
a'am lapa raram, maa lolo  
horok namehin Daud napolu  
Yesus, 'Makrom'u'. Ai  
na'aheni,

'Makromod Lalap na'aheni  
I Makrom'u: \* Mai,  
maikoredi I her'u  
malanne,

35 newek hehen nanumene  
Ya akeperedi Onum arwali  
enihe, leke O modi molollo  
hi.'

36 Kame'ede Petrus  
na'ahenia, "Ende mi ri Israel  
na'ahoru mauroin kokkoo  
panaeku eniyeni: Yesus eni  
man mim wairesne, Makro-  
mod Lalap kikan namwali  
mi Makrommu noro idewe  
minim Rai (Kristus)."

37 Hir derne panaeku  
onneni horu, hi akin woiredi  
me'e, de ra'ukani Petrus  
noro hophopon ma nodi  
Yesus Lirna namehin enihe  
ra'ahenia, "Mayai lo'o hi'i  
inhawa?"

38 Petrus walhale, "Mi  
dodoho herre minim mori-  
mori ma ka namloleni, la  
derne makani Makromod  
Lalap. Enla na'amoli mim  
hurinohi rin nodi oir ulutada  
mi nodi Yesus Kristus Naran,  
leke ra'ohu rahaledi minim

\* 2:28 Mzm. 16:8-11   \* 2:30 Mzm. 132:11   \* 2:31 Mzm. 16:10   \* 2:34 Mzm.  
110:1

dohohale, la na'amoli mim lernala Roh Kudus,

<sup>39</sup> ono Makromod Lalap nouwedi me'e na'ahenia Ai nala Roh Kudus mi moro mi upun anumhe, noro idewe ri ma aile noho koko'u enihe. Ik Makromod, Makromod Lalap, nala nou eniyeni ri na'akeme man Ai napolu mai namwali Nin ri."

<sup>40</sup> Petrus nala panaeku namansa hi leke ken herre hi honorok akin, la napanak an'anhedu na'ahenia, "Mapanak Makromod Lalap huriyedi mi nano ku eniyeni nin honoli man yaka, leke yon An hukum mi."

<sup>41</sup> Enime'ede ri man kokala Petrus nina wanakunu enihe aki hi na'akeme lo'o ri riwan wokelu. Hi na'akeme rala'a oir raram leke rin ulutade.

<sup>42</sup> Hi onnenihe rampe'el lawuku mamani leke derne rakani hophopon ma nodi Jesus Lirnenihe wakuku. Hi ida ma nala akin ida, la ha'ar roti ra'an romun mamani, la hi'i lir napanak wewerre.

<sup>43</sup> Ri na'akeme lolo Yerusalem heheledi po'on hophopon ma nodi Jesus Lirnenihe hi'i hahaa kar dodo'onnala la ka rauroroin-nala makun. Hir horhawa rehi hophopon ma nodi Jesus Lirnenihe ono Makromod Lalap naledi molollo hi me'e.

<sup>44</sup> Ri ma akin naili'il Jesus enihe lawuku mamani, ida man mori wawa'an noro ida, la inhawe man hirira aile hir ha'ar nair wewerre.

<sup>45</sup> Hi ra'olu rira hahaa leke ha'ar wella rale hirira ri man hewhewek nainair kan nokor.

<sup>46</sup> Akilere hir lawuku Makromod Lalap Nina Romleu Lap raram ra'uli rasa'a Oin Naran man kukulu la man lalape. Hir pakromo wuku lolo nakar laa nakar leke ra'ak wewerre noro akin ma nahuwa'anedi, la ida man helkaki ramdaru ida.

<sup>47</sup> Hi ra'uli rasa'a Makromod Lalap mamani, la ri man minle kote onne akin nahuwa'an noro hi. Akilere Makromod Lalap na'uwali ri man lernaledi Nina or'ori dardari ma kan horu eni, penia heri ma akin naili'il Yesus eren na'uwawali.

### 3

*Petrus noro Yohanis hi'i wa'an ri man ein naplu'uk*

<sup>1</sup> Rakan lerida lere mammal, Petrus noro Yohanis rala'a laa Romleu Lapa naise nadedem leke hi'i lir napanak.

<sup>2</sup> Hir rakan Romleu Lapa nin nika lapa ma naran, 'Nika Man Ma'arurue,' la lole laa raram. Ri mahar rodi mo'oni ida man ein naplu'ukedi mai raram haenhi. Nano lere mori me'ede ein makiyedi de, akilere rodi laa naikoredi lolo onne leke napanak kuan tarana.

<sup>3</sup> An po'on Petrus noro Yohanis laa raram ne, ai napanak ralala haida ai.

<sup>4</sup> Enime'ede hir po'on nale, Petrus hopon na'ahenia, "Po'onala mai eni!"

<sup>5</sup> An po'on hi, raram hawa'anedi ono lo'o an kokala haida nano hi harome.

<sup>6</sup> Maa Petrus na'aheni, "Kupan kaale mayai, maa inhawe man ainima ai mala

ki o. Lolo Yesus Kristus nano Nazaret Nina ke'ke'e'l an'anha am hopon o mamriri mala'ala'a here!"

<sup>7</sup> Petrus nasala ri onne li-man malanne paku na'ariri, idewe ein ma naplu'uk noro ein hunuhun naruriyedi, de nehu laa wawan, namririri, lalaa mamai.

<sup>8</sup> Enine ai noro hi laedi Romleu Lap raram, la ai onne nehunehu, lalaa mamai, la na'uli nasa'a Makromod Lalap mamani.

<sup>9</sup> Heri man minle Rom-leu Lape raram po'onale nala'ala'a, la dederne ai maha na'uli nasa'a Makromod Lalap.

<sup>10</sup> Mai hi rahiyyennala ri onne ma nadedem naikoro Romleu nin 'Nika Man Ma'aruru' mehe napanpanak ne, hir hehel rehi, ida ma ne'el ida, "Ha man ik kak dodo'onnale makun, namwaliyedi me'e!"

*Petrus lariyalari, "Mai lernohi Yesus"*

<sup>11</sup> Ri man wa'anedi onne lernohi Petrus noro Yohanis mamani, de ri nammori do'on ai la larinohi hi laa Salomo Nina Henei Lap eni ono hi na'akeme hehel rehi.

<sup>12</sup> Petrus po'on ri namansa onneni, ai na'aheni hi, "Heih! I walin Israel mie! Alhi'ihepenia i walin hehel rehi po'on inhawa namwali mai eni? Hi'ihepenia mim po'on mayai mamanie? Yon makoto nahenia ai modi anima ke'ke'e'l an'anha aimehi hi'i wa'an ri eni, ee lo'o ai akim mou wake'e de am hi'i wa'an ri onne! Ka menee!"

<sup>13</sup> Makromod Lalap man ik upud a'ad Abraham, Isak, noro Yakup roro ik upud a'ad namehin enihe ra'uli rasa'eni penia na'akulu na'alapedi Yesus, Ai Nina Hophopon Wahwahan, me'e. Yesus eni penia, i wal'uhe mamale laa ma nodi molollo, la ma'okuledie lolo Pilatus kalarna, kade Pilatus na'ahenia huriyedi Ai here.  
\*

<sup>14</sup> Mi ma'okuledi Ai Man Moumou Dewdewe la Man Akin Namdudu onne, la mi mapanak Pilatus huriyedi ri ma nadedem nesne ri mor-mori ki mi.

<sup>15</sup> I walin mesnedi Ai ma namwali or'ori dardari onno, maa Makromod Lalap na'ori wali'ur, la lere onne ai mehe modi ai makam do'odo'on.

<sup>16</sup> Yesus eni penia Nin ke'ke'e'l an'anha hi'i wa'an man ein maki eni. Ende ri man mim do'odo'on la mauroinedi nano nonolu me'en, an wa'anedi ono ai akim naili'il Yesus nodi molollo hi'i wa'an ai.

<sup>17</sup> I wal'u na'ahoru! Ler eniyeni ya auroin mi moro idewe minim man panulu enihe ka mauroin mim hi'i inhawa lere mi mesne Yesus.

<sup>18</sup> Maa Makromod Lalap nonolu eni nouwedi lolo Nina nabi na'akeme me'e nahenia Rai man Ai mehen kikanedi eni lo'o resnedi, de An hi'i Nina panaeku onne namwali lere mi mesne Yesus.

<sup>19</sup> Ende, i wal'uhe, herredi minim morimori ma ka namloleni, la derne makani Makromod Lalap leke Ai

\* **3:13** Kel. 3:6, 15

na'ohu nahaledi minima dohohala. Hi'i heheni leke Makromod Lalap nala honorok wawa'an nodi na'alaplapa mi akim,

<sup>20</sup> leke lere man mai An hopon Jesus mai ki mi wali'ur, ono nano lere dedesne Makromod Lalap kikanedi Ai namwali minim Rai laa ewi-ewi.

<sup>21</sup> Jesus eni ka namhara a'am raram hehen nanumene lere alam Makromod Lalap na'alolo ha wo'ira na'akeme wali'ur, naisa nonolu Ai na'aheniyedi lolo Nina nabi enihe me'e.

<sup>22</sup> Nonolu eni nabi Musa konohiyedi ik upud a'ad na'ahenia, 'Na'amoli Makromod Lalap kukul Nabi ida naise ya'u nano minim nohe. Derne makani Nina panaeku na'akeme man An loikaru ki mi eni.\*

<sup>23</sup> Inhoi kan derne nakani Nina loloi kakarue, Makromod Lalap naheiredi nano Nin ri la hukumesne.\*

<sup>24</sup> Nonolu eni Makromod Lalap Nina nabi na'akeme, nano nabi Samuel rakan nabi-nabi namehin man kauli'ur, konohiyedi ha ma namwali ku eniyeni me'e.

<sup>25</sup> I wal'uhe, Makromod Lalap nala Nina nou ma namkene nabi ma namwali mi upun a'um onnenihe, de mim lernala nou onne haenhi. An nou Abraham na'ahenia, 'Nano o upun anan ida, Ya ala wawa'an rara'a noho wawan na'akeme.\*

<sup>26</sup> Ende Makromod Lalap kikan Nin Hophopon Wah-

wahan, Yesus, la hopon mai mi nolu, namre'e namharu mi, leke mi na'akeme herre minim morimori ma ka nam-loleni, mai lernohi Ai."

## 4

*Petrus noro Yohanis rak-pali uluwakun man ho'ok kail lolo agame*

<sup>1</sup> Petrus noro Yohanis wakunkunu heri kalarua makun, imam lalapa ida woro'o roro uluwakun ma nadiyaka Makromod Lalap Nin Romleu Lape roro muku Saduki mai.

<sup>2</sup> Hi ra'ahan wake'e ono Petrus noro Yohanis wakuku ri nammori lolo onne ra'ahenia, "Jesus mori wali'uredi me'e," la nano rira wanakuku eni, hi ra'amou ra'aropo panaeku ri man maki, mori wali'ur.

<sup>3</sup> Ende hir kele wuku hi, rale laedi bui raram min lolo onne rakan nohoropo, ono lere helemedi me'e.

<sup>4</sup> Enimaa nano ri man dernessi rira wanakunu onneni, ri namansa akin naili'iledi Jesus. Enpenia rakan lere onne, aki mo'oni mehe man lernohi Jesus rakanedi riwan wolima me'e.

<sup>5</sup> Rakan nohoropo nanumene agame nina man panulu roro Yahudi rira leleher lalap roro meser Horok Lap enihe lawuku lolo Yerusalem hopun pepen.

<sup>6</sup> Hir lawuku roro wewerre Hanas ma namwali imam man kulu narehi, noro Kaya-pas, Yohanis, Aleksander noro ri namehin man ihin walin na'akeme.

\* 3:22 Ul. 18:15, 16 \* 3:23 Ul. 18:19

\* 3:25 NN. 22:18, 26:4

<sup>7</sup> Hi raikoro wukuwedi ne, hopon rodi Petrus noro Yohanis mai rakpali hi, mene ra'ukani hi ra'ahenia, "Hi'ihehewi? Modi inhoi nina ke'eke'el an'anha la inhoi naran penia mim hi'i wa'an ri ma naplu'uk onne?"

<sup>8</sup> Enime'ede Roh Kudus nodi molollo Petrus de walhale na'ahenia, "Man panulu roro leleher lalap Israel ne'en raramne mie!"

<sup>9</sup> Lere eni i wal'uhe sisnai mayai ono am paku ri ma naplu'uk eni, la mi mahehe mauroin hi'ihehewi mayai hi'i wa'an ai,

<sup>10</sup> de ya'u konohi mi inhawa ma namwali eni leke i wal'uhe moro manin Israel na'akeme mauroin kokkoo: Yesus Kristus, ri Nazaret onne, mehe Nina ke'eke'el an'anhe hi'i ri eniyeni wa'anedi, penia ai namriri mi kalarna. Yesus onne mim wairesnedi, maa Makromod Lalap na'oriyedi wali'ur me'e.

<sup>11</sup> Horok Lap Lirna aile man kukul Yesus eni na'ahenia,

'Waku man ri ma nayapi nakar sosopole, namwali waku na'a'ar.' ”\*

<sup>12</sup> Onne horu, Petrus na'aheni wali'ur, "Lolo Yesus mehe rin lernala or'ori dardari ma kan horu, kalla namehin kaale. Lolo noho wawan na'akeme Makromod Lalap ka nala molollo ri namehin nala or'ori dardari maika, maa Yesus mehe."

<sup>13</sup> Man panulu onnenihe rauroin Petrus noro Yohanis kar iskolo, maa ramwali ri

ma nadedem mehe, de hir hehel rehi po'on woro'ohe ka ramka'uk wakunu mouropo roro hi. Hi rauroinedi nahenia woro'ohe lidan nohi la'ak nohi Yesus mamani.

<sup>14</sup> Man panulu onnenihe ka rauroin wakunu me'e, ono hir po'on ri man wa'anedi onne namririri hi kalarna roro Petrus noro Yohanis.

<sup>15</sup> Enime'ede hir hopon woro'ohe laedi paharne leke hir paeku wukuwala.

<sup>16</sup> Ida ma na'ukani ida, "Lo'o kala inhawa panaeku kodi walha ri eniyenihe? Ri man minle Jerusalem na'akeme rauroinedi woro'ohe hi'iyedi ha man ri kan dodo'onnala makun eni me'e, de kan wa'an ka'aheni hi kar hi'i ha onne namwali.

<sup>17</sup> Maa wa'an rehi ik kasu hi, yono wakuku ri rodi Yesus Naran me'e leke panaeku eni yono naderre nadaul laa pororo pahahari herie."

<sup>18</sup> Enpenia hi rapolu Petrus noro Yohanis mai raram wali'ur, hopon na'ahenia, "Yono mim wakuku ri modi Yesus Naran me'e."

<sup>19</sup> Maa Petrus noro Yohanis walhale, "Mi mehem hi'i kenekrohu lolo Makromod Lalap herne kalarna, ewi man wa'an narehi: Am lernohi minim honopon, ee lernohi Makromod Lalap Nina honopon?

<sup>20</sup> Mayai eni kam ren wakunu panaeku onne ono ai mehem dodo'on la dedereni."

<sup>21</sup> Onne horu, man ho'ok kail onnenihe kasuwedi woro'ohe wali'ur mene huri.

\* **4:11** Mzm. 118:22

Hi ka rauroin hukum hi  
hi'ihewi, ono heri na'akeme  
ra'uli rasa'a Makromod  
Lalap ono hir hi'i wa'anedi  
ri ma naplu'uk onneni.

<sup>22</sup> Heri onne hehel rehi ono  
ri man wa'anedi onne nina  
anna weli'akka rehi me'e.

*Man lernohi Yesus rapanak Makromod Lalap na'alapa hi akin leke yono ramka'uk loikaru Yesus Lirna*

<sup>23</sup> Huriyedi Petrus noro  
Yohanis ne, hir wali wali'ur  
laa walinhé man lernohi  
Yesus la konohi hi imam  
lalapa roro Yahudi rir leleher  
lalap enihe rira lira kanasu  
eni.

<sup>24</sup> Walinhe derne wanakunu  
onne horu, hir lawuku aki  
hi'i lir napanak Makromod  
Lalap. Hi ra'ahenia, "MAKRO-  
MOD Ma Nodi Molollo Ha  
Wo'ira Na'akeme! O peni ma  
nakuku noho ma naleu a'am,  
la ma nakuku lour noro ihin  
ennen na'akeme,

<sup>25</sup> O mala Roh Kudus  
wakunuwedì lolo Onum  
hophopon, ai upum a'um  
Daud, na'ahenia,

'Hair-hair ma ka nauroin  
Makromod Lalap,  
alhi'ihepe mi ma'ahan,  
la paeku hi'i wowo'o  
ar'arra mamani?

Mi ri ma ka namwali Yahudi,  
alhi'ihepe mim hi'i  
panaeku ma kan min  
haida?

<sup>26</sup> Rai lolo noho wawanne  
roro rira man panulu  
lawuku ra'akene leke  
ra'ara roro Makromod  
Lalap noro Nina Rai  
man Ai mehen kikan  
eni.\*

<sup>27</sup> Oirawi inworo'ohē  
Herodes noro gubernur Pon-  
tius Pilatus lawuku roro ri  
ma ka namwali Yahudi roro  
ri Israel na'akeme manin  
koteni. Hir paekuwuku leke  
kohon yaka O Hophopon  
Wahwahan Man Moumou  
Dewdewe onne, man Om  
kikanedi namwali Rai me'e,  
de Daud nina wanakunu  
onne namwaliyedi me'e.

<sup>28</sup> Hir lawuku leke resne  
Yesus, maa hi ka rauroin  
O mehem nakakaredi rira  
hini'i wenewhe onne nano  
nonolu eni me'e.

<sup>29</sup> Makromod, lere eniyeni  
dernala rira wanakunu rodi  
aka'ukai. Ma'alapedi ai  
akim, mayai ma namwali  
Onum hophopon leke yono  
ai mamkauk loikaru O Lirmu  
wawa'an eni.

<sup>30</sup> Mala Onum ke'eke'el  
an'anha mayai leke am hi'i  
wa'an ma nakni'ir, la hi'i  
ha man ri kan dodo'onnala  
makun modi molollo nano  
Yesus, Num Hophopon  
Wahwahan Man Moumou  
Dewdeweni."

<sup>31</sup> Hir hi'i lir napanak horu,  
nakar hir miminle onne  
narururue, la Roh Kudus  
nodi molollo hi na'ahoru  
honorok akin, de hi ka  
ramka'uk wakunu Makro-  
mod Lalap Lirna Wawan laa  
heri mamani.

*Ri ma akin naili'il Yesus  
honorok namnehe panaeku  
na'alono*

<sup>32</sup> Heri ma akin naili'il  
Yesus na'akeme rira honorok  
namnehe panaeku na'alono.  
Ri mahaku ka na'aheni,  
"E'eni ain'u hahaa aimehi,"  
maa inhoi nina, hirira wew-  
erre.

<sup>33</sup> Roh Kudus nala molollo hophopon ma nodi Yesus Lirnenihe, de rampe'el wake'e konohi ri na'ahenia, "Yesus maki, maa mori wali'uredi me'e." Makromod Lalap namre'e namharu rehi hi na'akeme.

<sup>34</sup> Ler romromo ri aile ma na'olu nina kirna, ee nakar, mene nodi wella laa nale hophopon ma nodi Yesus Lirnenihe,

<sup>35</sup> leke hir ha'arle ri ma nin hahaa kan kuku kan nokor.

<sup>36-37</sup> Ri ida naran Yusup na'olu nina lari ipida nodi wella nala hophopon ma nodi Yesus Lirnenihe. Yusup onne nano luhu Lewi manin noho Siprus. Hophopon enihe waki ai 'Barnabas' haenhi. Naran Barnabas onne napa'ahne, 'ma na'alapa ri akin'.

## 5

### *Ananias noro Safira*

<sup>1</sup> Ler onne, mo'on ida naran Ananias noro hono Safira ra'olu rira lari ipida haenhi.

<sup>2</sup> Ananias nodi lari ip onne wella heruwali laa nalle hophopon ma nodi Yesus Lirnenihe, maa ai noro hono manaku aimehiyedi heruwali me'e.

<sup>3</sup> Ende Petrus na'ahenia Ananias, "Hi'ihepenia Hayakyak Makromon nodi molollo o akim, de mapoho Roh Kudus ma'ahenia o mala noho wella na'akeme, maa mala heruwali mehe?"

<sup>4</sup> Noho ka ma'olu makun, om manarna. O ma'oluwedni noho onne, om manarna wella na'akeme haenhi. Emene hi'ihepenia om paeku

yaka heheni o raramne? O ka mapoho ri mormori, maa mapoho Makromod Lalap!"

<sup>5</sup> Ananias derne wanakunu onneni horu, namlilinnohi nalwali yawa, idewe aran horuwedi. Ri man derne panaeku onne na'akeme ramka'uk wake'e.

<sup>6</sup> Ananias makiyedi ne, ma na'ikakenihe rodi tapi mai komon ihin kemen nanumene rodi laa paharne rawilo'e.

<sup>7</sup> Lo'o jam wokeluwedni nanumene hono Safira mai Petrus nina nakar raram, maa ai kan derne inhawa ma namwali hono makun.

<sup>8</sup> Petrus na'ukani Safira, "Noho moro o houm Ananias ma'o'olu onne, wella na'akeme me'eniyeni, ee ka?" Safira walhe, "Kokkoo, wella me'eni mehe."

<sup>9</sup> Enine Petrus na'ahenia, "Alhi'ihepenia moro o houm lawuku panaeku kene Makromod Nin Roh? Po'onale! Ma nawilo'edi o houm enihe, waliyedi ramririri melle nike makan me'e. Ler eniyeni hi rodi o laa paharne haenhi."

<sup>10</sup> Ideweni ne, ai nalwali yawa Petrus kalarna, idewe aran horuwedi. Ma na'ikakenihe laedi raram ne, hir po'on Safira makiyedi me'e, de rodi laa paharne leke rawilo'e min nohi hono Ananias nina lunne.

<sup>11</sup> Enpenia kerei raramne na'akeme roro idewe ri namehin man derne panaeku onne ramka'uk wake'e.

*Lirnenihe hi'i wa'an ri nammori*

<sup>12</sup> Hophopon ma nodi Yesus Lirnenihe hi'i tanada noro hahaa lewlewen nammori man ri kan dodo'onnale makun. Ri ma akin naili'il Yesus na'akeme radedem lawuku rodi honorok ma namnehe panaeku ma na'alono lolo Salomo Nin Henei Lapa ma aile Makromod Lalap Nina Romleu eni.

<sup>13</sup> Ri namehin ramka'uk roro hi lawuku, maa kota ne'en raram na'akeme horhawa hi ma akin naili'il Yesus enihe.

<sup>14</sup> Ka nalo'ol mo'oni maeke ma akin naili'il Yesus enihe, eren nammomori.

<sup>15</sup> Heri do'onedi ma nodi Yesus Lirnenihe hi'i hahaa man ri ka nadedem do'on, de hi rodi ma nakni'ir noro rira piki luni laa loile kalla arkan leke newek Petrus lolo onne, ono hi akin naili'il nahenia lo'o Petrus kakan mehe nalala hi, wa'anedi me'e.

<sup>16</sup> Ende ri nammori rano leke-leke ma na'urani Yerusalem rodi hirira ma nakni'ir roro ri man hayakyake huhu'ur raramne mai Petrus leke hi'i wa'an, la rohi hayakyaka man min ri raram onne.

*Kele ri ma nodi Yesus Lirnenihe*

<sup>17</sup> Ler onne imam man kulu narehi noro nina ri nano muku Saduki do'on ma nodi Yesus Lirn onnenihe hi'i ha wo'ira na'akeme onneni ne, hi akin apinha wake'e. Enpenia hir paeku wuku leke hi'i sus hi.

<sup>18</sup> Hir kele hophopon ma nodi Yesus Lirn onnenihe rale laedi bui raram,

<sup>19</sup> maa mai a'alam onneni Makromod Lalap Nina hophopon a'am raram ida lan hari bui nina nikenihe, norkaru hilaa paharne mene hopon hi,

<sup>20</sup> "Mala'a laa Romleu Lapa konohi heri lolo onne Lirna na'akeme ma nala or'ori dardari ma kan horu eni."

<sup>21</sup> Ende rakan oreki al'alam, hir laa Romleu Lap raram wakuku heri lolo onne.

Al'alam onne me'ede, imam man kulu narehi noro nina ri enihe polu wuku Yahudi rira man ho'ok kail enihe na'akeme mai leke rahinopun. Hi raikoro wukuwedi, hir hopon ri laa rala ma nodi Yesus Lirnenihe nano bui raram mai leke ho'ok kail hi.

<sup>22</sup> Enimaa ri hohopon onnenihe rakanedi bui eni, kar do'on hi me'e, de wali laa konohi man ho'ok kail enihe, ra'ahenia,

<sup>23</sup> "Am rakanedi bui nina nikenihe, na'akeme konkonse makun, la ma nadiyak enihe ramriri aile nike makan. Ende am hari nike po'on bui raram, maa ri mahaku kaale."

<sup>24</sup> Uluwakun ma nadiyaka Romleu Lap noro imam lalap enihe derne rira wanakunu onneni, hir mehe kakaiyedi ono ka rauroin lo'o inhawé namwali hi.

<sup>25</sup> Ka nalo'ol, mo'oni ida nodi lir mai konohi na'ahenia, "Eih, pap mie, ri man mi mala laa bui raram onnenihe aile Romleu Lap raram, mahar wakuku ri namansa."

<sup>26</sup> Enime'ede uluwakun ma nadiyaka onne noro nin

man howok wali enihe laa rala wali'ur ma nodi Yesus Lirnenihe, maa heri raram nodi derne rira wanakuku, de hir ka rodi apipinha rala hi, kalo'o heri onnenihe ra'ahan rodi waku wasla hi.

<sup>27</sup> Hi rorkaru Petrus noro Yohanis laa rakpali man ho'ok kail enihe. Imam man kulu narehi ne'el hi na'ahenia,

<sup>28</sup> "Eih! Am kasuwedi mi me'e nahenia yono wakuku ri modi Yesus onne Naran me'e menee! Maa ken mehem po'on inhawe mim hihi'i! Mim loikaruwedi wanakuku onne lolo Yerusalem ne'en raram na'akeme me'e, la mim tumdesne mayai nahenia am hi'i ri onne maki!" <sup>29</sup> Petrus noro Yesus Nin hophopon namehin enihe walhale, "Mayai lernohi Makromod Lalap Nina panaeku mehe, Ai kan huri mayai lernohi ri mormori nin panaeku.

<sup>30</sup> Mi mesne Yesus, rohedi au kekiyowok eni, maa Makromod Lalap man ik upud a'ad ra'uli rasa'eni na'ori wali'uredi,

<sup>31</sup> la kikanedi Ai, naikoro lolo herne malanna me'e leke rodi molollo wewerre. Naledi molollo Ai namwali Rai Ma Nala or'ori dardari maika. Ai nala leken paharin ika, noho Israel eni, herredi iknik morimori ma ka namloleni, leke Ai na'ohu nahaledi iknik dohohaleni.

<sup>32</sup> Ai moro Roh Kudus mamwali man kuku kalla laa ri namehin ha onne na'akeme. Roh Kudus eni, Makromod Lalap nalle ri na'akeme man derne rakani Ai."

<sup>33</sup> Hir derne Petrus nina wanakunu onneni horu, hi raram ha'a wake'e, de hi na'akeme rira panaeku resne hophopon ma nodi Yesus Lirnenihe.

<sup>34</sup> Enimaa ri Parisi ida ma narane Gamaliel namriri lolo hi leken kalarna la hopon rodi ma nodi Yesus Lirnenihe laedi paharne nanu. Ai onne meser Horok Lap man ri na'akeme horhawe rehi.

<sup>35</sup> Hir laedi paharne, ai ne'el walinhe na'ahenia, "Konohiyala i walin Israel na'ahohoruwedi! Paekuwala wawa'an nanumene hi'i kenekrohu kala ri eniyenihe.

<sup>36</sup> I walin horhorok annida woro'o man laedi me'e ne, Taudus onne na'aheni ai namwali ri lewlewen ma nodi molollo, penia lo'o ri rahu wo'akka lernohi ai, maa ri nesnedi ai, de nina man lernohi enihe na'akeme rapye'eredi, la rira panaeku onne namderredi.

<sup>37</sup> Lerida wali'ur, lere rin lalaa mamai horok ri narane leke aki lawanne, ri Galilea ida aile naran Yudas. Ai namwali uluwakun ri namansa haenhi. An kohon arra noro ma nodi molollo iknik nohe, maa ri nesnedi ai haenhi, la nina man lernohi enihe rapye'er mouwedi haenhi.

<sup>38</sup> Ende, i wal'uhe, ainu'u nounaku eni: Yono hi'i haida-haida ri eniyenihe. Wa'an rehi na'amoliyedi me'e, ono lo'o hirira panaeku noro hini'i wenewhe kan mai nano Makromod Lalap, maa namwali rir panaeku aimehi, rira wanakuku mehen moluwedi.

<sup>39</sup> Maa lo'o hir lernala panaeku onne nano Makromod Lalap, i wal'uhe ma'alehe molollo kawala hi. Yon mim hi'i ik koro Makromod Lalap ka'ara!"

Enime'ede man ho'ok kail onnenihe kokala nin nounaku onne.

<sup>40</sup> Ende hi rapolu hophopon ma nodi Jesus Lirnenihe wali mai nanumene riuk rerhe. Hir kasuwedi ra'henia, "Yono wakuku ri wekel Yesus naran me'e!" Onne horu, huriyedi hi.

<sup>41</sup> Ma nodi Yesus Lirna onnenihe ramhara honopun onne rodi aki ma nahuwa'an wake'e, ono Makromod Lalap naledi hi leken lernala apinpinha wo'operperi me'e ono hir lernohi Yesus.

<sup>42</sup> Akilere hi kar ren wakuku ri lolo Makromod Lalap Nina Romleu Lap noro ri nina nakar, la kar ren loikaru Makromod Lalap Lirna Wawa'an eni nahenia Yesus onne penia namwali Ai man Makromod Lalap kikanedi namwali Rai laa ewi-ewi.

## 6

*Nili ri wo'ikku leke paku ha'ar hahaa rale ri ma na'alehe haida-haida*

<sup>1</sup> Ri man lernohi Yesus enihe eren nammomori. Nano hi, ri Yahudi ma nodi wanakunu Yunani enihe akin kar wa'an roro ri Yahudi ma nodi wanakunu Ibrani. Hir hehel warna enu ra'henia, "Akilere hirira maeke walwalum enihe lernala hana'ar hanana'an, maa ainim walwalum enihe, kar lernala!"

<sup>2</sup> Ri idaweli woro'o ma nodi Yesus Lirnenihe derne panaeku onne, hir polu wuku ri man lernohi Yesus na'akeme hopun. Hi ra'ahenia, "Lo'o kan wa'an mayai ma'akene hanana'an, kalo'o ainim leken kaale loikaru Makromod Lalap Lirna Wawan eni.

<sup>3</sup> Ende lo'o man wa'an narehi, ai walinhe nili ri wo'ikku nano mi, ri man Roh Kudus nodi molollo, la man mori wawa'an, la ma nin honorok panaeku wa'an, leke ai mala hi tolle honowok onne,

<sup>4</sup> leke huri yai hi'i lir napakan noro loikaru Makromod Lalap Lirna Wawan eni mamani."

<sup>5</sup> Ri na'akeme kokaledi hirira panaeku onne. Enpenia hir nili Stepanus, ono Roh Kudus nodi molollo ai la akin naili'il Jesus kokkoo. Enla hir nili wali'ur Pilipus, Prokhorus, Nikanor, Timon, Parmenas, noro Nikolas ma nano Antiokia. Nikolas eni ri ma ka namwali Yahudi, maa an lernohiyedi agame Yahudi me'e.

<sup>6</sup> Ri man hopun enihe roro ri wo'ikku ninili enihe laa rakpali hophopon ma nodi Yesus Lirnenihe. Hir kemenala liman hi, rapakan Makromod Lalap nala molollo hi leke ilitolle honowok eni wawa'an.

<sup>7</sup> Ende Makromod Lalap Lirna Wawan eni eren naderre nadaul, penia ri man lernohi Yesus eren nammomori lolo Yerusalem, la imam nammori akin naili'il Jesus haenhi.

*Kele Stepanus tumdesne*

<sup>8</sup> Stepanus onne, Makromod Lalap nodi nale kokkoo, la nala molollo ai penia hi'i ha nammori ri kan dodo'onnale makun lolo heri kalarna,

<sup>9</sup> maa ri namehin aile man kawale. Man kawala enihe radedem laa Yahudi rira kerei ida wekwekel, 'Hophopon Wahwahan Ma Nahinuriyedi Me'e Rira Kerei.\* Kerei onne raramne Yahudi ma nano leke Kirene noro Aleksandaria. Hi roro ri Yahudi ma nano Kilikia noro Asia rawalha lira roro Stepanus,

<sup>10</sup> maa hi ka rauroin walha Stepanus, ono Roh Kudus nala woroin ai penia nauroin wakunu wawa'an.

<sup>11</sup> Ende hi rodi kalla suwsuwar rala kupan ri ida woro'o, leke hir tumdesne ai na'ahenia, "Mayai derne ri onne na'ihoru na'idaru Musa noro Makromod Lalap!"

<sup>12</sup> Hi rawa'u ri namansa roro leleher lalap roro meser Horok Lap enihe, penia hir laa kele Stepanus rodi laa nakpali Yahudi rira man ho'ok kail enihe.

<sup>13-14</sup> Hi rodi rira man kuku maka rakpali hi haenhi leke hir loikaru ha ma ka namlolo ainina hini'i wenewhe. Hi ra'ahenia, "Ri eniyeni kan ren na'ihoru na'idaru Makromod Lalap Nina Romleu man moumou dewdeweni noro idewe agame nina keneri hono'ok haenhi! Am derne an wakunkunu na'ahenia, 'Na'amoli Yesus, ri Nazaret onne, naiye'eredi Makromod

Lalap Nin Romleue, la An herre iknik honoli wenewhe na'akeme man ik upud a'ad Musa naledi maika nonolu me'e.'"

<sup>15</sup> Hir wakunu horu, man min honopun eni po'on kakane Stepanus oin makan siksik lerlere naisedi hophopon a'am raram.

## 7

*Stepanus walha man ho'ok kail enihe*

<sup>1</sup> Imam man kulu narehi na'ukani Stepanus na'ahenia, "Lo'o hirira kalakkal onnenihe namlololo, ee ka?"

<sup>2</sup> Stepanus walhe, "Konohiyala ya am'u la i walin na'ahohoruwedi! Makaniyala tarana. Ler ik upud a'ad Abraham min Mesopotamia, ka nala'a Haran makun, Makromod Lalap ma Nin ke'eke'el an'anha narehi nalewen eni nalhari kemen ai, hopon na'ahenia,

<sup>3</sup> 'Hoikaruwedi onum lekloi noro lodon wallumhe mala'a laa leke man Ya'u kukul ki o.\*

<sup>4</sup> Enime'ede an hoikaruwedi nina noho miminle, Kasdim onne, rei kau laa leke Haran. Abraham aman maki lolo Haran nanumene Makromod Lalap hopon ai rei kau wali'ur mai noho ika holiholi eniyeni. \*

<sup>5</sup> Ler onne Makromod Lalap ka nala noho me kirnida, nala Abraham leke manarna lolo onne, maa An

\* **6:9** 'Hophopon wahwahan ma nahinuri' nina panaeku 'ri Yahudi ma nahinuriyedi nano kenern danalha de ka ramwali hophopon me'e.' \* **7:3** NN. 12:1

\* **7:4** NN. 11:31, 12:4

nou na'ahenia, 'Noho eniyeni Ya ala ki o moro o upun anum manarna.' \* Ler Ai nala nou onne, Abraham anan kaale makun.

<sup>6</sup> Enine Makromod Lalap konohi ai wali'ur na'ahenia, 'Ku man mai o upun anum rala'a laa noho namehin ramwali do'on awan enne. Ornoho orrai lolo onne hi'i hi ramwali hophopon wahwahan, la kerne dalha hi hehen nanumene anna rahu wo'akka.

<sup>7</sup> Hir hi'i heheni nanumene Ya'u hukum noho ma nodi kenerne danalha onne. Hunukum onne horu, hi ramhara lolo onne laa noho Kana'an mene ra'uli rasa'a Ya'u.\*

<sup>8</sup> An konohiyedi onne horu, Ai nala nou ma namkene ida Abraham, la hopon ai noro upun anan na'akeme laa sunat, leke na'akerhe nou onne. Ende moriyedi Isak alam wo'aa nina ame mehen sunate. Mai wali'ur Isak na'ori Yakup, an mehe sunat anan haenhi. Enla Yakup na'ori tatana idaweli woro'o mehen sunat hi haenhi. Ri eniyenihe penia ma namwali Yahudi upun a'an.

<sup>9</sup> Mai lere li'ur, ik upud a'ad Yakup anan idaweli ida ra'olu walla Yusup laa Mesir, ono hi akin apinha, maa Makromod Lalap norle'ule'u norwaliwali ai,\*

<sup>10</sup> la huriyedie nano nina kenerne danalha lolo Mesir eni. Enla Ai nala morimori man wa'an noro honorok aki man wa'an ai penia lere ai nakpali Firaun ma namwali

rai Mesir, ai nauwa'an rai eni akin. Enpenia Firaun kikan ai namwali ma nodi molollo lolo Mesir ne'en raramne, la hi'i ai namwali uluwakun nin romleu onno.

<sup>11</sup> Eni nanumene Mesir noro Kana'an lernala rouvara lapa. Rouvara onne hi'i ri nammori sus wake'e, la aman noro walinhe kar ler-nala hanana'an lolo Kana'an me'e.

<sup>12</sup> Yakup derne maha ra'olu gandum ai Mesir, de hopon ik upud a'ad laa enne weli hanana'an.

<sup>13</sup> Rakan hir laa Mesir rewro'o nine, Yusup konohi walinhe na'ahenia, 'Maya'u eni Yusup.' Eni nanumene rai Mesir nauroin nahe-nia hi eniyenihe Yusup mo'oniwalinhe.

<sup>14</sup> Enime'ede Yusupaku lira laa aman napanak ai noro upun anan na'akeme rei kau mai Mesir. Aki hi na'akeme ri weli'ikku wolima.

<sup>15</sup> Enine Yakup noro ananhe re'e nohi laa Mesir. Min enne hehen nanumene hir maki,

<sup>16</sup> maa lere li'ur hi rurna hokon rodi wali'ur laa Sikem nanumene ra'akene lolo ku'il raram man Abraham nodi kupan pere weliyedi nano Hemor upun ananhe me'e."

<sup>17</sup> Stepanus na'aheni wali'ur, "Rakan lere li'ur, lere Makromod Lalap Nina nou noro Abraham na'uraniyedi me'e, ai upun ananhe lolo Mesir eren na'uwawali.

<sup>18</sup> Kame'ede kikan rai namehin nodi molollo Mesir ne'en raram, la ai onne ka

\* 7:5 NN. 17:8, 48:4    \* 7:7 NN. 15:13-14; Kel. 3:12    \* 7:9 NN. 37:11, 28, 39:2, 21

nauroin Yusup onne inhoi.  
\*

<sup>19</sup> Ai nodi konoko wunudi noro rurilai nala ik upud a'ad, hopon hi sopoledi anan memerana na'akeme, yono kahi lauhe.

<sup>20</sup> Ler onne mori Musa. Ai onne tatana man oin makan ma'aruru. Wollo wokelu raram mehe inna aman suwar, de wayahue rira nakar.

<sup>21</sup> Maa kan wa'an suware lolo nakar me'e, de rodi laa loiyedi paharne nanumene Firaun anan maeke nala, wayahue, nodi hi'i ananne.

<sup>22</sup> Noho Mesir nina wanakuku wanayo'e na'akeme rodi wakuku ai penia nina honoli wenewhe noro nina wanakunu wa'an.

<sup>23</sup> Rakan nina anna weli'akka, ai mehen hi'i kenekrohu lan ka'arala walin ri Israel enihe.

<sup>24</sup> An lae ne, an do'on ri Mesir ida nukur walin ida, de ai nodiyala ri man lernala nuknukur onne, la nesnedi ri Mesir eni.

<sup>25</sup> Musa pene'ek walinhe rauroinedi nahenia Makromod Lalap nair ai leke huriyedi hi nano kenern danalhe rahu eni, maa hi ka rauroin nina panaeku onneni.

<sup>26</sup> Rakan oreki, an do'on wali'ur ri Israel woro'o mahar wahih'i, de nahehe paku woro'ohe leke rahuwa'an wali'ur, penia ai na'ukani hi na'ahenia, 'Mi eniyenihe ma'ulosno ma'umo'onwali menee?! Alhi'ihepe mim wahi'ie?'

<sup>27</sup> Maa ri man hudi walin onne nokuledi Musa laa herne, na'ahenia, 'Inhoi man kikan o modi molollo mamwali man ho'ok kail mayai?

<sup>28</sup> Lo'o onuma panaeku mesne ya'u naisa oirawi mesne ri Mesir onne?

<sup>29</sup> An derne wanakunu onneni horu, namka'uk me'e, de lari laedi Midian. Lere an minle enne an ho, la na'ori tatana mo'oni woro'o. \*

<sup>30</sup> An minle Midian anna weli'akka.

Lerida ai mahan huri pipduma lolo noho mamu na'urani wo'or Sinai, an holikuku hophopon a'am raram ida aile ruri roke raram man ai lerlere mamani.

<sup>31</sup> An po'on ai lerlere onneni an hehel rehi, penia an hoi na'urani leke nau-roin kokkoo onne inhawe. Na'uraniyedi ne, an derne Makromod Lalap Lirna na'ahenia,

<sup>32</sup> 'Ya amwali o upun a'um Abraham, Isak noro Yakup rira Makromod Lalap man hi ra'uli rasa'eni.' Ideweni Musa namka'uk wake'e, la narururu me'e, de an po'onedi herne ono ka naruri po'on ai lerlere onne me'e.

<sup>33</sup> Enine Makromod Lalap hopon na'ahenia, 'Mohuwedi onuma pakpak ei eni, ono onno mamririri onne, moumou dewdewe.

<sup>34</sup> Ya'u mehe po'on ri Mesir eni hi'i Ainu'u ri enihe lernala kenerne danalha mamani. Ya'u dernedi rira sus mak oir me'e, de Ya'u kopuredi leke huriyedi hi

\* 7:18 Kel. 1:7-8 \* 7:29 Kel. 2:14, 18:3-4

nano rira kenerne danalheni. Ende lere eni me'ede ma'akene mala'a laa Mesir here.' ”\*

<sup>35</sup> Stepanus konohi wali'ur man ho'ok kail onnenihe, na'ahenia, "Ler Musa ka namhara Mesir makun, ri Israel kar kokala ai. Lere onne hi ra'ahenia, 'Inhoi kikan o mamwali man panulu noro man ho'ok kail mayai?' Maa lere li'ur Makromod Lalap nodi Nin hophopon a'am raram, mehen kikan Musa eni namwali rira man panulu noro man huri we'er hi. Onne namwali lere an do'on aiye man lerlere ruri roke raram onneni.

<sup>36</sup> Musa eni penia ma nodi ri Israel enihe ramhara rano Mesir. An hi'i ha ri kan dodo'onnale makun lolo Mesir, lolo Kahi Memere, la lolo noho mamun ma napro'uk hehen nanumene anna wel'i akka raramne.

<sup>37</sup> Musa me'ene konohi ri Israel na'ahenia, 'Lere man mai Makromod Lalap kikan mi upun anum ida namwali Nabi naise ya'u eni.'

<sup>38</sup> Musa eni nodi heri Israel lolo noho mamun ma napro'uk onne, la an laa wo'or Sinai derne la kokala Makromod Lalap Lirna nano hophopon a'am raram leke wali mai loikaru ik upud a'ad enihe. Ler onne an kokala Makromod Lalap Lirna Wawan ma nala or'ori dardari ma kan horu, leke rakan lere eni maika lernala haenhi.

<sup>39</sup> Enimaa ik upud a'ad enihe ramhene derne rakan

Musa, de lere an minle wo'or onne hi ra'okuledi ai, la lolo akinhe ra'ahenia, 'Lo'o wa'an rehi ika wali wali'ur laa Mesir me'e!'

<sup>40</sup> Enla hir hopon Harun ra'aheni,\* 'Hi'iyala aukerhida woro'o mayai leke rodi molollo mayai la norle'ule'u norwaliwali yai, ono ai ka mauroin inhawa ma namwali noro Musa ma nodi ai mamharedi nano Mesir onne.'

<sup>41</sup> Ende hir hi'i aukerhida naisa sapiyana, nanumene resne ha mormori rodi hoikani aukerhe onne. Horune, hir hi'i ya'an yomun lapa, la ra'uli rasa'a rira hini'i onne.\*

<sup>42</sup> Enpenia Makromod Lalap waliyedi kili'urn, huri we'eredi hi hoikani lere, wollo, noro kaliyoro manina a'am eni. Onne penia namnenehe Makromod Lalap Lirna ma aile horok nabi enihe, na'ahenia,

'Eih! Israel mie! Ler mim minminle noho mamu anna wel'i akka raram, mi ka mesne ha mormori modi hoikani Ya'u, maa modi hoikani aukerhe noro noho makromon mamani.

<sup>43</sup> Mim le'u aukerhe Molok noro aukerhe Refan ma naisa kaliyore noro rira heuheu mamani. Enpenia Ya'u huri mi leke manin Babilon enihe kerne dalha mi la rodi mi ko'u laa kota Babel wali enne.' ”\*

<sup>44</sup> Stepanus na'aheni wali'ur, "Lere ik upud a'ad

\* 7:34 Kel. 3:1-10 \* 7:40 Harun onne Musa mo'oniwalin anulu. \* 7:41 Kel. 32:1-6 \* 7:43 Am. 5:25-27

minle noho mamun ma napro'uk makun, Makromod Lalap hopon Musa nayapi Nin Tenda ma nodi kunukunohi nahenia Makromod Lalap aile hi leken kalarna.<sup>†</sup> Ai na'ariri Tenda onne lernohi kanakarne noro lapanne man Makromod Lalap konohiyedi ai me'e.

<sup>45</sup> Ler li'ur rira ananhe kokala Tenda onne haenhi, rodie roro Yosua laa ra'ara lere Makromod Lalap rohiyedi rira arwali man holiholi iknika lekloi eniyeni. Tenda onne min lolo onne hehen nanumene rai Daud nina lere.

<sup>46</sup> Daud onne nahuwa'an Makromod Lalap akin, la napanak leke nayapi rom ida namwali Makromod Lalap man Yakup na'uli nasa'eni Nina miminlole,

<sup>47</sup> maa ka namwali. Anan Salomo nayapi Nina Romleu onne.

<sup>48</sup> I wal'uhe, yon makoto nahenia Makromod Lalap Man Kulu Narehi Man Lap Narehi eni holi lolo rom ri mormori rayayapi, ono nabi lirna aile ma na'ahenia;

<sup>49</sup> 'A'am onne namwali Ainu'u naikoro onno, la noho wawan namwali Ye ei'u onno, de ma'ariri inhawa rom Maya'u? I holi ewi leke warnala?

<sup>50</sup> Ya'u penia man hi'i hahaa na'akeme.\*

<sup>51</sup> I wal'u na'ahoru! Mi akim kerhe rehi la mi

mamhene lernohi Roh Kudus wake'e naise mi upun a'um nonolu eni! Mi kilinna rohedi, de kam derne makani Ai Lirna me'e!

<sup>52</sup> Mi upun a'um na'akeme hi'i apipinha nabi na'akeme, la resne hi haenhi, ono nabi onnenihe konohi hi nahenia oreki inworo'o Makromod Lalap nala Hophopon Ma Namloleni mai. Hophopon onneni, Yesus, maiyedi me'e, maa mi ma'olu Ai male Nin arwali enihe, de minim hini'i eni, peni nesne Ai!

<sup>53</sup> Hophopon a'am raram mehen mai loikaruwed Makromod Lalap Nin keneri hono'ok ki mi me'e, maa mi kam lernohie."

*Yahudi rir man panulu  
enihe wadesne Stepanus*

<sup>54</sup> Man ho'ok kail onnenihe derne onne horu, hir raram ha'a wake'e weuweur nihin a'arne.

<sup>55</sup> Maa Roh Kudus nodi molollo Stepanus me'e, de an po'on laa a'am. An do'on Makromod Lalap Nina siksika lerlere, la an do'on Yesus namririri aile herne malanna.

<sup>56</sup> Ai na'ahenia, "Po'onale! Ya'u do'on a'am nahinariyedi me'e, la Ai ma namwali Ri Mormori Anan onne namririri aile Makromod Lalap herne malanna."

<sup>57</sup> Ai na'aheni onne horu, heri pasunala kilinna, wakaukau, la ra'ouwale,

<sup>58</sup> kele, soru laedi kote paharne mene wadesne. Man tumdesne Stepanus

\* <sup>7:44</sup> 'Nin Tenda', ee 'Makromod Lalap Nin Tenda' rodi wanakunu Malay, 'kemah Allah'. Nakar eniyeni hir hi'i rodi ha mormori ulikn, tapi, lauriri ma namrana leke hir rohu, le'u rodi lalaa mamai (Kel. 26).

\* <sup>7:50</sup> Yes. 66:1-2

enihe, ruri rira rain nanaru,  
rale ma na'ikakida naran  
Saulus nadiyake.

<sup>59</sup> Mahar wawasle,  
Stepanus wakau na'ahenia,  
"Makromod Yesus, kokaledi  
ainu'u roh."

<sup>60</sup> Enine Stepanus laa yawa  
kadi ein korno la wakau,  
"Makromod, dohohaleni  
yono mala hi ra'uwara." An  
wakau heheni, idewe aran  
horuwedi.

## 8

<sup>1</sup> Saulus me'ene ne'enohi hi  
resne Stepanus.

*Rin nodi apipinhe nale  
Yerusalem nin kerei raramne  
na'akeme*

Ler onne me'ede hir hi'i sus  
la hi'i apipinha Yerusalem  
nin kerei raramne na'akeme  
penia lariye'er rarari laa  
leke-leke ma aile Yudea  
noro Samaria na'akeme.  
Hophopon ma nodi Yesus  
Lirnenihe mehe ramkene  
Yerusalem.

<sup>2</sup> Ri ma namka'uk Makro-  
mod Lalap ida woro'o rod  
Stepanus kemen laa rawilo'e.  
Hi rahere rehi ono raramhe  
penu,

<sup>3</sup> maa Saulus eni nahehe  
naiye'er rarari kerei raramne  
mamani. An lolo nakar laa  
nakar kele ma akin naili'il  
Yesus enihe soru laa bui.

*Makromod Lalap Lirna  
Wawa'an loikaru laa Samaria*

<sup>4</sup> Man lari enihe ramharedi  
Yerusalem me'e, la hir  
loikaru Makromod Lalap  
Lirna Wawa'an onne lolo  
ewi-ewi.

<sup>5</sup> Pilipus namhara nala'a  
laa kota Samaria la konohi  
hi panaeku ma na'ono Kris-  
tus man Makromod Lalap

kikanedi namwali Rai laa  
ewi-ewi eni.

<sup>6</sup> Heri onnenihe rakakani  
an loikaru Yesus Lirna  
Wawa'an onneni, la hir loi  
honorok nin loloi kakaru eni  
ono do'on an hi'i tanada ri  
kan dodo'onnala makun.

<sup>7</sup> Pilipus rohi hayakyak  
man hu'uhu'ur ri raramne,  
(hayakyak onne wakaukau  
naruri mene ramhara ri  
raramne), la an hi'i wa'anedi  
ri nammori ma naplu'uk  
noro man liman ein yaka  
haenhi.

<sup>8</sup> Ende ri manina kota  
Samaria onnenihe akin  
nahuwa'an wake'e.

<sup>9</sup> Lolo kote onne mo'oni  
ida aile narane Simon ma  
nadedem hi'i waliwali maka  
man lewlewen. Nalo'oledi  
manin Samaria onnenihe  
hehel rehi do'on nin waliwali  
maka lewlewen onne. Ai  
mehe na'uli kemen na'aheni  
ai penia man lewlewen lolo  
kota onne.

<sup>10</sup> Enpenia kota onne  
ne'en raram na'akeme ler-  
nohi ainina hini'i onne  
mamani ra'ahenia ai onne  
lo'o nodi Makromod Lalap  
Nin molollo. Hir rapolu ai,  
"Papa Molollo Lape."

<sup>11</sup> An min lolo onne  
nalo'oledi me'e de, hi akin ka  
nahinuri nin hini'i onne.

<sup>12</sup> Enimaa Pilipus maie ne,  
hir derne ai. Pilipus loikaru  
Lira Wawa'an man konohi  
hi'ihewi Makromod Lalap  
nodi molollo ri mormori,  
la an wakuku hi na'ahenia  
Yesus penia namwali Rai  
man huri we'er ri nano do-  
hohala nin molollo. Enpenia  
mo'oni maeke nammori akin  
naili'il Yesus mene laa oir  
raram leke Pilipus ulutade.

<sup>13</sup> Simon me'ene akin naili'il Yesus, de laa oir raram leke ulutade. Onne horu, an lernohi Pilipus mamani, la an hehel rehi po'on Pilipus nin hini'i ri kan dodo'onnala makun onne.

<sup>14</sup> Hophopon ma nodi Yesus Lirnenihe man minle Yerusalem derne nahenia manin Samaria enihe kokaledi Makromod Lalap Lirna Wawa'an me'e, de hir hopon Petrus noro Yohanis laa enne.

<sup>15-16</sup> Ri Samaria enihe rodi Yesus Naran laedi oir raram leke ulutade me'e, maa kar lernala Roh Kudus makun. Petrus noro Yohanis rakanedi ne, hir hi'i lir napanak leke Makromod Lalap nala Roh Kudus ri Samaria enihe.

<sup>17</sup> Enla Petrus noro Yohanis kemenala liman ri Samaria enihe uluwakun, idewe hir kokaledi Roh Kudus.

<sup>18</sup> Simon po'on hophopon ma nodi Yesus Lirna onnenihe kemenala liman hi uluwakun leke hir kokala Roh Kudus, ai nodi kupan laa Petrus noro Yohanis na'ahenia,

<sup>19</sup> "Pap mie, malala molollo maya'u here ke'e, leke i kemenala inhoi uluwakun, ri onne kokala Roh Kudus haenhi."

<sup>20</sup> Maa Petrus walhe, "Modi onum kupane laa kawali pire ai porom raram! Yom makoto nahenia Makromod Lalap Nina nanala mayai eni rodi kupan welie!"

<sup>21</sup> O akim ka namlolo Makromod Lalap kalarna, de onum molollo kaale howok anima honowok enie.

<sup>22</sup> Ende sopoledi panaeku yaka onne, la mapanak Makromod Lalap leke nala ampun onum panaeku man ailanna onneni,

<sup>23</sup> ono ya auroiroin nahenia o akim apinha ri, la dohohala nodi molollo o raramne."

<sup>24</sup> Enime'ede Simon na'aheni, "Pap mie! Mararamyaka'u ke'e de, mapanak Makromod Lalap leke yon ha man om wakunkunu onne namwali maya'u!"

<sup>25</sup> Hir wakuku ri, la loikaruwedji Makromod Lalap Lirna Wawan lolo onne horu, Petrus noro Yohanis wali laa Yerusalem. Rala'e ne, hir kuli kuli Samaria nina leke-leke loikaru Makromod Lalap Lirna Wawa'an eni.

### *Pilipus pakromo or'onna lalap ida nano Etiopia*

<sup>26</sup> Lerida Makromod Lalap Nina hophopon a'am raram ida mai Pilipus na'ahenia, "Mala'a laa karanna laa kalla ma nano Yerusalem laa Gasa, kalla man ri ka nadedem lole." <sup>27-28</sup> Enime'ede Pilipus nala'a me'e. Ler onne manin Etiopia ida nano Yerusalem wali laa nina lekloi lolo kalla onne haenhi.

Ai onne or'onna lalap ida\* ma nadiyaka Kandake nina kanaru na'akeme. Kandake onne namwali Etiopia nin rai maeke. Or'onna lalap onne na'uli nasa'edi Makromod Lalap lolo Yerusalem me'e, de wali laa nin leke me'e. Ai naikokoro nina kerete wawan, mahan lelese nabi Yesaya nin horok.

\* **8:27-28** Or'onna lalapa onne ri man sida-sida haenhi.

29 Roh Kudus hopon Pilipus, "Laa ma'uraniyala kerete onneni."

30 Pilipus laa na'uraniyedi kerete onneni ne, an derne ri onne mahan lelese Yesaya nin horok. Ai na'ukaniyale na'ahenia, "Hi'ihewi? Makrom'u lese horok onneni mauroin nin panaeku, ee ka?"

31 An walhale, "Lo'o ri ka napa'ahe, hi'i hehewi ya auroin nin panaeku?" Enime'ede ai naka'uk Pilipus, "Mai ha'a wewerre ainu'u kerete."

32 Horok Lape Lirna an lelese onne na'aheni heheni, 'Ai onne, naisa pipduma waku ida man rodi laa resne,  
la naisa pipduma man makromon tori wulunne, maa ka na'umee,  
ai me'e ne ka na'oho, kan wakunu haida.

33 Ri na'ihoru na'idaru Ai onne,  
la nala hunukum ma ka namnenehe na'alono hono'ok kanail ma namlolo.

Ai kan minle noho wawan nalo'ol,  
ono ri nesne ai penia upun anan kaale me'e,  
de ri kan horok me'e." \*

34 Or'onno lalapa onne na'aheni Pilipus, "Pipduma onne wekel inhoi? Nabi Yesaya mehen wekel kemen, ee ri namehin?"

35 Enime'ede Pilipus napa'aha Horok Lapeni Lirna La'an leke konohi

ai Yesus Nin wanakuku wawa'an eni.

<sup>36</sup> Hir raikoro ai kerete makun, rakan onnida oir aile, de ri Etiopia na'ahenia, "Po'onale, oire me'eni me'e! Inhawa kawala ika makun penia kam ulutada ya'ue?" [

<sup>37</sup> Pilipus na'ahenia, "Lo'o makrom'u akin naili'il Jesus kokkoo, ik kala'a oire leke ulutade pape."

An walhale, "Ya akin naili'il Jesus Kristus eni namwali Makromod Lalap Ananne." ]†

<sup>38</sup> Ende an hopon ma nodi kerete paliyedi lolo onne, la woro'ohe kopur laa oir raram nanumene Pilipus ulutade.

<sup>39</sup> Hi ramharedi oir raram mai paharne, namlilinnohi Makromod Nin Roh naledi Pilipus laa onno namehin, de Etiopia onne kan do'on ai me'e, maa ai akin nahuwa'an wake'edi me'e, la nala'a manani laa nina leke.

<sup>40</sup> Pilipus onne, namlilinnohi aiyedi leke ida naran Asdod. Ai namhara leke onne laa mamani wali ra'i, loikaru Makromod Lalap Lirna Wawa'an eni lolo leke-leke na'akeme hehen nanumene rakan Kaisarea.

## 9

*Saulus akin naili'il Jesus  
(HN. 22:6-16, 26:12-18)*

<sup>1</sup> Ler Pilipus mahan laliwewer leke-leke onne, Saulus nanoinoin ri man lernohi Jesus enihe leke aka'uku la nesne hi. An laa imam man kulu narehi,

<sup>2</sup> napanak horok molollo ida leke nodi laa uluwakun

\* 8:33 Yes. 53:7-8 † 8:37 Horok man aile lolo tanada [ ] raram, kaale lolo horok Yunani dedesne heruwali.

kerei Yahudi enihe lolo kota Damsyik. Ainin panaeuku nanoin ri manin Damsyik man lernohi Yesus Nina Kalla, mo'oni maeke, kele, la nodi laa Yerusalem.

<sup>3</sup> An laa na'uranrani kota Damsyik onneni, namlin-nohi ropropida mai nano lanik siksika wake'e, idewe pupinedi Saulus. <sup>4</sup> Idewe ai nalwali yawa, la derne lira ida ma na'henia, "Saulus! Saulus! Hi'ihepenia om hi'i sus Ya'u?"

<sup>5</sup> Saulus na'ukaniyale, "Makrom'u, inhoi O?"

An walhale, "Ya'u eni Yesus man om hihi'i suse.

<sup>6</sup> Mamririyedi! Mala'a laa kote raram. Rakan lolo onne rin konohi o hi'i inhawa."

<sup>7</sup> Nina kalla wali enihe ramka'ukedi, ka rauroin wakunu me'e, ono hir derne lir onneni, maa kar do'on ri man wakunu onne.

<sup>8</sup> Enla, Saulus eni namriri, hari makan, maa makan tokedi me'e, de hi ri'ik roro laa Damsyik.

<sup>9</sup> Min enne, lere wokeluwedai ai kan do'on haida-haida, la ka na'ak, ka nomun haenhi.

<sup>10</sup> Ler onne ri man lernohi Yesus ida naran Ananias aile Damsyik. Ai mehen do'on haida nano Makromod Yesus naisa namarmi. Lolo ha man ai mehen do'on onne, Yesus napolu, "Ananias!"

An walhe, "Makromod, eni ya'u."

<sup>11</sup> Makromod hopon na'henia, "Mala'a here! Lolo kalla ma naran 'Kalla Namdudu' laa Yudas nin nakar. Lolo nakar onne manoin mo'oni ida naran Saulus, manin kota Tarsus.

Ai onne mahan hi'i lir napapanak,

<sup>12</sup> la lolo haida man ai mehen do'onedi me'e, an dodo'on ri ida ma naran Ananias mai nala liman loile ai uluwakun wawan leke makan mou wali'ur."

<sup>13</sup> Ananias walhe, "Wa'an Makrom'u, maa ya'u dernedi ri nammori kukunohi nahenia ri eniyeni nodi rurilai hi'i sus Num ri ma aile Yerusalem enihe.

<sup>14</sup> Enla lere eni me'ede an mai eni nodi molollo nano imam man kulu narehi leke kele ri ma akin naili'il ki O na'akeme."

<sup>15</sup> Maa Makromod na'henia, "Ananias! Ya'u niliyedi ai me'e leke howok Ainu'u honowok eni, de yon mamka'uk. Mala'a here. Ya'u nili Ai leke loikaru Ya'u Naran laa ri Yahudi noro ri ma ka namwali Yahudi enihe, noro rira rai-rai haenhi.

<sup>16</sup> Ya'u mehe konohi ai nahenia na'amoli an lernala apipinha nammori ono an lernohi Ya'u."

<sup>17</sup> Ende Ananias nala'a laa nakar onne, la nala liman loile Saulus wawanne. Ai na'heni, "I wal'u Saulus! Makromod Yesus man om dodo'on lolo kalla lere om mamai eni, Ai penia man hopon ya'u mai leke i wal'u makan mou wali'ur, leke Roh Kudus nala molollo ki o."

<sup>18</sup> Idewe ha ma naisa i'in di'ikne man minle makan nadiyauredi, idewe makan mou wali'uredi. Ai namaka, nala'a laa oir leke Ananias ulutade.

<sup>19</sup> Onne horu, ai na'ane, la kemen naruri wali'uredi.

*Saulus min Damsyik  
wakuku Makromod Lalap  
Lirna Wawa'an eni*

Onne horu, Saulus minle Damsyik alam wokelu wo'akka noro man lernohi Jesus enihe.

<sup>20</sup> An laa idewe Yahudi rira kerei-kerei loikaru Yesus Lirna na'ahenia, "Yesus onne penia Makromod Lalap Ananne."

<sup>21</sup> Ri na'akeme man derne Saulus wakunu mehe kakaiyedi, la hehel rehi ra'ahenia, "Hi'ihepenia an wakunu heheni? Oirawi inworo'ohe onneni an kele man lernohi Yesus enihe lolo Yerusalem, nahehe nesne horu, la lere eniyeni ainina panaeku mai eni kele ri nodi laa imam lalap enihe leke rala hunukum harome!"

<sup>22</sup> Maa Saulus nina wanakuku eni, eren nalolo'ol eren nana'an ri akin, penia Yahudi man minle Damsyik enihe mehe kakaiyedi, ka rauroin walha nin wanakuku me'e. Ai na'amou na'ropedi kokkoo panaeku ma nodi kunukunohi nahenia Yesus onne namwali Ai man Makromod Lalap kikanedi namwali Rai laa ewi-ewi me'eni.

<sup>23</sup> An min lolo onne nalo'oledi tarana mene Yahudi enihe paeku kelewuku leke resne.

<sup>24</sup> Hirira panaeku radiyaka kote nina nika na'akeme lelere a'alam leke resne Saulus, maa an dernessi rira panaeku yak onne,

<sup>25</sup> de a'alam ida nin muku man lernohi Yesus enihe rala ai loile lo'or raram mene ralkopur laa yawa lewen lukur kukulu man rodi

kawkawa kote paharn, leke an lari laa Yerusalem.

*Saulus minle Yerusalem*

<sup>26</sup> Rakanedi Yerusalem, Saulus nahehe noro ri man lernohi Yesus enihe lawuku, maa hi ramka'uk ai, ono ka rauroin nahenia namlolo kokkoo an lernohi Yesus, ee ka.

<sup>27</sup> Enima Barnabas lan lariyala ai rala'a wewerre leke roro hophopon ma nodi Yesus Lirnenihe pakromo. Barnabas konohi hi'ihehewi Saulus do'on Yesus lolo kalla man laa Damsyik, la hi'ihehewi Makromod Yesus wakunu noro ai. An konohi hi hi'ihehewi Saulus ka namka'uk nodi Yesus Naran wakuku manin Damsyik onnenihe haenhi.

<sup>28</sup> Enime'ede Saulus noro hi min wewerre Yerusalem, la ka namka'uk nodi Makromod Yesus Naran wakuku Yerusalem ne'en raram na'akeme.

<sup>29</sup> Ai noro ri Yahudi man wakunu Yunani enihe, wakunu la raherre honorok panaeku, maa hi kar kokale de rahehe ranoin kalla leke resne.

<sup>30</sup> Ai walinhe dernessi rira panaeku yak onneni ne, hi roro Saulus laedi Kaisarea mene hopon ai nala'a laa Tarsus.

<sup>31</sup> Enine man lernohi Yesus lolo Yudea, Galilea, noro Samaria na'akeme holi namolina namkai ono ri kan hi'i apinha hi. Ler onne Makromod Lalap na'alapa kerei raramne akinhe, de eren ramkene lernohi Yesus. Hirira honoli ramka'uk Makromod Lalap, la Roh Kudus na'alap hi

akin, de kerei raramne eren na'uwawali.

*Petrus hi'i wa'an Eneas la na'ori Dorkas*

<sup>32</sup> Petrus laliwewer ka'arala man lernohi Yesus enihe, de lerida an lole kota Lida.

<sup>33</sup> Lolo onne an holikuku mo'oni ida naran Eneas ma naplu'uk nap'ekeredi anna wo'aa me'e, ka namaka nano piki luni.

<sup>34</sup> Petrus na'aheni ai, "Eneas! Yesus Kristus hi'i wa'anedi o me'e, de makedi la ma'akenedi onum piki luni here!" Idewe namakedi.

<sup>35</sup> Ri manina Lida noro Saron do'on Eneas wa'anedi, hi na'akeme akin naili'il Makromod Yesus.

<sup>36</sup> Kote ida aile naran Yope ma kan ko'uwala Lida. Lolo onne maeke ida aile naran Tabita, la ai onne man lernohi Yesus. Naran 'Tabita' eni namneneha naran 'Dorkas' rodi wanakunu Yunani, la napa'ahne, 'ruse'. Ai eni hi'i ha man wa'an mamani, la an paku ri nammori ma na'alehe naulinu.

<sup>37</sup> Ler onne ai nakni'ir de makiyedi. Walinhe rarooho ihin kemen horu, rale laedi kamar nowawanne.

<sup>38</sup> Man lernohi Yesus lolo Yope derne Petrus aile Lida, de hir hopon ri woro'o rodi nou laa rapanpanakedi Petrus, "Halhaledi mai Yope nanu!"

<sup>39</sup> Konohiyedi Petrus ne, ai noro hi ra'alono pelek-lekedi laa enne. Hir rakanedi enne ne, hi rore laa kamar nowawan. Maeke walwalum ma nahehere lolo onne mai lupurala Petrus kukulle rira

nainairi man Dorkas hohour nala hi eni.

<sup>40</sup> Enime'ede Petrus hopon hi laedi paharne, la an kadi ein korno yawa hi'i lir napanak. Hi'i lir napanak horu, nakpaliyala Dorkas ihin kemen na'ahenia, "Tabita, mamakedi!" Idewe Tabita makan mouwedi, po'onala Petrus, namaka, naikoredi.

<sup>41</sup> Enine Petrus nasala liman leke paku na'ariri. Ai namririyedi, Petrus napolu maeke walwalum roro ma akin naili'il Yesus lolo onnenihe leke mai hir do'on rauroin maeke man maki onne mori wali'uredi me'e.

<sup>42</sup> Ha ma namwali onne raderre radaul lolo Yope ne'en raram na'akeme penia ri namansa akin naili'il Makromod Yesus.

<sup>43</sup> Petrus min Yope nalo'oledi tarana noro mo'on ida naran Simon. Ai onne nin honowok akilere na'akene ha mormori ulikin leke rodi ra'olu.

## 10

*Petrus noro Kornelius*

<sup>1</sup> Lolo kota Kaisarea mo'oni ida aile naran Kornelius. Ai onne namwali uluwakun ara ma nodi molollo ma nasala ke'urauk rahu ida ma nano hair Italia.

<sup>2</sup> Ai noro nina nakar raramka'uk Makromod Lalap, de ra'uli rasa'a Ai mamani, kade hi ka ramwali ri Yahudi. Ai nala kupan nammori ri Yahudi ma na'alehe haida-haida, la an hi'i lir napanak laa Makromod Lalap mamani.

<sup>3</sup> Lerida lere mamamal Makromod Lalap hi'i haida harile Kornelius mehen

do'on. Lolo ha onne an do'on mouropo Makromod Lalap Nina hophopon a'am raram ida mai napolu ai, "Kornelius."

<sup>4</sup> Kornelius po'on hophopon a'am raram onneni ne, ai namka'uk wake'edi me'e de na'ukani, "Makrom'u nodi inhawa panaeku?" An walhe, "Makromod Lalap kokaledi onum lir napanak, la kan hamlinu onum hini'i wawa'an rahu laa ri ma na'alehe haida.

<sup>5</sup> Ende lere eniyeni hopon ri ida woro'o laa Yope lariyala Simon Petrus wali mai eni.

<sup>6</sup> An min noro Simon ma nadedem na'akene ha mormori ulikin. Simon onne nina nakar aile herraram."

<sup>7</sup> Hophopon a'am raram onne nala'edi ne, Kornelius napolu nina hophopon mo'oni woro'o roro nina ma nasala ke'urauk ida ma namkene nadiyaka ai. Ma nasala ke'urauk onne namka'uk Makromod Lalap haenhi.

<sup>8</sup> Kornelius konohi hi ha wo'ira na'akeme man hophopon a'am raram konohiyedi ai me'e. Onne horu, an hopon hi rala'a laa Yope.

<sup>9</sup> Rakan orekiyedi, wokeluhe ramhara Kaisarea rala'a Yope me'e. Hi kar rakan Yope makun, Petrus ha'a laa onno ma aile nakar wawan leke hi'i lir napanak. <sup>10</sup> Na'ikeki lere ulu me'e de, ai namlaredi me'e. An newnewek ra'akene banana'an lere u'ulu nine, Makromod Lalap nalhari haida ai mehen do'on.

<sup>11</sup> An po'on lanik nahinariyedi, do'on haida naisa

tapi ma naphari, huhun wo'akkenihe nahal'lorlore, ku'uku'u mai noho wawan.

<sup>12</sup> Tapi raram onne, ha mormori ma ein wo'akka na'akeme aile, ha mormori ma na'ina'ik noro manu merwui na'akeme aile.

<sup>13</sup> Ka nalo'ol, an derne lir ida na'ahenia, "Petrus, laa malle mesne here, leke mo'on."

<sup>14</sup> Maa Petrus walhale, "Eih, Makromod! Ha mormori eniyenihe heruwali morso de luli ra'an, peni ka o'onal makun."

<sup>15</sup> Maa lir onne na'aheni wali'ur, "Inhawe man Makromod Lalap na'aheni mou, yom ma'aheni, 'Ha onneni morso, de luli yo o'on!'"

<sup>16</sup> Petrus do'on ha ma namwali onne rakan rewkelu nanumene tapi an dodo'on onne mehen nakinikanedi wali'ur laedi a'am.

<sup>17</sup> Petrus mahan nahehe nauroin hahaa an dodo'on onneni nina panaeku inhawa ne, Kornelius nina hophopon wokelu ma nano'in Simon nin nakar enihe rakanedi nina nike makan me'e.

<sup>18</sup> Hi ra'ukani ra'ahenia, "Peina'a ma naran Simon Petrus aile mai enie?"

<sup>19</sup> Petrus mahan nahehe nauroin ha an dodo'on onneni nina panaeku inhawa, la Roh Kudus na'aheni ai, "Petrus, mo'oni wokelu maha ranoin o.

<sup>20</sup> Kopur laa yawa, yono mamkauk moro hi mala'a, ono Ya'u penia man hopon hi mai eni."

<sup>21</sup> Enime'ede Petrus kopur laa yawa ne'el wokeluhe

na'ahenia, "Ya'u eni peni paphe ranonoine! Ik kodi inhawa panaeku mai eni?"

<sup>22</sup> Hir walhe, "Uluwakun ara ida naran Kornelius hopon am mai eni. Ai onne ri molololo, la namka'uk Makromod Lalap. Yahudi enihe na'akeme horhawe rehi. Makromod Lalap Nina hophopon a'am raram man moumou dewdewe ida hopon an polu papa la'ala nina nakar, leke an dernala papa nala inhawa wanakunu mayai."

<sup>23</sup> Enine Petrus lariyala hi laa raram leke minala lolo onne.

Orekiyedi mene noro hi rala'a. Ri Yahudi man lernohi Yesus ida woro'o ra'alono haenhi.

<sup>24</sup> Alam ida horu, hir rakanedi Kaisarea. Kornelius mahan lalapan, la lariyaledi walinhe noro nina ri orwali rarani enihe roro ai lapan wewerre haenhi.

<sup>25</sup> Petrus rakan nika makan ne, Kornelius lan rawa yawa la lariyale.

<sup>26</sup> Maa Petrus roul liman na'aririyedi la na'aheni, "Yom hi'i heheni, mamririyedi! Ya'u eni ri mormori naisa papa haenhi."

<sup>27</sup> Kame'ede Kornelius namririyedi, la mahar wakunkunu woro'ohe laa romleher. Laedi romleher ne, Petrus do'on ri namansa lawukuwedlo lolo onne me'e.

<sup>28</sup> Ai ne'el hi na'ahenia, "I walin na'ahohoru mehe mauroinedi Yahudi rira holoor halauk me'e. Holoor halauk onnenihe nou mayai Yahudi enihe na'ahenia, 'Yon

ka'ar, ee minwuku noro ri ma ka namwali Yahudi naisa mi eniyeuhe.' Maa Makromod Lalap kukuledi panaeku namehin maya'u me'e, de kan wa'an ya ahinorok nahenia ri namehin morso me'e.

<sup>29</sup> Enpenia papa polu pelekleke mai ne, ye e'enohi. Ende ya'u raram nodi au-roinala papa nina panaeku inhawa penia polu ya'u maie?"

<sup>30</sup> Enime'ede Kornelius walhe na'ahenia, "Alam wokelu man laedi eni, lo'o lere mamamal naisa eniyeni, ya'u mahanoro hi'i lir napanak min nakar. Ya amlilinnohi mo'oni ida man nair nainair hikhika wake'e namririri ya'u kalarna.

<sup>31</sup> Ai na'ahenia, 'Kornelius! Makromod Lalap kokaledi onum lir napanak me'e, la kan hamlinu onum hini'i wawa'an eni,

<sup>32</sup> de Ai napanak om hopon ri ida woro'o laa Yope lariyala ri ma naran Simon Petrus roro mai. Ainin miminbole aile herraram minle Simon ma na'akene ha mormori ulikn nin nakar.'

<sup>33</sup> Onne penia pelek-leke ya'u hopon ri ki polu makrom'u, la makrom'u akin wa'an rehi de aiyedi mai eni me'e. Enpenia mayai na'akeme maiwukuwedli Makromod Lalap kalarna me'e, leke am derne makani inhawe Makromod Lalap hopon makrom'u konohi mayai."

<sup>34</sup> Enime'ede Petrus na'ahenia, "Eni mene ya auroin kokkoo Makromod

Lalap ka na'ili nalocho ika ri mormori eni,

<sup>35</sup> maa An kokala ri na'akeme nano noho pa'i'ik rai pakakar horo hi ramka'uk Ai la hi'i ha ma namlolo mamani.

<sup>36</sup> Mi mehe mauroinedi Lira man Makromod Lalap naledi mayai ri Israel enihe me'e. Onneni Lirna Wawa'an man konomi hi'ihewi Yesus Kristus du'ul kali wali'ur ika ri mormori eni koro Makromod Lalap, la Yesus onne namwali ri mormori na'akeme Makromon.

<sup>37</sup> Mi me'ene mauroin Lirna ma naderre nadauledi lolo noho Yudea ne'en raram me'e. Yohanis mai wakuku ri leke herre rira morimori ma ka namlolo la derne rakani Makromod Lalap mene laa oir raram ulutade. Yohanis mai wakuku onne horu mene rin derne panaeku ma na'ono Yesus lolo Galilea.

<sup>38</sup> I walin lo'o mauroinedi Yesus ma nano Nazaret onne nina morimori me'e. Mi mauroin Makromod Lalap kikanedi Ai namwali Rai, la nala Roh Kudus Ai, la nala ke'eke'el an'anha Ai haenhi. Lolo ewi-ewi Yesus hi'i ha man wa'an, la hi'i wa'an ri na'akeme man Hayakyak Makromon kerne dalha, ono Makromod Lalap norle'ule'u norwaliwali Ai.

<sup>39</sup> Mayai eniyenihe mehem do'onedi An hi'i ha wo'ira na'akeme lolo Yahudi rira nohe rakan Yerusalem haenhi. Lolo onne hir wairesne lolo au kekiyowok eni,

<sup>40</sup> maa rakan lere wokelu Makromod Lalap na'ori Ai wali'ur nano makmaki, la hi'i

ri mormori do'on Ai.

<sup>41</sup> Ri na'akeme kar do'on, maa mayai mehe man Makromod Lalap nili leke namwali Nina man kuku maka, man mo'on momun wewerre moro Ai lere An mori wali'ur nano Nin makmaki.

<sup>42</sup> An hopon mayai loikaru Lirna Wawa'an eni laa ri na'akeme, la kukunohi hi nahenia Ai penia Makromod Lalap niliyedi namwali man ho'ok kail ri na'akeme, ri man mormori makun noro ri man makiyedi haenhi.

<sup>43</sup> Nabi nonolu na'akeme wekel Yesus haenhi ra'ahenia ri na'akeme ma akin naili'il Yesus, Makromod Lalap na'ohu nahaledi rira dohohale me'e."

*Ri ma ka namwali Yahudi enihe lernala Roh Kudus*

<sup>44</sup> Petrus wakunkunu makun, Roh Kudus kopur mai ri na'akeme man derne lirna onne honorok akinhe.

<sup>45</sup> Ri Yahudi ma akin naili'iledi Yesus man ler-nohi Petrus nano Yope, hir heheledi, ono hir do'on Roh Kudus kopur laa ri ma ka namwali Yahudi enihe.

<sup>46</sup> Hi rauroin mouropo nahenia ma ka namwali Yahudi enihe kokaledi Roh Kudus ono hir derderne ri ma ka namwali Yahudi enihe wakunkunu rodi wanakunu man mai nano Roh Kudus ra'uli rasa'a Makromod Lalap. Enine Petrus na'ahenia, "Po'onale,

<sup>47</sup> ri eniyenihe lernaledi Roh Kudus me'e naisa maika nonolu eni, de wa'an rehi hir laa oir leke ulutade."

<sup>48</sup> Enpenia Petrus hopon hi rala'a laa oir leke ulutade

nodi Yesus Kristus Naran. Onne horu, hi rapanak Petrus minala alam ida woro'o noralahe.

## 11

*Petrus laa Yerusalem  
kukunohi nin honowok*

<sup>1</sup> Lolo Yerusalem hophopon ma nodi Yesus Lirna rorowalin man lernohi Yesus enihe derne nahenia ri ma ka namwali Yahudi enihe kokaledi Makromod Lalap Lirna Wawan me'e haenhi.

<sup>2</sup> Enpenia lere Petrus laa Yerusalem, Yahudi man lernohi Yesus ida woro'o mai rodi ahan ra'ukani ai,

<sup>3</sup> "Hi'ihepenia om hi'i ha ma kan lolo ri raram mala'a laa ri ma kar sunat rira nakar moro ma'ake?"

<sup>4</sup> Enime'ede Petrus loikaru panaeku onne na'akeme nano dedesne rakan honon na'ahenia,

<sup>5</sup> "Ya'u mahanoro hi'i lir napanak min kota Yope, ya amlilinnohi i do'on haida naisa tapi ma naphari ida rala kopur nano a'am mai yawa, maa tapi onne huhun wo'akkenihe naha'iloloro rakan ya'u kalarna.

<sup>6</sup> Ya'u po'on a'inau tapi onne raramne, i do'on ha mormoriyana ma ein wo'akka, ha mormori man merwui, ha mormori ma na'ina'ik roro manu merwui haenhi.

<sup>7</sup> Ya'u derne lir ida na'ahenia, 'Petrus, laa mala mesne, leke mo'on here!'

<sup>8</sup> Maa ya'u walhe, 'Makromod, luli yo o'on! Ka o'onala hanana'an man Morse naise eni makun. Hanana'an eni

ainim agame nin holoor halauk penia na'ahenia morso de luli ra'an.'

<sup>9</sup> Maa lir ma nano a'am raram onne na'ahenia wali'ur, 'Inhawe ha man Makromod Lalap na'aheni mou de kan luli ra'an, yon ma'aheni morso!'

<sup>10</sup> Panaeku i dodo'on onne namwali rakan rewkelu. Onne horu, tapi ma naphari onne noro raramne mehen nakinikan wali'uredi laa a'ame.

<sup>11</sup> Onne horu, hophopon wokelu rano Kaisarea mai nakar i miminle.

<sup>12</sup> Roh Kudus hopon maya'u, 'Yon mamka'uk moro hi ma'alono laa Kaisarea!' Yo oro i walin Yahudi woneme ma'alono laa Kaisarea haenhi. Mayai na'akeme laa Cornelius nina nakar.

<sup>13</sup> An konohi mayai hi'ihehewi an do'on hophopon a'am raram ida mai namriri nina nakar raram na'ahenia, 'Hopon ri ida woro'o laa Yope lariyala mo'oni ida naran Simon Petrus moro mai nakar,

<sup>14</sup> leke ai nala wanakunu ma nala or'ori dardari man wa'an ki o moro num nakar raramne na'akeme.'

<sup>15</sup> Ende ya'u wakunkunu heheni hi, Roh Kudus kopur mai nala molollo hi naisa namwali maika nonolu eni.

<sup>16</sup> Enine ya'u horoknaledi Makromod Yesus Lirna ma na'ahenia, 'Yohanis nodi oir ulutada ri, maa oreki inworo'o mi eniyenihe, Makromod Lalap ulutade mi nodi Roh Kudus!'

<sup>17</sup> Ende ha onne namwaliyedi me'e. I wal'uhe, Makro-

mod Lalap nala hi ma ka namwali Yahudi, panaeku ma namnenehe Ai nala maika, ono ika na'akeme akin naili'il Makromod Yesus Kristus. Ende ya'u lo'o kawala Makromod Lalap hehewi?"

<sup>18</sup> Hir dernedi panaeku onneni, hi ka rawalha lira me'e, maa ra'uli rasa'a Makromod Lalap ra'ahenia, "Panaeku onne namlolo, lo'o Makromod Lalap naledi leken paharin ri ma ka namwali Yahudi enihe haenhi, leke hir herre rira morimori ma ka namlolo, mai lernohi Makromod, la lernala or'ori dardari ma kan horu eni."

### *Man lernohi Yesus lolo Antiokia*

<sup>19</sup> Ler Stepanus makiyedi onneni, ri ma akin naili'il Yesus enihe lariye'er rarariyedi, ono ri ma kan lernohi Yesus enihe kerne dalha wake'e hi. Heruwali lari rakan noho Finesia, heruwali rakan noho Siprus noro kota Antiokia. Hir lae ne, hir loikaru Makromod Lalap Lirna Wawan laa ri Yahudi enihe mehe.

<sup>20</sup> Enimaa ri man lernohi Yesus heruwali ma nano kota Siprus noro kota Kirene rala'a laa Antiokia loikaru Lira Wawa'an ma na'ono Makromod Yesus eni laa ri ma ka namwali Yahudi enihe.

<sup>21</sup> Makromod Nina molollo aile hi penia ri ma ka namwali Yahudi enihe derne rakani rira wanakunu onne, de lernohi Yesus haenhi.

<sup>22</sup> Yerusalem nin kerei raramne derne inhawa ma

namwali lolo Antiokia eni, de hir hopon Barnabas laa enne.

<sup>23</sup> An rakanedi, ai akin nahuwa'an wake'e ono do'on hi'ihehewi Makromod Lalap namre'e namharu heri onne. Ende an wakuku la na'alap hi akin leke ramkene lernohi Makromod Yesus.

<sup>24</sup> Barnabas eni akin wa'an, la Roh Kudus nodi molollo ai mamani, la ai akin namkene naili'il Makromod, de ri namansa derne ai la lernohi Makromod Yesus haenhi.

<sup>25</sup> Enime'ede Barnabas nala'a Tarsus nanoin Saulus.

<sup>26</sup> Hir pakromedi, ai noro Saulus wali wali'ur laa Antiokia. Annida raram, hi roro kerei raramne lawuku mamani la hir wakuku ri nammori. Lolo Antiokia eni lere dedesne wake'e rin waki man lernohi Yesus enihe 'Kristen'.

<sup>27</sup> Ler onne nabi ida woro'o rano Yerusalem mai Antiokia,

<sup>28</sup> la nano hi, nabi ida aile ma naran Agabus. Lerida ai namriri heri kalarna, la Roh Kudus nodi molollo ai de an wakunu ha ma namwali lere man mai na'ahenia, "Oreki inworo'o noho wawan na'akeme lernala roulara lapa." (Panaeku onne namwali kokkoo lere rai Kaisar Klaudius nodi molollo.)

<sup>29</sup> Hir derne onne horu, man lernohi Yesus enihe lawuku honorok panaeku puli kupanaku laa walinhe man minle Yudea. Man lernala nammori nala nammori, man lernala tarana nala tarana.

<sup>30</sup> Hir puliyedi kupan onneni, hir hopon Barnabas noro Saulus rodi laa ralle

uluwakun man lernohi Yesus  
enihe ma aile Yerusalem.

## 12

*Hir resne Yakobus la  
Petrus nahinuriyedi nano bui  
raram*

<sup>1</sup> Ler onne rai Herodes nodi rurilai kele ri ida woro'o ma aile kerei raramne leke hi'i apinpinha hi.

<sup>2</sup> An hopon ri nodi raa nesne Yohanis mo'oniwalla Yakobus.

<sup>3</sup> Herodes po'on nin hini'i onne nahuwa'an Yahudi ma akin ka naili'il Jesus akinhe, de an hopon ri kele Petrus haenhi. Panaeku onne namwali Yahudi nin Lere Alam Lalapa Ra'an Roti Ma Na'alehe Ragi.

<sup>4</sup> Hir kele Petrus rale laedi bui raram ne, rai Herodes hopon ma nasala ke'urauk idaweli woneme radiyaka na'apiku lolo onne. Hir ha'ar namwali muku wo'akka leke ida man herre ida. Herodes nin panaeku lapan rir Lere Alam Lalap Paska horu mene ho'ok kail Petrus lolo heri na'akeme kalarna.  
<sup>5</sup> Ende Petrus minle bui raram, maa kerei raramne hi'i lir napanak mamani leke Makromod Lalap paku nala kalla ai.

<sup>6</sup> A'alam ida nine, Petrus namkuru mahmahal lolo ma nasala ke'urauk woro'o leken, la rodi rantan wuk-wuku ai liman woro'o noro ma nasala ke'urauk woro'o liman haenhi. Ma nasala ke'urauk namehin radiyaka nika makan haenhi. Herodes nin panaeku oreki al'alam rodi laa heri kalarna leke hukumesne.

<sup>7</sup> Maa a'alam onne namlilinnohi hophopon a'am raram ida mai namriri lolo nin kamar raram, de hikhika lolo kamar onne raram. Hophopon onne roulle Petrus nado'e na'ahenia, "Heih, heih, makedi nanu!" Idewe rantan rodi wuwuku liman onne mehe nawine'eredi.

<sup>8</sup> Onne horu hophopon onne hopon na'ahenia, "Nairedi num nainair, la ma'akerhedi num pakpak ei here." Petrus hi'i onne horu, an hopon wali'ur, "Nairedi num rain nanaru, kala'a here!"

<sup>9</sup> Petrus lernohi ai ramhara nano bui raram. Ai ka nauroinnala hophopon a'am raram onne hi'i ha ma namwali kokkoo, maa ai nauroin nahenia namarmi mehe.

<sup>10</sup> Hir lewenedi muku ma nadiyaka dedesne noro rewro'o nine, rakanedi nike lapa man rodi pesi hihi'ie man laa paharneni. Enine nika mehen nahinuriyedi, de hir laa paharne, rala'a. Kan ko'uwalla namlilinnohi hophopon a'am raram onne mehen moluwedi.

<sup>11</sup> Eni nanumene Petrus nauroinnala ha onne namwali kokkoo. Ai mehen hehel kemen na'ahenia, "Eih, kokkoe! Makromod Lalap hopon Nina hophopon mai, de huriyedi ya'u nano Herodes liman raram, la huriyedi ya'u nano hahaa na'akeme man ri Yahudi enihe lo'o hihi'i maya'u eni."

<sup>12</sup> Kame'ede ai nala'a Maria, Yohanis inna nina nakar. (Yohanis onne rapolu

Markus haenhi). Lolo nin nakar onne, ri nammori aile mahar hi'i lir napanak.

<sup>13</sup> Petrus rakan nakar nin nika lap eni, disne nike. Maeke hophopon ida naran Rode laa leke hari nikeni.

<sup>14</sup> Petrus napolu, idewe ai nauroinnala lirna, de akin nahuwa'an wake'e penia an hamlinu hari nika, maa lari wali'ur laa romleher! An laa konohi heri onneni na'ahenia, "Petrus aile parharne."

<sup>15</sup> Hir walhe, "O ma'iseri haromo!" Maa Rode na'aheni mamani, "Kokkoo! E'eni, Petrus." Enimaa hi ra'ahenia, "Ah, onne lo'o nina hophopon a'am raram harome!"

<sup>16</sup> Hi mahar wakunu, Petrus disne nike mamani. Kame'ede hir laa hari nike, po'one, rauroin kokkoo ai onne Petrus. Hi na'akeme hehel rehi.

<sup>17</sup> Petrus nodi liman dadiyala, "Karkaramedi." Enine an konohi hi hi'ihehewi Makromod nodi ai namhara nano bui raram, la an hopon hi, "Lam konohi panaeku ma namwali eni laa Yakobus noro ik walinhe namehin haenhi." Onne horu, ai kan min lolo onne me'e, maa nala'edi onno namehin wali'ur.

<sup>18</sup> Rakan oreki al'alam ma nasala ke'urauk ma nadiyaka Petrus onnenihe ramka'uk wake'e, de ida man rusu arra noro ida ra'ahenia, "Inhawe namwaliyedi noro Petrus me'e."

<sup>19</sup> Herodes derne Petrus kaale bui raram me'e, an hopon ma nasala ke'urauk enihe lalaa mamai ranoin

Petrus, maa kar do'one. Kame'ede Herodes polu ma nasala ke'urauk ma nadiyaka na'akeme mai, sisnai nanumene resne mouwedi. Onne horu Herodes namharedi Yudea nala'a Kaisarea min lolo onne.

### *Makromod Lalap nesne rai Herodes*

<sup>20</sup> Lerida Herodes na'ahan wake'e ri manin kota Tirus noro kota Sidon. Enpenia hi rodi honorok panaeku mahaku laa Herodes leke wa'an wali'ur noro ai, ono hi radedem kokala hanana'an nano ainin noho. Hir rakanedi ne, hir nori Blastus ma namwali uluwakun lolo Herodes nin nakar romleher, leke an paku hi rakpali Herodes.

<sup>21</sup> Ende rakan lere hi rakpali Herodes, an nairedi nina nainaire man kukulu lalape, la naikoro kadere molollo mene wakunu heri kalarna.

<sup>22</sup> Hir derne Herodes wakunu horu, hi ra'uli rasa'e, wakau ra'ahenia, "Ik derne lirna eniyeni naise noho makromon lirna, ri mormori, ka."

<sup>23</sup> Ler onne me'ede hophopon a'am raram nala apinha ida walile Herodes ono an holi kukulu lalape, la kan horhawa Makromod Lalap. Ka nalo'ol ne, maki me'e ono sususu na'an riki raramne.

<sup>24</sup> Makromod Lalap Lirna Wawan eni eren raderre radaul, la man derne nakani eren na'uwawali.

<sup>25</sup> Barnabas noro Saulus rala'ala Yerusalem ha'ar ku-paan pulipuli horu ne, roro

Yohanis wali wali'ur laa Antioquia. (Yohanis eni rapolu Markus haenhi).

## 13

*Ma akin naili'il Yesus lolo  
Antioquia ra'ono Barnabas  
noro Saulus*

<sup>1</sup> Lolo Antiokia nin kerei raramne nabi-nabi roro meser-meser aile: onnenihe Barnabas, Simeon (waki Mau Mohon), Lukius nano Kirene, Saulus, noro Menahem (ai eni wayahu lapa wewerre noro rai Herodes).

<sup>2</sup> Hi maha ra'uli rasa'a Makromod la ra'aluli kemen ka ra'ak ne, Roh Kudus hopon hi na'henia, "Ma'onnedi Barnabas noro Saulus Maya'u, leke hir howok Ainu'u honowok man Ya aledi hi me'e."

<sup>3</sup> Ende hi ra'aluli kemenhe ka ra'ak la hi'i lir napanak horu, hir kemenala limanhe Barnabas noro Saulus uluwakun wawan mene huri woro'ohe rala'a.

### *Rakanedi noho Siprus*

<sup>4</sup> Roh Kudus naledi molollo Barnabas noro Saulus loikaru Lira Wawa'an eni me'e, de hir kopur laa lour laa kota Seleukia, mene ha'a kapal laa noho Siprus.

<sup>5</sup> Yohanis (rapolu 'Markus' haenhi) lernohi Barnabas noro Saulus leke pakuwala hi haenhi. Rakanedi kota Salamis, hir loikaru Makromod Lalap Lirna Wawan eni lolo Yahudi rir kerei-kerei.

<sup>6</sup> Hi ramhara Salamis, hir kuli kuli hehen nanumene rakan kota Papos. Rakan lolo onne, hir holikuku mo'oni Yahudi ida narane Bar Yesus (rodi wanakunu

Yunani rapolu Elimas). Ai eni ri man hi'i u'ur leher. Ai mehe na'heni ai onne Makromod Lalap Nin nabi, maa ka namlolo.

<sup>7</sup> Elimas eni namwali na'aromwali ri ida ma naran Sergius Paulus. Sergius Paulus namwali gubernur noho onne, la ai onne ri ma nauroin. Ai napolu Barnabas noro Saulus mai, ono ai raram nodi derne Makromod Lalap Lirna Wawan.

<sup>8</sup> Enimaa Elimas (ma naran napa'ahne, 'ma nauroin hi'i u'ur leher'), ai onne nadiyaka gubernur akin leke yono naili'il Yesus, penia noro Barnabas la Saulus nawalha lira mamani.

<sup>9</sup> Maa, Roh Kudus nala molollo Saulus (rapolu Paulus haenhi), penia an po'on desnala ri man hi'i u'ur leher onne na'henia,

<sup>10</sup> "Heih! Hayakyak Makromon anan, o! O modi konoko wunudi mamani. O kam suk honorok panaaku ma namlolo ida. Om suk herre Makromod Lalap Nin panaaku ma namlolo, modi onuma poho mamani.

<sup>11</sup> Makanie! Lere eni me'ede, Makromod Lalap hukum o me'e. An hi'i o makum toko, de alam ida woro'o kam do'on haida-haida me'e." Ler onne me'ede, haida naise howe damunala makan. Enime'ede makan tokedi, la mehe hapu napanak ri ni'ik liman lolo kalla.

<sup>12</sup> Gubernur po'on ha onneni namwali ne, ai akin naili'il Yesus, ono ai nahumarna derne wanakuku wanayo'o ma na'ono Makro-

mod.

*Paulus noro Barnabas rakanedi kota Antiokia ma aile noho Pisidia*

<sup>13</sup> Ramhara Papos, Paulus noro nin kalla wali enihe hopol laa noho Pamfilia rala'a laa kota Perga, maa lolo kota onne Yohanis (rapolu Markus haenhi) hoikaruwedi hi wali wali'ur laa kota Yerusalem.

<sup>14</sup> Paulus noro Barnabas ramhara Perga rala'a laa Antiokia lolo Pisidia. Rakan Yahudi nin Alam Renren Warwarna, hir laa Yahudi rir kerei raram raikoro.

<sup>15</sup> Ri lolo kerei onne lese Musa nina horok noro nabini-nabi rira horok horu ne, man panulu lolo Yahudi rir kerei onne hopon ri lan lariyala Paulus noro Barnabas na'henia, "I wal'u mie, lo'o papa lirna romo aile ma na'alapa ai akim, ken loikaruwale, am derne makaniyale ke'e."

<sup>16</sup> Kame'ede, Paulus namriri, kikan liman laa wawan na'henia,

"Konohiyala, i wal'uhe Israel roro i walin ma ka namwali ri Yahudi man horhawe Makromod Lalap na'ahoru. Ya apanak i wal'uhe, makaniyala tarana!"

<sup>17</sup> Makromod Lalap Ma Narehi Ma Nalewen, man ri Israel na'akeme hoikani eni, niliyedi ai upun a'um ramwali Nina ri. An hi'i hi rariwan rarahu lere hir holile Mesir ramwali do'on awan lolo onne. Enime'ede, Ai nodi Nina ke'eke'el

an'anha hi'i hi ramhara Mesir.\*

<sup>18</sup> Hi ramharedi Mesir ne, min lolo kalla noho mamun ma napro'uk anna weli'akka raram. Kade lere onne Makromod Lalap po'on rira hini'i wenewhe rahu man yakeni, maa An pepen haun, la kan huri we'er hi lolo noho mamun onne.

<sup>19</sup> Ai na'akeperedi leke wo'ikku lolo noho Kana'an raramne, leke ha'ar durum nohorai noro leke ruhun onnenihe, Israel manarne.

<sup>20</sup> Panaeku onnenihe na'akeme na'ene namwali horu lolo anna rahu wo'akka wellima raramne onne.

Ha'ar durum leke ruhun Kana'an raram horu, Makromod Lalap kikan man ho'ok kail wo'ira rodi molollo Israel hehen nanumene Samuel ma namwali nabi nin kulere. Ai onne namwali ri Israel nin man ho'ok kail man kauli'ur wake'e.

<sup>21</sup> Rakan nin lere onne, hi rapanak rai nodi molollo hi. Ende Makromod Lalap kikan Saul, Kis ananne nano luhu Benyamin namwali rir rai la ai nodi molollo anna weli'akka.

<sup>22</sup> Makromod Lalap nalkopuredie Saul onne mene kikan wali'ur Daud namwali rira rai. Enla Makromod Lalap wakunu na'ono Daud na'henia, 'I do'onedi Daud, ma namwali Isai ananne, la ai onne ri ma nahuwa'an Ya akin. Ai penia man hi'i wewhe Ainu'u honorok panaeku rahue.\*

<sup>23</sup> Nano Daud upun ananhe Makromod Lalap na'akenedi

\* **13:17** Kel. 1:7, 12:51

\* **13:22** 1Sam. 13:14, Mzm. 89:19

Is̄rael nin Rai man huri we'er ri mormori nano dohohala nin molollo, naise oirawie An konohiyedi me'e. Jesus eni peni Rai onne.

<sup>24</sup>Jesus kan mai wakukuwalarri makun, Yohanis hopon ri mormori noho Israel na'ahenia, 'Herredi minim morimori ma ka namlolo, wali derne makani Makromod Lalap, la mai oir leke ulutada mi.'

<sup>25</sup>Lere Yohanis na'akeki na'ahoru nina honowok eni, ai na'ukani ri onne na'ahenia, 'Mi mauroin ya'u eni inhoi? Ka amwali Rai man mim nenekek eni. Horhoroke! Yo olu mai mene An mai, maa An kulu narehi ya'u, de kan wa'an ya'u we'er nina sepatu kali eni.'

<sup>26</sup>I wal'uhe, Abraham upun ananhe roro idewe ma ka namwali Yahudi man horhawe Makromod Lalap na'ahohoruwedi! Makromod Lalap akuwedi Lirna or'ori dardari maiyedi ika me'e.

<sup>27</sup>Ri man minle Yerusalem roro rira man panulu onnenihe kar eremnala nahenia Jesus onne penia man Makromod Lalap kikan namwali Rai man huri we'er ri mormori nano dohohala nin molollo onne, de hukumesne. Kade aki Alam Renren Warwarna hir lese nabi-nabi rira wanakuku, maa hi ka rauroin wanakuku loloi kakaruwedi onne kukul hirira hini'i wenewhe man yakeni.

<sup>28</sup>Hi kar lernala Ainina yaksala ida leke hukumesne, maa rapanak Pilatus nesne

Ai.

<sup>29</sup>Ende hir hi'i ha wo'ira Ai kemen man horokedi lolo Horok Lap raram, mene rala kopur nano au kekiyowok, rala loile lunne raram.

<sup>30</sup>Enimaa Makromod Lalap na'amori Ai wali'ur nano makimakie,

<sup>31</sup>la An mai nalhari kemen lere wo'irha Nina ri ma nadedem lernohie nano Galilea rakan Yerusalem. Ri eniyenihe penia ramwali Nina man kuku maka laa heri Israel enihe.

<sup>32</sup>Ende, lere eniyeni am loikaru Makromod Lalap Lirna Wawa'an ma na'ono panaeku na'akeme man Makromod Lalap nouwedi ai upmu ai a'umhe nonolu me'e.

<sup>33</sup>An hi'i mayai ma namwali hi upun anan do'onedi Nin nou onne ma na'ahenia Ai na'amori wali'ur Jesus nano makimakie. Panaeku eni horokedi haenhi lolo horok Mazmur panakan woro'o ma na'ahenia,

'O penia Ya An'u, O.  
Ler eniyeni Ya amwaliyedi O  
Ammu.'\*

<sup>34</sup>Jesus onne, Makromod Lalap na'amori wali'uredi nano makimakie leke yon An minle lunna raram la yon Ai kemen popo. Panaeku onne Makromod Lalap nouwedi ai upun a'umhe nonolu me'e na'ahenia,

'Ya ala nou man moumou dewdeweni la ma namkene ki mi naise Ya aledi Daud me'e.'\*

<sup>35</sup>Lolo lisir namehin Daud na'aheni haenhi,

\* 13:33 Mzm. 2:7 \* 13:34 Yes. 55:3

'O kam huri we'er Num Man  
Moumou Dewdewe  
kemen popo.'\*

<sup>36</sup> I wal'uhe, lere Daud  
mormori lolo noho wawan,  
an hi'iyedi inhawa man  
Makromod Lalap hohopon  
na'akeme nanumene aran  
horuwedi. Ende ik kauroin  
wanakunu onne kan kukul  
nina makimaki aimehi, ono  
an maki rawilo'edi noro  
upun a'anhe me'e de kemen  
popo la namwaliyedi elimo'o  
larihapu me'e,

<sup>37</sup> maa Makromod Lalap  
na'amori wali'ur Yesus nano  
makimakie de Ai kemen kan  
popo la ka namwali elimo'o  
larihapue.

<sup>38</sup> Ende i wal'u na'ahoru,  
leke mi mauroin kokkoo, lere  
eniyeni Makromod Lalap  
hariyedi kalla lolo Yesus  
eni leke minim dohohala  
na'akeme ra'ohu rahaledi.

<sup>39</sup> Kade ika lernohi Musa  
nin keneri hono'ok, maa ik ka  
kahinuri nano ikenika dohohale,  
de ik akin kan mou lolo  
Makromod Lalap kalarna.  
Maa inhoi ma akin naili'il  
kokkoo Yesus, ri onne nina  
dohohale na'akeme ra'ohu  
rahaledi, la ai namwali ri  
molololo Makromod Lalap  
kalarna me'e.

<sup>40</sup> Mi na'ahohoru loi hon-  
orok wawa'an! Yono hi'i  
de inhawa Makromod Lalap  
na'heni lolo Nin nabi-nabi  
nonolu eni namwali ki mi.  
Makromod Lalap na'heni,

<sup>41</sup> 'Mahinorok wawa'an, mi  
man suk na'ihoru  
na'idaru mamani!  
Ya'u hi'i panaeku ma  
narehi ma nalewen,

la mim heheledi do'on  
Ainu'u hini'i we-  
newhe man ri kan  
dodo'onnala makun,  
maa oreki inworo'o mim  
maki, ko'u nano  
Maya'u, Makromod  
Lalap.

Mim makileken ono ri aile  
man kukunohi mi  
Ainu'u hini'i wenewhe  
man ma'aruru onne,  
maa mi akim mamhene  
naili'il Maya'u.' \*

<sup>42</sup> Paulus noro Barnabas  
ramhara kerei onneni ne,  
kerei raramne heruwali mai  
rapanak na'henia, "Paphe,  
Alam Renren Warwarna  
nokalari eni am lariyala  
paphe mai loikaru min-  
ima wanakuku eni mayai  
wali'ur."

<sup>43</sup> Heri ramharedi Yahudi  
rir kerei onneni ne, ri nam-  
mori lernohi Paulus noro  
Barnabas--ri Yahudi noro  
idewe ri ma ka namwali  
Yahudi man lernohiyedi  
Yahudi nin agama me'enihe.  
Enpenia woro'ohe nounaku  
heri onne leke rauroin la  
akin namkene naili'il Makro-  
mod Lalap ma nala rere'e  
haharu hi na'ahoru.

<sup>44</sup> Rakan Alam Renren  
Warwarna wali'ur, manin  
kota onne, manlo'o ne'en  
raram na'akeme, maiwuku  
derne Makromod Lirna  
Wawan.

<sup>45</sup> Enimaa, ri Yahudi  
heruwali po'on heri nam-  
mori onne maie ne, hi akin  
apinha wake'e. Ende hir  
wahilei ra'idaru inhawa  
Paulus loloi kakaru eni.

<sup>46</sup> Enine Paulus noro  
Barnabas ka ramka'uk, der

\* 13:35 Mzm. 16:10 \* 13:41 Hab. 1:5

wakunu mouropo roro hi, ra'ahenia, "Ai modi Makromod Lalap Lirna Wawan mai loikaru mi nolu, maa mi mamhene kokale! Mi mehe hi'iyedi kenekrohu nahenia kan wa'an mim lernala or'ori dardari ma kan horu eni! Ende lere eniyeni ai modi wanakuku eni laa konohi ri ma ka namwali Yahudi enihe!"

<sup>47</sup> Makromod Lalap hopon mayai na'ahenia,  
'Ya aledi molollo ki mi me'e,

leke mamwali wadu  
man ropo ri ma  
ka namwali Yahudi  
enihe,

leke hi rauroin Ainu'u  
honorok panaeku.

Laa ma'amou ma'aropo  
Ainu'u panaeku ri  
manin noho wawan  
na'akeme,

leke hir lernala or'ori  
dardari ma namlolo  
eni."\*

<sup>48</sup> Ler onne ri ma  
ka namwali Yahudi on-  
nenihe derne Paulus nina  
wanakunu onne, de hi akin  
nahuwa'an wake'e. Hi ra'uli  
rasa'a ra'ahenia, "Makromod  
Lalap Lirna Wawan eni  
ma'aruru wake'e." Ende ri  
na'akeme man Makromod  
Lalap niliyedi leke lernala  
or'ori dardari ma kan horu  
enihe, hi onne akin naili'il  
Jesus me'e.

<sup>49</sup> Ende Makromod Lalap  
Lirna Wawa'an eni raderre  
radaul lolo kota onne ne'en  
raram na'akeme.

<sup>50</sup> Enimaa, ri Yahudi  
heruwali onnenihe rawa'u  
maeke marna man horhawa  
Makromod Lalap roro man  
panulu lolo kota onnenihe,

penia hir hi'i ha man yaka  
roro Paulus noro Barnabas,  
la rohi woro'ohe ramharedi  
nano leke onne.

<sup>51</sup> Hi ramharedi kota  
onnensi ne, Paulus noro  
Barnabas disnedi elimo'o  
hapue nano ein raram me'e,  
leke namwali tanada hi ka  
rodi yodiwara ida ono kota  
raramne kar kokala hi. Horu  
ne, hi rala'a laa kota Ikonium.

<sup>52</sup> Ri Antiokia man ler-  
nohiyedi Yesus, hi akin  
nahuwa'an wake'e, la Roh  
Kudus nodi molollo hi me'e.

## 14

*Paulus noro Barnabas lolo  
Ikonium*

<sup>1</sup> Rakanedi kota Ikonium,  
Paulus noro Barnabas laa  
Yahudi nin kerei raram  
wakuku Makromod Lalap  
Lirna Wawa'an eni naise  
nadedem. Wanakuku onne  
nedille ri akinhe penia ri  
nammori, ri Yahudi noro  
ri ma ka namwali Yahudi  
enihe, akin naili'iliedi Yesus.

<sup>2</sup> Maa, ri Yahudi ma  
namhene akin naili'il Yesus  
rawa'u ri ma ka namwali  
Yahudi heruwali, penia hi  
kar suk ri ma akin naili'il  
Yesus haenhi.

<sup>3</sup> Enimaa Paulus noro  
Barnabas min nalo'ol lolo  
kota onne. Hi ka ramka'uk,  
der wakunu mouropo  
Makromod Lalap Lirna  
Wawan. Enla Makromod  
mehe nala molollo hi hi'i ha  
ri kan dodo'onnala makun,  
leke ri lolo onne rauroin  
nahenia Lira ma na'ono Nin  
rere'e haharu onne, Lira ma  
namlolo kokkoo.

<sup>4</sup> Maa, ri manin kota onne  
ida ma kan derne ida, de

heruwali rodi Yahudi rir man panulu honorok akin, heruwali rodi Paulus noro Barnabas rira loloi kakarue.

<sup>5</sup> Enine ler ida ri ma ka namwali Yahudi, noro ri Yahudi, noro wewerre rira man panulu, na'akeme lawuku panaeku leke na'omhe la rodi waku wadesne woro'ohe.

<sup>6</sup> Paulus noro Barnabas eremnala rira panaeku yaka onne, de ramharedi kota onne rala'a kota Listra noro kota Derbe ma aile noho Likaonia noro leke-leke lolo onne.

<sup>7</sup> Min lolo onne, hir loikaru Makromod Lalap Lirna Wawa'an eni.

*Paulus noro Barnabas lolo kota Lystra noro kota Derbe*

<sup>8</sup> Lolo Listra mo'oni ida aile ein naplu'ukedi. Nano lere momori me'ede ai ka nau-roin nala'a ono ein kawin ka naruri.

<sup>9</sup> Ri onne naikoro derne Paulus wakunkunu, Paulus po'on desnale, nauroinedi mo'oni onne akin naili'iledi kokkoo,

<sup>10</sup> de Paulus hopon naruri na'ahenia, "Mamririyedi!" Enime'ede, mo'oni ma naplu'uk onne nehu laa wawan lalaa mama'i me'e.

<sup>11</sup> Idewe heri onne po'onala Paulus hi'i wa'anedi ma naplu'uk onne, hir wakau rodi rira wanakunu Likaonia ra'ahenia, "Iknik noho makromon enihe kopuredi ramwali ri mormori kemen me'e!"

<sup>12</sup> Ende hir waki Barnabas naran 'Zeus' ono hirira noho makromon uluwakun naran onne, la Paulus hir waki naran 'Hermes' ono Paulus

penia man wakunu eni, la hirira noho makromon ma nauroin wakunu warei naran Hermes.

<sup>13</sup> Rira imam nala'a laa kote paharne laa rira noho makromon Zeus nin rom-leu ma na'urani nika lapa makan. An lae ne, ai nodi sapi dalu ida woro'o noro au dipi laa nika lapa makan. Ai noro heri onne raram nodi resne ha mormori onne rodi hoikani woro'ohe.

<sup>14</sup> Barnabas noro Paulus ma namwali hophopon ma nodi Yesus Lirnenihe derne rira panaeku onne, idewe hir sirrikiyedi rira rain lari laa heri toro,

<sup>15</sup> wakaukau ra'ahenia, "Heih! Alhi'ihepenia mim hi'i ha enie? Mayai eniyenihe ri mormori naise ai walum haenhi. Am mai loikaru Makromod Lalap Lirna Wawa'an ki mi leke mim ren hoikani noho makromon ma ka namlolenihe, la mai hoikani Makromod Lalap man mormori eni. Ai penia ma nakuku nawau a'am noro noho wawan noro kahi, la man umupala ha or'ori na'akeme ma aile raramne.

<sup>16</sup> Kade nano nonolu Makromod Lalap hurinohi ri mormori noho wawan lernohi rira raram nodi aimehi,

<sup>17</sup> maa Ai kan hamlinu nala tanada ai wallumhe leke mi mauroin namlolo kokkoo Ai onne inhoi. Tanada man Ai nala ki mi hi'i heheni: Ai nala ha man wa'an, nala okon kuru wara lanik, la hi'i noho ennen namwali nin yare. Ai nala i wal'uhe hanana'an, la nahuwa'an mi akim."

<sup>18</sup> Kade Paulus noro Barnabas wakunuweddi roro heri onne me'e, maa sus wake'e mene hir dadiyalahe leke yon heri resne ha mormori rodi hoikani hi.

<sup>19</sup> Enine ri Yahudi wo'ira nano kota Antiokia noro kota Ikonium mai Listra rawa'u ri nammori lolo onne, leke hir lernohi rira honorok panaeku yaka. Penia hi rodi waku wasla Paulus, soru kemen laedi kote paharne, ono hi rauroin nahenia an makiyedi me'e.

<sup>20</sup> Maa, ri man lernohi Jesus laa ramriri Paulus herne wali-wali, mahar po'one, ai namaka wali laa kote raram wali'ur. Mai noho werra'ha ai noro Barnabas ra'alono laa kota Derbe.

*Paulus noro Barnabas wali wali'ur laa kota Antiokia ai noho Siria*

<sup>21</sup> Hir minle Derbe, Paulus noro Barnabas loikaru Makromod Lalap Lirna Wawa'an eni, la ri nammori lernohi Jesus. Enime'ede hir wali wali'ur laa Listra. Horu ne, hir wali laa Ikonium mene wali laa Antiokia ai Pisidia.

<sup>22</sup> Lolo kota-kota onne hi ra'alapa man lernohi Jesus onnenihe akin, la nounaku hi leke hi ramkene lernohi Jesus. Hir wakuku ra'henia, "Ika lernala kenene panatal noro ha man sus nammori mene i kala'a Makromod Lalap Nin miminlole raram."

<sup>23</sup> Woro'ohe nili ri ida woro'o ma akin naili'il Jesus leke ramwali man leluwai makrana kerei raramne lolo kote laa kote. Hi ra'aluli kemen ka ra'ak, la hi'i lir napanak leke Makromod Lalap

norle'ule'u norwaliwali man leluwai makrana onnenihe.

<sup>24</sup> Onne horu, Paulus noro Barnabas rala'a lolo noho Pisidia rakan noho Pamfilia.

<sup>25</sup> Rakan lolo onne hir loikaru Makromod Lalap Lirna Wawan wali'ur lolo kota Perga. Horu ne, hi rala'a laa kota Atalia.

<sup>26</sup> Nano Atalia hir hopol wali wali'ur laa kota Antiokia ai noho Siria. Lere nonolu onne heri man lernohi Jesus lolo Antiokia onne rapanak Makromod Lalap nala Nin rere'e haharu noro molollo woro'ohe, leke howok Nin honowok, la ors eni rira honowok onne horuwedi me'e.

<sup>27</sup> Hir rakan Antiokia ne, hir ra'ukwuku kerei raramne leke wakunu panaeku na'akeme man Makromod Lalap hi'iyedi lolo rira nala'ala'a me'e. Enla hir konohi hi'ihewi Makromod Lalap hari kalla leke ri ma ka namwali Yahudi enihe akin naili'iledi Jesus me'e.

<sup>28</sup> Hir min nalo'ol roro man lernohi Jesus lolo kote onne.

## 15

### *Honopun Yerusalem*

<sup>1</sup> Ri Yahudi ida woro'o rano noho Yudea mai kota Antiokia wakuku ri ma akin naili'il Jesus lolo onne ra'henia, "Lo'o mi kam lernohi Musa nin keneri hono'ok de lam sunate, Makromod Lalap ka nala or'ori dardari ma kan horu ki mi."

<sup>2</sup> Paulus noro Barnabas kar huri wu'u ri onnenihe, penia rawalha lira naruri roro hi. Kame'ede, man lernohi Jesus lolo Antiokia kukul Paulus noro Barnabas

roro ri ida woro'o namehin rano rir kerei raramne rala'a laa Yerusalem, leke wakunuwala panaeku onne roro hophopon ma nodi Yesus Lirna roro uluwakun kerei enihe.

<sup>3</sup> Ende hi rala'a ne, kerei raramne na'akeme lolo Antiokia rorkaru hi rakan kote paharne. Hi rala rir tape masi horu, rala'a lolo noho Penesia laa noho Samaria kukunohi ri ma akin naili'il Yesus lolo onne ra'henia, "Ri ma ka namwali Yahudi nammori akin naili'iledi Yesus me'e." Manin lolo onne derne lirna onne hi akin nahuwa'an wake'e.

<sup>4</sup> Hir rakanedi Yerusalem, uluwakun kerei roro hophopon ma nodi Yesus Lirna, roro kerei raramne na'akeme kokalahe wawa'anedi. Ende hir konohi hi panaeku na'akeme man Makromod Lalap hi'iyedi lolo hi eni.

<sup>5</sup> Maa, ri ida woro'o ma nano Parisi rir muku man lernohi Yesus haenhi, hi ramriri wakunu ra'henia, "Hopon ri ma ka namwali Yahudi man lernohi Yesus enihe lar sunatedi, la hopon hi lernohi Musa nin keneri hono'ok eni!"

<sup>6</sup> Enine hophopon ma nodi Yesus Lirna roro uluwakun kerei enihe ra'ukwuku leke wakunu panaeku onneni wewerre.

<sup>7</sup> Hi rahirre honorok aki nalo'ol mene Petrus namriri na'henia, "Konohiyala i wal'u na'ahoru. Mi mau-roin lere man laedi Makromod Lalap polu ya ano mi na'ahoru, leke ya'u loikaru Ai Lirna Wawa'an eni laa ri ma ka namwali Yahudi enihe. An hi'i heheni leke hir derne

Lirna onne la akin naili'il Yesus.

<sup>8</sup> Enla Makromod Lalap ma nauroin ri mormori akinne, nodi kunukunohi nahenia An kokaledi ri ma ka namwali Yahudi onnenihe ono Ai nala Roh Kudus hi namnenehe Ai naledi Roh Kudus maika ma namwali Yahudi enihe.

<sup>9</sup> Makromod Lalap ka na'ilil naheir ik koro hi. Ai na'amouwedi hi akin me'e ono hi akin naili'il Yesus.

<sup>10</sup> Ende, i wal'uhe, alhi'ihepe mi raram nodi ken Makromod Lalap makun? Alhi'ihepe mi makerne ri ma ka namwali Yahudi enihe hi'i hi sus wake'e duni ta'al hi noro agame nina keneri hono'ok rahue? Ik upud a'ad me'ene kar paekunala lernohi keneri hono'ok rahu onne, emene maika ho'o!

<sup>11</sup> Ka! Naherre nawaliyedi! Ik akin naili'il Yesus, de ik kauroin nahenia ika lernala or'ori dardari ma kan horu nano Makromod Yesus Nin rere'e haharu eni mehe. Ri ma ka namwali Yahudi enihe lernala or'ori dardari namnenehe maika haenhi."

<sup>12</sup> Enpenia ri man hopun enihe na'akeme karkaramedi lolo onne. Enine Barnabas noro Paulus wakunu wali'ur hi'ihehewi Makromod Lalap nodi hi hi'i ha ri kan dodo'onnale makun lolo ri ma ka namwali Yahudi enihe kalarna.

<sup>13</sup> Hir wakunu horu, Yakobus na'henia, "Kono-hiyala, i wal'u na'ahoru! Makaniyala maya'u nanu!"

<sup>14</sup> Idediyeni Simon Petrus konohiyedi maika hi'ihehewi Makromod Lalap kan huri

we'er ri ma ka namwali  
Yahudi enihe nano nonolu  
eni, maa nalhari Nin rere'e  
haharu, de nili ri nano hi leke  
namwali Ainin ri.

<sup>15</sup> Onne namnenehe  
panaeku man nabi-nabi  
loikaruweddi lolo Horok Lap  
nonolu eni me'e. Horok onne  
na'ahenia,

<sup>16</sup> 'Makromod Lalap  
na'ahenia:

Onne horu, lere man mai  
Ya'u wali wali'ur  
leke wanna Daud noro  
upun anan rira nakar  
ma nadporeni,  
la hi'i wali'ur lukur akur ma  
nadiyaur eni,  
leke namriri wali'ur;

<sup>17</sup> leke ri na'akeme ma aile  
noho wawan makun,  
ri ma ka namwali  
Yahudi enihe man Ya  
apoluweddi ramwali  
Ainu'u ri haenhi,  
mai ranoin Makromod.

<sup>18</sup> E'eniyen Makromod Nina  
wanakunu  
man An loikaruweddi  
mouropo nano lere  
nonolu eni me'e.' " \*

<sup>19</sup> Yakobus na'aheni  
wali'ur, "I wal'uhe, ainu'u  
honorok panaeku eniyen:  
Yon ik hi'i susa ri ma ka  
namwali Yahudi enihe, man  
mehe re'e Makromod Lalap  
nodi molollo hi akin.

<sup>20</sup> Maa, wa'an rehi ika hi'i  
horok ida aku hi hopon yon  
hi'i panaeku ida woro'o: Yon  
ra'an hanana'an man ri nodi  
hoikani lernulu aukerhe, yon  
ra'an mahin man rarna ka  
namhara makun, yon romun  
rarna, la yon mo'oni maeke  
holi yaka leke yaka.

<sup>21</sup> Konohi hi panaeku  
eniyen, leke yon hi ra'ihoru  
ra'idaru ri Yahudi enihe, maa  
ida man mori wawa'an noro  
ida, ono nano nonolu me'e,  
aki Alam Renren Warwarna  
rin laa Yahudi nin kerei  
raram leke lese Musa nina  
keneri hono'ok eni, la hir  
wakukuwala keneri hono'ok  
onne lolo kota na'akeme."

*Hir hi'i horok rala ri ma  
ka namwali Yahudi enihe ma  
akin naili'iledi Yesus*

<sup>22</sup> Ende hophopon ma nodi  
Yesus Lirna roro uluwakun  
kerei roro kerei raramne  
na'akeme, hi rala kenekrohu  
nili ri ida woro'o rala'a Antiokia  
roro wewerre Paulus noro Barnabas wali'ur.  
Hir nili Silas noro Yudas (man  
waki Barsabas haenhi).  
Hir nili woro'ohe ono rin  
horhawa hi narehi ri namehin  
lolo kerei Yerusalem  
raramne.

<sup>23</sup> Ende kerei onne hi'i  
horok ida aku noro man laa  
enihe rodie. Horok onne  
lirna na'ahenia,

"Nano mi walinhe ma  
namwali hophopon ma  
nodi Yesus Lirna roro man  
leluwai makrana lolo kerei  
enihe,

Aku laa ai walinhe ma ka  
namwali Yahudi enihe, ma  
aile kota Antiokia, noho  
Siria, noro noho Kilikia.

Konohiyala ai walinhe  
ma akin naili'il Yesus  
na'ahoru!

<sup>24</sup> Am derne ri ida woro'o  
nano mayai kiyedi Antiokia  
wakuku mi ha ma na'o'o  
nadewe mi honorok akim la  
hi'i mi akim ka namkene. Ai  
kam hopon ri onnenihe hi'i  
ha onneni.

\* **15:18** Am. 9:11-12

<sup>25</sup> Enpenia am ra'ukwukuwedi me'e, modi akim mahaku nili ri ida woro'o, hopon hi ki ai wallumhe. Hi ra'alono roro wewerre Paulus noro Barnabas man ai mararamyakeni.

<sup>26</sup> Lere man laedi manlo'o rin nesne ri woro'o onnenihe, maa hi ramkene lernohi Makromod Yesus Kristus.

<sup>27</sup> Ende am hopon Yudas noro Silas ki ai wallumhe, leke mehe ra'amou ra'aropo ainima honorok panaeku ma aile horok eni raram.

<sup>28</sup> Ai moro Roh Kudus hi'i kenekrohu kan wa'an ma'awerek mi noro agame nin holoor halauk rahu eni kokoko panaeku ida woro'o mehe.

<sup>29</sup> Onnenihe: Yono ra'an hanan'a'an ri nodi laa hoikaniyedi lernulu aukerhe, yon romun rarna, yon ra'an mahin man rarna ka namhara makun, la yon mo'oni maeke holi yaka leke yaka.

Lo'o mim lernohi holoor halauk ida woro'o eniyenihe mim hi'i ha man wa'an.

E'eni mehe ainima honorok panaeku ki mi."

<sup>30</sup> Ri wo'akka ma nodi horok onne konohiyala Yerusalem nina kerei raramne horu, de ramharedi lolo onne ra'alono laa Antioquia. Hir rakanedi Antioquia ne, hi ra'ukwuku kerei raramne na'ahoru leke rala horok onneni.

<sup>31</sup> Heri dernedi ri lese horok onne horu ne, hi akin nahuwa'anedi la hi honorok akin kan laa ki laa mai me'e.

<sup>32</sup> Onne horu, Yudas noro Silas (woro'ohe ramwali nabi haenhi) wakunu nalo'ol, nounaku hi walinhé man lernohi Yesus leke ra'alapa hi akinhe.

<sup>33</sup> Yudas noro Silas min lolo onne nalo'oledi tarana mene hi walinhé ma akin naili'il Yesus lolo Antioquia huri hi wali wali'ur laa Yerusalem, la ra'ahenia, "Mala'a wawa'anedi! Mala'a, yon hamlinu mayai, la modi anim tape masi laa ri man hopon mi mai enihe."

<sup>34</sup> [Maa Silas mehe hi'i kenekrohu minle Antioquia, de kan wali me'e.]\*

<sup>35</sup> Paulus me'e ne noro Barnabas min nalo'ol lolo Antioquia. Hi roro ri nammori wakukuwala, la loikaru Makromod Lirna Wawan.

### *Paulus noro Barnabas rahina'ar*

<sup>36</sup> Ka nalo'ol Paulus lariyala Barnabas na'ahenia, "Mai, ika laa ka'arala ik walih ma akin naili'il Yesus lolo kota na'akeme man ik loikaruwedi Makromod Lirna Wawan me'e, leke ika po'on rira honoli hi'ihewi, wa'an, ee ka."

<sup>37</sup> Barnabas raram nodi lariyala Yohanis (rapolu Markus haenhi) ra'alono,

<sup>38</sup> maa Paulus namhene na'ahenia, "Lo'o yon lariyala ai me'e, ono nonolu an lernohi ika laa, maa ai ka namkene howok noro ika, de an hoikaruwedi ika lolo Pamfilia."

<sup>39</sup> Ende Paulus noro Barnabas rawalha lira la rasesi me'e, de woro'ohe

\* **15:34** Horok man aile lolo tanada [ ] raram, namwali horok man kaale lolo horok Yunani dedesne wake'e heruwali.

rahina'aredi. Barnabas nala Markus hopol wewerre laa noho Siprus,

<sup>40</sup> maa Paulus nili Silas namwali nin kalla wali. Ka rala'a makun, hi walinhe lolo Antioquia nina kerei hi'i lir napanak leke Makromod nala Nin rere'e haharu hi, la norle'ule'u norwaliwali hi lolo kalla.

<sup>41</sup> Woro'ohe konohiyala, rala'a laliwewer noho Siria noro noho Kilikia. Hi rala'a ne, ra'alapa ri akin lolo kerei-kerei lolo onne.

## 16

*Timotius lernohi Paulus noro Silas*

<sup>1</sup> Ramhara noho Kilikia, Paulus nala'a kota Derbe noro kota Listra. Lolo onne ri ida aile naranne Timotius man lernohi Yesus haenhi. Ai inne ri Yahudi ma akin naili'iledi Yesus me'e, maa aman ri Yunani.

<sup>2</sup> Lolo Listra noro Ikonium walin ma akin naili'il Yesus na'ahoru rauroin Timotius onne ri ma nina honoli wa'an der horhawe.

<sup>3</sup> Paulus raram nodi Timotius lernohie de, sunatedi ai leke yon ri Yahudi lolo onne rahinorok namehiyala ono hi rauroiroin ai aman ri Yunani.

<sup>4</sup> Hir kuli leke-leke lolo onne, hi rodi horok nano hophopon ma nodi Yesus Lirna roro uluwakun kerei Yerusalem enihe kukunohi ma akin naili'il Yesus onnenihe leke derne rakani rira kenekrohu eni.

<sup>5</sup> Enpenia lolo onne hi ra'alapa kerei raramne

na'akeme akinhe leke ramkene lernohi Yesus, la akilere ra'uwali ri ma akin naili'il mamani de kerei raramne eren nammomori.

*Paulus minle Troas mehen do'on haida nano Makromod Lalap*

<sup>6</sup> Roh Kudus kawala Paulus noro nin kalla wali enihe loikaru Lirna Wawa'an eni laa ri mormori manina Asia. Ende hi ramlololo laa noho Frigia noro noho Galatia.

<sup>7</sup> Hir rakanedi korono noho Misia, hir kene laa noho Bitinia raram, maa Roh Kudus kawala hi yono laa noho onneni.

<sup>8</sup> Enpenia woro'ohe rala'a mamani lewen Misia, la idewe kopur laa lour laa kota Troas.

<sup>9</sup> A'alam hi ramkukuru lolo Troas ne, Makromod Lalap hi'i haida harile Paulus mehen do'on. An do'on ri ida manina Makedonia namririri lolo kalarna nappanakedi na'ahenia, "Lariyala mai noho Makedonia leke paku mayai."

<sup>10</sup> Paulus do'on Makromod Lalap Nina hini'i onne horu, ai ma'akene\* mala'a Makedonia, ono am paeku wuku la mala kenekrohu nahenia Makromod Lalap penia hari kalla mayai lam loikaru Lirna Wawa'an eni ri ma aile lolo Makedonia.

*Lolo kota Pilipi, Lidia akin naili'il Yesus*

<sup>11</sup> Am ha'a kapal lolo Troas mene hopol namlololo laa Samotrake, la orekiyedi

\* **16:10** Nano wanakunu lirna 'ai ma'akene', ik kauroin nahenia lere romromo dokter Lukas man hi'i horok 'Honowok Nair' enie lernohi Paulus la namwali nin kalla wali haenhi.

nanumene am hopol laa kota Neapolis.

<sup>12</sup> Am kopur laa ro lolo onne, ai mala'a laa Pilipi ma namwali kota ma na'ono lolo noho Makedonia. Manin Roma nammori minle kota eni haenhi.

<sup>13</sup> Rakan Alam Renren Warwarna, am laa kote paharne laa oir wauwau kilinna, kan ko'uwala kote nin nika lapse. Am laa lolo onne ono ai makoto lo'o Yahudi rira lir napanak onno aile lolo onne. Am rakan ne, ai maikoro, wakunkunu noro maeke ida woro'o ma naikokoro wuku lolo onne.

<sup>14</sup> Maeke ida aile ma naranne Lidia manina Tiatira, la ai ma na'olu tapi au'auwe. Ai eni ri ma nadedem na'uli nasa'a Makromod Lalap, de Makromod nala honorok aki ai leke kokala Paulus nina wanakuku loloi kakaru eni.

<sup>15</sup> Onne horu, hir laa oir leke ulutade Lidia noro nakar raram na'akeme. Hir ulutade horu ne, an lariyala mayai na'henia, "Lo'o i wal'uhe mauroin mayai akin naili'iledi Jesus namlolo kokkoo, mai minala ainu'u nakar nanu ke'e." Ende an nori yai leke ai me'e nohiyala nina napanak onneni.

### *Kele Paulus noro Silas rale laa bui raram*

<sup>16</sup> Ler ida ai mala'ala'a laa Yahudi rira onno rodi hi'i lir napanak wali'ur, am holikuku hophopon wahwahan maekida. Hayakyaka hu'ur ai raramne, de ai nauroin hi'i u'ur leher penia nauroin panaeku ma namwali lere man mai. Enpenia

makromonhe lernala kupan nammori nano nin woroin eniyeni.

<sup>17</sup> Maeke onne lernohi Paulus noro mayai manani, wakaukau mamani na'henia, "Ri eniyenihe Makromod Lalap Ma Narehi Ma Nalewen Nina hophopon wahwahane! Hir mai leke konohi i wal'u na'ahoru hi'i inhawa leke lernala Makromod Lalap Nina or'ori dardari ma kan horu."

<sup>18</sup> Ende lelere a'alam an wakau heheni mamani rakan lere ida Paulus kan kerhu nina wanakau me'e, de ai nadwali po'on desnala maeke onne hophopon hayakyaka man hu'ur raramne na'henia, "Yo odi Yesus Naranne, de mamharedi ai here!" Ler onne me'ede, hayakyak onne namharedi maeke onne.

<sup>19</sup> Idewe makromonhe eremnaledi nahenia lo'o rira lere alam lernala kupan moluwedi me'e, de hir kele Paulus noro Silas sedu rodi laa pasar raram leke rakpali ma nodi molollo lolo kota onne.

<sup>20</sup> Rakpaliyedi ma nodi molollo enihe ne, hir tumdesne ra'ahenia, "Ri eniyenihe ri Yahudi. Hir hi'i rusrusu ar'arra lolo iknika kote.

<sup>21</sup> Hir wakuku ri noho honolla ma ka namnehe na'alono ika manin Roma enihe nik noho honolla. Ende kan wa'an ik kokala hi, ono luli ik lernohi rira noho honolla onneni!"

<sup>22</sup> Enime'ede, heri lolo onne lernohi hi tumdesne woro'ohe haenhi. Ma nodi molollo onnenihe hopon ri

hedu rikiyedi Paulus noro Silas rira nainair, riuk rerhe woro'ohe.

<sup>23</sup> Hir riuk rerhe woro'ohe kemen apinha wake'edi nanumene rale laa bui raram. Ma nodi molollo enihe hopon uluwakun bui eni nadiyaka na'apiku woro'ohe.

<sup>24</sup> Uluwakun bui eni lernaledi rir honopon onneni ne, ai nala hi laa kamar ma aile raram wake'e la nodi dasle dasdasle hi ein.

<sup>25</sup> Mai alam totore Paulus noro Silas mahanoro hi'i lir napanak, rahinara, la ra'uli rasa'a Makromod Lalap. Ri namehin man minle bui raram derderne rira hanara haenhi.

<sup>26</sup> Ramlilinnohi rururuwai lape namwali, de bui nina mesel noro pondasi narururu wake'e. Idewe bui nina nikenihe nahinari mouwedi, dasle ma aile liman ein mehe nawine'er mouwedi.

<sup>27</sup> Uluwakun bui eni namkukuru, nahumarna namaka idewe, la po'on nika na'akeme nahinariyedi, lehu nina rae leke mehe nodi nesne me'e, ono an pene'ek ri mormori manina bui raram na'akeme ramhara lari mouwedi me'e.

<sup>28</sup> Maa Paulus wakau naruri, "Yono mehe mesne o, mayai na'akeme meneni yai makun!"

<sup>29</sup> Uluwakun onne napank wadu ida nodie lari laa bui raram. Ai narururue, wali kemen laa yawa Paulus noro Silas kalarna.

<sup>30</sup> Enime'ede ai norkaru hi laa paharne na'ahenia, "Papee, ya'u hi'i inhawa leke yon lernala hunukum makimaki,

maa lernala or'ori dardari ma kan horu."

<sup>31</sup> Paulus noro Silas walhale ra'ahenia, "Papa, hi'i akin naili'il Jesus leke papa noro nakar raram na'akeme rahinuriyedi nano hunukum, la lernala Makromod Lalap Nina or'ori dardari ma kan horu eni."

<sup>32</sup> Enine Paulus noro Silas loikaru Makromod Lirna Wawan uluwakun bui noro nakar raramne na'akeme.

<sup>33</sup> Alam totoro onne me'ede uluwakun bui onne na'amou hirira no'o ririuk rererhe ma aile kemen. Alam onne me'ede hir laa oir leke ulutada ai noro nakar raram.

<sup>34</sup> Ulutade horu, uluwakun bui onne norhe laa nin nakar nala hanana'an, ra'an. Ai noro nakar raram na'akeme akin nahuwa'an wake'e ono hi akin naili'iledi Makromod Lalap me'e.

<sup>35</sup> Rakan werra'ha al'alam ma nodi molollo nano Roma onnenihe hopon rira ma nasala ke'uraukhe mai uluwakun buie na'ahenia, "Huriyedi woro'ohe here!"

<sup>36</sup> An dernedi rira honopon eni ne, an laa konohi Paulus na'ahenia, "Papee, idedi nanumene Roma nin ma nodi molollo enihe rala honopon mai na'ahenia huriyedi paphe nano bui raram. Ende lo'o me'eni me'e Paphe wali laa nakar. Mala'a wawa'anedi."

<sup>37</sup> Enima Paulus namhene la na'aheni ma nasala ke'urauk onnenihe, "Mayai manin Roma haenhi! Ai mamhene mala'a, ono minima ma nodi molollo kar ho'ok kail mayai lernohi Roma nin keneri hono'ok makun, hir riuk rerhedi

mayai heri rahue kalarna, ralai laa bui raram me'e. Kade Roma rira keneri hono'ok kan huri hi hi'i heheni, maa lere eniyeni rodi kalla susuwar huri yai! Ai mamhene! Lam hopon minima ma nodi molollo onnenihe meher mai huri yai!"

<sup>38</sup> Enime'ede ma nasala ke'urauk onnenihe wali laa konohi Roma nin ma nodi molollo onnenihe rira panaeku onne. Hir derne Paulus noro Silas manin Roma haenhi, ramka'ukedi.

<sup>39</sup> Ende hir laa rapanak lili maumau Paulus noro Silas. Horu ne, hi rorkaru woro'ohe nano bui raram mai paharne la ra'ahenia, "Lo'o wa'an rehi paphe mamharedi koten'i ke'e."

<sup>40</sup> Paulus noro Silas ramharedi bui ne, hi rala'a Lidia nina nakar. Lolo onne hir pakromo roro walin ma akin naili'il Jesus enihe raledi nounaku hi leke ra'alapa hi akin. Horu ne, hi rala'a ramharedi kota Pilipi.

## 17

### *Paulus noro Silas laa Tesonika*

<sup>1</sup> Hi rala kalla lolo kota Amfipolis noro kota Apolonia nanumene rakan kota Tesonika. Lolo onne Yahudi rira kerei aile.

<sup>2</sup> Ende naise nadedem, Paulus laa kerei raram noro ri manina lolo onne wakunu Horok Lap Lirna, la rahirre honorok panaeku nano Horok Lape raram nano nina lisar laa lisar. Alam Renren Warwarna wokelu an hi'i heheni.

<sup>3</sup> Paulus na'amou na'aropedi honorok nano Horok Lape ma nodi kunukunohi nahe-nia Kristus man Makromod Lalap kikan namwali Rai laa ewi-ewi mai noho wawan leke lernala apinpinha, maki, la mori wali'ur. Ai na'amou panaeku onne leke hi rau-roin mouropo Lirna Wawan nina panaeku ma namlolo. Horu ne, ai na'ahenia, "Yesus man ya'u konohi mi eni, namwali Rai onne."

<sup>4</sup> Ende ri Yahudi wo'ira akin naili'iliedi Jesus me'e, de lernohi Paulus noro Silas. Lolo onne ri Yunani nammori ma namka'uk Makromod Lalap roro idewe maeke marna nammori akin naili'il Yesus haenhi.

<sup>5</sup> Enimaa, ri Yahudi ma akin ka naili'il Yesus enihe, hi akin apinha wake'e Paulus noro Silas. Ende hi ra'ukwukuwedi mo'oni man ailanna ma nakosi mamani leke reore rawa'u ri lolo kote raram na'akeme hi'i rusu arra. Heri rahu onne laa idewe Yason nina nakar ranoin Paulus noro Silas, leke rodi woro'ohe laa paharne rakpali heri onneni.

<sup>6</sup> Maa kar do'on Paulus noro Silas, de hir soru Yason noro walin ma akin naili'il Jesus namehin rodi laa rakpali ma nodi molollo lolo kota onne. Hir wakau ra'ahenia, "Lolo ewi-ewi Paulus noro Silas hi'i rusrusu ar'arra mamani! Ler eniyeni hir mai iknika kote haenhi,

<sup>7</sup> la Yason kokaledi hi lolo ainina nakar me'e. Hi na'akeme kar lernohi rai Kaisar nina konomdere, ono hi ra'ahenia Rai man kulu narehi aile, naranne Yesus."

<sup>8</sup> Rir wanakunu onne hi'i ri nammori roro ma nodi molollo lolo kota onne raram rakponhu me'e.

<sup>9</sup> Ende ma nodi molollo onnenihe hopon Yason noro nina muku wali ma akin naili'il Jesus enihe pair kupan rodi herre kemen leke yon lernala hunukum lernohi kote nina keneri hono'ok mene huri hi rala'a.

*Paulus noro Silas min lolo Berea*

<sup>10</sup> A'alam onne me'e de walinhe ma akin naili'il Jesus lolo onne hopon Paulus noro Silas rala'a laa Berea. Hir rakanedi enne, rala'a Yahudi nina kerei raram.

<sup>11</sup> Ri manin Berea kar suwarala honorok akin, de kokale hi wa'an narehi manin Tesalonika onnenihe. Hir raram nodi derne Paulus nina loloi kakaru eni. Akilere hir lese Horok Lape rodi naho'ok Paulus nina wanakuku ke'e, de namlolo, ee ka.

<sup>12</sup> Ende ri Yahudi nammori akin naili'il Jesus. Yunani rir maeke marna roro mo'oni nammori akin naili'il Jesus haenhi.

<sup>13</sup> Ri Yahudi manina Tesalonika onnenihe derne Paulus mahan loikaru Makromod Lalap Lirna Wawan lolo Berea ne, hir mai Berea haenhi rawa'u heri lolo onne leke yono kokala Paulus me'e.

<sup>14</sup> Me'e'eni me'e de walin man minle Berea rorkaru Paulus laedi herraram, maa Silas noro Timotius minedi kote.

<sup>15</sup> Ende hi rorkaru Paulus rakan Atena nanumene wali wali'ur laa Berea. Paulus nou hi, wali laa hopon Silas

noro Timotius halhala ler-nohi here.

*Min lolo Atena*

<sup>16</sup> Paulus newnewek woro'ohe mai Atena ne, an po'on wali-wali kote raram aukerhe honoi kanani mamani, de akin woir rehi.

<sup>17</sup> Ende Paulus nala'a Yahudi rir kerei raram loiwuku honorok aki noro ri lolo onne, ri Yahudi roro ri ma ka namwali Yahudi ma namka'uk Makromod Lalap haenhi, leke hir ramkene ler-nohi Yesus. Enla akilere an laa pasare loiwuku honorok aki noro inhoi-inhoi ma aile lolo onne haenhi.

<sup>18</sup> Orworoin nano muku Epikoras noro muku Stoa roro Paulus rawalha lira haenhi. Heruwali ra'ahenia, "Ri onne nauroin inhawa pe? Ka nauroin haida! Wakunu namansa mehe." Ri name-hin ra'aheni, "Ai onne lo'o wakunkunu noho namehin nina noho makromon!" Hi ra'aheni heheni ono Paulus loikaru Lira Wawa'an ma na'ono Yesus, la hi'ihewi An maki, la mori wali'ur.

<sup>19</sup> Kame'ede, hi rorkaru Paulus laa wo'or Areopagus leke raikoro wuku. Raikoro wukuwedi, hi ra'ukani Paulus, "Ai raram nodi mauroinala papa nina wanakuku worworu man idedie loloi kakaru onne,

<sup>20</sup> ono am dernessi papa wakuku panaeku ida woro'o man rin kan derne rau-roinnale makun. Ai raram nodi mauroin panaeku loloi kakaru onne inhaw?"

<sup>21</sup> (Manin Atena roro ri rano noho namehin man minle kota onne radedem ra'ahoru alam leken mamani

makani wanakuku man worworu leke rahirre honorok panaeku.)

<sup>22</sup> Ler onne me'e de Paulus namriri lolo heri man minle rana'ukwuku onne kalarña na'ahenia, "Konohiyala i wal'uhe Atena mie! Ya'u po'onedi i wal'uhe mampe'el hoikani noho makromon mamani.

<sup>23</sup> Ya'u lalaa mamai lolo minim kote waliwali po'onedi minim honoi kanani rahu ne, ya'u do'on panaur ida horhorok ai wawan na'ahenia, 'Panaur eni hi'i leke horhawe noho makromon ma naranne ri ka nauroinnala makun.' Ende mim hoikani Makromod Lalap eni, maa ka mauroin Naran makun, onne penia ya'u loloi kakaru ki mi.

<sup>24</sup> Makromod Lalap eni ornakuku la ornawau, la man umu man pala noho ne'en raram na'akeme, la Ai nodi molollo a'am raram noro noho wawan, penia Ai kan minle romleu rodi hi'i honoi kanani man ri mormori hi'i eni.

<sup>25</sup> Makromod Lalap me'e ne, ka napanak ri mormori pakue, ono Ai penia ma nala ri mormori rira or'ori dardari, aran, la rira popono oreiki na'akeme.

<sup>26</sup> Nano ri ida, an hi'i ika ri mormori na'akeme, la hopon maika holi lolo noho wawan na'akeme. Nano dedesneni, Makromod Lalap nadoho la nakakaredi ma'anana-ma'anana la lolo ewi-ewi ika ri mormori holi lolo noho wawan eni.

<sup>27</sup> Makromod Lalap hi'i heheni leke ri mormori ranoin Ai. Enleke lo'o hi

ranoin, hir pakromnala Ai. Enimaa namlolo kokkoo, Ai kan ko'uwala nano ika meririi.

<sup>28</sup> Naise ri ida naledi lirna me'e na'ahenia,  
'Ika mori, lalaa mamai, la holi noho wawan ono Makromod Lalap Nina molollo.'

Mi upun a'um ida woro'o nonolu eni rahinara ra'ahenia,  
'Ika na'ahoru penia Makromod Lalap ananne.'

<sup>29</sup> Ende, i wal'uhe, maika na'ahoru penia Makromod Lalap ananne, yono ika pene'ek Makromod Lalap Nina kemen naisa aukerhe rodi hi'i nano maha, pere, me waku man ri mormori mehe hi'i nodi nina woroin.

<sup>30</sup> Nonolu eni Makromod Lalap kan po'on nohi iknika hini'i wenewhe poloo hoikani noho makromon ma ka namlolenihe, maa rakan lere eniyeni An hopon ri na'akeme lolo noho wawan herre rira morimori ma ka namloleni, mai derne rakani Ai ma namlole,

<sup>31</sup> ono Makromod Lalap kukuledi lere man mai ida leke ho'ok kail ri mormori noho wawan na'akeme namnehe na'alono me'e. Makromod Lalap na'onedi Ri ida hi'i hono'ok kanail onne. Enleke ri na'akeme rauroin mouropo onne inhoi, An makiyedi, maa Makromod Lalap na'amoriyedie wali'ur namwali man ho'ok kail eni."

<sup>32</sup> Hir derne Paulus nin wanakunu eni horu, heruwali ralau Paulus, ono hi akin ka naili'il ri man makiyedi mori wali'ur,

maa heruwali ra'heni, "Ai raram nodi derne ai walin wakunuwala panaeku onne wali'ur."

<sup>33</sup> Ende Paulus hoikaruwedi rana'ukwuku onneni me'e,

<sup>34</sup> maa ri heruwali nano heri onne lernohi Paulus, la hi akin naili'il Jesus. Lolo ma akin naili'il Jesus enihe ri eniyenihe aile: Doinisius ma namwali uluwakun honopun lolo wo'or Areopagus, maeke ida naran Damaris, noro ri namehin haehni.

## 18

### *Paulus min lolo Korintus*

<sup>1</sup> An wakunuwedi lolo wo'or Areopagus horu ne, Paulus namhara Atena nala'a laa Korintus.

<sup>2</sup> Lolo onne an pakromo noro ri Yahudi ida naran Akwila manin noho Pontus. Akwila eni noro hono Priskila eni nanumene rano Italia mai. Hir wali mai Korintus ono rai lapa Klaudius ma nodi molollo lolo kota Roma hopon ri Yahudi na'akeme ramharedi kota onne. Paulus lan ka'ar woro'ohe, la

<sup>3</sup> an min noro hi lolo onne ono nin honowok popono orereki namnenehe hi, de hir howok wewerre hi'i terteru lere leke ra'olu.

<sup>4</sup> Maa rakan aki Alam Renren Warwarne, Paulus nala'a laa Yahudi nina kerei raram wakunkunu leke ri Yahudi roro ri Yunani akinhe naili'il Jesus.

<sup>5</sup> Silas noro Timotius rano Makedonia rakan Korintus ne, Paulus kan hi'i terteru lere me'e, maa an loikaru Makromod Lalap Lirna Wawa'an eni laa ri Yahudi mamani na'ahenia Jesus onne penia Kristus man

Makromod Lalap kikanedi namwali Rai laa ewi-ewi eni.

<sup>6</sup> Enimaa ri Yahudi lolo onnenihe kawkawala nina wanakunu mamani, ramhene derne rakanie, la ra'ihoru ra'idarue mamani. Enpenia Paulus eni ka ne'enohi noro hi me'e, de an disnedi elimo'o hapue nano nin nainair, la dadiyala hi na'ahenia, "Oreki inworo'o lo'o mim makileken moluloin, onne minima sala aimehi. Ka'u hi'i sala. Enla nano lere eni me'e de, yo odi Lirna Wawa'an eni laa ri ma ka namwali Yahudi enihe me'e."

<sup>7</sup> Ende Paulus hoikaruwedi hi nala'a laa nakar ma aile kerei herne onneni. Ornakar onne naranne Titius Yustus ma ka namwali Yahudi, maa nadedem na'uli nasa'a Makromod Lalap.

<sup>8</sup> Ri ma namwali uluwakun Yahudi rir kerei onne naran Krispus. Ai noro nin nakar raram na'akeme akin naili'il Makromod. Enla ri Korintus nammori man derne Paulus nin loloi kakaru eni akin naili'il Jesus, la hir laa oir leke ulutade hi.

<sup>9</sup> A'alam lerida Makromod Lalap hi'i haida harile Paulus mehen do'on. Lolo ha ai mehen dodo'on onne Makromod na'aheni, "Yon mamkauk, maa wakunkunu mamani,

<sup>10</sup> ono Ya'u mehe orle'ule'u orwaliwali o, la ri nammori aile kote raram eni man Ya apoluwedi namwali man lernohi Ya'u. Ende ri kan hi'i yakyaka o mai eni."

<sup>11</sup> Ende Paulus minedi Korintus anna ida rehi nodi Makromod Lalap Lirna Wawan wakuku hi.

<sup>12</sup> Enimaa, rakan lere Galio namwali gubernur lolo noho Akhaya, ri Yahudi enihe lawuku panaeku mahaku, de kele Paulus rodi laa hono'ok kanail onno raram.

<sup>13</sup> Hir tumdesne Paulus na'henia, "Ri eniyeni mai nornori ri leke hoikani Makromod Lalap rodi panaeku ma ka namnehe noro agame nina keneri hono'ok eni."

<sup>14</sup> Paulus na'akeki walha hi, maa Galio na'aheniyedi ri Yahudi onnnenihe, "Heih, ri Yahudi mie! Lo'o minima kalaklak eni namwali yak-sala ida, ee ha ailanna romo, ya'u raram nodi derne minima kalaklakhe leke ho'ok kaile harome.

<sup>15</sup> Maa, eniyeni nawal-walha lira wawe noro ri naran noro minim keneri hono'ok mehe menee! Ya amhene ho'ok kail panaeku naisa eniyeni. Mi mehem ho'oke, ya'u ne, ka."

<sup>16</sup> Enime'ede, Galio toku hi nano hono'ok kanail onno laedi paharne.

<sup>17</sup> Laedi paharne ne, hir kele Sostenes ma namwali uluwakun kerei onne, nukure hono'ok kanail onno paharne, maa Galio kan peinohi wake'e rira hini'i onne.

### *Paulus wali laa Antiokia*

<sup>18</sup> Onne horu, Paulus minle Korintus nalo'ol tarana mene konohiyala walin ma akin naili'il Jesus lolo onne. Ai noro Priskila noro Akwila ha'a kapal wewerre laa noho Siria. Kan hopol makun, Paulus tori nina muruk deul lolo leke Kengkrea leke namwali tanade ai

mahan hi'i nou kerkerhe noro Makromod Lalap.<sup>19</sup> Hir hopol rakan Epesus, Paulus hoikaruweddi Priskila noro Akwila lolo onne nanumene nala'a Yahudi nin kerei raram leke wakunu la rafferre honorok panaeku noro ri Yahudi man aile kerei onne.

<sup>20</sup> Hi rapanak Paulus leke nalo'olala noro hi nanu, maa Paulus namhene

<sup>21</sup> la konohiyala na'henia, "Paphe, oreki inworo'o lo'o Makromod Lalap nala kalla ya'u, i wali wali'ur mai." Horu ne, an ha'a kapal wali'ur namhara kota Epesus.

<sup>22</sup> Enine an kopur laa kota Kaisarea nala'a laa Yerusalem nalala nina tape masi laa kerei raramne lolo onne mene nala'a laa Antioquia.

<sup>23</sup> Paulus minedi lolo Antioquia nalo'ol tarana mene nala'a wali'ur laa ka'arala man lernohi Jesus man minle noho Galatia noro noho Frigia leke na'ori honorok hi wali'ur, la na'alapa hi akinhe leke ramkene naili'il Jesus mamani.

### *Apolos min lolo Epesus noro Korintus*

<sup>24</sup> Ler onne ri Yahudi ida naran Apolos mai Epesus nano Aleksandaria. Ai nauroin wakunu warei, la nauroin mouwedi Horok Lape Lirna La'an.

<sup>25</sup> Apolos onne wakukuweddi me'e, la nauroinedi kalla lernohi Jesus wawa'an me'e. Ende an wakuku nakinemen wake'e, la ai nodi honorok ma namlolo la aki ma nadudu nakote nade'ek Jesus

Nin kalla wawa'an eni. Maa, ai ka nauroin Roh Kudus maiyedi leke min ri raram makun, ono ai nauroin Yohanis ma nodi oir ulutade ri nina unulu tanade mehe.

<sup>26</sup> Ler onne Apolos ka namka'uk, de wakunu ha ma nedille Yahudi rir kerei raramne akinhe. Priskila noro Akwila derne nina wanakuku onneni ne, woro'ohe lariyala rore laa rir nakar. Rakan rira nakar ne, Akwila noro Priskila wakuku ai mouropo Makromod Lalap Nina Kalla ma namlolo wake'e.

<sup>27</sup> Horu ne, Apolos nina panaeku nala'a laa noho Akhaya. Ende nin walin lolo Epesus ma akin naili'il Jesus enihe raram nodi pakue, de hir hi'i horok aku laa walin man lernohi Yesus ma aile Akhaya napanak kokale Apolos wawa'anedi. An rakanedi Akhaya ne, ainin wanakuku paku ri nammori ma akin naili'iledi Jesus me'e. Makromod Lalap nala Nin rere'e haharu man lap hi, penia ramwaliyedi Nin ri me'e.

<sup>28</sup> Apolos noro ri Yahudi enihe rawalha lira lolo heri kalarna, maa Apolos rehiyedi hi ono ai onne namwali ri ma nauroin Horok Lap lewlewen, la ai nodi Horok Lape Lirna ma nodi kunukunohi nahenia Jesus onne Man Makromod Lalap kikanedi namwali Rai laa ewi-ewi nano nonolu me'e.

## 19

*Lalap Lirna Wawa'an lolo Epesus*

<sup>1</sup> Apolos aile Korintus makun, Paulus mahan lali-wewer leke-leke ma aile Galatia noro Frigia. Onne horu, an kopur laa kota Epesus, la lolo onne an pakromo noro ri ida woro'o man lernohi Yesus.

<sup>2</sup> Paulus na'ukani hi na'ahenia, "Lere I wal'uhe akin naili'iledi Yesus ne, kokala Roh Kudus me'e, ee kaunu?"

Hir walhale, "Kaun! Mayai kam dernala Roh Kudus aile makun."

<sup>3</sup> Paulus na'ukani, "Emene I wal'uhe lernohi inhoi nin wanakuku ma na'ono ulutadeni?"

Hir walhale, "Am lernohi Yohanis nina wanakuku ulutadeni."

<sup>4</sup> Enine Paulus na'ahenia, "Ri man Yohanis ulutada enihe, ri man herredi rira morimori ma ka namlolo la derne rakani Makromod Lalap me'e. Maa lere onne me'e de, Yohanis nounaku manina Israel enihe na'ahenia, 'Wa'an rehi mi akim naili'il Ai man kauli'ur mai!' Ri onneni naran Yesus."

<sup>5</sup> Hir derne Paulus na'aheni onne horu, hi na'akeme raram nodi ulutada hi rodi Yesus Naranne.

<sup>6</sup> Enime'ede Paulus kemenala liman hi uluwakun, idewe Roh Kudus nodi molollo hi, penia hi rodi wanakunu namehin wakunkunu la hir wakunu lira man hir kokala nano Makromod Lalap.

<sup>7</sup> Aki hi na'akeme lo'o ri idaweli woro'o.

<sup>8</sup> Alam Renren Warwarna wollo wokelu raram Paulus ka namka'uk, de wakunu mouropo noro ri ma aile Yahudi rir kerei raram leke hi rauroin hi'ihehewi Makromod Lalap nodi molollo ri mormori.

<sup>9</sup> Maa ri ida woro'o nano hi ra'uluwaku kekerhe, de ramhene akin naili'il Jesus. Hir min heri kalarna wakunu nano'onyaka Paulus nina wanakuku ma na'ono Makromod Nina Kalleni. Ende Paulus hoikaruwedhi hi, la ai noro ri man lernohi Jesus enihe ra'alono laa iskole Tiranus. Akilere ai noro hi, ida ma na'ukani ida, la racherre honorok panaeku lolo onne.

<sup>10</sup> Paulus hi'i heheni hehen nanumene anna woro'edi, de ri na'akeme man minle propinsi Asia, ri Yahudi roro ri ma ka namwali Yahudi enihe, hi na'ahohoru derne Makromod Lirna Wawan.

*Skewa ananhe rodi Yesus  
Naran ken rohi hayakyaka  
nano ri raram*

<sup>11</sup> Makromod Lalap nala Paulus ke'eke'el an'anhe hi'i tanade nammori man lewlewen man ri kan dodo'onnala makun, penia

<sup>12</sup> ri nodi Paulus nin hai-warwara noro koronelhe laa ma nakni'ir me'ede, rira ap-inhe wa'anedi, la hayakyak ma aile ri raramne idewe ramharedi.

<sup>13</sup> Ler onne ri Yahudi wo'ira aile ma nadedem lariwewer rohi hayakyaka nano ri raram, de hir ken rodi Makromod Yesus Naran rohi hayakyaka ra'ahenia, "Yo odi Yesus Naran man Paulus loikaruwedhi me'e,

mamharedi nano ri onne raram here!"

<sup>14</sup> Nano ri Yahudi ma nadedem rohi hayakyaka onne mo'oni wo'ikku aile man hi'i eni haenhi. Rira pape naran Skewa la ai namwali ri Yahudi rir imam lalapa. Ende lerida hir ken rodi Yesus naran rohi hayakyak nano ri raram,

<sup>15</sup> maa hayakyak onne na'ahenia, "Ya auroin Yesus noro idewe Paulus, maa ka auroin mie inhoi?"

<sup>16</sup> Horu ne, ri man hayakyaka huhu'ur raram onne nodi ahan nehule, na'an no'o la hedu rikiyedi rira nainair, penia hi na'akeme lari ramno'no'o, radlewlewe nano nakar onne.

<sup>17</sup> Ri Yahudi roro ri ma ka namwali Yahudi man minle Epesus na'ahohoru derne panaeku ma namwali onne, hi ramka'uk wake'e, de eren horhawe Yesus Oin Naranne.

<sup>18</sup> Ri namansa ma akin naili'iledi Yesus me'e, mai rakpali heri kalarna leke rodi akin moumou la roprope konohi rira hini'i ma kan wa'an lere alam man laedi me'e.

<sup>19</sup> Ri onnenihe heruwali hi'i u'ur leher nair rira horok woroin. Ende hi ra'ukwuku rira horok woroin onnenihe na'akeme nanumene hir harne heri rahu kalarna. Horok onnenihe lo'o aki wella na'akeme na'ikeki kupan pere riwan wellima.

<sup>20</sup> Ende nano panaeku man lewlewen naise onnenihe Makromod Lirna Wawan

eren nalolo'ol eren hi'i ri  
nammori akin naili'il Yesus.\*

*Rusu arra lolo kota Epesus*

<sup>21</sup> Panaeku ma namwali  
onne horu, Paulus paekuwedi  
laa lolala Makedonia noro  
Akhaya mene idewe laa  
Yerusalem. Ai na'ahenia,  
“Ya'u laa Yerusalem  
nanumene laa Roma  
haenhi.”

<sup>22</sup> Ende Paulus hopon nina  
man paku enihe, Timotius  
noro Erastus, roluwedie laa  
Makedonia. Enla an mehe  
minala alam ida woro'o lolo  
noho Asia nanu.

<sup>23</sup> Ler onne namwali rus-  
rusu ar'arra lapa lolo Epesus  
ono hir loikaruwedi Yesus  
Nin Kalla eni.

<sup>24</sup> Rusu arra man lapa  
onne namwali heheni: Lolo  
kota onne man kuku pere  
ida aile naran Demetrius.  
Ainin honowok popono or-  
ereki hi'i romleuwana naise  
na'oi Artemis nina romleu  
lapa. Artemis onne, noho  
makromon maeke man hir  
hoikani, la nano Demetrius  
nina honowok onne nin man  
howok enihe lernala kupan  
nammori.

<sup>25</sup> Ende Demetrius  
ra'ukwuku nina man howok  
roro man howok pere name-  
hin enihe na'ahenia, “Kono-  
hiyala, I wal'u na'ahoru!  
Mi mauroin nano iknika  
honowok eni, ika lernala  
kupan nammori.

<sup>26</sup> I wal'uhe mehe mau-  
roinedi inhawe ri onne ma  
naran Paulus hihi'i onnneni.  
An wakuku ri na'ahenia auk-  
erhe man ri mormori hi'ie  
(naise iknika romleuwana

eniyen) ka nodi molollo  
haida. Enpenia ri nammori  
man minle kota Epesus eni  
lernohiyedi nina wanakuku  
onne me'e, la na'akeki noho-  
noho na'akeme ma aile Asia  
lernohi ai haenhi.

<sup>27</sup> Ende, i wal'uhe, ya  
amka'uk iknika honowok  
popono orereki eni lernala  
naran yaka. Onne kan  
mehe, maa ya amka'uk lo'o  
ri kan horhawe iknika noho  
makromon Artemis nina  
romleu lap eni haenhi, de  
lo'o iknik noho makromon  
Artemis ma narehi ma  
nalewen eni kar horhawe  
me'e harome, la oin naran  
molu me'e. Manin Asia roro  
noho wawan na'akeme ra'uli  
rasa'a Artemis eni menee.”

<sup>28</sup> Heri onne derne lirna  
onne horu ne, hi rawuhur  
wake'e la wakaukau  
ra'ahenia, “Ka'uli kasa'a  
iknika noho makromon  
Artemis ma narehi ma  
nalewen eni!”

<sup>29</sup> Rira rusrusu ar'arra  
onne naderre nadaul la  
pe'eredi lolo kote na'akeme.  
Ende heri man rusu arra  
onne kele Gayus noro  
Aristarkus. Ri woro'o on-  
nenihe manin Makedonia  
la ramwali Paulus nin kalla  
walie. Hir keledi woro'ohe  
ne, idewe heri rahu onne rodi  
peleklike laa kote nina rom  
lapa man rodi hi'i na'aromo  
onno noro panaeku rahu  
na'akeme.

<sup>30</sup> Paulus raram nodi  
lernohi hi laa raram, maa  
ri man lernohi Yesus lolo  
onne kawala Paulus yono laa  
raram.

<sup>31</sup> Uluwakun lalapa lolo

\* **19:20** Lere onne kupan ‘pere ida’ rodi pair alam ida nin na'iwe'el, de kupan pere  
riwan wellima namwali kupan namansa.

noho Asia ida woro'o ma namwali Paulus nin ri orwali, hopon ri lan konohi Paulus yono laa rom lapa onne raram nalhari kemen laa heri rahu onnenihe do'on.

<sup>32</sup> Ende heri rahu man lawuku lolo rira romo lap eni, na'akeme rusu arra wake'edi me'e. Ri na'akeme mahanoro wakau inhawe memehe la rir panaeku ka namnehe wake'e, ono nano heri rahu onne ri nammori ka rauroin hi'ihepenia hir lawuku lolo onne.

<sup>33</sup> Kame'ede ri Yahudi ida woro'o rokul Aleksander laa heri kalarna, de heri heruwali wakau kukunohi ai inhawa ma namwaliyedi me'e. Idewe Aleksander nala liman laa wawan napanak rala leken ke'e leke konohi heri onnenihe nahenia ai noro heri Yahudi enihe kar hi'i ha yakyak ida.

<sup>34</sup> Maa hir po'on dernale, idewe rauroinedi ai onne ri Yahudi, de na'akeme wakau raruri mamani hehen nanumene jam woro'edi. Hi ra'ahenia, "Ka'uli kasa'a Epesus nina noho makromon Artemis ma narehi ma nalewen eni!"

<sup>35</sup> Hawa'ande kota onne nina orleke ida aile man paekunala dadiyala man rusrusu ar'arra me'e, de na'akeme namlina namkaiyedi. Enla ai na'ahenia, "I walin man minle Epesus enihe, ri na'akeme rauroinedi kota Epesus namwali onno ma nadiyaka Artemis nina romleu noro iknika waku moumou dewdewe ma nadiyaur nano a'ame.

<sup>36</sup> Ri ka nodi molollo

na'okul panaeku onne, de karkaramedi nanu. Yono ik kodi pelekleke halhale hi'i haida.

<sup>37</sup> Mi modiyedi ri enihe mai eni me'e, maa hi ka ramna'a ha man moumou dewdewe nano iknika noho makromon nina romleu eni, la hi ka ra'ihoru ra'idaru iknika noho makromon eni oin naran man kukulu lalapa eni.

<sup>38</sup> Lo'o Demetrius noro nin man howok enihe rira kalaklake aile, wa'an rehi rodi panaeku onne laa kote nina hono'ok kanail onneni. Nina niike nahinarnari la man ho'ok kail aile haenhi.

<sup>39</sup> Maa lo'o minima panaekuwana namehin aile makun, ken modi panaeku onne laa kote ne'en raram rira honopun penepen leke ra'aloledie.

<sup>40</sup> Ya amka'uk wake'e lo'o ma nodi molollo nano Romenihe derne iknika hini'i wenewhe hir mai tumdesne ika hi'iyedi rusrusu ar'arra me'e. Lo'o ik kodi inhawa panaeku man wa'an walhe leke yono hir hi'i sus ika?"

<sup>41</sup> Orleke onne wakunu horu, an hopon heri onne na'akeme rala'a here!

## 20

*Paulus nala'a noho Makedonia noro noho Yunani*

<sup>1</sup> Rusrusu ar'arra onne namlinedi ne, Paulus ra'ukwukuwala ri man lernohi Yesus enihe leke nalala nounaku la na'alapa akinhe mene konohiyala, nala'a. Ai namhara kota onne nala'a laa noho Makedonia. <sup>2</sup> An laliwewer leke-leke lolo Makedonia nala wanakuku nammori nounaku walin ma

akin naili'il Yesus enihe leke ramkene lernohi Yesus. Horu ne, ai nala'a noho Yunani wali karanna.

<sup>3</sup> An min lolo onne wollo wokeluwed, an paeku ha'a kapal hopol laa Siria. Maa mahan na'akene hopol ne, an derne lir anna ida ma na'ahenia ri Yahudi enihe mahanoro lawuku panaeku leke resne. E'eni me'ede an hi'i kenekrohu lolo kalla namehin nala'a lolo ro wali wali'ur laa Makedonia.

<sup>4</sup> Ri wo'ikku ma noro Paulus ra'alono eniyenihe: Pirus anan Sopater manin Berea, Aristarkus noro Sekundus manin Tesalonika, Gayus manin Derbe, Timotius, la Tikhikus noro Trofimus rano propinsi Asia.

<sup>5</sup> Hi roluwedi mayai laa Troas mene newek mayai lolo onne.

<sup>6</sup> Lere Alam Lalapa Ra'an Roti Na'alehe Ragi horu ne, ai mamhara Pilipi ha'a kapal hopol laa Troas. Alam wolima mene am rakanedi Troas, moro hi pakromo wuku wali'ur. Am min lolo onne domeku ida.

### *Paulus na'amori wali'ur Eutikus lolo Troas*

<sup>7</sup> Alam Renren Warwarna lere helemedi\* am lawuku leke ma'ak wewerre, la Paulus wakunkunu noro walihen hehen nanumene alam toro, ono nin panaeku nohoropo lo'o nala'a me'e.

<sup>8-9</sup> Am minwuku lolo rom ida daran wokelu, lolo kamar ma aile nowawanne. Min kamar onne lokon wadu namansa, de noho manha. Ma na'ikaka ida naran

Eutikus naikoro nika ha-wolle nakanie. Maa Paulus wakunu nalo'ol rehi, de ai onne makan nasoi, mehen mahaledi penia an wauwedi nano hawollo onne laa yawa. Nina mukuwali kopur laa yawa leke roulle kikan ho'o ne, makiyedi me'e.

<sup>10</sup> Enine Paulus kopur laa yawa heriyala kemen laa mo'oni onne wawan, naurukuwale na'ahenia, "Yono mamka'uk, ai kan maki, maa mori wali'uredi me'e!"

<sup>11</sup> Horu ne, Paulus wali wali'ur, ha'a laa wawan, a'un roti, ha'ar, ra'an wewerre. Hi ra'an horu, Paulus wakunkunu noro hi rakan lere ha'a mene konohiyala, nala'a.

<sup>12</sup> Enla ma na'ikaka man wau laa yawa onne mormori, de nin mukuhe rorkaru ai laa nakar. Enine hi na'akeme akin nahuwa'an wake'e.

### *Paulus namhara Troas laa Miletus*

<sup>13</sup> Ende am ha'a kapal hopol noluwedi Paulus laa Asos. Ainin panaeku rakan Asos mene ha'a wewerre, ono ai mehe raram nodi nala'a lolo kalla ro.

<sup>14</sup> Mai de am pakromo wewerredi lolo Asos nanumene an ha'a nohi ainima kapal laa Metilene.

<sup>15</sup> Am hopoledi nano Asos ne, orekiyedi nanumene am pana'na'an noro noho Kios, la alam ida wali'ur am rakan noho Samos. Mai orekiyedi nanumene am rakan kota Miletus.

\* **20:7** ee, hari Domeku lere helemedi

<sup>16</sup> Paulus nala kenekrohu yono lolala kota Epesus, leke yono sopol leken nammori lolo Asia, ono na'ikeki Lere Alam Lalapa Pentakosta<sup>†</sup> me'e, de ainina panaeku halhala rakan Yerusalem leke lernohi alam lalapa onne.

*Paulus konohiyala uluwakun kerei Epesus mene rahina'ar*

<sup>17</sup> Nano Miletus, Paulus aku lir hopon ri nodi laa Epesus napanak uluwakun kerei enihe mai roro ai pakromo.

<sup>18</sup> Hir mai rakanedi Miletus ne, Paulus na'ahenia, "I wal'u na'ahoru mauroinedi ainu'u morimori lolo Asia me'e, nano lere dedesne yo oro mi rakan lere eniyeni.

<sup>19</sup> I helkaki amdaru, la yo odi sus mak oir howok Makromod Nina honowok nair eni, kade ya'u lernala hadwei hadwokor la kenene panatal, ono ri Yahudi enihe rahehe hi'i panaeku yakyaka maya'u.

<sup>20</sup> I wal'uhe rauroinedi ya'u ka amka'uk konohi inhawa panaeku man wa'an paku mi. Maya'u wakukuwed i wal'uhe lolo heri kalarna, la lolo minim nakar haenhi.

<sup>21</sup> Ya a'ori honorok manani ri Yahudi noro ri ma ka namwali Yahudi enihe haenhi, leke hir herredi rir honorok panaeku ma ka namloleni, mai derne rakani Makromod Lalap, la akin naili'il Makromod Yesus.

<sup>22</sup> Enla lere eniyeni ya'u derne akani Roh Kudus Nina honopon, de ya ala'a Yerusalem, maa ka auroin lo'o inhawe namwali i kem'u lolo enne.

<sup>23</sup> Ya auroin eni mehe, lolo kota-kota ya'u kuliyedi me'eni, Roh Kudus kono-hiyedi ya'u mouropo me'e nahenia lere man mai eni rin kele ya'u rodi laa bui raram, la hi'i sus ya'u haenhi.

<sup>24</sup> Maa lo'o ya'u mori me maki, kan hi'i haida, horo ya'u howok a'ahoruwed i honowok man Makromod Yesus naledi ya'u eni. Ainu'u honowok onne, ya'u loikaru Makromod Lalap Lirna Wawa'an eni leke ri rauroin nahenia Makromod Lalap kan ren namre'e namharu ika.

<sup>25</sup> Maya'u ka'aredi i wal'uhe na'ahoru, la kono-hiyedi hi'ihewi Makromod Lalap nodi molollo ri mor-mori me'e. Nano lere eniyeni ya auroin ka oro mi pakromo me'e.

<sup>26</sup> Ende lere eniyeni ya a'ori honorok mi, lo'o Makromod Lalap hukum ri ida lolo mi na'ahoru makileken moluloinedi, ka a'uwar aainin yodiwara me'e,

<sup>27</sup> ono ka'u ren loikaru Makromod Lalap Nin panaeku na'akeme laa i wal'uhe.

<sup>28</sup> Leluwai makrana mi kemen wawa'anedi, la madiyaka wawa'an ri na'akeme ma akin naili'il Yesus man Roh Kudus naledi

<sup>†</sup> **20:16** 'Pentakosta' napa'ahne, 'alam wellima'. Lere Alam Lalap Paska horu, ri Yahudi aki 'alam wellima' mene hi'i yapi lapa Lere Alam Pentakosta.

mi me'eni leke paku hi ra'akene akin naili'il Yesus. Ende leluwai makrana hi naisa man huri pipduma lolo wo'or. Hi penia Makromod Nin ri, ono Ai rarna dupuwedi leke yon hir maki ko'u Makromod Lalap.

<sup>29</sup> Ya auroin me'e nahenia lo'o ya ala'edi ne, ri ailannenihe mai leke na'o'o nadewe minima kerei raramne naise ahu merwui ma nohi pipi na'ane.

<sup>30</sup> Enla ya auroin lo'o nano i wal'uhe me'e de, ri aile man wakuku ha ma ka namlolo leke ri man lernohiyedi Yesus enihe rira kalla na'inelek, la hir lernohi rira waŋakuku ma ka namlolo onnneni mehe.

<sup>31</sup> Ende madiyaka mi wawa'anedi! Yom hamlinu ka'u ren nounaku mi na'ahoru, kade yo odi sus mak oir nammori lelere a'alam rakan anna wokelu raramne.

<sup>32</sup> Ende lere eniyeni ya apanak Makromod Lalap leke An leluwai makrana i wal'uhe wawa'anedi. I nounaku i wal'uhe masala kerkerhedi Makromod Lalap Lirna Wawa'an eni man konohi hi'ihewi Ai kan ren namre'e namharu ika. Makromod Lalap mehe Nina ke'eke'el an'anhe nokor leke na'alapa mi akim la nala hana'ar dunurum ki mi. Onnneni, An nouwedi Nin ri na'akeme man Ai na'amou na'adewed me'e.

<sup>33</sup> Lere yo oro mi min wewerre, ka akmanna ri nin kupaŋ, ee nainair.

<sup>34</sup> I wal'uhe mehe mauroin nahenia yo odi ainu'u ruri pe'el mehe howok leke yo

oro kalla wali enihe lernala ainim morimori popono oreki.

<sup>35</sup> Mi mauroin nano ainu'u hini'i wenewhe na'akeme, wa'an rehi ik kodi iknik ruri pe'el paku ri ma ka naruri howok me'e, ono ika horokala in-hawa man Makromod Yesus na'aheniyedi me'e,  
'Lo'o ik kala haida ri, onne wa'an narehi nano ik lernala haida.'

<sup>36</sup> Paulus wakunu horu, ai noro hi na'akeme kadi ein korno yawa hi'i lir napanak.

<sup>37</sup> Hi na'akeme rahere wewerre, la raurukuwala Paulus, rahuwo'oke, ra'ahenia, "Mala'a wawa'anedi."

<sup>38</sup> Hi akin woir rehi ono Paulus na'ahenia, "Lo'o i wal'uhe kam do'on ya'u me'e." Kame'ede hi rorkarue laa kapal.

## 21

<i>Paulus</i>	<i>nala'a</i>	<i>laa</i>
<i>Yerusalem</i>		
1 Am	konohiyaledi	
uluwakun	kerei Epesus	
enihe horu,	ai mamhara lolo	
onne hopol idewe	laa noho	
Kos.	Orekiyedi nanumene	
rakan noho Rodos.	Nano	
onne am hopol	mamani	
rakan noho Patara.		

<sup>2</sup> Am paliyedi her Patara ne, pakromonala kapal ida nala'a Fenesia, de am ha'a lernohi me'e.

<sup>3</sup> Am hopol hehen nanumene do'onedi noho Siprus aile wali ra'i, maa hopol mamani ulu laa noho Siria eni, de rakanedi Tirus. Rakanedi Tirus ne, am kopur laa ro, ono kapal onne ri'i nina ne'en lolo onne.

<sup>4</sup> Lolo Tirus ai lam ka'arala ri man lernohi Yesus lolo onne, la am minala noro hi domeku ida. Roh Kudus naledi woroin ainima ri orwali enihe me'e, penia hir konohi mayai inhawa lo'o namwali Paulus lere man mai, de nounaku Paulus na'henia, "Yono mala'a laa Yerusalem me'e."

<sup>5</sup> Maa rakan domeku onne horu, ai mala'a me'e. Hi roro hono ananhe na'akeme rorkaru mayai mamhara kote rakan herraram ne, na'akeme kadi ein korno yawa hi'lir napanak.

<sup>6</sup> Hi'i lir napanak horu, mayai na'akeme ida ma nala tape masi ida. Horu nanumene am ha'a kapal, la ri ma norkaru enihe wali laa rira nakar.

<sup>7</sup> Am hopol nano Tirus rakan Ptolemais. Lolo onne ai lam ka'arala ai walihne ma akin naili'il Yesus leke malala hiyene arore hi, la ai morala hi alam ida.

<sup>8</sup> Orekiyedi ne, am hoikaruwedhi hi mala'a rakan kota Kaisarea. Rakan lolo onne am min Pilipus nina nakar. Ai onne ma nakoto nade'ek Makromod Lalap Lirna Wawa'an eni, la ai namwali ri ida nano mo'oni wo'ikku man niliyedi lolo Yerusalem lere man laedi me'e.\*

<sup>9</sup> Pilipus anan maeke wo'akka kar ho makun. Makromod Lalap nala molollo maekrara enihe leke loibaru Lirna Wawa'an eni.

<sup>10</sup> Am min alam ida woro'edi lolo onne, la ri ida naran Agabus mai nano

Yudea. Ai onne ri ma akin naili'il Yesus la ma namwali nabi.

<sup>11</sup> An maie ne, ai nala Paulus nina kali ehe mehe nodi wuku liman ein la na'henia, "Roh Kudus Lirna na'heniyedi eni me'e, 'Ler man mai ri Yahudi lolo Yerusalem kele ai ma nina kali ehe eniyeni, wuku heheni mene rale ri ma ka namwali Yahudi enihe.'

<sup>12</sup> Am derne panaeku onneni horu, ai moro walihne na'ahoru man minle Kaisarea mapanak an'anhedi Paulus ke'e leke yono nala'a Yerusalem me'e.

<sup>13</sup> Maa an walihne na'henia, "Alhi'ihepe i walihne mahere heheni? Mim ken ma'idaru ya akin leke yon ya ala'a me'e. Kade rin kelle wuku ya'u lolo enne, ee lo'o ri nesne ya'u ono i lernohi Makromod Yesus, ya amkene laa Yerusalem mamani."

<sup>14</sup> Paulus namhene derne mayai me'e, de ai kam kawala me'e la ai ma'henia, "Menmolollo Makromod Nina honorok aki mehe."

<sup>15</sup> Min lolo onne horu ne, ai ma'akene ainim hahaa leke mala'a Yerusalem.

<sup>16</sup> Ai walihne na'ahoru man minle Kaisarea man lernohi Yesus haenhi ra'alono leke rorkaru mayai laa Manason nina nakar ma aile Yerusalem. Manason onne ri manin Siprus man lernohi Yesus nalo'oledi me'e.

*Paulus lan ka'ar Yakobus*

<sup>17</sup> Am rakanedi Yerusalem, ai walihne man lernohi Yesus lolo onne rodi aki

ma nahuwa'an kokalai  
wawa'anedi.

<sup>18</sup> Ende rakan orekiyedi,  
ai moro Paulus mala'a  
lam ka'arala Yakobus noro  
uluwakun kerei namehin  
na'akeme ma aile lolo onne  
haenhi.

<sup>19</sup> Am rakanedi ne,  
Paulus naledi nin hiyene  
aroore, la wakunu ha wo'ira  
na'akeme man Makromod  
Lalap hi'iyedi lolo ri ma ka  
namwali Yahudi enihe lere ai  
nodi Makromod Lalap Lirna  
Wawa'an eni loikaru hi.

<sup>20</sup> Hir derne Paulus  
wakunu onne horu, hi  
na'akeme ra'uli rasa'a  
Makromod Lalap. Horu ne,  
hir konohi Paulus ra'ahenia,  
“Papa, panaeku tarana aile:  
Ai walin mauroin nahenia  
ri riwriwan rahrahu lolo ri  
Yahudi enihe akin naili'iledi  
Yesus me'e. Enla na'akeme  
rasala kerkerhe agame nina  
keneri hono'ok enihe.

<sup>21</sup> Hir dernedi nahenia ai  
walin nadedem wakuku ri  
Yahudi manin noho namehin  
na'akeme yon lernohi  
Musa nina keneri hono'ok  
me'e. Hir derne ai walin  
nounakuwedhi hi yon hi  
ananhe lar sunate, la yon  
lernohi Yahudi rira noho  
honolleni.

<sup>22</sup> Ende lo'o lere eniyeni hir  
dernedi ai walin aiyedi mai  
eni me'e, de am hi'i inhawa?

<sup>23</sup> Lo'o wa'an rehi papa ler-  
nohi anima nounaku tarana.  
Aanim orwali ri wo'akka aile  
lolo eni, la hir hihi'i nou roro  
Makromod Lalap.

<sup>24</sup> Ende ai walin lam  
lernohi hi laa Makromod  
Lalap Nina Romleu Lapa  
hi'i panaeku lernohi noho  
honolla ra'amou ra'adewe

kemen moro hi wewerre,  
la lo'o pape pairala rira  
korban leke rir molollo  
aile tori rira muruk de'ulu  
(Nadedem ri Yahudi hi'i  
onne leke ri nauroin rira  
nou onne horuwedi me'e).  
Lo'o papa hi'i heheni mehe  
leke ri na'akeme rauroin  
mouropo nahenia lir anna  
hir dederneni ka namlolo,  
maa hir do'on rauroin ai  
walin me'ene mehe lernohi  
agame nina keneri hono'ok  
haenhi.

<sup>25</sup> Enimaa am aku horok  
laedi me'e laa ri ma ka  
namwali Yahudi ma akin  
naili'iledi Yesus enihe me'e,  
leke konohi hi anima  
kenekrohu nahenia yon  
ra'an hanana'an man ri nodi  
hoikani lernulu aukerhe,  
yon romun rarna, yon  
ra'an mahin man rarna ka  
namhara makun, la yon  
mo'oni maeke holi yaka leke  
yaka.”

<sup>26</sup> Enime'ede Paulus ler-  
nohi rira nounaku eni, penia  
oreki ai noro ri wo'akka  
onnihe lar hi'i panaeku  
leke ra'amou ra'adewe  
kemen wewerre. Enine Paulus  
laa Makromod Lalap Nina  
Romleu Lapa raram leke  
konohi Yahudi rir imam  
enihe lere wo'ira mene rira  
panaeku ra'amou ra'adewe  
kemen horu, leke hir elekedi  
panaeku ra'amou ra'adewe  
kemen onne la rodi rir honoi  
kanani mai imam enihe  
leke rala hoikani Makromod  
Lalap.

*Rin kelle Paulus lolo  
Makromod Lalap Nin Romleu  
Lape raram*

<sup>27</sup> Rira panaeku ra'amou  
ra'adewe kemen alam

wo'ikku, la alam wo'ikku onne na'akeki horu, mene ri Yahudi ma nano Asia ida woro'o do'onedi Paulus minle Romleu Lapa raram. Ende hi rawa'u ri ma aile lolo onne leke kelle Paulus,

<sup>28</sup> wakaukau ra'ahenia, "Heih, ri Israel mie, pakuwalai! Ri eni penia man laa ewi-ewi nala wanakuku leke yono ri lernohi noho Israel honolla, noro agame nina keneri hono'ok eni, la ai na'amorsedi Makromod Lalap Nina Romleu Lapeni haenhi. Ler eniyeni ai noro ri ma ka namwali Yahudi enihe laedi Makromod Lalap Nin Romleu Lape raram ra'amorso onno man moumou dewdewe me'eni."

<sup>29</sup> Hi ra'aheheni onne ono hir do'onedi Trofimus noro Paulus laliwewer wewerre loledi kote raram me'e, de hir pene'ek Paulus noro Trofimus laedi Romleu Lapa raram me'e. Trofimus eni ri manin Epesus, ka namwali ri Yahudi.

<sup>30</sup> Enpenia ri lolo kote raram na'akeme rusrusu ar'arra mamani, la ri nammori lawuku lari ki lari mai. Hir laa Romleu Lapa onne kelle Paulus rale laedi paharne. Idewe hir elekedi Romleu Lapa onne nina nika na'akeme.

<sup>31</sup> Man rusrusu onnenihe maha rahehe resne Paulus, la ri lan konohi Roma nina uluwakun arida na'ahenia, "Yerusalem ne'en raram mahar hi'i rusrusu ar'arra."

<sup>32</sup> Idewe uluwakun onne noro ri ida woro'o ma namwali nin man hemen noro nina ma nasala ke'urauk enihe pelekleke laa

rusrusu ar'arra onne me'e. Hir rarakan enne, heri rahu onne po'onnala hi me'e, de renedi nuknukur Paulus.

<sup>33</sup> Uluwakun ara onne lan kelle Paulus la hopon nina ri enihe rodi rantan woro'o dasledie. Ai na'ukani, "Ri eniyeni inhoi? An hi'i in-hawa pe?"

<sup>34</sup> Heri heruwali wakau walha panaeku ida, la heruwali wakau walha panaeku namehin. Rusrusu ar'arra kan ren, la uluwakun onne ka nauroin inhawa ma nakoko penia namwali rusrusu ar'arreni. Enime'ede an hopon nin ke'urauk enihe rorkaru Paulus laedi rira honowok onno.

<sup>35</sup> Hir rarakan rir honowok onno nin dadinyaru eni ne, ma nasala ke'urauk enihe re'e ramhene ra'uwara Paulus ono man rusrusu ar'arra onnenihe wakaukau eren namamansa me'e, la rahinesne wuku wake'e leke lar nukur Paulus.

<sup>36</sup> Heri rahu onne rasess-e lolo onne wakaukau ra'ahenia, "Mesnedie here!"

*Paulus loikaru inhawa namwali ai kemen lolo heri Yahudi kalarna*

<sup>37</sup> Hir na'ikeki rakan ma nasala ke'urauk rira honowok onno raram ne, Paulus napanak uluwakun ara onne na'ahenia, "Pape, lo'o yo oro pape wakunuwala tarana."

Uluwakun onne nahumarnedi na'ahenia, "O mau-roin wanakunu Yunani?

<sup>38</sup> Ya auroin o mammwali ri Mesir, maa lo'o ka! Ri Mesir onne haul arra lalapa penia nodi lari ri ma nasala ke'urauk man ailanna riwan

wo'akka laa noho mamun ma napro'uk."

<sup>39</sup> Paulus walhale na'ahenia, "Ya'u eni, Yahudi ya'u! Mori ya'u Tarsus, kote lalapa man aile noho Kilikia. Ya apanak papa malala leken maya'u ke'e ya ala wanakunu ri eniyenihe."

<sup>40</sup> Ai nala leken Paulus wakunu ne, Paulus laa namririyedile dadinyaru eni la nodi liman dadiyala leke namlinale mene an wakunu nodi wanakunu Ibrani na'ahenia,

## 22

<sup>1</sup> "Konohiyala i wal'uhe na'ahoruwed. Makaniyala yo odiyala i kem'u mai i wal'uhe, leke mauroinale ka'u hi'i yaksala ida."

<sup>2</sup> Hir derne Paulus wakunu nodi rira wanakunu Ibrani ne, hir eren namlinlina me'e. Enine Paulus wakunu manani na'ahenia,

<sup>3</sup> "Ya'u eni ri Yahudi, mori ya'u kota Tarsus lolo noho Kilikia, maa i lapa mai kota Yerusalem eniyeni. Gamaliel onne ainu'u meser lape man wakuku ya'u leke ya au-roin kokkoo keneri hono'ok man Musa nala ik upud a'adhe. Enpenia lere onne ya ampe'el hi'i Makromod Lalap Nin panaeku na'akeme namnenehe i wal'uhe na'ahoru lere eniyeni.

<sup>4</sup> Nonolu ya'u peni ahehe hi'i sus ri man lernohi Jesus Nin Kalla worworu enihe de ye esne heruwali haenhi. Ya'u kelledi mo'oni noro maeke odi hi laa bui raram me'e.

<sup>5</sup> Yahudi rira imam man kulu narehi noro Yahudi rir man panulu na'akeme ma nadedem raikoro wuku hono'ok kanail onno, hir mehe rauroinedi ainu'u hini'i onne me'e. Ka apoho, ono hi penia rala horok maya'u hopon yo odi laa kanile walinhe ma aile kota Damsyik. Yo odi horok onne leke la'u kele rin man lernohi Yesus enihe lolo onne, dasle hi mene yo odi mai kota Yerusalem leke hukumhe.

<sup>6</sup> Ler onne ya ala'ala'a na'ikeki rakan Damsyik, la lere ulu me'e. Ya amlilinohi ha man hikhika ida mai nano lanik hikhika wake'e idewe pupinedi ya'u.

<sup>7</sup> Idewe ya alwali yawa, ya'u derne lira ida ma na'ahenia, 'Saulus! Saulus! Hi'ihepenia om hi'i sus Ya'u?'

<sup>8</sup> Enine ya a'ukaniyale, 'In-hoi O, Makrom'u?'

An walhale, 'Ya'u eni Yesus, ri Nazaret, man om hi'i sus eni.'

<sup>9</sup> Ainu'u kalla wali enihe do'on ha man hikhika onne haenhi, la hir derne lirna, maa ka rauroin lira onne na'aheni inhaw.

<sup>10</sup> Enla ya a'ukanie, 'Makromod, i la'u hi'i inhawa?'

Makromod walhala ya'u na'ahenia, 'Mamakedi, mala'a laa kota Damsyik raram. Lolo enne, rin mai konohi o ha wo'ira na'akeme man Makromod Lalap paekuwedi om hi'i.'

<sup>11</sup> Ha man hikhika onne alele, de na'atokedi i mak'u me'e, de ainu'u kalla wali enihe ri'ik ya'u rorkaru laa kota Damsyik raram.

<sup>12</sup> Lolo enne ri ida aile naran Ananias. Ri onne ri ma nadedem na'uli NASA'a Makromod Lalap, la lernohi agame nina keneri hono'ok mamani. Ri Yahudi na'akeme man min lolo Damsyik horhawa ai.

<sup>13</sup> An mai ka'ar maya'u, namriri i her'u na'ahenia, 'I wal'u Saulus, makum mouwedi here!' Idewe i mak'u mouwedi wali'ur, de po'onala ai.

<sup>14</sup> Ananias na'ahenia maya'u, 'Makromod Lalap man ik upud a'ad ra'u'l'uli rasasa'e, An niliyedi o me'e, leke o mauroin Makromod Lalap Nina honorok aki, la om do'on Yesus, Makromod Lalap Nina hophopon wahwahan ma na'alehe dohohaleni, la om derne Yesus mehe wakunu noro o.

<sup>15</sup> An niliyedi o leke mamwali Nina ma nodi Lirna, de lam konohi ri na'akeme inhawa man om do'on dernedi me'e.

<sup>16</sup> Ende mamririyyedi, mala'a laa oir here, leke rin ulutada o, la mapanak Makromod leke na'ohu nahaledi onuma dohohale.'

<sup>17</sup> Ya'u waliyedi laa Yerusalem wali'ur ne, ya'u laa Makromod Lalap Nina Romleu Lapa raram hi'i lir napanak, de lere onne mahanoro ya'u hi'i lir napanak Makromod Lalap hi'i haida harile ya'u mehe do'on.

<sup>18</sup> Ya'u do'on Makromod Yesus wakunu noro ya'u na'ahenia, 'Pelek mamharedi Yerusalem, ono ri eniyeni kar kokala Ainu'u Lira Wawa'an om loloi kakaru eni.'

<sup>19</sup> Maa, ya'u wal-hale heheni, 'Makromod, alhi'ihepenia hi kar kokala i lir'u? Hi rauroinedi kokkoo me'e nahenia ya'u kuli kuli Yahudi rir kerei-kerei leke kele ri man akin naili'iliedi O me'e leke nukurhe.

<sup>20</sup> Enla lere hi resne Stepanus, Onuma ri ma nodi Lirmu Wawa'an eni, ye e'enohi hi resne ai, ono lere onne hir rala rira rain nanaru ya adiyaka.'

<sup>21</sup> Maa, Makromod hopon ya'u wali'ur na'ahenia, 'Mala'a here! Mala'a laa noho man ko'u laa ri ma ka namwali Yahudi enihe.'

*Paulus minle kota waku raram*

<sup>22</sup> Heri rahu onne karkaramedi maha rakani Paulus nina wanakunu hehen nanumene rakan ai na'ahenia Makromod hopon an laa ri ma ka namwali Yahudi enihe. An wakunu onne horu ne, hir wakau raruri wake'e ra'ahenia, "Resnedi ri onne here! Kan wa'an an mori me'e!"

<sup>23</sup> Hir wakaukau raruri, la sopol rira rain laa wawan, la wahair elimo'o hapu laa wawan ono hi rawuhur wake'e.

<sup>24</sup> Enpenia uluwakun ara onne hopon nina ri rodi Paulus laa nin honowok onno raram. Enla an hopon nin ri riuk rerhe rodi arpau ulik man nair kimiru aile honon, leke hi'i Paulus konohi nina sala ma nakoko heri Yahudi eniyeni wakau ai heheni.

<sup>25</sup> Maa hi mahar wuku Paulus laa lauriri leke riuk rerhe ne, ai na'ukani uluwakun ara nin man

## 23

hemen ida ma namriri wakurani na'ahenia, "Hi'ihewi? Roma nin holoor halauk huri lira ri riuk rerhe noho Roma nina ri nolu mene ho'ok kaile?"

<sup>26</sup> Man hemen onne derne Paulus lirna, idewe lan konohi nin uluwakun na'ahenia, "Alhi'ihepenia papa hopon mayai riuk rerhe ri enie? Ai eni manin Roma menee."

<sup>27</sup> Enine uluwakun arenlaa na'ukani Paulus, "Konohi ya'u ke'e, o eni manin Roma?"

Paulus walhale, "Namlolo."

<sup>28</sup> Uluwakun ara onne na'ahenia, "Ya'u eni manin Roma ono ya'u pair kupan nammori rehi!"

Paulus walhale, "Maa ya'u eni, nano alam momori me'e de, ya amwali manin Roma."

<sup>29</sup> Ke'urauk man sisnai Paulus onnnenihe idewe so'o kilili'ur, la rira uluwakun namka'uk haenhi, ono an hoponedi nin rie wuku dasledi Paulus me'e, kade ai eni noho Roma nin ri mememen.

*Paulus nakpali ri Yahudi man ho'ok kail enihe*

<sup>30</sup> Uluwakun ara onne nina suk wake'e nauroin inhawa kalaklaka ma nakoko penia heri Yahudi enihe tumdesne Paulus. Ende rakan oreki al'alaman, uluwakun onne hopon poluwuku Yahudi rira imam lalapa roro rira man ho'ok kail enihe. Horu ne, an hopon ri we'eredi Paulus nin dasle mene rodie laa nakpali ri Yahudi enihe na'akeme.

<sup>1</sup> An rakanedi hi kalarna ne, Paulus po'on kakane Yahudi rira man ho'ok kail enihe na'akeme la na'ahenia, "Konohiyala i wal'u na'ahoru! Rakan lere eniyeni yo odi honorok aki man mou hi'i ha ma namlolo lolo Makromod Lalap kalarne mamani."

<sup>2</sup> An wakunu onne horu, idewe Ananias, Yahudi rira imam man kulu narehi eni, hopon ri ma namriri na'urani Paulus pahar nurance.

<sup>3</sup> Enpenia Paulus walhale na'ahenia, "Makromod Lalap lo'o pahar o haenhi, o man kokme'e! O ma'ahenia o akin moumou dewdewe naise mesel man ra'awarwarhe, maa ka namlolo! O maikoro lolo onne ho'ok kail ya'u modi agame nina keneri hono'ok enihe, maa o peni man larlewenedi keneri hono'ok onne, ono hopon ri pahar ya'u."

<sup>4</sup> Ri ida woro'o ma aile Paulus herne ra'ukani ai ra'ahenia, "O ma'ihoru ma'idaru Makromod Lalap Nin imam man kulu narehi enie?"

<sup>5</sup> Paulus walhale, "Eih! I wal'uhe, idedi eni ka auroin ai onne imam man kulu narehi! Memen horhorok aile Horok Lape raram ma na'ahenia, 'Yono ma'ihoru ma'idaru ri ma nodi molollo minima nohe.'"

<sup>6</sup> Paulus po'on nauroinedi me'e nahenia heruwali nano Yahudi rira man ho'ok kail enihe lernohi muku Saduki rira wanakukue, la heruwali

lernohi muku Parisi rira wanakuku. Enpenia an wakunu naruri na'ahenia, "I wal'u na'ahoru! Ya'u eni ri Parisi, yu up'u ya a'uhe ri Parisi haenhi. I wal'uhe ho'ok kail ya'u mai eni ono ya auroin nahenia ri man maki, mori wali'ur."

<sup>7</sup> An wakunu onne horu, muku Parisi roro muku Saduki enihe rasesesi me'e, de honopun penepen onne napye'er namwali muku woro'o.

<sup>8</sup> Hir rasesi ono muku Saduki enihe rira panaekue ri man maki kan mori me'e, la hi akin naili'il nahenia hophopon a'am raram roro roh-roh kaale haenhi, maa ri Parisi enihe akin naili'il nahenia ha eni na'akeme namlolo.

<sup>9</sup> Enpenia namwaliyedi rusrusu ar'arra, la ri Parisi ida woro'o ma namwali meser Horok Lap enihe ram-riri ra'okulala muku Saduki enihe kokkoo ra'aheni, "Ai kam do'on ri eni nina sala ida. Lo'o roh me hophopon a'am raram aile man wakunu noro ai harome."

<sup>10</sup> Rusrusu ar'arra onne eren lalapa penia uluwakun ara onne namka'uk heri lo'o rasala Paulus la sedu kili'ur kalari. Ende an hopon nin ma nasala ke'urauk enihe laa rala Paulus nano heri onnenihe toro, rodie laa rira honowok onno raram.

<sup>11</sup> Alam onne me'e de, Makromod Yesus namrirri lolo Paulus herne na'ahenia, "Ma'alapedi o akim, ono na'amolia om laa konohi Ainu'u panaeku ma nam-lole ni manina Roma haenhi, naise om konohiyedi ri

man minle Yerusalem enihe me'e."

*Ri Yahudi lawuku hi'i panaeku leke resne Paulus*

<sup>12</sup> Rakan oreki al'alam ri Yahudi wel'irha lawuku leke hi'i panaeku yaka. Hi rakineriyedi kemen laa Makromod Lalap me'e nahenia hi ka ra'an ka romun hehen nanumene hi resne Paulus.

<sup>13</sup> Ri wel'akka rehi man paeku wuku onnenihe.

<sup>14</sup> Hir laa Yahudi rira imam lalape roro rira leleher lalap enihe ra'ahenia, "Ai makineriyedi ai kemen wewerre laa Makromod Lalap me'e, ai ka mo'on haida-haida hehen nanumene ai mesne Paulus.

<sup>15</sup> Ende lere eni me'ede, ai mapanak ai walinhe roro Yahudi rira man ho'ok kail enihe, leke hi'i horok akue laa Roma nina uluwakun ara. Mapanak ai norkaru Paulus mai nakpali mi wali'ur, leke mim koko sisnai wali'ur ai leke mauroin nina yak sale ma namlolo aile, ka. La ai ma'akenkenai leke kan rakan mai eni makun, ai mesnedie me'e."

<sup>16</sup> Maa Paulus narna anan derderne rira panaeku onne, de an laa ke'urauk rir honowok onno konohi Paulus rira panaeku onne.

<sup>17</sup> Ende Paulus napolu uluwakun ara nin man hemen ida mai, na'ahenia, "Modi tataneni laa uluwakun areni. An mai leke konohi panaeku ida ai."

<sup>18</sup> Ende man hemen onne nodi tatana onne laa nin uluwakun ara na'ahenia, "Paulus ma na'iro'o onne

napolu ya'u, napanak yo odi tatana eniyeni mai pape ono ainina panaekuwana aile noro papa."

<sup>19</sup> Uluwakun ara onne nasalala tatana onne li-man ni'ik nodi laedi onno namehin, mene na'ukani, "Pa'e, mam konohi inhawa maya'u?"

<sup>20</sup> An walhale, "Yahudi rir man panulu enihe raledi honorok panaeku me'e nahenia oreki hir mai rapanak makrom'u nodi Paulus laa nakpali Yahudi rira man ho'ok kail enihe wali'ur. Hir kokme'e ra'heni hir sisnaiyala Paulus wali'ur leke rauroin nina yaksala ma namlolo aile, ka.

<sup>21</sup> Maa yono makrom'u lernohi rira napanak onneni, ono ri welia'akka rehi aile mahanoro suwsuwar lolo kalla leke keriyale. Hi na'akeme rakineriyedi kemenhe me'e ra'heni hi ka resne Paulus makun, hi ka ra'ak, ka romun. Ler eniyeni hi ra'akenedi me'e, lapan mehe makrom'u nina kenekrohu."

<sup>22</sup> Uluwakun onne hopon na'ahenia, "Yom konohi ri mahaku inhawa om kono-hiyedi maya'u me'eni." Horu, an hopon tatan onne nala'a.

*Ma nasala ke'urauk rorkaru Paulus laa Gubernur Felix*

<sup>23</sup> Enime'ede uluwakun ara onne napolu nina man hemen woro'o, hopon hi na'ahenia, "Ma'akene ke'urauk ma nadedem rahu woro'o, noro ke'urauk man ha'a kude weli'ikku, noro idewe ke'urauk ma nasala

kere rahu woro'o. Riuk wohii a'alam eni me'e de, mi na'akeme mala'a laa Kaisarea.

<sup>24</sup> Ma'akene kuda ida woro'o leke Paulus naikorale, leke morkaru ai wawa'anedi rakan laa gubernur Feliks."

<sup>25</sup> Enine uluwakun onne hi'i horok ida lirna na'ahenia:

<sup>26</sup> "Konohiyala makrom'u, Gubernur Feliks.  
Tape masi nano Klaudius Lisias!

<sup>27</sup> Yahudi enihe nasaledi ri eniyeni, manlo'o resne me'e, maa yo oro ainu'u ke'urauk enihe mai paku madiyake leke heri Yahudi onne yono resne, ono ya'u derne ai onne manin Roma.

<sup>28</sup> Enpenia ya'u hopon ri rodi laa nakpali hirira man ho'ok kail onnenihe leke ya auroin hir tumdesne ai inhawa sale.

<sup>29</sup> Maa ka'u do'on yakyak salsa laa nano rira kalaklaka onnenihe, penia nakoko an lernala hunukum makimaki, ee ro'e. Hir tumdesne ai nodi hirira agame nina keneri hono'ok mehe.

<sup>30</sup> Ende lere rin kono-hiyedi ya'u heri Yahudi rira panaeku yake aile noro ai me'e, de ya'u hopon ri enihe rorkarue mai makrom'u gubernur, la ya'u hoponedi man tumdesnenihe rodi rira kalaklake mai rakpali makrom'u haenhi."

<sup>31</sup> Ende ma nasala ke'urauk onnenihe lernohi honopon onneni. A'alam onne me'e de, hi rorkaru Paulus laa leke Antipatris.

<sup>32</sup> Rakan orekiyedi, ke'urauk ma nala'la'a ei onnenihe wali laa rira honowok onno wali'ur, la ke'urauk man ha'a kuda onnenihe mehe rorkaru Paulus laa Kaisarea.

<sup>33</sup> Hir rakanedi Kaisarea ne, hi rala horok onne kanile gubernur, la hi raledi Paulus laa gubernur haenhi leke nadiyake.

<sup>34</sup> Gubernur lese horok onne horuwedi ne, ai na'ukani Paulus, "Mamhara nano noho ewi?" An derne nauroinedi Paulus namhara nano noho Kilikia ne,

<sup>35</sup> ai na'ahenia, "Wa'ane! Na'amoli ri man tumdesne o enihe mai lolo eni mene ya'u ho'ok onuma hini'i we-newheni." Enla an hopon ri nadiyaka ai lolo nina rom lap man Herodes hi'iyedi nonolu eni.

## 24

### *Paulus nakpali Gubernur Feliks*

<sup>1</sup> Ler wolimedi ne, Ananias ma namwali Yahudi rira imam man kulu narehi noro rir leleher lalap ida woro'o enihe mai Kaisarea roro wewerre ri ida naran Tertulus. Ai onne ma nau-roin kokkoo hono'ok kanail kanakarne. Hi rakpali gubernur Feliks leke loikaru rira kalaklakhe rodi tumdesne Paulus.

<sup>2</sup> Rapoluwedi Paulus mai Feliks kalarne ne, Tertulus nodi lir wawa tumdesne Paulus heheni:

"Konohiyala papa gubernur! Papa nodi molollo

wawa'an penia nalo'oledi ainima noho eni namlina namkai me'e, la papa hi'iyedi ha man wa'an nammori me'e, de am mori wawa'an lolo ainima noho eni.

<sup>3</sup> Papa Feliks, o mamwali gubernur man wa'an wake'e! Ha eni na'akeme ai akim kokale wawa'anedi, la mapanak trimkasi nammori, pape!

<sup>4</sup> Maa, leke yono sopol papa nina leken nammori, ya apanak papa dernala ainima wanakunu man deudeul tantaneni.

<sup>5</sup> Mayai mauroin ri eniyeni hi'i ha man yakyaka mamani. Lolo ewi-ewi an hi'i rusrusu ar'arra lolo heri Yahudi raram leke yon hi rakani ma nodi molollo, la ai namwali uluwakun ida lolo muku Nazaret man lernohi Yesus onne.

<sup>6</sup> An kene na'amorso Makromod Lalap Nina Rom-leu Lapa haenhi, penia am kele. [Ainima panaeku mah'o'ok makail ai rodi ainima agame nina hunukum mehe.]

<sup>7</sup> Maa, lere onne Lisias, uluwakun ara onne, nahoredie nano mayai,

<sup>8</sup> la an hopon ainima man tumdesnenihe rodi rira kalaklakhe rakpali Papa Feliks ke'e. Ende lo'o papa sisnai ri eniyeni la derne an wakunu, papa mehe nau-roin ainima kalaklakhe na'akeme ha ma namlolo kokkoo."

<sup>9</sup> Ri Yahudi ma aile lolo onne lernohi ai tumdesne Paulus haenhi, la hi re'eno hi

\* **24:8** Horok man aile lolo tanada [ ] raram, namwali horok man kaale lolo horok Yunani dedesne (naska) wake'e.

nahenia Tertulus nin waŋakunu onne namlolo kokkoo.

<sup>10</sup> Gubernur onne nodi li-man lariyala Paulus wakunu. Enine Paulus na'ahenia, "Konohiyala gubernur man kukulu lalape! Ya akin nahuwa'an wake'e yo odiyala i kem'u mai papa kalarna, ono ya auroin papa namwaliyedi man ho'ok kail lolo noho eni anna laa anna me'e.

<sup>11</sup> Papa mehe nodi woroin na'inau ainu'u wanakunu eni leke mauroin ainu'u wanakunu namlolo, ee ka. Alam idaweli woro'o man laedi eni, ilaa Yerusalem leke a'uli asa'a Makromod Lalap lolo Nina Romleu Lapa.

<sup>12</sup> Heri Yahudi onnenihe kar do'on yo oro ri ida asesi, kar do'on ya awa'u ri lolo Makromod Lalap Nina Romleu Lape, lolo Yahudi rira kerei raram, ee lolo ewi-ewi lolo kote raram.

<sup>13</sup> Hi ka rodi panaeku ma namlolo ida namwali tanada nahenia ya'u hi'iyedi yaksala me'e.

<sup>14</sup> Maa, ya'u konohi papa haida mou-ropo: Yo odi Yesus Nin Kalla man hi kar kokale a'uli asa'a Makromod Lalap man ai upun a'umhe ra'uli rasa'a haenhi, la ya akin naili'il Musa nina horok ma na'ono keneri hono'ok na'akeme noro idewe nabnabi rira horok na'akeme haenhi.

<sup>15</sup> Namnenehe hi, ya'u me'ene odi akin ma nahuwa'an lapan lere Makromod Lalap na'amori ri na'akeme wali'ur, ri man hi'i ha ma namlolo noro idewe ri

man hi'i ha man yaka.

<sup>16</sup> Onne penia ya ahehe odi honorok aki man mou hi'i ha ma namlolo mamani lolo Makromod Lalap noro ri mormori kalarne.

<sup>17</sup> Anna wo'irha ka'u minle Yerusalem, de lere ya'u wali laa enne, yo odi kupan leke paku i walin Yahudi enihe, la ya ala honoi kanani laa Makromod Lalap lolo Romleu Lapa.

<sup>18</sup> Ler hir dodo'on ya'u onne, ainu'u panaeku ra'amou ra'adewe i kem'u horuwedi me'e, de ya al'ala honoi kanani laa Makromod Lalap lolo Nin Romleu Lape, ka oro ri nammori wewerre, la ri lolo onne kar rusu ara.

<sup>19</sup> Enimaa lere onne ri Yahudi ida woro'o rano noho Asia aile ma na'ahenia ya'u hi'i sala. Lo'o rira kalaklaka ma namlolo aile, alhi'ihepe hi ka rodi mai kalaka papa gubernur?

<sup>20</sup> Maa, na'amoli ri eniyenihe mehe konohi papa hir lernala ainu'u yaksala inhawe lere hi rodi ya'u laa rakpali Yahudi rira man ho'ok kail enihe na'akeme, ono ainu'u yaksala kaale.

<sup>21</sup> Maa, lere onne ya'u wakunu ha ida mehe lo'o hir kar suk. Ya'u wakunu naruri hi kalarna a'ahenia, 'Lere eni i wal'uhe maho'ok makail ya'u ono ya'u akin naili'il ri man maki, mori wali'ur.'

<sup>22</sup> Enine Feliks ma nauroin Yesus Nin wanakuku eni nammoriyedi renala honopun onne. Ai na'ahenia, "Lapanala uluwakun ara Lisias rakan mai eni mene

ya ala kenekrohu onuma panaeku eni."

<sup>23</sup> Onne horu, an hopon uluwakun ara ida nadiyaka Paulus wali'ur, maa ne'e huriyale tarana, leke nina ri orwali ka'arale ilitolle nina hewheweck nainaire.

*Paulus laa Feliks noro Drusila kalarna*

<sup>24</sup> Ler ida woro'edi, gubernur Feliks mai wali'ur noro hono Drusila ri Yahudi haenhi. Feliks hopon ri nala Paulus mai hi kalarne leke rakaniyala an wakunu hi'ihehewi ri akin naili'il Kristus Yesus.

<sup>25</sup> Paulus nala wanakunu konohi hi'ihehewi Makromod Lalap hari kalla leke ri namwali ri molololo. An konohi hi'ihehewi Makromod Lalap raram nodi ri nodi molollo kemen leke yon hi'i ha man morso, la hi'ihehewi lere man mamai eni Ai naho'ok nakail ri mormori na'akeme. Idewe Feliks namka'ukedi na'ahenia, "Wa'an me'e, mala'a here, lo'o ainu'u leken aile, polu o wali'ur."

<sup>26</sup> Ler onne me'ede, ai raram nodi Paulus nala kupan ai leke huriyedie. Onne penia lere romromo hopon rin polu Paulus mai nore wakunu.

<sup>27</sup> Anna woro'o horu, Perkius Festus namwali gubernur man herre Feliks. Rakan lere onne Feliks hoikaru Paulus namkene bui raram ono ai raram nodi hi'i ha ma nahuwa'an heri Yahudi akinhe.

## 25

*Paulus napanak nakpali*

*Roma nin Kaisar leke naho'ok nakail ai*

<sup>1</sup> Festus rakan propinsi onne leke nodi molollo, la nakawedi lere wokelu men ai namhara kota Kaisarea nala'laa Yerusalem.

<sup>2</sup> An rakan enne, Yahudi rira imam lalap roro rir man panulu enihe rodi rira kalaklaka mai leke tumdesne Paulus laa Festus kalarna. Hir nori waliwali Festus,

<sup>3</sup> leke an hi'i ha ma nahuwa'an hi akinhe. Hi raram nodi an hopon ri nodi Paulus mai Yerusalem, ono hir lawukuwedi panaeku me'e leke resne ai lolo kalla.

<sup>4</sup> Maa Festus walha, "Paulus aile bui raram lolo Kaisarea makun. Ka nalo'ol me'e ya'u wali wali'ur laa enne.

<sup>5</sup> Ende wa'an rehi minim ri ma nodi molollo ra'alono laa Kaisarea leke loikaru minim tunum desne moro ai ke'e, lo'o ainina yaksala aile!"

<sup>6</sup> Festus minle Yerusalem lere wo'aa, ee idaweliyedi mene an wali wali'ur laa Kaisarea. Rakan orekiyedi ai naikoro lolo hono'ok kanail onno me'e, de hopon ri nodi Paulus mai nakpali ai.

<sup>7</sup> Paulus rakanedi ne, ri Yahudi man maiyedi nano Yerusalem ramriri lupurala Paulus. Hir loikaru rira tunum desne man werek wake'e, maa hirira tunum desne onne na'alehe tanada ida.

<sup>8</sup> Paulus mehe nodiyala kemen na'ahenia, "Ka'u hi'i sala ida. Ka'u larlewen agame nina keneri hono'ok, ka a'amorso Makromod Lalap Nina Romleu Lapa, la

ka ano'onyaka Roma nin rai  
lap eni haenhi."

<sup>9</sup> Maa Festus raram nodi namna'a heri Yahudi akin, de ai na'ukani Paulus, "O me'e laa Yerusalem makpali ya'u leke aho'ok akail onuma hini'i wenewhe laa enne?"

<sup>10</sup> Paulus walhe, "Ya amririri lolo rai Kaisar nin hono'ok kanail onno lolo eni. Kan wa'an papa naho'ok nakail ya'u lolo Yahudi rira hono'ok kanail onno man aile Yerusalem. Makrom'u mehe nauroinedi me'e, ka'u hi'i sala noro heri Yahudi eni.

<sup>11</sup> Lo'o ya'u larlewenedi agame nina keneri hono'ok hi'i yaksala man werek penia hukumesne, ka amhene ri nesne ya'u. Maa lo'o hirira tunum desne ka namlolo, ri nin molollo kaale huri ya'u laa hi. Ya apanak Kaisar naho'ok nakail ya'u!"

<sup>12</sup> An derne Paulus wakunu onne horu, Festus noro nin ma nala nounaku holoor halauk enihe laa paeku wukuwala tarana. An lernaledi nounaku ne, ai na'ahenia, "O penia mapanak Kaisar naho'ok nakail o, de om laa makpali Kaisar!"

*Festus loikaru Paulus nina hini'i wenewhe laa rai Agripa noro narna Bernike*

<sup>13</sup> Ka nalo'olala rai Agripa noro Bernike mai Kaisarea leke rahuwo'okala Festus.

<sup>14</sup> Hir min lolo onne lerida woro'edi, de Festus kukunohi rai Agripa Paulus nina hini'i wenewhe. Ai na'ahenia, "Ri ida aile mai eni man Feliks hopon ri nadiyaka lere ai nodi molollo makun.

<sup>15</sup> Ler ya'u minle Yerusalem, Yahudi rira imam lalap roro rir leleher lalap onnenihe loikaru ri onne nin tunum desne maya'u. Hi rapanak ya ala hunukum makmaki ai,

<sup>16</sup> maa ya'u walha hi a'ahenia, 'Menmolollo ainima honoli, manina Roma eni, ai madedem mala leken ri nakpali wewerre noro nina man tumdesnenihe leke mehe nodiyala kemen mene ai mala hunukum.'

<sup>17</sup> Ende lere yo oro hi ra'alono mai eni nano Yerusalem, ka'u lapan nalo'ol, de rakan oreki idewe i hopon ri nodi Paulus mai nakpali ya'u, leke ya'u ho'ok kail ai.

<sup>18</sup> Ma nodi tunum desnenihe na'akeme ramriri rakpali ya'u haenhi rodi rira kalaklaka onnenihe, de ya akoto lo'o Paulus hi'i yaksala man werek wake'e, maa ai kan sala. Hirira tunum desne onne ka namlolo!

<sup>19</sup> Enla, hi roro Paulus rasesi panaeku ma na'onno rir agame, la hi rawalha lira inhawe namwali noro ri ida man makiyedi me'e naran Yesus. Paulus enie na'ahenia, 'Namlolo! Ri onne makiyedi, maa mori wali'ur.'

<sup>20</sup> Ya'u me'e mehe kakaiyedi. Ka auroin ya'u hi'i keneckrohu hehewi nin hini'i wenewhe onneni. Ende ya a'ukani Paulus, 'Hi'ihewi, o me'e laa Yerusalem leke raho'ok rakail onuma hini'i wenewhe lolo enne, ee ka?'

<sup>21</sup> Maa Paulus napanak leke rai Kaisar ho'ok kail ai wali'ur. Ai napanak ri nadiyake hehen nanumene

rakan lere ai nakpali Kaisar. Enpenia i hopon ri nadiyakale ai rakan leken man wa'an mene i hopon ri norkaruwe laa Kaisar."

<sup>22</sup> Enine Agripa na'aheni Festus, "Ya'u me'ene suk akani ri onne nin wanakunu."

Festus walhe, "Oreki mene makrom'u nakani lirna."

*Paulus laa nakpali rai Agripa*

<sup>23</sup> Rakan oreki Agripa noro Bernike mai, la Festus hi'i rai nina yapi lapa rodi kokala hi. Hir laa rom honopun raram roro wewerre uluwakun ara wo'irha roro leleher lalap ma aile lolo kota onne. Festus hopon ri nodi Paulus mai raram.

<sup>24</sup> Enine Festus konohi hi na'ahenia, "Makrom'u, rai Agripa noro papa na'akeme ma aile mai eni! Heri Yahudi na'akeme lolo Yerusalem noro heri ma aile mai eni kalakedi ri eniyeni maya'u me'e. Hir wakau waliwali ra'ahenia, 'Ri eniyeni, yon huri mori me'e.'

<sup>25</sup> Maa, ka'u do'on an hi'i yaksala ida ma nakoko an lernala hunukum makmaki. Enla ai mehe napanak rai Kaisar ho'ok kail nina hini'i wenewhe lolo kota Roma, de ya aledi kenekrohu ri norkaruwe laa rai Kaisar me'e.

<sup>26</sup> Maa ya a'alehe wanakunu ma namlolo ida nano nin hini'i wenewhe makun leke ya'u hi'i horok aku laa rai Kaisar. Enpenia yo odie mai makrom'u, rai Agripa noro papa na'akeme kalarna! Ainu'u panaeku am

koklolo nina hini'i wenewhe horuwedi, lo'o haida aile leke yo odi hi'i horok laa Kaisar,

<sup>27</sup> ono ainu'u panaeku kan lolo ri honorok akin ika aku ri man minle bui raram laa rai Kaisar leke ho'ok kaile, na'alehe yakyaka salsale man mouropo."

## 26

*Paulus mehe nodiyala kem men rai Agripa kalarna*

<sup>1</sup> Agripa lariyala Paulus na'ahenia, "Ya ala leken pa'e mehe modiyala kemmu."

Ende Paulus kikan liman laa wawan mene ai mehe nodiyala kemen na'ahenia,

<sup>2</sup> "Konohiyala makrom'u, rai Agripa man i horhawe! Ya akin nahuwa'an wake'e ono lere eniyeni makrom'u nala leken ya'u mehe odiyala kem'u lolo makrom'u kalarna leke i walha heri Yahudi rira tunum desne na'akeme.

<sup>3</sup> Ya akin nahuwa'an ono ya auroin makrom'u mehe nauroinedi kokkoo noho Yahudi rira honoli wenewhe noro rira panaeku rahu ma ka namnenehe na'akeme me'e. Ende ya apanak makrom'u namdaruwala rakaniyala i lir'u tarana.

<sup>4</sup> Ri Yahudi enihe na'akeme rauroin ainu'u morimori nano ya'u mamai wawan makun rakan lere eniyeni. Nano nonolu eni, lere ya'u minle noho mememen noro idewe lere ya'u minle Yerusalem hi rauroin ainu'u hini'i wenewhe na'akeme.

<sup>5</sup> Nano nonolu me'e, hi rauroinedi ya'u, de lo'o hi re'e rodi kunuku maka ma

namlolo, hi rauroin na'aheni ya'u lernohi muku Parisi rira wanakuku na'akeme, wanakuku man kernala Yahudi rira holoor halauk na'akeme.

<sup>6</sup> Enpenia lere eniyeni ya amriri mai eni leke makrom'u ho'ok kail ya'u, ono ya auroin Makromod Lalap lo'o hi'i Nina nou man Ai naledi ik upud a'ad eni namwali me'e de ya akin nahuwa'an wake'e. Nou onne na'ahenia, 'Ri na'akeme man maki, lere man mai Makromod Lalap na'amori wali'ur.'

<sup>7</sup> Israel nina luhu idaweli woro'o onne, hi na'akeme akin naili'il nahenia lere man mai nou eniyeni namwali kokkoo penia hi ramkene ilitolle Makromod Lalap lelere a'alam. Maa, makrom'u, heri Yahudi eniyenihe tumdesne ya'u hi'iyedi yaksala me'e, ono ya akin naili'il nou onneni haenhi.

<sup>8</sup> Alhi'ihepenia mi ri Yahudi enihe honorok akin deul tana de ka naili'il Makromod Lalap! Alhi'ihepe mi ma'ahenia Nin ke'eke'el an'anhe kaale na'amori wali'ur ri man makie?

<sup>9</sup> Nonolu eni ya'u mehe ala honorok panaeku hi'i ha wo'ira leke ewek kawala Jesus, ri Nazaret onneni, Nin kalla.

<sup>10</sup> Enla ya'u hi'iyedi panaeku onne lolo Yerusalem me'e. Yahudi rir imam lalap enihe rala horok ma nala molollo maya'u leke kele ri nammori man lernohi Jesus odi laedi bui raram. Ye e'enohi hir hukummesne

ri man lernohi Yesus enihe haenhi.

<sup>11</sup> Ler alam nammori ya'u hi'i sus hi lolo Yahudi rir kerei na'akeme, la ya ahehe akerne hi ra'ihoru ra'idaru Yesus. Ainu'u panaeku eni kipkipun ya akin penia yo odi le'ule'u hi ma aile kota-kota namehin lolo noho Israel paharne."

*Paulus wakunu ha ma namwali ai kemen lolo kalla man laa Damsyik*

<sup>12</sup> "Ende ler ida yo odi horok ma nala molollo nano Yahudi rir imam man panulu enihe ya ala'a Damsyik leke hi'i panaeku eniyeni.

<sup>13</sup> Rakan lere ulu ya ala'ala'a lolo kalla laa Damsyik makun, ya amlilin-nohi ropropo ida mai nano a'am man hikhika narehiyedi lere, idewe pupinedi yo oro ainu'u kalla wali enihe.

<sup>14</sup> Mayai na'akeme wali yawa, i derne lira ida ma nodi Yahudi rira wanakunu Ibrani na'aheni maya'u, 'Saulus, Saulus! Alhi'ihepenia om hi'i sus Ya'u mamani? Mehem hi'i o akin apinha, ono mamhene Makrommu nodi molollo o,'

<sup>15</sup> Enine ya'u walha a'ahenia, 'Makrom'u, inhoi O?'

Enla Makromod walha maya'u na'ahenia, 'Ya'u Jesus man om hi'i sus eni.

<sup>16</sup> Mamririyedi here! Ya alahariyedi I kem'u ki o, ono Ainu'u panaeku ma na'ono o aile. Ya'u nili o mamwali Ainu'u hophopon, leke lam konohi ri noho namehin inhawa man om dodo'on lere

eniyeni noro inhawa man  
Ya'u kukul ki o lere man mai  
eni.

<sup>17</sup> Ainu'u panaeku huri  
o nano num ri mememen,  
Yahudi enihe, noro idewe  
nano ri ma ka namwali  
Yahudi lere hir kene kohon  
yaka o. Ya'u hopon o mala'a  
hi,

<sup>18</sup> leke ma'amouwedi hi  
makan, leke hi ramhara  
metmetek raram laa minle  
ropopeni raram, leke  
hi re'e Makromod Lalap  
huriyedi hi rano Hayakyak  
Makromon nin molollo, la  
rapanak Makromod Lalap  
nodi molollo hi. Mala'a hi  
leke hi akin naili'il Ya'u, de  
Makromod Lalap na'ohu  
nahaledi rira dohohala, la  
hi'i hi ramwali Nina ri man  
An niliyedi me'e.'

### *Paulus wakunu nina hon- owoke*

<sup>19</sup> "Ende, rai Agripa, onne  
penia ya'u derne akani la hi'i  
wewhe ha wo'ira na'akeme  
Makromod Yesus konohiyedi  
ya'u me'e lere An hari kemen  
maya'u.

<sup>20</sup> Ende ya'u nounaku  
ri na'akeme herredi rir  
morimori ma ka namloeni,  
la derne rakani Makromod  
Lalap mehe, leke lo'o ri  
namehin po'on hirira hini'i  
wenewhe, idewe hi rau-  
roin nahenia rira morimori  
herredi me'e. Loloi kakaru  
eni dedesne i loikaru lolo  
kota Damsyik. Horu ne, lolo  
Yerusalem noro Yudea ne'en  
raram na'akeme, la lolo eni  
laa ri ma ka namwali Yahudi  
haenhi.

<sup>21</sup> Onne penia nakoko heri  
Yahudi kele ya'u lolo Makro-

mod Lalap Nina Romleu  
Lapa nin nikoin leke resne  
ya'u.

<sup>22</sup> Maa rakan lere eniyeni  
Makromod Lalap norle'ule'u  
norwaliwali ya'u, penia ya  
amririri mai eni amwali  
Nina man kuku maka leke  
konohi ri na'akeme, ri lalap  
noro idewe ri man lolo  
yawa, Makromod Lalap  
Nina panaeku ma namlolo  
eni. Ainu'u wanakunu  
namnenehe Musa noro nabi-  
nabi nonolu eni.

<sup>23</sup> Wanakunu onneni  
na'ahenia Kristus man  
Makromod Lalap kikan  
namwali Rai laa ewi-ewi  
eni, Ai lo'o lernala wewerek  
pananaka, la Ai namwali ri  
dedesne man mori wali'ur  
nano makmakie, leke nodi  
kunukunohi nahenia ri  
Yahudi roro ri ma ka  
namwali Yahudi na'akeme,  
hirira leken aile lernala  
or'ori dardari ma namlolo  
eni. E'ni penia namwali ha  
man mou la ma na'ono hi."

<sup>24</sup> Paulus mahan nodiyala  
kemen, Festus kaisedi  
na'ahenia, "Paulus o  
ma'iseriyedi me'e! Onuma  
woroin rahu onne hi'i o lo'o  
ma'iseri."

<sup>25</sup> Maa Paulus walhe,  
"Ka! Ka a'iseri, makrom'u!  
Ya'u wakunu panaeku ma  
namlolo. Ya'u wakunu naise  
ri man hokhokon nala'a  
wawa'an."

<sup>26</sup> Rai Agripa nauroinedi  
ha wo'ira na'akeme eniyeni  
me'e, de ya a'alapa ya akin  
wakunu mouropo papa  
kalarne. Ya akoto papa rai  
Agripa derne nauroinedi  
panaeku na'akeme onne  
me'e, ono na'akeme namwali

lolo onno ma ka nasinuware.  
<sup>27</sup> Makrom'u, rai Agripa!  
 Lo'o makrom'u nauroin nahenia nabi-nabi rira wanakunu nonolu eni nam-lolo, ee ka? Ya auroin makrom'u derne nakani rir wanakunu onnel!"

<sup>28</sup> Enine Agripa na'aheni Paulus, "O mahehe hi'i ya amwali Kristen lere eniyeni?"

<sup>29</sup> Paulus walhe, "Lo'o mala leken tarana, me, leken nammori, ya'u hi'i lir napanak Makromod Lalap leke An hurinohi makrom'u noro ri na'akeme man derne ainu'u panaeku lere eniyeni ramwali naisa ya'u, kokoko rantan man rodi wukwuku eni mehe!"

<sup>30</sup> Kame'ede pap rai, governor, Bernike, roro ri namehin na'akeme ramririyedi.

<sup>31</sup> Hi ramharedi laa parhene ne, ida ma ne'el ida na'ahenia, "Ri eniyeni hi'i in-hawa sala penia hukumesne, ee rodie laa bui raram?"

<sup>32</sup> Enine Agripa na'aheni Festus, "Ri eniyeni manlo'o huriyedi me'e, maa ai napanakedi rai Kaisar ho'ok kail ai wali'ur."

## 27

*Paulus hopol laa noho Roma*

<sup>1</sup> Festus naledi kenekrohu nahenia am hopol laa noho Italia, de hi rala Paulus noro ri ida woro'o ma na'iro'o namehin kanile Yulius ma namwali uluwakun ara ida lolo rai Kaisar nina batalyon.

<sup>2</sup> Enime'ede am ha'a kapal nano Adramatium ma

namkenedi larolle Asia nina panaliyonno me'e. Am hopol me'e, la ainima kalla wali ida aile ma naran Aristarkus, manina Makedonia nano kota Tesalonika.

<sup>3</sup> Orekiyedi nanumene am rakan laa Sidon. Yulius akin wa'an noro Paulus, de ai nala leken Paulus lan ka'arala nina ri orwali manina lolo onne, leke hir ilitolle ralala hahaa man an hewek nair lolo kapal.

<sup>4</sup> Mayai mamhara lolo onne mala'a, maa kahi anna lape nano kalari, de kukuwala ainima kapal. Enpenia am hopol maulohir her noho Siprus wali kimur, leke ma'iheuwala anna tarana.

<sup>5</sup> Mayai deul heleken laa noho Kilikia noro noho Pamfilia mene am laa noho Likia nina leke Mira.

<sup>6</sup> Am rakanedi leke Mira ne, uluwakun areni pakrom-nala kapal ida nano Aleksandaria ma na'ikeki namhara me'e nala'a Italia. Ende an hopon mayai herre kapal me'e, de am ha'a kapal onne.

<sup>7</sup> Mayai hopol nalo'oledi ono kahi anna lapa wake'e. Eih! Apinpinha! Manlo'o ai kam rakan kota Knidus. Ai mamhara lolo onne anna hu namwerek kukuwale de kapal kan laa kalari, ka raruri ulu rira lalaa nonolu eni. Enime'ede am hopol ulu karanna deul lain Salmone lolo noho Kreta wali kimur leke am ma'iheuwala anna tarana.

<sup>8</sup> Ai maulohir noho wali kimur laa noho wali karanna, maa apinpinha nore. Kame'ede am rakan onnida naran 'Panaliyonno

Man Ma'aruru' man ranrani  
leke Lasea.

<sup>9</sup> Ai malo'oledi lolo  
heleken, de ri Yahudi enihe  
rira Lere Alam Lalape Ri  
Mormori Rahuwa'an Roro  
Makromod Lalap horuwedi  
me'e.\* Kahi anna nina lere  
alam mai me'e, de Paulus  
nala nounaku hi na'akeme  
na'ahenia,

<sup>10</sup> "I wal'u na'ahoru, ainu'u  
honorok aki heheni: Lo'o  
ika hopol mamani, ik lernala  
ha yakyaka la iknik ne'en  
na'akeme man minle kapal  
eni molu horu. Enlo'o ka  
na'ahenia ne'en noro kapal  
mehen molu, maa maika lo'o  
molu haenhi."

<sup>11</sup> Enimaa, uluwakun ara  
onne ka nakani Paulus nina  
nounaku onneni ono ai akin  
nodi rehi lernohi ri ma  
nasala ulle noro kapal nin  
kapten onne rira nounaku.

<sup>12</sup> Rakan alam rinrinna  
kapal ka nadedem pali lolo  
panaliyonno onneni, ono  
kahi anna nammori de  
namehiyala min lolo onne.  
Ende man howok kapal  
nammori re'e ramhara lolo  
her onne, ono hi raram  
nodi rahehe rakan leke  
Feniks, leke min enne newek  
noho mou. Hi raram nodi  
minle noho Krete nin leke  
onne, ono panaliyonno onne  
nadwaliwali laa ra'i warak  
noro warak karanna de kahi  
anna ka nale.

*Am pakromonala anna  
lape heleken*

<sup>13</sup> Ler onne anna karanna  
hu poloiloiyedi. Ende man

howok kapal enihe pene'ek  
noho mou me'e, de hi ri'ik  
waku karkare mene hopol  
raulohir here lolo noho  
Kreta.

<sup>14</sup> Maa ka nalo'ol anna  
kimur lape (waki anna Ra'i  
Kimur) hu namansa nano ro  
mai lour,

<sup>15</sup> nalwali ainima kapal la  
naiheheri nawawali. Kapal  
kan kerhu nala anna lap eni,  
de mayai kam paekunala  
ulu kapal me'e. Ende men-  
molollo me'e kahi anna do'o  
dewe kapal natalu pakan laa  
ewi-ewi lernohi.

<sup>16</sup> Am lolo nohana  
Kauda wali karanna onne  
nanumene am ma'iheu  
tarana. Min lolo onne am  
mahehe makimaki hedu  
kapal nina sampan mai  
wawanne wukuwedie.

<sup>17</sup> Hir wukuwedie sampan  
horu ne, hi rodi kali lapa  
wuku kapal loloweweredi  
la ralkopuredi walare ono  
hi ramka'uk kahi anna lapa  
nodi kapal laa nawidoro lolo  
noho Sirtis nina doslo uine,  
de huri kapal natalu pakan  
mamani.

<sup>18</sup> Kahi anna lapa de rakan  
orekiyedi, hir ri'i kapal nina  
ne'en heruwali sopol laa kahi  
raram.

<sup>19</sup> Alam ida wali'ur, man  
howok kapal onnenihe sopol  
kapal nina honowok are  
heruwali laa kahi raram  
haenhi.

<sup>20</sup> Akilere lelere a'alam  
noho ha'aha'a mamani, de ai  
kam do'on lere noro kaliyore.  
Kahi anna lapa do'o dewe

\* <sup>27:9</sup> Nadedem ri Yahudi hi'i Lere Alam Lalape 'Rahuwa'an Ri Mormori Roro Makromod Lalap' onne wollo September honon, ka eni Oktober kalari. Ler onne tade lere anne huu ka namkene de ri namka'uk hopol me'e onno kahi anna lapa wake'e.

yai mamani. Kame'ede panaeku rahu ai ma'idedemi na'akeme loledi leken, de lo'o am maki mouwedi.

<sup>21</sup> Man howok kapal eni, alam wo'irha ka ra'ak, de Paulus laa namriri hi toro na'ahenia, "Lo'o i wal'uhe makaniyedi ainu'u nounaku lere man laa eni, ik kak hopol nano noho Kreta, la ik kak lernala ha rahu man yakeni, la ne'en rahu eni manlo'o kak sopol!"

<sup>22</sup> Maa lere eniyeni ya apanak an'anchedi ke'e, i wal'uhe ma'alapala mi akim. Nano i wal'u na'ahoru ri ida kan maki, maa iknika kapal eni yaka.

<sup>23</sup> Ya auroin eni ono alam eni Makromod Lalap man ya a'uli asa'eni nala Nina hophopon a'am raram mai pakromo noro ya'u na'ahenia,

<sup>24</sup> 'Paulus yono mamka'uk! Makromod Lalap nouwedi nodi nala o me'e, de ri mahaku lolo kapal eniyeni kan maki, ono Ainina panaeku om laa makpali Kaisar.'

<sup>25</sup> Ende, i wal'uhe, ma'alapedi mi akim, ono ya akin naili'il Makromod Lalap, de ya auroin An hi'i inhawa An nouwedi maya'u me'eni,

<sup>26</sup> maa ya auroin kokkoo maika kawidoro laa noho ida nina herraram."

<sup>27</sup> Rakan a'alam idaweli wo'akka nine, am matalu pakpakan aile heleken Adria. Alam totore man howok kapal enihe rauroiroin lo'o kapal na'uranrani ro me'e.

<sup>28</sup> Ende rala waku oroke kali rodi ke'e kahi roromne. Hir ke'e horu, roromne re werro'o wo'akka. Ka nalo'ol hir ke'e wali'ur, roromne re idaweli wo'aa.

<sup>29</sup> Enime'ede hi ramka'uk kapal kuku hanai, de ralkopur waku karkara wo'akka kapal li'ur, la ra'idemiyedi halhala no-horopo here.

<sup>30</sup> Man howok kapal onnenihe rodi panaeku suw-suwar leke lari nano kapal onnneni. Ende hir koko rala kopur waku karkara kapal yulu, maa hi rala kopur sampan laa kahi raram.

<sup>31</sup> Paulus do'on hi rala kopuredi sampan me'e, de ai lan konohi uluwakun ara noro nina ma nasala ke'urauk enihe, "Lo'o man howok kapal enihe kar minle kapal eni, mi ri mahaku kan mori."

<sup>32</sup> Idewe ma nasala ke'urauk enihe rosuwedi sampan nina kalie leke kahi nodiyedie.

<sup>33</sup> Na'ikeki noho roropeni, Paulus nala wanakunu hi na'ahenia, "I wal'uhe na'akeme ma'ak here! Alam idaweli wo'akkedi me'e I wal'u na'ahoru kerhuwedi lara, ka mo'on haida-haida.

<sup>34</sup> Ende ya apanak an'anchedi i wal'uhe ma'akala tarana leke mi kemen naruriyedi wali'ur. Yono mim kerhu lara me'e, ono i wal'uhe na'akeme kak maki, la haida lo'o kan hi'i ika."

<sup>35</sup> An wakunu horu, ai nala roti, hi'i lir napanak laa Makromod Lalap hi kalarne mene an a'un roti, na'an.

<sup>36</sup> Enime'ede hi na'akeme ra'alapedi akin, de ra'an haenhi.

<sup>37</sup> Ri ma aile kapal wawan na'akeme, ri rahu woro'o weli'ikku woneme.

<sup>38</sup> Hi na'akeme ra'an pe-huredi ne, hir ri'i ne'en gandum rehi eni wakal laa kahi raram leke ra'aranala kapal tarana.

### *Rira kapal kuku*

<sup>39</sup> Rakan nohoropo ho'o ne, man howok kapal enihe do'onedi noho, maa hi ka rauroin noho onne ewi. Enla hir do'on her ida lolo holokanida raram, dosle mamani de paekuwedi ulu kapal laa herraram onne leke kuku dosle.

<sup>40</sup> Ende hir dara rohu waku karkare nina kali laedi kahi wi'in noro huriyedi kali ma nasala ullen, la ralha'a kapal nina selseli leke anna hu kapal laa ro.

<sup>41</sup> Maa, hir lolala meki deul, de kapal yulu kukuwedi, ka nawollo me'e, la kapal li'ur eruk lapa tapal nanumene kapal wi'in noro herne waliwali enihe auwana mosu horu me'e.

<sup>42</sup> Ma nasala ke'urauk enihe paeku resne mouwedi ri ma na'iro'o ma aile kapal enihe, leke yon hi ranani laa ro, de lari.

<sup>43</sup> Maa rir uluwakun onne raram nodi Paulus mori, de kawala rira panaeku onne. An hopon ma nauroin ranani enihe nehu rolu laa ro here,

<sup>44</sup> la ri ma ka nauroin ranani enihe, an hopon rodi kapal nina auwana man mosu enihe ranani lernohi laa ro here. Am lernohi nina

panaeku eni, de ri mahaku kan maki.

## 28

### *Paulus minle Malta*

<sup>1</sup> Mayai laedi ro nanumene ai mauroin nahenia noho onne naran Malta.

<sup>2</sup> Ri ornohorai lolo onne rodi honoli man wa'an kokala mayai la hunuku ai mamrinnu ono ok'okon noro noho rinrinna nina alam.

<sup>3</sup> Paulus mahanoro ra'uk au nala loile ai, kan do'on haimoke aile au onne. Ai manha me'e, de namlilinnohi mai paharne na'unihiyala limeane kan huri.

<sup>4</sup> Ornoho enihe po'onala haimoke onne na'unihia Paulus liman ne, ida ma ne'e'l ida na'ahenia, "Eih, ri onneni lo'o ma nesne rie harome! Po'onala! An mehe nahala kemen mai ro me'e, maa iknika noho makromon maeke man ho'ok kail eni, lo'o kan hurinohi an mori."

<sup>5</sup> Maa, Paulus wiukedi haimoko onne laa aiye raram wali'ur, liman kan apinha.

<sup>6</sup> Hir laplapan liman peken, ee wali yawa makiyedi ke'e, maa haida-haida ka namwali ai kemen, nadedem me'e. Enime'ede hi rahinorok ha namehin wali'ur ra'ahenia, "Ai lo'o namwali noho makromon harome."

<sup>7</sup> Kan ko'uwalla, awak ida aile, la Publius ma namwali man panulu lolo onne manarna awak onne. An kokala mayai nodi honoli wawa'an, de ai mammwali nina peina'a alam wokelu.

<sup>8</sup> Ler onne aman nakni'ir rinna manha noro koi kakkaki, la Paulus lan ka'arala ai. Paulus hi'i lir

napanak mene kemenala liman ai uluwakun, hi'i ai wa'anedi me'e.

<sup>9</sup> An hi'i wa'anedi ri leleher onneni ne, ma nakni'ir lolo noho onne na'akeme mai Paulus leke hi'i wa'an.

<sup>10</sup> Hi rahiylene aroro mayai rehi. Rakan lere am hohopol eni, hi ra'akenedi oir wa'aleher noro hahaa leke am nair lolo kapal.

### *Ramhara Malta hopol laa Roma*

<sup>11</sup> Mayai min wollo wokeluwedie enne mene am ha'a kapal ida nano Aleksandaria leke mamhara noho onne. Kahi anna lapa nina lere alam, de kapal pali nalo'oledi lolo onne. Kapal onne naran 'Dioskuri' (napa'ahne, 'noho makromon adodo'e').\*

<sup>12</sup> Am paliyala lolo kota Sirakusa alam wokelu.

<sup>13</sup> Ai mamhara lolo onne hopol laa kota Regium. Orekiyedi nanumene anna karanna hu, de alam woro'o mehe am rakan kota Putioli.

<sup>14</sup> Min lolo onne, am pakromnala ai walihne ida woro'o ma akin naili'il Yesus. Hir lariyala ai moro hi minala domeku ida mene ai mala'ala'a ei laa kota Roma.

<sup>15</sup> Ai walihne manin Roma ma akin naili'il Yesus enihe dernedi na'ikeki am rakan me'e de heruwali mai leke Pasar Apius, la heruwali mai leke Losmen Wokelu leke rahuwo'okalai, la ai ma'alono wewerre laa Roma. Pakromedi noro hi, Paulus

napanak trimkasi Makromod Lalap, la ai akin lapedi me'e.

### *Minle Roma*

<sup>16</sup> Ler am rakan Roma, uluwakun ara kakar leke Paulus mehe min nakar ida, la nala ma nasala ke'urauk ida nadiyake.

<sup>17</sup> Nakawedi alam wokelune, Paulus lariyala Yahudi rira man panulu manin Romeni. Hir maiwukuwedine, ai na'aheni, "Konohiyala I lodon walihne na'ahoru! Kade ka'u hi'i salida lolo iknika noho, la ka'u larlewenedi noho honolla man ik kokala nano ik upud a'ad, maa rin kele ya'u lolo Yerusalem, rala ya'u laa Roma nina ma nodi molollo lolo eni.

<sup>18</sup> Sisnai ainu'u hini'i wenewhe horu ne, hi re'e huri ya'u me'e, ono kar do'on ainu'u salida ma nakoko leke hukumesne ya'u.

<sup>19</sup> Maa, ri Yahudi lolo Yudea enihe ra'okulala ma nodi molollo Roma nin panaeku onne. Kame'ede, ne'e namhene ya apanak rai Kaisar mehen ho'ok kail ya'u lolo eni. Ya'u hi'i heheni, maa ya amhene odi kalaklak ida tum ainu'u noho raram.

<sup>20</sup> Hir kele ya'u la rantana'u ono ya akin naili'il Ai man Makromod Lalap kikan namwali Rai laa ewi-ewi, man noho Israel na'ahoru lalapan haenhi. Enpenia ya'u lariyala i wal'uhe na'ahohoru mai leke ika wakunuwala tarana."

\* **28:11** Dioskuri wekel mo'oniwalla adodo'e ma naran Kastor noro Poluks. Hi ramwali noho makromon woro'o nano ri Yunani rir noho makromon nammori onne.

<sup>21</sup> Hir walhe ra'ahenia, "Mayai kam kokala horok ida nano Yudea makun, man konohi ai walin nina kalla eniyeni. Enla ai walinhe man idedi nanumene mai rano enne, ka rodi lir ida ma namwali ai walin nina sala, la kar wakunu nano'onyaka ai walin.

<sup>22</sup> Maa, ai walin nina honorok aki hi'ihehewi, ono mayai na'akeme dernedi me'e nahenia ri na'okul wanakuku man ai walin lernohi, la mamala onne."

<sup>23</sup> Ende hi roro ai rala nelu alam ida leke pakromod wali'ur.

Rakan alam hir pakromeni, ri namansa mai-wuku Paulus nin nakar miminle. Nano al'alam rakan lere helemedi, Paulus loikaru panaeku hi'ihewi Makromod Lalap nodi molollo ri mor-mori. Ai na'amou na'arope panaeku eni nodi horok ma na'ono Musa nina keneri hono'ok noro nabi-nabi rira horok haenhi, nahehe leke hi rauroin Makromod Lalap kikanedi Yesus onne namwali Rai laa ewi-ewi, leke hi akin naili'il Ai.

<sup>24</sup> Heruwali derne rakani panaeku Paulus loloi kakaru eni, maa heruwali enihe ramhene derne rakani.

<sup>25</sup> Hirira honorok panaeku ka namnenehe na'alono, de ida ma nasesi noro ida, penia hi rahina'aredi lolo onne. Maa ka rahina'ar makun, Paulus wakunu wali'ur hi na'ahenia, "Memen Roh Kudus Nina wanakunu nam-lolo kokkoo man nabi Yesaya

na'aheni mi upum a'umhe nonolu eni nahenia,

<sup>26</sup> 'Mala'a here. Lam konohi ri eniyenihe nahenia:

Mim makankani mamani, maa ka mauroin haida-haida, mim koklolo ma'inau mamani, maa kam do'on haida haenhi.

<sup>27</sup> Ri eniyenihe akin kerhe de ramhenedi Ya'u me'e, ono hi raisedi ri man kilinna rohedi, la raisedi ri man mak-toke.

Enimaa, lo'o hi akin kan kerhe, hi rodiyedi makanhe do'on leke rauroin Ya'u, hi kilinne derne Ya'u, la honorok akinhe rau-roin Ainu'u wanakuku wanayo'o,

penia wali mai Ya'u leke Ya'u hi'i wa'an wali'ur hi.'"<sup>\*</sup>

<sup>28</sup> Paulus na'aheni onne horu, na'aheni wali'ur, "I wal'u na'ahoru, ya'u wakunu mouropo leke mi mauroin. Ler eniyeni Makromod Lalap Nina panaeku ri nodi Lirna Wawa'an eni loikaru laa ri ma ka namwali Yahudi enihe me'e, leke hi rauroin Ai nala or'ori dardari ma kan horu hi haenhi. Hi penia derne rakani Lirna Wawa'an onne!"

<sup>29</sup> [Paulus na'aheni onne horu, ri Yahudi enihe rala'a me'e, la ida ma nasesi noro ida.]<sup>†</sup>

<sup>30</sup> Paulus minle Roma anna woro'o, an mehe sewa nakar

\* <sup>28:27</sup> Yes. 6:9-10    † <sup>28:29</sup> Horok man aile lolo tanada [ ] raram, kaale lolo horok Yunani dedesne heruwali.

minle, la ai raram nodi  
kokala ri na'akeme man mai  
ka'ar enihe.

<sup>31</sup> Ai ka namka'uk konohi  
hi na'akeme hi'ihehewi  
Makromod Lalap nodi  
molollo ri mormori, la an  
wakuku Makromod Yesus  
Kristus Nin mamai noho  
wawan eni, la ri mahaku ka  
na'o'o ai wakuku lolo onne.

## Roma

*Horok Lirna La'an*

Nonolu kota Roma namwali kota lalapa ma na'ono lolo hair Italia. Lere onne hair Italia nin rai lalap wekel Kaisar la ai nodi molollo hair-hair namehin nammori nano kota Roma onne haenhi. Paulus nin panaeku hi'i horok eniyeni wakuku agame Kristen nin panaeku ma na'ono laa ri Kristen man minle Roma. An hi'i horok eni ono ai kan lernala leken laa Roma makun.

Ik lese panaeku ma na'ono wake'e lolo horok eni lolo lisir eniyeni: Lir Wawa'an onne kukunohi maika hi'ihehewi Makromod Lalap hi'i ri na'akeme ma akin naili'il Ai ramwali ri molololo Ai leken kalarna. Onne naise Horok Lape Lirna ma na'heni, "Ri ma akin naili'il Makromod Lalap, ai onne namwali ri molololo Ai kalarna, de lernala morimori ma namlolo." Onne namwali ono hi akin naili'il Makromod Lalap mehe, kalla namehin kaale (1:17)!

Lolo horok eniyeni Paulus wakuku heheni: Kade ik ken hi'i wewehe Musa nin keneri hono'ok mamani, maa ik ka kamwali ri molololo Makromod Lalap kalarna, ono ri kaale man paekunala hi'i wewhe Musa nin keneri hono'ok na'akeme leke namwali ri molololo (3:27-28; 4:15). Makromod Lalap Nala Nin rere'e haharu maika, de hi'i ika koro Ai kahuwa'an wali'ur lolo Jesus Kristus man huri we'er ik nano

dohohale nin hunukum eni, la ka napanak wanalhane ida (3:24-25; 5:8). Ende lo'o ik akin naili'il Jesus, Makromod Lalap huri we'er ika nano iknik dohohala nin hunukum, la An nou nahenia ik kamwali ri molololo Ai leken kalarna (3:22, 26; 4:24-25).

Paulus horok Makromod Lalap Nin panaeku ma na'ono ri Yahudi haenhi (pnk. 9-11). Nonolu ri nadedem wekel hi ri Yahudi, ri Israel, noro idewe Israel upun ananhe. Ri Yahudi enihe ramwali Abraham upun ananhe, la Abraham eni Makromod Lalap nili leke namre'e namharue, la hi'i ai namwali hair man lap, la nala ai upun ananhe nammori. Jesus eni namwali Abraham upun anan, maa ri Yahudi nammori ra'okuledi Ai. Ler onne ri aile ma nauroin nahenia lo'o Makromod Lalap hamlinuwedi Nin ri Yahudi onne. Paulus na'heni ri Yahudi nammori ra'okuledi Jesus ono ramhene derne rakani Ai (10:1-4). Ai na'heni, 'Namlolo hir hi'i sala, ono akinhe ka naili'il Jesus, maa rir sala onne nakoko ri ma ka namwali Yahudi lernala leken ramwali Makromod Lalap Nin ri' (11:11-15, 30-31). Panaeku eniyeni na'akeme horokedi lolo Horok Lap raram nano nonolu (9:25-29; 10:19-21). Makromod Lalap Nin panaeku lere li'ur huri we'er ri Israel na'akeme nano rir dohohala nin hunukum (11:26).

Lere Paulus hi'i horok eni ai kan laa Roma makun.

Kade an ken laa enne rew'ira, maa panaeku aile man kawala, de an hi'i lir napanak leke anna onne an lernala leken laa ka'arala hi (1:10-13; 15:22-29).

### *Horok Ihin*

1. Paulus nala wanakunu man hari horok eni (1:1-15).
2. Paulus nala wanakuku ma na'ono lolo horok eni (1:16-17).
3. Ri morimori na'akeme sala lolo Makromod Lalap kalarna (1:18-3:20).
4. Paulus kukul kalla ma namlolo leke ik kamwali ri molololo Makromod Lalap kalarna (3:21-5:21).
5. Paulus na'aheni ik koro Yesus kamwali mahaku, de ik kahinuriyedi nano dohohala nin molollo (pnk. 6), ik kahinuriyedi nano keneri hono'ok nin molollo (pnk. 7), la Roh Kudus nala morimori worworu maika (pnk. 8).
6. Paulus konohi hi'ihepe ri Yahudi heruwali ka ramwali Makromod Lalap Nin ri (pnk. 9-11).
7. Paulus konohi hini'i wenewhe man wa'an ri Kristen hi'ie (12:1-15:13).
8. Paulus wakunu nin honowok nodi Lira Wawa'an loikaru ri ma ka namwali Yahudi noro nin panaeku ki ka'ar manin Roma (15:14-33).
9. Paulus nala wanakunu tape masi noro nounaku man horu (pnk. 16).

*Paulus nala hiyene arore ri man minle Roma*

<sup>1</sup> I walin man minle Roma na'ahoruwed, ya'u eni Paulus, man hi'i horok eniyeni, la ya amwali Yesus Kristus Nina hophopon wahwahan. Makromod Lalap mehe nili ya amwali man loikaru Lirna Wawa'an eni, la Lirna onne

<sup>2</sup> An nouwedi nano nonolu me'e. Lere nonolu onne, An hopon Nina nabi-nabi horok Lirna Wawa'an onne lolo Horok Lap man moumou dewdewe raram.

<sup>3</sup> Lirna Wawa'an onne na'ono Makromod Lalap Anan, ik Makromod Yesus Kristus. Enla lere Yesus mai noho wawan eni, kemen namwali ri mormori, ono namwali rai Daud upun anan.

<sup>4</sup> Onne kan mehe, maa Makromod Lalap na'amori wali'ur Yesus nano Nin makmaki, de onne namwali tanada ma naruri wake'e nahenia Yesus onne Ai Anan mememen, de An moumou dewdewe namnenehe Aman.

<sup>5</sup> Makromod Lalap namre'e namharu ya'u, ono Yesus kukul ya amwali Nin hophopon wahwahan ma nodi Lirna Wawa'an eni loikaru ri ma ka namwali Yahudi na'akeme. An hopon ya'u wakuku hi, leke hi akin naili'il ik Makromod Yesus, penia derne rakani la ra'akulu ra'alap Ai Naran.

<sup>6</sup> Makromod Lalap napoluwedi mi man minle Roma eni, leke mamwali Yesus Kristus Nin ri haenhi.

<sup>7</sup> Onne penia ya'u hi'i horok eni maiyala ki mi ma akin naili'il Yesus man minle Roma eni. Makromod Lalap

naramyaka mi la niliyedi  
mi mamwali Nin ri me'e.  
Ya apanak na'amolia ik  
Amad Makromod Lalap noro  
Makromod Yesus Kristus rala  
rere'e haharu noro wawa'an  
rara'a ki mi.

*Paulus raram nodi nala'a Roma*

<sup>8</sup> Dedesne ya apanak trimkasi Makromod Lalap lolo Makromod Yesus Kris-tus, ono mi akim naili'il Yesus, la noho wawan na'akeme dernedi nahenia mi akim naili'il Ai kokkoo.

<sup>9</sup> Yo odi aki man mou ilitolle Makromod Lalap Nin honowok, de ya'u loikaru Lirna Wawa'an ma na'ono Ai Anan eniyeni. Makromod Lalap nauroin nahenia akilere ya'u hi'i lir napanak leke Makromod Lalap paku mi mamani,

<sup>10</sup> la ya apanak rehirehi lewlewen Makromod Lalap hari kalla maya'u leke ki ka'arala mi.

<sup>11</sup> Ya'u raram nodi oro mi pakromala, ono Roh Kudus namre'e namharu ya'u pena-nia ainu'u panaeku amre'e amharu mi la a'alapala mi akim haenhi.

<sup>12</sup> Ainu'u panaeku ik ida ma na'alapa ida akin, ono ik akin naili'il wewerre Yesus Kristus.

<sup>13</sup> I wal'u na'ahoru! Ya'u konohi mi leke mauroin nahenia ainu'u panaeku ki ka'arala mi, maa rakan ors eni ha man ewekala kawala aile mamani. Nonolu, ya'u laa ri ma ka namwali Yahudi namehin loikaru Lira Wawa'an eni, la ri nammori

akin naili'iliedi Yesus me'e. Enla ya'u raram nodi ki minim nohe leke nano i wal'uhe lo'o ri nammori akin eren naili'il haenhi.

<sup>14</sup> Makromod Lalap hopon ya'u loikaru Lirna Wawa'an ri na'akeme: ri man lernohi iknika noho honolla noro ma kan lernohi, ri man iskolo noro ma kan iskolo. Makromod Lalap naramyaka rehi maya'u, de ya'u raram nodi lernohi Nin konomdere manani.

<sup>15</sup> Onne penia ya'u raram nodi loikaru Lirna Wawa'an ki mi man minle kota Roma haenhi.

*Lir Wawa'an ma nala or'ori dardari maika*

<sup>16</sup> Ya auroin Lir Wawa'an onne namwali Makromod Lalap Nina ke'eke'el an'anha, la ri na'akeme ma akin naili'il Lir onne lernala or'ori dardari ma kan horu, de ka awawa loikaru Lir Wawa'an onne. Lir Wawa'an onne loikaruwedri ri Yahudi noluwedri ri namehin ma ka namwali Yahudi.

<sup>17</sup> Lir Wawa'an onne kukunohi maika hi'ihehewi Makromod Lalap hi'i ri na'akeme ma akin naili'il Ai ramwali ri molololo Ai leken kalarna. Onne naise Horok Lape Lirna ma na'aheni, "Ri ma akin naili'il Makromod Lalap, ai onne namwali ri molololo Ai kalarna, de lernala morimori ma namlolo." Onne namwali ono hi akin naili'il Makromod Lalap mehe, kalla namehin kaale!  
\*

*Makromod Lalap nalhari  
Nin ahan penia hukum ri mor-mori ma kan derne rakani Ai*

\* 1:17 Hab. 2:4

<sup>18</sup> Ors eniyeni Makromod Lalap man aile a'am raram nalhari Nin ahan man werek, la An hukum ri ma namhene derne nakani Ai noro ri man hi'i dohohala. Hirira hini'i wenewhe man ailanna onne namwali ew'ewek kawkawa penia hi roro ri namehin ka rauroin Makromod Lalap Nina kalla ma namlolo eni.

<sup>19</sup> Ri mormori na'akeme rauroiroin Makromod Lalap aile, ono Ai penia man hi'i ha wo'ira namwali leke hi rauroin.

<sup>20</sup> Ri kan do'on Makromod Lalap, maa nano lere Ai nakuku noho naleu a'am, ri mormori rauroin kokkoo Ai onne Makromod Lalap Ma Narehi Ma Nalewen la Nina molollo rakan laa ewi-ewi. Hi rauroin eniyeni ono do'onedi hahaa na'akeme man An hihi'i enihe. Ende ri nin molollo kaale na'heni, "Ka auroin Makromod Lalap aile!"

<sup>21</sup> Memen ri mormori onne rauroiroin Makromod Lalap aile, ma kar horhawe, ka ra'uli rasa'a, la ka rapanak trimkasi Ai. Ende rir honorok panaeku na'akeme nawokor nakali la honorok akin makiyedi de ka rauroin ha ma namlolo ida me'e.

<sup>22</sup> Hi ra'heni, "Ik kau-roin!" maa ma namlolo hi ramwaliyedi ma namdoowake'e.

<sup>23</sup> Hi ramhene hoikani la ra'uli rasa'a Makromod Lalap man mori laa ewi-ewi, maa hi raram nodi hoikani aukerhe man hi'i naise na'oi ri mormori, manu liwl-war, ha mormori man ein wo'akka, noro ha mormori ma na'ina'ik haenhi. Ha onne

na'akeme kan mori laa ewi-ewi naise Makromod Lalap.

<sup>24</sup> Ende Makromod Lalap huriyedi hi lernohi rira raram nodi aimehi, la rira hini'i wenewhe man morso onne nakoko hi ida man holi diwar dawar noro ida.

<sup>25</sup> Hi ramhene derne panaeku ma namlolo noro ha ma na'ono Makromod Lalap, maa hi raram nodi derne ha ma ka namlolo. Hi kar hoikani Makromod Lalap ma nakuku noho ma naleu a'am, maa hir hoikani la ilitolle inhawa man Makromod Lalap hi'ie. Rir hini'i onne kan wa'an, ono wa'an rehi ik koro hahaa na'akeme man Makromod Lalap hi'ie ka'uli kasa'a Ai laa ewi-ewi! Amin.

<sup>26-27</sup> Ri mormori onnenihe rira hini'i wenewhe namehiyala, de Makromod Lalap huriyedi hi lernohi rira raram nodi aimehi, penia mo'oni po'on maeke enihe akinhe ka namone me'e, la maeke onnenihe kar hi'i inhawa ma nadedem ri mormori hi'ie. Maeke, ida ma namono ida, la mo'oni, ida ma namono ida lernohi rira raram nodi aimehi. Ende hir hi'i ha ma kan lolo ri raram, penia lernala wanalhane lolo hi kemen lernohi rira honorok akin noro hini'i wenewhe man ailanna onne.

<sup>28</sup> Ri mormori onne ka rahinorok Makromod Lalap la ramhene rauroin Ai me'e, penia An huriyedi hi lernohi rira honorok aki man namehiyala onne, de hir hi'i ha man morso mamani.

<sup>29</sup> Hi raram nodi hi'i dohohala namansa, la hir hi'i ha man ailanna mamani. Hi

ida ma nakmanna ida nin hahaa, la hir ida ma holi diwar dawar noro ida me'e. Ida man kunu kehen ida, ida ma nesne ida, ida ma nasesi noro ida, ida man wukupoho ida, ida ma kan wakunu wawa'an noro ida, la ida man kokoldara ida nina morimori mamani.

<sup>30</sup> Hi radedem wakunu nano'onyaka ri heri ri wali, hadwei hadwokor Makromod Lalap, kar derne rakani nounaku, holi kukulu lalapa, mehe ra'uli kemen, ranoin kalla worworu hi'i ha man ailanna, la kar derne rakani ri leleher.

<sup>31</sup> Hirira honorok panaeku kan min haida. Hi rala nou, maa kar hi'ie, ka raramyaka ri, de akinhe kan wa'an wake'e.

<sup>32</sup> Hi rauroin lolo Horok Lap raram Lirna aile ma na'heni, "Inhoi ailanna naise eniyeni Makromod Lalap hukum," maa hi kar ren rira ailanna eniyeni. Onne kan mehe, maa hir nori ri namehin lernohi rira hini'i wenewhe man yak eni haenhi.

## 2

### *Makromod Lalap Nin hunukum namlolo mamani*

<sup>1-2</sup> I wal'u na'ahoru! Ik kauroin nahenia Makromod Lalap Nin hono'ok kanail namlolo mamani, de lere Ai nala hunukum ri ma nina hini'i wenewhe namehiyale eni, Nin hunukum onne namlolo. Mi mehem hi'i sala, de alhi'ihepe mala sala ri namehin? Kan wa'an mi mala sala ri namehin, ono minim hini'i wenewhe

namnenehe noro hi! Minim hini'i ma ka namlolo onne mehe nala hunukum ki mi.

<sup>3</sup> Mi me'ene mala sala ri namehin, maa mim hi'i ha man ailanna onne haenhi, de yom pene'ek nahenia Makromod Lalap kan hukum mi!

<sup>4</sup> Mim po'on lewen Makromod Lalap akin wawa'an eni, la kam peinohi Nin raramyaka ma narehi nalewen ki mi. Ai kan pelek na'ahan, de An newek mim herre minim morimori man hi'i dohohala, maa mi mamhene derne makani Ai.

<sup>5</sup> Mi honorok akim kerhe la mi mamhene herre minim morimori man ailanna onne. Ende rakan Lere Alam Hono'ok Kanail onne, Makromod Lalap nalhari Nina ahan noro Nin hunukum ma namlolo, de mim kokala hunukum man werek wake'e.

<sup>6</sup> Lere onne Makromod Lalap walha ri nina hini'i wenewhe lernohi inhawe man hir hi'iyedi me'eni.

<sup>7</sup> Ri aile ma namkene hi'i ha man wa'an mamani leke lernala ul'uli sassa'a, honoor hanawa, noro or'ori dardari ma kan horu nano Makromod Lalap nala or'ori dardari ma kan horu ri onnenihe.

<sup>8</sup> Enimaa Ai na'ahan ri man ailanna de nala hunukum man werek, ono hir ilitolle rir morimori aimehi, de hi'i ha man ailanna mamani, la akin ka naili'il Makromod Lalap Lirna ma namlolo eni.

<sup>9</sup> Ri na'akeme ma nadedem hi'i ailanna onne lernala wewerek pananaka noro apinpinha, la lere man mai rakineriyedi me'e. Makro-

mod Lalap nala panaeku yakyak onne ri Yahudi nanumene ri ma ka namwali Yahudi enihe.

<sup>10</sup> Ri ma namkene hi'i ha wawa'an mamani lernala uli sa'a, honoor hanawa, noro aki ma namlinga namkai. Makromod Lalap nala panaeku wawa'an onne ri Yahudi nolu men Ai nala ri ma ka namwali Yahudi enihe,

<sup>11</sup> ono Ai ka na'ili nalo ho ri mormori, maa lolo Ai kalarma ri na'akeme namnenehe.

*Makromod Lalap hukum ri Yahudi noro ri ma ka namwali Yahudi*

<sup>12</sup> Nonolu Makromod Lalap nala Nin keneri hono'ok Musa leke loikaru ri Yahudi, de lere man mai An ho'ok kail rir dohohala nodi keneri hono'ok onne. Makromod Lalap ho'ok kail ri ma ka namwali Yahudi enihe rir dohohala haenhi, maa Ai ka nodi keneri hono'ok onne ono hi kar kokale.

<sup>13</sup> Ri aile ma na'heni, "Maika kokala keneri hono'ok onne, de onne hi'i ik kamwali ri molololo!" Hir derne, maa kar hi'i wewhe, de ka ramwali ri molololo ono Makromod Lalap na'heni, "Ri man larlewenedi Ainu'u keneri hono'ok, ka namwali ri molololo Ya'u leken kalarma."

<sup>14</sup> Ri ma ka namwali Yahudi ka rauroin Makromod Lalap Nina keneri hono'ok makun, maa lere romromo hi akin ni'ik hi'i ha man wa'an naise man horhorok lolo Makromod Lalap Nina keneri hono'ok raram. Onne namwali

tanada nahenia kade kar kokala keneri hono'ok makun, maa hirira keneri hono'ok mememen namhara nano hi honorok akin ma namnenehe noro Makromod Lalap Nina haenhi.

<sup>15</sup> Lo'o hir hi'i ha man sala, honorok akinhe mehe nala sala kemen. Lo'o hir hi'i ha ma namlolo, honorok akinhe mehe na'aheni ramlolo, ono keneri hono'ok man aile hi raram penia man wakuku hi.

<sup>16</sup> Lirna Wawa'an man ya'u loloi kakaru eni konohi mi inhawa ma namwali rakan Lere Alam Hono'ok Kanail eniyeni. Lere onne Makromod Lalap nala molollo Yesus Kristus ho'ok kail ri mormori rira hini'i wenewhe ma nasinunuwar lolo hi honorok akin.

*Keneri hono'ok kan hi'i ri nahuwa'an noro Makromod Lalap*

<sup>17</sup> Hi'ihehewi? Mi ma'aheni, "Ai mamwali ri Yahudi!" Mi lo'o pene'ek Makromod Lalap kokala mi ono Ai naledi keneri hono'ok ki mi me'e harome! Mim holi kukulu lalapa ma'aheni mi moro Makromod Lalap mamwali mahaku.

<sup>18</sup> Mim lernaedi wanakuku nano keneri hono'ok onne de mauroinedi Makromod Lalap Nina panaeku, la mauroin ewi man sala noro ewi ma namlolo, maa ka mauroin panaeku ma namlolo ida.

<sup>19</sup> Mi ka mamka'uk mamwali ma norkaru mak-toko. Mim kene mala ro-propo ri man minle met-metek kalkala.

<sup>20</sup> Mi mamwali meser leke wakuku ri ma ka nauroin hi'i ha man wa'an noro ri

ma naise tatan'ukun ma ka nauroin haida makun. Mim pene'ek nahenia mim lernala woroin ma narehi nalewen nano Makromod Lalap Nin keneri hono'ok onne, de mauroin ha ma namlolo na'akeme me'e, maa ka namlolo wake'e!

<sup>21</sup> Ende hi'i ihewi? Alhi'i hepe mim wakuku ri namehin? Mi me'ene ka mauroin makun? Mim hopon ri yono ramna'a, maa mi mamna'a!

<sup>22</sup> Mim nounaku ri na'ahenia, "Yono lerwa'u hailai," maa mi mehem lerwa'u hailai! Mi mamhene rin hoikani aukerhe, maa mi mamna'a aukerhe nin onno onneni.

<sup>23</sup> Mi ma'uli mi kemen ono kokala Musa nina keneri hono'ok nano Makromod Lalap, maa mi mehem hadwei Ai, ono kam lernohi keneri hono'ok onne me'e!

<sup>24</sup> Hini'i wenewhe onne namnenehe horhorok man aile Horok Lap raram ma na'aheni, "Mi Yahudi enihe, minim hini'i wenewhe penia nakoko hair-hair namehin ra'ihoru ra'idaru Makromod Lalap Oin Naran." \*

### *Sunat ma namlolo namwali lolo ika kin*

<sup>25</sup> Lo'o sunatedi mi me'e, onne wa'an la namwali tanada nahenia mi mamwaliyedi Makromod Lalap Nin ri, horo nahenia mim hi'i wewhe Makromod Lalap Nin keneri hono'ok na'akeme. Enimaa lo'o Musa nina keneri hono'ok ida mehe mim larlewenedi, sunat onne ka namlolo, la mi maise ri ma kan sunat makun.

\* **2:24** Yes. 52:5

<sup>26</sup> Ri ma kar sunate makun, maa hi'i wewhe Makromod Lalap Nina keneri hono'ok na'akeme, hi onne ramwali ri molololo Makromod Lalap leken kalarna, kade kar sunate.

<sup>27</sup> Mim kokaledi keneri hono'ok onne nano nonolu me'e, la rin sunatedi mi me'e, maa mi kam hi'i wewhe keneri hono'ok onne, de ri ma kar sunate makun rala sala mi, ono hir hi'i wewhe keneri hono'ok onne kade kar sunat makun.

<sup>28</sup> Ri aile ma namwali ri Yahudi ono nin ri leleher ramwali ri Yahudi la sunatedi me'e haenhi, maa onne kan hi'i ai namwali ri Yahudi ma namlolo. Ai onne sunatedi me'e, maa sunat onne ka namlolo ono namwali lolo kemen mehe. Ende inhoi namwali ri Yahudi ma namlolo? Inhawe namwali sunat ma namlolo?

<sup>29</sup> Ri Yahudi ma namlolo eni lernala sunate ma namlolo lolo honorok akin mehe, ono Roh Kudus nodi molollo akin noro nin morimori. Keneri hono'ok kan hi'i ai namwali ri molololo, maa Roh Kudus mehe hi'i ai namwali Makromod Lalap Nin ri. Ende Makromod Lalap na'uli nasa'a ri Yahudi ma namlolo onne, kade ri mormori ka ra'uli rasa'a ai.

## 3

### *Makromod Lalap namkene hi'i ha ma namlolo mamani*

<sup>1</sup> Ri Yahudi heruwali ra'ukani heheni, "Lo'o sunat kan hi'i ika kahuwa'an noro Makromod Lalap, emene sunat onne nala inhawe maika? Ik kamwali ri Yahudi,

de lo'o ik lernala haida man wa'an narehi ri namehin?"

<sup>2-3</sup> Namlolo! Hir lernala ha man wa'an narehi ri namehin ono nonolu Makromod Lalap namre'e namharu ri Yahudi narehiyedi ri namehin, de Ai nala Lirna Wawan noro Nin Nou man horokedi lolo Horok Lap raram hi. Ri Yahudi heruwali kar derne rakani Nina Nou onne, de lo'o onne hi'i Makromod Lalap hamlinu Nin Nou, ee ka?

<sup>4</sup> Ka! Makromod Lalap namkene hi'i ha ma namlolo mamani, kade ri mormori hi'i ha ma ka namlolo. Onneni naise inhawa man rai Daud na'aheni lolo Horok Lape raram, "Makrom'u, lere Om ho'ok kail ri mormori, O Lirum na'akeme namlolo, de ri kan kuku sala O." \*

<sup>5</sup> Lo'o ri aile ma nawalha lira na'ahenia, "Wa'an rehi ik hi'i ha ma ka namlolo leke rin do'on nauroin Makromod Lalap Nin hini'i wenewhe wa'an narehi maika. Lo'o ik hi'i heheni hi'ihepe Ai nala hunukum maika!" Heih! Memen ri mormori wakunu heheni,

<sup>6</sup> maa onne ka namlolo wake'e! Ik kauroin mouropo nahenia Makromod Lalap penia ma nodi molollo ho'ok kail noho wawan na'akeme.

<sup>7</sup> Enla lo'o ri namehin na'aheni, "Wa'an rehi ik wakunu panaeku ma ka namlolo mamani leke rin do'on nauroin Makromod Lalap penia hi'i ha ma namlolo mamani. Ik hi'i dohohala, penia ri mormori eren ra'akukulu ra'alalapa Ai Oin Naran, de alhi'ihepe An

hukum ika?"

<sup>8</sup> Enpenia hi ra'aheni, "Wa'an rehi maika hi'i dohohala nammori leke An lernala uli sa'a mamani!" Memen namlolo ri aile man wakunu nano'onyaka ya'u na'aheni ya'u wakuku ha onneni! Ler man mai, Makromod Lalap hukum hi lernohi rira hini'i wenewhe onne.

*Ri na'akeme sala lolo Makromod Lalap leken kalarna*

<sup>9</sup> Ende hi'ihehewi? Lo'o mayai ri Yahudi wa'an narehi ri ma ka namwali Yahudi? Onne ka namlolo. Naise ya aheheni nonolu, ri mormori na'akeme hi'i dohohale, de na'akeme sala lolo Makromod Lalap leken kalarna, ri Yahudi enihe roro idewe ri ma ka namwali Yahudi.

<sup>10</sup> Onne namnenehe panaeku man horokedi nonolu lolo Horok Lape raram ma na'ahenia, "Ri mahaku ka namlolo lolo Makromod Lalap kalarna.

<sup>11</sup> Ri mahaku kaale ma nau-roin inhawe ma namlolo kokkoo, la ri mahaku kaale ma nanoin Makromod Lalap leke lernohie.

<sup>12</sup> Ri na'akeme waliyedi kili'urn, de na'akeme lolo kalla man sala penia rir hini'i wenewhe namehiyala.\*

Ri mahaku kaale man hi'i ha ma namlolo ida.

<sup>13</sup> Ahanhe naise lunna ma kar uine de nakpono,

\* 3:4 Mzm. 51:4 \* 3:12 Mzm. 14:1-3, 53:1-3

ono wanakunu ma  
namhara nurunhe ha  
man ailanna la poho  
mamani.

Namalhe wohir ha man had-  
wei hadwokor ri,  
naise haimoke ma ni'i ri  
ne, makiyedi.\*

<sup>14</sup> Nuranhe rahopo ra'aki la  
la'apekir ri mamani.\*

<sup>15</sup> Hi ranoin kalla leke pelek  
hi'i apinpinha ri la  
resne.

<sup>16</sup> Hi radedem lolo ewi-ewi  
hi'i nano'onyak ri,  
la hi'i apinpinha ri heri ri  
wali mamani.

<sup>17</sup> Hi ramhene ranoin kalla  
rahuwa'an roro ri heri  
ri wali,\*

<sup>18</sup> la ka ramka'uk Makromod  
Lalap.”\*

<sup>19</sup> Ik kauroin nahenia  
na'akeme man horokedi lolo  
Makromod Lalap Nin keneri  
hono'ok raram na'ono ri  
man kokaledi keneri hono'ok  
onne me'e. Horok Lap raram  
konohi maika nahenia ri  
mormori na'akeme ka ram-  
lolo, de ra'alehe wanalhan  
ida lolo Makromod Lalap  
kalarna. Ende ri na'akeme  
sala penia lernala hunukum.

<sup>20</sup> Ri mahaku kaale man hi'i  
wewhe Makromod Lalap Nin  
keneri hono'ok noknokor  
penia ramwali ri molololo  
Makromod Lalap kalarna,  
maa Makromod Lalap nala  
Nin keneri hono'ok leke  
ik kauroin nahenia iknika  
dohohala aile.

*Ik kamwali ri molololo  
Makromod Lalap kalarna,  
horo ik akin naili'il Jesus*  
<sup>21-22</sup> Enpenia, ors eni  
Makromod Lalap kukul kalla

worworu maika leke ik  
kamwali ri molololo Ai leken  
kalarna. Nonolu Musa noro  
nabi-nabi kukunohiyedi  
kalla eniyeni maika haehni.  
Kalla onne ik akin naili'il  
Jesus Kristus mehe. Ik ka  
kamwali ri molololo ono  
ik lernohi keneri hono'ok  
onne. Lolo Makromod  
Lalap kalarna ik na'akeme  
namnenehe,

<sup>23</sup> ono ri mormori noho  
wawan na'akeme radiyaur  
dohohale, la rako'uwedi  
nano Makromod Lalap Nin  
or'ori dardari man ma'aruru  
wake'en.

<sup>24</sup> Makromod Lalap nala  
Nin rere'e haharu maika, de  
hi'i ika kamwali ri molololo  
Ai kalarna lolo Jesus Kristus  
man huri we'er ik nano doho-  
hale nin hunukum eni, la ka  
napanak wanalhan ida.

<sup>25</sup> Makromod Lalap Nin  
panaeku Yesus lernala  
hunukum nahinerre iknik  
dohohala nin hunukum, de  
Yesus nala kemen maki, la  
rarna nakliu leke na'ohu  
nahala iknik dohohala, horo  
ik akin naili'il Ai. Nonolu  
Makromod Lalap ka nala  
hunukum dohohala makun,  
maa newek Yesus mai mene  
kukul idewe Nina ahan  
lolo Yesus Nin makmaki.  
An hi'i heheni ono Ai kan  
pelek na'ahan la akin wa'an  
mamani. Enimaa An hi'i ha  
ma namlolo mamani haehni,  
de lo'o Ai ka nala hunukum ri  
man hi'i dohohala, onne kan  
wa'an.

<sup>26</sup> Ende lere Ai nala  
hunukum dohohala lolo  
Yesus kemen, An kukul  
maika nahenia An hi'i ha ma  
namlolo mamani, la Ai nodi

\* 3:13 Mzm. 5:10, 140:3 \* 3:14 Mzm. 10:7 \* 3:17 Yes. 59:7-8 \* 3:18 Mzm.

molollo hi'i ika kamwali ri molololo Ai leken kalarna ono ik akin naili'il Jesus eniyeni.

<sup>27</sup> Ende iknik hini'i wenewhe kan paku ik kamwali ri molololo Makromod Lalap kalarna, de yon ik wakunu kukulu lalap. Makromod Lalap kan kokala ika ono iknik hini'i wenewhe lernohi keneri hono'ok onne, maa An kokala ika la mehen hi'i ika kahuwa'an noro Ai, ono ik akin naili'il Jesus Kristus. Onne mehe!

<sup>28</sup> Eniyeni ha ma na'ono lolo ainu'u wanakunu eniyeni: Makromod Lalap kan kokala ika ono ik kahehe hi'i wewhe keneri hono'ok na'akeme, maa An hi'i ika kamwali ri molololo ono ik akin naili'il Jesus Kristus!

<sup>29</sup> Yom pene'ek Makromod Lalap kokala mi ri Yahudi, maa kan kokala ri ma ka namwali Yahudi! Onne ka namlolo! Ai namwali Makromod ri Yahudi noro idewe ri ma ka namwali Yahudi!

<sup>30</sup> Makromod Lalap onne ida mehe la Ai penia man kokala ri Yahudi noro idewe ri ma ka namwali Yahudi, horo nahenia hi akinhe naili'il Jesus.

<sup>31</sup> Enla ik kamwali ri molololo ono ik akin naili'il Jesus. Ende hi'i hewi? Wa'an rehi ik sopoledi keneri hono'ok eniyeni, ee yono? Yon sopol! Makromod Lalap penia ma nala maika! Enla ika ma akin naili'il Jesus kauroin keneri hono'ok onne namlolo kokkoo de horhawe.

## 4

*Abraham akin naili'il,*

*de nahuwa'an wali'ur noro Makromod Lalap*

<sup>1</sup> I wal'u na'ahoru! Abraham onne ri Yahudi upun a'an. An hi'i inhawen penia namwali ri molololo Makromod Lalap leken kalarne?

<sup>2</sup> Abraham nin hini'i wenewhe kan hi'i ai namwali ri molololo, de ai na'alehe ya'ar holi kukulu lalap lolo Makromod Lalap kalarna.

<sup>3</sup> Lolo Horok Lape raram horhorok aile ma na'ahenia, "Abraham akin naili'il Makromod Lalap, de Makromod Lalap na'aheni ai namwali ri molololo Ai kalarna."

<sup>4</sup> Ik kala wanakunu naho'ok nano ri man howok. An lernala naiwe'el, la naiwe'el onne ka rala mamani, maa rodi pair nina mahmaha.

<sup>5</sup> Ri aile ma nahehe hi'i ha man wa'an mamani leke Makromod Lalap pair hi nala or'ori dardari ma kan horu, maa Makromod Lalap kan kokala ri onnenihe. An kokala mehe ri ma akin naili'il nahenia Ai na'ohu nahala rir dohohala, la akin naili'il nahenia An hi'i hi ramlolo lolo Aileken kalarna. Makromod Lalap hi'i ri ma noku doho na'uwara hala ramwali ri molololo Ai leken kalarna, horo hi akin naili'il Ai.

<sup>6</sup> Eniyeni namnenehe Daud lirna ma na'ono ri man akin nahuwa'an. Ri onne akin nahuwa'an ono Makromod Lalap ka napakan ai nahehe namwali ri molololo, maa Makromod Lalap penia man hi'i ai

\* 4:3 NN. 15:6, 22

namwali ri molololo Ai leken kalarna.

<sup>7</sup>Daud na'heni,  
“Makromod Lalap naledi am-pun ri man hi'i sala la na'ohu nahaledi nina do-hohale,  
de ai akin nahuwa'anedi!  
<sup>8</sup> Makromod Lalap kan horhorok ri nina dohohale me'e,  
de akin nahuwa'anedi!”  
\*

<sup>9</sup> Ende Daud wekel inhoi lolo wanakunu eniyeni? An wekel ri man sunat noro idewe ma kan sunate makun. Makromod Lalap na'heni Abraham namwali ri molololo Ai leken kalarna ono ai akin naili'il,

<sup>10</sup>kade lere onne Abraham kar sunat makun. Ende Abraham akin naili'il Makromod Lalap nolu mene sunate.

<sup>11-12</sup> Sunat onne namwali tanada nahenia Makromod Lalap kokaledi ai me'e. Ende ik kauroin mouropo nahenia Abraham namwali ri molololo Makromod Lalap leken kalarna nolu mene sunat, ono lere kar sunat makun akin naili'il edi Makromod Lalap me'e. Enpenia Abraham namwali ri man sunat noro idewe ma kar sunate upun a'an, horo hi akinhe naili'il Makromod Lalap naise ai akin naili'il lere nonolu eni.

*Abraham akin naili'il, de kokala Makromod Lalap Nina Nou*

<sup>13</sup> Nonolu Makromod Lalap nala Nin nou ma namkene Abraham noro upun ananhe na'heni, “Na'amolia noho eni wawan

om manarne.” \* Makromod Lalap ka napanak hi hi'i wewhe keneri hono'ok onne leke lernala Nin nou onne, maa Ai nala nou onne ono hi akin naili'il Ai, de ramwali ri molololo Ai leken kalarna.

<sup>14</sup> Ri Yahudi aile ma nau-roin nahenia ri man hi'i we-whe keneri hono'ok, hi onne lernala or'ori dardari man Makromod Lalap nouwedi eni. Lo'o onne namlolo, ik ma akin naili'il Makromod Lalap kak lernala haida, la Nin nou onne kan min haida, maa hirira woroin onne ka namlolo.

<sup>15</sup> Ri ma kan kokala keneri hono'ok makun, kan lar-lewen ono ka rauroin keneri hono'ok onne makun, maa ors eni ik lernaledi keneri hono'ok de lernala hunukum iknik dohohala. Ende keneri hono'ok onne kukul Nin ahan maika.

<sup>16</sup> Onne penia Nin nou ma namkene onne na'heni ik kamlolo Ai leken kalarna, horo ik akin naili'il Ai. An lernohi mehe Nina rere'e haharu nala nou eniyeni ri na'akeme, ri man lernala keneri hono'ok, noro idewe ma kan lernala, horo hi akin naili'il naise Abraham ma namwali ri leleher ri na'akeme man akin naili'il Ai.

<sup>17</sup> Makromod Lalap na'heni laa Abraham lolo Horok Lap, “Ya'u hi'i o mamwali ri leleher hair nammori.” Abraham akin naili'il Makromod Lalap ma nodi molollo na'amori wali'ur ri man makiyedi, la hi'i ha ma ka namwaliyala makun namwali. Ende ai

\* 4:8 Mzm. 32:1-2 \* 4:13 NN. 17:4-6, 22:17-18 \* 4:17 NN. 17:5

namwali iknik ame lolo  
Makromod Lalap kalarna.\*

<sup>18</sup> Kade Abraham na'alehe ya'ar lernala tatana, maa akin namkene naili'il Makromod Lalap, de ai namwali ri leleher hair nammori naise man horhorok lolo Horok Lape raram ma na'aheni, "O upum anumhe lo'o nammori naisa kalyoro rahu eni." \*

<sup>19</sup> Lere onne Abraham akin namkene naili'il Makromod Lalap, kade nin leleher na'urani me'e ono nina anne na'akeki rahu me'e, la hono Sara tatane kaale raramne.

<sup>20</sup> Ai akin ka nado'o Makromod Lalap Nina nou eni, maa ai akin eren naruri naili'il, la ai na'uli nasa'a Makromod Lalap mamani.

<sup>21</sup> Ai nauroin kokkoo nahenia Makromod Lalap nodi molollo hi'i Nin nou ma namkene namwali.

<sup>22</sup> Enpenia Makromod Lalap kokala ai la na'aheni, "Abraham onne namwali ri molololo Ya'u leken kalarna."

<sup>23</sup> Wanakunu eni ka na'ono Abraham mehe,

<sup>24</sup> maa na'ono maika haenhi. Makromod Lalap kokala ika la hi'i ik kamwali ri molololo Ai leken kalarna, horo ik akin naili'il Ai ma na'amori Makromod Yesus wali'ur nano Nin makmaki eni.

<sup>25</sup> Yesus onne, Makromod Lalap hurinohi ri nesne leke na'ohu nahala iknika dohohale, la na'amori Yesus wali'ur leke kalla aile ik kamlolo lolo Makromod Lalap leken kalarna.

## 5

*Ik akin moiliwi mahuwele  
noro Makromod Lalap*

<sup>1</sup> I wal'u na'ahoru! Ik kam-lolo lolo Makromod Lalap leken kalarna me'e, ono ik akin naili'il Ai. Enpenia ik Makromod Yesus Kristus Nin hini'i wenewhe hi'i ik koro Makromod Lalap mori moiliwi mahuwele.

<sup>2</sup> Ik akin naili'il Yesus penia An hi'i ika kokala Makromod Lalap Nin rere'e harharu leke lere eniyeni ik akin nahuwa'an. Enla ik akin nahuwa'an ono kauroin mouropo nahenia lere man mai ik lernala Makromod Lalap Nin morimori man ma'aruru narehi eni.

<sup>3</sup> Ende lere ik lernala wewerek pananaka yon ik akin tana, maa hi'i ik akin nahuwa'an mamani, ono ik kauroin wewerek pananaka onne hi'i ik akin eren namkene mamani.

<sup>4</sup> Enla lo'o ik akin namkene mamani, ik eren kerhu lolo kenen panatal penia iknik hini'i wenewhe onne nahuwa'an Makromod Lalap akin. Lo'o iknik hini'i wenewhe wa'an mamani, onne hi'i ika eren pu'ik heli Ai ono ik kauroin mouropo nahenia Nin nou onne namwali maika.

<sup>5</sup> Lo'o ik kauroin Nin nou na'akeme namwali maika, ik kak ma'irhu, maa ik akin nahuwa'an mamani, ono Makromod Lalap naramyaka ik rehi. Ik kauroin Ai naramyak ika ono Ai naledi Nina Roh Kudus maika me'e.

<sup>6</sup> Makromod Lalap niliyedi lere alam ma namlolo leke An kukul Nina raramyake

maika lolo Yesus Kristus. Lere onne Kristus mai noho wawan maki leke na'ohu nahala iknik dohohala, kade lere onne ik ka karuri hi'i ha man wa'an, maa hi'i dohohala nammori, de ik ko'u Makromod Lalap.

<sup>7</sup> Ik kala wanakunu naho'ok nano iknik mori-mori akilere. Ka nadedem ri nala kemen maki leke ri namehin mori, kade ai onne ri ma namlolo. Enimaa lere romromo lo'o ri ida woro'o aile ma ka namka'uk nala kemen rodi herre ri man wa'an wake'e, maa Yesus nala kemen maki herre ika, kade ik ailanna.

<sup>8</sup> Lere nonolu ik mori lolo metmetek kalkala makun, la iknik dohohala nammori. Ler onne me'ede Makromod Lalap kukul Nin raramyak maika heheni: kade ik hi'i ha man ailanna mamani, maa Ai nala Kristus mai leke maki nahinerre maika.

<sup>9</sup> Lere Kristus maki herredi ika, An kokala iknik dohohala nin hunukum, la hi'i ik kamlolo lolo Makromod Lalap leken kalarna. Ende ik kauroin namlolo kokkoo nahenia rakan Lere Alam Ho'ok Kail, Yesus huri ika nano Makromod Lalap Nina ahan ma nala hunukum iknik dohohala.

<sup>10</sup> Kade nonolu eni ik kamwali Makromod Lalap Nin arwali ono ka'okuledi Ai mamani, maa Ai mehen du'ul kaliyedi ik koro Ai wali'ur lolo Anan Nina makmaki eni. Lere eniyeni ik kauroin ik kahuwa'anedi noro Ai me'e, de ik kauroin namlolo kokkoo nahenia Ai namkene huri we'er ika nano dohohala nin molollo, la nala or'ori

dardari ma kan horu maika ono Kristus mori wali'ur la An mori lolo ik raramne mamani.

<sup>11</sup> Onne kan mehe! Ik akin nahuwa'an mamani ono Makromod Lalap nala Nina rere'e haharu maika lolo ik Makromod Yesus Kristus man du'ul kali ik koro Ai wali'ur.

*Adam nin hini'i hoiwuku noro Yesus Nin hini'i*

<sup>12</sup> Dohohale mai noho wawan lolo Adam, penia lernala hunukum makmaki. Onne penia ri na'akeme namwaliyedi ri man hi'i dohohala, de ri mormori noho wawan na'akeme lernala makmaki onne.

<sup>13</sup> Nonolu lere ri kar lernala keneri hono'ok makun, ri nadedem hi'i dohohala, maa Makromod Lalap kan aki rira dohohale onne, ono keneri hono'ok kaale makun.

<sup>14</sup> Enimaa nano Adam nin lere rakan Musa nin lere, makmaki nodi molollo ri mormori noho wawan na'akeme, kade kar larlewen Makromod Nin konomdere namnenehe Adam.

Ende nano Adam nin hini'i wenewhe ma namehiyala onne, ri mormori lernala hunukum makmaki, la nano Yesus Nin hini'i wenewhe man wa'an onne, ri mormori lernala wawa'an rara'a. Adam onne namwali kunukunohi ma na'ono lere li'ur Yesus Nin maimai eni,

<sup>15</sup> maa Yesus Nin hini'i wenewhe narehi nalewen ainina. Adam onne hi'i dohohala penia nakoko ri na'akeme maki, maa Yesus nala leken ri mormori na'akeme rahuwa'an wali'ur noro Makromod Lalap. Ai

akin wa'an maika, de nala Nin rere'e haharu man lap narehi maika lolo Yesus Kristus Nina hini'i wenewhe onne.

<sup>16</sup> Yesus noro Adam rir honowok ka namnenehe. Nano Adam nin dohohala ida onne ri mormori radiyaur dohohala la lernala hunukum, maa Makromod Lalap namre'e namharu maika penia Yesus na'ohu nahala iknik dohohala na'akeme, la hi'i maika kamlolo Ai leken kalarna, la ka napanak wanalhan ida.

<sup>17</sup> Adam nina dohohale penia ma nakoko makmaki nodi molollo ri na'akeme, maa Yesus Nin hini'i wenewhe wa'an narehi onne, ono Ai nala molollo noro or'ori dardari ma kan horu maika. Makromod Lalap naramyaka maika narehi, de An hi'i ik kamwali ri molololo Ai leken kalarna lolo Yesus Kristus, la ka napanak wanalhan ida.

<sup>18</sup> Ende dohohale ida mehe nakoko ri na'akeme lernala hunukum, naise hini'i wenewhe man wa'an ida wali'ur nakoko ri na'akeme ramwali ri molololo Makromod Lalap leken kalarna la hi'i ri nammori lernala or'ori dardari ma kan horu.

<sup>19</sup> Adam kan derne nakani Makromod Lalap, de ri nammori lernohi hi'i dohohala, maa Yesus derne nakani Makromod Lalap mamani, de ri nammori ramwali ri molololo Ai leken kalarna haenhi.

<sup>20</sup> Makromod Lalap penia nala keneri hono'ok leke ri na'akeme rauroinnala hir hi'i dohohala ono larlewenedi

keneri hono'ok onne nammori. Ai naramyaka hi mani, la Nin rere'e harharu eren lalap, kade hir hi'i dohohala eren namansa.

<sup>21</sup> Memen namlolo, nonolu dohohala nodi molollo maika, de ik lernala hunukum makmaki la ik ko'uwedi nano Makromod Lalap, maa ors eniyeni Ai namre'e namharu ik rehi, de hi'i ik kamwali ri molololo Ai leken kalarna la nala or'ori dardari ma kan horu maika lolo ik Makromod Yesus Kristus.

## 6

*Yono hurinohi dohohala nodi molollo maika*

<sup>1</sup> I wal'u na'ahoru! Namlolo kokkoo Makromod Lalap namre'e namharu ika rehi penia na'ohu nahala iknik dohohala, maa yon ik ka'heni, "Wa'an rehi ik hi'i dohohala mamani leke Ai eren kukul Nin rere'e haharu maika!"

<sup>2</sup> Yon wakunu heheni.

Lo'o ik kauroin nahenia Yesus maki herredi ika leke lernala ampun iknik dohohala, onne naise ik maki wewerre noro Ai haenhi. Ende alhi'ihepe ik hurinohi dohohale nodi molollo ika ho'o me'e? Yon ik mori hi'i dohohale mamani.

<sup>3</sup> Lere ulutada ika, onne namwali tanada nahenia ik koro Yesus Kristus kamwaliyedi mahaku me'e, la koro Ai maki wewerre.

<sup>4</sup> Ende unulu tanada onne nin panaeku ik koro Kristus maki wewerre leke mori wali'ur haenhi, ono ik Amad nodi Nin molollo man kulu narehi lap narehi nala ika or'ori dardari ma kan horu

namnenehe naise Ai nodi  
Nin molollo na'amori Kristus  
nano Nin makmaki.

<sup>5</sup> Lo'o ik koro Kristus kamwali mahaku lolo Nin makmaki onne, namlolo kokkoo koro Ai kamwali mahaku lolo Nin morimori, ono Makromod Lalap nala morimori worworu maika ma naise Ai nala Kristus lere Ai na'amoriyedi nano makmaki.

<sup>6</sup> Ik kauroin nahenia Jesus maki noredi iknik morimori nonolu lolo au kekiyowok leke yon ik derne kakani ha ma nakoko ika hi'i dohohala me'e, ono ri man makiyedi kar hi'i dohohala me'e. Enpenia dohohala ka nodi molollo maika me'e.

<sup>7</sup> Ri man makiyedi, ai onne nahinuriyedi nano dohohala nina molollo.

<sup>8</sup> Ende lo'o ik akin naili'il nahenia ik maki wewerre noro Jesus Kristus, ik kauroin ik mori wewerre noro Ai haenhi.

<sup>9</sup> Makromod Lalap na'ori wali'ur Jesus Kristus nano Nina makmaki la kan maki wali'ur me'e,\* de makmaki ka nodi molollo Ai me'e.

<sup>10</sup> An maki raram mehe leke na'amoluloin dohohala nin molollo, la An mori laa ewi-ewi leke hi'i wewhe Makromod Lalap Nin honorok panaeku mamani.

<sup>11</sup> Onne namnenehe noro ika haenhi, de yon hamlinu nahenia ik maki wewerre noro Jesus Kristus de dohohala ka nodi molollo maika me'e. Ik mori wali'ur haenhi leke hi'i wewhe Makromod Lalap Nin honorok panaeku

mamani, ono kamwali mahaku noro Yesus Kristus me'e.

<sup>12</sup> Ende yono hurinohi dohohale nodi molollo ik kemen ma ka nalo'ol makiyedi, la yon ik raram nodi hi'i ha man ailanna me'e.

<sup>13</sup> Yono hurinohi dohohala nodi molollo ik kemen leke hi'i ha man ailanna, maa wa'an rehi kala ik kemen Makromod Lalap leke hi'i ha ma namlolo mamani lolo Ai leken kalarna. Ik kala ik kemen Makromod Lalap ono kamwali ri ma nahinuriyedi nano makmaki, la ik lernala molollo mori mamani.

<sup>14</sup> Ors eni dohohala ka nodi molollo ika me'e, ono ik kak pu'ik keneri hono'ok leke hi'i ik kamlolo, maa ik pu'ik heli Makromod Lalap ono Ai namre'e namharu ika penia hi'i ik kamwali ri molololo Ai leken kalarna.

### *Wa'an rehi Makromod Lalap nodi molollo maika*

<sup>15</sup> Ende hi'ihewi? Lo'o ri aile ma na'aheni, "Keneri hono'ok ka nodi molollo ik me'e, maa Makromod Lalap nala Nin rere'e haharu maika, de wa'an rehi ika hi'i dohohala mamani!" Onne ka namlolo wake'e!

<sup>16</sup> Yon hamlinu nahenia lo'o ik kala ik kemen laa ri namehin komdere, ik kamwaliyedi hophopon wahwahan ri onne la ai nodi molollo maika! Onne namnenehe noro dohohala haenhi! Lo'o ik kala ik kemen hi'i ha man yak mamani, ik maki kako'u Makromod, ono dohohale nodi molollo

\* **6:9** Lere Jesus mori wali'ur nano makmaki An lernala morimori worworu ma kan horu, de Ai kan maki wali'ur laa ewi-ewi.

maika me'e, maa lo'o ik kala ik kemen Makromod Lalap nodi molollo, Ai penia hi'i maika kamwali ri molololo leken kalarna.

<sup>17</sup> Ya apanak trimkasi Makromod Lalap, ono ors eni mi modi honorok aki man mou derne makani wanakuku ma namlolo man raledi mi me'e, de dohohale ka nodi molollo ki mi me'e.

<sup>18</sup> Ende Makromod Lalap na'ohu nahala minim dohohale penia ka nodi molollo mi me'e, maa ors eni mi mamwaliyedi Makromod Lalap Nina hophopon wahwahan man lernohi Nin raram nodi me'e.

<sup>19</sup> Yo odi wanakunu akilere leke mi mauroin mouropo ainu'u panaeku eniyeni, ono ik eniyeni ri mormori mehe. Nonolu mala mi kemen lernohi minim raram nodi aimehi, penia minim hini'i wenewhe namehiyala de eren ailanna la morso mamani, maa yom hi'i naise nonolu me'e. Ors eni mala mi kemen Makromod Lalap mamwali Nina hophopon wahwahan ma namlolo, leke minim morimori namlolo wake'e lolo Ai leken kalarna la minim hini'i wenewhe na'akeme eren namlololo.

<sup>20</sup> Nonolu dohohale nodi molollo mi, ono Makromod Lalap ka nodi molollo mi makun, de kam derne makani Ai.

<sup>21</sup> Hi'ihehewi minima morimori lere onne? Wa'an, ee ka? Kan wa'an, ono minima morimori lere onne hi'i wawwawa mi, la ka nala haida man wa'an ki mi, la rakan lere li'ur mim lernala hunukum maki mako'uwedi

Makromod Lalap ono mim eren ailalanna.

<sup>22</sup> Maa ors eni Makromod Lalap huriyedi mi nano dohohale nin molollo, la mi mamwali Nina hophopon wahwahan. An hi'i mi akim nahuwa'an wake'e, la minim morimori lernohi Makromod Lalap Nin raram nodi mamani. Onne penia rakan lere li'ur mim moriwuku noro Ai laa ewi-ewi.

<sup>23</sup> Dohohale konokon onne hi'i ik maki ko'u nano Makromod Lalap, maa Makromod Lalap penia nala or'ori dardari ma kan horu maika lolo Makromod Kristus Yesus, la Ai ka napanak wanalhanne.

## 7

### *Keneri hono'ok ka nodi molollo maika me'e*

<sup>1</sup> I wal'u na'ahoru! Ik kala wanakunu naho'ok nano noho nin keneri hono'ok. Ik kauroin nahenia keneri hono'ok onne nodi molollo ri man mormori makun, maa ri man makiyedi nahinuriyedi nano keneri hono'ok onne me'e.

<sup>2</sup> Keneri hono'ok aile ma na'ahenia, "Yon maeke man hoedi reiha'ar noro hono," maa lo'o hono makiyedi, ai nahinuriyedi nano keneri hono'ok onne me'e.

<sup>3</sup> Enla keneri hono'ok onne na'aheni lo'o maeke onne hono mormori makun, la ai lan hi'i sala noro mo'oni namehin, an lerwa'uwedi me'e. Lo'o hono makiyedi, ai nahinuriyedi nano keneri hono'ok onne, de an ho ri namehin, kan hi'i haida.

<sup>4</sup> I wal'uhe, onneni namnehe noro Makromod Lalap

Nin keneri hono'ok haenhi. Nonolu keneri hono'ok onne nodi molollo maika, maa ors eniyeni ka me'e, ono ik maki wewerre noro Yesus Kristus lolo au kekiyowok. Enla ik kamwali mahaku noro Yesus man Makromod Lalap na'amori wali'ur nano Nin makmaki, leke ik hi'i ha man wa'an la ka'uli kasa'a Makromod Lalap mamani.

<sup>5</sup> Nonolu, ik lernohi monmono kamanna man aile ik irhun raramne. Ik raram nodi hi'i ha man luli lolo keneri hono'ok raram! Enpenia ik hi'i dohohala mamani la lernala hunukum de maki kako'u Makromod Lalap.

<sup>6</sup> Ors eni ik makiyedi wewerre noro Kristus, de ik kahinuriyedi nano keneri hono'ok onne me'e, la ka nodi molollo maika me'e. Ende ik kak lernohi kalla nonolu onne me'e, maa ik lernohi kalla worworu man An kukul maika lolo Nin Roh Kudus ma nodi molollo maika eni, leke ik lernohi Makromod Lalap Nin raram nodie.

*Keneri hono'ok konohi ika inhawe ma namwali dohohala*

<sup>7</sup> Hi'ihehewi? Lo'o keneri hono'ok onne namehiyale? Ka! Keneri hono'ok onne namlolo, ono Makromod Lalap penia ma nala keneri hono'ok onne ri Yahudi. Keneri hono'ok onne penia man konohi ik inhawe ma namwali dohohale. Naise eniyeni: Lo'o ya akmanna ri nin hahaa, maa ka'u derne keneri hono'ok onne makun, de ka auroin nahenia onne dohohala. Ende rakan ya'u

derne keneri hono'ok ma na'aheni, "Yono makmanna ri nin hahaa," mene ya auroin onne dohohala.\*

<sup>8</sup> Keneri hono'ok onne na'aheni, "Yon mamono makmanna ri nin hahaa," de dohohala nala leken hi'i ya'u eren akmamanna ri nina hahaa mamani. Lo'o keneri hono'ok onne kaale, dohohale ka naruri nodi molollo maika heheni.

<sup>9</sup> Nonolu lere ka'u derne keneri hono'ok onne makun, ya'u pene'ek ainu'u morimori wa'an, maa lere ya'u derne keneri hono'ok onne mouropo, dohohala eren na'aromromo i raram, de ya'u hi'i dohohala namansa la lernala hunukum makmaki!

<sup>10</sup> Enpenia ya auroinnala nahenia Makromod Lalap kan sala hukum mesna'u. Ende keneri hono'ok onne rale leke paku ya'u lernala morimori man wa'an, maa onne ka namwali, ono dohohala nala leken lolo keneri hono'ok onne de nala makmaki maya'u.

<sup>11</sup> Nano keneri hono'ok onne dohohale lernala leken leke kokwudi ya'u. Ya'u dernedi keneri hono'ok de ken hi'i lernohie, maa dohohala man aile i raram hi'i ya'u eren ailanna penia ya'u lernala hunukum makmaki.

<sup>12</sup> Keneri hono'ok man Makromod Lalap nala Musa noro Nin konomdere ma aile keneri hono'ok onne raram, na'akeme namlolo, moumou dewdewe, la wa'an.

<sup>13</sup> Enpenia yon kahinorok keneri hono'ok man wa'an

\* 7:7 Kel. 20:17, Ul. 5:21

onne nala makmaki maika! Onne ka namlolo! Keneri hono'ok man wa'an onne namwali kalla maya'uleke ya auroinnala ainu'u dohohala, maa dohohala kokwudi ya'u de ya'u hi'i yaksala nammori penia lere man mai ya'u lernala hunukum makmaki de ko'u Makromod Lalap. Ende dohohala onne namlolo kokkoo ailanna wake'e!

*Ik raram nodi hi'i ha man wa'an, maa ka namwali*

<sup>14</sup> Ik kauroin nahenia Makromod Lalap Nina keneri hono'ok onne wa'an ono Roh Kudus nala Musa, maa ya'u eni ri mormori mehe, de ka aruri hi'i ha man wa'an mamani ono dohohala nodi molollo maya'u. Dohohala duni ta'al ya'u mamani, de ya amwali nin hophopon wahwahan.

<sup>15</sup> Ka auroin alhi'ihepe ya'u hi'i heheni! Ya'u paeku hi'i ha man wa'an, maa ka namwali, de ya'u hi'i ha man ka'u suk hi'i mamani!

<sup>16</sup> Lo'o ya'u hi'i ha ma ka nedille ainu'u raram nodie, onne nin panaeku nahenia ya auroin keneri hono'ok onne wa'an, maa ka'u hi'ie.

<sup>17</sup> Enla lo'o ya'u hi'i ha ma namehiyala kade ya amhene hi'ie, onne naise ka'u hi'i ha man yak onne, maa dohohala man aile i raram penia man hi'i ha ma namehiyala onne.

<sup>18</sup> Ya auroin nahenia lolo yi irhun raramne, haida man wa'an kaale. Ya'u raram nodi hi'i ha man wa'an, maa ka'u hi'i.

<sup>19</sup> Ya amhene hi'i ha man ailanna, maa ya'u hi'i ha man

ailanna mamani, kade ka'u suk hi'i ha onne!

<sup>20</sup> Lo'o ya'u hi'i ha man ya amhene hi'i, onne nin panaeku ka'u hi'i, maa dohohala man aile i raram penia man hi'iie!

<sup>21</sup> Ende panaeku ma namwali lolo ainu'u morimori hi'i heheni: Ya'u raram nodi hi'i ha man wa'an, maa ya'u hi'i ha man yaka mamani!

<sup>22</sup> Lolo ya'u honorok akin, ya'u raram nodi lernohi Makromod Lalap Nina panaeku wawa'an man aile lolo keneri hono'ok onne,

<sup>23</sup> maa lolo yi irhun raram panaeku namehin ma na'okul Makromod Lalap Nina panaeku wawa'an eni aile haenhi. Lolo ya'u honorok akin ya'u raram nodi lernohi panaeku man wa'an, maa dohohala nodi molollo lolo i kem'u de hi'i panaeku man yak mamani.

<sup>24</sup> Ya'u mayo'o! Lo'o inhoi huri ya'u nano panaeku yaka eniyeni ma nakoko ya'u maki ko'uwedi nano Makromod Lalap?

<sup>25</sup> Ya apanak trimkasi nammori Makromod Lalap! Ai penia man huriyedi ya'u lolo Makromod Yesus Kristus. Ende lolo i honorok akin Makromod Lalap nodi molollo ya'u leke lernohi Ainina keneri hono'ok man wa'an, maa dohohale nodi molollo i kem'u, de i raram nodi hi'i dohohala mamani.

## 8

*Roh Kudus huri we'er ika nano dohohala nin molollo,*

*de dohohala ka nodi molollo  
maika me'e*

<sup>1</sup> Ors eniyeni, ik koro Yesus  
Kristus kamwali mahaku,  
la ik kak lernala hunukum  
iknik dohohala me'e.

<sup>2</sup> Ende Roh Kudus ma nala  
or'ori dardari maika lolon  
Kristus, nodi Nin molollo  
huri we'er ika nano dohohale  
nin molollo, leke yon ik maki  
ko'uwedni nano Makromod.

<sup>3</sup> Keneri hono'ok kan huri ika nano dohohale ono iki ri mormori mehe de ikem kemen nakoko hi'i dohohala mamani, maa Makromod Lalap penia hi'i ha wo'ira man keneri hono'ok onne kan hi'i. Onne penia Ai nala Anan mememen Yesus mai noho wawan namwali ri mormori. Yesus kemen naise ik kemen, maa Ai kan hi'i dohohala naise maika. Ende Makromod Lalap nala Yesus namwali honoi kanani na'ohu nahala ika nano dohohale, penia dohohala kano nudi molollo maika me'e.

<sup>4</sup> Makromod Lalap hi'i  
heheni leke ik kamwali ri  
molololo Ai leken kalarna, la  
lolo Yesus Nin hini'i onne ik  
kauroin hi'i wewhe keneri  
hono'ok onne na'akeme.  
Onne ka namwali noro  
ri man lernohi hi raram  
nodi aimehi, maa noro ri  
na'akeme man hi'i wehe  
lernohi Roh Kudus mamani.

5 Ri man lernohi nin  
raram nodi aimehi, ai onne  
nahinorok hini'i wenewhe  
man namehiyale noro man  
ailanna mamani, maa ri man  
lernohi Roh Kudus, ai onne  
nahinorok mamani inhawe  
man Roh Kudus raram nodi.

<sup>6</sup> Ri man honorok akin lernohi ri mormori rir raram nodi aimehi nadivaur

dohohale la maki nako'u  
Makromod, maa ri man  
honorok akin lernohi Roh  
Kudus lernala morimori man  
wa'an noro akin man moiliwi  
mahuwele.

<sup>7</sup> Enla ri man honorok  
akin lernohi nin raram nodi  
aimehi mamani, ai namwali  
Makromod Lalap Nin arwali,  
ono kan derne nakani Nina  
keneri hono'ok wake'e.

<sup>8</sup> Ri onne memen ka  
nahuwa'an Makromod Lalap  
akin.

<sup>9</sup> Ik eniyeni ka kaise hi  
onne. Lo'o Roh Kudus  
namkene ik akin, ik kak  
lernohi ri mormori nin  
raram nodie, maa ik hi'i  
ha ma nahuwa'an Ai akin  
mamani. Lo'o Kristus Nin  
Roh kan minle ik akin, ik ka  
kamwali Nin ri.

10 Lere man mai dohohala  
hi'i ik kemen eni maki, maa  
lo'o Yesus Kristus aile ik  
raramne, Makromod Lalap  
nala or'ori dardari maika  
ono hi'iyedi ik kamwali ri  
molololo Ai leken kalarna.

11 Makromod Lalap Nina  
Roh na'ori Yesus nano Nina  
makmaki, la An minle ik akin  
haenhi. Ende ik kauroin  
nahenia lo'o ik kemen maki,  
Makromod Lapa na'ori ik  
kemen wali'ur naise Ai  
na'amori Yesus lolo Nin Roh  
man aile ik raram.

<sup>12</sup> I wal'uhe, iknik yodidwara aile derne kakani Makromod Lalap Nina Roh man hopon ik hi'i ha man wa'an, de yon lernohi iknik raram nodi aimehi.

<sup>13</sup> Lo'o ik lernohi iknik  
raram nodi aimehi, ik maki  
kako'uwedi nano Makromod  
Lalap, maa lo'o ik lernohi Ai  
Nina Roh, An paku maika  
leke von dohohala nodi

molollo ik kemen me'e, de ik lernala or'ori dardari ma kan horu.

*Roh Kudus nodi molollo  
maika de ik kamwali Makromod Lalap ananne*

<sup>14</sup> Makromod Lalap Nina Roh nodi molollo ri na'akeme man derne nakani Ai manani, penia hi onne ramwali Ai anan.

<sup>15</sup> Makromod Lalap Nin Roh kan hi'i ik kamkauk naise hophopon wahwahan ma akin tana, maa Ai nala Nina Roh maika leke kamwali ananne. Roh onne Nin molollo hi'i ik kapolu Makromod Lalap iknik Pape.

<sup>16</sup> Roh Kudus mehe wakunu lolo ik honorok akin leke ik ka'heni, "Maika eni Ai anan!"

<sup>17</sup> Ai anan maika de ik kauroin nahenia lere man mai ik kokala rere'e haharu na'akeme man Makromod Lalap na'akenedi nala maika me'e, la ik koro Yesus Kristus kokala rere'e haharu onne wewerre haenhi. Ik kauroin eniyeni namlolo ono ik koro Kristus lernala apinpinha wewerre, de lere man mai Ai na'akulu na'alap ik leke lernala or'ori dardari man ma'aruru narehi namnenehe noro Kristus haenhi.

*Lere man mai ik lernala  
rere'e haharu narehi nalewen  
apinpinha lere eniyeni*

<sup>18</sup> I wal'u na'ahoru! Ainu'u honorok aki nahenia lo'o ik hoiwuku iknik wewerek pananaka man ik lernala lere eniyeni noro or'ori dardari man ma'aruru narehi man Makromod Lalap nala maika lere man mai eni, wewerek

pananaka onne kan min haida.

<sup>19</sup> Ha wo'ira na'akeme man Makromod Lalap hi'ie mahar nenewek hehen nanumene Makromod Lalap kukul inhoi namwali Ai ananhe, la kukul inhoi lernala or'ori dardari man ma'aruru narehi onne.

<sup>20</sup> Nonolu, ha wo'ira na'akeme man aile noho wawan yak horu, de kan wa'an me'e. Makromod Lalap penia ma nala hunukum onne, ono noho wawan kan lernohi Nin panaeku dedesne onneni. Onne ka namwali nano noho nin raram nodie, maa Makromod Lalap nala hunukum eniyeni. Ende noho eni ne'en raram ramkene laptop

<sup>21</sup> rakan An huriyedi hi nano makmaki nin molollo, leke roro ri mormori ma namwali Ai ananhe lernala morimori man ma'aruru wake'e wewerre.

<sup>22</sup> Ik kauroinedi nano nonolu rakan ors eni, wewerek pananaka nammori noro apinpinha warnawarna aile noho wawan eniyeni, de noho eniyeni ra'adidi naise maeke ma nelhenne apinhe ono na'akeki moriyana me'e.

<sup>23</sup> Noho eni nin wewerek pananaka nammori onne penia nakoko maika ma akin naili'il Makromod Lalap ka'adidi wewerre noro noho eniyeni. Ik lernaledi Roh Kudus man Makromod Lalap nala maika, la Roh Kudus namwali tanada nahenia lere man mai ik lernala morimori man ma'aruru wake'e, maa lere eniyeni ik mahak lalapan onne namwali, de

ka'adidi wewerre noro noho eniyeni. Lere onne An kikan ika kamwali ananhe la nala kemen worworu ma kan maki me'e maika.

<sup>24</sup> Ler eniyeni Makromod Lalap huriyedi ik nano iknik dohohala nin molollo, ono ik akin naili'il Nin nou maika onne namwali. Enla Nin nou nahenia lere man mai Ai nala morimori man ma'aruru maika, de ik akin namkene lapan An hi'i Nin nou onne namwali. Ri ka nadedem lapan ha ma namwaliyedi me'e, maa lapan ha ma ka namwali makun.

<sup>25</sup> Enimaa lo'o ik akin namkene lapan ha man kak lernala makun, ik kodi ik akin ma namlina namkai newek onne namwali.

<sup>26</sup> Ik kauroin Makromod Lalap Nin nou maika namwali, la ik kauroin nahenia lere ik ka karuri, Nin Roh na'aruri ik akin haenhi. Roh onne mehen paku ika hi'i lir napanak leke ik lernohi Makromod Lalap Nina honorok aki, la lere ik ka kauroin hi'i lir napanak ma namlolo, Ai mehen hi'i lir napanak, kade ri namehin ka rauroin lir napanak onne.

<sup>27</sup> Makromod Lalap mehe nauroin ik honorok akin la nauroin Roh Kudus Nin honorok panaeku na'akeme, de Roh Kudus hi'i lir napanak man lernohi Makromod Lalap honorok akin mamani. Ai nodiyala maika noro ri na'akeme ma akin naili'il Ai lolo Makromod Lalap leken kalarna mamani.

*Makromod Lalap naramyaka  
rehi maika*

<sup>28</sup> I wal'u na'ahoru, ik kauroin nahenia Makromod Lalap kakar ha wo'ira na'akeme ma namwali noro maika, ha man wa'an noro idewe man sus, leke na'akeme onne namwali ha man wa'an maika ma naramyaka Ai. Ai napoluwedi maika enihe, ono onne lernohi Nina panaeku ma na'ono maika nano nonolu me'e.

<sup>29</sup> Nonolu eni Makromod Lalap niliyedi Nin ri, la Ai nauroinedi hi onne akinhe naili'il Ai, leke hi'i hi naise na'oi Anan Yesus. Enpenia Anan onne namwali ri anulu lolo walinhe rahu eni.

<sup>30</sup> Makromod Lalap nili ri onnenihe namwali Nin ri, la ri onne Ai napolu haenhi. Ri man Ai napolu onne An hi'i ramlolo lolo Ai leken kalaruna, la na'akulu na'alap hi lere hir kokala or'ori man ma'aruru narehi eni.

<sup>31</sup> Ende ik ka'aheni inhawa ma na'ono lolo panaeku eniyenihe? Makromod Lalap Nina hini'i wenewhe wa'an rehi! Ai nodiyala maika, de ri kaale man rehi maika!

<sup>32</sup> Makromod Lalap huri Anan ri nesne leke na'ohu nahala iknik dohohala. Ai nala Anan mememen maika, de ik kauroin nahenia Ai raram nodi nala ha man wa'an rahu maika haenhi.

<sup>33</sup> Ri kaale man tumdesne Makromod Lalap Nin ri, ono Makromod Lalap mehen hi'i ik kamlolo lolo Ai leken kalarna.

<sup>34</sup> Ri kaale man kuku sala maika! Yesus Kristus mehen maki, maa onne kan mehe, Makromod Lalap na'amori wali'uredi, de ors eni Ai

naikoro lolo Makromod Lalap herne malanna, leke hi'i lir napanak Makromod Lalap nodiyala maika mamani.

<sup>35</sup> Ende ri kaale man reiha'ar maika nano Yesus Kristus Nin raramyaka! Lo'o ik lernala wewerek pananaka, apinpinha, nuknukur, noho rouvara, ka'alehe haida-haida, la ri nodi raa daresne ika. Lo'o ha rahu onne na'akeme namwali maika, maa ik kau-roin mouropo Yesus Kristus naramyaka ika mamani.

<sup>36</sup> Ha eniyeni namwali nonolu haenhi, naise Daud konohi Makromod Lalap lolo Horok Lap raram na'ahenia, "Akilere rin kene nesne mayai mamani ono ai mamwali Num ri. Hir pene'ek ai mamwali pip-duma rorohu kelen rodi hoikani me'e." \*

<sup>37</sup> Lo'o ika lernala ha man yak eniyenihe na'akeme, onne kan hi'i ika kadiyaur. Ika eniyenihe ri man kerhula karuri rehiyedi ara nano ha eniyeni na'akeme, ono Yesus Kristus naramyaka la paku ika!

<sup>38</sup> Ya akin naili'il wake'e nahenia ha ida kaale man hi'i ika kahinuriyedi nano Nin raramyaka! Hahaa wo'ira na'akeme ma namwali noro maika, lo'o ik mormori makun me makiyedi me'e, kan hi'i ika ko'u nano Ai. Hophopon a'am raram, hayakyaka noro namehin ma nodi molollo na'akeme, hahaa ma namwali lere eni

noro lere man mai, kan hi'i ika kako'u nano Ai.

<sup>39</sup> Ma nodi molollo lolo a'am raram, noho wawan noro noho wi'in kan hi'i ika kako'u nano Ai haenhi. Ha ida kaale man reiha'ar ika nano Nina raramyaka man An kukul maika lolo ik Makromod Kristus Yesus.

## 9

*Makromod Lalap nala ha man wa'an wake'e ri Israel*

<sup>1</sup> I wal'u na'ahoru! Ya'u wakunu panaeku ma nam-lolo! Yo oro Kristus mammwali mahaku, de ya auroin ka apoho. Makromod Lalap Nin Roh nodi molollo i honorok akin, de ya auroin nahenia ainu'u wanakunu eniyeni namlolo.

<sup>2-3</sup> Akilere ya'u raram nakponuhu wake'e ono i lodon walin mememen, ri Yahudi, ra'okuledi Yesus. Ya'u raram nodi nahenia lo'o wa'an rehi ya'u penia man lernala keneri kanai herredi hi! Lo'o wa'an rehi reiha'aredi ya'u nano Kristus, leke hi akin naili'il Yesus la rahinuriyedi nano dohohala nin hunukum, maa ya auroin onne ka namwali.

<sup>4</sup> Yahudi enihe Makromod Lalap niliyedi me'e. An hi'i hi ramwali anan mememen, la An kukul Nin molollo ma narehi ma nalewen hir do'on. An hi'i Nin Nou noro hi, la nala Nina keneri hono'ok hi. An kukul kalla ma namlolo ra'uli rasa'a Ai, la nala nou nammori hi haenhi.

<sup>5</sup> Hi onne upun a'an, melle Abraham, Isak, noro Yakup. Enla Kristus man Makromod

\* **8:36** Mzm. 44:22

Lalap kikan namwali Rai mai noho wawan, Ai penia hi upun anan haenhi! Kris-tus onne Makromod Lalap man kulu narehi lapa narehi na'akeme, de mai ik ka'uli kasa'a Ai rakan laa ewi-ewi. Amin.

*Abraham upun anan nam-mori, maa Makromod Lalap nili heruwali mehe*

<sup>6</sup> Lo'o ri aile ma na'aheni, "Makromod Lalap kan hi'i Nin nou namwali noro ri Yahudi eniyenihe," maa onne ka namlolo! Ri Israel nammori ra'okuledi Yesus Kristus, maa onne kan ewek kawala inhawe man Makromod Lalap nouwedi Abraham, Isak, noro Yakup. Makromod Lalap kan nili ri Yahudi na'akeme namwali Nin ri, maa heruwali mehe.

<sup>7</sup> Naise eni haenhi, Abraham upun ananhe na'akeme ka ramwali ai upun ananhe ma namlolo, maa heruwali mehe. Ik kauroin onneni namlolo ono Makromod Lalap konohi Abraham lolo Horok Lap raram na'ahenia, "Isak upun anan mehe ramwali o upmu anumhe ma namlolo, la namehin ka." \*

<sup>8</sup> Onneni nin panaeku na'ahenia Abraham upun ananhe heruwali morie nano nou man Makromod Lalap nala Abraham noro Sara, la heruwali ka. Ende man mori nano nou eniyeni ramwali Makromod Lalap anan ma namlolo, la namehin ka!

<sup>9</sup> Lo'o mim horokala nonolu Makromod Lalap nou

Abraham na'ahenia, "Anna man mai, Ya'u mai lo'o Sara moriyana mo'oni ida." \*

<sup>10</sup> Onne kan mehe! Sara anan onne naran Isak, la Isak ho noro Ribka, la Ribka moriyana anan adodo'e ma naran Esau noro Yakup.

<sup>11-12</sup> Lere tatana onne kar mori makun, de kar hi'i ha man sala noro ma namlolo makun, Makromod Lalap konohiyedi Ribka na'ahenia, "Anulu ilitolle karurie." Makromod Lalap wakunu onne leke ri nauroin mouropo nahenia An nili ri lernohi Nin raram nodie aimehi, kan lernohi ri nina hini'i wenewhe man sala noro ma namlolo. \*

<sup>13</sup> Ende lolo Horok Lape Makromod Lalap na'aheni heheni, "Ya aramyaka Yakup, maa Esau ka." \*

*Makromod Lalap Nin kenekerohu namlolo mamani*

<sup>14</sup> Ende hi'ihehewi? Lo'o Makromod Lalap nili ri ida la ka nili ri namehin, Ai namwali ma namlolo, ee ka? Makromod Lalap onne penia ma namlolo mamani!

<sup>15</sup> Yon hamlinu nahenia nonolu Makromod Lalap konohi Musa, "Na'amolia Ya'u kukul Ainu'u aki wawa'an ri man Ya akin nale, la Ya ala Ainu'u raramyaka ri lernohi Ainu'u honorok panaeku." \*

<sup>16</sup> Ende Makromod Lalap kukul Nin aki man wa'an ri mormori lernohi Nin honorok panaeku. Ai kan po'on rir raram nodie noro

\* 9:7 NN. 21:12 \* 9:9 NN. 18:10, 14

\* 9:15 Kel. 33:19

\* 9:11-12 NN. 25:23 \* 9:13 Mal. 1:2-3

rir hini'i wenewhe wa'an, ee  
yaka, maa An lernohi mehe  
Nin raram nodie.

<sup>17</sup> Ik po'on onne namwali  
nonolu lere Makromod Lalap  
konohi rai Mesir lolo Horok  
Lap raram na'ahenia, "Ya'u  
kikan o mamwali rai leke  
Ya'u kukul Ainu'u molollo  
lolo o kemen leke ri noho  
wawa'an na'akeme do'on  
rauroin nahenia Ya arehiyedi o, penia ra'uli rasa'a  
Ya'u." \*

<sup>18</sup> Ende Makromod Lalap  
kukul Nin aki wawa'an  
ri ida, la hi'i ri namehin  
na'uluwaku kekerhe, maa  
Nin kenekrohu onne lernohi  
Nin raram nodi mehe.

*Makromod Lalap umupala ri mormori de nodi molollo*

<sup>19</sup> Eih! Lo'o nano mi  
eniyeni ri aile ma na'ukani,  
"Alhi'ihepe Makromod Lalap  
kuku sala ri mormorie?  
Inhoi naruri kawala Makromod  
Lalap Nina kenekrohu?  
Ai kan nili ika, de iknik hini'i  
wenewhe namehiyala!"

<sup>20</sup> Maa i wal'u na'ahoru! Mi  
eniyenihe ri mormori mehe  
de yono walha Makromod  
Lalap Nina wanakunu! Ik  
kala wanakunu naho'ok  
nano ri man hi'i rana!  
Ler ida man hi'i rana hi'i  
audipi onno, la audipi  
onno na'ukani man hi'ie  
na'ahenia, "Alhi'ihepe om hi'i  
ya'u hehenie?" <sup>21</sup> Hi'ihewi?  
Ri man hi'i ha onne, lernohi  
nina raram nodi, ee ka?  
Nano elimo'o umu ida, ai  
nodi molollo hi'i rana man  
ma'aruru namwali audipi  
onno, noro idewe hi'i rana

ma nadedem, lernohi nin  
raram nodi mehe.

<sup>22</sup> Onne namnenehe noro  
Makromod Lalap! Ai nodi  
molollo kukul Nin ahan ri  
man ailanna, la Ai nodi  
molollo lapan mene nala  
hunukum makmaki man Ai  
na'akenedi ri onne me'e.

<sup>23</sup> Ainin panaeku heheni  
leke An kukul Nina rere'e ha  
haru ma nawei nahuwa'an ri  
man An niliyedi la man Ai  
naramyake. Ai na'akenedi  
ri onnenihe leke hir lernala  
onno man ma'aruru wake'e  
lolo a'am raram.

<sup>24</sup> Maika kamwali Nin ri  
man An niliyedi me'e, la Ai  
napolu ik nano ri Yahudi  
noro idewe hair-hair name  
hin leke Ai nala rere'e haharu  
man ma'aruru wake'e onne  
maika na'akeme.

<sup>25</sup> Lolo horok nabi Hosea,  
Makromod Lalap kukul  
nahenia An kokala hair-hair  
namehin ono Ai na'aheni,  
"Ri ma ka namwali Ainu'u ri,  
Ya apolu, 'Ainu'u ri,'  
La hair-hair man ka  
aramyake, Ya apolu,  
'Hair man Ya aramyake.'  
,, \*

<sup>26</sup> Enla,  
"Lolo noho onne ri na'ahenia,  
'Mi eniyenihe, ka mamwali  
Makromod Lalap Nin  
ri',  
maa lere man mai lolo  
onne ri na'aheni,  
'Mi eniyenihe, mamwali  
Makromod Lalap man  
mormori laa ewi-ewi  
ananhe.' "

<sup>27</sup> Enla nabi Yesaya  
wakunu mouropo na'ono ri  
Israel na'ahenia,

\* 9:17 Kel. 9:16 \* 9:25 Hos. 2:23 \*

"Kade mi Yahudi nammori  
maise doslo herraram,  
maa mi ri tarana mehe  
man lernala or'ori dardari  
dari ma kan horu.

<sup>28</sup> Ka nalo'ol me'e Makromod  
Lalap ho'ok kail la  
nala hunukum ri  
mormori noho wawan  
na'akeme,  
la onne namlolo kokkoo  
pelek namwali." \*

<sup>29</sup> Enla lere man mai onne  
na'akeme namwali noro ri  
Israel naise Yesaya na'heni,  
"Lo'o Makromod Lalap Ma  
Nodi Molollo Laa Ewi-Ewi  
kan hoikaru upun anan ida  
woro'o, ika maki horu naisa  
ri man minle kota Sodom  
noro Gomora." \*

*Ri ma ka napanak, lernala!  
Ri ma napanak, kan lernala!*

<sup>30</sup> Ende i wal'uhe na'ahoru,  
ha onne na'akeme nin  
panaeku hi'i heheni: Ri  
ma ka namwali Yahudi ka  
ranoin kalla leke ramlolo  
lolo Makromod Lalap leken  
kalarna, maa hir lernala ono  
hi akin naili'il Yesus Kristus.

<sup>31</sup> Ri Yahudi kar hi'i heheni.  
Hir lolo kalla lo'olo'ol nina,  
de rahehe hi'i wewhe keneri  
hono'ok na'akeme leke  
rahuwa'an noro Makromod  
Lalap, maa ka namwali ono  
akinhe ka naili'il Ai.

<sup>32</sup> Hi akin ka naili'il  
Makromod Lalap, de kar  
lolo kalla ma namlolo rodi  
hi'i hi ramwali ri molololo  
Makromod Lalap leken  
kalarna, maa pu'ik heli  
keneri hono'ok mehe. Ende  
hir wekur 'waku lapa man  
hi'i ri laa yawa.'\*

\* 9:28 Yes. 10:22-23 \* 9:29 Yes. 1:9

Yes. 28:16 \* 10:5 Im. 18:5

<sup>33</sup> Horhorok ma aile Horok  
Lap raram wekel waku onne  
na'aheni, "Ya ala waku lapida  
loile kota Sion man hi'i rin  
wekur laa yawa, maa ri ma  
kan wekur waku onne akin  
naili'il Ai, de kar hehel ono in-  
hawe man An nouwedi me'e  
onne namwali." \*

## 10

<sup>1</sup> I wal'u na'ahoru! Ya'u  
raram nodi ainu'u hair  
raramne lernala or'ori dardari  
dari ma kan horu, de ya'u hi'i  
lir napanak Makromod Lalap  
mamani leke onne namwali.

<sup>2</sup> Ya'u mehe auroin nahe-  
nia ri Yahudi rampe'el ler-  
nohi Makromod Lalap, maa  
hi ka rauroin kalla ma nam-  
lolo leke ramwali ri molololo  
Ai leken kalarna.

<sup>3</sup> Hi ka rauroin kalla ma  
namlolo man Makromod  
Lalap kukul maika, de  
ramhene lernohi Ai, maa hir  
lernohi rira panaeku aimehi,  
de ka ramwali ri molololo Ai  
leken kalarna.

<sup>4</sup> Yesus Kristus mai nala  
kemen maki leke na'akuku  
na'anokor keneri hono'ok  
onne, de keneri hono'ok onne  
ka nodi molollo ri mormori  
me'e. Ende ri na'akeme ma  
akin naili'il Yesus, hi onne  
mehe ramwali ri molololo  
Makromod Lalap kalarna.

*Makromod Lalap Nina  
molollo nala or'ori dardari  
ma kan horu maika*

<sup>5</sup> Musa horok lolo Horok  
Lap raram hi'i heheni, "Ri  
man hi'i wewhe keneri  
hono'ok na'akeme, la kan  
larlewenala mahaku, ai onne  
mehe namwali ri molololo  
Makromod Lalap leken

\* 9:32 Waku onne wekel Yesus. \* 9:33

kalarna la lernala or'ori dardari ma kan horu." \*

6-7 Enimaa wanakunu namehin aile lolo Horok Lap raram man kukul nahenia ri ma akin naili'il Makromod Lalap namwali ri molololo. Wanakunu onne na'heni, "Yono mi mahinorok lolo mi akim na'henia, 'Wa'an rehi ri mormori ha'a laa a'am raram leke napanak Kristus kopur mai noho wawan,' la yon mahinorok, 'Wa'an rehi ri mormori kopur laa makmaki onno leke napanak Kristus woku nano makmaki onno onne.' Ende yon ik kahehe laa a'am raram kanoin or'ori dardari ono Kristus kopuredi noho wawan naledi or'ori dardari maika me'e, la yon ik kahehe kopur laa makmaki onno leke kapanak Kristus woku nano makmaki, ono An moriyedi me'e haenhi." \*

8 Musa wakuku ik wali'ur na'heni, "Makromod Lalap Lirna Wawa'an na'uraniyedi ki mi nuran noro mi akim." Onne namwali ono am loikaruwed Lirna Wawa'an ki mi me'e, penia mim dernedi la akin naili'iledi me'e.

9 Ende lo'o ik wakunu na'henia, "Yesus onne ik Makromod," la ik akin naili'il Makromod Lalap na'amori Yesus wali'uredi nano Nin makmaki, Ai nala or'ori dardari ma kan horu maika.

10 Ri man akin naili'il nahenia Yesus maki la mori wali'ur, la ka namka'uk konohi heri kalarna na'henia, "Yesus onne i

Makrom'u," ri onne Makromod Lalap hi'i namlolo lolo Ai leken kalarna, la nala or'ori dardari ma kan horu ai.

11 Ik kauroin onne namlolo ono lisir ida aile lolo Horok Lape ma na'heni, "Ri ma akin naili'il enihe kar sus la akinhe kar hehel me'e." \*

12 Wanakunu eniyeni kukul ri mormori na'akeme, ono Makromod Lalap ka na'ili naloho ri. Lolo Ai leken kalarna ri Yahudi noro ri ma ka namwali Yahudi namnenehe. Yesus namwali ri na'akeme Makromon, la Ai nala rere'e haharu noro Nin raramyaka laa ri na'akeme ma napanak nano Ai.

13 Horok Lap raram na'heni, "Makromod Lalap nala or'ori dardari ma kan horu laa ri na'akeme ma napanak An pakuhe." \*

*Ri Yahudi derne rauroinedi  
Lirna Wawa'an, maa kar  
kokala*

14-15 Ri nammori aile ma akin ka naili'il Makromod Lalap makun, maa ik man kokala Makromod Lalap Lirna Wawan onne kamwali ma akin nahuwa'anedi! Enpenia Horok Lape raram na'heni, "Ri akin nahuwa'an wake'e ono ri man loikaru Makromod Lalap Lirna Wawa'an eni maiyedi me'e." Ende wa'an rehi ik ma akin naili'il paku ri ma kan derne nakani Lirna Wawa'an makun. Lo'o ri kaale ma ne'e nala'a, ik hopon inhoi lan loikaru Lirna Wawa'an onne? Lo'o ri man loikaru Lirna onne

kaale, hi'ihehewi rin derne Lirna onne? Lo'o ri kan derne makun, hi'ihehewi hi akin naili'il? Lo'o hi akin ka naili'il makun, hi'ihehewi hir hi'i lir napanak Makromod Lalap? \*

<sup>16</sup> Enimaa nano ri Israel enihe nammori kar kokala Lir Wawa'an onne, naise nabi Yesaya na'ahenia, "Makrom'u! Ri ida woro'o mehe man derne rakani anim wanakuku." \*

<sup>17</sup> Ende ik kauroin nahenia rin derne Lira Wawa'an ma na'ono Kristus onne nanumene hi akin naili'il, la ri namehin mai loikaru Lira onne nanumene hir derne rakani la rauroin.

<sup>18</sup> Enimaa ya a'ukaniyala! Ri man loikaru Lir Wawa'an onne laa ri Israel maiyedi me'e, ee kaun? Maiyedi me'e! Ri Israel onnenihe dernedi me'e. Horhorok aile lolo Horok Lape ma na'aheni, "Hir loikaruwedi Lir onne me'e, penia naderre nadauledi lolo noho wawan na'akeme me'e. Hirira wanakuku onne ri mormori noho wawan na'akeme dernedi me'e." \*

<sup>19</sup> Ya a'ukaniyala wali'ur? Ri Israel lo'o rauroinedi me'e, ee kaun? Hi rauroinedi me'e! Ik kauroin onne ono dedesne Makromod Lalap na'aheni lolo Musa na'ahenia, "Na'amolia Ya'u hi'i mi ri Yahudi kunu kehen ri ma ka namwali Yahudi ono Ya aramyaka hi. Mi ma'ahan Maya'u ono Ya amre'e amharu ri namehin

man mim pene'ek raplo'edi." \*

<sup>20</sup> Nabi Yesaya ka namka'uk loikaru Makromod Lalap Lirna Wawan man kukul nahenia Ai lo'o namre'e namharu ri ma ka namwali Yahudi. Ai na'aheni, "Ri ma ka nanoin Ya'u, Yo oro hi pakromedi me'e, la Ya alahariyedi I kem'u laa ri ma ka nauroin Ya'u." \*

<sup>21</sup> Enimaa Yesaya nin wanakunu ma na'ono ri Israel na'ahenia, "Lelere a'alam Ya aka'uk Ainu'u ri leke rahuwa'an wali'ur noro Maya'u, maa hi ramhene lernohi la ramhene derne rakani Ainu'u wanakunu eni." \*

## 11

*Ri Israel heruwali mehe ramwali ri molololo*

<sup>1</sup> Ya a'ukaniyala! Lo'o Makromod Lalap na'okuledi Nina ri Israel eniyenihe, ee ka? Ka! An kokalahe! Ya auroin onne namlolo ono An kokala ya'u! Ya'u me'ene Israel upun anan ono Abraham upun anan ya'u nano luhu Benyamin.

<sup>2</sup> Makromod Lalap ka na'okul Nina ri man An niliyedi nonolu eni. Ik kauroin onne namlolo nano wanakunu lolo Horok Lap ma na'ono Elia lere an konohi Makromod Lalap na'ahenia,

<sup>3</sup> "Makrom'u! Ri nesnedi Num nabi enihe na'akeme me'e! Hi raiye'eredi Num honoi kanani onno me'e.

Ya'u mehe me'e, maa hi ranoin ya'u resne haenhi." \*

<sup>4</sup> Makromod Lalap walha Elia na'aheni, "Yom pene'ek om memehedi! Ri riwan wo'ikku aile makun man kar hoikani aukerhe Ba'al. Ya'u niliyedi hi ramwali Ainu'u ri me'e." \*

<sup>5</sup> Nonolu onne namnenehe ors eni. Ri Yahudi nammori kar peinohi Makromod Lalap, maa ri Yahudi tarana aile ma akin naili'il Ai, la An niliyedi hi onne ramwali Nin ri lernohi Nin rere'e haharu mehe.

<sup>6</sup> Ai kan nili hi lernohi rir hini'i wenewhe man wa'an, ono onne naise Ai nodi or'ori dardari ma kan horu pair rir hini'i wenewhe onne. Lo'o An hi'i heheni Ainin rere'e haharu onne kan min haida, la ka namwali rere'e haharu ma namlolo.

<sup>7</sup> Ende hi'ihewi? Israel enihe ranoin kalla leke ram-lolo lolo Makromod Lalap leken kalarna, maa ri tarana mehe man lernala. Man lernala eniyenihe, ri Israel man Makromod Lalap niliyedi nonolu me'e, la namehin ra'uluwaku kekerhe de ka rakani.

<sup>8</sup> Panaeku onne horokedi lolo Horok Lap raram ma na'aheni, "Makromod Lalap hi'i hi honorok akinhe kerhe la ramdo'edi, de rakan ors eniyeni hi rohedi la makan tokedi me'e." \*

<sup>9</sup> Daud na'aheni haenhi, "Na'amolia rira hini'i la ya'an yomun na'akeme namwali or'orok hi penia rediyawa la

lernalala hunukum ma nam-lolo herre walha rir hini'i wenewhe ma namehiyala onne. \*

<sup>10</sup> Na'amoli hi ramwali maktoko, de kar do'on kalla ma namlolo la lernalala apinha wo'operi mamani."

<sup>11</sup> Ya a'ukaniyala wali'ur! Yahudi enihe rediyawa, de lo'o ka ramriri me'e? Ka! Hi ramriri wali'ur! Namlolo hir hi'i sala, ono akin ka naili'il Jesus, maa rir sala onne nakoko ri ma ka namwali Yahudi lernalala leken ramwali Makromod Lalap Nin ri. Onne namwali leke ri Yahudi po'on nahenia ma ka namwali Yahudi enihe lernaledi Makromod Lalap Nin rere'e haharu me'e, de hi raram nodi lernohi Ai haenhi.

<sup>12</sup> Lere ri Yahudi hi'i sala, hair-hair ma ka namwali Yahudi onne lernalala rere'e haharu. Ende lere ri Yahudi roro Makromod Lalap rahuwa'an wali'ur, lo'o noho wawan na'akeme lernalala rere'e haharu ma narehi nalewen wake'e!

*Madiyaka mi akim leke naili'il mamani*

<sup>13</sup> Lere eni ya'u konohi wanakunu eniyeni ki mi ma ka namwali Yahudi. Makromod Lalap hopon ya'u loikaru Lirna Wawa'an eniyeni ki mi ri ma ka namwali Yahudi na'akeme, de ya'u howok namlolo kokkoo ono honowok eni wa'an la na'ono.

<sup>14</sup> Ya'u raram nodi hi'i ainu'u ri mememen kunu kehen mi ono mi mahuwa'an

\* **11:4** 1Rai 19:18 \* **11:8** Ul. 29:4, Yes. 29:10 \* **11:9** Mzm. 69:23-24

moro Makromod Lalap, penia hi akin naili'il Ai naise mi, leke nano hi ri heruwali rahinuriyedi nano rir dohohala nin molollo haenhi.

<sup>15</sup> Makromod Lalap na'okuledi hi, de hair-hair namehin lernala leken rahuwa'an wali'ur noro Ai. Ende lere An kokala ri Yahudi wali'ur, lo'o noho wawan na'akeme lernala rere'e harharu man ma'aruru wake'e naise ri man makiyedi, maa mori wali'ur!

<sup>16</sup> Ik kala wanakuku nano banana'an naise roti. Lere nonolu lo'o ri Yahudi hi'i roti, hi radedem rala roti man kunu dedesne tarana laa Makromod Lalap, la onne nin panaeku nahenia roti na'akeme Ai Nina haenhi. Onne namnenehe noro au'ono haenhi. Lo'o au'ono ida a'arne Makromod Lalap Nina, onne nin panaeku hinan hanan Ainina haenhi.\*

<sup>17</sup> Lo'o au'ono zaitun ida aile kirna raram man ri nadiyaka, la au'ono zaitun namehin aile wo'or. Ende lo'o ri lan peku hanan man aile kirna sopoledi mene lan peku hanan man aile wo'or rodi mai leke remek wuku au man min mai kirna eni. Au hanan man remek onne lernala banana'an la mori naruri, maa hanan mememen heruwali peku sopoledi. Wanakunu eni naho'ok ri Yahudi enihe naise au hanan mememen, la ri ma ka namwali Yahudi

raisa auhana ma nano wo'or. Onne nin panaeku mi ma ka namwali Yahudi lernala rere'e haharu nano Makromod Lalap namnenehe noro ri Yahudi ma namwali au hanan mememen.

<sup>18</sup> Ende ri Yahudi ramwali au hanan man pekuwedi, de yono po'on lewen hi, ono mi maise au hanan haenhi! Mi ka mala banana'an a'arn, maa a'arne penia ma nala banana'an ki mi!

<sup>19</sup> Lo'o mi ma'aheni, "Yahudi enihe raisa auhana man sopoledi, leke mayai ma ka namwali Yahudi herre hi mori lolo au'ono onne."

<sup>20-21</sup> Onne memen namlolo! Makromod Lalap kan kokala hi ono akinhe ka naili'il makun, la mi akim naili'il de An kokala mi. Makromod Lalap na'okuledi ri Yahudi ma namwali au hanan mememen onne ono hi akin ka naili'il, de lo'o mi akim ka naili'il, An sopoledi mi haenhi! Ende yono mim holi kukulu lalapa, maa mamka'uk.

<sup>22</sup> Ende ik kauroin Makromod Lalap Nina aki wawa'an mamani, maa Ainin ahan lapa narehi haenhi. An kukul Nina ahan ri Yahudi ma akin ka naili'il enihe, la An kukul Nina aki man wa'an rehi ki mi ma ka namwali Yahudi enihe, horo mi mamkene lolo Nina raramyake eni. Lo'o mi akim ka namkene naili'il, An sopoledi mi haenhi!

<sup>23</sup> Lo'o Yahudi enihe huriyedi rira hini'i wenewhe man yak la akin naili'il Yesus,

\* **11:16** Exegesis na'ahenia wanakuku eniyeni naho'ok ri Yahudi naise hinan hanan, la rir upun a'an Abraham, Isak noro Yakup naise a'arne. Upun a'an onne Makromod Lalap Nin ri, de onne nin panaeku ri Yahudi, Makromod Lalap Nin ri haenhi.

Makromod Lalap kokala hi wali'ur ono Ai nodi molollo hi'i hi rahuwa'an wali'ur noro Ai.

<sup>24</sup> Lo'o ma nadiyaka kirna onne remek wuku auhana ma nano wo'or noro hanan mememen haenhi, ewi man mori nahuwa'an wake'e? Au hanan man mori nahuwa'an wake'e onne au hanan mememen! Makromod Lalap hi'i mi eniyenihe ma ka namwali au hanan mememen wa'an wali'ur noro Ai, de namlolo kokkoo An hi'i Nin ri mememen wa'an wali'ur noro Ai haenhi!

*Makromod Lalap naramyaka  
ri mormori noho wawan*

<sup>25</sup> I walin ma ka namwali Yahudi enihe, ya'u konohi mi ha man ri ka nauroinnala makun, leke lere eniyeni mi mauroin idewe. Wa'an rehi mi mauroin Makromod Lalap Nina panaeku susuwar eniyeni leke yon mim holi kukulu lalapa. Nin panaeku susuwar hi'i heheni: Lere eniyeni ri Israel heruwali kar derne rakani la ra'uluwaku kekerhe makun. Hi ra'uluwaku kekerhe hehen nanumene ri ma ka namwali Yahudi man Makromod Lalap niliyedi enihe lernala or'ori dardari ma kan horu. Onne namwali nanumene ri Yahudi enihe wali wali'ur la akin naili'il Makromod Lalap.

<sup>26</sup> Ende lere man mai onne ri Yahudi upun ananhe na'akeme lernala or'ori dardari ma kan horu naise horhorok ma aile Horok Lap raram ma na'aheni, "Na'amolia Rai man huri

we'er ika nano dohohala nin molollo mai nano Sion. An mai na'ohu nahala Yakup upun ananhe rira dohohale." \*

<sup>27</sup> Enla Makromod Lalap na'aheni, "Ya ala Ainu'u nou hi ma na'ahenia, 'Ya ohu ahala rir dohohale.' " \*

<sup>28</sup> Lere eniyeni ri Yahudi ramhene kokala Makromod Lalap Lirna Wawa'an eni, de ramwali arwali roro Makromod Lalap. Onne nakoko mi ma ka namwali ri Yahudi lernala Nin rere'e haharu, maa ri Yahudi eniyenihe Makromod niliyedi me'e, de Ai kan hamlinu hi. Ai naramyaka hi mamani, ono An horhorok Nin nou ma naledi hi upun a'anhe nonolu me'eni.

<sup>29</sup> Ik kauroin onne namlolo ono Makromod Lalap nili la namre'e namharu hi, la Ai kan herre honorok akin lolo inhawem An hi'iyedi me'e.

<sup>30</sup> Nonolu mi eniyenihe kam derne makani Makromod Lalap, maa Makromod Lalap nala leken mi mauroin Ai akin wawa'an eni ono ri Yahudi ramhene derne rakani Ai.

<sup>31</sup> Lere eniyeni ri Yahudi ra'okuledi Makromod Lalap penia mim kokala Nin rararamyake, maa lere man mai Makromod Lalap kukul Nin aki man wa'an ri Yahudi, de nala ampun hi namnenehe noro mi haenhi.

<sup>32</sup> Makromod Lalap huriyedi ri na'akeme lernohi rira uluwaku kekerhe penia dohohale nodi molollo hi, leke kukul Ai akin man

\* 11:26 Yes. 59:20-21

\* 11:27 Yer. 31:33-34

wa'an ri mormori na'akeme haenhi.

*Kapanak trimkasi nammori Makromod Lalap ono Ai naramyaka ika*

<sup>33</sup> Makromod Lalap Ma Narehi Ma Nalewen! Ri na'akeme ra'uli rasa'a Ai ono Nina woroin man kulu narehi lapa narehi. Ai penia linikar onno kanaru onno ma namlolo. Inhoi nau-roin Makromod Lalap Nin panaeku? Nin kenekrohu? Noro Nin hini'i wenewhe na'akeme?

<sup>34</sup> Onne naise man aile Horok Lape ma na'aheni, "Inhoi nauroin Makromod Lalap honorok akin? Inhoi nala nounaku Ai?" \*

<sup>35</sup> Inhoi nala haida Makromod Lalap penia lernala wanalhanne? Ri kaale!" \*

<sup>36</sup> Makromod Lalap hi'i ha wo'ira na'akeme, la Ai nodi molollo na'akeme. Ende na'akeme ra'uli rasa'a Ai. Mai i wal'uhe na'ahoru ik ka'uli kasa'a Ai laa ewi-ewi! Amin.

## 12

*Morimori ma namlolo lolo Makromod Lalap leken kalarna*

<sup>1</sup> I wal'u na'ahoru! Makromod Lalap kukul Nin aki man wa'an de naledi ampun lalap maika me'e. Onne penia ya apanak rehirehi lewlewen mim lernohi Makromod Lalap Nin panaeku na'akeme la ilitolle Ai mamani. Lo'o mim hi'i heheni, onne naise mi mala mi kemmu namwali honoi kanani man mormori laa Makromod Lalap.

Minima hini'i wenewhe onne moumou dewdewe la nahuwa'an Makromod Lalap akin, penia namwali ul'uli sasa'a ma namlolo.

<sup>2</sup> Yom derne makani ri mormori rira honorok akin ma ka namlolo eni, maa mala mi honorok akin Makromod Lalap mamani, leke Ai nala honorok aki worworu herredi minim morimori ma ka namlolo eni. Lo'o mim hi'i heheni, mi mauroin Makromod Lalap Nin honorok panaeku lolo minim morimori, de mauroin mouropo inhawe man wa'an, inhawe ma nahuwa'an Makromod Lalap akin, noro inhawe ma namlolo Ai leken kalarna.

<sup>3</sup> Makromod Lalap naledi Nina rere'e haharu maya'u me'e, de ya ala nounaku eniyeni ki mi na'akeme. Makromod Lalap naledi woroin ma na'ono maika do-hodoho leke ik akin naili'il Ai. Maika eniyenihe heruwali akin naruri naili'il Ai, la heruwali ka naruri makun, maa onne na'akeme mai nano Makromod Lalap. Ende yon mehe ma'uli mi kemen ono minim woroin onne Makromod Lalap penia nala ki mi.

<sup>4</sup> Ik kala wanakuku nano ik kemen eniyeni. Liman ein, oin makan, kilinna noro namehin rira honowok ka namnenehe, maa na'akeme rahinuhu rawinawar ri kemen leke namwali mahaku.

<sup>5</sup> Namnenehe noro maika ma akin naili'il Kristus. Kade ik ri nammori, maa kamwali mahaku lolo Ai. Ik ida man paku ida naise ik kemen

\* 11:34 Yes. 40:13 \* 11:35 Ayb. 41:11

hana'arne na'akeme, ida man paku ida.

<sup>6</sup> Ika dohoho lernala woroin aimehi nano Makromod Lalap lernohi Nina rere'e haharu, de wa'an rehi ik kampe'el nair woroin onne kodi aki ma nahuwa'an. Ri ma nauroin loikaru Makromod Lalap Lirna Wawan, loikaru wawa'an lernohi nin aki ma naili'il leke nin wanakunu mai nano Makromod Lalap.

<sup>7</sup> Ri ma nampe'el ilitolle ri heri ri wali, ilitolle kokkoo. Ri ma nauroin wakuku, wakuku kokkoo.

<sup>8</sup> Ri ma nauroin nala nounaku, nala nounaku ma na'alap ri akin, la ri man paku ri ma na'alehe haida-haida, yon sorno maa paku nodi aki man wa'an. Ri man leluwai makrana, leluwai makrana wawa'an, la ri ma naramyaka de paku ri heri ri wali, paku nodi aki ma nahuwa'an.

### *Ida ma naramyaka ida*

<sup>9</sup> Karamyaka ri heri ri wali kodi aki moumou. Sopoledi honorok aki man ailanne noro mormori man yak, la hi'i ha man wa'an mamani.

<sup>10</sup> Mi ida ma naramyaka ida naise ma na'unara noro ma na'umo'oniwali, la ida man horhawe ida mamani.

<sup>11</sup> Mampe'el howok la ilitolle Makromod Lalap Nina honowok modi aki man mou.

<sup>12</sup> Lo'o mim lernala apinpinha, yon mi akim werek, maa wa'an rehi mi akim nahuwa'an, ono mi mauroin Makromod Lalap hi'i Nin nou namwali. Yom pelek mi

akim nado'o, maa mamkene mamani, la yon hamlinu hi'i lir napanak mamani.

<sup>13</sup> Lo'o minim ri heri ri wali ma akin naili'il Makromod Lalap enihe rira hahaa kan nokor lolo rir morimori akilere, malala minima hahaa tarana. Lo'o rin mai minim nakar, kokala wawa'anedi modi aki ma nahuwa'an.

<sup>14</sup> Mapanak Makromod Lalap leke namre'e namharu ri man hi'i apinpinha mi, yono makneri maknai hi.

<sup>15</sup> Lo'o ri aile man akin nahuwa'an, mi akim nahuwa'an wewerre, la lo'o ri aile man akin sus, mim sus wewerre haenhi.

<sup>16</sup> Mori wawa'an noro ri heri ri wali, yono mim holi kukulu lalapa, maa holi helkaki namdaru noro ri ma na'alehe haida-haida, la yono ma'uli mi ma'heni mauroin narehi.

<sup>17</sup> Lo'o ri aile man hi'i ailanna ki mi, yono walhe noro ailanna, maa walha noro wawa'an. Hi'i wawa'an mamani leke rin po'on minima hini'i wenewhe wa'an wake'e.

<sup>18</sup> Madiyaka mi wawa'an leke moro num ri heri ri wali na'akeme holi melina makai. Yon mi mamwali ma namhene holi melina makai!

<sup>19</sup> I wal'u na'ahoru! Lere rin hi'i apinpinha me ailanna ki mi, yom walhe, ono na'amoli Makromod Lalap nala hunukum ma namlolo hi. Lolo Horok Lape raram Makromod Lalap na'aheni, "Ya'u penia man walhe, la Ya'u man hukum hi." \*

<sup>20</sup> Enimaa wa'an rehi mim lernohi Horok Lape Lirna ma na'aheni, "Lo'o num arwali namlara la marou, mala banana'an nonomun hi, leke rawawa la hir herre rira hini'i wenehwe onne." \*

<sup>21</sup> Ende yom walha ri nin ailanna modi ailanna, maa walha ailanna modi ha man wa'an, leke nano minim hini'i wenehwe man wa'an onne mim rehiyedi ailanna onne me'e.

## 13

### *Derne makani ri ma nodi molollo*

<sup>1</sup> I wal'u na'ahoru! Derne makani ri ma nodi molollo noho wawan. Makromod Lalap penia ma nala molollo hi, la An kakaredi de hi rodi molollo.

<sup>2</sup> Ende inhoi ma namhene derne nakani ri ma nodi molollo onne, ai na'okuledi inhawe man Makromod Lalap kakaredi me'eni, la nin hini'i wenehwe onne nakoko an lernala hunukum.

<sup>3</sup> Ende hi'i ha wawa'an mamani leke yono mamkauk ma nodi molollo noho wawan. Ri na'akeme man derne nakani ma nodi molollo nina konomdere ka ramka'uk haida-haida nano hi, maa ri man hi'i sala penia namka'uk. Lo'o mim hi'i ha man wa'an mamani, mi ka mamka'uk, maa ma nodi molollo ra'uli mi.

<sup>4</sup> Ri ma nodi molollo onnenihe ramwali Makromod Lalap Nina hophopon wahwahan, la hir paku mi leke mim holi melina makai, maa lo'o mim ailanna hi rodi molollo hukum mi.

Makromod Lalap kakar heheni la nala molollo hi leke hi'i kenekrohu hukum ri man sala.

<sup>5</sup> Mim derne makani ono mamka'uk lernala hunukum, maa wa'an narehi mim derne makani ono mi mauroinedi me'e nahenia hini'i onne namlolo lolo Makromod Lalap kalarna.

<sup>6</sup> Onne penia mim pair noho nin paipair leke ma nodi molollo onne ilitolle mamani honowok man Makromod Lalap nala hi.

<sup>7</sup> Lo'o hi onne rapanak mim pair noho nin paipair me bea, paire. Lo'o hi rapanak hiyene aroro, mala hiyene aroro hi, la lo'o hi rapanak honoor hanawe, mala haenhi. Ende hi'i wewhe na'akeme naisa ma nodi molollo kakaredi me'e, la mala ha ma namlolo laa ri na'akeme.

*Ida ma naramyak ida, ono ka nalo'olo Yesus mai wali'ur me'e*

<sup>8</sup> Yono hi'i minim okon rake aile haromo, pelek pairedi na'akeme. Enimaa iknik okon rakida aile, ono Makromod Lalap naramyak rehi maika, de wa'an rehi ik ida ma naramyak ida mamani. Ende onne namwali iknik okon rake ma kan horu. Ri ma naramyaka nina ri heri ri wali onne hi'iyedi Makromod Lalap Nina keneri hono'ok na'akeme me'e.

<sup>9</sup> Ainina keneri hono'ok na'aheni, "Yono lerwa'u hailai, yono mesne ri, yono mamma'a, la yono mamono ri nina hahaa." Keneri hono'ok namehin aile haenhi, maa lo'o ik lernohi keneri hono'ok

ma na'aheni, "Maramyaka minim ri heri ri wali naise maramyaka mi kemen," onne nin panaeku ik hi'iyedi keneri hono'ok na'akeme me'e.\*

<sup>10</sup> Lo'o ik karamyaka iknik ri heri ri wali kokkoo, ik kak hi'i yaksala hi, maa ik hi'i wewhedi keneri hono'ok na'akeme me'e.

<sup>11</sup> Wa'an rehi hi'i ha wo'ira na'akeme man ya'u konohiyedi mi me'e. Yom maise ri ma namkukuru, maa mamakedi herre, ono lere alam Yesus mai wali'ur na'akeki rakan me'e. Nano lere dedesne ik akin naili'il Ai rakan lere eniyeni, mi mauroinedi nahenia lere alam An mai nala or'ori dardari maika eren na'urani me'e.

<sup>12</sup> Noho na'ikeki ropo me'e, de yon ik lernohi hini'i man metmetek nine me'e, maa hi'i ha man wa'an mamani. Lo'o ik hi'i wewhe ropropo nine, onne naisa kasala ilak raa ma namlolo me'e.

<sup>13</sup> Wa'an rehi ik hi'i wewhe ropropo nine, de yono ik hi'i yapi lalapa ma namehiyala, yon ik manha, yon ik ida man hi'i sala ida, yon holi diwar dawar, yon wahi'i me kasesi, la yono kunu kehen ri.

<sup>14</sup> Yon ik hi'i heheni, maa wa'an rehi lernohi Makromod Yesus Kristus Nina hini'i wenewhe man wa'an mamani, leke iknik morimori namnenehe noro Ainine. Yon ik lernohi iknik raram nodi aimehi ma nakoko hi'i dohohale mamani.

## 14

*Yono kala sala ik walin*

<sup>1-2</sup> I wal'u na'ahoru! Kokala wawa'anedi mi wal-lum man akin ka naruri naili'il wawa'an makun. Ri heruwali ma akin ka naili'il wawa'an makun ra'aheni, "I'in mahin luli ik ka'an," la heruwali ma akin naruri naili'il ra'aheni, "Hanana'an na'akeme kan luli de ik ka'an." Yono ik ida ma nawalha lira noro ida.

<sup>3</sup> Ri ma na'an hanana'an na'akeme yono po'on lewen ma ka na'an i'in mahin, la ma ka na'an i'in mahin yon mala sala ma na'an hanana'an na'akeme, ono Makromod Lalap kokaledi ai me'e.

<sup>4</sup> Ai onne penia namwali Makromod Lalap Nin hophopon wahwahan, de Ai mehe Nin molollo nala kenekrohu nahenia nin hini'i onne nam-lolo, ee sala. Enla Ai penia man paku hophopon wahwahan onne leke namkene hi'i ha man wa'an. Ende minim molollo kaale mala sala ai.

<sup>5</sup> Ri aile ma nahinorok nahenia lere eni wa'an rehi ka'uli kasa'a Makromod Lalap nano lere namehin, maa ri namehin nahinorok nahenia lere alam na'akeme namnenehe lolo Makromod Lalap leken kalarna. Na'amolia hi dohodoho lernohi rira honorok aki aimehi, yono ida man kerne dalha ida lernohi hi honorok akin.

<sup>6</sup> Ri man nili lere alam ma na'ono onne, an hi'i heheni leke horhawe Makromod Lalap. Ri ma na'an hanana'an na'akeme, an hi'i heheni leke horhawe Makromod ono ai napanak trimkasi

\* **13:9** Kel. 20:13-15, 17, Im. 19:18, Ul. 5:17-19, 21

mene na'an. Namnenehe noro ri ma ka na'an i'in mahin, ai onne horhawe Makromod Lalap la napanak trimkasi haenhi.

<sup>7</sup> Ik kak mori lernohi nik suk aimehi, la kak maki lernohi nik suk aimehi haenhi,

<sup>8</sup> maa ik mori me maki, hi'i na'akeme lernohi Makromod Lalap Nina aki, ono maika eniyenihe Ainina ri.

<sup>9</sup> Enpenia Yesus Kristus makiyedi maa mori wali'ur, leke lo'o ik mori me maki, Ai namwali ik Makromod!

<sup>10</sup> Ende yon po'on lewen mi walinhe ma akin naili'il, ee kuku sala hi, ono mi mauroin nahenia lere man mai maika na'akeme kamrirri Makromod Lalap leken kalarna leke An ho'ok kail maika.

<sup>11</sup> Lolo Horok Lape raram Makromod Lalap nahopo, "Ya'u man mori laa ewi-ewi, de Ya aheni lere man mai ri na'akeme kadi ein korno lolo Ya'u kalarna la konohi nahenia Ya'u eni Makromod Lalap." \*

<sup>12</sup> Ende lere man mai ri dohodoho rala wanalhanne rir hini'i wenewhe na'akeme lolo Ai leken kalarna.

*Yono minim hini'i wenewhe nodi mi wallum laa yakanne*

<sup>13</sup> Ende yono mi ida man kuku sala ida, maa mahehe leke yon hi'i ha ma nodi ik walinhe radiyaur dohohale.

<sup>14</sup> Yo oro Makromod Yesus ai mamwaliyedi mahaku me'e, de ya akin naili'il nahenia An huri yo o'on banana'an na'akeme, maa wa'an rehi yon yo o'on

lolo ri kalarna ma nahinorok nahenia Makromod Lalap na'aheni hanana'an heruwali morso de luli ri na'an. Lo'o ai na'ane, onne namwali dohohala ono an larlewenedi nina lululi me'e.

<sup>15</sup> Wa'an rehi yon mi mo'on banana'an onne lolo ri onne kalarna, kalo'o an lernohi mi de hi'i dohohala ono kan lernohi nin honorok aki ma na'ahenia hanana'an onne luli. Lo'o mim hi'i heheni, mi ka maramyaka mi wallum onne me'e. Yon hi'i de minim hanana'an onne nodi ai laa yakanne, ono Yesus Kristus maki leke nala or'ori dardari ai haenhi.

<sup>16</sup> Yon hurinohi mi wallum onne na'aheni minim honorok aki man wa'an onne namwali man sala.

<sup>17</sup> Makromod Lalap nodi molollo namwali Rai maika, la Nin molollo ka na'ono hanana'an noro nonomun, maa Ainina panaeku ik lernohi Nin raram nodi mamani, de ik holi moiiliwi mahuwele la akin ma nahuwa'an mamani. Ha wo'ira na'akeme onne namwali ono Nin Roh aile ik raram.

<sup>18</sup> Ri na'akeme man hi'i wewhe Kristus Nin panaeku heheni, rahuwa'anedi Makromod Lalap akin me'e la ri namehin horhawa hi haenhi.

<sup>19</sup> Onne penia kahehe leke ida man mori wawa'an noro ida, la ida ma na'alap ida akin, leke ik na'akeme akin naili'il wawa'an.

<sup>20</sup> Yono hi'i de hanana'an nonomun nakoko ika ida ma na'ahan ida penia nano'onyaka Makromod

\* **14:11** Yes. 45:23

Lalap Nin honowok. Nam-lolo kokkoo hanana'an na'akeme kan luli ik ka'an, maa ri heruwali rir panaeku nahenia hanana'an heruwali luli, de wa'an rehi ik lernohi rir panaeku leke yon hi'i hi radiyaur dohohale.

<sup>21</sup> Ende yono ka'an mahin, komun arak, ee hi'i ha namehin ma nakoko mi wallumhe radiyaur dohohale.

<sup>22</sup> I wal'u na'ahoru! Lo'o ik kauroin iknik hini'i we-newhe onne kan sala, onne wa'an. Ende yon sopol minima panaeku onne, ono hini'i onne ka namwali dohohala lolo Makromod Lalap kalarna, maa yom nori ri namehin lernohi mi. Ri man hi'i wewhe nin panaeku man ai nauroin namlolo mamani lolo Makromod Lalap kalarna, kan sala, de akin nauhua'anedi.

<sup>23</sup> Enimaa ri aile ma nahinorok, "Lo'o hanana'an onne luli," maa ai na'anedi me'e, de onne namwali dohohala lolo Makromod Lalap kalarna. Ende lo'o ik hi'i haida kan lernohi ik akin ma naili'il, onne namwali dohohala maika.

## 15

*Ma'alapa mi wallumhe akin*

<sup>1</sup> I wal'u na'ahoru! Maika ma akin naruri naili'il Makromod Lalap, yon kuku sala ri ma akin ka naili'il wawa'an makun, maa helkaki mamdaru hi. Yon kanoin iknik wawa'an aimehi,

<sup>2</sup> maa ilitolle iknik ri heri ri wali, la paku hi leke hi akin eren narururi naili'il.

<sup>3</sup> Lere Yesus Kristus min noho wawan Ai ka nanoin Nin wawa'an mehe, de lolo Horok Lap wanakunu aile ma na'ono onne na'ahenia, "Makrom'u! Hadwei had-wokor rahu na'akeme man Om lernanala, Ya'u lernala haenhi." \*

<sup>4</sup> Na'akeme man aile Horok Lap onne rodi wakuku ika la na'alap ik akin, leke kamkene pu'ik mehe Makromod Lalap, ono ik kauroin inhawe man An nouwedi me'e, An hi'ie.

<sup>5</sup> Makromod Lalap pena ma na'alap ik akin la hi'i ik kamkene mamani. Na'amolia An paku ik na'ahoru lernohi Yesus Kristus Nin honorok panaeku wewerre,

<sup>6</sup> leke ik honorok akin namwali mahaku, pena ik ka'uli kasa'a Makromod Lalap ma namwali ik Makromod Yesus Kristus Aman.

*Ida man kokala ida wawa'anedi*

<sup>7</sup> Ende I wal'u na'ahoru! Ya apanak mi ida man kokala ida wawa'anedi naise Kristus kokaledi mi, leke ri na'akeme ra'uli rasa'a Makromod Lalap.

<sup>8</sup> Horhorok! Kristus mai ilitolle ri Yahudi leke na'akuku na'anokor Makromod Lalap Nin nou man Ai naledi ik upud a'ad, Abraham, Isak noro Yakup. Enpenia ri na'akeme rauroin Makromod Lalap Lirna Wawan onne namlolo.

\* 15:3 Mzm. 69:9

<sup>9</sup> Yesus kukul Nin aki man wa'an hair-hair namehin penia hi ra'uli rasa'a Makromod Lalap haenhi. Lolo Horok Lape raram Daud wekel onne na'heni, "Makromod Lalap! Lere ya'u min wewerre noro hair-hair ma ka namwali Yahudi, ya'u horhawe O! Ya ahinara a'uli asa'a Makromod Oin Naran leke hir derne." \*

<sup>10</sup> Horok namehin aile haenhi ma na'heni, "Heih, hair-hair ma ka mamwali Yahudi! Mi akim nahuwa'anedi moro ri Yahudi man An niliyedi me'eni." \*

<sup>11</sup> Horok onne na'heni wali'ur, "Hair-hair ma ka namwali Yahudi, ma'uli masa'a Makromod Lalap! Ri noho wawan na'akeme, mai ma'uli masa'a Ai!" \*

<sup>12</sup> Yesaya na'heni wali'ur, "Nano Isai Upun Anan Ida mai nodi molollo hair-hair ma ka namwali Yahudi, la hi akin namkene pu'ik mehe Ai." \*

<sup>13</sup> Na'amolia Makromod Lalap ma namwali iknik ya'ar, nala maika aki ma nahuwa'an wake'e la hi'i maika holi moiiliwi mahuwele ono ik akin naili'il Ai. Na'amoli Makromod Lalap nodi Nina Roh na'alapa ik akin leke ik kamkene pu'ik heli Ai mamani.

*Makromod Lalap nala molollo Paulus hi'i honowok eniyeni*

<sup>14</sup> I wal'u na'ahoru! Ya auroin nahenia mi honorok akin wa'an la mim hi'i ha

man wa'an mamani. Mi mau-roinedi Makromod Lalap Lirna Wawan, de mi ida man wakuku ida. Onne namlolo kokkoo,

<sup>15</sup> maa lolo horok eni ka amka'uk a'ori honorok mi mouropo wanakuku ida woro'o wali'ur. Ya'u hi'i heheni ono Makromod Lalap namre'e namharu ya'u penia

<sup>16</sup> kikan ya amwali Ainin hophopon wahwahan, la hopon ya'u loikaru Lirna Wawa'an laa ri ma ka namwali Yahudi enihe. Ya amwali hair-hair ma ka namwali Yahudi rir imam, leke hi ramwali honoi kanani ma nahuwa'an Makromod Lalap akin. Makromod Lalap kokaledi hi ono Roh Kudus penia man hi'i hi ramwali honoi kanani man wa'an lolo Ai kalarna.

<sup>17-18</sup> Yo oro Yesus Kristus mamwali mahaku, de ya akin nahuwa'an konohi mi hi'ihehewi Yesus paku ya'u ilitolle Makromod Lalap Nin honowok. Ya amhene konohi mi ha man ya'u mehe hi'i. Yesus paku ya'u lolo ainu'u hini'i wenewhe noro ainu'u wanakunu, penia ors eniyeni ri ma ka namwali Yahudi derne rakaniyedi me'e.

<sup>19</sup> Nina Roh nodi molollo leke ya'u hi'i tanada man ri kan dodo'onnale makun, penia ors eni ri nammori lernohiyedi Ai me'e. Ya'u loikaruweddi Kristus Lirna Wawa'an onne ri manina Yerusalem rakan ri manin Ilirikum me'e.

<sup>20</sup> Ri aile makun ma kan dernala Lir ma na'on

\* **15:9** 2Sam. 22:50, Mzm. 18:49 \*

**15:10** Ul. 32:43 \* **15:11** Mzm. 117:1

\* **15:12** Yes. 11:10

Kristus, de ya'u raram nodi ya ala'a rir noho leke loikaru Makromod Lalap Lirna Wawa'an eni, ono ya amhene ya ariri nakar lolo ri namehin rira nakar oron.

<sup>21</sup> Ya'u raram nodi hi'i naise Horok Lapa Lirna ma na'aheni,

"Ri ma kan kokala Makromod Lalap Lirna Wawa'an makun, lo'o dernedi me'e, la ri ma kan dernala makun, lo'o nauroinedi me'e."

*Paulus paeku nala'a laa Roma*

<sup>22</sup> Onne penia ka'u lernala leken ki ka'ar mi makun,

<sup>23</sup> maa ors eniyeni ainu'u honowok lolo noho eni na'akeki horu me'e. Anna laa anna, ya'u paeku ki ka'arala mi, maa ka namwali makun.

<sup>24</sup> Ende lo'o anna eniyeni namwali ya'u ki, ono ainu'u panaeku ya ala'a noho Spanyol, de lo'o lolale minim lekloin nanu, leke ik ida ma nahuwa'anala ida akin. Enla lo'o ya apanak mim pakuwala'u lolo ainu'u nala'ala'a laa Spanyol onne.

<sup>25</sup> Ors eni ya ala'a Yerusalem nanu leke yo odi pulipuli laa pakuwala Makromod Lalap Nina ri lolo enne.

<sup>26</sup> Kerei raramne ma ka namwali Yahudi man minle Makedonia noro Akhaya raramyaka Makromod Lalap Nina ri man minle Yerusalem, de rala pulipuli pakuwala hi ono hi onne ra'alehe haida-haida.

<sup>27</sup> Hi akinhe nahuwa'an de rala pulipuli onne. Memen wa'an rehi hir paku ri ma na'alehe haida-haida ma aile Yerusalem onne, ono nano ri Yahudi penia ma ka namwali Yahudi enihe lernala Makromod Lalap Nina rere'e haharu. Ende wa'an rehi ma ka namwali Yahudi rampe'el paku ri Yahudi lolo rir morimori akilere.

<sup>28</sup> Yo odi pulipuli eniyenihe laa Yerusalem leke nawineke narna nahenia ainu'u honowok horuwedi me'e. Eni nanumene, ya'u lolala minim lekloin, mene laa Spanyol.

<sup>29</sup> Ya auroiroin lere yo oro mi pakromo onne, yo odi Kristus Nina rere'e haharu nammori ki mi.

<sup>30</sup> I wal'u na'ahoru! Ik koro Makromod Yesus Kristus kamwali mahaku, la Makromod Lalap Nina Roh paku ika leke ik ida ma naramyaka ida. Onne penia ya apanak an'anchedi ki mi nahenia mi mamkene hi'i lir napanak leke Makromod Lalap paku maya'u lolo ainu'u honowok eni.

<sup>31</sup> Hi'i lir napanak leke Makromod Lalap huri ya'u nano ri Yudea ma akin ka naili'il makun enihe, leke yono hir hi'i apinpinha ya'u. Enla hi'i lir napanak haenhi leke Makromod Lalap Nin ri mememen manin Yerusalem kokala pulipuli onne noro aki wawa'an.

<sup>32</sup> Enla mapanak Makromod Lalap hari kalla ya'u ki ka'arala mi odi aki ma nahuwa'an leke ik ida ma nahuwa'anala ida akin.

<sup>33</sup> Na'amoli Makromod Lalap namre'e namharu mi na'ahoru, ono Ai penia ma nala ri mormori akin ma namlina namkai! Amin.

## 16

*Paulus nala nina tape masi*

<sup>1</sup> Ya'u raram nodi konohi i wal'uhe nahenia ik narda Febe nina hini'i wenewhe wa'an. Ai namwali man paku ilitolle kerei raramne lolo kota Kengkrea.

<sup>2</sup> Ya apanak mim kokala ai wawa'anedi naise mi wal-lum mememen, ono wa'an rehi ika man lernohi Makromod Lalap, ida man kokala ida wawa'an. Ai napanak in-hawa haromo mim paku, ono an pakuwedi yo oro ri nam-mori me'e.

<sup>3</sup> Ya apanak modiyala ainu'u tape masi rakanala Priskila noro Akwila. Yo oro hi howok wewerre Yesus Kristus Nina honowok.

<sup>4</sup> Ler ida manlo'o hir maki ono ilitolle maya'u, de ya apanak trimkasi nammori hi, la kerei raramne ma ka namwali Yahudi na'akeme rapanak trimkasi hi haenhi.

<sup>5</sup> Modi ainu'u tape masi rakanala kerei raramne man lawuku rira nakar haenhi. Ainu'u tape masi rakanala Epenetus man ya aramyake. Ai onne akin naili'il Kristus noluwedri ri na'akeme man minle noho Asia.

<sup>6</sup> Tape masi rakanala Maria man howok ka nauroin nina mahmaha ki mi.

<sup>7</sup> Tape masi rakanala Andronikus noro Yunias haenhi. Hi onne ramwali i wal'uhe ri Yahudi, la nonolu yo oro hi min bui raram

wewerre. Hophopon wah-wahan ma nodi Yesus Lirna na'akeme horhawe hi, la hi akin naili'il Kristus nolu ya'u.

<sup>8</sup> Modi ainu'u tape masi rakanala Ampliatus man ya aramyake lolo Kristus.

<sup>9</sup> Tape masi rakanala Urbanus, iknika man howok wali lolo Kristus, noro Stakis man ya aramyake haenhi.

<sup>10</sup> Tape masi rakanala Apelles man lernala apinpinha ono akin naili'il Kristus, maa namkene lernohi Kristus mamani. Modi ainu'u tape masi rakanala Aristobulus noro nina nakar raram,

<sup>11</sup> la rakanala Herodion ma noro ya'u hair mahaku. Ainu'u tape masi rakanala ri na'akeme ma akin naili'il ma namwali Narkisus nin nakar raram enihe.

<sup>12</sup> Ainu'u tape masi rakanala ik narda Tripena noro Triposa man howok ka rauroin rira mahmaha ilitolle Makromod Yesus Nina honowok, la rakanala ik narda Persis man ya aramyake. Ai eni howok mamani ilitolle Makromod Lalap Nina honowok.

<sup>13</sup> Tape masi rakanala Rupus noro nina mame. Rupus onne ri na'uli ono Makromod Lalap nili ai leke ilitolle Makromod Nina honowok, la nin mame naise ainu'u mama mememen.

<sup>14</sup> Modi ainu'u tape masi rakanala Asinkritus, Flegon, Hermes, Patrobas, Hermas, noro i wal'u na'ahoru man akin naili'il wewerre man min lolo onne.

<sup>15</sup> Tape masi rakanala Pilogus noro Yulia, rakanala

Nereus noro narna, rakanala Olimpas noro ri na'akeme ma akin naili'il wewerre noro hi enihe.

<sup>16</sup> Kerei raramne na'akeme rala tape masi rakanala i wal'uhe na'ahoru, la mi ida ma nala tape masi ida ono ik kamwali mahaku lolo Kristus.

### *Nounaku man horu*

<sup>17</sup> I wal'u na'ahoru! Ya apanak an'anhedu nakinem men ki mi leke yon derne makani ri man mai reiha'ar la kope'er mi ma akin naili'il, la nawokor nakali wanakuku man mim kokaledi me'e. Mako'uwedi nano ri man hi'i heheni.

<sup>18</sup> Ri man hi'i heheni kar ilitolle ik Makromod Kristus, maa lernohi rira panaeku aimehi. Hir wakunu wanakunu man ma'aruru rodi wukupoho ri ma akin mou, ono hi ka rauroin nahenia hi ma napoho mamani.

<sup>19</sup> Ri na'akeme rauroinedi me'e nahenia mim derne makani wanakuku ma na'ono Makromod Lalap Lirna Wawa'an eni. Ende ya akin nahuwa'an ono mim hi'i heheni, la ya'u raram nodi mi eren mauroroin panaeku man wa'an, leke kam hi'i panaeku man sala noro man ailanna.

<sup>20</sup> Makromod Lalap ma nala aki ma namrina namkai ri mormori, la ka nalo'ol me'e Ai na'amoluloinedi Hayakyak Makromon, leke yon nodi molollo ika me'e. Na'amoli ik Makromod Jesus nala Nin rere'e haharu ki mi na'ahoru!

<sup>21</sup> I walin Timotius nalala nina tape masi rakanala ki mi na'ahoru, noro idewe i wal'uhe ri Yahudi, Lukius, Yosan noro Sosipater haenhi.

<sup>22</sup> Maya'u, Tertius man horok Paulus lirna lolo horok eni, aku ainu'u tape masi rakanala i wal'u na'akeme ma akin naili'il Yesus lolo onne.

<sup>23</sup> Gayus aku tape masi rakanala ki mi haenhi. Ya'u minle nin nakar la ainim kerei raramne lawuku ra'uli rasa'a Makromod Lalap lolo nin nakar haenhi. Erastus ma nasala lekloi nin kupan noro ai walin Kwartus aku tape masi ki mi haenhi.

<sup>24</sup> Ai mapanak na'amolia ik Makromod Yesus Kristus namre'e namharu mi na'ahoru lolo onne! Amin.

### *Lira man horu*

<sup>25</sup> Ka'uli kasa'a Makromod Lalap ma nodi molollo na'aruri mi akim leke namkene naili'il Ai lernohi Lira Wawa'an man ya'u loikaruwedi mi me'en. Lira Wawa'an ma na'ono Yesus Kristus eni nalhariyedi Nin panaeku ki mi ma ka namwali Yahudi enihe. Ri kan derne nauroin Nin panaeku man ya'u loikaru eni nano nonoluweni,

<sup>26</sup> maa ors eniyeni Ai nalhariyedi Nin panaeku onne maika me'e. Makromod Lalap man mori laa ewi-ewi hopon Nin hophopon wahwahan rodi nabi-nabi rira horok enihe wakuku panaeku ma namlolo leke ri mormori noho wawan na'akeme akin naili'il la derne rakani Makromod Lalap.

27 Makromod Lalap mehe  
Nina woroin ma narehi  
nalewen la man moumou  
dewdewe, de mai ka'akulu  
kalapa Ai Oin Naran lolo  
Yesus Kristus lere eniyeni  
rakan laa ewi-ewi! Amin.

Ainima tape masi,  
*Paulus*

# 1 Korintus

## *Horok Lirna La'an*

Nonolu kota Korintus namwali kote man lap lolo noho Akhaya. Lere manin Korintus ka rauroin Makromod Lalap makun, hir hoikani la ra'uli rasa'a noho makromon nammori la radedem rir hini'i wenewhe ailanna wake'e. Paulus eni ri dedesne man loikaru Lira Wawa'an laa ri Korintus, la nano Paulus nin wanakunu ri Korintus nammori akinhe naili'il Makromod Yesus (HN. 18:1-11). Paulus namharedi Korintus mene ri ida naran Apolos mai (HN. 18:24-19:1). Apolos eniyeni nauroin wakuku la wakunu warei. An min lolo onne leke wakuku manin Korintus enihe (1Kor. 3:6).

Nakawedi wollo wo'ira, ri Kristen man minle Korintus rir na'ukankani aile de hir hi'i horok aku laa Paulus. Ende Paulus walha rir na'ukankani lolo horok eniyeni. Paulus dernedi nahenia hirira hini'i wenewhe nammori ka namlolo haenhi, de an nounaku hi yon hi'i ha man ailanna onne maa hi'i ha ma namlolo wali'ur. An kuku sala hi ono hi ka ramwali mahaku me'e, ono heruwali ra'heni hir lernohi Apolos, heruwali ra'heni lernohi ri namehin, la heruwali ra'heni lernohi ai, penia ida ma ka namkene noro ida me'e (1:10-12; 3:1-6). An nounaku hi panaeku ma na'ono noro ri man ho (pnk. 7), noro panaeku namehin nammori haenhi.

Panaeku ma na'ono lolo Paulus nin nounaku enie: An wakuku hi leke hi rau-roin hini'i wenewhe man wa'an la rauroin hi'ihehewi ri ma akin naili'il Makromod Lalap, ida man mori wawa'an noro ida.

## *Horok Ihin*

1. Paulus nala hiyene arore la hi'i lir napanak trimkasi (1:1-9).
2. Paulus kuku sala manin Korintus ono hirira hini'i wenewhe ailanna wake'e, la ida kan mori wawa'an noro ida (1:10-6:20).
3. An wakunu panaeku ma na'ono ri man ho (pnk. 7).
4. An wakunu panaeku ma na'ono hanana'an rodi hoikani noho makromon me lernulu aukerhe (8:1-11:1).
5. Ai nala nounaku ma na'ono noho honolla man wa'an lolo kerei raramne (11:2-16).
6. An wakunu panaeku ma na'ono ra'an romun leke na'ori honorok hi Makromod Yesus Nin makmaki (11:17-34).
7. An wakunu hi'ihehewi ri Roh Kudus nala woroin ma na'ono ri ma akin naili'il Yesus (pnk. 12-14).
8. An wakunu hi'ihehewi ri Kristen man maki mori wali'ur lere man mai (pnk. 15).
9. An loikaru nin panaeku hir puli kupan leke aku laa ri ma na'alehe haida-haida lolo noho Yudea (16:1-4).
10. Ai nala napanpanak man horu noro tape masi man horu (16:5-24).

*Paulus nala nin hiyene  
arore laa manin Korintus*

<sup>1-3</sup> Konohiyala i walin ma aile kota Korintus na'ahoruwed! Ya'u eni Paulus, la yo oro ik walin Sostenes aku horok eni ki mi ma namwali Makromod Lalap Nin kerei raramne. Ai napoluwedi mi mamwali Nina ri mememen man moumou dewdewe ono moro Makromod Yesus Kristus mamwali mahaku, noro wewerre ri lolo ewi-ewi ma na'uli nasa'a ik Makromod Yesus Kristus. Ai penia namwali ik na'ahoru Makromod.

Ainu'u molollo aile hi'i horok eni ono Makromod Lalap mehen kikan maya'u amwali hophopon ma nodi Yesus Kristus Lirna Wawa'an eni lernohi Ai honorok akin mehe.

Ya apanak Makromod Lalap, iknik Ame, noro Makromod Yesus Kristus rala rere'e haharu noro wawa'an rara'e ki mi.

*Makromod Lalap nala  
rere'e haharu maika lolo  
Yesus Kristus*

<sup>4</sup> I wal'u na'ahoruwed, ya apanak trimkasi Makromod Lalap mamani ono Ai naledi Nina rere'e haharu ki mi lolo Yesus Kristus me'e.

<sup>5</sup> Lolo minim morimori Ai naledi mi ha wo'ira na'akeme leke mim lernala woroin man wa'an la mauroin loikaru mouropo Makromod Lirna Wawan eni, ono mi moro Yesus Kristus mamwaliyedi mahaku me'e.

<sup>6</sup> Onne penia ri nauroin mouropo nahenia mi akim

namkene naili'il kokkoo Kris-tus Lirna Wawa'an man am loikaruwed ki mi me'en.

<sup>7</sup> Ende Makromod Yesus Kristus naledi rere'e ha-haruh penpenu kemkeme ki mi me'e de mim kokaledi woroin kukuku noknokor leke howok Nin honowok wawa'an lelere a'alam mi maham weilapan An wali mai noho wawan wali'ur.

<sup>8</sup> Onne kan mehe, maa Makromod Lalap mehe na'aruri mi akim hehen nanumene lere alam man horu, leke rakan lere Makromod Yesus Kristus wali mai wali'ur minim morimori na'alehe yaksala ida.

<sup>9</sup> Yon hamlinu nahenia Ai namkene hi'i Nina nou noro maika namwali, la Makromod Lalap napoluwedi mi leke moro Anan, ik Makromod Yesus Kristus, mamwali mahaku.

*Kerei raramne rira hon-orok aki ka namnehe*

<sup>10</sup> I wal'u na'ahoruwed! Yo odi ik Makromod Yesus Kristus Oin Naran apanak an'anhedi mi mamwali mahaku. Yono mi ida ma nase-si noro ida, de mi ida man reiha'ar ida, maa ya apanak mi na'ahoru na'amolia hon-orok mahaku aki mahaku.

<sup>11</sup> I wal'uhe, ya'u wakunu heheni ono Kloë nina nakar raram heruwali mai kono-hiyedi ya'u minim sesi me'e.

<sup>12</sup> Hi ra'aheni minim ri heruwali ra'aheni, "Am lernohi Paulus," heruwali ra'aheni, "Am lernohi Apolos," heruwali ra'aheni, "Am lernohi Petrus," la heruwali ra'aheni, "Am lernohi Kris-tus."

<sup>13</sup> Mi moro Kristus mamwali mahaku, de kan wa'an mahina'ar mamwali muku-muku! Inhoi man wairesnedi lolo au kekiyowok eni? Ya'u? Ka! Enla man ulutada mi lolo oire, kar wekel ya'u naran!

<sup>14</sup> Ya apanak trimkasi nammori ono ka'u ulutade ri nammori lolo oir. Ya'u ulutada Krispus noro Gayus mehe.

<sup>15</sup> Hawa'ande nano mi ri kaale ma na'aheni, "Paulus mehen ulutada maya'u, de ya'u lernohi ai."

<sup>16</sup> (Eih! Eni nanumene ya'u horokala ya'u ulutadedi Stepanus noro nin nakar raram haenhi. Ka'u ulutada ri namehin.)

<sup>17</sup> Kristus kan hopon ya'u laa ulutada ri, maa An hopon laa loikaru Lira Wawa'an eni lolo ewi-ewi. Enla lere ya'u loikaru Yesus Lirna Wawa'an eni, ka odi ri mormori nin woroin wakunu leke ri akin naili'il, maa ya'u wakunu mehe Lira ma na'ono Kristus Nin makmaki lolo au kekiyowok eni leke ri man derne ainu'u wanakunu akin naili'il Ai, ono hi rauroin Yesus Nin makimaki nodi molollo wake'e.

*Makromod Lalap kukul  
Nina molollo noro woroin lolo  
Yesus Kristus man maki lolo  
au kekiyowok eni*

<sup>18</sup> I wal'u na'ahoru, am loikaru Lira ma na'ono Yesus Nin makmaki lolo au kekiyowok. Lere ri man lolo kalla yakan derne Lir onne, hi ra'aheni, "Lira onne na'alehe panaeku ida." Maa, lere maika man Makromod

Lalap huri we'eredi nano dohohala nin molollo enihe derne Lir Wawa'an onne, ik ka'aheni, "Lira onneni penia Makromod Lalap Nin molollo."

<sup>19</sup> Lolo Horok Lape raram Makromod Lalap na'aheni,

"Ri ma na'aheni, 'Ainu'u woroin lewlewen,' na'amoli Ya a'amoluwedir rir woroin onne. Enla ri ma na'aheni, 'Ainu'u panaeku man kukulu lalap,' na'amoli Ya'u hi'i rira panaeku rahu eni kan min haida." \*

<sup>20</sup> Ende ri ma nin woroin narehi nalewen, noro meser ma nauroin wakuku agame nina holoor halauk, noro ri ma nauroin rawalha lira wawa'an enihe, Makromod Lalap hi'iyedi rir woroin na'akeme kan min haida wake'e, ono rir woroin onne mai nano noho wawan eni mehe.

<sup>21</sup> Kade ri mormori rau-roin wake'e, maa onne kan paku hi rauroin Makromod Lalap. Onne namlolo ono Makromod Lalap hi'iyedi kenekrohu nahenia An huri we'eredi ri ma akin naili'il Ai nano dohohala nin molollo lolo Lir Wawa'an man am loloi kakaru eni. Enima lere ri man lernohi rir woroin aimehi derne Lir onne, hi ra'aheni Lir onne na'alehe panaeku ida, de ka nala or'ori dardari ri mahaku.

<sup>22</sup> Ri Yahudi rapanak po'on tanada man ri kan dodo'onnala makun nanumene akinhe naili'il Lira onne. Enla ri Yunani enihe rapanak orworoin nala

\* **1:19** Yes. 29:14

wanakuku man lewlewen  
hi nanumene akinhe naili'il  
Lira onne.

<sup>23</sup> Enimaa ik wakunu  
Kristus Nin makmaki  
lolo au kekiyowok mehe.  
Wanakunu onne namwali  
au heliyowok lolo Yahudi  
enihe honorokne, la ma  
ka namwali Yahudi enihe  
ra'aheni Lir onne na'alehe  
panaeku ida.

<sup>24</sup> Kade nano hi ri nammori  
kar kokale, maa Makromod  
Lalap poluwedi ri Yahudi  
noro ri Yunani heruwali  
ramwali Nin ri mememen  
me'e. Hir dernedi ainim  
Lir ma na'ono Kristus eni la  
akin naili'iledi Ai me'e, de hi  
rauroin mouropo Makromod  
Lalap Nin molollo noro Nin  
woroin.

<sup>25</sup> Ri aile ma na'aheni Lira  
am loloi kakaru eni na'alehe  
panaeku ida, maa Makromod  
Lalap Nin panaeku eni  
namwali panaeku man  
wa'an narehi ri mormori  
rir panaeku na'akeme. Ri  
heruwali ra'aheni Makromod  
Lalap Nin hini'i lolo  
Yesus Nin makmaki onne  
na'alehe molollo ida, maa  
hini'i onne nin molollo  
narehi nalewen ri mormori  
nin molollo na'akeme.

<sup>26</sup> I wal'u na'ahoru,  
horokala minim morimori  
lere Makromod Lalap napolu  
mi mamwali Nin ri. Nano mi,  
ri ida woro'o mehe ramwali  
orworoin, ida woro'o mehe  
ramwali ma nodi molollo,  
ida woro'o mehe ramwali  
marna,

<sup>27</sup> maa Makromod Lalap  
nili ri mormori man noho  
wawan eni po'on rauroin  
raploedi leke hi'i wawwawa

orworoin enihe. Enla An nili  
ri man lolo yawa leke hi'i  
wawwawa ma nodi molollo  
enihe.

<sup>28</sup> Makromod Lalap raram  
nodi nili ri man lolo yawa,  
noro ri man noho wawan  
eni po'on mahalarne, la  
ra'alehe ha ma na'ono ida.  
An hi'i onne leke ri na'akeme  
rauroin mouropo nahenia ha  
na'akeme man ri lolo noho  
wawan eni ra'uli, kan min  
haida.

<sup>29</sup> Makromod Lalap hi'i  
heheni leke yono rin holi  
kukulu lalapa lolo Ai leken  
kalarna.

<sup>30</sup> Ai mehe du'ul kali ik koro  
Yesus Kristus. Yesus Kristus  
hi'i ika kauroin Makromod  
Lalap Nin woroin. Ai peni  
hi'i ik kamwali ri molololo  
Makromod Lalap kalarna, Ai  
na'amou na'adewe ika leke  
kamwali Nina ri mememen,  
la huri we'eredi ika nano  
ha wo'ira na'akeme man  
ailanna.

<sup>31</sup> Ende hi'i naise horhorok  
man aiyedi Horok Lap  
raram ma na'aheni, "Yono  
ma'uli masa'a minim hini'i  
wenewhe man wa'an, maa  
ma'uli masa'a Makromod  
Lalap Nin hini'i lolo minim  
morimori leke ri namehin  
ra'uli rasa'a Ai haenhi."\*

## 2

*Paulus ka nodi noho  
wawan nin woroin loikaru  
Yesus Lirna Wawa'an eni*

<sup>1</sup> I wal'u na'ahoru! Lere  
ya'u mai loikaruwedi Makromod  
Lalap Nina panaeku man ri ka nauroinala makun,  
ka odi wanakunu kukulu  
lalap la ainu'u wanakunu ka  
naise ri ma nauroin narehi,

\* 1:31 Yer. 9:24

<sup>2</sup> ono ya'u hi'iyedi  
kenekrohu me'e nahenia lere  
ya'u min ki enne makun ya'u  
wakunu ha ma na'ono Jesus  
Kristus noro idewe Nina  
makmaki lolo au kekiyowok  
mehe, ka'u wakunu panaeku  
namehin.

<sup>3</sup> Lere ya'u aile mi leken  
kalarna onne, ya'u ka aruri,  
la ya amka'uk rehi de i kem'u  
narururue.

<sup>4</sup> Lere ya'u loikaru Lir  
Wawa'an ki mi, ka odi  
wanakunu lirna man kukulu  
lalapa leke nori mim kokale,  
maa Roh Kudus mehen kukul  
Nin molollo penia hi'i mi  
mauroin panaeku onne ma  
namlolo.

<sup>5</sup> Ende ri mormori ka  
nodi rir woroin nori mi leke  
pu'ik heli Yesus Lirneni, maa  
Makromod Lalap mehe nodi  
Nin molollo hi'i mi akim  
naili'il Yesus.

### *Woroin ma nano wawan*

<sup>6</sup> Kade onne namlolo, maa  
ai modi woroin man wa'an  
loikaru Lirna Wawan eni  
leke ri ma akin namkene  
lernohi Kristus enihe eren  
rauroroin. Enimaa aimim  
woroin onne ka naisa noho  
wawan nina woroin, la ka  
naisa woroin man mai nano  
ri ma nodi molollo lolo noho  
wawan eni. Lere man mai hi  
na'akeme maki moluloinedi.

<sup>7</sup> Ai ka modi noho wawan  
noro ri man molu onne rir  
woroin, maa am konohi mi  
Makromod Lalap Nin woroin  
ma narehi eni. Woroin  
onne kukunohi ri ha wo'ira  
na'akeme man Makromod  
Lalap paekuwedi me'e. Lere  
Ai ka nakuku nawau noho  
makun An paekuwedi nala  
or'ori dardari man ma'aruru

maika, maa rakan lere  
eniyen'i mene An konohi ri  
mormori Nin woroin man  
nonolu suwsuwar onne.

<sup>8</sup> Nano ri ma nodi  
molollo lolo noho wawan  
na'akemeni, ri mahaku ka  
nauroin Makromod Lalap  
Nin woroin ma na'ono  
Jesus Kristus eni. Lo'o hi  
rauroinedi onne, hi kar  
wairesne ik Makromod man  
kulu narehi lapa narehi ha  
wo'ira na'akemeni.

<sup>9</sup> Enimaa naise horhorok  
aile Horok Lap ma na'aheni,  
“Makromod Lalap na'akenedi  
ha man ma'aruru  
wake'e nala ri ma  
naramyaka Ai me'e,  
ha man ri kan do'on  
derne makun, noro  
ha man ri ka nahi-  
norokale makun.”\*

<sup>10</sup> Nonolu eni ri mormori  
ka rauroin Nin panaeku  
onneni, maa lere eni Makromod  
Lalap nalharyedi Nin  
panaeku suwsuwar onne  
maika lolo Nin Roh me'e.  
Roh eni peni man koklolo  
na'inau ha wo'ira na'akeme  
la nauroin Makromod Lalap  
Nin panaeku man rorom  
wake'e haenhi.

<sup>11</sup> Mahinorok eniyeni!  
Ri mehe nauroin honorok  
akin aimehi, ka nauroin  
ri namehin honorok akin.  
Enla ri mahaku ka nauroin  
Makromod Lalap honorok  
akin, maa Makromod Lalap  
Nin Roh mehe nauroin  
Makromod Lalap honorok  
akin.

<sup>12</sup> Enla maika kak kokala  
honorok aki nano noho  
wawan eniyeni, maa ik  
kokaledi Roh man mai  
nano Makromod Lalap leke

\* <sup>2:9</sup> Yes. 64:4

kauroin ha wo'ira na'akeme  
man Makromod Lalap naledi  
maika me'e ono Ai namre'e  
namharu maika.

<sup>13</sup> Onne penia lere am  
loikaru Lir Wawa'an eni,  
ai ka modi ainima woroin  
aimehi, maa ai modi  
wanakunu man Makromod  
Nina Roh wakukuwedi  
mayai me'e. Ai ma'amou  
ma'aropo Nin wanakuku  
onne laa ri man kokaledi Roh  
Kudus me'e.

<sup>14</sup> Enimaa ri ma na'alehe  
Roh Kudus, kan kokala  
wanakuku nano Makro-  
mod Lalap Nin Roh, ono  
nahinorok wanakuku onne  
na'alehe panaeku ida. Ai  
ka nauroin wake'e ono kan  
huri Roh Kudus wakuku ai.  
Roh Kudus penia mehen  
konohi mouropo Makromod  
Lalap Nin panaeku wo'ira ri  
mormori.

<sup>15</sup> Ri man Roh Kudus  
na'aromo raramne, hi mehe  
rauroin ha wo'ira na'akeme,  
ewi ma namlolo noro ewi  
man sala, maa ri ma na'alehe  
Roh Kudus ka nauroin  
wake'e ri man Roh Kudus  
nodi mololleni nin panaeku  
ida.

<sup>16</sup> Wanakunu onne nam-  
lolo ono horhorok aile Horok  
Lap ma na'aheni,

"Inhoi ma nauroin Makro-  
mod Nina honorok  
aki de nauroin nala  
nounaku Ai?" \*

Enimaa maika man Roh  
Kudus nodi molollo enihe, ik  
kauroin Kristus Nin honorok  
panaeku.

### 3

*Yon hi'i ha man reiha'ar  
kerei raramne*

\* **2:16** Yes. 40:13

<sup>1</sup> I wal'u na'ahoru, lere  
yo or'oro mi makun, ka'u  
wakunu noro mi naise ya  
adedem wakunu noro ri man  
Roh Kudus nodi molollo.  
Ya'u wakunu noro mi naise  
ya adedem wakunu noro  
ri man lernohi noho eni  
nina panaeku wo'ira makun.  
Lere onne, eni nanumene  
mi akim naili'il Kristus  
de yo odi wanakuku man  
deudeul tantana leke pelek  
mi mauroin, naisa mama ma  
nodi wanakuku man tatane  
pelek nauroin.

<sup>2</sup> Kan wa'an ik kala  
banana'an man kerhe tatana  
man huhuhu makun na'an.  
Nonolu mi maise tatana  
onne, de yo odi wanakuku  
man mim pelek mauroin, ka  
odi wanakuku man wa'an  
ala ri ma akin namkene  
naili'il Yesus. Ya'u hi'i heheni  
ono lere onne mi akim  
ka namkene naili'il Yesus  
wawa'an makun. Enimaa  
lere eniyeni mi ka mamkene  
kokala wanakuku onne  
makun!

<sup>3</sup> Mi ka mahinuri nano  
noho wawan eni nin honoli  
wenewhe makun. Ya'u  
wakunu heheni ono mi ida  
ma akin apinha ida la mi ida  
ma nasesi noro ida. Onne  
penia ya auroin mouropo  
nahenia mi ka mahinuri  
nano noho eni nin honoli  
wenewhe makun, la mi  
maise ri ma ka nauroin  
Makromod makun!

<sup>4</sup> Onne namlolo ono lolo  
mi ri aile ma na'aheni, "Ya'u  
lernohi Paulus mehe," la  
ri aile ma na'aheni, "Ya'u  
lernohi Apolos mehe." Mor-  
rimori naise onne nodi  
kunukunohi nahenia mi ka

mahinuri noho eni nina honoli wenewhe makun.

<sup>5</sup> Yo oro Apolos eni, ai ka mamwali panaeku ma na'ono! Mayai eniyenihe peni mamwali Makromod Lalap Nin hophopon wah-wahan mehe, la am paku mi leke mi akim namkene naili'il Jesus Kristus. Ai modi ma'uvara honowok man Makromod nala mayai dohodoho.

<sup>6</sup> Ya'u eni man hap wini havonne, Apolos ma nodi oir wui, maa Makromod Lalap penia man hi'i wini hahap onne mori.

<sup>7</sup> Ri man hap noro man wui ka ramwali panaeku ma na'ono. Makromod Lalap penia namwali panaeku ma na'ono ono Ai nodi molollo hi'i wini onne mori.

<sup>8</sup> Ri man hap noro man wui onnenihe rir honowok nin panaeku namnenehe, maa hir kokala ihih ennen lernohi dohodoho rir honowok.

<sup>9</sup> Ai mamwali Makromod Lalap Nin man howok enihe. Enla mi mamwali Makromod Lalap Nin kirna noro Nin nakar haenhi.

<sup>10</sup> Makromod Lalap nala woroin ma na'ono maya'u penia kikan ya amwali ri dedesne ma nodi Jesus Lirna Wawa'an ki mi, de ya aisa man hi'i nakar nin waku na'a'ar. Enla ri namehin man mai wakuku mi naho'ok naisa ma nayapi nakar lolo waku na'a'ar onne wawan. Enimaa loi honorok wawa'an! Wa'an rehi ri man howok Makromod Lalap Nin honowok nadiyaka nin honowok wawa'an, naisa ma

nayapi nakar nadiyaka nin honowok wawa'an,

<sup>11</sup> ono Jesus Kristus mehe namwali waku na'a'ar man Makromod nala ki mi ma akin naili'il Ai. Yono mim nair waku na'a'ar namehin ono Jesus Kristus mehe namwali waku na'a'ar ma na'ono.

<sup>12</sup> Ri man mai nayapi nakar lolo waku na'a'ar onne nair nakar nin horn arn ma ka namnehe. Heruwali rodi maha, rodi pere, me waku man wella ai wawan rayapi, la heruwali rodi auwe, pi kawi, me norkawi,

<sup>13</sup> maa rakan lere Jesus Kristus wali mai rewro'o nine, ik po'on mouropo ma nayapi nakar nina honowok wa'an, ee ka, ono lere onne rodi aiye kene ri na'akeme dohodoho rira nakar.

<sup>14</sup> Lo'o aiye ka na'an nakar onne, ma nayapi kokala wanalha man wa'an nano nin mahmaha awenne,

<sup>15</sup> maa lo'o aiye na'anedi nakar onneni, ma nayapi onne kan lernala haida nano nin mahmaha awenne onne. Memen Makromod Lalap nala or'ori dardari ma kan horu ai ono ai akin naili'iledi Jesus me'e, maa ai naisa ri ma na'akeki ka nahala kemen nano aiye man lerlere raram.

<sup>16</sup> I walin mauroin nahenia mi mamwali Makromod Lalap Nina Romleu, ee ka!? Enla Makromod Lalap Nina Roh ai mi raramne, ee ka!?

<sup>17</sup> Inhoi ma nala wanakuku man sala, penia mi ma namwali Makromod Lalap Nin ri, ida ma nahina'ar noro ida!? Makromod Lalap nala hunukum man werek

ai, ono Makromod Lalap Nin Romleu Lape penia namwali onno man moumou dewdewe! Enla i wal'uhe mehe mamwali Nin Romleu onne.

<sup>18</sup> Yono ri mahaku mehen wukupoho kemen nahenia ai ma nauroin noho wawan nin ha wo'ira na'akeme, maa wa'an rehi ai namwali ma naploedi lolo ri mormori kalarna leke namwali ma nauroin kokkoo lolo Makromod Lalap leken kalarna.

<sup>19</sup> Lolo Makromod Lalap leken kalarna ri mormori rira woroin kan min haida. Onne naise horhorok ma aile Horok Lap ma na'aheni,

"Ri heruwali mehe ra'uli kemen ra'aheni hi penia ramwali 'ma nauroin rehi', maa Makromod Lalap nodi rir woroin onne rehiyedi hi." \*

<sup>20</sup> Enla horhorok aile haenhi ma na'aheni,

"Ri ma nauroin noho wawan nin ha wo'ira na'akeme enihe, Makromod nauroin nahenia rir woroin onne kan min haida."

<sup>21</sup> Ende ya apanak yono ri mahaku holi kukulu lalap na'aheni, "Ya'u lernohi ri ida ma narehi nalewen ri namehin!" Makromod Lalap penia nala hahaa wo'ira na'akeme mim manarnedi me'e.

<sup>22</sup> Maya'u, Apolos, noro Petrus eni, Makromod nala ki leke ilitolle mi. Ai nala or'ori dardari worworu ki mi, la An huri we'eredi mi nano hunukum makmaki me'e.

Ha wo'ira na'akeme ma aile noho eni wawan, la ha wo'ira ma namwali lere eniyeni noro idewe lere man mai, An kakaredi leke nala wawa'an rara'e ki mi. Ha wo'ira na'akeme mi manarna,  
<sup>23</sup> la mi mamwali Kristus Nin ri, la Kristus namwali Makromod Lalap Nine.

## 4

*Iknik man panulu ramwali Kristus Nin hophopon wahwahan, de yon ka'uli ida wa'an narehi namehin*

<sup>1</sup> Onne penia wa'an rehi mim po'on mauroin mayai eniyenihe mamwali Kristus Nin hophopon wahwahan man An niliyedi leke loikaru Makromod Lalap Lirna man nonolu ri ka nauroin makun eni.

<sup>2</sup> Ha ma na'ono rehi ri man lolo honopon namkene lernohi makromon nin honopon mamani.

<sup>3</sup> Ende lo'o mim koklolo ma'inau ainu'u honowok nair, ee modi ya'u laa hono'ok kanail onno leke manoin ainu'u sale, onne kan hi'i haida maya'u. Ka'u mehe koklolo a'inau ainu'u honowok nair eni menee!

<sup>4</sup> Ka'u eremnala ainu'u yaksalida, maa onne ka nodi kunukunohi nahenia ka'u sala. Makromod mehe nodi molollo ho'ok kail ya'u.

<sup>5</sup> Ende yon ik koklolo ka'inau ri namehin leke kauroin rir honowok wa'an, ee ka. Lapanala Makromod mai wali'ur mene nalhari panaeku wo'ira na'akeme ma nasinuwar lolo noho

\* 3:19 Ayb. 5:13 \* 3:20 Mzm. 94:11

momohon eni. Ai penia ma nalhari panaeku ma nasinuwari lolo ri mormori honorok akin. Lere onne ri na'akeme meririi lernala rir ul'uli sasa'a nano Makromod Lalap.

<sup>6</sup> I wal'uhe, lolo ainu'u wanakunu idedi eni yo oro Apolos mamwali wanakunu naho'ok ida leke mi mauroin wanakuku ma aile Horok Lapeni ma na'aheni, "Yon larlewen inhawa man horhorok lolo Horok Lapeni." Lo'o mim lernohi wanakuku onne mi kam horhawe man panulu ida narehi man panulu namehin.

<sup>7</sup> Lo'o mim pene'ek nahenia mi mamwali ri ma na'ono narehi minim ri heri ri walie!? Ka menee! Minim ha wo'ira na'akeme mim kokaledi nano Makromod Lalap me'e menee! Ende lo'o mim kokaledi ha wo'ira na'akeme nano Makromod Lalap, alhi'ihepe mim holi kukulu lalape!?

<sup>8</sup> Eih, mi lo'o mauroin minim ruri pe'el noro woroin nano wawan kukkuku no-knokor me'e harome? Ka menee! Mi mehem wukupoho mi nahenia mim lernaledi linikir kanaru nammori nano wawan me'e, maa ka! Lo'o mi modi molollo naise rai haromo, la mayai ma nodi Yesus Lirna Wawa'an eni, kae? Ya'u raram nodi hir kikanedi mi mamwali rai ma nodi molollo kokkoo leke kodi molollo wewerre.

<sup>9</sup> Enimaa ai ka maise mi wake'e. Menmolollo ya'u, Makromod Lalap hi'i mayai ma nodi Yesus Lirna Wawa'an enihe mamriri lolo onno man lolo yawa wake'e.

An hi'i mayai naisa ri man keledi leke hukumesne lolo heri kalarna, de ri mormori noro idewe hophopon a'am raram na'akeme po'onala mayai.

<sup>10</sup> Ri mormori noho wawan pene'ek ai maploedi ono ai maderre madaul Yesus Lirna Wawa'an eni, maa mim pene'ek mi mamwali ma nauroin rehi ono moro Kristus mamwali mahaku! Ri nammori pene'ek anim molollo kaale, maa mim pene'ek minim molollo lapa narehi! Rin horhawe mi, maa hir ilnohi ralnohi mayai!

<sup>11</sup> Rakan lere eniyeni, am lernala roulara mamani, am nair nainair ma napriki napraku, rin riuk rerhe mayai, la ai ka mamkene lolo nakar ida.

<sup>12</sup> Ai mampe'el howok ilitolle anim popono orerek. Ai mapanak Makromod namre'e namharu ri ma na'ihoru na'idaru mayai. Lere rin nukur la hi'i apinpinha mayai, ai kam walha rir hini'i onne, maa am kerhu mamani.

<sup>13</sup> Lere rin wakunu nano'onyaka mayai, ai modi aki wawa'an noro lir mama-mal walhe. Rakan lere eni hir hi'i wewhe naisa ai mamwali noho wawan nina munuk dewe, la rauroin nahenia ai mamwali noho wawan eni nin ha man Morse de wa'an rehi sopoledi me'e.

<sup>14</sup> Ka'u hi'i horok eniyeni leke hi'i wawwawa mi, maa yo odi nounaku eni dadiyala mi naise ya an'u mememen.

<sup>15</sup> Kade meser riwriwan rahrahu mai wakuku mi

panaeku ma na'ono Kristus, maa minim ame ida mehe. Ya'u penia amwali minim ri leleher dedesne ma nodi Yesus Lirna Wawa'an loikaru ki mi penia mi akim naili'il Kristus Yesus la moro Ai mamwali mahaku.

<sup>16</sup> Ende ya apanak mim teunohi ainu'u hini'i wenewhe.

<sup>17</sup> Onne penia ya'u hopon Timotius ki noro mi pakromala. Timotius onne, ya akin ka nahinurie la ai naisa ya an'u mememen ma namkene ilitolle Makromod Nin honowok mamani. An rakan ki enne, lo'o na'ori honorok mi ainu'u wanakuku man ya adedem wakuku lolo kerei laa kerei. Ainu'u wanakuku onne na'ono morimori man wa'an lolo Kristus Yesus.

<sup>18</sup> I wal'u na'ahoruwed! Lolo mi herne kalarne ri heruwali holi kukulu lalap ono hir pene'ek ka'u ki ka'ar mi me'e,

<sup>19</sup> maa lo'o ik Makromod hari kalla, ka nalo'olala ya'u ki ka'ar mi leke po'onala man holi kukulu lalap enihe rir hini'i wenewhe ke'e. Lere onne ya'u po'on auroin lo'o rir molollo ma namlolo aile, ee ka. Lo'o Roh Kudus nodi molollo hi, ee hi rodi nuran mehe wakunu.

<sup>20</sup> Lere Makromod Lalap nodi molollo ri, Ai nodi Nin molollo herredi ri onne nin morimori. Enla lo'o ik ka'heni, "Makromod Lalap namwali ainu'u Rai," maa iknik morimori kan wa'an, onne nin panaeku ik kapoho, la Makromod Lalap ka nodi molollo maika.

<sup>21</sup> Ende lere ya'u ki enne, lo'o mi raram nodi yo odi

lir apinpinha dadiyala mi ono mi kam herre minim morimori makun, ee lo'o mi raram nodi yo odi lir mamamal noro aki man wa'an ono mim herredi minim morimori me'e. Ewi man wa'an rehi? Mi mehem nili.

## 5

*Paulus hopon hi hukum ri man lerwa'u hailai noro inturnne*

<sup>1</sup> I wal'u miee! Rin konomiyedi ya'u me'e nahenia ri aile minim kerei raramne mahan holi diwar dawar la hi'i ha ma kan lolo ri raramne. Kokkoo! Ya'u dernedi ri ida aile mahan lerwa'u hailai noro nin inturnne. Ri ma ka nauroin Makromod Lalap me'ene kar hi'i panaeku man yak naisa onneni! Emene alhi'ihepe mim hurinohi minim ri hi'i hehenie?

<sup>2</sup> Mi wallum nin hini'i naise onne, maa mim wakunu kukulu lalap ma'aheni, "Ai akim naili'il wawa'an." Wa'an rehi mi akim woiredi la mawawa ono an hi'i diniwar danawar onne, la wa'an rehi hopon ai namharedi minim kerei raramne.

<sup>3</sup> I wal'u mie! Kade ya ako'uwedi mi, maa ainu'u honorok aki ai lolo onne. Ende ya aledi kenekrohu hukum ri man hi'i diniwar danawar onne naisa ya'u aile ki enne.

<sup>4</sup> Lere mim minwuku leke ma'uli masa'a Yesus, mahinorok ya'u aile ki enne haenhi. Enla modi molollo ik Makromod Yesus nanala

<sup>5</sup> ki mi hopon ai namharedi nano minim kerei raramne

la malle laa Hayakyak Makromon nin molollo leke an lernala hunukum lolo ihin kemen. Hi'i heheni leke an ren nin hini'i diniwar danawar onne, de lere Makromod wali mai wali'ur an lernala or'ori dardari ma kan horu eni.

<sup>6</sup> Kan wa'an mim wakunu kukulu lalap. Lolo mi akim mi lo'o ma'heni, "Dohohala eniyeni namwali panaeku tutusiyana mehe, de kan hi'i haida-haida," maa onne ka namlolo. Lo'o mim hamlinuwedi wanakunu lirna ma na'heni, "Ragi tarana mehe hi'i taponne nammori ha'a mouwedi."

<sup>7</sup> Lere alam ri Yahudi hi'i yapi Paska, hi radedem sopoledi ragi nano rir nakar, la hi resne pipdumana rodi herre rir dohohaleni. Wa'an rehi mim hi'i naise ri Yahudi man sopol ragi nano rir nakar, de hopon ri man hi'i dohohala onne namharedi nano minim kerei raramne, ono mi mamwali Makromod Lalap Nin ri man moumou dewdewe. I wal'uhe, mi mamwaliyedi Makromod Lalap Nin ri, ono Kristus ma namwali iknik Paska nin Pipdumaneni makiyedi leke huri we'eredi ika nano dohohala nin hunukum makmaki.

<sup>8</sup> Ende lolo iknik morimori eni, na'amoli ik hi'i lernohi ri Yahudi rir lere alam lalap onne. Lere onne hir sopoledi ragi, la ra'an roti ma na'alehe ragi. Onne nin panaeku yon ik hi'i dohohala noro ha man ailanna, maa wa'an rehi ik kodi aki man mou hi'i ha ma

namlolo mamani. Onne penia naisa ik ka'an roti ma na'alehe ragi.

<sup>9</sup> I walin mie, lolo ainu'u horok nonolu onne ya'u konohiyedi mi a'heni, "Yono holiwuku moro ri man holi yak leke yak."

<sup>10</sup> Ainu'u nounaku onne wekel ri ma aile minim kerei raramne mehe, ka'u wekel ri lolo noho wawan ma ka nauroin Makromod Lalap. Hi onne penia radedem holi yak leke yak, rakmanna ri namehin nin hahaa, hir wukupoho ri, la hoikani lernulu aukerhe. Lo'o ik kak holiwuku noro hi, ik kamharedi noho wawan eni me'e harome!

<sup>11</sup> Lere eniyeni ya'u hi'i horok leke mi mauroin yon minwuku moro ri ma na'heni hi akin naili'il, maa hir holi yak leke yak, rakmanna ri namehin nin hahaa, hoikani lernulu aukerhe, wakunu nano'onyaka ri namehin, romun arak manha, la ra'an ri nina mahmaha awenne. Yon ma'urani mi walin ma nin morimori naisa onne, la yon moro hi maikoro wuku ma'ak haenhi.

<sup>12-13</sup> Enimaa ri ma akin ka naili'il makun, ka odi molollo hukum hi, ono Makromod Lalap mehe nodi molollo hukum hi. Enimaa mi mehe modi molollo hukum ri ma aile minim kerei raramne man hi'i yaksala. Ende hi'i naisa horhorok aile Horok Lap ma na'heni, "Hopon ri man hi'i dohohala namharedi nano mi leken

\* 5:12-13 Ul. 13:5, 17:7, 19:19, 21:21, 22:21, 24, 24:7

kalarna,"\* de yon hurinohi ri onne minwuku noro mi lolo kerei raram.

## 6

*Yon modi mi wallum ma akin naili'il Yesus laa man ho'ok kail ma ka nauroin Makromod Lalap*

<sup>1</sup> I wal'u na'ahoru! Lo'o minim sesi na'esne moro mi wallum ma akin naili'il enihe aile, yon lam kalake laa man ho'ok kail ma ka nauroin Makromod Lalap! Alhi'ihepe ka mapanak mi wallum ma namwali Makromod Nina ri mememem rala kenekrohu minim panaeku onne?

<sup>2</sup> I wal'uhe, lo'o mim hamlinuwedi nahenia lere man mai Makromod nala molollo Nin ri leke ho'ok kail noho wawan eni na'akeme? Kokkoo! Ende lo'o ika ma akin naili'il enihe ho'ok kail ri na'akeme lere man mai, iknik molollo aile ho'ok kail panaekuwana ida woro'o lolo ik leken kalarne harome!

<sup>3</sup> Lo'o mim hamlinuwedi nahenia lere man mai ik ho'ok kail Makromod Nina hophopon a'am raram rira panaeku wo'ira! Ende yon ik kamka'uk ka'alolo panaeku wo'ire lolo iknik popono orereki.

<sup>4</sup> Ende lere minim sesi na'esne aile lolo minim popono orereki, alhi'ihepe mim hurinohi ri ma ka nauroin Makromod Lalap ho'ok kail mie?

<sup>5</sup> Ya'u wakunu heheni leke hi'i wawwawa mi. Yono hi'i de, lolo mi kerei raramne ri mahaku ka nauroin ho'ok kail mi wallum ma akin naili'il Yesus rira panaeku wo'ire!?

<sup>6</sup> Enimaa mi ida man kalaka ida lolo man ho'ok kail kalarna. Onne kan mehe, maa man ho'ok kail onne ka namwali ma akin naili'il Makromod Yesus!

<sup>7</sup> Lere mi modi mi wallum nin sale laa man ho'ok kail eni, onne nin panaeku mi mehe madiyauredi sala me'e, la minim sesi na'esne onne rehiyedi mi me'e. Wa'an rehi lere rin hi'i yaksala ki mi, ee na'an minim mahmaha awenne, mim kokala me'e wa'an la yon horhorok nin sala onne me'e!

<sup>8</sup> Mi kam hi'i onne, maa mi me'ene modi mi wallum laa man ho'ok kail de mo'on nin mahmaha awenne la hi'i yaksala ai, kade ai namwali mi wallum ma akin naili'il Yesus.

<sup>9</sup> Lo'o mi ka mauroin nahenia ri ma nin morimori ailanna ka ramwali Makromod Lalap Nin ri la kar minwuku noro Ai lolo a'am raram. Yono mehem wukupoho mi, ono ri man holi yak leke yak, man hoikani lernulu aukerhe, man lerwa'u hailai, man hi'i diniwar danawar naisa mo'oni ma namkuru wuku noro mo'oni, ee maeke noro maeke,

<sup>10</sup> ma nodi rurilai namna'a, ma nakmanna ri nin hahaa, ma nomun arak manha, man wakunu nano'onyaka ri, noro ma na'an ri namehin nin mahmaha awenne, hi na'akeme ka ramwali Makromod Lalap Nin ri, la kar minwuku noro Ai lolo a'am raram.

<sup>11</sup> Nonolu mi ri heruwali mori naisa onne haenhi, maa Makromod Lalap Nin Roh

na'amouwedi mi akim me'e, de mamwaliyedi Makromod Lalap Nin ri mememen man moumou dewdewe. An hi'iyedi mi mamlolo lolo Ai leken kalarna me'e, ono moro Makromod Yesus Kris-tus madinu'ul makinaliyedi me'e.

*Yon kodi ik kemen holi yak leke yak, maa kodi ik kemen ka'uli kasa'a Makromod Lalap*

<sup>12</sup> I wal'uhe, mi heruwali ma'aheni, "Makromod Lalap penia huriyedi ika nano iknik dohohala nin hunukum mee', de huri ika hi'i ha wo'ira na'akeme lernohi iknik raram nodi aimehi." Maa ya'u konohi mi nano ha na'akeme onne, heruwali kan paku ika. Memen, An hurinohi ya'u hi'i ha wo'ira na'akeme, maa yon hi'i de ha man ya'u hi'i onne nodi molollo maya'u.

<sup>13</sup> Enimaa minim ri aile ma na'aheni, "Makromod Lalap hi'i hanana'an nonomun leke laa konoin raram. An hi'i ik konoin suk hanana'an nonomun onne de ka'an komun ke'e." Hi ra'aheni onne ono rauroin nahenia lo'o ik kodi ik kemen holi yak leke yak, kan hi'i haida. Enimaa ya'u konohi mi, onne ka nam-lolo! Lere rin maki Makromod Lalap na'amoluloinedi ri konoin noro hanana'an de kar nair me'e.\* Makromod Lalap kan hi'i ik kemen leke holi yak leke yak, maa Ai raram nodi ik kodi ik kemen hi'i wewhe Nin honorok

aki mehe, ono Ai penia nodi molollo ik kemen.

<sup>14</sup> Makromod Lalap kan sopol ik kemen laa ewi-ewi, maa Ai nodi Nin molollo na'amori ik kemen nano makmaki naisa Ai nodi Nin molollo na'amori Makromod Yesus wali'ur nano Nin makmaki haenhi.

<sup>15</sup> I wal'uhe, lo'o mim hamlinuwedi mi kemmu namwali Kristus kemen hana'arne. Ende yon modi mi kemmu ma namwali Kristus kemen hana'arne mamkuru wuku noro maekyak. Onne namehiyala wake'e.

<sup>16</sup> Lo'o mi ka mauroin nahenia ri ma namkuru wuku noro maekyaka namwaliyedi ihin kemen mahaku noro maeke onne me'e, ono horhorok aile Horok Lap ma na'ahenia, "Lere mo'oni noro maeke ho, woro'ohe ramwali mahaku."

<sup>17</sup> Enimaa ri ma noro Makromod nadinu'ul nakanaliyedi me'e, ai noro Makromod Nin honorok aki mahaku.

<sup>18</sup> Ende mako'uwedi mi nano honoli yak leke yak, ono honoli onne penia ma nano'onyak ri nin morimori narehi dohohala namehin na'akeme.

<sup>19</sup> I wal'uhe, mi mauroinedi nahenia mi kemmu namwali Roh Kudus Nin Romleu me'e. Ai penia minle mi raram, la Makromod Lalap mehe nala Nin Roh onne ki mi. Mi kemmu eni, minim ka, maa Makromod Lalap Nine,

\* **6:13** Ma nauroin Horok Lapa Lirna La'an heruwali ra'aheni wanakunu lirna ma na'aheni, 'Lere rin maki...noro hanana'an me'e,' ka namwali Paulus nin wanakunu, maa namwali ri Korintus rir wanakunu. \* **6:16** NN. 2:24

20 ono Makromod Lalap weliyedi la pair mouwedi minim okon raka me'e. Ende kodi ik kemen ka'uli kasa'a Makromod Lalap.

## 7

*Paulus nala nounaku hohoo*

<sup>1</sup> I wal'uhe, ors eni ya'u walha minim na'ukankani ida woro'o man mim horokedi lolo minim horok. Mi ma'ukani na'ahenia, "Lo'o mo'oni kan ho, onne wa'an, ee ka?" Memen namlolo, onne wa'an,

<sup>2</sup> maa ri nammori lolo noho wawan eni holi yak leke yak, de lo'o wa'an rehi mo'oni ho noro nina maeke aimehi la maeke ho noro nina mo'oni aimehi.

<sup>3</sup> Mo'onleher mie, yon mamhene mamkuru wuku noro minim maekleher, la maekleher yon mamhene mamkuru wuku noro minim mo'onleher. Lo'o mim hi'i heheni, mim lernohiyedi hohoo nin holoor halauk ma namlolo.

<sup>4</sup> Maekleher kan mehe nodi molollo ihin kemen la mo'onleher kan mehe nodi molollo ihin kemen, maa mo'onleher noro maekleher, ida ma nodi molollo ida kemen.

<sup>5</sup> Mi man hoedi, yono ida ma nako'u ida lolo minim piki luni. Maa lo'o mim hi'i kenekrohu ida ma nako'uwala ida tarana leke hi'i lir napanak modi aki man mou, onne kan hi'i haida, horo nahenia yon nalo'ol rehi. Lere mim hi'i lir napanak onne horu, miro ida man pakromo wuku noro ida wali'ur leke yon Hayakyak

Makromon ken patal mi ono mi kam kerhu mi irhun raramne nin monmono kamanna.

<sup>6</sup> Ainu'u wanakunu eniyeni ka namwali konomdere, maa namwali nounaku mehe.

<sup>7</sup> Menmelollo ainu'u honorok aki, wa'an rehi ri na'akeme raisa maya'u de kar ho, maa Makromod Lalap naledi ri dohodoho rira molollo ma na'ono, de heruwali lernala molollo leke ho, heruwali lernala molollo leke yon ho me'e.

<sup>8</sup> I wal'uhe ma kan ho makun, noro maeke walwalum man hono makiyedi me'e, dernala ainu'u nounaku eni. Wa'an rehi mi maise maya'u de ka'u ho,

<sup>9</sup> maa lo'o kam kerhu minim monmono kamanna, wa'an rehi mim ho, kalo'o minim monmono kamanna eren na'a'ali.

<sup>10</sup> I wal'u man hoedi ma akin naili'iledi Yesus enihe, dernala ainu'u konomdere eni, (ka namwali ainu'u mehe, maa Makromod Yesus Nine): Yon maekleher reiha'ar noro hono.

<sup>11</sup> Enimaa lo'o maekleher ida namhenedi hono, wa'an rehi yono ho wali'ur. Lo'o ai nahinorok de ho wali'ur, wa'an rehi wali laa noro mo'onleher dedesne rahuwa'an leke ho wali'ur. Enla mo'oni yono reiha'ar noro hono haenhi.

<sup>12</sup> I wal'uhe namehin dernala ainu'u nounaku eniyeni. (Nounaku eni ka namwali Makromod Yesus Nina nounaku, maa ainu'u mehe.) Ya'u nounaku mi:

Lo'o mo'oni ma akin naili'il Kristus aile man hoedi noro maeke ma akin ka naili'il makun, la maeke onne ne'e nore moriwuku mamani, yono reiha'ar noro ai.

<sup>13</sup> Enla lo'o maeke ma akin naili'il Kristus aile man hoedi noro mo'oni ma akin ka naili'il makun, la mo'oni onne ne'e nore moriwuku mamani, yono maeke onne reiha'ar noro ai.

<sup>14</sup> Ya'u hopon heheni ono maekleher ma akin naili'il onne, nin hini'i penia nakoko Makromod Lalap namre'e namharu rir hohoo. Namnenehe noro mo'onleher ma akin naili'iledi me'e haenhi. Lo'o ai kan reiha'ar noro nin maeke, nin hini'i onne nakoko Makromod Lalap namre'e namharu rir hohoo haenhi. Lo'o hi ramhene ho me'e, hi ananhe raisa ri ma akin ka naili'il Makromod ananhe, de ka ramkene lolo Makromod Lalap Nin rere'e haharu.

<sup>15</sup> Enimaa lo'o mi houm ma akin ka naili'il Kristus nala kenekrohu namhene ho noro mi ma akin naili'iledi me'e, huriyedi ai nala'a, ono hohoo nin holoor halauk ida kan kawale lolo panaeku ma naise onne. Makromod Lalap penia raram nodi mi ida man holi moiwi mahuwele noro ida mamani.

<sup>16</sup> Mim huri nala'a ono mi ka mauroin mi houm lo'o akin naili'il Makromod de lernala or'ori dardari ma kan horu, ee ka.

*Lere Makromod Lalap napolu ika kamwali Nin ri, yon kahehe herre iknik onno lolo iknik morimori*

<sup>17</sup> I wal'u na'ahoru, Makromod nala maika dodoho kalla ma ka namnenehe, maika heruwali ho, heruwali kar ho, heruwali ramwali hophopon wahwahan, heruwali ramwali rai, heruwali ramwali Yahudi, la heruwali kaa. Ende lere Makromod Lalap napolu ik kamwali Nin ri, yon mahehe herre minim onno lolo minim morimori onne, maa mamkene lernohi Ai lolo minim morimori mamani. Ya adedem ala nounaku eni lolo kerei na'akeme laa ewi-ewi.

<sup>18</sup> Ya ala wanakunu naho'ok ida heheni: Lo'o ri aile man sunatedi me'e lere Makromod napolu ai namwali Nin ri mememen, yon ri onne nahehe herre nin sunat onne. Enla lo'o Makromod Lalap napoluwedi ri namehin ma kan sunat makun, yon ri onne laa napanak sunat me'e,

<sup>19</sup> ono lo'o ik lernohi sunat, ee ka, onne kan min haida lolo Makromod Lalap kalarna. Maa panaeku ma na'ono wake'e, ik derne kakani Makromod Lalap Nina wanakuku wanayo'o mehe.

<sup>20</sup> Ende lere mim lernala polpolu nano Makromod Lalap, yon mahehe herre minim onno lolo minim morimori me'e.

<sup>21</sup> Ya ala wanakunu namehin heheni: Lo'o mi mamwali hophopon wahwahan, la Makromod Lalap napolu mi de mi akim naili'il Jesus, yon mi akim apinha, maa mamkene mamwali hophopon wahwahan mamani.

Enimaa lo'o mi makromon huriyedi mi, yon mamhene kokale.

<sup>22</sup> Lo'o mi mamwali hophopon wahwahan onne, ee ka, onne namnenehe lolo Makromod Lalap kalarna, ono Makromod huriyedi hophopon wahwahan man ai napoluwedi namwali Nin ri nano dohohala nin molollo me'e. Enla ri man Makromod napoluwedi namwali Nin ri ma ka namwali hophopon wahwahan, ramwaliyedi Makromod Yesus Kristus Nin hophopon wahwahan man ilitolle Nin honowok me'e.

<sup>23</sup> Makromod weliyedi mi me'e, la pairedi minim okon rake me'e, de yon hurinohi ri mormori nodi molollo minim morimori, maa derne makani Makromod mehe.

<sup>24</sup> Ende I wal'u na'ahoru, naisa ya aheniyedi me'e, lere Makromod polu ika kamwali Nin ri, yono pelek kahehe herre iknik morimori lere onne. Ik koro Makromod Lalap kamwaliyedi mahaku me'e, de An paku maika.

### *Nounaku ralle ri ma kan ho makun*

<sup>25</sup> Ors eni ya ala nounaku ma na'ono ri ma kan ho makun. Lolo panaeaku eni, kade ya'u ka'u lernala konomdere ida nano Makromod Yesus, maa ya'u konohi mi ainu'u honorok aki mehe. Wa'an rehi mim derne makaniyala ainu'u nounaku eni ono Makromod kukuledi Nin aki man wa'an maya'u, de hi'iyedi ya amwali Nin ri ma akin nadudu me'e.

<sup>26</sup> Ende ainu'u honorok aki heheni: Lere eniyeni ik

ma akin naili'il Yesus enihe lernala wewerek pananaka nammori, de wa'an rehi ri ma kan ho makun, yon ho.

<sup>27</sup> I mo'onwal'uhe, lo'o minim maekleher aiyedi me'e, yono manoin kalla reiha'ar. Enla lo'o mi ma'alehe maekleher, yono manoin hohoo me'e.

<sup>28</sup> Enimaa lo'o mim ho, onne ka namwali dohohale. Namnenehe noro maekrara. Lo'o an ho, ai kan hi'i dohohala, maa ri man ho na'akeme, hir lernala apinpinha nammori lolo noho wawan eni. Enla i raram nodi yon apinpinha onne namwali ki mi.

<sup>29</sup> I wal'u na'ahoru, ainu'u honorok aki heheni: I wal'uhe yon hamlinu iknik lere alam howok Makromod Nin honowok na'akeki horu. Onne penia ya a'aheni nano lere eniyeni, mo'oni man hoedi yono nahinorok mehe nin popono orereki.

<sup>30</sup> Ri ma nahere, yono nahinorok mehe ai akin man woir onne, la ri ma nalau, yono nahinorok mehe akin ma nahuwa'an onne. Ri ma na'iwali hahaa, yon nahinorok nin hahaa onne mehe.

<sup>31</sup> Ri ma nanoin nin popono orereki lolo noho wawan eni, yon nahinorok nina popono orereki onne mehe, ono ka nalo'ol me'e noho eni noro inhawe man ik dodo'on na'akeme, moluloinedi me'e.

<sup>32</sup> Ya'u raram nodi yono mim ma'irhu ha wo'ira lolo minim popono orereki. Ri ma kan ho kan ma'irhu nin popono orereki naise ri man hoedi me'e, maa ai

nahnorok Makromod Nina panaeku wo'ira mehe leke nahuwa'an Aikin.

<sup>33</sup> Enimaa ri ma ninq maeke-leher aiyedi me'e, ai onne nadiyaka la horhorokala nina popono orerekki ono ai raram nodi nahuwa'an edi hono akin,

<sup>34</sup> penia honorok akin nahina'ar lolo kalla woro'o. Onne namnenehe noro maeke man ho noro ma kan ho. Maeke man hono makiyedi me'e noro maeke man memehe makun, ai onne honorok akin ka nahinuri Makromod de nodi irhun raramne ilitolle Makromod Nin honowok mamani. Enimaa maeke man hoedi me'e, honorok akin ka nahinuri noho eni nina panaeku wo'ire, ono honorokne na'ini'ik mamani hono leke hi'i akin nahuwa'an.

<sup>35</sup> Ya'u aku horok eni ki mi leke paku mi hi'i kenekrohu man wa'an. Ka'u hi'i horok eni leke kawala mi de kam ho, maa ya ala nounaku eni leke na'amoli minim hini'i wenewhe wa'an la namlolo mamani, la haida kan hi'i mi honorok akin nahinuri Makromod.

<sup>36</sup> Lo'o mo'oni noro maeke aile ida ma naledi honorok panaeku ida me'e leke woro'ohe ho, la ler ida mo'oni onne paeku na'henia, "Eih, wa'an rehi yo oro maekeni ho ono ainin anna eren nammomori me'e." Wa'an rehi woro'ohe ho,\* lernohi mo'oni raram nodi. Onne ka

namwali dohohala.

<sup>37</sup> Enimaa lo'o mo'oni mehe nala kenekrohu yon ho noro maeke onne, an hi'i ha man wa'an horo nahenia ri namehin ka nawa'u ai yon ho, maa ai mehe nala kenekrohu lernohi nin honorok aki aimehi.

<sup>38</sup> Ende, man ho hi'i ha man wa'an, maa ma kan ho hi'i ha man wa'an narehi man ho onne.<sup>†</sup>

<sup>39</sup> Lernohi hohoo nin holoor halauk ma namlolo, maeke man hoedi me'e yon nahinuri nano hono hehen nanumene hono nin lere horu. Enimaa lo'o hono makiyedi me'e, maeke onne nahinuriyedi de ho wali'ur lernohi nin raram nodi, horo nahenia an ho noro ri ma akin naili'il Yesus.

<sup>40</sup> Enimaa menmolollo ya'u, lo'o ai kan ho me'e, ai akin nahuwa'an rehi. Onneni ainu'u honorok aki mehe, maa ya auroin Makromod Lalap Nin Roh nodi molollo ya'u haenhi.

## 8

*Hanana'an rodi hoikaniyedi lernulu aukerhe me'e, ik ka'an, luli, ee ka?*

<sup>1</sup> I wal'u na'ahoru, ors eni ainu'u panaeku eni na'ono hanana'an rodi hoikaniyedi lernulu aukerhe me'e. Memen namlolo, 'Ik ma akin naili'il Yesus, iknik woroin aile de kauroin Makromod Lalap ida mehe, de ik kauroin nahenia lernulu aukerhe ma nodi molollo kaale,' maa

\* **7:36** Wanakunu 'ler ida mo'oni onne paeku na'henia, "Eih, wa'an rehi yo oro maekeni ho ono ainin anna eren nammomori me'e." Panaeku namehin: "Mo'oni onne lo'o kan kerhu nin monmono kamanna me'e de wa'an rehi woro'ohe ho."

† **7:38** Ri heruwali rahinorok 'mo'oni' ma aile lisir ida woro'o eni wekel maeke aman man raram nodi nala anan maeke rin ho.

ya'u konohi mi woroin naisa onne hi'i ika heruwali holi kukulu lalapa. Wa'an rehi ik karamyaka iknik ri heri ri wali, la ka'alapa hi akinhe leke eren ramkene naili'il Makromod.

<sup>2</sup> Ha ma namlolo, ri man pene'ek ai nauroin Makromod Nina kalla wawa'an me'e, lo'o ka nauroin wawa'an makun.

<sup>3</sup> Enimaa ri ma naramyaka Makromod Lalap kokkoo, ai onne Makromod Lalap nau-roin mouwedi honorok akin me'e.

<sup>4</sup> I wal'u na'ahoru, ors eni ya'u walha minim na'ukankani eniyeni, "Ik ka'an hanana'an man ri nodi hoikaniyedi lernulu aukerhe me'e luli, ee ka?" Ik ma akin naili'il enihe kauroin nahenia lolo noho wawan eni lernulu aukerhe ka namwali ha ma namlolo la ra'alehe molollo ida wake'e. Enla ik kauroin Makromod Lalap ida mehe, makromon namehin ka namlolo.

<sup>5</sup> Memen nadedem ri mormori hoikani noho makromon noro hayakyaka nammori ma aile a'am noro noho wawan eni,

<sup>6</sup> maa maika ma akin naili'il enihe, ik kauroin Makromod Lalap ida mehe, la Ai namwali iknik Ame. Ai penia ma nakuku nawau ha wo'ira na'akeme de ik ilitolle Ai mehe. Ik Makromod mahaku mehe, onne Yesus Kristus. Lolo Ai mehe ha wo'ira na'akeme aile, la nano Nina hini'i wenewhe ik lernala or'ori dardari.

<sup>7</sup> Kade onne namlolo, maa nano ri ma akin naili'il

na'akeme, heruwali ka rau-roin nahenia lernulu aukerhe onnenihe ka namlolo la ra'alehe molollo ida. Nonolu, lere ri onne akin ka naili'il Makromod Lalap makun, hi penia man hoikani lernulu aukerhe haenhi. Enpenia rakan lere eni lo'o hir do'on hanana'an rodi hoikaniyedi lernulu aukerhe, hi ra'aheni lolo akin na'ahenia, "Onneni namwaliyedi honoi kanani rala laa lernulu aukerhe me'e!" Ende lo'o hi ra'an hanana'an onne hir pene'ek hir hi'iyedi dohohala me'e ono hi honorok akin ka naruri naili'il Makromod makun.

<sup>8</sup> Enimaa hanana'an onne ka nodi ika laa kaurani Makromod Lalap, la ka na'ako'u ika nano Ai haenhi. Enla lo'o ik ka'an, ee ka, kak lernala haida-haida man wa'an, ee man yak haenhi.

<sup>9</sup> Maa madiyaka mi memen! Yon mim hi'i de nakoko ri man honorok akin ka naruri onne nadiyaur dohohale ono an po'on de lernohi minim hini'i wenewhe. Memen Makromod hurino hi mi mo'on hanana'an onneni, maa ri namehin pene'ek onne namwali dohohale.

<sup>10</sup> Mi mauroinedi me'e nahenia lernulu aukerhe onne ramwali ha ma ka namlolo la ra'alehe molollo ida, maa mi wallum man honorok akin ka naruri naili'il eni ka nauroin onne makun. Ende lo'o an do'on mi lolo rom ya'ak mahan mo'on hanana'an man ri nodi hoikaniyedi lernulu aukerhe me'e, ai lo'o lernohi na'an haenhi, kade lolo akin nauroin onne namwali

dohohala ai.

<sup>11</sup> Enpenia iknik woroin ma nahenia lernulu aukerhe na'alehe molollo ida onne nakoko ik walin man honorok akin ka naruri naili'il eni lolo kalla yakan, kade Kristus maki leke na'ohu nahaledi ri onne nano nin dohohala.

<sup>12</sup> I wal'uhe, lo'o ik hi'i heheni iknik hini'i wenewhe saledi ono ik kano'onyakedi ik lodon walin honorok akin ma ka nauroin ha ma nam-lolo wawa'an makun. Onne kan mehe, maa ik hi'i yedi dohohale lolo Kristus kalarna haenhi.

<sup>13</sup> Ende lo'o ainu'u banana'an onne nakoko de i wal'u nadiyaur dohohale, yon yo o'on mahin me'e. Yon ainu'u hini'i de nakoko i wal'u nadiyaur dohohala.

## 9

*Ma nodi Jesus Lirna Wawa'an eni rira molollo*

<sup>1</sup> Ya'u eni ri ma nahin-uriyedi nano ha wo'ira na'akeme me'e! Ya'u eni amwali hophopon ma nodi Jesus Lirna Wawa'an! Ya'u penia man mehe do'onedi ik Makromod Jesus Kristus! Ai mehen kikan ya amwali ma nodi Lirna. I wal'uhe, mi penia mamwali ainu'u honowok ihin ennen lolo Makromod Nin honowok eni.

<sup>2</sup> Kade ri namehin ka re'enozi ya amwali hophopon ma nodi Jesus Lirna Wawa'an, maa yon hi'i de mi ma'okuledi ya'u haenhi! Mi akim naili'iliedi Jesus me'e ono ya'u loikaru Lira Wawa'an ki mi, de

mi mamwali tanada man mouropo nahenia Makromod kikanedi ya amwali ma nodi Jesus Lirna Wawa'an eni.

<sup>3</sup> Ende ya'u walha ri ma nala sala maya'u heheni:

<sup>4</sup> Lo'o mim pene'ek mayai ma namwali ri ma nodi Jesus Lirna Wawa'an enihe ma'alehe molollo kokala ainim honowok nin mahmaha awenne penia ka mala hanana'an nonomun mayai?!

<sup>5</sup> Lo'o ainim maekleher aile, ai modi molollo more lalaa mamai howok Jesus Nin honowok la kokala wanalhanne, ee ka!? Makromod Jesus mo'oniwalla mememen, roro Petrus,\* noro hophopon ma nodi Jesus Lirna Wawa'an namehin enihe me'ene hi'i heheni!

<sup>6</sup> Ee, lo'o mi mahinorok nahenia wa'an rehi yo oro Barnabas mehe howok manoin anima nana'an nonomun akilere nine?!

<sup>7</sup> Loi honorok wawa'an! Ma nasala ke'urauk kan mehe nanoin nina nana'an nonomun lolo are raram! Ri man hapedi nina kirna, nin molollo aile na'an nina kirne ihin ennen. Ri kaale man huri wa'an ha mormori, maa kan lernala haida man wa'an nano nin honowok onne!

<sup>8</sup> Ai ka modi ri mormori nin honorok aki konohi mi ha eniyeni, maa ainim wanakuku eni namnenehe noro Makromod Lalap Nin keneri hono'ok haenhi.

<sup>9</sup> Lolo Musa nina horok, horhorok aile ma na'ahenia, "Arpau mahan hamar gandum leke nam'ihi,

\* 9:5 Naran Petrus eni lolo wanakunu Yunani wekel Kefas.

yono wuku nuranne, maa huriyedi nanoin ya'ane." I wal'u na'ahoru, alhi'ihepe Makromod Lalap na'aheni heheni? Lo'o Ainin panaeaku tolle arpau onne mehe, ka? \*

<sup>10</sup> Ee, lo'o wanakunu onne na'ono maika, ri mormori eni? Namlolo! Wanakunu onne na'ono maika. Ri man howok kirna, noro idewe ri ma na'amou gandum, hi ramkene howok ono hi rauroin hir kokala ihin ennen nano rira mahmaha awenne.

<sup>11</sup> Ri man hap kirne lernala ihin ennen nano nin honowok onne. Emene lo'o maika ho'o?! Alhi'ihepe mi mahinorok kan wa'an am lernala anim hewhewek nainair nano anima honowok loikaru Makromod Lirna ki mi?!

<sup>12</sup> Lo'o mi mahinorok ri namehin man loikaru Makromod Lirna Wawa'an ki mi rira molollo aile kokala mahmaha awenne nano mi. Anim molollo narehi hi ono mayai penia man dedesne loikaru Lira Wawa'an ki mi!

Kade Makromod nala molollo mayai leke lernala anim mahmaha awenne nano mi, maa ai ka makerne mi male mayai. Am kerhu ha wo'ira man apinha leke yon namwali ew'ewek kawkawa ki mi de kam kokala Kristus Lirna Wawa'an eni.

<sup>13</sup> I wal'uhe lo'o mau-roiroin nahenia ri man howok lolo Romleu Lapa kokala rira banana'an nano Romleu onne harome. Enla imam man harna ri mormori rir honoi kanani lolo honoi kanani onno, lernala

heruwali leke ra'an.

<sup>14</sup> Namnenehe onne haenhi, Makromod hoponedi nahenia inhoi loikaru Lirna Wawa'an eni, an kokala banana'an nano ri man kokala Lira Wawa'an onnenihe.

<sup>15</sup> Kade ainu'u molollo aile apanak haida nano mi, maa ka apanak mim walhe ainu'u mahmaha awenne. Ende ka'u aku horok eni ki leke mim puli hahaa mala maya'u. Ya akin nahuwa'anedi ono ya'u loikaru Lir Wawa'an onne na'alehe wanalhan ida. Onne penia namwali ainu'u ya'ar ma na'alapa ya akin. Lo'o ya'u loikaru Lira Wawa'an leke kokala minim wanalhanne mehe, wa'an rehi ya'u maki.

<sup>16</sup> Lere ya'u loikaru Lir Wawa'an eni, ka a'uli ainu'u hini'i onne ono Makromod Lalap penia hopon ya'u hi'ie. Lo'o ka'u loikaru Lira onneni, ya'u lernala Makromod Lalap Nina hunukum.

<sup>17</sup> Lo'o ya'u loikaru Lir Wawa'an onne lernohi ainu'u raram nodi aimehi, wa'an rehi ya'u lernala naiwe'el nano ainu'u mahmaha awenne onneni, maa ainu'u raram nodi ka nakoko ya'u loikaru Lir onne. Makromod Lalap hopon ya'u loikaru Lir Wawa'an eni, de ne'e namhene yo odi a'uwna honowok onne.

<sup>18</sup> Ende ainu'u naiwe'el inhawé? Ainu'u naiwe'el me'eni: Lere ya'u loikaru Lira Wawa'an ri, ka apanak ri nala naiwe'el maya'u, kade ainu'u molollo aile hi'i on-

neni. Onne penia na'alapedi ya akin la namwali ainu'u naiwe'el haenhi.

<sup>19</sup> Kade ya amwali ri ma nahinuriyedi me'e, la ka'u hurinohi ri mahaku nodi molollo ya'u, maa ya'u raram nodi amwali ri na'akeme rir hophopon wahwahan. Ya'u mori heheni leke hi'i ri nammori akin namrana ramwali Yesus Kristus Nina ri.

<sup>20</sup> Lere ya'u minwuku noro ri Yahudi, ya'u hi'i wewhe naise hi. Ya'u hi'i heheni leke hi akin namrana ramwali Yesus Kristus Nina ri. Lere ya'u minwuku noro ri ma nasala kerkerhe Musa nina keneri hono'ok, ya'u hi'i wewhe naise hi haenhi. Kade keneri hono'ok onne ka nodi molollo maya'u, maa ya'u hi'i wewhe naise hi leke hi akin namrana lernohi Yesus Kristus.

<sup>21</sup> Lere ya'u minwuku noro ri ma ka namwali Yahudi enihe, ya'u holi wewhe naise ri ma kan lernohi Yahudi rir holoor halauk, leke hi akin namrana lernohi Kris-tus man Makromod Lalap kikanedi namwali Rai. Ka a'ahenia ka'u derne akani Makromod Lalap Nin keneri hono'ok onne, ono ya'u derne akani Kristus Nin honorok aki mamani, de derne akani keneri hono'ok onne haenhi.

<sup>22</sup> Lere ya'u minwuku noro ri ma honorok akin ka naruri, ka'u hi'i ha man hi rahinorok sala, leke paku hi akin eren namkene naili'il Kristus. Yo oro inhoi-inhoi pakromo wuku, ya'u herre ainu'u morimori naisa hi, leke ainu'u hini'i wenewhe onne paku ri na'akeme

lernala or'ori dardari ma kan horu, kade heruwali mehe kokale.

<sup>23</sup> Ya'u hi'i heheni leke hir derne de akin naili'il Makromod Lirna Wawa'an onneni, la yo oro hi lernala rere'e haru haenhi.

*Hi'i wewhe ha ma namlolo  
mamani leke lere man mai lernala  
minim mahmaha kolkoli  
ihin ennen*

<sup>24</sup> I wal'u na'ahoru, mi mauroin nahenia nano ri na'akeme ma na'ohi lolo larlari ida, ri ida mehe lernala mahmaha kolkoli ihin ennen. Mahehe lernohi Makromod Nin kalle mamani leke lernala minim mahmaha kolkoli ihin ennen naise man lari onne.

<sup>25</sup> Ri ma na'akenkene kemen leke naruri lolo na'aroromo ida, ai na'aluli kemen nano ha wo'ira ma namwali ew'ewek kawkawa ono ai raram nodi lernala na'aroromo onne ihin ennen, kade pelek yak. An hi'i onne leke lernala ha man pelek yak, maa maika kerhu lolo ha wo'ira na'akeme ono ik lapan lere Makromod Lalap nala maika iknik mahmaha kolkoli ihin ennen ma kan yak laa ewi-ewi.

<sup>26</sup> Ende ya'u lari naisa ma na'ohi lari. Ka'u po'on waliwali, maa ya'u lari amlololo laa larlari honon. Ik po'on ri woro'o maha rahudi, hi kar mele huhudi me'e, maa rahehe leke rehiyedi rira na'aromwali eni. Naisa onne, ya ahehe odi molollo i kem'u la hi'i wewhe ha ma namlolo mamani leke lernala mahmaha kolkoli ihin ennen lere man mai eni.

<sup>27</sup> Ya akenkene i kem'u naisa ri man lernohi na'aroromo ida. Enla yo odi molollo yi irhun raramne nin monmono kamanna mamani, leke rakan lere ya'u loikaru Lir Wawa'an eni horu, ya'u kokala ainu'u mahmaha kolkoli ihin ennen.

## 10

*Ra'ori honorok leke yono hoikani lernulu aukerhe*

<sup>1</sup> I wal'u na'ahoru! Horhorok inhawe ma namwali lolo ik upud a'ad lere hir lernohi Musa nonolu eni. Hi rala'a lolo noho ha'aha'a kakan la hir deul heleken ma naran Kahi Memere lolo kalla ma naporo'uk.\*

<sup>2</sup> Hirira lalaa onne naisa unulu tanada lolo oir ma nodi kunukunohi nahenia hi ramwali man lernohi Musa.

<sup>3-4</sup> Hi na'akeme ra'an romun wewerre la rir hanana'an nonomun onne namnenehe, ono Makromod Lalap mehe nala hanana'an nonomun onne hi na'akeme ra'an romun. Hi romun oir man wau namhara nano waku lapida. Waku lapa onne naulinu nawali Kristus mehe ono Ai penia ma norle'ule'u norwaliwali hi.

<sup>5</sup> Kade hir lernala rere'e haharu onne nano Makromod Lalap, maa ri nammori hi'i wewhe hini'i ma ka nahuwa'an Makromod Lalap akin penia Ai nesnedi ri nammori de ihin kemen aile lolo ewi-ewi lolo noho mamun ma naporo'uk onne.

<sup>6</sup> I wal'uhe, ha wo'ira na'akeme onne namwali

iknik ope leke na'ori honorok ika yono ik raram nodi hi'i ha man ailanna naise hi.

<sup>7</sup> Nonolu eni hi heruwali hoikani lernulu aukerhe. Yom hi'i naise hi. Ik kauroin hir hi'i onne ono horhorok aile Horok Lap ma na'ahenia, "Hair onne hi'i yapi de ra'an romun la pe'uk waur leke hoikani rira lernulu aukerhe." \*

<sup>8</sup> Nonolu hi heruwali lerwa'u hailai penia lerida me'ede, ri riwan werro'o wokelu maki horu. Yom lerwa'u hailai naise hi.

<sup>9</sup> Hi heruwali kene ik Makromod penia haimoke ni'iyesnedi hi. Yom ken ik Makromod naisa hi.

<sup>10</sup> Nonolu hi heruwali hehel warna enu mamani ono hi kar suk Makromod Lalap Nin hini'i wenewhe. Yon ik hi'i wewhe naisa onne. Lere onne An hopon Nin hophopon a'am raram ma nodi molollo nesne ri, laa nala mouwedi hi aran.

<sup>11</sup> Panaeku eniyeni na'akeme namwali leke kukunohi maika yono ik lernohi rir hini'i onnneni. Enla panaeku onne na'akeme horokedi aile Horok Lap me'e, leke na'ori honorok maika man mori ku lili'ur eniyeni ma nauranrani noho wawan nin man horu me'e.

<sup>12</sup> Ende mi ma nauroin nahenia mi akim namkene naili'il, madiyaka mi memen, leke yon mi madiyaur dohohala.

<sup>13</sup> Mim lernala kenene panatal ma nakoko mi hi'i dohohala, maa kenen panatal onne ri mormori

\* 10:1 Kel. 14:21 \* 10:7 Kel. 32:6

na'akeme lernale haenhi. Enimaa Makromod Lalap namkene paku mi mamani, la Ai kan hurinohi minima kenene panatal onne ken patal mi narehi nalewen minima ruri. Lere mim lernala kenene panatal, An hari kalla ki mi leke lari, la An paku mi mamkene kerhue leke yom hi'i dohohala.

*Yon mo'on mahin rodi hoikaniyedi lernulu aukerhe lolo aukerhe nin romleu raram*

<sup>14</sup> Ende i walin man ya aramyaka na'ahoru! Ya apanak yom hoikani lernulu aukerhe, maa mako'uwedi mi nano panaeku onne.

<sup>15</sup> Ya'u wakunu heheni ono ya auroin ya'u wakunu noro ri man honorok akin mou. Ya apanak mi mehe maho'ok ainu'u wanakunu eniyeni leke mauroin namlolo, ee sala.

<sup>16</sup> Lo'o mim hamlinuwedi inhawa namwali lere ik ka'an komun lolo kerei. Ik komun anggur leke na'ori honorok ika Kristus rarna nakliuwedi lolo au kekiywok eni. Ik kapanak trimkasi Makromod Lalap, la komun wewerre. Onne namwali tanada nahenia koro Kristus kamwali mahaku ono An huriyedi ika nano dohohala nin hunukum makmakie! Enla ik ha'ar roti la ka'an wewerre leke na'ori honorok maika Kristus Nin makmaki lolo au kekiywok onne, penia nodi kunukunohi maika nahenia koro Kristus kemen mahaku.

<sup>17</sup> Ik ha'ar roti kemida mehe la ik na'akeme ka'an wewerre. Onne nin panaeku

ika na'akeme kamwali kemen mahaku lolo Kristus.

<sup>18</sup> Kene mim horokala ri Israel nonolu eni. Lere onne hirala honoi kanani loile honoi kanani onno wawan leke hoikani Makromod Lalap. Horu, hir ha'ar honoi kanani onne rehinne ra'an wewerre. Lo'o mi ka mauroin lere hi ra'an mahin onne wewerre, onne nin panaeku hi roro Makromod Lalap ramwali kemen mahakue!

<sup>19</sup> Nano ainu'u wanakunu onne ka a'aheni honoi kanani man ri nodi hoikani lernulu aukerhe onne nala ha man wa'an ida ai. Ka a'aheni aukerhe onne nina molollo aile!

<sup>20</sup> Ka menee! Ya a'aheni honoi kanani man ai nodi hoikani aukerhe onne, ai nodi hoikani hayakyaka mehe, ai ka nodi hoikani Makromod Lalap, la ya amhene mi moro hayakyak mamwali mahaku.

<sup>21</sup> Mi momunedi Makromod Nin anggur la mo'onedi Nin roti me'e, de kan wa'an mim laa mo'on hanana'an rodi hoikaniyedi lernulu aukerhe lolo rir romleu. Mi moro Makromod mamwaliyedi mahaku me'e, de kan wa'an mi moro hayakyak mamwali mahaku haenhi.

<sup>22</sup> Yono ika ken Makromod de akin apinha maika! Yom pene'ek minima molollo narehi nalewen Ainina, de Ai kan hukum mi!

*Hanana'an rodi hoikani lernulu aukerhe man ri na'olu lolo pasar, kan luli ik weli ka'an*

<sup>23</sup> Lo'o mi heruwali ma'aheni, "Makromod

Lalap penia huriyedi maika nano iknik dohohala nin hunukum me'e, de inhawe man ik raram nodi hi'i, ik hi'i ke'e." Onne namlolo, maa ya'u konohi mi nahenia ha wo'ira na'akeme man mi raram nodi hi'ie kan paku mi moro ri namehin akinhe namkene naili'il.

<sup>24</sup> Yono ik hi'i ha man paku maika mehe, maa wa'an rehi horhorok iknik ri heri ri wali de hi'i ha man paku hi akin leke namkene naili'il haenhi.

<sup>25</sup> Kar kawala mi mo'on hanana'an na'akeme mim weli lolo pasar, horo nahenia yon ma'ukani hanana'an onne lernala nano ewi. Ri nadedem na'ukani heheni ono an pene'ek lo'o ai na'aue an hi'iyedi sala me'e.

<sup>26</sup> Mi mauroin hanana'an na'akeme kan luli ik ka'an ono horhorok aile Horok Lap raram ma na'aheni, "Noho eni noro ne'en raram na'akeme Makromod Nine."

<sup>27</sup> Lo'o ri ma akin ka naili'il Jesus makun lariyala mi laa nin nakar mo'on momun, la mi me'enohi laa, yono mamhene mo'on inhawa man hi rala mi mo'on. Yon mi ma'ukani na'ahenia, "Mahin eniyeni rodi hoikaniyedi lernulu aukerhe me'e, ee ka?"

<sup>28</sup> Enimaa lo'o rin konohi maika na'ahenia, "Mahin eniyeni rodi hoikaniyedi lernulu aukerhe me'e," yono ik ka'an mahin onne, leke karamyaka ik walin ma na'aheni onne noro ri man lolo honorok akin

pene'ek ma na'an mahin onne hi'iyedi sala me'e.

<sup>29</sup> Ya a'aheni onne, ainu'u panaeku ri namehin honorok akin, minima, ka.

Enimaa lo'o minim ri aile ma na'ukani, "Alhi'ihepe ya'u hurinohi rin kawala ainu'u honorok aki ma nahinuriyedi eni?

<sup>30</sup> Lo'o ya apanak trimkasi Makromod Lalap ono nala mahin onne yo o'on, alhi'ihepe rin kuku sala maya'u?!"

<sup>31</sup> Nin panaeku onne namlolo, maa lo'o ik ka'an, komun, ee hi'i ha wo'ira na'akeme, panaeku ma na'ono wake'e, ik hi'i wewhe leke ri na'akeme ra'akulu ra'alapa Makromod Lalap Oin Naran.

<sup>32</sup> Yon hi'i ha ma nakoko ri Yahudi, ri ma ka namwali Yahudi, noro kerei raramne na'akeme radiyaur dohohala.

<sup>33</sup> Hi'i wewhe naisa maya'u, ono ya ahehe hi'i ha man wa'an lolo ainu'u hini'i wenewhe wo'ira leke ri na'akeme akin nahuwa'anedi, la hi akinhe eren namkene naili'il Jesus. Ya'u ka ahinorok i kem'u mehe, maa ya'u hi'i inhawa man paku ainu'u ri mormori wali leke hir lernala or'ori dardari ma kan horu eni.

## 11

<sup>1</sup> Lernohi ainu'u morimori naise ya'u lernohi Kristus Nin morimori.

*Honoli man wa'an lolo  
kerei raramne*

\* **10:26** Mzm. 24:1

<sup>2</sup> I wal'u na'ahoru, ya a'uli mi ono mim horhorok ya'u noro ainu'u hini'i newhe mamani, la mim lernohi wanakuku man ya'u loikaruwed i mi eni.

<sup>3</sup> Enimaa, i raram nodi mi mauroin panaeku ida wali'ur. Kristus namwali mo'oni rira uluwakun. Mo'onleher namwali maekleher uluwakun, la Makromod Lalap namwali Kristus uluwakun.

<sup>4</sup> Lo'o mo'oni ida karpuspuse laa hi'i lir napanak, ee loikaru Makromod Lirna Wawan lolo heri kalarne, ai kan horhawe Yesus Kristus ma namwali uluwakun me'e.

<sup>5</sup> Enla lo'o maeke ida hi'i lir napanak, ee loikaru Makromod Lirna Wawan lolo heri kalarna la ka nakou uluwakun, ai kan horhawe nina mo'onleher ma namwali uluwakun eni. Nin hini'i onne namnenehe maeke man eriyedi nin muruk me'e penia nawawa.

<sup>6</sup> Eni penia ya aheni maeke ma namhene nakou uluwakun lolo kerei raram, wa'an rehi eriyedi nina muruke. Lo'o ai nawawa rin eri nina muruk onne, wa'an rehi nakou wedi uluwakun.

<sup>7</sup> Mo'oni man hi'i lir napanak, ee loikaru Makromod Lalap Lirna lolo heri kalarna, yon nair karpuse ono Makromod Lalap umupala hi raisa ra'oi Makromod Lalap mehe, leke ri na'akeme do'on hi de ra'akulu ra'alap Ai Oin Naran. Enimaa wa'an rehi maeke nakou uluwakun leke ra'akulu ra'alapa rira mo'onleher oin naran.

<sup>8</sup> Onne namlolo ono

Makromod Lalap kan umupala ri mo'oni nano ri maeke, maa umupala maeke nano mo'oni rusanne.

<sup>9</sup> Enla Ai kan umupala mo'oni leke paku maeke, maa umupala maeke leke paku mo'oni.

<sup>10</sup> Onne penia wa'an rehi maekleher nakou uluwakun leke nodi kunukunohi nahenia an derne nakani nin mo'onleher. Onne kan mehe, maa hi'i heheni leke hophopon a'am raram po'opo'on de akinhe nahuwa'an haenhi.

<sup>11</sup> Enimaa maika koro Yesus Kristus kamwaliyedi mahaku me'e, de maeke ka nahinuri nano mo'oni la mo'oni ka nahinuri nano maeke.

<sup>12</sup> Makromod Lalap umupala maeke dedesne nano mo'oni nonolu eni, maa nano lere onne rakan lere eniyeni maeke mori mo'oni na'akeme. Enla woro'o onnenihe noro ha wo'ira na'akeme mai nano Makromod Lalap.

<sup>13</sup> Iwal'uhe, ken maho'okala panaeku eniye! Lo'o ri maeke hi'i lir napanak Makromod Lalap lolo heri kalarna la ka nakou uluwakun, onne wa'an, ee ka?!

<sup>14</sup> Lo'o ik po'on mo'oni murukne nanaru lolo heri kalarna, ik kadedem ka'aheni onne kan wa'an ono hi'i ika kawawa,

<sup>15</sup> maa lo'o ik po'on maeke man murukne nanaru, ik ka'ulie ono po'on ma'aruru. Makromod penia nala muruk nanaru onne maeke leke namwali nin kou nodi nakou uluwakun.

<sup>16</sup> Enimaa lo'o rin nawalha lira panaeku onneni, ya'u nounaku ai nahenia ai moro Makromod Lalap Nin kerei raramne namehin na'akeme lernohi honoli onne mamani.

*Makromod Nin mei rara'an roromunle*

<sup>17</sup> I wal'u na'ahoru! Ya'u loikaru panaeku ida woro'o ma na'ono minim rana'ukwuku mai eni. Lolo ainu'u wanakunu eni ka a'uli mi ono lere mim lawuku ma'uli masa'a Makromod, minim hini'i onne ka nodi mi hi'i ha man wa'an, maa nodi mi hi'i ha ma namehiyala.

<sup>18</sup> Dedesne, ya'u dernedi nahenia lere mim lawuku leke mo'on momun, mi ida ma nasesi noro ida, de mi mahina'aredi me'e. Ya'u dernedi minim hini'i onne, la ya'u pene'ek lo'o heruwali namlolo.

<sup>19</sup> Lo'o mi mahinorok wa'an rehi mi ida man rei ha'ar noro ida leke rin po'on rauroin inhoi ma namlolo lolo Makromod Lalap kalarna harome!

<sup>20</sup> Enimaa ka a'uli mi, ono lere mim lawuku hi'i ya'an yomun onne, mi kam horhawe Makromod Lalap! Minim hini'i namehiyala, ka naise ri man lawuku ra'an roti la romun anggur leke ra'ori honorok Makromod Yesus Nin makmaki eni!

<sup>21</sup> Mim hi'i sala, ono mi heruwali mo'on momun noluwedri ri namehin, de ma'ahoru hanana'an nonomun penia heruwali kar lernala haida-haida, la heruwali manhedi.

<sup>22</sup> Alhi'ihepe mim hi'i hehenie? Mi ma'alehe nakar?! Alhi'ihepe mi

ka mo'on momun memen lolo minim nakar nanu?! Ee, lo'o i wal'uhe minim panaeku ma'ihoru ma'idaru Makromod Lalap Nina kerei raramne?! Lo'o mim ken hi'i wawwawa ma na'alehe haida-haida?! Yom pene'ek ya'u wakunu heheni leke a'uli minim hini'i onne! Ka!

<sup>23</sup> Ya auroin minim hini'i onne kan wa'an ono Makromod nala wanakunu eniyeni maya'u. Ende ya'u wakuku mi kalla man wa'an ik ka'an roti la komun anggur leke na'ori honorok maika Nina makmaki eni, ono rakan alam Makromod Yesus walin na'olu Ai, Ai nala roti,

<sup>24</sup> la napanak trimkasi Makromod Lalap horu mene a'un roti na'aheni, "Eni namwali Yi ihin kem'u man Ya ala leke nahinerre mi. Kokale, mo'on, leke yon hamlinu Maya'u."

<sup>25</sup> Hi ra'anedi roti horu ne, naisa idedi haenhi Ai nala anggur cawan nanumene napanak trimkasi la na'aheni, "Anggur eni Ya'u rarna ma na'ono nawinau Makromod Lalap Nina Nou Worworu man du'ul kaliyedi ri mormori noro Ai. Lere alam mi momune, mim horokala Ainu'u makmaki eni."

<sup>26</sup> Ende, lere ik ka'an roti la komun anggur naisa onneni, ik loikaru ik Makromod Nin hini'i wenewhe lere An maki rakan lere An wali mai wali'ur.

<sup>27</sup> Onne penia, inhoi nodi hini'i wenewhe ma ka namlolo, de na'an Makromod Nin roti la nomun Nin anggur, ai onne hi'iyedi sala Makromod

me'e, ono kan horhawe Ai kemen noro rarna.

<sup>28</sup> Ende wa'an rehi mi dohodoho koklolo ma'inau minim hini'i wenewhe nanumene mo'on roti la momun anggur,

<sup>29</sup> ono lo'o mi mo'on roti momun anggur onne, maa kam horhorok hi'ihehewi Makromod Yesus paku mi lere An maki, mim lernala hunukum lolo mi ihin kemen.

<sup>30</sup> Onne penia mi ri heruwali kemen naprehen, heruwali rakni'ir, la heruwali maki haenhi.

<sup>31</sup> Enimaa lo'o ik koklolo ka'inau iknik hini'i wenewhe wawa'an nanu, Makromod Lalap ka nala hunukum maika.

<sup>32</sup> Maa lo'o An hukum maika naisa onne, onne nin panaeku Ai na'ori honorok ika leke yono ik lernala hunukum koro ri ma ka nauroin Ai, de sopoledi laa aiye ma kan maki laa ewi-ewi raram.

<sup>33</sup> I wal'u na'ahoru! Onne penia lere mim lawuku mo'on momun Makromod Nin mei ya'an yomun, wa'an rehi mi ida man lapan ida mene mo'on momun wewerre.

<sup>34</sup> Inhoi namlara, wa'an rehi na'akedi memen nina nakar nanumene lawuku. Lo'o mim horhawa panaeku eniyeni, mi kam lernala hunukum nano Makromod Lalap lolo mi kemen.

Panaeku namehin aile makun, maa na'amoli ya'u rakanedi ki enne mene ya a'amou a'arope ki mi.

## 12

*Makromod nala woroin ma na'ono Nin ri dohodoho*

<sup>1</sup> I wal'uhe, ya'u raram nodi mi mauroin kokkoo panaeku ma na'ono woroin man Roh Kudus nanala ki mi dohodoho.

<sup>2</sup> Horhorok lere mi ka mauroin Makromod Lalap makun, mim derne makani ha wo'ira man koko mi, penia mim lernohi mamani ri man hoikani lernulu aukerhe ma na'alehe lirna.

<sup>3</sup> Onne penia ya'u konohi mi nahenia ri man Makromod Lalap Nin Roh nodi mololle ka na'aheni, "Ya akineri Yesus." Enla lo'o Roh Kudus ka nodi molollo ri, ai ka na'aheni, "Yesus eni, i Makrom'u."

<sup>4</sup> Makromod Lalap nala woroin warna-warna ma na'ono maika, maa na'akeme onne mai nano Roh Kudus ma namwali mahaku mehe.

<sup>5</sup> Honowok wo'ira ma ka namnehe aile rodi ilitolle Makromod, maa Makromod man ik ilitolle onne mahaku mehe.

<sup>6</sup> Makromod Lalap nodi kalla wo'ire ma ka namnehe leke kukul Nin molollo lolo iknik morimori, maa Makromod Lalap mahaku mehe. Ai mehen howok lolo ik raramne hi'i ha wo'ire onne.

<sup>7</sup> Makromod Lalap nala woroin ma na'ono Nin ri na'akeme dohodoho, leke hi rodi rir woroin onne paku kerei raramne na'akeme. An hi'i onne leke nodi kunukunohi nahenia Roh Kudus mehe na'aromo ika dohodoho raramne.

<sup>8</sup> Roh Kudus onne na'aromo ri dohodoho

raramne, de heruwali lernala woroin ma na'ono leke rala nounaku rodi woroin nano wawan, la heruwali lernala woroin ma na'ono leke ra'amou ra'aropo Makromod Lalap Lirna Wawan.

<sup>9</sup> Roh ma namwali mahaku onne, Ai nala molollo ma na'ono ri namehin leke akin namkene naili'il Makromod Yesus Kristus mamani, la Ai nala molollo ma na'ono ri namehin wali'ur leke hi'i wa'an ma nakni'ir.

<sup>10</sup> Ai nala molollo ma na'ono ri heruwali leke hi'i ha ri kan dodo'onnale makun, la nala woroin ma na'ono ri namehin leke konohi Makromod Nin panaeku wo'ira laa ri namehin. Roh nala woroin ma na'ono ri namehin leke hi rauroin rahiyyene wanakunu ewi man mai nano Makromod Nina Roh noro man mai nano roh namehin ma ka namlolo enihe. Ai nala woroin ma na'ono ri namehin leke rauroin wakunu wanakunu man mai nano Roh Kudus, la Ai nala woroin ma na'ono ri namehin wali'ur leke nauroin napa'aha wanakunu onne leke ri namehin rauroin wanakunu onne haenhi.

<sup>11</sup> Woroin ma na'ono wo'ira onne na'akeme, Roh mahaku mehe Nina honowok. Enla Roh onne ha'ar Nin molollo noro woroin nala ri dohodoho lernohi Nina honorok panaeku aimehi.

*Ri ma akin naili'il Yesus na'akeme naho'ok naise kemen mahaku*

<sup>12</sup> Ika ma akin naili'il Yesus naho'ok naise Ai kemen hana'arne. Kade hana'arne nammori, maa lolo Kristus ik kamwali kemen mahaku.

<sup>13</sup> Ik na'akeme ka'isedi kemen mahaku me'e, ono lere ulutade ika, Makromod Lalap Nin Roh hi'i maika kamwali kemen mahaku, kade ik heruwali kamwali ri Yahudi, heruwali ka namwali Yahudi, heruwali namwali hophopon wahawan, la heruwali ka. Enla Nin Roh man ida mehe onne, Makromod Lalap huri minle ik irhun raramne.

<sup>14</sup> I wal'u na'ahoru, ri kemen ka namwali hana'arne ida mehe, maa namwali hana'arne nammori.

<sup>15</sup> Ende lo'o ein na'aheni, "Ya'u eni liman ka, de ka amwali kemen onne hana'arne." Kade ein na'aheni onne, maa ik kauroin ein onne namkene namwali kemen hana'arne mamani.

<sup>16</sup> Enla lo'o kilinna na'aheni, "Ya'u eni makan ka, de ya'u eni ka amwali kemen onne hana'arne." Kade kilinna na'aheni onne, maa ik kauroin ai namwali kemen onne hana'arne mamani.

<sup>17</sup> Lo'o kemen na'akeme namwali makan mamani, hi'ihehewi leke kemen derne? Ee, lo'o kemen na'akeme namwali kilinna mamani, hi'ihehewi leke kemen nauroue?

<sup>18</sup> Onne penia Makromod Lalap kakaredi ri kemen hana'arne na'akeme leke dohodoho hi'i wewhe lernohi Nin panaekue.

<sup>19</sup> Lo'o hana'arne na'akeme ramwali kemen hana'ar ida mehe, enlo'o kemen kaale.

<sup>20</sup> Ende kemen hana'arne nammori, maa namwali mahaku mehe.

<sup>21</sup> Makan ka ne'el liman na'ahenia, "O ka mala ha

man wa'an ida ik kemen," ee uluwakun ka ne'el ein na'ahenia, "O ka mala ha man wa'an ida ik kemen."

<sup>22</sup> Kar hi'i heheni, maa ik kemen hana'arne man ik po'on ka naruri enihe, ik nair mamani.

<sup>23</sup> Enla kemen hana'arne man ik po'on kan ma'aruru, ik ka'akeki kodi nainair man ma'aruru. Kemen hana'arne ma kan wa'an rin do'one, ik kadiyaka wawa'an la kodi nainair pasunedi,

<sup>24</sup> maa ik kemen hana'arne ik po'on ma'aruruwed me'e, ik kak nair ha man ma'aruru kodi ka'akekie. Makromod Lalap kakaredi ik kemen hana'arne me'e, de ik ilitolle ma ka naruri noro ma kan ma'aruru wa'an narehi ik kemen hana'arne namehin.

<sup>25</sup> An kakar heheni leke ri kemen yon nahina'ar, maa kemen hana'arne dohodoho ida man paku ida.

<sup>26</sup> Ende lo'o kemen hana'arne ida lernala apinpinha, kemen hana'arne namehin pelek lernala apinpinha onne haenhi. Namnenehe onne lo'o kemen hana'arne ida lernala u'uli sasa'a, kemen hana'arne namehin na'akeme rahuwa'an wewerre.

<sup>27</sup> I wal'u na'ahoru! Mi na'akeme mamwali Kristus kemen la mi dohodoho mamwali Ai kemen hana'arne haenhi.

<sup>28</sup> Ende lolo kerei raramne Makromod Lalap na'onedi ri dohodoho nin honowok me'e: Dedesne, hophopon ma nodi Yesus Lirna Wawa'an enihe, rewro'o nine, ri ma namwali nabi-

nabi, rewkelu nine, ri man wakuku lolo kerei. Onne horu, ri man hi'i ha man ri kan dodo'onnale makun. Horu ne, ri man lernala molollo hi'i wa'an ma nakni'ir, man paku rir ri mormori wali, man panulu lolo kerei nin honowok nair, noro man kokaledi woroin leke wakunu wanakunu man mai nano Roh Kudus.

<sup>29</sup> Ik meririi lernala woroin ma na'ono, maa woroin onne ka namnehe. Ik na'akeme ka kamwali hophopon ma nodi Lira Wawa'an, na'akeme ka kamwali nabi, na'akeme ka kamwali meser. Na'akeme kak lernala molollo hi'i ha man ri kan dodo'onnale makun,

<sup>30</sup> ee hi'i wa'an ma nakni'ir. Na'akeme ka kodi woroin wakunu wanakunu man mai nano Roh Kudus, ee ka kodi woroin halle wanakunu onne leke ri man derne rauroine.

<sup>31</sup> Enimaa mahehe leke mi akim namrana Roh Kudus nala woroin ma na'ono narehi ki mi.

*Kalla man wa'an rehi*  
Ors eni ya'u kukul mi kalla man wa'an narehi.

## 13

<sup>1</sup> I wal'u na'ahoruwed! Lo'o ya'u lernala woroin nano Roh Kudus de auroin wakunu ri mormori nina wanakunu noro hophopon a'am raram rira wanakunu na'akeme, maa ka aramyaka ainu'u ri heri ri wali, ainu'u wanakunu onne kan min haida. Ainu'u wanakunu onne naise ton mamu rin nukur ne, lirna mamani.

<sup>2</sup> Ee, lo'o yo odi molollo loikaru Makromod Lalap

Lirna Wawan eni wawa'an, la ya auroin Nina panaeku rahu noro Nin kalla man ri namehin ka rauroinnal makun, la ya akin naili'il wake'e Makromod Lalap penia yo odi molollo hopon wo'or-wo'or hoi laa onno namehin, maa ka aramyaka ainu'u ri heri ri wali, ainu'u morimori onne kan min haida.

<sup>3</sup> Ee, lo'o ya ala mouwedi ainu'u ha wo'ira na'akeme laa ri ma na'alehe naulinu, la ya'u ala i kem'u rin harne, maa ka aramyaka ainu'u ri heri ri wali, ainu'u hini'i onne ka nala ha man wa'an ida maya'u.

<sup>4</sup> Ri ma naramyaka nina ri heri ri wali, ai onne akin wa'an de kan pelek na'ahan, la an kukul aki man wa'an ri namehin. Ai kan kunu kehen ri, kan mehe na'uli kemen, la kan holi kukulu lalap.

<sup>5</sup> Ri onne kan holi la'apekir la'awair, ka nakerne ri namehin lernohi nina panaeku, raramne kan pelek ha'a, la kan horhorok ri nin sala ai.

<sup>6</sup> Ri ma naramyaka nin ri heri ri wali kan suk hini'i man ailanna, maa hini'i noro panaeku ma namlolo penia nahuwa'an ai akin.

<sup>7</sup> Ri ma naramyak nin ri heri ri wali onne namkene kerhu ha wo'ire na'akeme, ai akin naili'il Makromod Lalap mamani, ai nauroin nahe-nia Makromod Lalap hi'i ha wo'ira na'akeme lernohi Nin nou, la ai akin kan tana, maa ai namkene lolo ha wo'ire mamani.

<sup>8</sup> Raramyakeni kan horu laa ewi-ewi. Lere eniyeni

ri heruwali lernala woroin leke loikaru Makromod Lalap Lirna laa ri namehin, heruwali lernala woroin leke wakunu wanakunu man mai nano Roh Kudus, la heruwali lernala woroin leke rauroin ha wo'ire, maa rakan lere man mai woroin onne kar nair me'e.

<sup>9</sup> Lere eniyeni woroin man ik kokala nano Makromod Lalap onne kan kuku kan nokor makun, la iknika woroin loikaru Lirna Wawan kan kuku kan nokor makun haenhi.

<sup>10</sup> Enimaan rakan lere Makromod Lalap na'akuku na'anokor ha wo'ira na'akeme laa ewi-ewi, ik kak nair ha ma kan kuku kan nokor onne me'e de moluloinedi me'e.

<sup>11</sup> Ya ala wanakunu naho'ok ida woro'o leke a'amou panaeku onne: Lere tatana'u makun, ya'u wakunu naise tatane, la ainu'u honorok panaeku naise tatan'ukun, maa lere ya'u lapedi me'e, ainu'u honorok panaeku tatana onne, ya'u sopoledi me'e.

<sup>12</sup> Ik kak po'onala ha wo'ira mouropo makun, ono lere eniyeni ik kaisa ri man po'on oin makan lolo kokaka oi man au'au, de ai kakan kan mou. Lere eniyeni ik kak po'on mouropo, maa lere man mai ik po'on kauroin ha wo'ira na'akeme mouropo wake'e ono ik po'on idewe Makromod Lalap. Lere eni ainu'u woroin kan kuku kan nokor makun, maa lere man mai ya auroin ha wo'ire namlolo kokkoo, namnenehe Makromod Lalap nauroinedi

ainu'u panaeku wo'ire  
na'akeme me'e.

<sup>13</sup> Ende ors eni panaeku wokelu aile ma namkene laa ewi-ewi. Ik kamkene akin naili'il Makromod Lalap mamani, ik kamkene lapan Makromod Lalap nala rere'e haharu An nouwedi maika me'e, la ik karamyaka ri mamani. Enimaa nano panaeku wokelu eniyeni, ma na'ono narehi, ik ida ma naramyak ida mamani.

## 14

*Lo'o ik loikaru Makromod Lalap Lirna Wawan eni, onne paku ri nammori narehi ik kodi wanakunu man mai nano Roh Kudus*

<sup>1</sup> I wal'u na'ahoru! Wa'an rehi ik kahehe karamyaka iknik ri heri ri wali mamani, la kodi aki ma namrana kokala woroin wo'ire man mai nano Roh Kudus. Nano woroin wo'ire onne, ma na'ono narehi: woroin leke loikaru Makromod Lirna noro Nin panaeku, ono lo'o ik lernala woroin onne ik kauroin paku ri namehin.

<sup>2</sup> Ri man lernala woroin nodi wanakunu man mai nano Roh Kudus kan wakunu noro ri mormori, maa wakunu noro Makromod Lalap mehe. Ende nin wanakunu man Roh Kudus mehe nanale, kan paku ri namehin ono hi ka rauroine, maa Makromod Lalap mehe nauroine.

<sup>3</sup> Enimaa ri man loikaru Makromod Lirna noro Nin panaeku, ai onne wakunu na'aruri na'alapa ri akin leke namkene naili'il, la hi'i ri ma akin naili'il enihe eren nala'a

kalalari, la na'alapa ri namehin akinhe haenhi.

<sup>4</sup> Ri man wakunu nodi wanakunu man mai nano Roh Kudus, nin wanakunu onne na'aruri ai akin mehe, maa ri man wakunu nodi Makromod Lalap Lirna noro Nin panaeku, an paku kerei raramne leke akinhe eren nailili'il.

<sup>5</sup> Eih! Ya'u raram nodi mi na'akeme wakunu modi wanakunu man mai nano Roh Kudus, maa wa'an rehi mim loikaru Makromod Lalap Lirna noro Nin panaeku leke ri nauroin. Ri onne penia paku ri nammori narehi ri man lernala woroin nodi wanakunu namehin. Enimaa lo'o ri onne halle nin wanakunu onne wali'ur leke kerei raramne rauroin, ai onne paku hi la na'aruri na'alapedi hi akinhe.

<sup>6</sup> Ende i wal'uhe, lo'o ya'u ki enne lernohi minim kerei raramne, la ya'u wakunu odi wanakunu man mai nano Roh Kudus, onne kan paku mi wake'e, maa lo'o ya a'amou a'aropo Makromod Lalap Nin panaeku ki mi, ee lo'o ya'u loikaru Makromod Lalap Lirna Wawan ki mi, la wakuku mi kalla ma namlolo, ainu'u hini'i onne penia man paku mi leke mi akim eren nailili'il.

<sup>7</sup> Ya ala wanakunu naho'ok ida nano ha naisa poloit me hitare. Lo'o rin nou poloit onne, maa lirna kan mou, man derne ka rauroin an nou inhawa hanara. Ee, lo'o ri na'aromo hitare, maa na'aromo hitare ka namlolo, ri ka nauroin nin hanara.

<sup>8</sup> Onne namnenehe noro ri

man nou kowuri leke rapolu  
ri laa ra'ara. Lo'o ai kan  
nou mouropo, man derne ka  
rauroin nahenia lere alam  
ra'akene ra'are rakanedi  
me'e.

<sup>9</sup>Panaeku onne namnenehe  
noro mi haenhi. Lo'o mim  
wakunu modi wanakunu  
man ri ka nauroin wake'e,  
inholi nauroin minim  
wanakunu onne? Minim  
wanakunu lirna onne kan  
min haida, de mi maisa ri  
man wakunu noro anna man  
huhuu mehe.

<sup>10</sup>Loi honorok wawa'an,  
lolo noho wawan eni  
wanakunu nammori aile, la  
wanakunu na'akeme onne  
nin panaeku aile.

<sup>11</sup>Lo'o ri aile man wakunu  
noro maika, maa ik ka  
kauroin nin wanakunu nin  
panaekue, ika ida ma ka  
nauroin ida, de ik ida ma  
namwali do'on awan ida.

<sup>12</sup>Panaeku onne namwali  
noro i wal'uhe haenhi.  
Lo'o mim wakunu modi  
wanakunu man ri ka nau-  
roin, minim na'aromwali  
dederne, maa ka nauroin  
haida-haida. Ya auroin  
mi akim namrana kokala  
woroin ma na'ono man  
mai nano Roh Kudus, de  
mapanak Ai nala woroin  
mi leke ma'aruri ma'alapedi  
mi wallum ma aile kerei  
aramne akinhe.

<sup>13</sup>Onne penia ya'u  
nounaku mi nahenia in-  
holi man wakunu nodi  
wanakunu man mai nano  
Roh Kudus, na'amoli na-  
panak Makromod nala  
woroin ai leke halla  
wanakunu onne wali'ur leke  
rin derne rauroin.

<sup>14</sup>Ya a'aheni heheni ono  
lo'o ik hi'i lir napanak kodi

wanakunu man mai nano  
Roh Kudus, ik hi'i lir napanak  
lolo ik honorok akin, maa  
iknik honorok panaeku ka  
nala'a.

<sup>15</sup>Ende ik hi'i inhawa  
man wa'an? Ik hi'i heheni:  
Na'amoli ik kodi wanakunu  
man mai nano Roh Kudus hi'i  
lir napanak lolo ik honorok  
akin, la ik kodi wanakunu  
nadedem hi'i lir napanak  
leke ri namehin rauroin  
haenhi. Na'amoli ik kodi  
wanakunu man mai nano  
Roh Kudus kahinara ka'uli  
kasa'a Makromod Lalap lolo  
ik akin, la kodi wanakunu  
nadedem kahinara ka'uli  
kasa'a Makromod Lalap leke  
ri namehin rauroin haenhi.

<sup>16</sup>Lo'o ik kodi wanakunu  
man mai nano Roh Kudus  
kapanak trimkasi laa  
Makromod Lalap lolo kerei  
aramne, maa ri man  
dederne ka rauroin iknik  
wanakunu onne, hi penia ka  
re'eno hi ra'aheni, "Namlolo!  
Amin!" ono hi ka rauroin  
iknik wanakunu onne.

<sup>17</sup>Kade iknik lir napanak  
trimkasi Makromod Lalap  
namwali ha man wa'an, maa  
kan paku ri man derne onne  
ono hi ka rauroin lir onne nin  
panaeku wake'e.

<sup>18</sup>Ya apanak trimkasi  
Makromod Lalap ono ya'u  
mehe wakunu odi wanakunu  
man mai nano Roh Kudus  
narehi nalewen i wal'u  
na'ahoru,

<sup>19</sup>maa lolo kerei nin  
rana'ukwuku, lo'o yo  
odi wanakunu lirna ida  
woro'o man ri nauroroin,  
onne wa'an narehi yo odi  
wanakunu lirna riwriwan  
rahrahu ma kan min haida.

20 I wal'u na'ahoru! Yono mahinorok maise tatan'ukun, maa modi hon-orok akin man mou naisa ri leleher. Enimaa ya apanak lolo minim hini'i wenewhe mim hi'i naisa tatana ma ka nauroin hi'i ha man ailanna makun.

21 Lolo Horok Lap horhorok aile ma na'aheni, "Makromod Lalap na'aheni,

'Yo odi ri ma ka namwali Yahudi nuran wakunu noro Ainu'u ri Yahudi enihe.

Ya'u hopon do'on awan nano noho namehin mai wakunu noro Ainu'u ri enihe rodi wanakunu hi ka rau-roroin.

Kade Ya'u hi'i heheni, maa hi kar derne rakani Ainu'u wanakunu onne.'"

22 Ende, lo'o ika wakunu kodi wanakunu man mai nano Roh Kudus, iknik wanakunu onne namwali tanada leke ri ma ka nauroin Makromod makun rauroin Nin molollo me'e, maa kan paku ri ma akin naili'il edi Makromod me'e. Enimaa lo'o ik loikaru Makromod Lirna noro Nin panaeku, iknik wanakunu onne namwali tanada leke ri ma akin naili'il edi Makromod me'e akinhe eren namkene naili'il, maa ka namwali tanada ma na'ono ri ma akin ka naili'il makun.

23 Kade onne namlolo, maa lo'o lere ida kerei raramne na'akeme wakunu wewerre rodi wanakunu man mai nano Roh Kudus, la ri ma ka namwali Kristen noro ma ka nauroin Makromod Lalap Nin kalla makun,

ramlilinnohi mai kerei raram de po'on, derne minim wanakunu onne, hi lo'o pene'ek mi ma'iseri harome.

24 Enimaa lo'o mi maham loikaru Makromod Lalap Lirna Wawan lolo kerei raramne, la ri ma ka namwali Kristen ma ka nauroin Makromod Lirna makun mai derne minim wanakunu onne, ai lo'o nauroin nahenia ai penia namwali man hi'i dohohala, de raram nodi hehel kemen.

25 Lere onne me'ede, an eremnala nahenia Makromod Lalap nauroinedi ha na'akeme ma nasinuwari lolo ai raramne me'e, de an kadi ein korno laa yawa na'uli nasa'a Makromod Lalap na'ahenia, "Namlolo! Makromod Lalap aile mi leken kalarne."

*Ik ka'uli kasa'a Makromod lolo kerei yon kodi kalla ma nawokor nakali*

26 I wal'u na'ahoru! Onne na'akeme nin panaeku ra'ahewi? Lere mim lawuku kerei raram, mi ri dohodoho nin woroin ma na'ono aile. Heruwali rahinara, heruwali wakuku leke ik kauroin Makromod Nina calle, heruwali konohi Makromod Lirna Wawan man Ai nalhariyedi hi me'enii, heruwali wakunu rodi wanakunu man mai nano Roh Kudus, la heruwali napa'aha wanakunu man ri ka nauroin onneni. Na'amoli mim hi'i ha eniyenihe leke paku mi ma namwali kerei raram na'akeme akinhe eren naruri naili'il.

\* 14:21 Yes. 28:11-12

<sup>27</sup> Lo'o ri wo'ira aile ma nauroin wakunu nodi wanakunu man mai nano Roh Kudus, yon hir wakunu wewerre, maa ida man herre ida wakunu leke yon hi'i de nawokor nakali, la yon man wakunu narehi ri woro'o wokelu. Wa'an rehi ri ma napa'aha rir wanakunu aile leke ri namehin rauroin haenhi.

<sup>28</sup> Lo'o ma nauroin napa'aha rir wanakunu onne kaale, ri ma nauroin wakunu nodi wanakunu nano Roh Kudus onne yon wakunu nanu, maa noro Makromod Lalap wakunu lolo akin mehe.

<sup>29</sup> Lo'o nabi-nabi man loikaru Makromod Lalap Lirna aile, kakar leke woro'o me wokelu wakunu, ida man herre ida, la ri man derne enihe raihyene rir wanakunu leke rauroin nahenia mai nano Makromod Lalap, ee ka.

<sup>30</sup> Enimaa lo'o ri ida aile ma naikoro nakankani la namlilinnohi lernala Makromod Lalap Lirna Wawan, wa'an rehi ri man wakunkunu onne mehen renedi leke nala leken walin ma naikoro onne wakunuwala tarana.

<sup>31</sup> Lo'o mim hi'i heheni, mi na'akeme lernala leken loikaru Makromod Lalap Lirna Wawan, ida man herre ida, leke mi na'akeme lernala wanakuku la mi akim eren nailili'il.

<sup>32</sup> Nabi ma nauroin wakunu Makromod Lalap Lirna Wawan enihe, rauroin rodi molollo hi kemen de rodi kalla man wa'an wakunu heri kalarina,

<sup>33</sup> ono Makromod Lalap raram ka nodi ik hi'i ha ma nawokor nakali lolo kerei raram, maa Ai raram nodi ik kakar ha wo'ire lolo kalla ma namrina namkai.

Ende Makromod Lalap Nin ri mememen lolo kerei raramne na'akeme nadedem hi'i heheni.

<sup>34</sup> Wa'an rehi maeke raikoro karkaramedi lolo kerei raram. Yono hurinohi hir wakunu, maa derne rakani mehe rira mo'onleher naisa horhorok aile agame nin holoor halauk enihe me'e.

<sup>35</sup> Lo'o minim maekleher raram nodi nauroin panaeku ida harome, wa'an rehi an wali laa nakar nanumene na'ukani mo'onleher, ono lo'o ai na'ukani lolo kerei raramne, ai mehen hi'i wawwawedi nin mo'onleher me'e.

<sup>36</sup> Alhi'ihepe mi kam lernohi ainu'u wanakunu eni? Lo'o mi mahinorok Makromod Lalap Lirna Wawan mai nano mi dedesne? Ee, lo'o mi mehem kokala Lirna?!

<sup>37</sup> Lo'o ri aile ma na'aheni an lernaledi molollo nano Makromod Lalap leke loikaru Lirna Wawan, ee lo'o ai na'aheni an lernala molollo namehin nano Roh Kudus harome. Lo'o an wakunu ha ma namlolo an ne'e nahenia ainu'u wanakuku eni mai nano Makromod Lalap.

<sup>38</sup> Enimaa lo'o ri kan peinohi ainu'u wanakuku eniyeni, yono peinohi ri onne me'e.

<sup>39</sup> Ende, I wal'uhe, wa'an rehi mi raram nodi mamwali ri man loikaru Makromod Lalap Lirna noro Nin

panaeku, la yom kawala  
ri man wakunu nodi  
wanakunu man mai nano  
Roh Kudus,

<sup>40</sup> maa yon hamlinu kakar  
na'akeme modi kalla ma  
namlolo leke yon nawokor  
nakali.

## 15

*Yesus mori wali'ur nano  
makmaki onno*

<sup>1</sup> I wal'u mie, lolo ainu'u  
horok eniyeni ya a'ori  
honorok mi Yesus Lirna  
Wawa'an man nonolu ya'u  
loikaruwedi ki mi me'e. Ler  
onne mim kokaledi Lir onne  
me'e, la Lir onne namwali  
minim ya'ar penia mi akim  
namkene naili'il Makromod  
Yesus.

<sup>2</sup> Eni penia Lirna Wawa'an  
nahala mi nano minim  
dohohala nin molollo me'e,  
horo nahenia mi masala  
kerkerhe panaeku man ya'u  
loikaruwedi mi nonolu eni.  
Enimaa lo'o mi akim naili'il  
panaeku namehin ma ka  
namlolo, mi akim ma nonolu  
naili'il Yesus onne ka nala ha  
man wa'an ida ki mi.

<sup>3-4</sup> Ya'u konohiyedi mi  
Yesus Lirna Wawa'an man  
Ai nala maya'u. Lirna ma  
na'ono wake'e onne: Kristus  
maki leke huri we'er ika  
nano dohohala nin hunukum  
makmaki. Karuwedi Ai  
lolo Nin lunne me'e, maa  
alam wokelu Makromod  
Lalap na'amori wali'uredi  
nano makmaki onno, naise  
horhorok ma aile Horok Lap  
raram.

<sup>5</sup> Horu ne, Yesus nalhari ke  
men Petrus nanumene nal  
hari kemen Nin ri idaweli  
woro'o enihe.

<sup>6</sup> Ler ida wali'ur Ai nal  
hari kemen ri man lernohi Ai  
rahu wolima rehi. Nano hi  
na'akeme nammori mormori  
makun, maa ida woro'o pe  
nia makiyedi me'e.

<sup>7</sup> Horu ne, Ai nalhari ke  
men Yakobus mene nalhari  
kemen lolo hophopon ma  
nodi Ai Lirna Wawa'an eni  
na'akeme.

<sup>8</sup> Na'akeme onne horu,  
Ai nalhari kemen maya'u.  
Ya'u ka aise ma nodi Yesus  
Lirna Wawa'an namehin  
enihe, maa amlilinohi ya  
amwali ma nodi Yesus Lirna  
Wawa'an, naisa tatana ma  
nin wollo kan nokor makun,  
maa mori me'e.

<sup>9</sup> Ya'u wakunu heheni ono  
ya amwali hophopon ma  
nodi Yesus Lirna Wawa'an  
man lolo yawa wake'e.  
Ma namlolo, kan wa'an ri  
napolu ya'u 'hophopon ma  
nodi Yesus Lirna Wawa'an  
eni' ono ya'u penia man  
hi'i apinpinhedi Makromod  
Lalap Nina kerei raramne  
nonolu eni.

<sup>10</sup> Enimaa Makromod  
Lalap Nina rere'e haharu  
penia herredi ainu'u mor  
rimori me'e, de ors eni  
ya amwaliyedi Makromod  
Yesus Nina hophopon ma  
nodi Lirna Wawa'an loikaru  
ri. Enla Nina wawa'an  
Ai nala maya'u onne kan  
lolo leken, maa ya'u howok  
narehiyedi hophopon ma  
nodi Yesus Lirna Wawa'an  
na'akeme. Memen ka'u mehe  
howok, maa Makromod  
Lalap Nina rere'e haharu  
nodi nala ya'u penia ainu'u  
honowok onne na'akeme  
nala'a kalalari mamani.

<sup>11</sup> Ende lo'o i wal'uhe

derne Lir Wawa'an onne nano maya'u, ee nano ri namehin ma nodi Yesus Lirna Wawa'an eni, onne kan hi'i haida, maa panaeku ma na'ono wake'e, mi akim naili'iledi inhawe man am loikaruwedi ki mi me'eni.

*Makromod Lalap na'amori  
maika wali'ur nano iknik  
makmaki*

<sup>12</sup> Am loikaruwedi Lirna mi me'e nahenia Makromod Lalap na'amoriyedi Kristus nano Nina makmaki me'e. Ende hi'ihepenia mi ri heruwali ma'heni ri man makiyedi kan mori wali'ur rakan lere noho nin man horu?

<sup>13</sup> Lo'o rir panaeku onne namlolo, onneni nin panaeku nahenia Makromod Lalap ka na'amori Kristus wali'ur haenhi!

<sup>14</sup> Lo'o Kristus kan mori wali'ur, ainim honowok loikaru Yesus Lirna Wawa'an eni kan min haida, la minim honorok aki ma naili'il onne ka nala haida man wa'an ki mi haenhi, ono mim derne makaniyedi lir ma ka namlolo me'e.

<sup>15</sup> Onne kan mehe, maa lo'o rira panaeku onne namlolo, ai ma namwali man kuku maka mapoho mi ono ai ma'heni, "Makromod Lalap na'amori wali'uredi Kristus me'e."

<sup>16</sup> Maa lo'o ri man maki kan mori wali'ur, onne nin panaeku Kristus kan mori wali'ur haenhi.

<sup>17</sup> Enla lo'o Ai kan mori wali'ur, mi akim ma naili'il enihe kan min haida, la mi ka mahinuri nano minim dohohala nin hunukum makmaki.

<sup>18</sup> Onne kan mehe, maa ri ma akin naili'il Kristus man makiyedi me'e, hi lo'o kar mori wali'ur haenhi, de ko'u Makromod Lalap laa ewi-ewi.

<sup>19</sup> Lo'o Kristus nala wawa'an maika man pu'ik heli Ai lere ik morimori mai noho wawan eni mehe, nano ri lolo noho wawan na'akeme maika ma akin naili'il Ai kak lernala haida wake'e! I wal'u na'ahoruwedi! Panaeku onne kan hi'i heheni!

<sup>20</sup> Enimaa panaeku ma namlolo wake'e hi'i heheni: Makromod Lalap na'amori wali'uredi Kristus nano Nin makmaki me'e! Ende ik kauroin nahenia Ai penia namwali ri dedesne lolo Nin ri na'akeme man Makromod Lalap na'amori wali'ur nano rir makmaki lere man mai.

<sup>21</sup> Ik kauroin onne namlolo ono nano ri ida nin dohohala me'e ne, ri mormori na'akeme lernala makmaki, la nano ri ida nin hini'i, ri mormori man makiyedi lernala morimori wali'ur.

<sup>22</sup> Ik ri mormori na'akeme kamwali Adam upun ananhe, de kaise Adam maki haenhi. Naisa onne haenhi ri na'akeme ma noro Kristus ramwaliyedi mahaku me'e, mori wali'ur nano rir makmaki.

<sup>23</sup> Enimaa ri man mori wali'ur onnenihe kakar heheni: Dedesne Kristus mori wali'ur, la ik lapan An mai wali'ur mene Makromod Lalap na'amori maika ma akin naili'il Ai wali'ur.

<sup>24</sup> Onne horuwedi mene rakan noho nina man horu. Lere onne Kristus rehiyedi ma nodi molollo lolo a'am leherne noro idewe a'am

raram na'akeme me'e, de namwali Rai ma nodi molollo na'akeme. Lere onne Ai nala Nina molollo onne laa Aman Makromod Lalap,

<sup>25</sup> maa onne ka namwali hehen nanumene An rehi mouwedi Nina arwali enihe mene na'akeme derne rakani Ai.

<sup>26</sup> Ende, lere onne Ai na'amori Nin ri na'akeme, la makmaki kame'el. Onne nin panaeku An rehiyedi Nin arwali man kauli'ur, onne makmaki eni.

<sup>27</sup> Ik kauroin onne ono horhorok aile Horok Lap raram ma na'ahenia, "Makromod Lalap hi'i ha wo'ira na'akeme kadi ein korno Yesus kalarña," de ik kauroin mouropo ha wo'ira na'akeme lolo yawa Kristus. Makromod Lalap mehe kan lolo yawa Ai.\*

<sup>28</sup> Ende rakan lere ri na'akeme loledi yawa Yesus Kristus, Ai me'e ne lolo yawa Aman Makromod Lalap man hi'iyedi ha wo'ira na'akeme loledi yawa Yesus. Enpenia Makromod Lalap mehe nodi molollo ha wo'ira na'akeme.

<sup>29</sup> I wal'uhe, lo'o mi mahinorok nahenia ri man maki kan mori wali'ur me'e, hi'ihepe ri aile ma nodi oir ulutada rie herre walinhe man makiyedi, maa kar ulutade makun? Lo'o namlolo kokkoo ri man maki kan mori wali'ur, hi'ihepe hir hi'i ha onne?\*

<sup>30</sup> Lelere a'alam rin ken hi'i apinpinha mayai ono ai maham loloi kakaru Lira Wawa'an eniyeni. Ende lo'o ri man maki kan mori wali'ur, alhi'ihepeni ai me'enohi lernala apinpinha onne?

<sup>31</sup> Akilere ya'u lernala apinpinha mamani de manlo'o ya'u maki, maa ya'u kerhu mamani ono ainu'u honowok loikaru Yesus Lirna Wawa'an eni kan horu. Kokkoo, i wal'uhe! Ainu'u wanakunu eni, namlolo wake'e! Enla ya akin nahuwa'anedi ono mi penia akim naili'iledi Makromod Yesus Kristus me'e.

<sup>32</sup> Mai kota Epesus eni, ler ida ri nammori man ailanna lawuku leke hi'i apinpinha ya'u. Hi raisa ha mormori merwui man ken nesne ya'u. Enla lo'o wanakunu, 'Man maki kan mori wali'ur' namlolo kokkoo, apinpinha man ya'u lernala onne ka nala haida man wa'an maya'u. Lo'o namlolo, wa'an rehi ik lernohi lirna ma na'aheni,

"Ka'an komun leke lernala iknik wawa'an ke'e, ono oreki ik maki moluloinedi me'e." \*

<sup>33</sup> Yon hurinohi rin wukupoho mi! Yon derne makani ri man wukupoho nahenia ri man maki, kan mori wali'ur, kalo'o mim lernohi hi, de hi'i ha man ailanna haenhi.

<sup>34</sup> Heih! Mi mahinorokedi

\* **15:27** Mzm. 8:5 \* **15:29** Paulus nin kulere, ri heruwali akin naili'il nahenia ik ulutade ri man mormori herre man makiyedi me'e leke man maki onne ra'amori wali'ur. Mai eni Paulus ka na'aheni rir hini'i onne namlolo, ee sale, maa ai na'ahenia rir hini'i onne nodi kunukunohi maika na'ahenia hi rauroin nahenia ri man makiyedi mori wali'ur. \* **15:32** Yes. 22:13

here! Yono hi'i dohohala manani! Lolo mi, ri heruwali ka mauroin Makromod Lalap makun! Ya'u wakunu heheni leke hi'i wawwawa mi.

*Lere ik mori wali'ur, ik lernala kemen worworu*

<sup>35</sup> Enimaa lo'o ri aile ma na'ukani na'ahenia, "Man makiyedi enihe lo'o hi'ihehewi leke ra'amori wali'ur? Lo'o mori wali'ur hi kemen po'on hi'ihehewi?"

<sup>36</sup> Ri ma na'ukani heheni raploo rehi! Ri kemen man rawilo'edi namehi nano ri kemen man mori wali'ure. Ya ala wanakunu naho'ok ida nano minim kirna. Lere mim hap minim kirna, wini onne mim hape nanumene mori. Lo'o elimo'o kan damunedi wini onne, naisa ri man rawilo'edi, wini onne kan mori.

<sup>37</sup> Enla lere mim hap haida lolo kirna, mi kam loi ihin woin lolo elimo'o, maa mim hap wini mehe.

<sup>38</sup> Hapedi nanumene Makromod Lalap hi'i mori lernohi Nin raram nodi. Ende An hi'i keleuk nornoro kawin, dipin, wurna nano wini kele'uk eni, la An hi'i wini na'akeme namwali au or'ori man ik po'on ka namnehe.

<sup>39</sup> Ha man mormori na'akeme lolo noho wawan ik po'on ka namnehe. Ik po'on ri mormori kemen noro ha mormori kemen ka namnehe. Ik po'on ha mormori noro i'in ka namnehe, la ik po'on i'in noro manu liwliwar ka namnehe haenhi.

<sup>40</sup> Ha manin a'am noro ha manin mai noho wawan

eni, ka namnehe haenhi. Ha man minle a'am naisa wollo, lere, noro kaliyoro roponne ma'aruru, maa ka namnenehe noro noho wawan nina ha man ma'aruru.

<sup>41</sup> Lere hikanne namehi nano wollo roponne, woro'ohe roponne namehi nano kaliyore roponne, la kaliyoro na'akeme roponne ka ramnehe haenhi.

<sup>42-43</sup> Onne namnenehe noro ri man makiyedi lere hir mori wali'ur. Lere ik mori lolo noho wawan eni, ik kemen ka naruri la namehiyala. Iknik lere horu, ik kemen rawilo'edi la popedi, maa lere Makromod Lalap na'amori ika wali'ur, ik kemen lo'olo'ol onne herredi namwali kemen worworu ma naruri la ma'aruru wake'e. Enla kan maki la kan popo me'e.

<sup>44</sup> Ri kemen man rawilolo'o eni mai nano noho eni wawan, maa lere ika mori wali'ur, Roh Kudus nodi Nin ke'eke'el an'anha herredi ik kemen leke ik minle a'am raram. Lere eniyeni ik kemen mori mai noho wawan. Lere man mai ik kemen mori lolo a'am raram.

<sup>45</sup> Ende naisa horokedi lolo Horok Lap, Makromod Lalap umupala ri mormori dedesne ma naran Adam, la na'ori ai. \* Enimaa Kristus namwali Adam man kauli'ur. Ai penia ma nala or'ori dardari ma kan horu ri ma akin naili'il Ai.

<sup>46</sup> Makromod Lalap ka nala maika kemen man wa'an minle a'am raram nolu, maa dedesne Ai nala maika

kemen man wa'an minle  
noho wawan. Horu mene Ai  
nala kemen man wa'an minle  
a'am raram.

<sup>47</sup> Makromod Lalap nodi  
elimo'o umupala Adam ma  
namwali ri dedesne, maa  
Kristus ma namwali Adam  
man kauli'ur onne penia mai  
nano a'am raram.

<sup>48</sup> Ri na'akeme lolo noho  
wawan eni kemenhe raisa  
Adam nine, ono ik kamwali  
ai upun ananhe, maa ri  
na'akeme man du'ul kaliyedi  
roro Kristus me'e, raisa Kris-  
tus haenhi ono hir lernala  
kemen nano a'am raram.

<sup>49</sup> Ende ors eni ik po'on ik  
kemen kaisa Adam nonolu  
eni, maa lere man mai ik  
po'on ik kemen worworu  
kaisa Kristus ma nano a'am  
raram haenhi.

<sup>50</sup> Ende i wal'u na'ahoru!  
Ya'u konohi mi nahenia ri  
ihin kemen man minle mai  
noho wawan kan laa onno  
man Makromod Lalap nodi  
molollo raram, ono rakan  
lere ik kemen eni maki,  
popedi de namwaliyedi  
elimo'o me'e. Ik kemen noho  
wawan nine kan laa noho  
worworu ono noho worworu  
onne nin ha wo'ira mori laa  
ewi-ewi.

<sup>51</sup> Makaniyala ya'u taran  
nanu! Ya'u konohi mi ha  
man nonolu suwsuware,  
maa ors eni Makromod  
Lalap nalhariyedi me'e.  
Lere Makromod Yesus wali  
mai noho wawan wali'ur,  
ik eni heruwali kak maki  
makun, maa maika man  
makiyedi noro idewe ma kan  
maki makun eni, ik kemen  
na'akeme nahinerre.

<sup>52</sup> Rakan lere ik derne  
kowuri man kauli'ur lira,  
kamlilinnohi me'e'eni  
me'ede ik kemen nahin-  
erredi, de namwali kemen  
worworu. Ik dederne kowuri  
lilira, ri man maki enihe  
na'akeme mori wali'ur rodi  
kemen worworu man mori-  
mori laa ewi-ewi. Enla  
maika man mormori makun,  
ik kemen nahinerredi de  
namwali kemen worworu  
naise hi haenhi,

<sup>53</sup> ono ik kemen man  
elimo'e nana'an enihe  
herredi noro kemen man mai  
nano a'am raram me'e de kan  
maki me'e.

<sup>54</sup> Ende rakan lere ik  
kemen herredi, horhorok  
ma aile Horok Lap ra'akuku  
ra'anokoredi me'e. Horok  
onne na'aheni,

"Makromod Lalap na'amoluloinedi  
makmaki me'e, de ik  
mori laa ewi-ewi." \*

<sup>55</sup> "Heih! Makmakiye! Min-  
ima lewlewen ai ewi?  
Heih, makmakiye! O  
i'urn modi kadi ri ai  
ewi?" \*

<sup>56</sup> Naisa sayorne i'urnne  
kadi ri de maki, namnenehe  
onne dohohale nodi ik laa  
makmaki. Ri mormori  
na'akeme hi'i dohohala de  
na'akeme lernala hunukum  
makimaki. Makromod Lalap  
hukumedi ik ri mormori ono  
ik larlewenedi Nin keneri  
hono'ok me'e,

<sup>57</sup> maa ik kapanak trimkasi  
Makromod Lalap, ono Ai  
nala rehirehi kalukalu maika  
lolo ik Makromod Yesus  
Kristus Nin hini'i wenewhe.

<sup>58</sup> Ende i wal'u na'ahoru  
man ya aramyak enihe, yon  
mi akim nado'o, maa hi'i mi

\* 15:54 Yes. 25:8 \* 15:55 Hos. 13:14

akim namkene naili'il Ai maa mani. Yon maprehen, maa modi akim man mou howok Makromod Nina honowok mamani, ono mi mauroinedi me'e nahenia moro Makromod mamwali mahaku, de minim mahmaha awenne kan lolo leken, maa nala ihin ennen man wa'an wake'e ki mi.

## 16

*Paulus napanak manin Korintus puli kupan rala ma na'alehe naulinu lolo Yerusalem*

<sup>1</sup> I wal'u na'ahoru! Ik wakunu kupan man ik pupuli kala laa kerei raramne man aile Yerusalem. Ya apanak mim kakar pulipuli onne naise ya'u hopon kerei raramne ma aile Galatia kakare.

<sup>2</sup> Aki alam domeku mi dohodoho naleredi minim mahmaha ihin ennen heruwali la ma'akenedi modi weilapan ya'u ki mene mala maya'u. Hi'i heheni leke rakan lere ya'u ki enne, yono ya'u lapan minima pulipuli me'e.

<sup>3</sup> Ya'u rakanedi ki enne ne, nili ri ida woro'o man akin mou leke hi rodi kupan onne laa Yerusalem. Ya'u hopon hi rala minim pulipuli eni laa kerei raramne ma aile Yerusalem, la ya ala horok hi dohodoho leke manin Yerusalem kokala hi wawa'an.

<sup>4</sup> Rakan ki enne mene ya ala kenekrohu lo'o wa'an rehi yo oro hi laa wewerre, ee ka.

*Paulus konohi nin panaeku aimehi*

<sup>5</sup> I wal'uhe! Ainu'u panaeku ya'u kuli leke laa leke ma aile Makedonia nanumene ya'u ki enne ka'arala mi.

<sup>6</sup> Ya'u raram nodi oro mi minwuku nalo'ol tarana, lo'o rakan noho rinrinna (kahi anna nin lere alam) horu mene ya ala'ala noho namehin, leke mim pakuwala ya'u lolo ainu'u lalaa eni.

<sup>7</sup> Ors eni ka'u ki makun ono ya amhene ki ka'arala mi odi kalla pelekleke, maa ya'u raram nodi wali nano Makedonia nanumene ki enne. Lo'o Makromod nala leken maya'u harome, ya alo'olala tarana lolo onne mene ya ala'a ho'o.

<sup>8</sup> Enimaa ors eni ya'u minala mai Epesus eni rakan Lere Alam Lalap Pentakosta horu,

<sup>9</sup> ono Makromod hariyedi kalla mai eni leke ya'u howok Nina honowok mamani. Manina mai eni nammori kokaledi ainu'u honowok eni me'e, maa ri nammori ra'okul ya'u haenhi.

### *Timotius noro Apolos*

<sup>10</sup> Yono hi'i nahenia Timotius ki enne harome, kokala ai wawa'anedi leke yono akin tana ki mi, ono naise maya'u de an howok Makromod Nina honowok haenhi.

<sup>11</sup> Yono hi'i de rin po'on lewen ai, maa paku ai noro wawa'an leke pelek an wali wali'ur mai eni, ono ya'u mahu lapan ai noro ik walin ida woro'o namehin mai eni haenhi.

<sup>12</sup> Ik walin Apolos, ya a'ori honorokedi ai rewro'o rewkelu me'e leke noro man

howok wali namehin enihe  
ki ka'arala mi, maa ai akin ka  
namkene ki enne makun, de  
lo'o an lernala kalla mene ki.

*Lira man horu*

<sup>13</sup> Madiyakyaka mi  
wawa'an! Hi'i mi akim  
namkene naili'il mamani.  
Yono mi akim tana, maa  
madiyakyaka mi akim ma  
naili'il onne leke naruri  
kokkoo.

<sup>14</sup> Lolo minim hini'i we-  
newhe na'akeme, modi aki  
ma naramyaka ri mamani.

<sup>15</sup> I wal'uhe mauroinedi  
Stepanus noro nina nakar  
raram me'e. Mi mauroin na-  
henia hi akin naili'il Makro-  
mod Lalap noluwedni Akhaya  
ne'en raramne na'akeme. Hi  
akin namrana paku ilitolle  
Makromod Lalap Nina ri  
mememen mamani. Ende ya  
apanak an'anhedi i wal'uhe

<sup>16</sup> derne makani hi noro  
idewe ri na'akeme man roro  
hi howok wewwerre Makro-  
mod Lalap Nin honowok.

<sup>17</sup> Lere Stepanus, Portuna-  
tus, noro Akhaikus mai eni,  
ya akin nahuwa'an rehi. Hi  
rahinerre mi leke mai paku  
ya'u.

<sup>18</sup> Hi ra'alapedi ya'u hon-  
orok akin noro idewe mi  
honorok akin haenhi. Ri  
naise onnenihe, wa'an rehi  
ik horhawe.

<sup>19</sup> Kerei manina propinsi  
Asia na'akeme rala tape  
masi ki mi. Akwila, Priskila  
noro kerei raramne man  
pakromo lolo rir nakar, hi  
na'akeme aku rira tape masi  
ki mi ono moro Makromod  
mamwaliyedi mahaku me'e.

<sup>20</sup> Mi walin ma akin naili'il  
na'akeme ma aile mai eni,

rala rira tape masi ki mi  
haenhi. Lere mim pakromo  
wuku, mi ida ma nala tape  
masi ida modi honorok aki  
man mou.

<sup>21</sup> Ya'u, Paulus, mehe horok  
ainu'u tape masi eniyeni: "Ya  
ala ainu'u tape masi ki mi  
na'ahoru."

<sup>22</sup> Inhoi ka naramyaka  
Makromod Yesus, na'amoli  
Makromod Lalap nakineri  
hi. *Maranata!* Ik Makromod  
mai!

<sup>23</sup> Na'amoli Makromod  
Yesus nala nina rere'e ha-  
harue ki mi!

<sup>24</sup> Ya araramyak mi  
na'akeme lolo Yesus Kristus.  
Ainim tape masi,  
*Paulus*

## 2 Korintus

### *Horok Lirna La'an*

Paulus namwali ri dedesne man loikaru Lira Wawa'an laa manin kota Korintus (HN. 18:1-17). Paulus laa Korintus wakuku manin Korintus nanumene namhara laa onno namehin. Lere Paulus aile noho namehin, manin Korintus heruwali ra'okuledi Paulus noro nin molollo, de hi ra'aheni ai ka namwali Makromod Yesus Nin hophopon ma namlolo. Ende Paulus hopon nin man howok wali Titus laa Korintus. Titus nodi Paulus lirna man apinha rodi nounaku manin Korintus ma na'okuledi nin molollo me'e. Lere Titus wali mai nano Korintus pakromo noro Paulus lolo Makedonia, an konohi Paulus nahenia ri Kristen lolo Korintus nammori herredi rir honorok panaeku ma ka namlolo de ka ra'okul Paulus nin molollo me'e, maa hi rapanak an'anhedi leke Paulus lan ka'arala hi wali'ur. Enimaa ri Kristen heruwali akin kerhe. Kade hir derne Paulus nin nounaku, maa hi ramhene derne rakani Paulus nin molollo.

Titus mai Paulus wakunu wanakunu onne mene Paulus hi'i horok eniyeni man rin wekel horok rewro'o nine man Paulus aku laa kerei raramne ma aile Korintus.

Lolo horok eniyeni an konohi hi'ihehewi an loikaru Lira Wawa'an lolo noho nammori (2:14-6:10). An wakunu nahenia ai naramyak hi rehirehi (6:11-13; 7:2-4, 13-16), la ai na'aheni ai akin

nahuwa'anedi ono derne nahenia hir herredi rir honorok panaeku ma ka namlolo la wali wali'ur derne rakani nin molollo me'e (7:5-13).

Onne horu, ai napanak hir puli kupan leke lere an rakan rir kote, kupan ra'akenedi leke rodi laa ri Kristen ma na'alehe naulinu man minle noho Yudea (pnk. 8-9). Lolo horok honon, ai nodi lira apinha wali'ur nounaku ri ma kan derne rakani ai makun enihe (pnk. 10-13).

### *Horok Ihin*

1. Paulus nala lira man hari horok la konohi hi'ihehewi Makromod Lalap na'alap ik akin lere ik lernala wewerek pananaka (1:1-11).
2. Paulus konohi hi'ihehewi an herredi nin panaeku laa ka'ar hi, an konohi nin honowok loikaru Makromod Lalap Lirna Wawa'an eni, la napanak hi herredi rir honorok panaeku ma ka namlolo leke rahuwa'an wali'ur noro ai (1:12-7:16).
3. An wakunu panaeku puli kupan aku laa ri ma na'alehe haida-haida lolo noho Yudea (pnk. 8-9).
4. Paulus wakunu panaeku ma na'ono hi'ihepe ai namwali Makromod Yesus Nin hophopon ma namlolo, laa an nounaku wali'ur ri ma na'okuledi nin molollo (10:1-13:10).
5. Paulus nala tape masi man horu (13:11-13).

*Paulus nala nina hiyene  
arore laa manin Korintus*

<sup>1</sup> Konohiyala kerei raramne ma aile Korintus noro idewe Makromod Lalap Nin ri mememen ma aile nohorai Akhaya na'ahoruwed! Ya'u eni Paulus. Makromod Lalap kikan ya amwali hophopon ma nodi Kristus Yesus Lirna Wawa'an lernohi Nina honorok panaeku aimehi. Yo oro ik walin Timotius aku horok eni maiyala ki mi.

<sup>2</sup> Ai mapanak Makromod Lalap ma namwali iknik Ame, noro ik Makromod Yesus Kristus na'amoli rala rere'e haharu noro wawa'an rara'e ki mi.

*Makromod Lalap namkene  
na'alapa ika ma akin naili'il Ai*

<sup>3</sup> Ka'uli kasa'a Makromod Lalap, ik Makromod Yesus Kristus Aman. Mai ka'uli kasa'a Ai ono Ai penia ik Amad ma namkene kukul Nina aki man wa'an maika, la ik Makromod Lalap ma namkene na'alapa ik akin mamani.

<sup>4</sup> Lolo ainima sus wo'ira, Ai na'alapa ai akim mamani, leke ai maruri ma'alapa ri namehin akin lolo hirira wewerek pananaka haenhi.

<sup>5</sup> Memen, naisa Kristus lernaledi apinpinha mamani, am lernala mamani haenhi, maa Makromod Lalap na'alapa ai akim nammori rehi haenhi, ono ai moro Kristus mamwali mahaku.

<sup>6</sup> Ende lere am lernala wewerek pananaka, Makromod Lalap nair wewerek

pananaka onne leke ai mau-roin hi'ihehewi leke ma'aruri ma'alapa mi akim la paku mi lernala or'ori dardari. Lere Makromod Lalap na'alap ai akim, onne na'alap mi akim haenhi ono mi mauroinedi An paku mayai lolo ainim wewerek pananaka onne. Enpenia mi akim namkene kerhu apinpinha naise mayai haenhi.

<sup>7</sup> Enla ai mauroinedi mim kerhu lolo minim wewerek pananaka wo'ira, ono ai mauroin nahenia lere mim lernala apinpinha naise mayai, Makromod Lalap lo'o na'alapa mi akim naise mayai haenhi.

<sup>8</sup> Ai walin na'ahoru, ai raram nodi mi mauroin nahenia am lernala wewerek pananaka nammori lolo propinsi Asia. Wewerek pananaka am lernanala onne werek wake'e, penia ai mauroin nahenia lo'o am maki me'e, ono ai ka maruri kerhu me'e.

<sup>9</sup> Namlolo kokkoo, am pene'ek ka nalo'ol am maki me'e, maa onne na'akeme namwali leke yono am pu'ik ainima ruri aimehi, maa pu'ik mehe Makromod Lalap ma nodi molollo na'amori ri man makiyedi me'e.

<sup>10</sup> Lere onne Ai penia ma nahaledi mayai nano wewerek pananaka onne, penia ka resnai, la am pu'ik heli Ai mamani, ono ai mauroin Ai namkene nahalai nano wewerek pananaka na'akeme rakan lere li'ur haenhi.

<sup>11</sup> I wal'uhe, ya apanak mim hi'i lir napanak Makro-

mod Lalap mamani leke An  
paku mayai lolo wewerek  
pananaka onne. Ai mauroin  
nahenia lo'o ri nammori hi'i  
lir napanak mayai, Makro-  
mod Lalap namre'e namharu  
mayai penia ri nammori  
rapanak trimkasi Ai haenhi.

*Paulus herre wali'ur nina  
panaeku nala'a laa Korintus*

<sup>12</sup> I wal'u na'ahoru! Ai  
kam nair ri mormori rir  
woroin hi'i ha man wa'an  
lolo mi kalarna, maa am  
nair woroin man Makromod  
Lalap kan ren nala mayai  
lolo Nin rere'e harharu eni.  
Ai akim nahuwa'an ono ai  
mauroin nahenia ai honorok  
akim moumou, la ai mauroin  
ainim hini'i wenewhe lolo  
mi noro idewe ainim ri  
mormori wali leken kalarna  
ahuwa'an Makromod Lalap  
akin.

<sup>13-14</sup> Enpenia ainim horok  
man am a'aku ki mi eniyeni  
kan sus mi mauroin, maa  
am horok ha man mouropo  
leke mauroin idewe. Kade  
am hi'i horok ma kan sus  
mi mauroin, maa ors eni  
mi lo'o ka mauroin ha  
ida woro'o makun, de ai  
mapanak nahenia lere man  
mai mi mauroroin ainu'u  
panaeku eniyeni mouropo.  
Ai mapanak eniyeni leke  
lere Makromod Yesus mai  
noho wawan wali'ur, mi  
akim nahuwa'anedi ono  
mi mauroinedi mayai ri  
ma namlolo, naise ai akim  
ahuwa'anedi ono mauroin  
ai walinhe ri ma namlolo  
haenhi.

<sup>15-16</sup> Ya auroinedi mi akim  
nahuwa'an noro mayai, de  
nonolu ainu'u panaeku ki  
ka'arala mi nanumene ya'u  
laa Makedonia, la ainu'u  
panaeku wali nano Make-  
donia mene ka'arala mi  
wali'ur, leke paku mi. Ainu'u  
panaeku lolala minim noho  
leke lo'o mim pakuwala'u  
lolo ainu'u kalla laa Yudea  
haenhi.

<sup>17</sup> Enimaa ainu'u panaeku  
onne herredi me'e! Enpenia  
lo'o mi mahinorok nahenia  
ainu'u honorok panaeku ka  
namkene? Lo'o mi mauroin  
nahenia ya'u lernohi ainu'u  
honorok panaeku aimehi?  
Lo'o mim pene'ek ler ida  
ya a'heni, "Ya'u hi'ie," maa  
lolo honorok akin, "Ka'u hi'i  
me'e!"

<sup>18</sup> Ka'u paeku heheni!  
Makromod Lalap penia  
namkene hi'i Nin nou maika  
namwali. Namnenenehe onne  
haenhi, ai mammene hi'i  
ainim nou ki mi namwali, la  
ai kam ken paipudi mi.

<sup>19</sup> I wal'u na'ahoru, yo  
oro Timotius noro Silas  
loikaru Lira ma na'ono  
Makromod Lalap Anan Yesus  
Kristus,\* la Ai namkene hi'i  
lernohi Makromod Lalap  
Nin panaeku mamani, de ler  
ida Ai ka na'henia, "Onne  
namlolo," la lere name-  
hin herredi Nin panaeku  
na'heni, "Onne ka namlolo."

<sup>20</sup> Makromod Lalap nala  
nou nammori rehi† maika, la  
ik kauroin Nin nou na'akeme  
onne namwali ono An hi'i  
Nin nou na'akeme namwali

\* **1:19** Po'onala HN. 18:5. † **1:20** Leke mauroin nou onne wekel inhawa nou  
po'onala: NN. 12:1-3; Ul. 18:15; 1Taw. 17:11-14; Yes. 9:6-7; Mzm. 2:6-7; Dan. 9:25.

kokkoo lolo Yesus Kristus  
Nin hini'i wenewhe! Onne  
penia ik ka'heni, "Namlolo  
kokkoo! Amin!" leke  
ka'akulu ka'alapa Makromod  
Lalap Oin Naran.

<sup>21</sup> Enla Makromod Lalap  
penia man hi'i ik akin  
namkene naili'il Kristus,  
la hi'i ik koro Ai kamwali  
mahaku. Ai mehen kikan ika  
kamwali Nina ri mememen,

<sup>22</sup> la Ai nala Nina Roh minle  
ik akin leke namwali tanada  
nahenia ik kamwaliyedi Nin  
ri. Nin Roh onne na'ono naw-  
inauwedi Nin nou maika,  
leke ik kauroin kokkoo lere  
man mai Ai nala ha wo'ira  
na'akeme man An nouwedi  
me'eni maika.

*Ri Korintus hi'i ha ma ka  
namlolo de hi'i Paulus akin  
sus wake'e*

<sup>23</sup> I wal'u na'ahoru, nam-  
lolo kokkoo lere nonolu onne  
ka'u wali wali'ur ki Korintus  
leke yon yo odi lira apin-  
pinha dadiyala mi de hi'i mi  
akim sus. Makromod Lalap  
namwali man kuku maka  
nahenia ainu'u wanakunu  
eniyeni namlolo, ono Ai  
mehe nauroin ya akin.

<sup>24</sup> Ai mamhene modi lir  
apinpinha hopon mim hi'i ha  
man wa'an, ono ai mauroin  
nahenia mi akim namkene  
naili'il Yesus ma namwali  
Kristus me'e, maa aim  
panaeku pakuwala mi leke  
mi akim nahuwa'an la eren  
namkene nailili'il.

## 2

<sup>1</sup> Ende ya aledi kenekrohu  
me'e ka'u ki ka'ar mi makun,  
ono ya amhene hi'i mi sus  
naise lere man laedi me'e.

<sup>2</sup> Lo'o ya'u hi'i mi akimhe  
woir, inhoi lo'o nahuwa'an  
ya akin ho'o? Ri kaale! Mi  
penia ma nahuwa'an ya akin,  
de ya amhene hi'i mi akim  
woir wali'ur!

<sup>3</sup> Ende ka'u ki makun, maa  
ya'u hi'iyedi horok aku kiyedi  
me'e leke mim herre minim  
hini'i wenewhe man ailanna  
onne. Ya'u hi'i heheni leke  
lere ya'u ki ka'ar mi wali'ur  
haromo, mi kam hi'i ya akin  
woir me'e, maa hi'i ya akin  
ahuwa'an ono mim renedi  
minim hini'i wenewhe onne  
me'e. Ya auroin nahenia  
lo'o ya akin nahuwa'an, mi  
na'akeme akin nahuwa'an  
haenhi.

<sup>4</sup> Lere ya'u hi'i horok eni yo  
odi aki man woir rehi noro  
sus mak oir mamani. Ya  
amhene hi'i mi akim woir  
noro ainu'u horok eniyeni,  
maa ya aku horok eni ki  
leke mi mauroin nahenia ya  
aramyaka mi rehi la ya akin  
ka nahinuri mi.

*Kala ampun ri man hi'i  
sala maika*

<sup>5</sup> I wal'uhe, ri man hi'i do-  
hohala nonolu eni, namlolo  
kokkoo an hi'i sala. Ai kan  
hi'i ya akin woir mehe, maa  
an hi'i mi na'akeme akin  
woir haenhi. Ee, lo'o wa'an  
rehi yon ya aheni an hi'i  
mi na'akeme sus, maa an  
hi'i heruwali sus, kalo'o ya'u  
wakunu a'uwaliwali.

<sup>6</sup> Mi ri nammori kukuledi  
nina sale de hukumedi ai  
me'e. Ya'u konohi mi nahenia  
hunukum man mamale onne  
nokoredi me'e.

<sup>7</sup> Enla ya apanak mala  
ampun ri man hi'i dohohala  
onne la ma'alap ai akin,

kalo'o ai akin woir rehi de na'alehe ya'ar me'e.

<sup>8</sup> Onne penia ya apanak an'anchedi mim kukul aki man wa'an ri onne, leke ai nauroin kokkoo mi maramyaka ai.

<sup>9</sup> Lolo ainu'u horok nonolu onne, ya'u hopon mi mala hunukum ri man sala onne, la ya'u akuwedi horok onne leke ya auroin mim lernohi ainu'u honopon onne, ee ka! Enla namlolo kokkoo mim lernohiyedi ainu'u honopon onne me'e, de yon ma'uwali hunukum me'e.

<sup>10</sup> Lo'o mi mala ampun ri man hi'i sala onne, ya ala ampun ai haenhi. Namlolo kokkoo nin sala maya'u kan werek rehi. Kristus nauroin yo odi aki man mou aledi ampun nin dohohala maya'u me'e. Ya ala ampun ai leke mi moro ai mamwali mahaku wali'ur.

<sup>11</sup> Onne penia ya aheni wa'an rehi ik kala ampun ri onne, leke yon ik kala leken Hayakyak Makromon nair ika hi'i nin panaeku, ono ik kauroin kokkoo ai raram nodi nano'onyaka maika.

*Paulus ma'irhu ono Titus ka nodi lir nano Korintus mai makun*

<sup>12</sup> I wal'uhe, lere ya amhara Epesus, ya ala'a laa Troas leke loikaru Lir Wawa'an ma na'ono Kristus lolo onne. Makromod hariyedi kalla maya'u leke howok lolo onne,

<sup>13</sup> maa ya'u honorok akin ka namkene ono ka oro ik walin Titus pakromo lolo Troas makun, de ka'u derne lir man ai nodi nano Korintus

makun. Kame'ede ya'u konohiyala i wal'uhe lolo onne mene ya amhara ala'a laa Makedonia.

*Makromod kikan Paulus nodi Lir Wawa'an eni*

<sup>14</sup> Enimaa ya apanak trimkasi Makromod Lalap man rehiyedi Nin arwali na'akeme lolo Kristus! Ai norle'ule'u norwaliwali yai penia ainima arwali kan kawala mayai ono moro Kris-tus mamwaliyedi mahaku me'e, la Makromod Lalap nair mayai leke am loikaru Lirna Wawa'an ma na'ono Kristus lolo ewi-ewi, penia ri nammori derne rakani la rauroinedi Ai me'e! Ai Lirna Wawa'an onne naise ha wala'ula'u man hi'i ri nammori akin nahuwa'an.

<sup>15-16</sup> Lolo Makromod Lalap kalarna ai maise au mo'oni ra'in ma nahuwa'an Makromod Lalap akin. Ai penia man hopon am loikaru Lirna Wawa'an ma na'ono Kristus laa ri mormori na'akeme, man lernala or'ori dardari noro idewe man lolo kalla laa yakanne. Enla ri man lolo kalla laa yakan onnenihe, lo'o hir derne anim wanakunu, hir pene'ek anim wanakunu onne naisa ha mormori maki man pusuk wake'e, ono am kukunohi nahenia hir lernala hunukum nano Makromod Lalap. Enimaa ri man lolo kalla ma nala or'ori dardari onnenihe, lo'o hir derne anim wanakunu hi rauroin ma'aruru wake'e, naise ha man wala'ula'u ma'aruru ono am kukunohi nahenia Lirna onne ma nala

or'ori dardari ma kan horu hi.

Honowok eni werek rehi de inhoi lo'o naruri nampe'el howok honowok enie?! Lo'o Makromod Lalap kan paku maika lolo honowok eniyeni, ri mormori mahaku kaale ma naruri howok honowok eni!

<sup>17</sup> Ri nammori aile man loikaru Makromod Lalap Lirna Wawan, maa rodi ranoin kupan mehe. Ai kam hi'i heheni! Ai moro Kristus mamwali mahaku me'e, de am loikaru Makromod Lirna Wawan modi honorok moumou aki moumou. Makromod Lalap mehe do'on la nauroin ai akim ono Ai penia man hopon mayai loikaru Lira Wawa'an eni.

### 3

*Ri Korintus enihe raisa horok ma na'uli Paulus la man kukunohi nahenia an hi'i Makromod Lalap Nin honowok wawa'an*

<sup>1</sup> I wal'u na'ahoru! Yonde mi mahinorok nahenia ai mehe ma'uli yai harome! Ai ka maise man panulu namehin man kiyedi minim kote. Lere hir rakan, hir alhari horok ma na'uli hi kemen man hir lernala nano ri namehin leke mim kokale wawa'an. Enla lere hi ramhara minim kote lo'o hi rapanak mim hi'i horok ma na'uli hi leke rodi laa onno namehin wali'ur! Kade ai ka modi horok ma na'uli mayai naise hi, maa mim kokala mayai wawa'an!

<sup>2</sup> I wal'uhe mehe mamwali anim horok ma na'uli mayai, man aile ai akim! Enla lolo ewi-ewi, ri na'akeme rauroin nahenia minim

mormori namlolo la mim kokala Lira Wawa'an onne wawa'anedi, de onne nodi kunukunohi nahenia am ilitolle Makromod Lalap Nin honowok wawa'an wake'e lere am loikaru Lirna onne ki mi eni.

<sup>3</sup> Mi mamwaliyedi Kristus Nin horok ma na'uli mayai, ono mi mamwali anim honowok ihin ennen man rin po'on wa'an. Kristus ka nodi tintan hi'i horok eniyeni, maa Makromod Lalap man mori laa ewi-ewi Nin Roh howok lolo mi raram penia mamwali Nin horok! Ai kan horok lolo waku naise man nonolu Ai nala Musa, maa An horokedi lolo mi akim mehe!

<sup>4</sup> Ai ka mamkauk wakunu heheni ono ai moro Kristus mamwaliyedi mahaku me'e, la ai mauroin nahenia Makromod Lalap mehe nala molollo mayai howok Nin honowok.

<sup>5</sup> Ai ma'alehe ya'ar nahenia anima woroin noro ruri aimehi man hi'i honowok eniyeni, maa Makromod Lalap mehe nala woroin noro ruri pe'el leke ai maruri hi'i onne.

<sup>6</sup> Ai penia ma nala woroin noro ruri pe'el mayai leke ai maruri modi Nina Nou Worworu eni loikaru ri. Nou Worworu eni namwali kalla worworu leke ik kamwali ri molololo Makromod kalarna, maa ka namnehe noro keneri hono'ok ma namwali Nou Nonolu eni, ono lolo Nou Worworu eniyeni Makromod Lalap Nin Roh nala or'ori dardari maika. Enimaa Nin Nou Nonolu eni nou nahenia inhoi larlewenedi keneri

hono'ok ida mehe, an lernala hunukum makmaki.

*Nou Worworu wa'an narehi Nou man nonolu Musa horok lolo keneri hono'ok*

<sup>7</sup> Nonolu Makromod Lalap horok Nin Nou ma namwali keneri hono'ok lolo waku, la nale Musa leke rala leken ri mormori ramwali ri molololo Makromod Lalap leken kalarna. Lere Musa nodi waku onne mai nala ri Yahudi, Makromod Lalap Nina siksika lerlere sika idewe lolo Musa oin makan. Siksika lerlere onne allelele penia ri Israel kar kerhu po'on Musa oin makan, maa siksika lerlere onne ka namkene allelele mamani, ono eren nalolo'ol eren momolu hehen nanumene molu horu. Kade Nou Nonolu onne nala hunukum makmaki ri mormori ma kan derne nakanie, maa ik kauroin nahenia Makromod Lalap Nin hini'i nala nou onne lewlewen wake'e penia hi'i rin do'on Nin ke'eke'el an'anha lolo Musa oin makan man siksika onne. Ende lo'o Nin Nou Nonolu onne kukul Makromod Lalap Nin ke'eke'el an'anha heheni,

<sup>8</sup> emene hi'ihehewi noro Nin Nou Worworue?! Nin Nou Worworu kukul Nin ke'eke'el an'anha ma narehi narewen wake'e,\* ono lolo Nou Worworu onne, Nin Roh mori lolo ik akin la nala or'ori dardari ma kan horu maika.

<sup>9</sup> Nonolu ri Yahudi larlewenedi Nin Nou Nonolu onne, de hir lernala hunukum rako'uwedi Makromod Lalap me'e. Kade

onne namlolo, maa lere hir kokala Nou onne hir do'on Musa oin makan siksika lerlere de rauroin Makromod Lalap Nin Nou onne nodi molollo man lap. Emene hi'ihehewi lere rin derne Nou Worworu man hi'i hi ramwali ri molololo Ai leken kalarna wali'ur!? Rin do'on rauroin nahenia Nou Worworu onne nodi molollo man lap wake'e!

<sup>10</sup> Namlolo kokkoo keneri hono'ok nodi molollo man lap, maa lo'o ik hoiwuku keneri hono'ok onne noro Nou Worworu eniyeni, onne naise keneri hono'ok ka nodi molollo wake'e. Keneri hono'ok onne naise palite, maa Nou Worworu naise lere man ha'edi me'e penia kak do'on palite lerne me'e.

<sup>11</sup> Enla lo'o keneri hono'ok ma namwali Nou Nonolu onne nodi molollo man lap penia hi'i Musa oin makan siksik lerlere, kade kar nair nalo'ol, emene hi'ihehewi Nou Worworu ma namkene laa ewi-ewi ho'o!?! Nou Worworu nina ke'eke'el an'anha noro nina molollo narehi narewen wake'e!

<sup>12</sup> Ende ai mauroin kokkoo nahenia Nou Worworu onne namkene laa ewi-ewi, de ai ka mamkauk loikaru Lira Wawa'an eni mouropo.

<sup>13</sup> Ai kam suwar haida! Ai kam hi'i naise Musa ma nodi tapi pasunedi oin makan leke yon ri Israel po'on rauroin nahenia nin siksika lerlere molumolu me'e.

<sup>14</sup> Enla ri Yahudi onnenihe rir honorok panaeku

\* **3:8** Ul. pnk. 28 kukunohi maika inhawa man Nou Nonolu onne nala ri man lernohie. Nou onne ka nala ri or'ori dardari ma kan horu, maa nala wawa'an rara'e inhoi man lernohie.

## 4

*Ri man kokala Lira  
Wawa'an lernala ropropo*

<sup>1</sup> I wal'u na'ahoru! Makromod Lalap kukul Nin aki man wa'an mayai, de kikan mayai mamwali man loikaru Lirna onne. Onne penia ai akim kan tana, la ai ka mamka'uk hi'i honowok eniyeni.

<sup>2</sup> Nano lere dedesne ai mamhene lolo kalla ma nasinuwari man hi'i wawawa ri. Ai ka modi kalla naise onneni hi'i ri derne ainim wanakuku. Lolo ainim honowok eni, ai kam paipudi ri, la kam herre Makromod Lalap Lirna Wawan, maa am wakuku mouropo panaeku ma namlolo mamani. Am ilitolle Makromod Lalap Nina honowok nair modi honorok aki man mou, leke ri na'akeme do'on rauroin nahenia ainim wanakuku onne namlolo kokkoo lolo Makromod Lalap leken kalarna.

<sup>3</sup> Kade am hi'i heheni, maa ri aile ma ka nauroin Lir Wawa'an man am loloi kakaru eni. Onne namwali ono hi aki kerhe de honorok aki na'inelekedi me'e. Hi ramhene aki naili'il Makromod Lalap, de aiyedi lolo kalla man laa yakan me'e.

<sup>4</sup> Hayakyak Makromon ma nodi molollo noho wawan eni, an elekedi ri ma aki ka naili'il enihe honorok aki me'e, leke yono rauroin Lira Wawa'an ma na'ono Kristus Nin morimori man ma'aruru wake'e. Ende Lira Wawa'an onne ka nala ropropo hi penia ka rauroin nahenia Kristus Nin morimori man ma'aruru wake'e

el'elek, ono honorok akin na'inelnelek makun, naise ri oin makan ma rodi tapi pas-pasune, de rakan lere eniyeni lo'o hir lese horok man aile Nou Nonolu onne raramne, hi ka rauroin panaeku ida nano Makromod Lalap Nin Nou Worworu eni. Hi honorok akin elekedi hehen nanumene hi lo'o akin naili'il Kristus, la An hariyala hirira honorok panaeku penia rauroin Makromod Lalap Nina Nou maika onneni.

<sup>15</sup> Namlolo! Rakan lere eni hir lese Musa nina horok, onne naise tapi rodi el'elek hi honorok akin de ka rauroin panaeku ma namlolo,

<sup>16</sup> maa lo'o hi aki naili'il Makromod, onne naise tapi raledi nano hi oin makan me'e, de honorok panaeku ka na'inelek me'e.

<sup>17</sup> Lolo wanakunu eniyeni lirna ma na'aheni 'Makromod' onne, wekel Makromod Nin Roh. Enla lo'o Makromod Nina Roh aile lolo ik raramne, ik kahinuriyedi nano Yahudi rir holoor halauk na'akeme eni.

<sup>18</sup> I walin ma aki naili'il na'ahoru! Ors eni ha man elekedi ik honorok akin onne hariyedi me'e, de ik kamwali kokaka oi man kukul Makromod Kristus Nin ke'eke'el an'anhe ma narehi nalewen eni leke rin do'on. Enla Ai nala Nin Roh na'aromo ik raram leke nodi Nin molollo man lap hi'i iknik morimori eren naise Kristus Nina morimori, penia lo'o rin do'on iknik morimori, hi eren rauroroin Nin ke'eke'el an'anha ma narehi nalewen onne.

onne namnenehe Makromod Lalap Nin haenhi.

<sup>5</sup> Ai ka maderre madaul Lira Wawa'an eni leke ai naram pe'er, maa ai maderre madaul Lira ma na'aheni Yesus Kristus namwali Makromod. Enla ai mamwali minim hophopon wahwahan lernohi Yesus Nin honopon.

<sup>6</sup> Am hi'i heheni, ono lere Makromod Lalap na'akuku noho na'aleu a'am An hopen na'ahenia, "Roprope ro-pedi lolo metmetek me'e," la lere eniyeni me'ede An hi'i Nina reprope na'aropedi ik akin me'e, penia ik honorok akin mou, de ik kauroin Nina molollo ma narehi nalewen man An kukul maika lolo Kristus onneni.

*Kade ai kemenhe ka naruri, maa Makromod Lalap nala ruri pe'el mayai loikaru Lirna Wawa'an eni*

<sup>7</sup> Mayai mamwali ri ma nadedem mehe, de ai kemen naisa e'enoir ma ka naruri, maa ai modi Lira Wawa'an man wella ai wawan wake'eni. Enpenia rin po'on rauroin Makromod Lalap mehe nala Nin ke'eke'el an'anha ma narehi ma nalewen mayai. Onne nodi kunukunohi nahenia ai ka modi ainim molollo aimehi hi'i honowok eniyeni, maa Makromod Lalap penia ma nala molollo mayai.

<sup>8</sup> Mi mehem po'onedi lolo ewi-ewi ha wo'ira kerne dalha mayai mamani, maa Makromod Lalap kan hurnohi rehiyedi yai. Lere romromo ai ka mauroin hi'i inhawa, maa ai mauroin

kokkoo nahenia Makromod Lalap norle'ule'u norwali-wali yai mamani.

<sup>9</sup> Lere romromo rin hi'i apinpinha mayai, maa Makromod Lalap kan huri we'er ai! Lere namehin rin riuk rerhe mayai, maa ai kam maki!

<sup>10</sup> Lolo ewi-ewi ai mauroin nahenia ri aile man ken nesne mayai ono am lernohi Yesus, naise hir hi'i noro Ai haenhi. Onne namwali leke kukunohi ri nahenia Yesus mori lolo ai kemmu, ono hir do'on Nin ke'eke'el an'anha paku mayai mamani!

<sup>11</sup> Lolo ainima morimori am lernala sus man werek wake'e, manlo'o am maki ono am loikaru Yesus Lirna Wawa'an eni. Onne namwali leke kukunohi ri na'akeme nahenia Yesus mori wali'ur la Ainin ke'eke'el an'anha howok mamani lolo ai kemmu ma ka naruri eniyeni.

<sup>12</sup> Ende akilere am pakromo noro ri man hi'i apinpinha la ken resne mayai, maa kan hi'i haida, ono nano ainim honowok eniyeni mim lernala or'ori dardari ma kan horu eni.

<sup>13</sup> Ri aile man horokedi lolo Horok Lap raram na'ahenia, "Ya akin naili'il Makromod Lalap de ka amka'uk wakunu." \*

Namnenehe ri onne, ai akim naili'il Makromod Kristus la ai mauroin kokkoo Ai namkene paku mayai, de ai ka mamka'uk loikaru Lira ma na'ono Ai.

<sup>14</sup> Am hi'i heheni ono ai mauroin nahenia Makromod Lalap ma na'amoriyedi Yesus nano Nin makmaki, lere man

\* 4:13 Mzm. 116:10

mai na'amori mayai nano anim makmaki haenhi, leke ai moro Yesus mori wewerre, la lere onne An hi'i ik na'akeme kamriri wewerre lolo Ai leken kalarna.

<sup>15</sup> Am lernala apinpinha wo'operperi na'akeme onne leke paku mi mauroin Kris-tus wawa'an. Am mori heheni leke ri man derne rauroin Makromod Lalap Nin Nou Worworu ma nala or'ori dardari ri, eren nam-momori, penia hi rapanak trimkasi Makromod Lalap mamani, la eren ra'akukulu ra'alalapa la ra'u'uli rasasa'a Oin Naran mamani.

<sup>16-17</sup> Ende ai akim kan tana, ono ai mauroin rin eren nammomori lernohiyedi Kristus me'e. Lo'o am hoiwuku apinpinha man am lernala lere eniyeni noro rere'e harharu onneni, ai mauroin kokkoo apinpinha eniyeni kan werek wake'e la ka nalo'ol me'e horu. Enla ai mauroin nahenia apinpinha onne nala ha wawa'an mayai, ono lere man mai am lernala or'ori dardari man ma'aruru wake'e. Kade mayai kemen eren ka naruri ono lernaledi apinpinha nammori me'e, maa ai akim eren naruri naili'il ono akilere Makromod Lalap na'alap ai akim mamani.

<sup>18</sup> Ende am loi honorok ha man ri mormori kan dodo'on naise or'ori dardari ma kan horu eni! Enla ai kam peinohi ha ma nadedem rin dodo'on lolo noho wawan eni, de ai kam peinohi apinpinha onne! Am hi'i heheni ono ha man ik dodo'on onne ka nalo'ol moluwedi me'e,

maa ha man ik kak dodo'on kan molu laa ewi-ewi.

## 5

### *Kemen worworu*

<sup>1</sup> I wal'u na'ahoru! Ik kauroin nahenia ik kemen eni naise heuheu man ik holi mai noho eni wawan. Enla ik kauroin nahenia lere iknik heuheu eniyeni yakedi, Makromod Lalap mehe hi'i nakar worworu nala maika, la nakar onne minle a'am raram laa ewi-ewi. Onne nin panaeku lere ik maki, Makromod Lalap nala kemen worworu man mori laa ewi-ewi maika.

<sup>2</sup> Lelere a'alam ik mormori lolo noho wawan eni, ik ka'adidi rehi, la ik raram nodi herredi kemen lo'olo'ol eni noro kemen worworu man aile a'am raram eni.

<sup>3</sup> Ik raram nodi herredi kemen eniyeni noro kemen worworu me'e, leke yon ik kamwali hamaran ma na'alehe kemen, de kaise ri ma kan nair nainair.

<sup>4</sup> Ik mormori kodi kemen lo'olo'ol eniyeni makun, ik ka'adidi ono lernala wewerek pananaka nammori. Ka a'aheni ik raram nodi maki leke hoikaru kemen lo'olo'ol eniyeni, ka! Wa'an rehi yon ik maki, maa ik kemen eni herredi idewe noro kemen worworu ma nano a'am raram. Ik raram nodi onne namwali leke ik kemen man maki moluloinedi eni idewe herre noro kemen man mori laa ewi-ewi!

<sup>5</sup> Makromod Lalap mehen paekuwala ha eniyeni na'akeme, la Ai penia ma na'akenedi maika leke lere man mai maika lernala kemen worworu. Enla Ai

nala Nina Roh maika leke namwali tanada nahenia namlolo kokkoo lere man mai An hi'i Nin nou onne na'akeme namwali.

<sup>6</sup> Onne penia ai akim namkene mamani, la ai akim ka nado'o me'e. Ai mauroiroin nahenia lo'o am mormori mai noho wawan eni, ai kam min noro Makromod lolo a'am raram makun.

<sup>7</sup> Onne penia lere am mori mai noho eni wawan ai kam do'on noho wawan nin ha wo'ira, maa ai akim naili'il Kristus mehe.

<sup>8</sup> Ende ai akim ka nado'o la ka mamka'uk maki, la ai raram nodi mahinuriyedi nano kemen nadedem eni, leke min wewerre noro Makromod!

<sup>9</sup> Onne penia lo'o am holiholi mai noho eni makun, ee moro Ai holi wewerre lolo a'am raram, ai mahehe kokkoo leke ainim hini'i wenewhe na'akeme nahuwa'an Ai akin mamani.

<sup>10</sup> Am hi'i heheni ono namlolo kokkoo lere man mai ik na'akeme kamriri lolo Kristus kalarna, leke An ho'ok kail maika, la dohodoho lernala wanalhan lernohi iknik hini'i wenewhe wawa'an me yakyaka, man ika hi'iyedi lere holiholi lolo noho wawan eni.

*Paulus wakuku hi leke hi akin nahuwa'an wali'ur noro Makromod Lalap*

<sup>11</sup> Ende ai mauroinedi nahenia lere ida ik kamriri lolo Makromod Yesus leken kalarna, de ai mamka'uk hi'i ha ma ka nahuwa'an Ai akin. Onne penia ai mahehe wakuku ha ma na'ono leke ri nammori akin namrana

naili'il Yesus Kristus haenhi. Makromod Lalap mehe nauroin ai honorok akim moumou, de ai raram nodi ai walinhe mauroin ai honorok akim moumou haenhi.

<sup>12</sup> Ai kam wakunu heheni leke ma'uli mayai! Ka! Maa am konohi mi anima hini'i wenewhe man wa'an, leke lere rin mai wakunu nano'onyak mayai, minim ya'ar aile ma'uli mayai lolo hi kalarna. Ri onne po'on ri oin makan mehe, maa kar do'on ri nina morimori. Hir wakunu kukulu lalap ono hir pene'ek rir woroin lap narehi, maa hir suwsuwar hirira honorok panaeku ma kan wa'an.

<sup>13</sup> Lo'o mim pene'ek ai ma'iseriyedi me'e ono am wakuku Yesus Lirna Wawa'an mamani! Yon hamlinu am hi'i heheni ono Makromod Lalap hopon mayai hi'ie. Enimaa lo'o mi ma'aheni mayai ri ma nin honorok aki wawa'an. Onne namlolo ono am hi'i wewhe na'akeme leke paku hi'i minim aki ma naili'il eren narururi.

<sup>14</sup> Am hi'i ha wo'ira na'akeme eni ono Kristus naramyaka ika na'akeme. Ai mauroin kokkoo panaeku ma na'ono eniyeni: ri ida maki leke paku ri na'akeme, de onne naisa ik na'akeme makiyedi me'e.

<sup>15</sup> Enla Kristus maki leke paku ri na'akeme leke ri man mormori lolo noho wawan eni yono mori ilitolle kemen mehe, maa mori leke rahuwa'an Yesus Kristus akin. Ai penia man maki, maa mori wali'ur leke yon hir

lernala hunukum makmaki.

<sup>16</sup> Enla nano lere eniyeni ai kam po'on ri ma akin naili'il naise ri mormori ma nadedem me'e, de ai kam nair noho wawan honorok akin po'on ri me'e. Memen nonolu am do'on Kristus naise onne, la am pene'ek Ai namwali ri mormori ma nadedem haenhi, maa ors eni ka me'e.

<sup>17</sup> Ende ri ma namwaliyedi mahaku noro Kristus me'e, ai onne namwaliyedi ri worworu me'e. Ainin morimori lo'olo'ol kame'el! An lernaledi morimori worworu me'e!

<sup>18</sup> Makromod Lalap mehe hi'i ha eniyeni namwali! Makromod Lalap hari kalla lolo Kristus leke koro Makromod Lalap kahuwa'an wali'ur, la An hopon ika laa konohi Lirna Wawa'an onne ri namehin, leke roro Ai rahuwa'an wali'ur haenhi.

<sup>19</sup> An hopon am laa konohi ri nahenia lolo Kristus Nin hini'i onne, ik koro Makromod Lalap kahuwa'an wali'ur, la Ai kan horhorok iknik dohohale me'e. Enla An hoponedi maika laa konohi Lirna Wawa'an eni ri namehin na'akeme leke roro Ai rahuwa'an wali'ur haenhi.

<sup>20</sup> Ende mayai enihe, ai mamwali Kristus Nin hophopon lolo noho wawan eniyeni. Lere am loikaru Lira Wawa'an eniyeni, onne naise Makromod Lalap mehen wakunu lolo ai nurumhe. Enpenia ai modi Kristus Naran mapanak an'anchedi mi moro Makromod Lalap muhuwa'anedi here.

<sup>21</sup> Kristus eniyeni na'alehe dohohala wake'e, maa Makromod Lalap hukum Ai naise ri man hi'iyedi dohohala nammori leke herre maika, penia koro Ai kamwali mahaku. Makromod Lalap hi'i heheni leke hi'i maika kamwaliyedi ri molololo Ai leken kalarna.

## 6

<sup>1</sup> I wal'u na'ahoru! Ai mamwali Makromod Lalap Nin man howok wali, de ai mapanak an'anchedi, yon de mi kam peinohi Makromod Lalap Nina rere'e haharu man Ai naledi ki mi eni, de kan min haida lolo minim morimori. Lolo Nin rere'e haharu onne penia An hari kalla maika leke kore kahuwa'an wali'ur la kamwali mahaku.

<sup>2</sup> Yom hamlinu Ai Lirna ma aile Horok Lalap raram ma na'aheni,

"Ya'u niliyedi lere alam kukul  
Ainu'u rere'e haharu  
ki mi me'e,  
de lere onne Ya'u derne  
minim lir napanak,  
la huri we'er mi nano  
minim dohohala nin  
molollo." \*

Ende i wal'uhe na'ahoru!  
Ya'u konohi mi na'ahenia,  
"Lere alam An kukul Nin  
rere'e haharu onne maiyedi  
me'e! Lere eni me'ede  
Makromod Lalap raram nodi  
huri we'er mi nano minim  
dohohala nin molollo."

*Wa'an rehi Makromod  
Lalap Nin hophopon wahwa-  
han hi'i ha ma namlolo ma-  
mani, kade lernala apinpinha*

\* **6:2** Yes. 49:8

<sup>3</sup> I wal'u na'ahoru, ai raram nodi yon ri mahaku wakunu nano'onyaka ainim honowok loikaru Makromod Lalap Lirneni. Ende lolo ainim honowok na'akeme am hi'i we-whe leke yon ainim hini'i wenewhe ewek kawala ri mahaku de akin ka naili'il Yesus.

<sup>4</sup> Enimaa lolo ainim wanakunu noro hini'i wenewhe na'akeme, am hi'i ha ma namlolo leke kukul ri namehin nahenia ai mamwali Makromod Lalap Nin hophopon wahwahan ma namlolo. Kade am lernala apinpinha noro wewerek pananaka rahu manus wake'e, maa ai mamkene lernohi Ai.

<sup>5</sup> Am kerhu mamani lere rin nukur mayai, ee rodi yai laa bui raram, ee hi'i rusrusu ar'arra rehi ono ramhene derne ainim wanakuku. Am howok de maha wake'edi me'e, lere romromo ai ka mamkuru wake'e, la lere romromo ai ma'alehe banana'an.

<sup>6</sup> Enimaa lolo ha onne na'akeme ainim hini'i wenewhe moumou dewdewe. Ai mauroinedi Lirna Wawan, ai kam pelek ma'ahan ri, la ai modi aki wawa'an kokala ri. Am hi'i onne na'akeme ono Roh Kudus na'aromo lolo ai raram penia ai modi aki man mou maramyak ainim ri heri ri wali.

<sup>7</sup> Rin do'on rauroin nahenia namlolo kokkoo ai mamwali Makromod Lalap Nin hophopon ono am loikaru wanakuku ma namlolo wake'e, la Makromod Lalap Nin molollo manlap paku mayai mamani. Enla ainim hini'i wenewhe

ma namlolo namwali dawoi noro ilak rae ai modi madiyaka ai kemen, ono lere ainim arwali ken wakunu nano'onyaka mayai, hi ka raruri rehiyedi mayai ono ai kam hi'i sala.

<sup>8</sup> Lo'o rin wakunu nano'onyakai, ee na'uli yai; lo'o ri heruwali tumdesnai, ee horhawai; lo'o ri heruwali ra'aheni ai mapoho, ee derne ainim wanakunu;

<sup>9</sup> lo'o heruwali kar peinohi mayai, ee heruwali kokalai wawa'an: Lolo ha onne na'akeme rin do'on rauroin kokkoo am hi'i wewhe Makromod Lalap Nin honorok panaeku mamani. Kade rin nanoin mayai mamani leke resne, maa am mormori makun! Kade rin riuk rerhe mayai, maa ai kam maki makun.

<sup>10</sup> Kade rin hi'i ai akim woир rehi, maa ai raram nahuwa'an mamani. Kade rin po'on rauroin ai ma'alehe maulinu, maa am paku ri nammori lernaledi Makromod Lalap Nin linikir kanaru ma namlolo me'e. Memen rin po'on mayai ma'alehe haida-haida, maa ma namlolo am manarna ha rahu na'akeme.

<sup>11</sup> I walin man min mai Korintus na'ahoru! Am konohiyedi ainima honorok aki na'akeme mouropo ki mi me'e. Mi mauroinedi ai maramyaka mi kokkoo!

<sup>12</sup> Ai maramyak mi rehi de kam suwarala ainim honorok aki ki mi, maa alhi'ihepe mim suwarala mi honorok akin mayai?! Lo'o mi ka maramyakai harome?

<sup>13</sup> Ende lere eni derne makaniyal aina'u wanakunu

tarana. Ya'u wakunu naise ri leleher ida ma naramyaka anan wake'e. Ai mapanak mim werre mi honorok akin wawa'anedi mayai naise am hi'iyedi ki mi me'eni.

*Yono mamwali mahaku moro ri ma akin ka naili'il Yesus, kalo'o mim hi'i dohohala*

<sup>14</sup> I wal'uhe, yon moro ri ma akin ka naili'il Yesus lawuku honorok aki! Onne kan wa'ane. Kene mim loi honorok wawa'an! Lo'o mi mahinorok ri man hi'i ha man wa'an namnenehe noro ri man ailanne?! Hi'ihehewi panaeku ropropo minwuku noro metmetek nine?!

<sup>15</sup> Hi'ihehewi Kristus noro Hayakyak Makromon\* lawuku honorok aki?! Onne ka namlolo wake'e! Hi'ihehewi ri ma akin naili'il Yesus enihe lawuku honorok aki noro ri ma namhenedi Kristus?! Lo'o rira hinin'i wenewhe namnehe, ee ka? Ka namnehe wake'e!

<sup>16</sup> Makromod Lalap kan hurinohi ri mormori hoikani aukerhe lolo Nin Romleu, ono Ai penia nodi molollo narehi nalewen wake'e nano ha onne na'akeme! Maika eniyenihе kamwali Makromod Lalap man mori laa ewi-ewi Nin Romleu, ono Ai penia minle ik raram, de kan wa'an ik lawuku noro ri man hoikani ha ma ka namlolo onne. Onne namnenehe noro inhawe man Makromod Lalap na'aheni lolo Horok Lap raram nonolu eni, "Na'amoli Ya'u minle hi leken kalarna,

la Ya'u moriwuku noro hi mamani.

Ya amwali hirira Makromod Lalap,

la hi ramwali Ainu'u ri mememen.\*

<sup>17</sup> Ende yono lawuku honorok aki noro ri ma ka nauroin Ya'u, maa mako'uweddi hi here!

Ma'ako'uweddi mi nano hini'i wenewhe na'akeme man ailanna.

Lo'o mim hi'i heheni, Ya'u kokala mi,\*

<sup>18</sup> la Ya amwali minim Ame, la mi mamwali Ya an'u. Eniyenihе Makromod Lalap ma nodi molollo ma narehi nalewen na'akeme Nina wanakunu."

## 7

<sup>1</sup> I wal'u na'ahoru man ya aramyake! Makromod Lalap nala Nin nou onneni na'akeme maika, de wa'an rehi ik kako'uweddi ika nano ha wo'ira na'akeme ma na'amorso ik kemen noro ik honorok akin. Wa'an rehi ik kahehe hi'i lernohi Ai honorok akin mamani leke iknik morimori eren moumou dewdewe lolo Ai leken kalarna, ono ik kamka'uk Makromod Lalap.

*Paulus napanak manin Korintus rodi aki man wa'an kokala hi*

<sup>2</sup> I wal'u na'ahoru, ya apanak mi modi honorok aki wawa'an kokala mayai, ono ai kam hi'i salida ki mi, ai ka mawa'u mi hi'i dohohala,

\* **6:15** Lolo wanakunu Yunani rapolu 'Hayakyak Makromon' onne 'Belial'.

\* **6:16** Im. 26:12, Yer. 32:38, Yeh. 37:27

1Taw. 17:13, Yes. 43:6, Yer. 31:9

\* **6:17** Yes. 52:11 \* **6:18** 2Sam. 7:14,

la ai kam wukupoho mi leke manoin ainim wawa'an aimehi.

<sup>3</sup> Ka a'aheni heheni leke ya ala sala mi, ono naise ya aheni yedi nonolu me'e, ai maramyaka mi rehi de lo'o am mori me maki, ai akim ka nahinuri mi!

<sup>4</sup> Ka amka'uk wakunu heheni ki mi, ono ya auroin mi akim wa'an, la mim hi'i ya akin nahuwa'an wake'e. Kade am lernala wewerek pananaka nammori, maa mi ma'alapedi ai akim penia nahuwa'an rehi.

<sup>5</sup> Lere am rakan Makedonia ai kam lernala leken war-nala, ono lolo ewi-ewi am lernala anna kerkeri kawkawa mamani la am ma'irhu mi ono ai kam derne lir ida nano mi makun.

<sup>6</sup> Enimaa ai mapanak trimkasi Makromod Lalap ono Ai penia ma nadedem hi'i ri man akin tana nahuwa'an wali'ur, la Ai na'alapedi ai akim ono Ai nala Titus mai wali'ur, leke yon ai akim tana me'e.

<sup>7</sup> Onne kan mehe, maa ai akim nahuwa'an narehi, ono an konohi mayai hi'ihehewi mi ma'alapedi ai akin haenhi! Ai na'aheni mi raram nodi moro maya'u pakromala, la hi'ihehewi mi akim woir rehi ono mim horokala hini'i wenewhe ma ka namlolo nonolu onne,\* la hi'ihehewi mi modiyaledi maya'u me'e! Enpenia lere ya'u derne lir onne ya akin eren nahuwawa'an!

<sup>8</sup> Kade ainu'u horok man ya'u akuwedi ki mi onne hi'i

mi akim apinha, maa lere eni ka'u hehel ono ya'u hi'i horok onneni. Namlolo, lere ya'u hi'i horok onneni, ya akin werek ono ya auroin nahenia lere mim lese horok onne lo'o mi akim woir, maa ya auroin nahenia ka nalo'ol mi akim naruri yedi haenhi.

<sup>9</sup> Onne penia ya aheni ka'u hehelaku horok onne ki mi, maa ya akin nahuwa'an! Ya'u raram ka nodi ya'u hi'i mi akim woir, maa ya akin nahuwa'an ono lere mi akim woir onne mim herredi minim honorok panaeku ma ka namlolo eni, wali derne makani Makromod Lalap wali'ur. Makromod Lalap nair mi akim man woir onne leke nala re're'e harharu ki mi, penia ainim horok onne kan hi'i yakyak mi!

<sup>10</sup> Lo'o ik akin woir ono ik kak lernohi Makromod Lalap Nin honorok panaeku, ik akin man woir onne lo'o paku maika ono nakoko ika herredi iknik honorok panaeku ma ka namloleni wali lernohi Ai. Onne penia nala or'ori dardari maika, de ik akin kan woir me'e. Enimaa lo'o ik akin woir naise ri ma ka nauroin Makromod Lalap lolo noho wawan eniyeni, aki man woir onne kan paku ika ono kan hi'i ika herredi iknik honorok panaeku ma ka namloleni, de nala makmaki ko'u Makromod Lalap.

<sup>11</sup> I wal'u na'ahoru, lere ya'u aku horok onne ki mi, mim hehel ono mi mauroinedi mi kam lernohi Makromod Lalap honorok

\* **7:7** Po'onala 1:23, 24.

akin. Ken mahinorok! Minim henehel onne nakoko mim lernala ha man wa'an wake'e lolo minim morimori, ono ors eni mi mampe'el rehi mako'uwedi mi kemen nano ha ma na'amorse mi, la mi akim namrana mala hunukum ri man hi'i sala onne. Mi ma'ahan noro ri man hi'i dohohala onne, la mamka'uk wake'e hi'i dohohala man ri onne hi'ie. Mi raram nodi ya'u ki ka'arala mi, leke ya auroin nahenia mim hi'i wewhe ainu'u honpon mamani, la mi mamkene mala hunukum ri man hi'i sala onne. Nano minim hini'i wenewhe eniyeni, ri na'akeme do'on rauroin nahenia namlolo kokkoo mi akim mou la kam hi'i sala.

<sup>12</sup> Lolo ainu'u horok onne ya'u konohi mi mala hunukum ri man sala onne la paku man lernala sus nano nin sala onne, maa lolo Makromod Lalap leken kalarna panaeku woro'o onne ka namwali panaeku ma na'ono lolo ainu'u horok eni. Ainu'u panaeku ma na'ono mi mauroin mouropo nahenia mi maramyaka mayai la horhawe ainim wanakuku eni.

<sup>13</sup> Mim kokaledi ainu'u horok wawa'an me'e, de ai akim nahuwa'anedi me'e. Mi mahuwa'anedi ai akim, maa onne kan mehe! Lere ai moro Titus pakromo wali'ur, am derne an wakunu minima hini'i wenewhe man wa'an onne, penia ai akim nahuwa'an wake'e ono ai mauroin nahenia mi ma'alapedi Titus akin la hi'i ai honorok akin nahuwa'an haenhi.

<sup>14</sup> Lere ai kan ki makun, ya a'uli mi lolo ai kalarina me'e. Enla an rakanedi ki enne, mim kukul aki man wa'an ai de kam hi'i wawwawa maya'u! Ai made-dem konohi mi panaeku ma namlolo mamani, de ainim wanakunu ma na'uli mi man am konohiyedi Titus onne namlolo haenhi.

<sup>15</sup> Ende ors eni, ai me'ene eren nararamyaka mi ono mim derne makani wawa'an ainin wanakuku la horhawa ai haenhi.

<sup>16</sup> Ya akin nahuwa'an wake'e ono ya auroin namlolo kokkoo mi mamkene lernohi Makromod Lalap lolo ha wo'ira na'akeme.

## 8

*Paulus na'alapedi hi akin leke teunohi manin Macedonia puli kupan rala kerei raramne ma aile Yudea*

<sup>1</sup> I wal'u na'ahoru, ai raram nodi konohi mi inhawe namwali kerei raramne ma aile noho Makedonia eni. Makromod Lalap nala Nina rere'e harharu penia paku hi nammori.

<sup>2</sup> Kade wewerek pananaka man werek rehi kenedi hi me'e, maa hi akin nahuwa'an wake'e haenhi. Kade hi ra'alehe haida-haida, maa hir puli kupan namansa rodi laa pakuwala hi walinhé ma na'alehe haida-haida lolo Yudea.

<sup>3</sup> Ya'u konohi mi nahenia nano hirira honowok ihin ennen, hi rala nammori leke paku ri Yudea onne, penia lere romromo kupan rodi ilitolle rir popono orereki me'ene kan nokor haenhi. Ri

namehin ka rakerne hir hi'i heheni,

<sup>4</sup> maa hi rapanak an'anchedi mayai ke'ede hi ralala pulipuli pakuwala Makromod Lalap Nina kerei raramne ma aile Yudea.

<sup>5</sup> Ai ka mahinorok hi lo'o rala pulipuli man lap heheni! Hi rala kupan, maa onne kan mehe! Dedesne hi rala kemen Makromod Yesus leke lernohi Ai honorok akin mamani, la hir derne rakani ainim wanakuku ono hi rauroin onneni lernohi Makromod Lalap honorok akin haenhi.

<sup>6</sup> Nonolu Titus penia man paku mi puli kupan leke aku laa kerei ma aile Yudea haenhi, maa rakan lere eniyeni minim pulipuli onne kan horu makun. Ende am hopon an ki ka'arala mi wali'ur leke paku ra'ukwukuwala minim pulipuli ma kan horu makun eni, leke akuwala here.

<sup>7</sup> Ai mauroin minim hini'i wenewhe wa'an wake'e ono mi akim namkene naili'il Makromod, mi mauroinedi wanakunu ma namlolo, la mi mauroin morimori ma namlolo lolo Makromod kalarna haenhi. Mi mampe'el ilitolle ri heri ri wali, la mi maramyaka mayai rehi haenhi. Namlolo kokkoo mim hi'i ha wo'ira na'akeme wa'an wake'e, Enpenia wa'an rehi mi mampe'el hi'i minim pulipuli onne wawa'an haenhi, de ai mapanak mi modi honorok aki man mou puli kupan male ik walin ma na'alehe haida-haida enihe.

*Paulus na'alapedi hi akin leke hir teunohi Yesus ma naramyak ika rehi*

<sup>8</sup> Ainu'u wanakunu eniyeni ka namwali konomdere ki mi, maa ya'u konohi mi nahenia mi wal-inhe man minle Makedonia onne raramyake rehi ri ma na'alehe haida-haida onne de rampe'el paku hi. Ya'u konohi mi heheni, leke ya auroin lo'o mim lernohi hirira hini'i wenehwe onne, ee ka? Ya'u raram nodi auroin lo'o mi maramyaka minim ri heri ri wali kokkoo, ee ka?

<sup>9</sup> Ka'u hopon mi, maa ya apanak mehe ono mi mauroinedi nahenia Makromod Yesus Kristus nala Nin rere'e harharu man lap narehi maika. Kade Ai namwali orkanaru wake'e la Nin morimori ma'aruru wake'e lolo a'am raram, maa An hoikaru ha wo'ira onne na'akeme, ono Ai naramyaka rehi maika. An hi'i kemen namwali ri ma na'alehe naulinu leke nano Nina hini'i onne mim lernala rere'e haharu noro morimori man ma'aruru wake'e haenhi.

<sup>10</sup> Enpenia ya ala nounaku eniyeni ki mi leke mim hi'i pulipuli onne wawa'an. Anna man laa mi penia mamwali ri dedesne ma akin namrana paku ma na'alehe haida-haida onne, de mim puli kupan noluwedri namehin!

<sup>11</sup> Ende wa'an rehi ors eni mi mampe'el hi'i na'ahoruwedi minim pulipuli onne leke rin do'on nauroin mi ka mampe'el lere dedesne mehe, maa mi

mampe'el hehen nanumene ri ma na'alehe haida-haida kokaledi minim pulipuli onne. Enla ya apanak mi modi mi akim ma namrana male lernohi inhawe man mim lernaledi me'e.

<sup>12</sup> Lo'o mi akim namrana paku mi walihne, la mi mala lernohi minim hahaa man aile, Makromod kokala minim pulipuli onne. Ai ka napanak mi mala hahaa man mi ma'alehe!

<sup>13</sup> Ya'u ka'u nounaku heheni leke akerne mi mala nammori de mim sus ono ma'alehe haida-haida, maa ya'u nounaku heheni leke ri na'akeme rir morimori namnenehe.

<sup>14</sup> Lere eniyeni mim lernala dawaknala nokor narehi, de wa'an rehi mi mala wali'ur leke pulipuli onne noknokor paku mi wallum manin Yudea onnenihe. Enla lo'o lere namehin minim hahaa kan nokor, hi onne lo'o paku mi haenhi, leke mi na'ahoru mori wawa'an wewerre.

<sup>15</sup> Onne naise horhorok ma aile Horok Lap raram ma na'heni, "Ri man lernala nammori, lo'o ka narehi, la man lernala tarana, lo'o ka na'alehe." \*

*Paulus hopon Titus noro ri woro'o laa rala manin Korintus rira pulipuli rodi laa manin Yudea*

<sup>16</sup> Ya apanak trimkasi Makromod Lalap, ono Ai penia nala akin man wa'an Titus penia akin namrana wake'e paku mi namnenehe noro maya'u.

<sup>17</sup> Ya aheni heheni ono lere ai mapanak Titus ki paku mi, ai akin nahuwa'anedi ono ai me'e'ne naledi kenekrohu ki ilitolle mi haenhi.

<sup>18</sup> Ai mapanak ai wallum ida wali'ur nore na'alono ki haenhi. Ri onne, kerei raramne ra'uli ono ainina honowok nair wa'an la ai nampe'el loikaru Makromod Lalap Lirna Wawa'an eni.

<sup>19</sup> Onne kan mehe, maa kerei raramne niliyedi ai leke ai ma'alono lere ai modi pulipuli laa ri Yudea ma na'alehe haida-haida enihe. Am hi'i heheni leke ik Makromod mehen lernala ul'uli sasa'a nano ri mormori, la am hi'i haenhi leke rin nauroin nahenia ai akim namrana paku iknika ri heri ri wali modi honorok aki moumou.

<sup>20</sup> Ai mapanak ai walihne lernohi rodi pulipuli ma namansa onne ono ainim panaeku hi'i ha wo'ira na'akeme namlolo wake'e, leke yono hi'i de rin kuku sala mayai.

<sup>21</sup> Ainim honorok aki kakar pulipuli eni wawa'an, leke ainim hini'i wenewhe namlolo kokkoo lolo Makromod Jesus noro idewe ri mormori leken kalarna.

<sup>22</sup> Onne kan mehe, maa ai mapanak ri ida wali'ur noro Titus ki wewerre na'uwalini kalla wali onne haenhi. Ai onne am po'onedi me'e, de mauroin ai nampe'el ilitolle Makromod Lalap Nina honowok, la ai akin nahuwa'an rehi pakuwala mi ono ai nauroin nahenia mi akim namrana mala pulipuli onne.

\* 8:15 Kel. 16:18

<sup>23</sup> Enla Titus onne, ai namwali i wal'u, la yo oro ai howok wewerre paku mi. Ik walin woro'o man lernohi ai onnenihe, kerei raramne hopon ki de rodi kerei naran paku kakar minim pulipuli onne, la hirira morimori ramwali u'uli sasa'a Kristus.

<sup>24</sup> Ende ai mapanak mim kokala hi wawa'an la kukul nahenia mi maramyaka hi, leke kerei raramne na'akeme rauroin nahenia ainim wanakunu ma na'uli mi onne namlolo kokkoo.

## 9

*Paulus napanak kerei raramne ra'akenedi pulipuli nanumene an rakan laa enne*

<sup>1</sup> I wal'u na'ahoru, lo'o ka'u horok haida ma na'ono pulipuli rodi paku Makromod Nin ri mememen onnenihe me'e, kan hi'i haida,

<sup>2</sup> ono ya auroinedi mi akim namrana paku hi me'e. Ya a'uliyedi mi lolo ri Makedonia kalarna me'e. Ya a'aheni, "Nano anna man laedi rakan lere eniyeni, ik walin manin noho Akhaya\* ramkene puli kupan!" Enpenia hir derne onneni, mi ma'alapedi hi akin me'e, de hi raram nodi rala kupan paku haenhi.

<sup>3</sup> Kade onne namlolo, maa ya ahinorok lo'o wa'an rehi ya apanak Titus nori nina kalla wali ri woro'o onne roluwedi ya'u ki enne leke paku mi ma'akene pulipuli onne, kalo'o ya'u rakan, minim pulipuli onne ka namkene makun. Ya'u

konohiyedi ri Makedonia nahenia minim pulipuli onne namkenedi me'e, de yon hi'i de ainu'u wanakunu ma na'uli mi onne ka namlolo!

<sup>4</sup> Yonde am rakan ki enne, ri Makedonia ida woro'o man lernohi ya'u po'on mi kam ra'ukwuku minim pulipuli makun! Lo'o onne namwali, hi'i wawawa mayai, ono ya a'uliyedi mi me'e, la ya a'aheni, "Ri manin Korintus onnenihe rampe'el puli kupan." Emene hi'ihehewi noro mi? Mi lo'o mawawa haenhi!

<sup>5</sup> Onne penia ya ala keneckrohu nahenia wa'an rehi Titus noro ri woro'o onne rolu ki enne, leke paku mi ra'ukwukuwedii minim pulipuli onne. Ya'u hi'i onne leke lo'o am ki enne minim pulipuli na'akeme onne namkenedi me'e. Wa'an rehi hi'i heheni leke ri na'akeme rauroiroin mi mala kupan eniyeni modi aki man mou, ka mala kupan ono rin siase nakerne mi.

*Lo'o ik kala haida ri namehin, maika penia man lernala rere'e harharu*

<sup>6</sup> Horhorok inhawe ma namwali noro ri man howok kirne. Lo'o an hapa wini tarana lolo nina kirne, rakan lere ra'ili radai an lernala tarana haenhi, maa lo'o an hapa wini nammori, rakan lere ra'ili radai an lernala nammori haenhi.

<sup>7</sup> Lo'o ik kala haida-haida ri, wa'an rehi ik kale lernohi ik honorok akin. Yon ik kala haida ono rin siase nakerne ika, ee yon ik kala haida

\* **9:2** Kota Korintus onne minle noho Akhaya.

kodi aki man werek, ono Makromod Lalap naramyaka ri ma akin namrana nala haida paku nina ri heri ri wali.

<sup>8</sup> Makromod Lalap penia ma nodi molollo nala Nin wanalhan ki mi hehen nanumene minim ha wo'ira kukuku noknokor la ma narehi aile haenhi! An hi'i heheni leke mi mampe'el hi'i ha wo'ira man wa'an leke paku ri namehin mamani.

<sup>9</sup> Onne naise horhorok ma aile Horok Lap ma na'ono ri man paku ma na'alehe haida-haida. Horok onne na'aheni, "Ai nodi hahaa nammori nale ri yakyak halhala leke naramyaka hi, naise ri nodi wini nammori wahair lolo kirna, la Nin wawa'an onne namkene laa ewi-ewi." \*

<sup>10</sup> Makromod Lalap penia nala wini ri man howok kirna, la Ai nala kirna ihin ennen leke na'an. Naise onneni, Ai namre'e namharu mi leke mim lernala leken nammori paku ri namehin, la An hi'i minim hini'i wawa'an onne ihin ennen eren nammomori.

<sup>11</sup> Ai lo'o namre'e namharu mi nammori rehi noro ha wo'ira na'akeme, leke mi mammene paku minim ri heri ri wali mamani. Enla lere ai modi minim pulipuli onne mala ri ma na'alehe naulinu man aile Yudea, ri nammori lo'o rapanak trimkasi Makromod Lalap.

<sup>12</sup> Minim hini'i wenewhe man wa'an onne paku Makromod Lalap Nin ri ma na'alehe haida-haida, leke hirira popono orerekri nokor

haenhi, maa onne kan mehe! Minim hini'i man wa'an onne nakoko ri nammori rapanak trimkasi Makromod Lalap haenhi.

<sup>13</sup> Mi me'ene kukul nahenia mi maramyaka Makromod Lalap la mi raram nodi hi'i ha ma namlolo mamani. Lere ik walihne man minle Yudea do'on minim pulipuli onne, hi lo'o ra'uli rasa'a Makromod Lalap ono hi rauroin nahenia mi akim namkene naili'il Kristus, la namlolo kokkoo mim lernohi Nin konomdere. Hi ra'uli rasa'a Makromod Lalap ono mi modi aki man mou ha'ar minim hahaa onne leke paku hi noro ri namehin haenhi.

<sup>14</sup> Enla hi akin ka nahinuri mi, la hir hi'i lir napanak Makromod Lalap paku mi mamani, ono hi rauroin nahenia Makromod Lalap Nin rere'e harharu man lap narehi howok lolo mi raram.

<sup>15</sup> I wal'uhe, mai kapanak trimkasi Makromod Lalap ono Ai naledi rere'e haharu maika me'e. Nin rere'e harharu onne ri kan ho'oknala!

## 10

*Paulus napanak hi yon derne rakani ri man kuku sala ai*

<sup>1</sup> I wal'uhe, ya apanak mim dernala ainu'u napanak eniyeni. Lo'o ri aile ma na'aheni, "Lere ik koro Paulus minwuku, an wakuku naise ai namka'uk, de ka nodi lir apipinha, maa rakan lere ai nako'uwedi nano maika mene nawuhur lolo nin horok eni!" Ri onne lo'o pene'ek ya amka'uk,

\* 9:9 Mzm. 112:9

penia ainu'u morimori naisa onne! Onne ka namlolo, maa ya'u ken teunohi Kristus Nin morimori, de ya'u mori helkaki amdaru la odi lira mamamal lolo mi leken kalarna.

<sup>2</sup> Ya apanak mim kokala ainu'u molollo wawa'an, leke yon de lere ya'u rakan ki enne ya aahan de odi lir apipinha mi wali'ur. Ri aile ma na'aheni ainim hini'i wenewhe namnenehe noro ri ma ka nauroin Makromod Lalap makun! Lapanala'u rakanedi mene yo odi lir apipinha wake'e wakunu noro hi!

<sup>3</sup> Namlolo kokkoo mayai eniyenihe mamwali ri morimori mehe mai noho wawan eniyeni, maa ai kam hi'i rusrusu ar'arra naise noho nina. Ai ka modi noho wawan nin molollo ma'okuledi ri man wakuku ha ma ka namlolo,

<sup>4</sup> maa ai modi Makromod Lalap Nin molollo mehe. Ai penia ma nala maika molollo ma naho'ok naisa ilak rae rodi rehiyedi ri ma na'okuledi Ai Lirna Wawan eni. Ilak onne namehin wake'e nano noho wawan eni nina, ono lolo ilak onne Makromod Lalap Ma Narehi Ma Nalewen nala molollo mayai ma'ahoruwedri rir wanakuku ma ka namlolo onne. Ende mayai naise ma nasala ke'urauk ma naruri, de ai ma'ahoruwedri onno-onno ma naruri wake'e. Am nair molollo onne rehiyedi ri ma nawalha lira, la ma'okuledi rir wanakuku ma ka namlolo.

<sup>5</sup> Ai ma'okuledi ri ma nodi wanakunu man kukulu lalap

onnenihe, ono rir wanakunu onne ewek kawala ri leke yon hi rauroin Makromod Lalap Nin wanakuku ma namlolo eni. Enla ai modi molollo paku ri ma na'okuledi Lirna Wawan onne penia hir herredi honorok akin ma ka namlolo la derne rakani Kristus mehe.

<sup>6</sup> Enla ai mamkene mala hunukum ri na'akeme ma namhene derne rakani Kristus, maa am lapan hehen nanumene mim kukul nahenia mi mamkene derne makani ainim wanakunu eniyeni la mi raram nodi derne makani Kristus manani.

<sup>7</sup> I wal'uhe loi honorok wawa'an leke mauroin inhawe ma namwali lolo minim kerei raramne! Ri aile ma na'aheni, "Mayai penia ma nodi Kristus Lirna loikaru ri!" Wa'an rehi hi onne loi honorok wawa'an leke rauroin nahenia ai mamwali Kristus Nin ri naise hi haenhi!

<sup>8</sup> Kade ya'u wakunu kukulu lalap tarana konohi hi'ihehewi Makromod nala molollo mayai, maa ka awawa, ono Ai nala molollo mayai leke paku mi mamwali ri ma namlolo lolo Ai leken kalarna. Ai ka nala molollo onne leke nodi mi laa yakanne.

<sup>9</sup> Enla ka ahehe hi'i mi mamka'uk lolo ainu'u horok enihe.

<sup>10</sup> Yon hi'i de mim derne makani ri ma na'aheni, "Paulus nodi lir apipinha nake'u mayai lolo nina horok onne naise ai nodi molollo lap narehi, maa rakan lere ai noro mayai minwuku

nin molollo kaale, la ai ka nauroin wakunu wawa'an."

<sup>11</sup> Wa'an rehi meser man wakunu kukulu lalap onnenihe loi honorok wawa'an wanakunu eniyeni: Rakan lere ai moro mi minwuku wali'ur ai modi apinpinha hi'i wewhe panaeku ma namnenehe noro ainim horok haenhi!

*Paulus nodi molollo nala nounaku manin Korintus ono Makromod Lalap mehen hopon ai loikaru Lirna Wawa'an eni hi*

<sup>12</sup> Meser man holi kukulu lalap onnenihe konohi mi nahenia rir hini'i wenewhe namlolo wake'e! Lo'o rir wanakunu onne namlolo, ai mamka'uk rehi hoiwuku ainim hini'i wenewhe noro hi! Maa rir wanakunu onne ka namlolo! Rir hini'i wenewhe kan wa'an la rir honorok panaeku kan min haida, ono mehe ra'uli kemen, la meher ho'ok kail rir hini'i wenewhe!

<sup>13</sup> Ai kam hi'i heheni. Lo'o ai ma'uli ai kemen, ai kam wakunu kukulu lalapa mamani, maa am wakunu mehe inhawe man Makromod Lalap paku mayai hi'i lolo honowok man Ai naledi mayai me'e. Enla mi eniyeni mamwali ainim honowok ihin ennen, ono Makromod Lalap hopon mayai loikaru Lirna Wawa'an eni ki mi.

<sup>14</sup> Ende lo'o ai ma'aheni ai modi molollo mala nounaku ki mi, ai kam sala ono mayai penia man loikaru Lira Wawa'an ma na'ono Kristus ki mi dedesne! Enimaa lo'o

ai kam rakan minim noho makun, ainim molollo kaale nounaku mi.

<sup>15</sup> Ri aile ma na'uli kemen aimehi nahenia hir loikaruwed Lirna Wawa'an lolo nohida, maa ka namlolo ono ri namehin noluwed hi me'e. Ai kam hi'i heheni! Ai ka ma'uli ai kemen lolo ri namehin nin honowok! Enimaa ai raram nodi nahenia lere mi akim eren narururi naili'il Yesus, lo'o ainim honowok eren nala'a kalalari lolo minim noho haenhi.

<sup>16</sup> Lere panaeku onne namwali, ai mahina'ar noro mi leke ai lam loikaru wali'ur Lir Wawa'an lolo noho namehin. Ai raram nodi loikaru Lira Wawa'an laa noho-noho man ri ka nodi Yesus Lirna Wawa'an la'ala makun. Lo'o onne namwali, ri mahaku ka na'aheni am howok lolo ri namehin nin honowok onno!

<sup>17</sup> Horhorok aile Horok Lap raram ma na'aheni, "Lo'o ri aile man raram nodi wakunu kukulu lalap, wa'an rehi an wakunu kukulu lalap na'ono Makromod Kristus Nin hini'i wenewhe mehe!" \*

<sup>18</sup> Lo'o ik mehe ka'uli ik kemen, onne nin panaeku kaale, maa lo'o Makromod Lalap mehe na'uli maika,\* onne wa'an wake'e, ono ik kauroin kokkoo nahenia An kokala maika!

## 11

*Paulus namhene manin Korintus lernohi meser-meser ma ka namlolo*

\* **10:17** Yer. 9:24 \* **10:18** Nano HN. 14:3 ik kauroin Makromod Lalap na'uli ma nodi Ai Lirna enihe ono Ai nala molollo hi hi'i tanada man ri kan dodo'onnala makun.

<sup>1</sup> I wal'uhe, ya apanak mi mala leken ya a'uli i kem'u tarana! Ya auroin wanakunu kukulu lalap eniyeni nin panaeku kaale, maa ya apanak mi modiyala aki man wa'an derne ainu'u wanakunu eniyeni.

<sup>2</sup> I wal'uhe, ya a'ahan ri ma nano'onyak mayai, naise Makromod Lalap na'ahan hi haenhi, ono hirira wanakuku onne lo'o nakoko mim wali mi kili'urmne nano Kris-tus. Ende ya adiyaka mi mamani, leke mi akim eren namkene naili'il, ono mi pena naho'ok naisa maekrara man moumou dewdewe man ya'u nouwedi ala mo'oni ida, la mo'oni onne Kristus mehe.

<sup>3</sup> Enimaa lere eniyeni ya akin ka namkene ono ya amka'uk lo'o rin mai paipudi mi, de lo'o mi kam lernohi Yesus modi honorok aki man mou naise nonolu me'e. Ya amka'uk lo'o ri onne nodi rir wanakunu aimehi paipudi mi, naise nonolu nee nodi nin wanakunu aimehi paipudi Hawa de nakoko hi'i dohohala.

<sup>4</sup> Ya'u wakunu heheni ono rin mai wakukuwedi mi ha ma na'ono Yesus me'e, maa rir wanakuku onne namehin wake'e nano ainima. Alhi'ihepe mim derne hi!? Hir wakuku nahenia mim kokala roh namehin nano Roh man mim kokaledi lere mi akim naili'iledi Yesus. Alhi'ihepe mim kokala rir wanakukue!? Hir wakuku mi lirna namehin wake'e nano Makromod Lalap Lirna Wawa'an man mim kokaledi nano mayai nonolu me'e. Alhi'ihepe mi ka ma'okuledi

hie!? Alhi'ihepe mim pelek kokala rir wanakuku ma namehin wake'e onne?

<sup>5</sup> Hi onne mehe ra'uli kemen peni rin wekel hi 'hophopon man lewlewen ma nodi Yesus Lirna Wawa'an eni.' Onne penia mi lo'o raram nodi derne hirira wanakuku narehi ainu'u, maa ya'u ka amwali ri man lolo yawa hi!

<sup>6</sup> Lo'o ka auroin wakunu wawa'an naisa hi, maa ka amwali ma ka nauroin haida-haida haenhi! Ya auroin kokkoo Makromod Lalap Nin wanakuku wanayo'o ma namlolo eni! Mi me'ene mauroin onne namlolo ono mi mehem do'on ainim hini'i wenewhe na'akeme lere ai moro mi minwuku.

*Paulus ka napanak naiwe'el nano manin Korintus*

<sup>7</sup> Lere ya'u loikaru Makromod Lalap Lirna Wawa'an ki mi, ya'u ka apanak naiwe'el ida nano mi. Ya'u mori helkaki amdaru oro mi, pena ya'u mehe howok anoin ainu'u popono orereki naise ri ma nadedem. Ya'u hi'i heheni leke mi mahinuriyedi nano minim dohohala la mim kokala or'ori dardari ma kan horu. Nano ainu'u hini'i na'akeme onne inhawa ma nakoko penia mim kuku sala maya'ue!?

<sup>8</sup> Lere ya'u wakuku mi, kerei namehin rala pulipuli po'opo'o leke ainu'u popono orereki noknokor. Ende onne naise ya'u lo'o hi'i kerei onne raramne sus leke ya'u paku mi.

<sup>9</sup> Lere yo oro mi minwuku, lo'o lere ida woro'o ya alehe

haida-haida, maa ka apanak mi mala haida-haida paku maya'u, ono ya amhene hi'i sus mi. Ka apanak haida ono lere ya alehe onne ri Macedonia ma akin naili'il Jesus enihe puli ha wo'ire rodi mai rala maya'u. Ende lere man laedi, ka apanak haida-haida nano mi, la lere man mai eniyeni, ainu'u panaeku ka apanak haida-haida nano mi haenhi!

<sup>10</sup> I wal'uhe! Ors eni ya'u wakunu odi Jesus Naran mehe. Mi mauroin nahenia Kristus Nin wanakunu na'akeme namlolo, la Ai penia man howok lolo i raram, de ainu'u wanakunu eniyeni namlolo naise Ainina haenhi. Ende ya'u nou nahenia ya akin nahuwa'anedi ono ka apanak naiwe'el nano mi noro idewe nano ri namehin man minle noho Akhaya! Enla ka'u herre ainu'u honorok panaeku eniyeni!

<sup>11</sup> Lo'o mi mahinorok, "Alhi'hepe an wakunu hehenie? Lo'o ai ka naramyakai harome!" Onne ka namlolo! Makromod Lalap mehe nauroin ya aramyaka mi rehi!

<sup>12</sup> Ler eniyeni ka apanak naiwe'el nano mi, la lere man mai ka apanak haenhi. Ka apanak naiwe'el nano mi ono ri man wakunu nano'onyak ya'u onnenihe rapanak rir naiwe'el mamani, la ra'uli hi kemen mamani, de ya'u hi'i heheni leke hirira ya'ar kaale ra'aheni rir honowok namnenehe noro ainima.

<sup>13</sup> Ri man hi'i heheni

ramwali man howok ma napoho mehe. Hi ra'aheni hi ramwali hophopon man loikaru Kristus Lirna Wawa'an ma namlolo, maa onne ka namlolo! Hi rapoho la paipudi mi mehe.

<sup>14</sup> Ik po'on hirira hini'i wenewhe onne, yon ik mehe kakaiyedi ika ono ik kauroin nahenia Hayakyak Makromon me'ene nauroin herredi ai kemen leke rin po'on ai naise hophopon a'am raram man siksik lerlere eni!

<sup>15</sup> Ende ik kak mehe kakai ika lere Hayakyak Makromon nin man howok onne paipudi ri la suwsuwar rir hini'i wenewhe man ailanna leke rin po'on pene'ek hi onne ramwali Makromod Lalap Nin hophopon wahwahan ma namlolo. Enimaa lere li'ur ne, Makromod Lalap nala hi hunukum man herre walha rira hini'i wenewhe ma namehiyala onne.

*Paulus wakunu nin ya'ar  
namwali man loikaru Makromod Lalap Lirna Wawa'an ma  
namlolo*

<sup>16</sup> I wal'uhe, kade ors eni ya'u wakunu naise ri ma naploedi, maa yom pene'ek ya amwali ri ma naploe. Enimaa lo'o ri aile ma na'aheni ya amwali ri poloe, ya apanak hi kokala ainu'u wanakunu ma naploe naise hir kokala ri onnenihe rir wanakunu ma naploo haenhi! Ende ya apanak mi mala leken ya a'uli i kem'u taran haenhi.

<sup>17</sup> Ler eniyeni ya'u konohi mi alhi'ihepe ainu'u ya'ar aile holi kukulu lalap! Enimaa Makromod Lalap kan hopon ya'u wakunu heheni. Ainu'u wanakunu eniyeni naise ri ma naploedi me'e, ono ya'u mehe a'uli i kem'u.

<sup>18</sup> Ri nammori penia mehe ra'uli rira hini'i wenewhe naise ri nadedem hi'i lolo noho wawan eni, de ne'e namhene ya'u lernohi hi ma naploo onne a'uli ainu'u hini'i wenewhe haenhi!

<sup>19</sup> Mi modi akim ma nahuwa'an derne makani ri poloe onne, la kokala rir wanakuku ma ka namlolo onne haenhi, ono lo'o mim pene'ek minim woroin lap narehi!

<sup>20</sup> Onne kan mehe, maa mim hurinohi hi rodi molollo ki mi, la ra'ahoru minim mahmaha awenne. Hir holi kukulu lalap la ilnohi ralnohi mi haenhi, maa mi kam hi'i haida!

<sup>21</sup> Ai mamka'uk rehi hi'i lernohi rir hini'i wenewhe ma namehiyala onne! Enimaa mi lo'o mala sala mayai ono ai kam hi'i sus mi heheni! Mi ma'heni ya awawa ono ya amka'uk komdere mi naise hi! Onne ka namlolo wake'e!

Enimaa lo'o hi ka ramka'uk wakunu kukulu lalap panaeku wo'ira, wa'an rehi ya a'alapedi ya akin wakunu heheni haenhi! (Maa yon hamlinu ainu'u wanakunu eniyeni naise ri ma naploedi ono kan wa'an ik mehe ka'uli ik kemen.)

<sup>22</sup> Man panulu onnenihe wakunu kukulu lalap

ra'aheni hi ramwali ri Ibrani. Ya'u me'ene amwali ri Ibrani! Ee, hi ramwali ri Israel. Ya'u me'ene amwali onne haenhi! Lo'o hi ramwali Abraham upun ananhe. Ya'u me'ene amwali Abraham upun ananhaenhi!

<sup>23</sup> Hi ra'aheni hi ramwali Kristus Nina man howok, maa ya amwali Nin man howok narehi hi! (Ors eni ya'u wakunu naise ri ma na'iseriyedi me'e!) Ainu'u honowok wa'an narehi hirira. Ri nodi ya'u laa bui raram, ri nodi rurilai nukur maya'u, la lere romromo manlo'o ya'u maki! Ya'u lernala wewerek pananaka nammori rehi nano hi.

<sup>24</sup> Ri Yahudi kela'u rewlima, la lere kela'u onne hi rodi ha mormori ulikne riuk rerhe ya'u rewen wellikelu wohii.

<sup>25</sup> Manin Roma rodi au nukur maya'u rewkelu. Lerida ri nammori rodi waku wasla'u leke ken resna'u. Manlo'o i maki lolo lour rewkelu, ono anim kapal yaka. Ya atalu pakan kahi raram hehen nanumene lelere ida a'alam ida haenhi.

<sup>26</sup> Ya'u lalaa mamai manani leke hi'i honowok eniyeni, de ya'u lernala apinpinha nammori. Manlo'o ya'u keperedti lolo oir wauwau lape, la ri ma nahoro hahaa hi'i sus ya'u lolo kalla. Ri Yahudi roro idewe ri ma ka namwali Yahudi enihe hi'i sus ya'u. Lolo kote-kote rin ken hi'i sus ya'u, la lolo noho mamun ya'u lernala apinpinha wal'ur, la lolo lour ya'u lernala apinpinha namehin haenhi. Enla ya'u

lernala apinpinha nano ri ma napoho ra'aheni hi akin naili'il Kristus haenhi.

<sup>27</sup> Yo odi ainu'u ruri pe'el howok kerkerhe penia lere romromo ka amkuru, la lere namehin ya alehe hanana'an nonomun. Lere romromo ya'u rinna rehi, ono ainu'u nainair kan nokor haenhi.

<sup>28</sup> Onne kan mehe, maa akilere ya akin sus ono ya'u horokala kerei raramne na'akeme rira morimori!

<sup>29</sup> Lo'o i wal'u aile ma akin woir ono akin ka namkene naili'il wawa'an makun, ya akin woir haenhi. Lo'o i wal'u aile man rin koko de nadiyaur dohohala, ya akin woir haenhi.

<sup>30</sup> Mi raram nodi derne ri ma na'uli kemen mehe, de ne'e namhene, ya'u wakunu kukulu lalap a'uli i kem'u haenhi, maa ya a'uli ainu'u morimori mehe man kukul nahenia ka aruri!

<sup>31</sup> Lolo ainu'u wanakunu eniyeni, ka apoho! Makromod Lalap ma namwali Makromod Yesus Aman me'ene namwali man kuku maka nahenia ainu'u wanakunu eniyeni namlolo kokkoo! Ka'uli kasa'a Ai laa ewi-ewi!

<sup>32</sup> Enimaa maya'u eni, ka aruri! Lere ya'u min lolo kota Damsyik, rai Areta nin gubernur ken kele ya'u leke resne. An hopon nin ma nasala ke'urauk radiyaka kote nin nike lap,

<sup>33</sup> maa ainu'u kalla wali paku ya'u. Suwara'u lolo lo'or lap raram nanumene hir ku'u lolo hawollo man aile kote nin lukur lap eni laa

yawa, penia ya'u lari ahaledi i kem'u nano gubernur onne.  
\*

## 12

*Makromod Lalap nalhariyedi panaeku man ma'aruru wake'e Paulus*

<sup>1</sup> I wal'uhe, iknik wanakunu kukulu lalapa ka nala ha man wa'an ida maika! Kade onne namlolo, maa ya'u wakunu kukulu lalap tarana ikar konohi mi nahenia lere nonolu eni Makromod Lalap nalhari panaeku man ma'aruru wake'e maya'u mehe do'on.

<sup>2</sup> Anna idaweli wo'akka man laedi me'eni, ya auroin ri ida man akin naili'il Kristus, la ai onne nakinikan laa a'am raram min lolo Makromod Lalap leken kalarna. Ka auroin kemen idewe laa a'am raram, ee ainina roh mehe, Makromod Lalap mehe nauroin.

<sup>3-4</sup> Ya auroin namlolo kokkoo nahenia ai nakinikan laa onnida man ma'aruru wake'e, la onno onne naran Firdaus. (Ya aheni wali'ur, ka auroin ri onne kemen idewe laa a'am raram, ee nin roh mehe do'on a'am raram. Makromod Lalap mehe nauroin onne.) Lere ai nakinikan laa a'am raram, an derne panaeku man ma'aruru wake'e. Panaeku man ma'aruru onne, ri mor-mori ka nauroin wakunu, la Makromod Lalap kan huri ai konohi ri namehin haenhi!

<sup>5</sup> Ende lo'o wa'an rehi ya a'uli ri man derne panaeku onne, maa ya amhene a'uli i

kem'u. Lo'o ya a'uli i kem'u, ya'u raram nodi wakunu in-hawē man kukul nahenia ka aruri.

<sup>6</sup> Lo'o ya a'uli i kem'u de wakunu ha man ya'u mehe do'on onne, ka apoho, ono ya'u wakunu panaeku ma namlolo, maa ya amhene konohi ri nahenia Makromod Lalap nalhari ha man ma'aruru wake'e onne maya'u, leke yon rin derne la na'uli maya'u mamani. Lo'o ri raram nodi na'uli ya'u, wa'an rehi hi ra'uli ya'u ono hir do'on ainu'u hini'i wenewhe, la derne ainu'u wanakunu.

<sup>7</sup> I wal'u na'ahoru! Ya'u penia amwali ri man Makromod Lalap kikan laa a'am raram onne. Ya'u mehe do'on panaeku man ma'aruru onne, de Ai nala kini'ir ida maya'u, leke yon ya'u holi kukulu lalap. Kini'ir onne hi'i apinpinha maya'u naise ruri ida man kadi i kem'u. Kini'ir onne naise Hayakyak Makromon hopon nin hophopon mai hi'i apinpinha maya'u!

<sup>8</sup> Ya'u hi'i lir napanak rewkelu me'e a'aheni, "Makrom'e! Hi'i wa'anedi ya'u nano ainu'u apinha eniyeni."

<sup>9</sup> Enimaa Makromod Lalap na'aheni, "Ka'u hi'i wa'an onuma apinhe onne, maa Ainu'u rere'e haharu no-knokor paku o lolo ha wo'ira na'akeme, ono lere ma'alehe ruri, Ainu'u molollo man lap narehi howok namlolo wake'e lolo o raram." Onne penia ka'u wakunu kukulu lalap ha man ma'aruru idedi

eni, maa ya'u raram nodi wakunu ha man kukul nahenia ka aruri, leke Kristus Nin molollo man noknokor onne howok lolo i kem'u eniyeni.

<sup>10</sup> Ende lo'o ya'u lernaledi apinha wo'ira la ka aruri me'e ono ya'u lernohi Kris-tus, ya akin nahuwa'anedi! Lo'o ka aruri me'e, lo'o rin hadwei maya'u, lo'o ya'u lernala wewerek pananaka, lo'o rin hi'i apinpinha maya'u, la lo'o ya'u lernala sus nammori, maa ya akin nahuwa'anedi, ono lere ka aruri hi'i haida, lere onne me'ede Kristus nala ruri maya'u.

<sup>11</sup> Ainu'u wanakunu kukulu lalapa eniyeni naise ri ma naploedi ono ya'u mehe a'uli i kem'u, maa mi peni ma nakoko de ya'u wakunu heheni! Man wa'an narehi, mi mehe ma'uli maya'u. Kade ya'u ka amwali ri ma na'ono, maa ya amwali hophopon ma nodi Yesus Lirna Wawa'an eni, la ka'u lolo yawa ri man mim wekel 'man lewlewen onne'.

<sup>12</sup> Lere ya'u minle noro mi wewerre onne, ya'u hi'iyedi tanada nammori man kukul nahenia ya amwali hophopon ma nodi Kristus Lirna, la ka'u ren hi'i ha man ma'aruru wake'e noro ha man rin kan dodo'onnale makun.

<sup>13</sup> Lo'o mi ma'aheni ka'u paku mi wawa'an naise ya'u paku ri namehin! Onne ka namlolo! Ya'u hi'i ha wo'ira lolo mi raramne namnenehe ya'u hi'iyedi lolo kerei namehin me'e. Naukara eni mehe, ya amhene hi'i

mim sus, de ka apanak mala naiwe'el maya'u! Yon de minim panaeku ya'u sala ono ka apanak kupan nano mi harome!

*Paulus nou nahenia lere an rakan Korintus ai nala hunukum ri na'akeme ma kan derne nakani nin honopon*

<sup>14</sup> Derne wawa'an! Ainu'u panaeku ki ka'arala mi rewkelu nine. Lere ya'u rakan minim kote, ka apanak haida-haida, ono ka anoin minim kupan, maa ya anoin mi akim. Ya'u raram nodi mi maramyaka'u kokkoo. Lolo noho wawan eniyeni, ka nadedem tatan'ukun ranoin linikir kanaru rala ri leleher, maa ri leleher penia ma nadiyaka tatan'ukun.

<sup>15</sup> Ende ya akin nahuwa'an wake'e paku mi, la ya'u raram nodi ala mouwedi ainu'u ha wo'ire noro idewe i kem'u leke paku mi! Ya aramyaka mi lap rehi! Alhi'ihepe mi maramyaka'u tarana mehe?

<sup>16</sup> I wal'uhe, mi me'ene mauroinedi nahenia ka apanak haida-haida nano mi, maa ri aile man wakunu nano'onyaka'u na'ahenia, "Memen Paulus ka napanak mi mala kupan, maa an paipudi mi karkaram leke nano'in nin wawa'an aimehi."

<sup>17</sup> Onne ka namlolo! Lo'o hir pene'ek ya'u hopon ainu'u man howok wali ki rapanak kupan nano mi, leke rala maya'u? Ka menee!

<sup>18</sup> Ler man laedi me'e, ya'u hopon Titus ki ka'arala mi, la hopon ik walin ida noro ai

ra'alono ki. Hi'ihehewi? Lo'o lere onne Titus paipudi mi, de ra'ukwuku pulipuli onne narehi leke ai nala rehin am manarna harome? Kaa! Mi mauroin yo oro Titus onne honorok aki noro hini'i wenewhe mahaku mehe.

<sup>19</sup> Yonde mim pene'ek nahenia lolo anima horok eni ai modiyala ai kemen mehe leke mi mahinorok mayai ri wawa'an. Onne ka namlolo. Am wakunu anim wanakunu na'akeme eniyeni lolo Makromod Lalap leken kalarna, ono ai moro Kristus mamwaliyedi mahaku me'e. I wal'uhe man ya aramyaka! Lolo anim wanakunu noro hini'i wenewhe na'akeme, ai raram nodi ma'alap mi akim leke mi akim namkene naili'il Kristus!

<sup>20</sup> Ya'u hi'i horok eniyeni ono ya amkauk lere ya'u rakan ki enne, mi lo'o kam hi'i ha ma nahuwa'an ya akin, laa ya amka'uk lo'o ka'u hi'i ha ma nahuwa'an mi akim haenhi! Lere ya'u rakan minim kote, ya amka'uk do'on mi ida ma nasesesi noro ida, ida man kunu kehen ida, ida man pelek na'ahan ida, ida ma nahina'aredi noro ida, ida ma na'ihoru na'idaru ida, ida man wakunu nano'onyaka ida, ida man holi kukulu lalap noro ida, la ida ma kan mori wawa'an noro ida.

<sup>21</sup> Ya amka'uk haenhi, lo'o ya'u rakanedi ki enne, Makromod Lalap lo'o na'idaru ya'u lolo mi kalarna la ya ahene nammori ono mi ri heruwali mahar hi'i hini'i man morso, lerpi'u lerwa'u,

la holi diwar dawar. Nonolu  
hir hi'i ha man ailanna onne,  
la lere eni kar herre rir  
morimori ma ka namlolo  
onne makun.

## 13

### *Nounaku man horu*

<sup>1</sup> I wal'u na'ahoru, eni  
rewkelu nine ya'u ki ka'arala  
mi. Yon hamlinu horhorok  
aile Horok Lap raram ma  
na'aheni, "Lo'o ri aile man  
hi'i sala, wa'an rehi ri woro'o  
wokelu aile ramwali man  
kuku maka nin sala onne leke  
ri na'akeme rauroin kokkoo  
an hi'i sala." \*

<sup>2</sup> Lere ya'u ki ka'aredi mi  
rewro'o nine, ya'u dadiyaledi  
ri man hi'i dohohala on-  
nenihe, leke hir renedi rir  
hini'i wenewhe ma ka nam-  
lolo onne. Enla ors eni, lere  
ik ida man ko'u ida makun,  
ya a'ori honorok hi wali'ur,  
leke lo'o ya'u rakanedi lolo  
onne rewkelu nine hi kar hi'i  
dohohala onne me'e. Enima  
lere ya'u rakanedi, lo'o hi  
roro idewe ri namehin hi'i  
dohohala onne makun, ya  
ahan rehi la ya ala hunukum  
ma namlolo\* hi haenhi.

<sup>3</sup> Ya'u hi'i heheni ono mi  
penia mapanakedi tanada  
nahenia Kristus nala molollo  
man lap narehi maya'u leke  
yo odi molollo nounaku mi!  
Kristus ka namka'uk nala  
hunukum ki mi leke na'alolo  
minim morimori, maa Ai  
nodi Nin ke'eke'el an'anha  
ma narehi nalewen howok  
lolo mi raram na'akeme!

<sup>4</sup> Memen lere An maki  
lolo au kekiyowok, Ai kemen  
ka naruri, maa Makromod

Lalap kukul Nin ke'eke'el  
an'anha man lap wake'e hi'i  
An mori wali'ur nano Nina  
makmaki. Mayai ma akin  
naili'il Jesus enihe naisa  
onne haenhi. Lolo ai kemen,  
ai ka maruri, maa Makromod  
Lalap nala Nin molollo mayai  
penia am lernala morimori  
worworu leke ai maruri  
howok Nin honowok lolo  
mi herne kalarua. Ende  
rakan lere am ki ka'arala  
mi, lo'o mim do'on mauroin  
mouropo nahenia Makro-  
mod Lalap naledi molollo  
mayai leke mala nounaku  
noro hunukum ki mi.

<sup>5</sup> I wal'uhe, ya apanak mim  
koklolo ma'inau mi akim  
noro minim morimori, leke  
mi mauroin namlolo kokkoo  
mi akim naili'il Jesus me'e, ee  
kaun makun? Alhi'ihepe mi  
ka mauroin kokkoo nahenia  
Jesus Kristus aile mi raram?  
Lo'o onne nin panaeku mi  
akim ka naili'il makun! Yon  
de mim kokme'e ma'aheni  
mi akim naili'il, maa ma  
namlolo mi akim ka naili'il  
kokkoo makun.

<sup>6</sup> Ya'u raram nodi mim  
derne anim wanakunu la  
do'on anim hini'i wenewhe,  
de mauroin nahenia ai  
mamwali Makromod Lalap  
Nin hophopon wahwahan  
ma namlolo man An hopon  
loikaru Lirna Wawa'an ki mi.

<sup>7</sup> Enla ai mapanak Makro-  
mod Lalap nodi nala mi, leke  
yon mim hi'i dohohala. Ka'u  
hi'i lir napanak onne leke  
rin nauroin ai mamwali ma  
nodi Jesus Lirna Wawa'an  
ma namlolo, maa am hi'i  
lir napanak onne leke mim

\* 13:1 Ul. 19:15 \* 13:2 Po'onala HN. 13:6-12 leke mauroin hi'ihehewi Paulus  
nala hunukum ri ida.

hi'i ha man wa'an la lernohi Makromod Lalap Nin honorok aki mamani. Ma na'ono wake'e mayai, mim hi'i ha ma namlolo mamani.

<sup>8</sup> Lo'o mim hi'i ha ma namlolo, ka odi molollo ala hunukum ida ki mi, ono Makromod Lalap nala molollo mayai leke paku mi hi'i ha ma namlolo mehe.

<sup>9</sup> Lo'o ri na'aheni ai ka maruri ono ka mala hunukum man am nonou onne, kan hi'i haida, ai akim nahuwa'an mamani, horo nahenia mi akim naruri naili'il ik Makromod. Enla am hi'i lir napanak leke namlolo kokkoo mi modi honorok akin man mou hi'i wewhe Makromod Nin honorok panaeku.

<sup>10</sup> Onne penia lere ya'u ko'u nano mi makun, ya'u hi'i horok aku ki, leke lere ya'u rakan ki enne, kam hi'i dohohala onne me'e. Yon de yo odi molollo man Makromod Lalap nala ya'u, odi lir apipinha dadiyala mi wali'ur, ono Ai penia nala molollo onne maya'u leke ya a'alap mi akim. Ai ka nale leke yo odi ano'onyakedi mi akim ma naili'il eni.

### *Tape masi man horu*

<sup>11</sup> Lolo ainu'u wanakunu man horu eniyeni, ya apanak mim hi'i mi akim nahuwa'anedi here. I wal'uhe, mahehe leke minim hini'i wenewhe namlolo wake'e lolo Ai leken kalarna, la kokala ainu'u wanakunu nounaku eni wawa'an. Hi'i mi honorok akin mamwali mahaku lolo minim kerei raram, la ida man mori wawa'an noro ida. Ya

apanak Makromod Lalap ma namwali raramyaka onno noro moiliwi mahuwele onno norle'ule'u norwaliwali mi mamani.

<sup>12</sup> Enla ya apanak mi ida ma nala tape masi ida modi aki man mou.

<sup>13</sup> Makromod Lalap Nin ri mememen mai eni na'akeme rala rir tape masi ki mi haenhi.

<sup>14</sup> Na'amoli Makromod Yesus Kristus nala Nina rere'e haharu ki mi, Makromod Lalap namkene naramyak mi mamani, la Roh Kudus hi'i mi ida man mori wawa'an noro ida la norle'ule'u norwaliwali mi na'ahoru.

Ainima tape masi,  
*Paulus*

# Galatia

## *Horok Lirna La'an*

Manin noho Galatia ka ramwali ri Yahudi. Nonolu hir hoikani noho makromon mamani, maa rakan lere Paulus lan loikaru Yesus Lirna Wawa'an lolo noho Galatia, ri heruwali akin naili'il Makromod Yesus.

Paulus namhareti Galatia me'e ne, ri namehin laa Galatia wali'ur wakuku wanakuku ma ka namlolo. Meser man wukupoho onne ra'heni, "Yon ik akin naili'il Makromod Yesus mehe leke kamwali Nin ri, maa wa'an rehi ik lernohi Makromod Lalap Nin konomdere ida man Ai nanala Abraham ma na'heni lam sunat la lernohi Makromod Lalap Nin keneri hono'ok na'akeme haenhi."

Paulus dernedi rir wanakuku onneni ne, ai na'ahan. Lolo ainin horok man laa ri Galatia eniyeni an wakunu na'heni, "Ik kamwali ri molololo Makromod Lalap kalarna ono ik akin naili'il Yesus mehe. Ya'u ka'u hopon ri na'ahenia, 'Lam sunat la lernohi Makromod Lalap Nin keneri hono'ok na'akeme leke mi mamwali ri molololo.' Ka! Ik kamwali Abraham upun anan ma namlolo lere ik akin naili'il Yesus." Onne nin panaeku lere ik akin naili'il Yesus ik kamwali ri molololo Makromod Lalap kalarna, la ik lernala rere'e haharu man Makromod Lalap nouwedi Abraham haenhi (3:6-9). An wakuku wali'ur na'aheni, "Yon pene'ek ik kamwali ri molololo ono ik lak sunat,

ee lernohi Musa nin holoor halauk rahu enihe." Paulus nin wanakuku ma na'ono eni ik do'on lolo 2:16 noro 5:1.

## *Horok Ihin*

1. Paulus nala wanakunu man hari horok (1:1-10).
2. Paulus loikaru ha wo'ira ri Galatia leke hi rauroin nin molollo aile nounaku hi (1:11-2:10).
3. Paulus wakuku ri Galatia na'ahenia ik kamwali ri molololo Makromod Lalap kalarna ono ik akin naili'il Yesus mehe, ka na'ahenia ono ik lernohi agame nin holoor halauk rahu eni (2:11-4:31).
4. Paulus nounaku ri Galatia na'ahenia, "Yon hurinohi Makromod Lalap Nin keneri hono'ok eni nodi molollo ika...maa hurinohi Roh Kudus nodi molollo ik akin" (5:1-6:10).
5. Paulus nala nounaku man horu (6:11-18).

## *Paulus nala hiyene arore manin Galatia*

<sup>1-3</sup> I wal'uhe, kerei raramne manin Galatia na'ahoruwed!

Ya'u eni Paulus. Yo oro ik walihne ma akin naili'il Yesus mai eni, mapanak ik Makromod Lalap noro Makromod Yesus Kristus rala rira rere'e haharu ki mi la hi'i mim holi moiliwi mahuwеле.

Ri mormori kar hopon ya amwali hophopon ma nodi Lira Wawa'an eni, la hi kar kikan ya amwali onne haenhi, maa Yesus Kristus noro idewe ik Amad, Makromod Lalap ma na'amori Ai wali'ur nano Nin makmaki,

mehen kikan maya'u amwali  
ma nodi Lira Wawa'an eni.

<sup>4</sup> Makromod Yesus hi'i  
wewhe lernohi Makromod  
Lalap ma namwali iknik Ame  
Nin honorok aki, de mehen  
nala kemen ri nesne. Ende  
An pairedi iknik dohohala  
leke yon ik lernala hunukum.  
An hi'i onne leke huriyedi  
ika nano noho wawan nin  
yakyak salsala ma aile lere  
eniyeni.

<sup>5</sup> Ka'uli kasa'a Makromod  
Lalap laa ewi-ewi. Amin.

*Paulus na'ahan ono  
manin Galatia enihe waliyedi  
kili'urne Lira Wawa'an ma  
namloleni*

<sup>6</sup> Mim hi'i ya'u hehel rehi  
ono idedi nanumene Makromod  
Lalap napoluwedi  
mi lolo Kristus Nin rere'e  
haharu lekpananne mi  
akim naili'il Lira Wawa'an  
eni, maa mim pelek huri  
we'eredie, la loledi kalla  
namehin me'e.

<sup>7</sup> Kalla namehin kaale  
leke ik lernala rere'e haharu  
man Makromod Lalap nala  
maika, naukara Kristus  
Lirna Wawa'an man am loloi  
kakaruwedi ki mi me'en. Ri  
aile man loikaruwedi  
wanakuku man sala me'e,  
de hi'i mi mehe kakaiyedi.  
Hi ra'heni Kristus Lirna  
Wawa'an eni kan nokor, de  
ra'uwali rir wanakuku man  
saleni, penia mim waliyedi  
mi kili'urmne me'e.

<sup>8</sup> Ya'u konohi mi nahenia  
lo'o ri aile ma nodi lira  
namehin ma ka namnehe  
noro Lira Wawa'an am  
loikaruwedi ki mi me'en,  
na'amoli Makromod Lalap  
nakineri ai! Lo'o mayai  
mehe, ee hophopon a'am

raram herre Lira Wawa'an  
eni, na'amoli Makromod  
Lalap nakineri man herre  
onne.

<sup>9</sup> Lere ik minwuku makun  
am konohiyedi mi nahenia  
ri man hi'i heheni nakineri  
iyedi me'e, la lere eniyeni ya  
a'aheni wali'ur, "Lo'o ri aile  
ma nodi lira namehin nano  
Lira Wawa'an mim kokaledi  
me'en, ya apanak Makromod  
Lalap nakineriyedi ai!"

<sup>10</sup> Ende, hi'ihehewi i  
wal'uhe? Mim dernedi  
ainu'u wanakunu idedi eni,  
de lo'o mi mauroin nahenia  
ya anoin u'uli sasa'a nano  
ri mormori, ee ka? Ka!  
Ya'u raram nodi kokala u'uli  
sasa'a nano Makromod Lalap  
mehe. Mi mauroin nahenia i  
raram nodi ahuwa'anedi ri  
mormori akinhe, ee Makromod  
Lalap? Lo'o ya'u raram  
nodi lernala ri nin u'uli  
sasa'a, ka amwali Kristus Nin  
hophopon wahwahan.

*Paulus kan kokala Lira  
Wawa'an nano ri, maa nano  
Makromod Yesus mehe*

<sup>11</sup> Konohiyala i wal'u  
na'ahoruwedie! Lira  
Wawa'an man ya'u loikaru  
eni yeni kan mai nano ri mor  
mori nin honorok panaeku.

<sup>12</sup> Ya'u ka'u kokala Lira  
Wawa'an eni nano ri mor  
mori, la ri mormori mahaku  
kan wakuku Lira onne  
maya'u, maa Yesus Kristus  
mehen konohi Lirna onne  
maya'u!

<sup>13-14</sup> I wal'uhe mauroin  
ainu'u morimori nonolu eni,  
lere ya'u lernohi Yahudi nin  
agame makun. Ainu'u kunuu  
wali nammori rasala kerk  
erhe Yahudi nin agame, maa  
ya'u rehiyedi hi na'akeme

ono yo odi aki man mou lernohi ik upud a'ad rira keneri hono'ok na'akemeni. Lere onne ya ahehe hi'i sus Makromod Lalap Nin kerei raramne, la ya ahehe esne mouwedi hi.

<sup>15-16</sup> Kade ya'u hi'iyedi ha onne me'e, maa Makromod Lalap raram nodi nalhari Ananne lolo ya'u honorok akin. Kar mori ya'u makun, An niliyedi ya'u me'e, la napoluwedi ya'u leke loikaru Lirna Wawa'an eni ri ma ka namwali Yahudi enihe. An hi'i onne ono Ai namre'e namharu ya'u rehi, kade ya'u hi'i ha man ailanna lere nonolu eni. Lere Makromod Lalap nalhari Anan maya'u onne, ri mormori mahaku kan wakuku Lira Wawa'an eni maya'u makun.

<sup>17</sup> Enla ka'u laa Yerusalem leke lernala wanakuku nano hophopon ma noluwedidi ya'u rodi Lira Wawa'an enihe, maa ya'u idewe laa noho Arabia nanumene wali wali'ur laa kota Damsyik.

<sup>18</sup> Anna wokelu horu mene ya ala'a laa kota Yerusalem, leke oro Petrus pakromo. Ya'u minwuku noro ai alam idaweli wolima mehe.

<sup>19</sup> Lere onne yo oro Yakobus (Makromod Yesus mo'oniwalla mememen) pakromo haenhi, maa ka'u do'on hophopon ma nodi Lira Wawa'an namehin enihe. Ya'u do'on woro'ohe mehe.

<sup>20</sup> I wal'u na'ahoruwedidi, ainu'u wanakunu eniyeni namlolo kokkoo. Ik Makromod Lalap nauroin ka apoho.

<sup>21</sup> Onne horu ya'u laa noho

Siria noro noho Kilikia.

<sup>22</sup> Lere onne ka'u min Yudea de kerei raramne lolo onne ka rauroin ya'u makun,

<sup>23</sup> maa hir derne ri namehin ra'aheni, "Paulus ma nonolu eni hi'i sus maika, mahan wakuku Yesus Lirna Wawa'an man nonolu an ken nano'onyake."

<sup>24</sup> Enpenia hi ra'uli rasa'a Makromod Lalap ono hir derne inhawa ma namwali maya'u eni.

## 2

*Paulus pakromo noro Petrus, Yakobus, noro Yohannis man panulu lolo kerei Yerusalem*

<sup>1</sup> Nakawedi anna idaweli wo'akka, yo oro Barnabas wali wali'ur laa Yerusalem, ai moro Titus haenhi.

<sup>2</sup> Ya'u laa Yerusalem ono Makromod Lalap hopon ya'u laa. Rakanedi Yerusalem ne, ya'u pakromo noro man panulu lolo kerei raramne mehe. Ya'u konohi hi Lira Wawa'an ihin man ya'u loikaru ri ma ka namwali Yahudi enihe leke ya auroin lo'o hir kokala ainu'u honowok, ee ka. Yon hi'i hi kar kokala ainu'u wanakuku, de ainu'u honowok man ya'u hi'iyedi noro honowok man ya'u hihi'i lere eniyeni kan min haida.

<sup>3</sup> Kade Titus onne ri Yunani, maa man panulu lolo Yerusalem onnenihe ka rakerne ai lan sunat lernohi Makromod Lalap Nin holoor halauk eni.

<sup>4</sup> Enimaa ri Yahudi heruwali ra'aheni hi ramwali ri Kristen, maa rapoho. Hi onnenihe hopon Titus

laa sunat. Hir kokme'e ramwali ri Kristen leke mai koklolo ra'inau mayai, ono rir panaeku penia ri Kristen na'akeme kara hinuri nano Makromod Lalap Nin keneri hono'ok enihe. Maa keneri hono'ok onne ka nodi molollo maika me'e, ono ik koro Yesus Kristus kamwaliyedi mahaku me'e.

<sup>5</sup> Ende ik ka'okuledi rir panaeku onne, leke yon kawo'or kawa'aha Makromod Lalap Lirna Wawa'an eni noro rir wanakuku ma ka namlolo onne. I wal'uhe, Lira Wawa'an man mim kokaledi me'eni penia namlolo kokkoo.

<sup>6</sup> Enla man panulu lolo Yerusalem onnenihe man rin wekel uluwakun lalap lolo kerei, ka ra'uwali haida ainu'u wanakuku eni. Lo'o hi ramwali uluwakun lalap, ee man lolo yawa kan min haida maya'u, ono Makromod Lalap ka na'ilii ka naloho ri.

<sup>7</sup> Man panulu onnenihe dernedi ainu'u wanakuku, maa hi kar herre haida. Hi rauroin nahenia Makromod Lalap kikanedi ya'u leke odi Lira Wawa'an eni laa ri ma ka namwali Yahudi namnenehe Makromod Lalap kikanedi Petrus namwali ma nodi Lira Wawa'an eni laa ri Yahudi enihe.

<sup>8</sup> Makromod Lalap penia nala ruri pe'el Petrus leke namwali ma nodi Lira Wawa'an eni laa ri Yahudi enihe. Naise onne, Makromod Lalap nala ruri pe'el ya'u leke yo odi Lira Wawa'an eni laa ri ma ka namwali Yahudi enihe.

<sup>9</sup> Ende Yakobus, Petrus noro Yohanis ma namwali uluwakun ri Kristen na'akeme ma aile Yerusalem, hir re'e kokala ya'u noro Barnabas la ra'aheni, "Namlolo kokkoo, Makromod Yesus napoluwedi Paulus leke namwali ma nodi Lira Wawa'an eni." Enpenia ai moro hi tape masiyedi me'e. Tape masi eniyeni namwali tanada nahenia anima honorok aki mahaku. Mayai lolo nodi wuku na'akeme raramne, ida ma ne'enohi ida, de am howok noro ri ma ka namwali Yahudi enihe la hir howok noro ri Yahudi enihe.

<sup>10</sup> Wokeluhe rapanak eni mehe, "Yon hamlinu ri Kristen ma na'alehe naulinu lolo Yerusalem." Enla ya akin namrana hi'i rir panaeku onne.

*Paulus dadiyala Petrus, ono Petrus nako'uwedi kemen nano ri ma ka namwali Yahudi enihe*

<sup>11</sup> Lere Petrus rakanedi Antiokhia, ya'u dadiyale lolo heri kalarna ono an hi'i ha man sale.

<sup>12</sup> Nonolu ai ka na'ilii naloho ri Yahudi noro ri ma ka namwali Yahudi, de noro ma ka namwali Yahudi enihe ra'akwuku. Enimaalera ida Yakobus nin ri orwali ida woro'o mai nano Yerusalem. Nano lere onne Petrus nako'uwedi kemen nano ma ka namwali Yahudi enihe\* ono ai namka'uk ri Yahudi onnenihe, de ka noro ma ka namwali Yahudi enihe ra'akwuku me'e.

<sup>13</sup> Enla kade hi rauroin rir hini'i onne ka namlolo, maa

\* **2:12** 'Ma ka namwali Yahudi enihe' wekel ri ma kan sunat.

ri Yahudi namehin enihe lernohiyedi Petrus nin hini'i man sala onne haenhi. Onne kan mehe, maa Barnabas lernohiyedi hi haenhi, de ka na'akwuku noro ma ka namwali Yahudi enihe me'e.

<sup>14</sup> Ya'u do'onedi hi kar lernohi Lira Wawa'an nin panaeku ma namlolo eni me'e, de ya'u dadiyala Petrus lolo heri kalarna a'aheni, "I wal'u, Petrus! O mamwali ri Yahudi, maa nadedem om lernohi ri ma ka namwali Yahudi rir noho honolla, la o me'ene ka masala kerkerhe Makromod Lalap Nin keneri hono'ok me'e, de alhi'ihepe o makerne ri ma ka namwali Yahudi enihe lernohi keneri hono'ok rahu eni?"

*Ik kamwali ri molololo, ono ik akin naili'il Yesus Kristus mehe*

<sup>15</sup> Yo oro Petrus eni, nano lere momori airo eni ai mamwali ri Yahudi, la ainim hini'i wenewhe kan ailanna naise ma ka namwali ri Yahudi enihe.

<sup>16</sup> Kade ainim hini'i kan ailanna, maa ai mauroin ainim hini'i wenewhe man wa'an onneni kan hi'i yai mamwali ri molololo Makromod Lalap leken kalarna. Ri mahaku ka namwali ri molololo ono hir lernohi Makromod Lalap Nin keneri hono'ok eni, maa ri ma akin naili'il Yesus mehe. Onne penia ai kam pu'ik heli Makromod Lalap Nin keneri hono'ok enihe leke mamwali ri molololo Ai kalarna, maa ai akim naili'il Yesus Kristus mehe.

<sup>17</sup> Enla ri Yahudi heruwali ra'aheni ainim dohohala aile, ono ai kam lernohi keneri

hono'ok enihe, maa ai akim naili'il Kristus mehe leke An hi'i mayai mamwali ri molololo Makromod Lalap leken kalarna. Ri man wakunu heheni ra'aheni Kristus hi'i mayai madiyaur dohohala ono ai kam hi'i wewhe keneri hono'ok na'akeme, maa rir panaeku onne ka namlolo wake'e!

<sup>18</sup> Lo'o ya'u hi'iyedi kenekrohu yon lernohi keneri hono'ok rahu eni, maa ya'u wali wali'ur lernohi keneri hono'ok, ainu'u panaeku onne kan min haida la ya amwali man hi'i dohohala wali'ur. Ainu'u hini'i onne naise ya aiye'eredi heuheu lo'olo'ol la yo odi horn arn lo'olo'ol onne a'ariri heuheu wali'ur.

<sup>19</sup> Nonolu eni ya ahehe lernohi keneri hono'ok na'akeme, maa keneri hono'ok onne kukul mouropo nahenia ya'u hi'i dohohala nammori, la kan hi'i ya amwali ri molololo Makromod Lalap kalarna. Ende ka'u mori pu'ik heli keneri hono'ok onne me'e, maa ya'u mori lernohi Makromod Lalap Nin honorok aki mamani. Lere eniyeni ainu'u morimori lo'olo'ol maki noredi Kristus lolo au kekiyowok me'e, la Makromod Lalap do'on onne naise yo oro Ai maki wewerre.

<sup>20</sup> Ende ka'u mori naise nonolu eni me'e, maa Kristus penia mori lolo ya'u raramne. Lere ya'u aile mai noho wawan makun, ya akin naili'il mamani Makromod Lalap Ananne ma

naramyaka ya'u eni. Ai nala kemen resne nahinerre ya'u leke yon i lernala hunukum makmaki.

<sup>21</sup> Ende i wal'uhe, Makromod Lalap Nin rere'e haharu eni penia hi'i ik kamwali ri molololo Ai kalarna, de ya amhene a'okul Nin rere'e haharu onne. Lo'o ik kamwali ri molololo ono ik lernohi Makromod Lalap Nin keneri hono'ok rahu eni, Kristus Nin makmaki eni kan min haida.

### 3

*Yon pu'ik heli Makromod Lalap Nin keneri hono'ok, maa pu'ik heli mehe Yesus*

<sup>1</sup> Eih! I walin manin Galatia mie! Mi maploo rehi! Inhoi paipudi mi penia mi kam lernohi wanakuku ma namlolo me'e?! Lere man laedi me'e, ya'u wakuku mi mouropo hi'ihepe hir wairesne Yesus Kristus lolo au kekiyowoke.

<sup>2</sup> Horhorok inhawa ma namwaliyedi mi lere man laa eni. Lo'o mim lernala Roh Kudus ono mim lernohi Makromod Lalap Nin keneri hono'ok onne? Ka menee! Mim lernala Roh Kudus ono mim derne Lirna Wawa'an eni, de mi akim naili'iliedi Yesus!

<sup>3</sup> Mi lo'o ma'iseri me'e?! Lere dedesne mi akim naili'il Yesus onne, Roh Kudus hi'i mi mamwali ri worworu. Alhi'ihepe mim ken modi minim ruri pe'el ma'ahoru Nin honowok onne leke mamwali ri molololo Makromod Lalap kalarna! Onne kan wa'an!

<sup>4</sup> Panaeku nammori namwaliyedi noro mi me'e ono mim lernohi Lira Wawa'an eni, de alhi'ihepe mi raram nodi lernohi Yahudi rir keneri hono'ok wali'ur? Yono! Yon hi'i de panaeku rahu ma namwaliyedi mi onne, kan min haida.

<sup>5</sup> Ende i wal'u na'ahoru, Makromod Lalap naledi Roh Kudus ki mi me'e, la An hi'iyedi ha wo'ira lolo minim morimori man ri mormori kan dodo'onnala makun. Lo'o mi mauroin nahenia An hi'i onne ono mim lernohi Makromod Lalap Nin keneri hono'ok enihe? Ka menee! An hi'i onne, ono lere mim derne Lira Wawa'an eni mi akim naili'il Makromod Yesus mehe.

<sup>6</sup> Panaeku onne namnenehe Abraham nonolu eni. Ai akin namkene naili'il Makromod Lalap Nin nou, de MAKROMOD na'aheni Abraham onne namwali ri molololo. \*

<sup>7</sup> Ende, ik kauroin mouropo nahenia inhoi akin naili'il Kristus, hi penia ramwali Abraham 'upun anan' kokkoo.

<sup>8</sup> Nano nonolu eni Makromod Lalap Nin panaeku hi'i ri ma ka namwali Yahudi enihe ramwali ri molololo Ai leken kalarna, horo nahenia hi akin naili'il Yesus. Lira Wawa'an onne nonolu me'ede horokedi aile Horok Lap me'e. Hir horokedi Makromod Lalap Nin nou laa Abraham na'aheni, "Yo odi o leke Ya amre'e amharu ri na'akeme lolo noho wawan." \*

<sup>9</sup> Ende ri na'akeme ma

\* 3:6 NN. 15:6 \* 3:8 NN. 12:3, 18:18

akin naili'il Makromod Lalap  
naise Abraham, hir lernala  
Makromod Lalap Nin rere'e  
haharu haenhi.

*Ri mahaku kan paekunala  
lernohi Makromod Lalap Nin  
keneri hono'ok na'akeme leke  
lernala or'ori dardari ma kan  
horu eni*

<sup>10</sup> Lolo Horok Lapeni,  
horhorok aile ma na'aheni,  
"Makromod Lalap nakineri  
ri na'akeme ma kan hi'i we-  
whe lernohi keneri hono'ok  
na'akeme man aile Musa nin  
horok enihe." \* Ende inhoi  
nahehe namwali ri molololo  
ono lernohi Makromod Lalap  
Nin keneri hono'ok eni, an  
lernala keneri kanai nano  
Makromod Lalap ono ri  
mahaku kan paekunala  
lernohi keneri hono'ok onne  
na'akeme.

<sup>11</sup> Horok Lap Lirna aile  
haenhi ma na'aheni, "Ri ma  
akin naili'il Makromod Lalap  
mehe ramwali ri molololo  
Ai kalarna penia lernala  
or'ori dardari ma kan horu  
eni." \* Ende ik kauroin  
mouropo nahenia ka karuri  
hi'i wewhe Makromod Lalap  
Nin keneri hono'ok na'akeme  
leke kamwali ri molololo Ai  
leken kalarna.

<sup>12</sup> Kalla man wakuku ika  
aki ma naili'il Makromod  
eni namehin wake'e nano  
kalla man wakuku ika hi'i  
wewhe Makromod Lalap  
Nin keneri hono'ok onne,  
ono kalla onne kan wekel  
aki ma naili'il Makromod,  
maa na'aheni, "Lo'o rin hi'i  
wewhe Makromod Lalap Nin  
keneri hono'ok na'akeme  
kokkoo, an lernala morimori

man wa'an lolo Makromod  
Lalap leken kalarne." \*

<sup>13</sup> Makromod Lalap  
nakineriyedi ik na'akeme  
ono ik larlewenedi Nin  
keneri hono'ok enihe, maa  
Kristus huri we'eredi ika  
nano keneri onne me'e.  
Horhorok aile Horok Lap  
ma na'ahenia, "Ri man  
wairesne lolo au meriri,  
ai onne Makromod Lalap  
nakineriyedi me'e." \* Ende  
lere Kristus wairesnedi lolo  
au kekiyowok onne, An herre  
maika de mehen lernala  
Makromod Lalap Nin keneri.

<sup>14</sup> Kristus hi'i onne leke ri  
ma ka namwali Yahudi enihe  
kokala rere'e haharu man  
Makromod Lalap nouwedi  
Abraham haenhi. Hir kokala  
rere'e haharu onne ono hi  
akin naili'il Yesus Kristus.  
Ende lo'o ik akin naili'il Yesus  
Kristus man maki lolo au  
kekiyowok eni, ik lernala  
Roh Kudus man nonolu eni  
Makromod Lalap nouwedi  
me'eni.

*Nou man Makromod  
Lalap naledi Abraham noro  
upun ananhe, kan herre laa  
ewi-ewi*

<sup>15</sup> I wal'uhe, ya ala  
wanakunu naho'ok ida nano  
iknik morimori akilere. Lo'o  
ri aile man hi'i horok nou.  
An hi'i horok nou onne horu,  
na'ono nawinauwedi, de  
ri mahaku kan herre, ee  
ra'uwali panaeku namehin  
nano nou onne.

<sup>16</sup> Namnenehe, Makromod  
Lalap hi'iyedi Nin nou ma  
namkene noro Abraham  
noro Upun Anan. Lolo Horok  
Lapeni Makromod Lalap ka

\* 3:10 Ul. 27:26 \* 3:11 Hab. 2:4 \* 3:12 Im. 18:5 \* 3:13 Ul. 21:23

na'aheni, "noro Abraham noro upun ananhe," manin panaeku 'upun anan nammori', maa Ai na'aheni, "noro Abraham noro upun anan ida". \* Makromod Lalap hi'i Nin nou noro Abraham noro Upun Anan ida mehe, Ai onne Kristus.

<sup>17</sup> Ainu'u panaeku hi'i heheni: Makromod Lalap huhu wawar Nin nou An hi'i noro Abraham. Nakawedi anna rahu wo'akka welikelu nanumene Ai nala Nin keneri hono'ok ri mormori, maa Nin keneri hono'ok onne kan herre Nin nou ma namkene man An hi'iyedi noro Abraham onne. \*

<sup>18</sup> Horhorok! Yon mauroin nahenia Makromod Lalap nala Nin rere'e haharu ono mim lernohi keneri hono'ok onne. Onne nin panaeku An herredi Nin nou, de kan lernohi Nin nou noro Abraham me'e, maa onne ka namlolo ono Makromod Lalap nala Nin rere'e haharu Abraham lernohi Nin nou ma namkene onne mehe, ka napanak wanalhanne ida.

*Makromod nala keneri hono'ok onne leke ik kauroin ik hi'iyedi dohohala me'e*

<sup>19</sup> Ende, Makromod Lalap Nin inhawa panaeku penia nala keneri hono'ok laa Musa? Makromod Lalap nala Nin keneri hono'ok Musa leke ri mormoriyana rauroin mouropo inhawa ma namwali dohohala. Ainin panaeku ri mormori lernohi keneri hono'ok onnenihe rakan lere Jesus mai. Ai penia namwali Upun Anan man

Makromod Lalap wewekel onne lere Ai nala Nin nou laa Abraham nonolu eni. Makromod hopon Nin hophopon a'am raram nala Nin keneri hono'ok Musa, la Musa onne namwali Makromod Lalap Nin man hemen lira ma nodi Nin keneri hono'ok laa ri heri ri wali.

<sup>20</sup> Lo'o ri ida hi'i nou noro ri namehin, ai naadem nair man hemen lira leke paku woro'ohe. Ende lere Musa loikaru Makromod Lalap Nin keneri hono'ok onne ai namwali Makromod Lalap Nin man hemen lira, maa lere Makromod Lalap hi'i Nin nou noro Abraham, Ai kan nair man hemen lira. Makromod Lalap mehe nala Nin nou Abraham.

<sup>21</sup> Ende lo'o keneri hono'ok enihe ra'okuledi Makromod Lalap Nin nou ma namkene noro Abraham onne? Ka! Lo'o namlolo kokkoo rin lernala or'ori dardari nano keneri hono'ok, onne nin panaeku ri man hi'i lernohi keneri hono'ok na'akeme namwali ri molololo Makromod Lalap kalarna, maa onne ka namlolo.

<sup>22</sup> Horok Lap Lirna aile ma na'aheni dohohala nodiyedi molollo ri mormori lolo noho wawan na'akeme me'e. Enpenia or'ori dardari man Makromod Lalap nouwedi me'en i ik kokala ono ik akin naili'il Yesus Kristus mehe, kalla namehin kaale.

<sup>23</sup> Lere Jesus kan mai noho wawan makun, Makromod Lalap Nin keneri hono'ok onne nodi molollo ika manani. Iknik morimori naise ri ma aile bui raram ono

\* 3:16 NN. 12:7 \* 3:17 Kel. 12:40

keneri hono'ok onne duni ta'al ika mamani hehen nanumene Makromod Lalap na'amou na'ropedi Kris-tus maika penia ik akin naili'iledi Ai me'e.

<sup>24</sup> Keneri hono'ok enihe naisa meser ma nadiyaka maika hehen nanumene Kristus mai den hi'i ik kamwali ri molololo Makromod Lalap kalarna ono ik akin naili'il Ai.

<sup>25</sup> Lere eniyeni ik akin naili'iledi Kristus me'e, de keneri hono'ok onnenehe ka nodi molollo maika me'e.

<sup>26</sup> I wal'uhe, mi na'akeme mamwali Makromod Lalap ananhe ono mi akim naili'il Yesus Kristus.

<sup>27</sup> Rin ulutadedi mi me'e, de moro Kristus mamwaliyedi mahaku me'e, la mim kokaledi Kristus Nin mori-mori me'e, de minim mori-mori naise Ainin morimori me'e.

<sup>28</sup> Makromod Lalap ka na'ili naloho ri Yahudi noro ri ma ka namwali Yahudi, man hophopon noro ma ka namwali hophopon, mo'oni noro maeke. Ai penia po'on mi na'akeme namnenehe ono moro Kristus Yesus mamwali mahaku.

<sup>29</sup> Mi peni mamwali Kristus Nin ri, de mi mamwali Abraham upun ananhe haenhi. Ende mim lernala Makromod Lalap Nin rere'e haharu man An nouwedti Abraham haenhi.

## 4

<sup>1</sup> I wal'uhe, ya ala wanakunu naho'ok ida wali'ur leke a'amou i lir'u idedi eni. Tatanida aile, la aman namwali orkanaru.

Lere tatana onne lapedi me'e, an manarna aman nin linikir kanaru na'akeme, maa lere ai tatana makun, ainin molollo kaale namnehe ma namwali hophopon de kan lernala haida-haida.

<sup>2</sup> Ri namehin aile man ilitolle ai la nadiyaka nin hahaa hehen nanumene rakan lere man aman kukukul eni.

<sup>3</sup> Onneni namnenehe noro maika. Yesus kan mai makun, ik kaisedti tatana onne, ono noho wawan honolla noro holoor halauk rahu eni rodi molollo maika,

<sup>4</sup> maa rakan lere alam man Makromod Lalap niliyedi eni, An hopon Anan mai noho wawan. Anan onne, maeke morie, la Ai namwali ri Yahudi man derne nakani Makromod Lalap Nin keneri hono'ok eni.

<sup>5</sup> An mai leke huri we'er ika nano keneri hono'ok onne nin molollo leke hi'i ika kamwali Makromod Lalap ananhe.

<sup>6</sup> Ik kamwaliyedi Ai anan me'e, de Makromod Lalap hopon Anan Nin Roh mori lolo ik raramne la hi'i maika kapolu Makromod Lalap, 'Papa'.

<sup>7</sup> Ende noho honolla noro holoor halauk onne ka rodi molollo hi'i maika kamwali hophopon me'e, maa ik kamwaliyedi Makromod Lalap ananhe me'e, de ik kokala Nin rere'e haharu na'akeme man Ai na'akenedi ananhe me'eni.

*Keneri hono'ok kan hi'i ri namwali ri molololo Makromod Lalap kalarna*

<sup>8</sup> Nonolu eni mi ka mauroin Makromod Lalap

makun, de noho makromon  
ma ka namloleni rodi  
molollo mi mamani.

<sup>9-10</sup> Maa lere eniyeni  
mi mauroinedi Makromod  
Lalap me'e, ee lo'o wa'an  
rehi ya aheni Ai nauroinedi  
mi me'e! Alhi'ihepenia mi  
raram nodi hurinohi noho  
wawan eni honolla noro  
holoor halauk enihe nodi  
molollo mi wali'ur?! Mi  
masala kerkerhe Yahudi  
rir holoor halauk enihe:  
Alam Renren Warwarna,  
lere alam lalapa ma na'ono  
leke ra'an romun, wollo ha-  
nara, la alam lalap namehin  
na'akeme. Noho honolla  
noro holoor halauk on-  
nenihe ka nala rere'e haharu  
ki mi, la kan huri we'er mi  
nano dohohala.

<sup>11</sup> Ya'u ma'irhu nahenia  
ainu'u mahmaha awenne  
lere yo odi Lira Wawa'an  
loikaru ki mi eni loledi leken.

<sup>12</sup> I wal'u na'ahoru, ya  
apanak an'anchedi mi mahin-  
uriyedi nano Yahudi rir  
holoor halauk rahu onne  
naise ya ahinuriyedi me'e  
haenhi. Kade ya amwali  
ri Yahudi, lere yo oro mi  
min wewerre, ka'u lernohi  
Yahudi rir noho honolla  
naisa mi kam lernohie  
haenhi.

Lere onne mim ilitolle  
maya'u wawa'anedi.

<sup>13</sup> Lo'o mim horhorok  
ainu'u mamai lere dedesne  
onne makun. Lere onne  
i kem'u apinhale, de onne  
namwali leken paharin ya'u  
loikaru Yesus Lirna Wawa'an  
eni ki mi.

<sup>14</sup> Kade i kem'u man ap-  
inha onne hi'i mi mahalarna,  
maa mi ka ma'okul mahoi  
ya'u. Mim kokala ya'u naise

ya amwali Makromod Lalap  
Nin hophopon a'am raram,  
ee naise mim kokala Yesus  
Kristus mehe.

<sup>15</sup> I wal'uhe, lere onne  
mi akim nahuwa'an rehi.  
Alhi'ihepenia mi akim ka  
nahuwa'an naise nonolu  
me'e? Ya'u mehe auroin  
lere onne lo'o ya apanak  
mim hi'i haida leke paku  
maya'u, mi mampene hi'ie.  
Mi maramyaka ya'u hehen  
nanumene lo'o hiduwedi  
mi makam mala maya'u  
harome!

<sup>16</sup> Nonolu eni ya'u kono-  
hiyedi panaeku ma namlolo  
ki mi me'e, de alhi'ihepeni  
mim pene'ek ya amwali  
minim arwalie?!

<sup>17</sup> Ri man paeku hi'i mi  
lernohi Makromod Lalap  
Nin keneri hono'ok enihe  
rahehe rala mi akim, maa  
rir panaeku onne kan wa'an.  
Hirira panaeku mi akim  
nahinuriyedi nano maya'u,  
la mi akim namrana lernohi  
rir wanakuku leke yom  
derne makani maya'u me'e.

<sup>18</sup> Lo'o mi mampe'el  
lernohi panaeku ida, on-  
neni wa'an, horo nahenia  
panaeku mim lernohi onne  
namlolo! Lo'o ya'u aile, ee  
ka, wa'an rehi mampe'el  
lernohi panaeku ma namlolo  
mamani.

<sup>19</sup> I wal'uhe, mi maisa ya  
an'u mememen. I kem'u  
apinha naisa maeke ma  
na'akeki moriyana, ono  
ya'u nair ainu'u ruri pe'el  
leke paku mi mori wawa'an  
noro Kristus wali'ur. Ya  
amkene paku mi hehen  
nanumene Kristus Nin mo-

rimori namkenedi mi akim.

<sup>20</sup> Ors eni ya'u raram nodi rehi ya'u minwuku oro mi odi lir mamamal paku mi, maa ka namwali, de yo odi lir apipinha ono ya'u ka au-roin inhawa ma nakoko pena mim lernohi wanakuku ma ka namlolo.

*Naho'ok Hagar noro ri man lernohi Makromod Lalap Nin keneri hono'ok la naho'ok Sara noro ri ma akin naili'il Yesus*

<sup>21</sup> I wal'uhe man raram nodi mori lernohi Makromod Lalap Nin keneri hono'ok enihe, yon hi'i de mi ka mau-roin inhawa man horokedi lolo Musa nin Horok makun!

<sup>22</sup> Horok onne konohi na-henia Abraham anan woro'o. Anan ida inna naranne Ha-gar ma namwali hophopon, la anan ida inna naranne Sara ma ka namwali hophopon.

<sup>23</sup> Anan man mori nano maeke ma namwali hophopon onne, ra'ori naise tatana nadedem lernohi ri mormori rir honorok panaeku aimehi, maa anan man mori nano maeke ma ka namwali hophopon onne, ra'ori ler-nohi Makromod Lalap Nin nou noro Abraham.

<sup>24-25</sup> Maeke woro'o on-nenihe ramwali wanakunu naho'ok ida maika. Hi raulinu rauwali kalla woro'o rin lole leke ramwali ri molololo Makromod Lalap kalarna. Abraham hono Hagar namnenehe noro ri man lole kalla lernohi Makromod Lalap Nin keneri hono'ok eni leke ramwali ri

molololo. Ri na'akeme man lernohi keneri hono'ok enihe mori naise ma namwali hophopon, ono keneri hono'ok onne nodi molollo hi. Ende Hagar eni naho'ok naise wo'or Sinai\* man aile noho Arab, noro idewe kota Yerusalem ma aile noho wawan eni, ono Yerusalem ne'en raram mori naise hophopon, ono hir derne rakani keneri hono'ok enihe.

<sup>26</sup> Enimaa Sara eni naho'ok naisa Yerusalem ma aile a'am raram. Sara onne namwali iknik ine, la koro ai ka kamwali hophopon ono ik kahinuri kawine'eredi nano keneri hono'ok enihe me'e.

<sup>27</sup> E'niyieni naise horhorok aile Horok Lap ma na'aheni, "Maeke ma kan moriyana wake'e, o akim nahuwa'anedi!

O man nelhen kan apinha ono ka moriyana, mahuwa'anedi o akim la mahinara.

Kade o kam moriyana, maa o upmu anumhe lawanne narehi maeke ma nin mo'oni aile."\*

<sup>28</sup> I wal'u na'ahoru, ik kaisa Abraham anan Isak onne, ono ik kamwaliyedi Makromod Lalap ananne lernohi Nin nou ma namkene.

<sup>29</sup> Lere nonolu onne, Hagar anan man mori lernohi ri mormori nin panaeku aimehi onne, hi'i sus mo'oniwalla karuri man mori lernohi Makromod Lalap Nin nou eni. Lere niyieni ha ma naise onne namwali haenhi. Ri aile

\* 4:24-25 Musa kokala keneri hono'ok nano Makromod Lalap lolo wo'or Sinai onne.

\* 4:27 Yes. 54:1

man kerne dalha maika man lernohi Roh Kudus Nin honorok aki, leke hi'i ik lernohi Makromod Lalap Nin keneri hono'ok enihe.

<sup>30</sup> Enimaa horhorok aile Horok Lap ma na'aheni, "Mohiyedi maeke ma namwali hophopon noro ananne laa paharne, ono lere man mai aman ka nala nin linikir kanaru hophopon anan, maa ai nale maeke ma ka namwali hophopon anan." \*

<sup>31</sup> Ende ik ka kaisa Hagar ma namwali hophopon onne ananhe, maa ik kaisa Sara ma ka namwali hophopon onne ananhe, ono ik kahinuri kawine'eredi nano keneri hono'ok me'e.

## 5

*Yon hurinohi Makromod Lalap Nin keneri hono'ok duni ta'al mi ono Yesus huri we'eredi ika me'e*

<sup>1</sup> I wal'u na'ahoru, Kristus huri we'eredi ika nano keneri hono'ok eni me'e, de ik akin namkene naili'il Ai mamani, la yon hurinohi keneri hono'ok enihe nodi molollo ika wali'ur.

<sup>2</sup> Horhorok! Yau, Paulus mehe kukunohi mi eniyeni, "Lo'o mim hurinohi ri sunat mi leke mamwali ri molololo Makromod Lalap kalarna, Kristus Nin hini'i onne kan min haida de kan paku mi."

<sup>3</sup> Ya a'aheni wali'ur, "Lo'o ri aile ma napanak sunat lekpananne nahuwa'an wali'ur noro Makromod Lalap, la lo'o an larlewenedi keneri hono'ok ida mehe nano keneri hono'ok na'akemeni,

onne nin panaeku ai ka nahuwa'an wali'ur noro Makromod Lalap."

<sup>4</sup> Lo'o mi raram nodi lernohi keneri hono'ok enihe leke mamwali ri molololo Makromod Lalap kalarna, minim dunu'ul kanali noro Kristus kaprohuwedi me'e, la mamhene kokala Makromod Lalap Nin rere'e haharu man Ai nala ki mi eni.

<sup>5</sup> Enimaa Roh Kudus nodi molollo mayai ma akin naili'il Kristus, penia ai mamkene lapan Makromod Lalap hi'i ai mamwali ri molololo Ai kalarna.

<sup>6</sup> Mayai man du'ul kalyiedi noro Yesus Kristus me'en, lo'o am sunatedi, ee kam sunat, kan min haida, maa panaeku ma na'ono, ai akin naili'il Yesus kokkoo penia ai maramyak ainim ri heri ri wali' enihe.

<sup>7</sup> Nonolu eni mi akin naili'il Yesus wawa'an, la mim lernohi wanakuku ma namlolo mamani, maa lere eni ka me'e. Inhoi kawala mi penia kam lernohi wanakuku ma namlolo me'e?

<sup>8</sup> Mim derne makaniyedi wanakuku namehin, la wanakuku onne kan mai nano Makromod Lalap ma napolu mi mamwali ananhe.

<sup>9</sup> Wanakunu naho'ok ida aile ma na'aheni, "Ragi taran mehe hi'i tapon ha'a nammori." Hirira wanakuku onne naisa ragi eni.

<sup>10</sup> Lo'o onne namlolo, maa Makromod penia hi'i maika kamwali mahaku, de ya auroin mim herre mi honorok akin de kam

lernohi ri ma nodi wanakuku poho onneni. Enla ya auroin Makromod Lalap nala hunukum ri man hi'i mi mehe kakaiyedi onne.

<sup>11</sup> I wal'uhe, ri aile ma na'heni ya'u hopon mi lam sunat lernohi Makromod Lalap Nin keneri hono'ok enihe. Wanakunu onne ka namlolo wake'e! Lo'o ya'u wakuku nahenia wa'an rehi ri lan sunate, ri Yahudi ka na'ahan maya'u me'e. Ka'u wakuku onne, maa ya'u wakuku nahenia Yesus maki lolo au kekiyowok leke hi'i ik kamwali ri molololo Makromod Lalap kalarna, horo ik akin naili'il Ai. Hi kar kokala wanakuku onne, de hi'i apinpinha ya'u.

<sup>12</sup> Ya apanak ri man hi'i mi akim nado'o onnenihe, yon hir laa sunat mehe, maa wa'an rehi hir mehe kapaduwedi hi haenhi.

<sup>13</sup> I wal'uhe, Makromod Lalap Nin panaeku napolu ika leke ik mori huri we'eredi nano keneri hono'ok rahu eni, maa Ai ka na'heni huri we'eredi ik leke hi'i ha man ailanna lernohi ik raram nodi aimehi. Yono! Na'amoli ik ida ma naramyaka ida, la ida man paku ida mamani.

<sup>14</sup> Keneri hono'ok ida aile ma na'heni, "Maramyak minim ri mormori wali naisa mi maramyak mi kemen mememen." \* Lo'o ik lernohi keneri hono'ok onne mehe, ik lernohiyedi Makromod Lalap Nin keneri hono'ok na'akeme me'e.

<sup>15</sup> Enimaal o'o mi ida ma na'unihia ida, la ida ma

na'an ida mamani naise ha mormori merwui, minim hini'i onne kan wa'an wake'e. Horhorok, lo'o mim hi'i heheni, mi ida ma nano'onyaka ida.

*Yon mori lernohi minim raram nodi aimehi, maa lernohi Roh Kudus Nin honorok aki*

<sup>16</sup> Derne makaniyala ainu'u honorok aki eni. Hurinohi Roh Kudus nodi molollo mi mamani leke yon hi'i panaeku man ailanna lernohi minim monmono kamanna ma aile mi irhun raramne me'e.

<sup>17</sup> Panaeku man yak ma aile mi irhun raramne peni na'okul Roh Kudus Nin honorok aki, la Roh Kudus Nin honorok aki na'okul panaeku man yak ma aile mi irhun raramne, de ida ma na'ara noro ida mamani. Eni penia mi raram nodi hi'i ha man wa'an, maa mi kam hi'i.

<sup>18</sup> Lo'o mim hurinohi Roh Kudus nodi molollo mi, keneri hono'ok enihe ka nodi molollo mi me'e.

<sup>19</sup> Ik kauroin mouropo hini'i wenewhe ma namehiyala aile ri irhun raramne. Onneni hini'i naisa: lerpi'u lerwa'u, diniwar danawar man morso, monmono kamanna ma nodi ri mormori holi diwar dawar mamani,

<sup>20</sup> hi'i teitei, hi'i u'ur leher, rohon ara, wahi'i, kunu kehen ri, pelek na'ahan, kar peinohi ri namehin maa ilitolle kemen mehe, sopu se'er ri, na'ili naloho ri,

<sup>21</sup> nakmanna ri nin hahaa, romun arak manha mamani,

\* **5:14** Im. 19:18

raram nodi laa yapi ra'ak romun mamani, la hi'i dohohala namehin-namehin haenhi. Lere man laedi eni ya a'ori honorok mi me'e, la ya'u konohi mi wali'ur, ri ma nin honoli naise onneni kan lernala Makromod Lalap Nin rere'e haharu ono Makromod Lalap ka nodi molollo hi.

<sup>22</sup> Enimaa lo'o Roh Kudus nodi molollo maika, iknik hini'i wenewhe hi'i heheni: ik ida ma naramyak ida, ik akin nahuwa'an la ik holi moiliwi mahuwele, ik kak pelek ka'ahan ri, ik ka kodi ailanna walha ailanna, ik ida man hi'i ha wawa'an noro ida, ida ma kan huri we'er ida,

<sup>23</sup> ik kodi lir mamamal ri mamani, la ik mehe kauroin kadiyaka ika. Keneri hono'ok kaale ma na'aheni hini'i wenewhe onne sala.

<sup>24</sup> Ri ma noro Yesus Kristus ramwali mahaku, monmono kamanna ailanna ma aile hi irhun raramne ka nodi molollo hi me'e. Hirira honorok panaeku man ailanna onne wairesnedi lolo au kekiyowok me'e.

<sup>25</sup> Roh Kudus naledi ika morimori worworu me'e, de wa'an rehi ik lernohi Nin honorok aki mamani.

<sup>26</sup> Yon holi kukulu lalapa, yon ik ida man hi'i apinha ida akin, la yon ik ida man kunu kehen ida.

## 6

### *Ida man paku ida*

<sup>1</sup> I wal'u na'ahoru, lo'o mim do'on mauroin mi wallum man akin naili'il Yesus ida nin hini'i man sala aile, mi

man lernohi Roh Kudus Nin honorok aki mamani mala nounaku ai leke an lole kalla ma namlolo wali'ur. Lere mi mala nounaku onne, yon modi lir apipinha, maa modi lir mamamal. Enla, madiyaka mi kemmu leke yon mi madiyaur dohohala haenhi.

<sup>2</sup> Lere mi wallum lernala ha man sus, mi ida man paku ida, leke mi ida ma na'uwara ida nin yodi wewerek. Lo'o mim hi'i onneni, mim derne makaniyedi Kristus Nin konomdere me'e.

<sup>3</sup> Lo'o ri aile ma nauroin nahenia ai ma na'ono narehi ri namehin, maa onne ka namlolo, ai onne mehen wukupo-hedi kemen.

<sup>4</sup> Wa'an rehi mi dohodoho mehem koklolo ma'inau minim hini'i wenewhe, leke mi mauroin hini'i onne wa'an, ee ka. Lo'o wa'an, mi akim nahuwa'anedi, la yon hoiwuku minim hini'i noro ri namehin nine,

<sup>5</sup> ono mi meririi nodi na'uwara nin hini'i wenewhe aimehi.

<sup>6</sup> Ya apanak nano minim ha wo'ira man wa'an, mi malala heruwali laa ri man wakuku Makromod Lalap Lirna Wawan ki mi eni.

<sup>7</sup> Horhorok, i wal'uhe! Yon mim mehe wukupoho mi mauroin nahenia Makromod Lalap kan do'on nauroin minim hini'i man sala. Onne namlolo ono ik hap inhawa wini, ka'ili kadai wini onne ihin ennen haenhi.

<sup>8</sup> Lo'o ri ida nin hini'i lernohi nin raram nodi man ailanna, an kokala ihin ennen man yak ono ai mehe naheiredi kemen nano Makro-

mod Lalap laa ewi-ewi. Eni-maa lo'o ri namehin hi'i hini'i man lernohi Roh Kudus Nin honorok aki, ai noro Makromod Lalap mori laa ewi-ewi, la onne namwali ihin ennen man wa'an.

<sup>9</sup> Enla yon ik kaprehen hi'i ha man wa'an mamani, leke rakan lere man Makromod mehen nili, ik kokala ihin ennen man wa'an haenhi.

<sup>10</sup> Ende lo'o minim leken aile, hi'i ha man wa'an ri mormori na'akeme mamani, rehirehi ik walin ma akin naili'il Yesus.

### *Nounaku man horu*

<sup>11</sup> Ya'u, Paulus, mehe odi au rororo hi'i horok mai eni. Mi mehem po'on ainu'u honorokana man lape narehi nadedem, de loi honorok wawa'anedi.

<sup>12</sup> Ri man raram nodi ri Yahudi ra'uli hi, hi onne hopon mi lam sunat. Hirira panaeku hi'i onne leke yon ri Yahudi enihe hi'i apinpinha hi. Ri Yahudi onnenihe radedem hi'i apinpinha ri na'akeme man wakuku nahenia ri man akin naili'il Kristus man wairesnedi eni lernala or'ori dardari ma kan horu eni.

<sup>13</sup> Ri man lernohi holoor halauk sunat onne, hi mehe kar lernohi Makromod Lalap Nin keneri hono'ok na'akeme, maa hir hopon mim lernohi sunat leke hir holi kukulu lalap ono mim lernohiyedi rir honopon me'e.

<sup>14</sup> Ya'u me'ene, ka'u suk a'akulu a'alap ya'u kemen, maa ya a'akulu a'alapa ik Makromod Yesus Kristus mehe ono wairesnedi Ai lololau kekiyowok me'e. Nin

makmaki onne penia hi'i ya'u ka'u lernohi noho wawan eni nin panaeku wo'ira me'e, la ri mormori noho wawan kar peinohi ainu'u honorok aki haenhi.

<sup>15</sup> Sunat, me, kar sunat, onneni ka namwali ha ma na'ono lolo Makromod Lalap kalarna. Ha ma na'ono wake'e, rin lernala morimori worworu nano Makromod Lalap.

<sup>16</sup> Ya apanak Makromod Lalap nala Nin wawa'an rara'a la kukul Nin aki man wa'an laa ri man lernohi ainu'u wanakuku eni. Hi onne peni Makromod Lalap niliyedi ramwali ri Israel ma namlolo, Nin pipi unulu wawi tanma'a.

<sup>17</sup> Ya apanak yon ri mahaku hi'i sus maya'u wali'ur. Dilheya'are nammori aiyedi i kem'u me'e ono ya amwali Makromod Yesus Nin ri.

<sup>18</sup> Ya apanak Makromod Yesus Kristus nala Nin rere'e haharu ki mi. Amin.

Ainu'u tape masi,  
*Paulus*

# Epesus

## *Horok Lirna La'an*

Paulus hi'i horok eniyeni lere an minle bui raram ono ainina honowok nodi Lira Wawa'an eni loikaru ri (3:1, 13; 4:1). Lolo kota Epesus, ri nammori ka ramwali ri Yahudi (2:11, 12). Lere Paulus aku horok eni, lo'o nin panaeku manin Epesus lesala nanumene aku laa kota-kota namehin ma aile na'uranrani Epesus.

Lolo horok eni, Paulus konohi nahenia ik kokala rere'e haharu nammori ono 'Makromod Lalap du'ul kaliyedi ik koro Kristus me'e' (1:3). Paulus konohi ika Makromod Lalap Nin panaeku heheni: Ha na'akeme, ma aile a'am raram noro idewe ma aile noho wawan, An hi'i lolo yawa Kristus, la Kristus namwali ha onne na'akeme 'uluwakun' (1:10).

Lolo horok eni, Paulus nala wanakunu naho'ok ida woro'o. Jesus naho'ok naise uluwakun, la Nin man lernohi enihe naho'ok naise Jesus kemen (1:10, 22-23; 4:4, 15-16; 5:23-32). Jesus naho'ok naise nakar nin kunuku polle, la Nin ri na'akeme naho'ok naise nakar horn arn (2:20-21). Roh Kudus naho'ok naisa tanada lolo ik akin ma na'ono nawinawedi Makromod Lalap Nin nou maika naisa ri man hi'i horok ida na'ono nawinawedi nin horok onne nanumene ri man kokale nauroin kokkoo inhoi manaku horok onne. Onne namnenehe Roh Kudus lolo

ik akin, ono Ai namwali tanada nahenia ik kamwali Makromod Lalap Nin ri (1:13; 4:30). Enla man lernohi Yesus naho'ok naisa ke'urauk ma nodi ilak rae leke rakpali hayakyak (6:10-18).

## *Horok Ihin*

1. Paulus nala wanakunu man hari horok (1:1-2).
2. Paulus konohi Makromod Lalap Nin panaeku maika (1:3-3:21).
  - a. Ai nala rere'e haru nammori maika ono du'ul kaliyedi koro Kristus me'e (1:3-23).
  - b. Ai nala morimori worworu ma'ika, la hi'i ri Yahudi roro ri namehin na'akeme ramwali mahaku (2:1-3:13).
  - c. Paulus hi'i lir napanak leke ik kauroin nahenia Kristus naramyak ika rehi (3:14-21).
3. Paulus wakunu hini'i wenewhe man wa'an ik Kristen enihe lernohi (4:1-6:9).
  - a. Ik ida man minwuku wawa'an noro ida, la ida ma na'alapa ida akin (4:1-16).
  - b. Ik renedi íknik hini'i man ailanna la hi'i ha man wa'an (4:17-5:21).
  - c. Paulus nala nounaku namehin (5:22-6:9).
4. Naho'ok ri Kristen naisa ke'urauk ma nodi ilak rae (6:10-20).
5. Paulus nala wanakunu man horu (6:21-24).

## *Paulus nala nina hiyene arore manin Epesus*

<sup>1</sup> I walin ma namwali Makromod Lalap Nin ri mememen lolo Epesus na'ahoruwedi, mi mamkene akin naili'il Yesus Kristus

mamani ono more mamwali mahaku.

Ya'u eni, Paulus, man Makromod Lalap raram nodi kikan amwali Yesus Kristus Nin hophopon ma nodi Lirna Wawa'an eni.

<sup>2</sup> Ya apanak iknik Ame-Makromod Lalap noro Makromod Yesus Kristus rala rere'e haharu la hi'i mi mori moiliwi mahuwele.

*Makromod Lalap nala rere'e haharu nammori maika ono du'ul kalyedi ik koro Yesus me'e*

<sup>3</sup> Ka'uli kasa'a Makromod Lalap, Yesus Kristus Aman, ono An du'ul kalyedi ika koro Kristus me'e, de Ai nodi rere'e haharu man wa'an na'akeme ma aile a'am raram leke namre'e namharu ika.

<sup>4</sup> Makromod Lalap ka nakuku noho la ka naleu a'am makun, An niliyedi ika leke du'ul kalyedi koro Kristus leke kamwali Nina ri ma akin moumou dewdewe la ma na'alehe salida lolo Makromod Lalap leken kalarna.

<sup>5</sup> Nano nonolu wake'eni Ai naramyak ika, de raram nodi hi'i kenekrohu nahenia An hi'i ik kamwali Ai ananhe mememen lolo Yesus Kristus Nin hini'i, la Nin kenekrohu onne nahuwa'an Ai akin wake'e.

<sup>6</sup> Ende ka'uli kasa'a Makromod Lalap ono Ai nala Nin rere'e haharu man ma'aruru wake'eni ma'ika. Ai nala rere'e haharu onne maika lolo Kristus man Ai naramyaka rehi onne, la ka napanak wanalhan ida.

<sup>7</sup> Kristus rarna huri we'eredi ika nano dohohala nin molollo, la na'ohu

nahaledi iknik dohohala na'akeme. Ende namlolo kokkoo ik kamwali ri ma nahuriyedi me'e. Lolo kalla eniyeni Makromod Lalap kukuledi Nin rere'e haharu man ma'aruru wake'eni,

<sup>8</sup> man Ai naledi penpenu kemkeme ma'ika. An hi'i onne ono Ainin woroin narehi nalewen, la Ai nau-roin hi'i inhawa man wa'an leke paku ma'ika.

<sup>9</sup> Enla nonolu eni, Nin panaeku onne ri ka nau-roin makun, maa lere eniyeni Ai raram nodi nalhari Nin panaeku onne maika lolo Kristus me'e.

<sup>10</sup> Ende rakan lere alam Makromod Lalap mehe niliyedi, An hi'i ha wo'ira na'akeme man aile a'am raram noro idewe man aile noho wawan lolo yawa Kristus, leke Ai namwali uluwakun ha onnenihe na'akeme.

<sup>11</sup> Makromod Lalap hi'i ha wo'ira na'akeme namwali lernohi Nin raram nodi noro Nin honorok aki aimehi. Nano nonolu wake'eni An hi'iyedi kenekrohu nili ik kamwali Nin ri man du'ul kalyedi noro Kristus me'e.

<sup>12</sup> An nili mayai ma namwali ri Yahudi man dedesne namkene pu'ik heli Kristus mehe, la kikanedi mayai leke nakoko ri name-hin ra'uli rasa'a Makromod Lalap man kulu narehi la man lap narehi.

<sup>13</sup> Lere mim derne Lira ma namloleni, mi akim naili'iliedi Lira Wawa'an onne haenhi, la Makromod huriyedi mi nano minim dohohala nin molollo. Mi moro

Kristus madinu'ul makinaliyedi me'e, de Makromod Lalap nala Roh Kudus man Ai nouwedi nonolu eni ki mi leke namwali tanada ma na'ono nawinauwedi Nin nou onne la kukul nahenia mi mamwali Makromod Lalap Nin ri.

<sup>14</sup> Makromod Lalap nala Roh Kudus eni leke na'akerhe Nin nou noro ika, leke ik kauroin mouropo nahenia lere man mai Ai nala ha wo'ira na'akeme man An nouwedi maika. Rakan lere onne An huri we'er ika nano noho wawan man ailanneni, la kikan ika laa a'am raram ono ik kamwali Nin ri. Ende mai ka'uli kasa'a Makromod Lalap man kulu narehi la man lap narehi eni.

*Paulus hi'i lir napanak leke man lese horok eniyeni kokala woroin ma nano wawan*

<sup>15</sup> I wal'u na'ahoruwed! Nanolere ya'u derne nahenia mi akim namkene naili'il Makromod Yesus, la ya'u derne mi mararamyaka Makromod Lalap Nin ri na'akeme,

<sup>16</sup> ka'u ren apanak trimkasi minim hini'i onne, la akilere lolo ainu'u lir napanak ya'u wekel mi mamani.

<sup>17</sup> Ya apanak ik Makromod Yesus Kristus Nin Makromod Lalap, ik Amad man Oin Naran kukulu lalap, nodi Roh Kudus Nin molollo hari mi honorok akin leke mi mauroin Makromod Lalap namlolo kokkoo.

<sup>18</sup> Ya apanak An hari minim honorok panaeku leke mi mauroin ha wo'ira na'akeme man Ai na'akenedi nala ki mi man

Ai napoluwedi me'en. Enla ya apanak mi mauroin Nin rere'e haharu man penpenu kemkeme man Ai nala Nin ri na'akeme.

<sup>19</sup> Enla ya apanak leke mi ma akin naili'il Ai mauroin Nin ke'eke'el an'anha ma narehi ma nalewen lolo minim morimori. Ke'eke'el an'anha onne penia namwali Nin molollo man lapa wake'e,

<sup>20</sup> man Ai nodi na'amori Kristus wali'ur nano Nin makmaki, la hi'i naikoro lolo Ai herne malanna lolo a'am raram.

<sup>21</sup> Ende Kristus nodi molollo man kulu narehi ma nodi molollo lolo a'am noro idewe noho wawan na'akeme. Enla Ai Naran lap narehi ri ma nodi molollo na'akeme. Ai nodi molollo onne lelere a'alam ku eniyeni rakan laa ewi-ewi.

<sup>22</sup> Enla Makromod Lalap hi'i Kristus nodi molollo ha wo'ira na'akeme, la kikan Ai namwali uluwakun kerei raramne,

<sup>23</sup> la kerei raramne namwali Ai kemen. Ainin morimori, Nin woroin, noro Nin molollo na'akeme howok lolo maika ma namwali Ai kemen eni, la Ai nodi molollo ha wo'ira na'akeme haenhi.

## 2

*Lere ik koro Kristus kad-inu'ul kakinaliyedi, Makromod Lalap nala morimori worworu maika*

<sup>1</sup> Nonolu, lere mi akim ka naili'il Kristus makun, mi maise ri man makiyedi me'e, ono kam derne makani Makromod Lalap la hi'i dohohala mamani.

<sup>2</sup> Lere onne minim morimori lernohi ri man ailanna lolo noho wawan mamani, la mim lernohi Hayakyak Makromon nin honorok aki haenhi. Hayakyak Makromon onne peni namwali uluwakun ma nodi molollo hayakyak na'akeme ma aile a'am leherne. Nano nonolu rakan lere eniyeni an howok lolo ri ma namhene derne nakani Makromod Lalap raramne.

<sup>3</sup> Nonolu, namlolo kokkoo iknik morimori namnenehe noro hirira ono ik lernohi in-hawa ik raram nodi hi'ie, la ik hi'i wewhe lernohi mon-mono kamanna man ailanna ma aile ik irhun raramne. Lere onne ik koro ri name-hin lernala Makromod Lalap Nin ahan, de ik lernala Nin hunukum makmaki.

<sup>4</sup> Enimaa Ai naramyaka ika rehi, la kukul Nin aki man wa'an wake'e maika.

<sup>5</sup> Kade ik kaise ri man maki ono iknik morimori ailanna la kak derne kakani Makromod Lalap, maa Ai nala morimori worworu maika leke koro Kristus mori wewerre. Ende ik kauroin mouropo nahenia Makromod Lalap Nin rere'e haharu mehe huri we'eredi ika nano dohohala nin molollo.

<sup>6</sup> Enla Makromod Lalap na'amori ika wali'ur naise Ai na'amori Jesus wali'ur, de koro Ai kamwali mahaku, la Makromod Lalap nala kaderre kukulu ma aile a'am raram maika leke koro Kristus kaikoro wewerre.

<sup>7</sup> Makromod Lalap hi'i heheni leke nano lere eniyeni rakan laa ewi-ewi An kukul Nin rere'e haharu

ma narehi ma nalewen laa ri mormori na'akeme. Ik kauroin Nin rere'e haharu man lapa narehi onne, ono Ai naramyak ika rehi, de du'ul kalyiedi ik koro Yesus Kristus me'e.

<sup>8</sup> Lolo Nin rere'e haharu mehe, Makromod Lalap huri we'eredi ika nano iknik dohohala nin hunukum makmaki ono ik akin naili'il Yesus. Ai kan huri ika nano hunukum makmaki ono ik hi'i ha man wa'an mamani, maa nano Nin rere'e haharu man Ai nala maika mehe.

<sup>9</sup> Ende ri mahaku ka nodi molollo na'aheni, "Makromod Lalap huriyedi ya'u nano ainu'u hunukum makmaki ono ya'u hi'i ha man wa'an mamani." Onne namwali poho mehe, ono iknik hini'i wenewhe kan huri we'er ika nano hunukum makmaki onne.

<sup>10</sup> Kan wa'an ri na'aheni onne ono Makromod Lalap mehen du'ul kalyiedi ika koro Yesus Kristus me'e, de nala morimori worworu maika, leke ik hi'i ha man wa'an man Ai na'akenedi maika nano nonolu eni.

### *Kamwali mahaku lolo Kristus*

<sup>11</sup> I wal'uhe, yon hamlinu nonolu mi mamwali 'manin paharne' ono lere mori mi ka mamwali ri Yahudi. Ri Yahudi wekel mi 'ri ma kan sunat', la Yahudi onnenihe holi kukulu lalap ra'aheni hi mehe ramwali Makromod Lalap Nin ri, ono hir sunatedi lernohi rir agame nin holoor halauk enihe. Enimaa sunat onne kan herre hi akinhe, maa herre hi kemen mehe.

<sup>12</sup> Lere onne mim ko'u nano Kristus makun, la mi maise do'on awan, ono ka mamwali ri Israel man Makromod Lalap niliyedi namwali Nin ri. Mi kam lernala hana'ar ida nano Makromod Lalap Nin nou Ai nanala ri Israel enihe. Lere onne mim holi lolo noho wawan eni, maa mi ka mauroin Makromod Lalap, la kam pu'ik heli Nin rere'e haharu ida.

<sup>13</sup> Enimaa lere eni du'ul kaliyedi mi moro Yesus Kristus me'e, de minim morimori ka naise nonolu me'e. Mi ma nako'u Makromod Lalap nonolu enihe, mai ma'uraniyedi me'e ono Kristus rarna dupuwedi lolo au kekiyowok eni.

<sup>14-15</sup> Kristus onne penia man hi'i ik ida man holi moiliwi mahuwele noro ida, la hi'i ik kahuwa'an wali'ur koro Makromod Lalap haenhi. Yesus naledi kemen ri nesne leke yon ik lernala hunukum makmaki, la nano Nin makmaki eni An huriyedi ika nano Yahudi rir keneri hono'ok noro rir holoor halauk rahu enihe. An hi'i onne leke naiye'eredi roko kukulu takin ma'a'awal ma naulinu nauwali panaeku na'akeme man ha'ar ri Yahudi enihe nano ri ma ka namwali Yahudi enihe. Ende ma'ika, ri Yahudi koro ri ma ka namwali Yahudi enihe, An hi'i kamwali mahaku leke kamwali ri mormori worworu man du'ul kaliyedi noro Ai me'e. Lolo kalla eni, Kristus hi'i ik ida man holi moiliwi mahuwele noro ida.

<sup>16</sup> Kade iknik muku woro'o

enihe ramwali arwali nonolu eni, maa Kristus hi'i ik kamwali mahaku, la An hi'i maika na'akeme koro Makromod Lalap kahuwa'an wali'ur haenhi, ono An maki lolo au kekiyowok eni. Lolo Nin makmaki onne penia Ai na'amoluloinedi iknik oi mahu raram ha'a me'e, de ik ida ma ka na'ahan ida me'e.

<sup>17</sup> Onne penia Kristus mai loikaru Lirna Wawa'an man wakuku ika leke ida man holi moiliwi mahuwele noro ida eni. An loikaru Lirna onne ki mi ri ma ka namwali Yahudi man nonolu rako'uwedi Makromod Lalap roro idewe maika ri Yahudi ma ka nako'u Ai enihe.

<sup>18</sup> Ende Kristus Nin hini'i eni penia hurinohi maika na'akeme mai ka'urani ik Amad lolo Roh Kudus Nin molollo man ik kokaledi me'eni.

<sup>19</sup> Onne penia i wal'u ma ka namwali Yahudi enihe, mi ka mamwali do'on awan me'e, maa mamwaliyedi Makromod Lalap Nin ri mememen lolo Nin nakar raram me'e, naise mayai haenhi.

<sup>20-21</sup> Ika ma akin naili'il Yesus naho'ok naise Romleu man Makromod Lalap mehe nayapi. Yesus Kristus mehe namwali Romleu nina kunuku polle, la Nin hophopon ma nodi Lirna Wawa'an roro nabi enihe ramwali Romleu onne nin lauriri. Ri ma akin naili'il Yesus namehin enihe ramwali Romleu horn arne. Ik na'akeme kahinuhu kawinawar noro Kristus leke kamwali Romleu man moumou dewdewe man wa'an de Makromod minle.

<sup>22</sup> Enla i wal'uhe moro Kris-

tus mamwaliyedi mahaku me'e, de Ai mahan hi'i mi moro ri Kristen namehin enihe mamwali Makromod Lalap noro Nin Roh Rira miminlole.

### 3

*Lere eni Makromod Lalap nalhari Nin panaeku man nonolu ri ka nauroin makun*

<sup>1</sup> Enpenia ya'u, Paulus, minle bui raram ono yo odi Yesus Kristus Lirna Wawa'an eni loikaru mi ri ma ka namwali Yahudi enihe.

<sup>2</sup> Lo'o mim dernedi Makromod Lalap namre'e namharu ya'u me'e, de hopon yo odi Lira Wawa'an man konohi Nin raramyaka mi ri ma ka namwali Yahudi enihe.

<sup>3-4</sup> Lere eni Makromod Lalap nalhariyedi Nin panaeku man ri ka nau-roiroin makun maya'u. Ai namre'e namharu ya'u, de nala woroin maya'u leke ya'u konohi mi panaeku onne. Idedi eni ya'u konohiyedi mi panaeku eni me'e, de lo'o mim lesala horok eni, mi mauroin panaeku ma nasinuwar onne.

<sup>5-6</sup> Nin panaeku onne na'heni ri Yahudi roro ri ma ka namwali Yahudi enihe lernala Makromod Lalap Nin rere'e haharu wewerre, la ramwali mahaku haenhi. Enla hi akin naili'il Lira Wawa'an eni, de hir kokala inhawa man Makromod Lalap nouwedi lolo Kristus me'e. Nonolu, Makromod Lalap kan loikaru Nin panaeku onne ri mormori makun, maa lere eniyeni, Roh Kudus nalhariyedi Nin

panaeku onne leke Nin hophopon ma nodi Lirna Wawa'an roro Nin nabi mememen enihe rauroin mouropo.

<sup>7</sup> Makromod Lalap naramyak ya'u, de nala leken paharin yo odi Lira Wawa'an eni laa loikaru ri, la Nin molollo ma aile ya'u raramne paku ya'u hi'i honowok eniyeni.

<sup>8</sup> Kade ya'u man lolo yawa wake'e Nin ri na'akeme, maa Makromod Lalap namre'e namharu ya'u, de kikan ya amwali hophopon ma nodi Lira Wawa'an eni loikaru ri ma ka namwali Yahudi enihe, leke hi rauroin Kristus Nin wawa'an rara'e man ma'aruru man ri mahaku ka nauroin ho'oknala.

<sup>9</sup> Ai naledi honowok ya'u leke ya'u konohi mouropo ri na'akeme Makromod Lalap Nin panaeku hi'i ri Yahudi roro ri ma ka namwali Yahudi enihe ramwali mahaku lolo Yesus. Nano nonolu rakan lere eniyeni Makromod Lalap man hi'iyedi ha wo'ira na'akeme kan hari Nin panaeku onne makun.

<sup>10</sup> Lere eniyeni Ai nalhari Nin panaeku onne lolo Nin kerei raramne leke ma nodi molollo lolo a'am na'akeme rauroin nahenia Nin woroin man lewlewen eni penia kakar ha wo'ira na'akeme onne.

<sup>11</sup> Makromod Lalap ka nakuku noho ka naleu a'am makun, An hi'i kenekrohu Nin panaeku onne namwali, la lere eni An hi'iyedi Nin panaeku ma namkene laa

ewi-ewi onne namwaliyedi  
lolo ik Makromod Yesus  
Kristus Nin hini'i me'e.

<sup>12</sup> Ik akin naili'iledi Yesus  
Kristus la koro Ai kadinu'u  
kakinaliyedi penia kalla man  
laa Makromod Lalap kalarna  
hariyedi maika me'e, de ik  
ka kamka'uk lalaa mamai Ai  
leken kalarna me'e.

<sup>13</sup> Ende lere mim derne  
ya'u minle bui raram ono  
ya'u loikaru Lira Wawa'an  
eni ki mi, ya apanak yon mi  
akim tana ono ainu'u wew-  
erek pananaka eniyeni nodi  
ha man wa'an ki mi.

*Paulus hi'i lir napanak  
leke ma akin naili'il Yesus  
rauroin Makromod Lalap Nin  
raramyaka*

<sup>14</sup> Lere ya'u loi hon-  
orok Makromod Lalap Nin  
panaeku onne, ya'u kadi  
ye eu korno lolo ik Amad  
Makromod Lalap kalarna hi'i  
lir napanak.

<sup>15</sup> Ik na'akeme kapolu Ai  
iknik Ame, ik man minle  
noho wawan noro idewe  
a'am raram ne'en raram  
na'akeme.

<sup>16</sup> Makromod Lalap nodi  
molollo ma narehi nalewen,  
la Nin wawa'an rara'e  
ma'aruru wake'e, de ya  
apanak Ai nala Nin Roh ki  
mi leke hi'i mi akim eren  
narururi,

<sup>17</sup> lekpananne Kristus  
namkene mi raram ono mi  
akim naili'il Ai. Ya apanak  
mi maramyak Makromod  
Lalap, la mi ida ma naramyak  
ida mamani. Lo'o mim hi'i  
heheni minim morimori  
namkene naisa au'ono man  
a'arn aile elimo'o wi'in de ka  
nawollo.

<sup>18</sup> Ya apanak na'amoli  
Makromod Lalap nala  
molollo mi moro Nin ri  
na'akeme leke mauroin  
hi'ihewi Kristus naramyaka  
ika. Ai naramyak ik rehi,  
la ik kak ke'enala Nin  
raramyaka onne roromne, la  
kak ho'oknala nin paharin,  
narunne, noro kulunne.

<sup>19</sup> Kade ri mahaku ka  
nauroinnala Kristus Nin  
raramyaka hono'okne, maa  
ya apanak Makromod Lalap  
hi'i mi eren mauroin Nin  
raramyak onne, leke ha  
wo'ira na'akeme ma aile  
Makromod Lalap raramne,  
aile mi raramne haenhi.

<sup>20</sup> Makromod Lalap Nin  
molollo aile hi'i ha wo'ira  
narehi nalewen inhawa man  
ik kapanak, ee kahinorok eni,  
la Nin molollo onne aile ik  
raramne mamani.

<sup>21</sup> Ende ka'uli kasa'a Ai  
Naran man kukulu lalap eni  
ono An hi'i ha man ma'aruru  
lolo Nin kerei raramne noro  
idewe lolo Yesus Kristus Nin  
hini'i na'akemeni. Ik ka'uli  
kasa'a Makromod Lalap  
nano lere eniyeni rakan laa  
ewi-ewi. Amin!

## 4

*Nounaku leke ida man  
mori wawa'an noro ida ono ik  
kamwali mahaku lolo Kristus*

<sup>1</sup> Makromod Lalap nal-  
hariyedi Nin panaeku man  
ma'aruru onne maika me'e  
de, ya'u, man minle bui  
raram ono i loikaru Makro-  
mod Lirna Wawa'an eni, ya  
ala nounaku i wal'uhe. Ya'u  
nounaku mi hi'i wewhe ha  
man wa'an naise Makromod  
Lalap ananhe hi'ie, ono Ai

peni napolu mi mamwali  
ananhe.

<sup>2</sup> Lolo minim hini'i we-newhe yon holi kukulu lalap, maa modi lir mamamal mamani. Lere ri namehin hi'i yaksala ki mi yon pelek ma'ahan ai, maa mi ida ma naramyaka ida.

<sup>3</sup> Roh Kudus eni hi'iyedi mi mamwali mahaku me'e, de yon mi ida ma nasesi noro ida, maa ken mi ida man mori moiliwi mahuwеле noro ida, leke mi mamkene mamwali mahaku mamani.

<sup>4</sup> Ik na'akeme ma akin naili'il Yesus Kristus kamwali kemen mahaku, la ik kokala Roh Kudus ida mehe man minle ik na'akeme raramne. Ik na'akeme kamkene lapan ha ida mehe haenhi. Ik lapan kokala rere'e haharu man Makromod Lalap nouwedi nala Nin ri, ono Ai penia napolu ika na'akeme.

<sup>5</sup> Ik Makromod ida mehe, ik akin naili'il wanakuku ida mehe, iknik unulu tanada ida mehe haenhi.

<sup>6</sup> Ik Makromod Lalap man ik kapolu iknik Ame ida mehe, la Ai peni ma nodi molollo ha wo'ira na'akeme. An minle Nin ri na'akeme raramne, la howok lolo Nin ri na'akeme raramne.

<sup>7</sup> Kade iknik ha wo'ira na'akeme onne namnenehe, maa woroin ma na'ono man Kristus nala ika meririi, ka namnehe, ono Kristus nale lernohi Nin honorok aki aimehi leke paku ika hi'i Nin honowok eni.

<sup>8</sup> Onne penia horhorok aile Horok Lap raram ma na'aheni,

"An rehiyedi ara noro Nin ar-wali nanumene,  
ha'a laa wawan laa miminlole man aile onno man kulu eni,  
nakerne Nin arwali man kekele onnenihe ler-nohi lolo kili'ur,  
la ha'aredi Nin woroin ma na'ono laa Nin ri."

<sup>9</sup> Wanakunu lirna, 'An ha'a laa wawan,' napa'ahe hehewi? Lo'o an ha'edi laa onno man kulu me'e, onne nin panaeku an kopuredi mai noho wawan laa onno man lolo yawa wake'e nolu mene ha'a laa wawan.

<sup>10</sup> Kristus man kopuredi onne penia man ha'a laa onno man kulu narehi lolo a'am raram, lekpananne Ai namwali ma nodi molollo ha wo'ira na'akeme.

<sup>11</sup> Ai penia man kikan Nin ri heruwali ramwali hophopon ma nodi Lira Wawa'an eni, heruwali ramwali nabiniabi, heruwali ramwali man wakuku Lira Wawa'an eni laa ri ma kan derne makun, la heruwali ramwali man leluwai makrana roro meser-meser man paku kerei raramne.

<sup>12</sup> Kristus ha'ar Nin woroin ma na'ono onne maika man lernohi Ai leke hi'i ika kamkene ilitolle Nin honowok, la hi'i Nin kerei raramne ma namwali Ai kemen enihe eren narururi.

<sup>13</sup> Enpenia ik na'akeme kamwali mahaku ono ik na'akeme akin naili'il Makromod Lalap Anan wewerre la kauroin Ai namlolo kokkoo. Ende eren nalolo'ol iknik morimori lolo Kristus eren narururi la wawa'an hehen

nanumene iknik morimori  
namlolo naise Ainin mori-  
mori.

<sup>14</sup> Lere iknik morimori  
naise onne, ik ka kaise tatana  
man pelek rin kokwudi, la ka  
kaise au dore ma aile kahi  
raram de hari huri laa ki  
laa mai me'e. Ende ik kak  
pelek lernohi wanakuku ma  
ka namlolo man kokwudi ri  
laa yakanne me'e.

<sup>15</sup> Enimaa ik kamkene  
wakunu panaeku ma nam-  
lolo kodi aki ma naramyak  
ri mamani, leke ik akin eren  
naruri nailili'il Makromod,  
la iknik morimori eren  
namlololo naisa Kristus ma  
namwali iknik uluwakun,

<sup>16</sup> la ik na'akeme kamwali  
Kristus kemen. Ik po'on ri  
mormori kemen hana'arne,  
ida ma nahinuhu wawa'an  
noro ida, de namwali ke-  
men mahaku ma naruri.  
Namnenehe ika ma akin  
naili'il Kristus. An hi'i ika,  
ida ma nahinuhu wawa'an  
noro ida, ono koro Ai kad-  
inu'ul kakinaliyedi me'e.  
Lo'o ik howok honowok  
man ik Makromod haha'ar  
nala maika dohodoho, ik  
na'akeme eren karururi  
lernohi Ai, la ik ida man holi  
eren wawa'an noro ida, ono  
ik ida ma naramyak ida.

### *Morimori worworu lolo Kristus*

<sup>17</sup> Onne penia, yo odi  
molollo man Makromod  
nala maya'u nounaku mi  
mouropo. Yon mori naisa ri  
ma ka nauroin Makromod  
Lalap, ono hi rodi honorok  
panaeku ma kan min haida.

<sup>18</sup> Hirira honorok aki peni  
ailanna mamani de ka rau-  
roin panaeku ma namlolo  
me'e. Hi ra'alehe morimori  
worworu man Makromod  
Lalap nala ri ono hi akin  
kerhe de ka rauroin lolo kalla  
ewi leke rauroin Ai.

<sup>19</sup> Hi ka rawawa me'e,  
de hir hi'i lernohi irhun  
raramne rir monmono ka-  
manna man ailanna mamani  
la hir holi diwar dawar  
mamani.

<sup>20</sup> Enimaa, i wal'u mie, lere  
rin wakuku mi Kristus Nin  
kalla, kar wakuku mi lernohi  
morimori man ailanna naise  
onneni.

<sup>21</sup> Ya auroin rin wakukuwedidi  
mi Kristus Lirna me'e, la lere  
mi akim naili'iledi Ai, hir  
wakuku mi wanakuku ma  
na'ono Yesus ono mi moro Ai  
mamwali mahaku me'e.

<sup>22</sup> Hir hopon mi sopoledi  
minim morimori lo'olo'ol ma  
nodi mi laa makmaki nine.  
Minim monmono kamanna  
man ailanna onne penia  
hi'i mi madiyaur dohohala  
ma nano'onyaka minim  
morimori.

<sup>23</sup> Hir wakuku mi hurinohi  
Makromod Lalap herre mi  
honorok akin lo'olo'ol onne,  
leke mim lernala honorok aki  
worworu,

<sup>24</sup> la hi'i hini'i wenewhe  
man lernohi honorok aki  
worworu onne, ono Makromo-  
d Lalap hi'iyedi mi  
mamwali ri ma akin namlolo  
la moumou kokkoo lernohi  
Nin morimori ma namloleni.

<sup>25</sup> Ende, i wal'u na'ahoruwedidi,  
yon mapoho me'e, maa  
wakunu panaeku ma nam-  
lolo laa minim ri heri ri wali  
mamani ono ik na'akeme\*  
kamwali Kristus kemen.

<sup>26</sup> Lo'o mi ma'ahan, yon hurinohi ahan onne nodi mi hi'i dohohala. Yon ma'ahan hehen nanumene lere helem,  
\*

<sup>27</sup> leke yon mala leken parharin Hayakyak Makromon ken patal mi de nodi mi hi'i dohohala.

<sup>28</sup> Ri ma nadedem namna'a, yon mamma'a me'e, maa modi minim ruri pe'el howok leke lernala banana'an man noknokor, la malala heruwali ri namehin manin banana'an kan nokor.

<sup>29</sup> Yon ik wakunu wanakunu man morse, maa wakunu wanakunu man wa'an man paku na'alap ri namehin akin lolo rira morimori akilere. Wanakunu man wa'an naise onne nodi wawa'an rara'a ri man derneni.

<sup>30</sup> Yom hi'i Roh Kudus de akin woir. Ai onne penia Makromod Lalap nala maika leke namwali tanada lolo ik akin ma na'ono nawinauwedi Nin nou maika nahenia An minle ik raramne rakan lere Makromod Lalap huri we'er mouwedi ika nano noho wawan man ailanna eni.

<sup>31</sup> Ende, sopoledi hini'i wenewhe ma naisa aki apinha, nawuhwuhur, na'a'ahan, sesi na'esne, wakunu nano'onyaka ri, honorok aki ma kan suk ri, noro honorok panaeku man ailanna namehin.

<sup>32</sup> Yon hi'i ha man ailanna onne, maa mi ida man mori wawa'an noro ida, ida ma naramyak ida, la ida ma nala ampun ida naise Makromod

Lalap naledi ampun maika lolo Kristus me'e.

## 5

*Mai, ik mori lolo ropropo raram*

<sup>1</sup> I wal'u na'ahoru, Makromod Lalap hi'iyedi ik kamwali anan man Ai naramyaka enihe me'e, de po'onala la teunohi Nin morimori.

<sup>2</sup> Lolo iknik morimori akilere, karamyaka ri namehin mamani, naisa Kristus naramyak ika de hurinohi ri nesne Ai leke nahala ika nano dohohala nin hunukum. Nin hini'i onne namwali honoi kanani man wola'ula'u ma nahuwa'anedi Makromod Lalap akin.

<sup>3</sup> Ik kamwali Nin ri, de kako'uwedi ik kemen nano hini'i wenewhe ma kan wa'an Makromod Lalap Nin ri mememen hi'ie, naisa: lerpi'u lerwa'u, hi'i diniwar danawar man morso, la rakmanna ri namehin nin hahaq mamani. Yon hi'i de ri namehin nala lir na'aheni dohohala naisa onne namwalile maika.

<sup>4</sup> Kan wa'an ika wakunu wanakunu man hi'i rin derne nawawa, wanakunu ma kan min haida, noro soksok man morso. Yon ik wakunu naisa onne, maa kodi ik nuran ka'uli kasa'a Makromod Lalap la kapanak trimkasi.

<sup>5</sup> I wal'u na'ahoruwedi, loi honorok wawa'an! Kristus noro Makromod Lalap ka rodi molollo ri na'akeme man holi yaka leke yaka, man hi'i diniwar danawar man morso, noro ma nakmanna ri namehin nin hahaq, de hi

ka ramwali Makromod Lalap Nin ri, la kar kokala rere'e haharu Makromod Lalap nouwedi nala hi. (Ri ma nakmanna ri namehin nin hahaa onne penia horhawa nin hahaa narehi horhawa Makromod Lalap de ai naisa ri man hoikani lernulu aukerhe.)

<sup>6</sup> Yon derne ri man wukupoho na'heni hini'i onneni ka namwali dohohala kkokoo. Rir wanakunu onne kan min haida. Hini'i onneni penia nakoko ri ma kan derne nakani Makromod Lalap lernala Nin hunukum man werek.

<sup>7</sup> Ende yon ik lernohi hirira hini'i wenewhe man yakeni.

<sup>8</sup> Nonolu mi honorok akin aile metmetek kalkale raram, maa lere eni mi aiyedile ropropo raram me'e ono moro Makromod madinu'ul makinaliyedi me'e. Ende hi'i we-whe naisa ri ma aiyedile ropropo raram me'e,

<sup>9</sup> ono ropropo eni peni nakoko mim hi'i ha man wa'an, ma namdudu, la ma namlolo mamani.

<sup>10</sup> Mahehe mauroin la hi'i lernohi inhawa ma nahuwa'an Makromod akin.

<sup>11</sup> Yon lernohi ri man mori lolo metmetek kalkala de hi'i ha ma kan min haida, maa wa'an rehi malhariyedi hirira hini'i man yak man sala onne.

<sup>12</sup> Hirira hini'i man hir hi'i lolo kalla suwsuwar onne namehiyala wake'e de lo'o ik wekel mehe, kawawedi me'e.

<sup>13-14</sup> Nadedem rin do'on mouropo ha man minle ropropo raram, de lere ri man ailanna po'on minim

hini'i man ropropo onne, hi rauroin mouropo rir hini'i ramwali ha man ailanna, penia hir lernala leken huri we'eredi rir hini'i man ailanna onne, la minle ropropo raram haenhi. Enpenia wanakunu ida aile ma na'heni,

"Mi ma namkukuru, ma-makedi here!  
Mori wali'ur nano minim makmakie,  
na'amoli Kristus hi'i mi mori lolo ropropo."

<sup>15</sup> Ende ka'inau iknik morimori wawa'an. Yon mori naisa ri ma naploo, maa mori naisa ri ma honorok akin mou.

<sup>16</sup> Ku eniyeni ri nin morimori ailanna wake'e, de yon sopol leken paharin hi'i ha man wa'an.

<sup>17</sup> Yon mori naise ri ma naploo, maa kahehe kauroin Makromod Lalap honorok akin.

<sup>18</sup> Yono komun arak manha, ono arak onne nano'onyaka iknik morimori, maa hurinohi Roh Kudus nodi molollo maika mamani.

<sup>19</sup> Kahinara hanara u'uli sasa'a warna-warna laa Makromod Lalap leke ida ma na'alapedi ida akin, la ka'uli kasa'a Makromod kodi honorok aki man mou.

<sup>20</sup> Ik koro Makromod Yesus Kristus kamwali mahaku me'e, de lolo iknik panaeku na'akeme, kapanak trimkasi ik Amad Makromod Lalap mamani,

<sup>21</sup> la ik ida man derne nakani ida wawa'anedi ono ik horhawa Kristus.

*Nounaku ri man ho*

<sup>22</sup> Maekleher mie, derne makani minim mo'onleher naise mim derne makani Makromod,

<sup>23</sup> ono mo'onleher namwali maekleher nin uluwakun naise Kristus namwali kerei raramne rira uluwakun. Ai peni namwali Rai man huri we'eredi ika nano dohohala nin molollo eni.

<sup>24</sup> Ende mi maekleher enihe derne makani minim mo'onleher lolo inhawa memehe, naise kerei raramne derne rakani Kris-tus.

<sup>25</sup> Mo'onleher mie, maramyaka minim maekleher kokkoo naisa Kris-tus naramyaka Nin ri ma namwali Nin kerei raramne, de nala kemen maki leke huri we'eredi hi nano dohohala nin hunukum.

<sup>26</sup> An hi'i onne leke na'ono ika kamwali Nin ri aimehi, la Ai nodi oir unulu tanade noro Lirna Wawan na'amou na'adewe iknik morimori nano dohohala.

<sup>27</sup> An hi'i heheni leke maika, Nin kerei raramne, kamwali Ai hono man An po'on ma'aruru la moumou dewdewe ma na'alehe yakyak salsalida.

<sup>28</sup> Ende mo'onleher mie, maramyaka minim maekleher naisa mi maramyaka mi ihin kemen mememen. Mo'oni ma naramyaka nin maekleher penia naramyak ai ihin kemen haenhi.

<sup>29</sup> Ri kaale ma ka naramyaka ihin kemen, maa rin leluwai makrana ihin kemen mamani, naise Kristus leluwai makrana

maika ma namwali Nin kerei raramne,

<sup>30</sup> ono ik kamwaliyedi Ai kemen hana'arne.

<sup>31</sup> Lolo Horok Lapeni horhorok aile ma na'aheni, "Onne penia mo'oni hoikaruwedti inna aman, la noro hono moriwuku lekpananne woro'ohe ramwali mahaku." \*

<sup>32</sup> Panaeku idedi eni man rorom wake'e, de ri ka nauroin nin panaeku na'akeme, maa panaeku ida nano idedi eni kukunohi mi hi'ihewi Kristus noro Nin kerei raramne ramwali mahaku.

<sup>33</sup> Ende ya'u nounaku mi wali'ur, mo'oni maramyaka minim maekleher naise mi maramyak mi kemen, la maeke horhawa minim mo'onleher.

## 6

### *Nounaku tatan'ukun roro ri leleher*

<sup>1</sup> Tatan'ukun mie, derne makani minim ri leleher naisa mim derne makani Makromod, ono lolo Makromod Lalap kalar-na hini'i onne peni ma namlolo mim hi'ie.

<sup>2</sup> Keneri hono'ok aile man hopon na'ahenia, "Horhawe minim mama noro papa." Nano Makromod Lalap Nin keneri hono'ok idaweli ma aile Horok Lapeni, keneri hono'ok eni namwali dedesne nine nornoro nin noue.

<sup>3</sup> Nin nou onne na'aheni, "Lo'o ik horhawe iknik mama noro papa, ik mori wawa'an

la nalo'ol lolo noho wawan eni."\*

<sup>4</sup> I walin ma namwaliyedi papa me'e! Yom hi'i mi anumhe akin apinha, maa makrana la wakuku wayo'o hi modi nounaku man mim lernaledi nano Makromod Yesus.

*Rala nounaku hophopon wahwahan noro makromonhe*

<sup>5</sup> I wal'uhe ma namwali hophopon wahwahan! Modi akim man mou horhawe la derne makani mi makromon ma aile noho wawan eni mamani. Derne makani hi namnenehe mim derne makani Kristus mememen.

<sup>6</sup> Yon lapan makromon mai mene howok namlolo. Yon howok leke lernala nin ul'uli sasa'a, maa modi aki man mou howok naise Kristus Nin hophopon wahwahan man lernohi Makromod Lalap Nin honorok aki.

<sup>7</sup> Modi aki man mou hi'i minim honowok na'akeme, la howok naisa mim howok Makromod Nin honowok mememen, ri mormori nine, ka.

<sup>8</sup> Mahinorok eni wawa'an! Lo'o mi mamwali hophopon wahwahan me makromon, na'amoli Makromod walha minim hini'i man wa'an na'akeme onne. Lo'o mim hi'i ha man wa'an, Ai nala ha man wa'an wali'ur ki mi.

<sup>9</sup> I wal'uhe ma namwali makromon! Modi wawa'an ilitolle minim hophopon wahwahan, la yom kasu hi me'e. Horhorok! Mi moro minim hophopon wahhan enihe, mi Makrommu mahaku mehe. Ai penia

Makromod man aile a'am raram, la ka na'ilili naloho ri.

*Makromod Lalap Nin honowok are noro nainair rodi ra'a'ara noro Hayakyak Makromon*

<sup>10</sup> I wal'u na'ahoru, dernala ainu'u wanakunu man horu eni. Mamkene moro Makromod mamwali mahaku leke Nin molollo man lap wake'eni na'aruri mi akim.

<sup>11</sup> Masala ilak rae noro nainair rodi ra'a'ara na'akeme man Makromod Lalap na'akenedi ik nair. Ai nala ilak raa enihe maika leke kamriri karuri kakpali Hayakyak Makromon, de ka'okuledi nin konoko wunudi na'akemeni. <sup>12</sup> Lolo iknik ara eni ik ka kakpali ri mormori, maa ik kakpali Hayakyak Makromon noro nin man lernohi enihe. Hi onne rodi molollo lolo metmetek kalkala ma aile a'am lehern na'akeme.

<sup>13</sup> Ende kamkene nair Makromod Lalap Nin ilak rae noro nainair rodi ra'a'ara na'akeme eni, leke rakan lere ik lernala wewerek pananaka wo'ira, ik kamkene kamriri karuri hehen nanumene wewerek pananaka onne horu.

<sup>14</sup> Ende ik kamkene nair Makromod Lalap Nin ilak raeni la kamkene lernohi wanakuku ma namlolo. Panaeku onne naho'ok naisa kali ehe ma na'akerhe nainair leke ri namkene howok. Enla kodi honorok aki man mou hi'i hini'i wenewhe ma namlolo. Panaeku onne naho'ok naisa rain wonokon rodi kawala arwali nin konoko wunudi na'akeme.

<sup>15</sup> Kamkene loikaru Lira Wawa'an man du'ul kali ri noro Makromod Lalap leke Ai nala aki ma namrina namkai ma'ika. Panaeku onne namwali pakpak ei man hi'i ik kamriri kamkene.

<sup>16</sup> Enla kamkene ik akin naili'il Makromod Lalap mamani lolo panaeku wo'ira na'akeme. Ik akin ma namkene naili'il Makromod onne naho'ok naisa dawoi man ik kodi lalaa mamai leke ewekala kawala ha wo'ira na'akeme man Hayakyak Makromon ilakedi maika me'e.

<sup>17</sup> Mauroin kokkoo Makromod Lalap huri we'eredi mi nano dohohala nin molollo me'e. Woroin onne nadiyaka mi naisa karpusa man ke'urauk nair lolo ara rodi kowosala uluwakun. Masala Makromod Lalap Lirna Wawan man Roh Kudus naledi mi. Lirna Wawan onne naho'ok naisa raa man mi masasala.

<sup>18</sup> Enla lere mi ma'ara mak-pali Hayakyak Makromon onne, mamkene hi'i lir napanak Makromod Lalap mamani. Lolo panaeku wo'ira na'akeme hi'i lir napanak lernohi Roh Kudus Nin honorok aki. Madiyaka mamani la yom maprehen hi'i lir napanak Makromod Lalap leke paku mi wallum na'akeme ma akin naili'il Makromod Yesus.

<sup>19</sup> Ya apanak mim hi'i lir napanak maya'u haenhi. Mapanak Makromod Lalap nala wanakunu lirna man wa'an maya'u, leke yon ya amka'uk loikaru Lira Wawa'an man nonolu ri ka nauroin makun.

<sup>20</sup> Makromod Yesus

niliyedi ya amwali Nin hophopon ma nodi Lirna Wawa'an eni. Onne penia ya'u minle bui raram. Ende hi'i lir napanak maya'u leke ka amka'uk loikaru Lira Wawa'an eni ono Ai nala honowok eni maya'u.

### *Wanakunu man horu*

<sup>21</sup> I wal'u na'ahoru, na'amoli ya'u hopon ik walin Tikhikus ki konohi mi ha wo'ira na'akeme ma namwaliyedi mai eni me'e, leke mi mauroin ainu'u morimori noro ainu'u honowok nala'a hehewi. Tikhikus eni ik mo'oniwalin ma akin naili'il Jesus man ik karamyaka la ai namkene ilitolle Makromod Nin honowok.

<sup>22</sup> Onne penia ya'u hopon an ki konohi ainima morimori ki mi leke na'alapala mi akim.

<sup>23</sup> Na'amolia ik Amad-Makromod Lalap, noro Makromod Yesus Kristus rala Rir wawa'an rara'e i wal'uhe ma akin naili'il Ai. Na'amolia Hir hi'i mi ida ma naramyak ida, la hi'i mi akim namkene naili'il Kristus.

<sup>24</sup> Na'amolia Makromod Lalap nala Nin rere'e harharu ri na'akeme ma nodi honorok aki man mou raramyaka ik Makromod Yesus Kristus mamani.

Ainu'u tape masi,  
*Paulus*

# Pilipi

## *Horok Lirna La'an*

Kota Pilipi namwali kotida ma naran pe'eredi lolo propinsi Makedonia. Paulus rakanedi Makedonia, ai nodi Lira Wawa'an laa kota Pilipi. Kade ri nammori ra'okuledi ai, maa manin Pilipi heruwali akin naili'il Makromod Yesus (HN. 16). Paulus namharedi Pilipi, manin Pilipi enihe aku kupan raram rewro'o laa ai leke paku lolo nin honowok.

Nakawedi anna idaweli ne, kele Paulus rodi laa kota Roma rale laa bui raram. Manin Pilipi dernessi Paulus aile bui raram ne, hiraku kupan wali'ur leke paku ai. Hi rala kupan onne manin Pilipi ida ma naran Epaproditus leke nodi laa Paulus. Rakanedi Roma, ai nala kupan onne Paulus, la min lolo Roma wolwo'iraha raramne paku Paulus mene Paulus hopon an wali wali'ur laa Pilipi leke nodi horok eni laa manin lolo onne.

Paulus hi'i horok eniyeni leke nounaku manin Pilipi, ida man mori wawa'an noro ida, la yon ida man hi'i yaksala ida. Ainin panaeku ri ma akin naili'il Yesus Lirna Wawa'an eni eren nammomori (1:27-2:18; 4:2-3). An konohi hi an minle bui raram ono naderre nadauledi Lira Wawa'an eni. Kade an minle bui raram, maa ri man derne rakani Lira Wawa'an eni eren nammomori (1:12-26).

An konohi hi hi'ihepe an hopon Epaproditus wali laa Pilipi wali'ur, la an konohi nin panaeku hopon Timotius laa Pilipi haenhi (2:19-30). An nounaku hi radiyaka ri ma nodi wanakuku ma ka namlolo noro man hi'i hini'i man ailanna (3:1-2, 17-19). Ai napanak trimkasi manin Pilipi ono hir hopon Epaproditus nodi kupan laa paku ai (4:10-18). Lolo horok eni panaeku ma na'ono ida woro'o aile: 1) Paulus hopon manin Pilipi rahuwa'an hi akin mamani. 2) Lolo 2:1-11 Paulus nounaku hi teunohi Yesus de holi helkaki ramdaru. 3) Lolo 3:8 Paulus na'aheni ha ma na'ono wake'e, ik kauroin mehe Makromod Yesus Kristus, la ai na'aheni panaeku namehin na'akeme naisa munuk dewe.

## *Horok Ihin*

1. Paulus nala wanakunu man hari horok eni (1:1-2).
2. Paulus napanak trimkasi Makromod Lalap ono manin Pilipi enihe pakuwedi ai me'e (1:3-11).
3. Kade an minle bui raram, maa ri man derne rakani Lira Wawa'an eni eren nammomori (1:12-26).
4. An nounaku hi ida man mori wawa'an noro ida, leke ri man derne nakani Lira Wawa'an eni eren nammomori (1:27-2:18).
5. Ai na'uli Timotius noro Epaproditus ono hir howok Makromod Nin honowok wawa'an (2:19-3:1a).

6. An nounaku hi, radiyaka ri man wakuku wanakuku ma ka nam-lolo (3:1b-4:1).
7. An nounaku hi ida man mori wawa'an noro ida, la ida ma na'alap ida akin leke ramkene ler-nohi Makromod (4:2-9).
8. An konohi hi an kokaledi kupan hir akuwedi me'eni, la napanak trimkasi (4:10-20).
9. Ai nala tape masi man horu (4:21-23).

*Paulus nala hiyene arore manin Pilipi*

<sup>1</sup> I wal'uhe manin Pilipi na'ahoruwed! Mi penia mamwali Makromod Lalap Nin ri mememen man du'l kaliyedi noro Yesus Kristus me'!

Maya'u, Paulus, yo oro Timotius ai mamwali Yesus Nin hophopon wahawan, la airo aku horok eni ki mi, noro minim man leluwai makrana noro man paku lolo minim kerei raramne.

<sup>2</sup> Ai mapanak na'amoli iknik Ame--Makromod Lalap noro Makromod Yesus Kristus rala rere'e haharu noro wawa'an rara'e ki mi.

*Paulus hi'i lir napanak*

<sup>3</sup> Lere ya'u horokala mi ya apanak trimkasi ik Makromod Lalap,

<sup>4</sup> la aki lere ya'u hi'i lir napanak onne, yo odi aki ma nahuwa'an mamani.

<sup>5</sup> Ya apanak trimkasi ono nano nonolu rakan lere eniyeni, mi na'ahoru pakuwedi ya'u loikaru Yesus Lirna Wawa'an eni.

<sup>6</sup> Nano lere dedesne mi akim naili'il, Makromod Lalap mehen howok hi'i ha man wa'an lolo mi raram, la ya auroin kokkoo nahenia An howok lolo mi raram mamani hehen nanumene Yesus Kristus mai wali'ur.

<sup>7</sup> I wal'uhe, lere ya'u horokala mi ya akin nahuwa'anedi me'e. Eni wa'an ono ya akin nala mi wake'e. Mi penia mamwali ainu'u man howok wali lolo honowok man ma'aruru man Makromod Lalap naledi ya'u eni. Mim paku ya'u mamani lere ya'u minle mai bui raram eni noro lere ya'u walha ri man kuku sala Yesus Lirna Wawa'an eni, noro idewe lere yo odiyala Lirna Wawa'an onne haenhi.

<sup>8</sup> Makromod Lalap nau-roiroin nahenia ya'u raram nodi wake'e oro mi minwuku wali'ur, ono ya aramyaka mi naise Yesus Kristus mehe naramyaka mi.

<sup>9</sup> Ya'u hi'i lir napanak nahenia mi maramyaka Makromod Lalap noro minim ri heri ri wali eren wawa'an, la na'amoli Makromod Lalap eren na'uwawali woroin ma namlolo leke mi mauroin panaeku ewi ma namlolo, la ewi man sala.

<sup>10</sup> Ya apanak onne leke mi mauroin hi'i wewhe ha man wa'an, la minim morimori moumou la ma'alehe yak-salida lere Kristus wali mai wali'ur.

<sup>11</sup> Enla ya apanak Yesus Kristus howok lolo mi raramne leke mamkene hi'i ha man wa'an mamani naisa au'ono man woin wa'an, leke ri man po'on minim

hini'i man wa'an onne, ra'uli rasa'a la ra'akulu ra'alapa Makromod Lalap.

*Kade Paulus minle bui raram, maa ri ma akin naili'il Kristus eren nammomori*

<sup>12</sup> I wal'u na'ahoru, ya'u raram nodi mi mauroin nahenia kade ya'u min mai bui raram, maa ya akin nahuwa'an mamani ono ainu'u apinpinha eniyeni nakoko ri eren nammomori derne Lir Wawa'an eni.

<sup>13</sup> Keura'uk ma nadiyaka Kaisar nin nakar roro ri namehin lolo eni na'akeme rauroin ya'u minle bui raram ono ya'u ilitolle Kristus Nin honowok eni.

<sup>14</sup> Enla ik walin nammori ma aile mai eni eren ramkene akin naili'il Ai, la ka ramka'uk wakunu Ai Lirna Wawan eni, ono hir po'onedi hi'ihehewi Makromod paku ya'u lolo bui raram.

<sup>15</sup> Memen ri heruwali rodi Kristus Lirna Wawa'an loikaru ri ono hi akin apinhan ya'u, la hi raram nodi ra'okul ya'u, maa ri aile haehni man loikaru Kristus Lirna Wawa'an eni rodi honorok aki man mou.

<sup>16</sup> Hir loikaru Lirna Wawa'an eni ono raramyaka ya'u la rauroin Makromod Lalap hurinohi rin kele ya'u rala laa bui raram leke namwali leken paharin maya'u kukul ri nahenia Lirna Wawa'an eni namlolo kokkoo.

<sup>17</sup> Enimaa ri ma akin apinhan idedi enihe rodi honorok aki ma kan mou wakunu wanakunu ma na'ono Kristus. Hi raram nodi rin derne rakani hi

mehe, la hi rahinorok hi'i ya akin eren apinhan mai bui raram,

<sup>18</sup> maa rir panaeku onne ka namwali ha ma na'ono maya'u! Hi akin mou, ee kan mou, kan hi'i haida! Ha ma na'ono, Kristus Lirna Wawa'an eni raderre radaul mamani, la onne penia ma nahuwa'an ya akin.

Enla ya akin lo'o nahuwa'an mamani

<sup>19</sup> ono ya auroin nahenia, kade wewerek pananaka wo'ira kerne dalha ya'u, maa minim lir napanak noro Yesus Kristus Nin Roh ka nalo'ol huri ya'u nano noho wawan nin man ailanna eni.

<sup>20</sup> Ya'u raram nodi rehi yon ya'u lari nano ainu'u honowok eni de hi'i wawwawa ya'u, maa ya'u auroin nahenia nano lere eni rakan ainu'u lere horu, Makromod Lalap na'alapa ya akin leke yon ya amka'uk loikaru Lira Wawa'an eni. Ende ya'u mori me ya'u maki, ha ma na'ono Kristus Naran ra'akulu ra'alapedi lolo ainu'u morimori mamani.

<sup>21</sup> Ainu'u panaeku ma na'ono wake'e hi'i heheni: Yo oro Kristus mamwali mahaku, de ya a'uli asa'a Ai mamani. Enlo'o ya'u maki, onneni namwali ha man wa'an narehi, ono yo oro Kristus min lolo a'am raram wewerre!

<sup>22</sup> Enimaa lo'o ka'u maki, ya'u lernala leken paharin howok Yesus Kristus Nina honowok mamani, de ka auroin nili ewi man wa'an narehi.

<sup>23</sup> Kalla woro'o onne nahorala'u. Ya'u raram nodi

hoikaru noho wawan eni leke laa oro Kristus min wewerre. Onne man wa'an narehi.

<sup>24</sup> Enimaa wa'an rehi ya amkene moriyala mai noho eni wawan paku i wal'uhe leke mi mauroin morimori man eren wawa'an.

<sup>25</sup> Ya akin naili'il heheni ono ya auroiroin na'amoli yo orala i wal'u na'akeme leke paku a'aruri a'alapa mi akim leke mi akim eren namkekene naili'il Kristus la eren nahuwawa'an.

<sup>26</sup> Ende lere Kristus huri ya'u wali ki ka'arala mi, lo'o mi akim eren nahuwawa'an ma'uli masa'a Yesus Kristus me'e.

<sup>27</sup> Ha ma na'ono, mim mori wawa'an naise ri man loikaru Kristus Lirna Wawa'an wakukuwedi mi me'e. Ya apanak mim hi'i heheni leke ya'u ki oro mi pakromo wali'ur, ee ka, ya auroin mi modi honorok mahaku aki mahaku mamkene naili'il Lira Wawa'an onne kade ri na'okul mi. Enla ya auroin mi kam derne makani ri onnenihe rir wanakuku man sala, maa mi mamkene akin naili'il Lira Wawa'an eni mamani,

<sup>28</sup> la mi ka mamka'uk hi haenhi. Minim hini'i onne penia namwali tanada man mou leke hi rauroin nahenia Makromod Lalap nala hunukum makmaki hi, maa huri we'redi mi nano hunukum onne.

<sup>29</sup> Makromod Lalap mehe nili mi mamwali ma akin naili'il Kristus. Onne kan mehe, maa An nili mi lernala wewerek pananaka haenhi lekpananne Kristus Naran

ra'akulu ra'alape.

<sup>30</sup> Onne penia lere eniyeni mim lernaledi wewerek pananaka naisa nonolu mim do'onedi ya'u lernala lolo Pilipi, la naisa mim dernedi ya'u lernala lolo kota eniyeni.

## 2

*Kristus kan holi kukulu lalap de yon ik holi kukulu lalap*

<sup>1</sup> I wal'uhe, ya auroin mi peni moro Kristus madinu'ul makinaliyedi me'e, de Ai na'aruri na'alapedi mi akim me'e ono Ai namre'e namharu mi. Ya auroin mi moro Roh Kudus peni lawukuwedi me'e, la Kristus hi'iyedi mi ida ma naramyaka ida, la ida ma akin wa'an noro ida me'e.

<sup>2</sup> Ende ya apanak mim hi'i ya akin nahuwa'an wake'e, de hi'i wewhe heheni: Mi ida man mori wawa'an noro ida, de modi aki mahaku, honorok panaeku mahaku, la ida ma naramyaka ida.

<sup>3</sup> Mim hi'i haida yono modi minim raram nodi aimehi leke ra'uli rasa'a mi, la yon holi kukulu lalap, maa mi dohodoho holi helkaki namdaru la po'on ri namehin kulu narehi mi.

<sup>4</sup> Yono ilitolle mi ihin kemen mehe, maa ilitolle ri namehin rira lelehe loloie haenhi.

<sup>5</sup> Mahehe leke mi honorok akin namnenehe Yesus Kristus Nine:

<sup>6</sup> Kade Ai namnenehe noro Makromod Lalap, maa Ai ka nasala kerk-erhe Nin molollo

- mori naisa Makromod Lalap,  
 7 la An hoikaruwedi Nin molollo onne,  
 leke namwali ri mor-mori nadedem,  
 la mori naisa hophopon wahwahan man lolo yawa.  
 8 Lere Ai namwali ri mor-mori,  
 Ai kan holi kukulu lalapa,  
 maa An derne nakani Makromod Lalap mamani,  
 penia nala ihin kemen hurinohi rin wairesne lolo au kekiyowok naise ri man ailanna.  
 9 Onne penia Makromod Lalap kikan Ai laa naikoro onno man kulu narehi,  
 la nala Ai molollo man lap narehi nano molollo namehin na'akeme,  
 10 leke man mori lolo a'am raram, noho wawan, noro noho wi'in\* na'akeme  
 kadi ein korno yawa horhawe la ra'uli rasa'a Ai.  
 11 Hi na'akeme anilu manaku ra'aheni, "Yesus Kris-tus, namwali Makromod,"  
 penia ra'akulu ra'alapedi Aman Makromod Lalap.

*Mamwali ropropo leke ri man mori lolo metmetek kalkala do'on rauroin Yesus*  
 12 Ende i wal'uhe man ya aramyake, ya auroin mim derne makaniyedi maya'u me'e. Nonolu lere

yo oro mi minwuku mim derne makani ya'u mamani, maa lere eni ya ako'uwedi mi me'e, de ya apanak eren mampepe'el madiyaka minim hini'i wenewhe. Mori wawa'an ono Makromod Lalap huri we'eredi mi nano dohohala nin molollo me'e. Derne makani la mamka'uk Makromod Lalap mamani, de yon hi'i ha man ailanna,

13 ono Makromod Lalap mehen na'aromo mi raramne penia mi raram nodi lernohi Ai honorok akin, la Ai nala ruri pe'el ki mi hi'i wewhe lernohi Nin raram nodie.

14 Ende lolo minim hini'i wenewhe na'akeme, yon hehel warna enu mamani, la yon mi ida ma nasesi noro ida.

15 Hi'i heheni leke mi mamwali Makromod Lalap anan man moumou dewdewe ma na'alehe yak salida, kade mim mori lolo noho wawan man ailanna eni. Mi penia maise kaliyoro man ad'ada lolo noho momohon, leke kukul morimori ma namlolo ri man ailanna enihe,

16 la mi mamkene loikaru Lira ma nala or'ori dardari eni hi. Lo'o minim hini'i wenewhe naise onne, ya akin nahuwa'anedi lere Kristus mai wali'ur, ono nano minim hini'i eni ya auroin ainu'u honowok eni na'akeme kan lolo leken, maa ihin ennen aile.

17 Nano lere dedesne ya'u ki loikaru Lira Wawa'an eni, mi akim naili'iledi

\* **2:10** Lernohi ri nin honorok panaeku lere onne, ri man maki aile onno man metmetek lolo noho wi'in.

Makromod Yesus, la mi mala mi kemmu Ai leke lernohi Nin honorok aki mamani. Ende ka amka'uk ri lo'o hukumesna'u, maa ya apanak trimkasi Makromod Lalap mamani, la ya akin nahuwa'an noro mi mamani.

<sup>18</sup> Onne penia wa'an rehi yo oro i wal'uhe kapanak trimkasi wewerre, la hi'i ik akin nahuwa'an wewerre.

*Paulus na'uli Timotius noro Epaproditus*

<sup>19</sup> Ainu'u panaeku pelek hopon Timotius ki ka'arala mi, horo ik Makromod Yesus hurinohi. An ki enne leke na'alapa mi akimhe, la lere an wali nodi mi lirum mai, na'alapala ya akin haenhi.

<sup>20</sup> Ka'u hopon ri namehin ki enne, ono yo oro Timotius mehem loi honorok ki mi mamani leke minim morimori eren wawa'an.

<sup>21</sup> Ri namehin meher tolle kemen la kar ilitolle Yesus Kristus Nin honowok,

<sup>22</sup> maa mim do'on mau-roinedi nahenia Timotius namkene ilitolle Makromod Lalap Nin honowok. Airo mampe'el howok wewerre loikaru Yesus Lirna Wawa'an eni naise amida noro anan mememen howok wewerre.

<sup>23</sup> Ende lere ya auroin nahenia hi lo'o huri ya'u nano bui raram, ee ka, iraram nodi hopon Timotius ki ka'arala mi.

<sup>24</sup> Ya auroin kokkoo Makromod lo'o huri ya'u nano bui eni, de ka nalo'olala ya'u ki ka'arala mi haenhi.

<sup>25</sup> Enimaa ik walin, Epaproditus, man nonolu mim hopon mai ilitolle maya'u,

ya ahinorok nahenia lo'o wa'an rehi ya'u hopon an wali wali'ur ki enne. Airo maisa ke'urauk woro'o man laa ra'ara wewerre ono am howok Makromod Nin honowok wewerre, la an paku ilitolle ya'u lolo ainu'u wewerek pananakeni.

<sup>26</sup> Ya'u hi'iyedi kenekrohu hopon an wali ki enne, ono an horok rehi mi, la ai akin sus ono mim dernedi nahenia ai nakni'ir.

<sup>27</sup> Memen namlolo, ai nakni'ir manlo'o maki, maa Makromod Lalap kukul Nin aki man wa'an de hi'i wa'anedi. Onne kan mehe, maa An kukul Nin aki man wa'an maya'u haenhi leke yono hi'i ya akin sus wake'e.

<sup>28</sup> Onne penia ya akin namrana, de pelek hopon wali ki leke na'alapala mi akim wali'ur, la hi'i ya akin namkene haenhi.

<sup>29</sup> Ya apanak mi moro Epaproditus pakromo wali'ur, mi modi aki ma nahuwa'an wake'e kokala ai naisa mi wallum mememen man akin naili'il ik Makromod, la horhawa ri na'akeme ma nin morimori naisa Epaproditus haenhi.

<sup>30</sup> Lere an howok Kristus Nin honowok onne, manlo'o an maki. Ai kan horok kemen ono raram nodi herre mi namwali mi liman ein mai eni leke paku maya'u.

### 3

*Panaeku ma na'ono wake'e lolo iknik morimori, ik kauroin Yesus Kristus*

<sup>1</sup> Ainu'u wanakunu eniyeni ya apanak i wal'u na'ahoru dernala. Mi

na'akeme mahuwa'anedi mi akim ono moro Makromod mamwaliyedi mahaku me'e.

Ya akin namrana a'ori honorok mi nounaku man ya'u horokedi nonolu eni, leke yon ri mahaku nodi wanakuku man sala wukupoho mi.

<sup>2</sup> Madiyaka mi memen! Madiyaka ri ma nodi wanakuku man ailanna, rir hini'i onne naisa ahu merwui. Hi raram nodi rakerne mi lam sunat lernohi Yahudi rir holoor halauk enihe. Yom peinohi hi! Sunat onne kan hi'i ri namwali ri molololo Makromod Lalap kalarna!

<sup>3</sup> Maika mehe lernaledi sunat ma namlole! Kade ik kak lernohi hi sunat ri kemen, maa ik kamwaliyedi Makromod Lalap Nin ri, de Nin Roh mehen paku ik ka'uli kasa'a Makromod Lalap, la ik ka'akulu ka'alapa Yesus Kristus Oin Naran ono Ai mehen howok lolo ik raramne. Ik kak pu'ik heli ri mormori nin noho honolla me'e.

<sup>4</sup> Memen namlolo, nonolu ya'u pu'ik heli noho honolla onne. Lo'o ri aile man wakunu kukulu lalap nahe-nia an lernohi kokkoo noho honolla man ik dodo'on eni, ya'u lernohie narehiyedi ai!

<sup>5</sup> Ainu'u ri leleher manin Israel nano luhu Benyamin, mori ya'u rakan alam wo'aa hir sunat ya'u. Ende ya'u eni ri Ibrani mememen. Onne kan mehe, maa lere ya'u ka auroin Yesus makun, ya'u lernohi muku Parisi eni rir wanakuku de asala kerkerhe Makromod Lalap Nin keneri

hono'ok na'akeme.

<sup>6</sup> Lere onne ya ahehe aderre adaul keneri hono'ok onne mamani, de yo odi rurilai hi'i apinpinha kerei raramne ono ya auroin nahenia hi lo'o sopoledi keneri hono'ok onne me'e. Ya'u lernohi agama Yahudi nin holoor halauk eni penia derne akani na'akeme, de ri mahaku kan kuku sala maya'u.

<sup>7</sup> Nonolu ya ahinorok nahenia ha onne na'akeme nala ha man wa'an wake'e maya'u, maa lere eni ya auroin nahenia onne kan min haida-haida maya'u me'e, ono yo oro Kristus mamwaliyedi mahaku me'e.

<sup>8</sup> Onne kan mehe, maa panaeku na'akeme man nonolu ya ahinorok ma na'ono rehi, lere eni ya auroin ka nala ha man wa'an ida maya'u me'e, ono panaeku man wa'an narehi ha wo'ira na'akeme onne, ya auroin Makrom'u Yesus Kristus mehe. Enpenia ya auroin nahenia ha namehin onne na'akeme namwali munuk dewe, de ya'u sopoledi me'e leke ya'u lernala Kristus,

<sup>9</sup> la oro Ai mamwali mahaku. Ka amwali ri molololo Makromod Lalap kalarna ono ya'u lernohi keneri hono'ok enihe la hi'i ha man wa'an mamani, maa Makromod Lalap mehen hi'i ya amwali ri molololo ono ya akin naili'il Kristus mehe.

<sup>10</sup> Ya'u raram nodi eren auroiroin Kristus kokkoo. Ya'u raram nodi Makromod Lalap nodi Nin ke'eke'el an'anha man hi'i Yesus mori

wali'ur nano Nin makmaki leke howok lolo i raramne. Ya akin namrana lernala apinpinha naise An lernaledi me'e, kade hir wairesne ya'u lolo au kekiyowok haenhi,

<sup>11</sup> ono ya auroin nahenia ya'u me'ene mori wali'ur nano ainu'u makmaki eni.

*Kahehe lari kamlolollo laa  
Yesus Kristus*

<sup>12</sup> I wal'uhe, ka a'aheni ainu'u honorok aki onne kuku nokoredi me'e, la ka a'aheni ainu'u hini'i wenewhe namlolo wake'e me'e, maa ya ahehe mamani hi'i ainu'u morimori naisa Yesus Nine haenhi, leke i lernala Nin ha wo'ira na'akeme man wa'an. Ai mehen nili ya'u leke ya amwali Nin ri la lernala ha wo'ira man Ai na'akenedi eni.

<sup>13-14</sup> I wal'u na'ahoru, memen namlolo ka a'aheni ainu'u morimori namloledi me'e, maa ya ahehe lernohi Makromod Lalap Nin honorok aki mamani. Ya amwaliyedi ri ma na'ohi pelek lolo larlari. Ka'u po'on kilili'ur, maa ya'u po'on kalalari mamani, ahehe lari amlololo laa larlari honon, leke ya'u lernala ainu'u mahmaha kolkoli ihi ennen. Larlari honon onne, Yesus Kristus mehe. Lolo Yesus onne penia Makromod Lalap napolu ik koro Ai min wewerre lolo a'am raram rakan laa ewi-ewi.

<sup>15</sup> Ende, ika ma nodi honorok aki man mou lernohi Makromod, na'amoli ik kodi honorok aki mahaku hi'i wewhe naisa ya aheniyedi idedi eni. Enimaa lo'o mi ri ida woro'o aile man

honorok aki ka namnenehe noro ainu'u honorok aki eni, na'amoli Makromod Lalap mehe na'amou na'aropo kalla ma namlolo ki mi.

<sup>16</sup> Ha ma na'ono, ik mori lernohi kalla man Makromod Lalap kukuledi maika me'eni.

<sup>17</sup> I wal'u na'ahoru, ya apanak mi na'akeme tenuohi ainu'u hini'i wenewhe onne. Lere ai moro mi min wewerre am kukuledi kalla ma namlolo mim lole, de mahiyene wawa'an ri man lernohi anim hini'i wenewhe.

<sup>18</sup> Ya apanak mim lernohi anim hini'i wenewhe ono ri nammori ramhene derne rakani wanakuku ma na'ono Kristus Nin makmaki lolo au kekiyowok. Lere romromo ya'u konohiyedi mi rir hini'i man ailanneni me'e, la lere eni yo odi mak oir kukunohi mi wali'ur rir hini'i onne.

<sup>19</sup> Ri naisa onne penia lernala apinpinha ma kan horu lolo kawali pire ai porom raram. Hirira monmono kamanna nodi molollo hi de namwali hi makromon, la rir hini'i man hi'i wawwawa ri penia nahuwa'an hi akinhe. Hi rahinorok noho wawan eni nin panaeku wo'ira manani.

<sup>20</sup> Enimaa, i wal'u na'ahoru, ik kamwali a'am raram ne'en raramne, la nano onne penia ik kodi aki ma namranedi weilapan ik Makromod Yesus Kristus Nin maimai. Ai penia namwali iknik Rai man huriyedi ika nano dohohala nin molollo.

<sup>21</sup> An mai wali'ur ne, An herre ik kemen man

elimo'o nana'an eni hi'i namwali naise Ai kemen man ma'aruru wake'eni. An hi'i heheni ono Ai nodi molollo ma narehi nalewen nano molollo na'akeme de ha wo'ira na'akeme lolo yawa Ai.

## 4

<sup>1</sup> I wal'u man ya aramyaka na'ahohoru! Ya'u horok rehi mi, la minim hini'i wenewhe nahuwa'an la na'alapedi ya akin me'e, de ya a'uli asa'a Makromod Lalap. Ya'u kukuledi kalla man wa'an mim lole me'e, de mamkene akin naili'il Makromod mamani!

*Mai, ik kamkene mori lernohi Makromod Lalap Nin honorok aki*

<sup>2</sup> I nar'u Mam Euodia noro Mam Sintike! Ya apanak an'anchedi yono mi ida ma nasesi noro ida, ono moro Makromod mamwaliyedi mahaku me'e.

<sup>3</sup> Enla ainu'u man howok wali (*Sunsugos*)<sup>\*</sup> ma namkene akin naili'il Makromod, ya apanak om paku maeke woro'o enihe leke ida man mori wawa'an noro ida. Lere yo oro mi minwuku makun, woro'ohe roro ya'u howok mamani maderre madaul Lira Wawa'an eni, noro idewe Klemens noro ainu'u man howok wali namehin enihe. Hi naran na'akeme Makromod Lalap horokedi lolo Horok *Or'ori Dardari* me'e.

<sup>4</sup> I wal'uhe, mahuwa'anedi mi akim mamani ono moro Makromod mamwaliyedi mahaku me'e. Ya ahene wali'ur, mi mahuwa'anedi mi akim mamani.

<sup>5</sup> Modi lira mamamal hi'i ha man wa'an mamani lolo minim ri heri ri wali na'akeme. Horhorok! Ka nalo'ol me'e Makromod wali mai wali'ur.

<sup>6</sup> Yon ma'irhu haida-haida, maa lolo ha wo'ira na'akeme hi'i lir napanak Makromod Lalap, la yon hamlinu mapanak trimkasi haenhi.

<sup>7</sup> Lo'o mim hi'i heheni, Makromod Lalap nala aki ma namrina namkai ki mi. Ri mahaku ka nauroinnala minim aki ma namrina namkai man hi'i mi holi moiliwi mahuwele onne. An hi'i onne leke nadiyaka mi akim noro minim honorok panaeku ono moro Yesus Kristus mamwali mahaku.

<sup>8</sup> I wal'uhe, lolo ainu'u wanakunu man horu eniyeni, ya apanak mim loi honorok wawa'an panaeku wo'ira eni mamani: Panaeku ma namlolo, man rin horhawe, ma namdudu, man moumou dewdewe, man wa'an, man ma'aruru, la man wa'an ik ka'uli, onneni na'akeme mim loi honorok mamani.

<sup>9</sup> Lernohi ainu'u wanakuku man mim kokaledi me'eni, la inhawa mim derne la do'on ya'u hihi'i eni, ya apanak mim hi'i haenhi. Lo'o mim hi'i onne, Makromod Lalap

\* **4:3** Wanakunu lirna 'Sunsugos' namwali wanakunu Yunani napa'ahne, 'man howok wali.' Ri heruwali rahinorok onne namwali ri naran, maa ri namehin rahinorok lirna onne namwali wanakunu Yunani nin lirna ma nin panaeku 'man howok wali,' penia Horok Lap heruwali nair 'man howok wali' la heruwali nair 'Sunsugos'.

ma nala ri aki man moiliwi  
mahuwele onne, norle'ule'u  
norwaliwali mi.

*Paulus napanak trimkasi  
ri ma nala kupan paku ai*

<sup>10</sup> I wal'uhe, kade ik kahina'aredi nalo'ol me'e, maa mi kam hamlinu aku minim raramyaka maya'u, de ya akin nahuwa'an wake'e la ya a'uli asa'a Makromod. Memen mi kam hamlinu maya'u, maa rakan lere eni mene mim lernala kalla aku kupan paku maya'u.

<sup>11</sup> Ka'u wakunu heheni ono ainu'u ha wo'ira kan kuku kan nokor. Ya au-roinedi mori odi aki ma namkene lolo panaeku wo'ira na'akeme me'e.

<sup>12</sup> Lo'o ya alehe ya amlinu me karu, lo'o ya amlara me pehur, ka'u ma'irhu haida-haida ono ya auroinedi Kristus hi'i ya akin namkene lolo panaeku wo'ira me'e.

<sup>13</sup> Ai penia na'aruri na'alap ya akin, de ya akin namkene kerhu ha wo'ira na'akemeni.

<sup>14</sup> Kade onne namlolo, maa ya apanak trimkasi nammori ono mim pakuwedi ya'u lolo ainu'u apinpinheni.

<sup>15</sup> I wal'uhe manin Pilipi na'ahoruwed! Nonolu, ya'u minle minim kote loikaru Lir Wawa'an ki mi, la lere ya amhara minim propinsi Makedonia, kerei raramne namehin kar paku maya'u. Mi mehe mala kupan paku maya'u aderre adaul Lira Wawa'an eni.

<sup>16</sup> Onne kan mehe! Lere ya'u aile kota Tesalonika ainu'u hewhewek nainair kan nokor, de mim akuwedi

minim raramyaka raram rewro'o maya'u.

<sup>17</sup> Ka'u wakunu heheni leke mim aku minim raramyaka maya'u wali'ur, maa ya'u raram nodi Makromod Lalap herre walha minim hini'i man wa'an onne nala rere'e haharu mi eren nammomori.

<sup>18</sup> Ya'u konohi mi leke mi mauroin nahenia hahaa na'akeme man mim a'aku eni, ya'u lernaledi me'e. Ya'u kokaledi na'akeme nano Epaproditus me'e, de ainu'u hewhewek nainair nokor narehiyedi me'e. Minim raramyaka mala maya'u onne naisa honoi kanani man wala'ula'u rodi hoikani Makromod Lalap, de akin nahuwa'anedi kokala minim honoi kanani eni.

<sup>19</sup> Makromod Lalap man ya a'uli asa'eni penia Nina linikir kanaru nammori rehi. Ende nano Nin linikir kanaru onne, na'amoli Ai na'akuku na'anokor minim lelehe loloi ono moro Yesus Kristus madinu'ul makinaliyedi me'e.

<sup>20</sup> Ende ka'uli kasa'a Makromod Lalap, iknik Ame, rakan laa ewi-ewi! Amin.

### *Tape masi man horu*

<sup>21</sup> Na'amoli mala ainu'u tape masi laa Makromod Lalap Nin ri ma noro Yesus Kristus ramwali mahaku na'akeme lolo onne. Kokala tape masi nano mi walinhe ma aile mai eni haenhi.

<sup>22</sup> Enla ri ma akin naili'il Yesus man howok lolo Kaisar nin nakar enihe, hi akin namrana rala rir tape masi ki i wal'uhe. Ri ma akin naili'il Yesus namehin lolo kote eni rala rir tape masi haenhi.

23 Na'amoli ik Makromod  
Yesus Kristus nala Nin rere'e  
haharu ki mi na'ahoruwed.  
Tape masi,  
*Paulus noro Timotius*

nahenia Yesus namwali ma na'ono wake'e.

## Kolose

### *Horok Lirna La'an*

Kota Kolose aile propinsi Asia, kan ko'uwala nano kota Epesus. Paulus minle Epesus onne anna woro'o rehi naderre nadaul Lira Wawa'an lolo onne. Lere li'ur ri Kristen ida woro'o nano Epesus rodi Lira Wawa'an onne laa Kolose, penia manin Kolose heruwali akin naili'il Makromod Yesus haenhi. Nakawedi anna ida woro'o, kele Paulus rala laa bui raram ono ai nodi Lira Wawa'an onne. Lere onne an hi'i horok eniyeni aku laa manin Kolose onnenihe.

Lolo horok eni, Paulus na'ori honorok hi radiyaka meser agame ma nodi wanakuku man sala. Hir wakuku ra'aheni lo'o ik raram nodi lernala Makromod Lalap Nin or'ori dardari, kan nokor ik akin naili'il Yesus mehe, maa wa'an rehi ik hoikani ha ma nodi molollo lolo a'am noro noho wawan naisa hophopon a'am raram. Hir wakuku wa'an rehi ik sunat lernohi agame Yahudi nin holoor halauk noro ha ma ka namlolo namehin haenhi. Paulus nou ri Kolose enihe yon lernohi wanakuku ma ka namlolo onne. Ai na'ori honorok hi nahenia ik akin naili'il Yesus mehe, onneni nokoredi me'e, ono Yesus mehe Nin molollo nala or'ori dardari ma kan horu ri mormori. Meser man sala onnenihe wakuku wanakuku ma nakoko rin lernohi kalla man sala ono rir wanakuku onne kan wakuku

### *Horok Ihin*

1. Paulus nala wanakunu man hari horok eni (1:1, 2).
2. Paulus napanak trimkasi laa Makromod Lalap, la an hi'i lir napanak manin Kolose onnenihe (1:3-14).
3. Kristus narehi nalewen ha wo'ira na'akeme (1:15-23).
4. Paulus nin honowok naderre nadaul Lira Wawa'an eni (1:24-2:5).
5. Paulus wakuku hini'i wenewhe man wa'an ri ma akin naili'il Yesus hi'ie (2:6-7).
6. Paulus hopon yon lernohi wanakuku ma ka na'ono Kristus mehe namwali Or'ori Dardari Onno (2:8-23).
7. Wa'an rehi ik huri we'er iknik morimori lo'olo'ol, holi kodi morimori worworu (3:1-17).
8. Paulus nala nounaku man ho, tatan'ukun noro ri leleher, la ma namwali hophopon wahwahan noro makromonhe (3:18-4:1).
9. Paulus nala nounaku hi'ihewi hi'i lir napanak noro iknik hini'i wenewhe koro ri ma ka namwali Kristen (4:2-6).
10. Paulus nala lirna man horu (4:7-18).

*Paulus nala hiyene arore laa manin Kolose*

1-2 Konohiyala i walin ma namwali Makromod Lalap Nin ri mememen lolo Kolose na'ahoruwedi. Mi mamkene akin naili'il Kristus mamani

ono more mamwaliyedi mahaku me'e.

Ya'u eni Paulus, man Makromod Lalap raram nodi kikan amwali Yesus Kristus Nin hophopon ma nodi Lirna Wawa'an eni.

Yo oro ik walin Timotius ma namwali Yesus Nin ri haenhi, ai mapanak iknik Ame--Makromod Lalap, nala Nin rere'e haharu noro wawa'an rara'e ki mi.

*Paulus napanak trimkasi la hi'i lir napanak manin Kolose*

<sup>3-4</sup> Am dernessi nahenia mi akim naili'iledi Yesus Kristus me'e, la mi maramyaka ri ma akin naili'il Yesus Kristus na'akeme haenhi, de lere am hi'i lir napanak ki mi, ai kam hamlinu mapanak trimkasi Makromod Lalap, ik Makromod Yesus Kristus Aman.

<sup>5</sup> Lere dedesne rin mai konohi Yesus Kristus Lirna Wawa'an eni ki mi, mim derne makani la kokaledi me'e. Enpeni mi akim namkene lapan lere Makromod Lalap nala rere'e haharu na'akeme man Ai na'akene manakuwedti lolo a'am raram leke nala ki mi. Ende mi akim namkene naili'il Yesus Kristus, la mi maramyaka Makromod Lalap Nin ri na'akeme rakan lere eniyeni. Lirna Wawa'an onne penia namlolo,

<sup>6</sup> la raderre radauledi lolo noho wawan na'akeme me'e, penia ri ma akin naili'il Yesus eren nammomori, la hi onne hi'i ha ma nahuwa'an Ai akin. Ha onne namwali i wal'uhe haenhi. Lere mim derne Lira Wawa'an onne, mi akim naili'iledi Makromod Yesus

me'e, de mi mauroin kokkoo Makromod Lalap Nin rere'e haharu man Ai nanala ki mi eni.

<sup>7</sup> Mim dernessi Lira Wawa'an onne nano Eparpas, ainim man howok wali man ai maramyak eni. Eparpas onne namwali Kristus Nin hophopon wahwahan ma namkene howok leke paku mi.

<sup>8</sup> Ai peni man konohi mayai nahenia Roh Kudus hi'i mi de ida ma naramyakedi ida me'e.

<sup>9</sup> Ende nano lere am derne lirna ma na'ono hi'i hewi mi akim naili'il rakan lere eniyeni, ai mapanak Makromod Lalap paku mi mamani. Lolo ainim lir napanak eni, ai madeadem mapanak Ai nala woroin noro honorok panaeku man wa'an ki mi leke mauroin mouropo Nin honorok aki na'akeme.

<sup>10</sup> Am hi'i lir napanak onne leke mim hi'i wewhe ha man wa'an lolo Makromod kalarna, la minim morimori na'akeme nahuwa'anedi Ai akin. Am hi'i lir napanak leke mim hi'i wewhe ha man wa'an mamani la eren nalolo'ol eren mauroroin Makromod Lalap wawa'an.

<sup>11</sup> Ai mapanak Makromod Lalap nala Nin molollo noro Nin ke'eke'el an'anha ma narehi ma nalewen eni na'aruri mi akim mamani, lekpananne lere rin hi'i sus mi, ka modi lir apinpinha walha hi. Maa mi akim namkene naili'il Makromod mamani la mi akim nahuwa'anedi,

<sup>12</sup> la mi mapanak trimkasi iknik Ame, Makromod Lalap

man kikan mi mamwali  
anan, penia mim lernala  
inhawa man Ai na'akenedi  
Nin ri mememen lolo Nin  
onno man siksika lerlere eni.

<sup>13</sup> Ai na'ohu nahaledi ika  
nano metmetek kalkala nin  
molollo, la nodiyedi ika laa  
onno man Ai Anan nodi  
molollo raram leke Anan  
man Ai naramyakeni nodi  
molollo maika.

<sup>14</sup> Ai Anan onne peni  
namwali man huri we'er ika  
nano dohohala nin hunukum  
makmaki, de na'ohu na-  
haledi iknik dohohala me'e.

*Yesus Kristus nodi molollo  
ha wo'ira na'akeme*

<sup>15</sup> Ik po'on Kristus, ik  
do'onedi Makromod Lalap  
man ri kan dodo'onnala  
makun eni. Ka rakuku noho  
la ka raleu a'am makun,  
Kristus aiyedi me'e, la Ai  
nodi molollo ha rakukuku la  
raleleu na'akemeni,

<sup>16</sup> ono lolo Kristus penia  
Makromod Lalap nakuku  
noho naleu a'am la hi'i ha  
wo'ira na'akeme ma aile  
raramne. An hi'i ha man  
ik po'on na'akeme noro  
idewe ha man kak dodo'on  
na'akeme, la An hi'i ma nodi  
molollo lolo noho wawan eni  
noro idewe ma nodi molollo  
lolo a'am haenhi. An hi'i  
ha wo'ira na'akeme ma aile  
noho noro a'am onne leke  
horhawee Kristus.

<sup>17</sup> Ha wo'ira onne ka  
namwali makun, Kristus  
aiyedi nano nonolu me'e, la  
Ai nodi molollo ha wo'ira  
na'akeme leke yon yak.

<sup>18</sup> Ika ma akin naili'il  
Kristus kamwali Ai ke-  
men, la Kristus namwali  
iknik uluwakun. Naise ri  
uluwakun nodi molollo ke-  
men, Ai nodi molollo maika,

Nin kerei raramne. Enla Ai  
peni ma nala morimori wor-  
woru maika, ono Ai namwali  
ri dedesne man mori wali'ur  
nano Nin makmaki. Ende  
nano ha wo'ira na'akeme Ai  
namwali ma na'ono wake'e,

<sup>19</sup> ono Makromod Lalap  
penia raram nodi hi'i leke  
Nin molollo, Nin morimori  
mememen, noro Nin ha  
wo'ira na'akeme aile Anan  
Kristus raram.

<sup>20</sup> Makromod Lalap ho-  
pon Anan mai nala kemen  
ri nesne leke ha wo'ira  
na'akeme ma aile noho  
wawan noro ma aile a'am  
raram rahuwa'anedi noro  
Makromod Lalap wali'ur.  
Ende Yesus rarna man  
wauwedi lolo au kekiyowok  
onne penia hi'i ha wo'ira  
na'akeme wa'an wali'ur noro  
Makromod Lalap.

<sup>21</sup> Nonolu mi honorok  
akim noro minim hini'i we-  
newhe man ailanneni hi'i mi  
mamwali Makromod Lalap  
Nin arwali ma nako'uwedii  
Ai,

<sup>22</sup> maa lere eniyeni Ai  
Anan naledi kemen ri nesne  
leke du'ul kaliyedi mi moro  
Makromod Lalap wali'ur, de  
more minwuku wawa'anedi  
me'e. Enla lere mi mamriri  
lolo Ai leken kalarna, An  
po'on mi moumou dewdewe  
me'e, de ma'alehe dohohala  
la ri mahaku ka nodi yaksal-  
ida tumdesne mi me'e.

<sup>23</sup> Enimaa, horhorok, i  
wal'uhe! Yon mi akim  
nado'o, maa mamkene  
akin naili'il Yesus mamani.  
Yon hurinohi ri wukupoho  
mi, maa masala kerkerhe  
wanakuku mim dedernedi  
me'e, leke mamkene lapan

ha wo'ira na'akeme man Makromod Lalap nouwedi lolo Lirna Wawa'an me'eni. Lirna Wawa'an onne raderre radauledi lolo noho wawan na'akeme me'e, la ya amwali Makromod Nin hophopon wahwahan ma nodi Lirna onne haenhi.

*Paulus nin honowok lolo kerei raramne*

<sup>24</sup> Lere eni ya'u akin nahuwa'an odi a'uwnara wewerek pananaka man hi'i sus i kem'u leke paku mi. Wewerek pananaka namehin man Kristus nala maya'u, i raram nodi a'uwnara haenhi leke paku Nin kerei raramne na'akeme. Nin kerei raramne onne penia namwali Ai kemen.

<sup>25</sup> Ya amwaliyedi Nin hophopon wahwahan man paku Nin kerei raramne, ono Makromod Lalap mehen kikan ya amwali ma nodi Lirna Wawan eni, de ya'u loikaru Lirna penpenu kemkeme ki mi ma ka namwali Yahudi enihe.

<sup>26</sup> Nano nonolu wake'eni rakan lere eni Makromod Lalap suwaredi Lirna onne nano ri na'akeme, maa lere eniyeni Ai nalhariyedie laa Nin ri mememen na'akeme me'e.

<sup>27</sup> An hi'iyedi kenekrohu nalhari Nin panaeku man ma'aruru wake'eni laa Nin ri na'akeme, ri Yahudi noro idewe ri ma ka namwali Yahudi haenhi. Nin panaeku onne: Kristus aile mi raram. Onne penia mi mauroinedi nahenia moro Makromod Lalap minwuku lolo a'am raram man ma'aruru wake'eni.

<sup>28</sup> Kristus onne penia ai maderre madaul laa ri na'akeme. Ai modi woroin man Makromod Lalap nala mayai na'akeme nounaku la wakuku hi, leke lere hi ramriri lolo Makromod Lalap kalarna hirira hini'i wo'ira na'akeme namlolo kokkoo, ono roro Yesus ramwaliyedi mahaku me'e.

<sup>29</sup> Onne penia ya ampe'el howok odi Kristus Nin molollo ma narehi ma nalewen man howok lolo ya'u raram eni.

## 2

<sup>1</sup> I wal'uhe, ya'u raram nodi mi mauroin ainu'u honowok werekne leke paku mi manin Kolose, noro manin Laodikia, noro idewe ri ma ka nauroin-nala ya'u makun.

<sup>2</sup> Ya'u howok heheni leke a'aruri a'alapa mi akim na'akeme, la hi'i mi ida ma naramyaka ida leke mamwali mahaku. Ya'u raram nodi Ai nala woroin ma namlolo wake'e ki mi, leke mauroin kokkoo panaeku man nonolu eni Makromod Lalap suwaredi nano ri na'akeme. Nin panaeku man suwsuwar onne, Kristus mehe.

<sup>3</sup> Makromod Lalap Nin woroin noro honorok panaeku man mou man suwsuwar nano nonolu eni namwali linikir kanaru ma aile Kristus raram.

<sup>4</sup> Ya a'aheni na'akemeni leke yom derne makani ri ma nahehe wukupoho mi nodi lir mamamal wakuku wanakuku ma ka namlolo.

<sup>5</sup> Kade ya'u ko'u ki mi, maa ya'u honorok akin ka

nahnuri mi. Enla ya akin nahuwa'anedi derne mi ida man mori wawa'an noro ida la mi akim namkene naili'il Kristus mamani.

*Morimori ma namlolo*

<sup>6</sup> I wal'u na'ahoruwed! Mim kokaledi Yesus Kristus namwali mi Makrommu me'e, de mori lernohi Yesus Nin honorok aki mamani ono more mamwali mahaku.

<sup>7</sup> Mi ma'a'aredi lolo Yesus me'e, de mahehe leke mi akim eren narururi naili'il Ai, la mi akim naili'il kokkoo wanakuku ma namlolo man ri naledi mi me'en. Enla modi aki ma namkene mapanak trimkasi Makromod Lalap mamani.

<sup>8</sup> Madiyaka mi wawa'an, leke yon hurinohi rin wukupoho mi la rakerne mi lernohi rir agame nin wanakuku ma ka namlolo, ik derne ma'aruru maa kan min haida. Hir wakuku mi lernohi noho wawan eni nin noho honolla noro holoor halauk ma na'ono enihe.\* Hirira wanakuku onne kan mai nano Kristus, maa nano ri mormori rir honorok panaeku mehe.

<sup>9</sup> Onne penia yom derne makani rir wanakuku ma ka namlolo eni, ono Makromod Lalap Nin molollo noro morimori na'akeme penpenu kemkeme aile Yesus Kristus raramne.

<sup>10</sup> Enla mi moro Ai mamwali mahaku me'e, de Nin ha wo'ira penpenu kemkeme aiyedi mi raram me'e. Yesus penia nodi molollo ma narehi nalewen

ha wo'ira na'akeme, de na'akeme ma nodi molollo noro manin ke'eke'el an'anha man aile noho wawan eni lolo yawa Ai.

<sup>11</sup> Ik koro Kristus kamwaliyedi mahaku me'e, de ik ka'aheni An sunatedi ika me'e. Iknik sunat onne, ri mormori kan hi'ie, maa Kristus mehen sunatedi ik akin me'e ono Ai na'ohu nahaledi ika nano iknik morimori lo'olo'ol nin molollo me'e.

<sup>12</sup> Lere ik laa oir raram leke ulutade ika, namwali tanada nahenia iknik morimori man ailanneni makiyedi me'e, de karuwedi noro Kristus wewerre me'e. Ik kamharedi oir laa paharne namwali tanada nahenia koro Kristus mori wali'uredi me'e, de lernala morimori man worworu ono ik akin naili'il nahenia Makromod Lalap nodi Nin ke'eke'el an'anha ma na'amori Kristus nano Nin makmaki eni.

<sup>13</sup> Nonolu mim larlewenedi Nin keneri hono'ok me'e, la Makromod Lalap kan huri we'er mi nano minim morimori lo'olo'ol nin molollo makun, de mim mori maisa ri man makiyedi me'e, maa lere eniyeni Ai na'amoriyedi mi moro Kristus me'e, la Ai na'ohu nahala ika nano iknik dohohala na'akemeni.

<sup>14</sup> Ma namlolo, ik na'akeme hi'iyedi dohohala, de wa'an rehi hukum la kahineiredi nano Makromod Lalap ono ik larlewenedi Nin keneri hono'ok me'e, maa Ai na'amoluloinedi iknika dohohala na'akeme me'e, la huriyedi ika nano keneri

\* **2:8** Tafsiran namehin aile man herre 'holoor halauk ma na'ono enihe' noro 'roh-roh ma nodi molollo lolo noho wawan enihe.'

hono'ok man ik larlewenedi onne penia kak lernala hunukum me'e.

<sup>15</sup> Lolo Nin makmaki onne penia An rehiyedi ara noro hayakyak ma nodi molollo noro idewe rir ke'ek'e'l an'anha na'akemeni, la Ainin hini'i onne kukunohi ri na'akeme mouropo naheenia An rehiyedi hayakyak onnenihe me'e de ka rodii molollo me'e.

<sup>16</sup> Onne penia, yom derne makanri ma nahehe kerne i wal'uhe lernohi rir holoor halauk rahu eni. Hi ra'aheni mim saledi ono mi mo'on momun hanana'an nonomun man hi ra'aheni luli. Enla hi ra'aheni mim saledi ono mi kam lernohi Yahudi rir holoor halauk lolo rir lere alam lalapa, wollo hanara, noro Alam Renren Warwarna.

<sup>17</sup> Yon peinohi ri onnenihe, ono rir noho honolla noro holoor halauk onnenihe na'akeme naisa au kake mehe. Nonolu eni Makromod Lalap nala holoor halauk onnenihe leke namwali au kake man melle ha man wa'an man An nou mai lere li'ur. Kristus penia na'aku na'anokoredi ha wo'ira na'akeme man Makromod Lalap nonou eni.

<sup>18</sup> Ende yon hurinohi hi rakerne mi lernohi rir hini'i man kokme'e ra'adeul ra'atana rir honoli, la yon lernohi hi ra'uli rasa'a hophopon a'am raram. Lo'o mim derne makanri ma ka namlolo onnenihe, mi kam kokala mahmaha kolkoli ihin ennen man Makromod nouwedi nala ki mi. Ri onne ra'aheni hir lernala woroin ma na'ono lolo hahaa man

hir meher do'on, maa rir woroin onne nakoko hi holi kukulu lalap ono namwali ri mormori nin honorok panaeku mehe, de kan min haida.

<sup>19</sup> Ri onnenihe kar du'ul kali roro iknik uluwakun Jesus Kristus me'e. Ik ma akin naili'il Kristus kamwali Ai kemen, de naisa uluwakun nodi molollo kemen la kemen hana'arne rahinuhu rawinawaredi leke mori wawa'an, Kristus hi'i ik kamwali mahaku la nodi nala ika leke ik akin eren namkene naili'il Ai lernohi Makromod Lalap Nin honorok aki mamani.

<sup>20</sup> I wal'uhe, lere Kristus maki onne naisa mi moro Ai maki wewerre haenhi, la An huri we'eredi mi nano noho wawan eni nin noho honolla noro nin holoor halauk leke yon derne makanri me'e. Ende alhi'ihepe mim mori namnenehe ri man derne rakani noho wawan eni honolla noro nin holoor halauk enihe? Hi'ihepe mim derne makanri holoor halauk ma na'aheni,

<sup>21</sup> "Yon masala eniyeni! Yon mo'on onneni! Yon tukul onneni!"

<sup>22</sup> Holoor halauk man hi rasala kerkerheni peni wekel hanana'an noro hahaa man pelek yak de sopoledi ono kan wa'an ik nair wali'ur. Ende yom derne makanri holoor halauk rahu onnenihe, ono holoor halauk onnenihe peni ri mormori rir hini'i, Makromod Lalap ka.

<sup>23</sup> Rin po'on holoor halauk onnenihe hir pene'ek lo'o wa'an wake'e, ono nadedem ri man lernohi holoor halauk

onne rampe'el laa kerei, kar holi kukulu lalap, la ra'aluli kemen leke lernohi holoor halauk eni. Hir hi'i heheni leke ken rahuwa'an Makromod akin, maa holoor halauk noro woroin onne kan min haida ono kan huri ika nano monmono kamanna man ailanna ma aile ik irhun raramne.

### 3

*Mi mamwaliyedi ri worworu me'e, de sopoledi minim hini'i wenewhe ma ka nambole*

<sup>1</sup> I wal'uhe ma akin naili'il Kristus na'ahoruwed! Makromod Lalap na'amoriyedi mi naisa Ai na'amoriyedi Kristus nano Nin makmaki eni, de mim lernaledi morimori worworu me'e ono mi moro Kristus madinu'ul makinaliyedi me'e. Ende machehe leke mauroin panaeku wo'ira ma aile a'am raram. Lolo onne penia Kristus aile naikokoro Makromod Lalap herne malanna.

<sup>2</sup> Ende loi honorok a'am raram nin ha wo'ira mamani, yon ik loi honorok noho wawan eni nin ha wo'ira,

<sup>3</sup> ono iknik morimori lo'olo'ol eni makiyedi me'e, la ik kokaledi morimori worworu nano Kristus me'e. Ai onne penia noro Makromod Lalap mori wewerre lolo a'am raram. Manin noho wawan eni kar do'on rauroin iknik morimori worworu eni,

<sup>4</sup> maa lere Kristus ma namwali iknik or'ori dardari onno wali wali'ur mai noho wawan, Nin morimori man ma'aruru wake'eni ri na'akeme do'odo'on. Lere onne maika aile haenhi, la

koro Ai ra'akulu ra'alapa wewerre.

<sup>5</sup> Minim morimori lo'olo'ol eni makiyedi me'e, de yon hurinohi mi irhun raram nin monmono kamanna man ailannen nodi molollo mi me'e. Yon hi'i ha man ailanna naisa: holi yak leke yak, hi'i diniwar danawar man mors, hurinohi minim monmono kamanna nodi mi laa yakanne, la makmanna noho wawan eni nina ha wo'ire. Ri ma nakmanna onne penia naisa ri man hoikani lernulu aukerhe.

<sup>6</sup> Lere man mai Makromod Lalap kukul Nin ahan man werek leke hukum ri man hi'i ha man ailanna onne.

<sup>7</sup> Nonolu minim morimori naisa onneni,

<sup>8</sup> maa lere eniyeni yon ik hi'i ha man ailanna onne me'e. Yon ma'ahan ri, yon mawuhur rehi, yon hi'i yakyak ri namehin ono kam suke. Yon wakunu nano'onyak ri namehin, yon wakunu wanakunu man Morse,

<sup>9</sup> la yon ika ida ma napoho ida. Yon hi'i ha onne na'akeme ono ik huriyedi iknik morimori noro hini'i wenewhe lo'olo'ol me'e.

<sup>10</sup> Enla lere eni ik kokaledi morimori worworu me'e ono Makromod Lalap hi'iyedi ik kamwali ri mormori worworu. Na'amoli An hi'i heheni leke ika lernohi Nin hini'i wenewhe mamani la ik kauroin Ai kokkoo.

<sup>11</sup> Makromod Lalap hi'iyedi ik kamwali ri worworu me'e, de ik ka ka'ili kaloho ri Yahudi noro ri ma ka namwali Yahudi, ono Makromod Lalap po'on ri

man sunatedi noro ma kan sunat eni, namnenehe. Ai ka na'ili naloho ri ma namwali do'on awan, man minle alha raram, ma namwali hophopon wahwahan, noro ma namwali makromon. Enimaa Kristus eni penia namwali ma na'ono narehi nalewen ha wo'ira na'akeme, la Ai mehe minle ik na'akeme raramne.

<sup>12</sup> Makromod Lalap naramyaka ika la niliyedi ik kamwali Nin ri mememen me'e. Ende wa'an rehi ik ida ma naramyaka ida, la ida man mori wawa'an noro ida, yon ik holi kukulu lalap, la yon kodi lir apinpinha ri namehin, maa kodi lir mamamal, la yon ik ida man pelek na'ahan ida.

<sup>13</sup> Ik ida man kokala ida wawa'an la yon horhorokala ri namehin nin hini'i man yak noro ika. Makromod penia nala ampun maika de na'ohu nahaledi iknik dohohala me'e, de kamkene kala ampun ri namehin man hi'i sala maika haenhi.

<sup>14</sup> Ha ma na'ono narehi onne, ik ida ma naramyaka ida. Lo'o ik hi'i onneni, ik kamwaliyedi mahaku kokkoo.

<sup>15</sup> Kristus naledi aki ma namlina namkai maika me'e leke ida man holi moiliwi mahuwele noro ida, de hurinohi ik akin ma namlina namkai onne nodi molollo iknik panaeku na'akemeni. Makromod penia napoluwedi ika leke ida man holi moiliwi mahuwele noro ida, ono ik na'akeme kahinuhu kawinawaredi kamwali mahaku me'e. Enla

kamkene kapanak trimkasi Makromod Lalap mamani.

<sup>16</sup> Hurinohi Kristus Lirna man ma'aruru eni nodi molollo iknik honorok panaeku noro iknik hini'i wenewhe mamani. Na'amoli ik ida man wakuku ida, la ida ma nounaku ida kodi woroin nano wawan. Kahinara hanara mazmur, hanara u'uli sasa'a noro hanara namehin man Roh Kudus nala maika. Ik kahinara, kodi ik akin kapanak trimkasi Makromod Lalap.

<sup>17</sup> Lolo ha wo'ira na'akeme man ik wakunu la hi'i, kodi Makromod Yesus Naran. Enla kodi Makromod Yesus Naran kapanak trimkasi iknik Ame, Makromod Lalap, mamani.

*Nounaku man hoedi, tatan'ukun noro ri leleher, ma namwali hophopon wahwahan noro ma namwali makromon*

<sup>18</sup> Maekleher mie, derne makani minim mo'onleher ono maeke ma namwali mahaku noro Makromod nadedem hi'i heheni.

<sup>19</sup> Enla mo'onleher mie, yon modi lir apinpinha minim maekleher enihe, maa maramyak hi mamani.

<sup>20</sup> Tatan'ukun mie, derne makani minim ri leleher manani, ono minim hini'i onne nahuwa'an Makromod akin.

<sup>21</sup> Pap mie, yon modi lir apinpinha kerne dalha mi anumhe mamani, kalo'o hi akin tana.

<sup>22</sup> I walin ma namwali hophopon wahwahan mie! Derne makani mi makromonhe ma aile noho wawan eni rir konomdere na'akeme. Yon lapan hir mai

mene mim howok kokkoo  
leke lernala rir u'uli sasa'a,  
maa modi aki man mou  
howok mamani ono mim  
horhawe Makromod.

<sup>23</sup>Honowok na'akeme mim  
hi'ie, modi aki man mou noro  
minim ruri pe'el na'akeme  
howoke, naise Makromod  
nala honowok onne ki mi, ri  
mormori ka.

<sup>24</sup>Howok wawa'an ono mi  
mauroin na'amoli Makromod  
Yesus mehe nala mi  
wanalhan man Ai na'akenedi  
nala ananhe na'akeme. Yon  
hamlinu Kristus namwali mi  
Makrommu, la mi mamwali  
Nin hophopon wahwahan.

<sup>25</sup>Enla ri man hi'i yaksala,  
an lernala wanalahane nano  
Makromod Lalap ma ka na'il  
ka naloho ri mormori.

## 4

<sup>1</sup>I wal'uhe ma nodi molollo  
ri namehin! Modi mi akim  
ma namdudu hi'i ha man  
wa'an minim hophopon  
wahwahan enihe. Yon  
hamlinu mi Makrommu man  
aile a'am raram.

*Hi'i lir napanak leke am  
lernala kalla loikaru Lira  
Wawa'an eni*

<sup>2</sup>I wal'uhe, yon maprehen  
hi'i lir napanak, la madiyaka  
wawa'an leke mapanak  
trimkasi Makromod  
mamani.

<sup>3</sup>Yon hamlinu hi'i lir  
napanak mayai haenhi, leke  
Makromod Lalap hari kalla  
ai makoto made'ek Kristus  
Nin panaeku man suwsuwar  
nano nonolu eni. Ya aderre  
adaul Kristus Lirneni penia  
kela'u rala laa bui raram.

<sup>4</sup>Ende, hi'iyala lir napanak  
maya'u, leke yon ya amka'uk  
loikaru Lira Wawa'an eni

mouropo, ono ya auroin  
hini'i onne nahuwa'an  
Makromod Lalap akin.

<sup>5</sup>Lere mim pakromo  
noro ri ma akin ka naili'il  
Kristus, yon sopol leken  
paharin onne, ma modi  
woroin ma nano wawan lolo  
minim hini'i wenewhe noro  
wanakunu leke hi rauroin  
inhawa ma namlolo eni.

<sup>6</sup>Mi moro ri namehin  
wakunu, horhawe la nair  
wanakunu lirna man wa'an  
ma nedille akin, la mahi-  
norok wawa'an leke mi mau-  
roin walha rir na'ukankani  
enihe.

*Paulus nin wanakunu man  
horu noro tape masi*

<sup>7</sup>I wal'uhe, ya'u hopon  
Tikhikus ki leke konohi mi  
inhawa ma namwaliyedi  
maya'u eni. Tikhikus  
onne namwali ai walin  
man ai maramyakeni noro  
ainu'u man howok wali ma  
namkene howok Makromod  
Nin honowok eni.

<sup>8</sup>Ya'u hopon an ki konohi  
mi panaeku ma na'ono lolo  
ainim morimori mai eni, la  
an ki leke na'aruri na'alap mi  
akim haenhi.

<sup>9</sup>Ya'u hopon Onesimus  
nore na'alono ki haenhi.  
Onesimus eniyeni nonolu  
minle minim kote. Ai  
namwali ik walin man  
ik karamyaka la ai akin  
namkene naili'il Makromod.  
Hir ki konohi mi inhawa ma  
namwaliyedi mayai mai eni  
me'e.

<sup>10</sup>Aristarkus ma noro ya'u  
minle bui raram, nala nin  
tape masi ki mi. Markus,  
(Barnabas mo'oniwalla ono  
upunhe ra'umo'onwali),  
nala nin tape masi haenhi.

Horhorok inhawa man ya apanakedi nonolu me'e, de lere Markus rakan ki enne, mim kokale noro wawa'an.

<sup>11</sup> Enla Yesus, man rapolu Yustus haenhi, nala nin tape masi ki mi haenhi. Nano ainu'u man howok wali na'akeme ri wokelu onnenihe mehe ramwali ri Yahudi. Hi roro mayai howok wewerre wakuku ri leke hir hurinohi Makromod Lalap nodi molollo hi. Hi ra'alapedi ya akin nammori haenhi.

<sup>12</sup> Tape masi nano Eppras haenhi. Ai onne ma namharedi minim kote, la ai namwali Yesus Kristus Nin hophopon wahwahan man hi'i lir napanak ki mi mamani. Ai napanak an'anchedi leke Makromod Lalap hi'i mi akim namkene naili'il Ai, la hi'i mi mauroin kokkoo Ai Lirna noro honorok akin leke minim morimori namlolo mamani.

<sup>13</sup> Ya'u mehe po'on an howok mamani leke paku mi manin Kolose enihe, noro ik walin manin kota Laodikia noro Hierapolis haenhi.

<sup>14</sup> Dokter Lukas man ik karamyakeni noro Demos rala rir tape masi haenhi.

<sup>15</sup> Malala ainu'u tape masi laa mi wallum ma akin naili'il ma aile Laodikia enihe. Ainin tape masi laa Nimpa noro kerei raramne man pakromo wuku ra'uli rasa'a ik Makromod lolo nin nakar.

<sup>16</sup> Mim lesedi horok eni lolo kerei raramne horu ne, aku wali'ur laa ri Kristen ma aile Laodikia leke hir lese haenhi. Enla ainu'u horok man ya'u

akuwedi laa Laodikia onne, mim lesala haenhi.

<sup>17</sup> Konohi Arkhipus i lir'u eniyeni, "Horhorok! Honowok man om kokaledi nano Makromod onne, hi'i horu!"

<sup>18</sup> *Ainu'u tape masi eniyeni yo odi i lim'u mehe horok.* Ya'u, Paulus, aku ainu'u tape masi ki mi. Yon hamlinu ya'u aile mai bui raram. Na'amoli ik Makromod nala Nin rere'e haharu ki mi.

Ainin tape masi,  
Paulus

# 1 Tesalonika

## *Horok Lirna La'an*

Nonolu eni kota Tesalonika namwali kota ma na'ono lolo propinsi Makedonia. Ma nasala molollo propinsi eni min kota onne. Kota ne'en raram na'akeme lo'o riwan rahu woro'o. Manin lolo onne heruwali ri Yahudi, maa ornoho orrai ma ka namwali Yahudi namansa rehi hi. Ornoho orrai onnenihe hoikani aukerhe noro noho makromon ma ka namlolenihe. Paulus, Timotius noro Silas rodi Yesus Lirna Wawa'an eni loikaru hi, penia heruwali akin naili'il Makromod Yesus (HN. 17:1-4). Maa ka nalo'ol, Paulus noro nin kalla wali enihe lari nano Tesalonika ono ri ma akin ka naili'il Yesus hi'i sus hi (HN. 17:5-10). Lere li'ur, Paulus horhorok walin manin Tesalonika, maa leken kaale de kan laa enne. Ende hopon Timotius laa ka'arale, leke nauroin hi ramkene akin naili'il Yesus, ee ka (1Tes. 3:1-2). Timotius laa Tesalonika wali maiyedi mene Paulus hi'i horok eniyeni.

Paulus nin panaeku ida woro'o aile hi'i horok eniyeni. Ai na'ori honorok manin Tesalonika rir hini'i wenewhe lere min wewerre noro hi (2:1-2). Ai na'alap ri man lernala wewerek pananaka akinhe leke ramkene lernohi Yesus (3:3-5), la wakuku hi hini'i wenewhe man wa'an ri

man lernohi Yesus hi'ie (4:1-10). An nounaku hi yon raprehen howok (4:11-12). Enla an konohi inhawa lo'o namwali ri man lernohi Yesus lere An wali wali'ur mai noho wawan (4:13-17). Lolo horok enie, aki panakan wekel Makromod Yesus Nin maimai onne haenhi (1:9-10; 2:19-20; 3:13; 4:13-17; 5:1-2, 23-24).

## *Horok Ihin*

1. Paulus nala wanakunu man hari horok eni (1:1).
2. Paulus napanak trimkasi Makromod Lalap, la na'uli manin Tesalonika rira hini'i (1:2-3:13).
3. Paulus nala nounaku ma akin naili'il Yesus leke rauroin honoli wenewhe man wa'an (4:1-12).
4. Paulus wakuku hi inhawa ma namwali lere Makromod Yesus mai wali'ur leke ramkene lernohi Yesus (4:13-5:11).
5. Paulus nounaku hi leke ida man mori wawa'an noro ida (5:12-24).
6. Wanakunu man horu noro tape masi (5:25-28).

<sup>1</sup> Horok eni nano ai ri wokelu, Paulus,\* Silas,<sup>†</sup> noro Timotius.

Am aku horok eniyeni laa kota Tesalonika nin kerei raramne ma na'uli la ma nasa'a ik Amad Makromod Lalap, noro ik Makromod Yesus Kristus. Ai mapanak na'amoli Makromod Lalap nala Nin rere'e haharu noro wawa'an rara'e ki mi.

\* **1:1** Paulus namwali man hi'i horok eniyeni, maa wokeluhe lawuku honorok aki loile lolo horok eniyeni. † **1:1** ee Silvanus

*Paulus napanak trimkasi  
Makromod Lalap ono Tesalonika rira morimori man wa'an*

<sup>2</sup> Ai walin na'ahoru, ai mapanak trimkasi Makromod Lalap mamani ono mi akim naili'il Jesus, la am horokala hi'ihewi mim paku ri namehin ono mi maramyaka hi, la hi'ihehewi mi mamkene kerhu kenerne danalhanne ono mamkene lapan Makromod Yesus Kristus wali mai noho wawan wali'ur.

<sup>3</sup> Ai kam hamlinu wekel hi'ihewi ai walinhe howok wawa'an ono mi akim naili'il Jesus, la am horokala hi'ihewi mim paku ri namehin ono mi maramyaka hi, la hi'ihehewi mi mamkene kerhu kenerne danalhanne ono mamkene lapan Makromod Yesus Kristus wali mai noho wawan wali'ur.

<sup>4</sup> Ai mauroin Makromod Lalap naramyaka la niliyedi mi mamwali Nina ri me'e.

<sup>5</sup> Ai mauroin An niliyedi mi ono lere am loikaru Yesus Lirna Wawa'an eni ki mi, ai ka modi wanakunu lirna ma nadedem mehe, maa Roh Kudus nodi molollo mayai penia mi akim naili'iledi kokkoo Lira Wawa'an onne. Enla ai walinhe mehe derne anima wanakunu noro po'on anim morimori lere ai moro mi min wewerre leke paku mi.

<sup>6</sup> Lere ai walinhe kokala Lirna Wawa'an eniyeni, mim mori teunohi anim morimori noro ik Makromod Yesus Nina morimori. Kade rin hi'i sus mi, maa mi akim nahuwa'an lernohi Lira Wawa'an onne ono Roh Kudus nahuwa'anedi mi akim.

<sup>7</sup> Enpenia man lernohi Yesus lolo propinsi Makedonia noro Akhaya na'akeme derne rauroinedi hi'ihewi mi

mamkene akin naili'il Jesus, de hi raram nodi teunohi mi haenhi.

<sup>8-9</sup> Nano mi penia Makromod Lalap Lirna Wawan eni raderre radauledi lolo Makedonia, Akhaya, noro noho-noho namehin man ko'u nano mi. Ende am laa oukida, manin lolo onne kukunohi mayai hi'ihewi mim kokaledi mayai la mi akim naili'iledi Makromod Lalap. Ai kam wakunu haida makun, hir konohi mayai hi'ihehewi ai walinhe sopoledi mormori ma nawauwaur noho momohon, la ma'uli masa'a Makromod Lalap ma namlolo la man mori mamani eni.

<sup>10</sup> Hir konohi ri hi'ihehewi mim newek Yesus, Makromod Lalap Anan, wali mai nano a'am raram haenhi. Ai onne, Makromod Lalap na'amoriyedi wali'ur nano Nina makimaki, la Ai onne penia man huri we'er ika nano Makromod Lalap Nina ahane man werek lere alam An hukum ri na'akeme.

## 2

*Paulus nina honowok lere an minle Tesalonika*

<sup>1</sup> Ai walinhe mehe mauroin nahenia, lere am ka'ar mi nonolu eni, ai kam hi'i honowok ma kan min haida.

<sup>2</sup> Ai walinhe horokala lere ai kam rakan Tesalonika makun, am lernaledi hadwei hadwokor noro apinpinha lolo kota Pilipi. Kade ri nammori ra'okuledi mayai, maa Makromod Lalap na'alapa ai akim penia ai ka mamka'uk loikaru Yesus Lirna Wawa'an eni ki mi.

<sup>3</sup> Enla lere am loikaru Yesus Lirna Wawa'an eni, ai kam lariyala ri lernohi wanakuku man sala, maa ai modi panaeku man wa'an mamani. Ai kam ken kokwudi ri haenhi.

<sup>4</sup> Maa, Makromod Lalap do'on nauroinedi ai honorok akim me'e, de niliyedi mayai loikaru Lira Wawa'an eni. Onne penia ai kam wakunu leke mahuwa'an ri mormori akin, maa am wakunu leke mahuwa'an Makromod Lalap akin, ono Ai penia man koklolo na'inau ik honorok akin.

<sup>5</sup> Ai walinhe mehe mauroin nahenia ai kam kokwudi mi modi wanakunu mamamal, la kam suwar panaeku yaka leke mim kokala mayai de mala minim mahmaha awenne ihin ennen mayai. Ka! Makromod Lalap mehe do'on nauroin ai akim.

<sup>6</sup> Ai ka manoin minim uli sa'a, ee ri namehin nina uli sa'a. Enla ai ka mapanak mi mala haida mayai kade ainim molollo aile ono Kristus mehen kikan mayai mamwali Nin hophopon ma nodi Lirna Wawa'an ki mi.

<sup>7</sup> Lere ai mormoro mi makun, am wakunu modi lira mamamal naise mama man makrana ananne.

<sup>8</sup> Ai maramyaka mi penia ai raram nodi loikaru Makromod Lalap Lirna Wawa'an ki mi. Onne kan mehe maa ai mamkene paku mi lolo minim popono orerekki ono ai maramyaka mi rehi.

<sup>9</sup> Lo'o ai walinhe horhorok lere ai moro mi min wewerre leke loikaru Makromod Lalap Lirna Wawa'an eni, ai

mehem howok lelere a'alam leke yon kerne dalha mi ma'uwara ainima hewhewek nainair.

<sup>10</sup> Lere man laa onne, mi mehe moro Makromod Lalap do'onedi ainima hini'i wenewhe me'e, de mauroin mouropo nahenia am hi'i wewhe na'akeme modi aki man mou la namdudu, de ai kam hi'i yaksalida lolo mi herne kalarna.

<sup>11</sup> Mi mauroinedi haenhi na'ahenia am nounaku mi dohodoho naise papa man nounaku ananne. Ai ma'alapedi mi akim,

<sup>12</sup> la am werre ai akim nounaku mi leke mim hi'i wewhe naise Makromod Lalap Nin ri, ono Ai penia napoluwedii mi mamwali Nin ri leke moro Ai min wewerre Nin noho worworu, la mauroin Nin ke'ek'e'l an'anhe ma narehi ma nalewen.

<sup>13</sup> Ai walin na'ahoru, ai mapanak trimkasi nammori haenhi ono lere am loikaru Makromod Lalap Lirna Wawan ki mi, mim pelek kokale naise Makromod Lalap mehen wakunu, ri mormori ka. Ainima loloi kakaru onne penia namwali kokkoo Makromod Lalap Lirna Wawan man howok lolo mi na'akeme ma akin naili'il Kristus raram.

<sup>14</sup> Ai mauroin ai walin akinhe naili'iledi Makromod Lalap Lirna Wawan kokkoo me'e, ono ha ma namwaliyedi lolo kerei-kerei ma aile Yudea namwaliyedi lolo mi haenhi. Lere mim kokala Lirneni mim lernala wewerek pananaka nano minima noho raramne naise mi lodon walin lolo Yudea

onnenihe lernaledi nano ri Yahudi.

<sup>15</sup> Ri Yahudi onnenihe pena resne Makromod Yesus noro nabi-nabi nonolu eni. Hi rohi mayai nano ainima leke haenhi. Hi ramwali arwali ri na'akeme, la Makromod Lalap kan suk rir hini'i haenhi,

<sup>16</sup> ono hir ewek kawala mayai mamani leke yono loikaru Makromod Lalap Lirna Wawa'an laa ri ma ka namwali Yahudi enihe leke hir lernala or'ori dardari ma kan horu eni. Ende nano nonolu rakan lere eniyeni hirira dohohala eren na'uwalali hehen nanumene Makromod Lalap na'heni, "Nokoredi me'e." Enpenia Ai na'ahan me'e, de ka nalo'olala Ai nala hunukum man werek hi!

*Paulus raram nodi lan ka'arala manina Tesalonika wali'ur*

<sup>17</sup> Lere man laedi eni, ne'e namhene ai moro ai walinhe mahina'arala tarana. Kade ik ida ma nako'uwedi ida, maa ai akim ka nahinuri mi. Am horok mi rehi, de mahehe moro mi pakromala wali'ur.

<sup>18</sup> Memen ai raram nodi wake'e ki ka'arala mi. Maya'u, Paulus, ya'u mehe ahehedi raram rewro'o me'e, maa Hayakyak Makromon kawala mayai mamani.

<sup>19</sup> Ai raram nodi ki ka'arala mi ono rakan Yesus Nin lere alam wali mai polu wuku ika lolo herne kalarna, ai akim nahuwa'an wake'e ono mi mamwali ainim honowok ihin ennen ma namwali ainim ya'ar, la mi mahuwa'an rehi ai akim.

<sup>20</sup> Namlolo kokkoo mi pena ma'alapa la mahuwa'an rehi ai akim.

### 3

*Paulus hopon Timotius wali laa Tesalonika*

<sup>1-2</sup> Ai kam derne haida nano ki mi pena ai kam kerhu me'e ono am horok mi rehi, de ai mala kenekrohu nahenia wa'an rehi ai walin Timotius ki enne, la yo oro Silas mehe minedi mai kota Atena. Ai eni ri man howok Makromod Lalap Nin honowok haenhi, de noro mayai howok wewerre loikaru Kristus Lirna Wawa'an eni. Airo hopon Timotius ki na'alapala mi honorok akin,

<sup>3</sup> leke lere mim lernala wewerek pananaka yon mi akim nado'o. Mi mehe mauroin nahenia ri ma namwali Kristen lo'o lernala wewerek pananaka onnenihe lernohi Makromod Lalap Nin panaeku.

<sup>4</sup> Ler ai mormoro mi makun, am konohiyedi mi me'e nahenia ri man lernohi Yesus lo'o lernala wewerek pananaka. Ai walinhe mauroin ainim wanakunu nonolu onne namlolo, ono mim lernaledi me'e.

<sup>5</sup> Ya'u horok rehi i wal'uhe, pena ya'u hopon Timotius ki enne leke ya auroin nahenia mi akim namkene naili'il Yesus, ee ka. Yonde Hayakyak Makromon ma nadedem ken patal ika, paipudiyedi mi de ainima nahehe rahu loledi leken.

<sup>6</sup> Enimaa ors eni ai walin Timotius waliyedi mai eni nodi lira wawa'an man hi'i ai akim nahuwa'an

rehi. Ai na'heni, "Ik walin manin Tesalonika onnenihe, ramkene akin naili'il Yesus, de ida ma naramyaka ida. Hir horhorok ika mamani, la hi raram nodi roro ika pakromo namnenehe ika raram nodi koro hi pakromo haenhi."

<sup>7</sup> Kade ainima wewerek pananaka nammori, maa lere Timotius konohi mayai mi akim namkene naili'il Yesus kokkoo, onne na'alapedi ai akim me'e.

<sup>8</sup> Ende ai akim nahuwa'anedi ono ai mauroin mi akim ka nado'o, la mi mamkene lernohi Yesus.

<sup>9</sup> Namlolo kokkoo minim hini'i wenewhe onne nahuwa'an ai akim rehi, penia ai mapanak trimkasi Makromod Lalap mamani.

<sup>10</sup> Lelere a'alam ai mapanak an'anchedi Makromod Lalap nala kalla ik pakromo wali'ur leke wakukuwala mi panaeku ma kan mou makun leke ma'alapala mi akim de eren namkene lernohi Yesus.

<sup>11</sup> Ai mapanak ik Amad Makromod Lalap mehe noro ik Makromod Yesus rala kalla ai moro mi pakromala.

<sup>12</sup> Ai mapanak Makromod Lalap huri panaeku man wa'an mi raramne leke ida ma naramyaka ida mamani, la maramyaka ri na'akeme naise ai maramyaka mi eni.

<sup>13</sup> Na'amoli ik Makromod Yesus na'alapa mi akim leke rakan lere Ai noro Nina ri man moumou dewdewe na'akeme mai, mi ma'alehe

yaksalida lolo ik Amad, Makromod Lalap kalarna.

## 4

### *Morimori ma nahuwa'an Makromod Lalap akin*

<sup>1</sup> Ai walin na'ahoru, am loikaru panaeku ida woro'o wali'ur ki mi. Ai mapanak ai walinhе lernohi wanakuku man ai maledi ki mi me'eni. Lolo wanakuku onne am wakuku hi'ihehewi mim mori leke muhuwa'an Makromod Lalap akin. Memen minim morimori wa'anedi me'e, maa lere eni ai modi Makromod Yesus Nin molollo mapanak mim hi'i ha man wa'an narehiyala ikar,

<sup>2</sup> ono mi mauroinedi wanakuku man ai maledi mi modi Makromod Yesus Nin molollo me'e.

<sup>3</sup> Makromod Lalap Nina honorok aki eniyeni: Mim mori moumou dewdewe naise Nin ri An niniliyedi me'e, de yon mim lerwa'u hailai.

<sup>4</sup> Mori wawa'an moro minim maekleher\* lolo Makromod Lalap noro ri mormori herne kalarne.

<sup>5</sup> Yono lernohi minim monmono kamanna holi diwar dawar naise ri ma ka nauroin Makromod Lalap.

<sup>6</sup> Lolo panaeku naise onne, yono mano'onyaka mi wallum man lernohi Yesus enihe rir piki luni. Nonolu ai ma'ori honorok memen mi nahenia ik Makromod Lalap nala hunukum ri man hi'i dohohala naise onneni.

\* <sup>4:4</sup> Ri man wakuku Horok Lapa heruwali ra'heni wanakunu 'mori wawa'an moro minim maekleher' nin panaeku, 'wakuku kalla man wa'an leke madiyaka mi kemen.'

<sup>7</sup> Makromod Lalap ka napolu ika holi diwar dawar, maa polu ika kamwali Nin ri man moumou dewdewe.

<sup>8</sup> Inhoi ma na'okul wanakunu eniyeni, ka na'okul ri mormori, maa ai na'okul Makromod Lalap ma nala Nina Roh Kudus ki mi.

<sup>9</sup> Ai walinhe, lolo ainim horok enie, lo'o kan wa'an am wakuku mi hi'ihewi maramyaka mi wallumhe, ono Makromod Lalap mehen wakukuwed mi leke mi ida ma naramyaka ida.

<sup>10</sup> Memen mi maramyaka mi wallumhe man ler-nohi Yesus lolo Makedonia, maa ai mapanak mi eren mararamyaka hi.

<sup>11</sup> Yom kaile ri namehin nina panaeku, maa ken howok modi minim ruri pe'el aimehi manoin minim morimori akilere lolo kalla ma namrina namkai naise am nouwedi mi me'e.

<sup>12</sup> Lo'o mim mori heheni, mi kam warnala ri nina haida-haida modi ilitolle minim morimori akilere, la ri ma kan lernohi Yesus enihe lo'o horhawa mi.

*Paulus kukunohi inhawa namwali lere Yesus wali wali'ur mai noho wawan*

<sup>13</sup> Ai walin na'ahoru, ainim panaeku lo'o wa'an rehi mi mauroin inhawe namwali mi wallum man maki, leke yono mi akim woir rehi naise ri ma akin ka naili'il Makromod Lalap, la ka rauroin nahenia man maki lo'o mori wali'ur.

<sup>14</sup> Ik akin naili'il Yesus, de kauroin An makiyedi me'e, maa mori wali'ur. Onne penia ik akin naili'il nahenia ri na'akeme ma akin naili'il

Yesus la makiyedi, Makromod Lalap na'amori wali'ur, la nodi hi laa a'am raram leke roro Ai mori wewerre.

<sup>15</sup> Makromod Yesus naledi wanakunu eniyeni mayai: Rakan lere Yesus wali mai, ika man mormori makun enihe laa koro pakromo lolo lanik, maa ika ka kolu ri man makiyedi enihe.

<sup>16</sup> Rakan lere onne, Makromod Lalap Nin uluwakun hophopon a'am raram wakau naruri, la Makromod Lalap Nin trumpet lira, noro wewerre Yesus mehen kopur nano a'am raram. Onne horu, idewe ri Kristen man makiyedi me'enihe ra'amori waliur, ramhara nano rira lunne

<sup>17</sup> nanumene roro maika man mormori makun enihe kikan wewerre, leke ik na'akeme koro Yesus pakromo lolo hulik loiilo, kakam larlari, la koro Ai minwuku laa ewi-ewi.

<sup>18</sup> Ende ai mapanak mi modi wanakunu eniyeni ida ma na'alapa ida akin.

## 5

*Madiyakyaka mi newek Makromod Yesus mai wali'ur*

<sup>1</sup> Ai walin na'ahoru, lolo horok eniyeni ka'u wakunu panaeku ma na'ono ma'anana Yesus wali wali'ur mai noho wawan,

<sup>2</sup> ono mi mehe mauroinedi mouropo nahenia Yesus Nin mamai onne naise ri ma nodi a'alam mai namna'a.

<sup>3</sup> Ler onne ri na'aheni, "Ha wo'ire na'akeme wa'an ra'a, namrina namkaiyedi me'e." Maa lere onne penia

ha man sus narehi duni ta'al ri mormori noho wawan, la ri mahaku kan lernala leken suwar nano dunduni ta'ata'al onne. Mamlilinnohi ha onne namwali naise maeke ma nornoro raramne lernala apinpinha leke karuwana.

<sup>4</sup> Enimaa mi ka mamwali man minle metmetek kalkale, de mi ka mahumarna, kade mamlilinnohi Makromod Yesus mai wali'ur naise ri man mai namna'a.

<sup>5</sup> Ai walin na'ahoru, ik kak minle metmetek kalkala me'e. Ik kak hi'i wewhe naise ri man holi a'alam, maa ik minle ropropeni la hi'i wewhe naise ri man holi lelere.

<sup>6</sup> Ende, yono kaise ri ma namkukuru mamani ono minle metmetek, maa kadiyakyaka ika la kahinorok memen.

<sup>7</sup> Ri ma namkukuru, nadedem namkuru a'alam, la ma nomun manha, nadedem nomun a'alam.

<sup>8</sup> Maa, ika eniyeni minle ropropo de kahinorok memen, leke kamkene lernohi Makromod Lalap, la karamyaka ri namehin, ono ik kauroin kokkoo nahenia ik lernala Makromod Lalap Nina or'ori dardari ma kan horu eni. Onne namwali iknika ilak raa kodi kadiyaka ika leke yon kadiyaur metmetek kalkaleni.

<sup>9</sup> Makromod Lalap kan nili ika leke hukum ika, maa An nili ika leke ik Makromod Yesus Kristus huri we'er ika nano dohohala nin molollo.

<sup>10</sup> An maki nahinerre maika leke rakan Nina lere alam mamai eni, lo'o ik mormori makun, ee ik makiyedi

me'e, ik mori wali'ur koro Ai minwuku.

<sup>11</sup> Ende mi ida ma na'alapa ida akin, la ida ma na'ori honorok ida naise nadedem mim hihi'i eni.

*Paulus nala nounaku ida woro'o wali'ur*

<sup>12</sup> Ai walin na'ahoru, ai mapanak mim horhawe ri man howok lolo mi herne kalarna. Ri onnenihe, Makromod niliyedi leke ramwali man panulu rala wanakuku wanayo'o ki mi.

<sup>13</sup> Mim horhawa hi wawa'an la maramyaka hi modi aki man mou. Mi ida man holi wawa'an noro ida.

<sup>14</sup> Ai mala nounaku ida woro'o wali'ur ai walinhe: Dadiyala ri ma naprehen howok, ma'alapa ri man akin tana, paku ri ma ka naruri, la yono pelek modi ahan ri.

<sup>15</sup> Madiyaka leke yono mi modi ha yakyaka walha ha yakyaka. Mahehe leke ida man hi'i wawa'an ida noro idewe ri heri ri wali.

<sup>16</sup> Ai mapanak mi akim nauhuwa'anedi mamani,

<sup>17</sup> la hi'i lir napanak mamani.

<sup>18</sup> Inhawa-inhawa ma namwali lolo mi, wa'an me yaka, mapanak trimkasi Makromod Lalap. Onne namwali Ainin panaeku ai walinhe ma nadinu'ul nakinaliyedi noro Yesus Kristus me'e.

<sup>19</sup> Yono kawala Roh Kudus Nin honowok.

<sup>20</sup> Yono ma'idaru Makromod Lalap Lirna man rin loikaru ki mi eni,

<sup>21</sup> maa koklolo ma'inau loloi kakaru onne na'akeme leke mauroin ewi man wa'an

noro ewi man yaka. Lernohi  
man wa'an,

<sup>22</sup> la kemenedi man yaka  
na'akeme.

<sup>23</sup> Ya apanak ik Makromod Lalap man hi'i ik akin namkene, hi'i ai walinhe pu'ik heli mehe Ai. Ya apanak An ilitolle mi honorok akin, mi irhum raramne, noro mi ihin kemen leke rakan lere Makromod Yesus wali mai, minim salida kaale.

<sup>24</sup> Makromod Lalap man poluwedi mi me'e, mehen hi'i ha onne namwali, ono Ai namkene hi'i Nin nou na'akeme namwali.

<sup>25</sup> Ai mapanak ai walin na'ahoru, yono hamlinu mayai lolo minim lir na-panak.

<sup>26</sup> Modi ainima tape masi rakanala ai walin ma akin naili'il Yesus na'ahoru lolo onne.

<sup>27</sup> Yo odi Makromod Lalap Nin molollo apanak an'anchedi loikaruwala horok deudeul tantana eni laa ik walin ma akin naili'il Yesus na'akeme.

<sup>28</sup> Ya apanak ik Makromod Yesus nala Nin rere'e haharu ki mi.

Ainima tape masi,  
*Paulus*

## 2 Tesalonika

### *Horok Lirna La'an*

Kerei raramne man minle kota Tesalonika akinhe ka namnehe na'alono panaeku ida woro'o. Hir derne nahe-nia lere man mai Makromod Yesus mai noho wawan wali'ur, maa hi ka rauroin lere onne naise inhawe (2:1-2). Heruwali ra'aheni Yesus mai wali'uredi me'e, la heruwali kar howok haida me'e ono ra'aheni Yesus na'akeki mai me'e, de yon ik howok me'e (3:6, 11-12).

Paulus hi'i horok eni aku laa kerei raramne manin Tesalonika, la nin panaeku hi'i horok rewro'o nineni na'akeki namnenehe noro nin horok dedesne. An ken na'alap hi akin leke hi akin namkene naili'il Yesus lolo rir wewerek pananaka man hir lernala lere onne (1:4-10). An wakuku hi inhawe namwali lere Makromod Yesus mai wali'ur (2:1-12), la an nounaku hi leke hi akin namkene naili'il ik Makromod (2:13-15). An hopon hi yon raprehen howok, maa rampe'el leke lernala hanana'an (3:6-15). Lolo horok eni, Paulus wekel Makromod Yesus Nin mamai wali'ur rew'ira (1:7-10; 2:1-12).

### *Horok Ihin*

1. Paulus nala wanakunu man hari horok eni (1:1-2).
2. Paulus napanak trimkasi, la ai na'alap hi akin leke ramkene lernohi Makromod, kade hir lernala wewerek pananaka (1:3-12).

3. An wakuku hi inhawa ma namwali lere alam ma na'uraniyedi Makromod Yesus Nin mamai wali'ur (2:1-17).
4. Ai napanak manin Tesalonika hi'i lir napanak ai, la nou hi yon raprehen howok (3:1-15).
5. Ai nala hiyene arore noro hi'i lir napanak Makromod nodi nala hi (3:16-18).

<sup>1</sup> Horok eni nano ai ri wokelu, Paulus, Silas noro Timotius.

Am aku horok eniyeni laa kota Tesalonika nin kerei raramne ma na'uli ma nasa'a ik Amad Makromod Lalap, noro ik Makromod Yesus Kristus.

<sup>2</sup> Ai mapanak na'amoli Makromod Lalap nala Nin rere'e haharu noro wawa'an rara'e ki mi.

*Paulus napanak trimkasi Makromod Lalap ono manin Tesalonika rira hini'i man wa'an*

<sup>3</sup> I wal'u na'ahoru, ai mapanak trimkasi mamani Makromod Lalap ono minim hini'i wenewhe man wa'an eni. Memen am hi'i heheni ono mi akim eren naili'il Makromod Yesus Kristus, la mi na'ahoru eren ida ma naramyaka ida

<sup>4</sup> Enpenia lere am lali-wewer Makromod Lalap Nin kerei-kerei ai modi aki ma nahuwa'anedi ma'uli masa'a minim hini'i onne ma'aheni, "Eih! Ik walin manin Tesalonika rira hini'i wenewhe ma'aruru. Kade hir lernala wewerek pananaka, maa ramkene lernohi Makromod

Yesus la akinhe ka rahinuri Ai."

<sup>5</sup> Lere eni mim kerhu wewerek pananaka ono mi mamkene hurinohi Makromod Lalap nodi molollo mi. Maa Makromod Lalap nair minim wewerek pananakeni leke nodi kunukunohi nahenia Nin hono'ok kanail na'akeme namlolo. Mi mamkene kerhu apinpinha eniyeni, penia Ai na'aheni wa'an rehi mi mamwali Nin ri mememen.

<sup>6</sup> Makromod Lalap kukul Nin hono'ok kanail ma namlolo eni ono Ai nala wanahan ri man hi'i sus mi,

<sup>7</sup> la An huriyedi mi noro idewe mayai nano wewerek pananaka haenhi. Ha onne na'akeme namwali lere ik do'on Makromod Yesus noro Nina hophopon man lewlewen enihe kopur nano a'am raram.

<sup>8</sup> Lere onne Ai nodi aiye man lerlere nala hunukum ri ma ka nauroin Makromod Lalap. Ri onnenihe kar derne rakani Makromod Yesus Lirna Wawa'an eni.

<sup>9</sup> Ai lo'o nala hunukum man werek hi laa ewi-ewi, la sopol hi ko'u nano Makromod Lalap miminlole, de kar do'on Nina siksika lerlere me'e.

<sup>10</sup> Ha onne na'akeme namwali lere Makromod Yesus wali mai noho wawan wali'ur. Lere onne Nina pipi unulu wawi tanma'a na'akeme ra'uli rasa'e la rahiylene arore. Lere onne ai walihne moro hi ma'uli masa'a Ai haenhi, ono mi akim naili'iledi Yesus Lirna Wawa'an man am loikaruwedi ki mi me'en.

<sup>11</sup> Onne peni ai kam hamlinu mi, maa hi'i lir napanak Makromod Lalap mamani leke nodi nala mi hi'i wewhe naise ri ma akin naili'il Yesus kokkoo, ono ai Ammu penia napoluwedi mi mamwali Nina ri me'e. Ai mapanak ai Ammu nodi Nin molollo na'akuku na'anokor minim honorok panaeku man wa'an na'akeme, la na'akuku na'anokor Nin honowok man mim hi'i eni ono mi akim naili'il Yesus.

<sup>12</sup> Ai mapanak heheni leke ri na'akeme man po'on rau-roin minim hini'i man wa'an onneni ra'akulu ra'alapa Yesus Oin Naran, la mi naran ra'akulu ra'alapa lolo Ai haenhi. Onneni na'akeme namwali ono Makromod Lalap noro Makromod Yesus Kristus rala rir rere'e haharu ki mi.

## 2

*Paulus wakuku inhawa ma namwali nauranrani Yesus Nin mamai eni*

<sup>1-2</sup> Enla, i wal'uhe, ai mala wanakunu man konohi inhawa ma namwali lere ik Makromod Yesus Kristus wali wali'ur ra'ukwuku ika na'akeme leke koro Ai minwuku laa ewi-ewi. Madiyaka wawa'an ono ri aile ma na'aheni lere Yesus wali mai rakanedi me'e. Ri onne lo'o ra'aheni Roh Kudus kukunohiyedi hi lere onne maiyedi me'e, ee lo'o hir derne onne nano wanakuku namehin, ee lo'o ra'aheni kokaledi horok nano ya'u me'e, maa rira wanakunu onne ka namlolo. Ai mapanak an'anchedi, madiyaka wawa'an leke lo'o mim derne

wanakunu ma ka namlolo  
naisa onne, mi akim ka  
nado'o.

<sup>3-4</sup> Yon pelek derne makani  
lira warna-warna, kalo'o rin  
paipudi mi, ono Yesus Nin  
lere onne kan rakan hehen  
nanumene panaeku woro'o  
eniyeni namwali: Lolo noho  
wawan ri nammori ra'okul  
Makromod Lalap me'e, la Ha  
Man Ailanna Rehi nalhari  
kemen. Ha Man Ailanna  
Rehi onne holi kukulu lalap,  
la na'akulu na'alapa kemen  
narehi ha wo'ira na'akeme  
man ri mormori hoikani  
lolo noho wawan. Ai ka  
namka'uk naikoro Makro-  
mod Lalap Nin Romleu Lape  
raram, la na'aheni, "Ya'u  
penia, Makromod Lalap."  
Ende rakan lere li'ur Ha Man  
Ailanna Rehi onne sopoledi  
laa kawali pire ai porom  
raram.

<sup>5</sup> Yom hamlinu ha wo'ira  
man ya'u konohiyedi mi lere  
ik min wewerre Tesalonika.

<sup>6</sup> Lere eniyeni Ha Man  
Ailanna onne ka nalhari  
kemen makun, la mi mau-  
roiroin inhawa man kawala  
ai. Rakan lere alam Makro-  
mod Lalap niliyedi mene Ha  
Man Ailanna onne nalhari  
kemen.

<sup>7</sup> Lere eni nin ke'ek'e'l  
an'anha man hi'i ri na'okul  
Makromod Lalap Nin keneri  
hono'ok mahan howok suw-  
suwar lolo noho wawan  
me'e, maa man kawala aile  
de ka naruriyala makun.  
Rakan lere man kawala onne  
raledi me'e,

<sup>8</sup> mene ik do'on Ha Man  
Ailanna onne. Lere Makro-

mod Yesus nodi ke'ek'e'l  
an'anha man siksika ler-  
lere wali wali'ur mai noho  
wawan, Ai nodi aran  
nouwesnedi Ha Man Ailanna  
onne.

<sup>9</sup> Ha Man Ailanna onne  
hari mai noho wawan nodi  
molollo nano Hayakyak  
Makromon, de hi'i tanada  
noro ha warna-warna ri  
kan dodo'onnala makun leke  
wukupoho ri.

<sup>10</sup> An nair panaeku ailanna  
warna-warna nodi paipudi  
ri man lolo kalla man mak-  
ileken moluloin. Hir lolo  
kalla onne ono ramhene  
kokala Makromod Lalap  
Lirna ma namlolo ma nala  
or'ori dardari ma kan horu  
hi.

<sup>11</sup> Enpenia Makromod  
Lalap nala hi woroin ma  
ka namlolo wake'e, leke hi  
akin naili'il panaeku ma ka  
namlolo,

<sup>12</sup> la Ai lo'o hukum hi  
onne ono kar lernohi Lirna  
ma namloeni, la hi raram  
nodi rohon panaeku yaka  
mamani.

*Makromod Lalap niliyedi  
mi leke lernala or'ori dardari  
ma kan horu*

<sup>13</sup> I wal'u na'ahoru  
man Makromod Lalap  
naramyaka, ai mapanak  
trimkasi Makromod Lalap  
mamani ono nano lere  
dedesne me'ede, An niliyedi  
mi leke huriyedi mi nano  
dohohala nin molollo.\* An  
huriyedi mi nano dohohala  
nin molollo ono mi akim  
naili'il Lirna ma namloeni,  
la Roh Kudus minle mi

\* **2:13** Wanakunu: 'ono nano dedesne me'ede...kan horu,' tafsiran namehin aile  
haenhi: 'ono An nili mi namwali Nin ri dedesne man An huriyedi nano dohohala  
nin molollo.'

raram de hi'i mi mamwali  
Makromod Lalap Nina ri  
mememen man moumou  
dewdewe.

<sup>14</sup> Enpenia lere mim derne  
makani Lira Wawa'an man  
am loikaru ki mi eni, Makro-  
mod Lalap polu ai walinhe  
leke mim lernala Makromod  
Yesus Kristus Nina or'ori dar-  
dari man ma'aruru narehi.

<sup>15</sup> Ende i wal'uhe, yon mi  
akim nado'o, maa masala  
kerkerhe wanakuku ai ma-  
mala mi lolo wanakunu  
wa'ane me lolo horok wa'an.

<sup>16</sup> Makromod Lalap naledi  
Nin rere'e haharu maika  
me'e, la na'alapa ik akin  
laa ewi-ewi, la hi'i ik akin  
namkene lapan Nin nou ma  
na'heni ik lernala or'ori  
dardari ma kan horu eni.  
Enpenia ya apanak ik Makro-  
mod Yesus Kristus noro ik  
Amad Makromod Lalap

<sup>17</sup> ra'alapala i wal'uhe akin  
leke mi mamkene la minim  
wanakunu noro minim hini'i  
wenewhe wa'an mamani.

### 3

*Paulus napanak manin  
Tesalonika hi'i lir napanak  
ai noro walinhe man lernohi  
Yesus*

<sup>1</sup> I wal'u na'ahoru, i loikaru  
panaeku ida woro'o wali'ur  
ki mi. Ya apanak mim hi'i lir  
napanak mayai, lekpananne  
ik Makromod Lirna Wawa'an  
eni pelek raderre radaul, la  
rin kokale noro wawa'an,  
naise nonolu namwaliyedi ki  
mi me'enii.

<sup>2</sup> Mim hi'i lir napanak  
haenhi leke Makromod Lalap  
nahaledi mayai nano ri man  
ailanna rehi, ono ri heruwali

akin ka naili'il Makromod  
Lalap Lirna eniyeni.

<sup>3</sup> Enimaa Makromod Yesus  
namkene hi'i ha ma nam-  
lolo mamani, de Ai namkene  
hi'i mi akim namkene ler-  
nohi Ai la nadiyaka mi nano  
Hayakyak Makromon.\*

<sup>4</sup> Makromod Lalap na'alap  
ai akim, ono ai mauroin  
kokkoo nahenia mim lernohi  
ainima wanakuku lere eni  
noro lere man mai eni.

<sup>5</sup> Ai mapanak Makromod  
Kristus nodi nala mi leke  
eren mauroroin Makromod  
Lalap Nin rere'e haharu ki  
mi, la hi'i mi akim namkene  
naili'il Ai lere mim lernala  
wewerek pananaka.

*Paulus nou hi nahenia yon  
raprehen*

<sup>6</sup> I wal'u na'ahoru, Makro-  
mod Yesus Kristus nala  
molollo mayai leke am hopon  
mi yon minwuku noro ri  
Kristen ma naprehen ma kan  
lernohi wanakuku wanayo'o  
man ai mala ki mi eni.

<sup>7</sup> Lere ai mormoro mi  
makun, ai ka maprehen  
howok. Ai walinhe mehe  
mauroin nahenia wa'an rehi  
mim hi'ilernohi ainima hini'i  
wenewhe man wa'an onne.

<sup>8</sup> Lo'o ri nala hanana'an  
ai mo'one, am pair. Lelere  
a'alam am howok modi ruri  
pe'el leke yono hi'i sus ri ma-  
haku nano ai walinhe.

<sup>9</sup> Aanim molollo aile hopon  
mi paku mayai, maa ai raram  
nodi kukul mi honowok nair  
man wa'an leke mim lernohi.

<sup>10</sup> Lere ai mormoro mi  
makun onne, ai maledi  
kenekrohu ma na'aheni, "Ri

\* 3:3 ee, nano ha yakyaka

ma namhene howok, yono  
rala banana'an na'an me'e."

<sup>11</sup> Am wakunu heheni  
ono am derne nahenia  
ri ida woro'o nano mi  
eniyeni raprehen howok. Hi  
ramhene tolle rira popono  
orereki, maa lalaa mamai  
wakunu ri namehin nin  
popono orereki mamani.

<sup>12</sup> Makromod Yesus nala  
molollo ai ma'ori honorok la  
hopon ri onne howok nodi  
melina makai, la mehe ra-  
hehe kelen aranne.

<sup>13</sup> Enla mi, ai walinhe  
na'ahoru, yon hurinohi mi  
kemen ma naprehen kawala  
mi de kam hi'i ha man wa'an  
mamani.

<sup>14</sup> Lo'o ri aile ma namhene  
nakani ainim horok eni lirna,  
nakinemen ki mi yon moro ai  
ma'alono leke ai nawawa.

<sup>15</sup> Yom paeku ai onne  
num arwali, maa ma'anou  
ma'anaku ai ono ai penia  
namwali ihum wallum lolo  
ik Makromod Yesus.

*Paulus nin horok lirna  
man horu*

<sup>16</sup> Ya apanak Makromod  
man hi'i ik akin namkene,  
mehe na'akenedi mi akim  
lolo inhawe memehe laa ewi-  
ewi, la norle'ule'u norwali-  
wali ai walin na'ahoru wedi.

<sup>17</sup> *Hiyene arore nano ya'u,*  
*Paulus.* Wanakunu man  
horu eni ya'u mehe horok  
naisa nadedem ya'u hi'i lolo  
ainu'u horok na'akeme, leke  
mi mauroin kokkoo nahenia  
horok eniyeni nano maya'u.

<sup>18</sup> Na'amoli ik Makro-  
mod Yesus Kristus namre'e  
namharu i wal'u na'ahoru.

Ainima tape masi,  
*Paulus*

wanakuku ma namlolo (6:2b-21).

# 1 Timotius

## *Horok Lirna La'an*

Paulusaku horok eni laa Timotius, mo'oni ida ma na'ikaka makun man lernohiyedi Paulus laliwewer noho-noho raderre radaul Yesus Lirna Wawa'an eni (HN. 16:3; 17:14-15; 18:5; 19:22; 20:1-6). Lere Paulus hi'i horok eni, Timotius minle kota Epesus, la Paulus minle Makedonia. Paulus nauroin lo'o nalo'ol mene lernala leken laa kota Epesus, de an hi'i horok eni aku laa Timotius (3:14-15). Lolo horok eni, an hopon Timotius howok Makromod Yesus Nin honowok lolo Epesus (1:3, 18). An hopon kawala ri yon rodi wanakuku ma ka namlolo (1:3-11; 4:1-6). Lolo Epesus ri aile man wakuku ri ha ma na'okul Yesus Lirna Wawa'an eni. Hir wakuku Makromod Lalap Nin keneri hono'ok lirna, maa kar loikaru Lirna onne nin panaeku ma namlolo (1:7-8). Hir wakuku ri: yon ho, la yon ra'an hanana'an heruwali ono luli (4:1-5). Paulus hopon Timotius na'okul rira wanakuku onne.

Onne horu, Paulus wakuku Timotius leke kakar honowok lolo kerei wawa'an. An kakar panaeku naise: hi'i lir napanak (2:1-16), kerei nin man howok nair rir morimori (3:1-13), la rodi kalla man wa'an tolle maeke walwalum ma na'alehe haida-haida (5:3-16). Onne horu, Paulus nou ai leke nin hini'i wenewhe lernohi

## *Horok Ihin*

1. Paulus nala wanakunu lirna man hari horok (1:1-2).
2. Paulus hopon Timotius kawala ri ma nodi wanakuku ma ka namlolo (1:3-20).
3. An konohi ai inhawa hini'i wenewhe man wa'an ri man lernohi Yesus Nin wanakuku wanayo'o hi'ie (2:1-3:16).
4. An hopon Timotius na'okul wanakuku ma ka namlolo (4:1-16).
5. An wakuku Timotius leke ai nauroin kerei raramne rir honoli man wa'an (5:1-6:2a).
6. Ai na'ori honorok Timotius leke nin hini'i wenewhe lernohi wanakuku ma namlolo (6:2b-21a).
7. Paulus nala wanakunu man horu (6:21b).

## *Paulus nala nin hiyene arore*

<sup>1</sup> Horok eni nano ya'u, Paulus. Ya amwali hophopon ma nodi Kristus Yesus Lirna Wawa'an eni ono Makromod Lalap noro Yesus hopon ya'u hi'i heheni. Makromod Lalap penia huri we'er ika nano dohohala nin molollo, la Makromod Yesus Kristus namwali iknik ya'ar.

<sup>2</sup> Ya'u aku horok eni ki o, Timotius. O maise ya an'u mememen ono ik akin naili'il Makromod Yesus Kristus wewerre.

Ya apanak na'amoli ik Amad Makromod Lalap noro ik Makromod Yesus Kristus rala rere'e haharu, ampun, noro wawa'an rara'e ki o.

*Kawala ri ma nala wanakuku ma ka namlolo*

<sup>3</sup> O'irahahe, lere ya amhara Epesus laa Makedonia, ya apanak o mamkene lolo Epesus leke kawala ri wokelu wo'akka ma nodi wanakuku ma ka namlolo. Lere eni ya apanak wali'ur om min lolo onne leke nou hi yon wakuku panaeku onne me'e.

<sup>4</sup> Hopon hi, "Yono derne rakani koirwakar ma ka namlolo, la yon loiwuku opo rara kanakarne ma kan horu!" Ha onne lo'o hi'i ri, ida ma nasesi noro ida mamani. Koirwakar noro opo rara onne kan paku hi'i ri akin namkene naili'il Yesus la lernohi Makromod Lalap Nin honorok panaeku.

<sup>5</sup> Ainu'u panaeku ya ala konomdere onne, leke hi'i ri ma akin naili'il Yesus eni, ida ma naramyaka ida, leke rira raramyaka onne namhara nano akin man mou, nano honorok aki man hi'i ha ma namlolo mamani, la nano aki ma namkene lernohi Yesus mehe.

<sup>6</sup> Ri heruwali kar lernohi kalla ma namlolo onne me'e, maa hi radiyauredi sesi ara noro panaeku ma kan min haida mamani.

<sup>7</sup> Hi raram nodi ramwali meser man wakuku Makromod Lalap Nin keneri hono'ok. Hir pene'ek hir nair wanakuku man ma'aruru rodi ra'amou keneri hono'ok onne, maa hi me'ene ka rauroin keneri hono'ok onne nin panaeku ma na'ono.

<sup>8</sup> Ik kauroin kokkoo nahenia keneri hono'ok onne wa'an, horo ik hi'i wewhe

lernohi Makromod Lalap Nin panaeku ma namlolo.

<sup>9</sup> Yon hamlinu nahenia keneri hono'ok onne nina panaeku ma namlolo, de ka rala leke hukum ri man mori wawa'an, maa rala leke hukum ri man larlewen la ma na'okul keneri hono'ok onneni. Ri onne naise: man hi'i doho-hala, ma ka na'uli nasa'a Makromod Lalap, manina agame kaale, man hadwei hadwokor ha man moumou dewdewe, ma nesne nina ri leleher, ma nesne ri mormori wali,

<sup>10</sup> la ri man hailai, mo'oni ma na'aromseri noro nin mo'oni wali, maeke noro nin maeke wali, man kele ri mormori leke ra'olu, ma napoho, man larlewenedi rira hopo, la inhoi-inhoi ikar man hi'i panaeku kan lernohi wanakuku ma namlolo.

<sup>11</sup> Wanakuku ma namlolo onneni aiyedi lolo Makromod Lalap Lirna Wawa'an man ma'aruru eni me'e. Makromod Lalap Ma Narehi Ma Nalewen, man ik ka'u'uli kasasa'e, nala Lirna Wawa'an onne maya'u leke ya aderre adaurle.

*Paulus napanak trimkasi ono an kokala Makromod Lalap Nina rere'e haharu*

<sup>12</sup> Ya apanak trimkasi ik Makromod Yesus Kristus ono Ai naledi ruri pe'el maya'u odi ilitolle Nin honowok, la Ai nauroin ya amkene howok honowok onneni,

<sup>13</sup> kade nonolu ya a'ihoru a'idaruwedi Ai me'e. Ya'u hi'i sus la hi'i apipinha Nin ri haenhi, maa Makromod Lalap kukuledi Nin aki man

wa'an de nala ampun ya'u, ono lere onne ya akin ka naili'il Jesus makun, de ka auroin inhawe man ya'u hihi'ie.

<sup>14</sup> Kade ainu'u dohohala nammori, maa ik Makromod nala Nin rere'e haharu maya'u narehi. Ya adinu'ul akinaliyedi noro Makromod Jesus me'e, de An hi'i ya akin namkene lernohi Ai la hi'i ya'u aramyaka ri haenhi.

<sup>15</sup> Wanakunu eniyeni ma na'ono la ma namlole, de ik derne kakani! Makromod Yesus Kristus mai noho wawan eni leke huri we'er man hi'i dohohala nano dohohala nin molollo. Enla ya'u eni man hi'i dohohala narehi.

<sup>16</sup> Onne penia Makromod Lalap nala ampun ya'u, leke Makromod Yesus Kristus naira'u amwali tanadida lolo ri na'akeme, leke hi rauroin nahenia Ai kan pelek na'ahan ri man hi'i dohohala narehi. An hi'i heheni leke lo'o ri namehin po'on hi'ihehewi Ai nodi nala ya'u, hi akin naili'il Ai la kokala or'ori dardari ma kan horu eni.

<sup>17</sup> Na'amolia ik horhawe la ka'uli kasa'a Makromod Lalap mamani. Ai penia namwali Rai laa ewi-ewi, Ai onne kan maki, rin kan do'on Ai, la Ai mehe namwali Makromod Lalap man mori laa ewi-ewi. Amin!

### *Timotius nin honowok nair*

<sup>18</sup> Ya an'u, Timotius! Makaniyala ainu'u nounaku ida woro'o. Yon hamlinu nabi-nabi rir nounaku man om kokaledi lere hi ra'alap mi akim lolo

kerei raram nonolu eni. Horhorok nounaku onne leke o mamkene howok Makromod Nin honowok, la mamkene ma'okul ri ma nala wanakuku ma ka namlolo naise ma nasala ke'urauk ramkene rakpali rir arwali.

<sup>19</sup> Madiyaka o memen leke o akim namkene naili'il Jesus la modi honorok aki man mou hi'i ha ma namlolo mani.

Ri heruwali kar ne'en honorok akinhe de kar hi'i ha man mou, penia hi'i hi akin ka namkene naili'il Jesus me'e.

<sup>20</sup> Ri woro'o, Himeneus noro Aleksander, hi akin ka namkene naili'il Jesus me'e, de ya'u hukum hi hurile Hayakyak Makromon nin molollo, leke hir wakuku yon ra'ihoru ra'idaru Makromod Lalap rodi wanakuku ma ka namlolo.

## 2

### *Wanakuku hi'ihehewi ik hi'i lir napanak*

<sup>1</sup> Onne penia ya apanak an'anchedi i wal'uhe man lernohi Yesus na'akeme hi'i lir napanak mamani. Mapanak trimkasi laa Makromod Lalap la mapanak Ai namre'e namharu ri na'akeme.

<sup>2</sup> Mapanak Makromod Lalap namre'e namharu rai-rai noro ma nodi molollo na'akeme leke ik holi namllina namkai, la mori noro akin man mou lolo Makromod Lalap noro ri heri ri wali kalarne.

<sup>3</sup> Panaeku onne peni man wa'an la nahuwa'an Makromod Lalap man huri we'er ika nano dohohala nin molollo akin.

<sup>4</sup> Ai raram nodi huri we'er ri na'akeme nano dohohala nin molollo, la raram nodi ri na'akeme rauroin wanakuku ma namlolo,

<sup>5</sup> ono Makromod Lalap ida mehe, la Ri ida mehe namwali man lolo toro, la man du'ulkali wali'ur ri mormori na'akeme roro Makromod Lalap. Man iuwuku auwuku onne, Makromod Yesus Kristus man mai namwali ri mormori.

<sup>6</sup> Ai nala kemen ri nesne leke na'ohu nahala ri mormori na'akeme nano dohohala noro makimaki nin molollo. Makromod Lalap mehen nili lere alam Yesus nala kemen rin nesne. Nano onne ik kauroin mouropo nahenia Makromod Lalap raram nodi huri we'er ri na'akeme nano rir hunukum makimaki.

<sup>7</sup> Onne penia Makromod Lalap niliyedi maya'u, Nin hophopon ma nodi Yesus Lirna Wawa'an eni, leke ya aderre adaul Lirna Wawa'an eni laa ri ma ka namwali Yahudi. An hopon ya'u wakuku wanakuku ma namlolo leke hi akin naili'il Yesus. Ainu'u wanakunu eni namlolo, ka apoho.

*Mo'oni noro maeke rir honoli wenewhe lolo kerei raram*

<sup>8</sup> I mo'onwal'u, ya apanak nahenia lolo ewi-ewi lo'o mo'oni hi'i lir napanak, hir kikan liman laa wawan rodi aki ma ka nahinuri Makromod Lalap, la yon hi rodi oimahu raramha'a.

<sup>9</sup> Ya'u raram nodi maekenihе nair nainair nodi nohi noho honolla. Yon hir hi'i muruk man hi'i rin po'on mamani, yon nair maha, mutiyara noro nainair man ma'aruru wake'e leke ri namehin ra'uli,

<sup>10</sup> maa ra'akeki rodi honoli man wa'an mamani leke rin po'on rauroin hi akin ka nahinuri Makromod Lalap.

<sup>11</sup> Lere ri ma nodi molollo wakuku loikaru wanakuku, wa'an rehi maekenihе karkaramedi rakani wanakuku onne noro akin ma namdaru.

<sup>12</sup> Ya amhene maeke nodi molollo mo'oni, ee wakuku mo'oni. Wa'an rehi karkaramedi la rakani,

<sup>13</sup> ono dedesne Makromod Lalap umupala Adam onne noluwedì Hawa.

<sup>14</sup> Enla nee lalap kan kokwudi Adam, maa kokwudi Hawa penia larlewenedi Makromod Lalap Nin nou.

<sup>15</sup> Maa maekenihе lernala rere'e harharu lere alam mormoriyana,\* horo nahenia hi akin namkene naili'il Makromod Yesus Kristus, la raramyaka ri namehin, la holi rodi aki man mou lernohi hini'i wenewhe man wa'an.

### 3

*Man leluwai makrana kerei raramne rir honoli wenewhe*

<sup>1</sup> Wanakunu eniyeni namlolo kokkoo: Inhoi raram nodi namwali man leluwai makrana lolo kerei

\* **2:15** Napa'ahne ida woro'o aile: 1) lernala rere'e harharu ono hi ramwali man makrana tatana wawa'an, ee 2) hir lernala or'ori dardari ono mormoriyana Tatana man Kuru Mehe Lai Mehe de herre Hawa nin hini'i onne.

raramne,\* ai raram nodi honowok man wa'an.

<sup>2</sup> Lere mim kikan ri namwali man leluwai makrana lolo kerei, nili ri ma na'alehe tunum desne, hono ida mehe, ma nadiyaka kemen yon hi'i ha yakyaka, la nina hini'i wenewhe noro honorok panaeku ma'aruru, la rin horhawe ono nin honoli man wa'an. Ai akin namrana kokala peina'a, la ai nauroin wakuku ri.

<sup>3</sup> Yono nili ri ma nomun arak manha mamani, la yon nili ri ma nanoin rurilai. Maa nili ri ma nodi ma'urinrinna ma'uwarwara ri namehin mamani, man raram nodi holi namrina namkai, la ma akin ka naili'il kupan.

<sup>4</sup> Nili ri ma nauroin na'akene manaku nina meheromo kaimehi, la man wakuku ananhe leke derne rakani la rahiyene aroro ai.

<sup>5</sup> Lo'o ai ka nauroin na'akene manaku nina meheromo kaimehi, ai ka nauroin na'akene manaku Makromod Lalap Nin kerei raramne haenhi.

<sup>6</sup> Yom nili ri man eni nanumene akin naili'il Jesus leke namwali man leluwai makrana lolo kerei, kalo'o holi kukulu lalapa de Makromod Lalap hukum ai molmolo hukum Hayakyak Makromon.

<sup>7</sup> Nili ri ma nin morimori wa'an, leke lo'o ri ma akin ka naili'il Jesus makun do'onne horhawe. Lo'o nin morimori kan wa'an, rin wakunu nano'onyaka ai, la

lo'o ai nadiyaur Hayakyak Makromon nin konoko wunudi.

*Man paku lolo kerei raramne rir honoli wenewhe*

<sup>8</sup> Man paku lolo kerei raramne<sup>†</sup> wa'an rehi hirira honoli namnenehe noro man leluwai makrana kerei raramne onnenihe. Nili ri man rir honoli wa'an de rin horhawe, ri ma akin mou, ma kan maki kupan, la ma ka nomun arak mamani.

<sup>9</sup> Nili ri ma nodi honorok aki man mou nasala kerk-erhe wanakuku man Makromod Lalap nalhariyedi me'e.

<sup>10</sup> Lo'o ri ka namwali man paku makun, mala honowok namehin ai lolo kerei leke po'onala nin morimori wa'an, ee ka. Lo'o nin morimori wa'an, kikan ai namwali man paku lolo kerei raramne.

<sup>11</sup> Namnenehe onne nili ri ma nin maekleher<sup>‡</sup> namwali ri man wa'an, ma akin mou, ma kan suk naderre nadaul panaeku yakyake mamani, la ma nadiyaka kemen leke yon hi'i ha man namehiyala.

<sup>12</sup> Man paku lolo kerei raramne hono mahaku mehe. Ai nauroin tolle ananhe la na'akene manaku nina meheromo kaimehi wawa'an.

<sup>13</sup> Lo'o hir paku wawa'an lolo kerei raramne, ri nahiylene aroro hi, la hi ka ramka'uk wakunu hi'ihehewi hi akin naili'il Makromod Jesus Kristus haenhi.

\* **3:1** Wanakunu: 'man leluwai makrana kerei raramne' herre wanakunu 'penatua'. † **3:8** Wanakunu: 'man paku lolo kerei raramne' herre wanakunu 'diaken'. ‡ **3:11** 'ri ma nin maekleher', napa'ahne namehin na'ahenia, 'Maeke man paku hi lolo kerei raramne.'

*Makromod Lalap nalahari  
wanakuku ma namlolo*

<sup>14</sup> Timotius, ka nalo'ol me'e ya'u raram nodi ki ka'ar o, maa na'amolia ya'u hi'i horok eni aku ki o nanu,

<sup>15</sup> leke lo'o ka'u pelek ki enne, mauroin honoli wenewhe man wa'an ri ma namwali Makromod Lalap Nina nakar raramne lernohie. Hi penia ramwali Makromod Lalap man mor-mori laa ewi-ewi Nin kerei raramne. Hi rasala Makromod Lalap Nin wanakuku ma namlolo. Hi akin namkene naili'il la radiyaka wanakuku onne leke yon ri mahaku herre.

<sup>16</sup> Memen Makromod Lalap Nin panaeku man ma'aruru wake'e. Nano nonolu eni ri ka nauroin Nin panaeku onne, maa lere eni Makromod Lalap nalhariyedie maika me'e. Eniyeni namwali panaeku ma na'ono nano Nin panaeku man ma'aruru onne:

Makromod mai nalhariyedi kemen namwali ri mormori.

Roh Kudus na'amou na'ropedi Ai leke ri nauroin Ai onne inhoi, la hophopon a'am raram meher do'odo'on Ai.

Ri naderre nadauledi Ai Naran lolo noho-noho laa ri ma ka nauroin Ai makun.

Lolo noho wawan na'akeme ri akin naili'iledi Ai, la Makromod Lalap kikanedi Ai laa a'am raram me'e.

**4**

*Paulus na'ori honorok  
Timotius na'okuledi ri man  
wakuku wanakuku man sala*

<sup>1</sup> Roh Kudus na'amou na'ropo inhawa lo'o namwali lere alam man horu. Lere onne ri heruwali akin ka naili'il Makromod Yesus Nin wanakuku me'e, maa hir derne rakani roh-roh yakyaka ma napoho noro hayakyaka rira wanakuku.

<sup>2</sup> Ri ma nodi wanakuku onne, poho pailili la naman nahanhana. Hi honorok akin makiyedi me'e, de ka rahiyyennala hini'i man sala me'e.

<sup>3</sup> Hir wakuku ri, yon ho, la yon ra'an hanana'an heruwali. Kade Makromod Lalap nala hanana'an na'akeme leke ra'an, maa hi ra'aheni hanana'an onne luli ra'an. Ika ma akin naili'il Makromod Yesus Kristus la ma nauroin Nina wanakuku ma namloeni, kauroin Ai nala hanana'an na'akeme ik ka'an kodi honorok aki ma napanak trimkasi Makromod Lalap.

<sup>4</sup> Hahaa na'akeme man Makromod Lalap hi'i onne penia wa'an, la hanana'an man luli kaale, horo ik kokala kodi honorok aki ma napanak trimkasi Makromod Lalap,

<sup>5</sup> ono Makromod Lalap Lirna Wawan noro lir napanak hi'i hanana'an na'akeme wa'an.

<sup>6</sup> Lo'o o ma'ori honorok ik walin ma akin naili'il enihe ha onne na'akeme, o mamwali Makromod Yesus Kristus Nina man howok man wa'an, la ma'uraram o

akim noro Makromod Lirna man ik akin naili'il eni, la noro wanakuku ma namlolo man om lernohiyedi nalo'ol me'e.

<sup>7</sup> Yon sopol leken rawalha lira koirwakar ma ka namlolo noro wanakunu ma kan paku ri akin naili'il Makromod. Ma'akene o akim leke namkene naili'il Makromod Lalap.

<sup>8</sup> Lo'o ik ka'akene ik kemen leke karuri, onneni paku maika tarana, maa lo'o ik ka'akene ik akin leke namkene naili'il Makromod Lalap, onne paku maika nammori. Ik lernala wawa'an rara'a lere eni noro lere man mai haenhi.

<sup>9</sup> Wanakunu eniyeni, ha ma namlolo, de wa'an rehi ik na'akeme kokale la ik akin naili'il.

<sup>10</sup> Ik akin naili'il Makromod Lalap man mormori laa ewi-ewi, la ma namwali Rai man huri we'er ri mormori na'akeme nano dohohala nin molollo, rehirehi ri man akin naili'il Ai. Eni penia ik kahehe howok kodi iknik ruri pe'el na'akeme.

<sup>11</sup> Wakuku hi panaeaku onne na'akeme, la hopon hi lernohie.

<sup>12</sup> Hi'i ha man wa'an leke yon rin po'on lewen o ono ma na'ikaka o makun, maa mamwali man kuku kalla wawa'an laa ik walin ma akin naili'il enihe. Wakuku hi lolo o nuran wonohirn la namal panaitne, noro onum hini'i wenewhe, lolo onum re'e raramyaka, noro akin ma namkene naili'il Makromod Yesus, la lolo numa morimori man moumou.

<sup>13</sup> Yon ren lese Makromod

Lalap Lirna Wawan lolo kerei raram, la yon ren wakuku la loikaru Yesus Lirna Wawa'an eni hehen nanumene ya'u rakan ki enne.

<sup>14</sup> Yon maprehen modi woroin Roh Kudus naledi ki o howok num honowok onne. Ai naledi woroin onne lere nabi enihe wakunu ha ma namwali o kemmu, la man leluwali makrana lolo kerei enihe parhu liman ki o.

<sup>15</sup> Yom ren ilitolle panaeaku enihe na'akeme. Yon maprehen howok onuma honowok, leke rin po'on numa honowok nala'a kalalari.

<sup>16</sup> Madiyaka num hini'i wenewhe noro numa wanakuku. Ilitolle numa honowok na'akeme, ono nano num hini'i eni peni Makromod Lalap nala or'ori dardari ki o moro ri man derne nakani o haenhi.

## 5

*Rala nounaku kerei raramne leke ida man mori wawa'an noro ida*

<sup>1</sup> Yono modi lir apinpinha wakuku mo'oni man anulu ki o, maa modi lira mama-mal ma'alapa hi akin naisa moro onum pape wakunu. Ma na'ikaka enihe, mapolu hi naise mo'oniwallumhe.

<sup>2</sup> Maeke man anulu ki o, mapolu hi naisa num mame. Maekrara enihe, mapolu hi naise narumhe modi aki ma namdudu.

<sup>3</sup> Horhawa la ilitolle maeke walwalum ma na'alehe ihin walau man tolle hi.

<sup>4</sup> Maeke walwalum ma upun anan aile, na'amoli ai upun anan lernohi agame

nin holoor halauk de tolle mam onne. Lo'o hir hi'i onne hir walha rir ri leleher noro upun rira wawa'an. Onne penia nahuwa'an Makromod Lalap akin.

<sup>5</sup> Maeke walwalum ma namlolo kokkoo memehe ono na'alehe ihin walan, ai akin naili'il kokkoo de nauroin Makromod Lalap raram nodi paku ai. Lelere a'alam an hi'i lir napanak Makromod Lalap la ai napanak An ilitolle ai.

<sup>6</sup> Maa, maeke walwalum ma nin morimori nano'in wawa'an mamani, kade ai kemen mormori makun, maa honorok akin makiyedi me'e.

<sup>7</sup> Loikaru panaeku eni hi leke rira morimori wa'an, la ra'alehe yakyaka salsala.

<sup>8</sup> Maa lo'o ri ma kan tolle ihin walinhe, rehirehi ainina meheromo, ai onne kan lernohi Yesus Kristus me'e, la nin sala werek narehi nano ri ma akin ka naili'il Makromod Yesus.

<sup>9</sup> Horok maeke walwalum naran ma nin anna welineme laa wawan lolo kerei nin horok leke kerei ilitolle, horo nahenia hir ho raram mehe,

<sup>10</sup> la ri heri ri wali po'on rira morimori wa'an mamani. Ende hir hi'i ha naise: tolle ananne wawa'an, kokala peina'a noro wawa'an, ilitolle walin man akin naili'il Yesus, paku ri man lernala sus, la radedem hi'i hahaa man wa'an.

<sup>11-12</sup> Maeke walwalum ma nina anna kan rakan welineme makun, yon horok naran lolo horok onne raram, ono lo'o hirira

kamanne hohoo kan horu makun de hir ho wali'ur. Lo'o hir hi'i heheni, hir sala ono larlewenedi rir nou nahenia hir howok Kristus Nin honowok mehe.

<sup>13</sup> Onne kan mehe, lo'o hi ramwali ma naprehe la hir lalaa mamai nakar laa nakar wakunu nano'onyaka ri la rakani ri namehin nin panaeku, de hir wakunu ha ma kan wa'an mamani.

<sup>14</sup> Onne peni ya'u nounaku maeke walwalum ma ka na'ileher makun, ho, moriyana, tolle meheromo kaimehi, leke yon nala leken ri ma kan suk ika wakunu nano'onyaka ika man lernohi Kristus.

<sup>15</sup> Ya aheni heheni ono maeke walwalum heruwali hi akin ka namkene naili'il Yesus de lernohiyedi Hayakyak Makromon me'e.

<sup>16</sup> Lolo ri Kristen enihe, lo'o ma namwalum aile lolo rira meheromo, hi peni man ilitolle, leke yono namwali yodiwara lolo kerei raramne. Hi'i heheni leke kerei raramne paku ilitolle maeke walwalum ma namlolo kokkoo na'alehe ri man ilitolle.

<sup>17</sup> Man leluwai makrana enihe man tolle kerei nin honowok nair wawa'an, wa'an rehi lernala honoor hanawa man wa'an noro naiwe'el man noknokor, rehirehi man leluwai makrana ma nampe'el wakuku la naderre nadaul Makromod Lalap Lirna Wawan eni.

<sup>18</sup> Hi'i heheni ono lolo Horok Lap Lirna aile ma na'ahenia, "Sapi man hamar gandum ihin nano lollo, yono pasun nuranne kawala

ya'ane." Horok aile haenhi ma na'aheni, "Yon mamhene mala naiwe'el ri man howok num honowok." \*

<sup>19</sup> Lo'o rin tumdesne man leluwai makrana lolo kerei ida, yon pelek kokale, kokoko ri woro'o wokelu man do'on mouropo aile. \*

<sup>20</sup> Lo'o an hi'i sala, dadiyala ai lolo kerei raramne kalarna leke, ri namehin ma akin naili'il Yesus enihe ramka'uk.

<sup>21</sup> Timotius, ya apanak an'anchedi ki o, lernohi ainu'u nou eniyeni na'akeme, la yon ma'ili maloho ri lolo minim hini'i wenewhe onne. Horhorok! Makromod Lalap noro Makromod Yesus Kristus noro hophopon a'am raram man niliyedi enihe mahar po'on ika.

<sup>22</sup> Yom pelek ma'ono ri namwali man leluwai makrana lolo kerei. Yom lernohi ri namehin nin dohohala. Madiyaka o memen leke num morimori na'amoli moumou dewdewe.

<sup>23</sup> Yono momun oir mehe, maa momunala anggur tarana haenhi, leke yon konoum apinha.

<sup>24</sup> Ri heruwali rira dohohala, heri rauroin mouropedi me'e, kade kar ho'ok kail makun. Enimaa ri namehin rir dohohala, rakan Lere Alam Hono'ok Kanail mene heri do'on rauroin.

<sup>25</sup> Eni namnenehe ri namehin aile man hi'i ha wawa'an, pelek ri nauroin. Enla ri heruwali aile man rira hini'i wenewhe wa'ane, maa ri kar pelek do'on. Rakan lere man mai mene hir do'on rauroin.

## 6

<sup>1</sup> Ri Kristen ma namwali ri nin hophopon, rahiylene aroro makromon leke yono ri namehin na'ihoru na'idaru Makromod Lalap Oin Naran noro Nin wanakuku.

<sup>2</sup> Lo'o hi makromon namwali ri Kristen, yon hi'i de kar horhawe de lolo akinhe ra'aheni, "Ya'u raram ka nodi makrom'u nin honopon ono ik kamwali Kristen wewerre." Man wa'an narehi hir derne rakani rir makromon eren wawa'an, ono hi raramyaka makromon man hir ilitolle onne, la hi akinhe naili'il Yesus haenhi.

*Wanakuku ma ka namlolo  
noro linikir kanaru ma namlolo*

Timotius, wakuku ri wanakuku eni na'akeme la ma'alapa hi akin leke ramkene lernohie.

<sup>3</sup> Ri man wakuku wanakuku namehin, la akin ka nala ik Makromod Yesus Kristus Nin wanakuku ma namloleni, la akin ka nala agame nin wanakuku ma na'ono,

<sup>4</sup> ai onne man holi kukulu lalapa, la nin woroin kan min haida. Nin honorok panaeku man wa'an kaale, penia nanoin sesi ara la nawalha lira lolo panaeku mamani. Onne penia nakoko ida ma akin apinha ida, ida ma nawalha lira noro ida, ida man wakunu nano'onyaka ida, ida man tumdesne ida,

<sup>5</sup> la sesi ara ma na'alehe honon. Ri onnenihe honorok

\* 5:18 Ul. 25:4 \* 5:19 Ul. 17:6, 19:15

ka namlolo me'e, de hamlinuwedi wanakuku ma namlolo me'e. Hir pene'ek agame nala kalla hi leke karu.

<sup>6</sup> Memen agame nala kanaru man lapa narehi, horo nahenia ik akin namkene noro iknik ha wo'ira man ik mananarneni.

<sup>7</sup> Lere ika mai noho eni wawan ka kodi haida-haida, la lere ik kamhara noho wawan eniyeni ka kodi haida-haida haehni.

<sup>8</sup> Ende lo'o iknik hanana'an noro nainair aile, onneni nokoredi me'e.

<sup>9</sup> Maa, ri man suk namwali orkanaru, pelek radiyaur lolo kenene panatal, la hi ka rahinuri noro rira suk ma kan min haida, ma nano'onyaka rir morimori la hi'i mayo'ohe.

<sup>10</sup> Lo'o ri namono kupan mamani, hini'i wenewhe man ailanna rahue namhara ai honorok akin. Ri heruwali aile ma nanoin kupan mamani, penia kar lernohi Jesus Nina wanakuku me'e, la hir lernala wewerek pananaka man hi'i hi akin woir.

*Paulus na'anou na'anaku Timotius*

<sup>11</sup> Maa, ki o, Timotius, o mamwali Makromod Lalap Nina ri. Ende mako'uwedi hini'i wenewhe man yaka onne. Mahehe hi'i ha man wa'an la ma namlolo. Pu'ik heli mehe Makromod Lalap. Ma'alap o akim namkene naili'il Makromod Kristus, la maramyaka num ri mormori wali. Madiyaka o akim leke namkene lolo wewerek pananaka la yon pelek modi lir apipinha ri namehin.

<sup>12</sup> Mahehe kokkoo leke akim namkene naili'il Yesus, la masala kerkerhe or'ori dardari ma kan horu man Ai naledi ki o me'eni. Yon hamlinu Makromod Lalap napolu o leke lernala or'ori dardari eni lere o ka mamka'uk ma'aheni o akim naili'il Makromod Yesus lolo heri kalarna.

<sup>13</sup> Ende ya'u hopon o lolo Makromod Lalap ma nala or'ori ha wo'ira na'akeme kalarna, la lolo Makromod Yesus Kristus ma nala kunuku maka ma namlolo laa Pontius Pilatus kalarna,

<sup>14</sup> leke om lernohi Makromod Lalap Nin konomdere eni modi aki man mou. Ya'u hopon o hi'i ha man wa'an mamani leke yon ri mahaku po'on om hi'i haida man sala hehen nanumene rakan lere ik Makromod Yesus mai wali'ur.

<sup>15</sup> Lere alam An wali mai onne, Makromod Lalap mehe nala nelu lere. Makromod Lalap onne, ik ka'uli kasa'a, la Ai mehe nodi molollo na'akeme. Ai namwali Rai man kulu narehi lapa narehi rai na'akeme, la Makromon man kulu narehi nano makromon na'akeme.

<sup>16</sup> Ai mehe, makimaki ka nodi molollo, la An minle siksik lerlere raram, de ri mahaku kan paekunala wakuranie. Nano lere dedesne rakan lere man horu, ri mormori me'ene kar do'on Ai. Na'amoli ri na'akeme lo'o rahiylene arore, la Ai penia nodi molollo laa ewi-ewi. Amin.

<sup>17</sup> Ma'ori honorok ri orkanaru man minle noho wawan leke yono holi kukulu

lalapa, la yono hir nenhe rira  
 kanaru mehe ono kanaru  
 onne me'e'eni horuwedi.  
 Maa nenhe mehe Makromod  
 Lalap ma nala ha rahu maika  
 leke ika holi noro wawa'an.

<sup>18</sup> Nounaku hi hi'i wewhe  
 ha man wa'an mamani, rodi  
 aki man wa'an paku ri ma  
 na'alehe, la yono sorno.

<sup>19</sup> Lo'o hir hi'i ha man  
 wa'an heheni, hir loiwuku  
 kanaru ma na'akene manaku  
 rakan lere man mai. En-  
 leke hir lernala morimori  
 ma namlolo la man wa'an  
 narehi.

<sup>20</sup> Timotius, Makromod  
 Lalap naledi Nin wanakuku  
 ma namlolo eni ki o, de  
 madiyake wawa'an leke  
 yon ri mahaku herre.  
 Mako'uwedi nano ri man  
 wakuku wanakuku ma kan  
 min haida, la mako'uwedi  
 nano wanakuku ma na'alehe  
 Makromod Lalap Nin  
 wanakuku ma namlolo. Ri  
 ma nala wanakuku onne  
 pene'ek hi rauroin narehi  
 ri namehin, maa rir woroin  
 onne ka namlolo.

<sup>21</sup> Ri heruwali man lernohi  
 woroin ma ka namlolo onne,  
 sopoledi hi akin ma naili'il,  
 la kar lernohi Yesus Nin  
 wanakuku wanayo'o me'e.

Na'amoli Makromod Lalap  
 nala Nin rere'e haharu ki mi  
 na'ahoruwedi.

Ainu'u tape masi,  
*Paulus*

## 2 Timotius

### *Horok Lirna La'an*

Nano Paulus nin horok lolo Horok Lapeni na'akeme, an hi'i horok eniyeni kauli'ur wake'e. An hi'i horok eni lere min bui raram lolo kota Roma (1:8; 16-18; 2:9). Ai nauroin nahenia lo'o ka nalo'olala hir hukumesne ai (4:6), de an hi'e aku laa Timotius. Timotius eni ma na'ikaka ma namwali Paulus nin man howok walie. Ainin honowok namwali man leluwai makrana lolo kerei raramne ma aile kota Epesus.

Lolo horok eniyeni Paulus nala nin napanak man horu laa Timotius. Ai napanak Timotius pelekleke mai ka'ar ai (4:9, 21), ono an horokedi ai me'e (1:3-5). Paulus na'alap ai akin leke an hi'i wewhe Makromod Nin honowok nodi aki man mou (1:6-7), leke an wakuku hi wanakuku ma namlolo (1:13; 2:2; 3:14), la dadiyala ri ma nodi wanakuku ma ka namlolo (2:14, 16-18). Ai na'alap ai akin leke nampe'el naderre nadaul Yesus Lirna Wawa'an, la hi'i wewhe Makromod Nin honowok na'akeme haenhi (4:1-2).

Lolo horok enie, Paulus wekel ri woro'o man rodi wanakuku ma ka namlolo. Rir wanakuku na'ahenia, "Lere ri na'akeme man makiyedi la mori wali'ur onne namwaliyedi me'e," (2:17-18). Rir panaeku heheni: Makromod Lalap nala or'ori dardari worworu huri ika raram lere ik holi mai noho wawan eni

mehe, maa Ai ka na'amori ika wali'ur lere ik maki. Paulus na'okul hi na'aheni rir wanakuku onne ka namlolo. Lere man mai, Makromod na'amori wali'ur ri na'akeme nano makimaki enie. (Po'on 1Kor. 15:12, 19-23; 1Tes. 4:16-17 haenhi.)

### *Horok Ihin*

1. Paulus nala wanakunu man hari horok (1:1-2).
2. Paulus napanak trimkasi laa Makromod Lalap ono Timotius akin naili'il wawa'an Yesus (1:3-5).
3. Ai na'alapa ai akin leke howok wawa'an Makromod Nin honowok (1:6-4:8).
4. Ai napanak Timotius pelek mai ka'ar ai (4:9-15).
5. Kade Paulus min bui raram la ka nalo'olala lo'o hukumesne, maa ai nauroin Makromod Lalap kan huri we'er ai (4:16-18).
6. Paulus nala nin tape masi (4:19-22).

### *Paulus nala nin hiyene arore*

<sup>1-2</sup> Konohiyala Timotius! Ya'u, Paulus hi'i horok eni aku ki o ma namwali ya an'u man ya aramyaka rehi. Makromod Lalap Nin raram nodi kikan ya amwali Nin hophopon ma nodi Yesus Kristus Lirna Wawa'an eni leke loikaru Nina nou ma na'ono. Nano nou onneni ik kauroin ik lernala or'ori dardari ma kan horu ono Yesus Kristus du'ul kaliyedi ik koro Ai me'e.

Timotius! Ya apanak ik Amad Makromod Lalap,

noro ik Makromod Yesus Kristus rala rere'e haharu, ampun, noro wawa'an rara'e ki o.

*Paulus na'alapa Timotius akin leke namkene naili'il Yesus*

<sup>3</sup> Ya apanak trimkasi laa Makromod Lalap man ya a'uli ya asa'a odi honorok aki man mou, naise yu up'u ya a'uhe ra'uli rasa'e nonolu eni. Ya apanak trimkasi laa Makromod Lalap mamani, la ka'u hamlinu wekel o naran lelere a'alam lolo ainu'u lir napanak onne.

<sup>4</sup> Ya'u ka'u hamlinu num mak'oир man dupue, de ya'u raram nodi rehi ik pakromo wali'ur leke ya akin nahuwa'anala.

<sup>5</sup> Ya'u horhorok o akim ma namkene naili'il kokkoo Makromod Yesus Kristus. O upum Lois, noro o inum Eunike akin naili'il Ai kokkoo haenhi, la ya auroin o akim namkene naili'il Ai naise hi.

<sup>6</sup> Onne penia ya a'ori honorok o, Timotius, ma'alapa o honorok akim leke mampe'el howok honowok modi woroin Makromod Lalap naledi ki o me'e. Ai nala woroin onne ki o lere ya ala i lim'u parhu o uluwakun wawan.

<sup>7</sup> Yono mamkauk hi'i honowok onne ono Makromod Lalap naledi Nin Roh Kudus maika, la kan hi'i ik kamka'uk, maa Ai nala ruri pe'el maika leke ik kampe'el howok, la ik kararamyaka ri namehin, la ik kadiyaka ik kemen yon hi'i ha man yaka.

<sup>8</sup> Ende yono mawawa konohi ri inhawa ik Makromod hi'iyedi me'e, la yono mawawa maya'u ono ya'u ai bui raram! Ya'u peni min bui raram ono yo odi Makromod Lalap Lirna Wawa'an eni! Ende modi molollo Makromod Lalap nanala ki o, leke o mamkene lernala wewerek pananaka ono loikaru Lirna Wawa'an eni naise maya'u.

<sup>9</sup> An huri we'eredi ika nano dohohala nin molollo la niliyedi ika kamwali Nina ri mememen. Ai kan hi'i onne ono ik hi'i ha man wa'an, maa An hi'i onne lernohi Nin re're'e haharu noro Nin panaeku aimehi. Ai kan hi'i noho wawan makun, An paekuwedi nala leken maika leke koro Yesus kadinu'ul kakinali me'e.

<sup>10</sup> Enla lere eni Ai na'amou na'aropedi Nin panaeku onne lolo ik Makromod Yesus Kristus Nin mamai eni. Kristus eni peni namwali Rai Ma Nala Or'ori Dardari maika, la ma na'ahoruwedti makimaki nina mololle, la lolo Ai Lirna Wawa'an eni Ai nalhari Nin or'ori dardari ma kan horu eni.

<sup>11</sup> Onne penia Makromod Lalap niliyedi ya amwali Yesus Nin hophopon noro idewe meser leke ya'u loikaru Lirna Wawa'an eni.

<sup>12</sup> Onne penia ya'u lernala apipinha minle bui raram, maa, ka awawa, ono ya auroin Inhoi ya akin naili'il, la ya auroin Ai penia nodi molollo nadiyaka inhawa Ai nanala maya'u\* hehen

\* **1:12** 'Nadiyaka inhawa Ai nanala maya'u', ee 'Nadiyaka ya'u ono ya ala ainu'u morimori Ai'.

nanumene rakan lere alam  
man horu eni.

<sup>13</sup> Timotius, masala  
kerkere wanakuku ya a'ala  
ki o eni. Ainu'u wanakuku  
ma namlolo onne namwali  
panaeku man kuku kalla  
ki o. Ma'alapa o akin leke  
namkene naili'il Yesus la  
maramyaka ri namehin, ono  
Yesus Kristus du'ul kaliyedi  
ika leke koro Ai kamwali  
mahaku me'e.

<sup>14</sup> Modi Roh Kudus Nin  
molollo man minle ik hon-  
orok akin, madiyaka ha-  
haa man Makromod Lalap  
nanala ki o wawa'an, la yono  
hurinohi ri namehin herre.

<sup>15</sup> O mauroinedi me'e  
nahenia ri man min lolo  
propinsi Asia na'akeme  
ramhenedi ya'u me'e, Figelus  
noro Hermoganes haenhi.

<sup>16-18</sup> Maa, Onesiforus  
onne, lere romromo an mai  
na'alapa ya akin lolo bui  
raram. Ai ka nawawa de  
man ka'ara'u. An rakan mai  
Roma, ai nahehe nanoin  
ya'u hehen nanumene am  
pakromedi. Enla o, Timo-  
tius, mehe mauroinedi  
me'e nahenia an paku ya'u  
nammori lere ya'u minle  
Epesus makun. Ende ya  
apanak Makromod Lalap  
nodi nala nina nakar raram  
na'akeme, la na'amoli An  
kukul Nin aki man wa'an  
Onesiforus rakan lere alam  
An ho'ok kail ri mormori  
na'akeme.

## 2

*Lernohi Yesus Nin honoli  
wenewhe*

<sup>1</sup> Enpenia ya an'u, Timo-  
tius, ma'alapa o akim leke

mamkene howok num hon-  
owok eni, ono Makromod  
Yesus Kristus nala Nin rere'e  
haharu ki o.

<sup>2</sup> Nonolu om dernedi  
ainu'u wanakuku rahu eni  
lolo ri nammori kalarna  
me'e. Ende modi wanakuku  
onne wakuku wawa'an ri  
man o akin nale, ono mau-  
roin rira woroin noknokor  
la hi ramkene wakuku ri  
namehin wali'ur.

<sup>3</sup> Om hi'i wewhe Yesus  
Kristus Nina honowok naise  
ke'urauk man wa'an, de  
moro mayai mamkene kerhu  
wewerek pananaka.

<sup>4</sup> Nadedem ma nasala  
ke'urauk tolle mehe  
ke'urauk nin honowok leke  
nahuwa'an nin uluwakun  
akin, ka nodi honowok  
namehin na'uwali.

<sup>5</sup> Lolo na'aroromo ida,  
ma na'aromo lernohi  
na'aroromo onne la'an,  
kalo'o rakan ra'ohikuli  
na'aroromo ennen, kar  
lernala haida-haida.

<sup>6</sup> Enla ri man howok  
Makromod Nin honowok  
naho'ok naise man howok  
kirna ida. Lo'o ai nampe'el  
howok kirna rakan nina  
yare, ai peni dedesne man  
lernala kirne raramne.

<sup>7</sup> Loi honorok wawa'an  
ainu'u wanakunu eni.  
Makromod lo'o hari i wal'u  
honorok akin leke mauroin  
ha wo'ira enihe.

<sup>8</sup> Horhorok Yesus Kristus,  
Daud Upun Anan onne. An  
makiyedi, maa Makromod  
Lalap na'amori wali'ur.  
Panaeku eniyeni namwali  
Lira Wawa'an ya aderre  
adaul laa ri.

<sup>9</sup> Onne penia rin kela'u,  
dasle, rala laa bui raram  
naise ri man ailanna, maa

Makromod Lalap kan huri ri mahaku dasle Lirna Wawan, de raderre radaul mamani.

<sup>10</sup> Enpenia ya amkene a'uwara wewerek pananaka onne na'akeme. Kade rin hi'i susa'u, maa ya aderre adaul Makromod Lirna Wawan eni leke ri man Makromod Lalap niliyedi namwali Nin ri me'e, hir lernala or'ori dardari ma kan horu, la kokala morimori man ma'aruru wake'e ma kan horu, ono hi roro Yesus Kristus radin'u'l rakinaliyedi me'e.

<sup>11</sup> Wanakunu ma namlolo ida na'aheni,  
"Lo'o ik koro Ai makiyedi wewerre,  
ik koro Ai mori wali'ur haenhi.

<sup>12</sup> Lo'o ik kamkene ka'uwara wewerek pananaka,  
ik koro Ai kodi molollo haenhi,  
maa lo'o ka'aheni ka kauroin Ai,  
Ai lo'o na'aheni ka nau-roin ika haenhi.

<sup>13</sup> Kade ik ka kamkene ler-nohie,  
maa Ai namkene leluwai makrana ika mamani,  
ono inhawe man An nou, Ai namkene hi'i lernohi Nin nou."

*Kamwali man howok wawa'an*

<sup>14</sup> Timotius, ma'ori hon-orok hi ha onneni na'akeme, la lolo Makromod Lalap kalarna nounaku hi nahe-nia yono hi ida ma nasesi noro ida lolo agame lirna la'an, ono panaeku onne kan min haida, la hi'i man derne nakani enihe akin ka namkene naili'il Yesus.

<sup>15</sup> Mahehe leke om loikaru wanakunu ma namlolo modi aki man mou. Howok num honowok wawa'an leke rakan lere makpali Makromod Lalap yon mawawa. Rakan lere onne Ai lo'o na'aheni ki o, "O mamwaliyedi Ainu'u man howok man wa'an me'e."

<sup>16</sup> Yono derne makani ri ma nodi wanakunu ma kan min haida la kan horhawa Makromod Lalap, ono hirira wanakunu onne hi'i ri eren nako'u Ai.

<sup>17</sup> Hirira wanakuku onne naisa pekpeken yaka man pelek nano'onyaka ri raram. Himeneus noro Piletus rodi wanakuku onne wakuku ri haenhi.

<sup>18</sup> Woro'ohe kar lolo kalla ma namlolo me'e. Hir wakuku poho ma nahe-nia lere ri na'akeme man makiyedi la mori wali'ur onne namwaliyedi me'e. Ende hir hi'i ri heruwali mehe kakaiyedi, akinhe ka namkene naili'il Yesus me'e.

<sup>19</sup> Maa Makromod Lalap Nin waku na'a'ar man Ai na'akenedi me'e aile, la waku na'a'ar onne namkene la ka nawollo wake'e. Lolo waku onne horok aile, "Makromod Lalap nau-roiroin inhoi ma namwali Nin pipi unulu wawi tanma'a," la,

"Inhoi na'aheni ai namwali Makromod Nin ri, ai onne namhene hi'i hini'i man yak me'e."

<sup>20</sup> Lolo nakar lapa ida raramne, hahaa warna-warna aile. Hahaa man

wa'an aile rodi maha noro pire hi'ie, la hahaa ma nadedem aile rodi au noro elimo'o hi'ie haenhi. Peina'a mai mene hir nair hahaa man wa'an onne, maa hahaa ma nadedem onne hir nair akilere.

<sup>21</sup> Ri ma na'amou honorok akin nano panaeku yakyaka rahu eni namwali naisa hahaa wawa'an onne man Makromod Lalap raram nodi nair hi'i panaeku man wa'an. Enla hi ramkene howok honowok man wa'an na'akeme.

<sup>22</sup> Ende, Timotius, ya'u nounaku o mahaledi o kemen nano panaeku man morso ma nadedem ri man mamai wawan hi'ie. Mahehe mori lernohi Makromod Lalap Nina panaeku mehe. Ma'alapa o akin leke namkene naili'il Ai, la maramyaka minim ri mormori wali. Holi moiliwi mahuwele moro ri ma nodi akin moumou hi'i lir napnak laa Makromod Lalap.

<sup>23</sup> Ya aheni wali'ur, yon mawalha lira noro ri man wakuku ha ma kan min haida. Ik peinohi rira panaeku podo onne peni hi'i ik kasesi ka'ara.

<sup>24</sup> Ri ma namwali Makromod Lalap Nin man hopon yono rasesi, yon rodi lir apipinha wakuku ri, maa wakuku ri na'akeme rodi lir mama-mal,

<sup>25</sup> la yon rodi lir apipinha wakuku ri ma na'okul o. Enleke lo'o Makromod Lalap raram nodi nala leken hi herre rir honorok panaeku la rauroin wanakuku ma namlolo.

<sup>26</sup> Hi'i heheni leke hi rahinorok wali'ur, la hi rahinuriyedi nano Hayakyak Makromon nina molollo man kern dalha hi lernohi nin panaeku.

### 3

*Honoli wenewhe ma namwali lere alam man horu*

<sup>1</sup> Horhorok eniyeni: Rakan lere alam man horu lo'o sus nammori aile.

<sup>2</sup> Lere onne ri nammori ilitolle kemen mehe, maki kupan, holi kukulu lalapa, la mehe ra'uli kemen. Hi raram nodi hadwei hadwokor ri, kar horhawa rira ri leleher, ka rauroin rapanak trimkasi, la kar peinohi Makromod Lalap.

<sup>3</sup> Hi lo'o ka rauroin raramyaka rira ri mormori wali, kar suk rala ampun ri, hir wakunu rano'onyaka ri, ka radiyaka kemen de pelek hi'i ha yakyaka, hi raram nodi rodi rurilai hi'i ha man ailanna, la kar suk ha man wa'an.

<sup>4</sup> Hi raram nodi koklira rira ri orwali, hir pelek hi'i haida ka rodi honorok man wa'an, la holi kukulu lalapa rehi. Hi lo'o raram nodi noho wawan nina ha man ma'aruru nare-hiyedi Makromod Lalap.

<sup>5</sup> Hir kokme'e hi'i ha man wa'an leke rin po'on rauroin hir lernohi Makromod Lalap Nin honorok panaeku, maa hi ra'okuledi Nin molollo man herre ri akin. Ende yon ma'urani ri ma naisa onne.

<sup>6</sup> Hi heruwali laa maeke ma akin ka naili'il wawa'an rir nakar leke wukupoho hi. Maeke onne rira dohohala nammori, la rira monmono

kamanne nammori nodi molollo hi, de peleke lernohi rir wanakuku ma ka namlolo.

<sup>7</sup> Maeke onnenihe raram nodi derne wanakuku worworu mamani, maa hi ka rau-roin wanakuku ma namlolo.

<sup>8</sup> Meser ma napoho onnenihe, rira honorok panaeku yakedi me'e, la hi akin ka naili'il Yesus. Hir kawala wanakuku ma namlolo naise nonolu eni Yanes noro Yambres kawala Musa.

<sup>9</sup> Maa ka nalo'olala ri na'akeme rauroinedi rira poho, de kar lernala leken nalo'ol kawala ri me'e, naisa Yanes noro Yambres\* haenhi.

*Paulus nounaku Timotius wakuku Horok Lap Lirna La'an leke namkene lernohie*

<sup>10</sup> Maa Timotius, o mauroin kokkoo ainu'u wanakuku, ainu'u morimori, noro ainu'u panaeku. Mehem do'onedi hi'ihehewi ya akin naili'il Makromod Yesus, la ya aramyaka ainu'u ri mormori wali. O mauroin hi'ihehewi ka'u peleke odi lir apipinha la ya akin namkene lolo wewerek pananaka.

<sup>11</sup> Mehem do'onedi hi'ihehewi ya amkene lere i lernala wewerek pananaka rahu lolo Antiokhia, Ikonium noro Listra. Lere onne ya'u sus, maa Makromod huriyedi ya'u nano ha rahu ma namwali onne.

<sup>12</sup> Memen ri ma nadinu'ul nakinaliyedi noro Makromod Yesus Kristus man

raram nodi mori moumou dewdewe mamani, hir lernala wewerek pananaka.

<sup>13</sup> Enimaa ri man ailanna noro man wukupoho ri, lo'o eren ailalanna. Hi mahar wukupoho ri namehin, la hi meher wukupohedi hi me'e.

<sup>14</sup> Maa Timotius, masala kerkerhe wanakuku ma namlolo ya a'aledi ki o me'e. O mauroin wanakuku onne namlolo, ono mauroroin num meser enihe.

<sup>15</sup> Horhorok, nano tatana o me'e de mauroinedi Horok Lap man moumou dewdewe Lirna me'e. Horok Lap onne nin molollo aile hari o honorok akim, leke o akim naili'il Makromod Yesus Kristus la lernala or'ori dardari ma kan horu.

<sup>16</sup> Horok man minle Horok Lap raram na'akeme Makromod Lalap nala leke paku maika. Ik nair Horok Lapeni loikaru wanakuku ma namlolo, ka'okul wanakuku man sala, ka'alolo morimori man yaka, la wakuku ri mormori leke rir honoli wenewhe namdudu.

<sup>17</sup> Horok Lapeni wakuku ik kamwali Makromod Lalap Nin man howok leke kamkene howok ha man wa'an na'akeme.

## 4

<sup>1</sup> Rakan lere Makromod Yesus Kristus wali wali'ur mai noho wawan namwali Rai ma nodi molollo, An ho'ok kail ri man mormori noro man maki na'akeme. Ende ya apanak an'anhedi lolo Makromod Lalap noro

\* <sup>3:9</sup> Nonolu eni Yanes noro Yambres min Mesir la ramwali Firaun nin man howok ma nodi rira sulap na'okul nabi Musa.

Makromod Yesus Kristus kalarna, leke om

<sup>2</sup> loikaru Makromod Lalap Lirna ri. Ma'akenkene o, alam wawa'an me alam yakyaka, loikaru Ai Lirna. Kukunohi hirira sala, la dadiyala hi leke yon hi'i wali'ur. Ma'alapa hi akin haenhi, la wakuku hi wawa'an modi lir mamamal,

<sup>3</sup> ono lere man mai ri lo'o ramhene kokala wanakuku ma namlolo me'e, maa hir lernohi rir suk aimehi mamani, de hi ranoin meser nammori man wakuku wanakuku man hir derne ma'aruru, maa kan min haida.

<sup>4</sup> Hi ramhene rakani panaeku ma namlolo, maa hi rakani koirwakar ma kan min haida.

<sup>5</sup> Enpenia ya'u nounaku o, mahinorok memen loloha wo'ira ma namwali o leke hi'i ha man wa'an mamani. Mamkene ma'uwarawewerek pananaka, la maderre madaul Yesus Lirna Wawa'an eni laa ri ma kan derne makun, la ilitol honowok na'akeme man Makromod Lalap nanala ki o eni.

*Paulus kukunohi nin makkini na'uraniyedi me'e*

<sup>6</sup> Ya'u nounaku o heheni ono ka nalo'ol ka'u minle noho wawan me'e. Lere ya'u maki, ya aise honoi kanani rodi hoikani Makromod Lalap.

<sup>7</sup> Ya'u howok Makromod Lalap Nin honowok wawa'anedi naise ma nasala ke'urauk man rehi ara. Ya'u hi'iyedi Ainin honowok na'akeme rakanedi honon

me'e, la ya akin ka nado'o rakan lere eniyeni.

<sup>8</sup> Lere eni ainu'u mahmaha kolkoli iihin ennen Makromod na'akenedi aile a'am raram me'e ono ya'u lernohiyedi Nin honorok panaeku. Rakan lere alam horu mene Ai nala iihin ennen onne maya'u. Lere alam onne Ai nodi hono'ok ma namdudu ho'ok kail ri na'akeme. Mahmaha kokoli iihin ennen onne ka nala maya'u mehe, maa nale ri na'akeme ma naramyaka Ai, la man weilapan Nin maimai noho wawan wali'ur.

*Paulus nin nou man horu laa Timotius*

<sup>9</sup> Timotius, pelek maiyala ya'u nanu.

<sup>10</sup> Demas ka noro ya'u me'e, ono an horok rehi hahaa man aile noho wawan de nala'edi Tesalonika me'e. Kreskus laedi Galatia me'e, la Titus nala'edi Dalmatia.

<sup>11</sup> Lukas mehe noro maya'u min mai eni. Om mai ne, maka'uk Markus moro mai wewerre, ono ai nauroin paku ya'u wawa'an lolo ainu'u honowok.

<sup>12</sup> Ya'u hopon Tikhikus ki Epesus.

<sup>13</sup> Om mai, modiyedi rain lapa nanaru man i hoikaruwedlo lolo kota Troas aile Karpus nin nakar. Modi ainu'u horok lunlunne, la yon hamlinu ainu'u horok rodi ha mormori ulikn hihi'ie haenhi.

<sup>14-15</sup> Timotius, madiyaka wawa'an ono Aleksander ma nauroin kuku pire wawa'an onne na'okul iknika wanakuku mamani. An hi'iyedi ha man ailanna

nammori maya'u me'e.  
Na'amoli Makromod Lalap  
mehe walha nin hini'i onne.

<sup>16</sup> Lere ya'u mehe odiyala i  
kem'u dedesne lolo hono'ok  
kanail onno, ri mahaku  
kan paku ya'u. Na'akeme  
huriyedi ya'u. Ya apanak  
Makromod Lalap yono nala  
sala onne hi ra'uwara.

<sup>17</sup> Maa Makromod Jesus  
kan huri we'era'u. Ai nala  
ruri pe'el maya'u leke ya  
aderre adaul Jesus Lirna  
Wawa'an eni laa ri ma ka  
namwali Yahudi na'akeme  
leke hir derne, la An huriyedi  
ya'u nano ri man ken  
hukumesna'u.

<sup>18</sup> Ya auroin Makromod  
Jesus Nin panaeku huri ya'u  
nano ha yakyaka na'akeme,  
la nodi ya'u wawa'anedi laa  
a'am raram, Nin molollo  
onno. Na'amoli ik ka'uli  
kasa'a Oin Naran laa ewi-ewi.  
Amin.

### *Tape Masi*

<sup>19</sup> Mala ainu'u tape masi  
laa Priskila noro Akwila noro  
Onesiforus nin nakar raram.

<sup>20</sup> Erastus namkene lolo  
Korintus, la Trofimus eni,  
ya'u hoikaruwedti lolo Mile-  
tus ono nakni'ir.

<sup>21</sup> Paeku pelek maiyedi eni  
mene rakan noho rinrinne  
nin lere alam. Ebulus, Pudes,  
Linus noro Klaudia, hir aku  
tape masi mai ki o, roro ihin  
walin ma akin naili'il Jesus  
wewerre enihe na'akeme.

<sup>22</sup> Na'amoli Makromod  
Jesus norle'ule'u norwali-  
wali o, Timotius. Enla  
na'amoli Ai nala Nin  
rere'e haharu ki i wal'u  
na'ahoruwedti.

*Tape masi,  
Paulus*

# Titus

## *Horok Lirna La'an*

Titus ka namwali ri Yahudi, maa ai akin naili'iledi Yesus nalo'ol me'e. Ai onne, Paulus nin kalla wali la nin man howok wali haenhi (2Kor. 8:23; Gal. 2:1-3). Paulus aku horok eni laa Titus lere Titus minle noho Kreta.

Lolo horok eni Paulus nin panaeku ma na'ono hopon Titus leluwai makrana ri Kristen man minle noho Kreta (1:5). Ai na'ori honorok Titus hini'i wenewhe man wa'an ri ma namwali kerei liman ein hi'ye (1:6-9).

An wakuku ai kalla man wa'an leke wakuku ri na'akeme man lernohi Yesus, mo'oni maeke ma na'ileher noro ma ka na'ileher. Ai nala ai wanakuku man paku ri ma namwali hophopon wahwahan leke hir mori wawa'an roro makromonhe (2:9-10). Hophopon onne nonolu eni rin weli leke hopon wahan. Enla an konohi ma namwali Kristen honoli wenewhe man wa'an (3:1-11).

## *Horok Ihin*

1. Paulus nala wanakunu man hari horok (1:1-4).
2. Paulus nala nounaku Titus (1:5-3:11).
3. Paulus nounaku kerei liman ein honoli man wa'an (1:5-9), la nou hi leke ramkene ra'okul ri man loikaru wanakuku ma ka namlolo (1:10-16).
4. Paulus wakuku ri ma namwali Kristen leke rir hini'i wenewhe lernohi wanakuku ma namloleni (2:1-15).

5. Paulus na'ori honorok kerei raramne leke derne rakani rir man panulu la hi'i ha man wa'an (3:1-8).

6. Paulus nala nounaku yon minwuku noro ri man wakuku panaeku ma naiye'er kerei raramne (3:9-11).

7. Paulus nala nou man horu noro tape masi (3:12-15).

## *Hari horok*

<sup>1</sup> Horok eni nano ya'u, Paulus, ma namwali Makromod Lalap Nina hophopon wahwahan noro idewe hophopon ma nodi Yesus Kristus Lirna Wawa'an eni. An hopon ya'u ilitolle Makromod Lalap Nina ri ninili enihe, leke hi akin namkene naili'il Yesus, la hi rauroin Makromod Lalap Nin wanakuku ma namlolo leke lernohi Nin honorok panaeku wawa'an.

<sup>2</sup> Panaeku ma na'ono lolo wanakuku onne hi'i heheni: Or'ori dardari man ik lernala onne namwali iknik ya'ar, la kan horu laa ewi-ewi. Makromod Lalap nouwedi or'ori dardari onne maika lere noho ka namwali makun, la Ai onne hi'i Nin nou namwali ono ka nauroin napoho memen.

<sup>3</sup> Enla rakan nelu lere, Makromod Lalap nalhari Nin nou onne lolo Yesus Lirna Wawa'an eni. Lirna onne, Makromod Lalap ma nala or'ori dardari eni, naledi ya'u la hopon ya aderre adaulle.

<sup>4</sup> Ya aku horok eni ki o, Titus, ma namwali ya an'u mememen, ono ik akin

naili'il Jesus wewerre. Ya apanak na'amoli ik Amad Makromod Lalap noro Makromod Yesus Kristus ma nala or'ori dardari maika, rala rere'e haharu noro wawa'an rara'e ki o.

*Titus nin honowok lolo noho Kreta*

<sup>5</sup> Ya'u hoikaruwedi o minedi lolo noho Kreta, leke tolle honowok ma kan horu makun, la kikan kerei nin man leluwai makrana lolo leke-leke na'akeme. Horhorok ainu'u nounaku eniye:

<sup>6</sup> Lere mim nili man leluwai makrana lolo kerei enihe, nili ri ma na'alehe yaksalida, hono ida mehe, ai ananhe akin naili'il Makromod Yesus, la ri mahaku kan kuku sala ananhe nahenia hi ailanna, ee kar derne rakani ri.

<sup>7</sup> Nili ri ma na'alehe tunum desne ono ai penia man ilitolle Makromod Lalap Nina honowok. Yono an holi kukulu lalapa, pelek na'ahan, nomun arak manha mamani, raram nodi wahi'i, la yon maki kupan.

<sup>8</sup> Nili ri man akin namrana kokala peina'a, suk panaeku man wa'an na'akeme, ai akin namdudu la mou, ai akin ka nahinuri Makromod Lalap, la nauroin nadiyaka kemen.

<sup>9</sup> Wa'an rehi ai nasala kerkerhe wanakuku ma namlolo man an kokaledi me'e, leke nauroin nodi nounaku ri, la nauroin nodi kalla man wa'an na'alap ri akin, la kukul ri ma na'okul iknik wanakuku eni rir sala.

<sup>10</sup> Ya'u wakunu heheni, ono ri nammori ra'okul iknik

wanakuku ma namlolo eni, la hir paipudi ri namehin rodi rira wanakunu ma kan min haida, rehirehi ri Yahudi man nounaku man lernohi Yesus na'ahenia, "Lam sunat nanu!"

<sup>11</sup> Kawala hi ma'aheni, "Yon wakuku ri me'e," ono rir wanakuku man sala onne wali wokoredi nakar raram namansa me'e. Enla hir wakukuwala ri leke lernala naiwe'el mehe.

<sup>12</sup> Nonolu eni rira nabi ida manin noho Kreta me'ene na'aheni, "Manina Kreta onnnenihe, na'akeme rapoho mamani. Hi raisa ha mor-mori man ailanna, la hi ramwali ma nasumur la raprehen rehi."

<sup>13</sup> Wanakunu onne memen namlolo! Onne peni ya'u nou o dadiyala hi kokkoo leke hi akin namkene naili'il wanakuku ma namlolo.

<sup>14</sup> Dadiyala hi yon derne rakani Yahudi nin koirwakar la ri nin wanakuku ma na'okul wanakuku ma namlolo eni.

<sup>15</sup> Ri man honorok akin mou, haida kan luli ono ha man an hewek nair na'akeme moumou dewdewe. Maa ri man honorok akin morso la akin ka naili'il Yesus, moumou dewdewida kaale hi, ono hirira honorok akinne morso de hi ka rauroin ewi ma namlolo noro ewi ma ka namlolo me'e.

<sup>16</sup> Hi ra'aheni rauroin Makromod Lalap, maa rapoho ono rira hini'i we-newhe kar lernohi Nin wanakuku. Hi ramhene derne rakani Ai, rir mori-mori namehiyala wake'e, la kar paekunala hi'i ha man wa'an ida.

## 2

*Wakuku wanakuku ma namlolo*

<sup>1</sup> Enimaa, i wal'u Titus, loikaru wanakuku ma namlolo mehe!

<sup>2</sup> Wakuku mo'oni leleher leke radiyaka kemen yon hi'i ha yakyaka, la rauroin paeku panaeku man wa'an, la radiyaka rir morimori leke rin horhawe. Wakuku hi leke hi akin namkene naili'il Jesus, la raramyaka ri namehin rodi aki ma namdudu, la ramkene lolo wewerek pananaka.

<sup>3</sup> Wakuku maeke leleher leke hir mori naisa ri ma akin ka nahinuri Makromod Lalap haenhi. Wakuku hi leke yono wakunu nano'onyaka ri, yon suk romun arak mamani, maa rauroin wakuku panaeku man wa'an mamani.

<sup>4</sup> Nounaku hi hi'i heheni leke hir wakuku maeke ma ka na'ileher makun raramyaka hono ananhe,

<sup>5</sup> mehe rauroin radiyaka kemen yon hi'i ha yakyaka, rodi aki man mou mori wawa'an, rauroin tolle rira meheromo, hi'i ha man wa'an ri namehin, la derne rakani rira mo'onleher. Nounaku hi hi'i heheni leke yono ri mahaku hadwei hadwokor Makromod Lalap Lirna Wawan.

<sup>6</sup> Wakuku ma na'ikaka heheni haenhi. Ma'alapa hi akin leke hi mehe radiyaka kemen yon hi'i ha yakyaka.

<sup>7</sup> Enla ki o, Titus, mamwali man kukumaka hi'ihehewi hi'i wewhe ha man wa'an. Lere om wakuku ri, horhawa

hi modi aki man mou la namdudu.

<sup>8</sup> Wakuku wanakuku ma namlolo kokkoo leke ri ma na'okul kaale, leke num arwali enihe rawawa, ono ha man yakida kaale hi rodi tum ika.

<sup>9</sup> Nounaku hophopon wahwahan man lernohi Jesus enihe derne rakani makromon la rahehe rahuwa'an makromon akin mamani. Hopon hi yono rawalha lira

<sup>10</sup> la yon ramna'a makromon nina hahaa. Nounaku hi radiyaka rir honoli wenewhe wawa'an leke hi makromon rauroin hi akin namdudu mamani. Enlo'o rira honoli wenewhe hi'i heheni, ri na'akeme ra'uli iknika wanakuku ma na'ono Makromod Lalap man huriyedi ika nano dohohala nina molollo.

<sup>11</sup> Wakuku heheni: Makromod Lalap naledi Nin rere'e haharu ri na'akeme me'e, de hariyedi kalla leke hi na'akeme rahinuriyedi nano dohohala nin molollo.

<sup>12</sup> Nano Nin rere'e haharu onne, An wakuku ik leke kahinuriyedi nano honoli man yaka noro noho wawan nin yakyak na'akeme. An wakuku ik leke kadiyaka ik kemen yon hi'i ha yakyaka, ik holi kodi aki man mou, la ik min mai noho wawan eni kamkene derne kakani Ai.

<sup>13</sup> Ik min mai noho wawan eni, ik kamkene weilapan Lere Alam man ma'aruru wake'e. Rakan Lere Alam onne Jesus wali mai noho wawan wali'ur. Enla ri mormori noho wawan na'akeme lo'o po'on ke'eke'el an'anha

ma narehi nalewen nano  
Yesus Kristus ma namwali ik  
Makromod Lalap Man Lap  
Narehi, Man Huri We'er ika  
nano dohohala nin molollo.

<sup>14</sup> Ai naledi ihin kemen  
leke huri we'er ika nano  
ha yakyaka na'akeme, la  
na'amou ik akin na'akeme.  
An hi'i maika kamwali Nin ri  
mememen ma namkene hi'i  
ha man wa'an mamani.

<sup>15</sup> Ende, Titus, wakuku ha  
onne na'akeme, ma'alap hi  
akin leke ramkene hi'ie, la  
dadiyala ri man hi'i sala.  
Onum molollo aile de yono  
rin po'on lewen o.

### 3

#### *Ri Kristen rira mormori*

<sup>1</sup> Ma'ori honorok num ri  
man lernohi Yesus enihe,  
leke hir derne rakani ma  
nodi molollo haire noro nin  
ma nodi molollo na'akeme,  
la hi ramkene hi'i ha man  
wa'an.

<sup>2</sup> Nounaku hi leke yono  
wakunu nano'onyaka ri, yon  
rasesi, yon pelek rodilir apip-  
inha, maa holi mamamal  
roro ri na'akeme.

<sup>3</sup> Nonolu ik me'ene minle  
noho momohon, kak derne  
kakani Makromod Lalap  
la ka kauroin kalla ma  
namlolo. Ik irhun raramne  
monmono kamanna wo'ira  
nodi molollo ika mamani,  
ik raram nodi hi'i ha man  
ailanna ri mamani, ik kunu  
kehen ri, la ida ma kan suk  
ida.

<sup>4</sup> Maa, Makromod Lalap  
ma nala or'ori dardari ma  
kan horu, nalhari Nin rere'e  
haharu noro aki man wa'an  
maika,

<sup>5</sup> la nahaledi ik nano do-  
hohala nin molollo. Ai kan

hi'i onne ono iknik morimori  
man wa'an, maa Ai nahala  
ika ono Ai mehe naramyaka  
ika. Ai na'amou ik akin  
la nala morimori woruworu  
maika lolo Roh Kudus Nin  
ke'ke'e'l an'anhe.

<sup>6</sup> Makromod Lalap huri  
Roh Kudus ika raram lolo  
Makromod Yesus Kristus-  
Rai man huri we'er ika nano  
dohohala nin molollo.

<sup>7</sup> Nano Nin rere'e haharu  
man ma'aruru eni, An hi'i ika  
kamwali ri molololo Makro-  
mod Lalap leken kalarna. En-  
penia An hi'i maika kamwali  
Ai anan mememen ma nau-  
roinedi ik lernala or'ori dard-  
ari ma kan horu me'e.

<sup>8</sup> Ainu'u wanakunu eni  
na'akeme namlolo. Ya  
apanak an'anhedi wakuku  
mouropo wanakunu onne  
na'akeme laa ik walinhe  
ma akin naili'il Makromod  
Lalap, leke hi ramkene hi'i  
ha man wa'an mamani.  
Wanakuku eni nodi wawa'an  
ri mormori na'akeme.

<sup>9</sup> Yon moro ri mawalha  
opo rara lirna la'an ma kan  
min haida, la yon moro  
ri mawalha lira la masesi  
ma'arakuli agame nin holoor  
halauk. Ha eni na'akeme  
kan min haida, la kak lernala  
haida man paku ika.

<sup>10</sup> Ri man hi'i panaeku  
nodi naiye'er kerei raramne,  
dadiyala hi raram rewro'o.  
Kar derne, yon moro hi  
lawuku me'e.

<sup>11</sup> O mauroroin nahenia ri  
ma naise onne rira honorok  
akin noro hini'i wenewhe  
ka namlolo, la rira dohohala  
me'ede nodi kunukunohi  
nahenia hir saledi.

*Nou man horu noro tape  
masi*

<sup>12</sup> Titus, ainu'u panaeku hopon Artemas me Tikhikus, ki o. Hir rakanedi, pelekleke laa Nikopolis, ono ainu'u panaeku ya'u minle enne lere alam noho rinrinna eni.

<sup>13</sup> Om paku ilitolle Senas ma nauroin keneri hono'ok kanakarne noro Apollos wawa'anedi leke yon ra'alehe haida-haida lolo kalla.

<sup>14</sup> Wa'an rehi maika, ri Kristen, kahehe hi'i ha man wa'an lolo iknik morimori, leke ik paku ri namehin man sus. Yon hi'i de ik ma namwali Kristen enihe nik morimori kan min haida.

<sup>15</sup> Ik lodon walinhe man aile mai eni aku tape masi ki o. Modi ainim tape masi laa iknik ri orwali ma akin naili'il wewerrenihe.

Na'amoli Makromod nala Nin rere'e haharu i wal'u na'ahoruwed.

Tape masi,  
*Paulus*

## Pilemon

### *Horok Lirna La'an*

Paulusaku horok eniyeni laa ai walina naran Pilemon. Pilemon eni ri Kristen man minle kota Kolose. An weli ri ida woro'o ramwali nin hophopon wahwahan, la ainin hophopon wahwahan ida naran Onesimus. Onesimus onne lari nano makromon Pilemon laa kota Roma. Lere onne, Paulus min bui raram lolo kota Roma. Ik ka kauroin hi'ihehewi Onesimus noro Paulus pakromo, maa lere Onesimus derne Paulus nin wanakuku, ai akin naili'iledi Jesus.

Ai akin naili'iledi Jesus ne, Paulus nou ai na'ahenia, "Pa'e, lo'o wa'an rehi om wali wali'ur laa makrommu." Maa Onesimus namka'uk wali wali'ur laa Pilemon, kalo'o hukum ai ono nin sala aile. Paulus na'aheni, "Lo'o ai kan hukum o. Ya'u hi'i horok aku laa Pilemon leke nala ampun la kokala o wali'ur." Ende Paulus nin horok eni aku laa Pilemon napanak ai nala ampun Onesimus. Enla Paulus napanak Pilemon kokala wali'ur Onesimus noro aki man wa'an, la nou ai yon napolu ai hophopon wahwahan mehe, maa horhawe naise walina maa akin naili'il Jesus wewerre.

Lolo wanakunu Yunani, naran Onesimus napa'ahne, 'ma nampe'el hi'i ha man wa'an'. Paulus na'aheni nonolu eni Onesimus ka nampe'el hi'i haida man wa'an noro makromon, maa oras eni ai akin naili'iledi

Makromod Yesus me'e, de nampe'el hi'i panaeku man wa'an mamani (lsr. 11).

### *Horok Ihin*

1. Paulus nala wanakunu hari horok (lsr. 1-3).
2. Paulus na'uli Pilemon nin raramyaka noro hi'ihehewi akin naili'il Yesus (lsr. 4-7).
3. Paulus napanak Pilemon nala ampun Onesimus (lsr. 8-22).
4. Paulus nala tape masi (lsr. 23-25).

<sup>1</sup> Konohiyala i wal'u, Pilemon ma namwali ainu'u ri orwali wawa'an noro ainu'u man howok wali! Ya'u, Paulus, meneni ya'u bui raram ono ya'u wakuku ri Yesus Kristus Lirna Wawa'an eni. Yo oro ik walina Timotius hi'i horok eni aku maiyala ki o,

<sup>2</sup> moro kerei raramne man ki wuku num nakar eni, noro ik narda Alfia, noro ik walina Arkipus ma namkene howok Yesus Nin honowok nair noro maika.

<sup>3</sup> Na'amoli ik Amad-Makromod Lalap noro ik Makromod Yesus Kristus rala rere'e haharu noro wawa'an rara'a ki mi.

### *Pilemon nampe'el ilitolle ri*

<sup>4</sup> I wal'u, ka'u hamlinu o lere ya'u hi'i lir napanak, la ya apanak trimkasi nammori Makromod Lalap,

<sup>5</sup> ono i derne o akin namkene naili'il Makromod Yesus, la maramyaka Makromod Lalap Nina ri mememen na'akeme lolo onne.

<sup>6</sup> Ya apanak ik Makromod leke ik koro ik walina marnohi Kristus howok

wewerre, la ya apanak ik kauroin wewerre iknika wawa'an rara'e na'akeme, ono kadinu'ul kakinaliyedi noro Ai me'e.

<sup>7</sup> Lere ya'u derne hi'ihehewi i wal'u naramyaka ri namehin, onne na'alapedi ya akin me'e, ono mahuwa'anedi Makromod Lalap Nin ri mememen akinhe.

*Paulus napanak Pilemon kokala Onesimus wawa'anedi*

<sup>8-9</sup> I wal'u, ya a'ileheredi me'e, la ya'u minle bui raram ono yo odi Kristus lirneni, la ainu'u napanak ida aile konohi o. Ainu'u molollo aile hopon o hi'i ainu'u napanak eni, maa ka akerne o, ya apanak mehe ono ik ida ma naramyaka ida.

<sup>10</sup> Ende ya apanak kokala ya an'u Onesimus wawa'anedi ono yo odiyedi Jesus Lirna wawa'an wakuku ai minle mai bui raram, penia namwaliyedi ya an'u lolo Jesus me'e.

<sup>11</sup> Nonolu Onesimus\* ka nampe'el hi'i ha man wa'an noro i wal'u, maa lere eniyeni ai nampe'el hi'i ha man wa'an paku ikroko me'e.

<sup>12</sup> Lere eni ya'u hopon an wali wali'ur ki i wal'u, maa ya akin ka nahinuri ai.

<sup>13</sup> Manlo'o ya apanak an minala noro ya'u, leke nahinerrala i wal'u pakuwala'u lere ya'u min bui raram eni ono i loikaru Makromod Lalap Lirna Wawa'an eni.

<sup>14</sup> Maa ka ala kenekrohu onne makun, ono i wal'u kan

aki ulla makun. Wa'an rehi i wal'u mehe raram nodi hi'i ha man wa'an.

<sup>15</sup> Lo'o Makromod Lalap nala leken tarana Onesimus lari nano ki o, leke wali wali'ur ki ne, noro i wal'u aki mahaku laa ewi-ewi.

<sup>16</sup> Lere eni ai ka namwali hum hophopon wahwahan mehe, maa narehi onne, ai akin naili'iliedi Yesus me'e, de miro mamwali mahaku lolo Yesus. Ya aramyaka ai nammori, maa lo'o maramyaka ai narehi nalewenedi ya'u harome, ono ai namwali num ri noro idewe mo'oniwallum lolo Makromod Yesus.

<sup>17</sup> Ende, i wal'u mauroin ikroko nika honowok nair mahaku penia ya apanak kokala ai wali'ur, naise kokala maya'u haenhi.

<sup>18</sup> Lo'o an hi'iyedi ha man yaka noro i wal'u, la nin okon raka aile, ya apanak na'amolia na'akeme namwali yodiwara maya'u.

<sup>19</sup> Enpenia, yo odi i lim'u mehe horok nou ida mai eni: *Ya'u, Paulus, lo'o ainin okon raka aile harome, ya'u pair na'ahoruwed*. (Yon ya a'ori honorok i wal'u nahenia ya'u penia man wakuku o leke o akim naili'il Yesus de lernala or'ori dardari ma kan horu. Ende lo'o numa okon raka moro ya'u aile haenhi!)

<sup>20</sup> Ende, i wal'u hi'iyala ainu'u napanpanak eni ono ik kamwali mahaku lolo Makromod Yesus. Kokala Onesimus wawa'an wali'ur leke ma'alapa ya akin lolo Kristus.

\* **1:11** Naran Onesimus onne napa'ahne, 'ma nampe'el hi'i ha man wa'an'.

<sup>21</sup> Ya'u aku horok eni ki,  
ono ya auroin i wal'u lo'o  
lernohi ainu'u napanak eni,  
la lo'o hi'i narehi nalewenedi  
haenhi.

<sup>22</sup> Enla ainu'u napanak ida  
wali'ur aile. Ma'akene ka-  
mar ida num nakar maya'u  
ono ya akin naili'il nahenia  
Makromod Lalap lo'o walha  
minim lir napanak enihe de  
nodi nala ya'u wali wali'ur ki  
enne.

*Tape masi*

<sup>23-24</sup> Ik walin Epafras, airo  
melle mai bui raram ono ai  
akim naili'il Kristus Yesus.  
Ai noro ainu'u man howok  
wali Markus, Aristarkus, De-  
mas noro Lukas rala rira tape  
masi rakanala i wal'u haenhi.

<sup>25</sup> Ya apanak ik Makromod  
Yesus Kristus nala Nin rere'e  
haharu ki mi na'ahoru.

Ainima tape masi,  
*Paulus*

## Ibrani

### *Horok Lirna La'an*

Nano nonolu ri man wakuku Horok Lap wekel horok eni naran 'horok manaku laa ri Ibrani'. Naran 'ri Ibrani' onne na'ono ri ma namwali 'ri Yahudi', noro idewe 'ri Israel' haenhi.

Ik ka kauroin inhoi man hi'i horok eniyeni, ono ai kan loi naran, maa ik kauroin ai namwali man panulu lolo ri Ibrani ma namwali Kristen, la ka namwali ri nano ri idaweli woro'o man loikaru Jesus Lirna Wawa'an enihe (2:3).

Ik ka kauroin an aku horok eni laa inhawa kote, maa ik kauroin ri man kokala horok eni rauroinedi Musa nin Nou Nonolu, la hi rauroinedi agame nin holoor halaauk man ri Israel lernohi lere nonolu onne.

Ik ka kauroin ri onnenihe holi lolo ewi, maa ik kauroin hi onnenihe ramwali ma akin naili'iledi Jesus, la mahar lernala wewerek pananaka ono lernohi Jesus. Rin hadwei hadwokor hi, rahoredi rir hahaa, la kele rodi laa bui raram (10:32-34, 13:3, 13), penia hi heruwali akin tana me'e (12:12), la heruwali ramhene lawuku ra'uli rasa'a Makromod Lalap me'e (10:25). Heruwali ka ramkene akin naili'il me'e, la manlo'o kar derne rakani Makromod Lalap me'e.

Ende ri man hi'i horok eniyeni nin panaeku wokelu: Wakuku hi panaeku ma namlolo, na'alap hi akin leke yon nado'o, la nounaku

hi leke yon wali kili'urne Makromod Yesus.

An wakuku hi na'aheni Yesus eniyeni kulu narehi ha wo'ira na'akeme (1:1-4:13), la Ai namwali iknik Imam Man Kulu Narehi man paku ika mamani lolo Makromod Lalap kalarna (2:17, 7:24, 25). Man hi'i horok eniyeni konohi hi nahenia Yesus hari kalla leke ik lernala or'ori dardari ma kan horu (10:19-23), la an konohi hi yon ramka'uk hi'i lir napanak Makromod Lalap, ono Ai naramyaka ika rehi (4:16). An nounaku hi rahehe leke lernala Makromod Lalap Nin renren warwarna (3:10-4:11). Enla an nounaku hi mamani yon holi kili'ur kani ko'or Makromod Yesus, ono ri man holi naise onne lernala hunukum man werek narehi, la ka namwali hir wali wali'ur mai Makromod Lalap me'e (2:1-4, 3:7-19, 5:11-6:12, 10:26-39, 12:18-29).

### *Horok Ihin*

1. Hana'arne dedesne: Yesus kulu narehi Israel nin man panulu na'akeme man nonolu ilitolle Makromod Lalap Nin Nou Nonolu (1:1-10:18).

- Man hi'i horok eni nala wanakunu man hari horok eni (1:1-4).
- Yesus kulu narehi hophopon a'am raram (1:5-2:18).
- Yesus kulu narehi nabi Musa (3:1-4:13).
- Yesus namwali Imam Man Kulu Narehi de An kulu narehi imam-imam na'akeme lolo Yahudi rir agame (4:14-7:28).

- e. Yesus, iknik Imam  
Man Kulu Narehi,  
Nin honowok wa'an  
narehi nano imam-  
imam lolo Yahudi rir  
agame (8:1-10:18).
2. Hana'rne rewro'o nine;  
Yon ik akin nahinuri  
Yesus (10:19-12:29).
3. Panaeku Man Horu:  
Ik hi'i hehwewi leke  
kahuwa'an Makromod  
Lalap akin (pnk. 13).

*Yesus Nin siksika lerlere  
namnenehe noro Makromod  
Lalap*

<sup>1</sup> Nonolu eni, Makromod Lalap kan ren nodi kalla nammori wakunu noro nabi-nabi mamani leke hir loikaru Nin panaeku laa ik upud a'ad.

<sup>2</sup> Enimaa lere eniyeni, na'akeki noho nin man horu, Makromod Lalap kukunohi Nin panaeku maika lolo Anan mehe. Lolo Anan, Makromod Lalap nakuku noho na'aleu a'am noro ne'en raram na'akeme, la Ai nala Anan nodi molollo na'akeme.

<sup>3</sup> Lo'o ik do'on Anan eniyeni, onne naise ik do'onedi Makromod Lalap me'e haenhi, ono Nin morimori ma'aruru wake'e, la Nin ke'eke'el an'anha ma narehi nalewen eni namnenehe noro Makromod Lalap! Ai Lirna nodi molollo nadiyaka a'am lehern na'akeme leke yon man yaka. An mai noho wawan maki leke na'amou na'adewe ri mormori rir dohohale horu mene An laa a'am raram naikoro Makromod Lalap Ma Narehi Ma Nalewen herne malanna.

*Jesus kulu narehi nano  
hophopon a'am raram*

<sup>4</sup> Ende Ai onne lernala onno man kulu narehi nano hophopon a'am raram, ono Makromod Lalap penia man hi'i Ai kulu narehi nano hophopon a'am raram na'akeme.

<sup>5</sup> Ik kauroin onne ono Makromod Lalap na'aheni, "Ya an'u O,  
de lere eni Ya amwali O Ammu."

Ai na'aheni wali'ur,  
"Ya'u eni O Ammu,

la O mamwali Ya An'u." \*  
Makromod Lalap ka na'aheni hophopon a'am raram ramwali Ai anan, maa Ai na'aheni Yesus mehe namwali Ai Anan.

<sup>6</sup> Enla lere Makromod Lalap hopon Anan Anulu man An horhawe rehi mai noho wawan, Ai na'aheni wali'ur,  
"Na'amoli Ainu'u hophopon a'am raram na'akeme kadi ein korno ra'uli rasa'a Ya An'u eni." \*

<sup>7</sup> An wekel hophopon a'am raram la na'aheni,  
"Ya'u hi'i Ainu'u hophopon a'am raram ramwali anna lape man huhuu noro aiye man lerlere leke hir ilitolle Ya'u." \*

<sup>8</sup> Enimaa Makromod Lalap wakunu noro Anane, leke Ai na'ono Anan namwali Makromod Lalap haenhi. Lere onne Ai na'aheni Anan, "Makromod Lalap, O maikoro onno man wa'an,

\* 1:5 Mzm. 2:7 \* 1:6 Ul. 32:43 \* 1:7 Mzm. 104:4

la mamkene mamani  
rakan laa ewi-ewi.  
O mamwali Rai ma nodi  
molollo ma namlolo  
wake'e laa ewi-ewi.  
⁹ O raram nodi hi'i ha ma  
namlolo mamani,  
la kam suk wake'e ha  
man ailanne.  
Eni penia Ya'u ma namwali  
Num Makrommu,  
horhawe O narehi nano  
O wallumhe,  
de Ya ala wuru  
dupuwala uluwakum  
wawan hi'i \* O akim  
nahuwa'an." \*  
¹⁰ Makromod Lalap  
na'aheni wali'ur Anan,  
"Makromod, lere dedesne  
O penia ma nakuku  
noho  
ma naleu a'am noro  
ne'en raram haenhi.  
¹¹ Lere man mai noho wawan  
noro a'am raram  
moluloin,  
maa O mamkene ma-  
mani rakan laa ewi-  
ewi.  
Lere onne noho wawan noro  
a'am raram nalo'oledi  
me'e,  
de naise nainair lo'olo'ol  
man yakedi me'e.  
¹² Lere onne Om lunne noho  
noro a'am eni naise  
nainair lo'olo'ol man  
yakedi me'e  
leke rodi nainair wor-  
woru herredi,  
maa O penia Num morimori  
namkene mamani,  
la Num anna kan horu  
laa ewi-ewi!" \*  
¹³ Makromod Lalap  
wakunu noro Anan mehe  
na'ahenia,  
"Maikoro Ya'u herne  
malanna

hehen nanumene Ya'u  
hi'i Num arwali  
na'akeme lolo yawa ki  
O!" \* Ai kan wakunu  
noro hophopon a'am  
raram heheni.

<sup>14</sup> Hophopon a'am raram  
onne ramwali roh man ili-  
tolle Makromod Lalap, la An  
hopon hi paku ri man lernala  
or'ori dardari ma kan horu.

## 2

*Kasala kerkerhe or'ori  
dardari ma kan horu ma  
narehi nalewen eni*

<sup>1</sup> Kasala kerkerhe Lira ma  
na'ono or'ori dardari man  
ik dernedi me'eni, ono ik  
kauroin kokkoo nahenia  
Jesus onne kulu narehi  
nano hophopon a'am raram!  
Kasala kerkerhe Lir onne  
leke yono ik holi kili'ur  
kani ko'or Ai, maa ik akin  
namkene naili'il mamani.

<sup>2</sup> Nonolu hophopon a'am  
raram loikaru Makromod  
Lalap Nin keneri hono'ok  
ma namlolo laa ik upud  
a'ad, de inhoi kan derne  
nakani keneri hono'ok onne  
an lernala hunukum lernohi  
niña sale.

<sup>3</sup> Enima lere eniyeni  
Makromod Jesus mehe nala  
or'ori dardari ma kan horu  
ma narehi nalewen maika  
me'e, de lo'o ik kak peinohi  
or'ori dardari eniyeni ik ler-  
nala hunukum man werek  
narehi. Lere Jesus minle  
noho wawan, An wakuku  
Lirna Wawa'an eniyeni, la ri  
man meher derne Lir onne  
laa loikaruwedi maika me'e,  
de ik kauroin Lirna Wawa'an  
onne namlolo kokkoo.

\* 1:9 Mzm. 45:5-6

\* 1:12 Mzm. 102:24-26

\* 1:13 Mzm. 110:1

<sup>4</sup> Lere onne Makromod Lalap hi'i tanada man ri kan dodo'onnala makun, la Ai nodi Nin molollo hi'i ha man ma'aruru nodi kunukunohi nahenia Lirna onne namlolo. Enla Roh Kudus nala woroin ma na'ono ri ma akin naili'il enihe dohodoho lernohi Nina honorok aki, leke ik kauroin Lirn onne namlolo kokkoo.

*Yesus namwali ri mormori leke Ai nauroin kokkoo paku maika*

<sup>5</sup> Ler man mai Makromod Lalap hi'i noho worworu, de lere eniyeni ik mahak wakunu panaeku ma na'ono noho onne. Ai ka nala molollo hophopon a'am raram komdere noho worworu onne, maa nala ri mormori.

<sup>6</sup> Ik kauroin onne, ono horhorok aile lolo Horok Lape ma na'aheni,

"Ri mormori ramwali in-hawa penia O kam hamlinue? Ri mormori ananne onne ri mormori mehe, de alhi'ihepe O raram nodie?

<sup>7</sup> Enimaa Om hi'i ai lolo yawa Num hophopon a'am raram tarana, maa ka nalo'olala O maledi onno man kulu ai leke lernala honoor hanawe noro ul'uli sa'sa'a,

<sup>8</sup> la Om hi'i ai nodi molollo ha wo'ira na'akeme." \*

Ende ik kauroin Makromod Lalap Nin panaeku hi'i ai\* nodi molollo ha wo'ira na'akeme lolo noho wawan eniyeni. Memen lere eniyeni ik kauroin nahenia

ri mormori ka nodi molollo ha wo'ira na'akeme man aile lolo noho eniyeni,

<sup>9</sup> maa ik do'on Yesus penia ma nodi molollo ha wo'ira na'akeme. Lere An min noho wawan hophopon a'am raram rarehiyedi Ai tarana, maa Makromod Lalap kikan Ai naikoro onno man kulu narehi, la An lernala honoor hanawe noro ul'uli sa'asa'a man ma'aruru mamani, ono Ai nala kemen maki herredi maika. Makromod Lalap nala Nin rere'e harharu maika penia nala Yesus lernala apinpinha la maki leke na'uwara iknika dohohale na'akeme.

<sup>10</sup> Makromod Lalap hi'i ha wo'ira man aile mai noho wawan, la na'akeme lernohi Nin kenekrohu. Ai raram nodi napolu ri mormori namansa ramwali Ai ananhe la nala hi morimori man ma'aruru wake'e. Onne penia An huriyedi Yesus lernala apinpinha, wewerek pananaka la maki. Ainin kenekrohu onne wa'an wake'e ono lolo ha onne na'akeme An hi'i Yesus namwali iknik Man Panulu kokkoo, ono Ai nauroin namlolo kokkoo nala or'ori dardari maika.

<sup>11</sup> Yesus hi'i Nin ri mememen moumou dewdewe ono Ai na'amouwedi ik kemen nano dohohale me'e. Ai na'amou na'adewedi ika, penia ik koro Ai Aman mahaku. Onne penia Ai ka nawawa na'aheni maika kamwali Ai walih.

<sup>12</sup> Ik kauroin onne ono lolo Horok Lape raram Yesus

\* 2:8 Mzm. 8:3-8 \* 2:8 Lolo lisir eniyeni tafsiran heruwali na'ahenia 'ai' wekel ri mormori, maa tafsiran namehin na'ahenia 'ai' onne wekel Yesus.

konohi Makromod Lalap na'ahenia,

"Na'amoli Ya'u loikaru Makromod Lalap Oin Naran laa i wal'uhe. Ya ahinara Num ul'uli sasa'a lolo heri leken kalarina." \*

<sup>13</sup> Yesus na'aheni wali'ur, "Ya'u pu'ik heli mehe Ai."

Enla lolo lisir namehin Yesus na'aheni,

"Eni Maya'u! Yo oro anumhe man Makromod Lalap naledi Maya'u." \*

<sup>14</sup> Makromod Lalap ananhe ri mormori nad-edem, de mori ka nalo'ol ne, maki. Ende Yesus mai namwali ri mormori molmolo maika haenhi, Ai kemen naise ik kemen, la rarna naise ik rarna. Ai naise maika ri mormori, leke lere An maki Ai na'amoluloinedi Hayakyak Makromon nin molollo, de makmaki ka nodi molollo maika me'e.

<sup>15</sup> Nonolu ri na'akeme ramka'uk maki, maa Yesus huriyedi ika nano mak-maki nin molollo, de ik ka kamka'uk maki me'e.

<sup>16</sup> Ende ik kauroin mouropo nahenia Yesus kan mai leke paku hophopon a'am raram, maa mai leke paku maika ma namwali Abraham upun anan.

<sup>17</sup> Enpenia Yesus namwali iknik Imam Man Kulu Narehi ma nauroin paku ik wawa'an, ono Makromod Lalap nala Ai namwali ri mormori naise maika. Yesus naramyaka maika rehi, la namkene hi'i ha ma namlolo

mamanji. An ilitolle Makromod Lalap Nin honowok, ono Ai nala kemen maki namwali honoi kanani pair ika nik dohohale nin hunukum.

<sup>18</sup> Ai namkene paku maika lere ika lernala kenene panatal, ono An lernala kenene panatal noro apinpinha haenhi.

### 3

#### *Yesus kulu narehi Musa*

<sup>1</sup> Ende I wal'u na'ahoru ma namwali Makromod Lalap Nina ri, man Ai napolu leke lernala onno lolo a'am raram, wa'an rehi ika loi honorok Yesus eniyeni! Ika kauroin kokkoo nahenia Ai penia ma namwali iknik Imam Man Kulu Narehi, la Ai ma nodi Makromod Lalap Lirna Wawa'an loikaru ri mormori, la ik akin naili'il iknik Imam eniyeni.

<sup>2</sup> Yesus eni namkene derne nakani Makromod Lalap man kikan Ai leke howok Nina honowok, naise nonolu Musa namkene derne nakani ilitolle Makromod Lalap Nina Nakar Raram mamanji.

<sup>3</sup> Ik kodi wanakunu naho'ok nano ma nayapi nakar. Nadedem ma nayapi nakar lernala uli sa'a narehi nalewen nano nakar ma na'aririri onne. Yesus naise ma na'aririri nakar, de Ai penia man lernala honoor hanawe noro ul'uli sa'asa'a ma narehi nalewen Musa.

<sup>4</sup> Memen nakar rahu na'akeme ri mormori hi'ie, maa ha wo'ira na'akeme lolo noho wawan, Makromod Lalap mehen hi'i.

\* 2:12 Mzm. 22:22, 23

\* 2:13 Yes. 8:17, 18

5 Musa onne namkene ilitolle Makromod Lalap Nina Nakar Raram, la an howok naise hophopon wahwahan man wa'an. An konohi ri man mori lere onne inhawe ma namwali lere eniyeni.

6 Enimaa, Kristus eni narehi nalewen Musa ono Ai namwali Makromod Lalap Anan. Ai namkene ilitolle Makromod Lalap Nina Nakar Raram eni naise anan mememen ma nodi molollo lolo aman nin nakar. Enla ika penia kamwali Ainin Nakar Raram horo kasala kerkerhe inhawe man ik akin naili'iledi me'e, la kamkene pu'ik heli Ai mehe.

*Yono ka'uluwaku kekerhe molmolle ri Yahudi lere minle noho mamun*

7 Ende derne makani inhawe man Roh Kudus wakunu lolo Horok Lap raram na'ahenia,  
“Lere eniyeni, lo'o mim derne Makromod Lalap Lirna,

8 yono hi'i uluwakun kekerhe  
naise mi upum a'um nonolu lere hi ramhara Mesir minle noho mamun onne.  
Lere onne hi ra'okuledi Makromod Lalap la ramhene derne rakani,  
penia hir kene Ai leke rauroin An pelek na'ahan, ee ka!

9 Makromod Lalap na'aheni heheni:  
Lolo noho onne mi upum a'um ken hi'i Ya a'ahan,

kade hir po'on Ya'u hi'i tanada man kar dodo'onnala makun anna weli'akka raram onne.

10 Enpenia Ya a'ahan hi, la Ya aheni,  
'Hi honorok akin ka namkene Maya'u me'e,  
la hi kar derne rakani Ainu'u wanakuku wanayo'o me'e.'

11 Ya ahan de Ya ahopo na'ahenia,  
'Hi lo'o kar rakan noho man Ya'u nonouwedi hi me'e,  
la kar lernala renren warwarna roro Maya'u lolo noho onne haenhi!' \*

12 I wal'u na'ahoru, madiyaka mi akim leke yon mi ri mahaku raram nodi hi'i dohohale mamani. Madiyaka mi akim naili'il wawa'an, leke yon wali kili'ur, de mako'u nano Makromod Lalap man mori laa ewi-ewi.

13 Yon hi'i heheni, maa akilere ida ma na'alapa ida akin leke yon dohohala paipudi mi, de nakoko mi akim kerhe. Hi'i ha man wa'an onne mamani hehen nanumene rakan lere noho nin man horu, lere ri kan wekel 'Lere eniyeni' me'e.

14 Ik koro Kristus kamwaliyedi mahaku, de ik kokala na'akeme man Makromod Lalap nala Jesus haenhi, horo ik kadiyaka ik akin leke namkene naili'il ha man ik dederne nonolu onne rakan lere noho eni nin man horu.

\* 3:11 Mzm. 95:7-11

<sup>15</sup> Yono hamlinu inhawe man horhorok lolo Horok Lap ma na'heni,

"Lere eniyeni lo'o mim derne Makromod Lalap Lirna Wawan, yono hi'i uluwaku kekerhe naise mi upum a'um nonolu lere hi ramhara nano Mesir minle noho mamun." \*

<sup>16</sup> Lere nonolu onne, Musa nodi hi ramhara noho Mesir, la an loikaru Makromod Lirna hi, maa hir hi'i uluwaku kekerhe mamani, de ramhene derne rakani!

<sup>17</sup> Enla anna wel'akka raram Makromod Lalap na'ahan man uluwaku kekerhe onnenihe, ono hir hi'i dohohala mamani, penia maki mouwedi lolo kalla.

<sup>18</sup> Ende Makromod Lalap nahopo na'henia,  
"Hi onne kar rakan noho man Ya'u nonou onne raram, de hi kar lernala renren warwarna lolo noho onne."

Lere onne Makromod Lalap kukul inhoi? An kukul ri ma na'uluwaku kekerhe ma na'okuledi Ai lolo noho mamun onnneni.

<sup>19</sup> Ende ik kauroin kokkoo nahenia ri onnenihe kar rakan noho onne raram, la kar lernala renren warwarna lolo onne, ono akinhe ka naili'il Makromod Lalap.

## 4

*Makromod Lalap nou nala  
Nin renren warwarna maika*

<sup>1</sup> Makromod Lalap nou nahenia inhoi ma akin naili'il Ai, ri onne lernala Nin renren warwarna man An nouwedi

nonolu me'eni, la nano nonolu rakan lere eniyeni Nina nou onne aile makun. Ende madiyaka mi akim wawa'an leke mi na'akeme lernala renren warwarna onne.

<sup>2</sup> Lira Wawa'an onne loikaruwedie maika me'e naise nonolu loikaruwedie ik upud a'ad haenhi, maa Lir onne ka nala ha man wa'an ida hi, ono hi kar kokala la akin ka naili'il.

<sup>3</sup> Ik ma akin naili'il Yesus mehe lernala Nin renren warwarna man Makromod Lalap nouwedi me'e, maa ri ma akin ka naili'il kar lernala. Onne namnenehe noro inhawe man Makromod Lalap na'heni,

"Ya ahan de kikan hopo a'heni, 'Hi onne ka roro Ya'u ren warna lolo noho onne me'e.'

Hi kar lernala renren warwarna onne, kade Makromod Lalap na'akenedi renren warwarna onne nano lere Ai nakuku noho naleu a'am nonolu eni.

<sup>4</sup> Lolo Horok Lap raram horhorok ida aile man kukul lere alam wo'ikku onne na'henia, "Makromod Lalap howok lere alam woneme, la rakan lere alam wo'ikku eni An warnala nano Nin honowok na'akeme." \*

<sup>5</sup> Enla yon hamlinu horok namehin ma na'heni, "Hi onne kar rakan noho onne raram, de ka roro Ya'u lernala renren warwarna." \*

<sup>6</sup> Enpenia Makromod Lalap Nin panaeku nahenia ri mormori aile man lernala Nin renren warwarna, maa

man derne Lira Wawa'an nonolu enihe kar lernala ono hi kar derne rakani Makromod Lalap.

<sup>7</sup> Ende ik kauroin Makromod Lalap kan herre Nin panaeku onne makun, ono An nili lere alam worworu wali'ur leke rin lernala Nin renren warwarna. Ler alam worworu man An ninili onne An wekel, "Ler eniyeni!"

Ri ma kan derne nakani nonolu onnenihe morile Musa nin kulere, la nakawedi ku wo'iraha rakan Daud nin kulere mene Makromod Lalap konohi Daud na'ahenia,

"Lere eniyeni lo'o mim derne Makromod Lalap Lirna, yono ma'uluwaku kekerhe."  
\*

<sup>8</sup> Nonolu Yosua nodi ri Israel laa noho Kana'an, la hir lernala renren warwarna tarana lolo noho onne, maa ik kauroin Makromod Lalap kan wekel renren warwarna onne, ono An konohi Daud nahenia lere namehin ri ma akin naili'il Ai lernala Nin renren warwarna ma namlolo.\*

<sup>9</sup> Ende i wal'u na'ahoru, Makromod Lalap na'akenedi renren warwarna ma namlolo nala Nin ri, leke hir ren warna naise An ren warna lere wo'ikku nine haenhi, ono lere onne Ainin honowok horuwedi me'e.

<sup>10</sup> Ri na'akeme man lernala Makromod Lalap Nin renren

warwarna onne, hir warnala nano rir honowok naise Makromod Lalap warnedi nano Nin honowok lere wo'ikku nine onne.\*

<sup>11</sup> Ende wa'an rehi ik kahehe leke ik na'ahoru lernala renren warwarna man Makromod Lalap nouwedi me'eni, leke nano ik eniyeni yonde ri aile man lernohi ik upud a'ad rira hini'i wenewhe nonolue, penia wali kili'urne Makromod Lalap ono akin ka naili'il me'e, de kar lernala renren warwarna onne.

<sup>12</sup> Makromod Lalap Lirna Wawan namwali Lira man mormori la ma nodi molollo howok lolo ri honorok akin. Lirna Wawan onne naise raa ma namlorno kili'ur kalari, la nalhariyedi iknik honorok panaeku man susuwar eni, la ha'ar ri nin roh nano ri hamaran! Lirna Wawan penia nauroin ik honorok akin na'akeme, ono

<sup>13</sup> Makromod Lalap do'on la nauroin ha wo'ira na'akeme lolo noho wawan eniyeni. An do'on nauroin ha ma nasinuwari na'akeme, de lere man mai An hopon ik kala wanalhanne lolo iknik hini'i wenewhe na'akeme lolo Ai leken kalarna.

*Yesus namwali Imam Man  
Kulu Narehi*

<sup>14</sup> I wal'u na'ahoru! Makromod Lalap Anan Yesus namwali Imam Man Kulu Narehi. An laa a'am raram

\* **4:7** Mzm. 95:7-8 \* **4:8** Ul. 31:7, Yos. 22:4 \* **4:10** Tafsiran namehin na'aheni 'renren warwarna' wekel lere ik laa a'am raram, de kak howok lolo noho wawan me'e, la tafsiran namehin na'aheni 'renren warwarna' wekel lere ik ren warna nano nahehe mamani hi'i ha man wa'an leke lernala or'ori dardari onne, ono ik kak pu'ik heli iknik hini'i wenewhe me'e, maa ik pu'ik heli Makromod Lalap mamani ono ik kauroin Ai penia ma nala or'ori dardari maika.

minle Makromod Lalap leken kalaruna. Ende wa'an rehi ik kasala kerkerhe inhawa ma na'ono Yesus leke ik akin namkene naili'il.

<sup>15</sup> Ik eniyenihe ka karuri hi'i ha ma namlolo mamani, ono kamwali ri mormori ma nadedem mehe. Enimaa Yesus namwali iknik Imam Man Kulu Narehi ma nauroin kokkoo paku ika, ono lere An minle noho wawan An lernala kenene panatal nammori naise maika, maa Ai kan hi'i dohohalida.

<sup>16</sup> Ende yon kamkauk kak-pali Makromod Lalap hi'i lir napanak, ono Ai naramyaka ika, la kukul Nin aki man wa'an maika. Ai namre'e namharu la naramyaka ika, de lere ik kapanak An paku ika, Ai namkene paku.

## 5

<sup>1</sup> Nonolu lolo ri Israel, nadedem Makromod Lalap nili ri ida kikan namwali imam man kulu narehi leke ilitolle Nin honowok. Ri ma namwali imam man kulu narehi nadedem hi'i lir napanak la nodiyala ri mormori laa Makromod Lalap leken kalaruna. Imam onne nin honowok nesne ha mormori leke nodi na'ohu nahala rir dohohala, la nala rir honoi kanani namehin laa Makromod Lalap haenhi.

<sup>2</sup> Imam man kulu narehi onne namwali ri mormori ma nadedem naise maika, de ai ka naruri hi'i ha man wa'an mamani. Onne penia ai nauroin nodi wanakunu man mamamal wakunu noro ri man hi'i dohohala ma ka

nauroin kalla ma namlolo makun.

<sup>3</sup> Imam onne hi'i dohohala haenhi, de ai nodi honoi kanani nalle Makromod Lalap, la napanak Ai na'ohu nahala nin dohohala noro idewe ri Israel rira dohohala haenhi.

<sup>4</sup> Ri ka nadedem mehen kikan kemen namwali imam man kulu narehi nodi nin suk aimehi, maa Makromod Lalap mehe nili ri ma namwali imam onne leke ilitolle honowok eniyeni, naise Harun nonolu haenhi.

<sup>5</sup> Namnenehe onne, Kristus kan mehe na'uli nasa'a kemen, maa Makromod Lalap mehe nili Ai la kikan namwali Imam Man Kulu Narehi leke ra'uli rasa'e, la Ai na'aheni,

"Ya An'u O!

Lere eni Ya amwali O Ammu!" \*

<sup>6</sup> Lolo Horok Lap, Makromod Lalap Lirna namehin aile ma na'ahenia,

"O mamwali Imam laa ewi-ewi,

naise Melkisedek ma namwali imam nonolu eni." \*

<sup>7</sup> Lere Yesus aile mai noho wawan makun, An hi'i lir napanak wakau nodi mak oir lolo Makromod Lalap kalaruna. Ai nauroin Makromod Lalap mehe nodi molollo huriyedi Ai nano Nin makmaki onneni, maa Yesus derne nakani la horhawe mamani, de hurinohi kemen maki. Onne penia Makromod Lalap derne Ainin lir napanak haenhi.

\* 5:5 Mzm. 2:7 \* 5:6 Mzm. 110:4

<sup>8</sup> Yesus onne Makromod Lalap Anan mememen, maa An lernala hadwei hadwokor noro apinpinha namehin, penia eren dederne nakani Makromod Lalap.

<sup>9</sup> Makromod Lalap nodi kalla eniyeni hi'i Yesus namwali Rai Ma Nala Or'ori Dardari ma namlolo wake'e, la Ai onne namwali or'ori dardari onno, leke ri na'akeme man derne nakani Ai lernala or'ori dardari ma kan horu haenhi.

<sup>10</sup> Makromod Lalap kikan Ai namwali Imam Man Kulu Narehi naise rai Melkisedek nonolu eni.

*Wakuku wanakuku man hi'i ik akin eren namkekene lernohi Makromod Lalap*

<sup>11</sup> Ya'u raram nodi konohi mi panaeku nammori ma na'ono Yesus noro Melkisedek onne, maa mi honorok akin deul tana rehi makun, de nalo'ol mene mi mauroin.

<sup>12</sup> Mi ka mauroin wakuku ri namehin ha ma na'ono Yesus dedesne nine makun, kade mi akim naili'iledi nano nonolu me'e! Wa'an rehi mi mamwali man loikaru Lirn onne, maa onne ka namwali, ono mi ka mauroin haida-haida makun! Ende wa'an rehi mi mapanak rin mai wakuku mi! Mi eniyenihe maise tatana man huhuhu, de ka mauroin ma'ak makun!

<sup>13</sup> Ri ma naise tatana man huhuhu makun, wakuku ha ma na'ono Yesus dedesne nine mamani, de hi ka rauroin ewi ma namlolo noro ewi man sala lolo Makromod Lalap kalarna.

<sup>14</sup> Wanakuku man hi'i ik akin eren namkene onne

naise banana'an man ri lalap na'an. Ri man wakuku wanakuku onne, rir morimori namlolo wake'e. Hir loi honorok wanakuku onne mamani leke rauroin Makromod Lalap Nin honorok panaeku man wa'an, penia hi rauroin idewe inhawe ma namlolo noro inhawe man sala.

## 6

<sup>1</sup> Ende ya apanak I wal'u na'ahoru yono ik wakuku wanakuku dedesne nina mehe, maa na'amoli ik wakuku wanakuku man hi'i ik akin eren namkene haenhi, leke ik akin naruri naili'il wawa'an. Wa'an rehi ri man idedi nanumene akin naili'il Yesus, hi onne wakuku wanakuku ma na'ono Kristus dedesne nine. Wanakuku dedesne onne hopon hi herre rir hini'i wenewhe ma nodi ri laa makmaki, la wakuku hi leke akin naili'il Makromod Lalap.

<sup>2</sup> Wanakuku dedesne onne na'ono unulu tanada, kikan liman laa ri wawan, la konohi ika nahenia ri man makiyedi mori wali'ur. Wanakuku onne konohi ik nahenia lere man mai Makromod Lalap ho'ok kail ri na'akeme, la nala ri man ailanna hunukum laa ewi-ewi.

<sup>3</sup> Wanakuku dedesne onne wa'an la namlolo, maa ors eniyeni ik wakuku wanakuku man hi'i ik akin eren namkene, horo Makromod Lalap hari kalla maika.

<sup>4</sup> Lo'o ri aile ma akin naili'il wawa'an Yesus, maa hi'i kenekrohu ra'okuledi Ai leke rako'uwedi, hi onne kar

lernala leken wali wali'ur lernohi Yesus me'e. Nonolu hir min lolo Makromod Lalap Nin Ropropo, la kokaledi Nin rere'e haharu noro Nin Roh me'e.

<sup>5</sup> Hi rauroin kokkoo nahenia Makromod Lalap Lirna Wawan onne namlolo wake'e. Hir do'on rau-roinedi Makromod Lalap Nin molollo man lap wake'e lolol rir morimori, la hi rauroin Ai nodi molollo onne ku man mai eni haenhi.

<sup>6</sup> Enimaa lo'o hir hi'i kenekrohu ra'okuledi Makromod Lalap, kan hi'i hi derne rakani wali'ur me'e, ono hi kar herre rir morimori ma namehiyaleni wali'ur me'e. Nonolu hir derne rakani, maa ra'okuledi wali'ur, de rira hini'i wennewhe onne naise hi'i Makromod Lalap Ananne wair wali'ur lolo au kekiyowok la hadwei hadwokor lolo heri kalarna.

<sup>7</sup> Wanakunu eniyeni naho'ok naise ri mormori noro kirne! Ri aile man lernala wanakuku ma na'ono Yesus, la derne nakani Makromod Lalap mamani. Ai onne naise kirna man lernala okon, de au or'oriyana mori wawa'an, penia orkirna lernala ihin ennen nammori. Makromod Lalap namre'e namharu ri onne naise Ai namre'e namharu kirna onne haenhi.

<sup>8</sup> Enimaa ri ma na'okuledi Yesus onne naise kirna man au or'oriyana ruri roke mamani morile, de orkirna kan lernala haida-haida. Kirna onne Makromod Lalap nakineri la lere man mai

harnedi.

<sup>9</sup> I wal'u na'ahoru man ya aramyaka! Ai mala wanakunu naho'ok onne, maa ai kam wekel mi ono ai mauroin nahenia wallumhe kar hi'i heheni. Ai mauroin mim hi'i ha ma nahuwa'an Makromod Lalap akin. Mim hi'i ha ma nadedem ri man lernaledi or'ori dardari hihi'ie.

<sup>10</sup> Makromod Lalap kan hamlinu minima mahmaha awenne ilitolle Nin honowok, ono Ai namkene hi'i ha ma namlolo mamani. An horhorok nahenia mi maramyaka Ai mamani, penia mim ilitolle Nin ri nano nonolu rakan lere eniyeni.

<sup>11</sup> Ai mapanak yon maprehen, maa mampe'el maramyaka ri heri ri wali rakan noho nin man horu leke inhawe man Makromod Lalap nouwedi ki mi, onne namwali.

<sup>12</sup> Yon maprehen lernohi Makromod Lalap, maa madiyaka leke mi akim namkene naili'il mamani. Wa'an rehi mim teunohi ri ma akin naili'il wawa'an, ono hi rodi aki ma namkene weilapan hehen nanumene lernala inhawe man Makromod Lalap nouwedi hi eni.

*Ik akin nahuwa'anedi ono ik kauroin kokkoo Makromod Lalap Nin nou maika namwali*

<sup>13-14</sup> *Lere Makromod Lalap nala Nin nou ma namkene Abraham, Ai nahopo na'akerhe Nin nou na'ahenia, "Yo odi I Naran, Ya amre'e amharu o narehi nalewen, la Ya'u hi'i o upum anumhe nammori rehi."*\*

Ri kaale ma narehi nalewen Makromod Lalap, de Ai nahopo mehen wekel Naran.

<sup>15</sup> Ende Abraham akin namkene newek hehen nanumene nou ma namkene onne namwali.

<sup>16</sup> Nadedem lo'o ri nahopo, hir wekel ri man kulu narehi leke ri onne na'akerhe nin hope, de ri mahaku kan kawala.

<sup>17</sup> Enla Makromod Lalap nodi Naran nahopo na'akerhe Nin nou, leke ri na'akeme man lernala nou onnenihe rauroin kokkoo Ai kan herre Nin nou onne.

<sup>18</sup> Makromod Lalap naledi Nin nou noro Nin hopo maika leke na'alapedi ik akin, la Nin nou noro Nin hopo kan herre laa ewi-ewi. Ik kauroin Nin nou noro Nin hopo namwali, ono Ai ka napoho la kan herre inhawe man An nouwedi me'eni. Onne penia ika na'akeme lari laa Ai, ono ik kauroin mouropo nahenia inhawe man An nouwedi me'e onne ik lernala.

<sup>19</sup> Ik akin nawiya'ar Ai mamaani, naise kapal ma nina waku orkara rodi palipali, de ka nawollo. Ende Nin nou onne namwali kalla man du'ul kali ika koro Makromod Lalap leke ik lolo tapi man rodi kawkawa Makromod Lalap Nin Onno Man Moumou Dewdewe man aile Nin Romleu lolo a'am raram, leke min wewerre noro Ai.\*

<sup>20</sup> Yesus hari kalla maika ono Ai noluwedi laa Onno Man Moumou Dewdewe onne me'e, leke lere man mai ik lernohi Ai haenhi. Ai namwali iknik Imam Man Kulu Narehi laa ewi-ewi, naise rai Melkisedek nonolu eni.

## 7

*Imam Melkisedek kulu narehi nano Lewi upun anan ma namwali imam man kulu narehi*

<sup>1</sup> Nonolu Melkisedek eniyeni namwali kota Salem nin rai, noro idewe namwali imam man ilitolle Makromod Lalap Man Kulu Narehi Lap Narehi Nin honowok. Lere Abraham rehiyedi ara noro rai-rai man aile lolo onne, an wali laa nin nohe, maa kan rakan makun pakromo noro Melkisedek. Enla Melkisedek napanak Makromod Lalap namre'e namharu Abraham.

<sup>2</sup> Kame'ede Abraham nala Melkisedek hahaa man an lernale nano ara onne persen idaweli. Melkisedek onne narane napa'ahne, 'rai ma namlolo mamani,' la ai namwali 'rai ma nodi moiliwi mahuwele' haenhi, ono kota Salem onne narane napa'ahne, 'moiliwi mahuwele'. \*

<sup>3</sup> Ik ka kauroin Melkisedek eni upun a'an noro nin ri leleher inhoi, de ik ka kauroin ainina lere alam momori noro makmaki, maa ai eni namwali imam man kulu narehi naise Makromod

\* **6:19** Nonolu tapi kawkawa aile lolo Tenda man Musa hi'i, leke yon ri nadedem la Makromod Nin Onno Man Moumou Dewdewe raram. Maa oras eniyeni Yesus lariyala maika man pu'ik heli Ai lolo tapi kawkawa laa Onno Man Moumou Dewdewe lolo Romleu Lalap man aile a'am raram, leke ik koro Makromod Lalap minle wewerre. \* **7:2** NN. 14:17-20

Lalap Anan, ono ai namwali imam laa ewi-ewi haenhi.

<sup>4</sup> Ken ik horokala Melkisedek eni, ono ai namwali ri ma na'ono wake'e! Ik kauroin onne, ono ik upud a'ad Abraham nala Melkisedek persen idaweli nano nin hahaa lere onne.

<sup>5</sup> Makromod Lalap Nina keneri hono'ok hopon ri Israel puliwuku persen idaweli nano rira nahehe nawo'or ihin ennen rale Lewi upun anan ma namwali imam, kade Lewi upun anan onne na'akeme namwali Abraham upun ananhe haenhi.

<sup>6</sup> Melkisedek eni ka namwali Lewi upun anan, maa an lernala persen idaweli nano Abraham, la napanak Makromod Lalap namre'e namharu haenhi, kade Abraham eniyeni man lernaledi Makromod Lalap Nin nou ma namkene eni.

<sup>7</sup> Namlolo kokkoo, ri ma napanak Makromod Lalap namre'e namharu ri namehin, ai onne kulu narehi ri man kokala rere'e harharu onne.

<sup>8</sup> Ler nonolu onne, Lewi upun ananhe ma namwali imam nadedem lernala persen idaweli nano ri Israel, la imam onnenihe kar mori laa ewi-ewi ono hi ramwali ri mormori ma nadedem, de rakan rir lere horu, hir makiyedi. Enimaa ik kauroin nano Horok Lap raram nahenia Melkisedek man lernala persen idaweli onne mori mamani.

<sup>9</sup> Lo'o ik ka'heni Lewi upun ananhe ma nadedem puli persen idaweli nano

ri Israel lere li'ur onnenihe rala persen idaweli laa Melkisedek lolo hi upun a'an Abraham, iknik wakunu eni kan sala.

<sup>10</sup> Onne namlolo ono lere Abraham nala persen idaweli Melkisedek onne, ka ra'ori Lewi noro upun anan makun. Abraham namwali hi upun a'an de naise hi roro wewerre Abraham rala paipair onne Melkisedek.

*Keneri hono'ok man kikan Lewi upun anan ramwali imam herredi me'e*

<sup>11</sup> Lere Makromod Lalap nala keneri hono'ok ri Yahudi, An kikan Lewi upun ananhe mehe ramwali imam, la hopon hi wakuku ri Israel leke lernohi keneri hono'ok onne. Enimaa hirira honowok ka na'akuku na'anokor Makromod Lalap Nin panaeku wawa'an ono kan hi'i ri namlolo wake'e lolo Ai leken kalaruna. Ende Makromod Lalap hopon imam namehin mai naise Melkisedek. Imam woruworu eniyeni ka namwali Lewi upun anan naise Harun noro imam nadedem onne.

<sup>12</sup> Onne nin panaeku nahenia kanakarne man kikan Lewi upun anan ramwali imam onne herredi me'e, de Makromod Lalap Nin keneri hono'ok man kakar onne herredi haenhi.

<sup>13</sup> Keneri hono'ok onne herredi me'e ono Makromod Lalap niliyedi imam woruworu ma ka nano Lewi upun anan, maa Ai onne nano Yehuda upun anan ma ka nadedem namwali imam lolo kanakarne nonolu onne.

<sup>14</sup> Enla lolo Horok Lalap raram, ik kauroin nahenia ik Makromod Yesus namwali Yehuda upun anan, la Musa kan wekel Yehuda upun anan ramwali Makromod Lalap Nin imam.

<sup>15</sup> Ende ors eniyeni Yesus mai namwali imam naise Melkisedek nonolu eni, de ik kauroin mouropo nahenia Makromod Lalap herredi keneri hono'ok me'e.

<sup>16</sup> Keneri hono'ok nonolu onne kukul inhoi namwali imam, la kan kukul Yesus, ono ka namwali Lewi upun anan. Enimaa Makromod Lalap penia man kikan Yesus namwali imam worworu man mori laa ewi-ewi ono haida ka nano'onyak Ai!

<sup>17</sup> Onne naise horhorok aile Horok Lap raram ma na'aheni,  
“O eniyeni mamwali imam laa ewi-ewi  
maise imam Melkisedek.”\*

<sup>18</sup> Enla ik kauroin nahenia kanakarne man kikan imam ma aile lolo keneri hono'ok onne kar hewek nair me'e, ono keneri hono'ok onne ka naruri hi'i ik kamloko lolo Makromod Lalap leken kalarna.

<sup>19</sup> Keneri hono'ok onne kan hi'i ik kamwali ri molololo, de lere eni ik lernala kalla worworu man wa'an narehi nano kalla nonolu onne, ono ik kauroin Yesus nouwedi nahenia An hi'i ika kamloko lolo Makromod Lalap leken kalarna leke yon ik kako'u nano Ai me'e.

*Yesus namwali Imam Man Kulu Narehi Lewi upun*

### *ananhe*

<sup>20</sup> Ik kauroin panaaku ida wali'ur! Makromod Lalap kikan hopo lere Yesus namwali imam, maa Ai kan kikan hopo lere Lewi upun anan namwali imam.

<sup>21</sup> Lere Yesus namwali imam Makromod Lalap kikanedi hopo na'aheni, “Ya'u eni, MAKROMOD!

Ya'u kikanedi hopo me'e, de ka'u herre Ainu'u wanakunu ma na'ahenia,

‘O eni mamwali imam laa ewi-ewi.’”\*

<sup>22</sup> Makromod Lalap kikan hopo heheni leke ik kauroin Yesus penia ma na'akerhe Nou Worworu eniyeni, la Nou Worworu eniyeni wa'an narehi nano Nou Nonolu man ik kokala lolo keneri hono'ok onne.

<sup>23</sup> Lo'o ik hoiwuku Nou Worworu noro Nou Nonolu, ik do'on kauroin ha namehin ida wali'ur. Nou Nonolu nair imam nammori ono hi ramwali ri mormori nad-edem de ra'ileher la maki, mene namehin herre wali'ur,

<sup>24</sup> maa Nou Worworu eniyeni nair Imam ida mehe. Imam ida onne Yesus man mori laa ewi-ewi, de kar herre Ai, la Nin honowok nala'a mamani.

<sup>25</sup> Ende nano lere eniyeni rakan laa ewi-ewi, Yesus mehe nodi molollo huriyedi ri nano dohohala nin molollo, la lolo Yesus ri na'akeme man maiyedi Makromod Lalap lernala or'ori dardari ma kan horu. Ai nodi molollo eniyeni ono An mori laa ewi-ewi,

\* 7:17 Mzm. 110:4 \* 7:21 Mzm. 110:4

la namwali iknik Man Hemen lolo Makromod Lalap kalarna, la hi'i lir napanak mamani leke paku maika.

<sup>26</sup> Ende Yesus namwali Imam Man Kulu Narehi man wa'an wake'e ma nauroin paku ika. Ainin morimori moumou dewdewe lolo Makromod Lalap kalarna, la Ai kan hi'i dohohala wake'e, ono salida kaale raramne. Makromod Lalap nako'uwedi Ai nano ri man hi'i dohohala, la hopon Ai naikoro onno man kulu narehi na'akeme lolo a'am raram.

<sup>27</sup> Ai eni ka naise imam man kulu narehi namehin. Akilere hi ra'akene honoi kanani rale Makromod Lalap leke na'ohu nahala rira dohohala nanumene rala ri namehin rir honoi kanani haenhi. Yesus kan hi'i heheni, maa lere Ai nala kemen maki Ai namwali honoi kanani raram mehe laa ewi-ewi leke namlolo kokkoo na'ohu nahala iknik dohohala.

<sup>28</sup> Lere nonolu keneri hono'ok onne kikan ri mormori ramwali imam man kulu narehi, maa hi onne ka raruri hi'i ha man wa'an mamani ono hi ramwali ri mormori nadedem. Ende nakawedi anna wo'iraha mene Makromod Lalap kikan hopo na'akerhe Nin nou na'aheni Anan namwali Imam ma namlolo wake'e, la Ai onne Nin morimori moumou dewdewe laa ewi-ewi. Amin!

## 8

*Yesus namwali Imam Man*

*Kulu Narehi lolo Nou Wor-woru*

<sup>1</sup> Panaeku ma na'ono lolo iknik wanakunu eniyeni hi'i heheni: Ik lernaledi Imam Man Kulu Narehi man laedi a'am raram naikoro Makromod Lalap Ma Narehi Ma Nalewen herne malanna la rodi molollo wewerre.

<sup>2</sup> Ai namwali Imam Man Kulu Narehi man howok lolo Onno Moumou Dewdewe man aile lolo Makromod Lalap Nina Romleu Lape man aile a'am raram. Romleu Lap eniyeni namlolo wake'e ono Makromod mehen hi'ie, ka naise Nin Tenda man nonolu ri mormori hi'i lolo noho mamun onne.

<sup>3</sup> Keneri hono'ok kikan imam man kulu narehi na'akeme leke hi resne ha mormori rodi hoikani Makromod Lalap, la rodi ri nina honoi kanani namehin rala Ai haenhi. Onne namnenehe noro iknik Imam Man Kulu Narehi, de Ai nala honoi kanani haenhi.

<sup>4</sup> Ors eniyeni Yesus aile a'am raram, maa lere An minle noho wawan makun, Ai ka namwali imam, ono imam namehin aile ma nala honoi kanani lernohi keneri hono'ok onne.

<sup>5</sup> Hir ilitolle Makromod Lalap Nin honowok lolo Nin Tenda man aile lolo noho wawan onne, la Tenda onne naise na'oi Makromod Lalap Nin Romleu Lape man aile a'am raram. Ik kauroin onne ono Makromod Lalap konohiyedi Musa na'ahenia, "Madiyaka leke om hi'i Ainu'u Tenda onne lernohi kanakarn na'akeme man

Ya'u kukuledi ki o lolo wo'or tilu onne." \* Ende Makromod Lalap Nin Romleu Lap ma namlolo kokkoo aile a'am raram, la ma aile noho wawan onne naulinu nawali man aile a'am raram.

<sup>6</sup> Enla imam onnenihe kokala honowok lolo Tenda mai noho wawan eni, maa honowok man Yesus kokala onne wa'an narehi imam onnenihe rir honowok. Namnenehe onne Nou Worworu man Yesus nala maika eni naruri narehi nano Nou Nonolu onne, ono nala maika ha man ma'aruru narehi nano ha man keneri hono'ok onne nala maika.

*Nou Worworu naruri  
narehi Nou Nonolu*

<sup>7</sup> Keneri hono'ok ma namwali Nou Nonolu onne kan kuku kan nokor, de Makromod Lalap nala Nou Worworu wali'ur rodi herre.

<sup>8</sup> Makromod Lalap mehen kuku sala Nin ri ono hi kar derne rakani Ai, kade lernaledi Nou Nonolu onne me'e, de Ai na'aheni,\*

"Derne Ainu'u wanakunu eniyeni:

Ler man mai Ya'u hi'i Nou Worworu,

la Ya alle noho Israel noro luhu Yehuda.

<sup>9</sup> Nou Worworu onne ka naise Nou Nonolu man Ya aledi Yehuda upun a'an

lere Yo orokaru hi ramhara Mesir.

Hi onne kar derne rakani Ainu'u Nou Nonolu man Ya aledi hi eni, de lere onne ka'u peinohi hi me'e.

<sup>10</sup> Enimaa ors eni Ya'u konohi nahenia lere man mai Ya ala Nou Worworu eniyeni hair Israel upun anan na'akeme.

Ainu'u Nou Worworu hi'i heheni:

Na'amolia Ya ala Ainu'u keneri hono'ok naikoro hi honorokne, la horok loiledi hi akin.

Na'amolia Ya amwali hi Makromod Lalap, la hi ramwali Ainu'u ri.

<sup>11</sup> Lo'o ri kaale man wakuku hi ha ma na'ono Ya'u, kan hi'i haida ono Ya'u hi'iyedi hi na'akeme tatana lalapa rauroinedi Ya'u wawa'an me'e.

<sup>12</sup> Ya'u penia a'ohu ahala rir dohohala, la ka'u horhorok rir hini'i wenewhe man ailanna me'e." \*

<sup>13</sup> Ende lolo horok onne Makromod Lalap na'ono Nou Worworu, la kukul nahenia Nou Nonolu kar nair me'e. Enla ik kauroin nahenia ha man kar nair, lo'o ka nalo'ol moluloinedi me'e.

## 9

*Honoi kanani lernohi Nou Nonolu*

<sup>1</sup> Ors eni ik wakunu keneri hono'ok ma namwali Nou Nonolu. Memen Nou Nonolu onne wakuku ri Israel hi'i Makromod Lalap Nin Tenda leke ra'uli rasa'a Ai, la keneri hono'ok onne wakuku hi holoor halauk rala honoi kanani haenhi.

<sup>2</sup> Hi ra'ariri Tenda onne, la lolo Tenda onne raram

\* **8:8** Tafsiran namehin na'aheni 'Makromod Lalap mehen nala sala keneri hono'ok onne, ono ri kar derne rakani Ai, kade lernaledi Nou Nonolu onne...'\*

\* **8:12** Yer. 31:31-34

kanawa ida aile, de kawe namwali onno woro'o. Onno dedesne wekel 'Onno Man Moumou Dewdewe', la lolo onno onne rala wadu onno noro mei aile. Mei onne nadedem rala roti loile rodi hoikani Makromod Lalap.<sup>3</sup> Onno man aile lolo tapi wali eni, rin wekel 'Onno Man Moumou Dewdewe Wake'e'.

<sup>4</sup> Lolo onno raram onne honoi kanani onno man rodi mahe hi'ie aile noro Oplaha rodi panaku Makromod Lalap Nin nou, de rin wekel onne 'Oplaha Nou'. Honoi kanani onno onne nadedem rodi harna au hairne wala'ula'u, la Oplaha onne paharne rodi mahe hi'ie. Lolo Oplaha onne raram potol mahe aile penpenu noro hanana'an manna, la Harun nina au ke'ke'e'en ma napupul aile, la waku woro'o man Makromod Lalap horokedi keneri hono'ok idaweli enihe aile haenhi.

<sup>5</sup> Oplaha onne rala kerub woro'o man rodi mahe hi'ie loile aile wawan. Kerub onne kukul nahenia Makromod Lalap man siksik lerlere aile lolo onne.\* Kerub woro'o onne harhari liwarne lolo Oplaha anadunne wawan. Anadunne onne namwali onno ra'ohu rahala ri nin dohohala, maa ors eni ka a'amou a'aropo ha eniyeni na'akeme me'e.

<sup>6</sup> Ende Makromod Lalap Nin Tenda nonolu onne kakar naisa onne. Akilere imam ma nadedem laa tenda

raram ilitolle rir honowok lolo Onno dedesne onne,

<sup>7</sup> maa imam man kulu narehi mehen laa Onno Man Moumou Dewdewe Wake'e raram howok lolo onne. Ai kan laa Onno onne raram mamani, maa annida an laa raram mehe. Lere an la Onno onne raram ai nodi ha mormori rarna hoikani Makromod Lalap leke na'ohu nahala ai noro nin ri heri ri wali rira dohohala man hir hi'iyedi, maa ka rauroiroin eni.

<sup>8</sup> Imam man kulu narehi mehe laa Onno onne raram. Ende Roh Kudus nodi holoor halauk onne kukul mouropo maika nahenia lere onne kar hari kalla ri mormori ma nadedem makun leke roro Makromod Lalap pakromo lolo Onno Moumou Dewdewe Wake'e raram. Lo'o lere eni Tenda onne nainair makun, kalla kaale ri mormori ma nadedem pakromo noro Makromod Lalap.

<sup>9</sup> Onne na'akeme kukunohi maika nahenia honoi kanani noro hahaa namehin man imam lalape nala Makromod Lalap lolo Tenda onne, ka na'amou ri mormori honorok akin, kade hi rale honoi kanani noro hahaa onne mamani. Honoi kanani noro hahaa onne namwali henerun mehe ono honoi kanani ma namlolo kan mai makun.

<sup>10</sup> Keneri hono'ok man kakar hahaa noro honoi kanani onne kukul mehe nana'an nonomun noro holoor halauk man kakar

\* <sup>9:5</sup> Lo'o kerub onne liwarne aile la lo'o oin makan noro kemen naise Makromod Lalap Nin hophopon a'am raram, maa Horok Lap kan konohi mouropo kerub onne naise inhawe. Po'onala lolo kamus.

hi'ihehewi rodi oir leke ra'amou kemen. Ende keneri hono'ok onne na'ono hi kemen mehe, maa ka na'amou hi honorok akin. Makromod Lalap nala keneri hono'ok onne leke hir lernohie rakan lere Ai nala Nin Nou Worworu mai.

*Yesus nala kemen namwali honoi kanani ma nam-lolo narehi keneri hono'ok lo'olo'ol nina*

<sup>11</sup> Lere eniyeni Kristus ma namwali iknik Imam Man Kulu Narehi maiyedi noho wawan me'e. Ai nodi Nou Worworu ma nala rere'e harharu, moiliwi mahuwеле, noro or'ori dardari ma kan horu. Enla An maki, mori wali'ur mene laa Onno Man Moumou Dewdewe man Makromod Lalap na'akenedi lolo a'am raram me'e. Ai kan laa Tenda noho wawan nina, maa An laa Onno man wa'an narehi Tenda ri mormori hi'i mai noho wawan eni.

<sup>12</sup> Kristus laedi Onno Man Moumou Dewdewe Wake'e onne raram mehe laa ewi-ewi, la Ai ka nodi pipi rarna noro sapiyane rarna hi'i honoi kanani naise imam lolo noho wawan, maa Ai nodi Ai rarna namwali honoi kanani raram mehe. Ende Ai na'ohu nahala iknik dohohala, la An huriyedi ika nano dohohala nin hunukum laa ewi-ewi.

<sup>13</sup> Nonolu Makromod Lalap Nin keneri hono'ok kuku kalla leke ri mormori man 'morsو' ono larlewenedi keneri hono'ok onne, 'mou' wali'ur lolo keneri hono'ok onne kalarna. Keneri hono'ok ida hopon imam resne pipi noro sapi rala rarna loile ri onne

kemen leke 'mou' wali'ur. Keneri hono'ok namehin hopon imam harne sapi raranida hehen nanumene namwaliyedi apu la nala apu onne loile oir mene wetik ri kemen leke 'mou' wali'ur. Ende lo'o hi rodi pipi noro sapi rarna noro apu loile kemen leke 'mou' wali'ur,

<sup>14</sup> emene hi'ihehewi Yesus rarna ho'o? Makromod Lalap Nin Roh man mormori laa ewi-ewi nodi molollo Kristus penia Ai nala kemen Makromod Lalap namwali honoi kanani man moumou dewdewe ono Ai onne na'alehe dohohala wake'e. Ai rarna onne narehi nalewen, ono Ai penia na'amou ik honorok akin nano hini'i wenewhe ma nodi ik laa yakanne, leke ik ilitolle la ka'uli kasa'a Makromod Lalap man mormori manmani.

<sup>15</sup> Enpenia Kristus namwali man Hari Kalla Nou Worworu onne leke ri man Makromod Lalap napoluwedri me'eni, hir kokala rere'e harharu, or'ori dardari ma kan horu noro nou namehin na'akeme rakan laa ewi-ewi. Hir lernala ha wo'ira na'akeme eni, ono Yesus maki leke huri we'er hi nano rir dohohala man hir hi'iyedi lere Nou Nonolu onne nainair makun.

*Horok ma nakakar pusake, ri kan nair hehen nanumene man hi'ie maki*

<sup>16</sup> Lolo noho wawan eniyeni, lo'o ri ida hi'i horok man kakar nin pusake nale upun anan leke manarne, horok onne kar nair hehen

nanumene ri nauroin nahenia man hi'i horok onne makiyedi me'e.

<sup>17</sup> Ende lo'o man hi'i horok onne mormori makun horok onne kan min haida, maa rakan lere ri onne makiyedi mene nair horok onne.

<sup>18</sup> Onne namnenehe noro Nou Nonolu haenhi. Lo'o man maki rarna kaale, Nou Nonolu onne kan min haida. Ende imam nodi ha mormori rarna namwali tanada nahenia ha mormori maki namwali honoi kanani leke rodi rarna ra'ono rawinau Nou Nonolu onneni.

*Ha mormori rarna rodi ra'ono rawinau Nou Nonolu*

<sup>19</sup> Nonolu eni nadedem Musa napolu hair Israel mai-wuku mene konohi keneri hono'ok na'akeme man Makromod Lalap nanale hi eni. Onne horu, ai nala sapiyana noro pipi rarna loile oir. Horu, ai nala au hisop noro pip-dum wulu memere wuku nanumene ku'u laa rara ma nawa'awa'aha onne raram mene an we'ek laa horok lunlunna man horhorok Makromod Lalap Lirna onne, la we'ek ri Israel enihe haenhi.

<sup>20</sup> Musa mahan hi'i heheni, ai na'ahenia, "Rareni na'ono nawinau Makromod Lalap Nin Nou! Ai penia man hopon mi lernohi keneri hono'ok eni na'akeme."\*

<sup>21</sup> An we'ek rara wa'awa'aha onne lolo horok lunlunna horu, an we'ek rara onne laa Tenda noro hahaa na'akeme man hir nair rodi hoikani Makromod Lalap.\*

<sup>22</sup> Keneri hono'ok onne hopon hi rodi rara ra'amou na'akeki ha wo'ira na'akeme, la lo'o honoi kanani onne rarna kaale, ri kan lernala ampun nano rira dohohala.  
\*

*Yesus rarna namwali honoi kanani penia ik lernala ampun nano iknik dohohala laa ewi-ewi*

<sup>23</sup> Enla Makromod Lalap Nin Tenda lolo noho wawan eni, noro hahaa man nair lolo Tenda onne, nodi kunukunohi maika inhawé man aile a'am raram. Keneri hono'ok hopon hir nair ha mormori rarna ra'amou Tenda ma aile noho wawan onne noro nin hahaa, kalla namehin kaale leke ra'amou wali'ur. Enimaa rara rodi ra'amou ra'adewe hahaa man aile a'am raram onne narehi nalewen pipi noro sapiyana onne rarna.

<sup>24</sup> Tenda onne nodi kunukunohi maika naulinu nawali Tenda man aile a'am raram mehe. Kristus kan laa Onno Moumou Dewdewe raram man aile noho wawan, maa An laa a'am raram. An maki mori wali'ur mene laa a'am raram minle Onno Man Moumou Dewdewe ma namloleni, leke akilere An hemenala maika lolo Makromod Lalap leken kalarna hi'i lir napanak paku maika.

<sup>25</sup> Aki anna ri Yahudi ma namwali imam man kulu narehi rodi pipi noro sapi rarna laa Onno Man Moumou Dewdewe Wake'e raram, maa Yesus kan lernohi Yahudi rira hini'i wenewhe onne, ono Ai

\* 9:20 Kel. 24:6-8

\* 9:21 Im. 8:15

\* 9:22 Im. 17:11

nala kemen namwali honoi  
kanani nale Makromod  
Lalap raram mehe.

<sup>26</sup> Lo'o Kristus lernohi  
holoor halaauk onne, aki  
anna An lernala apinpinha  
mamani nano lere Makromod  
Lalap nakuku noho eni  
rakan lere eniyeni. Onne  
ka namwali, maa lere alam  
ma na'urani noho nina man  
horu eni, An mai noho  
wawan nala kemen maki  
raram mehe leke namwali  
hono'i kanani na'ohu nahala  
ri mormori rira dohohale.

<sup>27</sup> Onne naise Makromod  
Lalap Nin panaeku  
ma na'aheni, "Ri mormori  
na'akeme maki raram mehe,  
mene Makromod Lalap ho'ok  
kail hi."

<sup>28</sup> Enpenia namnenehe  
onne Kristus nala kemen  
maki raram mehe leke  
namwali honoi kanani  
na'ohu nahala ri nammori  
rira dohohale. Enla lere  
man mai An wali wali'ur  
mai noho wawan rewro'o  
nine, la lere onne Ai kan  
mai leke na'uvara ri nin  
dohohala me'e, maa An mai  
leke nala or'ori dardari ri  
man nenewek Ai enihe.

## 10

*Yesus namwali honoi  
kanani man kukkuku no-knokor*

<sup>1</sup> Keneri hono'ok onne  
kukunohi maika nahenia  
lere man mai Makromod  
Lalap nala maika hahaa  
ma namlolo, naise rere'e  
harharu, wawa'an rara'a,  
noro or'ori dardari ma kan  
horu. Ik kak kokala hahaa  
ma namlolo onne nano  
keneri hono'ok, ono keneri  
hono'ok onne naulinu nawali  
henerun mehe. Onne penia

keneri hono'ok nin honoi  
kanani onne kan huri ri  
Israel nano rir dohohala.  
Kade aki anna hi resne  
ha mormori rodi hoikani  
lernohi keneri hono'ok onne,  
maa onne kan hi'i hi ram-  
lolo lolo Makromod Lalap  
kalarna.

<sup>2</sup> Lo'o honoi kanani onne  
namlolo kokkoo na'amou rir  
dohohala leke ramlolo lolo  
Makromod Lalap kalarna,  
hi ka rala honoi kanani  
rapanak ampun wali'ur.  
Enima aki anna hi rodi  
hono'i kanani mai hoikani  
mamani, ono hi rauroin  
nahenia hi ka ramwali ri  
molololo makun, ono hi  
rokroku doho ra'uwarwara  
hala makun.

<sup>3</sup> Hir lernohi keneri  
hono'ok onne, maa aki  
anna rakan lere rala honoi  
kanani onne ra'ori honorok  
hi nahenia rir dohohala kan  
molu makun,

<sup>4</sup> ono memen namlolo  
kokkoo pipi ketawa noro sapi  
dalu rarna ka na'amoluloin  
riria dohohala.

<sup>5</sup> Onne penia lere Kristus  
mai noho wawan An konohi  
Makromod Lalap na'ahenia,

"Makrom'u, O ka mapanak hi  
rala honoi kanani noro  
hahaa ki O,

maa O penia ma'akene I  
kem'u

leke namwali honoi  
kanani Ya ale ki O.

<sup>6</sup> O kam suk honoi kanani  
man harna lolo honoi  
kanani onno,

noro honoi kanani  
namehin man hi rala  
ki O rodi herre rir  
dohohala.

<sup>7</sup> Enla ya a'ahenia, 'Makrom'u!  
Eni Maya'u!

Ya'u mai leke lernohi  
Num panaeku ma  
na'ono Maya'u man  
aile lolo Horok Lap  
eni." \*

<sup>8</sup> Lolo wanakunu onne,  
dedesne Yesus na'heni, "O  
ka mapanak hi rala honoi  
kanani noro hahaa namehin  
ki O. Okam suk ha man harne  
lolo honoi kanani onno noro  
ha namehin man hi rala ki O  
rodi herre rir dohohala." Ai  
na'heni heheni kade keneri  
hono'ok onne hopon hi rala  
honoi kanani onne.

<sup>9</sup> Enla Ai na'heni wali'ur,  
"Makrom'u! Eni Maya'u!  
Ya'u mai leke lernohi Num  
honorok panaeku!"

Ende ik kauroin nahenia  
Makromod Lalap herredi  
kanakarne lo'olo'ol leke nair  
kanakarne worworu.

<sup>10</sup> Yesus Kristus ler-  
nohiyedi Makromod Lalap  
Nin honorok panaeku, pe-  
nia An hi'i ika moumou  
dewdewe lolo leken kalaruna  
laa ewi-ewi. Onne namwali  
ono Ai nala kemen namwali  
honoi kanani maika raram  
mehe.

<sup>11</sup> Akilere Yahudi rir imam  
howok mamani rala honoi  
kanani ma namnenehe,  
maa honoi kanani onne ka  
na'amoluloin rir dohohala.

<sup>12</sup> Hi onne howok mamani,  
maa Kristus, iknik Imam  
Man Kulu Narehi, nala ke-  
men namwali honoi kanani  
raram mehe, leke na'ohu  
nahaledi iknik dohohala laa  
ewi-ewi. Ai namwali honoi  
kanani onne horu mene Ai  
naikoro Makromod Lalap  
herne malanna, ono Nin  
honowok onne horuwedi  
me'e.

<sup>13</sup> Nano lere onne Kris-  
tus namkene lapan hehen  
nanumene Makromod Lalap  
hi'i Nin arwali na'akeme lolo  
yawa Ai.

<sup>14</sup> Ende Ai nala kemen  
namwali honoi kanani  
raram mehe, la honoi kanani  
onne na'alolo Nin rileke ram-  
lolo wake'e lolo Ai kalaruna  
laa ewi-ewi. Enla Ai na'amou  
na'adewe ri onnenihe ono Ai  
penia ma na'ohu nahala rir  
dohohala.

<sup>15</sup> Panaeku onne namlolo  
ono Makromod Nin Roh  
kukunohi maika na'henia,

<sup>16</sup> "Makromod na'heni, 'Ler  
man mai Ya'u hi'i Nou  
Worworu noro Ainu'u  
ri.

Na'amolia Ya ala  
Ainu'u keneri hono'ok  
naikoro hi honorok la  
horok loile hi akin." \*

<sup>17</sup> Ai na'heni wali'ur,  
"Ya'u penia ma na'ohu na-  
hala rir dohohala,  
la ka'u horhorok rir  
hini'i wenewhe man  
ailanna me'e." \*

<sup>18</sup> Ende lere eniyeni ik  
kauroin kokkoo nahenia  
Makromod Lalap na'ohu  
nahaledi iknik dohohala  
me'e, de yon ik hi'i honoi  
kanani onne me'e.

*Yon kako'u Makromod  
Lalap*

<sup>19</sup> I wal'u na'ahoru! Lere  
nonolu onne lo'o imam  
man kulu narehi laa Onno  
Moumou Dewdewe Wake'e  
raram ka nodi rara ai  
namka'uk, maa ors eni  
ik ka kamka'uk kakpali  
Makromod Lalap me'e, ono  
Yesus na'ohu nahaledi iknik  
dohohala lolo rarna ma  
nakliu eni me'e.

<sup>20</sup> Yesus Nin makmaki onne hari kalla worworu ma nala or'ori dardari ma kan horu maika. Ai kemen namnenehe noro tapi man rodi kawkawa Onno Moumou Dewdewe Wake'e onne, de lere Ai nala kemen maki, tapi man rodi kawkawa Onno onne hariyedi kalla maika leke laa raram.

<sup>21</sup> Yesus eniyeni namwali iknik Imam Man Kulu Narehi, la Ai nodi molollo Makromod Lalap Nina Nakar Raram!

<sup>22</sup> Ende mai ik kauroani Makromod Lalap kodi honorok aki man moumou, noro aki ma naili'il kokkoo. Ik kauroinedi An kokala ika, ono Yesus Kristus rarna na'amouedi ik honorok akin me'e, de kan horhorok iknik dohohala me'e, la Ai nodi oir na'amouwedi ik kemen, leke namwali tanada nahenia ik kemen moumou dewdewe lolo Ai leken kalarna me'e.

<sup>23</sup> Kasala kerkerhe inhawé man ik akin naili'il leke kamkene pu'ik heli Yesus mamani, ono ik kauroin nahenia Makromod Lalap namkene mamani, la Ai namkene hi'i Nin nou na'akeme namwali maika!

<sup>24</sup> Loi honorok leke ik ida ma na'alap ida akin, la ika ida man pakuwala ida wawa'an, leke ik karamyaka ri heri ri wali la ik hi'i ha man wa'an mamani.

<sup>25</sup> Ri heruwali raprehen lawuku ra'uli rasa'a Makromod, de yon lernohi hi, maa wa'an rehi kampe'el lawuku leke ik ida man nounaku ida, la ida ma na'alap ida akin leke eren naruri nailili'il

ono kauroinedi lere Makromod Yesus Nin maimai eni na'uraniyedi me'e.

*Yon mi akim nahinuri  
Yesus*

<sup>26</sup> I wal'u na'ahoru! Lo'o ik kokaledi Makromod Lalap Lirna ma namlolo eni, maa ka nalo'olo ik ka'okuledi Ai wali'ur, la hi'i dohohala mamani, honoi kanani kaale kodi herre iknik dohohala onne. Lo'o ik hi'i heheni, ik kak lernala ampun wali'ur,

<sup>27</sup> maa ik kamka'uk manani newek lere Makromod Lalap ho'ok kail ika, ono lere onne Ai nodi aiye man mormori herre Nina ahan la harne is'isnedi ri ma na'okuledi Ai enihe!

<sup>28</sup> Lere nonolu lo'o ri woro'o wokelu po'on ri ida hi'i ha man sala, la kukumaka nahenia ri onne na'okuledi Makromod Lalap Nin keneri hono'ok, idewe imam ka nala ampun, maa hukumesne ri man sale onne.

<sup>29</sup> Ri ma kan derne nakani Makromod Lalap Nin keneri hono'ok onne me'ene lernala hunukum heheni, de lo'o inhawé namwali noro ri ma na'okuledi Yesus? Hir lernala hunukum man werek wake'e, ono ra'okuledi Makromod Lalap Anan. Ri ma na'okuledi Yesus, namnenehe hi ra'ihoru ra'idaru Yesus rarna ra'aheni rarna onne ka na'amou na'adewe maika, la hir wakunu nano'onyaka Roh Kudus ma nala rere'e haharu man wa'an maika eni.

<sup>30</sup> Ik kauroin Makromod Lalap inhoi. Ai peni na'aheni, "Ya amwali man herre walha ri nin hini'i, la Ya amwali ma nala hunukum." Ai na'aheni

wali'ur, "Ya'u eni Makromod Lalap man ho'ok kail Ainu'u ri." \*

<sup>31</sup> Eih! Ik kamkauk rehi lernala Makromod Lalap man mormori laa ewi-ewi Nin hunukum onne!

<sup>32</sup> Yon hamlinu! Nonolu, mim lernala Makromod Lalap Nin Ropropo lolo mi raram ono derne makani panaeku ma na'ono Ai. Ler onne, kade mim lernala apinpinha wake'e, maa mi mamkene lernohi Ai la mi akim naili'il mamani.

<sup>33</sup> Ler romromo rin hadwei hadwokor la hi'i apinpinha mi lolo heri kalarna, la lere namehin mi ka mamka'uk paku ri man mahan lernala wewerek pananaka, kade mim lernala wewerre haenhi.

<sup>34</sup> Mi maramyaka ri man aile bui raram de paku, la lere ri nahoro minim hahaa, mi kam walha haida, maa akin nahuwa'an mamani ono mauroin nahenia minim linikir kanaru namehin aile makun. Kanaru onne narehi nalewen minim hahaa man ri nahohoro onne, la kanaru onne namkene rakan laa ewi-ewi.

<sup>35</sup> Ler onne mi akim ka nado'o wake'e, de yon huri mi akim ma naili'il onne. Lo'o mi akim naruri naili'il Yesus mamani, lere man mai mim lernala mahmaha kolkoli man wa'an narehi ma aile a'am raram.

<sup>36</sup> Yon pelek mi akim towor, maa hi'i mi akim namkene mamani, leke mim hi'i wewhe Makromod Lalap Nin panaeku na'akeme. Lo'o

mim hi'i heheni mim lernala inhawa man nouwedi me'eni,

<sup>37</sup> ono lolo Horok Lap raram horhorok aile ma na'ahenia,

"Ka nalo'ol me'e, Ri Man Mai onne mai me'e.

<sup>38</sup> Ainu'u ri ma namwaliyedi ri molololo Ya'u leken kalarna,

hi onne akin naili'il mamani de mori laa ewi-ewi, maa lo'o hir waliyedi kili'ur Maya'u,

Ya a'ahan hi." \*

<sup>39</sup> Enimaa ika eniyenihe ka kamwali ri man wali kili'urn de makileken, maa ik kamwali ri ma akin naili'il mamani de lernala or'ori dardari ma kan horu eni!

## 11

*Wa'an rehi ik mori lernohi  
ri man akin naili'il*

<sup>1</sup> I wal'u na'ahoru, lolo wanakunu eniyeni ik wakunu panaeku ma na'ono hi'ihehewi ik akin naili'il Makromod Lalap. Lo'o ik akin naili'il Makromod Lalap, ik kauroin mouropo nahenia inhawa man An nou maika namwali, kade kak do'on ha onne namwali makun.

<sup>2</sup> Ik upud a'ad nonolu akin naili'il, de Makromod Lalap akin nahuwa'an noro hi.

<sup>3</sup> Ik akin naili'il, de kauroinedi nahenia Makromod Lalap nodi Lirna Wawan nakuku noho la naleu a'am eniyeni. Ai ka nodi hahaa man ik dodo'on lolo noho eni wawan hi'i ha wo'ira

\* 10:30 Ul. 32:35, 36 \* 10:38 Hab. 2:3-4

na'akeme eniyeni, maa nodi  
Lirna mehe!

<sup>4</sup> Habel akin naili'il penia nala honoi kanani Makromod Lalap man wa'an narehi mo'oniwalla Kain. Makromod Lalap kokala honoi kanani onne, la na'aheni Habel namwali ri molololo lolo leken kalaruna ono akin naili'il. Habel makiyedi me'e, maa nin hini'i wenewhe onne namwali wanakuku wanayo'o maika rakan lere eniyeni.

<sup>5</sup> Henok haenhi, ai akin naili'il penia kan maki, maa lere an mormori makun Makromod Lalap kikan ai nano noho wawan, de ri mahaku kan do'on ai me'e. Lere Makromod Lalap kan kikan Henok makun, Ai na'aheni lolo Horok Lap raram, "Henok onne nahuwa'anedi Ya akin." \*

<sup>6</sup> Ri ma akin naili'il Makromod Lalap, ai mehen hi'i Makromod Lalap akin nahuwa'an, ri namehin ka! Lo'o ri akin namrana na'urani Makromod Lalap, wa'an rehi ai onne akin naili'il kokkoo de nauroin nahenia Makromod Lalap aile, la Ai nala wanalha man wa'an ri na'akeme ma nampe'el nanoin Ai. Ri ma akin ka naili'il heheni, Makromod Lalap kan kokala!

<sup>7</sup> Nuh akin naili'il, de derne nakani Makromod Lalap Nin konomdere. Makromod Lalap konohi ai ha rahu man An hi'ie lere man mai eni, de Nuh nayapi kapal, kade kan do'on ha onne namwali makun. Onne penia ai noro

nakar raram kar maki maa mori lolo kapal onne raram, la nin hini'i wenewhe kukul nahenia noho wawan onne sala wake'e penia hir lernala hunukum de maki mouwedi. Makromod Lalap na'aheni Nuh onne ri molololo Ai leken kalaruna ono ai akin naili'il wawa'an.

### *Abraham akin naili'il Makromod Lalap*

<sup>8</sup> Abraham akin naili'il Makromod Lalap, de an derne nakani lere hopon ai namhara nin nohe nala'a laa noho man ko'u, kade ka nauroin noho onne aile lolo ewi. Makromod Lalap nou nahenia lere man mai Abraham manarna noho onne.

<sup>9</sup> Ai akin naili'il Makromod Lalap Nin nou, kade ai noro upun anan Isak noro Yakup minle tenda raram lolo noho onne, naise ri man ko'u nin nohe. Makromod Lalap nou nahenia lere man mai hir manarna noho onne.

<sup>10</sup> Abraham min lolo tenda raram ono ai mahan newek kote man ma'aruru wake'e man Makromod Lalap mehen paeku la na'ariri lolo waku na'a'ar ma naruri.

<sup>11</sup> Ai akin naili'il, penia hono Sara moriyana, kade Sara tatana kaale raramne, la nin anna mormoriyana larlewenedi me'e. Makromod Lalap nala tatana Abraham ono ai nauroinedi kokkoo Makromod Lalap namkene hi'i Nin nou namwali.

<sup>12</sup> Lere onne Abraham na'ileheredi la kemen ka naruri me'e, maa hono moriyana. Eni penia ai upun

\* 11:5 NN. 5:21-24

anan nammori naise kaliyoro man minle a'am noro dosle man minle herraram.

<sup>13</sup> Hi onne na'akeme akin naili'il hehen nanumene maki. Hi kar kokala in-hawe man Makromod Lalap nouwedi mene hir maki, maa hir loiyedi honorok me'e nahenia ha onne na'akeme namwali lere man mai. Eni penia hi rauroin kokkoo nou na'akeme onne namwali lere man mai, de akin nahuwa'an mamani. Hi akin nahuwa'an newekala nou onne namwali de hi ra'aheni, "Lo'o ik kamwali do'on awan noro ma nala leliyara lolo noho wawan eniyeni, kan hi'i haida."

<sup>14</sup> Ri man wakunu naise onne kukul nahenia hi maha ranoin onno namehin namwali rir nohorai.

<sup>15</sup> Hi ka rahinorok rir nohorai ramharhara onne, ono ka ranoin kalla wali wali'ur,

<sup>16</sup> maa hi ranoin noho man wa'an narehi nalewen nano noho onne. Hi ranoin noho man aile a'am raram, de Makromod Lalap ka nawawa namwali hirira Makromod. An kokala hi, de Ai na'akenedi kote man wa'an hir minle me'e.

<sup>17-18</sup> Abraham akin naili'il, de lere Makromod Lalap mai kene Abraham hopon nala anan Isak namwali honoi kanani, Abraham namkene derne nakani. Lere nonolu Makromod Lalap nala Nin nou ma namkene Abraham na'ahenia, "Ler man mai nano anum Isak, o upun anumhe nammori naise Ya'u konohiyedi o me'eni." \* Kade

Abraham lernaledi Nin nou onne, maa an derne nakani mamani, de namkene nesne anan mahaku onne nale namwali honoi kanani.

<sup>19</sup> Abraham hi'i heheni ono nauroin kokkoo nahenia lo'o Isak maki, Makromod Lalap na'amori wali'ur. Ende onne naise Abraham kokala wali'uredi anan nano nina makmaki me'e.

*Isak, Yakup noro Yusup, akinhe naili'il Makromod Lalap*

<sup>20</sup> Isak akin naili'il, de ai napanak Makromod Lalap namre'e namharu anan Yakup noro Esau, la konohi inhawa ma namwali noro hi lere man mai.

<sup>21</sup> Yakup akin naili'il, de rakan nina lere alam na'akeki horu, ai napanak Makromod Lalap namre'e namharu Yusup ananhe, la ai nodi nina au ke'eke'en ke'enale leke namriri na'uli nasa'a Makromod Lalap.\*

<sup>22</sup> Yusup akin naili'il, de rakan nin leleher laa honon, an hopon walinhe na'ahenia, "Makromod Lalap nou nahenia lere man mai Nina ri Israel ramhara Mesir, de ma'akene manaku ya'u rurna hokon wawa'anedi leke modi mamhara Mesir." \*

*Musa akin naili'il Makromod Lalap*

<sup>23</sup> Musa nina ri leleher akin naili'il, de lere mori Musa, hir po'on tatane onne ma'aruru de hir suware wollo wokelu raramne leke yon rai Mesir nesne. Hi ka

\* 11:17-18 NN. 21:12  
13:19

\* 11:21 NN. 47:31-48:20

\* 11:22 NN. 50:24-25, Kel.

ramka'uk hi'i onne, kade lere onne rai Mesir komdere resne mouwedi Israel anan mo'onyana na'akeme.

<sup>24</sup> Musa akin naili'il, de lere an lapedi namhene rin wekel ai rai Mesir upun anan.

<sup>25</sup> Musa namhene hi'i dohohala leke lernala soksok murmura lere ida woro'o noro ri Mesir, maa ai nahenorok nahenia wa'an rehi lernala apinpinha wewerre noro Makromod Lalap Nin ri.

<sup>26</sup> Musa hi'i kenekrohu nahenia wa'an rehi lernala hadwei hadwokor noro ri Israel, ono ai nauroin lere man mai Makromod Lalap kikan Kristus namwali Rai, la Ai onne mai nano ri Israel onne. Ende ai akin naili'il nahenia linikir kanaru man Makromod Lalap nala lere man mai, wa'an narehi nano Mesir nin linikir kanaru na'akeme.

<sup>27</sup> Ai akin naili'il, de lere ai namhara Mesir ka namka'uk rai nin ahan. Ai namkene mamani, ono an do'onedi Makromod Lalap man ri ka nadedem dodo'onnala.

<sup>28</sup> Musa akin naili'il, de hopon ri Israel hi'i Lere Alam Lalap Paska, la an hopon wetik rara lolo rir nakar nin nike heneli, leke lere Makromod Nin hophopon a'am raram mai leke nesne tatan anulu lolo noho Mesir, ka nesne Israel anan anulu enihe.

<sup>29</sup> Ri Israel onne akin naili'il, de Kahi Memere onne nahina'ar namwali woro'o leke hi rala'a lolo onno ma napro'uk, maa kahi onne uin mouwedi ri Mesir man lernohi enihe.

### *Ri nonolu man akin naili'il Makromod Lalap*

<sup>30</sup> Ri Israel akin naili'il penia hir laliwewer kota Yeriko lere wo'ikku raram mene kota onne nina lukur lapa napye'er.

<sup>31</sup> Lere onne ri Israel ida woro'o mai kokolo ra'inau kota Yeriko leke rauroin naruri, ee ka, la Rahab ma namwali maekyaka onne kokala hi wawa'anedi ono ai akin naili'il Makromod Lalap, de kan maki wewerre noro ri ma kan derne nakani Makromod Lalap lolo kota onne raram.

<sup>32</sup> Nammori makun man ya'u raram nodi wakunue, maa leken kaale wakunu ma na'ono Gideon, Barak, Simson, Yefta, Daud, Samuel, noro nabi-nabi namehin.

<sup>33</sup> Hi onne na'akeme akin naili'il Makromod Lalap penia hir hi'i heheni: Hi heruwali rarehiyedi hair-hair, heruwali ramwali ma nodi molollo ma namlolo lolo rir lekloi, la heruwali lernala inhawe man Makromod Lalap nouwedi. Heruwali hi'i singe kan werre wawan,

<sup>34</sup> heruwali kar maki lolo aiye man mormori lalap raram, la heruwali rahale nano ri ma nodi raa dare. Heruwali ka raruri me'e, maa lernala ruri wali'ur, penia raruri wake'e rehiyedi ara roro rir arwali man mai nano kote namehin.

<sup>35</sup> Maeke ma akin naili'il lernala wali'ur rir ri man makiyedi maa mori wali'ur.

Ri namehin ma akin naili'il aile ma ne'e lernala apinpinha noro makmaki ono hi ramhene ra'okul Makromod Lalap. Hi rahinorok nahenia

lo'o makiyedi, ka ramkene lolo makmaki onno, maa mori wali'ur la lernala or'ori dardari man wa'an narehi.

<sup>36</sup> Heruwali lernala hadwei hadwokor, riuk rerhe, rodi rantan wuku, la rala laa bui raram.

<sup>37</sup> Heruwali rodi waku wasle hehen nanumene maki, rodi ne'er ne'er ramwali woro'o, rodi raa daresne. Heruwali rir nainair kaale de rodi pip-dume noro pipi ketawa ulikne hi'i nainair lalaa mamai. Heruwali ra'alehe haida-haida, heruwali lernala nuknukur noro apinpinha nammori.

<sup>38</sup> Hir lalaa mamai lolo wo'or mamun, la minle ku'il-ku'il noro lo'o-lo'o ma aile wo'or. Noho wawan eni namehiyala de ka namwali onno man wa'an hir minle!

<sup>39</sup> Ri onne na'akeme hi'i Makromod Lalap akin nahuwa'an ono hi akin naili'il Ai wawa'an, maa lere onne hi kar lernala ha ma na'ono man Makromod Lalap nouwedi hi makun,

<sup>40</sup> ono Ai na'akenedi nou man wa'an narehi nala maika leke ik koro hi lernala wewerre. Ende Nin panaeku ik koro hi lernala Nin nou onne wewerre, leke ik na'ahoru kamwali ri ma namlolo wake'e lolo Ai leken kalarna.

## 12

*Nounaku lernohi Yesus  
Nin hini'i wenewhe*

<sup>1</sup> I wal'u na'ahoru! Ik kauroin nahenia ri ma akin naili'il nonolu onnenihe mahar lawuku po'on ika, la hi ramwali kunukunohi leke ra'alapa ik akin! Iknik

morimori lolo noho wawan eniyeni naise ma na'ohi larlari! Ende wa'an rehi ik sopoledi hahaa noro dohohala ma namwali ew'ewek kawkawa, leke ik kamkene lari kokkoo lolo kalla man Makromod Lalap kukuledi maika eni.

<sup>2</sup> Yon po'on laa mariri malanna, maa po'on mehe Yesus. Ai penia ma na'ori honorok maika leke ik akin naili'il Ai mamani, la An hi'i ik akin namkene naili'il Ai rakan lere An mai wali'ur. Yesus kerhu apinpinha hehen nanumene maki lolo au kekiyowok. Nadedem ri man maki lolo au kekiyowok nawawa wake'e, maa Yesus ka nawawa ono Ai nau-roin nahenia Nin wewerek pananaka onne horu, An lernala rere'e harharu lolo a'am raram ma nahuwa'an Ai akin wake'e. Enla lere eniyeni Ai naikoro lolo Makromod Lalap herne malanna rodi molollo wewerre.

<sup>3-4</sup> Yon hamlinu nahenia Yesus me'ene lernala nuknukur noro apinpinha nano ri man ailanna ma kar suk Ai, leke yon mi akim tana, maa mi akim eren namkene naili'il mamani, la madiyaka leke mampe'el hi'i ha man wa'an mamani. Kade ri aile man hi'i sus mi mamani, maa mi kam lernala makmaki naise Yesus makun.

<sup>5</sup> Yon hamlinu Horok Lap Lirna ma na'alap mi akim! Horok Lirna onne na'aheni Makromod Lalap napolu maika ananhe la Ai na'aheni,

"Makromod anan na'ahoru! Yom po'on lewen Makromod Lalap Nina wanakuku ki mi,

la lo'o An dadiyala mi yono  
mi akim tana,

<sup>6</sup> ono ri na'akeme  
man Makromod Lalap  
naramyaka, An nounaku  
la nukur. Onne namwali  
tanada nahenia mi mamwali  
Ai anan kkokkoo."\*

<sup>7</sup> Ende lo'o mim lernala  
apinpinha yon mi akim  
tana, maa kerhu mamani,  
ono mi mauroin nahenia  
apinpinha onne namwali  
nounaku noro nuknukur  
nano mi Ammu man aile  
a'am raram. Lolo noho  
wawan na'akeme paphe  
nadedem nala wanakuku  
noro nounaku ananhe, la  
lere romromo nukur hi  
haenhi!

<sup>8</sup> Makromod Lalap hi'i  
heheni noro Ai anan  
na'akeme haenhi, de lo'o mi  
kam lernala nuknukur la  
nounaku makun, onne nin  
panaeku mi ka mamwali Ai  
anan mememen!

<sup>9</sup> Lere iknik pape nukur  
maika, ik horhawe la derne  
kakani. Ende wa'an rehi  
ik derne kakani rehrehi  
lewlewen iknik Pape man  
aile a'am raram, leke ik  
lernala or'ori dardari ma kan  
horu!

<sup>10</sup> Ik kauroin nahenia lere  
tatana ik makun, iknika  
papa man aile mai noho eni  
wakuku la nala nounaku  
maika, maa rir wanakuku  
noro nounaku onne ka naise  
Makromod Lalap Nine, ono  
hir lernohi inhawe man hi  
rahinorok wa'an. Enimaan  
Makromod Lalap raram nodi  
wakuku la nala nounaku  
leke ik lernala ha man wa'an  
wake'e, leke kamwali ri man

moumou dewdewe naise Ai  
haenhi.

<sup>11</sup> Memen namlolo lere  
ik lernala apinpinha onne,  
ik kahere la sus rehi, maa  
lere man mai apinpinha  
onne hi'i ika kamwali ri  
man akin namrina namkai,  
la iknik hini'i wenewhe  
eren namlololo wake'e, horo  
nahenia ik derne kakani Nin  
wanakuku noro nounaku  
wawa'an.

*Ida man mori wawa'an  
noro ida*

<sup>12</sup> Ende i wal'u na'ahoru,  
yon mi akim tana, maa hi'i mi  
liman ein naruri, leke yon mi  
ein korno ruru me'e!

<sup>13</sup> Ma'adudu kalla leke mi  
walinhe ma akin ka naili'il  
wawa'an makun yon sus  
hir lole, maa hi akinhe eren  
naruri naili'il. Mi walin onne  
naise ri ma ein he'ehe'e de  
wa'an rehi lolo kalla ma  
namdudu la namnenehe  
onne, leke yon nediyawa,  
maa wa'an wali'ur.

<sup>14</sup> Mahehe leke ida man  
mori wawa'an noro ida, la  
madiyaka mi leke yon hi'i  
dohohala, ono lere man mai  
ri man moumou dewdewe  
lolo Makromod Lalap leken  
kalarna meher do'on Makro-  
mod.

<sup>15</sup> Madiyaka wawa'an  
leke yon mi ri mahaku kar  
peinohi Makromod Lalap  
Nin rere'e harharu de wali  
kili'urne. Yon mi ri mahaku  
mamwali naise au or'ori man  
ra'an meru, de nano'onyaka  
mi, penia ri nammori lolo  
kalla man laa yakan.

<sup>16</sup> Madiyaka wawa'an leke  
yono mim holi yak leke yak,  
la yon maise Esau ma kan

\* **12:6** Ams. 3:11-12

horhawe Makromod Lalap. Esau onne namwali Isak anan anulue, maa ai kan peinohi nin pusake, de nala walla herre noro ha ra'u ida mehe.

<sup>17</sup> Yono mim hi'i heheni, ono mi mauroin nahenia ka nalo'ol ne, Esau herredi nin honorok panaeku, de napanak an'anchedi leke aman namre'e namharu, maa kan yadi. Esau nahere la nahehe nanoin kalla leke lernala rere'e haharu wali'ur, maa leken kame'el.

*Ik mai Makromod Lalap man mori laa ewi-ewi*

<sup>18</sup> Mi eniyenihe kam lernala ha man hi'i ri Israel ramka'uk nonolu eni. Ler nonolu onne Makromod Lalap wakunu noro ri Israel lolo wo'or Sinai. Wo'or Sinai onne namwali wo'or nadedem, maa lolo wo'or onne hir do'on aiye man mormori noro aiye mahu nammori, noho ha'aha'a noro anna lalap.

<sup>19</sup> Enla hir derne neknekir lalap naise kowuri lirna, la derne Makromod Lalap wakunu nodi Lirna ma naruri wake'e, penia hi ramka'uk rehi. Ler onne kar kerhu derne Lirn onne de rapanak leke yon wakunu wali'ur noro hi.

<sup>20</sup> Hi ramka'uk maki, ono Lir onne hopon hi na'ahenia, "Lo'o ri mormori me inhawen memehe, mai rakan wo'or eniyeni, rodi waku waslesnedi." \*

<sup>21</sup> Inhawen man ri Israel do'on onne lewlewen, de hi'i hi ramka'uk rehi penia Musa

me'ene na'aheni, "Ya aruruwa'u la ya amka'uk rehi!" \*

<sup>22</sup> Enimaa mi eniyeni lernala ha man wa'an narehi onne! Ler eniyeni Makromod Lalap wakunu noro mi lolo Ai Anan mememen. Mim maiyedi wo'or Sion ma nam-lolo noro Kote Yerusalem man aile a'am raram. Makromod Lalap man mormori laa ewi-ewi minle kote onne. Lolo onne mim pakromo noro hophopon a'am raram riwriwan rahrahu man lawuku rahinara ra'uli rasa'a Makromod Lalap.

<sup>23</sup> Lolo onne, mim pakromo noro Makromod Lalap ananhe dedesneni, ma naranhe horokedi lolo a'am raram me'e. Mim pakromo noro Makromod Lalap man ho'ok kail ri mormori noho wawan eni na'akeme, la mim pakromo noro ri ma akin naili'il man makiyedi lolo noho wawan nonolu eni. Ri onnenihe ramwali ri molololo Makromod Lalap leken kalarna, la lere eniyeni moumou dewdewe naise ri ma na'alehe dohohala ida me'e.

<sup>24</sup> Mim pakromo noro Yesus haenhi. Ai penia Man Hari Kalla Nou Worworu ki mi. An maki, la rarna ma nakliu onne wa'an narehi Habel rarna, ono Yesus rarna huriyedi ika nano iknik dohohala. \*

<sup>25</sup> Ende nakinemen ki mi! Yom hi'i de kam derne makani Ai man loikaru Makromod Lalap Lirna Wawan eniyeni! Nonolu Musa loikaru Makromod

\* 12:20 Kel. 19:12-13 \* 12:21 Ul. 9:19

\* 12:24 NN. 4:10

## 13

*Hi'i hehewi leke kahuwa'an  
Makromod Lalap akin?*

Lalap Lirna Wawa'an ri Israel lolo noho wawan, maa hi kar derne rakani, de lernala hunukum. Ik kauroin Makromod Lalap wakunu noro ika nano a'am raram lolo Yesus man mehen mai noho wawan loikaru Lirna Wawa'an maika! Emene alhi'ihepe ik kak derne? Lo'o ik lernala hunukum, ee ka?! Namlolo kokkoo lo'o ik kak derne kakani ik lernala hunukum man werek wake'e!

<sup>26</sup> Lere nonolu onne Makromod Lalap wakunu noro ri Israel lolo wo'or Sinai eni, de Ai Lirna hi'i noho nado'odo'o. Enimaa lere eni An nou na'ahenia, "Ler man mai Ya ado'odo'o noho raram wali'ur noro idewe a'am haenhi." \*

<sup>27</sup> Makromod Nin wanakunu onne kukul nahenia lere man mai An do'o e'er mouwedi ha wo'ira na'akeme man An hi'i eni. Enpenia lere man mai Makromod Lalap naiye'eredi noho wawan eniyeni, maa inhawe man lernohi Nin honorok panaeku, onne mehe ka nawollo de namkene laa ewi-ewi.

<sup>28</sup> Ende i wal'u na'ahoru! Ik lernala onno lolo Makromod Lalap Nin Noho Worworu ma namkene laa ewi-ewi, de mai ik kapanak trimkasi mamaani, ka'uli kasa'a Makromod Lalap kodi aki man mou, horhawe la derne kakani Ai mamani.

<sup>29</sup> Ik horhawe la kamka'uk Makromod Lalap ma nodi molollo hukum ri, ono Ai onne naise aiye ma na'an mouwedi ha wo'ira.

<sup>1</sup> I wal'u na'ahoru, ya apanak mi ida ma naramyak ida naise ri ma na'unara noro ma na'umo'oniwali, ono mi mammwali mahaku lolo Kristus.

<sup>2</sup> Lo'o ri man mi ka mau-roroinala makun mai minim nakar, kokala wawa'anedi! Lo'o mim horhorok nahenia ri aile nonolu man kokala do'on awan lolo nakar, la pene'ek do'on awan onne ri mormori nadedem, maa ma namlolo hi onnenihe hophopon a'am raram!

<sup>3</sup> Ilitolle ri man minle bui raram naise moro minle bui raram wewerre. Pakuwala ri man lernala apinpinha naise mim lernala apinpinha wewerre haenhi.

<sup>4</sup> Ya'u hopon ri na'akeme horhawa hohoo, leke mo'oni maeke ida man horhawa ida. Makromod Lalap ho'ok kail ri na'akeme man holi yak leke yaka, la lerwa'u hailai.

<sup>5</sup> Yono hurinoi kupan nodi molollo minim morimori, maa hi'i mi akim nahuwa'anedi noro inhawe man mim lernaledi me'e, ono Makromod Lalap na'ahenia, "Ka'u hoikaru o memehedi, la ka'u huri we'er o laa ewi-ewi." \*

<sup>6</sup> Ende ik ka kamka'uk ka'aheni, "Makromod mehen paku ya'u, de ka amka'uk haida man ri mormori noho eni wawan hi'i maya'u." \*

<sup>7</sup> Yom hamlinu minim ri man panulu. Hi penia man dedesne loikaru Makromod

\* 12:26 Hag. 2:6

\* 13:5 Ul. 31:6, 8

\* 13:6 Mzm. 118:6

Lalap Lirna Wawan ki mi. Po'on wawa'an rir morimori rakan lere hir maki, la lernohi hi leke mi akim naili'il Makromod Lalap namnenehe hi akin naili'il haenhi.

<sup>8</sup> Yesus Kristus onne kar herre nano nonolu, lere eni, la rakan laa ewi-ewi.

<sup>9</sup> Yom lernohi wanakuku warna-warna ma nodi mi laa kalla yakanne. Kalle yakan onne naise Yahudi rir holoor halauk ma na'ono banana'an nonomun. Ri Yahudi onne lernohi holoor halauk nammori, maa onne ka na'aruri hi akin, la ka nala or'ori dardari ma kan horu hi. Wa'an rehi ik ka'alap ik akin noro Makromod Lalap Nin rere'e harharu man Ai naledi maika me'eni!

<sup>10</sup> Iknik honoi kanani lolo honoi kanani onno man aile a'am raram wa'an narehi hirira, ono Yesus penia namwali iknik honoi kanani leke na'ohu nahala iknik dohohala, la Ai nala or'ori dardari ma kan horu maika. Enimaa, ri aile man pene'ek keneri hono'ok nin honoi kanani onne hi'i hi ramwali ri molololo, de hir pu'ik heli keneri hono'ok onne makun. Hi onne kar lernala haida-haida nano Yesus Nin hini'i wenewhe onne.

<sup>11</sup> Nonolu imam man kulu narehi nodi ha mormori rarna laa Onno Man Moumou Dewdewe Wake'e raram, maa ha mormori man makiyedi onne rodi laa kote paharne mene harna.

<sup>12</sup> Onne namnenehe Yesus lernala apinpinha hehen nanumene maki lolo kota paharne. Lere onne Ai

nodi rarna mehe na'amou ri mormori nano rir dohohala.

<sup>13</sup> Ende yon ik lolo kalla namehin, maa kamkene lernohi Yesus mamani, kade rin hadwei hadwokor maika naise hir hadwei hadwokor Yesus lolo kota paharne haenhi.

<sup>14</sup> Lolo noho eni ik kak lernala kota ma namkene, maa ik akin naili'il nahenia lere man mai ik min lolo kota ma namkene laa ewi-ewi.

<sup>15</sup> I wal'u na'ahoru! Yesus penia man hi'i lir napanak la paku ika leke ka'uli kasa'a Makromod Lalap. Iknik ul'uli sasa'a onne namwali honoi kanani ma namlolo wake'e, de mai ik ka'uli kasa'a Ai mamani leke ri noho wawan na'akeme rauroin Ai onne namwali ik Makromod!

<sup>16</sup> Yom hamlinu hi'i ha man wa'an mamani, la wa'an rehi ik paku ri lolo rir lelehe loloi mamani. Hini'i onne penia namwali honoi kanani ma nahuwa'an Makromod Lalap akin.

<sup>17</sup> Horhawe minim man panulu la derne makani, ono Makromod Lalap hopon hi ilitolle ki mi leke mi akim eren namkene naili'il, la lere man mai hir konohi Makromod Lalap inhawa hir hi'iyedi me'eni. Derne makani hirira honopon modi aki man mou la lernohi, leke mi mahuwa'an hi akin. Lo'o kam derne makani, minim hini'i onne hi'i hi akin werek, la lo'o mim hi'i sus hi, onne kan paku mi haenhi!

<sup>18</sup> I wal'uhe, ya apanak mim hi'i lir napanak leke Makromod Lalap pakuwala

mayai. Ai mauroin nahenia ai modi honorok aki man mou la ai raram nodi hi'i ha ma namlolo mamani.

<sup>19</sup> Ya apanak an'anchedi mim hi'i lir napanak Makromod Lalap leke An hari kalla de ya'u pelek wali wali'ur ki mi.

### *Lir napanak man horu*

<sup>20</sup> Ik Makromod Jesus maki, la rarna rodi ra'ono rawinau Makromod Nin Nou Worworu. Enla Makromod Lalap na'amori Ai wali'ur nano Nin makmaki, la Ai namwali iknik Man Huri man wa'an, la ik kamwali Nin pipduma mememen! Ende ya'u hi'i lir napanak Makromod Lalap ma nala maika aki ma namrina namkai,

<sup>21</sup> leke Ai nala ha wo'ira na'akeme man wa'an ki mi, la ya apanak leke mi akim namkene naili'il, la mi mampe'el hi'i Nin panaeku mamani. Ya apanak Makromod Lalap howok lolo iknik morimori leke ik kahuwa'an Ai akin lolo Jesus Kristus! Mai ka'uli kasa'a Ai laa ewi-ewi. Amin!

### *Lir man horu*

<sup>22</sup> Horok eni deudeul tantana mehe, de ya apanak i wal'uhe derne makani ainu'u nounaku eniyeni.

<sup>23</sup> Ya'u kukunohi mi nahenia ik walin Timotius namharedi bui me'e. Lo'o an pelek mai ainu'u nakar, airo ki wewerre ka'arala mi.

<sup>24</sup> Konohiyala ainu'u tape masi rakanala minim man panulu enihe na'akeme noro idewe Makromod Lalap Nin ri ma aile lolo onne. Ik walin

ma nano Italia aku rir tape  
masi rakanala ki mi haenhi.

<sup>25</sup> Ya apanak na'amolia  
Makromod Lalap nala Nin  
rere'e haharu ki mi na'ahoru.

# Yakobus

## *Horok Lirna La'an*

Man hi'i horok eniyeni, Yakobus. Ri man wakuku la rauroin Horok Lap enihe pene'ek nahenia Yakobus eni Makromod Yesus mo'oniwalla man karuri (Mat. 13:55; Gal. 1:19). Yakobus eni namwali man panulu lolo Yerusalem nin kerei raramne (HN. 21:18; Gal. 2:9). Lere onne an hi'i horok eni aku laa Israel nin luhu-luhu idaweli woro'o man aiyedi noho wawan na'akeme me'e (1:1), maa Yakobus lirneni namwali lira man wa'an ri na'akeme lese haenhi.

Lolo horok eni, Yakobus konohi ika agame ma nam-lolo lolo Makromod Lalap kalarna (1:27). Ai na'aheni, "Lo'o ik ka'aheni ik akin naili'il Makromod Lalap, maa kak hi'i wewhe lernohi Nin honorok aki, onneni nin panaeku ik akin ka naili'il kokkoo, de kan min haida" (2:14-26). Horok eniyeni nin nounaku nammori aile man paku ika lolo iknik popono orereki akilere.

## *Horok Ihin*

1. Yakobus nala wanakunu man hari horok eni (1:1).
2. Ai nala wanakunu ma na'ono akin ma namkene naili'il noro woroin ma nano wawan (1:2-8).
3. Ai nala wanakunu ma na'ono ma na'alehe naulinu noro man karu (1:9-11).
4. Ai nala wanakunu ma na'ono kenene panatal

noro man ken patal (1:12-18).

5. An hopon ik derne kakani Makromod Lalap la hi'i wewhe Nin konomdere (1:19-27).
6. An hopon ika yon ka'ili kaloho ri (2:1-13).
7. Ai nala wanakunu ma na'ono ik akin ma naili'il noro iknik hini'i wenewhe man wa'an (2:14-26).
8. Ai nala wanakunu ma na'ono ri Kristen nuran wonohirn namal panaitne (3:1-18).
9. Ai nala wanakunu ma na'ono ri Kristen noro noho wawan (4:1-5:6).
10. Ai nala nounaku man horu (5:7-20).

<sup>1</sup> I wal'u na'ahoru, mi ri Yahudi ma namwali Israel nin luhu idaweli woro'o man aiyedi a'am lehern me'e, ya'u eni, Yakobus. Ya amwali Makromod Lalap Nin hophopon wahwahan man ilitolle Makromod Yesus Kristus Nin honowok. Ainu'u tape masi rakanala ki mi na'ahoru.

*Yon ik akin sus lere ik lernala wewerek pananaka*

<sup>2</sup> I wal'u na'ahoru wedi. Lere ik lernala wewerek pananaka warna-warna, yon ik akin sus, maa wa'an rehi ik akin nahuwa'an mamani,

<sup>3</sup> ono ik kauroin lo'o ik akin ka nado'o lolo iknik wewerek pananaka, ik akin eren narururi lernohi Makromod Lalap mamani.

<sup>4</sup> Lo'o ik akin ka nado'o hehen nanumene wewerek pananaka onne horu, Makromod Lalap nala ha man kukuku noknokor maika leke

kamwali ri ma namlolo ma akin namkene mamani.

<sup>5</sup> Lo'o i wal'uhe ka mauroin lolo kalla ewi ma namlolo, mapanak Makromod Lalap leke Ai nala woroin ki mi. Na'amoli Ai nala honorok aki man wa'an ki mi, ono ik Makromod raram nodi paku ri na'akeme lernohi Nin aki man mou eni, la Ai ka na'ahan ri ma napanak eni.

<sup>6</sup> Enimaa ma napanak onne nodi akin naili'il kokkoo, ono lo'o ik akin nado'odo'o, onne naise wo'o man anna huu laa ki laa mai.

<sup>7</sup> Ri onne yon pene'ek Makromod Lalap walha nin lir napanak ma naisa onne,

<sup>8</sup> ono ai akin woro'o de ka namkene lolo nin hini'i we-newhe na'akeme.

### *Orkanaru noro ri ma na'alehe naulinu*

<sup>9</sup> I wal'u ma na'alehe naulinu man lernohi Jesus enihe, yon mi akim sus ono mi ma'alehe haida-haida, maa muhuwa'anedi mi akim ono Makromod Lalap kikanedi mi mamwali Nin ri me'e.

<sup>10</sup> Enla mi Kristen man karu, muhuwa'anedi mi akim ono mi ma'adeul ma'atanedi mi akim me'e leke akim naili'il Jesus Kristus. Mi noro idewe minim kanaru na'akeme penia maisa audipi man lere eni aile, maa oreki moluwedi me'e.

<sup>11</sup> Lere eni audipi onne ma'aruru, maa rakan lere manha, namlau la nadiyau-redi, de kan ma'aruru me'e. Namnenehe noro ri man karu, lerida ai mahan na'olu nin hahaa, maa namlilinnohi an maki me'e.

*Lere ika lernala kenene panatal ma nodi ik kadiyaur dohohala, pu'ik heli mehe Yesus*

<sup>12</sup> Ri man kerhu wewerek pananaka, akin nahuwa'anedi, ono ri man kerhu hehen nanumene wewerek pananaka onne horu, an kokala mahmaha kolkoli ma namwali or'ori dardari man Makromod Lalap nouwedi nala ri na'akeme ma naramyaka Ai.

<sup>13</sup> Lere ik lernala kenene panatal ma nodi ika hi'i dohohala, yono ka'aheni, "Makromod Lalap ken patal ika," ono onne ka namlolo. Ha man ailanna ka nodi molollo ken patal Makromod Lalap leke hi'i yaksala, la Makromod Lalap kan ken patal ri leke hi'i yaksala,

<sup>14</sup> maa ri ma nadiyaur kenene panatal, nin monmono kamanna ma aile irhun raramne penia napi'u nawa'u ai de nakoko hi'i yakyak salsala.

<sup>15</sup> Lo'o ik lernohi monmono kamanna ma aile ik irhun raramne onneni, ik kadiyau-redi dohohala me'e. Enla lo'o dohohala na'a'aredi ik irhun raramne, onne nodi ika laa makimaki me'e.

<sup>16</sup> Ende, I walin man ya aramyak enihe, yono hurnohi panaeku ma na'aheni, "Makromod ken patal maya'u," mehem wukupoho mi.

<sup>17</sup> Ha na'akeme man wa'an la ma namlolo ik kokala nano ik Amad. Makromod Lalap hi'iyedi ha man ropropo na'akeme lolo a'am me'e, la ha ropropo onne lalaa

mamai de herherre mamani, maa Ai penia kar herre. Ai namkene nala Nin wawa'an rara'e maika mamani.

<sup>18</sup> Ai mehen hi'i kenekrohu konohi Lirna Wawan ma namloleni maika la nala morimori worworu maika lolo Lirna onne haenhi. An hi'i onne leke ik kamwali ananhe ma na'ono narehi Nin hini'i na'akemeni.

*Yon derne Lirna Wawan mehe, maa hi'i wewhe haenhi*

<sup>19</sup> I walin man ya aramyaka enihe, horhorok ainu'u nounaku enie. Yon ika pelek wakunu la yon pelek ka'ahan, maa kahehe leke ik kamkene derne,

<sup>20</sup> ono ri man pelek na'ahan kan hi'i ha ma namlolo ma nahuwa'an Makromod Lalap akin.

<sup>21</sup> Ende sopoledi iknik hini'i wenewhe man diwar dawar noro ailanna na'akeme man ik kadedem hi'i wewhe! Mai kodi honorok aki ma kan holi kukulu lalap, leke kokala Makromod Lalap Lirna man kamanedi ik akin me'e, ono Lirna Wawan onne penia nodi molollo huri we'eredi ika nano dohohala nin molollo.

<sup>22</sup> Yono ik derne mehe kakani mehe Makromod Lirna Wawan eni, maa hi'i wewhe lernohi inhawa man Makromod Lalap na'ahehenie! Lo'o ik kakani mehe, maa kak hi'i wewhe, ik mehe wukupohedi ik kemen me'e.

<sup>23</sup> Ri man derne Makromod Lalap Lirna Wawan, maa kan hi'i wewhe lernohie, namnenehe noro ri man koklolo oin makan lolo kokaka oi,

<sup>24</sup> maa nala'a ne, idewe hamlinuwedi oin makan me'e.

<sup>25</sup> Ende wa'an rehi ik koklolo ka'inau Kristus Nin keneri hono'ok ma namlolo wake'eni, la hi'i wewhe mamani. Nina keneri hono'ok onne penia nodi molollo huri we'er ika nano dohohala. Yon ik derne Nin keneri hono'ok la idewe hamlinu, maa ik hi'i wewhe haenhi. Makromod Lalap namre'e namharu ri man hi'i wewhe onne na'akeme.

*Agame ma namlolo lolo ik Makromod kalarna*

<sup>26</sup> Yono hi'i nahenia ri aile ma nampe'el laa kerei, maa ka nadiyaka nuran wonohirn namal panaitne. Ri onne mehen wukupohedi kemen me'e, la nina lalaa kerei onne kan min haida.

<sup>27</sup> Agame ma namlolo kokkoo lolo ik Amad Makromod Lalap kalarna, onne ik karamyaka la paku tatana ana'a re'e noro re'eyaka walumyaka ma na'alehe naulinu. Enla kadiyak ik kemen leke yono noho wawan nin honorok panaeku man ailanna nano'onyaka ika.

## 2

*Yono holi na'ilil naloho*

<sup>1</sup> I walin man ya aramyaka na'ahoru. Ik akin naili'il Jesus Kristus, Ik Makromod Man Kulu Narehi Man Lap Narehi eni, de yon holi na'ilil naloho mai noho wawan.

<sup>2</sup> Lo'o orkanaru ida mai iknik konoro wuku rana'ukwuku, nair deli maha, hewek nair nainair ma'aruru. Enla ri ma

na'alehe naulinu mai wali'ur,  
an nair nainair periku  
paraku.

<sup>3</sup> Lo'o ik horhawa ri  
orkanaru onne de lariyale  
ka'heni, "Pape, lariyala,  
maikoredi kaderewawa'an  
onne," la ri ma na'alehe  
naulinu onneni, ik hopon  
na'ahenia, "Laa mamririyedi  
lolo enne," ka eni, ik hopon,  
"Mai maikoredi lolo elimo'o  
wawan eni."

<sup>4</sup> Lo'o ik hi'i heheni, ik  
holiyedi na'ilili nalohloho  
noro iknik ri heri ri wali, la  
ik ho'ok kailedi ri namehin  
kodi aki ma kan mou me'e.

<sup>5</sup> I walin man ya aramyaka  
na'ahoru! Loi honorok  
ainu'u wanakunu eni  
wawa'an! Ri ma na'alehe  
naulinu enihe, kade hi ka  
ramwali orkanaru lolo noho  
eni wawan, maa Makromod  
Lalap kikanedi hi ramwali  
ri orkanaru lolo Ai leken  
kalarna ono hi akin namkene  
naili'il Ai. Makromod Lalap  
nodi molollo hi penia hir  
lernala Nin rere'e haharu An  
nouwedi ri ma naramyaka Ai  
me'e.

<sup>6</sup> Hi'ihepenia ik hi'i  
wawwawa ri ma na'alehe  
naulinu, maa horhawa ri  
orkanaru ma nadedem kerne  
dalha ika, la rodi ika laa  
hono'ok kanail onno leke  
tumdesne ika?! Kan wa'an  
ik hi'i heheni.

<sup>7</sup> Hi penia wahilei ra'idaru  
Yesus Kristus Naran man  
ik horhawe. Ai penia hi'i  
mi mamwaliyedi Makromod  
Lalap Nin ri me'e.

<sup>8</sup> Lo'o ik lernohi kokkoo  
iknik Rai Nin keneri hono'ok  
ma aile Horok Lape ma

na'ahenia, "Karamyaka  
iknik ri mormori wali naise  
karamyaka ik ihin kemen," ik  
hi'i ha man wa'an mamani.\*

<sup>9</sup> Lo'o ik holi na'ilili  
nalohloho, ik hi'iyedi do-  
hohala me'e. Namlolo, i  
wal'uhe, ik hi'iyedi dohohala  
ono ik larlewenedi keneri  
hono'ok onne me'e.

<sup>10</sup> Ri man derne nakani  
keneri hono'ok na'akeme,  
maa larlewenedi ida mehe,  
onneni namnenehe an lar-  
lewenedi Makromod Lalap  
Nin keneri hono'ok na'akeme  
me'e.

<sup>11</sup> Ai man hopon, "Yono  
lerwa'u hailai" na'aheni,  
"Yono resne ri" haenhi.  
Ende lo'o ik kak lerwa'u  
hailai, maa ik kesne ri,  
ik larlewenedi Nin keneri  
hono'ok me'e.\*

<sup>12</sup> Ende wakunu la hi'i  
wewhe ha man wa'an ono  
Makromod Lalap naho'ok  
nakail ika nodi Kristus Nin  
keneri hono'ok man huri  
we'er ri mormori eni.

<sup>13</sup> Ik hi'i heheni ono ri  
ma kan kukul aki man  
wa'an de nala ampun nin ri  
mormori wali lere eniyeni,  
Makromod Lalap kan kukul  
Nin aki man wa'an nala  
ampun ai lere An ho'ok kail  
ri na'akeme. Enimaa ri man  
kukul aki man wa'an nin ri  
mormori wali, ai onne kokala  
Makromod Nin raramyake  
lere ho'ok kail haenhi.

*Ik po'on ri nin hini'i we-  
newhe mene kauroin kokkoo  
ai akin namkene lernohi  
Makromod Yesus*

<sup>14</sup> I wal'u na'ahoru! Lo'o  
ik ka'aheni, "Ya akin naili'il  
Yesus," maa iknik hini'i

\* 2:8 Im. 19:18 \* 2:11 Kel. 20:13, 14, Ul. 5:17, 18

wenewhe kan lernohi iknik wanakunu onne, iknik aki ma naili'il naise onneni na'alehe molollo huri we'er ika nano dohohala nin molollo!

<sup>15</sup> Lo'o ik walin ida aile nin nainair noro hanana'an akilere kan nokor,

<sup>16</sup> maa ik ka'aheni ai, "Mala'a wawa'anedi, owe. Na'amoli Makromod Lalap nala nainair noro hanana'an man noknokor ki o." Lo'o ik ka kala haida-haida ai leke nodi mori wawa'an, iknik hini'i onne kan min haida-haida.

<sup>17</sup> Namnenehe noro iknik honorok aki ma naili'il Jesus. Lo'o ik ka'ahenia ik akin naili'il Ai, maa ka'alehe hini'i wenewhe man lernohi Ainin honorok aki, ik akin ma naili'il onne kan min haida-haida.

<sup>18</sup> Lo'o ri aile ma na'aheni, "Ri ida akin naili'il Jesus leke yon lernala hunukum, la ri namehin hi'i ha man wa'an mamani leke yon lernala hunukum. Kalla woro'o onne wa'an." Maa ya'u walha ri onne na'ahenia, "Lo'o mi kam hi'i ha man wa'an, ka'u do'on auroin nahenia mi akim naili'il Jesus, ee ka. Maa mim do'on mauroin ya akin naili'il Jesus nano ainu'u hini'i wenewhe man wa'an."

<sup>19</sup> Mi akim naili'il nahenia Makromod Lalap mahaku mehe! Honorok aki ma naili'il onne wa'an, maa hayakyak enihe rauroiroin onne haenhi. Hayakyaka akin naili'il Makromod Lalap mahaku mehe, maa kar derne rakani penia raruru-

rue ono ramka'uk rehi.

<sup>20</sup> I wal'uhe, lo'o ik ka'aheni ik akin naili'il Makromod Lalap, maa ik ka'alehe hini'i man wa'an, ik kamdoo rehi. Ik honorok akin ma naili'il onne kan min haida-haida.

<sup>21</sup> Horhorok ik upud a'ad Abraham. Lere ai nala anan Isak nodi hoikani Makromod Lalap lolo panaur wawan, Makromod Lalap dodo'on nin hini'i wenewhe onne peni Ai na'aheni Abraham namwali ri molololo.

<sup>22</sup> Ende ik kauroin mouropo na'aheni Abraham nin hini'i wenewhe noro nin aki ma naili'il Makromod Lalap onne ra'alono wewerre. Ainin hini'i wenewhe onne na'akuku na'anokor nin aki ma naili'il Makromod Lalap.

<sup>23</sup> Onne penia Horok Lap Lirna aile ma na'aheni, "Abraham namkene akin naili'il Makromod Lalap, de Ai na'aheni Abraham onne namwali ri molololo." Enla Horok Lap na'aheni ai namwali Makromod Lalap Nin na'aromwali haenhi. \*

<sup>24</sup> Nano wanakunu onne ik kauroin nahenia ik kamwali ri molololo Makromod Lalap kalarna ono ik akin naili'il Ai, noro idewe hi'i wewhe ha wawa'an haenhi.

<sup>25</sup> Namnenehe noro Rahab haenhi. Nonolu eni ai onne namwali maekyak manin Yeriko. Makromod Lalap na'aheni ai namwali ri molololo nano nin hini'i man wa'an. Kade an min lolo leke ma namwali Israel nin arwalie, maa an paku Israel rira ri woro'o man koklolo ra'inau onnnenihe, de

\* 2:23 NN. 15:6

an suwar hi lolo nin nakar, la hopon rala'a lolo kalla namehin leke rahaledi hi nano arwali.

<sup>26</sup> Ende lo'o ik ka'aheni ik akin naili'il Yesus wawa'an, maa ik kak hi'i ha ma naramyaka iknik ri heri ri wali, onne nin panaeku ik akin ma naili'il onne makiyedi naise ri ma aran horuwedi me'e.

### 3

#### *Kadiyaka ik namal*

<sup>1</sup> I wal'u na'ahoru! Nano mi na'akeme yono ri nammori raram nodi mamwali meser. Mi mauroinedi me'e nahenia mayai ma namwali meser, lernala hono'ok kanail man werek narehi ri namehin.

<sup>2</sup> Ik eni na'akeme kadedem hi'i dohohala, maa ri ma kan hi'i dohohala lolo nurun wonohirn namal panaitne, ai onne nauroin nadiyaka kemen wawa'an penia nin hini'i wenewhe na'akeme namlolo me'e.

<sup>3</sup> Ya ala wanakunu naho'ok ida man kukunohi ika nahenia ha man tutusiyana nodi molollo ha man lalape. Kude rala tome na'anedi ne, tom tutusiyaned, maa ik waki laa mariri me malanna, ai namkene lernohi ika.

<sup>4</sup> Naho'ok namehin ik po'on kapale. Anne lape huu kapal lap onne nodi lalaa mamai, maa yoromudi nasala ulla man tutusiyana mehe nodi kapal lapa onne laa ewi-ewi lernohi nina raram nodi.

<sup>5-6</sup> Wanakunu naho'ok eniyenihe naise ik namalle haenhi. Kade ik namal tutusiyaned, maa nodi ika wakunu kukulu lalapa,

noro hi'i sala lalapa. Ik namal namnenehe noro aiye tutusiyanida ma na'an alha lepe haenhi. Kade alhe onne lepe, maa lere noho nalere manha, aiye tutusiyanida mehe na'an horuwedi. Ik namal ailanna rehi la nakoko ik kemen na'akeme hi'i ha man ailanna. Ik nuran wonohirn namal panaitne peni nano'onyaka iknik morimori na'akeme nano lere mori ika rakan iknik lere horu. Iknik wanakunu ma naise aiye lerlere onne peni namhara nano kawali pire ai porom raram.

<sup>7</sup> Ri mormori nauroin nodi molollo ha mormori merwui, manu liwliwar, ha mormori ma na'ina'ik noro ha mormori na'akeme man minle kahi raram,

<sup>8</sup> maa ri mormori ka nau-roin nodi molollo namal, ono ailanna rehi. Ik nuran wonohirn namal panaitneni naise haimoke nin bise ma nesne ri.

<sup>9</sup> I walin na'ahohoru! Ik kodi ik namal ka'uli kasa'a ik Amad Makromod Lalap Oin Naranne, maa ik kodi ik namal kahopo ka'aki iknika ri heri ri wali man ik Makromod umupale naise Ai mememen.

<sup>10</sup> Ende nano namal ida mehe de rere'e haharu noro hopo akie ramhara wewerre. I wal'uhe, ha onne ka namlolo! Kan wa'an ik hi'i heheni.

<sup>11</sup> Hapenia nano oir makan ida, oir minmine noro oir ma'arahe ramhara wewerre?

<sup>12</sup> Ara onnida kan woi anggur, la pahi kan woi maplana. Oir minmine ka

namhara nano oir makan ma  
nam'arha haenhi.

### *Woroin ma nano wawan*

<sup>13</sup> Lo'o ri aile mi herne kalarna ma namwali ri ma nauroin la honorok akin mou, wa'an rehi ai nodi aki ma kan holi kukulu lalap mori wawa'an, la hi'i ha man wa'an mamani paku nin ri mormori wali enihe. Nin hini'i wenewhe onne peni kukul nahenia nin woroin onne namlolo.

<sup>14</sup> Enimaa lo'o ik akin apinha de kunu kehen ri, la kak peinoxi ri namehin, maa ilitolle ik kemen mehe, yon holi kukulu lalapa ka'aheni kamwali ri ma nauroin, ono iknik morimori onne kan pakana noro wanakuku ma namlolo.

<sup>15</sup> Iknik woroin onne ka namhara nano a'am raram, maa nano noho eni wawan, nano ik irhum raramne, la nano Hayakyak Makromon nin honorok panaeku.

<sup>16</sup> Lo'o ik akin apinha la kak peinoxi ri namehin, maa ilitolle ik kemen mehe, iknik morimori onne hi'i ik ida ma nasesi na'esne noro ida, la nakoko ika hi'i ha man ailanna na'akeme.

<sup>17</sup> Enimaa ri man lernala woroin nano Makromod Lalap, nin hini'i wenewhe naise eniyeni. Dedesne nin morimori moumou dewdewe lolo ri heri ri wali kalarna. An holi namrina namkai, ai nodi lira mama-mal de ka nadedem nasesi, la an derne nakani ri namehin nin honorok aki. Ai nauroin naramyaka ri heri ri wali, la hi'i ha man wa'an mamani.

Ai ka na'ili naloho ri, la kan kokwudi ri.

<sup>18</sup> Enla ri man holi moiliwi mahuwele enihe, hir hap wini hawonne man hi'i ri namehin holi moiliwi mahuwele haenhi, la ra'ili radai ihin ennen ma nam-lolo lolo Makromod Lalap kalarna mamani.

## 4

*Yon lernohi noho wawan  
nin panaeku yak, maa derne  
makani mehe Makromod  
Lalap*

<sup>1</sup> I wal'u na'ahoru! Inhawa ma nakoko penia ida ma nasesi noro ida, la ida ma na'ara noro ida mamani? Sesi ara onneni mai nano minim monmono kamanna ma aile mi irhum raramne. Monmono kamanna onne nodi molollo mi kemen penia ida ma nasesi na'ara noro ida.

<sup>2</sup> Mi raram nodi lernala haida, maa kam lernala, de mesne ri. Mi makmanna ri namehin nin hahaa, maa kam lernala, de ida ma nasesi noro ida, la ida ma na'ara noro ida. Mi kam lernala haida ono mi ka mapanak Makromod Lalap,

<sup>3</sup> ee lo'o mi mapanakedi me'e, maa kam lernale, ono minim honorok panaeku ma nodi mi hi'i napanpanak onne saledi ono mi mapanak modi ilitolle mehe minim monmono kamanne.

<sup>4</sup> Eih! Mi ri ma ka namkene lernohi Makromod mie! I wal'uhe mauroin nahenia lo'o ik lernohi noho wawan eni nin hini'i man yaka ik kamwali Makromod Lalap Nina arwali, ee ka?! Namlolo! Ya ahene wali'ur

inholawuku noro noho eni wawan, ri onne namwaliyedi Makromod Lalap Nina arwali me'e.

<sup>5</sup> Horok Lap Lirna na'heni, "Roh Kudus man Makromod Lalap nala maika eni, namhene wake'e ik lernohi noho wawan eni nin honorok panaeku, maa Ai raram nodi ik kauranrani Ai mamani." Yon ik pene'ek nahenia Horok Lap Lirna eni ka namlolo.

<sup>6</sup> Enimaa Makromod Lalap eren nanala rere'e haharu maika, la raram nodi wake'e paku ika. Onne penia horhorok aile lolo Horok Lapeni ma na'heni,

"Makromod Lalap na'okul ri man holi kukulu lalapa,

maa nala Nin rere'e haharu ri ma kan holi kukulu lalapa." \*

<sup>7</sup> Enpenia ya'u nounaku i wal'uhe, yon holi kukulu lalap lolo Makromod Lalap kalarna, maa derne makani Ai mamani, la ma'okuledi Hayakyak Makromon. Lo'o mi ma'okul Hayakyak Makromon, an lari nako'u mi.

<sup>8</sup> Lo'o mi ma'uranrani Makromod Lalap, Ai na'uranrani ki mi haenhi. Mi man hihi'i dohohale, ren here! Enla mi ri man honorok woro'o aki woro'o, ma'amouwedi mi honorok akin man Morse onne here.

<sup>9</sup> Lo'o ik kauroin iknik dohohala aile, yon ik kalau la soksok murmur, maa kodi aki man woiredi kahere, la

sus mak oir ono ik melui machehel dohohala onne.

<sup>10</sup> Lo'o ik kak holi kukulu lalap lolo Makromod Lalap kalarne, Ai na'akulu na'alapa ika.

*Yono ik ida man wakunu nano'onyaka ida*

<sup>11</sup> I wal'u na'ahoruwed! Yono ik ida man wakunu nano'onyaka ida, la ida man kuku sala ida, ono inholi hi'i heheni noro lodon walinhe, onne namnenehe an kuku sala Makromod Lalap Nina keneri hono'ok me'e. Ai kan lernohi keneri hono'ok onne, maa ai namwaliyedi man ho'ok kail keneri hono'ok onne me'e.

<sup>12</sup> Makromod Lalap mehe nala keneri hono'ok onne, la Ai mehe namwali Man Ho'ok Kail ri mormori noro Man Hukum. Ende Ai nodi molollo huri we'er ri nano hunukum la Ai nodi molollo hukumesne. Enpenia ik ka'alehe molollo kuku sala iknik ri heri ri wali enihe!

*Yono hamlinu Makromod Lalap lolo minim panaeku wo'ira*

<sup>13</sup> I wal'uhe man wakunu kukulu lalap ma'heni, "Lere eni me oreki, ai mala'a laa kotida minle enne anna ida raram leke ma'olu haha la manoin kupan rehirehi lawlawan." Makaniyala maya'u taran nanu.

<sup>14-15</sup> Wa'an rehi mi ma'heni, "Yono hi'i na'henia Makromod Lalap hurinohi am mormori makun, am hi'i ha eni, ee ha namehin," ono mi ka mauroin oreki lo'o inhawe namwali ki mi. Minim

\* 4:6 Ams. 3:34

morimori naise inhawa pe? Minim morimori naise aiye mahu menee! Lere eni me'ede ik aile, la me'e'eni me'ede mehen moluwedie.

<sup>16</sup> Enimaa mi kam wakunu naise onne. Mim holi kukulu lalap la mauroin minim panaeku wawa'an mamani. Honoli onneni na'akeme saledi.

<sup>17</sup> Horhorok! Inhoi nau-roin hi'i ha man wa'an, maa kan hi'ie, ai onne hi'iyedi do-hohala me'e.

## 5

### *Nounaku ri orkanaru*

<sup>1</sup> Mi ri orkanaru enihe, makaniyala tarana nanu. Wa'an rehi mi mahere la kanhi laplapa, ono lere man mai mim lernala wewerek pananaka.

<sup>2</sup> Minim linikir kanaru yakedi me'e, minim nainair seru na'anedi me'e.

<sup>3</sup> Mahe, pere mim loiwuku la manakuwedi lolo noho wawan onne nakarkoiyedi me'e. Enla karkoi onne lo'o namwali tanada man tumdesne mi lere alam Makromod Lalap ho'ok kail mi. Mim loiwuku minim linikir kanaru lernohi mi raram nodi aimehi, de mim lernala hunukum man werek naise aiye ma na'an mi kemen horu.

<sup>4</sup> Mi mambahene pair man howok minim kirna rira naiwe'el. Makani rira wanakau! Makromod Lalap Ma Nodi Molollo Narehi Nalewen Na'akemeni dernedi rira wanakau me'e.

<sup>5</sup> Mim lernaledi noho wawan nina wawa'an rahu me'e, mo'on momunedi

ya'an yomun minmin wor-woro na'akeme me'e. Mi ma'apoiredi mi kemen me'e, de mi maise ha mormori man poir rodi laa resne.

<sup>6</sup> Mim hukumesnedi ri ma kan sala, kade hi onne kar hi'i haida-haida mi, la ka raruri walha minim hini'i onne.

*Yon pelek ma'ahan ri man kerne dalha mi, ono Makromod na'akeki mai me'e*

<sup>7</sup> I wal'u na'ahoru! Lo'o rin kerne dalha maika yon ik pelek ka'ahan, maa kodi aki ma namkene weilapan Makromod mai wali'ur noho wawan. Po'onala ri man howok kirna. Ai akin namkene weilapan nin kirne ihin ennen ma namwali nin popono orereki onne. Ai namkene lapan okon warwarak noro kimkimur mai na'apenu na'amarra aukawi.

<sup>8</sup> Ik kamkene weilapan namnenehe man howok kirna onne, la yono ik akin nado'o, ono Makromod Nina lere alam maimaie na'uraniyedi me'e.

<sup>9</sup> I wal'uhe, yono hehel warna enu, la mi ida man kuku sala ida, kalo'o Makromod Lalap nala hunukum ki mi. Horhorok! Man Ho'ok Kail ri mormori na'akeki mai me'e.

<sup>10</sup> I wal'u na'ahoru! Horhorok nabi-nabi man konohi Makromod Lalap Lirna Wawan laa ri nonolu eni, Kade hir lernala wewerek pananaka, maa hi akin ka nado'o, la hi ramkene lernohi Makromod Lalap mamani. Wa'an rehi ik lernohi rir hini'i onneni.

<sup>11</sup> Ik kauroin nahenia ri ma akin namkene kade lernala wewerek pananaka, hi onne akin nahuwa'anedi me'e. Mi mauroin Ayub nin wanakunu. Lere an lernala wewerek pananaka onne, ai akin ka nado'o. Ai akin namkene weilapan hehen nanumene nin wewerek pananaka horu mene Makromod Lalap namre'e namharu ai wali'ur. Onne penia ik kauroinedi Makromod Lalap naramyaka rehi ri mormori la kukul Nin aki man wa'an hi mamani.

<sup>12</sup> I wal'u na'ahoru! Ainu'u nounaku eniyeni ha ma na'ono wake'e! Yono ik nair a'am raram, noho eni wawan, me ha namehin kodi kikan hopo laa Makromod Lalap. Lo'o iknik panaeku ka'heni wa'an, ik ka'heni mehe, "Wa'an." Lo'o iknik panaeku ka'heni kan wa'an, ik ka'heni mehe, "Kan wa'an." Yon ik kikan hopo kodi ka'akerhe iknik wanakunu, kalo'o ik lernala hunukum nano Makromod Lalap.

### *Nounaku hi'i lir napanak*

<sup>13</sup> Inhoi man lernala sus, hi'i lir napanak Makromod Lalap. Enla inhoi akin nahuwa'an, nahinara na'uli nasa'a Makromod Lalap.

<sup>14</sup> Inhoi ma nakni'ir, lam polu uluwakun kerei mai leke soruwala wuru tarana ma nakni'ir onne la hi'i lir napanak nodi Makromod Lalap Oin Naran.

<sup>15</sup> Makromod Lalap hi'i ma nakni'ir onne wa'anedi me'e, horo nahenia man hi'i lir napanak onnenihe akin naili'il

Makromod Lalap kokkoo, la lo'o ma nakni'ir onne nin dohohala aile, Makromod Lalap na'ohu nahaledi nin dohohala haenhi.

<sup>16</sup> Ende ik na'ahoru ida man anilu manaku iknik dohohala ida, la ida man hi'i lir napanak ida, leke Makromod Lalap hi'i wa'anedi ik kemen noro idewe ik akin haenhi.

Horhorok! Lere ri molololo Makromod Lalap kalarna hi'i lir napanak, ainin mololle lapa narehi.

<sup>17</sup> Horokala nabi Elia onne. Ai me'ene ri mormori nadedem naise maika haenhi. An hi'i lir napanak nodi honorok aki ma naili'il kokkoo na'aheni, "Yon okon mai." Enime'ede okon kan mai hehen nanumene anna wokelu rehi raramne.

<sup>18</sup> Anna wokelu rehi horu, an hi'i lir napanak wali'ur napanak okon mai, de lanik nala kopur okon hehen nanumene elimo'o naledi iihin ennen wali'ur.

<sup>19</sup> I walin na'ahohoru! Lo'o mi mauroin ri man waliyedi kili'urne me'e, de kan lernohi Makromod Lalap Nina wanakuku ma namlolo eni me'e, yon huri we'er ai, maa ken paku ai leke mai wali'ur lernohi ik Makromod Lalap.

<sup>20</sup> Horhorok! Ri man paku ma nadiyaur dohohale onne, nahaledi ai nano hunukum makmaki. Enla ma nadiyaur dohohala onne nin dohohala rahu ra'ohu rahaledi haenhi.

Tape masi,  
*Yakobus*

# 1 Petrus

## *Horok Lirna La'an*

Ri ma naran Petrus hi'i horok eniyeni. Petrus eni Yesus Nin man lernohi pakunohi ida nano ri idaweli woro'o enihe. Petrus aku horok eni laa ri Kristen ma ka namwali Yahudi man minle propinsi Asia Tatana (ors eni aile Turki wali warak). Lere onne ri Kristen man min lolo onne lernala wewerek pananaka ono hi akin naili'il Yesus. Heruwali rin hi'i apinpinha, la heruwali rin wakunu rano'onyaka (2:11-12; 2:15; 3:16; 4:4). Heruwali ramwali ri nin hophopon wahwahan, la hi onne lernala apinpinha nano hi makromon (2:18-20). Maeke heruwali sus ono hono akin ka naili'il Yesus (3:1, 6).

Ende Petrus hi'i horok eni aku laa na'alap hi akin, leke hi akin eren namkene naili'il Yesus lolo rir wewerek pananaka na'akeme. Petrus na'heni kenen panatal noro apinpinha ik lernanala nodi kunukunohi nahenia namlolo kokkoo ik akin naili'il Makromod Yesus, ono lo'o ik akin namkene lere ik lernala apinpinha ri nauroin namlolo kokkoo ik akin naili'il Yesus wawa'an (1:6-7; 4:12). Ai na'aheni lo'o ik lernala wewerek pananaka ono ik akin naili'il Yesus, wa'an rehi kala ik kemen Makromod Lalapa la hi'i ha man wa'an mamani (4:19). Petrus nala nounaku namehin na'alap hi akin leke hi ramkene hi'i ha man wa'an la hi akin namkene naili'il

lere hir lernala wewerek pananaka warna-warna.

## *Horok Ihin*

1. Petrus nala wanakunu man hari horok eni (1:1-2).
2. Ik lernaledi mori-mori worworu nano ik Amad Makromod Lalap, Makromod Yesus noro idewe Roh Kudus (1:3-12).
3. Makromod Lalap hi'i ik kamwali Ai ananhe, de wa'an rehi ik hi'i ha man wa'an mamani (1:13-2:10).
4. Petrus nala nounaku ri na'akeme leke derne rakani noho nin ma nodi molollo, nala nounaku ma namwali hophopon wahwahan, nala nounaku ri man ho, la nala nounaku namehin ri na'akeme (2:11-3:12).
5. Petrus nala nounaku ri man lernala wewerek pananaka ono hi akin naili'il Yesus (3:13-4:19).
6. Petrus nala nounaku laa man panulu lolo agame noro ri ma nadedem (5:1-11).
7. Petrus nala lira man horu (5:12-14).

## *Petrus nala hiyene aroro*

<sup>1</sup> I wal'u na'ahoru man Makromod Lalap niliyedi me'e! Ya'u eni Petrus ma namwali hophopon ma nodi Yesus Lirna, la ya'u hi'i horok eni aku ki mi man ko'u nano minim nohorai, man holiyala lolo propinsi Pontus, Galatia, Kapadokia, Asia noro Bitinia.

<sup>2</sup> Ik Amad Makromod Lalap, niliyedi mi ono onne lernohi Nin panaeku man An hi'iyedi nano nonolu

me'e, la Roh Kudus hi'i mi mamwali Nin ri mememen man moumou dewdewe, penia mim derne makani Yesus Kristus, la Ai rarna na'amouwedi mi nano minim dohohala na'akeme.

Ya apanak Makromod Lalap na'amoli nala Nin rere'e haharu rehirehi lewlewen ki mi, la hi'i mi akim eren moiliwi mahuwele.

*Ik lernala or'ori dardari ma kan horu*

<sup>3</sup> I wal'u na'ahoru! Mai ka'uli kasa'a Makromod Lalap ma namwali ik Makromod Yesus Kristus Aman! An kukul Nin aki man wa'an wake'e maika, de nala morimori worworu maika. Ik lernala morimori worworu onne, ono Ai na'amori wali'ur Yesus Kristus nano Nina makmaki onno. Onne penia ik kamkene kawiya'ar Ai.

<sup>4</sup> Ende ik kauroin nahenia lere man mai Makromod Lalap nala rere'e harharu man wa'an wake'e maika. Rere'e harharu onne Ai na'akenedi lolo a'am raram leke nala Ai ananhe na'akeme. Rere'e harharu onne namwali linikir kanaru man wa'an mamani, ono linikir kanaru onne kan yak, kan popo, la kan herre laa ewi-ewi.

<sup>5</sup> Memen mim lernala rere'e harharu man Ai na'akenedi onne ono mi akim naili'il Makromod Lalap, de Ai nodi Nin ke'ek'e'l an'anha nadiyaka mi hehen nanumene lere noho eni nin man horu. Enleke lere onne Ai nalhari or'ori dardari ma kan horu man Ai na'akenedi nala ki mi, ono An

huriyedi mi nano dohohala nin molollo me'e.

<sup>6</sup> Ende mi akim nahuwa'anedi here! Kade ors eni mim malui mahehel ono mim lernala apinpinha noro kenene panatal wo'ira na'akeme, maa ka nalo'ol minim wewerek pananaka onne horuwedi me'e.

<sup>7</sup> Kenen panatal noro apinpinha onne mim lernale leke ri nauroin nahenia mi akim naruri naili'il kokkoo, ee ka! Kenen panatal noro apinpinha onne naise aiye man ri nodi na'awoir mahe leke nauroin nahenia maha onne namlolo mahe ihi, ee ka! Enimaa mi akim ma naili'il onne wa'an narehi nano mahe onne, ono mahe onne lere man mai moluwedi me'e. Ende rakan lere alam Yesus Kristus nalhari kemen mai noho wawan wali'ur, mim lernala ul'uli sasa'a, honoor hanawa, la Ai na'akulu na'alapedi mi ono mi akim namkene naili'il Ai.

<sup>8</sup> I wal'uhe, nano nonolu mi kam do'onala Yesus, maa mi maramyak Ai rehi. Enla ors eni mi kam do'on Ai makun, maa mi honorok akin naili'il Ai, penia mi akim nahuwa'an wake'e!

<sup>9</sup> Mi akin nahuwa'an, ono mi mauroinedi nahenia Makromod Lalap huriyedi mi nano dohohala nin molollo, la naledi or'ori dardari ma kan horu ki mi me'e. Onne na'akeme namwali ono mi akim naili'iliedi Ai me'e.

<sup>10</sup> Nabi-nabi nonolu enihe konohiyedi mi nahenia Makromod Lalap kukul Nin aki wawa'an ki mi, penia lere eniyeni mim lernala or'ori dardari man ma'aruru onne.

Nonolu eni hir loi honorok Horok Lape, la wakuku leke rauroin mouropo rere'e harharu man Makromod Lalap nouwedi me'eni.

<sup>11</sup> Lolo Kristus Nin Roh man howok lolo nabi enihe raramne, Makromod Lalap konohi hi nahenia lere man mai Kristus man An kikan namwali Rai laa ewi-ewi lo'o lernala wewerek pananaka nammori horu mene lernala ul'uli sasa'a ma narehi nalewen wake'e. Onne penia nabi-nabi onne koklolo ra'inau leke hi rau-roin ma'anana An mai, la hi'ihehewi Ai nala or'ori dardari maika.

<sup>12</sup> Nonolu onne Makromod Lalap konohiyedi nabi enihe nahenia or'ori dardari man An nouwedi eni lo'o ka namwali hirira kulere, maa namwali lere man mai, penia hir konohi inhwae ma namwali noro mi lere eniyeni. Enimaa rakan ors eni Makromod Lalap Nin Roh nano a'am raram nala ke'eke'el an'anhe Nin ri ma nodi Lir Wawa'an enihe, leke hir konohi mi mouropo panaeku ma na'ono or'ori dardari ma kan horu eniyeni. Hophopon a'am raram enihe raram nodi do'on rauroin or'ori dardari ma kan horu onne haenhi.

*Ik lernaledi morimori wor-woru me'e, de hi'i ha ma nam-lolo mamani*

<sup>13</sup> Ende loi honorok wawa'an leke mi mamkene lernohi Makromod Yesus Lirna Wawa'an, la madiyaka mi kemen leke yono hi'i ha man ailanna. Mawiya'ar

mehe Makromod Lalap Nina rere'e haharu man Yesus Kristus nala ki mi lere An wali wali'ur mai noho wawan.

<sup>14</sup> Mi mamwaliyedi Makromod Lalap ananhe, de derne makani wawa'an, la yon lernohi minim monmono kamanna man ailanna me'e. Nonolu eni mi ka mauroin Makromod Lalap makun, de mim lernohi minim monmono kamanna onne mamani.

<sup>15</sup> Ende yon hi'i dohohala me'e, maa hi'i ha ma nam-lolo mamani, leke lolo minim hini'i wenewhe na'akeme mi maise Makromod Lalap man moumou dewdewe wake'eni, ono Ai penia ma napolu mi lernohi Ai.

<sup>16</sup> Ende yon hi'i dohohala, ono lolo Horok Lap raram Ai na'heni, "Yono mim hi'i dohohala me'e, ono Ya'u penia ma na'alehe dohohala wake'e." \*

<sup>17</sup> I wal'uhe! Lere mim hi'i lir napanak, nadedem mi mapolu Makromod Lalap, "Papa." Enla yon hamlinu nahenia Makromod Lalap penia man ho'ok kail ri mormori na'akeme lernohi dohodoho rira hini'i wenewhe, la Ai ka na'ilil nalo ho ri. Ende wa'an rehi mi mamka'uk Ai, la madiyaka minim morimori wawa'an leke hi'i ha ma namlolo mamani hehen nanumene minim lere horu, ono lere mim holi lolo noho wawan eniyeni mi maise ri man ko'u nano rir nohorai, de morile ri namehin nin nohe.

<sup>18</sup> Derne makani Makro-

\* **1:16** Im. 19:2

mod Lalap, ono mi mauroin nahenia An pairedi minim okon raka man lap wake'e leke huriyedi mi nano minim morimori lo'olo'ol man mi upum a'um naledi ki mi eni. Morimori lo'olo'ol onne kan min haida, la ka nala haida man wa'an ki mi. Makromod Lalap ka nodi ha man pelek molu naise maha noro pere pair iknik okon raka maa

<sup>19</sup> Ai nodi Kristus rarna man wella ai wawan wake'e. Kristus mehe namwali Pip-dumana ma na'alehe salida man Makromod Lalap naire namwali honoi kanani nodi pair iknik okon raka man lap onne.

<sup>20</sup> Lere noho eniyeni kaale makun, Makromod Lalap niliyedi Yesus namwali Rai laa ewi-ewi. Enla lere alam ma na'urani noho nina man horu eni, An hopon Yesus mai noho wawan leke na'ohu nahala minim dohohala la nala or'ori dardari ma kan horu ki mi.

<sup>21</sup> Makromod Lalap ma na'amori wali'ur Ai nano Nin makmaki, kikan Ai laa a'am raram, la na'akulu na'alapa Oin Naran. Yesus Nin hini'i wenewhe onne hi'i mi akim naili'il Makromod Lalap. Enpenia mi akim namkene naili'il Ai, la mi mawiya'ar Ai wawa'anedi, ono mi mauroin inhawa man An nouwedi na'akeme namwali.

*Ik ida ma naramyaka ida wawa'an*

<sup>22</sup> I wal'uhe, lere eniyeni mim derne makaniyedi Makromod Lalap Lirna Wawan ma namlolo me'e,

de mi kemmu ra'amou ra'adewedidi nano dohohale me'e. Ende mi ida ma nararamyaka ida molmolle ri noro lodon walin mememen. Onne penia ya'u nounaku mi leke mi ida ma naramyak ida eren wawa'an modi honorok aki man mou,

<sup>23</sup> ono mim lernaledi mormori worworu nano Makromod Lalap man mori laa ewi-ewi! Morimori man mai nano ri mormori, ka nalo'olo moluwedi, maa morimori worworu man mai nano Makromod Lalap kan molu laa ewi-ewi! Enla mi kam lernala morimori worworu nano ri mormori, maa mim lernala morimori worworu onne nano Makromod Lalap, ono mim kokaledi Ai Lirna Wawan man mori laa ewi-ewi.

<sup>24</sup> Horhorok aile lolo Horok Lap ma na'aheni, "Ri mormori noho wawan rira morimori namnenehe noro penek man pelek maki, la rir morimori ma'aruru namnenehe naise audipi man pelek namlau haenhi. Penek namlauwedi, la audipi mehen nadiyauredi,"

<sup>25</sup> maa Makromod Lalap Lirna Wawan namkene laa ewi-ewi!"

Enla Makromod Lalap Lirna Wawan onne namnenehe noro Lira Wawa'an man rin loikaruwedi ki mi me'eni!

## 2

<sup>1</sup> Ende ya apanak mim sopoledi minim hini'i wenewhe man ailanna noro minim wanakunu poho na'akeme. Yon kokme'e hi'i ha man wa'an, yon kunu

\* **1:24** Yes. 40:6-8

kehen ri, la yon wakunu nano'onyaka ri namehin. Yon ik hi'i ha man ailanna naise onne me'e,

<sup>2</sup> maa mahehe derne makani Makromod Lalap Lirna Wawan mamani naise tatana memerane ma nahere huhu mamani leke eren lalapa. Lo'o mim hi'i heheni, mi akim namkene naili'il, la eren mauroroin hi'i ha man wa'an mamani.

<sup>3</sup> I wal'uhe, mahehe leke mi mampe'el derne makani Lirna Wawan mamani, ono mi mauroinedi Makromod Nin aki wawa'an me'e.

*Yesus Kristus naho'ok  
naise waku na'a'ar man mori  
laa ewi-ewi*

<sup>4</sup> Makromod Yesus naho'ok naise waku ma namkene la mori laa ewi-ewi. Waku na'a'ar onne, ma nayapi nakar sopoledi, ono hir pene'ek waku onne kan wa'an rodi hi'i nakar, maa lolo Makromod Lalap leken kalarwa waku onne penia ma na'ono wake'e, la Makromod Lalap nileyedi waku na'a'ar onne namwali waku man wella ai wawan wake'e. Ende mai mauranrani Makromod Yesus

<sup>5</sup> ma nala morimori worworu ki mi, leke mi maise waku man mormori haenhi. Mai leke Makromod Lalap nair mi na'ariri Nin Romleu leke mi mamwali Nin kerei ma na'uli nasa'a Ai, la mi mamwali imam-imam man moumou dewdewe, la mi mala mi kemen mamwali honoi kanani ma nahuwa'an Ai akin. Yesus Kristus Nin hini'i wenewhe nala

wawa'an maika, penia Makromod Lalap kokala iknik honoi kanani onne.

<sup>6</sup> Lolo Horok Lap raram horhorok aile ma na'ono Yesus Kristus na'ahenia, "Po'onala! Ya'u nileyedi waku na'a'ar ida man wella ai wawan wake'e!

Ya ala waku na'a'ar ma na'ono onne leke loile Kote Sion.

Inhoi akin naili'il Ai, kan hehel,

ono na'akeme man Ya'u nou eni namwali kokkoo."

<sup>7</sup> Enla ri ma akin naili'il Yesus rauroin nahenia Ai penia man wa'an wake'e, maa ri ma akin ka naili'il, hehel rehi, naise horok ida ma aile lolo Horok Lap raram ma na'aheni,

"Waku man ma nayapi nakar sopoledi eni,

Makromod Lalap hi'i namwaliyedi waku na'a'ar ma na'ono wake'e!" \*

<sup>8</sup> Horok Lap na'aheni wali'ur,

"Ai onne namwali waku man rin wekur, la Ai namwali waku lap man hi'i rin man wekur laa yawa." \*

Hir wekur waku onne, ono kar derne rakani, la kar ler-nohi Makromod Lalap Lirna Wawan. Makromod Lalap kakaredi onne na'akeme nano nonolu me'e.

<sup>9</sup> Enimaa mi eniyenihe, Makromod Lalap nileyedi me'e, la Ai namwali minim Rai la hi'i mi mamwali imam-imam man ilitolle

\* 2:6 Yes. 28:16 \* 2:7 Mzm. 118:22

\* 2:8 Yes. 8:14-15

Nin honowok. Mi mamwali  
 Nin hair man moumou  
 dewdewe, la mi mamwali  
 Nin ri mememen. An hi'i  
 heheni leke mi maderre  
 madaul Nina hini'i wenewhe  
 man ma'aruru wake'e laa ri  
 mormori na'akeme. Ai penia  
 napolu mi mamhara nano  
 metmetek kalkala raram mai  
 min lolo Nin ropropo man  
 ma'aruru wake'e raram.\*

<sup>10</sup> Nonolu eni mi ka  
 mamwali Makromod Lalap  
 Nina ri makun, maa ors eni  
 mi mamwaliyedi Nin ri me'e.  
 Nonolu mi ka mauroin Nin  
 aki man wa'an makun, maa  
 ors eni An kukuledi Nin aki  
 man wa'an me'e, de naledi  
 ampun ki mi me'e.

*Mahehe hi'i minim morimori namlolo, ono mi mamwaliyedi Makromod Lalap anan me'e*

<sup>11</sup> I wal'u na'ahoru man  
 ya aramyaka! Mim holi mai  
 noho wawan eniyeni, mi  
 maise ri man ko'u rir nohorai  
 man aile leliyara mehe, ono  
 mi mori wewerre noro ri  
 ma akin ka naili'il Makro-  
 mod Lalap. Onne penia  
 ya apanak an'anchedi yono  
 lernohi minima monmono  
 kamanna man ailanna ma  
 aile mi irhun raram, ono  
 monmono kamanna onne  
 na'okul minim morimori  
 worworu onne penia lolo  
 mi irhum raram panaeku  
 man yak noro panaeku man  
 wa'an, ida ma na'okul ida  
 mamani.

<sup>12</sup> Lolo noho wawan  
 eniyeni mi moro ri ma ka  
 nauroin Makromod Lalap  
 minwuku, de mahehe hi'i ha

ma namlolo lolo Makromod  
 Lalap kalarna mamani. Kade  
 lere eniyeni ri onnenihe  
 kuku sala ki mi, maa lo'o ka  
 nalo'olo hir do'on rauroin  
 mim hi'i ha man wa'an  
 mamani. Ende rakan lere  
 Makromod Lalap mai ho'ok  
 kail noho wawan na'akeme,  
 hi ra'uli rasa'a la ra'akulu  
 ra'alap Ai, ono do'onedi  
 minim hini'i wenewhe man  
 wa'an me'e.

*Derne makani ri ma nodi molollo lolo noho wawan*

<sup>13</sup> I wal'uhe, ya apanak  
 mim derne makani ri  
 mormori ma nodi molollo  
 lolo noho wawan eniyeni  
 na'akeme, leke horhawa ik  
 Makromod Yesus. Derne  
 makani man anulu panulu  
 lolo minim losno hair,

<sup>14</sup> noro idewe nin man  
 hemen lira la man papal  
 wawa man an kikan leke  
 paku ai rodi molollo wew-  
 erre. Anulu panulu onne  
 hopon hi lar hukum ri  
 na'akeme man rira hini'i we-  
 newhe ailanna, la horhawa  
 ri na'akeme man rira hini'i  
 wenewhe wa'an.

<sup>15</sup> Makromod Lalap raram  
 nodi mim hi'i ha man wa'an  
 mamani leke ri ma kan  
 derne nakani Makromod  
 Lalap do'on minim hini'i  
 wenewhe man wa'an onne,  
 de ramka'uk tumdesne mi  
 me'e, ono ri na'akeme rau-  
 roin nahenia man tumdesne  
 mi onne rapoho.

<sup>16</sup> Makromod Lalap  
 huriyedi mi nano doho-  
 hala nin molollo, maa yon  
 ma'aheni, "Ik kahinuriyedi

\* **2:9** Kel. 19:5-6, Ul. 4:20, 7:6, 14:2, Yes. 9:1, 43:20, 21

me'e, de lo'o ik hi'i dohohala, kan hi'i haida!" Yon mahinorok heheni ono mi mamwaliyedi Nin hophopon wahwahan me'e, de lernohi Nin honorok panaeku la hi'i ha man wa'an mamani.

<sup>17</sup> Ende horhawa ri na'akeme, la maramyaka mi wallum ma akin naili'il enihe. Mamka'uk Makromod Lalap mamani, la horhawa man anulu panulu lolo minim losno hair.

*Teunohi Yesus Nin hini'i wenewhe lere An lernala wewerek pananaka*

<sup>18</sup> I wal'uhe! Nano mi, heruwali ramwali ri namehin nin hophopon wahwahan, de derne makani la horhawe mi makromon onne wawa'an. Nano mi makromon onnenihe, heruwali ramwali ri wawa'an de rodi lir mammal, maa heruwali rodi lir apinpinha mamani. Ya apanak mim derne makani ma nodi lir mammal noro idewe lir apipinha wewerre.

<sup>19</sup> Lo'o mim derne makani mi makromon kade an kerne dalha mi mamani, onne wa'an. Yom walha haida-haida, maa mamkene hi'i ha man wa'an mamani, ono mi mauroinedi minim hini'i wenewhe onne penia nahuwa'an Makromod Lalap akin.

<sup>20</sup> Lo'o mim hi'i sala de an nukur mi, ri ka na'uli mi, kade mi kam walha man nukur onne. Minim hunukum onne namlolo ono mi penia man sala. Enimaa lo'o mi makromon nukur mi, kade mi kam hi'i sala ida,

maa mi kam walha haida, minim hini'i wenewhe onne nahuwa'an Makromod Lalap akin.

<sup>21</sup> Makromod Lalap penia napoluwedi mi leke kerhu lolo wewerek pananaka modi aki ma namdudu naise Kristus. Ai me'ene kerhu lolo apinpinha wo'operperi, kade na'alehe salida, leke na'ohu nahala minim dohohala. Ende wa'an rehi mim teunohi Ainin hini'i wenewheni.

<sup>22</sup> Horhorok aile ma na'aheni, "Ai na'alehe dohohala wake'e, la wanakunu poho ida ka namhara nano nuran." \*

<sup>23</sup> Ler onne ri na'iyaka Ai, maa Ai kan walhe. Lolo Nin apinpinha wo'operperi onne, Ai ka napanak Makromod Lalap hukumesne ri man hi'ie, maa Ai nala kemen Makromod Lalap ma nodi aki man mou ho'ok kail ri.

<sup>24</sup> Yesus Kristus mehe nodi na'uwara iknika dohohale lolo Ai kemen lere An maki lolo au kekiyowok, leke ik kahinuri kawine'er nano dohohala nina molollo, penia ik kauroin hi'i ha ma namlolo mamani lolo Makromod Lalap leken kalarna. Yesus Kristus Nina no'o noro rarna penia man hi'i ika wa'an wali'ur.

<sup>25</sup> Nonolu mi maise pip-duma man sala kalla, de moluwedi, maa ors eni mim wali wali'ur lernohiyedi Yesus Man Huri la Man Leluwai Makrana mi hamaran me'e.

*Nounaku ri orhohoo na'akeme*

<sup>1</sup> Ende ri orhohoo na'akeme hi'i naise onne haenhi. Mi maeke man hoedi me'e, derne makani mi houm, leke lo'o mi houm kan derne nakani Makromod Lalap Lirna Wawan makun, minim hini'i wenewhe man wa'an onne nakoko na'erem namaka ai leke akin naili'il haenhi. Kade mi kam wakunu haida,

<sup>2</sup> maa minim mo'onleher onne po'on nauroin nahenia mim horhawe Makromod Lalap la minim hini'i wenewhe lernohi Ai mamani, penia ai akin lo'o naili'il haenhi.

<sup>3</sup> Yon ken mamwali maeke herlei man rin po'on ma'aruru wake'e. Yon modi nainair man ma'arururu noro deli mahe ma'akeki mi kemmu, la yono wuku minim muruk leke ma'aruru rehi.

<sup>4</sup> Enimaa modi lir mammal noro aki ma namlina namkai ma'akeki mi mehe, leke mi mamwali maeke herlei ma namlolo laa ewi-ewi. Makromod Lalap po'on maeke ma naise onne, Ai akin nahuwa'anedi.

<sup>5</sup> Nonolu maeke ma namwali Makromod Lalap Nin ri, rir morimori naise onne, la hi akin naili'il Makromod Lalap penia rira morimori moumou dewdewe, la hir derne rakani honhe mamani.

<sup>6</sup> Sara me'ene hi'i heheni! An derne nakani wawa'an hono Abraham, la horhawe narehi de napolu ai 'makrom'u'. Mi eniyeni mamwali Sara ananhe haenhi, horo nahenia mim hi'i ha man wa'an mamani

la ka mamka'uk haida-haida lolo minim wewerek pananaka na'akeme.

<sup>7</sup> Mi mo'oni enihe hi'i heheni haenhi! Horhawe minim maekleher, la moro ai mori wawa'an ono maeke ka naruri naise mo'oni. Yon hamlinu nahenia Makromod Lalap namre'e namharu hi, la nala or'ori dardari hi naise mi haenhi. Ende moro hi mori wawa'an, leke yono haida namwali ew'ewek kawkawa minim lir napanak lolo Makromod Lalap kalarna.

*Ida ma naramyaka ida, la ida man holi moiliwi mahuwele noro ida*

<sup>8</sup> Ende ya apanak mi na'akeme mi irhun raram mahaku la mi honorok aki mahaku, leke ida man mori wawa'an noro ida, la ida ma naramyaka ida naise lodon walin mememen, la ida man paku ida, la yon mim holi kukulu lalap.

<sup>9</sup> Lo'o ri aile man ailanna ki mi, yono walhe noro ailanna. Lo'o ri aile ma na'iyaka mi, yon walhe noro na'iyakyaka wali'ur. Wa'an rehi ik kapanak Makromod Lalap nala hi wawa'an rara'a walha rir hini'i man yak onne na'akeme. Ai napoluwedi ik hi'i ha man wa'an onne, leke Ai namre'e namharu maika haenhi.

<sup>10</sup> Horhorok aile lolo Horok Lap raram ma na'aheni,

"Inhoi raram nodi ler-nala morimori man wa'an noro aki ma nahuwa'an, yono an wohir warei yakyaka salsala la yon napoho

ri, maa nadiyaka nuan wonohirne namal panaitne mamani.\*

<sup>11</sup> Wa'an rehi sopoledi nin hini'i wenewhe man ailanna, leke hi'i ha man wa'an mamani, la nahehe mori melina makai noro nin ri heri ri wali.

<sup>12</sup> Wa'an rehi an hi'i heheni, ono Makromod Lalap po'on la nadiyaka ri molololo, la An derne nakani rir lir napanak mamani, maa Ai na'okuledi ri man hi'i wewhe ha man ailanna enihe."

### *Mamkene kerhu lolo wewerek pananake*

<sup>13</sup> I wal'u na'ahoru! Lo'o mi akim namrana hi'i ha wawa'an mamani, ri kan hi'i yakyaka mi.

<sup>14</sup> Enimaa lo'o ri aile man hi'i apinpinha mi, ono mim hi'i ha wawa'an mamani, yom hehel, ono lere onne Makromod Lalap namre'e namharu mi. Ende yono mamkauk ri mormori man hi'i sus mi, la yono mi akim tana,

<sup>15</sup> maa horhawe Kristus ono Ai mehe ma namwali ik Makromod. Lo'o ri aile ma na'ukani mi na'ahenia, "Alhi'ihepe mi akim naili'il Makromod Lalap?" Wa'an rehi mi mamkene walha ma na'ukani onne, maa modi lir mamamal noro akin ma namdaru.

<sup>16</sup> Enla modi honorok aki man mou hi'i ha ma namlolo mamani, leke lo'o ri aile man hadwei hadwokor minim hini'i wenewhe ono mi akim

naili'il Kristus, hi rawawa, ono rauroin rir wanakunu onne ka namlolo.

<sup>17</sup> Lo'o Makromod Lalap nakakaredi rin hi'i apinpinha maika ono ik hi'i ha man wa'an mamani, onne wa'an, maa yon de rin hi'i apinpinha maika ono ik hi'i ha man yak.

<sup>18</sup> Kristus lernala wewerek pananaka hehen nanumene maki leke na'ohu nahala iknik dohohala. Ai na'alehe salida, maa An maki raram mehe herredi maika man ailanna eni. Ai man moumou dewdewe onne kuku kalla leke maika kaurani Makromod Lalap. Ri nesne Ai, maa Makromod Lalap Nin Roh na'amori Ai wali'ur.

<sup>19</sup> Ai nala ke'ekel an'anha Yesus leke laa naderre nadaul Makromod Lalap Lirna Wawan ri hamaran man dasledi lolo hunukum onno mahar weilapan Makromod Lalap Nin hunukum.

<sup>20</sup> Hamaran onnenihe ramwali ri mormori ma kar derne rakani Makromod Lalap man makiyedi le Nuh nin kulere, de dasledi lolo hunukum onno onne. Ler onne Makromod Lalap kukul Nin aki man wa'an newek Nuh hi'i kapal horu mene nala oir rulu lap mai na'akeper noho wawan na'akeme. Nuh noro hono ananne, noro paninhe mehe minle kapal raram, de hi ri wo'aa mehe kar maki lolo oir rulu lap onne raram.

<sup>21</sup> Enla oir rulu lap ma na'akeper noho wawan onne naho'ok naise oir rodi

\* **3:10** Mzm. 34:11-15

ulutada ri, ono lolo oir rulu lap onne Nuh mori, la lolo oir unulu tanada onne mim lernala or'ori dardari haenhi. Oir rodi ulutada mi onne, kan hi'i ik kemen mou, maa namwali tanada nahenia ik kodi honorok aki man mou kapanak Makromod Lalap na'amou ika nano dohohala na'akeme. Ik kauroin kokkoo nahenia Ai na'amou ika ono Ai na'amori Yesus Kristus nano Nin makimaki,

<sup>22</sup> la Yesus nakinikan laa a'am raram naikoro Makromod Lalap herne malanna. Ler alam eniyeni An ke'el rehi anha rehi de nodi molollo hophopon a'am raram noro idewe na'akeme ma nodi molollo namehin lolo noho wawan noro a'am raram, de na'akeme lolo yawa Ai.

## 4

*Kerhu lolo wewerek pananaka la hi'i ha man wa'an mamani naise Yesus*

<sup>1</sup> I wal'u na'ahoruwed! Lere Kristus minle noho wawan eniyeni, An kokaledi wewerek pananaka nammori lolo kemen. Ende wa'an rehi ma'alap mi akim leke mi moro Kristus honorok aki mahaku leke mi mamkene lernala wewerek pananaka naise Ai haenhi, ono ri na'akeme man kokala wewerek pananaka lolo kemen, kar hurinohi dohohala nodi molollo hi me'e.

<sup>2</sup> Enpenia nano lere eniyeni rakan minim lere man horu, yon mori lernohi ri mormori nin monmono kamanna man ailanna, maa mori lernohi Makromod

Lalap Nin honorok aki manani.

<sup>3</sup> Nonolu mim lernohi ri ma ka nauroin Makromod Lalap nalo'ol. Hi onne hi'i ha ma namehiyala wake'e, de yon mim lernohi hi hi'i ha man ailanna onne me'e. Hi raram nodi ida man holi diwar dawar noro ida, hir hi'i ha man morso, hi romun manha, hir hi'i yapi lap ma namehiyala mamani, hir lalaa mamai hi'i ha man ailanna mamani, la hi'i teitei noro hoikani aukerhe ma kan lolo ri raram.

<sup>4</sup> Hir hehel ono mi mammhene lernohi hi hi'i ha ma namehiyala onne, de hir hadwei hadwokor la wakunu nano'onyaka mi mamani,

<sup>5</sup> maa lere man mai Makromod Lalap napanak ri onnenihe rala wanalhanne nano rira hini'i wenewhe man ailanna onne. Ai penia namkene ho'ok kail ri mormori na'akeme, man mormori makun noro idewe man makiyedi me'e.

<sup>6</sup> Onne penia Lir Wawa'an onne loikaruwed laa ri man makiyedi onnenihe haenhi. Kade kemenhe lernaledi hunukum de maki naise ma nadedem, maa hir mori wali'ur lernohi Makromod Lalap honorok akin.

*Rala nounaku leke ik ida man naramyaka ida, la ida man paku ida*

<sup>7</sup> Noho eniyeni nin man horu na'uraniyedi me'e, de madiyaka mi kemen la loi honorok wawa'an, leke yon maprehen hi'i lir napanak.

<sup>8</sup> Enla ha ma na'ono wake'e, mi ida ma naramyaka

ida kokkoo. Lo'o ik ida ma naramyak ida, kak pelek ka'ahan ri man hi'i sala maika, maa ik ida ma nala ampun ida, la ida man mori wawa'an noro ida mamani.

<sup>9</sup> Ya apanak mi modi lir mamamal noro aki man mou kokala ri na'akeme man ki minim nakar, la yon hehel warna enu.

<sup>10</sup> Makromod Lalap naledi woroin ma na'ono maika dohodoho leke kodi ilitolle Nin honowok wawa'an. Ende wa'an rehi ik na'akeme nair woroin onne paku ri namehin leke ilitolle honowok man Makromod Lalap naledi maika dohodoho lernohi Nin aki man wa'an eni.

<sup>11</sup> Lo'o rin lernala woroin loikaru Makromod Lalap Lirna Wawan, wa'an rehi ai nodi Ai Lirna mehe wakuku ri. Lo'o ri nauroin paku ri namehin, wa'an rehi ai nodi ruri pe'el man Makromod Lalap naledi ai leke paku ri namehin. Enleke Makromod Lalap lernala u'uli sasa'a mamani lolo ha wo'ira na'akeme, ono Yesus Kristus penia man paku ik mamani. Ri mormori na'akeme ra'uli rasa'a Ai mamani, ono Ai penia man kukulu lalap la ma nodi molollo ma narehi nalewen laa ewi-ewi! Amin!

*Nounaku ri man lernala wewerek pananaka ono lernohi Yesus*

<sup>12</sup> I walin man ya aramyaka! Ler eniyeni mim lernala wewerek pananaka man hi'i apinpinha mi naise aiye ma na'an mi kemen. Wewerek pananaka onne hi'i ri na'akeme rauroin nahenia mi akim naili'iledi

wawa'an me'e, ee kaun! Yon hehel ma'heni, "Alhi'ihepe eniyeni namwali maika?" Nadedem ri man lernohi Yesus lernala apinpinha heheni.

<sup>13</sup> Lere mim lernala wewerek pananaka, yon mi akim tana, maa muhuwa'anedi mi akim, ono mi moro Kristus mamwali mahaku lolo Nin wewerek pananaka haenhi. Enleke lere An mai wali'ur nalhari Nin siksik lerlere, la lernala ul'uli sa'sa'a noro honoor hanawe, mi akim muhuwa'an rehi ono lere onne moro Ai mamwali mahaku haenhi.

<sup>14</sup> Lo'o rin hadwei hadwokor mi ono mim lernohi Kristus, mi akim muhuwa'an mamani, ono onne nodi kunukunohi nahenia Roh man ma'aruru wake'e aile mi raram, la Roh onne, Makromod Lalap Nina.

<sup>15</sup> Lo'o mim lernala apinpinha ono mim lernohi Yesus, kan hi'i haida, maa yon de mim lernala apinpinha ono mim hi'i ha man yaka. Yon hi'i ha ma namehiyala naise resne ri, ramna'a, la yon hi'i ha namehin man ailanna naise onne, la yon wakunu ri namehin rir morimori haenhi.

<sup>16</sup> Enimaa lo'o rin hi'i apinpinha mi ono mi mamwali ri Kristen, yon mawawa, maa ma'uli masa'a Makromod Lalap ono namlolo kokkoo mi mamwali Kristus Nin ri.

<sup>17</sup> Lere Makromod Lalap ho'ok kail ri mormori na'akeki rakan me'e, la An ho'ok kail Nin ri mememen nolu mene ho'ok kail ri namehin. Ende lo'o An

ho'ok kail ika ma namwali  
Nin ri, emene hi'ihehewi  
ri ma kan derne rakani  
la akin ka naili'il Ai Lirna  
Wawa'ane ho'o? Hi lo'o lernala  
hunukum man werek  
wake'e.

<sup>18</sup> Lolo Horok Lap raram  
horhorok aile ma na'aheni,  
“Lo'o ri ma namwaliyedi ri  
molololo Makromod Lalap kalarna lernala  
wewerek pananaka  
nammori mene lernala  
or'ori dardari ma  
kan horu,

emene lo'o inhawe  
ma namwali noro ri  
man hi'i dohohala la  
ma namhene derne  
rakani Ai?!\*”

<sup>19</sup> Ende i wal'uhe na'ahoru,  
lo'o mim lernala wewerek  
pananaka nammori ono  
Makromod Lalap kakar  
heheni, yon mi akim tana,  
maa mala mi kemmu Makromod  
Lalap ma nakuku  
noho naleu a'am man  
um'umu man palpala, ono  
Ai penia namkene hi'i Nin  
nou na'akeme noro maika  
namwali. Enla yon mim ren  
hi'i ha man wa'an mamani.

## 5

### *Nounaku kerei raramne*

<sup>1</sup> Ya amwali man leluwai  
makrana ida lolo kerei  
raramne naise mi haenhi,  
la ya'u me'ene amwali man  
kuku maka Kristus Nin  
apinpinha haenhi. Ende lere  
man mai An mai nalhari  
Nin siksik lerlere wali'ur, la  
lernala ul'uli sa'asa'a noro  
honoor hanawe, ya'u penia  
lernala ul'uli sasa'a wewerre  
ono yo oro Ai mamwali

mahaku. Onne penia ya  
apanak mi ma namwali man  
leluwai makrana man ilitolle  
kerei raramne derne makani  
ainu'u nounaku eniyeni.

<sup>2</sup> Ya apanak mi madiyaka  
wawa'an minim kerei  
raramne ma namwali  
Makromod Lalap Nin pipi  
unulu wawi tanma'a man Ai  
naledi mi madiyaka. Ende  
yon ilitolle kerei raramne  
ono mi raram nodi lernala  
kupan mehe. Yon mamwali  
man panulu ono ri namehin  
nakerne mi mamwali man  
panulu, maa ono mi akim  
namrana ilitolle Makromod  
Lalap Nin ri. Ende modi aki  
man mou ilitolle Nin hon-  
owok onne leke muhuwa'an  
Makromod Lalap akin.

<sup>3</sup> Yon mim holi kukulu  
lalap, la yon modi apinpinha  
ilitolle hi, maa hi'i ha ma  
namlolo mamani, leke hir te-  
unohi minim hini'i wenewhe  
man wa'an onne.

<sup>4</sup> Ende rakan lere Man Huri  
Man Ma'aruru Wake'e mai,  
Ai nala rai nin karpusa man  
siksik lerlere ma kan molu  
laa ewi-ewi ki mi.

<sup>5</sup> Enla mi ma ka na'ileher  
makun, derne makani ri ma  
na'ileher, la mi na'akeme ida  
ma ilitolle ida modi aki ma  
namdaru, ono lolo Horok  
Lap raram horhorok aile ma  
na'ahenia,

“Makromod Lalap na'okuledi  
ri na'akeme man holi  
kukulu lalap, maa Ai  
nala Nin rere'e haharu  
ri man helkaki nam-  
daru.” \*

<sup>6</sup> Ende wa'an rehi, mim  
helkaki mamdaru la lolo  
yawa Makromod Lalap ma

\* 4:18 Ams. 11:31

\* 5:5 Ams. 3:34

nodi molollo ma narehi ma nalewen, leke rakan lere alam man An ninili eni, An kikan mi lernala honoor hanawe.

<sup>7</sup> Lo'o panaeku aile man hi'i mi akim ma'irhu, hi'i lir napanak leke Makromod Lalap paku mi, ono Ai penia ma naramyaka la norle'ule'u norwaliwali mi mamani.

<sup>8</sup> Eremedi here! Madiyaka mamani, ono Hayakyak Makromon ma namwali minim arwali lalap lalaa mamai nano'in ri leke nano'onyake. Ai naise singa ma namlara de na'umoo nano'in ya'ane.

<sup>9</sup> Mi mauroin nahenia mi walinhe lolo noho wawan na'akeme lernala wewerek pananaka namnenehe mi haenhi, de yon mi akim tana, maa modi aki ma namkene naili'il Makromod Lalap leke ma'okuledi ai here.

<sup>10</sup> Enla lere eniyeni lo'o mim lernala wewerek pananaka, maa ka nalo'olo wewerek pananaka onne horuwedi me'e, la Makromod Lalap mehen hi'i mi mamwali ri ma namlolo wake'e. Ai na'aruri mi akim, la hi'i mi mamkene mamani leke mi akim yon nado'o me'e. Ai penia man kukul Nin aki man wa'an wake'e ri mormori na'akeme, de Ai napolu mi leke lernala or'ori dardari man ma'aruru wake'e laa ewi-ewi, ono mi moro Kristus mamwaliyedi mahaku me'e.

<sup>11</sup> Ma'uli masa'a Ai ono Ai nodi molollo ma narehi ma nalewen laa ewi-ewi! Amin!

### Tape masi man horu

<sup>12</sup> Ya'u hi'i horok deudeul tantane eniyeni aku ki mi, la Silwanus\* ma namwali i wal'u ma akin namkene naili'il Makromod Lalap paku hi'i horok eni haenhi. Ya'u aku horok eniyeni ki leke na'alapala mi akim, la ya'u kukunohi mi mouropo leke mi na'akeme mauroin namlolo kokkoo Makromod Lalap Nin rere'e haharu ki mi. Mahehe leke mi mamkene lolo Nin rere'e haharu onne.

<sup>13</sup> Mi walin ma aile lolo kota Babilon man Makromod Lalap niliyedi naise mi haenhi, hir aku tape masi ki mi. Markus ma namwali ya an'u, an aku tape masi ki mi haenhi.

<sup>14</sup> Mi ida ma nala tape masi ida ono mi mamwali Makromod Lalap lodon walinhe.

Ya apanak Makromod Lalap nala aki ma namlina namkai ki mi na'ahoru ono moro Kristus mamwaliyedi mahaku me'e.

Tape masi,  
Petrus

\* **5:12** Silwanus, ee Silas

## 2 Petrus

### *Horok Lirna La'an*

Petrus hi'i horok ida wali'ur aku laa ri Kristen man min lolo propinsi Asia Tatana, de rin wekel horok eniyeni Petrus nin horok rewro'o nine.

Lolo horok eni Petrus nin panaeku ma na'ono, ra'okuledi meser agama man wakuku panaeku ma ka namlolo. Petrus na'ori honorok ri Kristen lolo onne leke yon hir derne rakani meser man ailanna onnenihe rir wanakuku ma ka namlolo. An ken na'alapa hi akin leke hi eren ramkene lernohi Makromod Yesus, la rasala kerkerhe Makromod Yesus Nin wanakuku ma namlolo. Wanakuku ma namlolo onne, ri man mehen do'on derne Makromod Yesus loikaru hi.

Petrus akin werek ono meser ma ka namlolo wakuku heheni: Yesus nou nahenia An mai wali'ur, maa Ai kan mai makun, de Ainin nou kan min haida (3:3-4). Petrus na'aheni rir wanakuku onne sala wake'e ono lolo Makromod Lalap Nin honorok panaeku alam ida naise alam riwan ida, la Ai kan huri Yesus mai makun ono Ai mahan weilapan ri na'akeme herredi rir morimori ma ka namlolo eni. Ai raram nodi yon ri mahaku lernala hunukum makmaki nako'uwedi Ai (3:8-9), maa onne lo'o ka namwali ono ri aile ma namhene derne nakani Ai. Enimaa rakan lere alam man Ai mehen nili, Makromod Yesus

namlolo kokkoo mai wali'ur nano'onyaka noho wawan man ailanna eniyeni (3:10).

### *Horok Ihin*

1. Petrus nala wanakunu man hari horok (1:1-2).
2. Petrus nounaku ika ma akin naili'il kahehe hi'i ha ma namlolo mamani (1:3-21).
3. Petrus nounaku ika yon derne kakani meser agama ma ka namlolo (2:1-22).
4. Petrus na'ori honorok ika na'aheni Yesus Kris-tus namlolo kokkoo mai noho wawan wali'ur (3:1-13).
5. Petrus nala wanakunu man horu (3:14-18).

### *Petrus nala hiyene aroro*

<sup>1</sup> I wal'u na'ahoru ma noro mayai akin naili'il kokkoo Yesus Kristus! Ya'u eni Simon Petrus, la ya'u hi'i horok eni aku ki mi ma akin naili'il Kristus, la ya amwali Ainina hophopon wahwahan noro Nin hophopon ma nodi Lirna Wawa'an eni. Yesus Kristus eni namwali ik Makromod Lalap noro idewe iknik Rai man huri we'er ika nano dohohala nin molollo. An hi'i ik akin naili'il wawa'an, ono Ai penia man hi'i ha ma namlolo mamani.

<sup>2</sup> Ya apanak Makromod Lalap hi'i mi akim eren moiliwi mahuwele, la nala Nina rere'e haharu eren nammomori ki mi na'ahoru ono mi mauroinedi Makromod Lalap noro Ik Makromod Yesus Kristus me'e.

*Mahehe leke eren mauro-roin Makromod Lalap man polu maika kamwali Nin ri*

<sup>3</sup> Makromod Lalap nodi Nin molollo man lewlewen na'aruri ik akin, la nala ha wo'ira na'akeme man paku maika leke iknik morimori namlolo mamani lolo Ai leken kalaruna, leke ik kau-roin hi'i wewhe Nin honorok aki mamani. Onne namwali ono ik kauroinedi Ai me'e. Ai onne, Nin morimori ma'aruru rehi, la akin wa'an wake'e. Nano Ai akin man wa'an noro Nin morimori man ma'aruru onne, Ai napolu ika kamwali Nin ri,

<sup>4</sup> la nala Nina nou man ma'aruru rehi ma na'ono wake'e maika. Lolo Nin nou onne, An huriyedi mi nano noho wawan nin monmono kamanna ma nodi ri laa yakanne, la nala mormori man wa'an wake'e ki mi, leke moro Ai mamwali mahaku la minim morimori teunohi Nin morimori man ma'aruru wake'eni.

<sup>5</sup> Makromod Lalap nala rere'e haharu man lewlewen onne, de mi ma akin nailil'i Ai, mahehe hi'i ha ma nam-lolo mamani. Enla mi man hi'i ha ma namlolo mamani, mahehe eren mauroroin ewi man wa'an noro ewi man sala.

<sup>6</sup> Mi ma nauroin ewi man wa'an noro ewi man sala, mahehe madiyaka mi kemen leke yon hi'i ha man sala me'e. Mi ma nauroin nadiyaka kemen mamani, mahehe leke eren mamkekene lolo wewerek pananaka. Mi ma namkenedi me'e enihe, ma-hehe leke lernohi Makromod Lalap Nin honorok panaeku mamani.

<sup>7</sup> Mi man lernohi Makromod Lalap Nin honorok

panaeku mamani, mahehe maramyak ri heri ri wali naise mi walinhe mememen. Mi ma naramyaka ri heri ri wali, mahehe eren mararamyaka ri mormori wali na'akeme.

<sup>8</sup> Lo'o minim morimori naise onne na'akeme, la mi mahehe leke minim morimori eren wawa'an, onne nin panaeku nahe-nia mi mampe'el ilitolle Nin honowok wawa'an, la mim lernohi Nin honorok panaeku mamani, ono nam-lolo kokkoo mi mauroinedi ik Makromod Yesus Kristus wawa'an me'e.

<sup>9</sup> Enimaa ri ma nin mori-mori ka naise onne, makan na'akeki toko me'e, de kan do'on haida mouropo, ono hamlinuwedi na-henia Makromod Lalap na'amouwedi hi nano rir dohohala man hir hi'iyedi nonolu eni.

<sup>10</sup> Ende I wal'u na'ahoruwed, Makromod Lalap napolu la niliyedi mi mamwali Nin ri, de mahehe lernohi Nin honorok panaeku mamani, leke namwali tanada na-henia namlolo kokkoo mi mamwaliyedi Nin ri me'e. Lo'o mim hi'i heheni, mi ka madiyaur dohohala, maa mi akim eren nailili'il Makromod Lalap,

<sup>11</sup> la lere man mai An kokala mi wawa'anedi lolo onno man ik Makromod Yesus Kristus ma namwali iknik Rai Ma Nala Or'ori Dardari eni nodi molollo laa ewi-ewi.

*Petrus nounaku hi yon hamlinu wanakuku ma nam-lolo*

<sup>12</sup> Ende I wal'u na'ahoru, kade mi mauroin mouwedi ha eniyenihe me'e, la mi mamkene lernohiyedi wanakuku ma namlolo man mim dernedi me'e, maa ainu'u panaeku ya a'ori honorok mi mamani ha ma na'ono eniyeni.

<sup>13</sup> Ya auroin nahenia wa'an rehi ya a'ori honorok mi mamani hehen nanumene ainu'u lere horu,

<sup>14</sup> ono Makromod Jesus Kristus konohiyedi ya'u nahenia ka nalo'olo i maki me'e.

<sup>15</sup> Ende ya ahehe wakunu ha eniyenihe na'akeme mouropo, leke lo'o ya'u makiyedi, mi kam hamlinu me'e.

<sup>16</sup> I wal'u na'ahoru! Am wakukuwedi mi nahenia ik Makromod Jesus Kristus nodi molollo ma narehi ma nalewen, la lere man mai An wali wali'ur mai noho wawan eniyeni. Ai kam nair wanakunu ma namwali ri mormori rir wanakunu koirwakar mehe, maa ha ma namlolo kokkoo, ono ai mehem do'on Jesus kemen siksik lerlere.

<sup>17</sup> Am do'on onne lere nonolu, ono ai moro Jesus min wewerre lolo wo'orida. Lere onne Ai Aman Makromod Lalap Man Siksik Lerlere nala honoor hanawe la na'akulu na'alap Jesus. Ai nodi lira man lapa na'aheni, "E'ni Ya An'u man Ya aramyake. An hi'i Ya akin nahuwa'an wake'e!"

<sup>18</sup> Enla ai mehem derne lira lalap onne mai nano a'am

raram lere ai moro Yesus min wewerre lolo wo'or man moumou dewdewe onne.

<sup>19</sup> Am do'on mauroin onne, penia ai mauroin nahenia ha wo'ira na'akeme man Makromod Lalap konohiyedi nabi-nabi nonolu eni namlolo kokkoo. Wa'an rehi mim derne makani nabi lirna onneni, ono lirna onne naise wadu man mormori lolo noho momohon eni rakan lere Kristus mai wali'ur. Ler Kristus mai onne naise lere ha'edi me'e de ropedi noho wawan na'akeme, la naise kaliyorok nokimur hikan lolo mi akim, penia mim do'on mauroin ha wo'ira na'akeme mouropo.

<sup>20</sup> Eniyeni ha ma na'ono wake'e! Yon hamlinu nahenia Lirna Wawan man horokedi lolo Horok Lap raram kan mai nano nabi onnenihe rir honorok panaeku aimehi, maa mai nano Makromod Lalap.\*

<sup>21</sup> Nabi onnenihe kar lerohi ri mormori nin honorok panaeku mehe, maa Roh Kudus penia ma nodi nala hi, de hir loikaru Makromod Lalap Lirna mememen lolo Horok Lap eni.

## 2

*Madiyaka mi leke yon derne makani meser-meser ma ka namlolo enihe*

<sup>1</sup> Enimaa lere nonolu nabi-nabi ma ka namlolo nammori aile lolo ri Israel enihe. Onne naise lere eni haenhi, meser-meser ma ka namlolo lo'o maiyedi

\* **1:20** Tafsiran namehin na'ahenia, 'Yon hamlinu nahenia Lirna Wawan man horokedi lolo Horok Lap raram mai nano Makromod Lalap, de yon ik kodi ik honorok panaeku aimehi napa'aha.'

lolo minim kerei raramne haenhi. Hi rahehe paipudi mi rodi wanakuku man wa'an, maa rir wanakuku onne ka namlolo, la nodi ri laa yakanne. Meser ma ka namlolo onnenihe ramhenedi Makromod Yesus man huri we'eredi hi nano dohohala nin hunukum makmaki me'eni, de ka nalo'olo me'e rir hini'i man yak onne nodi hi laa yakanne.

<sup>2</sup> Kade onne namlolo, maa ri nammori lo'o lernohi hi, de ida man holi diwar dawar noro ida, penia ri namehin man po'on, hir hadwei hadwokor Makromod Yesus Nin kalla ma namlolo haenhi.

<sup>3</sup> Meser ma ka namlolo onnenihe ranoin kupan mamani, de hir wakuku wanakuku lernohi rir raram nodi aimehi, leke hi rapanak rira mahmaha awenne nano mi mamani. Enimaa Makromod Lalap man ho'ok kail eni na'akenedi rir hunukum makmaki nano nonolu me'e, de ka nalo'ol hir lernala hunukum man werek onne me'e.

*Makromod Lalap nodi molollo namre'e namharu ri ma namlolo, la nala hunukum ri man ailanna*

<sup>4</sup> I wal'u na'ahoru! Ik kauroin nahenia nonolu hophopon a'am raram aile man hi'i dohohala, la Makromod Lalap kan hamlinu rir dohohala de kele sopoledi laa hunukum onno. Lolo onne wukuwedi hi lolo ku'il lap man metmetek raram hehen nanumene rakan Lere Alam Hono'ok Kanail hir lernala hunukum ma namlolo.

<sup>5</sup> Onne namnenehe noro noho wawan nonolu eni,

Makromod Lalap nala okon lape mai penia ri ma kan derne nakani Ai lere onne maki mouwedi. Ai kan huri we'er hi nano hunukum onne, maa An huri we'er Nuh noro nina nakar raram, ri wo'ikku, nano oir rulu lap onne de kar maki. Nuh onne loikaru Makromod Lalap Lirna Wawan nin ri heri ri wali, la nounaku hi hi'i ha ma namlolo haenhi.

<sup>6</sup> Onne namnenehe noro kota Sodom noro Gomora. Makromod Lalap nodi aiye nano'onyakedi kota woro'o onne, leke namwali wanakuku man konohi maika inhawe ma namwali noro ri man ailanna ma kan derne nakani Ai.

<sup>7</sup> Enimaa lere onne Makromod Lalap huriyedi Lot leke mori. Lot onne namwali ri man hi'i ha ma namlolo mamani, la an sus rehi po'on ri manin Sodom noro Gomora rir morimori, ono hir holi diniwar danawar la ra'okuledi keneri hono'ok na'akeme.

<sup>8</sup> Akilere Lot holiwuku noro ri mormori man ailanna enihe, la ai onne ri molololo de akin apinha rehi, ono po'on rir hini'i wenewhe man diwar dawar onne, la derne rir wanakunu wanarei man morso mamani.

<sup>9</sup> Ende I wal'u na'ahoru, nano ha onne na'akeme ik po'on kauroinedi nahenia Makromod Lalap nodi molollo huri we'er ri man hi'i wewhe Nina honorok aki lere hir lernala kenepanatal na'akeme, la Ai nodi molollo kele ri ma kan derne nakani lolo hunukum onno hehen nanumene nala hunukum man werek lere

An ho'ok kail ri mormori na'akeme.\*

<sup>10</sup> Ai nala hunukum ri man ailanna na'akeme, maa Ai nala hunukum man werek wake'e ri man lernohi irhun raramne nin monmono kamanna ma na'okuledi Makromod Lalap Nin molollo!

### *Meser-meser ma ka namlolo rir dohohala*

Meser-meser ma ka namlolo eniyenihe ra'uluwaku kekerhe la holi kukulu lalap, penia ka ramka'uk ra'ihoru ra'idaru ha man ma'aruru wake'e ma nodi molollo lolo a'am raram.<sup>†</sup>

<sup>11</sup> Kade hophopon a'am raram rodi molollo man lap narehi meser onnenihe, maa hi ramka'uk ra'ihoru ra'idaru ha man ma'aruru wake'e ma nodi molollo onnenihe lolo Makromod Lalap kalarna.

<sup>12</sup> Meser ma napoho onnenihe raisa ha mormori merwui ma ka nauroin haida, maa mori mehe leke ri mormori kele de resne. Meser onnenihe honorok panaeku kaale, de hir lernohi hi irhun raram aimehi naise ha mormori haenhi. Enla hi ra'ihoru ra'idaru ha man hi ka rauroin makun, penia Makromod Lalap kele hukumesne naise rin kele ha mormori merwui resne.

<sup>13</sup> Hir lernala hunukum man apinha rehi leke walha rira hini'i wenewhe man yaka man hi'i apinpinha ri namehin. Hi raram nodi

lalaan mamai noro soksok murmur mamani, la hir holi diwar dawar lelere al'alam leke lernohi rir monmono kamanna! Lere hi roro mi raikoro wuku ra'ak romun, hir lernohi mehe irhun raramne, de hir hi'i wawawa mi ono ri man po'on hirira hini'i onne, kuku sala mi haenhi.

<sup>14</sup> Hirira monmono kamanna kan horu penia hi ranoin maeke mamani, la kar ren hi'i dohohala. Hi ranoin ri ma akin pelek nado'o leke nakoko hir hi'i dohohala wewerre. Hi rampe'el rakmanna ri nin hahaa la ranoin kupan mamani. Onne penia Makromod Lalap nakineriyedi hi me'e!

<sup>15</sup> Hi ramhene lernohi kalla ma namdudu, maa hir lolo kalla man nabi Bileam, Beor anan, lolole. Nonolu Bileam eni raram nodi lernala kupan nano nina hini'i man ailanna,

<sup>16</sup> maa Makromod Lalap hi'i Bileam nin keledei wakunu nodi ri mormori lirna dadiyala ai. Eni nanumene nabi Bileam rededi nin honorok panaeku ma na'iseri onne.

### *Meser ma ka namlolo enihe rir hunukum*

<sup>17</sup> Meser ma ka namlolo enihe raisa oir makan ma napro'uk noro noho ha'aha'a man anne huwedi de okon kaale. Ende Makromod Lalap na'akenedi onnida man metmetek wake'e leke hir minwuku lolo onne.

\* **2:9** Tafsiran namehin na'ahenia: '...la Ai nodi molollo nala hunukum mamani ri ma kan lernohi Ai honorok akin onne, la keledi leke hir lernala hunukum man werek wake'e mamani rakan Lere Alam Hono'ok Kanail.' † **2:10** Tafsiran namehin na'ahenia: '...penia hi ra'ihoru ra'idaru ri ma nodi molollo man lap lolo noho wawan.' Tafsiran ida ikar na'ahenia, '...de hi ra'ihoru ra'idaru ma nodi molollo hayakyak.'

<sup>18</sup> Hir holi kukulu lalap la wakunu ha man rin derne ma'aruru mamani maa na'alehe panaeku ida. Hir kokwudi ri man idedi nanumene akin nail'il Makromod Lalap, la idedi nanumene rahinuri nano rir na'aromwali man ailanna onnenihe. Hir nori ri onnenihe hi'i ha man lernohi irhun raram nin monmono kamanna man ailanna mamani.

<sup>19</sup> Meser ma ka namlolo onnenihe ra'aheni, "Mai lernohi mayai ono ik kahinuriyedi nano keneri hono'ok me'e, de mai ik lernohi iknika raram nodi aimehi. Lo'o ik kak lernala hunukum me'e!" Enimaa namlolo kokkoo meser eniyenihie irhun raram monmono kamanna nodiyedi molollo hi me'e, penia nodi laa yakanne. Ik kauroin onne namlolo ono lo'o rin derne nakani panaeku ida mamani, panaeku onne nodi molollo ai me'e.

<sup>20</sup> Nonolu meser man ailanna onnenihe rauroinedi Makromod Yesus Kristus ma namwali iknik Rai man huri we'er ik nano dohohala nin molollo eni, la hi rahinuriyedi nano noho wawan nina monmono kamanna ma nodi ri laa yakanne. Enimaa hir derne rakani noho wawan nina honorok panaeku wali'ur, de ha man ailanna onne nodiyedi molollo hi ho'o me'e. Ende hi onne rira hini'i wenewhe ailanna narehi nano nonolu eni, penia hir mayo'o wake'e.

<sup>21</sup> Nonolu hir lernohi Makromod Lalap Nin kalla

ma namlolo, maa hir wali wali'ur lernohi kalla man sala, ono ra'okuledi Makromod Lalap Nin keneri hono'ok man moumou dewdewe man hir kokaledi me'eni! Ende wa'an rehi nano nonolu onne hi kar derne rakani idewe!

<sup>22</sup> Hirira hini'i onne memen naise wanakunu naho'ok ida ma na'aheni, "Ahu mehe na'an wali'ur nina moke, la wawi ma narohedi me'e, laa namkuru wali'ur dalupope!" \*

### 3

*Petrus konohi hi nahenia namlolo kokkoo Yesus Kristus mai wali'ur*

<sup>1</sup> I wal'u na'ahoru man ya aramyake! Nonolu ya akuwedi horok ida ki mi me'e, de horok man ya aku eniyeni rewro'o nine. Lolo ainu'u horok eniyeni, ya ahehe a'ori honorok mi panaeku ma namlolo mamani, leke mi honorok akin eren moumou lolo Makromod Lalap kalarna.

<sup>2</sup> Ainu'u panaeku a'ori honorok mi leke yon mim hamlinu Lira man Makromod Lalap Nina nabi enihe loikaruwedi ki mi nonolu eni, la yon mim hamlinu konomdere man ik Makromod Yesus ma namwali iknika Rai Ma Nala Or'ori Dardari naledi ki mi. Mim dernedi Nin honopon onne nano mayai ma namwali Nin hophopon ma nodi Lir Wawa'an enihe.

<sup>3</sup> Enimaa panaeku eniyeni ma na'ono wake'e yon mim hamlinu: Rakan lere

\* 2:22 Ams. 26:11

noho wawan na'ikeki nin man horu, rin mai hadwei hadwokor mi mamani. Ri onne irhun raram monmono kamanna nodiyedi molollo hi me'e.

<sup>4</sup> Hi rapoho na'ahenia, "Makromod Lalap nou nahenia lere man mai Yesus mai wali'ur noho wawan eni, maa kan mai, de Nin nou onne kan min haida! Ik upud a'ad maki mouwedi me'e, maa nano lere onne rakan lere eniyeni, haida lolo noho wawan eniyeni kar herre makun! Nano noho eni nin ma namwali, na'akeme nammenehe mamani!"

<sup>5</sup> Ri ma napoho heheni akin kerhe, de kar horok nahenia nonolu Makromod Lalap penia ma nodi lirna mehe nakuku noho naleu a'am na'akeme. Ai naheiredi oir nano noho, la An hi'i noho ma napro'uk namhara lolo oir onne raram.

<sup>6</sup> Enla rakan Nuh nin kulere, Ai nodi lirna hi'i oir onne namwali oir rulu lap mai na'akeperedi noho wawan nonolu onne.

<sup>7</sup> Enla namnenene naisa onne, ors eniyeni Ai nodi lirna mehe nadiyaka noho noro a'am, leke rakan Lere Alam Hono'ok Kanail onne Ai nodi aiye harna mouwedi noho noro a'am eniyeni, la nala hunukum ri na'akeme ma kan derne nakani Ai.

<sup>8-9</sup> I wal'u na'ahoru man ya aramyaka! Yom hamlinu panaeku ma na'ono eniyeni. Makromod kan hamlinu Nina nou, kade ri aile man pene'ek nahenia nalo'oledi me'e Ai kan mai de lo'o Nina nou onne ka namwali. Onne ka namlolo, ono lolo

Makromod Lalap Nin hon-orok panaeku, alam ida naise alam riwan ida, la alam riwan ida naise alam ida. Hi onne ka rauroin nahenia Makromod Lalap mahan weilapan nala hunukum ri mormori leke yon ri mahaku lernala hunukum makmaki nako'uwedi Ai. Ainin honorok panaeku ri mormori na'akeme lernala leken paharin derne rakani Ai la herredi rir morimori man ailanna.

<sup>10</sup> Enima rakan lere An ninili onne, Makromod Yesus namlolo kokkoo mai wali'ur! Enla Nin mamai onne hi'i ri polletilu ono ka rauroin inhawe lere An mai, naise ri mahaku ka nauroin inhawa lere ri mai nakar namna'a! Lere onne ik derne aiye man lapa wake'e neknekir, la ik po'on a'am moluwedi. Aiye na'an wollo, kaliyoro, noro noho wawan eni na'akeme horuwedi. Enla inhawe memehe man aile lolo noho wawan me'eni me'ede moluwedi.

*Hi'i ha ma namlolo hehen nanumene Makromod Yesus mai wali'ur*

<sup>11</sup> Makromod Lalap nouwedi me'e nahenia lere man mai ha onne na'akeme harne mouwedi. Ende I wal'u na'ahoru, lo'o ik kakar iknik morimori hehewi? Mai ik derne kakani Makromod Lalap Nina honorok aki manani, leke iknik morimori nammenehe noro Makromod Lalap Nina ri mememen man hi'i ha ma namlolo mamani.

<sup>12</sup> Ik mahak weilapan Makromod Lalap Nin lere alam noho nin man horu onne, de mai ik mori hi'i ha

ma namlolo mamani hehen nanumene Yesus mai wali'ur noho wawan eni, leke lere alam onne pelek rakan. Lere onne aiye na'an mouwedi a'am eni, la lere, kaliyoro noro wollo man aile a'am lo'o woir de moluwedi me'e.

<sup>13</sup> Enimaa ik weilapan a'am worworu noro noho worworu man Makromod Lalap nouwedi maika me'e! Ri man hi'i ha ma namlolo lolo Makromod Lalap kalarna mamani, hi onne mehe min lolo a'am noro noho worworu onne, ri man ailanna ka!

<sup>14</sup> Ende I wal'u na'ahoru man ya aramyaka, mi maham weilapan ha eniyeni namwali, de madiyaka minim dunu'ul kanali noro Ai wawa'an, la mahehe hi'i minim morimori namlolo mamani, leke rakan lere alam onne Makromod Lalap na'aheni minim morimori moumou dewdewe, la mi ma'alehe dohohala ida lolo Ai leken kalarna, leke mi moro Ai holi melina makai.

<sup>15</sup> Loi honorok wawa'an! Makromod Lalap mahan weilapan leke nala leken ri mormori rahinuriyedi nano dohohala nin hunukum.

Paulus, ik walin man ik karamyaka, horokedi ha naise onne ki mi me'e haenhi. Makromod nala Paulus woroin man lap narehi de horokedi horok onnenihe me'e.

<sup>16</sup> Lolo nina horok na'akeme, an konohiyedi mi ha eniyeni na'akeme me'e, la lolo nin horok enihe horhorok aile man sus mene ik kauroin. Ende ri ma akin ka naili'il wawa'an

la ka nauroin Paulus nin wanakuku onne wawa'an makun, hi onne wokor kaliyedi nin panaeku noro wanakuku onne lernohi rir woroin aimehi. Hir wokor kaliyedi wanakuku namehin lolo Horok Lap haenhi, penia rir hini'i wenewhe man sala onne nakoko hi rahineiredi nano Makromod Lalap la lernala hunukum makmaki.

### *Lira man horu*

<sup>17</sup> Enimaa I wal'u na'ahoru man ya aramyaka! Mi mauroinedi ha eniyeni na'akeme, la mi mauroinedi nahenia meser ma ka namlolo enihe lo'o mai me'e. Ende madiyaka mi kemen mamani, leke yom hurinohi hi paipudi mi, kalo'o mim sopoledi minim aki ma namkene naili'il Makromod Lalap, la mim loledi rir kalla man saleni.

<sup>18</sup> Mim lernohi Yesus Kristus ma namwali ik Makromod noro idewe Rai Ma Nala Or'ori Dardari maika. Ende mahehe leke eren mauroroin Makromod Lalap Nin rere'e harharu man wa'an wake'e, la mahehe leke eren mauroroin Makromod Yesus wawa'an. Na'amoli ik ka'uli kasa'a Makromod Yesus man kulu narehi man lap narehi nano lere eniyeni rakan laa ewi-ewi! Amin!

Ainu'u tape masi,  
*Petrus*

# 1 Yohanis

## *Horok Lirna La'an*

Ri Kristen man minle nonolu ra'aheni ri ma naran Yohanis man hi'i horok eniyeni, la lere an hi'i horok eni minle nin kota Epesus. An aku horok eni laa ri Kristen na'akeme man minle propinsi Asia Tatane. Lere an hi'i horok eniyeni ai na'ileheredi me'e.

Lere Yohanis hi'i horok eni, meser agame nammori aile man wakuku ha ma ka namlolo. Hi ra'aheni Kristus ka namwali ri morimori ma nadedem naise maika, maa Ai namwali roh mehe, de ha ma namwali noro ri kemen kan min haida. Hi ra'aheni lo'o ik hi'i ha man ailanna, onne kan min haida ono ik kemen mehe man ailanna. Yohanis na'aheni rir wanakuku onne na'akeme sala wake'e! Ai na'aheni Yesus namwali Makromod Lalap Ananne, la namwali ri mormori naise maika, la Ai kemen naise ik kemen haenhi. Lo'o ik kauroin Makromod Lalap kokkoo ik teunohi Nin hini'i wenewhe, de kak hi'i dohohala, maa ik lernohi Nin keneri hono'ok man hopon ik ida ma naramyaka ida.

Yohanis hi'i horok eniyeni leke ri ma akin naili'il Makromod Lalap Anan rauroin kokkoo hir lernaledi or'ori dardari ma kan horu (5:13). An horok panaeku namehin ma na'alapa ik akin haenhi leke ik kauroin kokkoo ik kamwali Nin ri (2:3, 5-6; 3:10, 14, 24; 5:11-12, 18-20). Ai na'aheni lo'o ik akin

naili'il ik Makromod Yesus, ik ka kamka'uk kamriri lolo Makromod Lalap leken kalarna (2:28; 3:19-22; 4:16a, 17-18; 5:14).

## *Horok Ihin*

1. Yohanis nala wanakunu man hari horok eni (1:1-4).
2. Ik min lolo Makromod Lalap Nin Roproporaram (1:5-2:27).
  - a. Lo'o ik kauroin Makromod Lalap, ik kak minle noho momohon la ik hi'i wewehe Nin keneri hono'ok (1:5-2:17).
  - b. Ik akin naili'il Yesus, de kauroin Ai penia man Makromod Lalap kikan namwali Rai laa ewi-ewi (2:18-27).
3. Ik kamwali Makromod Lalap ananhe (2:28-4:6).
  - a. Iknik morimori ka namnehe noro Hayakyak Makromon nin ri (2:28-3:24).
  - b. Ik kauroin Yesus ma namwali Rai laa ewi-ewi, namlolo kokkoo namwali ri mormori la Ai kemen naise ik kemen haenhi (4:1-6).
4. Ik akin naili'il Makromod Lalap, la ik kauroin Ai penia raramyaka onno (4:7-5:12).
  - a. Ik ida ma naramyaka ida (4:7-5:5).
  - b. Ik akin naili'il Yesus de kauroin Ai onne Makromod Lalap Anan man maki leke nala morimori man ma'aruru wake'e maika (5:6-12).
5. Yohanis konohi horok eniyeni nin panaeku (5:13).

6. Yohanis nala wanakunu man horu (5:14-21).

*Lira ma nala or'ori dardari*

<sup>1</sup> Horok eni ihin na'ono Lirna ma nala or'ori dardari man ailedi nano nonolu wake'e lere noho eni ka namwali makun. Am dernedi Ai ma namwali Lirna onne la modi ai makam do'onedi la tukuledi Ai me'e. Ai onne Yesus Kristus, Lirna ma nala or'ori dardari eni.

<sup>2</sup> Or'ori dardari onne maiyedi noho wawan, la am do'onedi me'e. Onne peni ai mamwali man kuku maka Ai ma nala or'ori dardari ma kan horu eni. Ende am konohi mi inhawa man nonolu am dederne la dodo'on eni. Nonolu Ai ma nala or'ori dardari eni minwuku noro Aman, maa lere eniyeni hariyedi mayai me'e.

<sup>3</sup> Am konohi mi hahaa na'akeme man am do'on la derne, leke lere eniyeni mi moro mayai minwuku kodi honorok aki mahaku la kauroin wewerre hi'ihehewi ik koro iknik Ame noro Anan Yesus Kristus moriwuku wawa'an.

<sup>4</sup> Am hi'i horok eniyeni leke ik na'akeme akin nahuwa'anedi kokkoo.

*Makromod Lalap siksik lerlere*

<sup>5</sup> Lira man am dederne nano Ai eni, am loikaru ki mi. Nou eni na'aheni, "Makromod Lalap onne penia siksik lerlere, la lolo Ai onne ha man metmetek kalkala ida kaale."

<sup>6</sup> Lo'o ik ka'aheni, "Ik koro Ai moriwuku wawa'an," maa ik mori aile metmetek

kalkala raram makun, ik mehe wukupohedi ik me'e lolo iknika wanakunu noro iknike hini'i wenewhe.

<sup>7</sup> Lo'o ik mori mamani lolo ropropo raram naise Makromod Lalap aile lolo ropropo raram mamani, ik ida man mori wawa'an noro ida, la Makromod Lalap Anan Yesus rarna na'amouwedi ik honorok akin nano dohohala na'akeme.

<sup>8</sup> Lo'o ik ka'aheni iknik dohohala kaale wake'e, mehe kapohedi ika me'e, la ka kauroin panaeku ma nam-lolo lolo Makromod Lalap kalarna.

<sup>9</sup> Makromod Lalap namkene hi'i Nin nou la hi'i ha ma namlolo mamani, de lo'o ik konohi mouropo iknik dohohala Makromod Lalap, Ai na'ohu nahala iknik dohohala, la na'amou na'adewe ik honorok akin nano hini'i wenewhe man sala na'akeme.

<sup>10</sup> Makromod Lalap na'aheniyedi ri morimori na'akeme hi'iyedi dohohala, de lo'o ik ka'aheni kak hi'i dohohala, onne nin panaeku ik ka'aheni Makromod Lalap ma napoho. Enla Ai Lirneni kan minle ik raramne.

## 2

*Makromod Kristus ma na'ohu ma nahala*

<sup>1</sup> Ya an'u na'ahoruwedi man ya aramyaka, ya'u aku horok maiyala ki mi leke yon mim hi'i dohohala, maa lo'o rin hi'iyedi dohohala, yon mamka'uk ono iknik Man Hemen Lira aile. Ai onne Yesus Kristus man

akin mou la namdudu, la Ai mehe nodiyala ika lolo Aman kalarua.

<sup>2</sup> Yesus Kristus onne pena maki nahinerre ika, de na'ohu nahaledi iknik dohohala noro idewe ri mormori noho wawan na'akeme rir dohohala.

*Lernohi Makromod Lalap Nin keneri hono'ok*

<sup>3</sup> Tanada ma na'aheni ik kauroiroin Makromod Lalap kokkoo hi'i heheni: Lo'o ik kauroiroin Ai, ik derne kakani Nin keneri hono'ok.

<sup>4</sup> Inhoi na'aheni, "Ya au-roiroin Makromod Lalap," maa kan derne nakani Nin keneri hono'ok, ai napoho la panaeku ma namlolo kaale raramne.

<sup>5</sup> Maa, inhoi man derne nakani Makromod Lalap Lirna mamani, ai onne naramyaka Makromod Lalap kokkoo. Ya'u konohi hi'ihehewi ik kauroin ik moriwuku wawa'an noro Makromod Lalap:

<sup>6</sup> Lo'o ik ka'aheni ik koro Makromod Lalap moriwuku mamani, iknik morimori lernohi Makromod Kristus Nin morimori haenhi.

*Keneri hono'ok worworu eni hopon ik ida ma naramyak ida*

<sup>7</sup> I wal'u na'ahoru man ya aramyaka, keneri hono'ok man ya'u horok lolo eniyeni, ka namwali ha man worworu, maa mim dernedi onne nano lere nonolu me'e.

<sup>8</sup> Enimaa, keneri hono'ok lo'olo'ol onne, naise worworu haenhi. Ik kauroin

keneri hono'ok eni namwali kokkoo lolo Makromod Kristus Nin raramyaka man lap, noro idewe lolo iknik raramyaka haenhi ono ika ida ma naramyaka ida. Nonolu mim hi'i dohohale mamani, maa lere eniyeni mim lernohi Makromod Yesus ma namwali ropropo. Ende metmetek kalkala na'akeki molu la ropropo ma namlolo maiyedi me'e.

<sup>9</sup> Lo'o ri aile ma na'aheni, "Ya'u mori lolo ropropo raram," maa kan suk walin ma akin naili'il enihe, ai onne holiholi aile metmetek kalkala raram makun.

<sup>10</sup> Inhoi naramyaka lodon walin, ai onne holiholi aile ropropo raram la haida kaale ai raram man hi'i ri onne nadiyaur dohohala.

<sup>11</sup> Maa, inhoi kan suk lodon walin, ri onne holiholi aile metmetek kalkala raram makun. Ai onne lalaa mamai lolo metmetek raram de ka nauroin kalla ma namlolo ono metmetek kalkala onne hi'ie kan do'on haida-haida.

<sup>12</sup> Ya an'u na'ahoruwedi, ya'u hi'i horok eni ono Makromod Lalap na'ohu nahaledi minim dohohala lolo Makromod Kristus kemen me'e.

<sup>13</sup> Mi ri leleher enihe, ya'u hi'i horok eni ono mi mauroin Ai Man Aile. Ai onne noho ka namwali makun, aiyedi me'e.\*

Mi ma ka na'ileher makun enihe, ya'u hi'i horok eni ono mim rehiyedi Hayakyak Makromon me'e.

\* **2:13** Makromod Lalap noro Anan noro Roh aile mamani nano nonolu, lere eniyeni, laa ewi-ewi. Rir lere ma namwali noro man horu kaale ono aile mamani.

<sup>14</sup> Ya an'u na'ahoru, ya'u  
aku horok eni ki mi, ono mi  
mauroin ik Amad kokkoo.

Mi ri leleher, ya'u aku  
horok eni ki mi, ono mi mau-  
roin Ai man ailedi dedesne  
me'e.

Mi ma ka na'ileher makun,  
ya'u aku horok eni ki mi,  
ono mi akim naruri, de ler-  
nohi Makromod Lalap Lirna  
Wawan mamani, la mim re-  
hiyedi Hayakyak Makromon  
me'e.

*Yon maramyaka noho  
wawan nin hahaa*

<sup>15</sup> Ende yono maramyaka  
noho wawan eni me ha-  
haha na'akeme man aile  
noho wawan. Inhoi ma  
naramyaka noho wawan  
eniyeni, ka naramyaka ik  
Amad.

<sup>16</sup> Noho wawan eni nin  
panaeku na'akeme ailanna  
wake'e, naise: ri man lernohi  
rir suk aimehi, ri man po'on  
la namone, la ri man suk  
holi kukulu lapa. Panaeku  
onne na'akeme kan lernohi  
ik Amad, maa lernohi noho  
wawan nin suk mehe.

<sup>17</sup> Noho wawan noro nina  
hahaa na'akeme na'akeki  
horu me'e, maa ri man  
lernohi Makromod Lalap  
honorok akin, an lernala  
or'ori dardari ma kan horu  
laa ewi-ewi.

*Makromod Kristus Nin ar-  
wali*

<sup>18</sup> Ya an'u na'ahoru, ik  
wakuraniyedi lere alam man  
horu me'e. Nonolu mim  
derne nahenia Makromod  
Kristus Nin arwali mai, la ors  
eniyeni Nin arwali nammori  
mai yedi me'e. Onne namwali  
tanada nahenia noho nin

lere alam man horu waku-  
raniyedi me'e.

<sup>19</sup> Ri ma kan suk Makro-  
mod Kristus onne rahin-  
uriyedi maika me'e, ono hi  
onnenihe, iknik muku ka.  
Lo'o hi onne iknik ri, hi ka  
rahinuri nano maika. Onne  
namwali tanada nahenia  
nano hi onnenihe ri mahaku  
ka namwali iknik muku.

<sup>20</sup> Enima mim kokaledi  
Makromod Lalap Nin Roh  
nano Makromod Yesus Kris-  
tus man moumou dewdewe,  
de mi mauroin wanakuku  
ma namlolo.

<sup>21</sup> Ende ya'u hi'i horok eni  
ki mi, ka a'aheni ka mau-  
roin wanakuku ma namlolo  
makun, maa ya aheni mi  
mauroinedi me'e, la mauroin  
wanakuku onne namlolo ma-  
mani,

<sup>22</sup> maa ri ma napoho  
aile. Ma napoho onne  
ra'aheni, "Yesus ka namwali  
Kristus man Makromod  
Lalap kikanedi namwali Rai  
laa ewi-ewi eni." Ri onne  
penia Makromod Kristus Nin  
arwali, la ka nauroin Aman  
noro Anan.

<sup>23</sup> Ri ma ka nauroin Anan,  
ai onne ka nauroin Aman  
haenhi, maa ri man kokala  
Anan, ai onne kokala Aman  
haenhi.

<sup>24</sup> Ende, na'akeme man  
mim dernedi nano nonolu  
eni, madiyaka wawa'an lolo  
mi akim. Lo'o mim loi  
honorok wawa'an, mi moro  
Aman noro Anan moriwuku  
wewerre.

<sup>25</sup> Enla Makromod Kristus  
Nin nou eni na'ahenia Ai  
naledi maika or'ori dardari  
ma kan horu eni.

<sup>26</sup> Ya'u horok eniyeni ki  
mi, ono ri aile ma nahehe

paipudi mi.

<sup>27</sup> Maa, Makromod Kristus huri waliyedi Nin Roh mi akim me'e, de Nin Roh aiyedi mi raram me'e. Nin Roh penia wakuku mi panaeaku na'akeme, de lo'o ri man wakuku mi kaale, kan hi'i haida, ono panaeaku na'akeme man Roh Kudus wakuku mi, onne namlolo kokkoo, man sale kaale. Ende moriwuku noro Makromod Kristus, naise Nin Roh wakukuwed mi me'e.

<sup>28</sup> Ya an'u na'ahoruwed, moriwuku noro Makromod Kristus, leke rakan Nin lere alam mamai eni yono ik kamka'uk, la rakan lere onne ka kawawa kakpali Ai, la ik akin namkene.

<sup>29</sup> Mi mauroinedi me'e Kristus Nin morimori namlolo, de mi mauroin haenhi inhoi nin morimori namlolo, ai onne namwali Makromod Lalap anan.

### 3

*Kamwali  
Lalap anan*

*Makromod*

<sup>1</sup> Po'onala! Iknik Pape naramyk maika rehi, penia napolu ma'ike ananne. Memen Makromod Lalap anan ika! Noho eni wawan ka rauroin maika, ono ka rauroin Makromod Lalap.

<sup>2</sup> I wal'u na'ahoru man ya aramyaka, lere eniyeni ik kamwaliyedi Makromod Lalap anan me'e, maa ik ka kauroin makun ik kemen naise inhawe lere Jesus Kristus mai wali'ur. Enimaa ik kauroin nahenia lere onne ik kamwaliyedi naise Jesus,

ono namlolo kokkoo ik do'on la kauroin Ai.

<sup>3</sup> Inhoi akin naili'il nahenia lerida Yesus wali mai, ai onne nadiyaka kemen leke yon hi'i dohohala, la ai akin mou lolo Makromod Lalap kalarna naise Kristus.

<sup>4</sup> Ri man hi'i dohohala larlewenedi Makromod Lalap Nin keneri hono'ok, ono dohohala penia larlewen keneri hono'ok onneni.

<sup>5</sup> Mi mauroinedi Makromod Kristus mai leke na'ohu nahala ri mormori rir dohohala na'akeme. Lolo Kristus onne dohohala ida kaale.

<sup>6</sup> Ende ri na'akeme man moriwuku noro Makromod Kristus kar hi'i dohohala manani, maa ri man hi'i dohohala manani, kar do'on la ka rauroin Ai.

<sup>7</sup> Ya an'u na'ahoru, yono rin paipudi mi. Ri man lernohi Makromod Lalap Nin honorok aki, ai onne nin morimori moumou dewdewe naise Makromod Yesus Nin morimori.

<sup>8</sup> Maa ri man hi'i dohohala manani, ri onne Hayakyak Makromon nin ri, ono nano dedesne me'e Hayakyak Makromon hi'i dohohala manani. Enpenia Makromod Lalap Anan mai leke na'amoluloinedi Hayakyak Makromon nin hini'i we-newhe onneni.

<sup>9</sup> Inhoi namwaliyedi Makromod Lalap anan me'e, ai ka nadedem hi'i dohohala, ono Makromod Lalap Nin morimori namkene lolo honorok akin. Honorok akinne kan hurinohi ai hi'i dohohala ono Makromod Lalap namwali Aman.

<sup>10</sup> Enpenia nano kalla eniyeni ik kauroin inhoi namwali Makromod Lalap anan la inhoi namwali Hayakyak Makromon anan. Inhoi kan hi'i wewhe lernohi Makromod Lalap Nin honorok aki, la ka naramyakala walinhé, ai onne Makromod Lalap anan ka.

*Ida ma naramyaka ida*

<sup>11</sup> Lira man mim dernedi nonolu hi'i heheni: Ik ida ma naramyak ida.

<sup>12</sup> Yono kaise Kain. Ai namwali Hayakyak Makromon anan, de mehe nesne mo'oniwalla mememen. Inhawa nakoko penia nesne waline? Ai nesne walin, ono nin hini'i wenewhe ailanna, la walin penia namlolo.

<sup>13</sup> Ende I wal'u na'ahoru, lo'o ri morimori noho wawan kar suk mi, yon hehel.

<sup>14</sup> Ik kauroin na'aheni nonolu noho makmaki nodi molollo maika, maa ors eniyeni ik lernaledi morimori ma kan horu me'e. Ik kauroin onne ono karamyaka ik walinhé. Ri ma ka naramyaka walinhé, ai onne noho makmaki nodi molollo makun.

<sup>15</sup> Ri ma kan suk walinhé, ai onne ma nesne ri mormori. Mi mauroin nahenia ma nesne ri mormori kan lernala or'ori dardari ma kan horu.

<sup>16</sup> Enpenia ik kauroin raramyaka ma namlolo, ono Yesus nala kemen maki leke yon ik lernala dohohala nin hunukum, de ika ida ma naramyaka ida naise Yesus naramyak ika haenhi.

Wa'an rehi ik kamkene paku ik walinhé, kade ik maki haenhi.

<sup>17</sup> Inhoi nin hahaa aile la do'on walinhé na'alehe haida-haida, maa namhene paku, ai onne na'alehe molollo na'aheni ai naramyaka Makromod Lalap noro ri namehin!

<sup>18</sup> Ya an'u na'ahoru, yon karamyaka ri lolo ik nuran mehe, ee lolo wanakunu mehe, maa ik karamyaka ri kodi honorok aki man moumou noro hini'i wenewhe man wa'an.

*Ik akin namkene lolo Makromod Lalap kalarña, horo ik karamyaka ik walin*

<sup>19</sup> Lo'o ik karamyakala ik waline, onne namwali tanada nahenia ik kamwaliyedi Makromod Lalap anan ma namlolo me'e, la ik akin ka namka'uk lolo Makromod Lalap leken kalarña.

<sup>20</sup> Lo'o ik karamyaka ik walin naise onne, maa ik akin nado'o makun na'ahenia, "Hi'ihehewi Makromod Lalap raram nodi nala ampun maika?" Yon ik derne kakani ik akin, maa ik derne kakani Makromod Lalap mehe, ono Ai penia ma nauroin narehi nalewen ik akin, la nauroin panaeku na'akeme.

<sup>21</sup> Ende i wal'u na'ahoru man ya aramyaka, lo'o ik akin ka nado'o naise onneni, ka kamka'uk kakpali Makromod Lalap.

<sup>22</sup> Enla inhawe ik kapanak Ai, ik lernala ono ik lernohi Nin keneri hono'ok noro hi'i ha ma nahuwa'an Ai akin.

<sup>23</sup> Keneri hono'ok man Ai nala maika onneni hi'i heheni: Ik akin naili'il Anane Jesus Kristus noro idewe ika ida ma naramyaka ida, naise nonolu Kristus komderedi ika me'eni.

<sup>24</sup> Ri na'akeme man derne rakani Makromod Lalap Nin keneri hono'ok eni, moriwuku noro Ai, la Ai noro hi ramwali mahaku. Enla ik kauroin nahenia Makromod Lalap moriwuku noro ika, ono Ai naledi Nina Roh maika me'e.

## 4

### *Roh ma namlolo noro roh hayakyaka*

<sup>1</sup> Wal'u na'ahoru man ya aramyaka. Meser nammori aile man wakuku ha ma ka namlolo, la mahar lalaa maimai lolo noho wawan me'e. Ende yon mi akim naili'il ri na'akeme ma na'aheni Makromod Lalap Nin Roh aile hi raram, maa koklolo ma'inau rir wanakuku leke mauroin Makromod Lalap Nin Roh nodi molollo hi, ee ka.

<sup>2</sup> Modi kalla eniyeni leke mauroin roh ma namlolo noro roh ma ka namlolo: Lo'o ri ida na'aheni Jesus Kristus mai noho wawan namwali ri mormori, ai onne nin Roh mai nano Makromod Lalap.

<sup>3</sup> Maa, lo'o ri namehin na'aheni Jesus kan mai noho wawan la ka namwali ri mormori naise maika, ai onne nin roh kan mai nano Makromod Lalap, maa mai nano Kristus Nin arwali. Mim dernedi me'e nahenia ler ida arwali onne lo'o mai noho wawan, maa lere eni maiyedi me'e.

<sup>4</sup> Enimaa ya an'u na'ahoru, mi eniyenihe Makromod Lalap Nine ri. Mi ka makani meser ma ka namlolo onnenihe, de mim rehiyedi hi, ono Makromod Lalap man aile mi akim nodi molollo narehi nano hayakyak man aile noho eniyeni.

<sup>5</sup> Meser ma ka namlolo onnenihe noho wawan nin ri, de hir wakunu ha ma na'ono noho wawan nin wanakuku mamani, la noho wawan nin ri raram nodi derne rakani rira wanakunu.

<sup>6</sup> Enimaa ik eniyenihe Makromod Lalap Nin ri, de inhoi ma nauroin Makromod Lalap, ai onne derne nakani iknik wanakunu, maa ri ma ka namwali Makromod Lalap anan, kar derne rakani maika. Nano onne ik kauroin idewe inhoi nina Roh ma namlolo, noro idewe inhoi nina roh ma nodi ri laa yakanne.

### *Makromod Lalap naramyak ananhe leke hi ida ma naramyaka ida*

<sup>7</sup> I wal'u na'ahoru man ya aramyaka, na'amoli ika ida ma naramyaka ida, ono raramyaka onne mai nano Makromod Lalap. Inhoi naramyaka ri, ai onne Makromod Lalap ananne, la nauroiroin Makromod Lalap.

<sup>8</sup> Maa inhoi ka naramyaka ri, ai onne ka nauroin Makromod Lalap, ono Makromod Lalap penia raramyaka onno.

<sup>9</sup> Ik kauroin Makromod Lalap naramyaka ika ono Ai nala Anan Kuru Mehe Lai Mehe mai noho wawan leke

ik lernala or'ori dardari nano Ai.

<sup>10</sup> Ende Nin raramyaka onne penia ma namlolo, iknik ka. Makromod Lalap penia ma naramyaka ika, la nala Anan namwali honoi kanani leke na'ohu nahala iknik dohohala.

<sup>11</sup> I wal'u na'ahoru man ya aramyaka, Makromod Lalap naramyaka ika rehi, de wa'an rehi ik ida ma naramyaka ida haenhi.

<sup>12</sup> Ri mahaku kan do'onnala Makromod Lalap makun, maa lo'o ik ida ma naramyak ida, Makromod Lalap moriwuku noro ika, la Nin raramyaka penpenu kemkeme aile ik raram penia ik karamyaka ri kokkoo.

<sup>13</sup> Makromod Lalap naledi Nin Roh maika me'e, de ik kauroin nahenia ik moriwukuwedi noro Ai me'e, la Ai namwali mahaku noro ika.

<sup>14</sup> Ai mehem do'onedi la kukumaka nahenia Makromod Lalap nala Anan mai leke namwali Rai Ma Nala Or'ori Dardari lolo noho wawan.

<sup>15</sup> Inhoi ma ne'e nahenia Makromod Yesus onne Makromod Lalap Anan, Makromod Lalap namkene moriwuku noro ai, la roro ramwali mahaku.

<sup>16</sup> Enpenia ik akin namkene ono kauroinedi nahenia Makromod Lalap naramyaka ika.

Makromod Lalap onne penia raramyaka onno, de inhoi nin morimori naramyaka ri mamani, ai onne noro Makromod Lalap namwali

mahaku, la Makromod Lalap moriwuku noro ai.

<sup>17</sup> Nano panaeku eni ik kauroin nahenia Makromod Lalap Nin raramyaka penpenu kemkeme aile maika leke yon ik kamka'uk rakan Lere Alam Hono'ok Kanail, ono lolo noho wawan ik mori naise Yesus haenhi.

<sup>18</sup> Ri ma nauroin kokkoo Makromod Lalap naramyaka ai, ka namka'uk. Maa ri ma ka nauroin Makromod Lalap Nin raramyaka, ai namka'uk lernala dohohala nin hunukum. Raramyaka man penpenu kemkeme onne penia ma na'amoluloinedi kamka'uk onneni, de ri man lernaledi Makromod Lalap Nin raramyaka onne, ka ramka'uk me'e. Maa ri ma ka nauroin Makromod Lalap Nin raramyaka man penpenu kemkeme eni, ramka'uk makun.

<sup>19</sup> Makromod Lalap naramyaka ika nolu, penia ik karamyak Ai noro iknik ri heri ri wali.

<sup>20</sup> Lo'o ri ida na'aheni, "Ya aramyaka Makromod Lalap," maa ai kan suk walihne, ai onne napoho. Lo'o ri ida ka naramyaka walihne man an dodo'on, hi'ihehewi ai naramyaka Makromod Lalap man ai kan dodo'on? Onne ka namwali wake'e.

<sup>21</sup> Enla, Makromod Lalap komdere ika na'ahenia, "Mi ri ma naramyaka Maya'u, maramyaka mi walihne haenhi."

*Ri ma akin naili'il Makromod Lalap Anan*

<sup>1</sup> Inhoi akin naili'il nahenia Makromod Lalap kikanedi Makromod Yesus namwali Rai laa ewi-ewi, ri onne namwaliyedi Makromod Lalap anan me'e. Enla inhoi naramyaka aman, ai naramyaka anan haenhi.

<sup>2</sup> Ende lo'o ik hi'i wewhe Nina keneri hono'ok enihe, la karamyaka Ai, ik kauroin kokkoo ik karamyaka Makromod Lalap ananhe haenhi.

<sup>3-4</sup> Namlolo kokkoo ik karamyaka Makromod Lalap, horo ik derne kakani Nin keneri hono'ok. Ri na'akeme ma namwaliyedi Makromod Lalap ananhe rehiyedi man ailanna noho wawan, de kan sus lernohi keneri hono'ok onneni. Ik akin naili'il Yesus, de Ai nala ruri pe'el maika leke rehiyedi man ailanna noho wawan eniyeni.

<sup>5</sup> Inhoi rehiyedi man ailanna lolo noho wawan eni? Ri ma nauroin kokkoo nahenia Yesus namwali Makromod Lalap Anan.

*Makromod Lalap kuku-maka nahenia Yesus Anan*

<sup>6</sup> Yesus Kristus penia mai noho wawan, la An laa oir raram leke rin ulutade, la An maki lolo au kekiyowok. Kan mai leke rin ulutade rodi oir mehe, maa leke nala kemen maki la rarna nakliu haenhi. Enla Makromod Lalap Nin Roh kuku maka konohi maika nahenia onne na'akeme namwali, la ik kau-roin Roh onne kan wakunu ha man sala.

<sup>7-8</sup> Kunuku maka wokelu aile: Makromod Lalap Nin Roh, oir, noro rare. Wokelu eniyeni rir panaeku namnenehe la konohi maika kokkoo nahenia Makromod Yesus Makromod Lalap Ananne.

<sup>9</sup> Nadedem ik derne kakani ri mormori kuku maka, maa wa'an rehi ik derne kakani Makromod Lalap Nin kunuku maka, ono Ai penia narehi nalewen ri mormori. Lolo kunuku maka wokelu onne Makromod Lalap wakunu panaeku ma na'ono Anan.

<sup>10</sup> Ri ma akin naili'il Makromod Lalap Ananne, akin naili'il Makromod Lalap Nin kunuku maka wokelu onne, maa ri ma akin ka naili'il onne, na'aheni Makromod Lalap napoho. Ai akin ka naili'il Makromod Lalap Nin wanakunu ma na'ono Anan kemen.

<sup>11</sup> Kunuku maka onne hi'i heheni: Makromod Lalap naledi or'ori dardari ma kan horu maika me'e. Anan penia or'ori dardari onno.

<sup>12</sup> Ende inhoi kokaledi Anan, an lernaledi or'ori dardari me'e, la inhoi kan kokala Anan, kan lernala or'ori dardari onneni.

*Or'ori dardari ma kan horu*

<sup>13</sup> Ya'u horok ha eniyeni na'akeme akuwala ki mi man akin naili'il Makromod Lalap Anan, leke mi mauroin kokkoo mim lernaledi or'ori dardari ma kan horu me'e.

<sup>14</sup> Enpenia ka kamka'uk kakpali Makromod Lalap, ono An derne iknik lir napakan, horo nahenia inhawa

man ik kapanak lernohi Nin honorok aki.

<sup>15</sup> Ik kauroinedi me'e nahenia Ai nala inhawe man ik kapapanak, ono ik kauroin nahenia An dernedi iknik lir napanak me'e.

<sup>16-17</sup> Hini'i wenewhe man sala na'akeme namwali dohohala, maa dohohala aile ma ka nakoko rin maki laa ewi-ewi. Lo'o mim do'on walin ida hi'i dohohala onne, wa'an rehi mim hi'i lir napanak leke Makromod Lalap nala or'ori dardari ma kan horu ai. Ya'u wekel dohohala onne mehe, maa dohohala namehin aile ma nakoko rin maki laa ewi-ewi. Ka'u hopon mim hi'i lir napanak leke Makromod Lalap nala or'ori dardari ri man hi'i dohohala onneni.

<sup>18</sup> Ik kauroin nahenia ri na'akeme ma namwaliyedi Makromod Lalap anan me'e ka radedem hi'i dohohala, ono Makromod Lalap Anan norle'ule'u norwaliwali hi, la Ai kan huri Hayakyak Makromon hi'i haida-haida man yak hi me'e.

<sup>19</sup> Ik kauroin nahenia noho wawan eni na'akeme Hayakyak Makromon nodi molollo, maa maika, ka! Ik kamwaliyedi Makromod Lalap Nin ri me'e.

<sup>20</sup> Maa ik kauroin Makromod Lalap Anan maiyedi me'e haenhi, la nala woroin maika leke kauroin nahenia Ai penia ma namlolo. Ik moriwuku noro Makromod Lalap ono ik moriwuku noro Anan Yesus Kristus. Ai penia Makromod Lalap ma namlolo, la ma nala or'ori dardari ma kan horu.

<sup>21</sup> Ya an'u man ya aramyaka na'ahoru, madiyaka mi leke yon hoikani aukerhe man hi'i mi ko'u nano Makromod.

## 2 Yohanis

### *Horok Lirna La'an*

Lolo horok eniyeni, Yohanis kan loi naran. Ai na'aheni, "Ya'u, man panulu lolo kerei, akuwala horok eni mai ki mi." Anaku horok eni laa mamida noro ananhe. Ri nammori man wakuku Horok Lap ra'aheni 'mama noro ananhe' namwali wanakunu ma nasinuwari rodi wekel ri Kristen muku ida, maa ri heruwali ra'aheni namlolo kokkoo anaku horok eni laa mam ida noro ananhe.

Yohanis nin panaeku hi'i horok eni na'alap hi akin leke hi ida man eren naramyak ida (Isr. 6), la an wakuku hi leke yon derne rakani meser agama man wakuku ha maka namlolo (Isr. 7, 9).

### *Nano man panulu lolo kerei*

<sup>1</sup> Ya'u, man panulu lolo kerei, akuwala horok eni mai ki mi. Ya aramyaka kokkoo mama\* noro ananhe man Makromod Lalap niliyedi me'e. Ka'u mehe aramyaka mi, maa ri na'akeme man nauroin Makromod Lalap Nin wanakuku ma namlolo raramyaka mi haenhi.

<sup>2</sup> Ai maramyaka mi, ono wanakuku ma namlolo onne aile ik akin, la norle'ule'u ika laa ewi-ewi.

<sup>3</sup> Ya auroin ik Amad Makromod Lalap, noro Anan Yesus Kristus rala rere'e haharu,

ampun, noro wawa'an rara'a maika, la hi'i ik akin naili'il wanakuku ma namlolo, la hi'i ik ida ma naramayaka ida.

### *Ika ida ma naramyaka ida*

<sup>4</sup> Ya'u raram nodi rehi derne nahenia nano mame ananhe ri aile ma nin morimori lernohi Makromod Lalap Nin wanakuku ma namlolo, naise ik Amad Nina keneri hono'ok eni.

<sup>5</sup> Ende, mame man ya'u horhawe, ka'u horok keneri hono'ok worworu, maa keneri hono'ok eniyeni raledi maika nano dedesne me'e. Ende Ya apanak ik ida ma naramyaka ida.

<sup>6</sup> Raramyaka onne nina panaeku ik mori lernohi Makromod Nin keneri hono'ok enihe. Keneri hono'ok man mim dernessi nano nonolu me'e hopon ika ida ma naramyaka ida lolo iknik hini'i wenewhe na'akeme.

<sup>7</sup> Meser nammori lalaa mamai noho wawan leke paipudi ri. Meser onnenihe ramhene ra'aheni Yesus Kristus mai noho eni wawan namwali ri mormori kokkoo. Inhoi paipudi ri naise meser onnenihe, ai namwali Makromod Kristus Nin arwali.

<sup>8</sup> Ende madiyaka mi wawa'an! Yon hi'i de rin paipudi mi, de minim honowok man Makromod Lalap nanala ki mi eni iihin ennen kaale. Madiyaka wawa'an leke lere man mai eni mim kokala na'akeme man

\* **1:1** Lolo wanakunu 'Mama noro ananhe', panaeku ida woro'o lo'o aile. 1) Lo'o naulinu nauwali kerei noro kerei raramne. 2) Lo'o naulinu nauwali maeke man anulu lolo kerei raramne noro ananhe.

Makromod Lalap nouwedi  
mi me'e.

<sup>9</sup> Inhoi ka nasala kerk-  
erhe Makromod Kristus Nin  
wanakuku, maa na'ikar  
na'uwalu wanakuku ma  
ka namlolo, ri onne kan  
moriwuku noro Makromod  
Lalap. Maa ri ma akin  
namkene lernohi wanakuku  
ma namlolo onne, ai noro  
Makromod Lalap noro Anan  
ramwali mahaku.

<sup>10</sup> Enla lere rin mai loikaru  
wanakuku namehin nano  
Makromod Kristus Nin  
wanakuku ki mi, yom kokala  
ri onne lolo minim nakar,  
la yon mala tape masi hi  
haenhi,

<sup>11</sup> ono inhoi nala tape masi  
ri man ailanna onneni, ai  
noro hi lawuku hi'i panaeku  
man yaka.

*Wanakunu man horue*

<sup>12</sup> Panaeku nammori  
makun man ya'u raram  
nodi loikaru ki mi, maa ka'u  
horok me'e. I raram nodi ki  
ka'arala, la oro mi wakunu  
idewe, leke ik akin na'akeme  
nahuwa'anedi.

<sup>13</sup> Mama nin we'ekwalla  
noro ananhe man Makro-  
mod Lalap niliyedi me'e man  
minle mai eni, akuwala tape  
masi ki mi haenhi.

## 3 Yohanis

### *Horok Lirna La'an*

Lolo horok eniyeni Yohanis kan loi naran, maa an wekel ai kemen 'man panulu lolo kerei'. An aku horok eni laa nin man howok wali ma naran Gayus. Yohanis na'uli Gayus ono an paku ri Kristen man loikaru Yesus Lirna Wawa'an. Lolo horok eniyeni Yohanis kuku sala ri ma naran Diotrefes ono an holi kukulu lalapa la kan derne nakani Yohanis nin konomdere.

### *Horok nano man panulu lolo kerei*

<sup>1</sup> I wal'u Gayus man ya aramyaka rehi, ya'u man panulu lolo kerei aku horok eni maiyala ki o.

<sup>2</sup> Ya'u hi'i lir napanak leke o kemen naruri nampe'el lolo numa morimori naise ya auroin o honorok akim nahuwa'an haenhi.

<sup>3</sup> Ya'u akin nahuwa'an wake'e, ono ik walin ma akin naili'il Yesus ida woro'o maiyedi me'e konohi nahenia om derne makani Makromod Lalap ma namlolo mamani ono om lernohi Nin wanakuku ma namlolo.

<sup>4</sup> Ya akin nahuwa'an wake'e ono derne nahenia ya an'uhe na'akeme mori lernohi Makromod Lalap Nin wanakuku ma namlolo eni.

### *Yohanis na'uli Gayus*

<sup>5</sup> I wal'u man ya aramyaka, o mamkene ilitolle meser man ki wakuku mi lolo kerei, kade ka mauroin hi makun.

<sup>6</sup> Meser onne kono-hiyedi kerei raram mai eni hi'ihehewi o maramyaka hi. Enla rakan lere hi ra'akene rala'a, wa'an rehi mim pakuwala hi wawa'an, ono hi onne man hi'i Makromod Lalap Nin honowok.

<sup>7</sup> Rira nala'ala'a onne ilitolle Kristus Nin honowok, la ri ma ka nauroin Makromod Lalap kar paku hi noro haida-haida.

<sup>8</sup> Ende, wa'an rehi ik ma namwaliyedi ri Kristen, mehe paku ik wal-inhe, leke koro hi lawuku loikaru Makromod Lalap Nin wanakuku ma namlolo eni.

### *Yohanis na'idaru Diotrefes la na'uli Demetrius*

<sup>9</sup> Ya'u hi'i yedi horok lir dedeulanida aku laa kerei raram, maa kerei onne ri ida aile naran Diotrefes ma namhene derne nakani mayai ono ai raram nodi namwali man panulu lolo kerei raram.

<sup>10</sup> Ende ya'u ki mene alhari inhawa man an hi'i yedi me'e, ono an wakunu nano'onyaka mayai, maa onne kan mehe. Rakan lere meser ma namlolo onne ki, ai kan kokala hi, la an dadiyala ri man wa'an yon kokala hi haenhi, la nohi hi man kokala meser onne ramharedi kerei eni.

<sup>11</sup> I wal'u man ya aramyaka, yom lernohi ri man hi'i ha man yaka, maa lernohi man hi'i ha man wa'an. Ri man hi'i ha man wa'an, ai onne Makromod Lalap Nina ri, la ri man hi'i ha man yaka, ai onne ka nauroin Makromod Lalap makun.

<sup>12</sup> Ri na'akeme ra'uli minim  
ri ida ma naran Demetrius,  
ono an lernohi wanakuku ma  
namlolo. Ai onne, ai ma'uli  
haenhi, la mi mauroin in-  
hawa man am loikaru onne  
namlolo.

*Tape masi man horu*

<sup>13</sup> Panaeku nammori  
makun man ya'u raram nodi  
loikaru ki o, maa ya amhene  
horok mouwedi lolo horok  
eniyen.

<sup>14</sup> Enimaa ya'u raram nodi  
leke yon nalo'ol rehi ya'u  
ki pakromala leke wakunu  
idewe noro o.

<sup>15</sup> Ya apanak Makromod  
Lalap na'amoli namre'e  
namharu i wal'u. Walumhe  
man aile mai eni aku tape  
masi ki o. Konohiyala ainu'u  
tape masi rakanala ik walin  
dohodoho.

## Yudas

### *Horok Lirna La'an*

Yudas ma namwali Yakobus mo'oniwalla hi'i horok eniyeni. Lo'o Yudas eni namwali Makromod Yesus mo'oniwalla mememen haenhi. Lolo horok eni, Yudas na'ori honorok ika nahenia yon derne kakani meser man wakuku panaeku ma ka namlolo la hi'i wewhe panaeku man ailanna. Enla ai na'alap ik akin leke kamkene lernohi Makromod Yesus Nin wanakuku ma namlolo la hi'i ik akin namkene naili'il Ai. Horok Yudas ihin ennen na'akeki namnenehe noro horok 2 Petrus.

### *Horok Ihin*

1. Yudas nala wanakunu man hari horok eni (Isr. 1-2).
2. Yudas wakunu nin panaeku hi'i horok eniyeni (Isr. 3-4).
3. Ler man mai Makromod Lalap nala hunukum meser ma ka namlolo (Isr. 5-16).
4. Yudas na'alap ik akin leke eren namkene naili'il Yesus (Isr. 17-23).
5. Yudas nin panaeku kala u'uli sasa'a laa Makromod Lalap (Isr. 24-25).

### *Yudas nala hiyene arore*

<sup>1</sup> I wal'u na'ahoru man Makromod Lalap napoluwedi namwali Nin ri! Ik Amad Makromod Lalap naramyak mi rehi, la An leluwai makrana mi wawa'an hehen nanumene Yesus Kristus mai wali'ur.

Ya'u eni, Yudas man aku horok eni ki mi. Ya amwali Yesus Kristus Nin hophopon wahwahan, la yo oro Yakobus eni ma na'umo'oniwali mememen.

<sup>2</sup> Na'amoli Makromod Lalap nala Nin wawa'an rara'a eren nammomori ki mi, la nala Nin raramyaka rehirehi lewlewen, la kukul Nin aki man wa'an ki mi mamani haenhi.

### *Yom derne makani meser-meser ma ka namlolo*

<sup>3</sup> I wal'u na'ahoru man ya aramyaka! Lere ya'u hi'i horok eniyeni, ya akin namrana konohi mi hi'ihehewi ik kahinuriyedi nano dohohala nin molollo la lernala or'ori dardari ma kan horu, maa onne ka namwali, ono ya'u derne ha ida woro'o man hi'i ya'u herredi ainu'u panaeku dedesne onne. Ya'u derne nahenia rin mai de wakukuwedni mi ha ma ka namlolo me'e. Ende wa'an rehi ya'u horok ha ma na'alap mi akim leke mi ma'okuledi ri man wakuku ha ma ka namlolo onne. Makromod Lalap nala wanakuku ma namlolo wake'e ki mi ma namwali Nin ri mememen, la Ai ka na'uwali. Wanakuku onne kan herre, maa namlolo rakan laa ewi-ewi, de masala wanakuku onne wawa'an la yon derne makani ri mahaku man ken herre.

<sup>4</sup> Ya'u konohi mi panaeku eniyeni ono ri man ailanna koko melinlina mai lolo mi leken kalarna, leke hir wakuku ha ma ka namlolo. Ri onnenihe mai rawokor rakali Makromod Lalap Nin

wanakuku ma namlolo. Hir wakuku na'henia, "Lo'o ik lernohi ik irhun raramne nin panaeku, kan hi'i haida, ono Makromod Lalap naramyak rehi maika!" Hi ra'okuledi ik Makromod Yesus Kristus ma namwali iknik Rai ma nodi molollo ha wo'ira na'akeme. Lolo Horok Lap raram nabi nammori konohiyedi nahenia Makromod Lalap na'akenedi hunukum man werek nano nonolu me'e, leke hukum ri man ailanna onnenihe.

*Makromod Lalap nala hunukum ri noro hophopon wahwahan man ailanna*

<sup>5</sup> I wal'uhe! Mi mauroinedi panaeku eniyeni me'e, maa i raram nodi ya a'ori honorok leke yon mim hamlinu nahenia nonolu MAKROMOD Lalap nala hunukum ri man ailanna. Ler nonolu onne Makromod huri we'er ri Yahudi nano noho Mesir. Ende hi ramharedi Mesir me'e, maa nano hi onnenihe ri nammori akin ka naili'il Makromod, de ka nalo'ol ne Ai nesnedi hi lolo noho mamun onne.

<sup>6</sup> Yon hamlinu nahenia Makromod nala hunukum hophopon a'am raram ma kan derne nakani Ai. Hophopon a'am raram me'ene larlewenedi rira molollo penia hoikaruwedti rira miminlole mememen. Ende Makromod Lalap nodi rantan wukuwedi hi lolo onno man aile noho metmetek, la rantan onne ka nawine'er laa ewi-ewi. Wukuwedi hi lolo onno onne hehen nanumene rakan Lere Alam Ho'ok Kail ri na'akeme. Lere onne hir lernala rir hunukum.

<sup>7</sup> Enla yon hamlinu nahenia Makromod Lalap nala hunukum kota Sodom, Gomora noro kota namehin ma na'uranrani lolo onne. Ri man minle kota onnenihe hi'i ha man ailanna wake'e naise hophopon a'am raram man ailanna onne. Hir holi yak leke yaka, holi diwar dawar hi'i ha ma kan lolo ri raram, la rir hini'i wenewhe na'akeme ailanna wake'e, penia Makromod Lalap nodi aiye harna mouwedi kota onnenihe. An hi'i heheni leke kukunohi inhawe namwali noro ri man ailanna ma kan derne rakanie. Hir lernala hunukum lolo aiye man mormori laa ewi-ewi.

<sup>8</sup> Kade Makromod Lalap nala hunukum man werek ri man ailanna onne, maa lere eniyeni meser ma ka namlolo enihe mai hi'i ha man ailanna namnenehe haenhi. Hi rapoho ra'ahenia hir lernala woroin aimehi lolo namarmi, de kar derne rakan Makromod Lalap me'e. Enpenia hi ra'ihoru ra'idaru ha man ma'aruru wake'e ma nodi molollo lolo a'am raram, la hir lernohi hi irhun raram nin monmono kamanna man morso wake'e.

<sup>9</sup> Nonolu, lere Musa maki, Makromod Lalap hopon hophopon a'am raram nin uluwakun ma naran Mikhael lan nawilo'o Musa ihin kemen, maa Hayakyak Makromon nahehe mai nahore. Kade Mikhael namwali hophopon a'am raram na'akeme rir uluwakun, maa ai ka nodi lir apinpinha na'ihoru na'idaru Hayakyak Makromon onne. Ai na'aheni

mehe, "Na'amoli Makromod Lalap nala hunukum ki o!"

<sup>10</sup> Enimaa meser ma ka namlolo enihe ka ramka'uk ra'ihoru ra'idaru inhawa man hi ka rauroin makun. Hi onne rauroin hi'i ha man ailanna mehe, la hi raisa ha mormori merwui man lernohi irhun raram mamani. Enpenia rir hini'i wenewhe man ailanna onne nakoko hir lernala hunukum man werek wake'e.

<sup>11</sup> Meser ma ka namlolo enihe mayo'edi me'e! Hir lernohi Kain nin kalle man sala, la hir teunohi Bileam nin hini'i wenewhe man yak. Kade hi rauroin rir hini'i wenewhe onne sala wake'e, maa hi raram nodi ranoin kupan mamani naise Bileam. Hi ra'okuledi Makromod Lalap naise Korah\* na'okuledi Ai lere nonolu onne haenhi, de lere man mai hir lernala hunukum makmaki ko'u nano Makromod Lalap namnenehe noro Korah haenhi.

<sup>12</sup> Lere minim kerei raramne raikoro wuku leke ra'ak wewerre, meser ma ka namlolo enihe lernohi haenhi, maa rir hini'i wenewhe hi'i wawawa ri rehi. Hi kar horhawe Makromod Lalap noro ri heri ri wali ono hir loi honorok hi kemen noro rir hanana'an mehe. Hi onne raisa noho ha'aha'a man anna huwedi de okon kaale, la hi raisa au'ono man rakan nin lere alam kan woi, penia rin he'ul de makiyedi noro a'arne idewe.

<sup>13</sup> Hir lalaa mamai raisa kahi lapa ma nodi mophorso

mai herraram, ono hir hi'i ha ma kan lolo ri raram mani. Hi raisa kaliyoro ma ka namkene nin onno, ono hir kokme'e rala ropropo ma namlolo, maa hir koko ri laa yakanne. Ende Makromod Lalap na'akenedi hunukum onno man metmetek laa ewi-ewi leke hukum hi lolo onne.

<sup>14</sup> Ler nonolu nabi Henok konohi nahenia lere man mai Makromod Lalap hukum meser ma ka namlolo enihe. Henok onne ku rew'ikku nano Adam, la ai na'ahenia, "Namlolo kokkoo lere man mai Makromod wali wali'ur mai noho wawan nornoro Nin hophopon a'am raram man moumou dewdewe riwriwan rahrahu,

<sup>15</sup> leke ho'ok kail ri mormori na'akeme, la nala hunukum ri ma kan derne nakani Ai. Enla An hukum hi lernohi rir hini'i wenewhe man morso lolo Ai leken kalarna, la nala wanalan rir wanakunu ma na'ihoru na'idaru Ai."

<sup>16</sup> Meser ma ka namlolo onnnenihe hehel warna enu la kuku sala ri mamani. Hir lernohi irhun raram nin monmono kamanna mehe. Hir holi kukulu lalap la mehe ra'akulu ra'alap kemen. Hi rodi wanakunu man ma'aruru hi'i ri lernohi rir honorok aki, leke ranoin rir wawa'an aimehi mamani.

*Nounaku leke ik akin namkene naili'il Yesus*

<sup>17</sup> Enimaa i wal'uhe man ya aramyaka, yon hamlinu panaeku na'akeme man mim derness me'e nano hophopon ma nodi ik Makromod

\* **1:11** Nonolu mo'oni ida naran Korah na'okuledi Musa lolo noho mamun ma napro'uk, de onne namnenehe noro ai na'okuledi Makromod Lalap haenhi.

**Yesus Kristus Lirna Wawa'an onnenihe!**

<sup>18</sup> Hir konohiyedi mi nahe-nia na'akeki rakan lere noho wawan nin man horu, rin lo'o mai hadwei hadwokor mi moro Makromod Lalap. Ri onne irhun raram mon-mono kamanna man ailanna nodi molollo hi mamani.

<sup>19</sup> Hi eniyenihe ramwali man reiye'er kope'er, penia hi'i mi ida ma nahina'ar nano ida. Makromod Lalap Nina Roh Kudus ka nodi molollo hi ono hir derne rakani mehe hi irhun raramne!

<sup>20</sup> Enimaa i wal'u na'ahoru man ya aramyaka! Ma-hehe mamani leke mi akim namkene naili'il Makromod Lalap Nin wanakuku man moumou dewdewe eniyeni. Hurinohi Roh Kudus nodi molollo mi leke mim hi'i lir napanak lernohi Makromod Lalap honorok akin mamani.

<sup>21</sup> Ai penia ma naramyaka mi, de mammene mamani lolo Nin raramyaka onne. Hi'i heheni hehen nanumene ik Makromod Yesus Kristus kukul Nin aki man wa'an wake'e maika lere An mai wali'ur nala or'ori dardari ma kan horu maika laa ewi-ewi!

<sup>22</sup> Ri aile ma akin ka naili'il wawa'an makun, de mim kukul aki man wa'an hi leke hi ramkene akin naili'il Makromod Lalap mamani.

<sup>23</sup> Ri aile man derne nakani meser ma ka namlolo penia lernohi kalla man sala. Ya apanak mim paku hi leke wali wali'ur mai kalla ma namlolo eni. Lo'o mim hi'i heheni, onne naise mim hedu ri ma na'ikeki aiye na'an me'e. Ri aile haenhi

man hi'i dohohala la lernohi hi irhun raramne man morso wake'e. Kukul minim aki man wa'an ri onnenihe, maa madiyaka wawa'an leke yon mim lernohi hi'i dohohala. Mako'uwedvi mi kemen nano rir hini'i wenewhe man ailanna onne, naise mi mako'uwedvi mi kemen nano rir nainair man ra'amorsedi noro dohohala me'e, kalo'o nakoko nodi mi lernohi laa yakon haenhi.

### *Ka'uli kasa'a Makromod Lalap*

<sup>24</sup> Mai ik ka'uli kasa'a Makromod Lalap Man Kulu Narehi Man Lap Narehi! Ai penia ma nodi molollo nadiyaka ika leke yon ik kadiyaur dohohala. Ai nadiyaka ika hehen nanumene ik kamriri lolo Ai man ma'aruru wake'e leken kalarna. Ler onne An hi'i ik akin nahuwa'an wake'e, la hi'i ik ka'alehe dohohala ida.

<sup>25</sup> Makromod Lalap mahaku mehe, namehin kaale, la Ai namwali iknik Rai man huri we'er ika nano dohohala nin molollo lolo ik Makromod Yesus Kristus. Ik ka'akulu ka'alap Ai Naran mamani, ono Ai penia man ma'aruru wake'e, la namwali Rai ma narehi ma nalewen, ma nodi molollo man kulu narehi man lap narehi, de ha wo'ira na'akeme lolo yawa Ai nano nonolu wake'e, lere eniyeni, la rakan laa ewi-ewi! Amin!

# Makromod Yesus nalhari panaeku Yohanis mehen do'on Wahyu

## *Horok Lirna La'an*

Horok eniyeni na'ono panaeku man Makromod Lalap nalhari Yesus Kristus leke Ai nalhari wali'ur laa Yohanis (1:1). An kukunohi Yohanis inhawe ma namwali Ai kemen lere man mai.

Dedesne An kukunohi nahenia Ai namwali Ri Mormori Anan ma namriri lolo wadu wo'ikku toro (1:12-16). An kukunohi nahenia Ai namwali Pipdumana ma namririnohi Makromod Lalap Nin naikorrono lolo a'am raram (5:6-14). An kukunohi nahenia An ha'a kuda wawarha namwali uluwakun ara man hi'i ha ma namlolo mamani lolo ara (19:11-16). An kukunohi nahenia Ai namwali Pipdumana ma nodi molollo noro Makromod Lalap lolo kota Yerusalem Worworu man moumou dewdewe (21:22-23; 22:1-5).

Ler hi'i horok eniyeni ma nodi molollo hair Roma hopon ri na'akeme ra'uli rasa'a rai lalap Kaisar, maa ri Kristen ramhene. Hi ra'aheni kan wa'an ra'uli rasa'a Kaisar ono Yesus mehe namwali rir Makromon, de hir lernala wewerek pananaka la heruwali resnedi. Maa ri Kristen heruwali sopoledi hi akin ma naili'il, de wali kili'urn ono ramka'uk hair Roma. Ende Yohanis na'alap ri Kristen akin lolo horok

eniyen leke hi ramkene akin naili'il Yesus.

Panaeku ma na'ono lolo horok eni heheni: Lolo noho wawan eniyeni ri man lernohi Yesus lernala wewerek pananaka, maa yon ik lari nano ik akin ma naili'il eni, ono lere man mai Makromod Yesus narehiyedi Nin arwali na'akeme, la Ai penia ma nodi molollo laa ewi-ewi (11:15)! Enla lere man mai ik man lernohi Ai mamani koro Ai kodi molollo wewerre.

Horok eniyeni wekel kota wo'ikku noro Makromod Lalap Nin Roh wo'ikku (1:4, 11); wekel rere'e haharu wo'ikku (1:3; 14:13; 16:15; 19:9; 20:6; 22:7; 22:14); noro lira u'uli sasa'a laa Makromod Lalap wo'ikku haenhi (5:12; 7:12); wadu onno wo'ikku (1:12), noro ha namehin nammori haenhi (1:16; 5:1, 6; 8:2; 12:3; 15:6-7; 17:9). Nomor wo'ikku onne wekel ha man moumou dewdewe la man kukkuku noknokor wake'e.

## *Horok Ihin*

1. Yohanis nala wanakunu man hari horok eni (1:1-8).
2. Yohanis wakunu panaeku dedesne (1:9-3:22):
  - a. Jesus namwali Riomimori Anan ma namriri lolo wadu onno wo'ikku toro (1:9-20).
  - b. Yohanis horok Yesus Lirna lolo horok wo'ikku aku laa kerei raramne ma aile kota wo'ikku (pnk. 2-3).
3. Yohanis wakunu panaeku rewro'o nine (4:1-16:21):

- a. Yesus namwali Pipdumanma ma namririnohi Makromod Lalap Nin naikoronno lolo a'am raram (pnk. 4-5).
  - b. Pipdumana hari segel wo'ikku (6:1-8:5).
  - c. Kowuri wo'ikku rouwedi (8:6-11:19).
  - d. Tanada wo'ikku kukunohi inhawe ma namwali lere man mai (pnk. 12-16).
4. Yohanis wakunu panaeku rewkelu nine (17:1-21:8):
- a. Yohanis do'on maekyak ma naran Babel (17:1-19:10).
  - b. Yesus naikoro kuda la rehiyedi Nin arwali na'akeme (19:11-21:8).
5. Yohanis wakunu panaeku rew'akka nine (21:9-22:5):
- a. Yohanis do'on maeke ma namwali Pipdumanma hono, ai naran Yerusalem Worworu (21:9-21:27).
  - b. Yohanis do'on oir wauwau ma nala or'ori dardari (22:1-5).
6. Yohanis nala nounaku man horu (22:6-21).

<sup>1</sup> Horok eniyeni ihin na'ono panaeku man Makromod Lalap nalhari Yesus Kristus, lekpananne Ai nalharile Nina hophopon wahwahan enihe inhawa ma ka nalo'ol namwali me'e. Enpenia Yesus Kristus hopon Nina hophopon a'am raram nodi Lir onne mai konohi ya'u. Ya'u eni, Yohanis ma namwali Nin hophopon wahwahan.

<sup>2</sup> Enla ha wo'ira na'akeme i dodo'on dederne ya'u

kukunohi la horok mouwedi. Ha na'akeme eni Makromod Lalap Lirna noro idewe inhawa Yesus Kristus nalhari maya'u.

<sup>3</sup> Inhoi lese horok ma namwali nabi lirna eni lolo heri kalarna, ai akin nahuwa'anedi. Enla inhoi derne nakanie, ai akin nahuwa'anedi haenhi, ono ka nalo'ol ha eniyenihe na'akeme namwali me'e.

*Yohanis aku nina tape masi laa kerei wo'ikku*

<sup>4</sup> Konohiyala i wal'uhe, kerei wo'ikku raramne man aile lolo propinsi Asia. Ya apanak Makromod Lalap man aile nonolu, man aile lere eniyeni, la man aile laa ewi-ewi nala Nin rere'e haharu noro Nin wawa'an rara'e ki mi. Na'amoli mim lernala rere'e haharu noro wawa'an rara'e nano Roh wo'ikku man minle Makromod Lalap Nin naikoronno kalarna,

<sup>5</sup> la nano Yesus Kristus man kuku kalla maika. Ai onne namkene kukunohi Makromod Lalap Nina wanakunu ma namlolo mamani maika. Ai penia man mori wali'ur nano makmaki, la An mori noluwedi ri man maki na'akeme, la nodi molollo rai noho wawan na'akeme. Yesus Kristus naramyaka ika,

la rarna nakliuwedi leke huri ika nano dohohala nin molollo.

<sup>6</sup> An hi'i ik kamwali hair ida, la kamwali imam-imam man ilitolle Aman Makromod Lalap.

Ende ka'uli kasa'a Yesus man kulu narehi lap narehi,

la ma nodi molollo laa  
ewi-ewi. Amin!

<sup>7</sup> Loi honorok wawa'an! An  
mai lolo hulik loiloi  
kakam larlari raram,  
la ri lolo noho wawan  
na'akeme do'on Nin  
mamai eni.

Ri man nonolu kadiyesne,  
do'on haenhi.

Enla ri mormori nano  
hair na'akeme do'on Ai  
de rahere.

Ya, namlolo kokkoo  
namwali! Amin!

<sup>8</sup> Makromod Lalap  
na'aheni, "Ya amwali Alfa  
noro Omega.\* Ya amwali  
man aile nano nonolu, man  
aile lere eniyeni, la man  
aile laa ewi-ewi. Ya'u peni  
Makromod Lalap Ma Nodi  
Molollo Narehi Nalewen  
Na'akeme."

### *Yohanis do'on Yesus mai nalhari kemen*

<sup>9</sup> Maya'u, Yohanis, yo oro  
i wal'uhe kamwali mahaku  
lolo Yesus Kristus. Ik ler-  
nala wewerek pananaka  
wewerre, maa ik kamkene  
kerhu ono kamwali Nin  
ri. Man panulu lolo hair  
Roma ra'ahan maya'u, ono  
i loikaruwedi Makromod  
Lalap Lirna Wawan noro  
panaeku man Yesus kono-  
hiyedi maya'u me'e, de hi  
rodi ya'u laa sopoledi lolo  
noho Patmos.

<sup>10</sup> Ler ida, alam domeku,  
Roh Kudus nodi molollo ya'u,  
mene i derne Lir ida man lap  
naise kowuri lirna lolo ya'u  
kili'urne,

<sup>11</sup> na'aheni, "Horokedi  
inhawa man om dodo'on,  
la aku horok onne laa kerei  
wo'ikku raramne enihe:  
Epesus, Smirna, Pergamus,  
Tiatira, Sardis, Piladelpia,  
noro Laodikia."

<sup>12</sup> Enime'ede ya'u po'on  
laa kili'uru, leke po'on inhoi  
wakunkunu noro ya'u. Ya'u  
po'on wadu onno wo'ikku  
rodi maha hi'ie. <sup>13</sup> Lolo wadu  
onno wo'ikku toro onne, i  
do'on ri ida naise na'oi Ri  
Mormori Anan namririri  
aile. An nair nainair man  
sorsoru rakan ein kawin,  
la kornelhe rodi mahe hi'ie  
ra'akerkerhe irhun makan.

<sup>14</sup> Murukne wawarhe  
naise awaha lue, la makan  
siksika naise aiye man mor-  
mori.

<sup>15</sup> Ein ad'ada naise pirmere  
man rala nano aiye raram, la  
Lirna lapa naise oir rulu lapa.

<sup>16</sup> Liman malanne nasal-  
sala kaliyoro waku wo'ikku,  
la raa ma namlorno wali-  
wali namhara nano nuranne,  
la oin makan siksika naise  
lere ma na'inuknukue.

<sup>17</sup> Ya'u do'on ri onneni ne,  
ya alwali yawa ahinononow  
naise ri man makie, maa Ai  
nala liman malanna parhu  
maya'u na'aheni, "Yono  
mamkauk! Ya'u penia ma  
nolu, man kauli'ure,

<sup>18</sup> la man mori eni.  
Po'onala! Lere man laa  
onne, Ya'u maki, maa lere  
eni Ya'u mormori laa ewi-  
ewi. Ya asala konse rodi hari  
makmaki onno nin nika, leke  
ri man makiyedi ramhara  
enne la mori wali'ur.

\* **1:8** 'Alfa noro Omega' onne nin panaeku Yunani nin huruf dedesne noro huruf  
man ka'ili'ur nano hirira abjad. Onne nin panaeku Makromod Lalap namwali  
man dedesne noro man kauli'ur.

<sup>19</sup> Ende horokedi ha wo'ira om dodo'on eni na'akeme, ha ma namwali lere eniyeni noro idewe ma namwali lere man mamaai.

<sup>20</sup> Kaliyoro waku wo'ikku Ya asasale i lim'u malanna noro wadu onno wo'ikku onnenihe, ri ka nauroin onne nin panaeku makun, de Ya'u konohi o nin panaeku. Kaliyoro waku wo'ikku onnenihe na'ono Makromod Lalap Nin hophopon wo'ikku ma nadiyaka kerei wo'ikku raramne, la wadu onno wo'ikku onnenihe na'ono kerei wo'ikku raramne haenhi."

## 2

*Aku horok laa kerei raramne ma aile kota Epesus*

<sup>1</sup> Makromod Lalap Anan hopon ya'u na'ahenia, "Horokedi I Lir'u eni aku laa Makromod Lalap Nin hophopon man leluwai makrana kerei raramne ma aile kota Epesus ma'aheni:

Wanakunu Lirna eniyeni mai nano Makromod Yesus ma nasala kaliyoro waku wo'ikku lolo liman malanna, la ma nala'ala'a lolo wadu onno wo'ikku rodi maha hihi'ie raram onne. Ai na'aheni,

<sup>2</sup> 'Ya auroin minim hini'ie. Mi mampe'el howok Ainu'u honowok, la mammene akin naili'il Ya'u mamani, kade lernala

apipinha. Ya auroin mi kam suk ri man ailanna haenhi. Ri man kokpoho ra'aheni hi ramwali hophopon ma nodi Yesus Lirna Wawa'an enihe, mim kenedi me'e, de mauroin mouropo nahenia hi rapoho.

<sup>3</sup> Kade rin hi'i apipinha mi ono mi akim naili'il Ya'u, maa mi kam ren howok Ainu'u honowok.

<sup>4</sup> Enimaa, Ya akin werek ono mi ka maramyak Maya'u, la mi ida ma ka naramyaka ida naise nonolu eni.

<sup>5</sup> Ende yon hamlinu minim hini'i man wa'an nonolu eni. Herre minim morimori ma ka namlolo eni, la maramyaka Ya'u noro ri namehin wali'ur naise nonolu eni, kalo'o Ya'u mai aledi minim wadu onno nano onneni.

<sup>6</sup> Enimaa minim hini'i man wa'an aile haenhi. Mi kam suk man lernohi Nikolaus\* rir hini'i wenewhe. Ka'u suk onne haenhi.

<sup>7</sup> Lo'o mi kilinum aile, dernala! Makani wawa'an inhawa man Roh Kudus na'aheheni laa Nin kerei raram na'akeme:

Inhoi rehi ara noro Hayakyak Makromon, Ya'u hurinohi ai na'an Makromod Lalap Nina au woi ma nala or'ori dardari man aile Makromod Lalap Nin Kirna Firdaus.' "

*Aku horok laa kerei raramne ma aile kota Smirna*

\* <sup>2:6</sup> Man lernohi Nikolaus' wekel ri man lernohi ri ida naran Nikolaus nin wanakuku. Ai nala wanakuku man sala nahenia man lernohi Yesus enihe hurinohi ri holi yak leke yak ra'alehe hunukum. 1) Hir wakuku nahenia ri ma akin naili'iledi Yesus rir dohohala ra'ohu rahaledi me'e, de hir huriyedi leke hi'i ha naise holi diwar dawar, la 2) hir pene'ek nahenia lere hir minle noho wawan makun, hi kemen ka namwali ha ma na'ono, ono lere man mai hir lernala kemen worworu.

<sup>8</sup> Enime'ede Makromod Lalap Anan hopon ya'u na'henia, "Horokedi I Lir'u eniaku laa Makromod Lalap Nin hophopon man leluwai makrana kerei raramne lolo kota Smirna ma'heni:

Wanakunu Lirna eniyeni nano Makromod Yesus ma namwali ma nolu, la man kauli'ur, man makiyedi, maa mori wali'ur. Ai na'heni,

<sup>9</sup> 'Ya auroin minima sus na'akeme, la mi ma'alehe haida-haida haenhi. Maa mim kokaledi Makromod Lalap Nin rere'e haharu nammori me'e, de mim karuwedi me'e! Ya auroin ri nodi wanakunu nano'onyaka mi mamani. Ri eniyenihe ra'heni hi ramwali ri Yahudi, maa ka, hi eniyenihe lernohi Hayakyak Makromon nina mukue!

<sup>10</sup> Yono mi mamka'uk lerkuku apinpinha wo'operperi. Madiyaka mi memen! Ka nalo'olala Hayakyak Makromon lo'o hi'i minim arwali kele mi heruwali rodi laedi bui raram. Hir ken mi rakan alam idaweli leke yon mi akim naili'il Maya'u. Yono mi akim nahinuri Maya'u, kade hi resne mi. Na'amoli Ya ala mi or'ori dardari ma kan horu ma namwali minim mahmaha kolkoli.

<sup>11</sup> Lo'o mi kilinum aile, dernala! Makani wawa'an inhawa man Roh Kudus na'aheheni laa Nin kerei raramne na'akeme:

Inhoi rehi ara noro Hayakyak Makromon, ai

kan lernala apinpinha nano makmaki rewro'o nine.<sup>†</sup>"

*Aku horok laa kerei raramne ma aile kota Pergamus*

<sup>12</sup> Enime'ede Makromod Lalap Anan hopon ya'u wali'ur na'henia, "Horokedi I Lir'u eniaku laa Makromod Lalap Nin hophopon man leluwai makrana kerei raramne lolo kota Pergamus ma'heni:

Lira eniyeni nano Makromod Yesus ma namwali ma nasala raa ma namlorno waliwali onneni. Ai na'heni,

<sup>13</sup> 'Ya auroiroin nahenia kade i wal'uhe minalle noho man Hayakyak Makromon nodi molollo, maa mi akim ka nahinuri Ya'u. Enla mi akim ka nado'o kade mim po'on hi resne Antipas, Ainu'u man kuku maka, lolo Hayakyak Makromon nina noho miminbole. Antipas onne kan ren konohi Ainu'u panaeku ri.

<sup>14</sup> Enimaa mim hi'i ha ida woro'o man hi'i Ya akin werek: Nano mi, heruwali lernohi Bileam<sup>‡</sup> nina wanakuku. Nonolu eni Bileam wakuku Balak kalla rodi kokwudi ri Israel de hi'i dohohala. An norikama hi ra'an teitei nin laulauhu rodi hohoi kakani lernulu aukerhe, la koko hi leke ida man holi diwar dawar noro ida haenhi.

<sup>15</sup> Naise onneni, mi heruwali lernohi Nikolaus nina wanakuku ma ka nam-lolo haenhi.

<sup>†</sup> 2:11 'Makimaki rewro'o nin' po'onala lisar 20:6; 20:14; 21:8 haenhi. <sup>‡</sup> 2:14 Bileam noro Balak enihe: po'onala Bil. 22:1-6; 25:1-3; 31:16.

<sup>16</sup> Ende Ya a'heni, "Herredi minim morimori ma ka namlolo onne here! Lo'o ka, Ya'u mai ki mi, la Yo odi raa ma namhara nano I nuran eniyeni leke Ya a'ara noro ri man ailanne onnnenihe."

<sup>17</sup> Lo'o mi kilinum aile, dernala! Makani wawa'an inhawa man Roh Kudus na'aheheni laa Nin kerei raramne na'akeme:

Inhoi rehi ara noro Hayakyak Makromon, Ya ala leken na'an manna \$ man susuwar aile a'am raram, la Ya ala hi do-hodoho waku wawarha ida, la rala naran worworu hi horokedi ai lolo waku onne haenhi. Ri man kokala waku onne mehe nauroin naran worworu eniyeni, ri namehin ka."

*Aku horok laa kerei raramne ma aile kota Tiatira*

<sup>18</sup> Makromod Lalap Anan hopon ya'u wali'ur na'ahenia, "Horokedi I Lir'u eni aku laa Makromod Lalap Nin hophopon man leluwai makrana kerei raramne lolo kota Tiatira ma'heni:

Wanakunu eniyeni nano Makromod Lalap Anan. Ai makan siksika naise ailere, la ein naise pirmere man ad'ada ono adi'adie.

<sup>19</sup> Ai na'heni, 'Ya au-roiroin minima hini'i, de Ya auroin mi maramyaka Ya'u, la mamkene lernohi Ya'u. Mim ilitolle Ainu'u honowok wawa'an, la mi akim ka nado'o lere mim lernala wewerek pananaka. Enla lere eniyeni Ya auroin

mim hi'i ha onnneni nare-hiyedi lere dedesne mi akim naili'iledi Ya'u,

<sup>20</sup> maa Ka'u suk minim hini'i ida. Mim hurino hi maekida ma naran Isabel wakuku ri lolo minim kerei raram. Ai na'heni ai namwali Makromod Lalap Nina nabi, maa ka namlolo. Nano nin wanakuku onne an nori Ainu'u hophopon wahwahan enihe leke hir holi yak leke yak la ra'an teitei nin laulahu rodi hohoi kakani lernulu aukerhe.

<sup>21</sup> Kade Ya aledi ai leken paharin herre nin morimori ma ka namlolo onne me'e, maa ai namhene.

<sup>22</sup> Ende mahinorok wawa'an! Ya'u lo'o hukum ai ala kini'ir man werek, la lo'o man holi yak leke yaka noro ai kan herre rir morimori onne, Ya ala apinha wo'operi hi.

<sup>23</sup> Ye esne mouwedi nin man lernohi enihe, penia man lernohi Ya'u lolo kerei raramne na'akeme lo'o rauroin mouropo nahenia Ya'u penia man do'on auroin ri na'akeme honorok akin. Ya'u lo'o herre walha mi dohodoho minim hini'i.

<sup>24</sup> Enimaa, mi ri heruwali lolo Tiatira kam lernohi Isabel nin wanakuku ma ka namlolo onne. Mi mamhene lernohi Hayakyak Makromon nina wanakukue man ri heruwali ra'aheni namwali ha man su-suwar la man rorom. Enpenia ka apanak mi modi ma'uvara yodiwara man werek me'e,

§ 2:17 Nonolu 'manna' onne namwali banana'an man Makromod Lalap nala kopur nano a'am raram mai Israel enihe lolo noho mamun.

25 maa ya apanak eni mehe: mi akim namkene lernohi inhawé mi mauroinedi me'e rakan lere Ya'u wali mai.

26-27 Inhoi rehi ara noro Hayakyak Makromon, la hi'i Ainu'u panaeku rakan lere man horu, Ya ala molollo hi namnenehe molollo man Ya Am'u nala Maya'u eni, leke hi rodi molollo hair-hair.

Hi rodi molollo naisa wonokon mermere,\* la ra'awoir rir arwali naise ri ma naiye'er rana dale.<sup>†</sup>

28 Enla Ya ala kaliyoro nokimur hi.<sup>‡</sup>

29 Lo'o mi kilinum aile, dernala! Makani wawa'an inhawa man Roh Kudus na'aheheni laa Nin kerei raramne na'akemeni.'"

### 3

*Aku horok laa kerei raramne ma aile kota Sardis*

1 Makromod Lalap Anan hopon ya'u wali'ur na'ahenia, "Horokedi I Lir'u eniaku laa Makromod Lalap Nin hophopon man leluwai makrana kerei raramne lolo kota Sardis ma'aheni:

Lir eniyeni Makromod Yesus Lirna. Ai onne ma nodi molollo Makromod Lalap Nin Roh Wo'ikku, la ma nasala kaliyoro wo'ikku enihe. Ai na'aheni, 'Ya auroin minima hini'i. Ri na'aheni mim mori wawa'an, maa mi honorok akin makiyedi me'e.

2 Ende mahinorokedi here, loi honorok wawa'an! Ma'alap mi akim leke naili'il Ya'u wawa'an, kalo'o mi akim ka naili'il Maya'u me'e, ono Ya'u do'onedi minim hini'i na'akeme me'e, la minim hini'i onne ka namlolo lolo Ya Am'u, Makromod Lalap kalarne.

3 Ende horhorok wanakuku mim dernedi la kokaledi nonolu me'e. Yon maprehen lernohi wanakuku onne, la herre minim morimori ma ka namlolo onne. Lo'o mi ka madiyakyaka mi akim wawa'an, mamlilinnohi Ya'u mai oro mi pakromo. Ainu'u mamai onne naise ma namna'a, ono mi ka mauroin ma'anana lo'o Ya'u mai.

4 Enimaa nano mi man minle Sardis, ri heruwali radiyaka hi honorok akin wawa'an naise ri nadiyaka rir nainair leke yon morso. Hi radiyaka kemen leke hirira morimori moumou dewdewe. Ende hi onne rala'a wewerre noro Ya'u, la hir nair nainair wawarha man siksik lerlere, ono hir hi'iyedi ha ma namlolo lolo Makromod Lalap kalarne me'e.

5 Inhoi rehi ara noro Hayakyak Makromon, Ya ala nainair wawarha an naire haenhi. Ya'u ka esne naran nano *Horok Or'ori Dardari* rakan laa ewi-ewi,\* la Ya'u konohi Ya Am'u noro Nina hophopon a'am raram hi ramwali

\* 2:26-27 Wanakunu Yunani: "rodi auke'eke'en rodi pesi hi'ie rodi molollo."

† 2:26-27 Po'onala Mzm. 2:9, Why. 12:5; 19:15. ‡ 2:28 Onne nin panaeku 'leke

namwali tanada nahenia hi rehiyedi ara nano arwali me'e.' \* 3:5 Lolo Horok eni ri man lernala or'ori dardari naranhe aiyedi me'e. Po'onala Why. 13:8; 17:8; 20:12, 15; 21:27.

*Ainu'u ri.*

<sup>6</sup> Lo'o mi kilinum aile, dernala! Makani wawa'an inhawa man Roh Kudus na'aheheni laa Nin kerei raramne na'akemeni."

*Aku horok laa kerei raramne ma aile kota Piladelpia*

<sup>7</sup> Makromod Lalap Anan hopon ya'u wali'ur na'ahenia, "Horokedi I Lir'u eni aku laa Makromod Lalap Nin hophopon man leluwai makrana kerei raramne lolo kota Piladelpia ma'aheni:

Wanakunu eniyeni Makromod Yesus Lirna, Ai penia Man Moumou Dewdewe la Ma Nam-lolo. Ai nasala konse man nonolu eni rai Daud nasaledi me'e. Lo'o An hari nikida, ri mahaku ka nodi molollo eleke, la lo'o An elekedie, ri mahaku ka nodi molollo harie.

<sup>8</sup> Ai na'aheni, 'Ya auroin inhawa mim hi'iyedi me'e. Ya auroin minim ruri pe'el ka nammori, maa mim lernohi I Lir'u mamani, la mi ka mamka'uk konohi ri nahenia mi mauroin Ya'u. Po'onala, Ya'u hari nika lolo mi kalarna, la ri mahaku ka nodi molollo eleke.

<sup>9</sup> Dernala! Ri aile ma na'aheni hi ramwali ri Yahudi, maa rapoho ono hi ramwali man lernohi Hayakyak Makromon nin mukue. Na'amoli Ya'u hi'i hi mai kadi ein korno mi kalarne, la anilu manaku ra'aheni, "Kokkoo! Makromod Lalap naramyak mi!"

<sup>10</sup> Mi mamkene lernohi Ainu'u honopon ma na'aheni, "mamkene kerhu

wewerek pananaka," de Yo orole'ule'u orowaliwali mi lere noho wawan na'akeme lernala wewerek pananaka man lapa. Wewerek pananaka man lapa onne mai leke ken ri na'akeme lolo noho wawan eni.

<sup>11</sup> Ka nalo'ol Ya'u mai wali'ur, de masala kerk-erhe wanakuku man mi mauroinedi me'e, leke yono ri mahakue nahoro mahmaha kolkoli ennen man ra'akenedi ki mi eni.

<sup>12</sup> Inhoi rehi ara noro Hayakyak Makromon, Ya'u hi'i namkene lolo Makromod Lalap Nina Romleu Lapa lolo a'am raram. Ya'u hi'i ai namkene lolo onne laa ewi-ewi, naise lauriri ma na'ono namkene lolo nakar ida. Enla Ya'u horok Ya Am'u Makromod Lalap Naranne noro Nin Kote naranne lolo ai kemen. Kota onne penia Yerusalem Worworu man kopur mai nano Ya Am'u, Makromod Lalap man minle a'am raram. Ya'u horok I Naranne worworu ai kemen haenhi.

<sup>13</sup> Lo'o mi kilinum aile, dernala. Makani wawa'an inhawa man Roh Kudus na'aheheni laa Nin kerei raramne na'akemeni."

*Aku horok laa kerei raramne ma aile kota Laodikia*

<sup>14</sup> Makromod Lalap Anan hopon ya'u wali'ur na'ahenia, "Horokedi I Lir'u eni aku laa Makromod Lalap Nin hophopon man leluwai makrana kerei raramne lolo kota Laodikia ma'aheni:

Eniyeni Makromod Yesus ma Naran 'Amin',

Lirna. Ai onne man kuku maka ma namkene wakunu panaeku ma namlolo mamani, la lolo Ai mehe Makromod Lalap hi'i hahaa na'akeme.<sup>†</sup>

<sup>15</sup> Ai na'aheni, 'Ya au-roin minim hini'i wenewhe na'akeme. Ya auroin mi ka ma'okul Ya'u, maa mi ka mamkene lernohi Ya'u haenhi. Mi maise oire ma kan ma'urinna, noro idewe kan manha haenhi. Wa'an rehi mi mamwali oir man ma'urinna wake'e, ee man manha wake'e,

<sup>16</sup> maa mi maise oir man lamlamak ono mi ka ma'okul Ya'u, la mi akim ka namkene naili'il Ya'u haenhi. Enpenia Ya'u lo'o amokedi mi!

<sup>17</sup> Mim wakunu kukulu lalap ma'aheni mi orkanaru, de minim morimori kukuku noknokor me'e. Enimaa mi ka mauroin nahenia mi maise ri ma na'alehe nakar de mehen lalaa mamai, la ri man po'on mi, akin woir ono mi mamwali ri yakyaka halhala. Mi ka mauroin nahenia ma'alehe haida-haida, mi makam tokedi, la mi madlewlewhe.

<sup>18</sup> Enpenia Ya ala mi nounaku eni: Weli maha ihi nano Maya'u man aiye na'amouwedi me'e, leke mim karu kokkoo. Enla weli nainair wawarha nano Ya'u haenhi leke yon mawawa ono minim nainair aile, la weli awa'ar modi ma'uwapin mi makam leke mim do'on wali'ur.

<sup>19</sup> Inhoi Ya aramyake,

Ya'u dadiyale, la a'alolo nin morimori man sala. Ende herre minim morimori man saleni, la yon maprehen lernohi Ya'u.

<sup>20</sup> Dernala! Ya amriri minim nike makan disne nika. Inhoi dederne I Lir'u de hari nike, Ya'u laa raram leke ore o'on omun wewerre.

<sup>21</sup> Inhoi rehi ara noro Hayakyak Makromon, Ya ala molollo naikoro Ainu'u naikoronno kodi molollo wewerre, namnenehe Yo oro Ya Am'u maikoro modi molollo wewerre, ono Ya'u rehiyedi ara noro Hayakyak Makromon me'e.

<sup>22</sup> Lo'o mi kilinum aile, makani wawa'an inhawa man Roh Kudus na'aheheni laa Nin kerei raramne na'akemeni.'

## 4

*Ul'uli sa'sa'a lolo a'am raram*

<sup>1</sup> Onne horu ya'u (Yohanis) do'on haida wali'ur. Heih! Ya'u po'on nikida lolo a'am raram nahinariyedi la ya'u derne Lira man lapa dedesne onne wali'ur. Lirna onne naise kowuri lirna la napolu ya'u na'ahenia, "Maiyala wawan nanu! Ya'u kukul ki o inhawe ma namwali lere man mai eni."

<sup>2</sup> Lere onne me'ede Roh Kudus nodi molollo maya'u de nodi ya'u laa a'am raram. Rakanedi lolo enne, ya'u do'on Rai nin naikoronno ida noro Ma naikokoro eni.

<sup>†</sup> 3:14 'Wanakunu...lolo Ai mehe Makromod Lalap hi'i hahaa na'akeme', tafsiran namehin, '...la Ai mehe nodi molollo ha wo'ira na'akeme man Makromod Lalap hi'iyedi me'e.'

<sup>3</sup> Ma naikokoro onne ad'ada naise deli wakue man wekel yaspis noro sardis. Haimerida aile man pupinala Nin naikoronna onne kakan mokmoko naise waku zamrud.

<sup>4</sup> Naikoronna werro'o wo'akka namehin pepepen naikoronna onne, la ri leleher lalapa werro'o wo'akka raikokoro haenhi. Rir nainair wawarhe mamani, la karpuspus karpusa mahe naise man rehi ara nine.

<sup>5</sup> Naikoronna man aile toro onne, siksika lerlere naise noho lerlere, la lirna naisa noho dildila namhara haenhi. Lolo naikoronna onne kalarna, obor wo'ikku mormori. Onne penia naulinu nawali Makromod Lalap Nin Roh wo'ikku enihe.

<sup>6</sup> Lolo naikoronna man aile toro onne kalarna haida aile naise oir lapa man po'on nahaloredi molmolle kokaka, la ha mormori wo'akka ri kan dodo'onnala makun aile naikoronna onne herne waliwali. Hi kemen kil'iur kalari makan mamani.

<sup>7</sup> Ha mormori dedesne nine naise singe, ha mormori rewro'o nina naise sapi dalu, rewkelu nina oin makan naise ri mormori, la rew'akka nine naise oprau man liwliware.

<sup>8</sup> Ha mormori wo'akka onnenihe doho-doho liwarne woneme, la kemen na'akeme makan penpenu, lolo liwarne waliwali makan aile haenhi. Enla lelere a'alam kar ren rahinara rir ul'uli sasa'a. Hi rahinara ra'aheni,

“Moumou dewdewe, O!  
Moumou dewdewe, O!  
Moumou dewdewe, O!

O penia Makromod Lalap Ma Nodi Molollo Ma Narehi Ma Nalewen Na'akeme, Man aile nonolu, Man aile lere eniyeni, la Man aile laa ewi-ewi.”

<sup>9</sup> Ha mormori wo'akka onne ra'uli rasa'a, ra'akulu ra'alap Oin Naran, ra'aheni trimkasi laa Ai ma naikokoro lolo Rai Nin naikoronna la Man mori laa ewi-ewi onne.

<sup>10</sup> Hi ra'ul'uli rasasa'a ne, ri leleher lalap werro'o wo'akka onnenihe laa rahinonouwedi yawa, la ra'uli rasa'a Ai Man Mori laa ewi-ewi haenhi. Hi rala rira karpuse rodi mahe hihi'ie loile Nin naikoronna kalarna ra'aheni,

<sup>11</sup> “Makrom'ee! O penia Makromod Lalap am horhawe!

O penia ma namlolo de Num molollo aile kokala ainim ul'uli sasa'a na'akeme.

Om hi'i ha naakeme namwali, la nano Num raram nodi penia umupala ha rahu na'akeme.”

## 5

*Pipdumana mehe nodi molollo hari horok lunlunne*

<sup>1</sup> Onne horu ya'u po'on haida wali'ur. Ya'u po'on Ai ma naikokoro lolo naikoronna onne nasasala horok lunlunna ida aile liman malanne. Horok onne horhorok waliwali la rodi segel wo'ikku segsegel.

<sup>2</sup> Enime'ede ya'u po'on hophopon a'am raram ma naruri ida, wakau na'ukani,

"Inhoi nin molollo aile hari horok eni nina segele?"

<sup>3</sup> Enimaa nano ri man aile noho wawan, a'am raram, me noho wi'in, ri mahaku ka nodi molollo hari horok onne, lese.

<sup>4</sup> Kame'ede ya'u raram penu, de ahere nammori, ono ri mahaku ka nodi molollo hari horok onne, lese.

<sup>5</sup> Ma namwali leleher lalapida nano ri wero'o wo'akka onnenihe na'aheni maya'u, "Heih! Yon mahere me'e ono Ri ida aile man rehiyedi ara Nin arwali me'e. Ai naran Singa, la Ai nano hair Yehuda, la Daud Upun Anan. Ai penia nodi molollo nohu segel onnenihe la hari horok lunlunna onne, lese."

<sup>6</sup> Enime'ede ya'u po'on Pipdumana ida aile namririnohi naikoronna onneni, la ha mormori wo'akka roro ma namwali leleher lalap onnenihe pepepen Ai. Ya'u po'on Ai kemen naise resnedi nonolu me'e. Ai dudalle wo'ikku la makan wo'ikku. Makan wo'ikku onne na'ono Makromod Lalap Nina Roh wo'ikku man An hopon laa lolo noho wawan na'akeme.

<sup>7</sup> Pipdumana onne laa kalari nala horok lunlunne nano Ai ma naikokoro lolo naikoronna onne liman malanna.

<sup>8</sup> Ai naledi horok onneni ne, ha mormori wo'akka roro leleher lalap wero'o wo'akka onnenihe laa yawa rahinononow lolo kalarna. Hi dohodoho rasala haida naise kecapi noro manuk man rodi maha hi'ie. Manuk onnenihe penpenu noro

wuru man wola'ula'u ma namwali lir napanak man Makromod Lalap Nin ri mememen na'akeme hi'ie.

<sup>9</sup> Hi rahinara hanarida ra'aheni,

"O penia ma namlolo, de Num molollo aile mala horok onneni we'er nina segel enihe, ono resnedi O me'e, la noro Num rara ma nakliu onneni,

Om weliyedi ri mor mori noho wawan na'akeme me'e, ri nano hair-hair, noho-noho, la nano wanakunu na'akeme, leke ramwali Makromod Lalap Nina ri.

<sup>10</sup> Om niliyedi hi leke ramwali hair mahaku, la ramwali imam-imam man ilitolle ik Makromod Lalap, la ramwali rai-rai leke rodi molollo lolo noho wawan na'akeme."

<sup>11</sup> Horu ne, ya'u po'on wali'ur la derne hophopon a'am raram nammori lirna, kar akinala hi. Hir pepepen Rai Nin naikoronna, ha mormori wo'akka roro leleher lalap onnenihe.

<sup>12</sup> Hi rahinara raruri ra'aheni, "Pipdumana man resnedi eni, Num molollo aile, de am horhawa O, ai ma'uli masa'a O, la ai ma'akulu ma'alapa O Oin Naran.

Am kukunohi Num molollo, am wakunkunu Num kanaru, am kukunohi Num woroin ma narehi ma nalewen,

la am wakunu wali'ur

Num ke'eke'el an'anhe!"

<sup>13</sup> Enime'ede ya'u derne ha man mormori na'akeme lolo a'am raram, a'am lehern, lolo lour ro, la noho wi'in rahi-nara ra'aheni,

"Ai ma naikoro lolo Nin naikoronna noro Pip-dumana onneni,

ai ma'uli masa'e,

am horhawe,

ai ma'akulu ma'alapa Hi Oin Naran,

la am wakunkunu Rir ke'eke'el an'anha laa ewi-ewi!"

<sup>14</sup> Ha mormori wo'akka onnenihe walhe ra'aheni, "Amin!" Ri leleher lalap onnenihe laa yawa rahi-nononow ra'uli rasa'a Hi haenhi.

## 6

### *Pipdumana hari segel woneme*

<sup>1</sup> Onne horu ya'u po'on Pipdumana onne hari idewe segel dedesne nine, la ya'u derne ha mormori ida nano wo'akka onnenihe napolu naruri nodi lir naise noho dildila na'aheni, "Mai nanu!"

<sup>2</sup> Enime'ede ya'u po'on kuda wawarha ida. Ma naikoro kuda onne nasalsala ram horne, la An lernaledi mahkota ri man rehi ara nina. Enine ma nadedem rehi ara onne namhara lolo onne leke rehi ara wali'ur.

<sup>3</sup> Onne horu, Pipdumane hari segel woro'o nine. Ya'u derne ha mormori woro'o nine napolu na'ahenia, "Mai nanu!"

<sup>4</sup> Kan maha ne kuda memere ida namhara

wali'ur. Ma naikoro kuda onne lernala raa lalapida, la lernala molollo leke na'amoluloinedi honoli man moiliwi mahuwele lolo noho wawan de hi'i ida ma nesne ida.

<sup>5</sup> Horu ne, Pipdumane hariyedi segel wokelu nine. Ya'u derne ha mormori wokelu nine napolu na'ahenia, "Mai nanu!" Ya'u po'onala kuda momohon ida. Nin ma naikoro nasalsala kaikaile rodi kail banana'an.

<sup>6</sup> Kuda onne hari ne, ya'u derne lirida naise ri mormori lirna namhara nano ha mormori wo'akka onnenihe toro ma na'aheni, "Na'iwe'el lerida nine noknokor rodi weli gandum okonne kilu ida mehe, ee kele'uk okonne kilu wokelu mehe,\* maa yon mano'onyaka rira zaitun-zaitun ono noro anggur kirne, leke rir anggur aile romun la wuru aile rodi rapali aiye."

<sup>7</sup> Onne horu, Pipdumane hariyedi segel wo'akka nine. Ya'u derne ha mormori wo'akka nine napolu na'ahenia, "Mai nanu!"

<sup>8</sup> Ya'u po'on kuda mokmok marmarra ida hariyedi, la nin ma naikoro onne naran 'Makmaki'. Enla man lernohi Makmaki onne aile ma naran 'Noho Makmaki'. Man ha'a kuda naran Makmaki noro ma naran Noho Makmaki lernala molollo resnedi ri mormori lolo noho wawan heruwali. Hir lernala molollo resne noho hana'ar ida mehe nano noho hana'ar wo'akka enihe. Hi rodi ara, roulare,

\* **6:6** Wanakunu lirna 'kele'uk' herre Yunani nina wanakunu lirna 'jelai sedinar.'

apinha wo'operi, noro ha mormori ma nawuhur resne ri na'akeme onne.

<sup>9</sup> Onne horu, Pipdumane hariyedi segel wolima nine. Ya'u po'on ri hamarane nammori lolo honoi kanani onno arkan. Ri hamaran onnenihe resnedi nonolu ono ramkene loikaru Makromod Lalap Lirna Wawa'an la ka ramka'uk konohi ri ra'aheni Yesus nodi molollo hi.

<sup>10</sup> Ri hamaran onnenihe wakau raruri ra'aheni,  
“MAKROMOD Ma Nodi Molollo Ha Wo'ira Na'akeme!

O penia Man Moumou Dewdewe la Ma Nam-lolo!

Lere wo'ira makun mene ho'ok kail ri man minle noho wawan ma nesnedi mayai enihe?”

<sup>11</sup> Makromod Lalap nala hi dohodoho rain wawarhe man sorsoru la na'aheni, “Warnala tarana nanu ono ri man ailanna mahar resne minim man howok wali enihe, naise nonolu hi resnedi mi, la man ailanna onne ka resne mi walinhe nokor makun.”

<sup>12</sup> Onne horu, ya'u po'on Pipdumane hari segel woneme nine. Ideweni ne rururuwai lape, po'on lere momohon naise makiyedi, la wollo penenu po'on memere naise rare.

<sup>13</sup> Kaliyoro nammori nadiyaur mai noho wawan naise anna lapa ma nado'o ara ono de woin dudu'ul nadiyaur re'er rararie.

<sup>14</sup> Ya'u po'on a'am lunedi naise piki man lunedi, de a'am moluwedi, la wo'or-wo'or noro noho-noho rahineiredi nano rir onno.

<sup>15</sup> Rai-rai lolo noho wawan, man anulu panulu, uluwakun ara, ri orkanaru, ma nodi molollo lalape, la ri namehin ma namwali hophopon wahwahan me ri ma nadedem, na'akeme lari laa wo'or-wo'or suwar lolo ku'il raram noro waku leken.

<sup>16</sup> Hir wakau rapanak, “Wo'or-wo'or noro waku mie, madiyaur uinedi mayai ke'e, leke suwaredi mayai nano Ai ma naikoro lolo Nin naikoronno noro Pipdumana onnenihe Rir ahanne,

<sup>17</sup> ono Hi raledi hunukum man lap maiyedi me'e, la ri mahaku ka naruri kerhu Rir ahan man lap onneni.”

## 7

*Makromod Lalap leluwai makrana Nina ri*

<sup>1</sup> Onne horu, ya'u po'on hophopon a'am raram wo'akka ramriri lolo noho huhun wo'akkenihe. Hi rodi molollo kawala anna man huhuu nano noho huhun wo'akkenihe, leke yono hu lolo ro, lolo lour, de our'ono au'ono mahaku ka nado'o.

<sup>2</sup> Ya'u po'on hophopon a'am raram ida wali'ur mai nano lere haha'a lolé, nodi Makromod Lalap man morimori Nin cap. An komdere hophopon a'am raram wo'akka man ler-naledi molollo ra'awoir ro noro lour onnenihe nodi lirna naruri na'aheni,

<sup>3</sup> “Yono huri anna naiye'er ro noro lour me our'ono au'ono nanu! Lapan am tade Makromod Lalap Nin hophopon wahwahan lolo lerenhe.”

<sup>4</sup> Enime'ede ya'u derne Lirida na'aheni, "Ri man lernala tanada onnnenihe, riwan rahu weli'akka wo'akka (144.000)!" Ri eniyenihem ramhara nano Israel (Yakup) anan la ramwali luhu idaweli woro'o.

<sup>5</sup> Ri riwan idaweli woro'o nano aki luhu idaweli woro'o onne lernala tanada onne:

nano Yehuda upun anan, riwan idaweli woro'o,

nano Ruben upun anan, riwan idaweli woro'o,

nano Gad upun anan, riwan idaweli woro'o,

<sup>6</sup> nano Asyer upun anan, riwan idaweli woro'o,

nano Naftali upun anan, riwan idaweli woro'o,

nano Manasye upun anan, riwan idaweli woro'o,

<sup>7</sup> nano Simeon upun anan, riwan idaweli woro'o,

nano Lewi upun anan, riwan idaweli woro'o,

nano Isakar upun anan, riwan idaweli woro'o,

<sup>8</sup> nano Zebulon upun anan, riwan idaweli woro'o,

nano Yusup upun anan, riwan idaweli woro'o,

la nano Benyamin upun anan, riwan idaweli woro'o.

*Sus kame'el lolo a'am raram*

<sup>9</sup> Ya'u po'on wali'ur ne, ri nammori rehi, kar aki-nalahe. Hi ramhara nano noho wawan na'akeme, nano hair-hair noro noho-noho na'akeme, la nano wanakunu na'akeme. Hi

ramriri rakpalipali naikorronno onne noro Pipdumana kalarna. Hir nair nainair wawarha man sorsoru la meririi nasala auhane we-whe leke horhawe Makromod Lalap,

<sup>10</sup> la hir wakau raruri ra'aheni,  
"Iknika or'ori dardari ma kan horu ik kokale nano ik Makromod Lalap Ma naikoro lolo Nin naikorronno noro Pipdumana onneni!"

<sup>11</sup> Hophopon a'am raram na'akeme polweweredi naikorronno onneni, roro leleher lalape, roro ha mormori wo'akka enihe. Hir laa yawa rahinononow lolo Nin naikorronno kalarna, ra'uli rasa'a Makromod Lalap rahinara na'ahenia:

<sup>12</sup> "Amin!  
Ai ma'uli masa'a ai Makrommu, Makromod Lalap eni, ai ma'akulu ma'alap O Oin Naran, ai mauroin O penia mauroin ha wo'ira na'akeme. Am horhorok Num ke'eke'el an'anha, noro Num molollo ma narehi ma nalewen! Ai mapanak trimkasi nam-mori, la am horhoor hawhawa O laa ewi-ewi!  
Amin!"

<sup>13</sup> Ri leleher lalapida na'ukani ya'u na'ahenia, "Ri man nair nainair wawarha onnnenihe inhoi? Hi rano ewi?"

<sup>14</sup> Ya'u walha na'ahenia, "Eih! Ka auroin, pape! Lo'o pape mehe nauroin ha onne."

Ai na'aheni, "Hi onnenihe ramharedi nano lere alam apinpinha wo'operperi man lap me'e. Hi rodi Pipdumane rarna paharedi rira nainair de ra'awarhedi me'e.

<sup>15</sup> Onne penia hi ramriri lolo Makromod Lalap Nina naikoronno kalarna ilitolle Ai lelere a'alam lolo nina Romleu Lape.\* Enla Makromod Lalap ma naikoro Nin naikoronno onne leluwai makrana hi mamani.

<sup>16</sup> Ende ka ramlara me'e, kar marou me'e, la lere manmanha ka nalahe me'e,

<sup>17</sup> ono Pipdumana ma namriri lolo naikoronno onne namwali hirira Man Hurie. Ai norkaru hi laa oir moumou ma nala or'ori dardari hi. Enla Makromod Lalap lo'o na'akisiyedi makan oirne de ka rahere me'e."

## 8

### Pipdumana hari segel wo'ikku nine

<sup>1</sup> Pipdumane hariyedi segel wo'ikku nineni ne, ri mahaku lirna kan hari lolo a'am raram na'ikeki jam heruwalie.

<sup>2</sup> Ya'u po'on hophopon a'am raram wo'ikku ma namriri lolo Makromod Lalap kalarna enihe. Hir kokala kowuri lapa\* wo'ikku.

<sup>3</sup> Onne horu, hophopon a'am raram namehin ida mai namriri na'urani honoi kanani onno man rodi maha hihi'ie man minle naikoronno onne kalarna. Hophopon onne nodi manuk

man rodi mahe hihi'ie, la an kokala wuru wola'ula'u namansa, leke harne wewerre noro idewe lir napanak nano Makromod Lalap Nina ri mememen na'akeme.

<sup>4</sup> An harnedi wuru onne me'ede, mahun noro rira lir napanak laa wawan lolo Makromod Lalap kalarna.

<sup>5</sup> Kame'ede hophopon a'am raram onne nodi manuk onne, laa nala aiwara man mormori nano honoi kanani onno onne loile manuk raram, nale wakal laa noho wawan. Ideweni ne, noho lerlere, noho dildila, la rururuwai man lapa wake'e.

*Kowuri wo'akka ma nolu*

<sup>6</sup> Onne horu, hophopon a'am raram wo'ikku man rasalsala kowuri lap wo'ikku onnenihe, ramkenedi leke rou me'e.

<sup>7</sup> Hophopon a'am raram dedesne nouwedi nin kowuri ne, aiye noro okon es nawa'ha rare nadiyaur naise okon waku lape. Lo'o noho wawan ha'ar namwali hana'arne wokelu, aiye na'anedi hana'ar ida nano wokelu onne, la aiye na'anedi our'ono, au'ono, noro penek monornoro na'akeme lolo hana'arne onnneni.

<sup>8</sup> Hophopon a'am raram woro'o nine nouwedi nin kowuri ne, haida ma naise wo'or man kulu sopoledi laa kahi raram me'e. Lolo wo'or onne, aiye morimori. Lo'o kahi nahina'ar namwali wokelu, hana'arn ida herredi namwali rare.

\* 7:15 Romleu Lape onne wekel a'am raram. wanakunu Malay: 'trompet' me 'sankakala'.

\* 8:2 'Kowuri lapa' onne herre

## 9

<sup>9</sup> I'in noro ha mormori man minle kahi raram hana'arne onne makiyedi, la lo'o kapal kahi na'akeme ha'ar namwali wokelu, hana'arne ida keperedi.

<sup>10</sup> Hophopon a'am raram wokelu nine nouwedi nin kowuri ne, kaliyoro waku lapa wake'e ida man mormori naise obor lape, nadiyaur nano a'am laa oir wauwau noro oir makan heruwali raram. Lo'o oir wauwau noro oir makan na'akeme ha'ar namwali wokelu, kaliyoro onne na'amorsedi hana'arn ida nano wokelu onne.

<sup>11</sup> Kaliyoro onne naranne Meru. An hi'i oir wauwau noro oir makan hana'arn onne meru la ri nammori maki ono hi romun oir man meru onne.

<sup>12</sup> Hophopon a'am raram wo'akka nine nouwedi nin kowuri ne, haida nukur lere, wollo, noro kaliyoro-kaliyoro. Lo'o lere, wollo, noro kaliyoro enihe ha'ar namwali wokelu, lere nina hana'arne ida momohon, wollo nin hana'arne ida momohon, la kaliyoro enihe rira hana'arne ida momohon haenhi. Ende lelere heruwali noho momohon, la a'alam heruwali noho eren momohon haenhi.

<sup>13</sup> Ya'u po'on laa wawan, la derne oprau ida man li-wliwar aile wawan wake'e wakaukau, "Mayo'o! Mayo'o! Ri mormori na'akeme man min ki noho wawan, mim mayo'o, ono hophopon a'am raram wokelu namehin aile makun ma namkene rou rira kowuri eni."

*Hophopon wolima nine nou nina kowuri*

<sup>1</sup> Hophopon a'am raram wolima nine nouwedi nina kowuri ne, ya'u do'on hophopon a'am raram ida man po'on naisa kaliyoro ma nadiyauredi nano a'am laa noho wawan. Makromod Lalap nala hophopon onne konse man hari Lo'o Lalapa nin nike. Lo'o Lalap onne roromne kar ho'oknala.

<sup>2</sup> Hophopon onne hariyedi Lo'o Lalap onne nin nikeni ne, aimahu namansa namhara naise man osno nor'ome. Ai mahu onne me'ede hi'i noho wawan metekedi.

<sup>3</sup> Poreke namhara nano aimahu onne mai noho wawan mamani. Makromod Lalap nala molollo ni'i ri naise sayorne nini'ie.

<sup>4</sup> Poreke onnenihe kar hurinohi ro'onyaka au or'oriyana, maa hurinohi ni'i ri mormori ma kan ler-nala Makromod Lalap Nina tanade lolo leren makun.

<sup>5</sup> Kar hurinohi hi resne ri onnenihe, maa hurinohi hi'i apinpinha hi wollo wolima raram. Ri man poreke nini'i onnenihe kemen apinha naise sayorne nini'ie.

<sup>6</sup> Heih! Wollo wolima raram apinha wake'e, de hi ranoin kalla leke maki, maa kar lernale. Hi raram nodi pelek maki, maa makmaki ko'u hi.

<sup>7</sup> Poreke onnenihe mol-molo kude ma namkenedi rodi laa ra'ara. Lolo uluwakunhe hir nair haida po'on molmolo karpusa

mahe la oin makan naise ri mormori.

<sup>8</sup> Murukne naru naise maeke nina muruke, nihinhe naise singe nihini.

<sup>9</sup> Lolo irun makanhe hir nair nainair rodi pesi hihi'ie. Hi liwarnhe neknekir naise kerete rahu man neknekir lere kude soru laa ra'ara.

<sup>10</sup> I'urne naise sayorne i'urne, la hi rodi molollo ri'i ri mormori hi'i apinpinha wollo wolima raram.

<sup>11</sup> Rira rai ma nodi molollo hi namwali hophopon a'am raram ma nodi molollo Lo'o Lalap man rorom wake'e onne. Ai naran rodi wanakunu Ibrani rapolu "Abadon," la rodi wanakunu Yunani rapolu "Apolion" (napa'ahne, 'ma nano'onyaka').

<sup>12</sup> Lere alam mayo'o dedesne horuwedi me'e, maa woro'o aile makun.

<sup>13</sup> Enine hophopon a'am raram woneme nine nouwedi nina kowuri. Ya'u derne Lira namhara nano honoi kanani onno nin huhun wo'akkenihe. Honoi kanani onno onne aile Makromod Lalap kalarna.

<sup>14</sup> Lira onne hopon hophopon woneme nine na'ahenia, "Huriyedi hophopon a'am raram wo'akka man or'orok aile lolo oir wauwau Efrat eni."

<sup>15</sup> Kame'ede ai lan huriyedi hophopon wo'akka man Makromod Lalap na'akenedi nano nonolu me'e, leke rakan anna, wollo, lere, noro jam Ai mehe nilie, hi resne ri mormori lolo noho wawan heruwali. Lo'o ri mormori noho wawan ha'ar namwali

wokelu, hi resnedi hana'arn ida.

<sup>16</sup> Hophopon wo'akka onne rodi molollo ri juta rahu woro'o ma nasala ke'urauk ma naikoro kude. Ya'u derne Lirida man wekel hi na'akeme lawanhe.

<sup>17</sup> Lolo haida Makromod Lalap nalhariyedi maya'u mehe do'on, ya'u po'on ma naikoro kudenihе rir nainair rodi pesi hi'ie. Rir nainair onne po'on memere naise aie, au'au naise ai mahue, la mamarra naise lalie. Kude onnenihe uluwakunhe po'on naisa singa uluwakun, la aiye, noro ai mahu, noro lali namhara nano nuranhe.

<sup>18</sup> Lo'o ri mormori noho wawan ha'ar namwali wokelu, hana'arne ida maki horu, ono aiye, ai mahu, noro lalie ma namhara kude nuranne resnedi hi.

<sup>19</sup> Kuda enihe rira ruri melle nuran noro i'urne haenhi, ono hi i'urnhe naise nee uluwakun. Hir naire rodi hi'i apinpinha ri mormori.

<sup>20</sup> Enimaa ri mormori man mormori makun kar herre rira morimori ma ka namloleni, penia kar ren hoikani hayakyak noro lernulu aukerhe man hir hi'ie rodi mahe, pere, pirmere, waku, noro au. Hir hoikani lernulu aukerhe ma kan do'on, kan derne, la ka nala'a.

<sup>21</sup> Hi kar herre rir morimori ma ka namlolo naise: resne ri, ramna'a, hi'i u'ur leher, ramwali nediyomon, la holi yak leke yak.

## 10

*Yohanis po'on hophopon a'am raram ida nasasala*

*horok lunlunnanida*

<sup>1</sup> Enime'ede ya'u po'on hophopon a'am raram namehin ma naruri wake'e kopur nano a'am raram. Kakam pupupine, la haimere wewwewer uluwakun. Oin makan siksik naise lere hikanne, la ein naise lauriri man aiye na'na'an.

<sup>2</sup> Ein wali malanna an loile kahi, la ein wali mariri loile ro. Horok lunlunnanida nadiwerwerre aile liman wali.

<sup>3</sup> An wakau naruri naise singe lirna. Wakau horu, noho nu'nu'ur wo'ikku walha lira onne.

<sup>4</sup> Noho nu'nu'ur horu, manlo'o ya'u horok wanakunu i dederne onne, maa Lirida nano a'am raram kawala'u na'henia, "Yom horok onne! Suwaredi inhawe om dederne nano noho nu'nu'ur wo'ikku onnenihe."

<sup>5</sup> Onne horu, hophopon a'am raram man idedi eni ya'u po'on namriri kahi noro ro onne kikan liman malanna laa wawan,

<sup>6</sup> la kikan nou nodi Makromod Lalap Naran, ono Ai penia man mori laa ewi-ewi, la ma nakuku noho ma naleu a'am noro ne'en raram na'akeme. An nou na'henia, "Eih! Makromod Lalap kan lapan me'e!"

<sup>7</sup> Lere hophopon a'am raram wo'ikku nine nou nin kowuri eni, Makromod Lalap lo'o na'akuku na'anokor Nin panaeku man suwsuwar nano nonolu eni. Nonolu An loikaruwed i panaeku onne lolo Nina nabi-nabi ma namwali Nin hophopon wahwahan me'e."

<sup>8</sup> Onne horu, Lira nano a'am raram man idedi ya'u derne onne, hopon ya'u wali'ur na'henia, "Laa mala horok ma nadiwerwerre onne nano hophopon a'am raram ma namriri lolo kahi noro ro onne limane."

<sup>9</sup> Ende ya'u laa apanak ai nala horok lunlunna onne maya'u. Ai na'heni, "Kokale, la mo'on here. O mo'one, lo'o rase namina naise wani oir, maa keper laa konomi lo'o meru."

<sup>10</sup> Enime'ede ya ala horok lunlunna onne nano li-man, yo o'one. Lolo i nurane rase naise wani oir, maa keperedilaa kono'u ne, meru me'e.

<sup>11</sup> Horu, an hopon ya'u wali'ur na'henia, "Maderre madaul wali'ur Makromod Lalap Nin panaeku ma namwali lere man mai noro ri na'akeme man minle noho wawan, lolo hair-hair, noho-noho, rai-rai, noro wanakunu na'akeme."

**11***Makromod Lalap Nina ri woro'o man kuku maka*

<sup>1</sup> Onne horu, Makromod Lalap nala maya'u au deul ida naise au ke'eke'en rodi ho'ok, la hopon ya'u na'henia, "Lam ho'ok Ainu'u Romleu Lape noro nin honoi kanani onno lolo Yerusalem. Lam akiyedi ri ma na'uli nasa'a Ya'u lolo onne na'akeme haenhi.

<sup>2</sup> Maa yom ho'ok Romleu onne nina nikoin, ono onneni raledi ri ma ka nauroin Ya'u. Hi rodi rurilai kerne dalha kote man moumou dewdewe onne wollo weli'akka woro'o.

<sup>3</sup> Lere onne Ya ala molollo Ain'u man kuku maka woro'o leke loikaru Ain'u nounaku. Hir nair nainair kaduk leke namwali tanada nahenia hi akin woiredi la hi ra'ahan ono ri mormori rir dohohale. Hir konohi Ain'u nou lolo noho wawan lere alam riwan ida rahu woro'o welineme (1.260) raramne."

<sup>4</sup> Naho'ok woro'ohe naise zaitun hana woro'o la wadu onno woro'o ma namriri lolo Makromod Lalap kalarna, MAKROMOD ma nodi molollo noho wawan na'akeme.\*

<sup>5</sup> Hirira molollo aile hi'i aiye namhara nuran harnesnedi ri man kene hi'i apinpinha hi. Ende inhoi ken hi'i sus hi, lere onne me'ede maki.

<sup>6</sup> Rir molollo aile elekedi a'am leke lere alam hir loikaru Lirna Wawan eni yon okon mai. Rira molollo aile hi'i oir wauwau noro oir makan na'akeme namwali rare, la hi'i wewerek pananaka rahu rodi duni ta'al noho wawan, lernohi rir suk aimehi.

<sup>7</sup> Hirira lere alam loikaru Makromod Lalap Lirna horu, ha mormori man ailanna ida namhara nano Lo'o Lalap man roromne kar ho'oknala onneni. Ha mormori onne noro hi ra'ara, la rehiyedi woro'ohe de nesnedi hi.

<sup>8</sup> Resnedi horu, hoikaruwedi ihin kemenhe lolo kota ma na'ono onne nin kalla lapa wawan. Kota onne penia namwali kota man wairesnedi woro'ohe rir Makromon nonolu eni. Kota onne naho'ok naise kota Sodom noro Mesir, ono ne'en raramne ailanna wake'e

naise Sodom noro Mesir nonolu eni.

<sup>9</sup> Ri lolo noho wawan na'akeme, nano hair na'akeme, nano luhu na'akeme, la nano wanakunu na'akeme po'on man maki onnenihe ihin kemen minle kalla wawan lere alam wokelu rehi ono ka rala leken rawilo'e.

<sup>10</sup> Ri man ailanna na'akeme lolo noho wawan do'one, la rase akin nahuwa'an wake'e ono ri woro'o man kuku maka onne makiyedi me'e. Hir hi'i yapi lalapa, la ida ma nala ida hahaa, ono nabi woro'o onne kar hi'i hi sus me'e.

<sup>11</sup> Alam wokelu rehi horu, Makromod Lalap nala aran hi wali'ur, de wuku wawan la ramririri penia ri man do'on hi ramka'uk wake'e.

<sup>12</sup> Woro'ohe derne Lirida nano a'am raram napolu naruri na'henia, "Ha'a mai eni here!" Rir arwali mahar popo'on ne, hir ha'a laa a'am raram la kakam pupupin hi.

<sup>13</sup> Lere onne me'ede ruruwai lape, de lolo kota onne nakar persen idaweli yakedi, la ri riwan wo'ikku maki horu. Ri ma kan maki enihe ramka'uk rehi ra'heni, "Idei! Makromod Lalap man aile a'am raram Nin ke'eke'el an'anha narehi nalewen na'akeme."

<sup>14</sup> Lere alam mayo'o rewro'o nine horuwedi me'e. Mahinorok memen! Kan maha mayo'o rewkelu nine lo'o mai ho'o me'e.

*Rouwedi kowuri wo'ikku nine*

\* **11:4** Zak. 4:3, 11-14.

<sup>15</sup> Hophopon a'am raram wo'ikku nine nouwedi nin kowuri ne, ya'u derne lira nammori wakaukau raruri lolo a'am raram ra'heni,

"Lere eniyeni, Ik Makromod Lalap noro idewe Nin Rai man An kikanedi nano nonolu eni,

rodi molollo noho wawan na'akeme me'e.

Enla Ai nodi molollo noho pa'i'ik rai pakakar na'akeme mamani laa ewi-ewi."

<sup>16</sup> Enime'ede ri leleher lalap werro'o wo'akka ma naikoro rir naikoronna lolo Makromod Lalap herne kalarna onnenihe wali laa yawa rahinononow ra'uli rasa'a Makromod Lalap.

17 Hi ra'heni,

"Makromod Lalap ma Nin ke'ke'el an'anha narehi nalewen na'akeme,

O mamwali man aile nano nonolu eni,  
la man aile lere eniyeni.

Trimkasi Makromod, ono O modi Num molollo ma narehi ma nalewen,  
leke modi molollo noho wawan na'akeme.

<sup>18</sup> Ri ma akin ka naili'il O na'akeme ra'ahan wake'e,

la ra'okuledi O,  
de lere alam malhari Num ahan hi rakanedi me'e.

Lere alam hukumesne ri ma nesne ri lolo noho wawan rakanedi me'e!

Lere alam maho'ok makail ri man makiyedi na'akeme rakanedi me'e.

Lere alam mala Num hophopon wahwahan rira mahmaha kolkoli ennen rakanedi me'e.

Hi onne nabi-nabi, Num ri mememen, roro ri na'akeme ma namka'uk O, ma na'ono roro idewe man lolo yawenihe."

<sup>19</sup> Enime'ede Makromod Lalap Nin Romleu Lape man aile a'am raram nin nike nahinariyedi, la ya'u do'on Oplaha rodi manaku Nin nou man horok lolo waku nonolu eni. Noho lerlere, la noho dildile mamani, na'uwalu rururuwai lalap noro okon es waku lape mai.

## 12

*Maeke noro nee memere lalapa man ailanna*

<sup>1</sup> Onne horu, tanada worworu man lewlewen ida hari lolo a'am. Maeke ida aile ma nodi lere ho'ihoi're, la namriririle wolle wawan. Lolo uluwakun wawanne karpuspusa karpusa maha rodi kaliyoro waku idaweli woro'o ra'akekekrie.

<sup>2</sup> Maeke onne nornoro raramne la nina lere alam me'e'de nelhenne apinha la na'adididi mamani.

<sup>3</sup> Enla tanada man lewlewen namehin hari lolo a'am wali'ur, po'on naise nee memere lalapa ida, uluwakun wo'ikku la dudal idaweli. Uluwakun wo'ikku onnenihe dohodoho nair rai nina karpuse.

<sup>4</sup> Nee lalap onne nodi i'urne wewhe kaliyoro manin a'am. Lo'o kaliyoro na'akeme ha'ar namwali wokelu, an wewhedi hana'ar

ida nadiyauredi mai noho wawan. Nee lalapa onne namriri lolo maeke ma na'ikeki karuwana kalarna. An lapan karuwana leke nawal anan.

<sup>5</sup> Maeke onne mori mo'oniyanida. Tatana onne penia ma nodi molollo ri mormori noho wawan na'akeme. Tatana onne lo'o nodi molollo naisa wonokon mermere leke na'awoiredi nina arwali enihe. Nee lalap onne manlo'o nawal Tatan onne, maa hophopon a'am raram ida nahoredie nodi laa Makromod Lalap Nina naikorronno kalarna.

<sup>6</sup> Maeke onne lari laedi noho mamun la an minle onnida man Makromod Lalap na'akenedi nano nonolu me'e. Min lolo onne Makromod Lalap ilitolle ai alam riwan ida rahu woro'o welineme (1.260).

<sup>7</sup> Lere onne ara lape namwali lolo a'am raram haenhi. Uluwakun ara ida ma naran Mikhael noro nin hophopon wali enihe ra'ara roro nee lalapa onne noro nina hophopon wali enihe.

<sup>8</sup> Maa, nee lalapa onne kan rehi ara, de noro nina hophopon enihe kar huri-nohi minle a'am raram me'e.

<sup>9</sup> Ende hir wakaledi nee lalapa onne nano a'am raram me'e. Nee onne naran 'Nee Nonolu eni,' me 'Hayakyak Makromon,' me 'Setan' haenhi. Ai penia wukupoho ri na'akeme lolo noho wawan. Hir sopoledi ai noro idewe nin hophopon a'am raram enihe nano a'am raram laa noho wawan.

<sup>10</sup> Enime'ede ya'u derne lir

man lapida nano a'am raram na'aheni,

"Lere eniyeni ik Makromod Lalap nala or'ori dardari Nin ri me'e.

Lere eniyeni An kukul Nin ke'eke'el an'anha nodi molollo noho wawan na'akeme me'e!

Enla Nin Rai Kristus ma nodi molollo laa ewi-ewi,

kukul Nin molollo me'e,

ono Hayakyak Makromon man lelere a'alam tumdesne ik walinhe lolo Makromod Lalap kalarna,

hir sopoledi nano a'am raram me'e.

<sup>11</sup> Ik walinhe rehiyedi ara roro Hayakyak Makromon onne me'e, ono Pipdumane makiyedi la rarna nakliuwedi leke na'ohu nahaledi rir do-hohalenih,

la hir rehiyedi ara roro Hayakyak Makromon ono ka ramka'uk maki, maa ramkene konohi ri na'aheni Pipdu-mana namwali hi Makromon mamani.

Kade rin hi'i sus hi, ee resne hi, maa kar lari nano Ai.

<sup>12</sup> Ende mi man minle a'am raram na'akeme, mi akim nahuwa'anedi here!

Maa mi man minle noho wawan la lolo lour na'akeme mayo'o,

ono Hayakyak Makromon kopuredi mai lolo mi herne kalarne me'e,

la ai na'ahan wake'e ono nauroinedi nina lere alam ka nammori me'e."

<sup>13</sup> Lere nee lalapa onne nauroin nahenia sopoledi laa noho wawan ne, ai lan holo maeke man karuwana mo'onyiana onneni.

<sup>14</sup> Maa maeke onne lernala oprau man lapa liwarne woro'o herne waliwali leke nahaledi kemen nano nee lalapa onne. An liwar laedi noho mamun ma na'akenedi leke yon nee hi'i sus ai. Lolo onne Makromod Lalap ilitolle ai anna wokelu rehi.

<sup>15</sup> Onne horu, nee lalapa onne salowor oir namhara nuranne leke wau nodiyedie,

<sup>16</sup> maa noho pakuwedi maeke onne me'e, de hariyedi nuranne nawaledi oir salolowor onne.

<sup>17</sup> Enime'ede nee lalapa onne na'ahan wake'e maeke onneni, de laa noro maeke onne upun ananhe ra'ara. Ai upun ananhe onne ri man lernohi Makromod Lalap Nina keneri hono'ok, la ka ramka'uk ra'heni Jesus namwali hi Makromon.

<sup>18</sup> Nee lalapa onne namriri lolo herraram.

## 13

*Ha mormori man ailanna wake'e ida woku nano kahi raram*

<sup>1</sup> Ya'u po'on ha mormori man ailanna ida woku nano kahi raram, uluwakun wo'ikku la dudalle idaweli. Dudal onnenihe dohodoho nair rai nin karpuse, la lolo uluwakun wo'ikku onnenihe horok naran ma na'ihoru na'idaru Makromod Lalap.

<sup>2</sup> Ha mormori ya'u dodo'on onne po'on naise pusi lape, maa ein naise beruang ein, la

nuran naise singa nuran. Enime'ede nee lalapa onne nala nin ke'ke'e'l an'anha noro nin molollo man lapa laa ha mormori onne leke namwali rai.

<sup>3</sup> Enla lolo uluwakun wo'ikku onne, ya'u do'on dilaher lalap ida aile uluwakun man po'on naise ri nodi raa dadare, maa pasuwedi me'e. Ri lolo noho wawan akinhe nale, la na'akeme polletilu de lernohie.

<sup>4</sup> Hi ra'uli rasa'a nee lalapa onne ono ai nala nin molollo ha mormori onne, la hi ra'uli rasa'a ha mormori onne haenhi ra'heni, "Ri mahaku kaale ma narehi ma nalewen ha mormori eniyeni. Ri mahaku ka naruri na'ara noro ai ono nin molollo ma narehi ma nalewen aile."

<sup>5</sup> Makromod Lalap hurinohi ha mormori man ailanna onne wakunu kukulu lalap la na'ihoru na'idaru Ai Naran. Makromod Lalap hurinohi ai nodi molollo ri mormori na'akeme wollo weli'akka woro'o raramne.

<sup>6</sup> Ai na'ihoru na'idaru Makromod Lalap Naranne noro Nin miminbole, la wakunu nano'onyak ri man minle a'am raram.

<sup>7</sup> Rala leken ai haenhi haul ara noro Makromod Lalap Nin ri leke rehi ara. Rala molollo ai leke nodi molollo ri nano hair-hair, noho-noho, luhu-luhu, noro wanakunu na'akeme.

<sup>8</sup> Ri man minle noho wawan nammori rehi ra'uli rasa'a ha mormori onne, maa ri man lernohi Pipdumana man resnedi onne ka ra'uli rasa'e. Hi onne naran

horokedi lolo Nin *Horok Or'ori Dardari* me'e. Noho ka namwali makun, ri man lernala or'ori dardari ma kan horu enihe, naranhe aiyedi Nin horok onne raram me'e.

<sup>9</sup> Ende inhoi man derderne, loi honorok wawa'an!

<sup>10</sup> Makromod Lalap naledi kenekrohu nahenia hir kele man lernohi Yesus heruwali rodi laa bui raram, la kele heruwali rodi raa daresne.\*

Ende mi man lernohi Makromod Lalap mamkene kerhu lolo ha man apinha, la yono mi akim nado'o, maa na'amoli mi akim namkene naili'il Yesus mamani.

*Ha mormori ida woku nano noho wi'in*

<sup>11</sup> Ya'u po'on wali'ur ha mormori namehin woku nano noho wi'in, dudal woro'o naise pipdume du-dalle, maa lirna naise nee lalapa lirna.

<sup>12</sup> Ha mormori man kauli'ur onne namwali ha mormori dedesne nin man hemen. An lernala ha mormori dedesne onne nin molollo hi'i ri mormori noho wawan na'akeme ra'uli rasa'a ha mormori ma nina dilahé lapa aile uluwakun onneni.

<sup>13</sup> Ha mormori woro'o nine onne hi'i tanada lewlewen man hi'i ri polletilu. Lolo ri na'akeme kalarna, an hi'i aiye nadiyaur nano a'am mai noho wawan.

<sup>14</sup> An hi'i tanada man lewlewen onne nodi ha mormori dedesne nin molollo. Ai nodi tanada man lewlewen onne kokwudi ri mormori noho wawan, la hopon

hi na'akeme ra'ariri auk-erhida man po'on naise ha mormori dedesne man mormori makun kade rodi raa ra'ano'edi.

<sup>15</sup> Makromod Lalap huri-nohi ha mormori man woku nano noho wi'in onne nala aran aukerhida man po'on naise ha mormori dedesne onne, de aukerhe onne nau-roin wakunu la nodi molollo hopon resne ri ma ka na'uli nasa'a ai.

<sup>16</sup> An hopon nahenia ri mormori noho wawan na'akeme kokala ha mormori dedesne onne nin tanada. Tanada onne rala cap loile hi liman malanna me hi leren. Ende ri mormori na'akeme, tatana noro lalapa, man karu noro ma na'alehe haida-haida, la hophopon noro ri ma nadedem, kokala tanada onne.

<sup>17</sup> Lo'o tanada onne kan minle ri liman me leren, kar huri ai na'iwali, ee na'olu ha-haa ida, ono tanada onne ha mormori dedesne naranne me nin nomor.

<sup>18</sup> Loi honorok wawa'an leke mauroin tanada onne nin panaeku! Inhoi nin woroin aile, ai akinala hon-orok onne la nauroinnala ha mormori dedesne onne nin nomor nin panaeku. Nomor onne penia namwali tanada ma na'ono 'ri mormori'. Nomor onne rahu woneme welneme woneme (666).

## 14

*Pipdumane noro Nin ri*

<sup>1</sup> Onne horu, ya'u do'on haida wali'ur. Ya'u po'on

\* **13:10** Panaeku namehin: Inhoi nodi raa nesne ri, resne ai rodi raa haenhi.

Pipdumana namririri lolo wo'or Sion, noro wewerre Nin ri riwan rahu weli'akka wo'akka (144.000). Lolo hi leren horhorok Pipdumane Naranne noro Aman Naranne.

<sup>2</sup> Ya'u derne lira ida nano a'am raram naise oir rulu lapa wauwau noro noho dildila leape. Lira i dederne onne naise ri nammori maha ra'aromo kecapi.

<sup>3</sup> Ya'u po'on ri riwan rahu weli'akka wo'akka (144.000) onne ramririri rahinanara hanara worworu lolo Makromod Lalap Nin naikoronno kalarla la lolo ha mormori wo'akka roro ri leleher lalapa onnnenihe kalarla haenhi. Heri riwan rahu weli'akka wo'akka onnnenihe mehe rauroin wakuku hanara onne, ri namehin ka. Nano ri na'akeme lolo noho wawan, hi penia Pipdumaneni pairedi rir okon de huri we'eredi hi nano makmaki nin hunukum me'e.

<sup>4</sup> Hi kar lerwa'u hailai wake'e ono hi radiyaka kemen leke rira morimori moumou dewdewe. Hir lernohi Pipdumaneni laa ewi-ewi. Nano ri noho wawan na'akeme, An hi'iyedi hi ramwali Nin ri ono An pairedi rir okon me'e, leke hi ramwali honoi kanani man ma'aruru rodi rala Makromod Lalap noro Pipdumaneni.

<sup>5</sup> Hi ka rapoho wake'e, la kar hi'i yaksala ida.

*Hophopon a'am raram wokelu man loikaru Makromod Lalap Lirna*

<sup>6</sup> Ya'u po'on hophopon a'am raram ida wali'ur

liwar laa wawan wake'e. Ai nodi Makromod Lalap Lirna Wawa'an ma kan herre laa ewi-ewi eni. Ai naderre nadaul Lira Wawa'an onne laa ri man mori lolo noho wawan na'akeme: hair-hair, noho-noho, luhu-luhu, la wanakunu na'akeme.

<sup>7</sup> An wakau naruri na'ahenia, "Mamka'uk Makromod Lalap la ma'uli masa'a Oin Naran man kulu narehi man lap narehi, ono Nina lere alam ho'ok kail ri na'akeme rakanedi me'e. Hoikani Ai ono Ai penia ma nakuku noho la ma naleu a'am noro idewe lour la oir makan na'akeme!"

<sup>8</sup> Onne horu, hophopon a'am raram rewro'o nine man lernohi hophopon dedesne onne na'aheni, "Babel nadiporedi me'e! Kote man lalap wake'e onne nadiporedi la ri kan min lolo onne me'e, ono hi rakoko hair-hair yon peinohi Makromod Lalap. Manin Babel onne nori ri holi yaka leke yaka naise maekyak man nori ri nomun arak manha de holi diwar dawar!"

<sup>9</sup> Enime'ede hophopon a'am raram rewkelu nine lernohi hophopon woro'o onnnenihe nodi lirna naruri na'aheni, "Inhoi man hoikani ha mormori man ailanna onne noro nina aukerhe, la man lernaledi ha mormori onne nina tanada lolo ai leren me liman malanna,

<sup>10</sup> na'amoli ai nomun Makromod Lalap Nina arak nini'i ma naulinu nawali Nina ahan man werek wake'e. Nin ahan ma ka namdaru, naisa arak man ni'i ono kar wa'aha noro oire.

Ende Ai nodi aiye noro lali hi'i apinpinha ri na'akeme man lernohi ha mormori woro'o onne lolo hophopon a'am raram man moumou dewdewe noro Pipdumane kalarna.

<sup>11</sup> Aiye ma na'an hi onne mahun ha'a la wawan manani. Lelere a'alam rira apinpinha kan ren laa ewi-ewi, ono hir hoikaniyedi ha mormori noro nin aukerhe, la hir kokaledi nin tanada lolo hi leren me liman malanne me'e."

<sup>12</sup> Enpenia mi man lernohi Makromod Lalap yom mi akim nado'o. Lere mim lernala wewerek pananaka, ma'alap mi akim leke mamkene lernohi Makromod Lalap Nin keneri hono'ok la mi akim namkene naili'il Yesus.

<sup>13</sup> Onne horu i derne Lirida nano a'am raram na'ahenia, "Horokedi ha eniyeni: Nano lere eniyeni, ri man maki ono ramkene lernohi Makromod, hi akin nahuwa'anedi!"

Roh Kudus walha na'ahenia, "Namlolo! Hir warnedi nano rir honowok man werek onne me'e, la Makromod Lalap nauroinedi hi'ihehewi hi ramkene howok Nin honowok nair de naledi hi ma'urinrinna mauwarwara me'e."

*Ra'ili radai noho wawan ihin ennen*

<sup>14</sup> Onne horu, ya'u po'on wali'ur kakam wawarhida, la Ri ida naikokoro kakam onne po'on naise Ri Mormori Anan. \* An nair karpuse

mahe man rehi ara nine, la nasalsala sabit mololornida. Sabit onne nair rodi ra'ili radai.

<sup>15</sup> Kan mahala hophopon namehin ida namhara nano Makromod Lalap Nina Romleu Lape wakau naruri na'ahenia, "Modi Num sabit onne ma'ili madai here, ono lere alam na'ili nadai noho ihin ennen rakanedi me'e!"

<sup>16</sup> Kame'ede An wewhe nina sabit laa yawa idewe noho wawan ihin ennen ra'ili radaiyedi.

<sup>17</sup> Enime'ede ya'u po'on hophopon a'am raram namehin namhara nano Romleu Lape man aile a'am raram onne. Ai onne nasalsala sabite mololornida haenhi.

<sup>18</sup> Enla hophopon namehin ma nadedem hunuku aiye man aile honoi kanani onno namhara lolo onne. Ai napolu hophopon a'am raram ma nasala sabit onne naruri na'ahenia, "Wewhe numa sabite onne rosu anggur woi manina noho wawan here, ono woin aw'awar me'e!"

<sup>19</sup> Kame'ede hophopon onne wewhedi nina sabite laa noho wawan leke rosu anggur woin nano hananne, la ra'uk loile bak raram leke hamar. Bak rodi hamar anggur onne naulinu nawali 'Makromod Lalap Nin ahane!'

<sup>20</sup> Ende anggur woi rorosu onnenihe hamar lolo bak man aile kote paharne onne. Rara ma namhara lolo onne wau naise oir wauwau man roromne na'ikeki meter

\* **14:14** Dan. 7:13    \* **14:20** 'Na'ikeki meter woro'o' onne wanakunu Yunani na'aheni 'rakan kude nin tome.

woro'o\* la ko'unne na'ikeki  
kilu rahu wokelu.

## 15

*Hunukum wo'ikku man horu*

<sup>1</sup> Ya'u po'on tanada namehin lolo a'am raram man lewlewen wake'e man hi'i ya'u polletilu. Hophopon a'am raram wo'ikku rodi molollo leke hi'i ri mormori noho wawan lernala hunukum wo'ikku man horu enihe. Hunukum wo'ikku man kauli'ur onne horuwedi, Makromod Lalap ka na'ahan me'e.

<sup>2</sup> Enine ya'u po'on ha ida naise kahi lapa rodi kokaka hi'ie ma nawa'aha aiye aile raramne. Lolo kahi ma naise kokaka onne arkanne, ya'u po'on ri nammori ramririri. Ri onnenihe rehiyedi ara noro ha mormori man ailanna onne, ono hi ramhene hoikani ai noro nin aukerhe, la hi ramhene kokala nin tanada ma namwali nomor man herre ai naran onne. Man rehi ara onnenihe rasalsala kecapi man Makromod Lalap nanala hi eni.

<sup>3</sup> Hi rahinanara Musa, ma namwali Makromod Lalap Nin hophopon wahawan, nin hanara noro Pipdumana Nin hanara. Hanara onne lirna na'aheni,

"Makromod Lalap,

O penia ma nodi molollo ma narehi la ma nalewen!  
Om hi'i ha man lewlewen wake'e man hi'i mayai polletilu!

O mamwali Rai ma nodi molollo ri mormori noho wawan na'akeme!

Num hini'i na'akeme penia ha ma namdudu la ma namlolo.

<sup>4</sup> Makromod! Ri na'akeme lo'o ramka'uk O!  
Ri na'akeme lo'o wakunu Num ke'eke'el an'anha ma narehi la ma nalewen!

O mehe mamwali Makromod man Moumou Dewdewe.  
Na'amoli ri mormori noho wawan na'akeme mai ra'uli rasa'a O,  
ono hir do'onedi Numa hini'i wenewhe rahu ma namlolo me'e."\*

<sup>5</sup> Hi rahinara horu, ya'u po'on Makromod Nina Romleu Lape man aile a'am raram nin nike nahinariyedi. Rom onne wekel Makromod Lalap Nin Tenda haenhi.

<sup>6</sup> Hophopon a'am raram wo'ikku onnenihe rodi hunukum wo'ikku ramhara Nin Tenda mai paharne. Rira nainair wawarha ad'ada la irhun makan rodi kornelhe mahe pakpake.

<sup>7</sup> Hophopon a'am raram wo'ikku onne maiyedi paharn ne, ha mormori ida nano wo'akka onnenihe nala hi manuk mahe wo'ikku man penpenu noro Makromod Lalap Nin ahan. Makromod Lalap onne ik Makromod man mori laa ewi-ewi,

<sup>8</sup> la aiye mahu nano Makromod Lalap Nin siksika lerlere noro Nin ke'eke'el an'anha na'apenuwedi Nin Romleu Lapa onne. Kar huri ri mahaku laa Romleu onne raram

\* 15:4 Kel. 15:1

hehen nanumene hunukum  
wo'ikku man hophopon a'am  
raram rorodi onne horu.

## 16

*Hophopon a'am raram  
kolo manuk man ihin naulinu  
nawali hunukum wo'ikku*

<sup>1</sup> Ya'u derne Lira lapida  
nano Makromod Lalap Nina  
Romleu Lapa na'heni, "Lam  
koledi manuk wo'ikku onne  
ihin ma naulinu nawali  
Makromod Lalap Nina ahane  
laedi noho wawan!"

<sup>2</sup> Enine hophopon a'am  
raram dedesne lan koledi nin  
manuk ihin laa noho wawan.  
Ri man lernaledi ha mormori  
man ailanna onne nina  
tanada noro man hoikani  
nina aukerhe, na'akeme  
lernala wihul pohipohi man  
hi'i mahalarlarna ri.

<sup>3</sup> Hophopon a'am raram  
rewro'o nine koledi nin  
manuk ihin lolo kahi. Enime'ede  
kah i namwali rare  
ma naise ri man makiyedi  
rarna. Ha man mormori  
manina kahi raram enihe  
na'akeme maki horu.

<sup>4</sup> Hophopon a'am raram  
rewkelu nine koledi nin  
manuk ihin lolo oir  
wauwau noro oir makan  
na'akeme. Enime'ede  
na'akeme namwali rara.

<sup>5</sup> Kame'ede ya'u derne  
hophopon a'am raram ma  
nodi molollo oir na'akeme  
na'uli nasa'a Makromod  
Lalap na'henia,

"O mehe mamwali Makro-  
mod Lalap Man  
Moumou Dewdewe,  
man aile nano nonolu,  
la man Aile lere eni.

Hunukum man O mala laa  
noho wawan onne pe-  
nia ma namlolo la ma  
namdudu,

<sup>6</sup> ono ri lolo noho wawan  
onnenihe resnedi  
Num ri,  
la hir koledi Num nabi-  
nabi rarne!

Eni penia lere eni mala rara  
hi romun.

Num panaeku onne  
wa'an la namlolo."

<sup>7</sup> Ya'u derne wali'ur lira  
nano honoi kanani onno on-  
neni na'henia,

"Namlolo! Makromod Lalap!  
Num ke'ke'el an'anha  
ma narehi la ma  
nalewen na'akeme!  
Onum hunukum nam-  
lolo la namdudu!"

<sup>8</sup> Onne horu, hophopon  
a'am raram rew'akka nine  
koledi nin manuk ihin laa  
lere wawan, de nala molollo  
lere leke nodi hikanne  
harnedi ri mormori.

<sup>9</sup> Lere hikanne hi'i ri  
mormori na'akeme ramno'o  
horu la kemen apinpinha  
mamani, de hi ra'ihoru  
ra'idaru Makromod Lalap  
Oin Naranne. Hi rauroin  
Ai nodi molollo apinpinha  
onne, maa hi kar herre rir  
morimori ma ka namlolo  
la ramhene ra'uli rasa'a  
Makromod Lalap ma nodi  
molollo ma narehi nalewen  
na'akeme.

<sup>10</sup> Onne horu, hophopon  
a'am raram rewlima nina  
koledi nin manuk ihin lolo  
noho man ha mormori man  
ailanna onne nodi molollo.  
Idewe ri na'akeme man  
derne rakani ai minedi noho  
momohon, hi na'akeme  
ra'unihi namal ono kemen  
apinha wake'e.

<sup>11</sup> Enime'ede hir lokor hauk Makromod Lalap man aile a'am raram, ono hi kemen eren apipinha, maa ramhene herre rira morimori man ailanna onneni.

<sup>12</sup> Onne horu hophopon rewneme nine koledi nin manuk ihih laa oir wauwau ma naran Efrat eni. Idewe oir wauwau lalap onne namkisiyedi de ra'akenedi namwali kalla leke rai-rai roro rira ke'urauk nano noho-noho wali kimur mai lole.

<sup>13</sup> Enla ya'u po'on hayakyaka wokelu naise na'oi dil'or'ore. Dedesne nine namhara nano nee lalapa onne nuranne, rewro'o nine namhara nano ha mormori dedesne man ailanna onne nuranne, la ida wali'ur namhara nano nin henemen\* ma napoho nurane haehni.

<sup>14</sup> Hayakyaka wokelu onne hi'i ha man ri kan dodo'onnale makun. Hir laa rapolu rai-rai lolo noho wawan na'akeme maiwuku leke haul ara lapa. Hir hi'i ara rakan Lere Alam Lalap man Makromod Lalap Ma Nodi Molollo Narehi Nalewen Na'akeme niliyedi leke na'ahoruwedidi Nin arwali na'akeme.

<sup>15</sup> Makromod Yesus na'aheni, "Loi honorok wawa'an, ono mamlinnohi Ya'u mai naise ri ma namna'a de mamlinnohi mai! Rakan lere Ya'u mai eni, ri ma nadiyaka nin morimori wawa'an, ai akin nahuwa'anedi. Ende

madiyaka wawa'an naise ri ma ka namkuru mahal, maa nair nin nainair mamani leke lo'o pelek nala'a, yon nawawa ono nadlewlewhew!"

<sup>16</sup> Hayakyak onnenihe poluwuku rai-rai de hir maiwuku onnida man rodi wanakunu Ibrani rapolu 'Harmagedon'.

<sup>17</sup> Onne horu, hophopon rew'ikku nine koledi nin manuk ihih laa huilik loiloi kakam larlari. Enla ya'u derne Lir lapida namhara nano Makromod Lalap Nina naikoronno man aile nina Romleu Lap raramne na'ahenia, "Ha rahu na'akeme kukkuku noknokor me'e!"

<sup>18</sup> Idewe noho lerlere noro noho dildile mamani, la rururuwai man lapa wake'e. Nano noho namwali me'ede rakan lere onne ri kan dodo'onalra rururuwai man lap heheni makun!

<sup>19</sup> Lere onne Makromod Lalap kan hamlinu nahenia manin kota Babel onne hi'i dohohala nammori me'e. Ende An hi'i hi romun arak nini'i nano Nin manuk ma naulinu nawali Nin ahan man werek wake'e. Ende kota lapa onne napye'eredi namwali wokelu la kota-kota lolo noho wawan na'akeme woir horu.

<sup>20</sup> Lere onne me'ede noho noho keper mouwedi laa kahi raram, la wo'or-wo'or na'akeme kame'e!

<sup>21</sup> Okon es waku lapa man werek lo'o kilu wellima nadiyaur nano a'am mai

\* **16:13** Ha mormori man ailanna nin henemen ma napoho onne namnenehe ha mormori man ailanna ma namhara elimo'o onne. Po'on 13:11-17, 19:20, noro 20:10.

nalwalile ri mormori. Enpenia ri mormori lokor hauk Makromod Lalap ono nala hunukum man werek wake'e.

## 17

### *Kote Babel naho'ok naise maekyak*

<sup>1</sup> Hophopon a'am raram ida nano wo'ikku ma nasala manuk wo'ikku onnenihe, kopur mai ya'u na'aheni, "I wal'u, mai nanu! Ya'u kukul ki o hi'ihehewi Makromod Lalap lo'o hukum maekyake ma naran pe'eredi. Ai onne namwali kota lapa man aile lolo oir wauwau nammori wawan.

<sup>2</sup> Rai-rai lolo noho wawan na'akeme lernohi kota onne holi yak leke yak la hoikani aukerhe. Kote onne nori ri mormori na'akeme holi yak leke yak la hoikani aukerhe naise maekyak ma nori mo'oni romun arak leke manha de holi diwar dawar."

<sup>3</sup> Enime'ede Roh Kudus nodi molollo maya'u, la hophopon a'am raram onne nodi ya'u laa noho mamun ma napro'uk. Min lolo enne ya'u do'on maeke ida naikokoro ha mormori man mere mohmohon ida. Ha mormori onne kemen horhorok naran mamani. Naran onnenihe ra'ihoru ra'idaru Makromod Lalap Naran. Ha mormori onne uluwakun wo'ikku la dudalle idaweli.

<sup>4</sup> Maeke i dodo'on onne nair nainair au'au noro mere mohmohon la rodi mahe, mutiyare, noro waku man

wella ai wawan ra'akeki kemen na'akeme, la ai nasalsala manuk mahe man penpenu noro nonomun man luli la man hi'i rin mahalarna. Nonomun onne nauulinu nawali nin hini'i wenewhe man diwar dawar wake'e noro hini'i man morso man hi'i ri mahalarna.

<sup>5</sup> Lolo maeke onne leran horhorok panaeku ma nasinuwari na'ahenia,

KOTE LALAP, BABEL!

RI MAN HOLI YAK LEKE YAK  
NAAKEME INNA  
LA NOHO WAWAN NIN

DINIWAR DANAWAR ONNO.

<sup>6</sup> I do'on maeke onne man-hedi ono ai nomunedi rara nano Makromod Lalap Nin ri mememen nammori ma nodi Yesus Lirnenihe. Do'on maeke onne, ya'u polletilu la mehe kakaiyedi ya'u.

<sup>7</sup> Enime'ede hophopon a'am raram onne na'aheni maya'u, "Alhi'ihepe om polletilu la mehe kakaiyedi oe? Na'amolia ya'u konohi rir panaeku ma nasinuwari ki o. Panaeku onne na'ono maeke noro ha mormori man uluwakun wo'ikku la dudal idaweli onne.

<sup>8</sup> Nonolu eni ha mormori onne mori, maa ors eni moluwedi me'e. Ka nalo'ol me'e ai namhara nano Lo'o Lalap man roromne kar ho'oknala, mene lernala hunukum laa ewi-ewi. Ri mormori lolo noho wawan ma naranhe kaale lolo *Horok Or'ori Dardari*\* man aiyedi nano noho eni ka namwali makun, lo'o polletilu po'on ha mormori onneni, ono nonolu eni an mori, maa ors

\* **17:8** Lolo *Horok Or'ori Dardari* eni raram ri naran man lernaledi or'ori dardari ma kan horu horokedi me'e nano noho eni ka namwali makun. Po'onala 13:8.

eni kaale me'e, la lo'o hari wali'ur.

<sup>9</sup> Inhoi loi honorok wawa'an, ai lo'o nauroin ha ma nasinuwari eniyeni nin panaeku. Ha mormori uluwakun wo'ikku onne naulinu nawali wo'or wo'ikku man maeke onne naikorle. Uluwakun wo'ikku onne namwali rai wo'ikku haenhi, maa

<sup>10</sup> wolima makiyedi me'e, la ida mormori, la ida kan mai makun. Rakan lere an mai, ai nodi molollo, maa ka nalo'ol.

<sup>11</sup> Ha mormori man nonolu mori, maa ors eni moluwedi me'e onne namwali rai wo'aa nine. Maa ai onne namwali rai ida nano rai wo'ikku idedi onnenihe. Enla lere man horu eni an lernala hunukum laa ewi-ewi.

<sup>12</sup> Ha mormori dudal idaweli onne namwali rai idaweli, maa kar komdere makun. Lere hir kokala molollo leke ramwali rai, hi rodi molollo wewerre noro ha mormori onne, maa ka nalo'olo, lo'o jam ida mehe.

<sup>13</sup> Rai idaweli onnenihe rala keneckrohu wewerre nahenia rala rira molollo noro rira ruri ha mormori onneni.

<sup>14</sup> Hi ra'ara roro Pipdumanene, maa Pipdumaneni rehiyedi ara, ono Ai penia Makromon ma nodi molollo makromon na'akeme, la Rai ma nodi molollo rai na'akeme. Enla lere onne ri ma nornoro Pipdumaneni, hi ramwali Nin ri ma napoluwedi, la man niliyedi, la ma akin ramkene lernohi Ai haenhi."

<sup>15</sup> Hophopon a'am raram onne haul lira wali'ur

na'ahenia, "Oir wauwau nammori man maekyake naikokoro onnenihe, naulinu nawali ri mormori noho wawan na'akeme: ma nano hair-hair, noho-noho, luhu-luhu, la ma nano wanakunu na'akeme.

<sup>16</sup> Rakan ler ida ha mormori noro idewe rai idaweli onnenihe kar suk maekyaka onne me'e, de rore ra'ara. Hi rahoredi nin nainair, ra'anedi ihin heruwali, la harnedi kemen rehin.

<sup>17</sup> Hir hi'i heheni ono Makromod Lalap hi'i hi lernohi Nin raram nodi me'e. Onneni penia rai onnenihe rala rira molollo ha mormori onneni. Hir derne rakani ha mormori onne hehen nanumene Makromod Lalap Nin panaeku na'akeme kuku nokoredi.

<sup>18</sup> Maekyak man om dodo'on onne naulinu nawali kota lalape ma nodi molollo komdere rai noho wawan na'akeme."

## 18

*Kote Babel lernala hunukum*

<sup>1</sup> Horu ne ya'u po'on hopon a'am raram namehin ida kopur nano a'am raram. An mai ne, nodi molollo man rehreh lewlewen la Nin sik-sik lerlere na'aropedi noho wawan.

<sup>2</sup> An wakau naruri na'ahenia,

"Babel nadiporedi me'e! Kote lape onne nadiporedi me'e! Ri mahaku kan min lolo onne me'e, la lere eni nediyomon ahuwain noro hayakyak-hayakyak man ailanna mamani suwsuwar

lolo onne. Manu liwliwar man hi'i mahalarlarna ri suwsuwar lolo onne haenhi.

<sup>3</sup> Kote Babel onne nadiporedi ono nin ri ken patal ri nano hair-hair na'akeme holi yak leke yak la hoikani aukerhe, naise maekyak ma nala nonomun mo'on'i leke romun manha de hailai noro ai. Rai-rai lolo noho wawan lernohi rir hini'i wenewhe haenhi, la ri na'akeme ma na'iwali noro ma na'olu hahaa lolo noho wawan na'akeme karu ono ri man minle Babel raram nodi weli hahaa man wella ai wawan mamani."

<sup>4</sup> Onne horu ya'u Derne Lir namehin ida nano a'am raram na'aheni,

"Eih, mi man lernohi Ya'u!  
Mamharedi kota onne here,  
kalo'o lernohi ne'en raramne rira dohohala,  
la lernala hunukum man werek ma nano'onyak hi,

<sup>5</sup> ono hirira dohohala  
nammori rehi rahupu  
kulunne rakanedi  
a'am raram me'e.

Enla Makromod Lalap horhorok rir yakyak salsala onne na'akeme, de na'akene nala hunukum hi me'e.

<sup>6</sup> Ende na'amoli An herre walhedi kota onne namnenehe kota onne hi'i wewhedi ri namehin me'e.

Na'amoli An herre walha kota onne nin hini'i man ailanna onne rewro'o,

la na'akenedi nonomun man meru nala kota onne ma naruri rewro'o narehi ai nala ri namehin.

<sup>7</sup> Babel ne'en raram onnenihe mori naise maeke ma na'akeki kemen herlei wake'e, la hi'i wewhe inhawa-inhawa man ai raram nodi aimehi.

Enpenia hi'iyedi apinpha la sus hi me'e,  
ono hir holi kukulu lalap ra'aheni, 'Ai modi molollo naise rai maeke,  
ai ka mamwalum, la kam lernala sus mak oire.'

<sup>8</sup> Ende lolo lerida raram mehe kota Babel ne'en raram onne lernala apinpinha wo'operperi.

Ende Makromod Lalap nala kini'ir, sus mak oire, noro roulare hi, noro idewe aiye ma na'an kota onne, ono Ai man ho'ok kail hi nodi molollo ma narehi ma nalewen."

<sup>9</sup> Rai lolo noho wawan na'akeme man lernohiyedi kota Babel, de holi diwar dawar la lernohi rir suk aimehi, rakan lere onne hi rahere la akin woir ono hir po'on aimahu nano aiye ma na'an kota onne.

<sup>10</sup> Hi ramka'uk hunukum onne, de ramririyedi ko'ko'u, rahere ra'aheni, "Idei! Kote Babel man lapa onne! Mayo'o wake'e! Lolo jam ida mehe an lernaledi hunukum!"

<sup>11</sup> Ri ma na'olu hahaa na'akeme sus mak oir rehi la ra'adididi, ono hir po'on kota lapa Babel onne nadiporedi. Hir sus ono kota ne'en raramne kar weli rira hahaa warna-warna me'e, naise:

<sup>12</sup> mahe, pere, waku man wella ai wawan, mutiyare, nainair man ma'aruru rodi tapi man wella ai wawan hihi'ie, tapi memere, noro tapi au'au. Hirira hahaa rodi au wala'ula'u hihi'ie, hahaa rodi leli ihi hihi'ie, au man wella ai wawan, pesi, pirmere, noro waku marmér.

<sup>13</sup> Au ulik ma namina noro rampa-rampa namehin aile, ha man wola'ula'u, naise kemenyan noro mur. Rir anggur noro wuru, gandum noro oke aile. Hirira sapi noro pipdume, kude noro kerete, la hi ra'olu ri ma namwali hophopon, (nam-lolo, hi ra'olu rimorimori haenhi).

<sup>14</sup> Ma na'olu hahaa enihe, hi akin woiredi ono Babel nadiporedi me'e de rahere ra'heni,

"Hahaa man ma'aruru mi raram nodi onne na'akeme, kame'el.

Hahaa ma namwali minim linikir kanaru noro hahaa rodi ra'akeki mi kemenhe molu mouwedi me'e."

<sup>15</sup> Ri ma na'oluwedi hahaa namansa lolo kota onne de karuwedi me'ene, ramriri ko'u ono ramka'uk aiye na'an hi haenhi. Hi rahere la sus mak oir mamani,

<sup>16</sup> la ra'heni,

"Idei! Idei! Kote lap eni nadiporedi me'eee!

Nonolu ai onne naise rai maeke man nair nainair man ma'aruru rodi tapi man wella ai wawan hihi'ie,

la nair nainair rodi tapi memere, tapi au'au hihi'ie,  
la nodi mahe noro pere, waku man wella ai wawan, noro mutiyara ra'akeki kemen,

<sup>17</sup> maa jam ida mehe nina linikir kanaru na'akeme onne, molu mouwedi!"

Ri ma nanoin kelen aran noro rira hehewek nanair lolo lour nine, ma namwali uluwakun kapal, man howok kapal, me man ha'anohi kapal, na'akeme ramriri ko'u.

<sup>18</sup> Hir po'on aiye ma na'an kota onneni mahun ne, wakau ra'heni, "Eih! Lolo noho wawan kota rahu ka naise kota lape onneni!"

<sup>19</sup> Hir wahair apu uluwakun, sus mak oir mamani, la ra'adidi ra'heni, "Idei! Idei! Kote lalapa onne mayo'o'edi me'eee! Nonolu man manarna kapal na'akeme karu horu nano ihin ennen rahue! Maa jamida mehe ha rahu na'akeme moluloinedi!"

<sup>20</sup> Ya'u derne Lir nano a'am raram wali'ur na'heni,

"Manin a'am raram na'ahoru, mi akim nahuwa'anedi here, ono Makromod Lalap na'apo'oredi kota Babel me'e.

Ende mi ma namwali Nin ri, roro hophopon ma nodi Lir Wawa'an eni, roro idewe nabi-nabi man loikaru Makromod Lalap Lirna Wawan enihe, mi akim nahuwa'anedi here,

ono Makromod Lalap  
naledi hunukum kota  
Babel herre walhedi  
riria hini'i wenewhe  
man yak ki mi me'e."

<sup>21</sup> Onne horu, hophopon  
a'am raram man lewlewen  
ida kikan waku lapida wakal  
laa kahi raram na'aheni,  
"Kote lap Babel onne,

Makromod Lalap nodi  
rurilai na'akeperedi  
naise waku onne  
wakaledi laa kahi  
raram de kak do'on  
me'e.

<sup>22</sup> Ri ma nauroin na'aromo  
kecapi, ma nahinara,  
ma nou poloit, la ma  
nou kowuri  
kaale lolo kota onne  
me'e.

Ri ma nauroin howok  
lewlewen ida naise  
nayapi nakar kaale  
lolo onne,  
la maeke ma nodi waku kuku  
kele'uk kame'el.

<sup>23</sup> Ri kan lokon wadu mori  
lolo kota Babel me'e.  
Ri kan hi'i yapi hohoo me'e.

Makromod Lalap hukum  
kota Babel naise on-  
neni  
ono nin ri ma na'olu  
hahaa enihe hi naran  
pe'eredi lolo noho  
wawan.

Hi rodi rir woroin hi'i u'ur  
leher kokwudi ri mor-  
mori na'akeme lolo  
noho wawan.

<sup>24</sup> Babel nin ri penia resnedi  
Makromod Lalap Nin  
ri roro man loikaru  
Makromod Lirna  
Wawan enihe.

Namlolo! Hi mehe resnedi  
ri na'akeme lolo noho  
wawan man resnedi  
nonolu eni."

## 19

*Manin a'am raram rahi-  
nara, "Haleluya," ono Babel  
nadiporedi me'e*

<sup>1</sup> Hophopon a'am raram  
ma naruri onne wakunu  
horu ne, ya'u derne ri nam-  
mori lirna nano a'am raram  
wakau ra'aheni,

"Haleluya! Mai ka'uli kasa'a  
ik Makromod!,

ono Ai penia ma nala  
or'ori dardari ma kan  
horu maika,

Ai namwali Makromod  
Lalap man kulu narehi  
lap narehi,  
la ma nodi molollo laa  
ewi-ewi!

<sup>2</sup> Ainina hono'ok kanail pe-  
nia ma namdudula ma  
namlolo!

Ai naledi hunukum maekyak  
lalapa onne me'e,  
ono ai nano'onyaka noho  
wawan nodi nina hon-  
oli diniwar danawar,  
la nesne Makromod  
Lalap Nina hophopon  
wahwahan enihe."

<sup>3</sup> Ya'u derne wali'ur lir rahu  
onne ra'aheni,  
"Haleluya!

Aiye ma na'an kota lalap  
onne mahun kan ren  
laa wawan laa ewi-  
ewi."

<sup>4</sup> Enime'ede ri leleher lalap  
werro'o wo'akka roro ha  
mormori wo'akka enihe wali  
yawa rahinononow ra'uli  
rasa'a Makromod Lalap ma  
naikoro Nin naikoronno  
onneni ra'aheni,  
"Namlolo! Haleluya!"

*Pipdumana Nina yapi*

<sup>5</sup> Onne horu ya'u derne  
Lira nano naikoronno onne  
wakau na'ahenia,

"Mi na'akeme ma namwali  
 Nin hophopon wah-  
 wahan ma namka'uk  
 Makromod Lalap,  
 Ma'uli masa'a Ai!  
 Mi na'akeme, man anulu  
 panulu noro man lolo  
 yawa,  
 ma'uli masa'a Ai."

<sup>6</sup> Horu ne, ya'u derne lirida  
 naise ri nammori wakaukau.  
 Rir wanakau onne naise oir  
 wauwau nammori neknekir,  
 la naise noho dildila lape. I  
 derne hi ra'aheni,  
 "Haleluya! Ka'uli Kasa'a

Makromod Lalap  
 ono Ai penia namwali  
 Rai Ma Nodi Molollo  
 Ma Narehi Ma  
 Nalewen!

<sup>7</sup> Ik akin nahuwa'anedi here,  
 mai ka'uli kasa'a Ai Oin  
 Naran man kukulu  
 lalap eni!,

ono Pipdumana Nina  
 lere alam hohoo rakan  
 dawakedi me'e,

la Nina maeke namkenedi  
 leke ho noro Ai me'e,  
<sup>8</sup> de an nair nainair lenan  
 man mamamal, man  
 mou, la man ad'ada."

(Nainair lenan onne  
 penia naulinu nawali  
 Makromod Lalap Nina  
 ri mememen rira hini'i  
 wenewhe ma namlolo  
 enihe.)

<sup>9</sup> Enla hophopon a'am  
 raram onne na'aheni maya'u,  
 "Horokedi lira eniyeni:  
 Ri man Pipdumana polu  
 lariyala laa Nina yapi  
 hohoo onneni, akinhe  
 nahuwa'anedi me'e."

Ai na'uwali lira wali'ur  
 na'ahenia, "Horok eni penia  
 Makromod Lalap Lirna ma  
 namlolo."

<sup>10</sup> Kame'ede ya'u laedi  
 yawa lolo hophopon onne  
 kalarna leke hoikani ai,  
 maa ai na'aheni, "Yono!  
 Yom hoikani ya'u! Hoikani  
 Makromod Lalap mehe.  
 Ya'u eni man howok Makro-  
 mod Nina honowok naise  
 o moro wallumhe man  
 loikaru Makromod Lalap  
 Lirna Wawan man Yesus  
 konohiyedi mi me'eni. Ma'uli  
 masa'a Makromod Lalap  
 mehe, ono ik na'akeme  
 konohi ri Makromod Lalap  
 Lirna Wawan man Yesus  
 konohiyedi maika me'e  
 namnenehe nabi-nabi  
 loikaruwedie nonolu eni."

*Ri ma naikoro kuda  
 wawarha rehiyedi ara Nin  
 arwali*

<sup>11</sup> Ka nalo'olala, ya'u po'on  
 a'am raram nahinariyedi.  
 Ya'u do'on kude wawarhida  
 aile. Ma naikoro kuda onne  
 naran 'Ma Namkene Hi'i Nin  
 Nou' la 'Ma Namlolo' ono Ai  
 nodi aki ma namdudu ho'ok  
 kail ri, la hi'i ha ma namlolo  
 mamani lolo ara.

<sup>12</sup> Makan naise ai lere la  
 lolo uluwakun karpuspus rai  
 nin karpusa nammori. Lolo  
 kemen horhorok Naran ida  
 ai mehe nauroin.

<sup>13</sup> Nainair An nanair onne,  
 rala kounedi rara me'e, la hi  
 rapolu Ai 'Makromod Lalap  
 Lirna Wawan.'

<sup>14</sup> Ma nasala ke'urauk lolo  
 a'am raram nammori ler-  
 nohi Ai ha'a kuda wawarha  
 mamani, la na'akeme nair  
 nainair lenan wawarha man  
 mamamal la man moumou.

<sup>15</sup> Raa mololornida  
 namhara nano Ai ma nair  
 nainair rare mamani onne  
 nuranne. Ai nodi raa onne  
 rehiyedi ara noro hair-hair

lolo noho wawan, la namwali Rai ma nodi molollo rehiyedi wonokon mermere. An rehiyedi ara la hamaredi Nin arwali naise rin hammar anggur woi lolo bak raram. Nin hini'i onne naulinu nawali Makromod Lalap Ma Nodi Molollo Ma Narehi Ma Nalewen Nin ahan man werek wake'eni!

<sup>16</sup> Horhorok naran aile Nina rain man sorsoru, la aile pahpaharne ma na'heni:

**RAI MA NAREHI RAI NA'AKEME!**

**MAKROMOD MA NAREHI  
MAKROMON NA'AKEME!**

<sup>17</sup> Onne horu ya'u do'on hophopon a'am raram ida namriri lere wawan. An wakaukau naruri napolu manu liwliwar ma nadedem ra'an ha mormori man maki ihin kemen na'heni, "Maiwuku leke lernohi yapi lapa man Makromod Lalap hihi'i eni.

<sup>18</sup> Mai mo'on rai-rai roro uluwakun ara ihin kemenhe, mo'on ma nasala ke'urauk man lewlewen ihin kemenhe, mo'on kuda noro ma naikoro kuda ihin kemenhe. Mai mo'on ri mormori na'akeme ma namwali anulu panulu me man lolo yawa, noro ma namwali marna me ma namwali hophopon ihin kemenhe."

<sup>19</sup> Ya'u do'on ha mormori man ailanna onne, noro rai-rai lolo noho wawan, roro rira ma nasala ke'urauk enihe lawuku ramkene ra'ara roro Ai ma naikoro kuda wawarha onneni noro Nina ma nasala ke'urauk enihe.

<sup>20</sup> Kame'ede Ai ma naikoro kuda onne keledi ha mormori man ailanna noro nin henemen. Hir mormori

makun, maa Ai nodi hi laa sopoledi kahi aiye noro lali ma kan maki laa ewi-ewi raram. (Henemen onne penia ma nodi ha mormori ailanna onne nin molollo hi'i tanada man ri kan dodo'onnala makun. Nonolu ai onne wukupoho ri na'akeme man kokaledi ha mormori onne nin tanade noro man hoikaniyedi nin aukerhe me'e.)

<sup>21</sup> Horu ne, Ai ma naikoro kuda onne nodi raa ma namhara nuranne nesne mouwedi rir ma nasala ke'urauk enihe, la manu liwliwar na'akeme mai ra'an ihin kemenhe.

## 20

*Kristus nodi molollo lolo noho wawan anna riwan ida*

<sup>1</sup> Onne horu, ya'u po'on hophopon ida kopur nano a'am raram nasalsala dasla lalapida noro konse man hari nike Lo'o Lalap man roromne kar ho'oknala onne.

<sup>2</sup> Hophopon onne kele nee lalapa man hi rapolu 'Nee Nonolu eni,' man waki 'Hayakyak Makromon,' me 'Setan' haenhi. An dasledi ne,

<sup>3</sup> sopoledi laa Lo'o Lalapa onne raram, la konsedi nina nike leke yon wukupoho hair-hair lolo noho wawan hehen nanumene anna riwan ida horu. Makromod Lalap naledi keneckrohu me'e nahenia anna riwan ida horu huriyale tarana wali'ur.

<sup>4</sup> Ya'u po'on rai-rai rir naikoronno wali'ur la ma naikokoro lolo onno onnenihe rodi molollo ho'ok kail ri. Ya'u po'on ri hamaran man nonolu

uluwakunhe pekuwedi ono hi ka ramka'uk konohi ri Yesus Lirna Wawa'an noro Makromod Lalap Lirna Wawan eni. Hi ramhene hoikani ha mormori man ailanna onne noro nin aukerhe, la kar kokala nin tanada lolo hi liman me hi leren. Ende hir moriyedi wali'ur me'e, la roro Kristus rodi molollo wewerre anna riwan ida raram.

<sup>5</sup> Lere onne penia lere dedesne ri man makiyedi ra'amori wali'ur. Maa anna riwan ida horu mene ri namehin man maki ra'amori wali'ur.

<sup>6</sup> Ri man Makromod Lalap na'amori wali'ur lere dedesne onnenihe, akinhe nahuwa'anedi la hi mehe ramwali Nina pipi unulu wawi tanma'a man moumou dewdewe. Makmaki rewro'o nine ka nodi molollo hi me'e, maa hi ramwali imam-imam man ilitolle Makromod Lalap noro Kristus, la roro Kristus rodi molollo wewerre anna riwan ida raram haenhi.

### Hukum Makromon      Hayakyak

<sup>7</sup> Anna riwan ida horu, hophopon a'am raram ida huriyedi Hayakyak Makromon nano dasleni.

<sup>8</sup> Enine ai namhara Lo'o Lalap onne laa noho pa'i'ik rai pakakar wukupoho ri mormori lolo hair-hair na'akeme man rapolu 'Gog', noro 'Magog.' Hayakyak Makromon wukupoho hi leke lawuku ra'ara. Hi eniyenihe lawukuwedi ne, kar akinalahe.

<sup>9</sup> Hi ramhara noho pa'i'ik rai pakakar maiwuku lupurala kote man Makromod Lalap nararamyakeni. Lolo kota onne Nin ri mai wukuwedi me'e, maa haida ka namwali Nin kota eni ono aiye kopur nano a'am mai na'an mouwedi man mai ra'ara onnenihe.

<sup>10</sup> Enla Hayakyak Makromon man wukupohedi hi onne sopol laedi kahi man aiye noro lali mormori eni. Lolo kahi onne, ha mormori man ailanna onne noro nin hemen men ma napohe aiyedi me'e. Wokeluhe lernala apinpinha lelere a'alam rakan laa ewi-ewi.

### Hunukum man horu

<sup>11</sup> Onne horu, ya'u po'on naikoronna wawarha lapida, la ya'u po'on Ai ma naikorole, la ya'u po'on a'am noro noho wawan idewe moluloinedi nano Ai kalarne me'e.

<sup>12</sup> Ya'u po'on ri man makiyedi na'akeme, ma na'ono noro man lolo yawa, ramririri aile naikoronna onne kalarne. Horok na'akeme man horokedi ri na'akeme rir hinin'i wenewhe hariyedi, la horok namehin man wekel *Horok Or'ori Dardari* hariyedi haenhi. Makromod Lalap naho'ok nakailedi ri man maki na'akeme enihe namnenehe noro rira hini'i wenewhe man horokedi aile horok raram eni.

<sup>13</sup> Enla ri man maki lolo lour, la man maki lolo ro man aiyedi Makmaki Onno onne, hi na'akeme ramririri naikoronna onne kalarne leke ho'ok kail hi namnenehe

noro rira hini'i wenewhe haenhi.

<sup>14</sup> Makmaki noro Makmaki Onno sopol laedi kahi man aiye mormori raram, la Hunukum eni namwali makmaki rewro'o nine.

<sup>15</sup> Enla ri na'akeme ma naran kaale lolo *Horok Or'ori Dardari* onne, hir sopol laedi kahi man aiye mormori raram haenhi.

## 21

### *Noho worworu noro a'am worworu*

<sup>1</sup> Onne horu, ya'u po'on wali'ur a'am noro noho wawan man worworu. A'am noro noho wawan dedesneni moluwedi me'e, la ka'u do'on lour me'e haenhi.

<sup>2</sup> Enla ya'u po'on kota Yerusalem Worworu man moumou dewdewe namhara a'am raram kopur nano Makromod Lalap. Kote onne ra'akenedi me'e, de po'on ma'aruru naise maeke man ra'akekeki nair nainair man ma'aruru ono namkenedi noro mo'oni ho,

<sup>3</sup> la ya'u derne Lira naruri nano Nin naikoronto onne ma na'heni, "Makaniyala! Ler eniyeni me'ede Makromod Lalap namkenedi holi wewerre noro ri morimori. Ai namkene holi wewerre noro hi, la hi ramwali Nin ri. Makromod Lalap mehen minwuku noro hi, la namwali hi Makromon.

<sup>4</sup> Ai na'akisi rir mak oir na'akeme, la ri kan maki, ri akin kan woir, ri ka nahere, la ri ka nakni'ir me'e ono apinha rahu onne noho lo'olo'ol nine de moluloinedi me'e."

<sup>5</sup> Ai ma naikoro naikoronto onne na'heni wali'ur, "Po'onale! Lere eni ha rahu na'akeme Ya'u hi'i worworu." An hopon maya'u na'henia, "Horokedi ha eniyenihe ono wanakunu eni na'akeme namlolo la namwali kokkoo."

<sup>6</sup> Kame'ede Ai na'heni wali'ur, "Ya'u hi'i ha rahu horuwedi me'e! Ya amwali Alfa la Omega,\* Man Dedesne la Man Horu. Inhoi man marou, Ya ala oir hi nano oir makan ma nala or'ori dardari ma kan horu eni. Oir onne Ya ala me'e, ka apanak mim pair.

<sup>7</sup> Inhoi man rehiyedi ara noro Hayakyak Makromon ono ramkene lernohi Ya'u, hir kokala ha wo'ira na'akeme man wa'an onne, la Ya amwali rir Makromod Lalap, la hi ramwali Ya an'u.

<sup>8</sup> Maa, ri ma namka'uk lernohi Ya'u, ma akin ka namkene naili'il Ya'u, man hi'i hini'i ma kan lolo ri raram, ma nesne ri, man holi yak leke yak, man hi'i u'ur leher, man hoikani lernulu aukerhe, la ma napoho, hi na'akeme Ya'u sopol laedi kahi man aiye noro lali mormori eni. Onne makmaki rewro'o nine."

### *Yerusalem Worworu*

<sup>9</sup> Lere onne hophopon a'am raram ida nano wo'ikku ma nasaledi manuk man penpenu noro Makromod Lalap Nin hunukum wo'ikku man horu onne, mai na'heni, "Mai eni leke ya'u kukul maeke man ho noro Pipdumaneni ki o."

\* **21:6** Po'onala catatan kaki ma aile 1:8.

<sup>10</sup> Enime'ede Roh Kudus nodi molollo maya'u, la hophopon onne nodi ya'u laa wo'or ida man kulu narehi. Min lolo onne an kukul maya'u Kota Yerusalem man moumou dewdeweni kopur nano a'am raram nano Makromod Lalap.

<sup>11</sup> Makromod Lalap Nina siksika lerlere hi'i kota onne siksika lerlere, la ad'ada naise deli waku man ma'aruru, waku yaspis, noro kokake man mou wake'e.

<sup>12</sup> Kota onne nina lukur lapa man kulu eni nina nike idaweli woro'o, la dohodoho nin hophopon a'am raram radiyakyake. Lolo nike enihe horhorok luhu Israel idaweli woro'o enihe naran.

<sup>13</sup> Ende lolo kote waliwali nike idaweli woro'o aile, lolo wali kimur wokelu, wali warak wokelu, wali ra'i wokelu, la wali karanna wokelu.

<sup>14</sup> Lukur lapa man kulu onne ra'ariri lolo waku na'a'ar idaweli woro'o, la lolo waku na'a'ar onnenihe horhorok hophopon ma nodi Pipdumana Lirna Wawa'an idaweli woro'o eni naranhe.

<sup>15</sup> Hophopon a'am raram man wakunu noro maya'u onne nasalsala au ke'ke'en mahe, leke nodi ho'ok kota onne noro nina nike noro nin lukur lapa man kulu enihe.

<sup>16</sup> Kota onne narunne noro paharin namnenehe. An ho'ok kota onne ne, narunne stadia riwan idaweli woro'o (kilu 2.200), la paharin noro kulunne namnenehe noro narunne.

<sup>17</sup> Mai an ho'ok lukur

lapa onneni, hophopon a'am raram onne nodi ri morimori nin hono'okne, la lukur onne kulunne<sup>†</sup> limhi'u rahu weli'akka wo'akka (meter 65).

<sup>18</sup> Kota nin lukur lapa onne rodi waku yaspis hihi'ie, la kota onneni rodi maha ihi hihi'ie penia po'on naholoredi waliwali naise kokake.

<sup>19</sup> Waku na'a'ar idaweli woro'o onnenihe rodi waku man ma'aruru la wella ai wawan ra'akekie. Waku idaweli woro'o enihe ra'akeki heheni:

waku na'a'ar dedesne rodi waku mokmoke wekel waku yaspis,

woro'o nine rodi waku mokmoke naise oir man rorom wekel waku nilam,

wokelu nine rodi waku mokmoko wekel waku mirah,

wo'akka nine rodi waku mokmoke naise penek wekel waku zamrud,

<sup>20</sup> wolima nine rodi waku memere ma nawa'aha noro wawarhe wekel waku unam,

woneme nine rodi waku mere mohmohon wekel waku sardis,

wo'ikku nine rodi waku mamarre wekel waku ratna cempaka,

wo'aa nine rodi waku mokmoke wekel waku beril,

wohii nine rodi waku mamarre ma naise kokaka wekel waku krisolit,

idaweli nine rodi waku mokmoke naise mu'u kawin wekel waku krisopras,

<sup>†</sup> 21:17 ee, ma'awalne

idaweli ida nine rodi waku  
mok au'au wekel waku  
lasuardi,

la idaweli woro'o nine  
rodi waku au'au man  
mou naise kokaka wekel  
waku kecubung.<sup>‡</sup>

<sup>21</sup> Nike idaweli woro'o  
onnenihe dohodoho rodi  
mutiyara lapida hi'ie. Kalla  
lapa man aile kota onne rodi  
mahe ihi hi'ie penia ad'ada  
naholoredi waliwali naise  
kokake.

<sup>22</sup> Ka'u do'on Makromod  
Lalap Nina Romleu lolo  
kota onne, ono kote raram  
na'akeme namwali Romleu  
rodi ra'uli rasa'a Makromod  
Lalap ma nodi molollo ma  
narehi ma nalewen noro  
Pipdumana onneni.

<sup>23</sup> Lolo kota onne lere noro  
wollo kaale, ono Makromod  
Lalap Nin siksik lerlere mehe  
na'aropo kota onne, la Pip-  
dumana onne namwali nin  
wadu haenhi.

<sup>24</sup> Hair-hair na'akeme lalaa  
mamai lolo kakan onne, la  
rai-rai lolo noho wawan rodi  
rira linikir kanaru laa kota  
onneni.

<sup>25</sup> Lukur lapa nina nike  
enihe nahinari mamani, kar  
elek me'e, ono a'alam kaale  
me'e.

<sup>26</sup> Hi na'akeme rodi rira  
honoor hanawe noro rir  
linikir kanaru laa kota onne.

<sup>27</sup> Ri ma naran horhorok  
aile Pipdumana Nina *Horok*  
*Or'ori Dardari*<sup>§</sup> meher lalaa  
mamai lolo kote raram onne,  
maa ri man hi'i ha man  
morso, hoikani aukerhe, ee

wukupoho ri kar laa kota  
onne raram.

## 22

*Oir wauwau ma nala  
or'ori dardari*

<sup>1</sup> Onne horu, hophopon  
a'am raram onne kukul  
maya'u oir wauwau man  
mou naise kokake. Oir ma  
nala or'ori dardari onne  
wauwau nano Makromod  
Lalap noro Pipdumana Rira  
naikoronna onnenihe,

<sup>2</sup> laa wauwau lolo kalla  
lapa toro man aile Kota  
onne. Lolo oir waliwali,  
au'ono man woin ma nala  
or'ori dardari ri aile. Au'ono  
onnenihe wollo ida woi  
raram, de anna ida woi  
rewen idaweli woro'o, la  
kawin namwali awa'ar man  
hair-hair lolo noho wawan  
nair rodi rala ruri pe'el hi  
kemen.

<sup>3</sup> Ri mahaku me haida-  
haida man Makromod Lalap  
lokoredi, kar huri minle Kota  
onne raram.

Enla Makromod Lalap  
noro Pipdumane Rir naiko-  
ronno aile kote raram, la  
Nina hophopon wahwahan  
enihe ra'uli rasa'a Ai lolo  
onne.

<sup>4</sup> Hi meher po'on Makro-  
mod Lalap oin makan la Ai  
Naranne horhorok hi leren.

<sup>5</sup> Lolo onne a'alam kame'el,  
de kar nair wadu noro lere  
me'e, ono Makromod Lalap  
mehe na'aropo Kota onne.  
Makromod Lalap Nin ri  
enihe rodi molollo laa ewi-  
ewi.

<sup>‡</sup> **21:20** Horok Lapa, BIS 'Bahasa Indonesia Sehari-hari' wekel waku enihe naran  
heheni: 1-baiduri pandan, 2-nilam, 3-yakut, 4-zamrud, 5-baiduri sepat, 6-de-  
lima, 7-ratna cempaka, 8-pirus, 9-topas, 10-krisopras, 11-lasuardi, 12-kecubung.

<sup>§</sup> **21:27** Po'onala 3:5.

*Yesus Nin mamai eni*

<sup>6</sup> Enla hophopon onne na'aheni maya'u, "Wanakunu Lirna na'akeme om dedereni namlolo la na'akeme namwali kokkoo. Makromod Lalap man konohi Nina nabi-nabi inhawa namwali lere man mai, Ai penia hopon Nin hophopon a'am raram mai leke kukul Nin hophopon wahwahan enihe inhawe ma ka nalo'ol me'e namwali."

<sup>7</sup> Yesus na'aheni Nin ri na'akeme, "Makaniyala! Ka nalo'ol Ya'u mai me'e, la ri man derne nakani wanakunu Ya alahariyedi lolo Horok raram eniyeni, hi akin nahuwa'an wake'e!"

<sup>8</sup> Maya'u, Yohanis, mehe do'on la derne ha eniyeni na'akeme horu, la'u kadi i e'u korno hophopon man kukul hahaa onnenihe kalarna leke hoikani,

<sup>9</sup> maa ai namhene la na'aheni, "Yom hoikani ya'u! Ya'u me'ene, ya amwali hophopon haenhi naise o moro wallumhe ma namwali nabi-nabi, la noro ri na'akeme man derne nakani nounaku man aile Horok eni! Hoikani Makromod Lalap mehe!"

<sup>10</sup> Ai na'aheni wali'ur, "Yono suwar Horok eni Lirna man Makromod Lalap nalhariyedi me'eni, ono ka nalo'ol me'e ha eniyenihe namwali.

<sup>11</sup> Ri man ailanna la ma akin morso na'amoli hir hi'i memmelollo rir suk aimehi mamani, maa mi man hi'i ha ma namlolo lolo Makromod Lalap kalarna, na'amoli mampkene hi'i ha ma

namlolo mamani. Enla mi ma akin moumou dewdewe, na'amoli mim mori moumou dewdewe mamani."

<sup>12</sup> Yesus na'aheni, "Makaniyala! Ka nalo'ol me'e Ya'u mai odi Ainu'u mahmaha kolkoli herre walha ri dohodoho rira hini'i wenewhe.

<sup>13</sup> Ya amwali Alfa noro Omega!\* Ya amwali Man Dedesne la Man Horu! Ya amwali Ma Nolu la Man Ka'uli'ur!"

<sup>14</sup> Ri man pahar rira nainair hehen nanumene mou, hi akinhe nahuwa'anedi ono rira molollo aile lole Kota onne nin nike laa raram, la ra'an au woi nano au'ono ma nala or'ori dardari eni.

<sup>15</sup> Maa ri man hi'i hahaa man Morse, man hi'i u'ur leher, man holi diwar dawar, ma nesne ri, man hoikani lernulu aukerhe, roro man raram nodi napoho mamani, hi onne ra'alehe molollo laa kota onne raram.

<sup>16</sup> "Maya'u eni Yesus! Ya'u hoponedi Ainu'u hophopon a'am raram loikaru ha eniyeni na'akeme ki mi ma namwali kerei raramne. Ya'u eni rai Daud nin Upun Anan! Ya'u penia Kaliyoro ad'ada man ha'a noho roropo."

<sup>17</sup> Roh Kudus noro Pipdu-mana hono ra'aheni, "Mai here!" Lariyala man derne Lir eniyeni na'aheni, "Mai here!"

Enla inhoi man marou, lariyala mai nomun oir ma nala or'ori dardari eni. Oir eniyeni kar pair.

*Lira man horu*

<sup>18</sup> Maya'u, Yohanis, a'ori honorok mi man dernedi

\* 22:13 Po'onala catatan kaki ma aile 1:8.

wanakunu ya'u horokedi lolo  
 horok eniyeni ma na'ono  
 hahaa ma namwali lere  
 eni noro lere man mai.  
 Horhorok! Inhoi na'uwal  
 panaeku ida lolo Horok eni  
 Lirna, na'amoli Makromod  
 Lalap na'uwal apinpinha  
 wo'operperi man aile Horok  
 eni ai.

<sup>19</sup> Enla inhoi sopoledi  
 panaeku ida nano Horok  
 eniyeni, Makromod Lalap

ka nala molollo ai holi lolo  
 Kota man moumou dewdewe  
 onne, la kan hurinohi ai  
 na'an auwoi nano au'ono ma  
 nala or'ori dardari eni man  
 horokedi lolo horok eniyeni.

<sup>20</sup> Man loikaru wanakunu  
 na'akeme eniyeni na'aheni,  
 "Namlolo! Ka nalo'ol Ya'u  
 mai me'e!"

Ya! Mai here, Makromod  
 Yesus!

<sup>21</sup> Na'amoli Makromod  
 Yesus nala Nin rere'e haharu  
 Nin ri na'akeme! Amin!